

# New Testament

**Guaraní, Western Bolivian  
Language**

## Guaraní, Western Bolivian - Bible - New Testament

|                  |     |  |
|------------------|-----|--|
| Mateo            | 3   |  |
| Marcos           | 94  |  |
| Lucas            | 148 |  |
| Juan             | 240 |  |
| Hechos           | 304 |  |
| Romanos          | 389 |  |
| 1 Corintios      | 428 |  |
| 2 Corintios      | 468 |  |
| Gálatas          | 491 |  |
| Efesios          | 503 |  |
| Filipenses       | 517 |  |
| Colosenses       | 526 |  |
| 1 Tesalonicenses | 535 |  |
| 2 Tesalonicenses | 543 |  |
| 1 Timoteo        | 548 |  |
| 2 Timoteo        | 557 |  |
| Tito             | 565 |  |
| Filemón          | 570 |  |
| Hebreos          | 573 |  |
| Santiago         | 602 |  |
| 1 Pedro          | 612 |  |
| 2 Pedro          | 623 |  |
| 1 Juan           | 629 |  |
| 2 Juan           | 638 |  |
| 3 Juan           | 640 |  |
| Judas            | 642 |  |
| Apocalipsis      | 646 |  |
|                  |     |  |
|                  |     |  |
|                  |     |  |

# Guaraní, Western Bolivian - Bible - New Testament

## Mateo

### Mateo 1

#### Jesucristo iyipi reta jee

(Lucas 3.23-38)

- <sup>1</sup>Yambipi kuárái kua tupapire pe tee reta. Kua tee reta jae ko Jesucristo iyipi reta. Jesucristo ko jae David ñemoñaá pewa jare Abraham ñemoñaá pewa wi.
- <sup>2</sup>Echa'ã Abraham tai jae ko Isaac, jare Isaac jae ko Jacob tu, jare Jacob tai reta jae ko Judá jare tikei reta jare tiwi reta wi.
- <sup>3</sup>Jare Judá jare jembireko Tamar isambiai reta ko jae Fares jare Zara. Jare Fares tai ko jae Esrom, jare Esrom tai ko jae Aram.
- <sup>4</sup>Jare Aram tai ko jae Aminadab, jare Aminadab tai ko jae Naasón, jare Naasón tai ko jae Salmón.
- <sup>5</sup>Jare Salmón jare jembireko Rahab isambiai ko jae Booz. Jare Booz jare jembireko Rut isambiai ko jae Obed. Jare Obed tai ko jae Isaí.
- <sup>6</sup>Jare Isaí tai ko jae David. Kua David ko jae Israel pewa reta imburuwicha wasurã arakaete ikose wae. Jokua ko jae Jesús iyipi reta Abraham wiwe David rewa. Jare joko wi mburuwicha wasu David tai jae ko Salomón. Salomón ichi jae ko Urías jembirekokue.
- <sup>7</sup>Jare Salomón tai ko jae Roboam, jare Roboam tai ko jae Abías, jare Abías tai ko jae Asa.
- <sup>8</sup>Jare Asa tai ko jae Josafat, jare Josafat tai ko jae Joram, jare Joram tai ko jae Uzías.
- <sup>9</sup>Jare Uzías tai ko jae Jotam, jare Jotam tai ko jae Acáz, jare Acáz tai ko jae Ezequías.
- <sup>10</sup>Jare Ezequías tai ko jae Manasés, jare Manasés tai ko jae Amón, jare Amón tai ko jae Josías.
- <sup>11</sup>Jare Josías tai reta ko jae Jeconías jare tiwi reta. Jare Jeconías iko rambuewe, iwi Babilonia pewa reta opa seri wiraa Israel pewa reta Babilonia pe.
- <sup>12</sup>Jare judío reta opa uyereraa Babilonia pe yawe, Jeconías tai ko jae Salatiel, jare Salatiel tai ko jae Zorobabel.
- <sup>13</sup>Jare Zorobabel tai ko jae Abiud, jare Abiud tai ko jae Eliaquim, jare Eliaquim tai ko jae Azor.

**14**Jare Azor tai ko jae Sadoc, jare Sadoc tai ko jae Aquim, jare Aquim tai ko jae Eliud.

**15**Jare Eliud tai ko jae Eleazar, jare Eleazar tai ko jae Matán, jare Matán tai ko jae Jacob.

**16**Jare Jacob tai ko jae José. Kua José ko jae María ime. Jare María imembi ko jae Jesús. Jae ko Cristo yae chupe wae – jokuwa Upuruepi wae Tumpa ombou wae.

**17**Jayawe Abraham wiwe oo David pe uwäe rewa uyepapa catorce ñemoñaeta. Jukuärái wi David wiwe Jeconías rewa uyepapa wi catorce ñemoñaeta. Joko wi Babilonia pewa rewa wiraa Israel pewa rewa iíwi pe. Jare jukuärái wi Jeconías wi uyepapa catorce ñemoñaeta Cristo rewa.

### **Jesucristo oa wae rewa**

*(Lucas 2.1-7)*

**18**Añawe tamimbeu Jesucristo oa wae rewa. Jae ichi María jee wae José ndiwe jei umendata. Erëi ndei uyereroke rewa mbowe, uyekuaa María ipurúa ma oí. Kua uyeyapo chupe Espíritu Santo imbaepuere rupi.

**19**Jayawe José uikuaa yawe jembirekorä wae ipurúa ma yepe oí, uyemingeta tēi ipia pe omombo waerä. Echa'ä jae ko kuimbae jupi wae. Erëi uipota tēi omombo wiari María awiye waerä umimaraka opaete wae rewa jowake.

**20**Jukuärái José uyemingeta iko tēi ipia pe. Erëi pēti piare, José oke iko rambuwe, pēti araiwa Tumpa ombou wae uyekuaa chupe ipau pe jare jei chupe: “José, David ñemoñaeta pewa,” jei chupe. “Nde ndepuere nemenda ndepiawiwe rewa María ndiwe, echa'ä jae mbaeti ko ipurúa oí kuimbae pewarä. Jae ipurúa ko oí Espíritu Santo imbaepuere rupi etei,” jei chupe.

**21**“María imembita oí pēti kuimbae jare nde nembijeeta jokuwa sambiai Jesús. Echa'ä yepe tēi opaete wae uyawi Tumpa koti jare ime onoi rewa teko Tumpa jowai, erëi Jesús uepita oí kía kía jae imaerä iko wae rewa,” jei araiwa José pe.

**22**Jukuärái opaete kua mbaembae uasa uyeyapo waerä kërái arakaete Tumpa jei wae rupi. Echa'ä jae jei ñee umimbeu wae Isaías jee wae rupi kuärái:

**23**“Mase, pēti kuñatái oroke'ä etei kuimbae wae ipuruata oí jare imembita oí pēti kuimbae. Jare jeita chupe rewa Emanuel.” Jukuärái jei Tumpa arakaete. Kua tee Emanuel uipota jei, “Tumpa yande ndiwe oí.”

**24**Jayawe José usareko jare uyapo kërái Tumpa iaraiwa jei chupe wae rupi jare umenda María ndiwe.

**25**Erëi uyereroke'ä rewa María imembi ipi oa rewa. Jare oa María imembi pēti kuimbae mii jare José oñono sambiai jeerä Jesús.

## **Mateo 2**

### **Kuimbae yasitata re uyemboe wae rewa yuweru ueka Jesús**

<sup>1</sup>Jesús oa iwí Judea pe tēta wasu rai Belén pe. Jare Jesús oa yawe, Herodes iko mburuwicha wasurā opaete iwí Israel re. Jayawe jokuwa ara rupi yuweru uwāe kuimbae reta yasitata re uyemboe wae reta warasi oē wae koti wi tēta wasu Jerusalén pe.

<sup>2</sup>Jare jae reta upirandu joko pewa reta pe: “¿Kiape pa oī sambiai judío reta imburuwicha wasurā ikota wae?” jei reta. “Ore nduikuaa oa ma ko, echa’ā nduecha pēti yasitata warasi oē wae koti. Jare jokuwa yasitata uikuaaka oī orewe jesewa. Jáeramo ndoyu ndueka numbutuicha waerā,” jei reta.

<sup>3</sup>Erēi kua mburuwicha wasu Herodes pe jerākua yawe, ipia kawi’ā upita. Echa’ā jae uipota’ā etei uyekuaa waerā iru mburuwicha, echa’ā uipota’ā uyepepika ramo. Jare opaete Jerusalén pewa reta uyembipia’ā Herodes ipia kawi’ā oī wae re, echa’ā jae reta ukiye chuwi.

<sup>4</sup>Jayawe Herodes umbatika opaete sacerdote itenondewa reta jare Moisés uikuatía wae re oporomboe wae reta, jare upirandu chupe reta: “¿Kiape ra oata oī jokuwa Cristo yae chupe wae?” jei chupe reta.

<sup>5</sup>Jare jae reta jei chupe: “Jae oata oī iwí Judea pe tēta wasu rai Belén pe. Echa’ā pēti kuimbae Tumpa iñee arakae umimbeu wae jukuarái jei. Jae uikuatía kuarái:

<sup>6</sup>“Tumpa jei: ‘Belén jae ko tēta wasu rai ikawiete wae iwí Judea pe oī wae. Echa’ā joko pe oata oī pēti mburuwicharā ikota wae. Jare jae uyandareko kawita oī Israel iñemoñaa reta re – jae ko che aiparawo wae reta,’ jei.” Jukuarái jei Tumpa iñeeriru pe,” jei reta Herodes pe.

<sup>7</sup>Jayawe Herodes omondo uenika wari jokuwa yasitata re uyemboe wae reta. Echa’ā jae uipota upirandu chupe reta kērái yawe etei ra uyekuaa chupe reta jokuwa yasitata wae.

<sup>8</sup>Jare jae reta uikuaaka ma chupe yawe, Herodes jei tēi chupe reta umbitawi rewe: “Pekua Belén pe peka jokuwa sambiai mii,” jei chupe reta. “Jare pewāe chupe yawe, peyu ye kua pe pemimbeu chewe. Echa’ā che aipota wi a ambutuicha jokuwa sambiai mii,” jei chupe reta.

<sup>9</sup>Jayawe uyandu yawe mburuwicha wasu jei chupe reta wae, jokuwa kuimbae reta opa oē yuraa Jerusalén wi. Jare jawoi pewa mii uyekuaa ye chupe reta jokuwa yasitata tenonde uyekuaa chupe reta warasi oē wae koti wae. Jare jokuwa yasitata oo jae reta jenonde jare oo uyemboi jokuwa tēta iáramo kiape sambiai oī wae pe.

<sup>10</sup>Jare jokuwa uecha reta yawe, jae reta uyerowiaete ye yureko.

<sup>11</sup>Jayawe uike reta sambiai oī wae pe jare uecha reta sambiai jare ichi María ndiwe. Jayawe kuimbae reta uñeñono iwí re sambiai jowai umbutuicha reta waerā. Jare joko wi pēti pēti wae uipea reta jewita umee waerā mbaembae ikawi wae sambiai pewarā. Umee reta chupe oro jare mbaembae utimbo kawi wae jare jepiete wae – jae ko incienso jare mirra jee wae.

<sup>12</sup>Jayawe umbutuicha ma reta sambiai yawe, opa ye yuraa reta jëta koti ambie tape rupi. Echa'ä Tumpa umimbeu chupe reta ipau rupi awiye waerä yuraa ye reta Herodes jëta rupi.

### **Herodes uipota tēi uyukaka Jesús**

<sup>13</sup>Jayawe kuimbae yasitata re uyemboe wae reta opa ye ma yuraa yawe, pēti araiwa Tumpa ombou wae uyekuaa José pe ipau pe jare jei chupe: “Epüa. Eraa jupiwoiño sambiai jare ichi ndiwe iwi Egipto koti. Jare pepita joko pe che amimbeu ye ndewe rewa. Echa'ä Herodes uekakata onoi sambiai uyukaka waerä tēi,” jei chupe.

<sup>14</sup>Jayawe jawoi pewa José upüa, jare pītu oī rewe wiraa sambiai ichi ndiwe iwi Egipto koti.

<sup>15</sup>Jare joko pe upita reta Herodes umano rewa. Jukuärái uasa uyeyapo waerä Tumpa arakaete jei uyeyapota iko wae. Echa'ä Tumpa jei arakae pēti wae jae iñee umimbeu wae rupi kuärái: “Aru ye cheRai iwi Egipto wi,” jei.

<sup>16</sup>Jayawe jeräkua Herodes pe jokua yasitata re uyemboe wae reta opa ye ma yepe yuraa ikotīa rupi jare mbaeti uyapo reta Herodes jei wae. Jáeramo Herodes pochiete rewe omondo sindaro reta Belén pe jare Belén iyipi rupi uyuka reta waerä opaete sambiai kuimbae mii reta ndei mokui año onoi wae reta. Jukuärái uyapo Herodes uyukaka waerä tēi Jesús. Echa'ä yasitata re uyemboe wae reta uyemboi yawe Herodes jowai, jae reta jei chupe: “Mokui año ma oī jokua yasitata umbipi uyekuaa orewe wae,” jei reta chupe.

<sup>17</sup>Jukuärái uasa Tumpa jei arakaete uyeyapota iko wae. Echa'ä jae jei iñee umimbeu wae Jeremías jee wae rupi kuärái:

<sup>18</sup>“Tëta wasu Ramá pe uyenduta jäse ikuasi katu rewe uyao ñonoï wae reta. Echa'ä Raquel iñemoñaeta reta uyaota ñonoï imembi reta re. Jare ndarau etei kía ipuere umbipiakatu reta, echa'ä imembi reta opa ma ko umano chuwi.” Jukuärái jei.

### **José, María, jare Jesús uñatima ye iwi Israel pe**

<sup>19</sup>Jayawe kua jaikue rupi Herodes umano. Jare José imeño iko iwi Egipto pe. Jayawe uyekuaa ye chupe ipau pe pēti araiwa Tumpa ombou wae.

<sup>20</sup>Jare jei chupe: “Epüa. Eraa ye sambiai ichi ndiwe iwi Israel pe. Awiye ekiye, echa'ä jokua sambiai uipota tēi uyuka yureko wae reta opa ma umano,” jei chupe.

<sup>21</sup>Jayawe José upüa jare wiraa ye sambiai ichi ndiwe iwi Israel pe.

<sup>22</sup>Erēi jeräkua José pe Herodes ipepika pe iko tai Arquelao jee wae mburuwicha wasurä iwi Judea pe. Jáeramo José ukiye oo waerä jokoti. Jayawe Tumpa uikuaaka José pe ipau rupi yuraa waerä iwi Galilea pe. Jáeramo jokoti yuraa reta.

<sup>23</sup>Jare yuraa uwäe reta pēti tēta wasu Nazaret jee wae pe jare joko pe uyakao reta. Kua uasa uyeyapo waerä Tumpa iñee arakae umimbeu wae reta jei uyeyapota iko wae. Echa'ä jei reta Upuruepi wae rewa kuärái: “Jeita chupe reta: ‘Jae ko pēti Nazaret pewa,’ jeita reta.”

## Mateo 3

### Juan upurumbisakambu wae umimbeu Tumpa iñee

(*Marcos 1.1-8; Lucas 3.1-20; Juan 1.19-28*)

- <sup>1</sup>Jayawe ima ma uasa yawe, pëti kuimbae Juan upurumbisakambu wae jei chupe reta wae oo iwitini wasu pe iwi Judea pe oï wae. Jare joko pe umimbeuñoi opaete yuweru ikoti wae reta pe kuärái:
- <sup>2</sup>“Koiño ma oï uyekuaa waerä Tumpa imbaepuere mburuwicha wasu pewa kua iwi pe. Jáeramo peya pepiyemingeta jupi mbae wae jare perowia Tumpa jei wae re peï waerä jae ndiwe,” jei Juan chupe reta.
- <sup>3</sup>Kua Juan ko jae jokua uyekuatiaño mái iko Tumpa iñeeriru pe jesewa wae. Echa’ä pëti kuimbae Tumpa iñee arakae umimbeu wae Isaías jee wae umimbeu mbaembae Juan uyapota iko wae rewa kuärái: “Jae oïta iwitini wasu rupi, jare jeta wae reta yuraata jae oï wae pe. Jare jae usapikai rewe jeita chupe reta kuärái: ‘Piyerowa jare piyeyapikatu yandeYa koti, echa’ä koiñoete ma oï yandeYa iwäe ara,’ jeita.” Jukuärái jei arakae Isaías Juan rewa.
- <sup>4</sup>Jare Juan jemimonde mbaemimba camello jee wae jawe pewa ko, jare jumbikuaa ko wakapi pewa. Jare jembiu ko jae tuku jare ei ñana rupiwa.
- <sup>5</sup>Jare jeta tëta wasu Jerusalén pewa reta yuraañoi Juan oï wae pe uyapisaka reta waerä iñee re. Jare jukuärái wi jeta iwi Judea pewa reta jare jeta i wasu Jordán iyipi rupi yureko wae reta.
- <sup>6</sup>Jare opaete wae jowake uyembeu reta uñemimichi rewe kërái Tumpa koti uyawi reta wae. Jare uyembeu reta ma yawe, Juan umbisakambu reta i wasu Jordán pe.
- <sup>7</sup>Pëti ara jeta fariseo reta jare saduceo reta wi yuweru Juan oï wae pe, echa’ä jae reta uipota tëi uyembisakambuka i pe. Erëi Juan uecha reta yawe, jei chupe reta: “¿Pe reta ko jae upurumbitawi wae reta!” jei chupe reta. “¿Këraita pa añawe pipota peoyepe waerä Tumpa iarasi wasu oata oï peré wae wi?” jei chupe reta.
- <sup>8</sup>“Pipota che pumbisakambu waerä i pe yawe, jayawe tenonde peya rani pepiyemingeta jupi mbae wae Tumpa rewa. Jare tuyekuaa peya ma ko pepiyemingeta jupi mbae wae mbaembae piyapo wae rupi,” jei chupe reta.
- <sup>9</sup>“Jare awiye pere pepia pe: ‘Tumpa ndarau uiporaraka chewe, echa’ä che ko jae Abraham iñemoña pewa ramo.’ Awiye etei jokua pere, echa’ä Abraham iñemoña pewa yaiko wae mbae’ä ko. Jare Tumpa uipota yawe, kua ita reta wi ipuere uyapo Abraham iñemoña retarä,” jei chupe reta.
- <sup>10</sup>“Koiño ma oï Tumpa uiporaraka waerä opaete uyawi ikoti wae reta pe. Pe reta pikuaa kawi peï pëti iwira ía kawi’ä yawe, iya uitita jare uapita. Jare jukuäriete wi Tumpa uiporarakata oï opaete jeko kachi wae reta pe,” jei chupe reta.
- <sup>11</sup>“Che pumbisakambu i pe yaechaka waerä peya ma ko pepiyemingeta jupi mbae wae Tumpa rewa,” jei chupe reta. “Erëi cheraikue rupi outa pëti wae imbaepuerete

chewi wae. Jare che jupi'ä etei ko ipipasa mii yepe araa waeräwe," jei. "Che pumbisakambuño ko äi i pe, erëi jae peñonota pëti pëti wae piko waerä pëti ramiño iyé etei Espiritu Santo rupi. Erëi peya'ä yawe pepiayemingeta jupi mbae wae, jae uiporarakata oï pewe tata pe," jei chupe reta.

<sup>12</sup>"Jae ko kía trigo uipoo wae rami. Echa'ä trigo uipoo wae umbiwewe trigo iti ikotiä oo waerä chuwi, jare joko wi umbiru trigo jiru pe. Jae ramiño wi jokua outa oï wae umbisirita jupi wae reta jupi mbae wae reta wi," jei chupe reta. "Jare kërái trigo uipoo wae uapi chuwi iti tata pe, jukuärái wi jokua outa oï wae uiporarakata jupi mbae wae reta pe tata owe mbae wae pe." Jukuärái Juan jei fariseo jare saduceo reta pe.

### **Juan umbisakambu Jesús i pe**

*(Marcos 1.9-11; Lucas 3.21-22)*

<sup>13</sup>Kua jaikue rupi Jesús oë oo iwi Galilea wi i wasu Jordán koti uyembisakambuka waerä Juan pe.

<sup>14</sup>Erëi Jesús oo uwäe yawe Juan oï wae pe, Juan uipota'ä tēi umbisakambu Jesús jare jei chupe: "¿Kía ko che numbisakambu waerä? Jupi ko tēi nde chembisakambu waerä," jei chupe.

<sup>15</sup>Erëi Jesús jei chupe: "Emaeño tayembisakambuka ndewe. Echa'ä jukuärái uyeyapota jupi rupi Tumpa uipota wae," jei chupe. Jayawe Juan umbisakambu Jesús.

<sup>16</sup>Jare uyembisakambuka ma yawe, Jesús oë i wi. Jare jupiwoiño ara uyepea, jare jae uecha Espiritu Santo uweyi ou ara wi uwapi jese pëti pikasu rami.

<sup>17</sup>Jare uyendu ñee ara wi jei kuärái: "Kua ko jae cheRai aucte wae. Jae chembiyerowiaete oï," jei.

## **Mateo 4**

### **Añawasu uipota tēi uyawika Jesús pe Tumpa koti**

*(Marcos 1.12-13; Lucas 4.1-13)*

<sup>1</sup>Joko wi Espiritu Santo jei Jesús pe oo waerä iwitini wasu koti tēta mbae rupi. Jayawe Jesús oo jokoti. Kua uyeyapo Añawasu ou uyawika waerä tēi Jesús pe Tumpa koti.

<sup>2</sup>Jesús iko joko pe cuarenta ara rupi ukaru mbae rewe. Jáeramo iyembaiete iko.

<sup>3</sup>Jayawe Añawasu ou jei chupe: "Nde ko jae Tumpa Tai yawe, yaecha ere kua ita reta pe tuyeyapo ndewe mbiyaperä," jei chupe.

<sup>4</sup>Erëi Jesús jei chupe: "Ndarau ayapo. Echa'ä Tumpa iñeeriru pe uyekuatía oï kuärái: 'Ndarau kiawe iko tembiu reño. Echa'ä tembiu ndarau umee chupe reta tekowe opa mbae wae. Imeta ko iko reta wi Tumpa jei wae re.' Jukuärái uyekuatía oï," jei chupe.



<sup>5</sup>Jayawe Añawasu wiraa Jesús Jerusalén pe jare uyupi reta yuraa iwatete ye tupao wasu iyapite re.

<sup>6</sup>Jare joko pe Añawasu jei Jesús pe: “Nde ko jae Tumpa Tai yawe, yaecha iyeriti kua wi. Echa’ä Tumpa iñeeriru pe uyekuatía oï kuärái: ‘Tumpa oyokuita araiwa reta uyandareko waerä nderé. Ipo pe ndepisita ndeoko reta awiye waerä ndeasa marái. Ndepi awe uyererokuata’ä ita re.’ Jukuärái uyekuatía oï,” jei Añawasu Jesús pe.

<sup>7</sup>Jayawe Jesús jei chupe: “Ndarau ayapo. Echa’ä Tumpa iñeeriru pe uyekuatía oï wi kuärái: ‘Awiye pemboporowaiño peYa Tumpa imbaepuere,’ jei,” jei chupe.

<sup>8</sup>Jayawe Añawasu wiraa Jesús pëti iwitu wasu iwatete wae re jare joko wi uechaka chupe opaetei tëta wasu reta ipöraete wae imburuwicha wasu imbaepuere wae reta ndiwe.

<sup>9</sup>Jare Añawasu jei chupe: “Mase, nde niñeño yawe ndetawa re cherowai chembutuicha waerä, che ameeta ndewe opaetei kua mbaembae ndecha nei wae ndepo pe oï waerä,” jei chupe.

<sup>10</sup>Jayawe Jesús jei chupe: “Esiri chewi, Satanás. Echa’ä Tumpa iñeeriru pe uyekuatía oï kuärái: ‘Tumpa jeeño ko pembutuichata, jare chupeño ko piyeyokuita.’ Jukuärái uyekuatía oï,” jei chupe.

<sup>11</sup>Jayawe Añawasu usiri Jesús wi, jare jupiwoiño yuweru araiwa reta ombori waerä Jesús.

### **Jesús umbipi iparawiki**

*(Marcos 1.14-15; Lucas 4.14-15)*

<sup>12</sup>Joko wi mbowi ara rupi, mburuwicha wasu Herodes oñonoka Juan upurumbisakambu wae peresoriru pe. Jayawe kua jeräkua Jesús pe yawe, jae oo ye iwi Galilea pe.

<sup>13</sup>Erëi mbaeti ma iko tëta wasu Nazaret pe. Oo tëta wasu Capernaum pe. Jokua tëta wasu oï ipa wasu jembei pe – jae ko Zabolón jare Neftalí iñemoñaeta reta iwi.

<sup>14</sup>Kua uyapo Jesús opa uyeyapo waerä Tumpa iñee arakae umimbeu wae Isaías jei uyeyapota iko wae. Echa’ä jae jei kuärái:

<sup>15</sup>“Iwi Zabolón jare iwi Neftalí jee wae – jae ko i wasu Jordán jowaicho koti jare koiño oï ipa wasu wi. Joko pe oï iwi Galilea jee wae kipe yurekota jeta judío mbae wae reta.

<sup>16</sup>Jokua iwi pewa reta yureko pëtumimbi pe mbiri Tumpa wi. Erëi jae reta uechata ñonoï tembipe tuicha wae. Umbiembipeta ipia pe mano imbaepuere pe yureko wae reta.” Jukuärái jei Isaías arakaete.

<sup>17</sup>Jayawe Jesús oo uwäe Capernaum pe yawe, umbipi umimbeu chupe reta kuärái: “Koiño ma oï uyekuaa waerä Tumpa imbaepuere mburuwicha wasu pewa kua iwi

pe. Jáeramo peya pepiyemingeta jupi mbae wae jare perowia Tumpa jei wae re pei waerä jae ndiwe,” jei Jesús.

### **Jesús umbipi ueni jemimboe retarä**

*(Marcos 1.16-20; Lucas 5.1-11)*

<sup>18</sup>Pëti ara Jesús uwata iko ipa wasu Galilea jee wae jembei rupi. Jare uwata iko rambuewe, uecha mokui kuimbae. Pëti ko jee Simón, jare chupeño wi jei reta Pedro. Jare iruwe ko jae Simón tiwi Andrés jee wae. Jae reta pira uipisi wae reta ko, jare omombo yureko reta pisa ipa wasu pe.

<sup>19</sup>Jayawe Jesús jei chupe reta: “Peyu che ndiwe,” jei. “Pe reta pikuaa pira pipisi, erëi che pomboeta peporomboe waerä, iru wae reta wirowia waerä cheré,” jei chupe reta.

<sup>20</sup>Jayawe jae reta ueya woi ipisa reta jare yuraa reta Jesús ndiwe yureko waerä jemimboerä.

<sup>21</sup>Jare joko wi Jesús oo yuapi ye kuti mii, jare uecha ye iruwe kuimbae reta – jae ko Zebedeo tai reta. Pëti jee Jacobo jare tiwi jee Juan. Jae reta uyapikatu yureko pisa reta chalana pe tu ndiwe. Jayawe Jesús ueni reta wi.

<sup>22</sup>Jayawe jupiwai jae reta ueya chalana jare tu, jare yuraa reta Jesús ndiwe yureko waerä jemimboerä.

### **Jesús omboe jeta wae reta**

*(Marcos 1.39; Lucas 6.17-19)*

<sup>23</sup>Jayawe Jesús oo opaete iwi Galilea rupi, jare oporomboe tupao reta rupi. Jae umimbeuñoi ñee ikawi wae kërái uyembipita ma Tumpa imbaepuere mburuwicha wasu pewa kua iwi pe. Jare jae uminguera wi imbaerasi wae reta ipotawe mbaerasi wi.

<sup>24</sup>Jáeramo Jesús jeräkua opaete iwi Siria pewa reta pe. Jare ueru reta jae oi wae pe imbaerasi wae reta. Amokue wae reta uiporaraete mbaerasi jasi wae, jare amokue wae reta aña uyembiiya jese wae, jare amokue umanomano wae reta, jare amokue ipuere mbae omi wae reta. Jayawe Jesús uminguera opaetei kua imbaerasi wae reta.

<sup>25</sup>Jare yuraa Jesús jupie jeta wae reta iwi Galilea wi, jare iwi Decápolis jee wae wi, jare Jerusalén wi, jare iwi Judea wi, jare i wasu Jordán jowaicho wi.

## **Mateo 5**

### **Jesús oporomboe iwitu iáramo wi**

*(Lucas 6.20-23)*

<sup>1</sup>Jare Jesús uecha yawe kua jeta wae reta yuweru ñonoï ikoti, oo uyupi pëti iwitu re. Jare joko pe uwapi omboe reta waerä. Jare jemimboe reta yuweru uyembati jae oi wae pe.

<sup>2</sup>Jayawe Jesús umbipi omboe reta kuärái:

<sup>3</sup>“Uyekoueteta ñonoï kuri ikoi Tumpa koti wae reta. Echa’ä jae reta ñonoïta Tumpa ndiwe jae oi ma yawe opaete wae imburuwicha wasurä jaeño máí pewa.

<sup>4</sup>Jare uyekoueteta ñonoï wi ipiatiti wae reta. Echa’ä Tumpa umbipiakatuta oi reta kuri.

<sup>5</sup>Jare uyekoueteta ñonoï wi uyembutuicha mbae wae reta. Echa’ä Tumpa umeeta oi chupe reta kuri opaete kua iwi jae reta imaerä.

<sup>6</sup>Jare uyekoueteta ñonoï wi opaete kía kía uipotaete iko Tumpa jowai jeko mbae wae reta. Echa’ä Tumpa umeeta chupe reta mbaepuere jukuärái yureko reta waerä.

<sup>7</sup>Jare uyekoueteta ñonoï wi japicha uiparareko wae reta. Echa’ä Tumpa uipararekota umae jese reta wi.

<sup>8</sup>Jare uyekoueteta ñonoï wi jokua ipia ikia mbae ñonoï Tumpa koti wae reta. Echa’ä jae reta uechata oi Tumpa.

<sup>9</sup>Jare uyekoueteta ñonoï wi jokua upurumbipiakatu wae reta. Echa’ä Tumpa jeita chupe reta: ‘Cherai jare cherayi reta.’

<sup>10</sup>Jare uyekoueteta ñonoï wi jokua uiporara wae reta ikawi wae uyapo wae jeko pewa. Echa’ä jae reta ñonoïta Tumpa ndiwe jae oi ma yawe opaete wae imburuwicha wasurä jaeño máí pewa.”

<sup>11</sup>“Jare pe reta perowia cheré ramo, ïru wae reta uiporarakata oi pewe jare jeita mbaembae kachi wae pekoti. Ipotawe ikawi mbae wae jeita reta pekoti iyapu rewe. Erëi jukuärái uyapo reta pewe yawe, piyekouete pei.

<sup>12</sup>Echa’ä Tumpa umiñatimata oi pewe ara pe opaete mbaembae piporara wae rupi. Jáeramo piyerowiaete jare pepiakatu jukuärái piporara yawe. Añetete jukuärái Tumpa iñee arakae umimbeu wae reta uiporara wi ïru wae reta ipo pe,” jeï chupe reta.

### **Jesús umbijaanga jemimboe reta yuki re**

*(Marcos 9.50; Lucas 14.34-35)*

<sup>13</sup>Jare Jesús jeï wi chupe reta: “Jare pe cheremimboerä piko wae reta, pe reta ko jae yuki rami kua iwi pewa reta pewarä,” jeï. “Echa’ä yuki pipe yamombochi soo awiye waerä imambae ikumewa. Jare jukuärái rami wi ko pe reta, echa’ä pereko pewa mbaeti imambaeño uñemiái mbaembae kachi wae kua iwi rupi,” jeï. “Erëi yuki opa ma jembochipa yawe, ¿këraita ra ipuere jembochi ye? Ndarau ipuere. Ikawi’ä ma ko jokua maeräwe – jaeño uyemombo waerä jare uñepïro jese waerä,” jeï chupe reta.

### **Jesús umbijaanga jemimboe reta tembipe re**

<sup>14</sup>“Jae nunga wi pe cheremimboerä piko wae reta, pe reta ko jae pëti tembipe rami iwi pewa reta pewarä. Jare tembipe ko jae yaecha waerä. Ndarau kiawe ipuere oñomi pëti tëta wasu iwïtu re oi wae,” jeï.

15“Jae ramiño wi pëti mechero yamiendi yawe, ndarau ñañoño yapepo uyembowapo oï wae íwi pe. Ñañoño ko iwate mechero jenda pe umbiembipe waerä opaete o pe ñonoï wae reta pe,” jei.

16“Jukuärái wi pe reta, jokua tembipe rami, jekuaeñota ko pechaka pereko ikawi wae opaete wae jowake jae reta uecha waerä jare umbutuicha waerä peRu ara pe oï wae jee,” jei Jesús chupe reta.

### **Jesús oporomboe Moisés arakae uikuatía wae rewa**

17“Aramoi pe reta perowia tēi che ayu ma ko ambái waerä opaete Moisés jare ñru kuimbae Tumpa ñnee arakae umimbeu wae reta uikuatía wae. Erēi che jokuaerä’ä ko ayu. Che ayu ko opaetei jae reta jei wae uyeyapo waerä kērái Tumpa uipota wae rupi,” jei.

18“Che tae pewe añetete wae, ara jare íwi imeño oï rambuewe, ndarau etei ukañi jae reta uikuatía wae wi pëti awe ñee michi mii yepe. Jare jukuäráita oo oï kuri opa uyeyapo rewa Tumpa ipiyemingeta jokua kuatía reta pewarä wae,” jei.

19“Jayawe ime yawe kía uyawi jokua ñee reta wae, yepe tēi aramoi tuicha’ä mii, jare omboe yawe ñru wae reta uyapo waerä wi jukuärái, jae ikota’ä maeräwe Tumpa oï ma yawe opaete wae imburuwicha wasurä jaeño mái pewa,” jei. “Erēi ime yawe kía Tumpa jei wae rupi iko wae, jare omboe yawe ñru wae reta uyapo waerä wi jukuärái, Tumpa umbutuichata oï jokua nunga jae oï ma yawe opaete wae imburuwicha wasurä,” jei.

20“Moisés uikuatía wae re oporomboe wae reta jare fariseo reta uyapo kawí tēi jupi wae. Erēi che tae pewe, pe reta mbaeti jupiete peï yawe jae reta wi, ndarau etei peï Tumpa ndiwe jae oï ma yawe opaete wae imburuwicha wasurä,” jei Jesús chupe reta.

### **Yandepochi wae jae ko yapuruyuka ma wae rami**

*(Lucas 12.57-59)*

21“Yambijaanga kua re. Pe reta pikuaa kawí peï Moisés jei arakae yanderamikue reta pe kuärái: ‘Awiye pepuruyuka.’ Jare pepuruyuka yawe, teko pe ma peï jare jokua re piporarata peï,” jei.

22“Erēi che tae pewe wi, ime yawe kía aramoi waeño pochí oï japicha pe wae, jae teko pe ma oï wi jare jokua re uiporarata oï,” jei. “Jae ramiño wi ime yawe kía japicha pe jei, ‘Usiriwe mbae’ wae, jupi ko jae onoi waerä tēi teko mburuwicha reta jowai. Jare che tae pewe wi, ime yawe kía japicha pe jei, ‘Nesöso’ wae, jae jupi ko uiporara waerä Tatawasurenda pe,” jei chupe reta.

23“Jáeramo ikawi ko nde ndiyapo waerä kuärái: Aramoi nderaa neï pëti mbae ikawi wae tupao wasu pe nemeë waerä Tumpa pe. Jare joko pe neï rambuewe aramoi nemandúa nderapicha pochí oï ndewe wae.

<sup>24</sup>Jayawe eya jokua mbae ikawi wae tupao wasu pe, jare ekua eka rani ndiyeapikatu waerä jae ndiwe. Joko wi ramo ndepuere niñatima ye tupao wasu pe ndepiawiwe rewe neme wae rä jokua mbae ikawi wae Tumpa pe,” jei chupe reta.

<sup>25</sup>“Jae ramiño wi ime yawe kía uipota uñeapo nderé wae, ekua iyeapikatu jae ndiwe imambaeño. Echa’ä jukuärái’ä ndiyapo yawe, jae uñeapota oï nderé mburuwicha pe, jare mburuwicha neñonota peresoriru iyandarekoa ipo pe jae neñonoka waerä peresoriru pe,” jei.

<sup>26</sup>“Che tae ndewe añetete wae, ndarau etei ndepuere neë peresoriru wi opa nembiepi rewa jokua mburuwicha jei ndewe nembiepi waerä wae,” jei Jesús chupe reta.

### **Jesús oporomboe awasa rewa**

<sup>27</sup>“Jare pikuaa ko wi kërái jei Moisés arakae yanderamikue reta pe wae: ‘Awiye piyapo awasa,’ jei.

<sup>28</sup>Erëi che tae pewe, ime yawe kía umae kuña re wae, jare ipia pe uipota uyapo awasa jae ndiwe wae, jae uyapo ma ko awasa ipia pe jae ndiwe,” jei.

<sup>29</sup>“Jáeramo che tae ndewe, nderesa ndeakata kotíwa jekuaeño uyawíka oï ndewe Tumpa koti yawe, eki emombo ndeyuwi. ¿Maera pa ikawita nenoí waerä opaete nderete pe nenoí wae neí yawe Tatawasurenda pe pëti wae nderete pewa uyawíka ndewe jeko pewa? Ikawiete ko nenoí waerä tekowe opa mbae wae, yepe tëi aramoi pëtiño nenoí nderesa,” jei chupe reta.

<sup>30</sup>“Jae ramiño wi ndepo ndeakata kotíwa jekuaeño uyawíka oï ndewe Tumpa koti yawe, iyasia emombo ndeyuwi. ¿Maera pa ikawita nenoí waerä opaete nderete pe nenoí wae neí yawe Tatawasurenda pe pëti wae nderete pewa uyawíka ndewe jeko pewa? Ikawiete ko nenoí waerä tekowe opa mbae wae, yepe tëi aramoi pëtiño nenoí ndepo,” jei Jesús chupe reta.

### **Jesús oporomboe kía omombo jembireko wae rewa**

*(Mateo 19.9; Marcos 10.11; Lucas 16.18)*

<sup>31</sup>“Jae nunga wi Moisés arakae jei kuärái: ‘Jembireko omombo wae tumee rani jembireko pe tupapire yemombo pewa jare jayawe ramo ipuere omombo jembireko.’ Jukuärái jei,” jei.

<sup>32</sup>“Erëi che tae pewe, pëti kuimbae omombo yawe jembireko jae awasa uyapo mbae rewe, uyapo ma ko oï mbae ikawi mbae wae. Echa’ä kuña umenda ye yawe, kuña uyapo ko oï awasa Tumpa jowai. Jare kía wireko yawe kuña uyemombo wae, jae nunga wi uyapo ko oï awasa,” jei Jesús chupe reta.

### **Jesús oporomboe yayapo waerä añetete yae wae**

<sup>33</sup>“Jare pikuaa ko wi kërái jei Moisés arakae yanderamikue reta pe wae: ‘Pere yawe peïru pe Tumpa jowake piyapo waerä, jayawe imeta ko piyapo.’ Jukuärái jei.

**34** Erëi che tae pewe, pere yawe piyapo waerä mbae kía pewartä, awiye pemiiru ñee. Jáeramo awiye ere: ‘Ara tukañi ayapo’ä yawe che jae wae.’ Awiye ere, echa’ä ara pe ko oï Tumpa jenda mburuwicha wasu pewa,” jei.

**35** “Jare awiye wi ere: ‘Iwi tukañi ayapo’ä yawe che jae wae.’ Awiye ere, echa’ä iwi ko jae Tumpa ipi jenda,” jei. “Jare awiye wi ere: ‘Jerusalén tukañi ayapo’ä yawe che jae wae.’ Awiye ere, echa’ä Jerusalén ko jae mburuwicha wasu imbaepuerete wae jëta wasu,” jei.

**36** “Jare awiye wi ere: ‘Chäka tukañi ayapo’ä yawe che jae wae.’ Awiye ere, echa’ä ndepuereta’ä nemitii jare nemujü waerä pëti awe ndea. Jaeño Tumpa ipuere kua mbaembae uyapo,” jei.

**37** “Jayawe ndipota ndikuaaka yawe nderapicha pe añetete ko ndere nei wae, ereño chupe: ‘Ayapota,’ ani ‘Ayapota’ä.’ Jokuano ere chupe, echa’ä nemiiru yawe jokuandere wae, joku ou ko Añawasu wi,” jei Jesús chupe reta.

### **Jesús oporomboe awiye yayepi waerä**

*(Lucas 6.27-31)*

**38** “Jare pikuaa kawi pei wi kerái Moisés arakae jei kuarái: ‘Ime yawe kía japicha jesa urükumewa wae, turükumewa wi chuwi jesa japicha reta. Jae ramiño wi ime yawe kía japicha jäi uakio wae, japicha reta tuakio wi chuwi jae jäi.’ Jukuarái jei arakae,” jei.

**39** “Erëi che tae pewe kuarái: Kía uyapo ndewe yawe mbae ikawi mbae wae, awiye iyepi jese. Jare ime yawe kía nderowapete wae, erowa wi chupe jowaicho kotiwa uipete ye waerä,” jei.

**40** “Jae ramiño wi ime yawe kía uñeapo oï nderé wae, jare uipota upiro ndewi ndecamisa yawe, emaeño jese jare emee chupe wi niñepëwaka,” jei.

**41** “Jae ramiño wi ime yawe pëti sindaro jei ndewe nderaa waerä chupe jewita pëti kilómetro wae, eraa chupe mokui kilómetro,” jei.

**42** “Jae ramiño wi ime yawe kía mbae ueka ndewe wae, emeeño chupe. Awiye embiete chupe. Jare ime yawe kía uipota mbae uiporu ndewe wae, iporuka chupe,” jei Jesús chupe reta.

### **Jesús yanemboe yaiparareko waerä yanderowaicho reta**

*(Lucas 6.27-36)*

**43** “Jae nunga wi pe reta pikuaa kawi pei, arakaete wiwe oporomboe reta ma kuarái: ‘Peau perapicha jare piñamitaa perowaicho,’ jei reta.

**44** Erëi che tae pewe peauta ko perowaicho reta wi. Jare piyureta Tumpa pe jese reta,” jei.

**45** “Jukuarái piyapo yawe, piyekuaakata pe reta ko jae peRu ara pe oï wae tai reta jare tayi reta, echa’ä piyapo pei jae uyapo wae rami,” jei. “Añetete peRu Tumpa jeko kawiete ko, echa’ä jae umee warasi jeko kawi wae reta pe jare jeko kachi wae

reta pe wi, opaete wae onoi waerä tembipe. Jae ramiño wi jae ombou ama jupi wae reta pe jare jupi mbae wae reta pe wi, jukuärái opaete wae onoi waerä i. Jukuärái ko peRu Tumpa jeko,” jei.

<sup>46</sup>“Erëi pe reta peau yawe jokua perau wae retaño, ¿jokua re umiñatimata ra pewe ikawi wae Tumpa? Ndarau. Echa’ä mburuwicha pewarä okowara wae reta uyapo wi jukuärái,” jei chupe reta.

<sup>47</sup>“Jae ramiño wi peiru retaño pipopisi yawe, mbaeti mbae ikawiete wae piyapo pei Tumpa jowai. Echa’ä oyowakeño piyapo pei Tumpa re wirowia mbae wae reta uyapo wae rami,” jei.

<sup>48</sup>“Jayawe opaete kua mbaembae reta rupi pereko imeta ko oï wi peRu ara pe oï wae jeko jupi wae rami,” jei Jesús chupe reta.

## Mateo 6

### Yayapota ko mbae ikawi wae kía uikuaa mbae rewe

<sup>1</sup>Jesús jekuaeño omboe reta kuärái: “Jayawe pe reta piyapo yawe ikawi wae pembiyerowia waerä Tumpa, awiye piyapo opaete wae jowake umae waerä peré. Echa’ä jukuärái piyapo yawe, peRu ara pe oï wae ndarau ma umee pewe mbae ikawi wae jokua piyapo wae re,” jei.

<sup>2</sup>“Jáeramo nde neme yawe mbae ikuasi wae reta pe, awiye iyapo kía Tumpa pe uyeyokuiranga wae reta rami. Echa’ä jae reta umee yawe mbae ikuasi wae reta pe, jekuaeño uechaka opaete wae pe mbae uyapo ñonoï wae. Jukuärái uyapo reta ñru wae reta uyemingeta kawi jese reta waeräño mbae ikawi wae uyapo reta wae re,” jei. “Che tae pewe añetete wae, jokua ñru wae reta uyemingeta kawi jese reta waeño ma ko jae reta onoita. Tumpa ndarau ma umee chupe reta mbae ikawi wae jokua uyapo reta wae re,” jei.

<sup>3</sup>“Erëi nde neme yawe mbae ikuasi wae reta pe, awiye tuikuaa kiawe jokua ndiyapo wae rewa.

<sup>4</sup>Iyapo kía uikuaa mbae rewe. Jare jukuärái ndeRuño uikuaata jokua ndiyapo wae re, jare jae umeeta oï ndewe mbae ikawi wae jokua re,” jei Jesús chupe reta.

### Jesús oporomboe yerure rewa

(Lucas 11.1-4)

<sup>5</sup>“Jare pe reta piyerure yawe Tumpa pe, awiye piyapo Tumpa pe uyeyokuiranga wae reta rami,” jei. “Echa’ä jae reta uyerure yawe Tumpa pe, jekuaeño ikirëiete uyemboi reta opaete wae jowake tupao reta pe jare plaza pe uyerure waerä Tumpa pe. Jukuärái uyapo reta ñru wae reta umae kawi jese reta waeräño,” jei. “Erëi che tae pewe añetete wae, jokua ñru wae reta umae kawi jese reta waeño ma ko jae reta onoita. Tumpa ndarau ma umee mbae ikawi wae chupe reta jokua jae reta uyapo wae re,” jei.

6“Erëi nde ndiyerure yawe Tumpa pe, ike ndero pe jare iyukenda öke awiye waerä uikuaa kiawe ndiyerure nei wae. Jare ndeRuño uikuaata jokua ndiyapo nei wae re, jare jae umeeta oi ndewe mbae ikawi wae jokua re,” jei.

7“Jae nunga wi pe reta piyerure yawe Tumpa pe, awiye piyapo jokua uikuaa’ä Tumpa wae reta uyapo wae rami,” jei. “Jae reta jekuaeño umbiakuere ye ye jei pëti waeño. Echa’ä wirowia reta tëi itumparaanga uyapisakata jese reta jukuärái uyapo reta yawe,” jei.

8“Erëi pe reta, awiye piyapo jae reta uyapo wae rami. Echa’ä peRu Tumpa uikuaaño mái mbae uata pewe wae ndei piyerure chupe mbowe,” jei.

9“Jayawe pe reta piyerure yawe Tumpa pe, piyerureta ko kuärái: ‘OreRu mii ara pe nei wae, nderee tuñeño tee opaete iiru tee reta wi.

10Tuwäe ara imambae nde ndiko waerä opaete wae imburuwicha wasurä jaeño mái pewa. Jare jukuärái tuyeyapo kua iwí pe nde ndipota wae kërái ara pe uyeyapo oi wae rami.

11Jare emee mii orewe kua ara orerembiurä.

12Jare kërái ore oremandua’ä iiru wae reta pe jokua mbaembae uyawi orekoti wae re, jukuärái wi nde awiye mii nemandúa orewe mbaembae nduyawi ndekoti wae re.

13Awiye mii toya orekoti uyawika orewe ndekoti wae, jare orerepi mii Añawasu wi. Nde neni opaete mbaepuere, jare nde ndikota wi oremburuwicha wasurä, jare opaete wae umbutuichata nderee jaeño mái pewa. Jukuärái tuiko.’ Jukuäraita ko pe reta piyerure,” jei Jesús chupe reta.

14“Añetete pe reta piparareko yawe uyawi pekoti wae reta, jayawe jukuärái wi peRu ara pe oi wae pepararekota wi piyawi ikoti yawe.

15Erëi jekuaeño pipota pemandúa yawe chupe reta mbaembae uyawi pekoti wae re, jukuärái wi peRu Tumpa imanduaata pewe wi mbaembae piyawi ikoti wae re,” jei chupe reta.

### **Jesús oporomboe ara reta ñaño tee yakaru mbae waerä wae re**

16“Jayawe pe reta piño tee yawe ara reta pekaru mbae waerä, awiye piyapo Tumpa pe uyeyokuiranga wae reta rami,” jei. “Echa’ä jae reta uychaka opaete pe iyembaí ñonoí wae opaete wae reta uikuaa waerä jae reta ukaru mbae ko ñonoí. Erëi che tae pewe añetete wae, jokua iiru wae reta uma kawi jese reta waeño ma ko jae reta onoita. Mbaeti ye ma mbae re Tumpa umiñatima chupe reta waerä,” jei.

17“Erëi nde niño tee yawe ara reta ndekaru mbae waerä, iyeyapikatu kawi jare iyowae kërái opa ara rupi ndiyapo wae rami.

18Iyapo jukuärái awiye waerä iiru wae reta uikuaa nde ndekaru’ä nei wae,” jei. “Jaeño ndeRu ara pe oi wae uikuaata nde ndekaru mbae nei wae, jare jae umiñatimata oi ndewe jokua re. Jukuärái nenoita mbae ikawi wae ara pe,” jei Jesús chupe reta.



## Yaikota ko ñanoi waerä mbaembae ikawi wae ara pe

(Lucas 12.32-34)

19“Jayawe pe reta awiye piko mbaembae kua iwi pewa pembati waeräño,” jei. “Echa’ä kua iwi pe pemaembae ipuere opa iyukiri jare kupii reta ipuere opa urükumewa pawi. Jare ipuere wi uike wiari imonda wae reta opa oñomi pawi pemaembae,” jei.

20“Jáeramo pe reta ikawiete ko piko waerä penoi waerä mbaembae ikawi wae ara pe. Echa’ä ara pe mbaembae ndarau iyukiri jare kupii reta ndarau urükumewa wi. Jae nunga wi joko pe ndarau imonda wae reta uike wiari oñomi waerä pawi,” jei.

21“Ikawi ko penoi waerä mbaembae ikawi wae ara pe, echa’ä kiape mbaembae ikawi wae penoi wae pe, joko pe ko oï wi pepia,” jei Jesús chupe reta.

22“Kërái pemaembae re, jukuäráita iko pemaerä. Echa’ä neräkatei’ä yawe nemaembae re, ndiyekouta nei kuri opa kërái rái rupi. Jokua ikota ndewe pëti tembipe ikawi wae pe ndiko wae rami.

23Erëi neräkatei yawe, jokua ikota ndewe pëtumimbi pe ndepiwíwi ndiko wae rami. Jare jukuärái añawe ndiko yawe, ¿mbowi ye ra pëtumimbieteta oï ndewe kuri?” jei chupe reta.

## Yandepuere’ä yayeyokui Tumpa pe korepoti yaipotaete rewe

(Lucas 16.13)

24Jare Jesús jei wi umbijaanga rewe: “Kiawe ndarau ipuere uyeyokui mokui karái pe pëti jei wae peño. Echa’ä jukuärái yawe, uauta pëti wae jare iruwe uñamitáata. Jae nunga wi jae jatangätuta oï pëti wae pe, jare iruwe re ndarau uipota umaembae. Jukuärái wi ko pe reta pepuere’ä piyeyokui Tumpa pe pipotaete korepoti rewe,” jei chupe reta.

## Awiye yayembipia’ä mbae re awe

(Lucas 12.22-31)

25Jare Jesús jei wi: “Jayawe che tae pewe, awiye piyembipia’ä jokua mbaembae piporuta wae re kua iwi pe pei rambuwe – jae ko perembiurä wae re jare peremimonderä wae re,” jei. “Echa’ä ñai’ä ko yakaru wae reño. Jare yanderete oï’ä ko temimonde reño,” jei chupe reta.

26“Mase. Pemaembae wira reta re. Mbaeti jae reta umaeti jare mbaeti umbawiro wi. Jare mbaeti upi reta wi awati awatio pe,” jei. “Erëitu peRu ara pe oï wae umingaru reta. Jare jukuärái yawe, ¿këraitapa jae pemingaruta’ä pe reta wi? Echa’ä jae perauete ko wira reta wi,” jei.

27“¿Ime yerá kía uyembipia’ä rupi ipuere umiiru iyupe michi mii yepe jekowe wae? Mbaeti etei,” jei chupe reta.

28“Jare ¿maera pa piyembipia’ä peremimonderä wae re? Pemaembaepoti reta ñana rupiwa re kërái ukuakuaa reta,” jei. “Uparawiki’ä reta jare umaepöwa’ä reta jemimonderä uyapo waerä.

<sup>29</sup>Erëi che tae pewe pea mbaepoti reta maepöraete ye ko arakae mburuwicha wasu Salomón jemimonde ikawi wae wi, yepe tēi jae ikokatu wae rupi uyemonde kawiete,” jei.

<sup>30</sup>“Jukuärái Tumpa omopöra kawi ñana reta, yepe tēi ñana reta pēti ara jekowe rewe oï jare piarewe pe ñañono tata pe,” jei. “Jare pe reta, Tumpa perauete ye ko jokua mbaepoti reta wi. Jayawe ¿këraita pa jae umeeta’ä pewe peremimonderä? Tumpa re perowia wae michiete ko,” jei chupe reta.

<sup>31</sup>“Jayawe awiye piyembipia’ä pepirandu peyupe rewe: “¿Mbae ra yauta kuriye?” jare “¿Kiape ra yanderemimonderä ñawäeta?”

<sup>32</sup>Echa’ä jokua nunga mbaembae reta re ko uyembipia’ä Tumpa re wirowia mbae wae reta. Erëi pe reta, awiye piyapo jukuärái, echa’ä peRu ara pe oï wae uikuaaño mái jokua mbaembae piporuta wae,” jei.

<sup>33</sup>“Opaetei mbae wi piñono tenonde Tumpa pemburuwicha wasurä opaete mbaembae rupi. Jare pekirëi piyapo jupi rupi jae jowai. Jare jukuärái piyapo yawe, jae umeeta pewe wi jokua mbaembae uata oï pewe wae,” jei chupe reta.

<sup>34</sup>“Jayawe awiye piyembipia’ä jokua mbaembae piporuta kuriye wae re. Kuriyeño pepuere piyemingeta jokua mbaembae re. Kua ara yembipia’ä penoi wae maeño ma ko pemaerä,” jei chupe reta Jesús.

## Mateo 7

### Kërái ñru wae pe yayapo wae rupi uyeyapota oï yandewe

(Lucas 6.37-38,41-42)

<sup>1</sup>Jesús jekuaeño oporomboe kuärái: “Pipota’ä kía ñnera waerä peré yawe, jayawe pe reta awiye wi piñera kía re awe.

<sup>2</sup>Echa’ä ñru wae reta ñnerata peré kërái pe reta ñru wae reta re piñera wae rami. Jayawe piñera yawe täta rupi ñru wae re, jukuärái wi jae täta rupi ñnerata peré,” jei.

<sup>3</sup>Jare jei wi chupe reta umbijaanga rewe: “Nde neratangätu neï netae waerä iti michi wae neïru jesa pe oï wae re. Erëi ¿maera pa nde netae’ä iwira puku nderesa pe oï wae re?” jei chupe reta.

<sup>4</sup>“Nde ndere: ‘Tëtara, taeki nderesa wi jokua iti michi wae,’ ndere. Erëi ¿këraita pa ndepuere ndiyemingeta jukuärái nde ime yawe nenoï iwira puku wae nderesa pe?”

<sup>5</sup>Jukuärái ndiyapo yawe, jayawe ndiyemingetaiño ko neï,” jei. “Che tae ndewe, tenonde eki rani iwira puku wae nderesa wi. Jare jayawe ramo netae kawita ndepuere waerä ndeki iti michi wae neïru jesa wi,” jei Jesús chupe reta umbijaanga rewe.

<sup>6</sup>Jare jei wi chupe reta: “Ime yawe kía uipota’ä uyapisaka Tumpa ñnee re wae, ¿mbae ra yayapota yande reta? ¿Ñnameeta ra mbae ikawiete ye wae yimba reta pe? Jare ¿ñnameeta ra ita ikawiete wae jare jepiete wae kuchi reta pe? Ndarau ñnamee, echa’ä mbae’ä chupe reta. Kuchi reta upiñoñota jese, jare yimba reta ipuereta ou

yandesuu. Jukuärái wi jupi'ä ko jekuaeño yamimbeu waerä Tumpa iñee kía pe uipota'ä uyapisaka jese yawe,” jei chupe reta.

### **Jesús oporomboe ye yerure rewa**

*(Lucas 11.9-13, 6.31)*

<sup>7</sup>Jayawe Jesús jei wi chupe reta: “Mbae uata oï pewe yawe, piyerureñoi Tumpa pe jese. Pekañoi chupe jare jae umeeta pewe. Piyerure chupe kía öke pe ueni pii oï wae rami, jare jae uipeata pewe,” jei.

<sup>8</sup>“Echa'ä kía uyerure yawe Tumpa pe mbae re, Tumpa umeeta oï chupe. Jare jae nunga wi kía ueka yawe, uwäeta chupe wi. Jare uyepeata oï chupe wi kía öke pe ueni oï wae. Jukuärái ko peRu Tumpa,” jei.

<sup>9</sup>“Mase. Nderai mbiyape ueka ndewe yawe, ndarau nemee chupe ita.

<sup>10</sup>Jare nderai pira chariki ueka ndewe yawe, ¿nemeeta yerá chupe mboi?” jei.

<sup>11</sup>“Pe reta, yepe tēi pereko ikawi mbae wae ko, erēi pikuaa ko pemee waerä mbaembae ikawi wae pesambiai reta pe. Jare jukuärái yawe, ¿këraita pa peRu ara pe oï wae umeeta'ä pewe mbaembae ikawi wae peka chupe yawe?” jei chupe reta.

<sup>12</sup>“Kërái pe reta pipota ñru wae reta uyapo pewe ikawi wae pemaerä, jukuärái wi piyapota ko ikawi wae chupe reta. Echa'ä jukuärái wi jei Moisés jare opaete ñru kuimbae Tumpa iñee arakae umimbeu wae reta,” jei Jesús chupe reta.

### **Jesús oporomboe umbijaanga rewe mokui öke re**

*(Lucas 13.24)*

<sup>13</sup>Jare Jesús jei wi umbijaanga rewe: “Pipota tekowe opa mbae wae penoi yawe, piketa ko öke ipirai wae rupi,” jei. “Echa'ä öke ipiwasu wae jae ko Tatawasurenda pe oo wae. Jare tape jokoti oo wae, ipiwasu ko jare yawai'ä ko. Jáeramo jeta wae reta uwata ñonoï jokoropi,” jei.

<sup>14</sup>“Erēi jokua öke ipirai wae, jae ko tekowe opa mbae wae pe oo wae. Jare tape jokoti oo wae ipiraiete ko jare yawái ko. Jare mbowiño uwäe chupe reta jokua öke,” jei chupe reta.

### **Kërái yaikuaa waerä kía ko jae Tumpa iñee umimbeuraanga wae reta**

*(Lucas 6.43-45)*

<sup>15</sup>“Piyandareko kawi piyé kuri, echa'ä outa oï Tumpa iñee umimbeuraanga wae reta. Jae reta ikota pepite rupi owecha reta rami, echa'ä uyekuaata reta pewe ikoi wae echa rami. Erēi añetete jae reta ko yawa pochi wae rami,” jei.

<sup>16</sup>“Erēi pe reta pikuaata jae reta ko upurumbitawi wae reta mbaembae uyapo wae rupi,” jei. “Yaikuaa ñai ndarau yaipoo uva iwopëre jáka wi. Jae ramiño wi iwa ndarau yaipoo kapiäti wi,” jei.

<sup>17</sup>“Pëti temiti ikawi wae umee ía ikawi wae. Jae ramiño wi pëti temiti ikawi mbae wae umee ía ikawi mbae wae,” jei.

18“Jare pëti temiti ía ikawi umee wae ndarau umee ía ikawi mbae wae. Jae ramiño wi pëti temiti ía ikawi mbae umee wae ndarau umee ía ikawi wae.

19Jare temiti ía ikawi’ä yawe, temiti iya uyasiata jare uapita,” jei.

20“Jayawe jukuärái yaikuaa ía rupi temiti ikawi wae ra ani ikawi mbae wae ra. Jare jukuärái wi pe reta pikuaata jae reta jeko rupi kía ko jae Tumpa iñee umimbeuraanga wae reta,” jei Jesús chupe reta.

**Jesús jeita jeta wae reta pe: “Che pukuaa’ä etei ko.”**

*(Lucas 13.25-27)*

21“Jeta wae reta täta rupi jeita chewe, ‘CheYa,’ erëi yurekota’ä opaete jae reta che ndiwe che aï ma yawe opaete wae imburuwicha wasurä jaeño mái pewa. Jaeño cheRu ara pe oï wae jei wae rupi uyapo wae reta yurekota che ndiwe,” jei.

22“Jokua ara uwäe yawe, jeta wae reta jeita tëi chewe: ‘CheYa mii, ore jupi ko nduiko waerä nde ndiwe, echa’ä ore numimbeu Tumpa iñee nderee re. Jare nderee re nomoë añä reta uyembiiya jese wae reta wi. Jare nembraepuere rupi nduyapo jeta mbaembae kuimbae reta ipuere’ä uyapo wae.’ Jukuärái jeita tëi chewe reta.

23Erëi che jaeta chupe reta: ‘Che pukuaa’ä etei ko. Pesiri chewi, pe pereko kachi wae reta.’ Jukuärái jaeta chupe reta,” jei Jesús.

**Jesús jei wae uyapo wae reta tëta itape re oï iwapika wae rami ko**

*(Lucas 6.46-49)*

24“Jayawe ime yawe kía uyapisaka kua chiñee re wae jare uyapo kawi kua chiñee wae, jae ko pëti kuimbae iyarakuaa katu wae uyapo jëtarä pëti itape wasu re rami,” jei.

25“Echa’ä jae opa ma jëta uyapo yawe, ama tuicha oki, jare i uyembutuicha oo jare uyepete tëta re. Jare iwitu täta uyepete jese wi. Erëi mbaeti jokua tëta uyapara jokua re, echa’ä iwapika itape re oï ramo,” jei. “Jukuärái rami ko che jae wae uyapo wae reta iyarakuaa katu ñonoï,” jei.

26“Erëi ime yawe kía uyandu tëi kua chiñee wae jare mbaeti uyapo wae, jae ko pëti kuimbae iyarakuaa mbae echa iwikuïti re jëtarä uyapo wae rami,” jei.

27“Echa’ä jae opa ma jëta uyapo yawe, ama tuicha oki, jare i uyembutuicha oo jare uyepete tëta re. Jare iwitu täta uyepete jese wi. Jare uyapara jokua tëta jare opa uyembái opaetei,” jei. “Jukuärái rami ko chiñee uyandu tëi wae reta erëi uyapo’ä reta,” jei. “Kuaañä ma che jae aï pewe.” Jukuärái jei Jesús jokua jeta uyembati wae reta pe.

28Jare Jesús kua opa ma jei yawe, opaete uyapisaka jese wae reta ipiakañi jae oporomboe wae re.

29Echa’ä oporomboe’ä Moisés uikuatía wae re oporomboe wae reta rami. Jae oporomboe imbaepuere rewe.

## Mateo 8

## Jesús uminguera kuimbae ipire okui wae

(*Marcos 1.40-45; Lucas 5.12-16*)

- <sup>1</sup>Joko wi Jesús uweyi oo iwitu wi, jare jeta wae reta yuraa jupie.
- <sup>2</sup>Jare ou owaiti pëti kuimbae ipire okui wae. Jayawe kuimbae uñeño itawa re Jesús jowai jare jei chupe: “CheYa, nde ndipota yawe, ndepuere cheminguera mii jukuärái wi chekia mbae aï waerä,” jei chupe.
- <sup>3</sup>Jayawe Jesús oñoño ipo jese jei rewe: “Aipotaete ndekuera waerä. Añawe ekuera,” jei chupe. Jare jupiwoiño kuimbae ukuera imbaerasi wi jare opaete ipire ukuera kawi.
- <sup>4</sup>Jayawe Jesús jei chupe: “Awiye embeu kía pe awe che ko numinguera wae,” jei. “Ekua iychaka sacerdote pe jae uikuaa waerä nde ndekuera ma ko. Jare emee wi Tumpa pe mbae kërái arakaete Moisés jei wae rami, ime yawe kía kua nunga mbaerasi wi ukuera wae. Joko wi ramo sacerdote umimbeuta tëta wasu pewa reta pe ndekuera ma ko, jare jukuärái ndepuereta niñemiiru ye jae reta ndiwe,” jei chupe.

## Jesús uminguera sindaro reta itenondewa pe uyeyokui wae

(*Lucas 7.1-10*)

- <sup>5</sup>Jayawe Jesús oo uwäe tëta wasu Capernaum pe. Jare oo ma uwäe yawe joko pe, ou owaiti pëti kuimbae uyerure waerä chupe mbae re. Jae ko kuimbae romano sindaro reta itenondewa.
- <sup>6</sup>Jae jei Jesús pe: “Oporomboe wae, chembori mii,” jei. “Chewe uyeyokui wae imbaerasiete oï cherëta pe. Ipuere’ä etei omi oï jare tuicha uiporara oï parawete,” jei chupe.
- <sup>7</sup>Jayawe Jesús jei chupe: “Jaikó. Taa taminguera jayawe,” jei.
- <sup>8</sup>Erëi sindaro reta itenondewa jei chupe: “Oporomboe wae, mase, che parawete jupi’ä ko nde ndeo waerä cherëta pe,” jei chupe. “Ndepuere ndere kua wiño uyeyokui chewe wae ukuera waerä jare ukuerata ko,” jei chupe.
- <sup>9</sup>“Echa’ä che aikuaa wi kërái ko mbaepuere reta. Che ime anoi chemburuwicha reta, jare che imeta ko ayapo jae reta jei chewe wae. Jae ramiño wi ime sindaro reta che ayokui wae. Che jae yawe pëti sindaro pe, ‘Ekua,’ jae oota ko. Jare jae yawe ñru sindaro pe, ‘Eyu,’ jae imeta ko ou. Jae ramiño wi che jae yawe uyeyokui chewe wae pe mbae uyapo waerä, jae imeta ko uyapo. Jáeramo che aikuaa nde mbae ndere yawe, uyeyapota ko,” jei sindaro Jesús pe.
- <sup>10</sup>Jare Jesús kua uyandu yawe, ipiakañiete jare jei jaikue yuraa wae reta pe: “Che tae pewe añetete wae, awäe’ä etei kía kuärái tuicha wirowia cheré wae kua iwi Israel rupi awe,” jei chupe reta.
- <sup>11</sup>“Jare che tae pewe, Tumpa oï ma yawe opaete wae imburuwicha wasurä jaeño mái pewa, yuweruta opaete keti keti wi jeta kua nunga judío mbae wae reta yureko

waerä Tumpa ndiwe. Jare jae reta ukaruta uyerowia rewe yanderamikue ikowe yeta oï wae reta Abraham, Isaac, jare Jacob ndiwe,” jei chupe reta.

<sup>12</sup>“Erëi jeta ñanerëtara judío reta uyekouta tēi jese wae, uyemombokata reta joko wi oka pe pītumimbi oï wae pe. Jare joko pe uyaota tēi reta jare jai umbikiriuta reta ikuasi katuta ñonoï ramo.” Jukuärái Jesús jei yuraa jupie wae reta pe.

<sup>13</sup>Jayawe Jesús uyerowa ye sindaro reta itenondewa koti jare jei chupe: “Ekua ye nerëta pe ndepiawiwe rewe, echa’ä jokua nde ndeka chewe wae ayapo ma nderowia cheré ramo,” jei chupe. Jare jokua ora etei ukuera imbaerasi wae.

### **Jesús uminguera Pedro jaicho**

*(Marcos 1.29-31; Lucas 4.38-39)*

<sup>14</sup>Joko wi Jesús oo uwäe Pedro jëta pe. Jare uike ma yawe o pe, uecha Pedro jaicho jaku yepe oï jupa pe.

<sup>15</sup>Jayawe Jesús oya oo ikoti jare uipisi ipo pe, jare jaku upita woi chuwi. Jayawe jokua kuña upüa jare umbipi uyapo tembiu umingaru reta waerä.

### **Jesús uminguera jeta imbaerasi wae reta**

*(Marcos 1.32-34; Lucas 4.40-41)*

<sup>16</sup>Joko wi, warasi uike ma oo yawe, tēta wasu pewa reta ueru Jesús pe jeta wae reta aña uyembiiya jese wae. Jare Jesús omombo pēti pēti wae iñee rupi. Jae nunga wi Jesús opa uminguera joko pe opaño kërái rái imbaerasi ñonoï wae reta.

<sup>17</sup>Jukuärái uyapo Jesús opa uyeyapo waerä Tumpa iñee arakae umimbeu wae Isaías jei uyeyapota iko wae. Echa’ä Isaías jei Upuruepi wae rewa kuärái: “Jae etei yaneminguera yanembaerasi reta wi,” jei.

### **Yawái ko oï kía iko waerä Jesús jemimboerä**

*(Lucas 9.57-62)*

<sup>18</sup>Jare jeta wae reta yuweru uyembati Jesús oï wae pe. Jare jae uecha reta yawe, jei jemimboe reta pe: “Ya ipa wasu jowaicho koti,” jei chupe reta.

<sup>19</sup>Erëi ndei yuraa reta mbowe, pēti kuimbae ou oya Jesús re. Jae ko pēti wae Moisés uikuatía wae re oporomböe wae. Jae jei Jesús pe: “Oporomböe wae,” jei chupe. “Aipota aiko nderemimboerä. Taa nde ndiwe opaete kerupi ndeo wae rupi,” jei chupe.

<sup>20</sup>Jayawe Jesús jei jokua kuimbae pe: “¿Añetete pa ndiyemingeta nei? Echa’ä awara reta ime onoi ikua, jare wira reta wi ime onoi jaiti. Erëi che kuimbaerä ayeyapo wae mbaeti anoi kiae awe ake waerä,” jei chupe.

<sup>21</sup>Jare ñru jemimboe jei Jesús pe: “Oporomböe wae, che aipota a wi nde ndiwe,” jei chupe. “Erëi emaeño rani cheré a waerä cherëta pe cheru umano rewa. Jare añoti ma cheru yawe ramo taa nde ndiwe,” jei chupe.

<sup>22</sup>Jayawe Jesús jei chupe: “Eyuño che ndiwe. Emaeño jokua umano wae echa ñonoï Tumpa wi wae reta tuñeñoti kuri jae reta yepái,” jei chupe.

### **Jesús umimbíta iwitu**

*(Marcos 4.35-41; Lucas 8.22-25)*

**23**Jayawe Jesús jare jemimboe reta ndiwe uyupi chalana pe jare umbipi uasa reta ipa wasu.

**24**Jare aramoiño ou iwitu täta, jare i opa uyembiaparoaroa jare uike chalana japipe. Erëi Jesús oke öi.

**25**Jayawe jemimboe reta umbisareko Jesús, jare jei reta chupe ukiye rewe: “¿OreYa, opata ma yandeputupa! ¿Epüa yanderepi!” jei reta.

**26**Jayawe Jesús jei chupe reta: “¿Maera pa pekiyete pei? Mbaeti chawaa perowia cheré,” jei chupe reta. Jayawe Jesús upüa, jare jei ñneeäta rewe iwitu pe jare iaparoa pe wi upita waerä. Jare jupiwoi opaete upita küi ngatu.

**27**Jare Jesús jemimboe reta opa ipiakañi jare jei reta: “¿Mbae nunga kuimbae ra kua? I jare iwitu wi awe uyapo jae jei wae,” jei reta iyupe.

### **Jesús uminguera mokui kuimbae añä uyembüiya jese wae**

*(Marcos 5.1-20; Lucas 8.26-39)*

**28**Ipa wasu jowaicho pe ko jae Gadara pewa reta iüwi. Jare jokua ipa wasu jembei pe öi pëti patüu. Jokua patüu pe yureko mokui kuimbae parawete reta añä uyembüiya jese wae. Jare jokua kuimbae reta kiyeta ko. Jáeramo mbaeti kiawe uipota uwata jokoropi. Jayawe Jesús ou uwäe yawe joko pe, jokua kuimbae reta yuweru patüu wi owäiti Jesús.

**29**Jare jei reta ñneeäta rewe: “Jesús Tumpa Tai, ¿mbae pa ndeyu ndeka kua pe? ¿Ndeyu pa ndiporaraka waerä orewe añawe ndei ara Tumpa jei wae uwäe mbowe?” jei reta chupe.

**30**Jare joko wi mbiri katu mii ime ñonoï kuchi iyandarekoa reta umingaru ñonoï kuchi reta.

**31**Jayawe añä reta jei Jesús pe ikuasi katu rewe: “Kua kuimbae reta wi oremoö yawe, emañö mii oreré ndoo nduïke waerä pea kuchi reta re,” jei reta chupe.

**32**Jayawe Jesús jei chupe reta: “Peë pekua.” Jayawe añä reta opa öë kuimbae reta wi jare opa yuraa uike kuchi reta re. Joko wi kuchi reta täta rupi opa osi uweyi yuraa iwia rupi uike reta ipa wasu pe. Jare joko pe kuchi reta opa iputupa umano.

**33**Jayawe kuchi iyandarekoa reta opa osi yuraa tëta wasu koti jare umimbeu joko pewa reta pe opaete mbae uyeyapo wae rewa. Umimbeu wi chupe reta mbae uyeyapo jokua mokui kuimbae añä uyembüiyase jese wae reta pe.

**34**Jayawe opaete jokua tëta wasu pewa reta yuraa owäiti Jesús. Jare umiñera reta Jesús öë ye oo waerä jae reta iüwi wi.

## **Mateo 9**

### **Jesús uminguera pëti kuimbae ipuere mbae omi wae**

*(Marcos 2.1-12; Lucas 5.17-26)*

<sup>1</sup>Jayawe Jesús jare jemimboe reta ndiwe uyupi reta ye chalana pe yuraa reta ye waerä ipa wasu jowaicho koti. Jare yuraa ma uwäe reta yawe jowaicho pe, joko wi yuraa reta jëta wasu rai pe.

<sup>2</sup>Jayawe amokue wae reta owoi ueru jupa rewe pëti kuimbae ipuere mbae omi wae Jesús oï wae pe. Jare Jesús kua uecha yawe, uikuaa jae reta wirowia kawi jese wae. Jáeramo jei kuimbae ipuere mbae omi wae pe: “Iñemiatangätu, cheraí. Teko nenoí Tumpa koti wae opa ma uyembái ndewi,” jei chupe.

<sup>3</sup>Jare joko pe ñonoï wi amokue kuimbae Moisés uikuatía wae re oporomboe wae reta. Jae reta uyemingeta ipia pe Jesús rewa: “Kua kuimbae uyapo ma mbae kachi wae. Echa’ä uyemingeta oï Tumpa rami,” jei reta ipia pe.

<sup>4</sup>Jayawe Jesús uikuaa chuwi reta ipiayemingeta, jare jei chupe reta: “¿Maera pa piyemingeta peï mbae ikawi mbae wae pepia pe?” jei.

<sup>5</sup>“Che jae kua kuimbae pe, ‘Teko nenoí Tumpa koti wae opa ma uyembái ndewi,’ jae chupe. Erëi ipotawe kía yawai’ä jokua jei waerä,” jei. “Yawaita ko ipotawe kía jei chupe waerä kuärái: ‘Epüa jare ewata.’ Echa’ä aramoi ukuera’ä yawe, jayawe imarata upita,” jei.

<sup>6</sup>“Jayawe taminguera kua kuimbae perowake pikuaa waerä che kuimbaerä ayeyapo wae ime ko anoi wi mbaepuere kua iwi pe ambái waerä kía wi teko onoi Tumpa koti wae,” jei Jesús chupe reta. Jayawe Jesús jei kuimbae ipuere mbae omi wae pe: “Epüa, jare eupi nderupa, jare ekua nerëta pe,” jei chupe.

<sup>7</sup>Jayawe kuimbae upüa jare oë oo jëta koti.

<sup>8</sup>Jare joko pe ñonoï wae reta uecha yawe jokua mbaepuere tuicha wae Tumpa umee Jesús pe wae, umbutuicha reta Tumpa jee uipiu rewe.

### **Jesús ueni pëti kuimbae Mateo jee wae iko waerä jemimboerä**

*(Marcos 2.13-17; Lucas 5.27-32)*

<sup>9</sup>Jare Jesús oo joko wi yawe, uecha pëti kuimbae Mateo jee wae uwapi oï kiape umbiepi reta mburuwicha pewarä okowara wae pe. Echa’ä Mateo ko jae pëti wae mburuwicha pewarä okowara wae. Jayawe Jesús jei chupe: “Eyu che ndiwe ndiko waerä cheremimboerä,” jei chupe. Jayawe Mateo upüa jare oo Jesús ndiwe.

<sup>10</sup>Jare kaaru katu ma yawe, Mateo uparea Jesús jare jemimboe reta pe ukaru waerä jae jëta pe. Jare joko pe ukaru ñonoï wi iru kuimbae reta mburuwicha pewarä okowara wae jare jeko kachi wae reta wi.

<sup>11</sup>Jayawe amokue fariseo reta kua uecha yawe, jei reta Jesús jemimboe reta pe: “Mase, pemboea ukaru oï okowara wae reta ndiwe jare iru jeko kachi wae reta ndiwe. ¿Kërái pa jokua añawe?” jei reta.

<sup>12</sup>Jesús kua uyandu yawe, jei umbijaanga rewe fariseo reta pe: “Ikowe katu wae reta ueka’ä iyupe upurupiano wae. Imbaerasi wae retaño ko ueka,” jei.



13“Tumpa jei iñeeriru pe: ‘Che aipotaete ko perapicha piparareko waerä mbaemimba peru pemee chewe wae wi.’Jukuärái jei. Jare pe reta ikawi ko piyemboe waerä mbae ra uipota jokua jei. Echa’ä che ayu’ä ko aeni waerä jupi wae reta. Ayu ko aeni waerä jeko kachi wae reta,” jei chupe reta.

### **Maera Jesús jemimboe reta oñono tee’ä ara reta ukaru mbae waerä**

*(Marcos 2.18-22; Lucas 5.33-39)*

14Jayawe Juan upurumbisakambu wae jemimboe reta yuweru jei Jesús pe: “Ore noñono teeñoi ara reta ndukaru mbae waerä numbiyerowia waerä Tumpa. Jare fariseo reta jukuärái uyapo wi. ¿Maera pa nderemimboe reta uyapo’ä wi jukuärái?” jei chupe.

15Jayawe Jesús jei chupe reta umbijaanga rewe: “Uparea reta yawe menda pe, ¿ipiätitita yerá joko pe ñonoï wae reta kuimbae umenda wae jae reta ndiwe oï rambuewe? Ndarau etei,” jei chupe reta. “Erëi outa uwäe ara kuimbae umenda wae uyereraa waerä chuwi reta. Jayawe ramo jae reta oñono teeta ara reta ukaru mbae waerä,” jei chupe reta.

16Jare Jesús jei wi chupe reta umbijaanga rewe: “Yaikuaa ñaï ikawi’ä ko yamboya waerä temimonde indechi wae mbaemboyaka ipiau wae pipe. Echa’ä jukuärái yayapo yawe, mbaemboyaka ipiau wae umiatata temimonde indechi wae, jare temimonde jeieteta osoro,” jei chupe reta.

17“Jae nunga wi kiawe umbiru’ä vino ipiau wae vino jiru wakapi pewa indechikue pe. Echa’ä jukuärái uyapo yawe jare vino jayasi yawe, omondorota jiru jare opata uyepiyere. Jayawe vino jare jiru ndarau ma ikawi,” jei chupe reta. “Jáeramo yambiru vino ipiau wae jiru ipiau wae pe. Jare jukuärái yawe, jiru osorota’ä jare vino uyepiyereta’ä wi,” jei. “Jukuäraiete wi che aporomböe wae ipiau wae ko,” jei Jesús chupe reta.

### **Jesús umbijekowe ye pëti kuñatái**

*(Marcos 5.21-43; Lucas 8.40-56)*

18Jare Jesús uyemingeta iko rambuewe, ou uwäe pëti mburuwicha jare uñeño itawa re Jesús jowai, jare jei chupe: “Cherayi mii iyei mii ramo umano chewi. Erëi ya mii iño no ndepo jese ikowe ye waerä,” jei chupe.

19Jayawe Jesús jare jemimboe reta ndiwe upüa yuraa mburuwicha ndiwe.

20Jare yuraa yureko reta rambuewe, ou Jesús jaikue koti wi pëti kuña doce año ma uiporara oï mbaerasi tuwi wasu pewa. Jae uñatai Jesús jemimonde jembei pe.

21Echa’ä jae jei iyupe: “Jemimonde mii yepe añatai yawe, akuerata ko,” jei iyupe.

22Jayawe Jesús uyerowa umae jaikue koti jare uecha kuña joko pe oï. Jayawe jei chupe: “Cherayi, iñemiatangätu. Ndekuera ma ko cheré nderowia ramo,” jei chupe. Jare jupiwoiño kuña ukuera.

<sup>23</sup>Jare joko wi jekuae yuraa reta mburuwicha jëta koti. Jare yuraa ma uwäe yawe, Jesús uike o pe jare uecha jeta wae reta joko pe ñonoï. Jare uyemimbi wae reta umiñee ñonoï jemimbi mbiatiti pewa. Jare jeta wae reta jäse uyao ñonoï.

<sup>24</sup>Jayawe Jesús jei chupe reta: “Peë oka pe. Kua kuñatái umano’ä oi. Okeño ko oi,” jei chupe reta. Erëi jae reta kua ñee uyandu yawe, oyoyai reta Jesús.

<sup>25</sup>Jayawe Jesús omoë reta oka pe. Jare opa ma oë oo reta yawe, Jesús uike kuñatái joo pe jare uipisi kuñatái ipo pe. ¡Jare kuñatái upüa woi!

<sup>26</sup>Jayawe jeräkua opaete jokua iwi rupi Jesús uyapo wae.

### **Jesús uminguera mokui kuimbae jesa mbae wae reta**

<sup>27</sup>Jayawe Jesús jare jemimboe reta ndiwe yuraa joko wi. Jare yuraa yureko reta rambuewe, mokui kuimbae jesa mbae wae reta yuraa Jesús jaikue. Jare jei reta chupe usapikái rewe: “Jesús, David iñemoña pewa, oreparareko mii,” jei reta.

<sup>28</sup>Erëi Jesús uyemboi’ä oo uwäe rewa tëta pe. Jare uike ma yawe o pe, uike wi jaikue jokua jesa mbae wae reta. Jayawe Jesús upirandu chupe reta: “¿Perowia pa che chepuere pumimae wae?” jei chupe reta. “Ndorowia, cheYa,” jei reta chupe.

<sup>29</sup>Jayawe Jesús uyawiki chuwi reta jesa, jare jei chupe reta: “Jayawe tuyeyapo pewe kërái perowia cheré wae rupi,” jei.

<sup>30</sup>¡Jare jupiwoiño mokui rewe ipuere umae kawi! Jayawe Jesús jei chupe reta: “Awiye pemiári kía pe awe kua mbae ayapo pewe wae re,” jei tëi chupe reta.

<sup>31</sup>Erëi jae reta yuraa umimbeu opaete jokua iwi rupi Jesús uyapo chupe reta wae re.

### **Jesús uminguera kuimbae ipuere mbaei uyemingeta wae**

<sup>32</sup>Jayawe Jesús jare jemimboe reta ndiwe opa yuraa joko wi. Jare yuraa yureko reta rambuewe, amokue wae reta ueru Jesús oi wae pe pëti kuimbae ipuere mbaei uyemingeta wae. Kua kuimbae parawete ipuere’ä uyemingeta, echa’ä aña uyembiiya jese ramo.

<sup>33</sup>Jayawe Jesús omoë chuwi aña jare kuimbae umbipi uyemingeta. Jare jeta joko pe ñonoï wae reta ipiakañiete upita, jare jei reta iyupe: “Mbaetii nduecha kua nunga iwi Israel pe,” jei reta.

<sup>34</sup>Erëi fariseo reta jei: “Añawasú imbaepuere rupi ko kua kuimbae omoë aña reta uyembiiya jese wae reta wi,” jei tëi reta.

### **Jesús jei jeta oi yambaewiro waerä**

<sup>35</sup>Jare Jesús oo opaete tëta wasu reta rupi jare tëta wasu rai reta rupi, jare oporomboe tupao reta rupi. Jae jekuaeño oporomboe, jare umimbeu ñee ikawi wae kërái uyembipi ma Tumpa imbaepuere mburuwicha wasu pewa kua iwi pe. Jare jae uminguera wi imbaerasi wae reta ipotawe mbaerasi wi.

<sup>36</sup>Jare uecha yawe jeta wae reta yuweru ñonoï ikoti, tuicha rupi uiparareko umae jese reta. Echa'ä jae reta ipia'ä ñonoï jeta mbaembae re jare mbaeti wi kía ombori reta waerä. Jae reta owecha mbaeti iyandarekoa onoi wae reta rami ko.

<sup>37</sup>Jayawe Jesús jei jemimboe reta pe umbijaanga rewe: “Jetaete oï yambaewiro waerä, erëi mbowiete oï umbaewiro wae reta.

<sup>38</sup>Jáeramo piyerure koo iYa pe ombou waerä umbaewiro wae reta,” jei chupe reta umbijaanga rewe.

## Mateo 10

### Jesús jemimboe tenondewaete reta jee

*(Marcos 3.13-19; Lucas 6.12-16)*

<sup>1</sup>Pëti ara Jesús umbatika jokua doce jemimboe tenondewaete reta, jare umee chupe reta mbaepuere omoë waerä aña uyembiiya jese wae reta wi jare uminguera waerä imbaerasi wae reta ipotawe mbaerasi wi.

<sup>2</sup>Kuärái ko Jesús uiparawo wae reta jee: Simón (kua kuimbae Jesús umbijee Pedro), jare Simón tiwi Andrés jee wae, jare Zebedeo tai reta Jacobo jare Juan jee wae reta,

<sup>3</sup>Felipe, Bartolomé, Tomás, Mateo (jae ko mburuwicha pewarä okowarase wae), Alfeo tai Jacobo jee wae, Tadeo,

<sup>4</sup>jare Simón (kua Simón jae ko ñru wae reta ueni wi Zelote pe). Jare jae nunga wi Jesús uiparawo Judas Iscariote (kua kuimbae taikue rupi umeeta wireko Jesús jowaicho reta pe). Jukuärái ko jee Jesús uiparawo wae reta.

### Jesús umbiarakuaa jemimboe reta omondo reta waerä

*(Marcos 6.7-13; Lucas 9.1-6)*

<sup>5</sup>Jesús omondo jokua doce kuimbae reta umimbeu waerä ñee ikawi wae opaete kerupi. Jare ndei yuraa reta mbowe, Jesús jei chupe reta kuärái: “Awiye pekua kuri judío mbae wae reta ñonoï wae pe jare samaritano reta jëta wasu reta rupi,” jei chupe reta.

<sup>6</sup>“Pekua jaeño ñanerëtara Israel pewa reta oï wae rupi. Echa'ä jae reta ko jae owecha reta ukañi wae rami,” jei chupe reta.

<sup>7</sup>“Jare ipotawe kerupi peo wae rupi, pemimbeu kua ñee: ‘Koiñoete ma oï uyembipi waerä Tumpa imbaepuere mburuwicha wasu pewa kua iwi pe,’ pere chupe reta,” jei.

<sup>8</sup>“Jae nunga wi peminguera imbaerasi wae reta jare ipire okui wae reta. Pembijekowe ye wi umanokue wae reta. Jare pemoë pemombo aña reta kía re uyembiiya wae wi,” jei. “Che amee ma pewe kua mbaepuere jepi mbae rewe. Jáeramo pe reta awiye pekowara kía pe pembori wae re,” jei chupe reta.

<sup>9</sup>“Jae nunga wi awiye peraa peyupe oro jare korepoti piporu waerä.

<sup>10</sup>Awīye wi peraa peurupuku. Jaeño peraa pepopoka, jare pepipasa, jare jokua peremimonde pemonde peī wae. Awiyeta ko peraa jeta mbaembae, echa’ā uparawiki wae jupi ko uyemingaruka waerä,” jei chupe reta.

<sup>11</sup>“Jare peo pewäe yawe pēti tēta wasu pe ani pēti tēta wasu rai pe, peka jokoropi kía ipuere pembiasa jēta pe wae. Jare pepita jae jēta pe jokua tēta wasu wi peo ye rewa,” jei.

<sup>12</sup>“Jare pike yawe jokua kuimbae jēta pe, pembisaluda kawī Tumpa jee re.

<sup>13</sup>Jare jokua kuimbae jētara reta pembiasa kawī yawe, jayawe Tumpa umaeta jokua tēta re. Erēi mbaeti pembiasa kawī reta yawe, Tumpa ndarau wi umae jese reta,” jei chupe reta.

<sup>14</sup>“Jare mbaeti yawe kía uipota pembiasa jokua tēta wasu pe wae, jare mbaeti yawe kía uipota uyapisaka peré joko pe wae, jayawe peasa joko wi,” jei. “Jare peē jokua tēta wasu wi yawe, pemitimo pepipasa iwīkuī usururu waerä chuwi. Jukuärái pikuaakata chupe reta jae reta etei ko teko onoi Tumpa uiporaraka chupe reta waerä,” jei.

<sup>15</sup>“Che tae pewe añetete wae, jokua ara iwī pewa reta uyemboi yawe Tumpa jowai Tumpa umbijeko reta waerä, jokua tēta wasu pewa reta tātaete ye uiporarata ñonoī jokua arakae tēta wasu Sodoma jare Gomorra pewa reta wi,” jei Jesús chupe reta.

### **Jesús umimbeu jemimboe reta pe uiporarata ñonoī**

<sup>16</sup>“Mase, che pomondo aī ikawī mbae wae uyapo wae reta ipite rupi,” jei chupe reta. “Jukuärái pe reta pikota peī owecha yawapīta reta ipite rupi iko wae rami. Jáeramo piyandareko kawī piyé pearakuaa katu rewe jare pekoi rewe,” jei.

<sup>17</sup>“Piyandareko kawī piyé ikawī mbae wae uyapo wae reta wi. Echa’ā amokue wae reta pepisita jare pemeeta mburuwicha reta pe uñeapo waerä peré,” jei. “Jare jae reta penupata itupao reta pe.

<sup>18</sup>Jare cheré perowia ramo, pereraata wi mburuwicha reta jare mburuwicha wasu reta jowai pembijeko reta waerä. Erēi jokoropi jēwata pewe pemimbeu kawī waerä chupe reta jare judío mbae wae reta pe wi che rewa,” jei.

<sup>19</sup>“Erēi jae reta pemee yawe mburuwicha reta pe, awīye piyembipia’ā mbae pere waerä jare kērái piyemingeta waerä. Echa’ā jokua ora etei Tumpa uikuaakata oī pewe mbae pere waerä,” jei.

<sup>20</sup>“Echa’ā Espiritu Santo etei pemborita oī piyemingeta waerä. Pe retaiño’ā ko piyemingetata peī,” jei chupe reta.

<sup>21</sup>“Jokua ara reta rupi imeta tikei reta umee tiwī reta uyukaka waerä, tiwī reta wirowia cheré ramo. Jae nunga wi imeta tu reta umee isambiai reta. Jare jae nunga wi imeta sambiai reta oyowaicho tu jare ichi koti uyukaka reta waerä,” jei.

<sup>22</sup>“Jare cheré perowia ramo, opaete seri peamitāata. Erēi ipotawe kía umiawāta cheré wirowia rewe wae, Tumpa uepita oī kuri,” jei chupe reta.

23“Jayawe uipota uiporaraka reta pewe yawe pëti tëta wasu pe, peë pekua chuwi reta ïruwe tëta wasu koti. Che tae pewe añetete wae, ndarau opa pemimbeu ñee ikawi wae opaete Israel pewa reta jëta wasu rupi ndei ayu ye mbowe che kuimbaerä ayeyapo wae,” jei chupe reta.

24Joko wi Jesús jei wi chupe reta: “Yande reta yaikuaa kawi ñäi pëti uyemboe wae ndarau uasa imboea iáramo rupi. Jae ramiño wi pëti pione ndarau uasa ipatrón iáramo rupi,” jei.

25“Erëi uyemboe wae iko yawe imboea rami, jokua ikawi ko. Jare pione iko yawe ipatrón rami, jae nunga wi ikawi ko. Jayawe piyandareko kawi piyé, echa’ä jei reta ma chewe, ‘Añawasú.’ Jare jukuärái uyapo reta ma chewe yawe che peYarä äi wae, ;oeteta uyapo reta pewe chermimboerä piko wae reta!” jei Jesús chupe reta.

### **Jesús umikirëi jemimboe reta awiye waerä ukiye jowaicho reta wi**

*(Lucas 12.2-9)*

26“Erëitu awiye pekiye jokua peamitää wae reta wi,” jei. “Echa’ä opaete mbaembae jae reta uyapo wïari tëi wae, taikue rupi oëta oï ikatu pe etei. Añawe jae reta oñomi ñonoï jeko kachi wae, erëi jokua uyekuaata oï taikue rupi,” jei.

27“Jayawe jokua mbaembae peweño aikuaaka äi wae, pemimbeuta ko opaete wae jowake,” jei chupe reta.

28“Awïye pekiye jokua uipota peyuka wae reta wi. Echa’ä pereteño ko jae reta ipuere uyuka pewi. Ndarau ipuere uyuka reta peä,” jei. “Erëi che tae pewe ikawi ko pekiye waerä Tumpa wi. Echa’ä jaëño ipuere omombo perete jare peä wi Tatawasurenda pe,” jei chupe reta.

29“Yande yaikuaa kawi ñäi, yepe tëi wïra räi reta jepi’ä ko, erëitu pëti awe wïra räi mbaeti umano jare oa iwi pe peRu Tumpa uipota’ä yawe.

30-31¿Këraita pa jayawe peRu Tumpa uyandarekota’ä wi peré? Echa’ä jae perauete ye ko opaete wïra räi reta wi,” jei chupe reta. “Jare jae pekuaa kawiete ramo, jae uikuaa wi mbowï ra pea penoi päka pe wi. Jáeramo awiye pekiye,” jei Jesús chupe reta.

32“Jare awiye pemara chewi. Echa’ä ime yawe kía uyembeu kawi che rewa ïru wae reta jowake, che jae nunga wi amimbeu kawita jesewa cheRu ara pe oï wae jowake,” jei chupe reta.

33“Erëi ime yawe kía chekuaku ïru wae reta jowake, jayawe che aikuakuta wi cheRu ara pe oï wae jowake,” jei Jesús chupe reta.

### **Jesús jeko pewa iwi pewa reta oyowaichota ñonoï**

*(Lucas 12.51-53, 14.26-27)*

34Jare Jesús jei wi jemimboe reta pe: “Aramoi perowia tëi che ayu ko iwi pewa reta yureko waerä ipiawiwe rewe jare uñeräro mbae waerä. Erëi jokuaerä’ä ko che ayu. Che ayu ko iwi pewa reta uyembowaicho waerä chereko pewa,” jei.

<sup>35</sup>“Echa’ä chereko pewa jeta tai reta oyowaichota tu reta koti, jare jeta kuñatái reta oyowaichota ichi reta koti, jare jeta imembitati reta oyowaichota imesi reta koti wi.

<sup>36</sup>Jukuärái tēta pewa reta oyowaichota ñonoï jae yepái che chereko pewa,” jei chupe reta.

<sup>37</sup>“Erēi ime yawe kía uauete tu jare ichi chewi wae, jupi’ä ko iko waerä cheremimboerä. Jae ramiño wi ime yawe kía uauete isambiai reta chewi wae, jupi’ä ko iko waerä cheremimboerä.

<sup>38</sup>Jare ime yawe kía mbaeti owoi ikurusu oo cherupie wae, jupi’ä ko iko waerä cheremimboerä,” jei chupe reta.

<sup>39</sup>“Jayawe ime yawe kía jaeño uyembipia’ä uepi waerä tēi jekowe kua iwī pewa re, umikañita iyuwi jekowe opa mbae wae ipuereta tēi onoi wae. Erēi kía umee jekowe chereko pewa wae, yepe tēi umano, erēi onoita tekowe opa mbae wae,” jei Jesús chupe reta.

### **Jesús umiñatimata jokua jemimboe reta umbiasa kawi wae pe**

*(Marcos 9.41)*

<sup>40</sup>Jesús jei wi chupe reta: “Ime yawe kía pembiasa kawi jēta pe wae, che ko chembiasa oï rami. Jare jokua chembiasa wae, chembou wae etei ko umbiasa oï wi,” jei.

<sup>41</sup>“Jare ime yawe kía umbiasa kawi Tumpa iñee umimbeu wae jēta pe wae jokua ñee umimbeu ramo, jayawe Tumpa umiñatimata oï chupe kērái Tumpa iñee umimbeu wae pe umiñatimata wae rami,” jei. “Jae ramiño wi ime yawe kía umbiasa kawi pēti jupi wae jae jupi ramo, jayawe Tumpa umiñatimata chupe kērái jupi wae pe umiñatimata wae rami,” jei.

<sup>42</sup>“Che tae pewe añetete wae, ime yawe kía umee i roisa mii wae yepe cheremimboe pe jae ko cheremimboe ramo, jayawe Tumpa umiñatimata oï chupe mbae ikawi wae jokua re. Jukuärái uyapota, yepe tēi aramoi jokua cheremimboe wae ñru wae reta pewarä mbae’ä ko,” jei chupe reta. Opaete kua mbaembae Jesús jei jemimboe reta pe ndei omondo reta mbowe umimbeu waerä iñee.

## **Mateo 11**

### **Jesús oporomboe Juan upurumbisakambu wae rewa**

*(Lucas 7.18-35)*

<sup>1</sup>Jare Jesús opa ma omboe yawe jokua doce jemimboe reta, jae etei oo joko wi tēta wasu rai reta rupi oporomboe waerä jare umimbeu waerä Tumpa iñee.

<sup>2</sup>Jokua ara reta rupi Juan upurumbisakambu wae peresoriru pe oï jare jeräkua chupe Cristo mbaembae uyapo oï wae. Jayawe ueni mokui jemimboe reta jare jei chupe reta: “Pekua yandeYa oï wae pe

<sup>3</sup>pepirandu chupe jae ra ko Upuruepi wae outa iko wae, ani jekuaeño ñaärota ñru wae,” jei chupe reta. Jayawe jukuärái uyapo reta.

<sup>4</sup>Jayawe Jesús jei chupe reta: “Pekua ye pemimbeu Juan pe kua piyandu wae re jare pecha wae re.

<sup>5</sup>Pere chupe kuärái: ‘Jesa mbae wae reta uma ma. Ipuere mbae uwata wae reta uwata ma. Ipire okui wae reta ukuera ma. Iyapisa mbae wae reta uyandu ma. Umanokue wae reta ikowe ye ma. Jare ikuasi wae reta uyandu ñonoï ñee ikawi wae.’ Jukuärái pere chupe,” jei chupe reta.

<sup>6</sup>“Aramoi kua ayapo aï wae jae’ä ko jeta wae reta wirowia tēi Upuruepi wae uyapota iko wae. Erēi uyekoueteta ñonoï jokuwa chereriro mbae wae reta.” Jukuärái Jesús jei Juan jemimboe reta pe.

<sup>7</sup>Jare yuraa ye ma yawe Juan ombou wae reta, Jesús umbipi uyemingeta joko pe ñonoï wae reta pe Juan rewa. Jei chupe reta: “Karamboe peo yawe iwitini wasu pe piyapisaka waerä Juan ñee re, ¿mbae nunga kuimbae peo pecha joko pe? ¿Pecha yerá joko pe pēti kuimbae takuaräsi koti koti omi oi rami wae? Mbaeti. Echa’ä Juan aramoimoïño uyemingeta wae’ä ko,” jei.

<sup>8</sup>“¿Peo yerá pecha pēti kuimbae jemimonde ikawi wae? Mbaeti. Echa’ä temimonde ikawi wae omonde wae reta ñonoï ko mburuwicha wasu reta jēta pe,” jei chupe reta.

<sup>9</sup>“Jayawe ¿kía pa peo pecha? Peo ko pecha waerä pēti kuimbae Tumpa ombou ñee umimbeu waerä wae – jae ko Juan. Jare che tae pewe añetete wae, Juan ikawiete ko ipotawe iiru kuimbae Tumpa ñee umimbeu wae reta wi.

<sup>10</sup>Echa’ä Tumpa ñeeriru pe uyekuatía oi jese kuärái: ‘YandeRu Tumpa jei Tai pe: ‘Mase, che amondota aï tenonde mii ndewi chiñee umimbeu wae. Jare jae umimbeuta oi iiru wae reta pe uyeyapikatu reta waerä ndei newäe mbowe,’ jei Tai pe.’ Jukuärái uyekuatía oi,” jei chupe reta.

<sup>11</sup>“Che tae pewe añetete wae, opaete kuimbae reta wi mbaeti kía nungawe imbaepuerete Juan upurumbisakambu wae wi. Erēitu taikue rupi Tumpa oi ma yawe opaete wae imburuwicha wasurä, ipotawe kía oi Tumpa ndiwe wae imbaepuereteta oi Juan wi. Jukuäräita ko, yepe tēi jae mbae’ä etei ko iiru wae reta pewarä aramoi,” jei Jesús chupe reta.

<sup>12</sup>“Juan upurumbisakambu wae umbipi Tumpa ñee umimbeu wiwe añawe rewa, jeta wae reta uñemee ma ñonoï Tumpa pe Tumpa iko waerä jae reta imburuwicha wasurä. Jare jukuärái uñemiái oo oi Tumpa imbaepuere mburuwicha wasu pewa. Erēi jeta jeko kachi wae reta uipota tēi oyopia reta,” jei.

<sup>13</sup>“Moisés jare iiru kuimbae Tumpa ñee arakae umimbeu wae reta uikuaaka yandewe kua ara reta rewa. Jare jukuärái uyapose reta Juan ou uwäe rewa,” jei chupe reta.

<sup>14</sup>“Yaikuaa kawi ñai, Tumpa ñeeriru pe jei ndei Upuruepi wae ou mbowe tenonde ou yeta rani Elías. Jare kua che jae pewe wae pipota perowia yawe, Juan ko jae

jokua Elías jei chupe wae Tumpa iñee arakae umimbeu wae reta jei outa iko wae,” jei.

15“Ipotawe kía uipota uikuaa kawi wae, tuyapisaka kua chiñee re,” jei chupe reta.

16“¿Mbae re ra chepuere ambijaanga añawe ñonoï wae reta? Jae reta ko jae sambiai reta uyuwanga ñonoï wae rami,” jei. “Jare jei ñonoï rami kuärái:

17‘Nduyemimbi ma pewe tēi, erēi pe reta pepirae’ä. Jare mbiatiti pe nduyao perowake, erēi pe reta piyao’ä ore ndiwe,’ jei reta. Jukuärái wi ko añawe rupi ñonoï wae reta wirirowa orewi ipotawe mbae che jare Juan nduyapo wae,” jei.

18“Echa’ä Juan ou yawe, jae jou’ä vino jare oñono teeñoi wi amokue ara reta ukaru mbae waerä. Jáeramo jei reta tēi jesewa: ‘Aña uyembiiya ma jese,’ jei reta tēi.

19Erēi che kuimbaerä ayeyapo wae akaru jare jau vino. Erēi jei reta tēi che rewa: ‘Mase, jokua kuimbae tuicha ukaru jare isawipose. Jare jae nunga wi uñemiiru jeko kachi wae reta ndiwe jare mburuwicha pewarä okowara wae reta ndiwe,’ jei reta. Erēitu opaete ore ndoporomboe wae rupi yureko wae reta uikuaata añetete ko oriñee arakuaa pewa,” jei Jesús chupe reta.

### **Jesús umbijeko mbapi tēta wasu reta**

*(Lucas 10.13-15)*

20Jayawe Jesús umbipi uñeengata jokua tēta wasu pewa reta pe kerupi rupi jae uyapo jeta mbaembae Tumpa imbaepuere rupi wae pe. Echa’ä yepe tēi uecha reta Tumpa imbaepuere Jesús rupi, erēi jesewe mbaeti ueya reta ipiyemingeta jupi mbae wae Tumpa rewa. Jesús jei:

21“Jokua tēta wasu Corazín jare Betsaida pewa reta, ¡ikuasi parawete reta!” jei. “Jeta mbaembae ayapo tēi ipite rupi Tumpa imbaepuere pe. Jukuärái moná ayapo yawe tēta wasu Tiro jare Sidón pe, arakaete ma ko jokua tēta wasu pewa reta ueyata tēi ipiyemingeta jupi mbae wae Tumpa rewa,” jei. “Jae reta omondeta tēi temimonde jaimbe wae mbiatiti pewa jare oñonota tēi reta tanimbu iñaka re, jukuärái jae reta uechaka waerä ipiatiti ko ñonoï jeko kachi re,” jei.

22“Jáeramo che tae pewe jokua ara iwi pewa reta uyemboi yawe Tumpa jowai Tumpa umbijeko reta waerä, Corazín jare Betsaida pewa reta tãtaete ye uiporarata ñonoï Tiro jare Sidón pewa reta wi,” jei.

23“Jare Capernaum pewa reta wirowia tēi Tumpa umbutuichata onoi reta. Erēi mbaetita jukuärái,” jei. “Jae reta uiporarata umanokue wae reta jenda pe, echa’ä yepe tēi che jeta ayapo mbaembae ipite rupi Tumpa imbaepuere pe, erēi jae reta wirowia’ä cheré. Jukuärái moná ayapo yawe arakae tēta wasu Sodoma pe, jae reta ueyata tēi ipiyemingeta jupi mbae wae Tumpa rewa jare Tumpa ndarau tēi opa umbái jae reta,” jei.

24“Jáeramo che tae pewe, jokua ara iwi pewa reta uyemboi yawe Tumpa jowai, Capernaum pewa reta tãtaete ye uiporarata ñonoï arakae Sodoma pewa reta wi,” jei chupe reta Jesús.



## Jesús uipota yaputuu waerä añetete pewa

(Lucas 10.21-22)

- <sup>25</sup>Joko wi Jesús umbipi uyerure Tumpa pe kuärái: “CheRu mii, nde ko jae ara pewa reta iYa jare iwi pewa reta iYa wi,” jei. “Che ambutuicha nderee, echa’ä kua mbaembae ndikuaaka ma sambiai reta pe, jare nemaño’ä iyarakuaa katu echa iyupe wae reta re uikuaa waerä,” jei.
- <sup>26</sup>“Jukuärái ndiyapo, cheRu, echa’ä jokua nembiyerowia ramo,” jei uyerure.
- <sup>27</sup>Jayawe Jesús jei wi joko pe ñonoï wae reta pe: “CheRu umee ma chewe mbaepuere opaete mbaembae re. Jaeño chekuaa kawi. Mbaeti ye kiawe chekuaa kawiete. Jae ramiño wi mbaeti kiawe uikuaa kawiete cheRu. Cheño aikuaa kawi. Jare jokua che aikuaaka chupe wae reta uikuaa wi,” jei chupe reta.
- <sup>28</sup>Jayawe Jesús jei wi chupe reta: “Opaete pekueri ye ma pepiatiti wae reta jare piyembipia’ä wae reta, peyu mii chekoti. Jare che pumbuputuuta,” jei chupe reta.
- <sup>29</sup>“Che añemimichi jare ayembutuicha’ä etei. Jáeramo piñemee mii chewe che pomboe waerä. Jare jukuärái piyapo yawe, peputuuta añetete pewa,” jei.
- <sup>30</sup>“Echa’ä chewe piyeyokui waerä, mbarawiki täta’ä etei ko. Jae ko pembipiawiwe pewa,” jei Jesús chupe reta.

## Mateo 12

### Jesús oporomboe mbutuu ara rewa

(Marcos 2.23-28; Lucas 6.1-5)

- <sup>1</sup>Pëti mbutuu ara Jesús oo iko pëti koo rupi jemimboe reta ndiwe. Jare uasa yureko reta rambuewe, jemimboe reta iyembaï, jare umbipi uipoo trigo jare jou reta.
- <sup>2</sup>Erëi amokue fariseo reta uecha, jare jei Jesús pe: “Mase, nderemimboe reta uyapo ñonoï Moisés arakae jei awiyeta ko yayapo tëi mbutuu ara pe wae,” jei reta.
- <sup>3</sup>Jayawe Jesús jei chupe reta: “¿Pemingeta’ä yerá Tumpa iñeeriru pe kërái arakaete David uyapo wae re?” jei chupe reta. “Pëti wese David jare jae ndiwe ñonoï wae reta iyembaiete.
- <sup>4</sup>Jayawe David uike tupao wakapi pewa pe jou waerä mbiyape reta Tumpa pewarä uñeño tee wae. Erëi Moisés arakae jei jaeño sacerdote reta ipuere jou jokua mbiyape. Erëi David jou, jare umee jae ndiwe yureko wae reta pe jae reta wi jou waerä,” jei chupe reta.
- <sup>5</sup>“Jare ¿pemingeta’ä yerá Moisés uikuatía wae pe kërái imeta ko amokue sacerdote reta uparawiki ñonoï tupao wasu pe mbutuu ara pe wi? Erëi yepe tëi jae reta uparawiki ara mbutuu pe, jesewe Tumpa umbijeko’ä reta jokua re,” jei.
- <sup>6</sup>“Jare che tae pewe, ime oï añawe pëti pepite pe wae jae ko ikawiete ye tupao wasu wi,” jei chupe reta.

<sup>7</sup>“Jae nunga wi Tumpa jei yandewe iñeeriru pe kuärái: ‘Che aipotaete ko piparareko waerä perapicha mbaemimba peru pemee chewe wae wi,’ jei. Erëi pe reta mbaeti chawaa pikuaa kawi kua Tumpa jei wae. Echa’ä añetete kua pikuaa kawi yawe, ndarau tēi pembijeko kua jeko mbae wae reta,” jei chupe reta.

<sup>8</sup>“Jayawe che kuimbaerä ayeyapo wae ime anoi mbaepuere jae waerä mbae ko yayapota mbutuu ara pe wae,” jei Jesús fariseo reta pe.

### **Jesús uminguera pēti kuimbae ipo jowaicho utini wae**

*(Marcos 3.1-6; Lucas 6.6-11)*

<sup>9</sup>Jayawe Jesús oē ye joko wi jare oo uike pēti tupao pe. Jare jeta ma ime joko pe uyembati ñonoï.

<sup>10</sup>Jare joko pe oï wi pēti kuimbae ipo jowaicho utini wae. Jayawe amokue fariseo reta upirandu Jesús pe: “Tumpa jei wae rupi, ¿yandepuere pa yapuruminguera mbutuu ara pe?” jei reta chupe. Jukuärái upirandu reta ipuere waerä tēi umbijeko reta Jesús jae mbae jei wae re.

<sup>11</sup>Jayawe Jesús jei chupe reta: “Ime yawe penoi pēti owecha, jare jokua owecha oa yawe iwikua pe mbutuu ara pe, ¿mbae ra piyapota pe reta? Pipisi woita ko penoe waerä iwikua wi,” jei.

<sup>12</sup>“Erëi yande ikawiete ye ko owecha reta wi. Jáeramo yayapo yawe ikawi wae mbutuu ara pe, yayaw’ä ko ñaï Tumpa iñeeriru pe jei wae,” jei chupe reta.

<sup>13</sup>Jayawe Jesús jei kuimbae ipo jowaicho utini wae pe: “Emisimi ndepo,” jei chupe. Jayawe kuimbae ipo umisimi jare ukuera woi. Oyowake ma oï ipo jowaicho ikawi wae ndiwe.

<sup>14</sup>Jayawe fariseo reta opa oē joko wi, jare umbipi uyemboemboe reta kërái rupi ipuere uyukaka waerä Jesús.

<sup>15</sup>Erëi Jesús uikuaa chuwi reta mbae uipota uyapo reta wae; jáeramo oē oo ye chuwi reta.

### **Jesús ko jae Tumpa uiparawo wae**

Jare jeta wae reta yuraa jupie, jare Jesús uminguera opaete imbaerasi wae reta jae reta ipite pe.

<sup>16</sup>Jare jae jei chupe reta: “Awiye pikuaaka kía pe awe kua che rewa,” jei chupe reta.

<sup>17</sup>Kua mbaembae uyapo Jesús uyeyapo waerä kërái arakaete Tumpa jei wae rupi. Echa’ä Tumpa jei iñee umimbeu wae Isaías jee wae rupi Upuruepi wae rewa kuärái:

<sup>18</sup>“Mase, ko oï aiparawo wae. Jae ko cherai uyeyokui chewe wae,” jei Tumpa. “Auete, jare jae chembiyerowiaete. Ameeta aï chupe cheEspíritu, jare jae uikuaakata oï judío mbae wae reta pe wi kërái jae reta ipuere waerä ñonoï cherowai jeko mbae wae rami.

<sup>19</sup>Jae ndarau uyeaka kía ndiwe awe, jare ndarau wi uñee kía pe awe calle rupi.

<sup>20</sup>Amokue wae reta ipiräta'ä etei Tumpa koti pëti takuaräsi uyeka wae rami. Erëi jokua nunga reta re jae uipararekoeteta umae. Jare amokue wae reta ikuasi ñonoï. Jae reta pëti mechero michi rai mii jendi oï wae rami ko. Erëi jae omborita oï jokua nunga reta. Jukuärái jae uyapota oo oï Tumpa oï ma opaete wae imburuwicha wasurä rewä.

<sup>21</sup>Jare jeta judío mbae wae reta wi wirowiata jese.” Jukuärái jei arakae Tumpa Upuruepi wae rewä.

### **Mburuwicha reta umbijeko tēi Jesús**

*(Marcos 3.20-30; Lucas 11.14-23, 12.10)*

<sup>22</sup>Jayawe amokue wae reta ueru Jesús pe pëti kuimbae añä uyembiiya jese wae. Kua kuimbae parawete jesa'ä jare iñee mbae wi. Jayawe Jesús omoë chuwi añä jare uminguera. Jayawe jokua kuimbae umbipi ye umae kaw i jare uyemingeta kaw i wi.

<sup>23</sup>Jare opaete joko pe ñonoï wae reta ipiakañiete upita, jare jei reta iyupe: “¿Jae ra ko kua David iñemoñaa pewa mburuwicha wasurä ikota wae?”

<sup>24</sup>Jare fariseo reta kua uyandu yawe, jei reta iyupe: “Añawasu imbaepuere rupi ko kua kuimbae omoë oï añä reta kuimbae reta wi,” jei tēi reta.

<sup>25</sup>Jare Jesús uikuaa chuwi reta ipiyemingeta, jare jei chupe reta: “Pëti iiw i pewái oyowaicho reta yawe jae yepái, opata ko uyererukachi reta. Jare jukuäräita wi ko tēta wasu pewa reta ani pëti ñetära reta oyowaicho yawe jae yepái,” jei.

<sup>26</sup>“Jayawe Satanásndarau jaei uñemoë kuimbae wi. Echa'ä jukuärái yawe, Satanás jare añä reta opata tēi uyembiyao tee tee oyowaicho waerä jae yepái, jare opata tēi uyererukachi reta,” jei chupe reta.

<sup>27</sup>“Pe reta pere tēi chewe che amoë aï añä reta uyembiiya jese wae reta wi Añawasu imbaepuere rupi. Erëi peremimboe reta jae nunga wi omoë ñonoï añä uyembiiya jese wae reta wi. Jayawe, ¿kía imbaepuere pe pa jae reta jokua uyapo ñonoï? Pepirandu chupe reta. Jae reta jei wae rupi pikuaata ko peï piyaw i ma jokua mbae pere peï chekoti wae,” jei chupe reta.

<sup>28</sup>“Añetete Tumpa iEspíritu imbaepuere pe ko che amoë aï añä uyembiiya jese wae reta wi. Jáeramo añawe pecha peï Tumpa imbaepuere mburuwicha wasu pewa pepite rupi oï,” jei Jesús fariseo reta pe.

<sup>29</sup>“Jae nunga wi ime yawe kía uipota uike kuimbae ipiräta wae jēta pe upiro waerä chuwi imbaembae, jae uipokua ranita ko jokua kuimbae ipiräta wae. Jayawe ramo jae ipuereta upiro chuwi imbaembae,” jei. “Jare jukuärái wi che mbaeti yawe tenonde amiamiri añä reta itenondewa Añawasu, ndarau chepuere amoë añä reta. ¿Kēräita ra chepuere jayawe amoë añä reta kía wi Añawasu imbaepuere pe?” jei Jesús chupe reta.

30“Yande reta ñañeräro ko ñai Añawasu koti. Jare ipotawe kía uyemboya’ä che ndiwe ñeräro pe wae, oyowaicho ko oi chekoti. Jae ramiño wi kía uipota’ä mbarawiki pe chemiiru wae, chembiawái ko oi,” jei chupe reta.

31“Jáeramo che tae pewe, piyandareko kawi piyé kërái piyemingetata wae re. Echa’ä kua iwi pe ime opa kërái rái rupi Tumpa koti uyawi reta wae, jare jeta wae reta uyemingeta kachi Tumpa koti,” jei. “Tumpa ipuereta jokua umbái chuwi reta. Erëi ime yawe kía uyemingeta kachi Espiritu Santo koti wae, Tumpa ndarau umbái chuwi jokua,” jei.

32“Jare che kuimbaerä ayeyapo wae, ime yawe kía mbae kachi jei chekoti wae, Tumpa ipuereta umbái chuwi jokua mbae kachi wae. Erëi ime yawe kía uyemingeta kachi Espiritu Santo koti wae, Tumpa ndarau umbái chuwi jokua. Jukuärái ko añawe rupi jare jaeño mái pewa wi,” jei chupe reta.

### **Yayandareko kawi yandiyé mbae yae wae re**

33Jare Jesús jei wi fariseo reta pe umbijaanga rewe: “Yaikuaa pëti iwira ikawi wae, ía ikawi wi. Jae ramiño wi pëti iwira ikawi’ä wae, ía ikawi’ä wi. Echa’ä ía rupi yaikuaa jokua iwira ikawi ra ani ikawi’ä ra,” jei chupe reta.

34“¿Këraita ra jayawe pe pepurumbitawi wae reta pepuere pemoë ñee ikawi wae? Ndarau pepuere, echa’ä pepia kachi oi. Yande pëti pëti wae yandepia pe oi wae rupi ko yayemingeta,” jei.

35“Jayawe kía ipia ikawi oi wae onoi mbae ikawi wae ipia pe, jare joko wi omoë iñee ikawi wae,” jei. “Jare kía ipia ikawi’ä oi wae onoi ipia pe mbae ikawi mbae wae, jare joko wi omoë iñee ikawi mbae wae,” jei chupe reta.

36“Jare che tae pewe jokua ara iwi pewa reta uyemboi yawe Tumpa jowai jae jei waerä jae reta jeko rewa, Tumpa umbijekota reta ipotawe ñee uyemingeta pochiño wae rupi wi.

37Jáeramo pe reta pëti pëti piyemingeta wae rupi ko Tumpa jeita pewe teko pe pei wae, ani mbaeti teko pe pei wae,” jei Jesús fariseo reta pe.

### **Judío itenondewa reta uipota tõi omboporowa Jesús imbaepuere**

*(Marcos 8.11; Lucas 11.29-32)*

38Jayawe amokue kuimbae Moisés uikuatía wae re oporomboe wae reta jare fariseo reta jei Jesús pe: “Oporomboe wae, añetete Tumpa nembou yawe, jayawe yaecha iyapo orewe mbae tuicha wae Tumpa imbaepuere pe,” jei reta chupe.

39Jayawe Jesús jei chupe reta: “Pe reta añawe pei wae reta, pereko kachi ko jare jupi’ä ma ko pei Tumpa koti,” jei chupe reta. “Pipota tõi ayapo waerä pewe mbae tuicha wae Tumpa imbaepuere pe jukuärái aechaka waerä pewe Tumpa ko chembou wae. Erëi jaeño uasata oi kërái Tumpa iñee arakae umimbeu wae Jonás pe uasa wae rami,” jei chupe reta.

40“Echa’ä kërái Jonás iko mbapí ara jare mbapí piare jokua pira wasu jie pe, jukuärái wi che kuimbaerä ayeyapo wae äíta mbapí ara jare mbapí piare teöwerenda pe,” jei chupe reta.

41“Jare uwäe yawe ara piyemboi waerä Tumpa jowai, arakae tëta wasu Nínive pewa reta pembijekota ñonoï, pe añawe peï wae reta,” jei chupe reta. “Echa’ä arakae rupi Jonás umimbeu yawe chupe reta Tumpa iñee, jae reta opa woi ueya ipiyemingeta jupi mbae wae Tumpa rewa. Erëi pe reta piyapo’ä ko jae reta uyapo wae rami, yepe tëi chembaepuere tuichaete ye ko Jonás imbaepuere wi,” jei chupe reta.

42“Jae ramiño wi, uwäe yawe ara piyemboi waerä Tumpa jowai, imeta ambie wae pembijeko oï wi, pe añawe peï wae reta,” jei chupe reta. “Jae ko kuña mburuwicha wasu arakae iko sur koti wae. Echa’ä jae ou mbiriete ye wi uyapisaka waerä mburuwicha wasu Salomón iyarakuaa re. Erëi yepe tëi che chearakuaa katuete ye ko Salomón wi, erëi pe reta piyapisaka’ä chiñee re,” jei Jesús chupe reta.

### **Jesús umbijaanga judío reta kuimbae añä uyembiiya jese wae re**

*(Lucas 11.24-26)*

43“¿Mbae re ra chepuere pumbijaanga, pe pereko kachi wae reta?” jei chupe reta. “Pe reta ko jae kuärái: Pëti añä oë ma yawe kuimbae uyembiiya jese wae wi, jokua añä oo iwi utini wae rupi ueka kiape iko waerä tëi. Erëi uwäe’ä chupe.

44Jayawe jei iyupe: ‘Taa ye kuimbae aikose jese wae re,’ jei. Jayawe añä oo ye uwäe yawe jokua kuimbae oï wae pe, uecha kuimbae pëti tëta ipo’ä oï wae rami, jare uyeyapikatu kawi oï wae rami, jare uyeyoe kawi wae rami,” jei.

45“Jayawe añä oo ye ueru ñru chiu añä reta kachiete chuwi wae yureko waerä jokua kuimbae re. Jare juri rewe uike reta yureko waerä jokua kuimbae re,” jei. “Tenonde yawe, pëtiño añä uyembiiya jese yawe, jokua kuimbae uiporarase. Erëi añawe rupi oete ye ma uiporara parawete,” jei. “Jare jukuärái rami wi ko uasata oï pewe, pe pereko kachi añawe peï wae reta.” Jukuärái jei Jesús jokua mburuwicha reta pe.

### **Jesús ichi jare tiwi reta ou ueka reta Jesús**

*(Marcos 3.31-35; Lucas 8.19-21)*

46Jare Jesús umingeta iko rambuwe joko pe ñonoï wae reta, jae ichi jare tiwi reta yuweru uwäe. Jae reta uipota tëi uyemingeta Jesús ndiwe, erëi oka pe upita reta o pe tinee iko ramo.

47Jayawe pëti wae jei Jesús pe: “Ndesi jare nderiwi reta oka pe ñonoï. Uipota uyemingeta reta nde ndiwe,” jei chupe.

48Jayawe Jesús jei chupe: “¿Kía reta ra ko jae chesi jare cheriwi reta?” jei chupe.

49Jayawe upuwëe jemimboe reta koti, jare jei: “Kua nunga reta ko jae chesi jare cheriwi reta.

50Echa’ä cheRu ara pe oï wae jei wae uyapo wae reta ko jae cheriwi reta jare cherindi reta jare chesi,” jei chupe reta.

## Mateo 13

### Jesús umbijaanga kuimbae umaeti wae re

(Marcos 4.1-9; Lucas 8.4-8)

- 1 Jokua ara etei Jesús oë oo tēta wi jare oo uwapi ipa wasu jembei pe.
- 2 Jare joko pe jetaete ye yuweru uyembati reta jare ipuere oyopi ye reta Jesús. Jáeramo jae oo uyupi pēti chalana pe jare uwapi. Jare uyembati wae reta uyemboi ipa wasu jembei rupi.
- 3 Jayawe i jembei seri wi Jesús omboe reta jeta mbaembae umbijaanga rewe. Jei chupe reta kuārái: “Pēti kuimbae oo umaeti waerä.
- 4 Jare umiái temiti yawe, amokue oa tape rai rupi. Jayawe yuweru wira reta opa jou,” jei chupe reta.
- 5 “Īru temiti oa itapite rupi mbowiño iwi wireko wae re. Kua reta imambae jeñi, jeta’ä iwi chupe ramo.
- 6 Erëi jaikue rupi warasi jasi yawe, opa ipiru japo kipe’ä iko ramo,” jei.
- 7 “Īru temiti oa ñurätipite pe. Jare ñuräti ukuakuaa ma yawe, opa umbuputupa temiti,” jei.
- 8 “Erëi ĩru temiti oa iwikawi pe. Jokua reta jeñi kawi, ukuakuaa, jare ía. Amokue jetaete ye ía, jare ĩru reta jeta katu ía, jare ĩru reta mbowiño ía.” Jukuārái Jesús jei chupe reta umbijaanga rewe.
- 9 Jare jei wi chupe reta: “Ipotawe kía uipota uikuaa kawi wae, tuyapisaka kua chiñee re,” jei chupe reta.

### Maera Jesús oporomboe umbijaanga rewe

(Marcos 4.10-12; Lucas 8.9-10)

- 10 Jayawe Jesús jemimboe reta yuweru upirandu chupe: “¿Maera pa nemboe reta nembijaanga rewe?” jei reta chupe.
- 11 Jayawe Jesús jei chupe reta: “Tumpa imbaepuere mburuwicha wasu pewa umbipi ma uyekuaa kua iwi pe. Jare jokua re ko che amimbeu aĩ,” jei. “Tenonde yawe Tumpa uikuaaka’ä kía pe awe kua mbaembae rewa. Erëi añawe uñemee ma pewe pikuaa kawi waerä. Erëi ĩru wae reta pe uñemee’ä uikuaa waerä.
- 12 Echa’ä ime yawe kía uyapisaka kawi jare wirowia chiñee re wae, uñemiiruta chupe iyarakuaa. Jae iyarakuaa katuta ko. Erëi ime yawe kía uipota’ä uyapisaka añetete re wae, jokua jae uikuaa tēi michi mii yepe chiñee wae, jokuawe uñepirota chuwi,” jei chupe reta.
- 13 “Jare jae reta uipota’ä uikuaa añetete rewe ramo, jokua jeko pewa che amingeta reta ambijaanga rewe. Jukuārái uechata tēi reta che mbaembae ayapo wae jare uyanduta tēi reta chiñee, erëi ndaraúi uikuaa kawi reta,” jei.

14“*Añetete, uyeyapo ma chupe reta kërái arakae Tumpa iñee umimbeu wae Isaías jei wae rupi. Echa’ä arakaete rupi jae jei jokua nunga reta rewa kuärái: “Tumpa jei: ‘Uyanduta tõi reta chiñee, erõi uikuaata’ä etei reta. Uechata tõi reta che mbaembae ayapo wae, erõi ndarau uikuaa kawi reta.*

15*Echa’ä jae reta ipiatäta uyeyapo chekoti. Iyapisa oyopi reta awiye waerä uyandu chiñee. Jare usapimi reta awiye waerä uecha mbaembae ayapo wae. Erõi jae reta moná uyandu chiñee yawe jare uecha reta ayapo wae yawe, ipia rewe uikuaa kawita reta jare uyerowata reta chekoti che aepi reta waerä,’ jei Tumpa.” Jukuärái jei Isaías,” jei Jesús chupe reta.*

16“*Erõi pe cheremimboerä piko wae reta, piyekouete pei, echa’ä pikuaa kawi pei kua pecha wae re jare piyandu wae re,” jei chupe reta.*

17“*Che tae pewe añetete wae, ime iko jeta Tumpa iñee arakae umimbeu wae reta jare kuimbae jupi wae reta uipotaete tõi uecha mbaembae pe reta pecha pei wae, jare uipotaete tõi uyandu reta mbaembae pe reta piyandu pei wae. Erõitu ipuere’ä uecha reta jare uyandu’ä reta wi,” jei Jesús jemimboe reta pe.*

### **Jesús umiesäka kuimbae umaeti wae rewa**

*(Marcos 4.13-20; Lucas 8.11-15)*

18“*Jayawe piyapisaka kawi mii chiñee re amiesäka pewe rambuwe jokua kuimbae umaeti wae rewa,” jei chupe reta.*

19“*Añawe rupi uyemimbeu oï ñee kërái kía ipuere waerä oï Tumpa ndiwe, Tumpa oï ma yawe opaete wae imburuwicha wasurä jaeño mái pewa. Jare kía kua ñee uyandu yawe, erõi uikuaa kawi’ä yawe jokua uyandu wae, jayawe ou Añawasú jare opa umiakañika Tumpa iñee wi. Jokua re ko umbijaanga yandewe tape rai rupi oa temiti wae,” jei chupe reta.*

20“*Jae nunga wi amokue temiti oa itapite rupi mbowiño iwí wireko wae re,” jei. “Kua uyembijaanga oï ñru wae Tumpa iñee uyandu wae re. Kua nunga jaeramo uyandu yawe, jupiwoiño uyapisaka jese uyerowia rewe,” jei.*

21“*Erõi Tumpa iñee uyembijapo kawi’ä ipia pe ramo, imambae ikueri. Yembiawái ou chupe yawe, jare ñru wae reta uyapo ikawi mbae wae chupe yawe Tumpa iñee re wírowia jeko pewa, jayawe jupiwoiño opia Tumpa jape wi,” jei chupe reta.*

22“*Jae nunga wi amokue temiti oa ñurätipite pe. Kua uyembijaanga oï ñru wae Tumpa iñee uyandu wae re,” jei. “Kua nunga uyandu Tumpa iñee, erõi umbipi uyembipia’ä mbaembae iwí pewa reño. Jare uyembitawi, echa’ä uipota ikokatu ramo. Jare opaete kua mbaembae umiakañika Tumpa iñee wi. Jáeramo ndarau uyekuaa jese Tumpa jeko ikawi wae,” jei chupe reta.*

23“*Erõi amokue temiti oa iwíkwai pe. Kua iwí ikawi wae uyembijaanga oï kía Tumpa iñee uyandu wae jare uepiti kawi oï wae re,” jei. “Jare Tumpa iñee uyembijapo kawi oï ipia pe ramo, uyekuaa jese Tumpa jeko ikawi wae. Amokue reta re uyekuaa kawi Tumpa jeko ikawi wae. ñru wae reta re uyekuaa kawiete, jare*

iru wae reta re uyekuaa kawiete ye,” jei. “Jukuärái ko ambijaanga rewe jae pewe wae,” jei Jesús jemimboe reta pe.

### **Jesús umbijaanga trigo jare kapii trigo echa wae re**

**24**Jesús uyemingeta ye umbijaanga rewe uyembati wae reta pe. Jei chupe reta: “Tumpa oï ma yawe opaete wae imburuwicha wasurä jaeño mái pewa, umbisirita kía kía jae imaerä iko wae reta iru wae reta ipite wi. Yambijaanga. Pëti kuimbae oñotika iko pe trigo ikawi wae,” jei.

**25**“Erëi pïtu yawe, opaete wae oke yureko rambuewe, jokua kuimbae jowaicho ou oñoti trigo ipite rupi kapii ikawi mbae wae trigo echa wae. Jare opa oñoti yawe, oo ye,” jei.

**26**“Jayawe trigo ukuakuaa jare ía. Erëi ukuakuaa wi jokua kapii trigo echa wae trigo ipite rupi,” jei.

**27**“Jáeramo jokua kuimbae ipione reta yuweru jei chupe: ‘Karái, ¿ñañoti’á yerá temiti ikawi wae ndeko pe? Erëi añawe koo pe ukuakuaa oï wi kapii ikawi mbae wae. ¿Kía wi ra oë oï jokua?’ jei reta,” jei.

**28**“Jayawe karái jei chupe reta: ‘Cherowaicho ko aipo ou oñoti wiari,’ jei. “Jayawe ipione reta upirandu chupe: “¿Ndipota pa ndoo nomondoro waerä jokua kapii?’ jei reta.

**29**“Erëi karái jei chupe reta: ‘Awiye pemondoro. Echa’ä pemondoro yawe kapii, aramoi pemondorota peï wi jokua trigo ikawi wae jokua kapii ndiwe,’ jei.

**30**“Tukuakuaa päwe mokui rewe trigo yaipoo rewa. Jare yaipoo yawe, jayawe ramo jaeta uipoo wae reta pe, ‘Pembati rani kapii jare piyokua peapi waerä. Erëi pembati trigo o pe yambiru yaupi waerä,’ jaeta chupe reta kuri,’ jei koo iya.” Jukuärái Jesús jei chupe reta.

### **Jesús umbijaanga mostaza jäikue re**

*(Marcos 4.30-32; Lucas 13.18-19)*

**31**Jayawe Jesús omboe ye umbijaanga rewe uyembati wae reta. Jei chupe reta: “Yandepuere yambijaanga kërái Tumpa imbaepuere mburuwicha wasu pewa jekuaeño ukuakuaa oo oï. Jae ko pëti mostaza jäikue rai mii kuimbae oñoti iko pe wae rami,” jei.

**32**“Echa’ä jokua jäikue michi raiete ko opaete iru temiti reta wi. Erëi oñoti ma yawe, jare ukuakuaa ma yawe, tuichaete uyeyapo opaete iru temiti reta koo pewa wi. Uyeyapo ko pëti iwira. Jare wira reta ipuere uyapo jaitirä jäka rupi,” jei chupe reta.

### **Jesús uyapo yembijaanga levadura re**

*(Lucas 13.20-21)*

**33**Jare Jesús uyemingeta ye umbijaanga rewe uyembati wae reta pe. Jei chupe reta: “Jae nunga wi yandepuere yambijaanga ye kërái Tumpa imbaepuere mburuwicha wasu pewa jekuaeño uyekuaa oo oï. Jae ko levadura kuña umbiyea jeta katu harina



ndiwe wae rami,” jei. “Echa’ä kuña opa ma masa omona kawi yawe, levadura opa ma uyembiyea kawi opaete masa rupi,” jei chupe reta.

### **Maera Jesús oporomboe umbijaanga rewe**

*(Marcos 4.33-34)*

**34**Jukuärái ko Jesús jei jeta mbaembae umbijaanga rewe uyembati wae reta pe. Mbae nunga ñee awe jei’ä umbijaanga mbae rewe.

**35**Jukuärái uyapo opa uyeyapo waerä Tumpa ñee arakae umimbeu wae jei wae rupi. Echa’ä jae umimbeu Upuruepi wae uyapota iko wae rewa kuärái: “Che ayemingetata ambijaanga rewe. Aikuaakata chupe reta mbaembae iwi uyembipi wiwe uyekuaa mbae wae.” Jukuärái jei.

### **Trigo jare kapii ikawi mbae wae re uyembijaanga wae**

**36**Jayawe Jesús usiri uyembati wae reta wi, jare uike o pe. Jare jemimboe reta yuweru ikoti jare jei reta chupe: “Nemimbeu orewe nembijaanga rewe jokua koo pe kapii trigo echa oï wae rewa. Erëi ore nduepiti kawi’ä. Ikuaka mii orewe mbae ra ko uipota jei,” jei reta.

**37**“Jaikó,” jei Jesús. “Jokua temiti ikawi wae oñotika wae uyembijaanga oï che kuimbaerä ayeyapo wae re,” jei.

**38**“Jare jokua koo uyembijaanga oï opaete iwi re. Jare trigo ikawi wae uyembijaanga oï kía reta ikota Tumpa ndiwe wae re, Tumpa oï ma yawe opaete wae imburuwicha wasurä jaeño mái pewa. Jae reta ko Tumpa tai reta. Jare kapii ikawi mbae wae uyembijaanga oï jokua uyeyokui Añawasu pe wae reta re. Jae reta ko jae Añawasu tai reta.

**39**Jare koo iya jowaicho kapii oñoti wae uyembijaanga oï Añawasu re etei. Jare mbaepoo uyembijaanga oï ara taikuewa re. Jare umbaepoo wae reta uyembijaanga oï araiwa reta re,” jei chupe reta.

**40**“Jayawe pemandúa peï jokua che jae pewe wae re. Opa ma uipoo reta yawe, umbati jare opa uapi reta tata pe jokua kapii ikawi mbae wae. Jukuärái rami ko uasata oï wi ara taikuewa pe,” jei.

**41**“Echa’ä che kuimbaerä ayeyapo wae abouta chearaiwa reta umbisiri waerä cheré wirowia wae reta ipite wi opaete kía japicha pe uyawika Tumpa kotu wae reta jare ikawi mbae wae uyapo wae reta,” jei.

**42**“Jare joko wi araiwa reta omombota tata wasu pe kiate uyaota tēi reta jare jäi umbikiriuta reta ikuasi katueete ñonoï ramo,” jei.

**43**“Jare jayawe ramo yandeRu Tumpa oïta opaete wae imburuwicha wasurä jaeño mái pewa. Jare jayawe ramo jae imbaepuere jembipete ye wae uyekuaata jokua jupi wae reta re,” jei. “Uipota uikuaa kawi wae, tuyapisaka kawi kua chiñee re,” jei Jesús jemimboe reta pe.

### **Mbae ikawiete wae uñeñoti oï iwi pe wae rewa**

<sup>44</sup>Jare Jesús jei wi chupe reta: “Jae nunga wi kía onoi yawe Tumpa imburuwicha wasurä, jokua ikawieteta ko ipotawe ñru mbaembae wi. Jae ko mbae ikawiete wae jare jepiete wae kía arakaete oñoti ñwi pe wae rami,” jei. “Jare kía uwäe chupe yawe, jupiwoiño oñoti ye awiye waerä ñru wae uecha. Jayawe uyerowia rewe oo owaka opaete imbaembae korepotirä owa waerä iyupe jokua ñwi. Jare jukuärái jokua mbae jepiete wae ikota jae imaerä,” jei chupe reta.

### **Ita ipöraete wae rewa**

<sup>45-46</sup>“Jae nunga wi yandepuere yambijaanga pëti kuimbae ita ipöra wae owaka wae re. Jae oo ueka kía ita ipöra wae reta ime onoi wae owa waerä chuwi jare owaka yuapi ye waerä iyupe. Jare uwäe yawe pëti ita ipöraete ye wae jare jepiete wae, uipota onoi imaerä. Jáeramo oo owaka opaete imbaembae korepotirä owa waerä iyupe. Jukuäraiete wi ko kía onoi yawe Tumpa imburuwicha wasurä, jokua ikawiete ye ko ipotawe ñru mbaembae wi,” jei chupe reta.

### **Jesús umbijaanga pisa omboa pira wae re**

<sup>47</sup>“Jae nunga wi Tumpa oï ma yawe opaete wae imburuwicha wasurä jaeño mái pewa, jae oñono teeta kía kía jae imaerä iko wae reta ñru wae reta ipite wi. Yambijaanga. Pira uipisi wae reta omombo pisa ñ wasu pe jare uipisi reta jeta opa yea yea pira reta,” jei.

<sup>48</sup>“Jare pisa tinee ma yawe, umiata reta ñ wasu jembei pe. Jayawe jae reta uwapi joko pe jare umbiru pira tuicha kawu wae reta urupuku pe, jare pira ikawi’ä yau waerä wae reta opa omombo,” jei.

<sup>49</sup>“Jare jukuärái rami ko wi uyeyapota oï ara taikuewa pe. Echa’ä jokua ara yuweruta araiwa reta umbisiri waerä mbae ikawi mbae wae uyapo wae reta jupi wae reta ipite wi,” jei.

<sup>50</sup>“Jare joko wi omombota reta tata wasu pe kiape uyaota tēi reta jare jäi umbikiririuta reta ikuasi katuete ñonoï ramo,” jei chupe reta.

### **Jesús umbijaanga mbaembae ipiau wae jare indechi wae re**

<sup>51</sup>Jayawe Jesús upirandu jemimboe reta pe: “¿Opaete kua mbaembae reta pepiti kawu ma pa pei?” jei chupe reta. “Nduepiti kawu ma, oreYa,” jei reta.

<sup>52</sup>Jayawe Jesús jei wi chupe reta: “Jayawe aipota wi pikuaa kawu waerä ñru mbae. Ime yawe kía ima ma uyemboe Tumpa ñnee re wae, jare uyemboe ma wi kërái onoi waerä Tumpa imburuwicha wasurä wae, jae ko pëti tēta iya rami. Echa’ä tēta iya ime joo pe onoi mbaembae ikawi wae upi oï wae – jae ko mbaembae ipiau wae jare indechi wae. Jare mokui rewe re ipuere uyekou.” Jukuärái jei Jesús jemimboe reta pe.

### **Jesús jētáíwa reta wirowia’ä jese**

*(Marcos 6.1-6)*

<sup>53</sup>Jayawe Jesús opa ma jei yawe kua umbijaanga rewe, oo ye joko wi.

<sup>54</sup>Jare oo jētara reta koti, tēta wasu Nazaret jee wae pe. Jare oo uwāe yawe joko pe, oporomboe tupao pe. Jare uyapisaka jese wae reta ipiakañi jare jei reta iyupe: “¿Kiape ra oo uyemboe kua kuimbae iyarakuaa katu waerä? ¿Kērái ra ipuere uyapo mbaembae kiawe ipuere’ä uyapo wae?” jei reta.

<sup>55</sup>“¿Jae’ä yerá carpintero tai jare María imembirae? ¿Jae’ä yerá Jacobo, José, Simón, jare Judas tikei?

<sup>56</sup>Jare opaete jindi reta wi yureko yandepite rupi. Kua pochi ñaneiru tēi ko. ¿Kērái ra jae ime onoi arakuaa jare mbaepuere?” jei reta iyupe.

<sup>57</sup>Jáeramo jae reta uyembiarasi jare wirōro reta Jesús. Jayawe Jesús jei chupe reta: “Pēti kuimbae Tumpa iñee umimbeu wae ikotiā oī yawe, jeta wae reta umae kawi jese jare uyapisaka reta jese,” jei. “Erēi jēta pe oī yawe jētáíwa reta jare jētara reta ipite pe, uyapisaka’ä reta jese,” jei chupe reta.

<sup>58</sup>Jayawe wirōwia’ä reta Jesús re jeko pewa, Jesús uyapo’ä joko pe jeta mbaembae Tumpa imbaepuere pe.

## Mateo 14

### Juan upurumbisakambu wae imano rewa

(Marcos 6.14-29; Lucas 9.7-9)

<sup>1</sup>Jokua ara reta rupi jeräkua mburuwicha wasu Herodes pe Jesús mbaembae uyapo wae.

<sup>2</sup>Jayawe jae jei uyeyokui chupe wae reta pe: “Jokua Jesús, jae ko aipo Juan upurumbisakambuse wae aramoi ikowe ye ma ou umanokue wae reta ipite wi. Jáeramo ko uyapo oī kua mbaembae kiawe ipuere’ä uyapo wae,” jei chupe reta.

<sup>3-4</sup>Echa’ä Herodes etei ko uyukaka Juan. Kua uyeyapo kuärái: Tenonde yawe Herodes umenda tiwi Felipe jembireko Herodías jee wae ndiwe. Jare Juan umbieta Herodes pe jare jei chupe: “Kua nemenda nderiwi jembireko ndiwe wae, ikawi’ä etei ko Tumpa jowai,” jei chupe. Jayawe Herodes uipisika Juan uñapitika jare oñonoka peresoriru pe umbiyerowia waerä jembireko Herodías.

<sup>5</sup>Jare yepe tēi Herodes uipota uyukaka Juan, erēi uyapo’ä. Echa’ä opaete wae reta wirōwia Tumpa ko ombou Juan umimbeu waerä ñee chuwi etei ou wae. Jare Herodes ukiye chuwi reta ramo, uyukaka’ä Juan.

<sup>6</sup>Jayawe uwāe Herodes iara. Jare jae uparea jeta wae reta pe yuweru ukaru waerä jae ndiwe. Jayawe Herodías imembi kuña uike upirae chupe reta, jare Herodes uyerowia umae jese.

<sup>7</sup>Jáeramo jei chupe: “Che tae ndewe Tumpa jowake, ameeta ndewe ipotawe mbae ndeka chewe wae,” jei chupe.

<sup>8</sup>Jayawe kuñatái jei Herodes pe: “Emee chewe Juan upurumbisakambu wae iñäka pēti karúa pe,” jei chupe. Jukuärái jei kuñatái, echa’ä ichi omboemboe ma jukuärái jei waerä.

<sup>9</sup>Jayawe mburuwicha wasu tuicha rupi ipiatiti tēi. Erēi Tumpa jowake jei chupe ramo, jare ĩru wae reta uyandu ramo, omondo pēti sindaro uyapo waerā kuñatái jei wae.

<sup>10</sup>Jayawe oo sindaro peresorĩru pe uyayuasía Juan kisepuku pe.

<sup>11</sup>Joko wi ueru ĩñākakue pēti karúa pe jare umee kuñatái pe. Jare kuñatái wĩraa umee yuapi ye ichi pe.

<sup>12</sup>Jayawe Juan jemimboe reta kua uikuaa yawe, yuweru jare wĩraa oñoti reta waerā Juan jetekue. Joko wi yuraa umimbeu reta Jesús pe.

### **Jesús umingaru jeta wae reta Tumpa imbaepuere rupi**

*(Marcos 6.30-44; Lucas 9.10-17; Juan 6.1-13)*

<sup>13</sup>Jare Jesús uyandu yawe Juan imano rewa, oo uyupi pēti chalana pe jare oo kii ngatu wae pe. Erēi jeta wae reta uikuaa kiape Jesús oo oĩ wae. Jayawe jae reta yuraa Jesús jaikue ĩwi rupi etei tēta wasu rai reta wi.

<sup>14</sup>Jayawe Jesús oo uwāe ĩpa wasu jembei pe jare uweyi chalana wi. Jare uecha jeta wae reta ime ma yepe joko pe ñonoĩ. Jare tuicha rupi uiparareko umae jese reta. Jáeramo uminguera imbaerasi wae reta joko pe.

<sup>15</sup>Jayawe pītuta ma oĩ yawe, Jesús jemimboe reta yuweru jei chupe: “Mbaeti tēta kua rupi, jare kaaru ma oĩ,” jei reta. “Emondo kua jeta wae reta kiape ime tēta wae rupi owa reta waerā jembiurā. Echa’ā mbaeti mbae jou reta waerā kua pe,” jei reta.

<sup>16</sup>Jayawe Jesús jei chupe reta: “Awiye too reta,” jei. “Pe reta etei ko pemeeta chupe mbae jou reta waerā,” jei chupe reta.

<sup>17</sup>“Ndarau orepuere,” jei reta. “Jaeño kua pe ime nonoi pandepo mbiyape jare mokui pira chariki mii,” jei reta chupe.

<sup>18</sup>Jayawe Jesús jei chupe reta: “Peru chewe kua pe. Yaecha,” jei.

<sup>19</sup>Jayawe ueru reta ma yawe chupe, Jesús jei joko pe ñonoĩ wae reta pe uwapi waerā kapiichape re. Jayawe uipisi jokua pandepo mbiyape jare mokui pira. Jare umae ara koti jare umee yasurupái Tumpa pe jese. Joko wi upisāa mbiyape, jare umee jemimboe reta pe jae reta umee yuapi ye waerā opaete wae pe.

<sup>20</sup>Jayawe opaete wae reta ukaru ipunga rewa. Jare Jesús jemimboe reta umbati jokua jembirekue doce canasta rupi.

<sup>21</sup>Opaete ukaru wae reta kuimbae retaño uyepapa pandepo miri rupi. Uyepapa’ā kuña reta jare sambiaĩ reta joko pe ñonoĩ wae. Jukuarái Jesús umbijeta mbiyape jare pira umingaru waerā jeta wae reta.

### **Jesús uwata i iáramo rupi**

*(Marcos 6.45-52; Juan 6.15-21)*

<sup>22</sup>Jayawe Jesús jei jemimboe reta pe uyupi waerä chalana pe jare yuraa waerä tenonde ipa wasu jowaicho koti. Jare jae upitaño joko pe omondo ye waerä uyembati wae reta.

<sup>23</sup>Jare opa ma omondo ye reta yawe, Jesús uyupi pëti iwitu wasu re oo uyerure waerä Tumpa pe. Jare pïtu ma yawe, Jesús imeño jaeño pe etei joko pe oï.

<sup>24</sup>Jayawe chalana Jesús jemimboe reta oo pipe wae oo ma uwäe ipa wasu mbite pe. Jare yawái chupe reta uruwata waerä, echa'ä täta iwitu ou ikoti jare tuicha i uyembiaparoaroa chupe reta.

<sup>25</sup>Jare köeta ma yawe, Jesús uwata oo ikoti reta i iáramo rupi.

<sup>26</sup>Jare jemimboe reta uecha yawe, ukiyete ye reta jare jei reta iyupe: “¡Umanokue wae iä ko aipo kua!” jei reta. Jáeramo jäse reta ukiyete ramo.

<sup>27</sup>Erëi jupiwoiño Jesús omondo chupe reta iñee: “Piyembipiakatu. Awiye pekïye. Che ko,” jei chupe reta.

<sup>28</sup>Jayawe Pedro jei chupe: “CheYa, nde etei ko yawe, ere chewe awata waerä a ndekoti i iáramo rupi,” jei chupe.

<sup>29</sup>Jayawe Jesús jei chupe: “Eyu,” jei chupe. Jayawe Pedro uweyi chalana wi, jare umbipi uwata i iáramo rupi oo waerä tëi Jesús koti.

<sup>30</sup>Erëi uecha yawe iwitu täta oï chupe, Pedro ukiye jare umbipi uike i pe. Jayawe jei usapikai rewe: “¡CheYa, chepisi mii!”

<sup>31</sup>Jayawe jupiwoiño Jesús uipisi Pedro ipo wi, jare jei chupe: “Michiete nderowia cheré. ¿Maera pa nderowia kawi'ä cheré?” jei chupe.

<sup>32</sup>Jayawe yuweru uyupi reta chalana pe, jare jupiwoiño iwitu upita.

<sup>33</sup>Jare Jesús jemimboe chalana pe ñonoï wae reta umbutuicha Jesús. “Añetete yepe nde ko jae Tumpa Tai,” jei reta chupe.

### **Jesús uminguera Genesaret pewa imbaerasi wae reta**

*(Marcos 6.53-56)*

<sup>34</sup>Jayawe yuraa uwäe reta ipa wasu jowaicho pe iwï Genesaret jee wae pe.

<sup>35</sup>Jare joko pewa reta uecha yawe Jesús, uikuaa reta kía ko jae wae. Jáeramo wiraaka reta ñee opaete jokua iwï rupi uikuaa reta waerä. Jayawe keti keti wi ueru reta imbaerasi wae reta Jesús oï wae pe.

<sup>36</sup>Jare umiñera reta Jesús umaño waerä imbaerasi wae reta re uñatai waerä Jesús jemimonde jembei mii yepe. Jare opaete uñatai Jesús jemimonde wae, opa ukuera reta Jesús imbaepuere pe.

## **Mateo 15**

### **Yandapo ikia Tumpa koti wae yandepia wi ko oë**

*(Marcos 7.1-23)*

- <sup>1</sup>Pëti ara amokue kuimbae Moisés uikuatía wae re oporomböe wae reta jare fariseo reta yuweru Jerusalén wi Jesús oí wae pe.
- <sup>2</sup>Jare jae reta upirandu chupe: “¿Maera pa nderemimboe reta uyapo’ä yanderamikue reta jeko rupi? Echa’ä ukaru reta uyepoe mbae rewe,” jei reta chupe.
- <sup>3</sup>Jayawe Jesús jei chupe reta: “Pe reta oete ko piyapo mbae, echa’ä piyawí Tumpa jei wae piko waerä pereko rupii.
- <sup>4</sup>Pe reta pikuaa kawi tēi ko Tumpa arakaete jei kuärái: ‘Pipiü peru jare pesi wi,’ jei. Jare jei wi kuärái: ‘Kía jei ikawi mbae wae tu jare ichi koti wae, tuyuka reta.’ Jukuärái Tumpa jei Moisés pe uikuatía waerä.
- <sup>5</sup>Erēi pe reta peporomböe tēi kía ipuere jei tu jare ichi ikuasi wae pe kuärái: ‘Che ime anoi tēi korepoti, erēi chepuereta’ä pombori pipe, echa’ä añono tee ma amee waerä Tumpa pe.’
- <sup>6</sup>Jare kía jukuärái jei wae, pe reta pere joko wiwe ipuereta’ä ma ombori tu jare ichi jokuá korepoti pipe. Jáeramo peporomböe wae rupi uipiü’ä reta tu jare ichi wi. Jukuärái pe reta peya ma ko Tumpa jei wae piko waerä pereko rupii,” jei chupe reta.
- <sup>7</sup>“Pe reta añetete wae nunga piyeyokui Tumpa pe. Isaías uikuatía arakaete peré wae jupi ko. Echa’ä jei kuärái:
- <sup>8</sup>“Kua reta iyuru wiño ko uipiü chewi,” jei Tumpa. ‘Erēi ipia pe uipiü’ä etei chewi reta.
- <sup>9</sup>Umbutuicharaangaiño reta cheree. Oporomböe reta kuimbae jei wae rupiño.’ Jukuärái Isaías uikuatía Tumpa jei peré wae,” jei Jesús chupe reta.
- <sup>10</sup>Jayawe Jesús ueni opaete joko pe ñonoí wae reta jare jei chupe reta: “Piyapisaka kua re pikuaa kawi waerä,” jei chupe reta.
- <sup>11</sup>“Ipotawe mbae kía jou wae ndarau uyapo ikia Tumpa koti. Erēi ikawi mbae wae jei wae, jokuá ko uyapo ikia Tumpa koti,” jei chupe reta.
- <sup>12</sup>Jayawe Jesús jemimboe reta yuweru jei chupe: “¿Ndikuaa pa fariseo reta umbiarasi jokuá nde ndere wae?” jei reta.
- <sup>13</sup>Jayawe Jesús jei chupe reta: “Jae reta oporomböe wae temiti rami ko. Erēi jae’ä ko temiti cheRu ara pe oí wae oñoti wae. Jare pēti ara Tumpa omondorokata oí,” jei.
- <sup>14</sup>“Jáeramo awiye piyembipia’ä jae reta jei wae re. Jae reta uyererowia tēi uruwata ñonoí iru wae reta Tumpa koti. Erēi añetete jae reta jesa mbae wae uipoko uruwata iru jesa mbae wae rami ko. Jare jukuärái yawe, mokui rewe uasawita iwíkua pe,” jei chupe reta.
- <sup>15</sup>Jayawe Pedro jei Jesús pe: “Ikuaaka mii orewe mbae uipota jei jokuá nembijaanga rewe ndere wae,” jei chupe.

- 16 Jayawe Jesús jei chupe reta: “¿Pe retawe yerá ndei pikuaa kawi jokua rewa?” jei.
- 17 “¿Pikuaa kawi’ä yerá ipotawe mbae peu wae oo perie peño jare pemombo?”
- 18 Erëi mbae ikawi mbae wae pere wae, jokua oë pepia wi. Jare jokua ko peapo ikia Tumpa koti,” jei chupe reta.
- 19 “Echa’ä pepia wi ko oë opa mbae ikawi mbae wae, echa’ä pepia pe piyemingeta mbaembae kachi wae re jare joko wi pepuruyuka, piyapo awasa, pembikere, pemonda, papu iru wae reta re, jare ikawi mbae wae pere perapicha koti,” jei.
- 20 “Kua mbaembae ko peapo ikia Tumpa koti. Erëi pekaru yawe piyepoe mbae rewe, jokua ndarau peapo ikia Tumpa koti,” jei Jesús jemimboe reta pe.

### **Pëti kuña iwi Canaán pewa wirowia Jesús re**

*(Marcos 7.24-30)*

- 21 Jayawe Jesús jare jemimboe reta ndiwe yuraa reta joko wi tëta wasu reta Tiro jare Sidón jee wae iyipi rupi.
- 22 Jare jokua iwi pe ime iko pëti kuña iwi Canaán pewa. Jae ko judía mbae wae. Jae ou Jesús oï wae pe, jare usapikai pii rewe jei chupe: “CheYa, David iñemoña pewa, cheparareko mii,” jei. “Chemembi kuña mii uiporaraete oï, echa’ä aña uyembiiya ma jese,” jei chupe.
- 23 Erëi Jesús jei’ä mbae awe chupe. Jayawe jemimboe reta yuweru jei chupe: “Emondo ye jokua kuña, echa’ä usapikai pii rewe ou oï yanderaikue. Yanembikuerita oï,” jei reta chupe.
- 24 Jayawe Jesús jei kuña pe: “Tumpa chembou Israel iñemoña reta peño. Jae reta owecha ukañi wae reta rami ko,” jei chupe.
- 25 Jayawe kuña ou uñeñono iwi re Jesús jowai uipiu rewe, jare jei chupe: “CheYa, chembori mii,” jei.
- 26 Jayawe Jesús jei chupe umbijaanga rewe: “Jupi’ä ko ñapïro waerä tembiu sambiai reta wi ñamee waerä yimba rai reta pe,” jei chupe.
- 27 “Jukuärái tëi, cheYa,” jei kuña. “Erëitu tembiu uepitita ko oremaerä wi, echa’ä yimba rai retawe jou tembiu usururukue iya imesa wi,” jei chupe.
- 28 Jayawe Jesús jei chupe: “¿Tuicha ko nderowia cheré, cherindi! Jáeramo uyeyapota ko ndewe nde ndipota wae rami,” jei chupe. Jare jupiwoiño kuña imembi ukuera.

### **Jesús uminguera jeta wae reta**

- 29 Jayawe Jesús jemimboe reta ndiwe yuraa ye joko wi uwäe reta ipa wasu Galilea pe. Joko wi koiño ime oï iwitu wasu rai. Jayawe uyupi reta jese, jare Jesús uwapi joko pe.

<sup>30</sup>Jare jeta wae reta wi yuweru jae oï wae pe. Jare ueru reta wi oñono Jesús jowai iköcho wae reta, jare ipo jowaicho utini wae reta, jare jesa mbae wae reta, jare iñee mbae wae reta, jare jeta ñru imbaerasi wae reta. Jayawe Jesús opa uminguera reta.

<sup>31</sup>Iñee mbae wae reta umbipi uyemingeta, jare ipo jowaicho tipa wae reta ukuera, jare iköcho wae reta uwata kawi, jare jesa mbae wae reta umae kawi. Jare kua uecha reta yawe, opaete joko pe ñonoï wae reta ipiakañi upita jare umbutuicha reta Tumpa jee.

### **Jesús umingaru irundi miri wae reta Tumpa imbaepuere rupi**

*(Marcos 8.1-10)*

<sup>32</sup>Jayawe Jesús ueni jemimboe reta ikoti jare jei chupe reta: “Aiparareko anoi kua yuweru wae reta. Echa’ä mbapi ara rupi ma ñonoï reta che ndiwe, jare mbaeti ma mbae onoi reta jou waerä. Aipota’ä amondo ye reta iyembaï rewe, echa’ä aramoi jesawirita reta tape rupi,” jei chupe reta.

<sup>33</sup>Jayawe Jesús jemimboe reta jei chupe: “¿Kiape pa yandepuere ñawäe chupe mbae kua jeta wae reta jou waerä? Echa’ä mbaeti kiawe iko kua rupi,” jei reta.

<sup>34</sup>Jayawe Jesús upirandu chupe reta: “¿Mbowi pa mbiyape ime penoi?” jei. Jare jae reta jei chupe: “Jaeño ime nonoi chiu mbiyape, jare mbowi pira chariki mii,” jei reta.

<sup>35</sup>Jayawe Jesús jei joko pe ñonoï wae reta pe uwapi waerä.

<sup>36</sup>Joko wi uipisi jokua chiu mbiyape jare pira chariki mii reta, jare umee yasurupái Tumpa pe jese. Jare upisäa umee jemimboe reta pe, jemimboe reta umee yuapi ye waerä opaete uwapi ñonoï wae reta pe.

<sup>37</sup>Jayawe opaetei ukaru reta jare ipunga upita reta. Jayawe Jesús jemimboe reta umbati jembirekue chiu canasta tuicha wae reta.

<sup>38</sup>Jare ukaru wae reta kuimbae retaño uyepapa irundi miri rupi. Uyepapa’ä kuña reta jare sambiai reta.

<sup>39</sup>Jayawe Jesús omondo ye reta jëta jëta rupi. Jare omondo ye reta ma yawe, jae jare jemimboe reta ndiwe uyupi chalana pe, jare yuraa reta iwï Magdala jee wae koti.

## **Mateo 16**

### **Fariseo reta uipota tïi omboporowa Jesús imbaepuere**

*(Marcos 8.11-13; Lucas 12.54-56)*

<sup>1</sup>Jayawe yuweru amokue fariseo reta jare saduceo reta Jesús oï wae pe, jare jei reta chupe: “Añetete Tumpa nembou yawe, jayawe yaecha iyapo orewe mbae tuicha wae Tumpa imbaepuere pe,” jei reta.

<sup>2</sup>Jayawe Jesús jei chupe reta: “Amo pe warasi uike ma oo yawe, pe reta pere: ‘Ara kawita oï kuriye, echa’ä ara pïta kawi oï,’ pere.



<sup>3</sup>Jae ramiño wi amo pe ndimbowe yawe, pere: ‘Ara pochita oï kua ara, echa’ä ara pïta kawi oï jare ime oï amapïtu wi,’ pere,” jei. “Pe reta pikuaa kawi pemae ara re këraita oï ara wae. Erëi pemae yawe mbaembae ayapo äi añawe rupi wae re, pikuaa’ä etei mbae ra uipota jei wae,” jei chupe reta.

<sup>4</sup>“Pe reta añawe peï wae reta, pereko kachi ko jare jupi’ä ma ko peï Tumpa koti,” jei chupe reta. “Pipota tëi ayapo waerä pewe mbae tuicha wae Tumpa imbaepuere pe jukuärái aechaka waerä pewe Tumpa ko chembou wae. Erëi jaeño uasata oï kërái Tumpa iñee arakae umimbeu wae Jonás pe uasa wae rami,” jei chupe reta. Jare jukuärái jei yawe, Jesús ueya reta.

### **Jesús jei jemimboe reta pe uyandareko kawi waerä iyé fariseo reta wi**

*(Marcos 8.14-21)*

<sup>5</sup>Jayawe Jesús jemimboe reta ndiwe uyupi reta chalana pe jare yuraa reta ipa wasu jowaicho koti. Jare yuraa ma uwäe reta yawe, Jesús jemimboe reta aramoïño imandúa ueru’ä yepe reta mbiyape wae.

<sup>6</sup>Jayawe Jesús jei chupe reta umbijaanga rewe: “Piyandareko kawi piyé kuri fariseo reta jare saduceo reta ilevadura wi,” jei chupe reta.

<sup>7</sup>Jayawe jemimboe reta jei tëi iyupe: “Kua jei yandewe yaru’ä mbiyape ramo,” jei reta.

<sup>8</sup>Jayawe Jesús uikuaa woi chuwi reta jae reta uyemingeta yureko wae re, jare jei chupe reta: “¿Maera mbate pa piyemingeta mbiyape peru mbae wae re? Pe reta perowia kawi’ä peï cheré,” jei.

<sup>9</sup>“¿Ndeïño pa pikuaa kawi? Che ayemingeta’ä äi mbiyape yau wae re. Echa’ä yawai’ä ko chewe ambijeta waerä mbiyape. ¿Pemandua’ä yerá kuee yawe pandepo mbiyape wae ambijeta jou reta waerä pandepo miri wae reta? Jare joko wi, ¿mbowi kanasta pa pembati jembirekue?” jei chupe reta.

<sup>10</sup>“Jare jae nunga wi ïru wese pe chiu mbiyape wae ambijeta jou reta waerä irundi miri wae reta. ¿Pemandua’ä yerá jokua re? Jare joko wi, ¿mbowi kanasta pa pembati jembirekue?” jei chupe reta.

<sup>11</sup>“Jayawe ¿kërái mbate pa pikuaa kawi’ä che ayemingeta’ä äi mbiyape yau wae re? Che tae ye pewe, piyandareko kawi piyé fariseo reta jare saduceo reta ilevadura wi,” jei chupe reta.

<sup>12</sup>Jayawe ramo jemimboe reta uikuaa Jesús uyemingeta yepe iko umbijaanga rewe. Jei’ä yepe iko chupe reta uyandareko waerä iyé levadura mbiyape pewa wi. Jaeño uipota jei chupe reta uyandareko kawi waerä iyé reta fariseo reta jare saduceo reta oporomboe wae wi.

### **Pedro jei Jesús ko jae Upuruepi wae Tumpa ombou wae**

*(Marcos 8.27-30; Lucas 9.18-21)*

<sup>13</sup>Jayawe Jesús jemimboe reta ndiwe yuraa uwäe reta tēta wasu Cesarea Filipino jee wae pe. Jare Jesús upirandu jemimboe reta pe: “¿Kērái pa iru wae reta uyemingeta che kuimbaerä ayeyapo wae kía ko che wae?” jei chupe reta.

<sup>14</sup>Jayawe jae reta jei chupe: “Amokue wae jei nde ko jae Juan upurumbisakambuse wae. Jare iru wae reta jei nde ko jae Tumpa iñee arakae umimbeu wae Elías. Jare iru wae reta jei nde ko jae Jeremías, ani ambie kuimbae Tumpa iñee arakae umimbeu wae ikowe ye wae,” jei reta.

<sup>15</sup>Jayawe Jesús upirandu ye chupe reta: “Jare pemaerä, ¿kía pa ko che?” jei chupe reta.

<sup>16</sup>Jayawe Simón Pedro jei chupe: “Nde ko jae Cristo ndoe chupe wae. Nde ko jae Tumpa ikoño mái wae Tai,” jei chupe.

<sup>17</sup>Jayawe Jesús jei Pedro pe: “Nde Simón, Jonás tai, ndiyekouete neí. Echa’ä cheRu ara pe oí wae uikuaaka ma ndewe jokua. Mbaeti ye kía uikuaaka ndewe wae,” jei chupe.

<sup>18</sup>“Jare che tae ndewe, añawe nderee ko jae Pedro. Jare chemaerä nde ndikota pēti itape jese kía jētarä uyapo wae rami. Echa’ä che ayapota nde ndiko waerä opaete cheré wirowiata oí wae reta iyipirä. Jare Añawasú ndarau ipuere umiamiri reta,” jei.

<sup>19</sup>“Nde ndipeata öke ipuere waerä wirowia reta cheré, jare che ameeta ndewe mbaepuere jese reta,” jei chupe. “Jare ime yawe kua iwi pe mbae re nde nemaño’ä jese wae, Tumpa ara pe oí wae umaño’ä ma jese wi. Jae ramiño wi ime yawe kua iwi pe mbae re nde nemaño jese wae, Tumpa ara pe oí wae umaño ma ko jese wi.” Jukuärái jei Jesús Pedro pe.

<sup>20</sup>Jayawe Jesús jei jemimboe reta pe awiye waerä umimbeu reta kía pe awe jae ko Cristo jei chupe reta wae.

### **Jesús umimbeu umanota ko**

*(Marcos 8.31-38; Lucas 9.22-27)*

<sup>21</sup>Jare jokua ara reta wiwe Jesús umbipi umimbeu jemimboe reta pe kērái jae umanota iko wae. Jei chupe reta: “Che imeta ko a Jerusalén pe. Jare joko pe yandetenondewa reta, jare sacerdote itenondewa reta, jare Moisés uikuatía wae re oporomboe wae reta uiporarakata chewe jare cheyukakata reta,” jei. “Erēi kua imeta ko uyeyapo. Jare joko wi mbapi ara pe aikowe yeta ayu aī kuri umanokue wae reta ipite wi,” jei chupe reta.

<sup>22</sup>Jayawe kua Jesús jei wae ikawi’ä Pedro pe. Jáeramo jae wiraa Jesús iru reta ipite wi, jare umbipi umbieta chupe jokua jae jei wae re. Jei chupe: “¿Ndarau etei, cheYa! Awiye etei tuyeyapo ndewe jokua,” jei chupe.

<sup>23</sup>Erēi Jesús uyerowa Pedro wi, jare jei chupe: “Esiri chewi, Satanás,” jei chupe. “Nde ndipota tēi chembiawái, echa’ä ndepia oí mbaembae iwi pewa reño. Mbaeti ndepia oí mbaembae Tumpa uipota wae re,” jei chupe.

<sup>24</sup>Jayawe Jesús jei jemimboe reta pe: “Ime yawe kía uipota iko cheremimboerä wae, awiye ma tuiko jae jei wae rupiño. Erëi towoi ikurusu jare tou che ndiwe,” jei.

<sup>25</sup>“Echa’ä ime yawe kía jaeño uyembipia’ä uepi waerä tēi jekowe kua iwi pewa re, umikañita iyuwi jekowe opa mbae wae ipuereta tēi onoi wae. Erëi kía umee jekowe chereko pewa wae, yepe tēi umano, erëi onoitā tekowe opa mbae wae,” jei chupe reta.

<sup>26</sup>“Kua re ikawi ko piyemingeta waerä pepia pe. ¿Maera ra ikawita kía umingana waerä opaete kua iwi pe oī wae, erëi umano ma yawe, umikañi ma iyuwi jekowe opa mbae wae? Añetete jae umingana’ä mbae awe. Echa’ä pe reta pepuere’ä etei pembiepi penoi waerä tekowe opa mbae wae,” jei chupe reta.

<sup>27</sup>“Che jae pewe kua mbaembae, echa’ä pēti ara che kuimbaerä ayeyapo wae ayu yeta aī cheRu imbaepuere jembipete rewe jare chearaiwa reta ndiwe. Jare jayawe amiñatimata aī pēti pēti wae pe mbae uyapo wae rupi,” jei.

<sup>28</sup>“Che tae pewe añetete wae, amokue pe reta kua pe peī wae ndei pēmano mbowe cherechata che kuimbaerä ayeyapo wae ayu ye yawe aiko waerä opaete wae imburuwicha wasurä jaeño mái pewa.” Jukuärái Jesús jei jemimboe reta pe.

## Mateo 17

### Amokue Jesús jemimboe reta uecha Jesús imbaepuere jembipete wae

(Marcos 9.2-13; Lucas 9.28-36)

<sup>1</sup>Jayawe owa ara ma uasa yawe, Jesús wiraa Pedro, Jacobo, jare Jacobo tiwi Juan iru reta ipite wi pēti iwitu wasu re.

<sup>2</sup>Jare joko pe Jesús jete uyembiambie chupe reta. Jowa jembipe warasi jembipe rami. Jare jemimonde tiasī jare uwera.

<sup>3</sup>Jare aramoiño uyekuaa chupe reta Moisés jare Elías uyemingeta ñonoī Jesús ndiwe.

<sup>4</sup>Jayawe Pedro jei Jesús pe: “OreYa, jaekawi ko ore noī kua pe,” jei chupe. “Nde ndipota yawe, che ayapota kua pe mbapi warasīa ñanaroki pewa – pēti nemaerä, pēti Moisés pewarä, jare pēti Elías pewarä wi,” jei chupe.

<sup>5</sup>Jare Pedro uyemingeta iko rambuewe, uyekuaa chupe reta amapitu jembipe wae jare opa oñowa reta. Jare amapitu wi uyendu ñee jei: “Kua ko jae cheRai auete wae. Jae chembiyerowiaete. Piyapisaka jese,” jei.

<sup>6</sup>Jare Jesús jemimboe reta kua uyandu yawe, ukiyete jare oa reta iwi re uipiu rewe.

<sup>7</sup>Jayawe Jesús ou oñono ipo jese reta jare jei: “Pepüa. Awiye pekiye,” jei chupe reta.

<sup>8</sup>Jare umae reta ye yawe, uecha’ä ma kiawe joko pe oī – jaeño ma Jesús.

<sup>9</sup>Joko wi uweyi ye yureko reta rambuewe iwitu wasu wi, Jesús jei chupe reta: “Awiye pemiäri añawe kía pe awe kua pecha wae. Ndei rani. Peäro che kuimbaerä

ayeyapo wae amano jare aikowe ye ayu umanokue wae reta ipite wi rewa. Jayawe ramo pemieräkuata pei kuri,” jei chupe reta.

<sup>10</sup>Jayawe jemimboe reta upirandu ye chupe mbae re: “¿Maera pa Moisés uikuatía wae re oporomboe wae reta jei Elías rani ko outa ndei Upuruepi wae ou mbowe?” jei reta.

<sup>11</sup>Jayawe Jesús jei chupe reta: “Añetete ko jae reta jei wae. Elías rani ko ou uyapikatu waerä opaete mbaembae,” jei.

<sup>12</sup>“Erëi che tae pewe añetete wae, Elías ou ma ko, jare yandetenondewa reta uikuaa’ä. Jáeramo uyapo reta chupe mbae jae reta uipota wae rupi. Jae ramiño wi che kuimbaerä ayeyapo wae aiporarata ai wi jae reta ipo pe,” jei chupe reta.

<sup>13</sup>Jayawe ramo Jesús jemimboe reta uikuaa Juan upurumbisakambuse wae re yepe uyemingeta iko Jesús wae.

### **Jesús uminguera pëti kunumi rai añä uyembüya jese wae**

*(Marcos 9.14-29; Lucas 9.37-43)*

<sup>14</sup>Jayawe Jesús jare jokua mbapi jemimboe reta ndiwe yuweru ye uwäe reta jeta ñonoï wae reta pe. Jare pëti kuimbae jae reta ipite wi ou uñeñono itawa re Jesús jowai. Jare jei chupe:

<sup>15</sup>“Oporomboe wae, iparareko mii chewe cherai parawete,” jei. “Jae imbaerasi, jare umanomano, jare tuicha rupi uiporara oi. Jeta wese ma oa tëi tata pe jare i pe wi,” jei.

<sup>16</sup>“Jáeramo ko aru tëi ma nderemimboe reta pe uminguera waerä, erëi jae reta ipuere’ä uminguera,” jei kuimbae Jesús pe.

<sup>17</sup>Jayawe Jesús jei joko pe ñonoï wae reta pe: “Pe pepiatäta piko wae reta, ¿marái mbate ra perowia kawi’ä cheré? Chembikueri ma pei perowia mbae cheré wae. ¿Kërái yawe rewa ra arupiata pewe? Peru chewe kua pe jokua kunumi rai,” jei chupe reta.

<sup>18</sup>Jayawe ueru reta chupe yawe, Jesús iñeeäta rewe jei añä pe oë waerä kunumi rai wi. ¡Jare jupiwoiño kunumi rai ukuera!

<sup>19</sup>Jayawe kaaru katu mii yawe, Jesús jemimboe reta yuweru Jesús oi wae pe. Jare jae retaño jae ndiwe ñonoï yawe, upirandu reta chupe: “¿Maera pa ore orepuere’ä nomoë añä jokua kunumi rai wi?” jei reta.

<sup>20</sup>Jayawe Jesús jei chupe reta: “Pepuere’ä, echa’ä perowia kawi’ä Tumpa re ramo,” jei. “Che tae pewe añetete wae, pe reta perowia yawe Tumpa re michi rai mii yepe, jayawe pepuereta piyapo mbaembae tuicha wae. Pepuereta pere pea iwitu wasu pe oo waerä joko wi jare upita waerä ikotia pe. Jare jukuärái uyapota ko iwitu wasu. Ndarau mbae yawái pewe,” jei chupe reta.

<sup>21</sup>“Erëi jokua nunga añä, jaeño pepuere pemoë piyerure rewe Tumpa pe, jare piñono tee ara reta pekaru mbae rewe,” jei Jesús jemimboe reta pe.

## Jesús umimbeu ye jemimboe reta pe umanota iko wae

(Marcos 9.30-32; Lucas 9.44-45)

<sup>22</sup>Jare iwĩ Galilea pe ñonoĩ rambuewe, Jesús jei jemimboe reta pe: “Che kuimbaerä ayeyapo wae, imeta kía chemee oĩ cherowaicho reta pe wae.

<sup>23</sup>Jare jae reta cheyukata,” jei. “Erëi joko wi mbapĩ ara pe aikowe yeta ayu aĩ kuri umanokue wae reta ipite wi,” jei chupe reta. Jayawe jemimboe reta ipiatiti tuicha rupi Jesús jei chupe reta wae re.

## Jesús oporomboe tupao wasu pewarä umbiepita wae rewa

<sup>24</sup>Jayawe Jesús jare jemimboe reta ndiwe yuraa uwäe reta tēta wasu Capernaum pe. Jare joko pe yureko reta rambuewe, yuweru amokue tupao wasu pewarä okowara wae reta jare upirandu reta Pedro pe: “¿Umbiepi pa pemboea yande imeta ko yambiepi wae tupao wasu re uyandareko wae reta pewarä?” jei reta.

<sup>25</sup>“Umbiepi ko,” jei Pedro chupe reta. Jayawe Pedro oo uike tēta kiape Jesús oĩ wae pe. Jare ndei upirandu mbowe Jesús pe jokua rewa, Jesús rani jei chupe: “Simón,” jei chupe. “Mburuwicha reta kua iwĩ pewa, ¿kía reta pe pa okowara – tai reta pe ra ani ñru wae reta peño? ¿Mbae pa ndere?” jei chupe.

<sup>26</sup>“Ñru wae reta peño,” jei Pedro. Jayawe Jesús jei chupe: “Jayawe tai reta umbiepi'ä ko. Jae ramiño wi che ambiepi'tä ko tēi cheRu jēta pewarä,” jei chupe.

<sup>27</sup>“Erëitu awiye waerä yambiarasi jokua okowara wae reta, ekua epindapo ipa wasu pe. Jare jokua pira tenondete ndipisi wae, epipira iyuru chuwi. Jare joko pe newäeta pēti korepoti riare. Eraa embiepi tupao wasu pewarä okowara wae reta pe. Jokua uepitita oĩ chemaerä jare nemaerä wi,” jei Pedro pe. Jayawe jukuärái Pedro uyapo.

## Mateo 18

### ¿Kía nunga ra ko jae tenondewarä?

(Marcos 9.33-37; Lucas 9.46-48)

<sup>1</sup>Jokua jaikue rupi Jesús jemimboe reta yuweru ikoti jare jei reta chupe: “Tumpa oĩ ma yawe opaete wae imburuwicha wasurä jaeño mái pewa, ¿kía pa ikota yandepite rupi yandetenondewarä?” jei reta chupe.

<sup>2</sup>Jayawe Jesús ueni pēti sambiai, jare oñono jae reta ipite pe, jare jei chupe reta:

<sup>3</sup>“Che tae pewe añetete wae, pe reta piko piau'ä yawe Tumpa koti, jare piyeyapo'ä yawe sambiai reta rami, ndarau etei penoi Tumpa pemburuwicha wasurä,” jei.

<sup>4</sup>“Erëi ime yawe kía uñemimichi kua sambiai rami wae, jae ikota petenondewarä Tumpa oĩ ma yawe opaete wae imburuwicha wasurä jaeño mái pewa,” jei chupe reta.

<sup>5</sup>“Jeta wae reta jei tēi sambiai reta usiriwe'ä ko. Erëi che tae pewe, ime yawe kía umbiasa kawĩ pēti sambiai kua rami wae, jare jukuärái uyapo cheré wirowia ramo, chembiasa kawĩ ko oĩ wi,” jei chupe reta.

## Jesús oporomboe kía japicha pe uyawika Tumpa koti wae rewa

(Marcos 9.42-48; Lucas 17.1-2)

<sup>6</sup>Jayawe Jesús jei wi jemimboe reta pe jokua sambiai rewa: “Ime yawe kía uyawika Tumpa koti kua nunga cheré wirowia wae pe, Tumpa tuicha rupi uiporarakata oï chupe,” jei. “¿Këraita ra ko kía uñapiti yawe peyayu re pëti ita tuicha wae, jare joko wi pemombo yawe i tipí wae pe? Jokua ikawi’ä ko. ¿Erëi oete yeta oï kía pe Tumpa koti uyawika yawe pëti cheré wirowia mii wae pe! Echa’ä Tumpa tuichaete ye uiporarakata oï chupe,” jei.

<sup>7</sup>“¿Ikuasi kua iwi pewa reta, echa’ä ime jeta uyawika japicha pe Tumpa koti wae reta! Jukuärái ñotái ko. Erëi ime yawe kía japicha pe uyawika Tumpa koti wae, ¿ikuasi parawete! Echa’ä Tumpa tuicha rupi uiporarakata oï chupe,” jei chupe reta.

<sup>8</sup>“Jáeramo ndepo ani ndepi jowaicho jekuaëño uyawika oï ndewe Tumpa koti yawe, iyasia emombo ndeyuwi. ¿Maera pa ikawita nenoí waerä mokui ndepo jare mokui ndepi, neí yawe tata owe mbae wae pe ndepo jare ndepi uyawika ndewe jeko pewa? Che tae ndewe, ikawiete ko nenoí waerä tekowe opa mbae wae, yepe tëi aramoi pëtiño nenoí ndepo ani ndepi,” jei chupe reta.

<sup>9</sup>“Jae ramiño wi nderesa jowaicho jekuaëño uyawika oï ndewe Tumpa koti yawe, eki emombo ndeyuwi. ¿Maera pa ikawita nenoí waerä mokui nderesa, neí yawe Tatawasurenda pe nderesa uyawika ndewe jeko pewa? Che tae ndewe, ikawiete ko nenoí waerä tekowe opa mbae wae, yepe tëi aramoi pëtiño nenoí nderesa,” jei Jesús jemimboe reta pe.

## Owecha ukañi wae rewa

(Lucas 15.3-7)

<sup>10</sup>“Piyandareko kawí piyé awiye waerä perïro pëti awe kua sambiai mii reta. Echa’ä che tae pewe, jokua araiwa reta uyandareko kua nunga reta re wae jekuaëño ñonoí cheRu ara pe oï wae jowai,” jei chupe reta.

<sup>11</sup>“Jeta wae reta mbiri ñonoí Tumpa wi, jare uikuaa’ä etei reta tape Tumpa koti oo wae. Jáeramo che kuimbaerä ayeyapo wae ayu ko aepi reta waerä,” jei.

<sup>12</sup>“¿Mbae pa pere? Ime yawe pëti kuimbae pëti chiëto owecha onoi wae, jare ukañi yawe chuwi pëti owecha, ¿mbae ra uyapota? ¿Ndarau yerá ueya jokua noventa y nueve owecha reta iwitu raí re oo waerä ueka jokua ukañi chuwi wae? Jukuäráita ko,” jei.

<sup>13</sup>“Jare che tae pewe añetete wae, jae uwäe yawe jokua owecha ukañi wae, tuicha uyerowiata jokua owecha uwäe ye chupe wae re ïru noventa y nueve owecha reta wi,” jei.

<sup>14</sup>“Jae ramiño wi peRu ara pe oï wae uipota’ä pëti awe kua nunga mii reta yepe upita waerä mbiri chuwi,” jei Jesús chupe reta.

## Ïru hermano mbae kachi uyapo yawe yandekoti wae rewa

15Jare Jesús jei wi jemimboe reta pe: “İru cheré wirowia wae mbae kachi uyapo ndekoti yawe, ekua ikuaaka chupe jeko kía uikuaa mbae rewe. Jare jae uyapisaka nderé yawe, ndiyeapikatu ma ko jae ndiwe,” jei.

16“Erëi jae uipota’ä yawe uyapisaka nderé, jayawe ekua jare eru nde ndiwe pëti wae ani mokui wae, jare ikuaaka ye chupe jeko rewa. Jukuärái iyapo jae reta uikuaa waerä mbae ra piyemingeta wae, jare opaete wae uikuaa waerä añetete wae ko nde ndere wae,” jei.

17“Jare jokua teko onoi wae uipota’ä uyapisaka jese reta yawe, jayawe emimbeu İru cheré wirowia wae reta pe piyembati peİ rambuewe. Erëi jokua teko onoi wae uipota’ä ñeño uyapisaka opaete İru wae reta re yawe, jayawe pemaeta ko jese Tumpa re wirowia mbae wae rami jare pëti mburuwicha pewarä okowara wae rami,” jei chupe reta.

18“Che tae pewe añetete wae, jukuärái piyapo yawe päwe rewe, Tumpa umae kawita jese. Echa’ä ime yawe kua İwi pe mbae re pe reta päwe rewe pemaño’ä jese wae, Tumpa ara pe oİ wae umaño’ä ma jese wi. Jae ramiño wi ime yawe kua İwi pe mbae re pe reta päwe rewe pemaño jese wae, Tumpa ara pe oİ wae umaño ma jese wi,” jei chupe reta.

19“Jae nunga wi che tae pewe, ime yawe aramoi mokui yepe pe reta piyerure pëti ramiño Tumpa pe mbae re wae, cheRu ara pe oİ wae uyapota ko pewe,” jei.

20“Echa’ä ime yawe kía reta cheree re uyembati wae, che aİta jae reta ipite pe, yepe tëi jae reta mokui ani mbapİ miño yepe,” jei Jesús jemimboe reta pe.

### **Jesús umbijaanga mokui kuimbae ipía wae reta re**

21Jayawe Pedro ou jei Jesús pe: “CheYa,” jei chupe. “İme yawe İru hermano mbae kachi uyapo chekoti wae, aikuaa awiyeta ko chemandúa chupe jokua re. Erëi jae jekuaeño mbae kachi uyapo chekoti yawe, ¿mbowİ wese pa aipararekota? ¿Chiu weseño pa aramoi?” jei chupe.

22Jayawe Jesús jei Pedro pe: “Mbaeti,” jei. “Chiu weseño’ä. Che tae ndewe, jekuaeño ndipararekota.

23Echa’ä jukuärái uyeyapota oİ Tumpa oİ ma yawe opaete wae imburuwicha wasurä jaeño mái pewa,” jei. “Yambijaanga. İme iko pëti mburuwicha wasu jeta pione reta onoi wae. Jare pëti ara jae uipota uikuaa iko opa ra umbiepi chupe ipione reta ipía chupe wae.

24Jayawe pëti pëti rupi ueruruka reta jae jowai ipuere waerä upirandu chupe reta jae reta ipía rewa,” jei. “Jayawe ou uyemboİ jae jowai pëti pione jetaete ye ye korepoti pe ipía chupe wae,” jei.

25“Jokua kuimbae parawete ipuere’ä etei opa umbiepi ipía. Jáeramo mburuwicha wasu jei owaka waerä jokua kuimbae iko waerä ambie wae ipionerä – jae nunga wi jembireko, jare isambiai reta, jare opaete imbaembae. Jare jokua korepoti pipe umbiepİka İyupe jokua kuimbae parawete ipía iko wae,” jei.

26“Jayawe jokua pione oa iwi re uñemimichi rewe mburuwicha wasu jowai, jare umiñera: ‘Awiye mii, cheya,’ jei chupe. ‘Ndepiawasú mii chewe, jare ambiepiña ndewe opaetei,’ jei parawete.

27Jayawe mburuwicha wasu uiparareko wite umae jese. Jáeramo opa umbái chupe ipía jare ombopoika chuwi,” jei.

28“Erëi jokua pione oë mburuwicha wasu oï wae wi, jare oo owäiti pëti wae jeta’ä mii ipía iko chupe wae. Jare uipisi iyasio wi jare jei chupe pochi rewe: ‘Embiepi chewe añawe jokua ndepía chewe wae,’ jei chupe.

29“Jayawe jokua ñru parawete oa iwi re uñemimichi rewe jae jowai, jare umiñera tëi: ‘Ndepiawasú mii chewe, jare ambiepiña ndewe opaetei,’ jei chupe.

30Erëi jokua pione uipota’ä etei ipiawasú chupe. Umíngeka peresoriru pe opa ipía umbiepi rewa,” jei.

31“Jare ñru pione reta uecha yawe mbae uyeyapo wae, ipiatiti jare yuraa umimbeu reta mburuwicha wasu pe jokua pione mbae uyapo wae rewa.

32Jayawe mburuwicha wasu pochi rewe uenika jokua pione jare jei chupe: ‘¡Nde ko jae pëti chepione jeko kachi wae!’ jei chupe. ‘Che ambái ndewi opaete ndepía nde chemiñera jese ramo.

33Jae ramiño wi nde imeta tëi ko ndiparareko wi nderapicha kërái che nduparareko rami,’ jei chupe.

34Jayawe mburuwicha wasu pochieta jokua ipione pe jare omomboka peresoriru pe. Jare oyokui wi peresoriru iyandarekoa reta uiporaraka waerä chupe opa ipía umbiepi rewa,” jei chupe reta.

35Joko wi Jesús jei wi jemimboe reta pe: “Jukuäraiete wi cheRu ara pe oï wae uyapota pewe, pe reta jekuaeño pemandúa yawe perapicha pe mbae kachi uyapo pekotí wae re,” jei chupe reta.

## Mateo 19

### Jesús oporomboe menda rewa

(Marcos 10.1-12; Lucas 16.18)

1Jare opaete kua jei ma yawe, Jesús jare jemimboe reta ndiwe yuraa iwi Galilea wi iwi Judea pe, i wasu Jordán jowaicho pe.

2Jare jeta wae reta yuraa jupie. Jare Jesús umínguera imbaerasi wae reta jae reta ipite pe ñonoï wae.

3Jayawe yuweru wi amokue fariseo reta Jesús oï wae pe uyawika waerä tëi chupe iñee rupi umbijeko reta waerä. Jayawe upirandu reta chupe kuärái: “Tumpa jei wae rupi, ¿ipuereta ra kuimbae omombo jembireko ipotawe mbae re?” jei reta chupe.

4Jayawe Jesús jei chupe reta: “¿Pemingeta’ä yerá Tumpa iñeeriru pe kërái Tumpa uyapo ramo yawe mbaembae, uyapo kuimbae jare kuña?” 5Jare Tumpa jei:



‘Kuimbae usirita tu jare ichi wi iko tee waerä jembireko ndiwe. Jare mokui wae uyeyapota pëti ramiño.’ Jukuärái uyekuatía oï,” jei chupe reta.

<sup>6</sup>“Jayawe che tae pewe, mbaeti ma ko ñonoï mokui wae rami. Yureko ma ko pëti ramiño. Jáeramo kuimbae jare kuña Tumpa uyapo pëti ramiño wae, awiye kiawe tumbisiri reta iyuwi. Jukuärái che jae,” jei Jesús chupe reta.

<sup>7</sup>Jayawe fariseo reta jei chupe: “Jukuärái yawe, jayawe ¿maera pa Moisés umaño kuimbae re omombo waerä jembireko? Jae jei kuimbae jaeño tuikuatía rani tupapire yemombo pewa jare tumee jembireko pe. Jayawe ramo ipuere omombo jembireko,” jei reta Jesús pe.

<sup>8</sup>Jayawe Jesús jei chupe reta: “Moisés umaño peré pemombo waerä pembireko pe reta pepiatäta ramo. Erëi jukuärái’ä iko iyipi wiwe,” jei.

<sup>9</sup>“Jayawe che tae pewe, ime yawe kía omombo jembireko awasa uyapo mbae rewe, jare wireko yawe ambie kuña, uyapo ko oï awasa Tumpa jowai,” jei Jesús chupe reta.

<sup>10</sup>Jayawe Jesús jemimboe reta jei chupe: “Jukuäräita iko yawe kuimbae jembireko ndiwe, jayawe ikawi ko awiye etei yamenda waerä,” jei reta.

<sup>11</sup>Jayawe Jesús jei chupe reta: “Mbaeti opaete wae ipuere yureko jukuäráiño umenda mbae rewe – jaeño kía reta pe Tumpa umee jukuäráiño yureko waerä wae reta, jae reta ipuere,” jei.

<sup>12</sup>“Yambijaanga. Amokue wae ichi wi oa wiwe ipuereta’ä uñemoña. Jáeramo ndarau umenda. Jare amokue wae ndarau umenda, echa’ä iru wae reta uapiawo ramo. Jare amokue wae umenda’ä ipuere waerä uñeño tee Tumpa peño uyeyokui waerä,” jei. “Ime yawe kía ikawi oï chupe iko waerä umenda mbae rewe wae, jayawe tuiko jukuäráiño,” jei Jesús jemimboe reta pe.

### **Jesús uyerure Tumpa pe sambiai reta re**

*(Marcos 10.13-16; Lucas 18.15-17)*

<sup>13</sup>Jokua jaikue rupi amokue wae reta ueru Jesús pe isambiai reta. Echa’ä uipota reta Jesús oñono waerä ipo jese reta jare uyerure waerä Tumpa pe jese reta. Erëi Jesús jemimboe reta uñeengata jokua sambiai ueru wae reta pe. “Awiye jekuaeño pemiawái Jesús,” jei chupe reta.

<sup>14</sup>Erëi Jesús jei: “Pemaño sambiai reta re yuweru waerä chekoti. Awiye piyopia reta, echa’ä jaeño kua sambiai rami wae reta oïta Tumpa ndiwe, Tumpa oï ma yawe opaete wae imburuwicha wasurä,” jei chupe reta.

<sup>15</sup>Jayawe Jesús oñono ipo sambiai reta re jare uyerure Tumpa pe jese reta. Jare jukuärái uyapo yawe, oo ye joko wi.

### **Pëti kuimbae ikokatu wae ou Jesús oï wae pe**

*(Marcos 10.17-31; Lucas 18.18-30)*

<sup>16</sup>Joko wi pëti kuimbae ou Jesús oï wae pe jare jei chupe: “Oporomboe wae, jupi wae ko nde,” jei chupe. “¿Mbae nunga mbae ikawi wae pa ayapota anoi waerä tekowe opa mbae wae?” jei chupe.

<sup>17</sup>Jayawe Jesús jei chupe: “¿Maera pa ndere chewe jupi wae? Mbaeti ko pëti awe jupi wae. Jaeño ko Tumpa jupi wae,” jei. “Erëi ndipota tekowe opa mbae wae neni yawe, ndikota ko Tumpa arakae jei wae rupi,” jei chupe.

<sup>18</sup>Jayawe kuimbae jei chupe: “Opaete mbaembae Tumpa jei wae wi, ¿mbae nunga reta etei pa imeta ko ayapo?” jei chupe. Jayawe Jesús jei chupe: “Awiye epuruyuka. Awiye iyapo awasa. Awiye nemonda. Awiye ndapu nembijeko waerä nderapicha.

<sup>19</sup>Ipiu nderu jare ndesi wi. Jare eau nderapicha nde ndiyerau rami. Jukuärái jei Tumpa,” jei Jesús chupe.

<sup>20</sup>Jayawe kuimbae jei Jesús pe: “Che ayawi’ä etei pëti awe kua reta. ¿Mbae ye ra uata chewe ayapo waerä?” jei chupe.

<sup>21</sup>Jayawe Jesús jei chupe: “Ndipota ndiyapo yawe jupi wae, ekua ewaka opaete nembraembae, jare jokua korepoti emee iparawete wae reta pe. Jare jukuärái imeta neni mbaembae ikawiete wae ara pe. Joko wi eyu kuri che ndiwe ndiko waerä cheremimboerä,” jei chupe.

<sup>22</sup>Jayawe kua uyandu yawe, kuimbae oo ye ipiatiti rewe. Echa’ä jae ikokatuete ko jare uauete imbaembae opa umee waerä iyuwi.

<sup>23</sup>Jayawe Jesús jei jemimboe reta pe: “Pëti ara Tumpa ikota opaete wae imburuwicha wasurä jaeño mái pewa. Erëi che tae pewe añetete wae, yawaieteta ko ikokatu wae reta uyekou waerä jokua re jare onoi reta waerä tekowe opa mbae wae,” jei.

<sup>24</sup>“¿Këraita ra ko pëti camello uasa waerä yuu jesakua mii rupi? Jokua yawái. Erëi che tae pewe, yawaieteta ko pëti ikokatu wae onoi waerä tekowe opa mbae wae,” jei chupe reta.

<sup>25</sup>Jayawe Jesús jemimboe reta kua uyandu yawe, ipiakañiete jare jei reta: “Jukuärái yawe, ¿kía ra ipuereta uyerepi awiye waerä oo Tatawasurenda pe jayawe?” jei reta.

<sup>26</sup>Jayawe Jesús umaie jese reta, jare jei chupe reta: “Iwi pewa reta jaei ndarau kiawe ipuere uyerepi chuwi. Erëitu Tumpa ipuere uyapo chupe reta, echa’ä Tumpa pewarä mbaeti mbae yawái,” jei chupe reta.

### **Kërái Tumpa umiñatimata oï kuri uyeyokui chupe wae reta pe**

<sup>27</sup>Jayawe Pedro jei Jesús pe: “Mase, ore ndueya ma opaetei nduiko waerä nderemimboe retarä. ¿Kërái pa Tumpa umiñatimata oï orewe kuri jokua re?” jei chupe.

<sup>28</sup>Jayawe Jesús jei jemimboe reta pe: “Che tae pewe añetete wae, pëti ara Tumpa umbipiauta oï opaete mbaembae. Jare jokua ara che kuimbaerä ayeyapo wae

awapita chewapia mburuwicha wasu pewa re. Jukuärái uyekuaata chembaepuere jembipete wae. Jare pe cheremimboe reta, pewapita peĩ kuri wi doce wapia pe piko waerä Israel inemoñaeta reta imburuwicha retarä,” jei chupe reta.

<sup>29</sup>“Jare ime yawe kía ueya jëta, jare tikei reta, jare tiwi reta, jare jindi reta, jare tu, jare ichi, jare isambiai reta, jare iko reta wi chereko pewa wae, cien wese ye ko uñemiñatimata chupe, jare onoita imaerä tekowe opa mbae wae,” jei chupe reta.

<sup>30</sup>“Erëi jeta añawe rupi uyembutuichaka ñonoĩ wae reta, Tumpa umimichita oĩ reta kuri. Jae ramiño wi jeta añawe rupi usiriwe mbae echa ñonoĩ wae reta, Tumpa umbutuichata oĩ reta kuri,” jei chupe reta.

## Mateo 20

<sup>1</sup>“Echa’ä Tumpa oĩ ma yawe opaete wae imburuwicha wasurä jaeño mái pewa, jayawe ramo uyeyapota oĩ kuri kua rami: Yambijaanga. Ime iko pëti kuimbae uvarupa onoi wae,” jei. “Jare ndimboweasi oë oo ueka kía reta uparawiki waerä chupe.

<sup>2</sup>Jare jei chupe reta: ‘Che ambiepita pewe pëti ara ndeparawiki wae,’ jei chupe reta. ‘Jaikó,’ jei chupe reta. Jayawe koo iya omondo reta uparawiki waerä iuvarupa pe,” jei.

<sup>3</sup>“Jayawe warasi iwate katu mii yawe, uvarupa iya oo plaza pe jare uecha joko pe ñonoĩño jembiaipo mbae reta.

<sup>4</sup>Jayawe uvarupa iya jei chupe reta: ‘Pe reta wi pekua peparawiki cheuvarupa pe. Jare ambiepita pewe jupi wae,’ jei chupe reta. Jayawe jae reta wi yuraa uvarupa pe uparawiki,” jei.

<sup>5</sup>“Jare taikue rupi ara mbite ma yawe, uvarupa iya jekuae oo ye jokuia plaza pe, jare jekuae joko pe uecha ye iiru jembiaipo mbae reta. Jare jae reta wi omondo uparawiki waerä iuvarupa pe. Joko wi mbapi ora ma kaaru yawe, omondo ye ambie kuimbae reta uparawiki waerä iuvarupa pe,” jei.

<sup>6</sup>“Jare kaaruete ma yawe, uvarupa iya jekuae oo ye plaza pe jare uecha joko pe iiru jembiaipo mbae reta. Jayawe jei chupe reta: “¿Maera pa pe reta pembiasa peĩ ara kua pe peparawiki mbae rewe?” jei chupe reta.

<sup>7</sup>“Mbaeti kía umee orewe mbarawiki ramo,” jei reta. “Jayawe uvarupa iya jei chupe reta: ‘Pe reta wi pekua peparawiki cheuvarupa pe. Jare ambiepita pewe jupi wae,’ jei chupe reta. Jayawe jae reta wi yuraa uparawiki kuimbae iuvarupa pe,” jei Jesús.

<sup>8</sup>“Jayawe warasi uike ma yawe, uvarupa iya jei ipione reta itenondewa pe: ‘Eni uparawiki wae reta jare embiepi chupe reta. Tenonde embiepi jokuia taikuate uike uparawiki wae reta pe rani. Jare taikue rupi embiepi jokuia tenondete umbiepi uparawiki wae reta pe,’ jei uvarupa iya,” jei.

<sup>9</sup>“Jare uvarupa wi yuweru ye yawe jokuia kaaruete uike uparawiki wae reta, uvarupa iya umbiepika chupe reta pëti ara uparawiki wae,” jei.

10“Jare yuweru wi jokua ndimboweasi wiwe umbipi uparawiki wae reta. Jae reta wirowia tēi uvarupa iya uasa katu mii umbiepita chupe reta iiru wae reta wi. Erēi uvarupa iya umbiepika wi chupe reta pēti ara uparawiki wae oyowakeño jokua iiru reta ndiwe,” jei.

11“Jayawe jae reta uecha yawe oyowakeño umbiepi chupe reta wae, iyengeta reta jokua uvarupa iya pe.

12‘Jupi’ā kua nde ndiyapo nei,’ jei reta chupe. ‘Echa’ā kua taikue rupi umbipi uparawiki wae reta pēti ora miño uparawiki reta. Erēi nde nembiepi chupe reta oyowakeño orewe nembiepi rami, yepe tēi ore nduparawiki ndimbowe wiwe jare warasi jasi rewe,’ jei reta chupe,” jei.

13“Jayawe uvarupa iya jei pēti wae pe: ‘Mase cheiru, che ayapo’ā etei ai mbae jupi mbae wae ndewe,’ jei chupe. ‘Che amimbeu ndewe che ambiepita aiko ndewe pēti ara ndeparawiki wae. Jare nde ndepita che ndiwe jukuārāi,’ jei chupe.

14‘Mase, joko neno ndekorepoti. Ekua jayawe. Che aipota ambiepi jokua taikute uike uparawiki wae reta pe pēti ara pewa ndewe ambiepi wae rami.

15¿Che chepuereta’ā yerá ayapo mbae aipota wae chekorepoti ndiwe? Ani ¿aramoi ndepochi ra nei chepiakawi ai iiru reta pe ramo?” jei uvarupa iya,” jei.

16Jare Jesús jei wi jemimboe reta pe: “Jukuāraiete wi ko jeta taikuewa añawe ñonoī wae reta, pēti ara Tumpa umbitenondewata oī reta kuri. Jare jeta tenondewa añawe ñonoī wae reta, Tumpa umbitaikuewata oī reta kuri. Jukuārāi che jae,” jei chupe reta.

### **Jesús umimbeu ye jemimboe reta pe umanota iko wae**

*(Marcos 10.32-34; Lucas 18.31-33)*

17Kua jaikue rupi Jesús jare jeta wae reta ndiwe yuraa Jerusalén koti. Jare jokoti yuraa yureko reta rambuewe, Jesús ueni jokua doce jemimboe reta iiru reta ipite wi, jare jei chupe reta:

18“Mase, pe reta pikuaa peī añawe ya ñaī Jerusalén koti. Erēi aipota pikuaa waerā wi mbae uasata oī chewe joko pe wae,” jei chupe reta. “Echa’ā joko pe ma ñawāe yawe, che kuimbaerā ayeyapo wae, pēti wae chemeeta oī sacerdote itenondewa reta pe jare Moisés uikuatía wae re oporomboe wae reta pe. Jae reta jeita cheyukaka waerā,

19jare joko wi chemeeta reta judío mbae wae reta pe,” jei. “Chemeeta chupe reta jae reta upuka waerā cheré, jare chembipiu reta waerā, jare chekutu reta waerā kuru re amano rewa. Erēitu joko wi mbapi ara pe aikowe yeta ayu ai kuri umanokue wae reta ipite wi.” Jukuārāi jei Jesús jemimboe reta pe.

### **Pēti kuña ueka Jesús uyapo waerā ikawi wae imembi reta pewarā**

*(Marcos 10.35-40)*

<sup>20</sup>Jokua jaikue rupi yuweru Jesús oï wae pe Zebedeo jembireko jare imembi reta ndiwe – jae ko Jacobo jare Juan. Jayawe kuña uñeño itawa re Jesús jowai jare jei chupe: “Che aipota nde ndiyapo waerä chewe ikawi wae,” jei chupe.

<sup>21</sup>Jayawe Jesús upirandu kuña pe: “¿Mbae pa ndipota?” jei chupe. Jare kuña jei chupe: “Nde neï ma yawe opaete wae imburuwicha wasurä, ere mii kua mokui chemembi pe uwapi waerä ndeyipi pe, pëti wae oï waerä ndeakata koti jare ïru wae oï waerä ndeaso koti. Jukuärái jae reta ipuereta oporoyokui nde ndiwe,” jei kuña chupe.

<sup>22</sup>Jayawe Jesús jei chupe reta: “Pe reta pikuaa’ä mbae ra peka peï wae,” jei chupe reta. Jayawe jei Jacobo jare Juan pe: “¿Pepuereta pa piporara che aiporarata wae rami?” jei chupe reta. “Orepuereta ko,” jei reta.

<sup>23</sup>Jayawe Jesús jei chupe reta: “Añetete ko piporarata che rami,” jei. “Erëi chepuere’ä jae pewe pëti wae uwapi waerä cheakata koti jare ïru cheaso koti. Echa’ä cheRu Tumpa uyapikatu ma jokua tenda reta kía nunga jae uiparawo wae reta pewarä,” jei chupe reta.

### **Kía uipota tenondewarä iko wae tuyeyokui ïru wae reta pe**

*(Marcos 10.41-45)*

<sup>24</sup>Jare ïru payandepo Jesús jemimboe reta uikuaa yawe Jacobo jare Juan mbae ueka reta Jesús pe wae, pochi chupe reta.

<sup>25</sup>Jayawe Jesús ueni opaete jemimboe reta ikoti jare jei chupe reta: “Pe reta pikuaa peï mburuwicha reta jare itenondewa reta kua iwï pewa kërái ko jeko wae. Jae reta jekuaeño uikuaaka yandewe yande ñäi jae reta imbaepuere pe wae,” jei chupe reta.

<sup>26</sup>“Erëi pe reta awiyeta ko piyapo jukuärái,” jei. “Ime yawe pepite pe pëti wae uipota mburuwicharä iko wae, tuyeyokui ïru wae reta pe,” jei.

<sup>27</sup>“Jare ime yawe pepite pe pëti wae uipota iko tenondewarä wae, tuyeyokui ïru wae reta pe pëti pione täta uyeyokui wae rami,” jei.

<sup>28</sup>“Jukuärái wi che kuimbaerä ayeyapo wae ayu’ä ko ïru wae reta uyeyokui waerä chewe. Che ayu ko ayeyokui waerä ïru wae reta pe jare amee waerä cherekowe jeta wae reta aepi waerä.” Jukuärái jei Jesús jemimboe reta pe.

### **Jesús uminguera mokui kuimbae jesa mbae wae**

*(Marcos 10.46-52; Lucas 18.35-43)*

<sup>29</sup>Jayawe yuraa reta tëta wasu Jericó wi Jerusalén koti, jare jeta ïru wae reta yuraa Jesús jupie wi.

<sup>30</sup>Jare ime iko mokui kuimbae jesa mbae wae reta uwapi ñonoï tape jembei pe. Jare uyandu reta yawe uasa iko jokoropi Jesús, umbipi usapikai reta Jesús pe kuärái: “OreYa, David ñemoña pewa, oreparareko mii,” jei parawete reta.

<sup>31</sup>Erëi jeta joko pe ñonoï wae reta uñeengata tēi chupe reta. “Pekii,” jei chupe reta. Erëi kuimbae jesa mbae wae reta jeiete usapikai Jesús pe: “OreYa, David iñemoña pewa, reparareko mii,” jei reta.

<sup>32</sup>Jayawe Jesús uyemboi jare ueruruka reta. “¿Mbae pa pipota ayapo waerä pewe?” jei chupe reta.

<sup>33</sup>“OreYa, nduipota numae mii,” jei reta chupe.

<sup>34</sup>Jayawe Jesús uiparareko umae jese reta, jare uyawiki jesa chuwi reta. Jare jupiwoiño mokui rewe ipuere umae kawi, jare yuraa reta Jesús jupie.

## Mateo 21

### Jesús uike Jerusalén pe

(*Marcos 11.1-10; Lucas 19.28-38; Juan 12.12-19*)

<sup>1</sup>Koiño tēta wasu Jerusalén wi, ñaipe Olivorenda jee wae jowai, ime oï pēti tēta wasu rai Betfagé jee wae. Jayawe Jesús jare jemimboe reta ndiwe yuraa seri ma uwäe reta yawe joko pe, Jesús jei mokui jemimboe reta pe:

<sup>2</sup>“Pekua pea tēta wasu rai yanderenonde oï wae pe. Jare joko pe pewäe yawe, pewäeta peï kuri pēti mburika uñeñapiti oï wae. Jare joko pe oï wi pēti mburika taurusu wae jae ndiwe. Piyora, peru mokui rewe chewe,” jei chupe reta.

<sup>3</sup>“Jare ime yawe kía upirandu pewe wae, pereta chupe: ‘YandeYa uipota uiporu, erëi imambaeño ueruruka yeta ueya pewe,’ pere.” Jukuärái jei Jesús chupe reta.

<sup>4</sup>Jayawe opaete kua mbaembae uasa uyeyapo waerä kërái arakaete Tumpa jei wae rupi. Echa’ä jae jei iñee umimbeu wae rupi kuärái:

<sup>5</sup>“Pemimbeu Jerusalén pewa reta pe: ‘Mase, pemburuwicha wasurä ou oï pepi. Uñemimichi rewe opo ou oï pēti mburika imembi taurusu wae re,’ pemimbeu chupe reta.” Jukuärái jei.

<sup>6</sup>Jayawe joku mokui Jesús jemimboe reta yuraa jare uyapo reta Jesús oyokui wae.

<sup>7</sup>Ueru reta mburika jare mburika taurusu wae Jesús oï wae pe, jare omboi reta iñepëwaka oñono waerä mburika reta ikupe re. Jayawe Jesús opo mburika taurusu wae re, jare oo yuapi ye Jerusalén koti.

<sup>8</sup>Jare jeta wae reta yuweru jare iñepëwaka uipiso reta tape rupi mburika jenonde. Jare ñru wae reta uyasia karandai joki jare uipiso reta tape rupi. <sup>9</sup>Jare Jesús jenonde jare jaikue rupi yuraa yureko wae reta usapikai pii rewe jei reta: “¿Tuyembutuichaka kua David iñemoña reta pewa jee! ¿Tumpa tuyapo ikawiete wae kua ou oï Tumpa jee re wae pe! ¿Tuyembutuichaka Tumpa jee ara pe!” Jukuärái jei reta usapikai pii rewe.

<sup>10</sup>Jare Jesús oo uwäe yawe Jerusalén pe, opaete tēta wasu rupi ipiakañi reta jare upirandu reta iyupe: “¿Kía ra ko jae?”

**11**Jare jokua jeta wae reta yuweru Jesús ndiwe wae reta jei chupe reta: “Kua ko jae Jesús tēta wasu Nazaret pewa, iwi Galilea pe oī wae. Tumpa ombou umimbeu waerä ñee chuwi etei ou wae,” jei reta.

### **Jesús omoë mbaemimba owaka wae reta tupao wasu joka wi**

*(Marcos 11.15-18; Lucas 19.45-46)*

**12**Jayawe Jesús oo uike tupao wasu joka pe kiape judío mbae wae reta ipuere uyembati umbutuicha reta waerä Tumpa jee. Erëi joko pe ime jeta wae reta owaka ñonoī mbaemimba uñemee waerä Tumpa pe wae. Jayawe Jesús opa omoë joko wi jokua mbaemimba owaka wae reta jare owa ñonoī wae reta wi. Jare jokua uipepika korepoti iwi ambie wi ueru wae reta imesa reta Jesús opa umbiyapara wiraa chuwi reta. Jae nunga uyapo wi pikasuowaka wae reta jenda.

**13**Jare jei chupe reta: “Tumpa jei iñeeriru pe kuärái: ‘Cherēta ko jae yerurerenda pewa.’ Jukuärái Tumpa jei. Erëi pe reta piyapo pei imonda wae reta iñemía rami,” jei Jesús chupe reta.

**14**Jayawe Jesús tupao wasu joka pe oī rambuewe, yuweru ikoti jesa mbae wae reta jare iköcho wae reta. Jare Jesús opa uminguera reta.

**15**Jare joko pe ñonoī wi sambiaī reta. Jae reta usapikái rewe jei pii yureko: “¡Tuyembutuichaka kua David iñemoñaa reta pewa jee!” jei reta. Jayawe sacerdote itenondewa reta jare Moisés uikuatía wae re oporomboe wae reta uecha yawe Jesús upuruminguera oī jare sambiaī reta usapikái pii ñonoī, pochi reta, echa’ä wirowia’ä reta Jesús ko jae Upuruepi wae.

**16**Jayawe jae reta jei Jesús pe: “¿Ndiyandu’ä yerá kua reta mbae jei usapikái ñonoī wae?” jei reta chupe. “Ayandu,” jei Jesús. “Jare pe reta, ¿pemingeta’ä yerá Tumpa iñeeriru pe uyekuatía oī wae? Joko pe jei: ‘Nde, cheTumpa, ndiyapo ma nderee uyembutuichaka waerä sambiaī reta pe jare imeño ukambu ñonoī wae reta pe.’ Jukuärái uyekuatía oī,” jei chupe reta.

**17**Jayawe Jesús ueya reta, jare oë oo Jerusalén wi tēta wasu rai Betania koti, jare joko pe umbiasa pītu.

### **Iwa ía mbae wae**

*(Marcos 11.12-14,20-24)*

**18**Jayawe piarewe pe ndimbowe etei Jesús jare jemimboe reta ndiwe yuraa ye Jerusalén koti. Jare Jesús iyembai.

**19**Jare uecha tape jembei pe pēti iwa. Jayawe oo tēi umae jese. Erëi mbaeti ía; jaeño joki. Jayawe jei iwa pe: “Kua wiwe ndarau ye ma ndeía,” jei chupe. Jare jupiwoiño iwa opa utini.

**20**Jare Jesús jemimboe reta kua uecha yawe, ipiakañiete upita jare jei reta: “¿Kērái ra jupiwoiño opa utini kua iwa joki?” jei reta.

**21**Jayawe Jesús jei chupe reta: “Che tae pewe añetete wae, pe reta perowia yawe añetete rewe Tumpa re, jayawe pepuereta wi piyapo kua nunga che ayapo iwa pe

wae. Jare jokuaño'ä ko. Pepuereta wi pere kua iwitu wasu rai pe oo uyemombo waerä mar pe, jare jukuärái uyeyapota ko pewe," jei.

<sup>22</sup>“Jare pipota yawe Tumpa ipotawe mbae uyapo waerä pewe, piyerure Tumpa pe jese. Jare perowia kawi Tumpa uyapota oï pewe yawe, jayawe uyapota ko,” jei Jesús jemimboe reta pe.

### **Jesús umikii jowaicho reta**

*(Marcos 11.27-33; Lucas 20.1-8)*

<sup>23</sup>Jayawe Jesús oo uike ye tupao wasu joka pe jare umbipi omboe joko pe ñonoï wae reta. Jare yuweru ikoti sacerdote itenondewa reta jare judío itenondewa reta, jare upirandu reta chupe: “¿Kía pa nembou kua mbaembae ndiyapo waerä? ¿Kía pa jei ndewe ndepuere nemoë waerä mbaemimba owaka wae reta tupao wasu joka wi?” jei reta chupe.

<sup>24</sup>Jayawe Jesús jei chupe reta: “Che tapirandu wi pewe mbae re,” jei chupe reta. “Pemimbeu yawe chewe, che wi amimbeuta pewe kía ko chembou kua mbaembae ayapo waerä,” jei.

<sup>25</sup>“Pemimbeu chewe, ¿kía pa ombou Juan upurumbisakambu waerä? ¿Tumpa ra ombou, ani kuimbae retaño ra ombou?” jei chupe reta. Jayawe jae reta yuraa ikotiä mii jare jei iyupe: “Yae yawe, ‘Tumpa ko ombou Juan,’ jayawe Jesús jeita yandewe, ‘Jukuärái yawe, ¿maera pa perowia’ä jae jei wae?’ jeita yandewe.

<sup>26</sup>Erëi yae yawe, ‘Kuimbae retaño ko ombou,’ jayawe ipuereta kua uyembati ñonoï wae reta uyembopochi yandekoti. Echa’ä kua pochí reta wirowia tēi Tumpa ko ombou Juan umimbeu waerä ñee Tumpa wi etei ou wae,” jei iyupe reta.

<sup>27</sup>Jayawe jei reta Jesús pe: “Ore nduikuaa’ä kía ra ko ombou Juan wae,” jei reta. Jayawe Jesús jei chupe reta: “Jayawe che wi ndarau amimbeu pewe kía ko chembou kua mbaembae ayapo waerä,” jei chupe reta.

### **Jesús imiäri pēti kuimbae jare mokui tai reta rewa**

<sup>28</sup>“Piyapisaka cheré. ¿Mbae ra pereta? Ime iko pēti kuimbae mokui tai reta onoi wae. Pēti ara kua kuimbae jei tai tenondewa pe: ‘Cheraí, kua ara ekua mii eparawiki yandeko pe,’ jei chupe.

<sup>29</sup>“Jayawe kunumi jei tu pe: ‘Aipota’ä,’ jei chupe. Erëitu taikue rupi ueya ipiyemingeta jare oo uparawiki koo pe,” jei.

<sup>30</sup>“Jayawe kuimbae jei iru tai pe: ‘Cheraí, kua ara ekua mii eparawiki yandeko pe,’ jei chupe. “Jare kunumi jei tu pe: ‘Jaikó. Taa taparawiki jayawe,’ jei tēi. Erëi oo’ä,” jei Jesús.

<sup>31</sup>“Jayawe ¿kía nunga pa kua mokui wae wi uyapo tu jei wae?” jei chupe reta. “Jokua tenondewa,” jei mburuwicha reta Jesús pe. Jayawe Jesús jei chupe reta: “Che tae pewe añetete wae, jeta mburuwicha pewarä okowara wae reta jare kuña jete re umingana wae reta, jae reta ko jokua kuimbae tai tenondewa rami. Echa’ä



ñonoï rape'ä echa Tumpa ndiwe, Tumpa oï ma yawe opaete wae imburuwicha wasurä. Erëi añetete jeta jae reta ñonoïta Tumpa ndiwe,” jei chupe reta. “Erëi pemaerä mbaetita jokua,

<sup>32</sup>echa'ä Juan ou tēi uikuaaka pewe kērāi pepuere waerä peï pereko mbae wae rami Tumpa jowai, erëi pe reta perowia'ä jae jei wae. Erëi jeta mburuwicha pewarä okowara wae reta jare kuña jete re umingana wae reta wirowia. Kua pikuaa kawi peï tēi, erëi pipota'ä ñeño peya pepiyemingeta jupi mbae wae Tumpa rewa. Jekuaeño perowia'ä Juan jei wae re,” jei Jesús chupe reta.

### **Jesús umbijaanga uvarupa uiporu wae reta re**

*(Marcos 12.1-12; Lucas 20.9-19)*

<sup>33</sup>Jayawe Jesús jei wi jokua judío itenondewa reta pe: “Piyapisaka kawi kua che jaeta pewe ambijaanga rewe wae re: Ime iko pēti kuimbae uvaruparä uyapo wae,” jei chupe reta. “Jae uikēse kawi jokua uvarupa, jare oñoti pipe jeta uva,” jei. “Jare uyapo wi uva uñetami pipe waerä. Jare uyapo wi pēti chapapa iwate, joko wi umae waerä opaete uvarupa re,” jei. “Jare opa ma uyapikatu kawi yawe jokua uvarupa, iya umee ambie reta pe uyandareko jese waerä. Jare jei chupe reta: ‘Piyandareko kawi uvarupa re. Jare uva yawiye ma yawe, mbite ameeta pewe kuri,’ jei chupe reta. Jayawe uvarupa iya oo mbiri ambie iwi pe,” jei Jesús.

<sup>34</sup>“Jayawe uva yawiye ma yawe, uvarupa iya ombou amokue uyeyokui chupe wae reta uvarupa uiporu wae reta pe ueka waerä tēi chupe reta jae imbae wae.

<sup>35</sup>Erëi uvarupa uiporu wae reta uipisi jokua uyeyokui wae reta. Jare pēti wae uinupa reta, jare ñru wae uyuka reta, jare ñru uyapi reta ita pe uyuka waerä,” jei.

<sup>36</sup>“Jayawe uvarupa iya ombou ye tēi jeta katu uyeyokui wae reta tenonde ombou wae wi. Erëi uvarupa uiporu wae reta jekuae jukuärāi uyapo ye chupe reta,” jei.

<sup>37</sup>“Taikue rupi uvarupa iya ombou tai etei. Echa'ä jei tēi iyupe: ‘Kua cheraï wi uipiuta ko reta,’ jei tēi.

<sup>38</sup>“Erëi uvarupa uiporu wae reta uecha tai ou oï yawe, jei reta iyupe: ‘Pea ou oï wae ko jae uvarupa iyarä wae. Yayuka ñañono, jare uvarupa upitata yanemaerä,’ jei iyupe reta.

<sup>39</sup>Jayawe jae reta uipisi, jare omombo reta uvarupa wi oka pe, jare joko pe uyuka etei reta,” jei chupe reta.

<sup>40</sup>Jayawe Jesús jei wi mburuwicha reta pe: “Jayawe uvarupa iya ou ye yawe, ¿mbae ra uyapota jokua uvarupa uiporu wae reta pe?” jei chupe reta.

<sup>41</sup>Jayawe mburuwicha reta jei Jesús pe: “Opata uyuka jokua kuimbae jeko kachi wae reta, jare uiporukata uvarupa ambie wae reta pe – jae ko kía reta umeeta chupe imaerä uva yawiye ma yawe wae,” jei reta chupe.

<sup>42</sup>Jayawe Jesús jei wi chupe reta: “¿Pemingeta'ä yerá Tumpa ñneeriru pe uyekuatía oï wae? Echa'ä joko pe uyekuatía oï umbijaanga rewe Upuruepi wae re kuärāi: ‘Jokua ita tēta iyapoa reta wiriro omombo iyuwu reta wae, añawe uyeyapo ma

chuwí reta ita ikawíete ye wae opaete ñru ita reta tēta pewa wi. Jukuärái Tumpa uyapo. Jare jokua orembipiakañiete.’ Jukuärái uyekuatía oí,” jei Jesús chupe reta.

<sup>43</sup>“Jáeramo pe reta chereriro ramo, che tae pewe, pe reta ndarau pei Tumpa ndiwe jae oí ma yawe opaete wae imburuwicha wasurä jaeño máí pewa. Echa’ä Tumpa umeeta oí ñru wae reta pe jokua jae uyapikatu tēi pemaerä wae. Jare jae reta uyeyokui kawita Tumpa pe,” jei chupe reta.

<sup>44</sup>“Che ko jae jokua ita rami. Jare yande reta yaikuaa kawí ñai pēti yambii oa yawe ita re, ani ita oa yawe yambii re, yambii opata iperaso,” jei. “Jare jukuärái rami wi ko uyeyapota oí ipotawe kía chereriro wae pe. Jae uyererukachita oí.” Jukuärái Jesús jei mburuwicha reta pe.

<sup>45</sup>Jayawe jokua sacerdote itenondewa reta jare fariseo reta uyandu yawe Jesús jei wae, uikuaa kawí reta Jesús jei iko chupe reta wae – jae reta ko jokua uvarupa uiporu wae reta rami, echa’ä wiriro reta Jesús.

<sup>46</sup>Jáeramo jae reta uipota tēi jawoi pewa uipisika reta Jesús. Erēi ukiye reta uipisika waerä. Echa’ä joko pe uyembati ñonoí jeta wae reta wirowia Tumpa ko ombou Jesús umimbeu waerä ñee chuwí etei ou wae. Jare aramoi jae reta uyembopochita jokua mburuwicha reta koti, jae reta uipisika yawe Jesús.

## Mateo 22

### Jesús umbijaanga mbarea menda pewa re

(Lucas 14.15-24)

<sup>1</sup>Jayawe Jesús omboe ye joko pe ñonoí wae reta umbijaanga rewe. Jei chupe reta:

<sup>2</sup>“Pēti ara Tumpa ikota opaete wae imburuwicha wasurä jaeño máí pewa. Jare yandepuere yambijaanga jokua ara re kuärái: Ime iko pēti mburuwicha wasu tai umendata iko wae. Jayawe tu uipota uyapoka chupe tembiu ikawí wae, jare uparea jeta wae reta pe yuweru waerä jare uyekou waerä wi.

<sup>3</sup>Jayawe uwäe ma ara yawe tai umenda waerä, mburuwicha wasu omondo uyeyokui chupe wae reta ueni waerä uparea chupe reta wae pe. Erēi jae reta ñatēi yuweru,” jei.

<sup>4</sup>“Jayawe mburuwicha wasu omondo ye ñru uyeyokui wae reta. Jare jei chupe reta: ‘Pekua pemimbeu apareta chupe wae reta pe: ‘Mase, jae ma oí yakaru waerä. Ayukaka ma cheweye reta jare ñru cherimba ikira wae reta. Opa ma ayapikatu kawí. Jayawe peyu kua menda pe perorikatu waerä,’ pere chupe reta,’ jei mburuwicha wasu uyeyokui wae reta pe.

<sup>5</sup>“Erēitu jokua uparea chupe wae reta uipota’ä ñeño yuweru. Pēti wae oo uparawiki iko pe. ñru wae oo mbaembae owaka.

<sup>6</sup>Jare ñru wae reta uipisi mburuwicha wasu ombou wae reta, jare uyapo chupe reta ikawí mbae wae, jare joko wi uyuka reta,” jei.

7“Jayawe mburuwicha wasu kua uikuaa yawe, pochiete. Jáeramo omondo isindaro reta opa uyuka waerä jokua upuruyuka wae reta jare opa uapi waerä chuwi reta jokua jëta wasu,” jei.

8“Joko wi mburuwicha wasu jei uyeyokui wae reta pe: ‘Opaete uyeyapikatu ma oi yakaru kawi waerä menda pe. Erëi jokua tenonde aparea tëi chupe wae reta, jupi’ä ko yuweru waerä,’ jei.

9“Jáeramo pekua opaete tape reta rupi, jare peparea opaete pewäe chupe wae reta pe yuweru waerä menda pe,’ jei chupe reta,” jei.

10“Jayawe uyeyokui wae reta yuraa tape reta rupi ueru opaete uwäe chupe wae reta – kua reta ko jae jeko kawi wae jare jeko kachi wae wi. Jare jae reta opa umitinee mburuwicha wasu jëta,” jei.

11“Jare mburuwicha wasu ou uwäe yawe uikuaa waerä jokua yuweru wae reta, uecha joko pe pëti kuimbae mbaeti temimonde menda pewa onoi wae.

12Jayawe jei chupe: ‘Cheïru, ¿kërái pa nde ndike kua pe temimonde menda pewa mbaeti neni rewe? Kua jupi’ä etei ko,’ jei chupe. Erëi kuimbae jei’ä mbae awe. Kiiño upita,” jei Jesús.

13“Jayawe mburuwicha wasu jei uyeyokui wae reta pe: ‘Piñapiti ipo rupi jare ipi rupi, jare peraa pemombo oka pe pitumimbi oi wae pe. Joko pe uyaota tëi jare jäi umbikiririuta, echa’ä ikuasi katuete oi ramo,’ jei chupe reta,” jei Jesús.

14Jayawe Jesús jei wi joko pe ñonoï wae reta pe: “Jae ramiño wi Tumpa ueni tëi jeta wae reta, erëi mbowiño yuweru. Jae retaño ko jae Tumpa uiparawo wae reta,” jei chupe reta.

### **Amokue reta uipota tëi uyawika Jesús pe iñee rupi**

*(Marcos 12.13-17; Lucas 20.20-26)*

15Jayawe kua jaikue rupi fariseo reta uyembati, jare uyemboemboe kërái uyawika reta waerä tëi Jesús pe iñee rupi umbijeko reta waerä.

16Jayawe jae reta omondo amokue jemimboe reta Jesús oi wae pe mburuwicha Herodes imboria reta ndiwe. Jae reta jei Jesús pe: “Oporomboe wae, ore nduikuaa nde jekuaño ndiyemingeta jupi rupi jare ndeporomboe kawi kërái yambiyerowia waerä Tumpa. Nde nemea oyowake opaete wae re jare niñemaño’ä ndiyé,” jei reta.

17“Jayawe ore nduipota ndupirandu ndewe mbae re. Romano reta imburuwicha wasu César jei yandewe yambiepi waerä chupe korepoti pe opa año rupi. Erëi ¿mbae pa ndere nde? Emimbeu orewe, ¿jupi ra yambiepi chupe waerä, ani jupi’ä ra?” jei reta chupe.

18Erëi Jesús uikuaa jae reta jaño uipota tëi uyapo ikawi mbae wae chupe. Jayawe jei chupe reta: “Pe reta ko jae mokui jowa wae reta. ¿Maera pa pipota piyawika pei chewe?” jei.

19“Pechaka chewe pëti korepoti pembiepi mburuwicha wasu pewarä wae,” jei chupe reta. Jayawe ueru reta chupe pëti korepoti.

20Jare Jesús upirandu chupe reta: “¿Kía jowa iä pa oï jese, jare kía jee pa uyekuatía oï jese?” jei chupe reta.

21“César,” jei reta. Jayawe Jesús jei chupe reta: “Jayawe kua ko jae César imbae. Pemee ye chupe jayawe. Erëi pemee wi Tumpa pe jokua mbaembae Tumpa uipota wae,” jei chupe reta.

22Jare kua uyandu reta yawe, ipiakañi upita reta. Jayawe ueyaño reta Jesús jare opa yuraa ye reta.

### **Jesús oporomboe umanokue wae reta ikowe yeta wae rewa**

*(Marcos 12.18-27; Lucas 20.27-40)*

23Jare jokua ara etei yuweru Jesús oï wae pe amokue mburuwicha reta, saduceo jei chupe reta wae. Opaete saduceo reta jei tëi umanokue wae reta ndarau ma ikowe ye. Jayawe yuweru wae reta jei Jesús pe:

24“Oporomboe wae, ore nduipota ndupirandu ndewe pëti mbae re. Moisés arakae jei kuärái: ‘Pëti kuimbae umano yawe jembireko umimembi mbae rewe, jayawe kuimbae amiri tiwi tumenda jokua kuña ndiwe. Jayawe umimembi yawe, kuimbae amiri onoita inemoña tiwi rupi.’ Jukuärái jei Moisés,” jei reta.

25“Jayawe ime iko orepite pe pëti kuimbae owa tiwi reta onoi wae. Kua kuimbae umenda, jare umano jembireko umimembi mbae rewe,” jei reta. “Jayawe kuimbae amiri tiwi jae iyeuka umenda jokua kuña ndiwe.

26Jare jae wi umano jembireko umimembi mbae rewe,” jei reta. “Jae nunga wi jukuärái uyeyapo jaikue rupiwa reta pe. Opaete chiu rewe pëti pëti umenda jokua kuña ndiwe, jare opaete pëti pëti rupi umano reta umimembi mbae rewe.

27Jare jaikue rupi kuña parawete umano wi,” jei reta.

28“Jayawe añetete yawe umanokue wae reta ikowe yeta, ¿kía nunga wae jembirekorä pa ikota jokua kuña jae reta ikowe ye yawe? Echa’ä opaete chiu rewe umenda jae ndiwe.” Jukuärái jei saduceo reta Jesús pe.

29Jayawe Jesús jei chupe reta: “Pe reta pikuaa’ä Tumpa inee uyekuatía oï wae, jare pikuaa’ä etei wi kërái ko Tumpa imbaepuere wae. Jáeramo piyawí ko piyemingeta umanokue wae reta rewa.

30Echa’ä jokua ara umanokue wae reta ikowe ye yawe, ndarau ye ma umenda reta. Echa’ä yurekota araiwa reta yureko wae rami,” jei chupe reta.

31“¿Pemingeta’ä yerá Tumpa jei pewe ineeriru pe wae? Joko pe jei simi umanokue wae reta ikowe yeta wae rewa.

32Echa’ä jei kuärái: ‘Che ko jae nderamikue reta Abraham, Isaac, jare Jacob i Tumpa.’ Jukuärái Tumpa jei yepe tëi yanderamikue reta arakaete ye ma opa umano,” jei. “Añetete umanokue wae reta mbaeti yawe onoi tekowe, jayawe

Tumpa ndarau jei tēi jae ko jae reta iTumpa wae, echa'ä jae ko ime tekowe onoi wae reta iTumpa,” jei. “Jayawe kua uikuaaka yandewe yanderamikue reta imeño yepete tekowe onoi,” jei Jesús saduceo reta pe.

<sup>33</sup>Jare uyembati wae reta kua uyandu yawe, opa ipiakañiete Jesús oporomboe wae re.

### **Jesús oporomboe Tumpa mbae jei wae ikawiete ye wae rewa**

*(Marcos 12.28-31)*

<sup>34</sup>Jayawe fariseo reta uikuaa yawe Jesús opa umikii oñono saduceo reta, uyembati amokue fariseo reta Jesús oï wae pe.

<sup>35</sup>Jayawe pēti wae – jae ko Moisés uikuatía wae re oporomboe wae – upirandu Jesús pe mbae re uyawika waerä tēi chupe iñee rupi.

<sup>36</sup>Jei chupe: “Oporomboe wae, opaete mbaembae Tumpa jei yandewe wae wi, ¿mbae nunga pa ko jae ikawiete ye wae yayapo waerä?” jei chupe.

<sup>37</sup>Jayawe Jesús jei chupe: “Jae ko kua: ‘Peau yandeYa Tumpa pepia rewe, pekirēi rewe, pepiayemingeta rewe, jare añetete rewe.’ <sup>38</sup>Opaete mbaembae Tumpa jei wae wi, jokua ko jae ikawiete ye wae ndiyapo waerä,” jei chupe.

<sup>39</sup>“Jare jaikue rupiwa jukuärái etei wi ko jae kua: ‘Peau perapicha kērái pe reta etei piyerau wae rami.’ <sup>40</sup>Kua mokui mbaembae ndiyapo yawe, ndiyapo ma ko Moisés jare ñru kuimbae Tumpa iñee arakae umimbeu wae reta jei wae rupi opaetei,” jei Jesús chupe.

### **Upuruepi wae David iñemoña pewaño'ä ko**

*(Marcos 12.35-37; Lucas 20.41-44)*

<sup>41</sup>Jare fariseo reta imeño joko pe ñonoï rambuewe, Jesús upirandu chupe reta:

<sup>42</sup>“¿Mbae pa pere Cristo yae chupe wae rewa? ¿Kía iñemoña pewa ra ko jae?” jei chupe reta. Jare fariseo reta jei chupe: “Jae ko David iñemoña reta pewa,” jei reta.

<sup>43</sup>Jayawe Jesús jei chupe reta: “Jukuärái yawe, ¿maera pa David etei Espíritu Santo imbaepuere rupi arakaete jei chupe, ‘CheYa’?”

<sup>44</sup>Echa'ä jae jei kuärái: ‘Tumpa ikoño mái wae jei cheYa pe kuärái: ‘Ewapi kua cheakata kotí, nderowaicho reta opa añonoka rewa itawa re nderowai,’ jei Tumpa.’ Jukuärái David uikuatía arakaete rupi kērái Cristo jae'ä ko kuimbaeño. Jae ko iYa wi.

<sup>45</sup>Jayawe David etei jei chupe yawe, ‘CheYa,’ ¿kēraita pa jayawe Cristo ipuere iko David iñemoña pewaño?” jei Jesús chupe reta.

<sup>46</sup>Jare kiawe ipuere'ä umimbeu chupe. Jare joko wiwe kiawe uipota'ä ye ma upirandu Jesús pe mbae re awe, echa'ä aramoi ipuere uñemimaraka reta.

## **Mateo 23**

## Jesús umbijeko judío imburuwicha reta

(Marcos 12.38-40; Lucas 11.37-54, 20.45-47)

- 1 Jayawe Jesús jei jemimboe reta pe jare jeta joko pe ñonoï wae reta pe wi:
- 2 “Moisés uikuatía wae re oporomböe wae reta jare fariseo reta uwapi yandetupao pe Moisés iwapiá yae chupe wae pe. Jare jukuärái jae reta ime onoi mbaepuere oporomböe waerä Tumpa iñee re.
- 3 Jáeramo piyapota ko jae reta jei pewe wae rupi,” jei. “Erëi awiye piko jae reta yureko wae rami, echa’ä jae reta etei uyapo’ä ñonoï mbae jei pewe piyapo waerä wae,” jei.
- 4 “Jae reta umiïru pewe jetaete ye mbaembae piyapo waerä, jare jei reta tëi pewe: ‘Kua rupi ko piyeyokuita Tumpa pe.’ Jukuärái jei reta tëi. Erëi jukuärái jae reta jaeño oñono ñonoï peré tewita poiete wae pewoi peraa waerä wae rami. Erëi michi mii awe yepe jae reta pembori’ä,” jei chupe reta.
- 5 “Moisés uikuatía wae re oporomböe wae reta jare fariseo reta uyapo yawe mbae, ïru wae reta umae jese waeräño ko uyapo reta. Pe reta pikuaa kawi kua yandereko pe jeta kuimbae reta amo pe uñapiti jesiwa re pëti jiru mii, jare japipe oï amokue Tumpa iñee. Jare jemimonde onoi topea mii reta. Jukuärái uyapo reta imandúa waerä yandeRu Tumpa re,” jei. “Erëi Moisés uikuatía wae re oporomböe wae reta jare fariseo reta uipotaeete opaete wae reta wirowia waerä tëi kërái uipiüete ko oï Tumpa wi. Jáeramo jiru mii oñono reta jesiwa re wae tuicha ko, jare jukuärái wi jemimonde jopea umbupuku reta,” jei chupe reta.
- 6 “Jare yuraa reta yawe tupao pe, jae reta uipotaeete uwapi tenda tenondewa ikawiete wae pe. Jare jukuärái uyapo reta wi uparea chupe reta yawe,” jei.
- 7 “Jare jae reta uwata ñonoï mercado rupi yawe, jekuaeño uipota ïru wae reta umbisaluda waerä uipiü chuwi rewe. Jare jekuaeño jae reta uipota ïru wae reta uipiü rewe jei chupe reta waerä, ‘Chemboea.’
- 8 “Erëi pe reta, awiye kía tei pewe, ‘Chemboea.’ Echa’ä cheño ko jae pemboea, jare opaete pe reta oyowake pëti tëtara ko,” jei chupe reta.
- 9 “Jare awiye kía kua iwi pewa pe pere, ‘Cheru.’ Echa’ä pëtiño ko jae peRu – jae ko ara pe oï wae,” jei chupe reta.
- 10 “Jare awiye wi kía tei pewe, ‘Cheya.’ Echa’ä pëtiño ko jae peYa – jae ko che. Echa’ä che ko jae Cristo pere chupe wae,” jei chupe reta.
- 11 “Ime yawe kía pepite pe uipota iko petenondewarä wae, tuyeyokui ïru wae reta pe pëti pione uyeyokui rami.
- 12 Echa’ä Tumpa umimichita oï uyembutuicha wae reta, jare umbutuichata oï uñemimichi wae reta,” jei chupe reta.
- 13 Joko wi Jesús jei: “Pe Moisés uikuatía wae re peporomböe wae reta jare fariseo reta, pe reta añetete wae nunga piyeyokui Tumpa pe. ¡Tumpa tuicha uiporarakata oï

pewe!” jei chupe reta. “Echa’ä peporomboe kachi wae rupi piyopia peï iru wae reta wi awiye waerä ñonoï Tumpa ndiwe jae oï ma yawe opaete wae imburuwicha wasurä. Pe reta mbaeti penoi Tumpa pemburuwicha wasurä, jare jukuärái piyopia peï wi chuwi reta awiye waerä jae reta wi onoi Tumpa,” jei chupe reta.

14“Pe Moisés uikuatía wae re peporomboe wae reta jare fariseo reta, pe reta añetete wae nunga piyeyokui Tumpa pe. ¿Tumpa tuicha uiporarakata oï pewe!” jei chupe reta. “Echa’ä puku piyerure Tumpa pe opaete wae umae waerä tēi peré jupi ko peï Tumpa ndiwe wae. Erēi tawi rupi pepiro kuña ime umano chuwi wae reta wi imbaembae. Jáeramo tāta rupi Tumpa uiporarakata oï pewe,” jei chupe reta.

15“Pe Moisés uikuatía wae re peporomboe wae reta jare fariseo reta, pe reta añetete wae nunga piyeyokui Tumpa pe. ¿Tumpa tuicha uiporarakata oï pewe!” jei chupe reta. “Echa’ä peratangātu peï pewata waerä opaete rupi peka waerä kía iko waerä peremimboerä, yepe tēi pēti miño yepe,” jei chupe reta. “Jare jae parawete wirowia yawe pe reta perowia wae rami, jae jatangātuete uyeyapo pereko kachi wae re. Jáeramo jae parawete mokui wese yewi uiporarata pewi Tatawasurenda pe pereko pewa,” jei chupe reta.

16“Pe reta ko jae jesa mbae wae uipoko iru jesa mbae wae uruwata oï wae rami. ¿Tumpa tuicha uiporarakata oï pewe!” jei chupe reta. “Echa’ä pe reta pere: ‘Ime yawe kía jei, ‘Che tae ndewe tupao wasu jowake,’ jei wae, mbae’ä ko jokua,’ pere. Erēi ime yawe kía jei, ‘Che tae ndewe oro tupao wasu pe oï wae jowake,’ jei wae, jokua imeta ko uyemingeta añetete rewe. Ipuere’ä iyapu.’ Jukuärái pere,” jei chupe reta.

17“¿Pe reta peresa mbae ko peï Tumpa koti! ¿Pearakuaa mbae echa ko pe reta! ¿Maera ra jokua oro uñeñono tee oï Tumpa pewarä? Uñeñono tee oï, echa’ä oï tupao wasu pe ramo. Jáeramo tupao wasu ikawiete ko jokua oro tupao wasu pe oï wae wi,” jei chupe reta.

18“Jae ramiño wi pe reta pere: ‘Ime yawe kía jei, ‘Che tae ndewe mbaerenda mbaemimba uyeapi jese wae jowake,’ jei wae, mbae’ä ko jokua,’ pere. Erēi ime yawe kía jei, ‘Che tae ndewe mbaemimba uyeyukakue mbaerenda iáramo oï wae jowake,’ jei wae, jokua imeta ko uyemingeta añetete rewe. Ipuere’ä iyapu.’ Jukuärái pere,” jei chupe reta.

19“¿Pe reta peresa mbae peï Tumpa koti! ¿Pearakuaa mbae echa ko pe reta! ¿Maera ra jokua mbaemimba uyeyukakue uñeñono tee oï Tumpa pewarä? Uñeñono tee oï, echa’ä jokua mbaerenda iáramo oï ramo. Jáeramo mbaerenda ikawiete ko jokua mbaemimba uyeyukakue uñemee wae wi,” jei chupe reta.

20“Jáeramo ime yawe kía jei, ‘Che tae ndewe mbaerenda jowake,’ jei wae, mbaerenda jowakeño’ä ko jei oï. Jae nunga wi jokua mbaemimba uyeyukakue mbaerenda iáramo oï wae jowake ko jei oï wi,” jei.

21“Jae ramiño wi ime yawe kía jei, ‘Che tae ndewe tupao wasu jowake,’ jei wae, Tumpa jowake etei ko jei oï wi, echa’ä Tumpa oï tupao wasu japipe,” jei.

22“Jae ramiño wi ime yawe kía jei, ‘Che tae ndewe ara jowake,’ jei wae, Tumpa jowake etei ko jei oï wi, echa’ä ara pe ko oï Tumpa iwapia mburuwicha wasu pewa ramo,” jei chupe reta.

23“Pe Moisés uikuatía wae re peporomböe wae reta jare fariseo reta, pe reta añetete wae nunga piyeyokui Tumpa pe. ¡Tumpa tuicha uiporarakata oï pewe!” jei chupe reta. “Echa’ä pemeeñoi diezmo penoi wae wi, jare mbaembae tembiu pembipiche pipe wae retawe wi pemee diezmo. Erëi pe reta mbae piyapo wae michiete ko. Jetaete ko kua wi Tumpa jei pewe piyapo waerä wae. Echa’ä jei pewe piyapo waerä jupi wae, jare piparareko waerä perapicha, jare perowia kawi waerä Tumpa re. Erëi pe reta pewarä, mbae’ä ko jokua,” jei chupe reta. “Pe reta diezmo pemee wae, jaekawi oï tēi. Erëi piyapota tēi ko wi jokua ñru mbaembae reta,” jei chupe reta.

24“Pe reta ko jae jesa mbae wae uipoko ñru jesa mbae wae uruwata oï wae rami. Peratangätuete peï piyapo waerä opaete Moisés arakae uikuatía wae rupi michiete wae reta. Erëi jokua tenondete piyapota tēi wae piyapo’ä etei. Jare jukuärái pe reta peki peï ñeti perembiu wi rami awiye pemokui waerä, erëi pemokui ko peï pēti camello tuicha wae rami,” jei chupe reta umbijaanga rewe.

25“Pe Moisés uikuatía wae re peporomböe wae reta jare fariseo reta, pe reta añetete wae nunga piyeyokui Tumpa pe. ¡Tumpa tuicha uiporarakata oï pewe!” jei chupe reta. “Pe reta jupi wae echa ko. Erëi pe reta ko jae karúa reta jare vaso reta ikupekueño uyeyoe wae rami. Echa’ä pepia oï monda reño, jare pikoño piyembiyerowia katu waerä,” jei chupe reta.

26“¡Pe fariseo reta ko jae jesa mbae wae reta rami! Tenonde piyoeta rani ko peyuwi pepia, jare jayawe ramo pereko oïta ikawi añetete pewa,” jei chupe reta.

27“Pe Moisés uikuatía wae re peporomböe wae reta jare fariseo reta, pe reta añetete wae nunga piyeyokui Tumpa pe. ¡Tumpa tuicha uiporarakata oï pewe!” jei chupe reta. “Echa’ä pe reta ko jae teöwerenda reta uñemitii kawi oï wae rami. Jokua nunga teöwerenda ipöra uyekuaa yandewe oka rupi, erëi japipe rupi tinee maekäwe reta pe jare opa yea kërái ikia,” jei.

28“Jae ramiño wi oka rupi piyekuaa jupi wae echa, erëi pepia tinee oï tawi jare mbae ikawi mbae wae pipe.

29“Pe Moisés uikuatía wae re peporomböe wae reta jare fariseo reta, pe reta añetete wae nunga piyeyokui Tumpa pe. ¡Tumpa tuicha uiporarakata oï pewe!” jei chupe reta. “Pe reta piyapikatu peï kiae kiae Tumpa ñnee arakae umimbeu wae reta jeöwe oï wae rupi. Jare pemopöra jupi wae reta kiae kiae uñeñoti ñonoï wae jenda.

30Jare pere peï: ‘Yande reta yanderamikue reta rami’ä ko. Echa’ä jae reta uyuka arakae Tumpa ñnee umimbeu wae reta. Erëi yande moná yaiko yawe jae reta yureko yawe, ndarau yambori reta jae reta uyapo wae,’ pere tēi.

31Erëitu añawe pe reta pemomoe peï peramikue reta jeko wi.



- 32**Jayawe piyapo pochiño jokua peramikue reta umbipi uyapo wae,” jei chupe reta.
- 33**“¡Pe reta ko jae upurumbitawi wae reta! ¡Jukuärái iko peramikue reta, jare jukuärái wi ko pe reta! ¿Këraita ra pepuere peoyepe Tumpa iarasi wi jare Tatawasurenda wi?” jei chupe reta.
- 34**“Mase, che abouta ai chiñee umimbeu wae reta, jare iyarakuaa katu wae reta, jare oporomboe wae reta. Amokue wae jae reta, pe reta pikututa pei kuri kurusu re jare jukuärái piyukata. Jare iru wae reta pembipiuta petupao reta rupi. Jare paraikuemoñata reta wi peti teta wasu wi iru teta wasu pe piyapo waera ikawi mbae wae chupe reta,” jei chupe reta.
- 35**“Jáeramo peré oata oi teko opaete jupi wae reta juwi uyepiyere wae re pe reta piyuka wae rami. Jae ko opaete jupi wae reta Abel wiwe Zacarías rewa – jae ko Berequías tai. Jokua Zacarías, peramikue reta uyuka tupao wasu joka mbite pe etei,” jei chupe reta.
- 36**“Pe añawe pei wae reta, che tae ye pewe añetete wae, Tumpa uiporarakata oi pewe opaete jokua mbaembae reta re.” Jukuärái jei Jesús fariseo reta pe jare Moisés uikuatía wae re oporomboe wae reta pe.

### **Jesús ipiatiti Jerusalén pewa reta re**

*(Lucas 13.34-35)*

- 37**Joko wi Jesús jei tuicha ipiatiti rewe: “Pe Jerusalén pewa reta, jeta ma Tumpa ombou tei pewe jae iñee umimbeu wae reta jare iru chupe uyeyokui wae reta. Erëi pe reta jekuaño piyapi ita pe opa piyuka,” jei. “Jeta wese ma chekirëi tei pumbati ayandareko waera peré, peti uru imembi reta umbati ipepo iwi pe wae rami, erëi pe reta pipota’ä,” jei.
- 38**“Mase, añawe Tumpa pereyata oi, jare petupao wasu wi usirita oi.
- 39**Jare che tae pewe, ndarau ma cherecha pe reta pere chewe rewa kuärái: ‘Tumpa tuyapo ikawiete wae kua Tumpa jee re ou oi wae pe.’ Jukuäraita ko,” jei Jesús chupe reta.

## **Mateo 24**

### **Jesús umimbeu tupao wasu opata uiti wae rewa**

*(Marcos 13.1-2; Lucas 21.5-6)*

- 1**Jayawe Jesús oë oo tupao wasu joka wi. Jare oë oo iko rambuewe, yuweru jemimboe reta jare jei reta chupe: “Mase, ¡ipöraete ko kua tupao wasu joka rupi o rai reta!” jei reta.
- 2**Jayawe Jesús jei chupe reta: “Tuicha jare ipöra tei ñonoï reta,” jei. “Erëi che tae pewe añetete wae, outa uwäe oi ara opa uiti reta waera. Jare jokua ara ndarau peti awe ita upita iru ita iáramo,” jei chupe reta.

### **Jesús oporomboe mbaesusera reta uyeyapota oi wae rewa**

*(Marcos 13.3-23; Lucas 21.7-24)*

<sup>3</sup>Jayawe Jesús jemimboe reta ndiwe yuraa uyupi reta ñaipe Olivorenda jee wae re, jare Jesús uwapi. Jare joko pe jae retaño ñonoĩ rambuewe, jemimboe reta yuweru oya jese jare jei reta chupe: “Emimbeu mii orewe, ¿kërái yawe etei ra uasata kua mbaesusere tupao wasu rewa? Jare ¿këraita pa nduikuaa ndeyu yeta ma nei yawe jare ara iyapita ma oĩ yawe?” jei reta chupe.

<sup>4</sup>Jayawe Jesús jei chupe reta: “Piyandareko kawi piyé kuri awiye waerä kiawe pemitawí,” jei chupe reta.

<sup>5</sup>“Echa’ä outa jeta cheree pe uyembijeeraanga wae reta. Jare jeita tēi reta: ‘Che ko jae Cristo.’ Jare umbitawita jeta wae reta,” jei.

<sup>6</sup>“Jare imeta oĩ ñeräro reta koiño pewi. Jae nunga wi imeta oĩ ñeräro reta mbiri pewi. Erēi piyandu yawe kua reta rewa, awiye pekiye. Echa’ä kua mbaesusere reta uyeyapo ñotái ko. Erēi ndei witeño ko ara reta opa waerä,” jei.

<sup>7</sup>“Echa’ä jeta iwí pewa reta uñerärota ambie iwí pewa reta ndiwe, jare jeta mburuwicha reta uñerärota ambie mburuwicha reta ndiwe,” jei chupe reta. “Jare imeta wi karuái reta jare jeta iwikäta reta kerupi rupi.

<sup>8</sup>Jare jokua mbaesusere reta jaeño ko uyembipi wae. Kuña umbipi imembirasi oĩ wae rami ko jokua mbaesusere reta. Echa’ä imeñota jeta mbaesusere reta uyeyapo waerä,” jei chupe reta.

<sup>9</sup>“Jokua ara reta rupi perowaicho reta pepisita jare pereraata mburuwicha reta pe. Jare jae reta uiporarakata pewe jare peyukata wi. Jare cheré perowia ramo, opaete seri peamitääta,” jei.

<sup>10</sup>“Jare jeta wae reta opiata Tumpa wi. Jae reta uñeamitääta jae yepái, jare opata uñemee jae yepái towaicho reta ipo pe,” jei.

<sup>11</sup>“Jare imeta jeta Tumpa iñee umimbeuraanga wae reta. Jae reta jeita tēi: ‘Tumpa chembou animbeu waerä ñee chuwi etei ou wae,’ jeita tēi reta. Jare jukuärái umbitawita jeta wae reta,” jei chupe reta.

<sup>12</sup>“Jare opaete kerupi teko kachi jeieteta uñemiái. Jare jokua jeko pewa jeta wae reta upuruauta’ä ma,” jei.

<sup>13</sup>“Erēi ipotawe kía umiawäta cheré wirowia rewe wae, Tumpa uepita oĩ kuri,” jei.

<sup>14</sup>“Jare ñee ikawi wae uyemimbeuta opaete iwí rupi. Opaete kerupi rupi uyemimbeuta kërái Tumpa oita opaete wae imburuwicha wasurä jaeño mái pewa,” jei. “Jukuärái uyeyapota oĩ opaete wae ipuere uikuaa waerä tēi kërái ñonoĩ reta waerä jae ndiwe jokua ara. Jare kua ñee ikawi wae uyemimbeuta ma yawe opaete iwí rupi, jayawe ramo kua ara reta opata iyapi,” jei Jesús chupe reta.

<sup>15</sup>“Jare pe reta pechata peĩ mbae ikawi mbaete wae – jae ko upururükumewa wae uyemboi oĩ tupao wasu pe. Jukuärái arakae Tumpa iñee umimbeu wae Daniel jei uyekuaata ko,” jei. (Jare kua umingeta wae tuikuaa kawi mbae uipota jei wae.)

16“Jayawe jokua pecha yawe, kua iwī Judea pe ñonoī wae reta tosi iwitu wasu reta koti,” jei.

17“Jare jēta joka pe oī wae tosi woi joko wi oyepe waerä. Awiye awe tuike jēta pe wiraa waerä imbaembae.

18Jare iko pe uparawiki oī wae tosi woi wi. Awiye awe tou ye jēta pe wiraa waerä inepewaka yepe,” jei chupe reta.

19“;Ikuasita parawete kuña ipurúa wae reta jare imembi umbikambu ñonoī wae reta jokua ara reta rupi!” jei.

20“Piyerure Tumpa pe awiye waerä uyeyapo kua mbaembae ara roi rupi ani mbutuu ara pe, echa’ä jukuärái yawe, yawaita pewe pesi waerä,” jei chupe reta.

21“Jokua ara reta rupi uiporaraeteta ñonoī reta. Mbaetii uiporara reta jukuärái iwī uyembipi wiwe, jare ndarau ye uiporara reta jukuärái,” jei.

22“Jare Tumpa jei’ä yawe awiye uiporara reta waerä ima rupi, ndarau etei upita kiawe jekowe rewe jokua ara reta opa rewa. Erēi Tumpa uiparareko jae uiparawo wae reta ramo, jae jeita awiye uiporara reta waerä ima,” jei chupe reta.

23“Aramoi jokua ara reta rupi kía jeita pewe, ‘Mase, ko oī Cristo.’ Jare aramoi kía jeita pewe wi, ‘Mase, pee oī Cristo,’ jeita pewe. Jukuärái jei reta yawe, awiye perowia,” jei.

24“Echa’ä imeta upurumbitawi wae reta jei, ‘Che ko jae Cristo,’ jare imeta wi iru upurumbitawi wae reta jei, ‘Tumpa chembou animbeu waerä ñee chuwi etei ou wae.’ Jukuärái jeita tēi reta. Jare jae reta uyapota mbaembae tuicha wae kuimbae retaño ipuere’ä uyapo wae. Jare jokua mbaembae rupi jae reta uipotata tēi wi umbitawi Tumpa uiparawo wae retawe,” jei.

25“Mase, aikuaaka aī pewe opaete uyeyapota oī wae ndei uyeyapo mbowe pe reta pikuaa peī waerä,” jei chupe reta.

26“Jáeramo ime yawe kía jei pewe, ‘Mase, Cristo ime oī iwitini wasu pe,’ awiye pekua pemaese jese kuri. Jare ime yawe kía jei pewe, ‘Mase, jae ime oī o japipe,’ awiye perowia kuri.

27Echa’ä che kuimbaerä ayeyapo wae ayu ye yawe, ayekuaata kērái ama uwera wae uyekuaa opaete ara re wae rami. Echa’ä opaete wae cherechata oī kuri,” jei.

28“Yaecha uruwī reta uyembati ñonoī yawe, yaikuaa woi ime ko mbaereöwe aipo joko pe. Jae ramiño wi che ayu ye yawe, opaete wae uikuaata che ayu wae,” jei Jesús jemimboe reta pe.

### **Kuimbaerä uyeyapo wae ou yeta oī**

*(Marcos 13.24-37; Lucas 17.26-36, 21.25-36)*

29Jare Jesús jei wi chupe reta: “Jayawe opa ma uasa jokua ara reta täta rupi uiporara reta yawe, warasi jawoi pewa uñemipitumimbata oī, jare yasi ndarau ma jembipe. Yasitata reta oata ara wi, jare opaete ara re oī wae reta uñemitimota,” jei.

- 30“Jare jayawe imeta mbae ara re uyekuaa wae. Jokua uikuaakata iwi pewa reta pe che kuimbaerä ayeyapo wae ayu yeta ma ko. Jayawe opaete iwi pewa reta tuicha ipiatitita ukiye pipei. Jare che kuimbaerä ayeyapo wae, iwi pewa reta cherechata ayu ye ai amapitu re chembaepuere jembipete rewe,” jei.
- 31“Jare pëti temimbi wasu uñee oi rewe che amondota araiwa reta umbati waerä che aiparawo wae reta opaete kerupi rupi wi,” jei chupe reta.
- 32“Yandepuere yambijaanga jokua ara ayu yeta wae pëti iwa re. Echa’ä iwa joki ye ma yawe, yaikuaa ñai koiño ma ko oi ama oki waerä,” jei.
- 33“Jae ramiño wi pe reta pecha yawe uasa oi opaete kua mbaembae amimbeu ai pewe wae, pikuaata ko pei ima’ä ma uata ayu ye waerä,” jei chupe reta.
- 34“Che tae pewe añetete wae, kua iwi pe yureko wae reta ndarau opa umano opaete kua mbaembae reta ndei opa uyeyapo mbowe,” jei.
- 35“Pepuere pikuaa kua ñee che jae ai pewe wae añetete ko. Echa’ä yepe tēi ara jare iwi opata ko, erēi chiñee ndaraui opa,” jei chupe reta.
- 36“Erēi mbaetita kiawe uikuaa kērāi yawe etei ra che ayu yeta wae. Jaeño cheRu uikuaa oi jokua,” jei. “Araiwa retawe uikuaa’ä. Jare yepe tēi che ko jae Tumpa Tai, erēi che awe aikuaa’ä wi,” jei.
- 37“Pikuaa kawi pei kērāi yureko iwi pewa reta arakaete rupi Noé iko rambuewe. Jukuäraiete wi yurekota che kuimbaerä ayeyapo wae ayu ye yawe,” jei.
- 38“Echa’ä arakaete rupi, ndei iporu wasu ou mbowe, iwi pewa reta ipiawiwe yureko jekoño mái rupi. Echa’ä jae reta ukaruñoi jare ukauñoi yureko. Jare jekuaeño umenda reta jare umimendaka reta wi. Jukuärāi uyapo yureko reta jokua ara Noé jare jētara reta ndiwe opa uike rewa chalana wasu pe,” jei.
- 39“Jare iporu wasu ou uwäe yawe, opaetei uyepokouka reta, jare i opa wiraa reta. Jare jukuärāi wi iwi pewa reta uyepokoukata ñonoï kuri che kuimbaerä ayeyapo wae ayu ye yawe,” jei chupe reta.
- 40“Yandepuere yambijaanga kērāi uasata oi jokua ara wae kuärāi: Imeta mokui kuimbae uparawiki ñonoï pëti koo pe. Jare pëti wae uyereraata, jare ñru wae uyereyata,” jei chupe reta.
- 41“Jae ramiño wi imeta mokui kuña umbaeso ñonoï pëti angúa pe. Jare pëti wae uyereraata, jare ñru wae uyereyata,” jei chupe reta.
- 42“Jáeramo pe reta jekuaeñota ko peäro, echa’ä pikuaa’ä pei mbae nunga ara etei ra che peYarä ai wae ayu yeta wae,” jei chupe reta.
- 43“Che aipota pikuaa kawi waerä kua: pëti tēta iya uikuaa yawe mbae nunga ora etei ra outa imonda wae oñomi waerä chuwi imbaembae, jae ndarau etei oke jare ndarau wi umaño imonda wae re uike waerä jēta pe,” jei.

44“Jae ramiño wi pe reta pikuaata’ä kërái yawe etei ra che kuimbaerä ayeyapo wae ayu yeta wae. Echa’ä ayu yeta äi pepiranoë pewa. Jáeramo jekuaeño piyandareko kawi piyé kuri,” jei chupe reta.

### **Awíye yaiko pëti uyeyokui wae uyandareko’ä oí wae rami**

*(Lucas 12.42-46)*

45Jayawe Jesús jei wi umbijaanga rewe jemimboe reta pe: “Pëti karái ime onoi yawe pëti uyeyokui chupe wae iyarakuaa katu jare wirowia katu wae, jae oñonota opaete uyeyokui wae reta iyandarekoarä umingaru reta waerä opa ara rupi,” jei.

46“Jukuärái yawe, jokuä karái ipuere oo uwata ikotia rupi ipiawiwe rewe. Jare jae ou ye uwäe yawe jëta pe, jare uecha yawe jokuä uyeyokui wae uyapo kawi oí iparawiki, jayawe karái uyerowiaeteta umae jese. Jare jae nunga wi jokuä uyeyokui wae uyerowiata upita,” jei.

47“Che tae pewe añetete wae, jokuä nunga uyeyokui wae pe karái umeeta uyandareko waerä opaete imbaembae re,” jei chupe reta.

48“Erëi aramoi jokuä uyeyokui wae uyapota ikawi mbae wae, jare jeita iyupe: ‘Karái ndarau ou ye imambae,’ jeita.

49Jayawe umbipita uinupa ñru uyeyokui wae reta, jare umbipita ukaru jare ukau ikause wae reta ndiwe,” jei.

50“Jayawe pëti ara jokuä karái ou yeta uwäe ipiranoë pewa jëta pe.

51Jare uiporarakata jokuä uyeyokui wae pe, jare omondota iko waerä opaete ñru upurumbitawi wae reta ndiwe. Joko pe uyaota tëi reta jare jäi umbikiriuta reta ikuasi katuete ñonoï ramo.” Jukuärái Jesús umikirëi jemimboe reta uäro kawi waerä jae iwäe ara.

## **Mateo 25**

### **Jesús umbijaanga payandepo kuñatái reta re**

1Jayawe Jesús jei wi jemimboe reta pe: “Jokuä ara che ayu ye yawe, Tumpa ikota opaete wae imburuwicha wasurä jaeño mái pewa. Yambijaanga jokuä ara re kuärái: Ime yureko payandepo kuñatái reta. Kua kuñatái reta ko jae pëti kuñatái umendata oí wae umiiru ñonoï wae reta,” jei. “Jayawe uwäe yawe pëti jokuä kuñatái umenda waerä wae, jokuä payandepo kuñatái reta pëti pëti wiraa imechero oo owäiti waerä kuimbae umendata wae,” jei.

2“Pandepo jokuä kuñatái reta iyarakuaa katu wae, jare ñru pandepo reta iyarakuaa mbae echa.

3Jokuä iyarakuaa mbae echa reta jaeño wiraa imechero.

4Erëi jokuä iyarakuaa katu wae reta wiraa wi aceite imechero pewarä,” jei.

5“Erëi jarea’ä uwäe jokuä kuimbae umendata wae. Jáeramo kuñatái reta jopei jare opa oke reta,” jei.

6“Jare piare mbite pe uyendu ñee: ‘¿Aipo! Kuimbae umendata wae outa ma uwäe. Pekua peowäiti,’ jei chupe reta.

7Jayawe jokua kuñatái reta upüa jare uyapikatu imechero jendi kawi waerä.

8Jare jokua kuñatái iyarakuaa mbae echa reta jei ñru kuñatái reta pe: “Oremechero owe oï orewi. Jáeramo pemee mii orewe michi mii aceite oremechero pewarä,” jei reta.

9“Erëi jokua kuñatái iyarakuaa wae reta jei: “Ndarau numee pewe, echa’ä uatata ko orewe. Ikawi ko peo pewa peyupe waerä,” jei reta.

10“Jayawe kuñatái iyarakuaa mbae echa reta yuraa aceite ueka rambuewe, kuimbae umendata wae ou uwäe. Jare kuñatái iyarakuaa katu wae reta yuraa jae ndiwe uike menda uyeyapo oï wae pe. Jayawe öke uyeyukenda ma,” jei.

11“Jare taikue rupi jokua ñru kuñatái reta yuweru tēi uwäe jare usapikai reta täta rewe: ‘Ipea mii orewe öke,’ jei reta.

12Erëi kuimbae umenda oï wae jei chupe reta: ‘Ndarau. Echa’ä añetete che pukuaa’ä,’ jei chupe reta,” jei.

13Jayawe Jesús jei wi chupe reta: “Jae ramiño wi pewe awiye tuyeyapo kuri jukuärái. Jekuañota ko peäro, echa’ä pikuaa’ä kërái yawe etei ra che ayu yeta äi wae,” jei chupe reta.

### **Jesús umbijaanga mbapi uyeyokui wae re**

*(Lucas 19.11-27)*

14Jare Jesús jei wi jemimboe reta pe: “Pëti ara Tumpa ikota opaete wae imburuwicha wasurä jaeño mái pewa. Jare yandepuere yambijaanga jokua ara re kuärái: Ime iko pëti kuimbae ikokatu wae. Kua kuimbae uipota oo mbirí ambie iwi pe. Jare oota ma iko yawe, uenika uyeyokui chupe wae reta jare umee chupe reta korepoti pëti pëti pe umimbarawiki waerä,” jei.

15“Pëti uyeyokui wae pe umee korepoti pandepo talento jee wae. Jare ñru uyeyokui wae pe umee mokui talento. Jare ñru uyeyokui wae pe umee pëti talento. Jukuärái pëti pëti pe umee jae reta ipuereta mbaembae uyapo wae rupi. Joko wi kuimbae oo ambie iwi pe,” jei chupe reta.

16“Jayawe jokua pandepo talento onoi wae umbipi woi umimbarawiki, jare umingana pandepo ye,” jei.

17“Jae ramiño wi jokua mokui talento onoi wae umbipi umimbarawiki, jare umingana mokui ye,” jei.

18“Erëi jokua pëti talento onoi wae mbaeti umimbarawiki. Jae oo oyoo iwi jare oñoti joko pe oñomi waerä,” jei chupe reta.

19“Jare ima ma uasa yawe, jokua karái ou ye jëta pe jare upirandu chupe reta: “¿Mbae pa piyapo jokua korepoti amee pewe wae?” jei chupe reta.

20“Jayawe jokua pandepo talento onoi wae ueru karái pe ñru pandepo talento umiiru wae ndiwe, jare jei chupe: ‘Karái, amimbarawiki ma jokua pandepo talento nde neme chewe wae. Mase, ko amingana ñru pandepo talento ye,’ jei chupe.

21“Jayawe karái jei chupe: ‘Jaekawi ndiyapo. Nde ko jae ndiyeyokui kawi chewe wae jare ndorowia katu wae,’ jei chupe. ‘Ndiyeyokui kawi ma chewe kua mbowi wae re. Jáeramo añawe ameeta ndepo pe jeta ndiyandareko waerä jese. Yakaru kawita yayerowia rewe,’ jei chupe,” jei.

22“Jae ramiño wi jokua mokui talento onoi wae ou jei karái pe: ‘Karái, amimbarawiki ma jokua mokui talento nde neme chewe wae. Mase, ko amingana ñru mokui talento ye,’ jei chupe.

23“Jayawe karái jei chupe: ‘Jaekawi ndiyapo wi. Nde ko jae ndiyeyokui kawi chewe wae jare ndorowia katu wae,’ jei chupe. ‘Ndiyeyokui kawi ma chewe kua mbowi wae re. Jáeramo añawe ameeta ndepo pe jeta ndiyandareko waerä jese. Yakaru kawita yayerowia rewe,’ jei chupe,” jei.

24“Joko wi jokua pëti talento onoi wae ou jei karái pe: ‘Karái, che aikuaa ndepochi rái wae. Nde jaeño ndiyembiikokatu neï ñru wae reta ipapi re,’ jei chupe.

25‘Jáeramo che akiye ndewi ramo, araa añoti ndekorepoti iwíwi pe. Echa’ä aramoi ndiporarakata chewe ndekorepoti amikañi yawe. Mase, ko oï ndekorepoti,’ jei chupe.

26“Jayawe jokua karái jei uyeyokui wae pe: ‘Nde ko jae ndiyeyokui kawi mbae chewe wae jare iyaki wae,’ jei chupe. ‘Nde ndikuaa kërái ayembiikokatu aï ñru wae reta ipapi re aparawiki mbae rewe.

27Jáeramo nderaata tēi ko niñono banco pe chekorepoti. Jare jukuärái che ayu ye yawe, nemeeta tēi ko chewe chekorepoti uñemíru wae yepe ndiwe,’ jei chupe,” jei.

28“Jayawe jokua karái jei ñru uyeyokui wae reta pe: ‘Pepiro chuwi jokua pëti talento, jare pemee jokua payandepo talento onoi wae pe.

29Echa’ä kía uiporu kawi yawe jokua jae ime onoi wae, uñemíruta ko chupe jare jae uyekoueteta. Jae ramiño wi kía mbaeti uiporu kawi yawe jokua jae ime onoi wae, jare yepe tēi mbowi mii ime onoi yawe, jokuawe uñepirota ko chuwi,’ jei.

30‘Kua uyeyokui pochí wae, ikawi’ä maeräwe. Pemombo oka pe pítumimbi oï wae pe. Joko pe uyaota tēi jare jäi umbikiririruta ikuasi katuete oï ramo,’ jei chupe reta.” Jukuärái jei Jesús chupe reta umbijaanga rewe.

### **Opaete iwi pewa reta uyemboita ñonoí Jesús jowai**

31“Che kuimbaerä ayeyapo wae, che ayu yewi yawe chembaepuere jembipete rewe, aruta opaete araiwa reta che ndiwe. Jayawe che awapita aï chewapia mburuwicha wasu pewa ikawiete ye wae re,” jei.

32“Jare ambatikata cherowai opaete ambie iwi rupi yureko wae reta. Jare jae reta ipite wi ambisirita amokue wae reta, pëti kuimbae iowecha reta umbisiri ikapura reta wi rami,” jei.

33“Jare opaete jupi wae reta añonota cheakata koti. Jare ñru wae reta añonota cheaso koti,” jei chupe reta.

34“Joko wi che mburuwicha wasurä aïta wae, jaeta cheakata koti ñonoï wae reta pe: ‘CheRu uyapo ma pewe piyekou waerä che ndiwe che opaete wae imburuwicha wasurä aï wae re. CheRu kua uyapikatu ma pewe iwi uyembipi wiwe. Peyu piyekou jese.

35Echa’ä che chiyembai aiko yawe, pe reta pemee akaru waerä. Jare cheiwe aiko yawe, pe reta pemee i jau waerä. Jare yepe tēi che aiko ambie iwi pewa jare pe reta chekuua’ä, erēi chembiasa kawī perēta pe.

36Jare temimonde uata chewe yawe, pe reta pemee chewe cheremimonderä. Jare chembaerasi aiko yawe, pe reta peyu pemaē cheré. Jare peresoriru pe aiko yawe, pe reta peyu pepou chepi,’ jaeta chupe reta,” jei.

37“Jayawe jokua jupi wae reta jeita chewe: ‘OreYa, ¿kērái yawe pa ndiyembai ndiko jare numee ndekaru waerä? ¿Kērái yawe pa ndeiwe ndiko jare numee ndeu waerä i?’

38¿Kērái yawe pa pëti ambie iwi pewa ndiko jare numbiasa orerēta pe? ¿Kērái yawe pa temimonde uata ndewe jare numee ndewe nderemimonderä?

39¿Kērái yawe pa nembraerasi jare peresoriru pe ndiko, jare ndoo ndopou ndepi?’ jeita reta chewe,” jei.

40“Jayawe che jaeta chupe reta: ‘Che tae pewe añetete wae, pe reta pembori yawe ipotawe cheriwi reta jare cherindi reta, che etei ko chembori piko. Jukuärái ko, yepe tēi jokua reta mbae’ä ko ñru wae reta pewarä aramoi,’ jaeta chupe reta,” jei.

41“Joko wi che jaeta cheaso koti ñonoï wae reta pe: ‘Pesiri chewi tata owe mbae wae pe. Jokua tata uyeyapikatu ma oï Añawasū jare araiwakue chupe uyeyokui wae reta pewarä. Joko pe pikuaata peï Tumpa iarasi.

42Echa’ä chiyembai aiko yawe, pe reta pemee’ä akaru waerä. Jare cheiwe aiko yawe, pe reta pemee’ä i jau waerä.

43Jare che aiko yawe iwi ambie pewa, erēi pe reta peparea’ä chewe. Jare temimonde uata chewe yawe, pe reta pemee’ä chewe cheremimonderä. Jare chembaerasi aiko yawe jare peresoriru pe aiko yawe, mbaeti pe reta chembori,’ jaeta chupe reta,” jei.

44“Jayawe jae reta wi jeita chewe: ‘OreYa, ¿maera pa jukuärái ndere nei orewe? ¿Kērái yawe pa ndiyembai ndiko jare numee’ä ndekaru waerä? Jare ¿kērái yawe pa ndeiwe ndiko jare numee’ä ndewe i? Jare ¿kērái yawe pa ambie iwi pewa ndiko jare nduparea’ä ndewe? Jare ¿kērái yawe pa temimonde uata ndewe jare numee’ä



nderemimonderä? Jare ¿kërái yawe pa nembraerasi jare peresorirru pe ndiko, jare nombori'ä? Ore nduecha'ä jokua,' jeita chewe reta," jei.

<sup>45</sup>“Jayawe che jaeta chupe reta: ‘Che tae pewe añetete wae, pe reta pembori'ä yawe ipotawe cheriwi reta jare cherindi reta, che etei ko chembora'ä piko. Jukuärái ko, yepe tēi jokua reta mbae'ä ko ñru wae reta pewarä aramoi,' jaeta chupe reta,” jei.

<sup>46</sup>“Jayawe jae reta yuraata kiape uiporarata ñonoï jaeño mái pewa wae pe. Erēi jokua jupi wae reta yuraata tekowe opa mbae wae pe.” Jukuärái Jesús jei jemimboe reta pe.

## Mateo 26

### Judío itenondewa reta uyemboemboe uyukaka waerä Jesús

(Marcos 14.1-2; Lucas 22.1-2; Juan 11.45-53)

<sup>1</sup>Jayawe opaete kua jei ma yawe, Jesús jei wi jemimboe reta pe:

<sup>2</sup>“Pe reta pikuaa mokui araño ma ko uata oï uwäe waerä pascua ara. Jokua ara etei, che kuimbaerä ayeyapo wae, imeta kía reta chemee cherowaicho reta pe jae reta chekutuka waerä kurusu re amano waerä.” Jukuärái Jesús jei chupe reta.

<sup>3</sup>Jokua rambuewe, sacerdote itenondewa reta jare judío itenondewa reta uyembati sacerdote tenondewaete Caifás jee wae joka pe.

<sup>4</sup>Jare uyemboemboe reta kërái ipuere waerä uipisika tawí rupi Jesús uyukaka reta waerä.

<sup>5</sup>Jei reta iyupe: “Erēi awiye yaipisika kua pascua ara rupi, awiye waerä tēta wasu pewa reta uyembopochi yandekoti,” jei reta iyupe.

### Pēti kuña upiyere mbae utimbo kawi wae Jesús re

(Marcos 14.3-9; Juan 12.1-8)

<sup>6</sup>Ime iko tēta wasu rai Betania pe pēti kuimbae Simón jee wae tenonde yawe ipire okuise wae. Kua kuimbae uparea Jesús jare jemimboe reta pe yuweru ukaru waerä jae jēta pe.

<sup>7</sup>Jayawe ukaru yureko reta rambuewe, uike ou pēti kuña mbae jiru rai rewe. Jokua mbae jiru rai tinee oï mbae utimbo kawi wae, jepiete wae ko. Jayawe Jesús mesa pe uwapi iko rambuewe, kuña opa upiyere mbae utimbo kawi wae Jesús iñäka re.

<sup>8</sup>Erēi Jesús jemimboe reta kua uecha yawe, ikawi'ä iko chupe reta, jare jei reta: “¿Maera pa opa upiyere iyuwí kua mbae utimbo kawi wae?”

<sup>9</sup>Jokua jepiete ko. Jae ipuereta tēi owaka, jare jokua korepoti pipe omborita tēi iparawete wae reta,” jei reta.

<sup>10</sup>Erēi Jesús uikuaa jae reta mbae jei yureko wae. Jáeramo jei chupe reta: “Awiye mbae pere kua kuña pe, echa'ä jae uyapo ma mbae ikawi wae chemaerä,” jei.

<sup>11</sup>“Iparawete wae reta jekuaeñota yureko pepite rupi, jare pepuere pembori ipotawe ara rupi. Erēi che ndarau aiko jekuaeño pepite pe kuärái,” jei chupe reta.

12“Kua kuña upiyere ma cheré kua mbae utimbo kawi wae ndei amano mbowe uyapikatu waerä cherete teöwerenda pewarä,” jei.

13“Che tae pewe añetete wae, opaete iwi rupi Tumpa iñee ikawi wae uyemimbeu wae rupi, uyemimbeuta wi kua kuña uyapo wae ñru wae reta imandúa waerä jese,” jei Jesús chupe reta.

### **Judas ipiayemingeta umee waerä Jesús jowaicho reta pe**

*(Marcos 14.10-11; Lucas 22.3-6)*

14Jayawe pëti Jesús jemimboe doce wae wi, Judas Iscariote jee wae, oë wiari oo sacerdote itenondewa reta ñonoï wae pe.

15Jare jei chupe reta: “¿Mbowi ra pembiepita chewe amee yawe pewe Jesús pipisi waerä?” jei chupe reta. “Numeeta ndewe treinta riare korepoti,” jei reta chupe.

16Jayawe joko wiwe Judas umbipi ueka kërái ipuere waerä umee chupe reta Jesús.

### **Jesús jou tembiu pascua pewa**

*(Marcos 14.12-25; Lucas 22.7-23; Juan 13.21-30)*

17Jayawe uwäe ara tenondewa yemimandúa mbiyape levadura mbae pewa jei chupe reta wae. Jare Jesús jemimboe reta yuweru jei chupe: “¿Kiape pa ndipota nduyapo waerä yandewe tembiu pascua pewa?” jei reta chupe.

18Jayawe Jesús jei chupe reta: “Pekua tëta wasu pe jokua kuimbae che amimbeu ma pewe wae jëta pe. Jare pere chupe: ‘Oremboea jei: Uwäe ma ora Tumpa oñono tee chemaerä wae. Che aipota jau tembiu pascua pewa nerëta pe cheremimboe reta ndiwe,’ pere chupe,” jei Jesús chupe reta.

19Jayawe Jesús jemimboe reta opa yuraa uyapo Jesús jei wae, jare uyapo reta tembiu pascua pewa.

20Jare pïtu ma oï yawe, Jesús uwapi mesa pe ukaru waerä jokua doce jemimboe reta ndiwe.

21Jare ukaru yureko reta rambuwe, Jesús jei chupe reta: “Che tae pewe añetete wae, pëti yandepite pe oï wae chemeeta oï cherowaicho reta pe,” jei chupe reta.

22Jayawe jokua uyandu reta yawe, Jesús jemimboe reta tuicha ipiatiti. Jare pëti pëti wae umbipi upirandu chupe: “CheYa, ¿che ra ko jae?” jei reta.

23Jare Jesús jei chupe reta: “Mbiyape che ndiwe umäki oï karúa pe wae ko jae.

24Che kuimbaerä ayeyapo wae amano ñotái ko kërái Tumpa iñeeriru pe uyekuatía oï cheré wae rami. Erëi jokua kuimbae chemeeta oï wae uiporaraeteta ko. Ikawi tëi ko jokua kuimbae awiye etei oa waerä ichi wi,” jei chupe reta.

25Jayawe Judas – jae ko umeeta iko Jesús jowaicho reta pe wae – jei chupe: “Oporomboe wae, ¿che ra ko jae?” jei chupe. “Nde ndere wae ko jae,” jei Jesús chupe.

<sup>26</sup>Jare ndei opa ukaru reta mbowe, Jesús uipisi mbiyape jare umee yasurupái Tumpa pe jese. Joko wi upisaa jare umee jemimboe reta pe, jare jei chupe reta umbijaanga rewe: “Pipisi peu. Kua mbiyape ko jae cherete,” jei chupe reta.

<sup>27</sup>Jayawe Jesús uipisi wi copa, jare umee wi yasurupái jese, jare umee jemimboe reta pe. “Peu, opaete pe reta,” jei.

<sup>28</sup>Jare jei wi chupe reta umbijaanga rewe: “Kua ko jae cheruwi uyepiyereta oï wae. Jukuarái uyeyapota Tumpa opa umbái waerä jeta wae reta wi mbaembae uyawi reta Tumpa koti wae. Kua cheruwi pipe Tumpa uyapo oï pëti yemingeta ipiau wae jae reta ndiwe,” jei.

<sup>29</sup>“Che tae pewe, ndarau ye ma che jau uva tikue cheRu oï rewa opaete wae imburuwicha wasurä jaeño mái pewa. Jokua ara ramo jau piau yeta pe reta ndiwe,” jei chupe reta.

<sup>30</sup>Jare opa ma ukaru reta yawe, ukäta reta pëti himno Tumpa pe. Jare joko wi oë yuraa reta ñaipe Olivorenda jee wae koti.

### **Jesús umimbeu Pedro pe uikuakuta oï wae**

*(Marcos 14.26-31; Lucas 22.31-34; Juan 13.36-38)*

<sup>31</sup>Jayawe yuraa yureko reta rambuewe, Jesús jei chupe reta: “Tumpa iñeeriru pe uyekuatía oï kuarái: ‘Ayukata owecha reta iyandarekoa, jare owecha reta opata uñemiái.’ Jukuarái uyekuatía oï cheré. Jare kua pïtu woi jokua uyeyapota oï, echa’ä pe reta opata chereya peï,” jei chupe reta.

<sup>32</sup>“Che amano ñotái ai. Erëitu Tumpa chembijekowe yeta chereru umanokue wae reta ipite wi. Jare aikowe ye ma yawe, che rani ata pewi iwi Galilea pe,” jei chupe reta.

<sup>33</sup>Jayawe Pedro jei Jesús pe: “Yepe tëi opaetei ïru wae reta ndereyata mbae uyeyapo ndewe wae jeko pewa, erëi che ndarau etei ndueya,” jei chupe.

<sup>34</sup>Jayawe Jesús jei chupe: “Che tae ndewe añetete wae, kua pïtu woi, ndei uru kuimbae uñee mbowe, mbapi wese ma nde chekuakuta neï kuri,” jei chupe.

<sup>35</sup>Erëitu Pedro jeiete jei chupe: “Yepe tëi aramoi amanota nde ndiwe, erëi che ndarau etei ndukuaku,” jei chupe. Jare jukuarái wi jei tëi opaete Jesús jemimboe reta.

### **Jesús oo Getsemaní pe uyerure waerä**

*(Marcos 14.32-42; Lucas 22.39-46)*

<sup>36</sup>Jayawe Jesús jare jemimboe reta ndiwe yuraa uwäe reta temiti reta jenda Getsemaní jee wae pe. Jare Jesús jei jemimboe reta pe: “Pewapi kua pe che a pea pe ayerure rambuewe Tumpa pe,” jei chupe reta.

<sup>37</sup>Jayawe joko wi Jesús wiraa Pedro jare jokua mokui Zebedeo tai reta ïru wae reta wi kuti katu mii. Jare jae umbipi ipiatiti ikuasi katu rewe.

<sup>38</sup>Jare jei jokua mbapí jemimboe reta pe: “Tuicha rupi chepiatiti aï jare amano pota echa. Pepita mii kua pe che ndiwe, jare awiye peke wi,” jei chupe reta.

<sup>39</sup>Jayawe Jesús usiri katu chuwi reta, jare uñeño ipitía re iwi re. Jare uyerure Tu pe kuärái: “CheRu mii, nde ndipota yawe, embiasa mii chewi kua aiporarata aï wae. Erëi awiye tuyeyapo che jae waeño. Tuyeyapo chewe nde ndere wae,” jei.

<sup>40</sup>Joko wi Jesús ou ye jokua mbapí jemimboe reta ñonoï wae pe, jare uecha oke ñonoï reta. Jayawe jei Pedro pe: “¿Pepuere’ä yerá pëti orawe yepe peke mbae peï che ndiwe?” jei chupe.

<sup>41</sup>“Awiye peke. Piyerure Tumpa pe, echa’ä jarei katu mii imeta penoi kirëi chereriro waerä. Jayawe piyerure Tumpa pe jokua re awiye waerä piñemiamirika jokua kirëi pe. Echa’ä pepia pe peratangätu ko tëi, erëi perete ipiräta’ä,” jei Pedro pe.

<sup>42</sup>Jayawe Jesús usiri ye chuwi reta, jare oo ye uyerure Tu pe. “CheRu mii,” jei. “Aiporarata ko yawe, jayawe tuyeyapo chewe nde ndere wae,” jei.

<sup>43</sup>Jare joko wi jekuae ou ye jemimboe reta ñonoï wae pe. Jare uecha oke ñonoï reta ye, echa’ä topei opa umiamiri reta ramo.

<sup>44</sup>Jayawe Jesús usiri ye chuwi reta uyerure waerä Tu pe kërái tenonde uyerure wae rami. Kua re mbapí wesea ma.

<sup>45</sup>Jayawe ou ye jemimboe reta ñonoï wae pe jare jei chupe reta: “¿Jekuaeño yerá peke jare peputuu peï?” jei chupe reta. “Mase, uwäe ma ora. Che kuimbaerä ayeyapo wae, pëti wae chemee oï jeko kachi wae reta ipo pe,” jei.

<sup>46</sup>“Pepüa. Mase, chemee wae ko uwäe ma ou. Ya ñawäiti,” jei chupe reta.

### **Jesús jowaicho reta yuweru uipisi**

*(Marcos 14.43-50; Lucas 22.47-53; Juan 18.2-11)*

<sup>47</sup>Jare Jesús uyemingeta iko rambuewe, ou uwäe Judas. Jae ko Jesús jemimboe doce wae wi pëti. Jare yuweru wi jae ndiwe jeta wae reta mburuwicha reta ombou wae ikisepuku rewe jare iiwira rewe uipisi reta waerä Jesús. Jokua oporombou wae reta ko jae sacerdote itenondewa reta jare judío itenondewa reta.

<sup>48</sup>Judas umimbeu kawi ma yepe jokua iru kuimbae reta pe kërái jae reta ipuere waerä uikuaa kía nunga ra ko jae Jesús wae. Jei chupe reta: “Jokua jowa pe ayurupiteta aï wae ko jae. Pipisi kawi kuri,” jei chupe reta.

<sup>49</sup>Jayawe Judas ou uwäe yawe, ou woi jei Jesús pe: “Oporombou wae, ¿kërái pa nei?” jei chupe. Jayawe uyurupite jowa pe.

<sup>50</sup>Jayawe Jesús jei chupe: “Cheiru, ¿maera pa ndiyapo jukuärái?” jei chupe. Jare jupiwoiño jokua iru kuimbae reta uipisi Jesús.

<sup>51</sup>Jare aramoiño pëti wae Jesús ndiwe iko wae ueki ikisepuku jiru wi, jare uiporu sacerdote tenondewaete pe uyeyokui wae re, jare uyasiasa chuwi inambi.

52 Jayawe Jesús jei jokua jemimboe pe: “Iñono ye ndekisepuku jiru pe. Echa’ä opaete kía ñeräro reño iko wae jare upuruyuka wae jukuäraino ko umanota oï,” jei chupe.

53 “Añetete che aipota yawe, chepuereta tēi aeka cheRu pe jae jawoi pewa ombou waerä jetaete araiwa reta cherepi waerä. ¿Ndikuaa’ä yerá jokua?” jei chupe.

54 “Erēi jukuärái ayapo yawe, ¿kērāita pa uyeyapo Tumpa iñeeriru pe uyekuatía oï wae? Echa’ä joko pe jei mbaembae añawe uyeyapo oï wae imeta ko uyeyapo chewe,” jei chupe.

55 Jayawe Jesús jei yuweru wae reta pe: “¿Maera pa peyu kisepuku rewe jare iwira rewe chepisi waerä? ¿Jae yerá che imonda jeko kachi wae?” jei chupe reta. “Opa ara rupi che aporomboe aiko pepite rupi tupao wasu joko pe. ¿Maera pa joko pe chepisi’ä?” jei.

56 “Erēitu opaete kua mbaembae uasa oï uyeyapo waerä kērái arakae Tumpa iñee umimbeu wae reta uikuatía wae rupi,” jei chupe reta. Jayawe opaete Jesús jemimboe reta ueya jare opa osi reta.

### **Jesús uyemboi judío imburuwicha reta jowai**

*(Marcos 14.53-65; Lucas 22.54,63-71; Juan 18.12-13,19-24)*

57 Jayawe Jesús uipisi wae reta wiraa sacerdote tenondewaete Caifás jee wae jēta pe. Joko pe uyembati ñonoï Moisés uikuatía wae re oporomboe wae reta jare judío itenondewa reta.

58 Jare Pedro oo wi Jesús jaikue, erēi mbiri katu mii upita chuwi. Jare uike oo sacerdote tenondewaete joko pe, jare oo uwapi sindaro tupao wasu iyandarekoa reta uwapi ñonoï wae pe uecha waerä mbae ra uasata wae.

59 Jayawe sacerdote itenondewa reta jare opaete ñru mburuwicha reta ueka yureko kērái apu rupi uñeapo waerä Jesús re uyukaka reta waerä.

60 Erēi yepe tēi jeta wae reta iyapu Jesús re, erēi ipuere’ä uwäe reta kērái rupi uñeapo waerä jese. Erēi taikuate yuweru mokui wae jare jei reta Jesús rewa:

61 “Kua pochi jei, ‘Chepuere opa arukachi tupao wasu jare amupüa ye mbapi ara rupi,’ jei,” jei reta.

62 Jayawe sacerdote tenondewaete upüa uyemboi jare jei Jesús pe: “¿Maera pa niñee nemoë’ä? ¿Maera pa nde ndere’ä mbae jae reta jei ndekoti wae re?” jei chupe.

63 Erēi Jesús kiiño. Jayawe sacerdote tenondewaete jei chupe: “Emimbeu orewe Tumpa ikoño mái wae jowake, ¿nde pa ko jae Cristo yae chupe wae? ¿Nde pa ko jae Tumpa Tai?” jei chupe.

64 Jayawe Jesús jei chupe: “Nde ndere wae ko jae,” jei chupe. “Jare wi che tae pewe, outa uwäe ara che kuimbaerä ayeyapo wae, pe reta etei cherechata pei kuri Tumpa imbaepuere tuichaete wae iyakata koti. Jare cherechata wi ayu ye yawe ara wi amapitu re,” jei chupe.

<sup>65</sup>Jayawe jokua uyandu yawe, sacerdote tenondewaete pochi pipei omondoro iyuwi jemimonde. Jare jei iru mburuwicha reta pe: “;Jae jei iyupe tēi Tumpa ko! ;Maera ye pa yaekata iru wae reta uñeapo waerä jese?” jei chupe reta. “Mase, pe reta etei piyandu ma kērāi jae jei iyupe tēi Tumpa ko.

<sup>66</sup>;Mbae pa pere añawe? ;Ime ra teko onoi ani mbaeti ra?” jei chupe reta. Jayawe iru sacerdote reta jei: “Ime onoi teko. Jupi ko umano waerä,” jei reta.

<sup>67</sup>Jayawe amokue jae reta undiwi Jesús jowa re jare uinupa reta. Jare iru wae reta owapete,

<sup>68</sup>jare jei reta chupe: “Añetete nde ko jae Cristo yawe, jayawe yaecha Tumpa tuikuaaka ndewe kía ra okua oï nderé wae,” jei reta chupe.

### **Pedro uikuaku Jesús**

*(Marcos 14.66-72; Lucas 22.55-62; Juan 18.15-18,25-27)*

<sup>69</sup>Jokua rambuwe Pedro jekuaeño uwapi oï oka pe. Jare pēti kuñatái uyeyokui wae ou jei chupe: “Nde ndiko wi jokua Jesús Galilea pewa ndiwe,” jei chupe.

<sup>70</sup>Erēi Pedro uikuaku opaete wae jowake jei rewe: “Aikuaa’ä mbae re ra ndiyemingeta neï wae,” jei chupe.

<sup>71</sup>Jayawe Pedro upüa oo oka jöke koti. Jare iru kuñatái uecha jare jei joko pe ñonoï wae reta pe: “Kua kuimbae, jae iko wi Jesús Nazaret pewa ndiwe,” jei chupe reta.

<sup>72</sup>Erēi Pedro uikuaku ye: “Che tae pewe Tumpa jowake, ;aikuaa’ä etei jokua kuimbae!” jei chupe reta.

<sup>73</sup>Jare ndei ima mbowe amokue joko pe ñonoï wae reta yuweru jei Pedro pe: “Añetete nde wi ko jae Jesús ndiwe ndiko wae, echa’ä simi nduikuaa ndiyemingeta re nde ko jae Galilea pewa wae,” jei reta chupe.

<sup>74</sup>Jayawe Pedro jei chupe reta: “Che tae pewe Tumpa jowake, ;aikuaa’ä etei jokua kuimbae! Jare Tumpa tuiporaraka chewe kua che jae wae añetete’ä yawe,” jei chupe reta. Jayawe jawoi pewa uru kuimbae uñee.

<sup>75</sup>Jare Pedro imandúa woi Jesús jei chupe wae re: “Ndei uru kuimbae uñee mbowe, mbapi wese ma nde chekuakuta neï kuri,” jei chupe. Jayawe Pedro oë oo joko wi, jare umbipi uyao täta rupi ipiatiti rewe.

## **Mateo 27**

### **Wiraa reta Jesús mburuwicha Pilato jowai**

*(Marcos 15.1; Lucas 23.1; Juan 18.28-32)*

<sup>1</sup>Jare köe ma yawe, opaete sacerdote itenondewa reta jare judío itenondewa reta uyembati jare uyemboemboe Jesús re uyukaka reta waerä.

<sup>2</sup>Jayawe uñapiti reta Jesús ipo rupi, jare wiraa reta mburuwicha romano Poncio Pilato jee wae jowai uyemboi waerä.

### **Judas imano rewa**

<sup>3</sup>Jayawe Judas – jae ko umee Jesús wae – uikuaa yawe Jesús umanota oï wae, tuicha rupi ipiatiti jokua mbae uyapo wae re. Jáeramo wiraa ye umee jokua treinta riare korepoti sacerdote itenondewa reta pe jare judío itenondewa reta pe.

<sup>4</sup>“Ko aru ye pewe pekorepoti,” jei chupe reta. “Che ayapo mbae kachi wae Tumpa jowai. Echa’ä amee pewe kuimbae jeko mbae wae,” jei chupe reta. Jayawe jae reta jei Judas pe: “Jokua mbae’ä orewe. Jokua teko nderé ma ko oï,” jei reta chupe.

<sup>5</sup>Jayawe Judas omombo jokua korepoti tupao wasu pe, jare joko wi oë oo uyeyuwi umano.

<sup>6</sup>Jayawe sacerdote itenondewa reta omonoo jokua korepoti jare jei: “Kua korepoti mano jepi ko. Jáeramo jupi’ä etei ko ñañono waerä korepoti jiru pe tupao wasu pewarä. Jukuärái Moisés arakae uikuatía,” jei reta.

<sup>7</sup>Jayawe uyemingeta reta mbae ra uyapo waerä jokua korepoti pipe. Jare upita reta owa waerä pëti kuimbae yambii uyapo wae iwi. Jukuärái ambie iwi pewa reta umano yawe tëta wasu pe, imeta onoi reta kiaepe oñoti reta waerä.

<sup>8</sup>Jáeramo umbijee reta jokua iwi: Iwi tuwi jepi wae. Jare jukuärái ko jee añawe rewa.

<sup>9-10</sup>Jare jukuärái uyeyapo Tumpa iñee umimbeu wae Jeremías arakae jei uyeyapota iko wae. Echa’ä jae jei arakae kuärái: “YandeYa jei chewe: ‘Too towa reta kuimbae yambii uyapo wae iwi. Jare tumbiepi reta chupe treinta riare korepoti tii wae pewa. Echa’ä jokua ko Upuruepi wae jekowe jepi chupe reta wae,’ jei chewe. Jare jukuärái uyapo reta.”Jukuärái jei arakae rupi Jeremías.

### **Jesús uyemboi mburuwicha Pilato jee wae jowai**

*(Marcos 15.2-5; Lucas 23.2-5; Juan 18.33-38)*

<sup>11</sup>Jayawe sacerdote itenondewa reta jare judío itenondewa reta wiraa Jesús mburuwicha romano Poncio Pilato jee wae jowai uyemboi waerä. Jare Pilato upirandu Jesús pe: “¿Nde pa ko jae judío reta mburuwicha wasu?” jei chupe. Jayawe Jesús jei chupe: “Nde ndere wae ko jae,” jei.

<sup>12</sup>Jayawe sacerdote itenondewa reta jare judío itenondewa reta umbijeko Jesús jeta mbaembae re. Erëi Jesús jei’ä mbae awe.

<sup>13</sup>Jáeramo Pilato jei chupe: “¿Ndiyandu’ä yerá kërái jeta mbaembae re nembijeko ñonoï wae?” jei chupe.

<sup>14</sup>Erëi Jesús jeseuwe mbaeti etei mbae jei. Jáeramo jokua mburuwicha ipiakañiete umae jese.

### **Pilato umee Jesús umano waerä**

*(Marcos 15.6-15; Lucas 23.13-25; Juan 18.38–19.16)*

<sup>15</sup>Opa año pascua ara rupi mburuwicha romano omoëkañoi peresoriru wi pëti pereso tëta wasu pewa reta uipota wae.

<sup>16</sup>Jare jokua año pe ime iko peresoriru pe pëti kuimbae jeräkua wae Barrabás jee wae.

<sup>17</sup>Jayawe jeta wae reta yuweru uyembati Pilato joka rupi. Jare Pilato oë oo jare upirandu chupe reta: “¿Kía nunga pa pipota ambopoika waerä pewe? ¿Barrabás ani Jesús, jokua Cristo pere chupe wae?” jei chupe reta.

<sup>18</sup>Pilato upirandu jukuärái, echa’ä jae uikuaa iko judío imburuwicha reta uñamitää ramoño ko ueru Jesús chupe.

<sup>19</sup>Jayawe Pilato uwapi kiape ipuere waerä mbae jei kía jeko rewa. Jare joko pe uäro jae reta mbae jei waerä. Jare uäro iko rambuewe, jembireko ombou kía jei chupe waerä: “Awiye iyapo mbae jokua kuimbae jupi wae pe. Echa’ä piare apau pochi jesewa; jáeramo chepia ikawi’ä oi,” jei chupe.

<sup>20</sup>Jayawe sacerdote itenondewa reta jare judío itenondewa reta omboemboe jokua uyembati wae reta kuärái: “Peka Pilato pe ombopoika waerä yandewe Barrabás. Tuyukaka jokua Jesús pochi,” jei reta.

<sup>21</sup>Jayawe Pilato upirandu ye chupe reta: “¿Kía nunga pa kua mokui kuimbae reta wi pipota ambopoika waerä pewe?” jei chupe reta. “Embopoika orewe Barrabás,” jei reta chupe.

<sup>22</sup>Jare Pilato jei chupe reta: “Ambopoika yawe Barrabás, ¿mbae pa pipota ayapo waerä pewe Jesús pe, jokua Cristo pere chupe wae?” jei chupe reta. Jayawe opaete wae usapikai rewe jei: “¡Ikutuka kurusu re!”

<sup>23</sup>Erëi Pilato upirandu chupe reta: “¿Marái ramo pipota umano waerä kua kuimbae? ¿Mbae ikawi mbae wae pa uyapo?” jei chupe reta. Jayawe jae reta jeiete usapikai rewe jei: “¡Ikutuka kurusu re!”

<sup>24</sup>Jayawe Pilato uikuaa ipuere’ä mbae uyapo ombopoika waerä Jesús, echa’ä judío reta umbipi ma uyembopochi ikoti. Jáeramo ueruka i, jare umbijaanga rewe uyepoe pipe uyembati wae reta jowai jei rewe: “Che mbaeti anoi teko kua kuimbae jupi wae imano re. Añawe aeya pepo pe,” jei chupe reta.

<sup>25</sup>Jayawe opaete uyembati wae reta jei: “Ore jare oriñemoñaá reta tonoi teko jae imano re,” jei reta.

<sup>26</sup>Jayawe Pilato ombopoika chupe reta Barrabás. Joko wi umbipiuka chikote pe Jesús. Jare umbipiuka ma yawe, umeeka sindaro reta pe uikutu reta waerä kurusu re.

### **Sindaro reta oyoyai Jesús**

*(Marcos 15.16-20; Juan 19.2,3)*

<sup>27</sup>Jayawe mburuwicha isindaro reta wiraa rani Jesús mburuwicha joka tuicha wae pe, jare umbatika reta wi opaete ñru sindaro reta.

<sup>28</sup>Jae reta omboi Jesús wi jemimonde, jare umiñepëwa reta ñepëwaka pïta wae pe mburuwicha wasu echa oyoyai reta waerä.



<sup>29</sup>Jare oñono reta Jesús iñäka re ñuräti uñeñopekue iñäkarewarä. Umee reta wi chupe ipo pe uipisi waerä takuaräsi iyakata koti mburuwicha wasu pe wae echa. Jayawe uñeño no reta itawa re Jesús jowai, jare uipiuraanga rewe usapikái pii reta: “¡Tikoño mái kua judío reta imburuwicha wasu!” Jukuärái oyoyai reta Jesús.

<sup>30</sup>Joko wi undiwi reta jese. Jare uipisi reta jokua takuaräsi jare uyepepikapika uiporu reta Jesús iñäka re.

<sup>31</sup>Jayawe ikueri ma oyoyai reta yawe, sindaro reta omboi ye chuwi ñepëwaka pïta wae jare omondeka ye chupe reta jemimondei. Jayawe wiraa reta mburuwicha wasu joko wi uikutu reta waerä kurusu re.

### **Uikutu reta Jesús kurusu re**

*(Marcos 15.21-32; Lucas 23.26-39; Juan 19.17-24)*

<sup>32</sup>Jare yuraa yureko reta rambuewe, owäiti reta pëti kuimbae Simón jee wae. Kua kuimbae tëta wasu Cirene pewa ko. Jayawe sindaro reta wiraaka chupe Jesús ikurusu.

<sup>33</sup>Jare wiraa reta Jesús tëta wasu oka pe Gólgota jee wae pe. (Kua ñee Gólgota uipota jei judío reta iñee pe, “Äkakerenda.”)

<sup>34</sup>Jare joko pe umee tëi jou reta Jesús vino uyea mbae iro wae ndiwe wae. Erëi Jesús omboporowa ma yawe, uipota’ä jou.

<sup>35</sup>Jayawe sindaro reta uikutu kurusu re Jesús, jare umbiyemboi reta oñono kurusu. Joko wi uyuwari reta Jesús jemimonde re, pëti pëti wae uikuua waerä mbae nunga wiraata iyupe wae. Jukuärái uyeyapo Tumpa iñee arakae umimbeu wae jei wae rupi. Echa’ä jae jei arakae kuärái: “Umbiyao reta iyupe cheremimonde. Uyuwari reta jese uikuua waerä kía ra wiraata iyupe wae.” Jukuärái jei.

<sup>36</sup>Jayawe sindaro reta uwapi joko pe uäro ñonoí Jesús.

<sup>37</sup>Jare oñono reta kurusu re iwira ipe wae Jesús iñäka iáramo, jare uyekuatía iko jese umbijeko wae kuärái: “KUA KO JAE JESÚS, JUDÍO RETA IMBURUWICHA WASU.”

<sup>38</sup>Jare uikutu reta wi mokui kuimbae imonda wae reta Jesús iyikeyike pe, pëti pëti ikurusu rei.

<sup>39</sup>Jare jokoropi uasa wae reta uñeäkambiwawa rewe jei reta ikawi mbae wae Jesús pe.

<sup>40</sup>Jei reta: “Nde ndere tëi: ‘Opata arukachi tupao wasu jare amupüa yeta mbapi ara pe,’ ndere. Jukuärái ndepuere ndiyapo yawe, añawe iyerepi. Añetete nde ko jae Tumpa Tai yawe, yaecha eweyi kurusu wi,” jei reta Jesús pe.

<sup>41</sup>Jae ramiño wi sacerdote itenondewa reta, jare Moisés uikuatía wae re oporomboe wae reta, jare iru judío itenondewa reta oyoyai reta Jesús.

<sup>42</sup>Jae reta jei: “Jae ndaye uepi iiru wae reta, erëi ipuere’ä uyerepi jae. Añetete jae ko yanemburuwicha wasurä yawe, yaecha tuweyi añawe kurusu wi. Jayawe ramo yarowiata jese kuri yande reta,” jei reta.

<sup>43</sup>“Jae wirowia katu Tumpa re, jare jei tēi iyupe Tumpa Tai ko jae wae. Yaecha Tumpa tuepi añawe, añetete Tumpa uau yawe,” jei upuka reta.

<sup>44</sup>Jare jukuärái wi uyemingeta kachi reta Jesús koti jokua imonda wae reta uyekutu ñonoï kurusu re Jesús iyikeyike pe wae.

### **Jesús umano kurusu re**

*(Marcos 15.33-41; Lucas 23.44-49; Juan 19.28-30)*

<sup>45</sup>Jayawe ara mbite wiwe uñemipitumimbi mbapi ora rupi opaete jokua iwi rupi.

<sup>46</sup>Jare mbapi ora ma kaaru yawe, Jesús usapikai rewe jei: “Elí, Elí, ¿lama sabactani?” (Kua uipota jei judío reta iñee pe, “CheTumpa, cheTumpa, ¿maera pa chereya?”)

<sup>47</sup>Jare kua uyandu reta yawe, amokue joko pe ñonoï wae reta jei tēi: “Kua kuimbae ueni oï Elías,” jei reta.

<sup>48</sup>Jare jupiwoiño pēti wae osi oo umäki esponja vino uasakue pipe, jare oñono takuaräsi iyapi re, jare omondo oñono Jesús iyuru re jou waerä.

<sup>49</sup>Erëi iiru reta jei upuka rewe: “Eäro rani. Yaecha aramoi outa Elías uepi waerä,” jei reta.

<sup>50</sup>Jayawe Jesús täta usapikai ye jare umano.

<sup>51</sup>Jare aramoiño puyu tupao wasu joo umbiyao pipe wae osoro mbite rupi iwate wi iwi koti. Jare iwi ukäta, jare amokue itape reta owo.

<sup>52-53</sup>Jare teöwerenda reta uyepea. Jare taikue rupi, Jesús ikowe ye yawe ou umanokue wae reta ipite wi, jeta uñeñono tee Tumpa pewarä umanokue wae reta ikowe ye wi. Jare jae reta oë teöwerenda reta wi, jare opa yuraa reta tēta wasu Jerusalén pe, jare uyekuaa reta jeta wae pe.

<sup>54</sup>Jayawe sindaro reta itenondewa Jesús re umae iko wae jare sindaro reta uecha reta yawe kërái iwi ukäta wae jare opaete mbae uyeyapo wae, ukiyete reta, jare jei reta iyupe: “Añetete yepe, kua kuimbae ko jae Tumpa Tai,” jei reta.

<sup>55</sup>Jare mbiri katu wi umae ñonoï amokue kuña reta. Kua kuña reta yuweru Jesús ndiwe Galilea wi ombori waerä Jesús.

<sup>56</sup>Jare jae reta ipite pe ñonoï María Magdalena, jare Jacobo jare José ichi María jee wae, jare Zebedeo tai reta ichi wi.

### **Oñono reta Jesús jetekue teöwerenda pe**

*(Marcos 15.42-47; Lucas 23.50-56; Juan 19.38-42)*

<sup>57</sup>Ime iko wi pēti kuimbae ikokatu wae tēta wasu Arimatea pewa José jee wae. Jae wi ko pēti Jesús jemimboe. Ndei warasi uike mbowe, kua kuimbae

<sup>58</sup>oo ueka Pilato pe Jesús jetekue wiraa waerä oñono teöwerenda pe. Jayawe Pilato jei uñemee waerä chupe Jesús jetekue.

<sup>59</sup>Jayawe José oo umbiweyi Jesús jetekue kurusu wi, jare oñoma nieso ikia mbae wae pipe.

<sup>60</sup>Joko wi wiraa oñono pëti teöwerenda ipiau wae pe itape uyeyoo wae pe. Jokua ko jae teöwerenda José uyapoka iyupe wae. Jayawe oñono ma yawe Jesús jetekue joko pe, José umbiyapayere ita tuicha wae uyukenda waerä teöwerenda jöke. Jare joko wi oo ye.

<sup>61</sup>Jare María Magdalena jare ñru kuña María jee wae opa yuraa uwapi teöwerenda jöke jowai.

### **Sindaro reta uyandareko teöwerenda re**

<sup>62</sup>Piärewa pe – jae ko ara mbutuu pe – sacerdote itenondewa reta jare fariseo reta ndiwe yuraa Pilato jowai.

<sup>63</sup>Jare jei reta chupe: “Oremburuwicha, oremandúa ma noï, ndei umano mbowe jokua upurumbitawise pochi wae jei, ‘Mbapi ara ma uasa yawe, aikowe yeta ayu ai kuri umanokue wae reta ipite wi,’ jeise uyemingeta.

<sup>64</sup>Jayawe iyokui mii ndesindaro reta yuraa uyandareko waerä teöwerenda re mbapi ara pewa. Echa’ä jukuärái yawe, ndarau jokua jemimboe pochi reta yuraa oñomi Jesús jetekue. Echa’ä jukuärái uyapo reta yawe, jeita reta opaete wae pe Jesús ikowe ye ma ko ou umanokue wae reta ipite wi. Jare jukuärái yawe, oete ma upurumbitawita ñonoï reta Jesús upurumbitawi wae wi,” jei reta Pilato pe.

<sup>65</sup>Jayawe Pilato jei chupe reta: “Joko penoi pepo pe chesindaro reta. Pekua jae reta ndiwe piyukenda kawi teöwerenda jöke kërái pepuere wae rupi,” jei chupe reta.

<sup>66</sup>Jayawe jae reta yuraa uyukenda kawi teöwerenda jöke. Jare umiseñara reta awiye waerä kiawe uipea. Jare ueya joko pe sindaro reta uyandareko waerä teöwerenda re.

## **Mateo 28**

### **Jesús ikowe ye ou umanokue wae reta ipite wi**

*(Marcos 16.1-8; Lucas 24.1-12; Juan 20.1-10)*

<sup>1</sup>Jayawe mbutuu ara reta uasa ma yawe, domingo ndimboweasi, María Magdalena jare ñru kuña María jee wae yuraa reta teöwerenda koti.

<sup>2</sup>Jare aramoño iwi täta ukäta. Echa’ä pëti araiwa yandeYa pe uyeyokui wae yepe uweyi ara wi umbisiri ita tuicha wae teöwerenda jöke wi. Joko wi uwapi jokua ita re.

<sup>3</sup>Jare jae jowa uyekuaa jembipe ama uwera wae rami. Jare jemimonde täsi, roi täsi wae rami.

<sup>4</sup>Jare jokua teöwerenda re uyandareko ñonoï wae reta kua uecha yawe, opa uriri reta ukiye ramo. Jare umano wae echa upita reta.

<sup>5</sup>Jayawe araiwa jei kuña reta pe: “Awiye pekiye,” jei. “Aikuaa pe reta peka pei Jesús umano kurusu re wae.

<sup>6</sup>Erëi jae mbaeti ma kua pe oi. Echa’ä ikowe ye ma ou umanokue wae reta ipite wi kërái jae jeise pewe rami. Mase, peyu pemaie jendakue re,” jei.

<sup>7</sup>“Jare pekua woi pere jemimboe reta pe kuärái: ‘Jesús ikowe ye ma ou umanokue wae reta ipite wi, jare jae oota oi tenonde pewi iwi Galilea pe. Joko pe peowäitita pei kuri,’ pere chupe reta. Kua ko jae che aipota jae pewe wae,” jei araiwa kuña reta pe.

<sup>8</sup>Jayawe kuña reta oë woi yuraa ye reta teöwerenda wi. Jare yepe tēi ukiye reta, erëi uyerowia reta tuicha rupi. Jayawe osi yuraa umimbeu reta waerä Jesús jemimboe reta pe kërái araiwa jei chupe reta rami.

<sup>9</sup>Jare yuraa yureko reta rambuewe, aramoiño Jesús uyekuaa chupe reta jei rewe: “Pepüa ma, ¿kërái pa pei?” jei chupe reta. Jayawe kuña reta oya yuraa ikoti, jare uñeñoño iwi re uikuäwa ipi rupi, jare umbutuicha reta Jesús.

<sup>10</sup>Jayawe Jesús jei chupe reta: “Awiye pekiye,” jei. “Pekua pemimbeu chehermano reta pe yuraa reta waerä iwi Galilea pe. Joko pe cherechata reta kuri,” jei chupe reta.

### **Sindaro reta umimbeu mburuwicha reta pe wae**

<sup>11</sup>Jare kuña reta yuraa ye rambuewe teöwerenda wi, sindaro reta uyandareko yureko teöwerenda re wae yuraa ye reta wi tēta wasu pe. Joko pe umimbeu reta sacerdote itenondewa reta pe opaete mbae uasa wae.

<sup>12</sup>Jayawe sacerdote itenondewa reta uyembati judío itenondewa reta ndiwe jare uyemingeta reta mbae uyapo waerä. Jare opa ma uyemboemboe reta yawe, umee reta jeta korepoti sindaro reta pe.

<sup>13</sup>Jare jei chupe reta: “Pereta kuri, ‘Jesús jemimboe reta yuweru teöwerenda pe pītu yawe, jare oñomi reta Jesús jetekue ore ndoke nduiko rambuewe.’ Jukuärái pereta kuri,” jei chupe reta.

<sup>14</sup>“Jare aramoi jeräkua Pilato pe yawe, ore ndoeta chupe kuri pe reta mbaeti ko teko penoi. Awiye piyembipia’ä kua re,” jei mburuwicha reta sindaro reta pe.

<sup>15</sup>Jayawe sindaro reta uipisi korepoti jare uyapo jokua judío imburuwicha reta jei wae rupi. Jare jokua jeko pewa ko jekuaeño añawe rewa jeta judío reta jei tēi Jesús jemimboe reta oñomi Jesús jetekue.

### **Jesús oyokui once wae jemimboe reta**

*(Marcos 16.14-18)*

<sup>16</sup>Jayawe Jesús once jemimboe tenondewaete reta yuraa iwi Galilea pe pēti iwitu wasu rai re kiape Jesús umimbeu chupe reta wae pe.

<sup>17</sup>Jare joko pe Jesús uyekuaa chupe reta. Jare jemimboe reta uecha yawe, umbutuicha reta Jesús. Erëi amokue wae pewarä yawái iko chupe wirowia waerä jae ko Jesús wae.

<sup>18</sup>Jayawe Jesús oya ou jese reta, jare jei chupe reta kuärái: “CheRu umee ma chewe opaete mbaepuere ara pe ñonoï wae reta re jare iwí pe ñonoï wae reta re,” jei chupe reta.

<sup>19</sup>“Jáeramo che tae pewe, pekua opaete iwí rupi. Jare pemboe opaete wae ambie ye ye iñee pe uyemingeta wae reta yureko waerä cheremimboe retarä,” jei chupe reta. “Pembisakambu reta í pe cheRu jee re, jare cheree re, jare Espíritu Santo jee re,” jei.

<sup>20</sup>“Jare pemboe reta uyapo waerä opaete che jae pewe wae rupi,” jei. “Mase, che aïta pe reta ndiwe jaeño mái pewa ara taikuewa rewa.” Jukuärái Jesús oyokui reta. Jaeño ma.

## Marcos

### Kua tupapire rewā:

Kua kuatía, jae ko Marcos uikuatía wae. Marcos ko jae pëti kuimbae tenonde yawe umiiru amokue Jesús jemimboe tenondewaete reta wae (Hechos 12.25, 13.5), jare jae jee wi Juan Marcos. Jaikue rupi Marcos iko Jesús jemimboe Pedro jee wae imboria, jare uikuatía Pedro umimbeu Jesús rewā wae. Jayawe kua tupapire Marcos uikuatía wae, jae ko mbaembae yandeYa Jesucristo uyapo wae jare jei wae kua iwi pe iko rambuewe. Kua tupapire puku'ä oï iiru kuatía reta Jesús rewā wae wi, echa'ä Marcos uikuatía iko romano reta pewarä jae reta ipuere waerä uikuaa Jesucristo rewā. Jare romano reta uipota'ä umingeta kuatía puku wae reta jeta ñee ime onoi wae. Kua tupapire ko jae tenondete kuatía Jesucristo rewā uyekuatía wae.

### Marcos 1

#### Juan upurumbisakambu wae umimbeu Tumpa iñee

(Mateo 3.1-11; Lucas 3.2-16; Juan 1.23-27)

- <sup>1</sup>Kua wiwe uyembipi ñee ikawi wae Tumpa Tai Jesucristo rewā.
- <sup>2</sup>Ime iko arakaete pëti kuimbae Tumpa iñee umimbeu wae Isaías jee wae. Jae uikuatía Tumpa iñee kuärái: “YandeRu Tumpa jei Tai pe: ‘Mase, che amondota äi tenonde mii ndewi chiñee umimbeu wae. Jare jae umimbeuta oï iiru wae reta pe uyeyapikatu reta waerä ndei newäe mbowe.
- <sup>3</sup>Jae oïta iwitini wasu rupi, jare jeta wae reta yuraata jae oï wae pe. Jare jae usapikai rewe jeita chupe reta kuärái: ‘Piyerowa jare piyeyapikatu yandeYa koti, echa'ä koiñoete ma oï yandeYa iwäe ara,’ jeita chupe reta,’ jei yandeRu Tumpa Tai pe.” Jukuärái uikuatía arakae Isaías.
- <sup>4</sup>Jayawe Juan upurumbisakambu wae oo iwitini wasu rupi, jare umimbeuñoi opaete yuweru ikoti wae reta pe kuärái: “Piyembisakambukata ko i pe pechaka waerä iiru wae reta pe peya ma ko pepiyemingeta jupi mbae wae jare perowia ma ko Tumpa jei wae re. Jare jukuärái piyapo yawe, yepe tēi piyawī ma Tumpa koti, erēi Tumpa ndarau imandúa pewe jokua teko penoi wae re.” Jukuärái jei Juan chupe reta.
- <sup>5</sup>Jare jeta iwi Judea pewa reta jare tēta wasu Jerusalén pewa reta yuraañoi reta Juan oï wae pe uyapisaka reta waerä iñee re. Jare opaete wae jowake uyembeu reta uñemimichi rewe kērai Tumpa koti uyawī reta wae. Jare uyembeu reta ma yawe, Juan umbisakambu reta i wasu Jordán jee wae pe.
- <sup>6</sup>Juan jemimonde mbaemimba camello jee wae jawe pewa ko, jare jumbikuaa ko wakapi pewa. Jare jembiu ko jae tuku jare ei ñana rupiwa.

<sup>7</sup>Jae umimbeu yuweru wae reta pe kuärái: “Cheraikue rupi outa pëti wae imbaepuerete chewi wae,” jei. “Che jupi’ä etei ko ipipasa ïcha mii yepe ayora waeräwe,” jei.

<sup>8</sup>“Che pumbisakambuño ko äi i pe, erëi jae peñonota pëti pëti wae piko waerä pëti ramiño iyé etei Espiritu Santo rupi.” Jukuärái jei Juan chupe reta.

### **Juan umbisakambu Jesús i pe**

*(Mateo 3.13-17; Lucas 3.21-22)*

<sup>9</sup>Jayawe mbowí ara rupi Jesús oo tëta wasu Nazaret wi Juan oí wae pe. Nazaret ko jae pëti tëta wasu iwi Galilea pewa. Jayawe Juan umbisakambu Jesús i wasu Jordán pe.

<sup>10</sup>Jare Jesús oë ye i wi yawe, jupiwoi uecha ara uyepea oí. Jare uecha wi Espiritu Santo uweyi ou ara wi uwapi jese pëti pikasu rami.

<sup>11</sup>Jare uyendu ñee ara wi jei kuärái: “Nde ko jae cheRai nduauete wae. Nde chembiyerowiaete neí,” jei.

### **Añawasu uipota tëi uyawika Jesús pe Tumpa koti**

*(Mateo 4.1-11; Lucas 4.1-13)*

<sup>12</sup>Jupiwoiño Espiritu Santo jei Jesús pe oo waerä iwitini wasu koti tëta mbae rupi. Jayawe Jesús oo jokoti.

<sup>13</sup>Jare upita joko pe cuarenta ara pewa mbaemimba jesaete wae reta ipite rupi. Jayawe Satanás ou uyawika waerä tëi chupe Tumpa koti. Jare Jesús iwitini wasu pe iko rambuewe, yuweru araiwa reta ombori waerä.

### **Jesús umbipi iparawiki**

*(Mateo 4.12-17; Lucas 4.14-15)*

<sup>14</sup>Joko wi mbowí ara rupi, oñono reta Juan upurumbisakambu wae peresoriru pe. Jayawe Jesús oo iwi Galilea pe umimbeu waerä ñee ikawi wae Tumpa wi ou wae.

<sup>15</sup>Jae jeiñoise kuärái: “Uwäe ma ara Tumpa uyapo waerä jae jei uyapota iko wae. Koiño ma oí uyekuaa waerä Tumpa imbaepuere mburuwicha wasu pewa kua iwi pe. Jáeramo peya pepiayemingeta jupi mbae wae jare perowia Tumpa iñee ikawi wae re,” jei.

### **Jesús umbipi ueni jemimboe retarä**

*(Mateo 4.18-22; Lucas 5.1-11)*

<sup>16</sup>Pëti ara Jesús uwata iko ipa wasu Galilea jee wae jembei rupi. Jare uwata iko rambuewe, uecha pëti kuimbae Simón jee wae jare tiwi Andrés. Jae reta pira uipisi wae reta ko jare omombo yureko reta pisa ipa wasu pe.

<sup>17</sup>Jayawe Jesús jei chupe reta: “Peyu che ndiwe,” jei. “Pe reta pikuaa pira pipisi, erëi che pomboeta peporomboe waerä, ïru wae reta wirowia waerä cheré,” jei chupe reta.

<sup>18</sup>Jayawe jae reta ueya woi ipisa, jare yuraa reta Jesús ndiwe yureko waerä jemimboerä.

<sup>19</sup>Jare ndei mbiri oo mbowe, Jesús uecha Zebedeo tai reta. Pëti jee Jacobo, jare tiwi jee Juan. Jae reta uyapikatu yureko pisa reta chalana pe.

<sup>20</sup>Jare jawoi pewa Jesús ueni reta. Jayawe jae reta ueya tu chalana pe uparawiki chupe wae reta ndiwe, jare yuraa reta Jesús ndiwe yureko waerä jemimboerä.

### **Jesús omoë pëti añä kuimbae wi**

*(Lucas 4.31-37)*

<sup>21</sup>Jayawe yuraa uwäe reta tëta wasu Capernaum jee wae pe. Jare mbutuu ara pe Jesús uike tupao pe jare umbipi oporomboe.

<sup>22</sup>Jare uyapisaka jese wae reta ipiakañi jae oporomboe wae re, echa'ä oporomboe'ä Moisés uikuatía wae re oporomboe wae reta rami. Jae oporomboe imbaepuere rewe.

<sup>23</sup>Jare jokua tupao pe ime iko wi pëti kuimbae añä uyembiiya jese wae. Aramoiño jae iñeeäta rewe jei:

<sup>24</sup>“Jesús Nazaret pewa, ¿mbae pa ndeyu ndeka kua pe?” jei. “¿Ndeyu pa orerukachi waerä? Che ndukuaa. Nde ko jae Tumpa Tai jupiete wae,” jei.

<sup>25</sup>Jayawe Jesús iñeeäta rewe jei añä pe: “¡Nekii! Eë kua kuimbae wi,” jei chupe.

<sup>26</sup>Jayawe añä täta umbiriri kuimbae, jare täta jäse rewe oë chuwi.

<sup>27</sup>Jare opaete kua uecha wae reta ipiakañiete jare jei reta iyupe: “¿Mbae ra ko kua? Jae ko oporomboe oi mbaembae yayandu'ä etei wae re. Mase kërái jae ime onoi mbaepuere añä reta re. Echa'ä jae reta uyapo jae jei chupe reta wae,” jei reta.

<sup>28</sup>Jayawe imambae jeräkua Jesús rewa opaete iwi Galilea rupi.

### **Jesús uminguera Simón Pedro jaicho**

*(Mateo 8.14-15; Lucas 4.38-39)*

<sup>29</sup>Jayawe Jesús, Jacobo, Juan, jare amokue iru jemimboe reta oë ye tupao wi, jare yuraa reta Simón jare Andrés jëta pe.

<sup>30</sup>Jare yuraa ma uwäe reta yawe, umimbeu woi reta Jesús pe Simón jaicho jaku jare uyapakua oi jupa pe.

<sup>31</sup>Jayawe Jesús oo uipisi ipo wi umupüa umbiwapi. Jare jaku upita woi chuwi. Jayawe jokua kuña upüa jare umbipi uyapo tembiu umingaru reta waerä.

### **Jesús uminguera jeta imbaerasi wae reta**

*(Mateo 8.16-17; Lucas 4.40-41)*

<sup>32</sup>Joko wi, warasi uike ma oo yawe, tëta wasu pewa reta ueru Jesús pe imbaerasi wae reta jare añä uyembiiya jese wae reta.

<sup>33</sup>Jare jeta joko pewa reta uyembati jokua tëta jöke rupi.



<sup>34</sup>Jayawe Jesús uminguera jeta imbaerasi wae reta opa yea mbaerasi reta wi, jare omoë jeta añã uyembiiya jese wae reta wi. Jare umaño'ã uyemingeta waerã añã reta, echa'ã jae reta uikuaa kía ko jae Jesús wae. Jare Jesús uipota'ã jokua uyemimbeu waerã añã reta rupi.

### **Jesús oo iwi Galilea rupi umimbeu waerã Tumpa iñee**

*(Lucas 4.42-43)*

<sup>35</sup>Piãrewa pe Jesús upüa ndei köe mbowe, jare oë oo kii ngatu wae pe uyerure waerã Tumpa pe.

<sup>36</sup>Jayawe Simón jare jae ndiwe ñonoï wae reta yuraa ueka.

<sup>37</sup>Jare uwäe chupe yawe, jei reta Jesús pe: “Opaete wae ndereka ñonoï,” jei reta.

<sup>38</sup>Jayawe Jesús jei chupe reta: “Ya ñru tãta wasu rai reta koiño ñonoï wae rupi, joko pe wi amimbeu waerã Tumpa iñee. Echa'ã jokuaerã ko che ayu,” jei chupe reta.

<sup>39</sup>Jayawe yuraa reta opaete iwi Galilea rupi. Jare Jesús umimbeu Tumpa iñee tupao reta rupi, jare omoë jeta añã uyembiiya jese wae reta wi.

### **Jesús uminguera kuimbae ipire okui wae**

*(Mateo 8.1-4; Lucas 5.12-16)*

<sup>40</sup>Pëti ara ou owäiti Jesús pëti kuimbae ipire okui wae. Jayawe kuimbae uñeño itawa re Jesús jowai, jare ikuasi katu rewe jei chupe: “Nde ndipota yawe, ndepuere cheminguera mii jukuärái wi chekia mbae aï waerã,” jei chupe.

<sup>41</sup>Jare Jesús uiparareko uma jese. Jayawe oñoño ipo jese jare jei chupe: “Aipotae ndekuera waerã. Añawe ekuera,” jei chupe.

<sup>42</sup>Jare jupiwoiño kuimbae ukuera imbaerasi wi!

<sup>43</sup>Jayawe Jesús omondo ye jei chupe rewe:

<sup>44</sup>“Awiye embeu kía pe awe che ko numinguera wae,” jei. “Ekua iyechaka sacerdote pe jae uikuaa waerã nde ndekuera ma ko. Jare emee wi Tumpa pe mbae kërái arakaete Moisés jei wae rami, ime yawe kía kua nunga mbaerasi wi ukuera wae. Joko wi ramo sacerdote umimbeuta tãta wasu pewa reta pe ndekuera ma ko, jare jukuärái ndepuereta niñemüru ye jae reta ndiwe,” jei chupe.

<sup>45</sup>Erëi kuimbae oë ye oo yawe, umimbeu opaete wae pe Jesús uyapo chupe wae rewa. Jáeramo Jesús ipuere'ã ma uike tãta wasu reta pe kía uikuaa mbae rewe. Jáeramo upita tãta mbae rupi. Erëitu jeta wae reta yuraa jae oï wae pe opaete kerupi wi.

## **Marcos 2**

### **Jesús uminguera pëti kuimbae ipuere mbae omi wae**

*(Mateo 9.1-8; Lucas 5.17-26)*

<sup>1</sup>Mbowi ara rupi Jesús oo ye tãta wasu Capernaum pe, jare jeräkua jae ime oï tãta pe wae.

<sup>2</sup>Jayawe jeta wae reta yuweru uyembati joko pe, jare tinee reta o rupi jare öke rupi awe. Jayawe Jesús umimbeu Tumpa ñnee chupe reta.

<sup>3</sup>Jare Jesús oporomboe iko rambuewe, irundi kuimbae reta owoi ueru jupa rewe pëti kuimbae ipuere mbae omi wae.

<sup>4</sup>Erëi ueru wae reta ipuere'ä uruïke jokua kuimbae Jesús oï wae pe, jetaete o pe ñonoï ramo. Jáeramo uruyupi reta tëta iáramo, jare ombosopu reta chupe Jesús jese katu. Jokoropi umbiweyi reta jokua kuimbae ipuere mbae omi wae jupa rewe.

<sup>5</sup>Jare Jesús kua uecha yawe, uikuaa jae reta wirowia kawi jese wae. Jáeramo jei kuimbae ipuere mbae omi wae pe: “Cheraï, teko nenoï Tumpa koti wae opa ma uyembái ndewi,” jei chupe.

<sup>6</sup>Amokue kuimbae Moisés uikuatía wae re oporomboe wae reta uwapi yureko joko pe. Jare pëti pëti wae ipia pe uyemingeta reta uyandu wae re kuärái:

<sup>7</sup>“¿Kiaete ra kua kuimbae pochi jukuärái uyemingeta waerä? Jae uyapo ma mbae kachi wae, echa'ä uyemingeta oï Tumpa rami. Tumpaño ko ipuere umbái yandewi teko ñanoï ikoti wae.” Jukuärái ipia pe uyemingeta reta.

<sup>8</sup>Jayawe Jesús uikuaa woi chuwi reta ipiayemingeta, jare jei chupe reta: “¿Maera pa jukuärái piyemingeta peï pepia pe?” jei.

<sup>9</sup>“Che jae kua kuimbae pe, ‘Teko nenoï Tumpa koti wae opa ma uyembái ndewi,’ jae chupe. Erëi ipotawe kía yawai'ä jokua jei waerä,” jei. “Yawaita ko ipotawe kía jei chupe waerä kuärái: ‘Epüa, jare eupi nderupa, jare ewata.’ Echa'ä aramoi ukuera'ä yawe, jayawe imarata upita,” jei.

<sup>10</sup>“Jayawe taminguera kua kuimbae perowake pikuaa waerä che kuimbaerä ayeyapo wae ime ko anoi wi mbaepuere kua iwï pe ambái waerä kía wi teko onoi Tumpa koti wae,” jei Jesús chupe reta. Jayawe Jesús jei kuimbae ipuere mbae omi wae pe:

<sup>11</sup>“Che tae ndewe, epüa. Eupi nderupa, jare ekua nerëta pe,” jei chupe.

<sup>12</sup>Jayawe jupiwai kuimbae upüa, jare ueupi jupa, jare oë oo opaete joko pe ñonoï wae reta jowake. Jayawe opaete ipiakañi upita reta, jare umbutuicha reta Tumpa jee jei rewe: “Yaecha'ä etei kua nunga,” jei reta.

### **Jesús ueni pëti kuimbae Leví jee wae iko waerä jemimboerä**

*(Mateo 9.9-13; Lucas 5.27-32)*

<sup>13</sup>Joko wi Jesús oo ye ipa wasu Galilea jembei pe. Jare jeta wae reta yuweru uyembati jae oï wae pe. Jayawe jae umbipi omboe reta joko pe.

<sup>14</sup>Jare joko wi oo yawe, Jesús uecha Alfeo tai Leví jee wae uwapi oï kiape umbiepi reta mburuwicha pewarä okowara wae pe. Echa'ä Leví ko jae pëti wae mburuwicha pewarä okowara wae. Jayawe Jesús jei chupe: “Eyu che ndiwe ndiko waerä cheremimboerä,” jei chupe. Jayawe Leví upüa jare oo Jesús ndiwe.

<sup>15</sup>Jare kaaru katu ma yawe, Leví uparea Jesús jare jemimboe reta pe ukaru waerä jae jëta pe. Jare joko pe ukaru ñonoï wi ïru kuimbae reta mburuwicha pewarä okowara wae jare jeko kachi wae reta wi. Jae reta ñonoï joko pe wi, echa'ä jokua ara reta rupi jeta kua nunga reta uwata Jesús jupie.

<sup>16</sup>Jayawe amokue Moisés uikuatía wae re oporomböe wae reta jare fariseo reta uecha Jesús ukaru oï jokua nunga kuimbae reta ndiwe. Jáeramo upirandu reta Jesús jemimboe reta pe: “Mase, pemboea ukaru oï okowara wae reta ndiwe jare ïru jeko kachi wae reta ndiwe. ¿Kërái pa jokua añawe?” jei reta.

<sup>17</sup>Jesús kua uyandu yawe, jei umbijaanga rewe chupe reta: “Ikowe katu wae reta ueka'ä iyupe upurupiano wae,” jei. “Imbaerasi wae retaño ko ueka. Jáeramo che ayu'ä aeni waerä jupi wae reta. Ayu ko aeni waerä jeko kachi wae reta,” jei chupe reta.

### **Maera Jesús jemimboe reta oñono tee'ä ara reta ukaru mbae waerä**

*(Mateo 9.14-17; Lucas 5.33-39)*

<sup>18</sup>Pëti ara Juan upurumbisakambu wae jemimboe reta jare fariseo jemimboe reta oñono tee yureko ara ukaru mbae waerä. Jayawe amokue reta yuweru jare jei reta Jesús pe: “Juan jemimboe reta oñono teeñoi ara reta ukaru mbae waerä umbiyerowia reta waerä Tumpa. Jare fariseo jemimboe reta jukuärái uyapo wi. ¿Maera pa nderemimboe reta uyapo'ä wi jukuärái?” jei reta.

<sup>19</sup>Jayawe Jesús jei chupe reta umbijaanga rewe: “Uparea reta yawe menda pe, ¿oñono teeta yerá jokua ara etei ukaru mbae ñonoï waerä? Ndarau etei,” jei chupe reta. “Jae reta ukaru ñotái ko kuimbae umenda wae jae reta ndiwe oï rambuewe, echa'ä uyerowiaete ñonoï ramo,” jei.

<sup>20</sup>“Erëi outa uwäe ara kuimbae umenda wae uyereraa waerä chuwi reta. Jokua ara ramo jae reta oñono teeta ara reta ukaru mbae waerä,” jei chupe reta.

<sup>21</sup>Jare Jesús jei wi chupe reta umbijaanga rewe: “Yaikuaa ñaï ikawi'ä ko yamboya waerä temimonde indechi wae mbaemboyaka ipiau wae pïpe. Echa'ä jukuärái yayapo yawe, mbaemboyaka ipiau wae umiatata temimonde indechi wae, jare temimonde jeieteta osoro,” jei chupe reta.

<sup>22</sup>“Jae nunga wi kiawe umbiru'ä vino ipiau wae vino jïru wakapi pewa indechikue pe. Echa'ä jukuärái uyapo yawe jare vino jayasi yawe, omondorota jïru jare opata uyepiyere. Jayawe vino jare jïru ndarau ma ikawi. Jáeramo yambiru ko vino ipiau wae jïru ipiau wae pe,” jei. “Jukuäraiete wi che aporomböe wae ipiau wae ko,” jei Jesús chupe reta.

### **Jesús oporomböe mbutuu ara rewa**

*(Mateo 12.1-8; Lucas 6.1-5)*

<sup>23</sup>Pëti mbutuu ara Jesús oo iko pëti koo rupi jemimboe reta ndiwe. Jare uasa yureko reta rambuewe, jemimboe reta umbipi uipoo trigo jare jou reta.

<sup>24</sup>Jayawe amokue fariseo reta jei Jesús pe: “Mase, ¿maera pa nderemimboe reta uyapo ñonoï Moisés arakae jei awiyeta ko yayapo tëi mbutuu ara pe wae?” jei reta.

**25-26** Jayawe Jesús jei chupe reta: “¿Pemingeta’ä yerá Tumpa iñeeriru pe kërái arakaete David uyapo wae re?” jei chupe reta. “Pëti wese, sacerdote tenondewaete Abiatar jee wae iko yawe, David jare jae ndiwe ñonoï wae reta iyembaiete. Jayawe David uike tupao wakapi pewa pe jou waerä mbiyape reta Tumpa pewarä uñeñono tee wae. Erëi Moisés arakae jei jaeño sacerdote reta ipuere jou jokua mbiyape. Erëi David jou, jare umee jae ndiwe yureko wae reta pe jae reta wi jou waerä,” jei chupe reta.

**27** Jare Jesús jei wi jokua fariseo reta pe: “Tumpa uyapo mbutuu ara yanemaerä ikawi waerä yandewe. Mbaeti ko uyapo mbutuu ara yanembiawái waerä,” jei.

**28** “Jayawe che kuimbaerä ayeyapo wae ime anoi mbaepuere jae waerä mbae ko yayapota mbutuu ara pe wae,” jei chupe reta.

## Marcos 3

### Jesús uminguera pëti kuimbae ipo jowaicho utini wae

(Mateo 12.9-14; Lucas 6.6-11)

**1** Jayawe Jesús uike ye tupao pe, jare joko pe oï wi pëti kuimbae ipo jowaicho utini wae.

**2** Jare fariseo reta umae ngatu Jesús re upuruminguerata ra mbutuu ara pe wae re. Echa’ä Jesús uminguera yawe kuimbae, jeita reta Jesús uparawiki ma mbutuu ara pe jare umbijekota tëi reta jokua re.

**3** Jayawe Jesús jei kuimbae ipo jowaicho utini wae pe: “Epüa. Eyu iyemboi kua reta jowai,” jei chupe.

**4** Jayawe Jesús upirandu fariseo reta pe: “¿Mbae ra ko jupi yayapo waerä mbutuu ara pe? ¿Ikawi wae, ani ikawi mbae wae? ¿Yapuruepi waerä, ani yapuruyuka waerä? ¿Mbae pa jei Tumpa kua rewa?” jei chupe reta. Erëi jae reta jei’ä mbae awe.

**5** Jayawe pochi rewe Jesús umae iyipi rupi ñonoï wae reta re, jare tuicha ipiatiti jae reta ipiatäta ramo. Jayawe jei kuimbae pe: “Emisimi ndepo,” jei chupe. Jayawe kuimbae ipo umisimi jare ukuera woi.

**6** Jayawe fariseo reta opa oë joko wi. Jare umbipi uyemboemboe reta mburuwicha Herodes jee wae imboria reta ndiwe kërái rupi ipuere uyukaka reta waerä Jesús.

### Jeta yuweru uyapisaka waerä Jesús iñee re

(Mateo 12.15-16; Lucas 6.17-19)

**7** Jayawe Jesús jare jemimboe reta ndiwe yuraa ipa wasu koti. Jare yuraa wi jaikue jeta iwi Galilea pewa reta.

**8** Jare uyandu reta yawe opaete Jesús uyapo wae rewa, yuweru wi jae oï wae pe jeta iwi Judea pewa reta jare iwi Idumea pewa reta. Jare yuweru wi jeta tëta wasu reta Jerusalén, Tiro, jare Sidón pewa reta, jare i wasu Jordán jowaicho kotiwa reta.

<sup>9</sup>Jayawe Jesús jei jemimboe reta pe uyapikatu waerä chupe pëti chalana uyupi pipe waerä, awiye jeta wae reta oyopi waerä.

<sup>10</sup>Echa'ä jae uminguera ma jeta wae reta; jáeramo jeta ñru imbaerasi wae reta uñemiañamiaña yuweru reta ikoti uyawiki reta waerä.

<sup>11</sup>Jare aña uyembiiya jese wae reta joko pe ñonoï wi. Jare jae reta uecha yawe Jesús, opa oa reta iwi re jae jowai, jare ñneeäta rewe jei reta chupe: “Nde ko jae Tumpa Tai,” jei reta.

<sup>12</sup>Jayawe Jesús jei chupe reta: “Awiye pemimbeu kía pe awe kua che rewa,” jei chupe reta.

### **Jesús jemimboe tenondewaete reta jee**

*(Mateo 10.1-4; Lucas 6.12-16)*

<sup>13</sup>Joko wi Jesús oo pëti iwitu re, jare uenika amokue kuimbae jae uiparawo wae reta. Jayawe jae reta yuweru jae oï wae pe.

<sup>14</sup>Jare jae reta ipite wi Jesús uiparawo doce kuimbae reta jae ndiwe uñemiïru uwata waerä. Jare taikue rupi Jesús omondota iko reta umimbeu waerä opaete rupi Tumpa ñnee.

<sup>15</sup>Jare wi umeeta iko chupe reta mbaepuere uminguera waerä imbaerasi wae reta jare omoë waerä aña uyembiiya jese wae reta wi.

<sup>16</sup>Kuärái ko Jesús uiparawo wae reta jee: Simón (kua kuimbae Jesús umbijee Pedro);

<sup>17</sup>jare Zebedeo tai reta Jacobo jare Juan jee wae reta (kua mokui reta pe Jesús jei Boanerges, jare kua tee uipota jei ñnee pe, “Ara jiapu wae rami.”).

<sup>18</sup>Jae nunga wi Jesús uiparawo Andrés, Felipe, Bartolomé, Mateo, Tomás, Alfeo tai Jacobo jee wae, Tadeo, jare Simón (kua Simón jae ko ñru wae reta ueni wi Zelote pe).

<sup>19</sup>Jare Jesús uiparawo wi Judas Iscariote (kua kuimbae taikue rupi umeeta wireko Jesús jowaicho reta pe). Jukuärái ko jee Jesús uiparawo wae reta.

### **Mburuwicha reta umbijeko tēi Jesús**

*(Mateo 12.22-32; Lucas 11.14-22, 12.10)*

<sup>20</sup>Jayawe Jesús oo ye uike tēta pe kiape jae upita iko wae pe. Jare jeta wae reta yuweru ye joko pe. Jáeramo Jesús jare jemimboe reta ikii'ä ñonoï jeko pewa, ipuere'äwe ukaru reta.

<sup>21</sup>Jare Jesús jētara reta jokua uikuaa yawe, yuweru wiraa waerä tēi Jesús jēta pe. Echa'ä amokue reta jei Jesús rewa: “Iyarakuaa'ä ma oï,” jei reta.

<sup>22</sup>Jare joko pe ñonoï amokue Moisés uikuatía wae re oporomboc wae reta. Jae reta yuweru ma Jerusalén wi. Jare jei yureko reta iyupe Jesús rewa:

“Añawasu uyembiiya ma jese. Añawasu imbaepuere rupi ko kua kuimbae omoë oï añã uyembiiya jese wae reta wi,” jei tēi reta.

<sup>23</sup>Jayawe Jesús ueni opaete wae reta ikoti, jare jei chupe reta umbijaanga rewe: “Satanás ndarau jaei uñemoë kuimbae wi,” jei.

<sup>24</sup>“Echa’ã yande yaikuaa kawĩ ñaĩ tēta wasu pewa reta oyowaicho yawe jae yepái, opata ko uyererukachi reta.

<sup>25</sup>Jare jukuäráita wi ko pēti ñetära reta oyowaicho yawe jae yepái,” jei.

<sup>26</sup>“Jayawe Satanás ndarau jaei uñemoë kuimbae wi. Echa’ã jukuärái yawe, Satanás jare añã reta opata tēi uyembiyao tee tee oyowaicho waerä jae yepái, jare opata tēi uyererukachi reta. Jare joko pe iyapita tēi ko Satanás,” jei chupe reta.

<sup>27</sup>Jare Jesús umbijaanga rewe jei wi chupe reta: “Ime yawe kía uipota uike kuimbae ipiräta wae jēta pe upiro waerä chuwi imbaembae, jae uipokua ranita ko jokua kuimbae ipiräta wae. Jayawe ramo jae ipuereta upiro chuwi imbaembae,” jei. “Jare jukuärái wi che mbaeti yawe tenonde amiamiri añã reta itenondewa Añawasu, ndarau wi chepuere amoë añã reta. ¿Këräita ra chepuere jayawe amoë añã reta kía wi Añawasu imbaepuere pe?” jei chupe reta.

<sup>28</sup>“Che tae pewe añetete wae, kua iwi pe ime opa kërái rái rupi Tumpa koti uyawi reta wae, jare jeta wae reta uyemingeta kachi Tumpa koti,” jei. “Tumpa ipuereta jokua umbái chuwi reta.

<sup>29</sup>Erēi ime yawe kía uyemingeta kachi Espiritu Santo koti wae, Tumpa ndarau umbái chuwi jokua. Uyembijekota jaño mái pewa,” jei chupe reta.

<sup>30</sup>Jesús jei jukuärái jokua Moisés uikuatía wae re oporomboe wae reta pe, echa’ã tenonde yawe jae reta jei tēi chupe: “Añã uyembiiya ma jese.”

### **Jesús ichi jare tiwi reta ou ueka reta Jesús**

*(Mateo 12.46-50; Lucas 8.19-21)*

<sup>31</sup>Jayawe Jesús ichi jare tiwi reta ndiwe yuweru uwäe jokua tēta kiape Jesús oï wae pe, jare oka wi omondo uenika reta.

<sup>32</sup>Jayawe o pe Jesús iyipi rupi uwapi ñonoï wae reta jei chupe: “Ndesi jare nderiwi reta nereni ñonoï oka pe,” jei reta.

<sup>33</sup>Jayawe Jesús jei chupe reta: “¿Kía reta ra ko jae chesi jare cheriwi reta?” jei chupe reta.

<sup>34</sup>Jayawe umae iyipi rupi uwapi ñonoï wae reta re jare jei: “Mase, kua nunga reta ko jae chesi jare cheriwi reta.

<sup>35</sup>Echa’ã Tumpa jei wae uyapo wae reta ko jae cheriwi reta jare cherindi reta jare chesi,” jei chupe reta.

## **Marcos 4**

### **Jesús umbijaanga kuimbae umaeti wae re**

(Mateo 13.1-9; Lucas 8.4-8)

<sup>1</sup>Pëti ara Jesús umbipi ye oporomboe ipa wasu jembei pe. Jare joko pe jetaete ye yuweru uyembati reta jare ipuere oyopi ye reta Jesús. Jáeramo jae oo uyupi pëti chalana pe jare uwapi. Jare uyembati wae reta ñonoï ipa wasu jembei rupi.

<sup>2</sup>Jayawe i jembei seri wi Jesús omboe reta jeta mbaembae re umbijaanga rewe. Jei chupe reta kuärái:

<sup>3</sup>“Piyapisaka kua chiñee re,” jei. “Pëti kuimbae oo umaeti waerä.

<sup>4</sup>Jare umiái temiti yawe, amokue oa tape rai rupi. Jayawe yuweru wira reta opa jou,” jei chupe reta.

<sup>5</sup>“Ëru temiti oa itapite rupi mbowiño iwi wireko wae re. Kua reta imambae jeñi, jeta’ä iwi chupe ramo.

<sup>6</sup>Erëi jaikue rupi warasi jasi yawe, opa ipiru japo kipe’ä iko ramo,” jei.

<sup>7</sup>“Ëru temiti oa ñurätipite pe. Jare ñuräti ukuakuaa ma yawe, opa umbuputupa temiti. Jáeramo yawiye’ä,” jei.

<sup>8</sup>“Erëi ïru temiti oa iwikawi pe. Jokua reta jeñi kawi, ukuakuaa, jare ía kawi. Amokue mbowiño ía, jare ïru reta jeta katu ía, jare ïru reta jetaete ye ía.” Jukuärái Jesús jei chupe reta umbijaanga rewe.

<sup>9</sup>Jare jei wi chupe reta: “Ipotawe kía uipota uikuaa kawi wae, tuyapisaka kua chiñee re,” jei chupe reta.

### **Maera Jesús oporomboe umbijaanga rewe**

(Mateo 13.10-15; Lucas 8.9-10)

<sup>10</sup>Jayawe kaaru katu ma yawe, opaete seri yuraa ye reta. Jaeño jokua doce jemimboe reta jare amokue ïru wae reta upita Jesús ndiwe. Jayawe jae reta upirandu Jesús pe jokua umbijaanga rewe jei wae re.

<sup>11</sup>Jayawe Jesús jei chupe reta: “Tumpa imbaepuere mburuwicha wasu pewa umbipi ma uyekuaa kua iwi pe. Jare jokua re ko che amimbeu aï,” jei. “Tenonde yawe Tumpa uikuaaka’ä kía pe awe kua mbaembae rewa. Erëi añawe uñemee ma pewe pikuaa kawi waerä. Erëi ïru wae reta uipota’ä wirowia cheré. Jáeramo che amboe reta ambijaanga rewe uyeyapo waerä kërái Tumpa iñeeriru pe uyekuatía oï wae rupi. Echa’ä joko pe Tumpa jei kuärái:

<sup>12</sup>“Uechata tëi reta che mbaembae ayapo wae, erëi ndarau uikuaa kawi reta. Uyanduta tëi reta chiñee, erëi ndarau uikuaa reta. Jukuärái uyerowata’ä reta chekoti ambái waerä chuwi reta teko onoi chekoti wae.’ Jukuärái uyekuatía oï,” jei Jesús chupe reta.

### **Jesús umiesäka kuimbae umaeti wae rewa**

(Mateo 13.18-23; Lucas 8.11-15)

13 Jayawe Jesús jei wi chupe reta: “¿Pikuaa kawi’ä yerá jokua ambijaanga rewe jae pewe wae? Pikuaa kawi’ä yawe, ¿këraita ra jayawe pikuaa ïru mbaembae jaeta äi pewe ambijaanga rewe wae?” jei chupe reta.

14 “Jokua umaeti wae uyembijaanga oï kía Tumpa iñee umimbeu wae re.

15 Jare tape rai rupi temiti oa wae uyembijaanga oï amokue wae Tumpa iñee uyandu wae re. Kua nunga reta uyandu tēi Tumpa iñee. Erēi jupiwoiño ou Satanás jare opa umiakañika reta Tumpa iñee wi,” jei chupe reta.

16 “Jae nunga wi amokue temiti oa itapite rupi mbowiño iwī wireko wae re,” jei. “Kua uyembijaanga oï ïru wae reta Tumpa iñee uyandu wae re. Kua nunga reta jaeramo uyandu yawe, jupiwoiño uyapisaka jese uyerowia rewe,” jei.

17 “Erēi Tumpa iñee uyembijapo kawi’ä ipia pe ramo, imambae ikueri reta. Yembiawái ou chupe reta yawe, jare ïru wae reta uyapo ikawi mbae wae chupe reta yawe Tumpa iñee re wirowia jeko pewa, jayawe jupiwoiño opia reta Tumpa jape wi,” jei chupe reta.

18 “Jae nunga wi amokue temiti oa ñurätipite pe. Kua uyembijaanga oï ïru wae reta Tumpa iñee uyandu wae re,” jei.

19 “Kua nunga reta uyandu Tumpa iñee, erēi jae reta umbipi uyembipia’ä mbaembae iwī pewa reño. Jare uyembitawi reta, echa’ä uipota ikokatu reta ramo. Jare uipota reta wi onoi jeta mbaembae,” jei. “Jare opaete kua mbaembae umiakañika reta Tumpa iñee wi. Jáeramo ndarau uyekuaa jese reta Tumpa jeko ikawi wae,” jei chupe reta.

20 “Erēi amokue temiti oa iwīkawi pe. Jare kua jae nunga wi uyembijaanga oï ïru wae reta Tumpa iñee uyandu wae re,” jei. “Kua nunga reta wirowia kawi jese ipia rewe. Jare Tumpa iñee uyembijapo kawi oï ipia pe ramo, uyekuaa jese reta Tumpa jeko ikawi wae. Amokue reta re uyekuaa kawi Tumpa jeko ikawi wae. ïru wae reta re uyekuaa kawiete, jare ïru wae reta re uyekuaa kawiete ye,” jei. “Jukuärái ko ambijaanga rewe jae pewe wae,” jei Jesús jemimboe reta pe.

### **Jesús oporomoe wae tembipe pe uyekuaa wae rami oïta**

*(Lucas 8.16-18)*

21 Jare jei wi chupe reta umbijaanga rewe: “Mechero yaruike yawe o pe, ndaraúi ñañoño yapepo uyembowapo oï wae iwi pe ani wirapembi iwi pe. Ñañoño ko iwate mechero jenda pe,” jei chupe reta.

22 “Jare jukuärái rami wi ko che aporomoe wae ikota pemaerä. Jare yepe tēi añawe pikuaa kawi’ä pei jare jae ko mbae uñeñomi oï wae rami pewe, erēi taikue rupi jesäka kawita oï pewe kuri,” jei chupe reta.

23 “Ipotawe kía uipota uikuaa kawi wae, tuyapisaka kua chiñee re,” jei Jesús chupe reta.



<sup>24</sup>Jare jei wi chupe reta: “Pepia pe piyemingeta kawi kua chiñee re,” jei. “Jare jokua piyapo yawe, pikuaa kawita jare Tumpa uikuaaka kawieteta pewe jeta ñru mbaembae re.

<sup>25</sup>Echa’ä ime yawe kía uyapisaka kawi jare wirowia chiñee re wae, uñemiiruta chupe iyarakuaa,” jei. “Erëi ime yawe kía uipota’ä uyapisaka añetete re wae, jokua jae uikuaa tēi michi mii yepe chiñee wae, jokuawe uñepirota chuwi,” jei chupe reta.

### **Jesús umbijaanga temiti ukuakuaa wae re**

<sup>26</sup>Jare Jesús jei wi chupe reta: “Yandepuere yambijaanga kërái Tumpa imbaepuere mburuwicha wasu pewa jekuaeño ukuakuaa oo oï kuärái: Pëti kuimbae oo umaeti.

<sup>27</sup>Joko wi pïtu rupi kuimbae oke oï rambuewe, temiti jeñi jare ukuakuaa. Jare jukuärái uyapo wi ara rupi kuimbae uparawiki oï rambuewe. Erëi umaeti wae uikuaa’ä kërái ra ukuakuaa jokua temiti wae.

<sup>28</sup>Echa’ä temiti ukuakuaa yambori mbae rewe. Tenonde oë joki mii, jare joko wi uyekuaa oo itimaka, jare joko wi ipotï jare ía,” jei.

<sup>29</sup>“Jare yawiye ma yawe, iya uipoo. Echa’ä uwäe ma ara uipoo waerä,” jei chupe reta.

### **Jesús umbijaanga mostaza jäikue re**

*(Mateo 13.31-32; Lucas 13.18-19)*

<sup>30</sup>Jare Jesús jei wi chupe reta: “¿Kërái ra uyekuaa Tumpa imbaepuere mburuwicha wasu pewa? ¿Mbae ye re ra yambijaangata kërái ra jekuaeño ukuakuaa oo oï?” jei chupe reta.

<sup>31</sup>“Yandepuere yambijaanga pëti mostaza jäikue re. Jokua jäikue michi raïete ko opaete ñru temiti reta ñañoti wae wi.

<sup>32</sup>Erëi ñañoti ma yawe, jare ukuakuaa ma yawe, tuichaete uyeyapo opaete ñru temiti reta koo pewa wi. Jare jäka tuicha ukuakuaa wi. Jáeramo wira reta ipuere uyapo jaitirä jese warasïa pe,” jei Jesús chupe reta.

### **Maera Jesús oporomboe umbijaanga rewe**

*(Mateo 13.34)*

<sup>33</sup>Jeta kuärái Jesús oporomboe Tumpa ñnee re umbijaanga rewe kërái jae reta ipuere uikuaa wae rupi.

<sup>34</sup>Jei’ä mbae awe chupe reta umbijaanga mbae. Erëi jemimboe reta peño uikuaaka kawi mbae uipota jei wae jae retaño ñonoï rambuewe.

### **Jesús umimbita iwitu**

*(Mateo 8.23-27; Lucas 8.22-25)*

<sup>35</sup>Jokua ara warasi uike ma yawe, Jesús jei jemimboe reta pe: “Ya ipa wasu jowaicho koti,” jei chupe reta.

<sup>36</sup>Jayawe jae reta ueya uyembati wae reta, jare wiraa reta Jesús jokuwa chalana jae iko pipe wae pe. Jare iru wae reta yuraa wi ambie chalana reta pipe.

<sup>37</sup>Jayawe ndei ima mbowe ou iwitu täta, jare i opa uyembiaparoaroa jare uike chalana japipe, jare umbipi usakambu pota echa.

<sup>38</sup>Erëi Jesús yepe uñemiakandita ma chalana iyapi re jare oke oï. Jayawe jemimboe reta umbisareko Jesús jare jei reta chupe ukiye rewe: “¡Oporomboe wae! ¿Nemañota yerá opa ñamano waerä?” jei reta chupe.

<sup>39</sup>Jayawe Jesús upüa, jare jei iñeeäta rewe iwitu pe jare ipa wasu pe: “¡Epita! ¡Nekii!” jei. Jare iwitu jupiwai upita jare opaete kii ngatu.

<sup>40</sup>Jayawe Jesús upirandu jemimboe reta pe: “¿Maera pa pekiyete? ¿Ndeño pa perowia cheré?” jei chupe reta.

<sup>41</sup>Jare Jesús jemimboe reta ukiyete jare jei iyupe reta: “¿Mbae nunga kuimbae ra kua? I jare iwitu awe uyapo jae jei wae,” jei reta iyupe.

## Marcos 5

### Jesús omoë año reta kuimbae wi

(Mateo 8.28-34; Lucas 8.26-39)

<sup>1</sup>Jayawe Jesús jare jemimboe reta ndiwe yuraa uwäe ipa wasu jowaicho pe. Jokuwa ko jae Gadara pewa reta iwi.

<sup>2</sup>Jayawe Jesús uweyi chalana wi rupiwe, osi ou owäiti pëti kuimbae año uyembiiya jese wae.

<sup>3</sup>Jae yepe iko parawete patiu rupi. Jare ipuere’ä ma kiawe uñapiti, yepe tëi uñapiti reta cadena pe.

<sup>4</sup>Jeta wese ma jae reta uñapiti tëi ipo jare ipi rupi cadena pe. Erëi jae opa omondoo cadena reta. Jare kiawe ipuere’ä ma jese.

<sup>5</sup>Jekuaño pïtu rupi jare ara rupi iko patiu rupi jare iwitu wasu rai rupi. Jare jekuaño jäse jare uyembipere parawete ita pe.

<sup>6</sup>Jayawe kua kuimbae mbiri wi uecha Jesús. Jare osi ou owäiti jare uñeño itawa re jae jowai.

<sup>7-8</sup>Jayawe Jesús jei año pe: “Nde año, eë kua kuimbae wi,” jei chupe. Jayawe kuimbae jei Jesús pe iñeeäta rewe: “Jesús, Tumpa imbaepuere tuichaete wae Tai, ¿mbae pa ndeyu ndeka kua pe? Ere chewe Tumpa jowake awiye waerä ndiporaraka chewe,” jei chupe.

<sup>9</sup>Jayawe Jesús upirandu chupe: “¿Mbae pa nderee?” jei chupe. Jare año jei chupe: “Che cheree Jeta Wae. Echa’ä jeta wae ko ore,” jei chupe.

<sup>10</sup>Jare año reta jekuaño umiñera Jesús awiye waerä omoë reta mbiri jokuwa iwi wi.

<sup>11</sup>Joko wi ime koiño ñaipe re kuchi iyandarekoa reta umingarü ñonoï kuchi reta.

- <sup>12</sup>Jayawe añã reta jei Jesús pe ikuasi katu rewe: “Oremondo pea kuchi reta re. Emaeño oreré nduïke waerä jese reta,” jei reta chupe.
- <sup>13</sup>Jayawe Jesús umaeño jese reta. Jayawe añã reta opa oë kuimbae wi jare opa yuraa uïke kuchi reta re. Joko wi kuchi reta täta rupi opa osi uweyi yuraa iwia rupi uïke reta ipa wasu pe. Jare joko pe kuchi reta opa iputupa umano. Kuchi reta uyepapa mokui miri rupi.
- <sup>14</sup>Jayawe kuchi iyandarekoa reta opa osi yuraa umimbeu tēta wasu pewa reta pe jare jokoropi ñonoï wae reta pe kua uyeyapo wae rewa. Jayawe uyandu wae reta yuweru uecha waerä mbae ra ko uasa wae.
- <sup>15</sup>Jare yuweru uwäe reta yawe Jesús oï wae pe, uecha reta jokua kuimbae añã reta uyembiiyase jese wae uwapi oï, jare uyemonde ye ma oï, jare iyarakuaa ye ma oï. Jáeramo opa ukiye reta.
- <sup>16</sup>Jare jokua tenonde uecha wae reta umimbeu ïru wae reta pe kërái uyeyapo kuimbae añã uyembiiyase jese wae pe jare kuchi reta pe.
- <sup>17</sup>Jare kua uyandu reta yawe, umiñera reta Jesús oë ye oo waerä jae reta iïwi wi.
- <sup>18</sup>Jare Jesús uyupi ye chalana pe iko yawe, jokua kuimbae añã reta uyembiiyase jese wae umiñera oo waerä tēi Jesús ndiwe.
- <sup>19</sup>Erēi Jesús umaeño’ã jese jare jei chupe: “Ekua ye nerēta pe, jare embeu nerētara reta pe kërái mbae ikawi wae ndeYa uyapo ndewe wae rewa jare kërái ndeparareko wae rewa,” jei chupe.
- <sup>20</sup>Jayawe kuimbae oo joko wiño umbipi umimbeu iwi Decápolis jee wae rupi mbae ikawi wae Jesús uyapo chupe wae rewa. Jare opaete uyandu wae reta ipiakañi jese reta.

### **Jesús umbijekowe ye pēti kuñatái**

*(Mateo 9.18-26; Lucas 8.40-56)*

- <sup>21</sup>Jayawe Jesús jemimboe reta ndiwe yuraa ye uwäe reta ipa wasu jowaicho koti chalana pipe. Jare jeta wae reta yuweru ipa wasu jembei rupi Jesús oï wae pe.
- <sup>22</sup>Jare ou wi pēti kuimbae Jairo jee wae. Jae ko pēti tupao itenondewa. Jare jae uecha yawe Jesús, uñeño ipitía re iwi re jae jowai.
- <sup>23</sup>Jare ikuasi katu rewe jei Jesús pe: “Cherayi mii umanota ma oï orewi,” jei chupe. “Ya mii iñoño ndepo jese ukuera waerä, awiye waerä umano orewi,” jei chupe.
- <sup>24</sup>Jayawe Jesús oo woi jae ndiwe. Jare jeta yuraa reta wi Jesús jupie, jare oyopi ye reta uwata kawï waerä.
- <sup>25</sup>Jare jae reta ipite pe oo wi pēti kuña doce año ma imbaerasi iko tuwi wasu pe wae.

<sup>26</sup>Kua kuña tuicha rupi uiporara jeta upurupiano wae reta uipiano tēi rewe, jare opaete ma ikorepoti umee tēi iyuwi chupe reta. Erēi jeseuwe ukuera'ä. Jeieteño imbaerasi parawete.

<sup>27-28</sup>Jayawe jokua kuña uyandu ikawi wae Jesús rewa. Jare jei iyupe: “Jemimonde mii yepe añatai yawe, akuerata ko,” jei. Jayawe ou Jesús jaikue koti wi jeta wae reta ipite rupi, jare uñatai Jesús jemimonde.

<sup>29</sup>¡Jare jupiwoiño juwi wasu upita chuwi, jare uyandu jete ukuera ma imbaerasi wi!

<sup>30</sup>Erēi Jesús uikuaa woi jae imbaepuere pe uminguera ma ko kía. Jáeramo uyemboi jare uyerowa umae. Jare upirandu: “¿Kía pa cheremimonde uñatai?” jei.

<sup>31</sup>Jayawe jemimboe reta jei chupe: “Ndecha ko kua jeta wae reta ndeopi ye ñonoï. ¿Maera pa ndepirandu kía ra nderemimonde uñatai?” jei reta chupe.

<sup>32</sup>Erēi Jesús jekuaeño umae iyipi rupi uecha waerä kía ra uñatai jemimonde wae.

<sup>33</sup>Jare kuña uikuaa ma mbae uyeyapo chupe wae. Jáeramo ou Jesús koti, jare uipiu rewe uñeñoño iwi re jae jowai. Jare uyembeu chupe jae ko jemimonde uñatai wae. Jae parawete uriri iko ukiye ramo.

<sup>34</sup>Jayawe Jesús jei chupe: “Cherayi, ndekuera ma ko cheré nderowia ramo. Ekuia ndepiakatu rewe. Ndekuera ma ko nembraerasi wi,” jei chupe.

<sup>35</sup>Jare Jesús uyemingeta iko rambuewe, yuweru uwäe amokue kuimbae reta Jairo jēta wi ou wae. Jare jei reta Jairo pe: “Nderayi mii umano ma. Awiye ma embiawái oporomboe wae,” jei reta chupe.

<sup>36</sup>Erēi Jesús kua uyandu yawe, jei Jairo pe: “Awiye ndepiatiti. Erowiaño cheré,” jei chupe.

<sup>37</sup>Jare Jesús umaeño'ä iru reta re yuraa waerä jae ndiwe Jairo jēta pe – jaeño Pedro, jare Jacobo, jare Jacobo tiwi Juan.

<sup>38</sup>Jayawe yuraa uwäe reta Jairo jēta pe. Jare Jesús uecha jeta wae reta mbiatiti wasu pe ñonoï jare jāse uyao ñonoï reta.

<sup>39</sup>Jayawe Jesús uike o pe jare jei chupe reta: “¿Maera pa mbiatiti wasu pe peï jare piyao peï? Kua kuñatái umano'ä oï. Okeño ko oï,” jei chupe reta.

<sup>40</sup>Erēi jae reta kua ñee uyandu yawe, oyoyai reta Jesús. Jayawe Jesús jei chupe reta oë waerä oka pe. Jare joko wi uruike wiraa kuñatái joo pe kuñatái tu jare ichi, jare jokua mbapi jemimboe jae ndiwe yuraa wae reta.

<sup>41</sup>Jayawe Jesús uipisi kuñatái ipo pe jare jei chupe: “Talita kumi,” jei. (Kua ñee uipota jei jae reta ñee pe, “Kuñatái, che tae ndewe, epüa.”)

<sup>42</sup>¡Jayawe jupiwoiño kuñatái upüa jare umbipi uwata! Kua kuñatái doce año ma onoi. Jayawe Jesús ndiwe ñonoï wae reta ipiakañiete.

<sup>43</sup>Erëi Jesús jei chupe reta awiye waerä umimbeu reta kía pe awe. Jare joko wi jei tu jare ichi pe umingaru reta waerä kuñatái.

## Marcos 6

### Jesús jétáíwa reta wirowia'ä jese

(Mateo 13.53-58)

<sup>1</sup>Jayawe joko wi Jesús oo jétara reta koti, tēta wasu Nazaret jee wae pe. Jare jemimboe reta wi yuraa jae ndiwe.

<sup>2</sup>Jare mbutuu ara pe Jesús umbipi oporomboe tupao pe. Jare jeta uyapisaka jese wae reta ipiakañi jare jei reta iyupe: “¿Kiape ra kua kuimbae uyemboe kua mbaembae reta re? ¿Mbae nunga arakuaa ra uñemee chupe? Mase kērái jae mbaembae uyapo kiawe ipuere'ä uyapo wae. ¿Kērái ra jokua?” jei reta.

<sup>3</sup>“¿Jae'ä yerá kua kuimbae carpintero jare María imembirae? ¿Jae'ä yerá Jacobo, José, Judas, jare Simón tikei? Jare jindi reta wi yureko yandepite rupi. Kua pochi ñaneiru tēi ko,” jei reta. Jáeramo jae reta uyembiarasi jare wiriro reta Jesús.

<sup>4</sup>Jayawe Jesús jei chupe reta: “Pēti kuimbae Tumpa iñee umimbeu wae ikotia oí yawe, jeta wae reta umae kawí jese jare uyapisaka reta jese,” jei. “Erëi jēta pe oí yawe jétáíwa reta jare jétara reta ipite pe, uyapisaka'ä reta jese,” jei chupe reta.

<sup>5</sup>Jayawe wirowia'ä reta Jesús re jeko pewa, Jesús ipuere'ä uyapo joko pe jeta mbaembae Tumpa imbaepuere pe. Jaeño oñono ipo imbaerasi wae reta re mbowiño uminguera waerä.

<sup>6</sup>Jare Jesús ipiakañi jae reta wirowia'ä jese ramo. Jayawe oē ye oo joko wi oporomboe waerä iru tēta wasu rai reta rupi.

### Jesús omondo jokua doce jemimboe reta

(Mateo 10.1,9-14; Lucas 9.1-6)

<sup>7</sup>Pēti ara Jesús umbatika jokua doce jemimboe tenondewaete reta, jare omondo mokui mokui rupi oporomboe waerä. Jare umee chupe reta mbaepuere omoē waerä añá uyembiiya jese wae reta wi.

<sup>8</sup>Jare ndei yuraa reta mbowe, Jesús jei chupe reta: “Peo yawe, awiye peraa mbae awe. Awiye peraa peurupuku, perembiurä, jare korepoti. Jaeño peraa pepopoka,

<sup>9</sup>pepipasa, jare peremimonde pemonde pei wae,” jei chupe reta.

<sup>10</sup>Jare jei wi chupe reta: “Peo ma pewäe yawe pēti tēta wasu pe, jare ime yawe kía uparea pewe pepita waerä jēta pe, pepita joko peño jokua tēta wasu wi peo ye rewa,” jei.

<sup>11</sup>“Erëi ime yawe pēti tēta wasu uipota'ä pepita waerä joko pe jare uipota'ä uyapisaka peré wae, jayawe peasa joko wi,” jei. “Jare peē jokua tēta wasu wi yawe, pemitimo pepipasa iwikuí usururu waerä chuwi. Jukuärái pikuaakata chupe reta jae reta etei ko teko onoi Tumpa uiporaraka chupe reta waerä,” jei. “Che tae pewe añetete wae, jokua ara iwi pewa reta uyemboi yawe Tumpa jowai Tumpa jei waerä

jae reta jeko rewa, jokua tēta wasu pewa reta uiporarata tātaete ye jokua tēta wasu Sodoma jare Gomorra pewa reta wi.” Jukuārái jei Jesús jemimboe reta pe.

<sup>12</sup>Jayawe joko wi Jesús jemimboe reta yuraa. Jare kerupi yuraa wae rupi umimbeu chupe reta ueya waerä ipiayemingeta jupi mbae wae jare wirowia reta waerä Tumpa jei wae re.

<sup>13</sup>Jare jae reta omoë jeta añä uyembiiya jese wae reta wi. Jare jeta imbaerasi wae reta re uipichi aceite pipe uminguera reta waerä.

### **Juan upurumbisakambu wae imano rewa**

*(Mateo 14.1-12; Lucas 9.7-9)*

<sup>14</sup>Jayawe mburuwicha wasu Herodes pe jeräkua Jesús rewa, echa’ä opaete wae reta uyemingeta yureko jesewa. Amokue wae jei tēi: “Jae ko aipo Juan upurumbisakambuse wae aramoi ikowe ye ma ou umanokue wae reta ipite wi. Jáeramo ko uyapo oï kua mbaembae kiawe ipuere’ä uyapo wae,” jei reta tēi.

<sup>15</sup>Jare ñru wae reta jei tēi: “Jae ko Elías.” Jare ñru wae reta jei tēi: “Jae ko pēti Tumpa ñnee umimbeu wae, arakae wae rami,” jei reta.

<sup>16</sup>Erēi Herodes kua uyandu yawe, jei: “Jae ko Juan ayayuasiaka kispuku pe wae. Ikowe ye ma aipo umanokue wae reta ipite wi,” jei.

<sup>17-19</sup>Echa’ä Herodes etei ko uyukaka Juan. Kua uyeyapo kuārái: Tenonde yawe Herodes umenda tiwi Felipe jembireko Herodías jee wae ndiwe. Jare Juan umbieta Herodes pe jare jei chupe: “Kua nemenda nderiwi jembireko ndiwe wae, ikawi’ä etei ko Tumpa jowai,” jei chupe. Jáeramo Herodías pochi Juan pe. Jayawe Herodes uipisika Juan, uñapitika, jare oñonoka peresoriru pe umbiyerowia waerä jembireko Herodías. Jare Herodías uipota tēi uyukaka, erēi ipuere’ä.

<sup>20</sup>Echa’ä Herodes uikuaa Juan jae ko kuimbae jupi wae jare Tumpa pe uyeyokui wae. Jáeramo uipiü chuwi, jare umaño’ä kía re awe uyapo waerä chupe mbae ikawi mbae wae. Jare yepe tēi Herodes tuicha uyembipia’ä Juan jei chupe wae re, jeseuwe jekuaño uipota uyapisaka jese.

<sup>21</sup>Erēi pēti ara jēwa Herodías pe uyapo waerä mbae ikawi mbae wae Juan pe. Echa’ä jokua ara uwäe iko Herodes iara. Jáeramo uparea ñru mburuwicha reta pe, jare sindaro juwicha reta pe, jare ikokatu wae Galilea pewa reta pe ukaru reta waerä jae ndiwe.

<sup>22</sup>Jayawe Herodías imembi kuña uike upirae chupe reta. Jare Herodes jare opaete jae ndiwe ukaru ñonoï wae reta uyerowia uma jese. Jáeramo Herodes jei kuñatái pe: “Eka chewe ipotawe mbae ndipota wae, jare che ameta ndewe,” jei chupe.

<sup>23</sup>Jare jei chupe ñru wae reta jowake: “Che tae ndewe Tumpa jowake, ameta ndewe ipotawe mbae ndeka chewe wae. Iwi anoi mbaepuere jese wae yepe ameta ndewe mbite rupi ndipota yawe,” jei chupe.

- <sup>24</sup>Jayawe kuñatái oë oo upirandu ichi pe: “¿Mbae pa aekata chupe?” jei. Jare Herodías jei imembi kuña pe: “Eka chupe Juan upurumbisakambu wae iñäka,” jei chupe.
- <sup>25</sup>Jayawe imambaeño kuñatái uike yewi mburuwicha wasu oï wae pe jare jei chupe: “Emee chewe añawe woi Juan upurumbisakambu wae iñäka pëti karúa pe,” jei chupe.
- <sup>26</sup>Jayawe mburuwicha wasu tuicha rupi ipiatiti tëi. Erëi Tumpa jowake jei chupe ramo, jare ñru wae reta uyandu ramo, uipota’ä orowa jei chupe wae.
- <sup>27</sup>Jáeramo jupiwoiño omondo pëti sindaro peresoriru pe Juan iñäkakue ueru waerä.
- <sup>28</sup>Jayawe oo sindaro peresoriru pe jare uyayuasía Juan kisépuku pe. Joko wi ueru iñäkakue pëti karúa pe jare umee kuñatái pe. Jare kuñatái wíraa umee yuapí ye ichi pe.
- <sup>29</sup>Jayawe Juan jemimboe reta kua uikuaa yawe, yuweru jare wíraa Juan jetekue oñono reta pëti teöwerenda pe. Jukuärái Herodes uyukaka Juan upurumbisakambu wae.

### **Jesús umingaru jeta wae reta Tumpa imbaepuere rupi**

*(Mateo 14.13-21; Lucas 9.10-17; Juan 6.5-13)*

- <sup>30</sup>Jayawe jokua kuimbae reta Jesús omondo wae uñatima ye oporomboe reta wae wi Jesús oï wae pe. Jare umbeu reta chupe opaete jae reta uyapo wae re jare oporomboe reta wae re.
- <sup>31</sup>Jayawe Jesús jei chupe reta: “Pe retañó peyu ya kii ngatu wae pe peputuu waerä michi pewa.” Jukuärái jei chupe reta, echa’ä jeta wae reta jekuaekuae yuweru yureko opou waerä jae reta ipi. Jare umaeño’äwe ukaru kawi reta waerä Jesús jare jemimboe reta.
- <sup>32</sup>Jayawe jae retañó chalana pe yuraa kii ngatu wae pe.
- <sup>33</sup>Erëi jeta wae reta uecha yuraa ñonoï jare uikuaa woi reta kía ko jae wae. Jayawe jae reta yuraa iwí rupi etei tëta wasu raí reta wi kía pe Jesús oo oï wae pe. Jare yuraa uwäe reta ndei Jesús oo uwäe mbowe, jare uäro reta joko pe.
- <sup>34</sup>Jayawe Jesús oo uwäe yawe joko pe, uecha jeta wae reta ime ma yepe joko pe ñonoï. Jare tuicha rupi uiparareko umae jese reta, echa’ä jae reta owecha mbaeti iyandarekoa onoi wae reta rami ko. Jáeramo Jesús umbipi omboe reta jeta mbaembae re.
- <sup>35</sup>Jayawe kaaruete ma oo yawe, Jesús jemimboe reta yuweru jei chupe: “Mbaeti tëta kua rupi jare kaaru ma oï,” jei reta.
- <sup>36</sup>“Emondo kua reta tëta wasu raí reta kotí jare kía pe ime tëta wae rupi owa reta waerä jemiurä. Echa’ä mbaeti mbae jou reta waerä kua pe,” jei reta.

<sup>37</sup>Jayawe Jesús jei chupe reta: “Pe reta etei ko pemeeta chupe mbae jou reta waerä,” jei chupe reta. Erëi Jesús jemimboe reta jei chupe: “¿Ndowa chupe reta mbiyape yawe, jepita orewe mokui chiëto ara mbarawiki pewa! ¿Ndipota pa nduyapo waerä jukuärái?” jei reta.

<sup>38</sup>Jayawe Jesús upirandu chupe reta: “¿Mbowi pa mbiyape ime penoi? Peka yaecha,” jei chupe reta. Jayawe jae reta umbipi ueka, jare uikuaa ma yawe, jei reta Jesús pe: “Ime nonoi pandepo mbiyape jare mokui pira chariki mii,” jei reta.

<sup>39</sup>Jayawe Jesús jei jemimboe reta pe: “Tuyembati tuwapi tee tee opaete wae reta kapiichape re,” jei.

<sup>40</sup>Jayawe uwapi reta cien rupi jare cincuenta rupi.

<sup>41</sup>Jayawe Jesús uipisi jokua pandepo mbiyape jare mokui pira. Jare umae ara koti jare umee yasurupái Tumpa pe jese. Joko wi upisäa mbiyape, jare umee jemimboe reta pe jae reta umee yuapi ye waerä opaete wae pe. Jae nunga wi Jesús uipisi jokua mokui pira, jare umee jemimboe reta pe. Jare jemimboe reta opa umeemee yuapi ye opaete wae pe.

<sup>42</sup>Jayawe opaete wae reta ukaru ipunga rewa.

<sup>43</sup>Joko wi Jesús jemimboe reta umbati jokua jembirekue doce kanasta rupi.

<sup>44</sup>Opaete ukaru wae reta kuimbae retaño uyepapa pandepo miri rupi.

### **Jesús uwata i iáramo rupi**

*(Mateo 14.22-27; Juan 6.15-21)*

<sup>45</sup>Jayawe jawoi pewaño Jesús jei jemimboe reta pe uyupi waerä chalana pe jare yuraa waerä tenonde ipa wasu jowaicho koti tëta wasu Betsaida jee wae pe. Jare jae upitaño joko pe omondo ye waerä uyembati wae reta.

<sup>46</sup>Jare opa ma omondo reta ye yawe, Jesús uyupi pëti iwitu re oo uyerure waerä Tumpa pe.

<sup>47</sup>Jare pïtu ma yawe, jemimboe reta yuraa yureko chalana pe ipa wasu mbite rupi, erëi Jesús upita jaeño pe etei jokua iwitu re.

<sup>48</sup>Jare jae uecha jemimboe reta täta uparawiki uruwata waerä chalana. Echa’ä täta iwitu ou ikoti. Jare köeta ma yawe, Jesús uwata oo ikoti reta i iáramo rupi jare uasata tëi chuwi reta.

<sup>49-50</sup>Jare jemimboe reta uecha yawe, jäse reta. Echa’ä ukiye reta. Jae reta wirowia tëi uecha ñonoï kía umanokue wae iä. Erëi jupiwoiño Jesús omondo chupe reta iñee: “Piyembipiakatu. Awiye pekiye. Che ko,” jei chupe reta.

<sup>51</sup>Jayawe ou uyupi chalana pe, jare jupiwoiño iwitu upita. Jare jemimboe reta ipiakañiete upita.



<sup>52</sup>Echa'ä yepe tēi jae reta uecha Jesús umbijeta mbiyape jare pira umingaru waerä jeta wae reta, erēi jeseuwe ndeiño uikuaa kawi reta Jesús imbaepuere rewa. Echa'ä uipota'ä umaño iyé reta wírowia waerä Jesús re.

### **Jesús uminguera Genesaret pewa imbaerasi wae reta**

*(Mateo 14.34-36)*

<sup>53</sup>Jayawe yuraa uwäe reta ipa wasu jowaicho pe iwí Genesaret jee wae pe.

<sup>54</sup>Jare uweyi reta yawe chalana wi ipa wasu jembei pe, jupiwoiño joko pewa reta uikuaa Jesús ko.

<sup>55</sup>Jayawe jawoi pewaño yuraa ueru waerä imbaerasi wae reta jupa rewe kerupi rupi jeräkua chupe reta Jesús uasata iko wae rupi.

<sup>56</sup>Jayawe Jesús oo tēta wasu reta rupi, jare tēta wasu rai reta rupi, jare tēta rai ikatu rupiwa reta rupi. Jare kerupi rupi uasa wae rupi, joko pewa reta ueru oñono imbaerasi wae reta tape jembei rupi. Jare umiñera reta Jesús umaño waerä imbaerasi wae reta re uñatai waerä Jesús jemimonde jembei mii yepe. Jare opaete uñatai Jesús jemimonde wae, opa ukuera reta Jesús imbaepuere pe.

## **Marcos 7**

### **Yandapo ikia Tumpa koti wae yandepia wi ko oë**

*(Mateo 15.1-20)*

<sup>1</sup>Amokue kuimbae Moisés uikuatía wae re oporomboe wae reta jare fariseo reta yuweru Jerusalén wi Jesús oí wae pe.

<sup>2</sup>Jare uecha reta amokue Jesús jemimboe reta ukaru ñonoí uyepoe mbae rewe. Jáeramo iñera jese reta.

<sup>3</sup>Echa'ä fariseo reta, jare opaete ñru judíoreta wi, uyepoeñoi reta ndei ukaru reta mbowe yureko waerä tamikue reta jeko rupi.

<sup>4</sup>Jare jukuärái wi yuweru reta ye yawe mercado wi, imeta ko uyepoe reta ndei ukaru reta mbowe. Jare jei reta wi oyoe reta waerä copa reta, jare yapopo reta, jare mbaembae jiru jiero pewa reta. Opañe kërái rái rupi uyapo reta yureko waerä tamikue reta jeko rupi.

<sup>5</sup>Jayawe fariseo reta jare Moisés uikuatía wae re oporomboe wae reta upirandu Jesús pe: “¿Maera pa nderemimboe reta uyapo'ä yanderamikue reta jeko rupi? Echa'ä ukaru reta uyepoe mbae rewe,” jei reta Jesús pe.

<sup>6</sup>Jayawe Jesús jei chupe reta: “Pe reta añetete wae nunga piyeyokui Tumpa pe. Isaías uikuatía arakaete peré wae jupi ko. Echa'ä jei kuärái: ‘Kua reta iyuru wiño ko uipiu chewi,’ jei Tumpa. ‘Erēi ipia pe uipiu'ä etei chewi reta.

<sup>7</sup>Umbutuicharaangaiño reta cheree. Oporomboe reta kuimbae jei wae rupiño.’ Jukuärái Isaías uikuatía Tumpa jei peré wae,” jei Jesús chupe reta.

- <sup>8</sup>“Pe reta piyapo’ä Tumpa jei wae rupi, erëi pipisi kawi yanderamikue reta jeko,” jei.
- <sup>9</sup>Jare jei wi chupe reta: “Tumpa jei wae peya ma ko piko waerä pereko rupii.
- <sup>10</sup>Pe reta pikuaa kawi tēi ko Moisés arakaete jei kuärái: ‘Pipiü peru jare pesi wi,’ jei. Jare jei wi kuärái: ‘Kía jei ikawi mbae wae tu jare ichi koti wae, tuyuka reta.’ Jukuärái Tumpa jei Moisés pe uikuatía waerä.
- <sup>11</sup>Erëi pe reta peporomboe tēi kía ipuere jei tu jare ichi ikuasi wae pe: ‘Che ime anoi tēi korepoti, erëi chepuereta’ä pombori pipe, echa’ä añono tee ma amee waerä Tumpa pe.’
- <sup>12</sup>Jare kía jukuärái jei wae, pe reta pere joko wiwe ipuereta’ä ma ombori tu jare ichi joku korepoti pipe. Jáeramo peporomboe wae rupi uipiü’ä reta tu jare ichi wi.
- <sup>13</sup>Jukuärái pe reta peya ma ko Tumpa jei wae piko waerä pereko rupii. Jare jeta ma kua nunga mbaembae pe reta piyapo,” jei Jesús chupe reta.
- <sup>14</sup>Jayawe Jesús ueni opaete joko pe ñonoï wae reta jare jei chupe reta: “Opaete pe reta, piyapisaka kua re pikuaa kawi waerä,” jei.
- <sup>15</sup>“Ipotawe mbae kía jou wae ndarau uyapo ikia Tumpa koti. Erëi ikawi mbae wae uyapo wae jare jei wae, joku ko uyapo ikia Tumpa koti,” jei.
- <sup>16</sup>“Ipotawe kía uipota uikuaa kawi wae, tuyapisaka kua chiñee re,” jei chupe reta.
- <sup>17</sup>Joko wi Jesús ueya uyembati wae reta jare uike pēti tēta pe. Jare joko pe oï rambuwe, jemimboe reta upirandu chupe mbae ra uipota jei joku jae oporomboe umbijaanga rewe wae.
- <sup>18</sup>Jayawe Jesús jei chupe reta: “¿Pe retawe yerá pikuaa kawi’ä joku rewa?” jei. “¿Pikuaa’ä yerá ipotawe mbae peu wae ndarau peapo ikia Tumpa koti?”
- <sup>19</sup>Echa’ä oo’ä pepia pe ramo. Oo perie peño jare pemombo,” jei chupe reta. (Kua Jesús jei wae rupi uikuaaka iko Tumpa ndarau yanembijeko ipotawe mbae yau wae re.)
- <sup>20</sup>Jare Jesús jei wi: “Erëi mbae ikawi mbae wae piyapo wae jare pere wae, joku oë pepia wi. Jare joku ko peapo ikia Tumpa koti.
- <sup>21</sup>Echa’ä pepia wi ko oë opa mbae ikawi mbae wae, echa’ä pepia pe piyemingeta mbaembae kachi wae re jare joko wi piyapo awasa, pembikere, pepuruyuka,
- <sup>22</sup>pemonda, pipota iru wae reta imbaembae, piyapo mbae kachi wae, pepurumbitawi, piñemiro perapicha pe, ikawi mbae wae pere perapicha koti, piyembikate, jare piyeyapo pearakuaa mbae echa rami,” jei.
- <sup>23</sup>“Opaete kua ikawi mbae wae oë pepia wi. Jare joku ko peapo ikia Tumpa koti.” Jukuärái Jesús jei jemimboe reta pe.

### **Pēti kuña iwi Sirofenicia pewa wirowia Jesús re**

(Mateo 15.21-28)

**24**Jayawe Jesús jare jemimboe reta ndiwe yuraa reta joko wi tēta wasu reta Tiro jare Sidón jee wae iyipi rupi. Jare joko pe upita reta pēti tēta pe. Jare Jesús uipota'ā tēi kiawe uikuaa waerā jae jokoropi oī wae. Erēitu jeseuwe uikuaañoi joko pewa reta.

**25-26**Jare jokua iwi pe ime iko pēti kuña iwi Sirofenicia pewa griego ñee pe uyemingeta wae. Jae ko judía mbae wae. Jare jae imembi kuña rai re uyembiiya aña. Jayawe kuña uikuaa yawe Jesús joko pe oī wae, jawoi pewa mii ou uñeñono iwi re Jesús jowai uipiu rewe. Jare uyerure pii chupe omoë waerā aña imembi kuña rai wi.

**27**Jayawe Jesús jei chupe: “Emaeño tambori cherētáywa judío reta rani,” jei. Jare jei wi chupe umbijaanga rewe: “Echa'ā jupi'ā ko ñapīro waerā tembiu sambiai reta wi ñamee waerā yimba rai reta pe,” jei chupe.

**28**Erēi kuña jei Jesús pe: “Jukuārái tēi, cheYa,” jei. “Erēitu yimba rai retawe jou tembiu sambiai reta umbusururu mesa íwi pe wae,” jei chupe.

**29**Jayawe Jesús jei chupe: “Kua ndere wae jeko pewa che aikuaa nderowia ko cheré. Jáeramo amoë ma aña nemembi kuña rai wi. Ndepuere ndeo ye nerēta pe,” jei chupe.

**30**Jayawe kuña oo ye. Jare uwäe jēta pe yawe, uecha imembi kuña rai uputuu oī jupa pe. Aña oë ma chuwi. Jukuārái Jesús uminguera jokua kuña imembi kuña rai.

### **Jesús uminguera pēti kuimbae iyapisa mbae jare ñee mbae wae**

**31**Jayawe Jesús oë oo tēta wasu Tiro iyipi rupiwa wi, jare uasa oo tēta wasu reta Sidón jare Decápolis rupi. Jare joko wi oo uwäe yewi ipa wasu Galilea pe.

**32**Jare joko pe oī rambuewe, amokue wae reta ueru chupe pēti kuimbae iyapisa mbae jare ñee mbae wae. Jare uyerure reta Jesús pe oñono waerā ipo jese uminguera waerā.

**33**Jayawe Jesús onoe wiraa kuimbae iru wae reta ipite wi, jare oñono ipoäka reta kuimbae iyapisa pe oyowai rewe. Joko wi undiwi, jare uyawiki kuimbae ikü chuwi.

**34**Jayawe umae ara koti, jare iañeki, jare jei: “¡Efata!” jei. (Kua ñee uipota jei ñee pe, “¡Tuyepea!”)

**35**¡Jare jupiwoiño kuimbae iyapisa uyepea jare uyandu kawi ma! ¡Jare ikü omi kawi jare uyemingeta kawi ma!

**36-37**Jayawe uecha wae reta tuicha rupi ipiakañi jokua kuimbae ukuera wae re. Erēi Jesús jei tēi chupe reta awiye waerā imiäri reta kía pe awe uecha reta wae re. Erēi yepe tēi opa wese jei ye ye chupe reta, erēitu jeseuwe jae reta imiäriñoi. Jei reta: “Opaete mbaembae Jesús uyapo wae ikawiete ko. Iyapisa mbae wae reta jare ipuere mbae uyemingeta wae retawe jae uminguera,” jei reta.

## **Marcos 8**

### **Jesús umingaru irundi miri wae reta Tumpa imbaepuere rupi**

(Mateo 15.32-39)

<sup>1</sup>Jokua ara rupi jeta wae reta yuweru uyembati ye Jesús oï wae pe. Jare mbaeti ma mbae awe wireko jou reta waerä. Jayawe Jesús ueni jemimboe reta ikoti jare jei chupe reta:<sup>2</sup>“Aiparareko anoi kua yuweru wae reta. Echa’ä mbapi ara rupi ma ñonoï reta che ndiwe, jare mbaeti ma mbae onoi reta jou waerä,” jei.

<sup>3</sup>“Amondo reta ye yawe jëta koti iyembai rewe, jesawirita ko reta tape rupi. Echa’ä amokue yuweru mbiri wi,” jei chupe reta.

<sup>4</sup>Jayawe Jesús jemimboe reta jei chupe: “¿Kiawe pa yandepuere ñawäe chupe mbae kua reta jou waerä? Echa’ä mbaeti kiawe iko kua rupi,” jei reta.

<sup>5</sup>Jayawe Jesús upirandu chupe reta: “¿Mbowi pa mbiyape ime penoi?” jei. Jare jae reta jei chupe: “Jaeño ime nonoi chiu mbiyape,” jei reta.

<sup>6</sup>Jayawe Jesús jei joko pe ñonoï wae reta pe uwapi waerä. Joko wi uipisi jokua chiu mbiyape jare umee yasurupái Tumpa pe jese. Jare upisäa umee jemimboe reta pe, jemimboe reta umee yuapi ye waerä opaete uwapi ñonoï wae reta pe.

<sup>7</sup>Jae nunga wi ime wireko reta mbowi pira chariki michi wae reta. Jokua re wi Jesús umee yasurupái Tumpa pe. Jare jei jemimboe reta pe umee waerä uwapi ñonoï wae reta pe.

<sup>8</sup>Jayawe opaetei ukaru reta jare ipunga upita reta. Jayawe Jesús jemimboe reta umbati jembirekue chiu canasta tuicha wae reta.

<sup>9</sup>Jukuärái Jesús umbijeta mbiyape jare pira umingaru waerä irundi miri rupi. Jayawe Jesús omondo ye reta jëta jëta rupi.

<sup>10</sup>Jare omondo reta ma yawe, jae jare jemimboe reta ndiwe uyupi chalana pe, jare yuraa reta iwi Dalmanuta jee wae pe.

### **Fariseo reta uipota tõi omboporowa Jesús imbaepuere**

(Mateo 16.1-4; Lucas 11.29)

<sup>11</sup>Jayawe yuweru amokue fariseo reta Jesús oï wae pe, jare umbipi uyeaka reta jae ndiwe. Jae reta jei chupe: “Añetete Tumpa nembou yawe, jayawe yaecha iyapo orewe mbae tuicha wae Tumpa imbaepuere pe,” jei reta.

<sup>12</sup>Jayawe Jesús iañeki jare jei chupe reta: “¿Maera ra pe reta pipota che ayapo waerä mbae tuicha wae jukuärái aechaka waerä pewe Tumpa ko chembou wae?” jei. “Che tae pewe añetete wae, ndarau etei ayapo pewe kua peka peï chewe wae,” jei chupe reta.

### **Jesús jei jemimboe reta pe uyandareko kawi waerä iyé fariseo reta wi**

(Mateo 16.5-12)

<sup>13</sup>Jayawe Jesús ueya fariseo reta, jare uyupi ye chalana pe jemimboe reta ndiwe. Jare umbipi yuraa ye reta ipa wasu jowaicho koti.

<sup>14</sup>Jare Jesús jemimboe reta aramoño imandúa ueru'ä yepe reta mbiyape wae. Jaeño wireko reta pëti mbiyapeño chalana pe.<sup>15</sup>Jayawe Jesús jei chupe reta umbijaanga rewe: “Piyandareko kawi piyé kuri fariseo reta jare Herodes ilevadura wi,” jei chupe reta.

<sup>16</sup>Jayawe jemimboe reta jei tēi iyupe: “Kua jei yandewe yaru'ä mbiyape ramo,” jei reta.

<sup>17</sup>Jayawe Jesús uikuaa woi chuwi reta jae reta uyemingeta yureko wae re, jare jei chupe reta: “¿Maera mbate pa piyemingeta mbiyape peru mbae wae re? ¿Ndeño pa pikuaa kawi? Che ayemingeta'ä äi mbiyape yau wae re. ¿Täta yerá pepia?” jei chupe reta.

<sup>18</sup>“Yepe tēi ime penoi peresa jare peapisa, erēi jese we pikuaa kawi'ä chwaa pecha jare piyandu wae re. ¿Pemandua'ä yerá kuee yawe ayapo wae re?” jei.

<sup>19</sup>“Apisäa pandepo mbiyape jare amingaru pandepo miri wae reta. Jare jembirekue pembati yawe, ¿mbowi kanasta pa pemitinee?” jei chupe reta. “Numitinee doce,” jei reta.

<sup>20</sup>Jare Jesús jei wi chupe reta: “Jae nunga wi apisäa chiu mbiyape amingaru waerä irundi miri wae reta. Jare jembirekue pembati yawe, ¿mbowi canasta tuicha wae pa pemitinee ye?” jei chupe reta. “Numitinee chiu,” jei reta.

<sup>21</sup>Jayawe Jesús jei chupe reta: “¿Ndeño pa pikuaa kawi jokua jae ambijaanga rewe wae?” jei chupe reta.

### **Jesús uminguera pëti kuimbae jesa mbae wae**

<sup>22</sup>Jayawe Jesús jare jemimboe reta yuraa uwäe tēta wasu Betsaida pe. Jare joko pe amokue wae ueru Jesús pe pëti kuimbae jesa mbae wae. Jare jae reta uyerure Jesús pe oñono waerä ipo jese uminguera waerä.

<sup>23</sup>Jayawe Jesús uipoko onoe wíraa kuimbae jesa mbae wae tēta wasu wi ikatu pe. Jayawe undiwi kuimbae jesa re jare oñono ipo jese. Joko wi jei chupe: “¿Ndecha pa mbae?” jei chupe.

<sup>24</sup>Jayawe kuimbae umae jare jei Jesús pe: “Aecha kuimbae reta uwata ñonoï iwíra reta echa chewe,” jei chupe.

<sup>25</sup>Jayawe Jesús oñono ye ipo jesa re. Jayawe kuimbae täta umae, jare jayawe ramo uecha kawi opaete mbaembae, echa'ä ukuera ramo.

<sup>26</sup>Jayawe Jesús omondo kuimbae jēta pe jare jei chupe: “Awiye ekua tēta wasu rupi. Jare awiye nemiäri kía pe awe jokoropi kua ayapo ndewe wae re,” jei chupe.

### **Pedro jei Jesús ko jae Upuruepi wae Tumpa ombou wae**

*(Mateo 16.13-16; Lucas 9.18-21)*

<sup>27</sup>Koiño tēta wasu Cesarea Filipino jee wae wi ñonoï amokue tēta wasu rai reta. Jokoti yuraa Jesús jare jemimboe reta. Jare tape rupi yuraa yureko reta rambuwe,

Jesús upirandu jemimboe reta pe: “¿Kērái pa ñru wae reta uyemingeta kía ko che wae?” jei chupe reta.

<sup>28</sup>Jayawe jae reta jei chupe: “Amokue wae jei nde ko jae Juan upurumbisakambuse wae. Jare ñru wae reta jei nde ko jae Tumpa ñnee arakae umimbeu wae Elías, ani ambie kuimbae Tumpa ñnee arakae umimbeu wae ikowe ye wae,” jei reta.

<sup>29</sup>Jayawe Jesús upirandu ye chupe reta: “Jare pemaerä, ¿kía pa ko che?” jei chupe reta. Jayawe Pedro jei chupe: “Nde ko jae Cristo ndoe chupe wae,” jei.

<sup>30</sup>Jayawe Jesús jei chupe reta awiye waerä umimbeu reta kía pe awe kía ko jae wae.

### **Jesús umimbeu umanota ko**

*(Mateo 16.21-28; Lucas 9.22-27)*

<sup>31</sup>Jayawe Jesús umbipi umimbeu kawi jemimboe reta pe kērái jae umanota iko wae. Jei chupe reta: “Che kuimbaerä ayeyapo wae imeta ko aiporara jeta. Jare yandetenondewa reta, jare sacerdote itenondewa reta, jare Moisés uikuatía wae re oporomböe wae reta chererirota jare cheyukakata reta,” jei. “Erëi kua imeta ko uyeyapo. Jare joko wi mbapi ara pe aikowe yeta ayu ai kuri umanokue wae reta ipite wi,” jei chupe reta.

<sup>32</sup>Jukuärái Jesús uikuaaka kawi chupe reta umanota iko wae. Erëi jokua ikawi’ä Pedro pe. Jáeramo jae wiraa Jesús ñru reta ipite wi, jare umbipi umbieta chupe jokua jae jei wae re.

<sup>33</sup>Jayawe Jesús uyerowa umae ñru jemimboe reta koti, jare umbieta Pedro pe. “Esiri chewi, Satanás,” jei chupe. “Echa’ä ndepia oi mbaembae iwi pewa reño. Mbaeti ndepia oi mbaembae Tumpa uipota wae re,” jei chupe.

<sup>34</sup>Jayawe Jesús ueni jemimboe reta jare ñru jokoropi ñonoï wae reta ikoti. Jare jei chupe reta: “Ime yawe kía uipota iko cheremimboerä wae, awiye ma tuiko jae jei wae rupiño. Erëi towoi ikurusu jare tou che ndiwe,” jei.

<sup>35</sup>“Echa’ä ime yawe kía jaeño uyembipia’ä uepi waerä tei jekowe kua iwi pewa re, umikañita iyuwi jekowe opa mbae wae ipuereta tei onoi wae. Erëi kía umee jekowe chereko pewa wae jare Tumpa ñnee ikawi wae jeko pewa wae, yepe tei umano, erëi onoita tekowe opa mbae wae,” jei chupe reta.

<sup>36</sup>“Kua re ikawi ko piyemingeta waerä pepia pe. ¿Maera ra ikawita kía umingana waerä opaete kua iwi pe oi wae, erëi umano ma yawe, umikañi ma iyuwi jekowe opa mbae wae? Añetete jae umingana’ä mbae awe,” jei.

<sup>37</sup>“Echa’ä pe reta pepuere’ä etei pembiepi penoi waerä tekowe opa mbae wae,” jei chupe reta.

<sup>38</sup>“Añetete kua iwi pe añawe ñonoï wae reta uyerowa ma Tumpa wi jare uyawi reta ma jeta ikoti. Jare ime yawe kía imara chewi jare chiñee wi kua reta jowai, che kuimbaerä ayeyapo wae chemarata wi chuwi che ayu ye yawe. Echa’ä ayu yeta ko ai. Jare ayu ye ma yawe, ayuta cheRu imbaepuere jembipete rewe jare araiwa Tumpa oñono tee wae reta ndiwe.” Jukuärái jei Jesús jemimboe reta pe.

## Marcos 9

<sup>1</sup>Jayawe Jesús jei wi chupe reta: “Che tae pewe añetete wae, amokue pe reta kua pe pei wae pechata pei ndei pemento mbowe Tumpa imbaepuere mburuwicha wasu pewa,” jei chupe reta.

### Amokue Jesús jemimboe reta uecha Jesús imbaepuere jembipete wae

*(Mateo 17.1-13; Lucas 9.28-36)*

<sup>2</sup>Jare owa ara ma uasa yawe, Jesús wiraa Pedro, Jacobo, jare Juan iru reta ipite wi pëti iwitu wasu re. Jare joko pe Jesús jete uyembiambie chupe reta.

<sup>3</sup>Jemimonde wi umbipi uwera jare tiasí. Mbaeti kiawe umbaeputuka wae ipuere umitiasí jukuári.

<sup>4</sup>Jare aramoiño uyekuaa chupe reta Elías jare Moisés uyemingeta ñonoí Jesús ndiwe.

<sup>5</sup>Jayawe Pedro jei Jesús pe: “Oporomböe wae, jaekawi ko ore noí kua pe,” jei chupe. “Nduyapota mbapi warasía ñanaroki pewa – pëti nemaerä, pëti Moisés pewarä, jare pëti Elías pewarä wi,” jei chupe.

<sup>6</sup>Añetete Pedro uikuaa’ä mbae jei waerä, echa’ä jae jare Jacobo jare Juan ukiye ramo.

<sup>7</sup>Jayawe jupiwoiño uyekuaa chupe reta amapitu jare opa oñowa reta. Jare amapitu wi uyendu ñee jei: “Kua ko jae cheRai auete wae. Piyapisaka jese,” jei.

<sup>8</sup>Jare aramoiño umae reta ye yawe, uecha’ä ma kiawe joko pe oí – jaeño ma Jesús.

<sup>9</sup>Joko wi uweyi ye yureko reta rambuwe iwitu wasu wi, Jesús jei chupe reta: “Awiye pemiári añawe kía pe awe kua pecha wae. Ndei rani. Peáro che kuimbaerä ayeyapo wae amano jare aikowe ye ayu umanokue wae reta ipite wi rewa. Jayawe ramo pemierakuata pei kuri,” jei chupe reta.

<sup>10</sup>Jáeramo jemimboe reta upita awiye waerä imiári kía pe awe uyeyapo wae rewa. Erëi upirandu reta iyupe: “¿Mbae ra uipota jei yandewe kua jei wae: ‘aikowe ye ayu umanokue wae reta ipite wi rewa?’” jei iyupe reta.

<sup>11</sup>Jayawe jae reta upirandu ye Jesús pe mbae re: “¿Maera pa Moisés uikuatía wae re oporomböe wae reta jei Elías rani ko outa ndei Upuruepi wae ou mbowe?” jei reta.

<sup>12</sup>Jayawe Jesús jei chupe reta: “Añetete ko jae reta jei wae. Elías rani ko ou uyapikatu waerä opaete mbaembae,” jei. “Erëitu Tumpa iñeeriru pe uyekuatía oí wi che kuimbaerä ayeyapo wae aiporarata ko jeta jare iru wae reta chererirota,” jei.

<sup>13</sup>“Erëi che tae pewe añetete wae, Elías ou ma ko, jare iru wae reta uyapo chupe mbae jae reta uipota wae rupi, kërái Tumpa iñee arakae umimbeu wae reta uikuatía jese wae rami,” jei chupe reta.

### Jesús uminguera pëti kunumi rai añña uyembiiya jese wae

*(Mateo 17.14-21; Lucas 9.37-43)*

- 14 Jayawe Jesús jare jokua mbapi jemimboe reta ndiwe yuweru ye uwäe kiapé ñruwe jemimboe reta upita wae pe. Jare uecha reta ambie reta jeta uyembati ñonoï jese reta. Jare joko pe ñonoï wi amokue Moisés uikuatía wae re oporomböe wae reta uyeaka yureko Jesús jemimboe reta ndiwe.
- 15 Jare opaete wae ipiakañi reta Jesús ipiranoë pewa uyekuaa chupe reta ramo. Jayawe jupiwoiño osi yuraa owäiti reta jare umbisaluda reta.
- 16 Jayawe Jesús jei chupe reta: “¿Mbae re pa piyeaka piko?” jei chupe reta.
- 17 Jayawe pëti kuimbae joko pe oï wae jei chupe: “Oporomböe wae, aru ndewe cherai,” jei chupe. “Aña uyembiiya ma jese jare iñee opa umikañi chuwi.
- 18 Jare kerupi oï wae rupi täta umbiriri. Jare jäi umbikiriñu, jare iyuru tiriye, jare jete opa uñemiata,” jei. “Ayerure tēi ma nderemimboe reta pe omoë waerä chuwi aña, erēi ipuere’ä reta,” jei kuimbae Jesús pe.
- 19 Jayawe Jesús jei joko pe ñonoï wae reta pe: “¿Marái mbate ra pe reta perowia kawí’ä cheré? Chembikueri ma peï perowia mbae cheré wae. ¿Kērái yawe rewa ra arupiata pewe? Peru chewe kua pe jokua kunumi rai,” jei chupe reta.
- 20 Jayawe ueru reta chupe yawe, jare aña uecha yawe Jesús, jupiwoiño täta umbiriri jokua kunumi rai. Jayawe kunumi rai oa iwí re, jare uyapayere, jare iyuru tiriye.
- 21 Jayawe Jesús upirandu tu pe: “¿Kērái yawe ma pa uyeyapo chupe kua?” jei chupe. “Michi rai wiwe uyeyapo chupe,” jei tu parawete.
- 22 “Jare jeta wese ma aña uiti tēi tata pe jare i pe uyuka waerä tēi. Erēi nde ndepuere yawe ndiyapo chupe mbae, oreparareko mii jare orembori,” jei Jesús pe.
- 23 Jayawe Jesús jei chupe: “¿Maera pa nde ndere chewe, ‘nde ndepuere yawe’?” jei. “Opaete mbaembae chepuere ayapo cheré wirowia wae pewarä,” jei chupe.
- 24 Jayawe kunumi rai tu täta uyemingeta rewe jei: “¿Che arowia nderé! Erēi chembori mii, echa’ä uata chewe arowia kawí waerä nderé,” jei Jesús pe.
- 25 Jayawe Jesús uecha jeta ñru wae reta osi yuweru ñonoï ikoti. Jayawe iñeeäta rewe jei aña pe: “Nde aña nembiyemingeta’ä jare nembiapisa’ä kua kunumi rai wae, che tae ndewe, eë ekua kua kunumi rai wi jare awiye ye ma iyembiiya jese,” jei.
- 26 Jayawe aña jäse, jare täta umbiriri kunumi rai, jare oë chuwi. Jare kunumi rai umano echa upita. Jayawe jeta wae reta uecha yawe, jei tēi: “Umano ma.”
- 27 Erēitu Jesús uipisi kunumi rai ipo wi jare umupüa. ¿Jare kunumi rai ukuera kawí!
- 28 Joko wi Jesús jare jemimboe reta ndiwe uike o pe. Jare jemimboe retaño Jesús ndiwe ñonoï yawe, upirandu reta chupe: “¿Maera pa ore orepuere’ä nomoë aña jokua kunumi rai wi?” jei reta.
- 29 Jayawe Jesús jei chupe reta: “Jaeño pepuere pemoë jokua nunga aña piyerure rewe Tumpa pe,” jei chupe reta.



## Jesús umimbeu ye jemimboe reta pe umanota iko wae

(Mateo 17.22-23; Lucas 9.44-45)

**30**Joko wi Jesús jare jemimboe reta yuraa ye jare uasa yuraa reta iwí Galilea rupi. Jesús uipota'ä joko pewa reta uikuaa reta waerä jae jokoropi oí wae,

**31**echa'ä omboe iko jemimboe retaño. Jayawe jei jemimboe reta pe: “Che kuimbaerä ayeyapo wae, imeta kía chemee oí cherowaicho reta pe wae. Jare jae reta cheyukata,” jei. “Erëi taikue rupi mbapí ara ma uasa yawe, aikowe yeta ayu äi kuri umanokue wae reta ipite wi,” jei chupe reta.

**32**Erëi Jesús jemimboe reta uikuaa kawí'ä mbae re ra Jesús uyemingeta iko wae, jare ukiye reta upirandu chupe waerä.

### ¿Kía nunga ra ko jae tenondewarä?

(Mateo 18.1-5; Lucas 9.46-48)

**33**Jayawe yuraa uwäe reta tēta wasu Capernaum pe, jare uike reta pēti tēta pe. Jare o pe ñonoí reta yawe, Jesús upirandu jemimboe reta pe: “Yayu yaiko yawe tape rupi, ¿mbae re pa piyeaka piko?” jei chupe reta.

**34**Jayawe jae reta uñemikiño chuwi. Echa'ä tape rupi jae reta uyeaka yureko kía ra ko jae tenondewaete wae.

**35**Jayawe Jesús uwapí jare ueni jokua doce jemimboe reta ikoti. Jare jei chupe reta: “Ime yawe kía uipota iko tenondewarä wae, tuyembitaikue opaete wae wi jare tuyeyokui chupe reta,” jei chupe reta.

**36**Jayawe Jesús ueni pēti sambiaí jae reta ipite pe jare owoí oñono ipapí re. Jare jei chupe reta:

**37**“Jeta wae reta jei tēi sambiaí reta usiriwe'ä ko. Erëi che tae pewe, ime yawe kía umbiasa kawí pēti sambiaí kua rami wae, jare jukuärái uyapo cheré wirowia ramo, chembiasa kawí ko oí wi,” jei. “Jare jokua chembiasa kawí wae, umbiasa kawí ko oí wi chembou wae,” jei chupe reta.

### Oyowaicho'ä yandekoti wae, jae'ä ko yanderowaicho

(Mateo 10.42; Lucas 9.49-50)

**38**Jayawe Juan jei Jesús pe: “Oporomboe wae, ore nduecha pēti kuimbae omoë iko añä reta kuimbae reta wi. Jare jae nderee re uyapo iko jukuärái,” jei. “Jare ore ndoe chupe awiye ma jukuärái uyapo waerä, echa'ä jae ñaneiru'ä ko,” jei chupe.

**39**Jayawe Jesús jei Juan pe: “Awiye piyopia chuwi. Echa'ä ime yawe kía mbaembae tuicha wae uyapo cheree re wae, ndarau aramoi pewaeño mbae ikawí mbae wae jei chekoti,” jei.

**40**“Ime yawe kía mbaeti oyowaicho oí yandekoti wae, jae ko yandepipika pe oí,” jei.

41“Jare che tae pewe añetete wae, ime yawe kía umee pewe i yepe peu waerä pe reta cheré perowia ramo, che amiñatimata chupe mbae ikawi wae jokua re,” jei chupe reta.

### **Jesús oporomboe kía japicha pe uyawika Tumpa koti wae rewa**

*(Mateo 18.6-9; Lucas 17.1-2)*

42Jayawe Jesús jei wi jemimboe reta pe jokua sambiai owoi ipapi re onoi wae rewa: “Ime yawe kía uyawika Tumpa koti kua nunga cheré wirowia wae pe, Tumpa tuicha rupi uiporarakata oï chupe,” jei. “¿Këraita ra ko kía uñapiti yawe peyayu re pëti ita tuicha wae, jare joko wi pemombo yawe i tipì wae pe? Jokua ikawi’ä ko. ¿Erëi oete yeta oï kía pe Tumpa koti uyawika yawe pëti cheré wirowia mii wae pe! Echa’ä Tumpa tuichaete ye uiporarakata oï chupe,” jei chupe reta.

43“Jae nunga wi che tae ndewe, ndepo jowaicho jekuaeño uyawika oï ndewe Tumpa koti yawe, iyasia ndeyuwi. ¿Maera pa ikawita nenoï waerä mokui ndepo, neï yawe Tatawasurenda pe ndepo uyawika ndewe jeko pewa? Che tae ndewe, ikawiete ko nenoï waerä tekowe opa mbae wae, yepe tëi aramoï pëtiño nenoï ndepo,” jei chupe reta.

44“Jokua Tatawasurenda pe taso reta oporou wae ndarau umano, jare tata ndarau owe,” jei.

45“Jae ramiño wi ndepi jowaicho jekuaeño uyawika oï ndewe Tumpa koti yawe, iyasia ndeyuwi. ¿Maera pa ikawita nenoï waerä mokui ndepi, neï yawe Tatawasurenda pe ndepi uyawika ndewe jeko pewa?” jei. “Che tae ndewe, ikawiete ko nenoï waerä tekowe opa mbae wae, yepe tëi aramoï pëtiño nenoï ndepi,” jei chupe reta.

46“Tatawasurenda pe taso reta oporou wae ndarau umano, jare tata ndarau owe,” jei.

47“Jae ramiño wi nderesa jowaicho jekuaeño uyawika oï ndewe Tumpa koti yawe, eki ndeyuwi. ¿Maera pa ikawita nenoï waerä mokui nderesa, neï yawe Tatawasurenda pe nderesa uyawika ndewe jeko pewa? Che tae ndewe, ikawiete ko Tumpa nenoï waerä nemburuwicha wasurä jaeño máï pewa, yepe tëi aramoï pëtiño nenoï nderesa,” jei.

48“Tatawasurenda pe taso reta oporou wae ndarau umano, jare tata ndarau owe,” jei chupe reta. Jukuärái Jesús oporomboe umbijaanga rewe japicha pe uyawika Tumpa koti wae reta rewa.

49Jare Jesús jei wi jemimboe reta pe umbijaanga rewe: “Opaete wae uasa ñotái ko yembiawái reta rupi. Jare kërái ko yuki yanderembiu umbikawi rami, jukuärái wi jokua yembiawái reta ikawita oï pewe kuri,” jei.

50“Jae nunga wi yuki ikawi ko. Erëi opa ma jembochipa yawe, ¿këraita ra jembochi ye yandewe?” jei. “Jayawe piyapo yuki jembochi wae uyapo wae rami, jare piko kawi päwe pepiakatu rewe,” jei Jesús jemimboe reta pe.

## Marcos 10

### Jesús oporomboe menda rewa

(Mateo 19.1-9; Lucas 16.18)

- <sup>1</sup>Joko wi Jesús oo iwi Judea pe jare i wasu Jordán jowaicho pe. Jare jeta wae reta yuraa ye jae oï wae pe. Jayawe Jesús omboe reta jae jekoño mái rami.
- <sup>2</sup>Jare amokue fariseo reta wi yuraa joko pe, jare upirandu reta Jesús pe kuárái: “Tumpa jei wae rupi, ¿ipuereta ra kuimbae omombo jembireko?” jei reta chupe. Upirandu reta Jesús pe jukuárái, echa’ä jae reta uipota tēi uyawika chupe iñee rupi umbijeko reta waerä.
- <sup>3</sup>Jayawe Jesús jei chupe reta: “¿Kērái pa Moisés uikuatía wae pemingeta kua rewa?” jei chupe reta.
- <sup>4</sup>Jayawe jae reta jei: “Moisés umaño kuimbae jembireko omombo waerä. Erēi kuimbae imeta ko uikuatía rani tupapire yemombo pewa jare umee jembireko pe. Jayawe ramo ipuere omombo jembireko,” jei reta.
- <sup>5</sup>Jayawe Jesús jei chupe reta: “Moisés uikuatía jukuárái, pe reta pepiatäta ramo,” jei.
- <sup>6</sup>“Erēi jukuárai’ä ko tenonde yawe. Echa’ä Tumpa iñeeriru pe uyekuatía oï kērái Tumpa uyapo ramo yawe mbaembae, uyapo kuimbae jare kuña. <sup>7</sup>‘Jáeramo kuimbae usirita tu jare ichi wi iko tee waerä jembireko ndiwe.
- <sup>8</sup>Jare mokui wae uyeyapota pēti ramiño.’Jukuárái uyekuatía oï,” jei chupe reta. “Jayawe che tae pewe, mbaeti ma ko ñonoï mokui wae rami. Yureko ma ko pēti ramiño.
- <sup>9</sup>Jáeramo kuimbae jare kuña Tumpa uyapo pēti ramiño wae, awiye kiawe tumbisiri reta iyuiwi. Jukuárái che jae,” jei Jesús chupe reta.
- <sup>10</sup>Joko wi Jesús jare jemimboe reta yuraa uwäe tēta pe kiate jae reta upita yureko wae pe. Jare o pe ma ñonoï reta yawe, Jesús jemimboe reta upirandu chupe jokua jae jei yemombo rewa wae re.
- <sup>11</sup>Jayawe Jesús jei chupe reta: “Pēti kuimbae omombo jembireko yawe, jare wireko yawe ambie kuña, uyapo ko oï awasa jembireko omombo wae koti,” jei chupe reta.
- <sup>12</sup>“Jae ramiño wi kuña usiri ime wi yawe, jare umenda ambie kuimbae ndiwe yawe, uyapo ko oï awasa,” jei Jesús chupe reta.

### Jesús uyerure Tumpa pe sambiai reta re

(Mateo 19.13-15; Lucas 18.15-17)

- <sup>13</sup>Jayawe amokue wae reta ueru Jesús pe isambiai reta, jare uipota reta Jesús oñono waerä ipo jese reta. Erēi Jesús jemimboe reta uñeengata jokua sambiai ueru wae reta pe. “Awiye jekuaño pemiawái Jesús,” jei chupe reta.

<sup>14</sup>Erëi Jesús kua uyandu yawe, pochi jemimboe reta pe jare jei chupe reta: “Pemaño sambiai reta re yuweru waerä chekoti. Awiye piyopia reta, echa’ä jaeño kua sambiai rami wae reta oïta Tumpa ndiwe, Tumpa oï ma yawe opaete wae imburuwicha wasurä,” jei chupe reta.

<sup>15</sup>“Che tae pewe añetete wae, pipota peï Tumpa ndiwe yawe, jayawe imeta ko perowia jese pëti sambiai wirowia tu re wae rami,” jei chupe reta.

<sup>16</sup>Jayawe Jesús uikuäwa sambiai reta jei rewe: “Tumpa tuyapo ikawi wae pewe,” jei chupe reta.

### **Pëti kuimbae ikokatu wae ou Jesús oï wae pe**

*(Mateo 19.16-30; Lucas 18.18-30)*

<sup>17</sup>Jayawe Jesús joko wi oo ye jemimboe reta ndiwe. Jare yuraa yureko reta rambuwe, aramoño pëti kuimbae osi ou owäiti. Jare uñeño itawa re Jesús jowai jare jei chupe: “Oporomboe wae, jupi wae ko nde. ¿Mbae pa ayapota tekowe opa mbae wae anoi waerä?” jei chupe.

<sup>18</sup>Jayawe Jesús jei chupe: “¿Maera pa ndere chewe jupi wae? Mbaeti ko pëti awe jupi wae. Jaeño ko Tumpa jupi wae,” jei.

<sup>19</sup>“Nde ndikuaa ko Tumpa arakae jei wae: ‘Awiye epuruyuka. Awiye iyapo awasa. Awiye nemonda. Awiye ndapu nembijeko waerä nderapicha. Awiye epurumbitawi. Ipiu nderu jare ndesi wi,’ jei,” jei chupe.

<sup>20</sup>Jayawe kuimbae jei: “Oporomboe wae, che ayawi’ä etei pëti awe kua reta chemichi wiwe,” jei chupe.

<sup>21</sup>Jayawe Jesús umae jese uiparareko rewe jare jei chupe: “Imeño mbae uata oï ndewe ndiyapo waerä,” jei chupe. “Ekua ewaka opaete nembraembae, jare jokua korepoti emee iparawete wae reta pe. Jare jukuärái imeta neno mbaembae ikawiete wae ara pe. Joko wi eyu kuri che ndiwe ndiko waerä cheremimboerä,” jei chupe.

<sup>22</sup>Jayawe kua uyandu yawe, kuimbae oo ye ipiatiti rewe. Echa’ä jae ikokatuete ko jare uauete imbaembae opa umee waerä iyuwi.

<sup>23</sup>Jayawe Jesús umae iyipi rupi, jare jei jemimboe reta pe: “Pëti ara Tumpa ikota opaete wae imburuwicha wasurä jaeño mái pewa. Erëi yawaieteta ko ikokatu wae reta uyekou waerä jokua re jare onoi reta waerä tekowe opa mbae wae,” jei chupe reta.

<sup>24</sup>Erëi jemimboe reta ipiakañi Jesús jei wae re. Jayawe Jesús jei ye chupe reta: “Cheriwi reta, yawái ko korepoti re uyeke wae reta onoi waerä tekowe opa mbae wae Tumpa ndiwe,” jei.

<sup>25</sup>“¿Këraita ra ko pëti camello uasa waerä yuu jesakua mii rupi? Jokua yawái. Erëi yawaieteta ko pëti ikokatu wae onoi waerä tekowe opa mbae wae,” jei chupe reta.

<sup>26</sup>Jayawe jemimboe reta ipiakañiete, jare upirandu iyupe reta: “Jukuärái yawe, ¿kía ra ipuereta uyerepi awiye waerä oo Tatawasurenda pe jayawe?” jei reta.

<sup>27</sup>Jayawe Jesús umae jese reta, jare jei chupe reta: “Iwi pewa reta jaei ndarau kiawe ipuere uyerepi chuwi. Erëitu Tumpa ipuere uyapo chupe reta, echa’ä Tumpa pewarä mbaeti mbae yawái,” jei chupe reta.

<sup>28</sup>Jayawe Pedro jei Jesús pe: “Mase, ore ndueya ma opaetei nduiko waerä nderemimboe retarä. ¿Imeta ra mbae oremaerä?” jei chupe.

<sup>29</sup>Jayawe Jesús jei chupe: “Amokue wae reta chereko pewa ueya ma jeta mbaembae ipuere waerä umimbeu ñee ikawi wae Tumpa rewa. Ueya ma reta jëta, jare tikei reta, jare tiwi reta, jare jindi reta, jare tu, jare ichi, jare isambiai reta, jare iko reta. Erëi che tae pewe añetete wae, ime yawe kía jukuärái uyapo wae,

<sup>30</sup>cien wese ye ko uñemiñatimata oï chupe kuri jekowe pe oï rambuewe,” jei chupe reta. “Uñemiñatimata oï chupe jëta retarä, tikei retarä, tiwi retarä, jindi retarä, ichi retarä, isambiai retarä, jare iko retarä wi. Erëi yepe tēi uyekouta kuärái, jeseuwe uiporarata oï wi cheré wirowia mbae wae reta ipo pe. Erëitu taikue rupi Tumpa umeeta oï chupe tekowe opa mbae wae,” jei.

<sup>31</sup>“Erëi jeta añawe rupi uyembutuichaka ñonoï wae reta, Tumpa umimichita oï reta kuri. Jae ramiño wi jeta añawe rupi usiriwe mbae echa ñonoï wae reta, Tumpa umbutuichata oï reta kuri,” jei Jesús jemimboe reta pe.

### **Jesús umimbeu ye jemimboe reta pe umanota iko wae**

*(Mateo 20.17-19; Lucas 18.31-34)*

<sup>32</sup>Jayawe Jesús jare jemimboe reta jare jeta iru wae reta ndiwe yuraa yureko tape Jerusalén koti oo wae rupi, jare Jesús oo jae reta jenonde. Jare jemimboe reta ipiakañi jare iru wae reta ukiye, echa’ä Jesús jowaicho reta ñonoï Jerusalén pe. Jayawe Jesús ueni jokua doce jemimboe reta iru wae reta ipite wi. Jare umbipi umimbeu ye chupe reta mbae uyeyapota iko chupe wae.

<sup>33</sup>“Mase, pe reta pikuaa peï añawe ya ñaï Jerusalén koti. Erëi aipota pikuaa waerä wi mbae uasata oï chewe joko pe wae,” jei chupe reta. “Echa’ä joko pe ma ñawäe yawe, che kuimbaerä ayeyapo wae, pëti wae chemeeta oï sacerdote itenondewa reta pe jare Moisés uikuatía wae re oporomboe wae reta pe. Jae reta jeita cheyukaka waerä, jare joko wi chemeeta reta judío mbae wae reta pe,” jei.

<sup>34</sup>“Jare jae reta cheyoyaita, jare undiwita reta cheré, jare chembipiuta reta, jare cheyukata reta,” jei. “Erëitu joko wi mbapi ara pe aikowe yeta ayu aï kuri umanokue wae reta ipite wi.” Jukuärái jei Jesús jemimboe reta pe.

### **Mokui Jesús jemimboe ueka jendarä oporoyokui waerä Jesús ndiwe**

*(Mateo 20.20-23)*

<sup>35</sup>Jokua jaikue rupi Zebedeo tai reta, Jacobo jare Juan jee wae, yuweru jei Jesús pe: “Oporomboe wae,” jei reta. “Ndoyu ndueka mii ndewe ikawi wae, jare iyapo mii orewe,” jei reta.

<sup>36</sup>Jayawe Jesús jei chupe reta: “¿Mbae pa pipota ayapo waerä pewe?” jei chupe reta.

<sup>37</sup>Jayawe jae reta jei chupe: “Nde nei ma yawe opaete wae imburuwicha wasurä, emaeño mii oreré nduwapi waerä ndeyipi pe, pëti wae oï waerä ndeakata koti jare ïru wae oï waerä ndeaso koti. Jukuärái ore reta wi orepuereta ndoporoyokui nde ndiwe,” jei reta chupe.

<sup>38</sup>Jayawe Jesús jei chupe reta: “Pe reta pikuaa’ä mbae ra peka peï wae,” jei chupe reta. “¿Pepuereta pa piporara che aiporarata wae rami, jare pepuereta pa pemiawäta yembiawái reta che amiawätata wae rami?” jei chupe reta.

<sup>39</sup>“Orepuereta ko,” jei reta. Jayawe Jesús jei chupe reta: “Añetete ko piporarata jare peasata yembiawái reta rupi che rami,” jei.

<sup>40</sup>“Erëi chepuere’ä jae pewe pëti wae uwapi waerä cheakata koti jare ïru cheaso koti. Echa’ä cheRu Tumpa uyapikatu ma jokua tenda reta kía nunga jae uiparawo wae reta pewarä,” jei chupe reta.

### **Kía uipota tenondewarä iko wae tuyeyokui ïru wae reta pe**

*(Mateo 20.24-28)*

<sup>41</sup>Jare ïru payandepo Jesús jemimboe reta uikuaa yawe Jacobo jare Juan mbae ueka reta Jesús pe wae, pochi chupe reta.

<sup>42</sup>Jayawe Jesús ueni opaete jemimboe reta ikoti jare jei chupe reta: “Pe reta pikuaa peï mburuwicha reta jare itenondewa reta kua iwí pewa kërái ko jeko wae. Jae reta jekuaeño uikuaaka yandewe yande ñäi jae reta imbaepuere pe wae.

<sup>43</sup>Erëi pe reta awiyeta ko piyapo jukuärái,” jei. “Ime yawe pepite pe pëti wae uipota mburuwicharä iko wae, tuyeyokui ïru wae reta pe.

<sup>44</sup>Jare ime yawe pepite pe pëti wae uipota iko tenondewarä wae, tuyeyokui ïru reta pe pëti pione täta uyeyokui wae rami,” jei.

<sup>45</sup>“Echa’ä che kuimbaerä ayeyapo wae ayu’ä ko ïru wae reta uyeyokui waerä chewe. Che ayu ko ayeyokui waerä ïru wae reta pe jare amee waerä cherekowe jeta wae reta aepi waerä.” Jukuärái jei Jesús jemimboe reta pe.

### **Jesús uminguera pëti kuimbae jesa mbae wae**

*(Mateo 20.29-34; Lucas 18.35-43)*

<sup>46</sup>Jayawe yuraa uwäe reta tëta wasu Jericó jee wae pe. Jare joko wi uasa reta yawe, jeta ïru wae reta yuraa Jesús jare jemimboe reta jupie. Jare yuraa yureko reta tape rupi rambuwe, oñowäiti pëti kuimbae jesa mbae wae ndiwe. Jae jee Bartimeo, jare tu ko jee Timeo. Kua kuimbae parawete uwapi iko tape jembei pe uyerure waerä mbae re.

<sup>47</sup>Jare jae uyandu yawe uasa iko jokoropi Jesús Nazaret pewa, umbipi usapikai Jesús pe kuärái: “Jesús, David ñemoña pewa, cheparareko mii,” jei parawete.

<sup>48</sup>Erëi jeta joko pe ñonoï wae reta uñeengata tëi chupe. “Nekii,” jei chupe reta. Erëi jae jeiete usapikai Jesús pe: “David ñemoña pewa, cheparareko mii,” jei parawete.

<sup>49</sup>Jayawe Jesús uyemboi jare omondo ueni. Jayawe jei reta jesa mbae wae pe: “Inemiatangātu. Epüa. Nereni ma oï,” jei reta chupe.

<sup>50</sup>Jayawe jesa mbae wae omombo ueya inepewaka, jare upüa woi oo parawete ipotawe pochi rupi Jesús koti.

<sup>51</sup>Jayawe Jesús upirandu chupe: “¿Mbae pa ndipota ayapo waerä ndewe?” jei chupe. Jayawe kuimbae jesa mbae wae jei chupe: “Oporomboe wae, aipota amae mii,” jei chupe.

<sup>52</sup>Jayawe Jesús jei chupe: “Ndepuere ndeo ye. Ndekuera ma nderowia cheré ramo,” jei chupe. Jare jupiwoiño kuimbae ipuere umae kawi, jare oo Jesús jupie tape rupi.

## Marcos 11

### Jesús uike Jerusalén pe

(Mateo 21.1-9; Lucas 19.28-38; Juan 12.12-15)

<sup>1</sup>Koiño tēta wasu Jerusalén wi, ñaibe Olivorenda jee wae jowai, ime ñonoï mokui tēta wasu rai reta Betfagé jare Betania jee wae. Jayawe Jesús jare jemimboe reta ndiwe yuraa seri ma uwäe reta yawe joko pe, Jesús jei mokui jemimboe reta pe:

<sup>2</sup>“Pekua pea tēta wasu rai yanderenonde oï wae pe. Jare joko pe pewäe yawe, pewäeta peï kuri pēti mburika taurusu wae uñeñapiti oï wae, ndei kiawe opo jese wae. Piyora peru kua pe,” jei chupe reta.

<sup>3</sup>“Jare ime yawe kía upirandu pewe wae, pereta chupe: ‘YandeYa uipota uiporu, erēi imambaeño ueruruka yeta ueya pewe,’ pere.” Jukuärái jei Jesús chupe reta.

<sup>4</sup>Jayawe Jesús jemimboe reta yuraa uwäe tēta wasu rai pe, jare uwäe chupe reta mburika taurusu wae Jesús jei wae rami. Uñeñapiti iko tapembeï pe pēti tēta jōke iyipi mii pe. Jayawe jae reta oyora.

<sup>5</sup>Jare amokue joko pe ñonoï wae reta uecha jare upirandu chupe reta: “¿Maera pa piyora peï mburika?” jei chupe reta.

<sup>6</sup>Jayawe Jesús jemimboe reta umimbeu chupe reta Jesús jei wae. Jayawe umaeño jese reta wiraa waerä.

<sup>7</sup>Joko wi Jesús jemimboe reta ueru mburika taurusu wae Jesús oï wae pe jare omboi reta inepewaka oñono waerä mburika ikupe re. Jayawe Jesús opo jese jare oo yuapi ye Jerusalén koti.

<sup>8</sup>Jare jeta wae reta yuweru jare inepewaka uipiso reta tape rupi mburika jenonde. Jare iru wae reta uyasia karandai joki jare uipiso reta tape rupi. <sup>9</sup>Jare Jesús jenonde jare jaikue rupi yuraa yureko wae reta usapikai pii rewe jei reta: “¿Tuyembutuichaka Tumpa jee! ¿Tumpa tuyapo ikawiete wae kua ou oï Tumpa jee re wae pe!

<sup>10</sup>Kua ko jae yanemburuwicha wasu David iñemoña pewa outa iko wae. ¡Tuiko yanemburuwicha wasurä jaeño máí pewa! ¡Tuyembutuichaka Tumpa jee ara pe!” Jukuarái jei reta usapikai pii rewe.

<sup>11</sup>Jayawe Jesús oo uwäe Jerusalén pe yawe, uike oo tupao wasu joka pe jare umae jokoropi opaete mbaembae re. Erëi kaaru ma chupe ramo, oë ye oo Betania pe joku doce jemimboe reta ndiwe.

<sup>12</sup>Jayawe piarewe pe yuraa ye reta Betania wi Jerusalén koti. Jare yuraa yureko reta rambuewe, Jesús iyembai.

<sup>13</sup>Jare mbiri wi uecha pëti iwa joki kawi oï wae. Jayawe oo tëi ikoti umae jese ime ra ía wae. Erëi mbaeti ía; jaeño joki, echa’ä ndei uwäe ara ía waerä. <sup>14</sup>Jayawe Jesús jei chupe: “Kua wiwe ndarau ye ma kía jou ndeía,” jei chupe. Jare uyandu kawi Jesús jemimboe reta joku jei wae.

### **Jesús omoë mbaemimba owaka wae reta tupao wasu joka wi**

*(Mateo 21.12-19; Lucas 19.45-48; Juan 2.13-16)*

<sup>15</sup>Jayawe yuraa uwäe reta tëta wasu Jerusalén pe. Jare Jesús uike ye tupao wasu joka pe kiape judío mbae wae reta ipuere uyembati umbutuicha reta waerä Tumpa jee. Erëi joko pe ime jeta wae reta owaka ñonoï mbaemimba uñemee waerä Tumpa pe wae. Jayawe Jesús umbipi omoë joko wi joku mbaemimba owaka wae reta jare owa ñonoï wae reta wi. Jare joku uipepika korepoti iwi ambie wi ueru wae reta imesa reta Jesús opa umbiyapara wiraa chuwi reta. Jae nunga uyapo wi pikasu owaka wae reta jenda.

<sup>16</sup>Jare umaeño’ä kía re awe uasa waerä jewita rewe jokoropi.

<sup>17</sup>Jayawe Jesús umbipi omboe joko pe ñonoï wae reta jare jei: “Tumpa jei iñeeriru pe kuarái: ‘Cherëta ko jae yerurerenda pewa opaete iwi pewa reta pewarä.’ Jukuarái Tumpa jei. Erëi pe reta piyapo ma imonda wae reta iñemía rami,” jei Jesús chupe reta.

<sup>18</sup>Jayawe sacerdote itenondewa reta jare Moisés uikuatía wae re oporomboe wae reta uikuaa yawe kua mbae Jesús uyapo wae rewa, ukiye reta aramoi jae imbaepuereteta chuwi reta. Echa’ä jae reta uikuaa opaete wae ipiakañi tuicha rupi Jesús oporomboe wae re. Jáeramo joko wiwe joku mburuwicha reta umbipi ueka kërái rupi uyukaka reta waerä Jesús.

<sup>19</sup>Jare pñuipi yawe, Jesús jare jemimboe reta yuraa ye Jerusalén wi Betania pe.

### **Jesús oporomboe yerure rewa**

*(Mateo 21.20-22)*

<sup>20</sup>Jare piarewe pe ndimbowe yawe, yuraa reta yewi Jerusalén koti. Jare yuraa yureko reta rambuewe, uecha reta iwa opa ma utini iyipi wiwe.

<sup>21</sup>Jayawe Pedro imandúa Jesús jei iwa pe wae re, jare jei: “¡Oporomboe wae, mase! Pea iwa ndiyepipeyu jese wae opa ma utini,” jei chupe.



**22**Jayawe Jesús jei chupe reta: “Perowia Tumpa re,” jei.

**23**“Che tae pewe añetete wae, ime yawe kía jei pea iwitu wasu pe oo uyemombo waerä mar pe, jare wírowia ipía rewe uyeyapota oí chupe wae, jayawe uyeyapota ko chupe. Tumpa uyapota iwitu wasu oo uyemombo waerä mar pe,” jei chupe reta.

**24**“Jáeramo che tae pewe, piyerure yawe Tumpa pe ipotawe mbae re, jare perowia Tumpa umee ma ko pewe yawe, jayawe penoita ko,” jei chupe reta.

**25**“Jae nunga wi che tae pewe, piyerure peí yawe Tumpa pe, aramoi pemanduata perapicha mbae kachi uyapo pewe wae re. Jukuärái yawe, awiye pemandúa chupe jokua re, peRu ara pe oí wae awiye waerä imandúa wi pewe mbaembae piyawi ikoti wae re,” jei.

**26**“Erëi jekuaño pemandúa chupe yawe ikawi mbae wae uyapo pewe wae re, jukuärái wi peRu ara pe oí wae jekuaño imanduata pewe wi mbaembae piyawi ikoti wae re,” jei Jesús jemimboe reta pe.

### **Jesús umikii jowaicho reta**

*(Mateo 21.23-27; Lucas 20.1-8)*

**27**Jayawe Jesús jare jemimboe reta ndiwe yuraa uwäe reta ye Jerusalén pe jare yuraa reta ye tupao wasu pe. Jare Jesús uwata iko rambuwe tupao wasu joka rupi, yuweru owäiti sacerdote itenondewa reta, Moisés uikuatía wae re oporomboe wae reta, jare judío itenondewa reta.

**28**Jae reta upirandu chupe: “¿Kía pa nembou kua mbaembae ndiyapo waerä? ¿Kía pa jei ndewe ndepuere nemoë waerä mbaemimba owaka wae reta tupao wasu joka wi?” jei reta chupe.

**29**Jayawe Jesús jei chupe reta: “Che tapirandu wi pewe mbae re,” jei chupe reta. “Pemimbeu yawe chewe, jayawe che wi amimbeuta pewe kía ko chembou kua mbaembae ayapo waerä,” jei.

**30**“Pere chewe, ¿kía pa ombou Juan upurumbisakambu waerä? ¿Tumpa ra ombou, ani kuimbeu retaño ra ombou? Pemimbeu chewe,” jei chupe reta.

**31**Jayawe jae reta yuraa ikotía mii jare jei iyupe reta: “Yae yawe, ‘Tumpa ko ombou Juan,’ jayawe Jesús jeita yandewe, ‘Jukuärái yawe, ¿maera pa perowia’ä jae jei wae?’ jeita yandewe.

**32**Erëi yae yawe, ‘Kuimbeu retaño ko ombou,’ jayawe ¿mbae ra uyapota kua uyembati wae reta?” jei iyupe reta. Jae reta ukiye chuwi reta aramoi ipuere uyembopochi reta ikoti. Echa’ä opaete wae wírowia Tumpa ko ombou Juan umimbeu waerä ñee Tumpa wi etei ou wae. Jáeramo mburuwicha reta uipiu jei reta waerä kuimbeu retaño ombou.

**33**Jayawe jei reta Jesús pe: “Ore nduikuaa’ä kía ra ko ombou Juan wae,” jei reta. Jayawe Jesús jei chupe reta: “Jayawe che wi ndarau amimbeu pewe kía ko chembou kua mbaembae ayapo waerä,” jei chupe reta.

## Marcos 12

### Jesús umbijaanga uvarupa uiporu wae reta re

(Mateo 21.33-46; Lucas 20.9-19)

- <sup>1</sup>Jayawe Jesús umbipi uyemingeta umbijaanga rewe jokua mburuwicha reta pe kuarái: “Ime iko pëti kuimbae uvaruparä uyapo wae,” jei. “Jae uikëse kawu jokua uvarupa, jare oñoti pipe jeta uva,” jei. “Jare uyapo wi uva uñetami pipe waerä. Jare uyapo wi pëti chapapa iwate, joko wi umae waerä opaete uvarupa re,” jei. “Jare opa ma uyapikatu kawu yawe jokua uvarupa, iya umee ambie reta pe uyandareko jese waerä. Jare jei chupe reta: ‘Piyandareko kawu uvarupa re. Jare uva yawiye ma yawe, mbite ameeeta pewe kuri,’ jei chupe reta. Jayawe uvarupa iya oo mbiri ambie iwi pe,” jei Jesús.
- <sup>2</sup>“Jayawe uva yawiye ma yawe, uvarupa iya ombou pëti uyeyokui chupe wae uvarupa uiporu wae reta pe ueka waerä tēi chupe reta jae imbae wae.
- <sup>3</sup>Erēi uvarupa uiporu wae reta uipisi uinupa, jare umee’ä chupe mbae awe. Jare omondo ye jukuarái etei reta,” jei.
- <sup>4</sup>“Jayawe uvarupa iya ombou ye tēi ñru uyeyokui wae. Erēi uvarupa uiporu wae reta uyapi ita pe umbipere ññaka pe, jare uyapo reta chupe mbaembae ikawu mbae wae. Jare omondo ye reta,” jei.
- <sup>5</sup>“Jayawe uvarupa iya ombou ye tēi ñru uyeyokui wae. Erēi uvarupa uiporu wae reta uyuka kua. Jare uvarupa iya jekuaeño ombou tēi ñru uyeyokui wae reta, erēi uvarupa uiporu wae reta jekuaeño uyapo mbae ikawu mbae wae chupe reta. Amokue wae uinupa reta, jare ñru wae uyuka reta,” jei chupe reta.
- <sup>6</sup>“Jare uvarupa iya ime wireko pëti tai jae waeño uauete wae. Taikuete rupi ombou tai uvarupa uiporu wae reta pe. Echa’ä jei tēi iyupe: ‘Kua cherai wi uipiuta ko reta,’ jei tēi.
- <sup>7</sup>Erēi uvarupa uiporu wae reta uecha tai ou oï yawe, jei reta iyupe: ‘Pea ou oï wae ko jae uvarupa iyarä wae. Yayuka ñañono, jare uvarupa upitata yanemaerä,’ jei tēi iyupe reta.
- <sup>8</sup>Jayawe jae reta uipisi, jare uyuka, jare omombo etei reta uvarupa wi,” jei chupe reta.
- <sup>9</sup>Jayawe Jesús jei wi jokua mburuwicha reta pe: “Jayawe, ¿mbae ra uyapota uvarupa iya?” jei chupe reta. “Che tae pewe, outa oï opa uyuka waerä jokua uvarupa uiporu wae reta, jare uiporukata uvarupa ambie wae reta pe,” jei chupe reta.
- <sup>10</sup>“¿Pemingeta’ä yerá Tumpa ññeeriru pe uyekuatía oï wae? Echa’ä joko pe uyekuatía oï umbijaanga rewe Upuruepi wae re kuarái: ‘Jokua ita tēta iyapoa reta wiriño omombo iyuwu reta wae, añawe uyeyapo ma chuwi reta ita ikawiete ye wae opaete ñru ita reta tēta pewa wi.

**11**Jukuärái Tumpa uyapo. Jare jokua orembipiakañiete.’ Jukuärái uyekuatía oï,” jei Jesús chupe reta.

**12**Jayawe jokua Israel pewa mburuwicha reta uyandu yawe Jesús jei wae, uikuaa kawí reta Jesús jei iko chupe reta wae – jae reta ko jokua uvarupa uiporu wae reta rami, echa’ä wiri-ro reta Jesús. Jáeramo jae reta uipota tēi jawoi pewa uipisika reta Jesús. Erēi ukiye reta uipisika waerä. Echa’ä uipisika reta yawe, aramoi jokua uyembati wae reta uyembopochita ikoti. Jayawe mburuwicha reta ueyaño jare opa yuraa ye reta.

### **Amokue reta uipota tēi uyawika Jesús pe iñee rupi**

*(Mateo 22.15-22; Lucas 20.20-26)*

**13**Joko wi jokua mburuwicha reta ombou Jesús pe amokue fariseo reta jare Herodes imboria reta, uyawika reta waerä tēi Jesús pe iñee rupi.

**14**Jae reta yuweru uwäe yawe, jei reta Jesús pe: “Oporomboe wae, ore nduikuaa nde jekuaeño ndiyemingeta jupi rupi. Nde netae oyowake opaete wae re jare niñemaño’ä ndiyé. Jare nde ndeporomboe kawí kērái yambiyerowia waerä Tumpa,” jei reta. “Jayawe ore nduipota ndupirandu ndewe mbae re. Romano reta imburuwicha wasu César jei yandewe yambiepi waerä chupe korepoti pe opa año rupi. Erēi ¿mbae pa ndere nde? ¿Jupi ra yambiepi chupe waerä, ani jupi’ä ra? ¿Yambiepi pa chupe, ani mbaetita pa?” jei reta chupe.

**15**Erēi Jesús uikuaa chuwi reta uipota umbitawí wireko reta wae. Jayawe jei chupe reta: “¿Maera pa pipota piyawika pei chewe? Peru chewe pēti korepoti; ñamae jese,” jei chupe reta.

**16**Jayawe jae reta ueru, jare Jesús jei chupe reta: “¿Kía jowa iä pa oï jese, jare kía jee pa uyekuatía oï jese?” jei chupe reta. “César,” jei reta.

**17**Jayawe Jesús jei chupe reta: “Jayawe kua ko jae César imbae. Pemee ye chupe jayawe. Erēi pemee wi Tumpa pe jokua mbaembae Tumpa uipota wae,” jei chupe reta. Jare Jesús jei wae re jae reta ipiakañi upita.

### **Jesús oporomboe umanokue wae reta ikowe yeta wae rewa**

*(Mateo 22.23-33; Lucas 20.27-40)*

**18**Jayawe yuweru Jesús oï wae pe amokue mburuwicha reta, saduceo jei chupe reta wae. Opaete saduceo reta jei tēi umanokue wae reta ndarau ma ikowe ye. Jayawe yuweru wae reta jei Jesús pe:

**19**“Oporomboe wae, ore nduipota ndupirandu ndewe pēti mbae re. Moisés arakae uikuatía ueya yandewe kuärái: ‘Pēti kuimbae umano yawe jembireko umimembi mbae rewe, jayawe kuimbae amiri tiwi tumenda jokua kuña ndiwe. Jayawe umimembi yawe, kuimbae amiri onoita iñemoña tiwi rupi.’ Jukuärái uikuatía Moisés,” jei reta.

**20**“Jayawe ime iko pēti kuimbae owa tiwi reta onoi wae. Kua kuimbae umenda, jare umano jembireko umimembi mbae rewe,” jei reta.

<sup>21</sup>“Jayawe kuimbae amiri tiwi jae iyeuka umenda jokua kuña ndiwe, jare umano wi jembireko umimembi mbae rewe. Jae nunga wi jukuärái uyeyapo jaikue rupiwa reta pe.

<sup>22</sup>Opaete chiu rewe pëti pëti umenda jokua kuña ndiwe, jare opaete pëti pëti rupi umano reta umimembi mbae rewe. Jare jaikue rupi kuña parawete umano wi,” jei reta.

<sup>23</sup>“Jayawe añetete yawe umanokue wae reta ikowe yeta, ¿kía nunga wae jembirekorä pa ikota jokua kuña jae reta ikowe ye yawe? Echa’ä opaete chiu rewe umenda jae ndiwe.” Jukuärái jei saduceo reta Jesús pe.

<sup>24</sup>Jayawe Jesús jei chupe reta: “Pe reta pikuaa’ä Tumpa iñee uyekuatía oï wae, jare pikuaa’ä etei wi kërái ko Tumpa imbaepuere wae. Jáeramo piyawí ko piyemingeta umanokue wae reta rewa.

<sup>25</sup>Echa’ä jokua ara umanokue wae reta ikowe ye yawe, ndarau ye ma umenda reta. Echa’ä yurekota araiwa reta yureko wae rami,” jei chupe reta.

<sup>26</sup>“¿Pemingeta’ä yerá Moisés arakae uikuatía wae? Joko pe jei simi umanokue wae reta ikowe yeta wae rewa,” jei. “Echa’ä uyekuatía oï kërái Tumpa jei yái jendi wae wi Moisés pe wae. Jei chupe: ‘Che ko jae nderamikue reta Abraham, Isaac, jare Jacob i Tumpa.’ Jukuärái Tumpa jei Moisés pe yepe tēi Moisés tamikue reta arakaete ye ma opa umano,” jei.

<sup>27</sup>“Añetete umanokue wae reta mbaeti yawe onoi tekowe, jayawe Tumpa ndarau jei tēi jae ko jae reta i Tumpa wae, echa’ä jae ko ime tekowe onoi wae reta i Tumpa,” jei. “Jayawe kua uikuaaka yandewe yanderamikue reta imeño yepe tekowe onoi. Pe reta tuicha ko piyawí pei,” jei Jesús saduceo reta pe.

### **Jesús oporomboe Tumpa mbae jei wae ikawiete ye wae rewa**

*(Mateo 22.34-40)*

<sup>28</sup>Jayawe saduceo reta uyeaka Jesús ndiwe rambuwe, ou uwäe pëti kuimbae Moisés uikuatía wae re oporomboe wae. Jae uyandu kërái Jesús umimbeu kawi chupe reta. Jayawe jae upirandu Jesús pe: “Opaete mbaembae Tumpa jei yandewe wae wi, ¿mbae nunga pa ko jae ikawiete ye wae yayapo waerä?” jei chupe.

<sup>29</sup>Jayawe Jesús jei chupe: “Jae ko kua: ‘Israel iñemoñaeta, piyapisaka kawi kua re. YandeYa Tumpa ko jae jaeño Tumpa wae.

<sup>30</sup>Peau yandeYa Tumpa pepia rewe, pekirëi rewe, pepiayemingeta rewe, jare añetete rewe.’ Jokua ko jae ikawiete ye wae ndiyapo waerä,” jei chupe.

<sup>31</sup>“Jare jaikue rupiwa jae ko kua: ‘Peau perapicha kërái pe reta etei piyerau wae rami.’ Opaete mbaembae Tumpa jei wae wi, mbaeti iru ikawiete ye wae kua reta wi,” jei Jesús chupe.

<sup>32</sup>Jayawe kuimbae jei Jesús pe: “Jaekawi ndiyemingeta, oporomboe wae,” jei chupe. “Nde ndere añetete wae, ime pëtiño Tumpa wae jare mbaeti ye ambie wae,” jei.

<sup>33</sup>“Jare imeta ko yaau Tumpa yandepia rewe, yandepiyemingeta rewe, jare añetete rewe. Jare imeta ko yaau wi yanderapicha kërái yande reta etei yayerau wae rami,” jei. “Jokua ko ikawiete ye opaete mbaemimba reta yaraa yayuka ñamee Tumpa pewarä wae wi,” jei Jesús pe.

<sup>34</sup>Jayawe Jesús uyandu yawe kuimbae arakuaa katu rewe uyemingeta oï wae, jei chupe: “Nde ndikuaa kawi neï. Jeta’ä uata oï ndewe Tumpa iko waerä nemburuwicha wasurä,” jei chupe. Jare joko wiwe kiawe uipota’ä ye ma upirandu Jesús pe mbae re awe, echa’ä aramoi ipuere uñemimaraka reta.

### **Upuruepi wae David ñemoña pewaño’ä ko**

*(Mateo 22.41-46; Lucas 20.41-44)*

<sup>35</sup>Jayawe Jesús jei tupao wasu joka pe ñonoï wae reta pe: “Moisés uikuatía wae re oporomböe wae reta jei Cristo yae chupe wae jae ko David ñemoña pewaño. Erëi, ¿kërái ra jokua?”

<sup>36</sup>Echa’ä David etei uikuatía arakaete Espíritu Santo imbaepuere rupi kuärái: ‘Tumpa ikoño mái wae jei cheYa pe kuärái: ‘Ewapi kua cheakata koti, nderowaicho reta opa añonoka rewa itawa re nderowai,’ jei Tumpa.’ Jukuärái David uikuatía arakaete rupi kërái Cristo jae’ä ko kuimbaeño. Jae ko iYa wi.

<sup>37</sup>Jayawe David etei jei chupe yawe, ‘CheYa,’ ¿këraita pa jayawe Cristo ipuere iko David ñemoña pewaño?” jei Jesús chupe reta. Jare joko pe ñonoï wae reta uyapisaka Jesús re uyerowia rewe.

### **Jesús umbijeko Moisés uikuatía wae re oporomböe wae reta**

*(Mateo 23.1-7; Lucas 20.45-47)*

<sup>38</sup>Jayawe Jesús umbipi oporomböe ye, jare jei joko pe ñonoï wae reta pe kuärái: “Piyandareko kawi piyé Moisés uikuatía wae re oporomböe wae reta wi,” jei chupe reta. “Echa’ä jae reta jekuaeño uipota uyepiuka waerä ñu wae reta pe. Jáeramo jekuaeño uyemonde kawi reta uychaka waerä jae reta ko jae tenondewa reta,” jei. “Jare jae reta uwata ñonoï mercado rupi yawe, jekuaeño uipota ñu wae reta umbisaluda waerä uipiü chuwi rewe,” jei.

<sup>39</sup>“Jare yuraa reta yawe tupao pe, jae reta uipotaete uwapi tenda tenondewa ikawiete wae pe. Jare jukuärái uyapo reta wi uparea chupe reta yawe,” jei.

<sup>40</sup>“Jare jae reta puku uyerure reta Tumpa pe opaete wae umae waerä tõi jese reta jupi ko ñonoï Tumpa ndiwe wae. Erëi jae reta tawi rupi upiü kuña ime umano chuwi wae reta wi imbaembae. Jáeramo täta rupi Tumpa uiporarakata oï chupe reta,” jei Jesús chupe reta.

### **Pëti kuña ime umano wae opa umee ikorepoti Tumpa pe**

*(Lucas 21.1-4)*

<sup>41</sup>Jare kaaru katu ma yawe, Jesús uwapi iko tupao wasu joka pe, korepoti Tumpa pewarä uñemee wae jiru jowai. Jare uecha jeta yuweru wae reta oñono ñonoï

korepoti jiru pe. Jeta jae reta ikokatu wae reta ko, jare oñono reta jeta korepoti jiru pe.

<sup>42</sup>Erëi ou wi pëti kuña iparawete mii wae ime umano wae. Kua kuña jaeño oñono mokui korepoti mii. Jokua jeta'ä ko mbae yawa pipe waerä.

<sup>43</sup>Jayawe Jesús ueni jemimboe reta jare jei chupe reta: “Che tae pewe añetete wae, pea kuña iparawete mii wae ime umano wae umee jetaete ye ñru wae reta wi Tumpa jowai,” jei.

<sup>44</sup>“Echa'ä ñru wae reta ueru umee jembire chupe wae wi. Erëi pea kuña, yepe tēi iparawete, erëi jembiorä owata tēi iko pipe wae opaetei umee Tumpa pewarä,” jei Jesús chupe reta.

## Marcos 13

### Jesús umimbeu tupao wasu opata uiti wae rewa

(Mateo 24.1-2; Lucas 21.5-6)

<sup>1</sup>Jayawe Jesús oë oo tupao wasu joka wi. Jare oë oo iko rambuewe, pëti wae jemimboe jei chupe: “Oporomboe wae, mase. Kua tupao wasu iiwambi, ¡tuichaete kua ita reta! Jare ¡ipöraete ko kua tupao wasu joka rupi o rai reta!” jei chupe.

<sup>2</sup>Jayawe Jesús jei chupe: “Tuicha jare ipöra tēi ñonoï reta,” jei. “Erëi jeseuwe outa uwäe oï ara opa uiti reta waerä. Jare jokua ara ndarau pëti awe ita upita ñru ita iáramo,” jei chupe.

### Jesús oporomboe mbaesusere reta uyeyapota oï wae rewa

(Mateo 24.3-28; Lucas 21.7-24)

<sup>3</sup>Jayawe Jesús jare jemimboe reta ndiwe yuraa uyupi reta ñaipe Olivorenda jee wae re tupao wasu jowai, jare joko pe Jesús uwapi. Jayawe Pedro, Jacobo, Juan, jare Andrés upirandu chupe jae retaño jae ndiwe ñonoï yawe, jare jei reta:

<sup>4</sup>“Emimbeu mii orewe, ¿kërái yawe etei ra uasata kua mbaesusere tupao wasu rewa? Jare opaete kua uyeyapota ma oï yawe, ¿këraita pa nduikuaa?” jei reta chupe.

<sup>5</sup>Jayawe Jesús jei chupe reta: “Piyandareko kawi piyé kuri awiye waerä kiawe pemitawi,” jei chupe reta.

<sup>6</sup>“Echa'ä outa jeta cheree pe uyembijeeraanga wae reta. Jare jeita tēi reta: ‘Che ko jae Cristo.’ Jare umbitawita jeta wae reta,” jei.

<sup>7</sup>“Jare imeta oï ñeräro reta koiño pewi. Jae nunga wi imeta oï ñeräro reta mbiri pewi. Erëi piyandu yawe kua reta rewa, awiye pekiye. Echa'ä kua mbaesusere reta uyeyapo ñotái ko. Erëi ndei witeño ko ara reta opa waerä,” jei.

<sup>8</sup>“Echa'ä jeta iwi pewa reta uñerärota ambie iwi pewa reta ndiwe, jare jeta mburuwicha reta uñerärota ambie mburuwicha reta ndiwe,” jei chupe reta. “Jare imeta jeta iwikäta reta kerupi rupi. Jare imeta wi karuái reta. Jare jokua mbaesusere reta jaeño ko uyembipi wae. Kuña umbipi imembirasi oï wae rami ko jokua

mbaesusere reta. Echa'ä imeñota jeta mbaesusere reta uyeyapo waerä," jei chupe reta.

<sup>9</sup>“Erëi pe reta piyandareko kawi piyé. Echa'ä pepisita reta jare pemeeta reta mburuwicha reta pe uñeapo waerä peré,” jei. “Jare jae reta penupata itupao reta pe. Jare pemiymboita oï reta kuri mburuwicha jare mburuwicha wasu reta jowai cheré perowia ramo,” jei. “Erëi jokoropi jëwata pewe pemimbeu kawi waerä chupe reta che rewa.

<sup>10</sup>Echa'ä Tumpa iñee ikawi wae jeräkua ranita ko opaete iwï reta kerupi oï wae rupi ndei iwï iyapï mbowe,” jei chupe reta.

<sup>11</sup>“Jare ñru wae reta pereraa yawe pemee waerä mburuwicha reta pe, awiye piyembipia'ä mbae pere waerä. Echa'ä jokua ora etei Tumpa uikuaakata oï pewe mbae pere waerä. Jokuaño pere kuri, echa'ä Espiritu Santo etei pemborita oï piyemingeta waerä. Pe retaiño'ä ko piyemingetata peï,” jei chupe reta.

<sup>12</sup>“Jokua ara reta rupi imeta tikei reta umee tiwï reta uyukaka waerä, tiwï reta wirowia cheré ramo. Jae nunga wi imeta tu reta umee isambiai reta. Jare jae nunga wi imeta sambiai reta oyowaicho tu jare ichi koti uyukaka reta waerä,” jei.

<sup>13</sup>“Jare cheré perowia ramo, opaete seri peamitáata. Erëi ipotawe kía umiawäta cheré wirowia rewe wae, Tumpa uepita oï kuri,” jei chupe reta.

<sup>14</sup>“Jare pe reta pechata peï mbae ikawi mbaete wae – jae ko upururükumewa wae uyemboi oï kiapé oïta'ä tēi wae pe. Jokua ko jae tupao wasu pe. Jukuärái arakae Tumpa iñee umimbeu wae Daniel jei uyekuaata ko,” jei. (Jare kua umingeta wae tuikuaa kawi mbae uipota jei wae.) “Jayawe jokua pecha yawe, kua iwï Judea pe ñonoï wae reta tosi iwïtu wasu reta koti,” jei.

<sup>15</sup>“Jare jëta joka pe oï wae tosi woi joko wi oyepe waerä. Awiye awe tuike jëta pe wiraa waerä imbaembae.

<sup>16</sup>Jare iko pe uparawiki oï wae tosi woi wi. Awiye awe tou ye jëta pe wiraa waerä iñepëwaka yepe,” jei chupe reta.

<sup>17</sup>“¡Ikuasita parawete kuña ipurúa wae reta jare imembi umbikambu ñonoï wae reta jokua ara reta rupi!” jei.

<sup>18</sup>“Piyerure Tumpa pe awiye waerä uyeyapo kua mbaembae ara roi rupi, echa'ä jukuärái yawe, yawaita pewe pesi waerä,” jei chupe reta.

<sup>19</sup>“Jokua ara reta rupi uiporaraeteta ñonoï reta. Mbaetiï uiporara reta jukuärái Tumpa iwï uyapo wiwe, jare ndarau ye uiporara reta jukuärái,” jei.

<sup>20</sup>“Jare Tumpa jei'ä yawe awiye uiporara reta waerä ima rupi, ndarau etei upita kiawe jekowe rewe jokua ara reta opa rewa. Erëi Tumpa uiparareko jae uiparawo wae reta ramo, jae jei ma awiye uiporara reta waerä ima,” jei chupe reta.

21“Aranoi jokua ara reta rupi kía jeita pewe, ‘Mase, ko oï Cristo.’ Jare aranoi kía jeita pewe wi, ‘Mase, pee oï Cristo,’ jeita pewe. Jukuärái jei reta yawe, awiye perowia,” jei.

22“Echa’ä imeta upurumbitawi wae reta jei, ‘Che ko jae Cristo,’ jare imeta wi ïru upurumbitawi wae reta jei, ‘Tumpa chembou amimbeu waerä ñee chuwi etei ou wae.’ Jukuärái jeita tēi reta. Jare jae reta uyapota mbaembae tuicha wae kuimbae retaño ipuere’ä uyapo wae. Jare jokua mbaembae rupi jae reta uipotata tēi wi umbitawi Tumpa uiparawo wae retawe,” jei.

23“Jayawe piyandareko kawi piyé kuri. Aikuaaka aï pewe opaete uyeyapota oï wae ndei uyeyapo mbowe pe reta pikuaa peï waerä,” jei Jesús jemimboe reta pe.

### **Kuimbaerä uyeyapo wae ou yeta oï**

*(Mateo 24.29-51; Lucas 21.25-36)*

24Jare Jesús jei wi chupe reta: “Jayawe opa ma uasa jokua ara reta täta rupi uiporara reta yawe, warasi uñemipitumimbata oï, jare yasi ndarau ma jembipe.

25Yasitata reta oata ara wi, jare opaete ara re oï wae reta uñemitimota,” jei chupe reta.

26“Jayawe che kuimbaerä ayeyapo wae, iwi pewa reta cherechata ayu ye aï amapïtu re chembaepuere jembipete rewe,” jei.

27“Jare amondota araiwa reta umbati waerä che aiparawo wae reta opaete kerupi rupi wi – jae ko iwi pe ñonoï wae reta jare ara pe ma ñonoï wae reta wi,” jei chupe reta.

28“Yandepuere yambijaanga jokua ara ayu yeta wae pēti iwa re. Echa’ä iwa joki ye ma yawe, yaikuaa ñaï koiño ma ko oï ama oki waerä,” jei.

29“Jae ramiño wi pe reta pecha yawe uasa oï kua mbaembae amimbeu aï pewe wae, pikuaata ko peï ima’ä ma uata ayu ye waerä,” jei chupe reta.

30“Che tae pewe añetete wae, kua iwi pe yureko wae reta ndarau opa umano opaete kua mbaembae reta ndei opa uyeyapo mbowe,” jei.

31“Pepuere pikuaa kua ñee che jae aï pewe wae añetete ko. Echa’ä yepe tēi ara jare iwi opata ko, erēi chiñee ndaraúi opa,” jei chupe reta.

32“Erēi mbaetita kiawe uikuaa kērái yawe etei ra che ayu yeta wae. Jaeño cheRu uikuaa oï jokua,” jei. “Araiwa retawe uikuaa’ä. Jare yepe tēi che ko jae Tumpa Tai, erēi che awe aikuaa’ä wi,” jei.

33“Jayawe piyeyapikatu peï, jare piyandareko wi piyé, jare piyerure wi Tumpa pe. Echa’ä pikuaa’ä kērái yawe etei ra che ayu yeta wae,” jei chupe reta.

34“Yandepuere yambijaanga jokua ara ayu yeta wae pēti kuimbae ikokatu wae oota ambie iwi pe wae re,” jei. “Oota ma jēta wi yawe, kuimbae ueya uyeyokui chupe wae reta ipo pe uyandareko kawi waerä jēta re, jare ueya wi pēti pēti pe iparawikirä. Jare oyokui öke järoa umae kawi waerä jendawe pe,” jei.



35-36“Kërái jokua uyeyokui wae reta uikuaa’ä kërái yawe ra tēta iya ou yeta uwäe wae, jukuärái wi pe reta pikuaa’ä kërái yawe ra che ayu yeta wae. Aramoi ayu yeta awäe pītuipi yawe, ani piare mbīte rupi, ani ndei kōe mbowe, ani ndimbowe yawe,” jei. “Jáeramo jekuaeño pemaie kawi awiye waerä aramoiño che ayu ye awäe yawe, puipokou piyeyapikatu mbae rewe, pēti öke jāroa oke oī wae rami,” jei.

37“Jare kua jae pewe wae, tae wi opaete wae pe: Pemaie kawi che ayu ye rewa.” Jukuärái jei Jesús jemimboe reta pe.

## Marcos 14

### Judío itenondewa reta uyemboemboe uyukaka waerä Jesús

(Mateo 26.1-5; Lucas 22.1-2; Juan 11.45-53)

<sup>1</sup>Mokui araño ma uata iko uwäe waerä pascua ara jare uyembipi waerä yemimandúa mbiyape levadura mbae pewa jei chupe reta wae. Jare sacerdote itenondewa reta jare Moisés uikuatía wae re oporomboe wae reta ueka yureko kërái ipuere waerä uipisika tawi rupi Jesús uyukaka reta waerä.

<sup>2</sup>Jei reta iyupe: “Erēi awiye yaipisika kua pascua ara rupi, awiye waerä tēta wasu pewa reta uyembopochi yandekoti,” jei reta iyupe.

### Pēti kuña upiyere mbae utimbo kawi wae Jesús re

(Mateo 26.6-13; Juan 12.1-8)

<sup>3</sup>Ime iko tēta wasu rai Betania pe pēti kuimbae Simón jee wae tenonde yawe ipire okuise wae. Kua kuimbae uparea Jesús jare jemimboe reta pe yuweru ukaru waerä jae jēta pe. Jayawe ukaru yureko reta rambuewe, uike ou pēti kuña mbae jiru rai rewe. Jokua mbae jiru rai tinee oī mbae utimbo kawi wae, jepiete wae ko, nardo jee wae. Jayawe kuña oyoka mbae jiru rai jare opa upiyere mbae utimbo kawi wae Jesús iñäka re.

<sup>4</sup>Jare amokue joko pe ñonoī wae reta iarasi jokua re. Jei reta iyupe: “¿Maera pa opa upiyere iyuwī kua mbae utimbo kawi wae?”

<sup>5</sup>Jokua jepi ko mbapi chiēto ara uasa mii mbarawiki. Jae ipuereta tēi owaka, jare jokua korepoti pipe omborita tēi iparawete wae reta,” jei reta. Jayawe uñeengata reta kuña pe.

<sup>6</sup>Jayawe Jesús jei chupe reta: “Awiye mbae pere chupe,” jei. “Pemaieño jese, echa’ä jae uyapo ma mbae ikawi wae chemaerä,” jei.

<sup>7</sup>“Iparawete wae reta jekuaeñota yureko pepite rupi, jare pepuere pembori ipotawe ara rupi. Erēi che ndarau aiko jekuaeño pepite pe kuärái,” jei chupe reta.

<sup>8</sup>“Kua kuña upiyere ma cheré kua mbae utimbo kawi wae, jare jukuärái uyapo ma chemaerä jae ipuere wae rupi. Añawe uyapikatu ma cherete teöwerenda pewarä ndei amano mbowe,” jei.

<sup>9</sup>“Che tae pewe añetete wae, opaete iwí rupi Tumpa iñee ikawi wae uyemimbeu wae rupi, uyemimbeuta wi kua kuña uyapo wae iiru wae reta imandúa waerä jese,” jei Jesús chupe reta.

### **Judas ipiayemingeta umee waerä Jesús jowaicho reta pe**

*(Mateo 26.14-16; Lucas 22.3-6)*

<sup>10</sup>Jayawe pëti Jesús jemimboe doce wae wi, Judas Iscariote jee wae, oë wíari oo sacerdote itenondewa reta ñonoí wae pe. Echa’ä Judas uipota uyemingeta jae reta ndiwe uikuaa waerä kërái rupi ipuere ombori uipisi reta waerä Jesús.

<sup>11</sup>Jayawe jae reta uyandu yawe mbae Judas jei wae re, uyerowia reta, jare upita reta umee waerä korepoti Judas pe. Jayawe Judas umbipi ueka kërái ipuere waerä umee chupe reta Jesús.

### **Jesús jou tembiu pascua pewa**

*(Mateo 26.17-30; Lucas 22.7-23; Juan 13.21-30)*

<sup>12</sup>Jayawe uwäe ara tenondewa yemimandúa mbiyape levadura mbae pewa jei chupe reta wae. Jare jokua ara judío reta uyukañoi owecha pascua pewa. Jayawe Jesús jemimboe reta upirandu chupe: “¿Kiape pa ndipota nduyapo waerä yandewe tembiu pascua pewa?” jei reta chupe.

<sup>13</sup>Jayawe Jesús omondo mokui jemimboe reta tëta wasu Jerusalén pe, jare jei chupe reta: “Peo pewäe tëta wasu pe yawe, pëti kuimbae i wíraa oí wae outa perowäiti oí kuri,” jei chupe reta. “Peota jaikue jae oo uwäe tëta pe rewa.

<sup>14</sup>Joko pe pereta tëta iya pe: ‘Oporomboe wae upirandu oí kiape ra ime oí o jae jou waerä tembiu pascua pewa jemimboe reta ndiwe,’ pere chupe,” jei.

<sup>15</sup>“Jayawe tëta iya uechakata oí pewe pëti o tuicha wae jae joo iwate oí wae, opaete mbaembae yaiporuta ñaí wae rewe. Jare joko pe piyapikatuta yandewe yakaru waerä kuri,” jei Jesús chupe reta.

<sup>16</sup>Jayawe Jesús jemimboe reta yuraa uwäe yawe tëta wasu pe, uyeyapo opaete Jesús jei chupe reta wae rupi etei. Jare uyapo reta tembiu pascua pewa joko pe.

<sup>17</sup>Jare pïtu ma oí yawe, Jesús ou uwäe jokua doce jemimboe reta ndiwe.

<sup>18</sup>Jare ukaru yureko reta rambuwe mesa pe, Jesús jei chupe reta: “Che tae pewe añetete wae, pëti yandepite pe ukaru oí yande ndiwe wae chemeeta oí cherowaicho reta pe,” jei chupe reta.

<sup>19</sup>Jayawe jokua uyandu reta yawe, Jesús jemimboe reta ipiatiti. Jare pëti pëti wae umbipi upirandu chupe: “¿Che ra ko jae?” jei reta.

<sup>20</sup>Jare Jesús jei chupe reta: “Pëti pepite pe oí wae ko jae. Mbiyape che ndiwe umäki oí karúa pe wae ko jae,” jei chupe reta.

<sup>21</sup>“Che kuimbaerä ayeyapo wae amano ñotái ko kërái Tumpa iñeeriru pe uyekuatía oí cheré wae rami. Erëi jokua kuimbae chemeeta oí wae uiporaraeteta ko. Ikawi tëi ko jokua kuimbae awiye etei oa waerä ichi wi,” jei chupe reta.

<sup>22</sup>Jare ndei opa ukaru reta mbowe, Jesús uipisi mbiyape jare umee yasurupái Tumpa pe jese. Joko wi upisaa jare umee jemimboe reta pe, jare jei chupe reta umbijaanga rewe: “Pipisi peu. Kua mbiyape ko jae cherete,” jei chupe reta.

<sup>23</sup>Jayawe Jesús uipisi wi copa, jare umee wi yasurupái jese, jare umee jemimboe reta pe. Jare opaete jae reta jou jokua copa wi.

<sup>24</sup>Jare Jesús jei wi chupe reta umbijaanga rewe: “Kua ko jae cheruwi uyepiyereta oï wae. Kua cheruwi pipe Tumpa uyapo oï pëti yemingeta ipiau wae jeta wae reta pewarä,” jei chupe reta.

<sup>25</sup>“Che tae pewe añetete wae, ndarau ye ma che jau uva tikue Tumpa oï rewa opaete wae imburuwicha wasurä jaeño mái pewa. Jokua ara ramo jau yeta aï kuri,” jei chupe reta.

<sup>26</sup>Jare opa ma ukaru reta yawe, ukäta reta pëti himno Tumpa pe. Jare joko wi oë yuraa reta ñaipe Olivorenda jee wae koti.

### **Jesús umimbeu Pedro pe uikuakuta oï wae**

*(Mateo 26.31-35; Lucas 22.31-34; Juan 13.36-38)*

<sup>27</sup>Jayawe yuraa yureko reta rambuewe, Jesús jei chupe reta: “Tumpa ñeeriru pe uyekuatía oï kuärái: ‘Ayukata owecha reta iyandarekoa, jare owecha reta opata uñemiái.’ Jukuärái uyekuatía oï cheré. Jare kua pïtu woi jokua uyeyapota oï, echa’ä pe reta opata chereya peï,” jei chupe reta.

<sup>28</sup>“Che amano ñotái aï. Erëitu Tumpa chembijekowe yeta chereru umanokue wae reta ipite wi. Jare aikowe ye ma yawe, che rani ata pewi iwï Galilea pe,” jei chupe reta.

<sup>29</sup>Jayawe Pedro jei Jesús pe: “Yepe tëi opaetei ñru wae reta ndereyata, erëi che ndarau etei ndueya,” jei chupe.

<sup>30</sup>Jayawe Jesús jei chupe: “Che tae ndewe añetete wae, kua pïtu woi, ndei mokui wese uru kuimbae uñee mbowe, mbapi wese ma nde chekuakuta neï kuri,” jei chupe.

<sup>31</sup>Erëitu Pedro jeiete jei chupe: “Yepe tëi aramoi amanota nde ndiwe, erëi che ndarau etei ndukuaku,” jei chupe. Jare jukuärái wi jei tëi opaete Jesús jemimboe reta.

### **Jesús oo Getsemaní pe uyerure waerä**

*(Mateo 26.36-46; Lucas 22.39-46)*

<sup>32</sup>Jayawe yuraa uwäe reta temiti reta jenda Getsemaní jee wae pe. Jare Jesús jei jemimboe reta pe: “Pewapi kua pe che a ayerure rambuewe Tumpa pe,” jei chupe reta.

<sup>33</sup>Jayawe joko wi Jesús wiraa Pedro, Jacobo, jare Juan ñru wae reta wi kuti katu mii. Jare jae umbipi ipiatiti ikuasi katu rewe.

<sup>34</sup>Jare jei jokua mbapi jemimboe reta pe: “Tuicha rupi chepiatiti ai jare amano pota echa. Pepita mii kua pe, jare awiye peke wi,” jei chupe reta.

<sup>35</sup>Jayawe Jesús usiri katu chuwi reta, jare uñeño ipitía re iwí re. Jae uipota tēi uasa waerā chuwi jokua uiporaraeteta iko wae ipuere yawe. Jáeramo uyerure Tu pe kuarái:<sup>36</sup>“CheRu mii, nde ndepuere ndiyapo opaete mbaembae. Embiasa mii chewi kua aiporarata ai wae. Erēi awiye tuyeyapo che jae waeño. Tuyeyapo chewe nde ndere wae,” jei.

<sup>37</sup>Joko wi Jesús ou ye jokua mbapi jemimboe reta ñonoí wae pe, jare uecha oke ñonoí reta. Jayawe jei Simón Pedro pe: “Simón, ¿ndeke yerá nei? ¿Ndepuere’á yerá pēti orawe yepe ndeke mbae nei?” jei chupe.

<sup>38</sup>Jare jei wi jemimboe reta pe: “Awiye peke. Piyerure Tumpa pe, echa’á jarei katu mii imeta penoi kirēi chereriro waerā. Jayawe piyerure Tumpa pe jokua re awiye waerā piñemiamirika jokua kirēi pe. Echa’á pepia pe peratangātu ko tēi, erēi perete ipirāta’á,” jei chupe reta.

<sup>39</sup>Jayawe Jesús usiri ye chuwi reta, jare oo uyerure ye Tu pe kērái tenonde uyerure wae rami.

<sup>40</sup>Jare joko wi jekuae ou ye jemimboe reta ñonoí wae pe. Jare uecha oke ñonoí reta ye, echa’á topei opa umiamiri reta ramo. Jare jae reta uikuaa’á mbae jei waerā Jesús pe.

<sup>41</sup>Jayawe Jesús usiri ye chuwi reta mbapi wesea ma. Jare ou ye yawe, jei chupe reta: “¿Jekuaeño yerá peke jare peputuu pei?” jei chupe reta. “Jokuaño ma. Uwāe ma ora. Che kuimbaerā ayeyapo wae, pēti wae chemee oí jeko kachi wae reta ipo pe,” jei.

<sup>42</sup>“Pepüa. Mase, chemee wae ko uwāe ma ou. Ya ñawāiti,” jei chupe reta.

### **Jesús jowaicho reta yuweru uipisi**

*(Mateo 26.47-56; Lucas 22.47-53; Juan 18.2-11)*

<sup>43</sup>Jare Jesús uyemingeta iko rambuewe, ou uwāe Judas. Jae ko Jesús jemimboe doce wae wi pēti. Jare yuweru wi jae ndiwe jeta wae reta mburuwicha reta ombou wae ikisepuku rewe jare iiwira rewe uipisi reta waerā Jesús. Jokua oporombou wae reta ko jae sacerdote itenondewa reta, jare Moisés uikuatía wae re oporombou wae reta, jare judío itenondewa reta.

<sup>44</sup>Judas umimbeu kawí ma yepe jokua iru kuimbae reta pe kērái jae reta ipuere waerā uikuaa kía nunga ra ko jae Jesús wae. Jei chupe reta: “Jokua jowa pe ayurupiteta ai wae ko jae. Pipisi kawí jare peraa,” jei chupe reta.

<sup>45</sup>Jayawe Judas ou uwāe yawe, ou woi jei Jesús pe: “Oporombou wae,” jei chupe. Jayawe uyurupite jowa pe.

<sup>46</sup>Jare jupiwoiño jokua iru kuimbae reta uipisi Jesús.

47Jare pëti wae Jesús ndiwe iko wae ueki ikisepuku jiru wi, jare uiporu sacerdote tenondewaete pe uyeyokui wae re, jare uyasía chuwi inambi.

48Jayawe Jesús jei yuweru wae reta pe: “¿Maera pa peyu kisepuku rewe jare iwira rewe chepisi waerä? ¿Jae yerá che imonda jeko kachi wae?” jei chupe reta.

49“Opa ara rupi che aporomböe aiko pepite rupi tupao wasu joka pe. ¿Maera pa joko pe chepisi'ä?” jei. “Erëi kua mbaembae uyeyapo ñotái ko kërái Tumpa ñneeriru pe uyekuatía oí wae rupi,” jei chupe reta.

50Jayawe opaete Jesús jemimboe reta ueya jare opa osi reta.

51Erëi imeño pëti kunumi taurusu wae uñepëwa oí pëti ñepëwaka pe. Jae oo iko Jesús jaikue rupi. Jare amokue joko pe ñonoí wae reta uipisi tëi.

52Erëi jae reta uipisi ñepëwaka pe yawe, taurusu wae omboi jare ueya kuimbae reta ipo pe. Jayawe oë osi nani etei joko wi.

### **Jesús uyemboi judío imburuwicha reta jowai**

*(Mateo 26.57-68; Lucas 22.54-55,63-71; Juan 18.12-14,19-24)*

53Jayawe wiraa reta Jesús sacerdote tenondewaete jëta pe. Joko pe uyembati opaete sacerdote itenondewa reta, Moisés uikuatía wae re oporomböe wae reta, jare judío itenondewa reta.

54Jare Jesús wiraa rambuewe, Pedro uyerowa oo ye jaikue. Erëitu mbirí katu mii upita chuwi. Jare uike oo sacerdote tenondewaete joka pe, jare oo uwapi sindaro tupao wasu iyandarekoa reta uyepee ñonoí wae pe.

55Jayawe sacerdote itenondewa reta jare opaete iru mburuwicha reta ueka yureko kërái uñeapo waerä Jesús re uyukaka reta waerä. Erëi ipuere'ä uwäe reta teko jese.

56Yepe tëi jeta wae reta umbijeko iyapu rewe, erëi uyemingeta'ä reta oyowake pëti ramiño.

57Jare amokue wae reta upüa jare umbijeko tëi iyapu rewe kuärái:

58“Ore nduyandu kua pochi jei, ‘Kua tupao wasu kuimbae retaño uyapo wae, che opata arukachi aï. Erëi mbapi ara rupi che amupüa yeta ambie tupao wasu kuimbae reta'ä uyapo wae,’ jei,” jei reta.

59Erëi yepe tëi jukuärái jei reta, jesewe mbaeti oyowake uyemingeta reta umbijeko reta waerä Jesús.

60Jayawe sacerdote tenondewaete upüa uyemboi uyembati wae reta jowai, jare upirandu Jesús pe: “¿Maera pa niñee nemoë'ä? ¿Maera pa nde ndere'ä mbae jae reta jei ndekoti wae re?” jei chupe.

61Erëi Jesús kíiño. Jei'ä mbae awe. Jayawe sacerdote tenondewaete upirandu ye chupe: “¿Nde pa ko jae Cristo yae chupe wae? ¿Nde pa ko jae Tumpa yambutuicha wae Tai?” jei chupe.

<sup>62</sup>“Jae ko che,” jei Jesús chupe. “Jare che kuimbaerä ayeyapo wae, pe reta etei cherechata pei kuri Tumpa opaetei mbaepuere onoi wae iyakata koti. Jare cherechata wi ayu ye yawe ara wi amapitu re,” jei chupe.

<sup>63</sup>Jayawe jokua uyandu yawe, sacerdote tenondewaete pochi pipei omdoro iyuwi jemimonde. Jare jei iru mburuwicha reta pe: “¿Maera ye pa yaekata iru wae reta uñeapo waerä jese?”

<sup>64</sup>Mase, pe reta etei piyandu ma kërái jae jei iyupe tēi Tumpa ko. ¿Mbae pa pere añawe? ¿Ime ra teko onoi, ani mbaeti ra?” jei chupe reta. Jayawe opaete jae reta jei: “Ime onoi teko. Jupi ko umano waerä,” jei reta.

<sup>65</sup>Jare amokue wae reta umbipi undiwi Jesús re. Jare uesañoma reta jare okua reta jese jei rewe: “Yaecha Tumpa tuikuaaka ndewe kía ra okua oí nderé wae,” jei reta chupe. Jare sindaro tupao wasu iyandarekoa reta wi okua jese.

### **Pedro uikuaku Jesús**

*(Mateo 26.69-75; Lucas 22.56-62; Juan 18.15-18,25-29)*

<sup>66</sup>Jayawe Pedro jekuaeño oka pe oí rambuwe, ou pēti kuñatái sacerdote tenondewaete pe uyeyokui wae.

<sup>67</sup>Jare uecha Pedro uyepēe oí. Jayawe kuñatái umae ngatu jese jare jei chupe: “Nde ndiko wi jokua Jesús Nazaret pewa ndiwe,” jei chupe.

<sup>68</sup>Erēi Pedro uikuaku jei rewe: “Aikuaa’ä jokua kuimbae, jare aikuaa’ä mbae re ra ndiyemingeta neí wae,” jei chupe. Jayawe Pedro upüa oo oka jöke koti. Jare uru kuimbae uñee.

<sup>69</sup>Jayawe kuñatái uecha ye, jare jei joko pe ñonoí wae reta pe: “Kua kuimbae, jae ko jokua Jesús iru,” jei chupe reta.

<sup>70</sup>Erēi Pedro uikuaku ye. Jare ndei ima mbowe amokue joko pe ñonoí wae reta jei ye Pedro pe: “Añetete nde wi ko jae Jesús ndiwe ndiko wae, echa’ä nde ko wi Galilea pewa,” jei reta chupe.

<sup>71</sup>Jayawe Pedro jei chupe reta: “Che tae pewe Tumpa jowake, ¡aikuaa’ä etei jokua kuimbae piyemingeta peí jese wae! Jare Tumpa tuiporarka chewe kua che jae wae añetete’ä yawe,” jei chupe reta.

<sup>72</sup>Jayawe jawoi pewa uru kuimbae uñee ye. Jare Pedro imandúa Jesús jei chupe wae re: “Ndei mokui wese uru kuimbae uñee mbowe, mbapi wese ma nde chekuakuta neí kuri,” jei chupe. Jayawe Pedro umbipi uyao parawete.

## **Marcos 15**

### **Wiraa reta Jesús mburuwicha Pilato jowai**

*(Mateo 27.1,2,11-14; Lucas 23.1-5; Juan 18.28-38)*

<sup>1</sup>Jayawe ndimboweasi ma yawe, sacerdote itenondewa reta, judío itenondewa reta, Moisés uikuatía wae re oporomoe wae reta, jare opaete iru mburuwicha reta

uyembati uyemboemboe reta waerä Jesús re. Jayawe uñapiti reta Jesús ipo rupi, jare wiraa reta mburuwicha romano Poncio Pilato jee wae jowai uyemboi waerä.

<sup>2</sup>Jayawe Pilato upirandu Jesús pe: “¿Nde pa ko jae judío reta imburuwicha wasu?” jei chupe. Jayawe Jesús jei chupe: “Nde ndere wae ko jae,” jei.

<sup>3</sup>Jare sacerdote itenondewa reta umbijeko yureko Jesús jeta mbaembae re, erëi Jesús jei’ä mbae awe.

<sup>4</sup>Jáeramo Pilato upirandu ye Jesús pe: “¿Maera pa niñee nemoë’ä? Mase, jeta mbaembae re nembijeko ñonoï,” jei chupe.

<sup>5</sup>Erëi Jesús jeseuwe mbaeti etei mbae jei. Jáeramo Pilato ipiakañi umae jese.

### **Pilato umee Jesús umano waerä**

*(Mateo 27.15-26; Lucas 23.13-25; Juan 18.39–19.16)*

<sup>6</sup>Opa año pascua ara rupi Pilato omoëkañoi peresoriru wi pëti pereso tëta wasu pewa reta uipota wae.

<sup>7</sup>Jare jokua año pe ime iko pëti kuimbae Barrabás jee wae peresoriru pe iiru upuruyuka wae reta ndiwe. Tenonde yawe jae reta ombowaicho mburuwicha romano koti, jare jukuärái uyuka reta amokue sindaro romano reta.

<sup>8</sup>Jayawe jeta wae reta umbipi ueka Pilato pe ombopoika waerä pëti pereso kërái jae uyapoñoi wae rami.

<sup>9</sup>Jayawe Pilato upirandu chupe reta: “Pe judiorä piko wae reta, ¿pipota pa ambopoika waerä pewe kua pemburuwicha wasu Jesús?” jei chupe reta.

<sup>10</sup>Pilato upirandu jukuärái, echa’ä jae uikuaa iko sacerdote itenondewa reta uñamitää ramoño ko ueru Jesús chupe.

<sup>11</sup>Jayawe sacerdote itenondewa reta omboemboe jokua uyembati wae reta kuärái: “Peka Pilato pe ombopoika waerä yandewe Barrabás. Awiye tombopoika Jesús,” jei chupe reta. Jayawe jukuärái uyapo reta.

<sup>12</sup>Jayawe Pilato upirandu ye chupe reta: “Ambopoika yawe Barrabás, ¿mbae pa pipota ayapo waerä pewe kua judío reta imburuwicha wasu pere chupe wae pe?” jei chupe reta.

<sup>13</sup>Jayawe jae reta usapikai rewe jei chupe: “¡Ikutuka kurusu re!” jei reta.

<sup>14</sup>Erëi Pilato upirandu ye chupe reta: “¿Marái ramo pipota umano waerä kua kuimbae? ¿Mbae ikawi mbae wae pa uyapo?” jei chupe reta. Jayawe jae reta jeiete usapikai rewe jei chupe: “¡Ikutuka kurusu re!”

<sup>15</sup>Jayawe Pilato ombopoika chupe reta Barrabás umbiyerowia reta waerä. Joko wi umbipiuka chikote pe Jesús. Jare umbipiuka ma yawe, umeeka sindaro reta pe uikutu reta waerä kurusu re.

### **Sindaro reta oyoyai Jesús**

*(Mateo 27.27-31; Juan 19.2,3)*

<sup>16</sup>Jayawe jokua sindaro reta wiraa rani Jesús mburuwicha joka tuicha wae pe, jare umbatika reta wi opaete iru sindaro reta.

<sup>17</sup>Joko wi jae reta umiñepëwa Jesús pëti ñepëwaka mborao wae pe mburuwicha wasu echa oyoyai reta waerä. Jare oñono reta Jesús iñäka re ñuräti uñeñopekue iñäkarewarä.

<sup>18</sup>Jare umbipi uipiuraanga chuwi reta, jare jeiraanga reta usapikakai rewe: “¡Tikoño mái kua judío reta imburuwicha wasu!” jei reta upuka rewe.

<sup>19</sup>Jare uiporu reta Jesús iñäka re iwira, jare undiwi reta jese wi. Jare uñeño no reta itawa re Jesús jowai uipiuraanga rewe.

<sup>20</sup>Jayawe ikueri ma oyoyai reta yawe, sindaro reta omboi ye chuwi ñepëwaka mborao wae jare omondeka ye chupe reta jemimondei. Jayawe wiraa reta mburuwicha wasu joka wi uikutu reta waerä kurusu re.

### **Uikutu reta Jesús kurusu re**

*(Mateo 27.32-44; Lucas 23.26-43; Juan 19.17-27)*

<sup>21</sup>Jare yuraa yureko reta rambuewe, owäiti reta pëti kuimbae Simón jee wae uwäe ma ou oi tëta wasu pe. Kua kuimbae tëta wasu Cirene pewa ko, jare jae ko Alejandro jare Rufo jee wae tu. Jayawe sindaro reta wiraaka chupe Jesús ikurusu.

<sup>22</sup>Jare wiraa reta Jesús tëta wasu oka pe Gólgota jee wae pe. (Kua ñee Gólgota uipota jei judío reta ñee pe, “Äkakerenda.”)

<sup>23</sup>Jare joko pe umee tëi jou reta Jesús vino uyea mirra ndiwe wae. Erëi Jesús uipota’ä jou.

<sup>24</sup>Jayawe sindaro reta uikutu kurusu re Jesús, jare umbiyemboi reta oñono kurusu. Joko wi uyuwari reta Jesús jemimonde re, pëti pëti wae uikuaa waerä mbae nunga wiraata iyupe wae. Jukuärái umbiyao iyupe reta Jesús jemimonde.

<sup>25</sup>Uikutu reta Jesús kurusu re ndimbowe yawe ora chau pe.

<sup>26</sup>Jare oñono reta kurusu re wi iwira ipe wae Jesús iñäka iáramo. Jare uyekuatía iko jese umbijeko wae kuärái: “JUDÍO RETA IMBURUWICHA WASU.”

<sup>27</sup>Jare uikutu reta wi mokui kuimbae imonda wae reta Jesús iyikeyike pe, pëti pëti ikurusu rei.

<sup>28</sup>Jayawe uyeyapo ma kërái Tumpa iñeeriru pe uyekuatía oi wae rupi. Echa’ä uyekuatía oi Upuruepi wae re kuärái: “Jeta wae reta umae jese pëti jeko kachi wae rami.” Jukuärái uyekuatía oi.

<sup>29</sup>Jare jokoropi uasa wae reta uñeäkambiwawa rewe jei reta ikawi mbae wae Jesús pe. “¡Aaa!” jei reta. “Nde ndere tëi: ‘Opata arukachi tupao wasu jare amupüa yeta mbapi ara pe,’ ndere.

<sup>30</sup>Jukuärái ndepuere ndiyapo yawe, añawe iyerepi jare eweyi kurusu wi,” jei reta Jesús pe.



<sup>31</sup>Jae ramiño wi sacerdote itenondewa reta jare Moisés uikuatía wae re oporomboe wae reta jei iyupe oyoyai rewe: “Jae ndaye uepi ñru wae reta, erëi ipuere’ä uyerepi jae.

<sup>32</sup>Jae ñnereni tõi Cristo yae chupe wae jare yanemburuwicha wasurä. Jukuärái yawe, yaecha tuweyi añawe kurusu wi yarowia waerä jese.” Jukuärái jei reta oyoyai rewe Jesús koti. Jae nunga wi jokua mokui kuimbae uyekutu ñonoï kurusu re Jesús iyikeyike pe wae jei reta wi mbae kachi Jesús pe.

### **Jesús umano kurusu re**

*(Mateo 27.45-56; Lucas 23.44-49; Juan 19.28-30)*

<sup>33</sup>Jayawe ara mbite wiwe ñnemipitumimbi mbapi ora rupi opaete jokua iwi rupi.

<sup>34</sup>Jare mbapi ora ma kaaru yawe, Jesús usapikai rewe jei: “Eloi, Eloi, ¿lama sabactani?” (Kua uipota jei judío reta ñnee pe, “CheTumpa, cheTumpa, ¿maera pa chereya?”)

<sup>35</sup>Kua uyandu reta yawe, amokue joko pe ñonoï wae reta jei tõi: “Mase, Elías ueni oï,” jei reta.

<sup>36</sup>Jayawe pëti wae osi oo umäki esponja vino uasakue pipe, jare oñono takuaräsi iyapi re, jare omondo oñono Jesús iyuru re jou waerä. Jare jae jei: “Ñäaro. Yaecha aramoï outa Elías umbiweyi waerä,” jei.

<sup>37</sup>Jayawe Jesús usapikai täta jare umano.

<sup>38</sup>Jare aramoïño puyu tupao wasu joo umbiyao pipe wae osoro mbite rupi iwate wi iwi koti.

<sup>39</sup>Jare Jesús ikurusu jowai uyemboï oï sindaro reta itenondewa. Jae uecha yawe kërái Jesús usapikai jare umano, jei: “Añetete yepe kua kuimbae ko jae Tumpa Tai,” jei.

<sup>40</sup>Jare mbiri katu wi umae ñonoï amokue kuña reta. Jare jae reta ipite pe ñonoï María Magdalena, Salomé, jare María (kua María imembi reta ko jae Jacobo taurusu wae jare José).

<sup>41</sup>Jesús ikose yawe Galilea pe, kua kuña reta yuraa jae ndiwe ombori reta waerä. Jare jeta ñru kuña reta joko pe ñonoï wi. Kua reta wi yuweru Jerusalén pe Jesús ndiwe.

### **Oñono reta Jesús jetekue teöwerenda pe**

*(Mateo 27.57-61; Lucas 23.50-56; Juan 19.38-42)*

<sup>42</sup>Jokua ara opaete judío reta uyeyapikatu yureko piarewe pewarä, echa’ä piarewe ko jae mbutuu ara. Jáeramo ndei warasi uike mbowe,

<sup>43</sup>pëti kuimbae tëta wasu Arimatea pewa, José jee wae, ñnemiatangäto oo Pilato oï wae pe ueka waerä chupe Jesús jetekue. José ko jae pëti wae judío reta itenondewa, jare opaete wae reta uipiu chuwi. Jae uäro iko ikirëi rewe Tumpa oï waerä opaete wae imburuwicha wasurä jaeño mái pewa.

<sup>44</sup>Jayawe Pilato uikuaa yawe Jesús umano ma ko, ipiakañi, echa'ä imambae umano ramo. Jayawe uenika sindaro reta itenondewa jare upirandu chupe: “¿Añetete pa umano ma Jesús?” jei chupe.

<sup>45</sup>Jayawe sindaro jei chupe: “Jukuärái ko. Umano ma,” jei chupe. Jayawe Pilato umaño José re wiraa waerä Jesús jetekue.

<sup>46</sup>Jayawe José oo owa nieso. Jare umbiweyi ma yawe Jesús jetekue kurusu wi, oñoma nieso pe. Joko wi wiraa oñono pëti teöwerenda itape uyeyoo wae pe, jare umbiyapayere ita tuicha wae uyukenda waerä teöwerenda jöke.

<sup>47</sup>Jare María Magdalena jare José ichi María jee wae umae yureko jare uecha kiape Jesús jetekue oñono wae.

## Marcos 16

### Jesús ikowe ye ou umanokue wae reta ipite wi

(Mateo 28.1-10; Lucas 24.1-12; Juan 20.1-10)

<sup>1</sup>Jayawe mbutuu ara uasa ma yawe, María Magdalena, Jacobo ichi María jee wae, jare Salomé owa reta mbaembae utimbo kawi wae ipuere waerä uipichi reta tēi pipe Jesús jetekue.

<sup>2</sup>Jare domingo ndimboweasi warasi oë ma yawe, jokuu mbapi kuña reta yuraa teöwerenda koti.

<sup>3</sup>Jare yuraa yureko reta rambuewe, jei reta iyupe: “¿Kía ra umbisirita yandewe jokuu ita tuicha wae yandepuere waerä yaike teöwerenda japipe?” jei reta.

<sup>4</sup>Erëi joko pe yuraa ma uwäe reta yawe, uecha reta jokuu ita tuicha wae uyembisiri ma oï joko wi.

<sup>5</sup>Jayawe uike yuraa reta teöwerenda japipe, jare uecha reta pëti kunumi uwapi oï iyakata koti. Jae jemimonde puku jare tii. Jayawe kuña reta opa ukiye.

<sup>6</sup>Jayawe kunumi jei chupe reta: “Awiye pekiye,” jei. “Aikuaa pe reta peka pei Jesús Nazaret pewa umano kurusu re wae. Jae ikowe ye ma ou umanokue wae reta ipite wi. Mbaeti ma kua pe oï. Mase, pemaie jendakue re,” jei chupe reta.

<sup>7</sup>“Añawe pekua pere jemimboe reta pe jare Pedro pe kuärái: ‘Jesús oota oï tenonde pewi iwi Galilea pe. Joko pe peowaitita pei kuri kërái jae jei pewe wae rami.’ Jukuärái pere chupe reta,” jei kunumi kuña reta pe.

<sup>8</sup>Jayawe uriri rewe jare ipiakañi rewe kuña reta opa oë osi yuraa ye teöwerenda wi. Erëi umimbeu'ä kía pe awe ukiye reta ramo.

### María Magdalena uecha Jesús

(Juan 20.11-18)

<sup>9</sup>Jesús ikowe ye ou umanokue wae reta ipite wi domingo ndimboweasi. Jare uyechaka tenondete María Magdalena pe. Tenonde yawe Jesús omoë chiu aña reta

kua kuña wi.<sup>10</sup>Jayawe María uecha ma yawe Jesús, oo umimbeu tēi Jesús jemimboe reta pe. Jae reta ipiatiti jare uyao yureko Jesús umano ramo.

<sup>11</sup>Jare María jei tēi chupe reta: “;Jesús ikowe ye ma oī! Aecha ma,” jei tēi chupe reta. Erēi jae reta wirowia’ä María jei wae re.

### **Mokui jemimboe reta uecha Jesús**

*(Lucas 24.13-35)*

<sup>12</sup>Kua jaikue rupi Jesús uyembiambie uyechaka waerä mokui jemimboe reta pe, jae reta yuraa yureko rambuewe tēta mbae koti.

<sup>13</sup>Jare Jesús oo ye ma chuwi reta yawe, jokua mokui wae yuraa ye reta tēta wasu koti umimbeu waerä tēi iru reta pe. Erēi jae reta jei wae re awe wirowia’ä reta.

### **Jesús uyechaka once jemimboe reta pe**

*(Mateo 28.16-20; Lucas 24.36-49; Juan 20.19-23)*

<sup>14</sup>Kua jaikue rupi Jesús uyechaka once jemimboe tenondewaete reta pe etei jae reta ukaru yureko rambuewe. Jare umbieta chupe reta, echa’ä jae reta ipiatäta ramo. Echa’ä iru wae reta uecha Jesús ikowe ye ou umanokue wae reta ipite wi, jare umimbeu tēi jemimboe reta pe. Erēi jeseuwe jae reta uipota’ä wirowia.

<sup>15</sup>Joko wi Jesús jei chupe reta: “Pekua opaete iwi rupi jare pemimbeu opaete wae pe ñee ikawi wae che rewa,” jei chupe reta.

<sup>16</sup>“Jare ipotawe kía wirowia jare uyembisakambuka i pe wae onoita tekowe opa mbae wae. Erēi jokua wirowia’ä wae reta, Tumpa umbijekota oī reta jare omombota oī reta Tatawasurenda pe jaeño mái pewa,” jei chupe reta.

<sup>17</sup>“Jare jeta wae reta uechata cheré wirowia wae reta uyapo ñonoī kua nunga mbaembae reta: Cheree re jae reta omoēta aña uyembiiya jese wae reta wi. Jare uyemingetata reta ambie ñee reta pe – jokua jae ñee mbaetiī uyemingeta pipe wae.

<sup>18</sup>Jare yepe tēi aramoi uipisita reta mboi, jare yepe tēi aramoi jouta reta mbayachi, erēi ndarau mbae awe uyeyapo chupe reta. Jare oñonota reta ipo imbaerasi wae reta re umingera waerä.” Jukuärái Jesús jei jemimboe reta pe.

### **Jesús oo ye ara pe**

*(Lucas 24.50-53)*

<sup>19</sup>Jayawe yandeYa Jesús opa ma jemimboe reta umingeta yawe, uyereraa ara pe. Jare uwapi yandeRu Tumpa iyakata koti jae ndiwe onoi waerä mbaepuere.

<sup>20</sup>Jayawe jemimboe reta opa yuraa umimbeu Tumpa iñee opaete kerupi rupi. Jare yandeYa umee chupe reta mbaepuere uyapo waerä mbaembae ipuere’ä ambie kuimbae reta uyapo wae. Jare jukuärái jae uikuaaka opaete wae pe añetete wae ko jemimboe reta jei wae. Jaeño ma.

## Lucas

### Kua tupapire rewa:

Kua kuaatía, jae ko pëti kuimbae Lucas jee wae uikuaatía wae. Lucas ko jae pëti doctor upurupiano wae jare Pablo iwataïru pëti wae. Kua jae uikuaatía wae, jae ko jeta mbaembae yandeYa Jesucristo uyapo wae jare jei wae. Lucas uikuaatía kua tupapire jare tupapire Hechos jee wae wi pëti mburuwicha Teófilo jee wae pewarä. Echa'ä Lucas uipota iko jokua mburuwicha jare opaete ïru wae reta wi uikuaa kawi waerä añetete wae Jesús rewa. Kua Lucas uikuaatía wae rupi yaikuaa Jesucristo jae'ä ko Israel ñemoñaetaño uepi wae. Jae ko opaete ïwi pewa reta wi uepi wae.

### Lucas 1

#### Lucas uikuaatía mburuwicha Teófilo pe

<sup>1</sup>Chemburuwicha Teófilo, ikawiete ko kua ara reta rupi mbaembae uasa wae. Jare jeta wae reta uikuaatía wae rupi umimbeu ma yandewe kua mbaembae rewa.

<sup>2</sup>Jae reta uikuaatía kawi ma yandewe kua mbaembae ïru uecha etei wae reta imiäri chupe wae rupi. Kua reta uecha etei mbaembae uyembipi uyeyapo wiwe, jare uyeyokui reta Tumpa pe kua mbaembae imiäri yandewe wae rupi.

<sup>3</sup>Jare che wi aikuaa kawi opaete kua uyembipi wiwe uyeyapo wae, echa'ä ayemboe kawi ma jese ramo. Jare chemaerä ikawi ko aikuaatía waerä ndewe opaete kua mbaembae uyeyapo wae, chemburuwicha Teófilo.

<sup>4</sup>Echa'ä aipota nde ndikuaa waerä añetete ko jokua mbaembae ndiyemboe jese wae. Echa'ä jukuärái uasa.

#### Araiwa uikuaaka Zacarías pe jembireko imembita oï wae

<sup>5</sup>Herodes iko yawe ïwi Judea pewa reta imburuwicha wasurä, ime yureko reta wi mbowi ati sacerdote reta. Jae reta uyepepikapika uparawiki waerä tupao wasu pe. Pëti ati wi jae reta uyembijee Abías. Jare jae reta ipite wi ime iko pëti sacerdote Zacarías jee wae. Zacarías jembireko wi ko jae Aarón ñemoñaetaño pewa. Jae ko jee Elisabet.

<sup>6</sup>Zacarías jare jembireko uyapo jupi wae Tumpa jowai, echa'ä yureko reta jupi opaete Tumpa jei wae rupi.

<sup>7</sup>Erëi jae reta mbaeti wireko sambiaï. Echa'ä Elisabet parawete imembi mbaei wae ko. Jare jae jare ime ukuakuaete ma parawete reta.

<sup>8</sup>Jayawe pëti ara Zacarías jare jae iparawiki ïru reta uyapo yureko iparawiki sacerdote pewa tupao wasu pe.

- <sup>9</sup>Jokua año reta rupi sacerdote reta opa ara rupi uyeparawo reta pëti wae uike waerä tupao wasu japipe uapi waerä mbae utimbo kawi wae Tumpa jowai. Jare kua wese uiparawo reta Zacarías.
- <sup>10</sup>Jayawe jae uike tupao wasu japipe etei uapi waerä mbae utimbo kawi wae. Jare jeta Israel pewa reta uyembati uyerure yureko oka pe.
- <sup>11</sup>Jare aramoiño uyekuaa Zacarías pe pëti araiwa Tumpa ombou wae uyemboi oi mbaerenda mbae utimbo kawi wae uyeapi jese wae iyakata koti.
- <sup>12</sup>Jare Zacarías uecha yawe, uyamondo jare ukiyete wi.
- <sup>13</sup>Jayawe araiwa jei chupe: “Awiye ekiye, Zacarías,” jei. “Tumpa uyandu ma ndewe ndiyerure chupe wae, jare nembireko Elisabet imembita ndewe pëti kuimbae mii. Jare nde nembijeeta Juan,” jei.
- <sup>14</sup>“Jare nde tuicha ndiyerowiata nei kuri. Jare jeta wi uyerowiata nde ndiwe jae oa wae rewa,
- <sup>15</sup>echa’ä Tumpa umaeta jese pëti kuimbae jeräkua wae rami,” jei. “Nderai awiye etei tou vino jare ipotawe mbae upurumbisawipo wae. Añetete nderai ichi jie pe oi wiwe imeta onoi Espiritu Santo imbaepuere,” jei chupe.
- <sup>16</sup>“Jare nderai ukuakuaa ma yawe, umbiyerowa yeta oi jeta Israel pewa reta yandeYa Tumpa koti.
- <sup>17</sup>Jae ikota Tumpa iñee arakae umimbeu wae Elías rami, jare onoita mbaepuere Elías wireko wae rami,” jei. “Jare jae oota oi tenonde uyapikatu waerä yandeYa iwäe ara pewartä. Echa’ä jae iñee rupi tu reta uyeapikatuta isambiai reta ndiwe. Jare jukuärái wi kía kía tenonde yawe Tumpa jei wae uipota’ä uyandu wae reta uyapisakata oi reta jese. Jayawe iyarakuaa katuta ñonoï jare uyapota reta jupi wae,” jei. “Jukuärái nderai uyapota oi Israel pewa reta uyeyapikatu waerä yandeYa iwäe ara pewartä,” jei araiwa Zacarías pe.
- <sup>18</sup>Jayawe Zacarías jei araiwa pe: “¿Këraita ra aikuaa añetete ra kua ndere nei chewe wae? Echa’ä che akuakuaaete ma ko jare chembireko parawete jae nunga wi,” jei chupe.
- <sup>19</sup>Jayawe araiwa jei Zacarías pe: “Che ko jae Gabriel. Che ayemboi Tumpa jowai etei ayeyokui waerä chupe. Tumpa chembou amimbeu waerä ndewe kua ñee ikawi wae,” jei chupe.
- <sup>20</sup>“Kua amimbeu ndewe wae uyeyapota ko ara Tumpa uiparawo wae ou uwäe yawe. Erëi nde nderowia’ä che jae ndewe wae ramo, añawe ndepitata nei niñee mbae jokua ara uwäe rewa,” jei araiwa Zacarías pe.
- <sup>21</sup>Jokua rambuwe oka pe ñonoï wae reta uäro ñonoï Zacarías oë waerä tupao wasu wi. Jare ipiakañi reta Zacarías ima upita tupao wasu japipe ramo.

<sup>22</sup>Erëi Zacarías oë yawe, ipuere'ä omoë iñee chupe reta. Jaeño uyemingeta ipo pe chupe reta. Jáeramo jae reta uikuaa Zacarías uecha ko mbae ambie ye wae tupao wasu japípe.

<sup>23</sup>Jare opa ma yawe ara reta Zacarías iparawiki tupao wasu pewa, oo ye jëta pe.

<sup>24</sup>Jare kua jaikue rupi jembireko Elisabet uyekuaa ipurúa oï. Jare Elisabet oë'ä etei jëta wi pandepo yasi rupi. Jare jei iyupe:

<sup>25</sup>“YandeYa uyapo chewe kua mbae ikawi wae. Ima ma chemara chemembi'ä etei ramo. Erëi añawe yandeYa uyapo ma chewe awiye waerä jekuaeño chemara,” jei.

### **Araiwa umimbeu María pe imembita oï wae**

<sup>26</sup>Jayawe Elisabet owa yasi ma ipurúa yawe, Tumpa ombou araiwa Gabriel iwi Galilea pe tëta wasu Nazaret pe.

<sup>27</sup>Joko pe iko pëti kuñatái María jee wae. María ko jae pëti kuñatái oroke'ä etei kuimbae wae. Erëi jae uyemingeta ma iko umenda waerä pëti kuimbae José jee wae ndiwe. José ko jae pëti kuimbae mburuwicha wasu David iñemoña pewa.

<sup>28</sup>Jayawe araiwa uike María oï wae pe jare umbisaluda jei rewe: “Iyerowia. Tumpa oï nde ndiwe jare tuicha rupi ipiakawi oï ndewe opaete ñru kuña reta wi,” jei chupe.

<sup>29</sup>Jayawe María kua uyandu yawe, ipiakañi jare iñee'ä upita kua ñee uyandu wae re.

<sup>30</sup>Jayawe araiwa jei chupe: “Awiye ekiye, María. Echa'ä Tumpa uyerowia umae nderé,” jei chupe.

<sup>31</sup>“Mase, ndepuruata jare nemembita neï pëti kuimbae mii. Jare nemembi oa yawe, nembijeeta Jesús.

<sup>32</sup>Jae onoita mbaepuere tuicha wae, jare ñru wae reta jeita chupe Tumpa imbaepuere tuichaete wae Tai. Jare Tumpa ikoño mái wae uyapota iko waerä Israel pewa reta imburuwicha wasurä jae tamikue David rami,” jei chupe.

<sup>33</sup>“Jae ikota Jacob iñemoña reta imburuwicha wasurä jaeño mái pewa. Jare jae imbaepuere mburuwicha wasu pewa ndarau etei opa,” jei araiwa María pe.

<sup>34</sup>Jayawe María jei araiwa pe: “¿Këraita ra kua uyeyapo chewe? Echa'ä ndei etei ake kuimbae ndiwe,” jei chupe.

<sup>35</sup>Jayawe araiwa jei chupe: “Espíritu Santo outa nderé, jare Tumpa imbaepuere tuichaete wae rupi ndepuruata neï kuri. Jáeramo nemembi oa yawe, jeita chupe reta Tumpa Tai jupiete ye wae,” jei chupe.

<sup>36</sup>“Mase, nerëtara Elisabet, yepe tëi ukuakuaete ma, erëi jae nunga ipurúa oï wi. Yepe tëi jei reta chupe imembi mbaei wae, erëitu owa yasi ma ipurúa oï.

<sup>37</sup>Echa'ä Tumpa pewarä mbaeti mbae awe yawái,” jei araiwa María pe.

<sup>38</sup>Jayawe María jei chupe: “Mase, ko aï ayeyokui waerä yandeYa pe. Tuyeyapo chewe nde ndere wae rupi,” jei chupe. Jayawe araiwa oo ye María oï wae wi.

### **María oo opou Elisabet ipi**

<sup>39</sup>Jayawe mbowi ara rupi María oë oo iapura rewe iwi Judea koti

<sup>40</sup>Zacariás jëta pe. Jare oo ma uwäe yawe, umbisaluda Elisabet.

<sup>41</sup>Jare Elisabet uyandu yawe María iñee, Elisabet imembi omi raí jie pe. Jare Espiritu Santo imbaepuere rupi Elisabet

<sup>42</sup>täta uyemingeta rewe jei: “¡Nde ndiyekouete neï opaete ïru kuña reta wi! ¡Jare uyekoueteta oï wi nemembi!” jei.

<sup>43</sup>“¿Kía pa ko che, cheYa ichi ou waerä chepi?” jei.

<sup>44</sup>“Mase, nde nembipi chemingeta rupiwe, chemembi omi raí cherie pe uyerowia pipei,” jei.

<sup>45</sup>“Ndiyekouete neï, echa’ä nde nderowia Tumpa uyapota ko jae jei uyapota ndewe wae,” jei Elisabet María pe.

<sup>46</sup>Jayawe María jei: “Che ambutuicha yandeYa jee chepia rewe.

<sup>47</sup>Tumpa ko jae cheRepi wae jare tuicha chembiyerowia.

<sup>48</sup>Mbae’ä ko che, jae umae waerä cheré cheparareko rewe. Mase, añawe wiwe opaete wae reta jeita chewe: ‘Uyekouete oï.’

<sup>49</sup>Echa’ä Tumpa imbaepuere tuichaete wae uyapo chewe mbaembae ikawiete ye wae. Jae ko jupiete ye wae.

<sup>50</sup>Jare jae jekuaëño uiparareko opaete uipiu chuwi wae reta.

<sup>51</sup>Jae uikuaaka ma kërái jae imbaepuere tuichaete ko. Jare opa umikañi uyembikate wae reta ipiyemingeta.

<sup>52</sup>Jae upïro mburuwicha reta wi imbaepuere, jare umbutuichaka iparawete wae reta.

<sup>53</sup>Jae umingapii iyembai wae reta tembiu ikawi wae pe. Erëi omondo ye ikokatu wae reta jukuärái etei.

<sup>54</sup>Jae yanembori ma yande Israel iñemoñaá reta yaiko wae. Yayeyokui ma chupe, jare jae iñakañi’ä yandeparareko waerä.

<sup>55</sup>Jukuärái jae jei yanderamikue Abraham pe. Echa’ä jei chupe: ‘Che aechakata aï ndewe jare niñemoñaá reta pe wi puparareko wae jaëño mái pewa,’ jei Tumpa Abraham pe.” Jukuärái jei María.

<sup>56</sup>Jare María upita Elisabet ipi mbapi yasi pewa. Jaikue rupi oo ye jëta pe.

### **Juan upurumbisakambu wae oa wae rewa**

<sup>57</sup>Jare uwäe yawe ara Elisabet imembi oa waerä, oa imembi kuimbae mii.

<sup>58</sup>Jare jeräkua Elisabet jëtara reta pe jare jëtáíwa reta pe wi kërái yandeYa uiparareko Elisabet. Jare kua uikuaa reta yawe, uyerowia reta Elisabet ndiwe.

<sup>59</sup>Jayawe sambiaí juri ara ma onoi yawe, jëtara reta yuweru umbicircuncidaka waerä. Jare jae reta uipota tēi oñono jese tu jee – jae ko Zacarías.

<sup>60</sup>Erēi ichi uipota'ä. “Imeta ko jee Juan,” jei chupe reta.

<sup>61</sup>Jayawe jae reta jei chupe: “¿Maera pa ndipota jokua tee onoi waerä? Mbaeti etei ko nerëtara jokua nunga tee onoi wae,” jei reta chupe.

<sup>62</sup>Jayawe jae reta ipo pe upirandu Zacarías pe këraita ra umbíjee tai wae.

<sup>63</sup>Jayawe Zacarías ipo pe ueka chupe reta mbae uikuatía jese waerä. Jare ueru reta ma chupe yawe, jae uikuatía kuärái: “Jae jee ko Juan.” Jayawe opaete joko pe ñonoí wae reta ipiakañi jokua re.

<sup>64</sup>¿Jare jupiwoiño Zacarías ipuere ye omoë ñnee! Jayawe umbípi umbutuicha Tumpa jee.

<sup>65</sup>Jayawe opaete Zacarías jëta iyipi rupi ñonoí wae reta ipiakañi kua re. Jare kua uyeyapo wae jeräkua opaete iwi Judea rupi.

<sup>66</sup>Jare opaete kua uyandu wae reta ipia pe uyemingeta kua re, jare jei reta iyupe: “¿Mbaerä ra ikota aipo kua sambiaí ukuakuaa ma yawe?” Jukuärái jei reta, echa'ä uecha reta yandeYa imbaepuere oí Juan ndiwe.

### **Zacarías umimbeu Tumpa ñnee**

<sup>67</sup>Jayawe Zacarías ipuere ma uyemingeta ye yawe, jawoi pewa Espíritu Santo umee chupe ñee umimbeu waerä. Jare Espíritu Santo imbaepuere rupi jei kuärái:

<sup>68</sup>“¿Tuyembutuichaka yandeTumpa jee opaete yande Israel pewa yaiko wae reta! Echa'ä jae ou ma yanembori waerä jare yanderepi waerä, yande jae imaerä yaiko wae reta.

<sup>69</sup>Jae ombou oí yandewe Upuruepi wae jeta onoi mbaepuere wae. David ñnemoña yuapi ikota.

<sup>70-71</sup>Kua añawe uyeyapo oí wae, jae ko arakae Tumpa jei wae etei. Echa'ä jae jei yanderepita oí yanderowaicho reta wi jare opaete ñnaneamitää wae reta wi. Jukuärái jei Tumpa jae ñnee arakae umimbeu wae reta rupi. Jare jokua kuimbae reta jupi wae ko.

<sup>72</sup>Tumpa uiparareko Abraham jare ñru yanderamikue reta, echa'ä jae ñnakañi'ä jokua jae jei chupe reta wae wi.

<sup>73-74</sup>Tumpa jei arakaete Abraham pe: ‘Che etei tae ndewe, aepita aï kuri ñnemoña reta jowaicho reta ipo wi. Jare jukuärái jae reta ipuereta uyeyokui chewe ukiye mbae rewe.



<sup>75</sup>Jae reta kua iwi rupi ñonoï rambuewe, yureko teeta chemaerä jare jupi rupi.’ Jukuärái Tumpa jei Abraham pe.”

<sup>76</sup>Joko wi Zacarías jei tai mii pe kuärái: “Nde, cherai mii,” jei chupe. “Tumpa imbaepuere tuichaete wae etei neñono jae iñee nemimbeu waerä. Echa’ä nde rani ndeota neï yandeYa wi nemimbeu waerä opaete wae pe yandeYa iwäe ara koiñoete ma oi wae.

<sup>77</sup>Jare nde ndikuaakata neï kuri yandeYa uiparawo wae reta pe kërái jae reta ipuere mbaembae uyawi Tumpa koti wae opa uyembái chuwi reta waerä, jare jukuärái onoi reta waerä tekowe opa mbae wae.

<sup>78</sup>Jukuärái Tumpa uyapota yandeparareko ramo. Jare yandeparareko ramo, jae ombouta yandewe ara wi Upuruepi wae, kërái ndimbowe rupi omoë yandewe warasi rami.

<sup>79</sup>Jukuärái jokua pïtumimbi pe mbiri Tumpa wi yureko wae reta jare mano ipo pe yureko wae reta onoita tembipe. Jukuärái ko uyeyapota yaikuaa waerä kërái yandepiakatu yaiko waerä Tumpa ndiwe.” Jukuärái Zacarías jei Espiritu Santo rupi.

<sup>80</sup>Jayawe sambiai tuicha ma oo oo jare uñemimiräta Tumpa re. Jare ukuakuaa ma yawe, iko iwitini wasu rupi tēta mbae rupi umbipi umimbeu rewa Tumpa iñee Israel pewa reta pe.

## Lucas 2

### Jesús oa tēta wasu rai Belén pe

(Mateo 1.18-25)

<sup>1</sup>Jokua ara reta rupi romano reta imburuwicha wasu Augusto jee wae oyokui opaete wae uyepapaka reta waerä. Kua uyeyapota iko opaete iwi kiape jae uyembiiya jese wae rupi.

<sup>2</sup>Kua tenondewa yepapa uyeyapo Cirenio iko yawe iwi Siria pewa reta imburuwicharä.

<sup>3</sup>Jayawe opaete wae yuraa jēta jētái rupi uyepapaka reta waerä.

<sup>4</sup>Jare jukuärái uyapo José wi. Jae oë oo Nazaret wi – jokua tēta wasu oi iwi Galilea pe. Jare oo iwi Judea koti tēta wasu rai Belén pe, echa’ä jae ko David iñemoñaa pewa ramo, jare David jēta wasu rai ko jae Belén.

<sup>5</sup>Jáeramo José oo Belén pe uyepapaka waerä, jare wiraa wi jembirekorä wae María. Jare María ipurúa wasu oi.

<sup>6</sup>Jare Belén pe ñonoï reta rambuewe, uwäe ara María imembi oa waerä.

<sup>7</sup>Erēi mbaeti chupe reta o ipotawe tēta pe. Jáeramo María imembiripi kuimbae mii oa pēti o mbaemimba reta jokai japipe oi wae pe. Jare María oñoma imembi mii ñomaka reta pe jare umbiyapakua mbaemimba reta ikaruariru pe.

### Araiwa reta uyekuaa owecha iyandarekoa reta pe

<sup>8</sup>Jare jokua p̄itu etei amokue owecha iyandarekoa reta uyandareko ñonoĩ iowecha reta re koiño Belén wi.

<sup>9</sup>Jayawe aramoiño uyekuaa chupe reta p̄eti araiwa Tumpa ombou wae. Jare Tumpa imbaepuere jupiete wae uyekuaa chupe reta p̄eti tembipe uwerasi wae rami jare umbiembipe chupe reta. Jáeramo jae reta opa uk̄iyete up̄ita.

<sup>10</sup>Jayawe araiwa jei chupe reta: “Aw̄iye pek̄iye,” jei. “Mase, amimbeuta pewe p̄eti ñee ikawiete wae, yerowia wasu pewa ko. Kua ñee opaete wae pewarä ko.

<sup>11</sup>Echa’ä kua p̄itu etei oa ma Upuruepi wae David j̄eta wasu pe. Jae ko yandeYa etei jare Cristo pere chupe wae,” jei.

<sup>12</sup>“Jare pikuaata kuärái: pewäeta sambiai mii uñeñoma oĩ ñomaka reta pe jare uyapakua oĩ p̄eti mbaemimba reta ikaruariru pe,” jei araiwa chupe reta.

<sup>13</sup>Jare jupiwoiño uyekuaa jae ndiwe jetaete ye araiwa reta. Jare opaete jae reta umbutuicha Tumpa jee jei rewe:

<sup>14</sup>“;Tuyembutuichaka Tumpa ara pe oĩ wae jee! Jare tipiakatu iwi pewa reta Tumpa ipiakawi chupe reta wae,” jei araiwa reta.

<sup>15</sup>Jare opa ma umingeta reta yawe, araiwa reta opa ye yuraa chuwi reta ara pe. Jayawe owecha iyandarekoa reta jei iyupe: “Ya jayawe Belén pe yaikuaa waerä kua mbae uasa oĩ wae, Tumpa uikuaaka ma yandewe wae,” jei reta.

<sup>16</sup>Jayawe jawoi pewa opa yuraa reta Belén koti. Jare yuraa ma uwäe reta yawe, uwäe chupe reta María jare José, jare sambiai mii. Jokua sambiai mii uyapakua oĩ mbaemimba reta ikaruariru pe.

<sup>17</sup>Jare uecha reta ma yawe, opa ye yuraa reta umimbeu waerä iru wae reta pe araiwa jei chupe reta sambiai mii rewa wae.

<sup>18</sup>Jare opaete uyandu wae reta ipiakañi owecha iyandarekoa reta umimbeu chupe reta wae re.

<sup>19</sup>Er̄ei María upi ipia pe opaete kua mbaembae jare jukuärái iñakañi’ä chuwi reta.

<sup>20</sup>Jare owecha iyandarekoa reta opa ye yuraa Belén wi Tumpa jee umbutuicha rewe opaete uyandu jare uecha reta wae re. Echa’ä jae reta uecha ma sambiai mii k̄erái araiwa jei chupe reta rami etei.

### **José jare María wiraa Jesús tupao wasu pe**

<sup>21</sup>Jayawe sambiai mii juri ara ma onoi yawe, ichi jare tu umbicircuncidaka. Jare umbijee reta Jesús, echa’ä jukuärái araiwa umimbeu María pe umbijee waerä ndei María ipurúa mbowe.

<sup>22-24</sup>Moisés arakae uikuatía kuärái: P̄eti kuña imembi oa yawe, jare jokua imembi kuimbae mii yawe, kuña ipuere’ä oo tupao wasu pe cuarenta ara rupi. Jare cuarenta ara uasa ma yawe, imeta ko wiraa mokui pikasu taurusu wae Jerusalén pe umee waerä Tumpa pe jokua tupao wasu pe. Jayawe ramo kuña ikia’ä ma oĩ Tumpa koti,

jare joko wi ramo ipuere umbutuicha ye Tumpa jee tupao wasu pe. Jukuärái uyekuatía oï Tumpa iñeeriru pe. Jayawe cuarenta ara ma Jesús oa wae uasa yawe, José jare María uyapo kua Tumpa jei wae rupi. Opa yuraa reta tupao wasu pe. Jare joko pe ñonoï reta rambuewe, oñono tee reta Jesús Tumpa pewarä. Echa'ä Tumpa iñeeriru pe jei kuña imembiripi kuimbae mii oa yawe, jokuä sambiaï uñeñoño teeta ko Tumpa pewarä.

**25**Jare iko Jerusalén pe pëti kuimbae Simeón jee wae. Jae jupi jare uyeyokui kawi Tumpa pe. Jae uäro iko ikirëi rewe Tumpa umbipiakatu waerä Israel iñemoñaä reta. Jare Espiritu Santo iko jese.

**26**Jare Espiritu Santo uikuaaka ma chupe jae umanota'ä iko ndei uecha mbowe Cristo Tumpa ombouta iko wae.

**27**Jayawe jokuä ara Espiritu Santo uikuaaka ma yepe Simeón pe oo waerä uike tupao wasu joka pe. Jare joko pe oï rambuewe, uecha María jare José ueru ñonoï Jesús tupao wasu koti uyapo reta waerä Moisés arakae uikuatía wae rupi.

**28**Jayawe Simeón oo owäiti. Jare owoï Jesús jare umbutuicha Tumpa jee jei rewe:

**29**“CheYa mii, añawe ramo chepuereta amano chepiawiwe rewe. Echa'ä añawe ndiyapo ma nde ndere chewe wae.

**30**Añawe aecha ma kua nde nembou orerepi waerä wae.

**31**Kua ndiyapo ma opaete wae reta jowake.

**32**Jae ikota pëti tembipe rami judío mbae wae reta pe, echa'ä jae ndekuaakata oï chupe reta. Jare jae orembutuichata oï, ore Israel pewa nduiko wae reta, echa'ä ore ko jae nde oreparawo wae reta.” Jukuärái jei Simeón.

**33**Jesús ichi jare José ipiakañi upita kua Simeón jei sambiaï re wae.

**34**Jayawe Simeón jei chupe reta: “Tumpa tuyapo ikawi wae pewe,” jei chupe reta. Jare joko wi jei María pe: “Mase, Tumpa ombou kua nemembi yanembiyao tee waerä yandeyuwi, yande Israel pewa yaiko wae reta. Echa'ä jeta wae reta wiriöta kua nemembi, jare jokuä jeko pewa Tumpa umimichikata oï reta. Erëi iru wae reta wiröwiata jese, jare Tumpa umbutuichata oï reta,” jei. “Kua nemembi uyekuaakata oï Israel pewa reta pe kía ko jae wae mbaembae uyapota oï wae rupi. Erëi jeta wae reta wiriöta,

**35**jare jukuärái ikatu pe etei uyekuaata ipiyemingeta reta. Jare nde ndepiatitita neï kuri nemembi re uiporara wae re, jare ndikuasi katuta neï kuri jese.” Jukuärái jei Simeón María pe.

**36**Jare oï wi joko pe pëti kuña Ana jee wae. Jae ko ñee Tumpa wi etei ou wae umimbeu wae. Jae ko Fanuel tayi, jare Aser iñemoñaä pewa ko. Kua kuña ukuakuaete ma parawete. Jaeño yureko ime ndiwe chiu año.

**37**Jare ime umano chuwi wiwe wireko yewi ochenta y cuatro año ime mbae. Añawe jae usiri'ä tupao wasu joka wi. Jare oñono teeñoi ara reta ukaru mbae waerä,

jukuärái umbutuicha waerä Tumpa jee. Jare uyerureñoi Tumpa pe ara rupi jare pïtu rupi. Jukuärái Ana uyeyokui Tumpa pe.

<sup>38</sup>Jayawe jokua ara jae wi oo oya María jare José re. Jare umee yasurupái Tumpa pe Jesús re. Jokua ara reta rupi jeta Jerusalén pewa reta uäro yureko Tumpa uepi reta waerä. Jayawe joko wiwe Ana imiäri Jesús rewa chupe reta.

<sup>39</sup>Jayawe José jare María opa uyapo reta yawe tupao wasu pe Tumpa ñeeriru pe jei wae rupi, opa ye yuraa reta jëta wasu Nazaret koti iwi Galilea pe.

<sup>40</sup>Jare sambiai tuicha oo oo, jare ipiräta, jare iyarakuaa katu wi. Jare Tumpa umae kawi jese.

### **Jesús oo tupao wasu pe taurusu yawe**

<sup>41</sup>Opa año rupi José jare Jesús ichi yuraa reta tëta wasu Jerusalén pe umbiasa reta waerä pascua ara reta yemimandúa pewa.

<sup>42</sup>Jare Jesús doce año ma onoi yawe, oo jae reta ndiwe Jerusalén pe jae reta jeko uyapoño mái wae rupi.

<sup>43</sup>Jare pascua ara reta uasa ma yawe, José jare Jesús ichi opa ye yuraa reta tëi jëta koti. Erëi Jesús upitaño Jerusalén pe José jare María uikuaa mbae rewe.

<sup>44</sup>Jae reta wirowia tëi Jesús ou ko aipo oï jëtara reta ndiwe. Erëi pëti ara ma uwata reta yawe, ueka reta tëi jëtara reta ipite rupi jare uikuaa wae reta ipite rupi.

<sup>45</sup>Erëi uwäe'ä chupe reta. Jayawe José jare María opa uñatima ye reta Jerusalén koti ueka reta waerä Jesús.

<sup>46</sup>Jare mbapi ara rupi ma ueka reta yawe, uwäe wite reta chupe tupao wasu joka pe. Joko pe Jesús uwapi oï Moisés uikuatía wae re oporomoe wae reta ndiwe. Uyapisaka oï jese reta, jare uyapo oï chupe reta mbirandu.

<sup>47</sup>Jare jae reta upirandu chupe yawe mbae re, Jesús umimbeu kawi chupe reta. Jáeramo opaete uyapisaka jese wae reta ipiakañi Jesús iyarakuaa re.

<sup>48</sup>Jare José jare Jesús ichi kua uecha yawe, jae reta wi ipiakañi. Jayawe ichi jei chupe: “Chemembi, ¿maera pa kuärái ndiyapo orewe? Mase, che jare nderu ndueka tëi opaete kerupi orepiatiti rewe,” jei chupe.

<sup>49</sup>Jayawe Jesús jei chupe reta: “¿Maera pa chereka piko? ¿Pikuaa'ä yerá cheRu iparawiki imeta ko che ayapo wi?” jei chupe reta.

<sup>50</sup>Erëi jae reta uikuaa'ä mbae ra Jesús uipota jei chupe reta wae.

<sup>51</sup>Jayawe Jesús oo ye Nazaret pe jae reta ndiwe, jare jekuaeño uyapo jae reta jei wae rupi. Jare Jesús ichi upi ipia pe opaete jokua mbaembae uasa wae.

<sup>52</sup>Jare Jesús jekuaeño tuicha oo oo iyarakuaa katu rewe. Jare Tumpa umae kawi jese, jare jëtáywa reta umae kawi jese wi.

## **Lucas 3**

## Juan upurumbisakambu wae umimbeu Tumpa iñee

(Mateo 3.1-12; Marcos 1.1-8; Juan 1.19-28)

**1-2**Jayawe Tiberio quince año ma iko romano reta imburuwicha wasurä yawe, Tumpa umee iñee Juan pe umimbeu waerä. Juan ko jae Zacarías tai, jare jae iko iwitini wasu rupi. Jokua ara reta rupi Poncio Pilato iko iwi Judea pewa reta imburuwicha wasurä. Jare Galilea pewa reta imburuwicha wasurä iko Herodes. Jare Herodes tiwi Felipe jee wae iko iwi Iturea pewa reta jare iwi Traconite pewa reta imburuwicha wasurä. Jare Lisantias iko iwi Abilinia pewa reta imburuwicha wasurä. Jare Anás jare Caifás mokui rewe yureko Israel pewa reta isacerdote tenondewarä.

**3**Jayawe Juan oo opaete i wasu Jordán iyipi rupi. Jare umimbeu opaete wae pe kuärái: “Piyembisakambukata ko i pe pechaka waerä iru wae reta pe peya ma ko pepiayemingeta jupi mbae wae jare perowia ma ko Tumpa jei wae re. Jare jukuärái piyapo yawe, yepe tēi piyawī ma Tumpa koti, erēi Tumpa ndarau imandúa pewe jokua teko penoi wae re.” Jukuärái jei Juan chupe reta.

**4**Pēti kuimbae Tumpa iñee arakae umimbeu wae Isaías jee wae umimbeu kua mbaembae Juan uyapota iko wae kuärái: “Jae oīta iwitini wasu rupi, jare jeta wae reta yuraata jae oī wae pe. Jare jae usapikai rewe jeita chupe reta kuärái: ‘Piyerowa jare piyeyapikatu yandeYa koti, echa’ä koiñoete ma oī yandeYa iwäe ara. Kua piyeyapikatu yandeYa koti jae wae, jae ko pēti tape piyapikatu mburuwicha wasu iwäe ara pewarä wae rami. Imeta ko pemisimi kawi.

**5**Imeta ko pemitinee opaete juwa juwa reta iwi pīpe. Jare opaete ñaīpe reta piyapota ko iwi ipe wae rami. Jare tape ipäripäri oī wae reta, pemisimi kawita ko. Jare opaete tape ikawi’ä oī wae reta, pembiipe kawita ko. Jukuärái rami piyeyapikatuta yandeYa iwäe ara pewarä.

**6**Jare joko wi opaete wae uechata kērái Tumpa Upuruepi wae ko,’ jeita chupe reta.” Jukuärái uikuatía Isaías Juan rewa.

**7**Jayawe jeta wae reta yuweru Juan oī wae pe uyembisakambuka waerä i pe. Erēi Juan jei chupe reta: “¡Pe reta ko jae upurumbitawī wae reta!” jei chupe reta. “¿Kērāita pa añawe pipota peoyepe waerä Tumpa iarasi wasu oata oī peré wae wi?” jei chupe reta.

**8**“Pipota che pumbisakambu waerä i pe yawe, jayawe tenonde peya rani pepiayemingeta jupi mbae wae Tumpa rewa. Jare tuyekuaa peya ma ko pepiayemingeta jupi mbae wae mbaembae piyapo wae rupi,” jei chupe reta. “Jare awiye pere pepia pe: ‘Tumpa ndarau uiporaraka chewe, echa’ä che ko jae Abraham iñemoña pewa ramo.’ Awiye etei jokua pere, echa’ä Abraham iñemoña pewa yaiko wae mbae’ä ko. Jare Tumpa uipota yawe, kua ita reta wi ipuere uyapo Abraham iñemoña retarä,” jei chupe reta.

<sup>9</sup>“Koiño ma oï Tumpa uiporaraka waerä opaete uyawi ikoti wae reta pe. Pe reta pikuaa kawi peï pëti iwira ía kawi’ä yawe, iya uitita jare uapita. Jare jukuäráiete wi Tumpa uiporarakata oï opaete jeko kachi wae reta pe,” jei chupe reta.

<sup>10</sup>Jayawe joko pe ñonoï wae reta upirandu Juan pe: “¿Jayawe mbae pa nduyapota?” jei reta chupe.

<sup>11</sup>Jayawe Juan jei chupe reta: “Ime yawe kía mokui temimonde onoi wae, tumee pëti wae mbaeti temimonde onoi wae pe. Jare ime yawe kía tembiu onoi wae, tumee mii wi kía mbaeti tembiu onoi wae pe,” jei chupe reta.

<sup>12</sup>Jare yuweru wi Juan oï wae pe amokue mburuwicha pewarä okowara wae reta uyembisakambuka waerä. Jayawe jae reta upirandu wi Juan pe: “Oporomboe wae, ¿mbae pa nduyapota ore?” jei chupe reta.

<sup>13</sup>Jayawe Juan jei chupe reta: “Awiye ma uasaete pekowara mburuwicha reta jei pewe wae wi,” jei chupe reta.

<sup>14</sup>Jare amokue sindaro reta wi upirandu Juan pe: “Jare ore reta, ¿mbae pa nduyapota?” jei reta chupe. Jayawe Juan jei chupe reta: “Awiye pepiro korepoti ñru wae reta wi pemumburu rewe jare apu rupi. Jare pepia toï jenda pe jokua peminganakue re,” jei chupe reta.

<sup>15</sup>Jokua año rupi opaete wae uäro yureko imambae ou waerä Cristo jei chupe reta wae. Chupe reta waerä jae ko jokua Upuruepi wae Tumpa ombouta iko wae. Jayawe opaete wae umae Juan re jare uyemingeta yureko ipia pe: “¿Jae ra ko Cristo aramoi?” jei reta.

<sup>16</sup>Jáeramo Juan jei chupe reta: “Che pumbisakambuño aï i pe. Erëi outa pëti wae imbaepuerete chewi wae. Jare che jupi’ä etei ko ipipasa ícha mii yepe ayora waeräwe,” jei. “Che pumbisakambuño ko aï i pe, erëi jae peñonota pëti pëti wae piko waerä pëti ramiño iyé etei Espíritu Santo rupi. Erëi peya’ä yawe pepiayemingeta jupi mbae wae, jae uiporarakata oï pewe tata pe,” jei chupe reta.

<sup>17</sup>“Jae ko kía trigo uipoo wae rami. Echa’ä trigo uipoo wae umbiwewe trigo iti ikotiä oo waerä chuwi, jare joko wi umbiru trigo jiru pe. Jae ramiño wi jokua outa oï wae umbisirita jupi wae reta jupi mbae wae reta wi,” jei chupe reta. “Jare kërái trigo uipoo wae uapi chuwi iti tata pe, jukuärái wi jokua outa oï wae uiporarakata jupi mbae wae reta pe tata owe mbae wae pe,” jei chupe reta.

<sup>18</sup>Jukuärái jare jeta ñru ñee rupi Juan umbiarakuaa reta jare umimbeu chupe reta ñee ikawi wae.

<sup>19</sup>Taikue rupi Juan umbieta mburuwicha wasu Herodes pe kuärái: “Nde ndiyapo neï ikawi mbae wae, echa’ä ndereko neï Herodías – jae ko nderiwi Felipe jembireko,” jei chupe. Jare umbieta chupe wi jeta ñru mbae ikawi mbae wae uyapo wae re.

<sup>20</sup>Jayawe Herodes uyapo ye ñru mbae ikawi mbae wae, echa’ä oñonoka Juan peresoriru pe.

## Juan umbisakambu Jesús i pe

(Mateo 3.13-17; Marcos 1.9-11)

<sup>21</sup>Erëi ndei oñono reta Juan peresoriru pe mbowe, Juan umbisakambu iko jeta wae reta i pe. Jare jae nunga wi Juan umbisakambu Jesús. Jare jokua jaikue rupi, Jesús uyerure iko Tumpa pe. Jare jae uyerure iko rambuewe, ara uyepea.

<sup>22</sup>Jare Espiritu Santo uweyi ou ara wi Jesús re pëti pikasu rami. Jare uyendu ñee ara wi jei kuärái: “Nde ko jae cheRai nduauete wae. Nde chembiyerowiaete neï,” jei.

## Jesús iyipi reta jee

(Mateo 1.1-17)

<sup>23</sup>Jare Jesús ime ma onoi treinta año rupi yawe, umbipi oporomböe Tumpa re. İru wae reta wirowia tëi jae ko José tai. José ko jae Elí tai.

<sup>24</sup>Elí ko jae Matat tai. Matat ko jae Leví tai. Leví ko jae Melqui tai. Melqui ko jae Jana tai. Jana ko jae José tai.

<sup>25</sup>José ko jae Matatías tai. Matatías ko jae Amós tai. Amós ko jae Nahum tai. Nahum ko jae Esli tai. Esli ko jae Nagai tai.

<sup>26</sup>Nagai ko jae Maat tai. Maat ko jae Matatías tai. Matatías ko jae Semei tai. Semei ko jae José tai. José ko jae Judá tai.

<sup>27</sup>Judá ko jae Joana tai. Joana ko jae Resa tai. Resa ko jae Zorobabel tai. Zorobabel ko jae Salatiel tai. Salatiel ko jae Neri tai.

<sup>28</sup>Neri ko jae Melqui tai. Melqui ko jae Adi tai. Adi ko jae Cosam tai. Cosam ko jae Elmodam tai. Elmodam ko jae Er tai.

<sup>29</sup>Er ko jae Josué tai. Josué ko jae Eliezer tai. Eliezer ko jae Jorim tai. Jorim ko jae Matat tai.

<sup>30</sup>Matat ko jae Leví tai. Leví ko jae Simeón tai. Simeón ko jae Judá tai. Judá ko jae José tai. José ko jae Jonán tai. Jonán ko jae Eliaquim tai.

<sup>31</sup>Eliaquim ko jae Melea tai. Melea ko jae Mainán tai. Mainán ko jae Matata tai. Matata ko jae Natán tai.

<sup>32</sup>Natán ko jae David tai. David ko jae Isaí tai. Isaí ko jae Obed tai. Obed ko jae Booz tai. Booz ko jae Salmón tai. Salmón ko jae Naasón tai.

<sup>33</sup>Naasón ko jae Aminadab tai. Aminadab ko jae Aram tai. Aram ko jae Esrom tai. Esrom ko jae Fares tai. Fares ko jae Judá tai.

<sup>34</sup>Judá ko jae Jacob tai. Jacob ko jae Isaac tai. Isaac ko jae Abraham tai. Abraham ko jae Taré tai. Taré ko jae Nacor tai.

<sup>35</sup>Nacor ko jae Serug tai. Serug ko jae Ragau tai. Ragau ko jae Peleg tai. Peleg ko jae Heber tai. Heber ko jae Sala tai.

<sup>36</sup>Sala ko jae Cainán tai. Cainán ko jae Arfaxad tai. Arfaxad ko jae Sem tai. Sem ko jae Noé tai. Noé ko jae Lamec tai.

<sup>37</sup>Lamec ko jae Matusalén tai. Matusalén ko jae Enoc tai. Enoc ko jae Jared tai. Jared ko jae Mahalaleel tai. Mahalaleel ko jae Cainán tai.

<sup>38</sup>Cainán ko jae Enós tai. Enós ko jae Set tai. Set ko jae Adán tai. Adán ko jae Tumpa tai.

## Lucas 4

### Añawasu uipota tēi uyawika Jesús pe Tumpa koti

*(Mateo 4.1-11; Marcos 1.12-13)*

<sup>1</sup>Jayawe Jesús ou ye i wasu Jordán wi Espiritu Santo imbaepuere rewe. Jayawe jae oo Espiritu Santo jei wae rupi iwitini wasu koti tēta mbae rupi.

<sup>2</sup>Jare Jesús upita joko pe cuarenta ara rupi. Jayawe Añawasu ou uyawika waerä tēi chupe Tumpa koti. Opaete jokua ara reta rupi Jesús jou'ä mbae awe. Jáeramo jokua jaikue rupi iyembaí.

<sup>3</sup>Jayawe Añawasu jei chupe: “Nde ko jae Tumpa Tai yawe, yaecha ere kua ita pe tuyeyapo ndewe mbiyaperä,” jei chupe.

<sup>4</sup>Erēi Jesús jei chupe: “Ndarau ayapo. Echa'ä Tumpa iñeeriru pe uyekuatía oí kuärái: ‘Ndarau kiawe iko tembiu reño. Echa'ä tembiu ndarau umee chupe reta tekowe opa mbae wae. Imeta ko iko reta wi Tumpa jei wae re.’ Jukuärái uyekuatía oí,” jei chupe.

<sup>5</sup>Jayawe Añawasu wiraa Jesús pēti iwitu wasu iwate wae re, jare joko wi pēti uecha wae peño uechaka chupe opaetei tēta wasu reta imburuwicha wasu imbaepuere wae reta ndiwe.

<sup>6</sup>Jare Añawasu jei chupe: “Tamee ndewe mbaepuere opaete kua iwi reta re pēti pēti ipōra rewe. Echa'ä kua mbaepuere uñemee ko chewe, jare che chepuere amee ipotawe kía pe aipota wae rupi,” jei chupe.

<sup>7</sup>“Jáeramo añawe nde chembutuicha yawe, opaete kua mbaembae ndecha neí wae oíta ndepo pe,” jei chupe.

<sup>8</sup>Jayawe Jesús jei chupe: “Ndarau etei ayapo. Echa'ä Tumpa iñeeriru pe uyekuatía oí kuärái: ‘Tumpa jeeño ko pemptuichata, jare chupeño ko piyeyokuita.’ Jukuärái uyekuatía oí,” jei Jesús chupe.

<sup>9</sup>Jayawe Añawasu wiraa Jesús Jerusalén pe, jare uyupi reta yuraa iwatete ye tupao wasu iyapite re. Jare joko pe Añawasu jei Jesús pe: “Nde ko jae Tumpa Tai yawe, yaecha iyeriti kua wi.

<sup>10</sup>Echa'ä Tumpa iñeeriru pe uyekuatía oí kuärái: ‘Tumpa oyokuita araiwa reta uyandareko waerä nderé.



<sup>11</sup>Ipo pe ndepisita ndeoko reta awiye waerä ndeasa marái. Ndepi awe uyererokuata'ä ita re.' Jukuärái uyekuatía oí," jei Añawasu Jesús pe.

<sup>12</sup>Jayawe Jesús jei chupe: "Ndarau ayapo. Echa'ä Tumpa iñeeriru pe uyekuatía oí wi kuärái: 'Awiye pemboporowaiño peYa Tumpa imbaepuere,' jei," jei chupe.

<sup>13</sup>Jayawe Añawasu jeta ma uyere yawe Jesús re umbiyawika waerä tēi Tumpa koti, joko wi usiri chuwi mbowi ara pewa.

### **Jesús umbipi iparawiki**

*(Mateo 4.12-17; Marcos 1.14-15)*

<sup>14</sup>Joko wi Jesús uñatima ye oo iwi Galilea pe Espiritu Santo imbaepuere rewe. Jare jeräkua opaete jokua iwi rupi jese.

<sup>15</sup>Jare jae oporomboe tupao reta rupi, jare opaete wae uyemingeta kawi jese.

### **Jesús jētáíwa reta wirowia'ä jese**

<sup>16</sup>Jayawe Jesús oo ye tēta wasu Nazaret pe kiae jae ukuakuaa wae pe. Jare ara mbutuu pe uike tupao pe kērái jae uyapoñoi wae rami. Jayawe joko pe jae oo uyemboi opaete wae reta jenonde umingeta waerä Tumpa iñee.

<sup>17</sup>Jare umee reta chupe pēti tupapire uyembapúa oí wae, Isaías iñee uyekuatía oí pipe wae. Isaías ko jae pēti ñee Tumpa wi etei ou wae arakae umimbeu wae. Jayawe Jesús oyora jare uwäe chupe kiae umingeta waerä. Jare umingeta kuärái:

<sup>18</sup>"Tumpa ikoño mái wae iEspiritu oí cheré, echa'ä jae cheparawo a amimbeu waerä ñee ikawi wae iparawete wae reta pe. Jae chembou ambipiakatu waerä ipiatiti wae reta, jare amimbeu waerä pereso reta pe kērái ipuere waerä uyembopoika reta. Chembou wi amimae waerä jesa mbae wae reta, jare aepi waerä uiporara wae reta jowaicho reta wi.

<sup>19</sup>Jukuärái Espiritu Santo chembou amimbeu waerä kērái uwäe ma año yandeYa uechaka waerä ipiakawi opaete wae pe." Jukuärái Jesús umingeta chupe reta.

<sup>20</sup>Jayawe Jesús umbapúa ye tupapire, jare umee ye tupapire iyandarekoa pe, jare uwapi ye. Jare opaete tupao pe ñonoí wae reta uma ngatu jese.

<sup>21</sup>Jayawe Jesús jei chupe reta: "Kua ara etei uyeyapo perowake kua uyekuatía oí wae," jei.

<sup>22</sup>Opaete joko pe ñonoí wae reta uyemingeta kawi Jesús re, jare ipiakañi reta iñee ikawiete wae re. Jayawe jei reta iyupe: "¿Jae'ä yerá kua José tai?"

<sup>23</sup>Jayawe Jesús jei chupe reta: "Aikuaa aī mbae pipota pere peī chewe wae: 'Iyapo kua nerēta wasu pe jokua mbaembae reta jeräkua orewe ndiyapo tēta wasu Capernaum pe wae.'

<sup>24</sup>Erēi che tae pewe añetete wae, ime yawe kía umimbeu Tumpa iñee jētáíwa reta pe wae, jae reta uipotata'ä uyapisaka jese, echa'ä jae mbae'ä chupe reta ramo," jei chupe reta.

25“Pemandúa kawi peï, arakaete Elías iko rambuewe, oki’ä mbapi año jare owa yasi rupi, jare karuái tuicha wae opa uyembapi opaete iwi rupi. Jare che tae pewe añetete wae, jokuä año reta rupi ime yureko kua iwi Israel pe jeta kuña ime umano wae reta.

26Erëi Tumpa omondo’ä Elías ombori waerä pëti awe jae reta. Omondo tëta wasu rai Sarepta pe tëta wasu Sidón wi koiño, joko pe ombori waerä pëti kuña ime umano wae, jae’ä ko judía wae,” jei chupe reta.

27“Jare pemandúa kawi peï wi, arakaete yawe Tumpa iñee umimbeu wae Eliseo iko rambuewe, ime yureko kua iwi Israel pe jeta ipire okui wae reta. Erëi Eliseo uminguera’ä pëti awe jae reta. Jaeño uminguera Naamán – jae ko pëti kuimbae iwi Siria pewa.” Jukuärái Jesús jei chupe reta.

28Jayawe opaete tupao pe ñonoï wae reta kua uyandu yawe, pochiete reta Jesús pe.

29Jayawe jae reta upüa jare onoe wiraa Jesús tëta wasu wi oka pe. Jokuä tëta wasu oï pëti ñaipe re. Jayawe jae reta uipisi Jesús jare wiraa reta ñaipe iyapite re uiti reta waerä tëi iwawira wi.

30Erëi Jesús uasa jae reta ipite rupi jare oo ye chuwi reta.

### **Jesús omoë pëti añä kuimbae wi**

*(Marcos 1.21-28)*

31Jayawe Jesús oo tëta wasu Capernaum pe. Jae ko pëti tëta wasu iwi Galilea pe oï wae. Jare mbutuu ara pe umbipi oporomboe tupao pe.

32Jare uyapisaka jese wae reta ipiakañi jae oporomboe wae re, echa’ä jae oporomboe imbaepuere rewe.

33Jare jokuä tupao pe ime iko pëti kuimbae añä uyembiiya jese wae. Aramoiño jae iñeeäta rewe jei:

34“Jesús Nazaret pewa, ¿mbae pa ndeyu ndeka kua pe? ¡Emaeño oreré!” jei. “¿Ndeyu pa orerukachi waerä? Che ndukuaa. Nde ko jae Tumpa Tai jupiete wae,” jei.

35Jayawe Jesús iñeeäta rewe jei añä pe: “¡Nekii! Eë kua kuimbae wi,” jei chupe. Jayawe opaete wae jowake añä uiti kuimbae iwi re jare oë chuwi. Erëi marai’ä uyapo.

36Jare opaete kua uecha wae reta ipiakañiete, jare jei iyupe reta: “¿Mbae nunga ñee ra kua? Imbaepuere rewe jei añä reta pe oë waerä uyembiiya jese wae reta wi. ¡Jare jae reta oë!” jei reta.

37Jayawe jeräkua Jesús rewa opaete jokuä iwi rupi.

### **Jesús uminguera Simón Pedro jaicho**

*(Mateo 8.14-15; Marcos 1.29-31)*

<sup>38</sup>Jayawe Jesús oë ye tupao wi, jare oo uike pëti kuimbae Simón jee wae jëta pe. Jare Simón jaicho täta rupi jaku oï joko pe. Jare joko pewa reta umiñera Jesús uminguera waerä.

<sup>39</sup>Jayawe Jesús oo uyemboi wirapembi iyipi mii pe, jare jei iñeeäta rewe taku usiri waerä chuwi. Jare jaku upita woi chuwi. Jayawe jupiwoiño jokua kuña upüa jare umbipi uyapo tembiu umingaru reta waerä.

### **Jesús uminguera jeta imbaerasi wae reta**

*(Mateo 8.16-17; Marcos 1.32-34)*

<sup>40</sup>Jare warasi uike ma oo oï yawe, jokua tëta wasu pewa reta ueru opa yea imbaerasi wae reta Jesús oï wae pe Jesús uminguera reta waerä. Jayawe Jesús oñono ipo pëti pëti re, jare opa ukuera reta.

<sup>41</sup>Jae nunga wi omoë jeta aña uyembüya jese wae reta wi. Jare aña reta pëti pëti rupi oë yureko rambuewe, jei reta jäse rewe: “Nde ko jae Tumpa Tai,” jei reta. Erëi Jesús iñeeäta rewe umikii reta. Echa’ä jae reta uikuaa Jesús ko jae Cristo jei chupe reta wae. Erëi Jesús ndei uipota jokua ñee uñemiäi waerä opaete rupi.

### **Jesús oo iwi Galilea rupi umimbeu waerä Tumpa iñee**

*(Marcos 1.35-39)*

<sup>42</sup>Piarewe pe ndimboweasi, Jesús oë oo tëta wasu wi kii ngatu wae pe. Jayawe tëta wasu pewa reta yuraa ueka. Jare uwäe chupe reta yawe, umiñera tëi reta awiye waerä ueya reta.

<sup>43</sup>Erëi Jesús jei chupe reta: “Ikawi ko a waerä ñru tëta wasu rai reta pe, joko pe amimbeu waerä wi. Echa’ä che aipota jae reta uikuaa waerä wi koiñoete ma oï Tumpa imbaepuere mburuwicha wasu pewa uyekuaa waerä kua iwi pe. Echa’ä jokuaerä ko cheRu Tumpa chembou,” jei chupe reta.

<sup>44</sup>Jayawe Jesús oo opaete iwi Galilea rupi, jare jekuaeño umimbeu iko tupao reta rupi.

## **Lucas 5**

### **Jesús umbipi ueni jemimboe retarä**

*(Mateo 4.18-22; Marcos 1.16-20)*

<sup>1</sup>Pëti ara Jesús iko ipa wasu Genesaret jee wae jembei pe. Jare jeta wae yuweru jae oï wae pe uyapisaka reta waerä Tumpa iñee re. Jare oyopi ye reta Jesús.

<sup>2</sup>Jare Jesús uecha mokui chalana ipa wasu jembei pe oï. Iya reta pira uipisi wae reta ko, jare uweyi reta ma chuwi oyoe waerä ipisa reta.

<sup>3</sup>Jayawe Jesús uyupi Simón ichalana pe, jare ueka Simón pe uruuke waerä i pe i jembei pe seri. Jayawe Jesús uwapi chalana pe jare japipe wi omboe joko pe ñonoï wae reta.

<sup>4</sup>Jare opa ma oporomböe yawe, jae jei Simón pe: “Eraa ndechalana pea i tipí wae koti. Jare joko pe nde jare ndeparawiki ñru reta ndiwe pemombo pepisa reta pipisi waerä pira,” jei chupe.

<sup>5</sup>Jayawe Simón jei Jesús pe: “Oporomböe wae, orekoe ma nduparawiki tõi. Erëi nduipisi’ä mbae awe. Erëi añawe nde ndere chewe ramo, tamombo pisa reta,” jei chupe.

<sup>6</sup>Jare jukuärái uyapo reta yawe, jetaete pira reta uike ma pisa reta pe. Jáeramo pisa reta umbipi osoro.

<sup>7</sup>Jayawe uyepueru reta ñru chalana pe ñonoï wae reta pe yuweru waerä ombori. Jayawe jae reta yuweru ombori jare umitinee reta mokui rewe chalana. Jare mokui rewe chalana reta poiete jare usakambu pota echa.

<sup>8</sup>Jare Simón Pedro kua uecha yawe, uñeñono itawa re Jesús jowai uipiu rewe. Jare jei chupe: “CheYa, esiri mii chewi. Echa’ä che ko jae kuimbae jeko kachi wae.”

<sup>9</sup>Jukuärái Simón jei chupe, echa’ä jae jare opaete jae ndiwe ñonoï wae reta ipiakañiete jokua jetaete pira reta uipisi ramo, jare ukiye reta wi.

<sup>10</sup>Jae ramiño wi Simón ñru reta Jacobo jare Juan jee wae ipiakañi jokua re. Jae reta ko Zebedeo tai reta jare Simón iparawiki ñru reta. Jayawe Jesús jei Simón pe: “Awiye ekiye,” jei. “Che ime anoi mbarawiki nemaerä. Añawe wiwe nderuta ñru wae reta chekoti,” jei chupe.

<sup>11</sup>Jayawe jae reta opa onoe ichalana i wi iwitini pe jare joko pe ueya reta. Jare jae nunga wi ueya opaete imbaembae reta yuraa waerä Jesús ndiwe jemimboe retarä.

### **Jesús uminguera kuimbae ipire okui wae**

*(Mateo 8.1-4; Marcos 1.40-45)*

<sup>12</sup>Jayawe Jesús jare jemimboe reta ndiwe opa yuraa uwäe pëti tëta wasu pe. Jare joko pe ñonoï reta rambuewe, ou owäiti pëti kuimbae ipire okui wae. Jayawe jokua kuimbae parawete uecha Jesús yawe, uñeñono iwí re Jesús jowai jare ikuasi katu rewe jei chupe: “CheYa, nde ndipota yawe, ndepuere cheminguera mii jukuärái wi chekia mbae äi waerä,” jei chupe.

<sup>13</sup>Jayawe Jesús oñono ipo jese jei rewe: “Aipotaete ndekuera waerä. Añawe ekuera,” jei chupe. ¡Jare jupiwoiño kuimbae ukuera imbaerasi wi!

<sup>14</sup>Jayawe Jesús jei chupe: “Awiye embeu kía pe awe che ko numinguera wae,” jei. “Ekua iychaka sacerdote pe jae uikuaa waerä nde ndekuera ma ko. Jare emee wi Tumpa pe mbae kërái arakaete Moisés jei wae rami, ime yawe kía kua nunga mbaerasi wi ukuera wae. Joko wi ramo sacerdote umimbeuta tëta wasu pewa reta pe ndekuera ma ko, jare jukuärái ndepuereta niñemiiru ye jae reta ndiwe,” jei chupe.

<sup>15</sup>Erëitu jesewe jeieteño jeräkua Jesús uyapo wae rewa. Jáeramo jeta wae reta yuweru jae oi wae pe uyapisaka waerä jese jare jae uminguera waerä imbaerasi ñonoï wae reta.

**16** Erëi Jesús jeta wese usiri chuwi reta, jare oo kii ngatu wae pe uyerure waerä Tumpa pe jaeño pe etei.

### **Jesús uminguera pëti kuimbae ipuere mbae omi wae**

*(Mateo 9.1-8; Marcos 2.1-12)*

**17** Pëti ara Jesús oporomboe iko, jare amokue fariseo reta jare Moisés uikuatía wae re oporomboe wae reta uwapi yureko jokoropi. Jae reta yuweru tëta wasu Jerusalén wi, jare opaete iwi Galilea wi, jare iwi Judea wi uyapisaka reta waerä jese. Jare Tumpa imbaepuere uyekuaa Jesús rupi upuruminguera waerä.

**18** Jayawe amokue kuimbae reta owoi ueru jupa rewe pëti kuimbae ipuere mbae omi wae. Jare jokua kuimbae ueru wae reta uipota tēi uruike wiraa o pe Jesús oï wae pe.

**19** Erëi ipuere'ä reta, echa'ä jetaete o pe ñonoï ramo. Jáeramo uruyupi reta tēta iáramo, jare ombosopu reta chupe Jesús jese katu. Jokoropi umbiweyi reta jokua kuimbae ipuere mbae omi wae jupa rewe Jesús iyipi pe.

**20** Jare Jesús kua uecha yawe, uikuaa jae reta wirowia kawi jese wae. Jáeramo jei kuimbae ipuere mbae omi wae pe: “Cherai, teko nenoï Tumpa koti wae opa ma uyembái ndewi,” jei chupe.

**21** Jayawe Moisés uikuatía wae re oporomboe wae reta jare fariseo reta pëti pëti wae ipia pe umbipi uyemingeta kuärái: “¿Kiaete ra kua kuimbae pochi jukuärái uyemingeta waerä? Jae uyapo ma mbae kachi wae, echa'ä uyemingeta oï Tumpa rami. Tumpaño ko ipuere umbái yandewi teko ñanoï ikoti wae.” Jukuärái ipia pe uyemingeta reta.

**22** Jayawe Jesús uikuaa woi chuwi reta ipiyemingeta, jare jei chupe reta: “¿Maera pa jukuärái piyemingeta peï pepia pe?” jei.

**23** “Che jae kua kuimbae pe, ‘Teko nenoï Tumpa koti wae opa ma uyembái ndewi,’ jae chupe. Erëi ipotawe kía yawai'ä jokua jei waerä,” jei. “Yawaita ko ipotawe kía jei chupe waerä kuärái: ‘Epüa jare ewata.’ Echa'ä aramoï ukuera'ä yawe, jayawe imarata upita,” jei.

**24** “Jayawe taminguera kua kuimbae perowake pikuaa waerä che kuimbaerä ayeyapo wae ime ko anoi wi mbaepuere kua iwi pe ambái waerä kía wi teko onoi Tumpa koti wae,” jei Jesús chupe reta. Jayawe Jesús jei kuimbae ipuere mbae omi wae pe: “Che tae ndewe, epüa. Eupi nderupa, jare ekua nerëta pe,” jei chupe.

**25** Jayawe jupiwai kuimbae upüa opaete wae jowake jare ueupi jupa. Jare oë oo jëta koti Tumpa jee umbutuicha rewe.

**26** Jae ramiño wi opaete joko pe ñonoï wae reta umbutuicha Tumpa jee. Echa'ä opa rewe ipiakañiete jare ukiye reta wi. Jei reta: “¿Kua ara yaecha mbaembae ikawiete wae mbaetii kiawe uecha wae!” jei reta.

### **Jesús ueni pëti kuimbae Leví jee wae iko waerä jemimboerä**

*(Mateo 9.9-13; Marcos 2.13-17)*

<sup>27</sup>Jayawe Jesús oë oo ye joko wi. Jare oo iko rambuewe, uecha pëti kuimbae Leví jee wae uwapi oï kiate umbiepi reta mburuwicha pewarä okowara wae pe. Echa'ä Leví ko jae pëti wae mburuwicha pewarä okowara wae. Jayawe Jesús jei chupe: “Eyu che ndiwe ndiko waerä cheremimboerä,” jei chupe.

<sup>28</sup>Jayawe Leví upüa, jare ueya opaetei imbaembae, jare oo Jesús ndiwe.

<sup>29</sup>Jare kaaru katu ma yawe, Leví uyapoka tembiu jëta pe Jesús pewarä. Jare uparea wi mburuwicha pewarä okowara wae reta pe jare ñru wae reta pe.

<sup>30</sup>Erëi Moisés uikuatía wae re oporomboe wae reta jare fariseo reta kua uecha yawe, iyengeta reta Jesús jemimboe reta pe. Jei reta: “Mase, pemboea ukaru oï okowara wae reta ndiwe jare ñru jeko kachi wae reta ndiwe. ¿Kërái pa jokua añawe?” jei reta.

<sup>31</sup>Jesús kua uyandu yawe, jei umbijaanga rewe chupe reta: “Ikowe katu wae reta ueka'ä iyupe upurupiano wae,” jei. “Imbaerasi wae retaño ko ueka.

<sup>32</sup>Jáeramo che ayu'ä aeni waerä jupi wae reta. Ayu ko aeni waerä jeko kachi wae reta ueya reta waerä ipiyemingeta jupi mbae wae Tumpa rewa,” jei chupe reta.

### **Maera Jesús jemimboe reta oñono tee'ä ara reta ukaru mbae waerä**

*(Mateo 9.14-17; Marcos 2.18-22)*

<sup>33</sup>Jayawe amokue wae reta jei Jesús pe: “Juan jemimboe reta oñono teeñoi ara reta ukaru mbae waerä umbiyerowia reta waerä Tumpa. Jare fariseo jemimboe reta jukuärái uyapo wi. Erëi nde nderemimboe reta uyapo'ä jukuärái. ¿Kërái pa jokua?” jei chupe.

<sup>34</sup>Jayawe Jesús jei chupe reta umbijaanga rewe: “Uparea reta yawe menda pe, ¿këraita pa yae joko pe ñonoï wae reta pe ukaru mbae reta waerä? Ndarau jukuärái yae chupe reta kuimbae umenda wae imeño oï jae reta ndiwe rambuewe. Echa'ä ara yerowia pewa ko,” jei chupe reta.

<sup>35</sup>“Erëi outa uwäe ara kuimbae umenda wae uyereraa waerä chuwi reta. Jayawe ramo jae reta oñono teeta ara reta ukaru mbae waerä,” jei chupe reta.

<sup>36</sup>Jare Jesús jei wi chupe reta umbijaanga rewe: “Mbaeti kiawe uyasía temimonde ipiau wae omboya waerä pipe temimonde indechi wae. Echa'ä jukuärái uyapo yawe, urükumewaiño ma ko temimonde ipiau wae. Jare wi jokua mbaemboyaka ipiau wae ambie ye ko temimonde indechi wae wi,” jei chupe reta.

<sup>37</sup>“Jae nunga wi kiawe umbiru'ä vino ipiau wae vino jiru wakapi pewa indechikue pe. Echa'ä jukuärái uyapo yawe jare vino jayasi yawe, omondorota jiru jare opata uyepiyere. Jayawe vino jare jiru ndarau ma ikawi.

<sup>38</sup>Jáeramo yambiru ko vino ipiau wae jiru ipiau wae pe,” jei. “Jukuäraiete wi che aporomboe wae ipiau wae ko,” jei chupe reta.

<sup>39</sup>“Erëi pe reta pipota’ä che aporomboe wae. ¿Maera pa pipota’ä? Echa’ä ime yawe kía jou vino indechi wae, uipota’ä jupiwoiño jou vino ipiau wae. Echa’ä jae jei vino indechi wae ikawiete ko vino ipiau wae wi,” jei Jesús chupe reta umbijaanga rewe.

## Lucas 6

### Jesús oporomboe mbutuu ara rewa

(Mateo 12.1-8; Marcos 2.23-28)

<sup>1</sup>Pëti mbutuu ara Jesús oo iko pëti koo rupi jemimboe reta ndiwe. Jare uasa yureko reta rambuewe, jemimboe reta uipoo trigo, jare ueki reta chuwi ipire, jare jou reta.

<sup>2</sup>Jayawe amokue fariseo reta jei chupe reta: “¿Maera pa piyapo pei Moisés arakae jei awiyeta ko yayapo tēi mbutuu ara pe wae?” jei chupe reta.

<sup>3</sup>Jayawe Jesús jei chupe reta: “¿Pemingeta’ä yerá Tumpa iñeeriru pe kërái arakaete David uyapo wae re?” jei chupe reta. “Pëti wese David jare jae ndiwe ñonoï wae reta iyembaiete.

<sup>4</sup>Jayawe David uike tupao wakapi pewa pe jou waerä mbiyape reta Tumpa pewarä uñeñono tee wae. Erëi Moisés arakae jei jaeño sacerdote reta ipuere jou jokua mbiyape. Erëi David jou, jare umee jae ndiwe yureko wae reta pe jae reta wi jou waerä,” jei chupe reta.

<sup>5</sup>Jare Jesús jei wi jokua fariseo reta pe: “Che kuimbaerä ayeyapo wae ime anoi mbaepuere jae waerä mbae ko yayapota mbutuu ara pe wae,” jei chupe reta.

### Jesús uminguera pëti kuimbae ipo jowaicho utini wae

(Mateo 12.9-14; Marcos 3.1-6)

<sup>6</sup>Jare iru ara mbutuu pe Jesús oo uike pëti tupao pe jare joko pe oporomboe. Jare joko pe oï wi pëti kuimbae ipo iyakata utini wae.

<sup>7</sup>Jare Moisés uikuatía wae re oporomboe wae reta jare fariseo reta umae ngatu Jesús re upuruminguerata ra mbutuu ara pe wae re. Echa’ä Jesús uminguera yawe kuimbae, jeita reta Jesús uparawiki ma mbutuu ara pe jare umbijekota tēi reta jokua re.

<sup>8</sup>Erëi Jesús uikuaa jae reta ipiyemingeta, jare jei kuimbae ipo jowaicho utini wae pe: “Epüa. Eyu iyemboi kua reta jowai,” jei chupe. Jayawe kuimbae upüa uyemboi jae reta jowai.

<sup>9</sup>Jayawe Jesús upirandu fariseo reta pe: “¿Mbae ra ko jupi yayapo waerä mbutuu ara pe? ¿Ikawi wae, ani ikawi mbae wae? ¿Yapuruepi waerä, ani yapuruyuka waerä? ¿Mbae pa jei Tumpa kua rewa?” jei chupe reta.

<sup>10</sup>Jayawe umae opaete iyipi rupi ñonoï wae reta re, jare jei kuimbae pe: “Emisimi ndepo,” jei chupe. Jayawe kuimbae ipo umisimi jare ukuera woi.

<sup>11</sup>Jayawe Moisés uikuatía wae re oporomboe wae reta jare fariseo reta pochiete Jesús koti, jare uyemboemboe reta kërái uyapo waerä mbae ikawi mbae wae Jesús koti.

## Jesús jemimboe tenondewaete reta jee

(Mateo 10.1-4; Marcos 3.13-19)

<sup>12</sup>Jokua ara reta rupi Jesús oo uyupi pëti iwitu re uyerure waerä Tumpa pe. Jare iköe joko pe uyerure Tumpa pe.

<sup>13</sup>Jare köe ma yawe, umbatika jemimboe reta. Jayawe jae reta ipite wi Jesús uiparawo doce kuimbae reta. Jare taikue rupi jae omondota iko reta jae jee re umimbeu waerä Tumpa iñee. <sup>14</sup>Kuärái ko jae reta jee: Simón (kua kuimbae Jesús umbijee Pedro), jare Simón tiwi Andrés jee wae, jare Jacobo, Juan, Felipe, Bartolomé,

<sup>15</sup>Mateo, Tomás, Alfeo tai Jacobo jee wae, jare Simón (kua Simón jae ko ñru wae reta ueni wi Zelote pe),

<sup>16</sup>jare Jacobo tiwi Judas jee wae. Jare jae nunga wi Jesús uiparawo Judas Iscariote (kua kuimbae taikue rupi umeeta wireko Jesús jowaicho reta pe). Jukuärái ko jee Jesús uiparawo wae reta.

## Jesús omboe jeta wae reta

(Mateo 4.23-25)

<sup>17</sup>Jayawe kua reta ndiwe Jesús uweyi ye iwitu wi iwi ipe wae pe. Jare joko pe jeta wae reta uyembati uäro ñonoï. Jae reta ko Jesús jemimboe reta wi. Jare joko pe ñonoï wi jeta iwi Judea pewa reta, jare Jerusalén pewa reta, jare tëta wasu reta Tiro jare Sidón mar jembei rupiwa reta. Opaete wae yuweru uyapisaka waerä Jesús iñee re jare Jesús uminguera waerä imbaerasi wae reta.

<sup>18</sup>Jare Jesús uminguera wi añä uyembiiya jese wae reta.

<sup>19</sup>Jare opaete wae reta uipota uyawiki Jesús. Echa'ä jae reta uikuaa jae ime onoi mbaepuere uminguera waerä opaete imbaerasi wae reta.

## Jesús jei kía uyekoueteta oï wae

(Mateo 5.1-12)

<sup>20</sup>Jayawe Jesús umae jemimboe reta re jare jei chupe reta: “Peparawete peï wae reta, piyekoueteta peï kuri. Echa'ä pe reta pikota Tumpa ndiwe jae oï ma yawe opaete wae imburuwicha wasurä jaeño mái pewa.

<sup>21</sup>Jare pe añawe rupi piyembai peï wae reta, piyekoueteta peï kuri. Echa'ä peangapiita peï kuri. Jare pe añawe rupi piyao peï wae reta, piyekoueteta peï kuri. Echa'ä pepukata peï kuri.

<sup>22</sup>Jare che kuimbaerä ayeyapo wae, pe reta perowia cheré ramo, ñru wae reta peamitääta ñonoï jare pemombota reta iyuwí. Jare jeita reta mbaembae kachi wae pekoti, jare jeita pewe reta: ‘Añawasu ko.’ Erëi jukuärái uyapo reta pewe yawe, piyekoueteta peï kuri.



<sup>23</sup>Echa'ä Tumpa umiñatimata oï pewe ara pe opaete mbaembae piporara wae rupi. Jáeramo piyerowiaete jare pepiakatu jukuärái piporara yawe. Añetete jukuärái wi jae reta tamikue reta uiporaraka arakae Tumpa iñee umimbeu wae reta pe.

<sup>24</sup>Erëi pe pikokatu wae reta, ¡pikuasita peï! Añaweño ko piyerowia peï pekorepoti re. Erëi taikue rupi mbaeti yeta ma oï mbae re piyerowia waerä.

<sup>25</sup>Jare pe añawe rupi peangapii kawi peï wae reta, ¡pikuasi parawete! Echa'ä uwäeta oï kuri ara piyembai waerä. Jare pe añawe rupi pepuka jare perorikatu peï wae reta, ¡pikuasi parawete! Echa'ä uwäeta oï kuri ara pepiatiti waerä jare piyao waerä.

<sup>26</sup>Jare pikuasi parawete opaete wae uyemingeta kawi peré yawe. Jukuäráiño wi tamikue reta uyemingeta kawi Tumpa iñee umimbeuraanga wae reta re,” jei Jesús chupe reta.

### **Jesús yanemboe yaiparareko waerä yanderowaicho reta**

*(Mateo 5.38-48, 7.12)*

<sup>27</sup>Jare Jesús jei wi chupe reta: “Erëi pe piyapisaka peï chiñee re wae reta, che tae pewe kua: Peauta ko perowaicho reta, jare piyapota ikawi wae peamitää wae reta pe,” jei.

<sup>28</sup>“Jare ñru wae reta uyepipeyu peré yawe, pereta ko chupe reta: ‘Tumpa tuyapo ikawi wae pewe.’ Jare ime yawe kía reta mbae ikawi mbae wae uyapo pewe wae, piyerure Tumpa pe jese reta,” jei.

<sup>29</sup>“Jare ime yawe kía nderowapete wae, erowa wi chupe jowaicho kotiwa uipete ye waerä. Jare ime yawe kía niñepëwaka upïro ndewi wae, jayawe emee chupe wi ndecamisa,” jei.

<sup>30</sup>“Jae ramiño wi ime yawe kía mbae ueka ndewe wae, emeeño chupe. Jare ime yawe kía nembraembae upïro ndewi wae, emaeño jese. Awiye mbae ere chupe,” jei.

<sup>31</sup>“Opaete kua mbaembae rupi che jae aï pewe kuärái: kërái pe reta pipota ñru wae reta uyapo pewe ikawi wae pemaerä, jukuärái wi pe reta piyapota ko ikawi wae chupe reta,” jei Jesús chupe reta.

<sup>32</sup>“Erëi pe reta peau yawe jokua perau wae retaño, ¿jokua re umiñatimata ra pewe ikawi wae Tumpa? Ndarau. Echa'ä jeko kachi wae reta wi uyapo jukuärái,” jei.

<sup>33</sup>“Jare ikawi wae uyapo pewe wae reta peño piyapo yawe ikawi wae, ¿jokua re umiñatimata ra pewe ikawi wae Tumpa? Ndarau. Echa'ä jeko kachi wae reta wi uyapo jukuärái,” jei.

<sup>34</sup>“Jare piporuka yawe mbae ñru wae pe, jokua perowia umiñatima yeta pewe wae peño, ¿jokua re umiñatimata ra pewe ikawi wae Tumpa? Ndarau. Echa'ä jeko kachi wae reta wi uyapo jukuärái,” jei chupe reta.

<sup>35</sup>“Erëi pe reta imeta ko peau perowaicho reta, jare piyapo ikawi wae chupe reta. Piporuka wi pembraembae chupe reta peäro mbae rewe umiñatima waerä pewe

jokua re,” jei. “Jukuärái piyapo yawe, Tumpa tuicha umiñatimata oï pewe kuri, jare uyekuaata pe reta ko jae Tumpa imbaepuere tuichaete wae tai reta añetete wae,” jei. “Echa’ä Tumpa ipiakawi oï opaete pewarä, yepe tēi jeta wae reta umee’ä etei yasurupái chupe jare jeko kachi wi.

<sup>36</sup>Pipararekota ko perapicha kērái peRu ara pe oï wae peparareko rami,” jei Jesús chupe reta.

### **Kērái ĩru wae pe yayapo wae rupi uyeyapota oï yandewe**

*(Mateo 7.1-5)*

<sup>37</sup>Jare Jesús jei wi chupe reta: “Pipota’ä kía iñera waerä peré yawe, jayawe pe reta awiye wi piñera kía re awe. Jae ramiño wi pipota’ä yawe kía jei waerä pewe, ‘Jupi ko Tumpa uiporarakä waerä ndewe,’ jayawe awiye wi pere kía pe awe jukuärái,” jei. “Jare ime yawe kía ikawi mbae wae uyapo pewe wae, awiye pemandúa chupe. Jare jukuärái jae ndarau imandúa pewe wi mbae ikawi mbae piyapo chupe wae re,” jei.

<sup>38</sup>“Mbaembae uata chupe wae pe pemeeta ko chupe, jare jukuäriete wi uñemeeta pewe. Añetete jetaete ye ye uñemeeta pewe. Echa’ä kērái ĩru wae pe piyapo wae rupi uyeyapota oï pewe wi,” jei chupe reta.

<sup>39</sup>Jayawe Jesús jei wi chupe reta umbijaanga rewe: “¿Kēraita ra ko pēti jesa mbae wae uipoko uruwata yawe ĩru jesa mbae wae? ¿Uasawita’ä yerá mokui rewe iwikua pe? Jayawe piparawo kawī peyupe pemboearä,” jei.

<sup>40</sup>“Pēti uyemboe wae ndarau uasa imboea íramo rupi. Erēi uyemboe kawiete ma yawe, iyarakuaa katuta imboea rami,” jei chupe reta.

<sup>41</sup>Jare jei wi chupe reta umbijaanga rewe: “Nde neratangātu neī nemeae waerä iti michi wae neīru jesa pe oï wae re. Erēi ¿maera pa nde nemeae’ä iwira puku nderesa pe oï wae re?” jei chupe reta.

<sup>42</sup>“Nde ndere: ‘Tētara, taeki nderesa wi jokua iti michi wae,’ ndere. Erēi ¿kēraita pa ndepuere ndiyemingeta jukuärái nde ime yawe nenoī iwira puku wae nderesa pe? Jukuärái ndiyapo yawe, jayawe ndiyemingetaiño ko neī,” jei. “Che tae ndewe, tenonde eki rani iwira puku wae nderesa wi. Jare jayawe ramo nemeae kawita ndepuere waerä ndeki iti michi wae neīru jesa wi,” jei Jesús chupe reta umbijaanga rewe.

### **Iwira ía ikawi wae jare ía ikawi mbae wae**

*(Mateo 7.17-20, 12.33-35)*

<sup>43</sup>Jare Jesús jei wi chupe reta: “Pēti iwira ía ikawi umee wae ndarau umee ía ikawi mbae wae. Jae ramiño wi pēti iwira ía ikawi mbae umee wae ndarau umee ía ikawi wae.

<sup>44</sup>Echa’ä opaete iwira ía re ko yaikuaa,” jei. “Yaikuaa ñaī ndarau yaipoo iwa iwopēre jáka wi. Jae ramiño wi uva ndarau yaipoo kapiāti wi,” jei.

<sup>45</sup>“Jare jukuärái wi kía ipia ikawi oï wae onoi mbae ikawi wae ipia pe, jare joko wi omoë iñee ikawi wae,” jei. “Jare kía ipia ikawi’ä oï wae onoi ipia pe mbae ikawi mbae wae, jare joko wi omoë iñee ikawi mbae wae. Echa’ä yande pëti pëti wae yandepia pe oï wae rupi ko yayemingeta,” jei chupe reta.

### **Jesús jei wae uyapo wae reta tëta itape re oï iwapika wae rami ko**

*(Mateo 7.24-27)*

<sup>46</sup>Jare Jesús jei wi chupe reta: “¿Maera pa pere chewe ‘OreYa,’ erëi piyapo’ä che jae wae?” jei.

<sup>47</sup>“Ime yawe kía ou chekoti uyapisaka waerä cheré wae jare iko yawe che jae wae rupi, jae ko kuärái:

<sup>48</sup>Jae ko pëti kuimbae jëtarä uyapo wae rami,” jei. “Oyoo kipe oñono waerä tëta iwapikarä itape re. Jare opa ma jëta uyapo yawe, ama tuicha oki, jare i uyembutuicha oo jare uyepete tëta re. Erëi tëta oa’ä etei, echa’ä iwapika itape re oï ramo,” jei. “Jukuärái rami ko che jae wae uyapo wae reta iyarakuaa katu ñonoï,” jei chupe reta.

<sup>49</sup>“Erëi ime yawe kía uyandu tëi kua chiñee wae jare mbaeti uyapo wae, jae ko ñru kuimbae jëtarä uyapo wae rami. Erëi jae oñono’ä jëta iwapikarä itape re. Jae uyapo jëtarä iwi iaramoño,” jei. “Jare opa ma jëta uyapo yawe, ama tuicha oki, jare i uyembutuicha oo jare uyepete tëta re. Jare jupiwoiño opa umbiyapara, jare opa uyembái opaetei,” jei. “Jukuärái rami ko chiñee uyandu tëi wae reta erëi uyapo’ä reta.” Jukuärái jei Jesús jokua jeta uyembati ñonoï wae reta pe.

## **Lucas 7**

### **Jesús uminguera sindaro reta itenondewa pe uyeyokui wae**

*(Mateo 8.5-13)*

<sup>1</sup>Jare Jesús opa ma omboe yawe uyembati wae reta, oo tëta wasu Capernaum pe.

<sup>2</sup>Jare jokua tëta wasu pe ime iko pëti kuimbae romano; sindaro reta itenondewa ko. Jae ime wireko pëti uyeyokui wae uauete wae. Jare jokua uyeyokui wae parawete imbaerasi oï jare umanota ma oï.

<sup>3</sup>Jayawe Jesús jeräkua sindaro reta itenondewa pe. Jáeramo omondo Jesús oï wae pe amokue judío itenondewa reta, umiñera waerä Jesús ou uminguera waerä chupe uyeyokui wae.

<sup>4</sup>Jayawe yuweru uwäe reta yawe Jesús oï wae pe, jae reta umiñera Jesús ombori waerä kuimbae. Jei reta chupe: “Jupi ko nembori waerä kua mburuwicha.

<sup>5</sup>Echa’ä jae yanderau jare uyapoka yandewe pëti tupao,” jei reta Jesús pe.

<sup>6</sup>Jayawe Jesús oo jae reta ndiwe. Jare yuraa seri ma uwäe reta yawe jokua sindaro reta itenondewa jëta pe, jae ombou amokue ñru reta owäiti waerä Jesús. Jare owäiti reta ma yawe, jei reta chupe: “Mburuwicha jei ndewe: ‘Awiye tuyembipia’äete,” jei. Jare jei wi: ‘Che parawete jupi’ä ko jae ou waerä cherëta pe.

<sup>7</sup>Jáeramo a'ä awäiti,' jei. Jare jei wi: 'Jesús oï wae wiño tei uyeyokui chewe wae ukuera waerä.

<sup>8</sup>Echa'ä che aikuaa wi kërái ko mbaepuere reta,' jei. 'Che ime anoi chemburuwicha reta, jare che imeta ko ayapo jae reta jei chewe wae,' jei. Jare jei wi: 'Jae ramiño wi ime sindaro reta che ayokui wae. Che jae yawe pëti sindaro pe, 'Eku,' jae imeta ko oo. Jare jae yawe ñru sindaro pe, 'Eyu,' jae imeta ko ou. Jae ramiño wi che jae yawe uyeyokui chewe wae pe mbae uyapo waerä, jae imeta ko uyapo. Jáeramo che aikuaa Jesús mbae jei yawe, uyeyapota ko.' Jukuärái jei mburuwicha," jei reta Jesús pe.

<sup>9</sup>Jare Jesús kua uyandu yawe, ipiakañiete jokua sindaro reta itenondewa re. Jayawe uyerowa jare jei jaikue yuraa wae reta pe: "Che tae pewe, awäe'ä etei kía kuärái tuicha wírowia cheré wae kua iwí Israel rupi awe," jei chupe reta.

<sup>10</sup>Jayawe sindaro reta itenondewa ombou wae reta opa ye yuraa. Jare tëta pe yuraa ma uwäe reta yawe, uecha ukuera ma jokua uyeyokui wae imbaerasi iko wae.

### **Jesús umbijekowe ye kuña ime umano wae imembirae**

<sup>11</sup>Jare kua jaikue rupi Jesús oo tëta wasu Naín jee wae pe. Jare jemimboe reta jare jeta ñru wae reta yuraa jae ndiwe.

<sup>12</sup>Jare yuraa seri ma uwäe reta yawe tëta wasu jöke pe, ko oë yuweru kía jetekue wíraa oñoti wae reta. Jokua umano wae ko jae pëti kuña ime umano wae imembirae jae waeño wae. Jare jeta tëta wasu pewa reta yuweru ñonoï jokua kuña ndiwe.

<sup>13</sup>Jare yandeYa uecha yawe jokua kuña, uiparareko umaee jese jare jei chupe: "Awiye iyao," jei.

<sup>14</sup>Jayawe Jesús oo oñono ipo kunumi jetekue uruwata pipe wae re. Jare owoi ueru wae reta opa uyemboi. Jayawe Jesús jei taurusu wae pe: "Che tae ndewe, epüa," jei chupe.

<sup>15</sup>Jare jupiwoiño umano wae upüa uwapi jare umbipi uyemingeta! Jayawe Jesús jei ichi pe: "Ko oï nemembi, cherindi mii," jei chupe.

<sup>16</sup>Jayawe opaete wae ukiye jare umbutuicha reta Tumpa jee jei rewe: "Tumpa ñnee umimbeu wae imbaepuere wae ou ma kua yandepite pe." Jare jei reta wi: "Tumpa etei yanembori oï, yande jae yandeparawo wae reta," jei reta.

<sup>17</sup>Jare kua Jesús uyapo wae jeräkua opaete iwí Judea rupi jare iyipi rupi.

### **Jesús oporomboe Juan upurumbisakambu wae rewa**

*(Mateo 11.2-19)*

<sup>18</sup>Jare Juan upurumbisakambu wae jemimboe reta yuraa umimbeu Juan pe Jesús opaete kua uyapo wae rewa.

<sup>19</sup>Jayawe Juan ueni mokui jemimboe reta jare jei chupe reta: "Pekua yandeYa oï wae pe pepirandu chupe jae ra ko Upuruepi wae outa iko wae, ani jekuaeño ñäärota ñru wae," jei chupe reta.

**20**Jayawe jokua kuimbae reta yuraa uwäe Jesús oï wae pe jare jei chupe: “Juan upurumbisakambu wae orembou ndupirandu ndewe waerä, ¿nde pa ko jae Upuruepi wae outa iko wae, ani jekuaeño pa nuärota ñru wae?” jei reta chupe.

**21**Jokua ora pe etei Jesús uminguera oï jeta imbaerasi wae reta, jare omoë oï jeta añä uyembiiya jese wae reta wi. Jae ramiño wi umimae oï jeta jesa mbae wae reta.

**22**Jayawe Jesús jei Juan ombou wae reta pe: “Pekua ye pemimbeu Juan pe kua piyandu wae re jare pecha wae re. Pere chupe kuärái: ‘Jesa mbae wae reta umae ma. Ipuere mbae uwata wae reta uwata ma. Ipire okui wae reta ukuera ma. Iyapisa mbae wae reta uyandu ma. Umanokue wae reta ikowe ye ma. Jare ikuasi wae reta uyandu ñonoï ñee ikawi wae.’ Jukuärái pere chupe,” jei chupe reta.

**23**“Aramoi kua ayapo aï wae jae’ä ko jeta wae reta wirowia tõi Upuruepi wae uyapota iko wae. Erëi uyekoueteta ñonoï jokua chereriro mbae wae reta.” Jukuärái Jesús jei Juan jemimboe reta pe.

**24**Jare yuraa ye ma yawe Juan ombou wae reta, Jesús umbipi uyemingeta joko pe ñonoï wae reta pe Juan rewa. Jei chupe reta: “Karamboe peo yawe iwitini wasu pe piyapisaka waerä Juan iñee re, ¿mbae nunga kuimbae peo pecha joko pe? ¿Pecha yerá joko pe pëti kuimbae takuaräsi koti koti omi oï rami wae? Mbaeti. Echa’ä Juan aramoimoïño uyemingeta wae’ä ko,” jei.

**25**“¿Peo yerá pecha pëti kuimbae jemimonde ikawi wae? Mbaeti. Echa’ä temimonde ikawi wae omonde wae reta ñonoï ko mburuwicha wasu jëta pe, jare ikawiete yureko reta,” jei chupe reta.

**26**“Jayawe ¿kía pa peo pecha? Peo ko pecha waerä pëti kuimbae Tumpa ombou iñee umimbeu waerä wae – jae ko Juan. Jare che tae pewe añetete wae, Juan ikawiete ko ipotawe ñru kuimbae Tumpa iñee umimbeu wae reta wi.

**27**Echa’ä Tumpa iñeeriru pe uyekuatía oï jese kuärái: ‘YandeRu Tumpa jei Tai pe: ‘Mase, che amondota aï tenonde mii ndewi chiñee umimbeu wae. Jare jae umimbeuta oï ñru wae reta pe uyeyapikatu reta waerä ndei newäe mbowe,’ jei Tai pe.’ Jukuärái uyekuatía oï,” jei chupe reta.

**28**“Che tae pewe añetete wae, opaete kuimbae reta wi mbaetii kía nungawe imbaepuerete Juan wi. Erëitu taikue rupi Tumpa oï ma yawe opaete wae imburuwicha wasurä, ipotawe kía oï Tumpa ndiwe wae imbaepuereteta oï Juan wi. Jukuäräita ko, yepe tõi jae mbae’ä etei ko ñru wae reta pewarä aramoi,” jei Jesús chupe reta.

**29**“Opaete wae – jare jae nunga wi mburuwicha pewarä okowara wae retawe – uyapisaka Juan re jare umaeño reta jese umbisakambu reta waerä i pe. Jukuärái jae reta uikuaaka wirowia ma ko Tumpa jei wae re,” jei chupe reta.

**30**“Erëi fariseo reta jare Moisés uikuatía wae re oporomboe wae reta uipota’ä uyembisakambuka reta Juan pe. Jare jukuärái jae reta wiriro ko Tumpa ipiyemingeta jae reta imaerä tõi wae,” jei chupe reta.

31“¿Jayawe mbae re ra chepuere ambijaanga añawe ñonoï wae reta? ¿Kërái rami ra ko jae reta?”

32Jae reta ko jae sambiaï reta uyuwanga ñonoï wae rami,” jei. “Jare jei ñonoï rami kuärái: ‘Nduyemimbi ma pewe tēi, erēi pe reta pepirae’ä. Jare mbiatiti pe nduyao perowake, erēi pe reta piyao’ä ore ndiwe,’ jei reta. Jukuärái wi ko pe reta periro orewi ipotawe mbae che jare Juan nduyapo wae,” jei.

33“Echa’ä Juan upurumbisakambu wae ou yawe, jae jou’ä vino jare oñono teeñoi wi amokue ara reta ukaru mbae waerä. Jáeramo pe reta piyemingeta Juan re kuärái: ‘Aña uyembiya ma jese,’ pere tēi,” jei.

34“Erēi che kuimbaerä ayeyapo wae akaru jare jau vino. Erēi pe reta piyemingeta cheré kuärái: ‘Mase, jokua kuimbae tuicha ukaru jare isawipose. Jare jae nunga wi uñemiru jeko kachi wae reta ndiwe jare mburuwicha pewarä okowara wae reta ndiwe,’ pere.

35Erēitu opaete ore ndoporomboe wae rupi yureko wae reta uikuaata añetete ko oriñee arakuaa pewa,” jei Jesús chupe reta.

### **Jesús oo pēti fariseo Simón jee wae jēta pe**

36Pēti ara pēti fariseo uparea Jesús pe oo ukaru waerä jēta pe. Jayawe Jesús oo fariseo jēta pe jare uwapi ukaru waerä.

37Jare uike wi oo jokua o pe pēti kuña. Opaete jokua tēta wasu pewa reta uikuaa jokua kuña jae ko iawasapota wae. Jokua kuña uikuaa iko Jesús oï jokua fariseo jēta pe wae. Jare ueru mbae utimbo kawi wae pēti mbae jiru rai ita pewa pe.

38Jayawe kuña oo uwapichuku Jesús iyipi pe jare umbipi jesai oē. Jare jesai pe umäki Jesús ipi chuwi. Joko wi umitini Jesús ipi ía pipe. Jare uyurupite Jesús ipi jare uipichi ipi re jokua mbae utimbo kawi wae pipe.

39Jare fariseo Jesús pe uparea wae kua uecha yawe, uyemingeta ipia pe: “Añetete Tumpa ombou yawe kua kuimbae iñee umimbeu waerä, jayawe jae uikuaata tēi ko mbae nunga kuña ko uipichi oï ipi re wae. Uikuaata tēi ko jae ko jeko kachi wae.” Jukuärái jokua fariseo uyemingeta ipia pe.

40Jayawe Jesús jei fariseo pe: “Simón, aipota jae ndewe mbae,” jei chupe. Jare Simón jei chupe: “Jayawe ere mii chewe, oporomboe wae,” jei.

41Jayawe Jesús jei chupe: “Pēti kuimbae upurumbipía wae onoi mokui ipía chupe wae reta. Pēti wae ipía chupe pandepo chiēto ara mbarawiki jepi pewa, jare iru ipía chupe cincuenta ara mbarawiki jepi pewa,” jei.

42“Erēi mokui rewe mbaeti wireko korepoti ipía umbiepi waerä. Jayawe upurumbipía wae opa umikañi mokui rewe pe jokua mbía,” jei. “Jayawe, jokua mokui wae wi, ¿kía nunga uaueteta upurumbipía wae? Emimbeu chewe,” jei Jesús Simón pe.

<sup>43</sup>Jayawe Simón jei chupe: “Jae chawaa jokua kuimbae jetaete ipía opa umikañi chuwi wae,” jei. “Jaekawi ndere,” jei Jesús chupe.

<sup>44</sup>Jayawe Jesús uyerowa kuña koti jare jei wi Simón pe: “Mase, emae kua kuña re,” jei. “Che aike nerëta pe yawe, nde nemeë’ä chewe i ayoe waerä chepi. Erëi kua kuña umäki chepi jesai pe jare umitini ía pe,” jei chupe.

<sup>45</sup>“Nde chembisaluda yawe, cheyurupite’ä cherowa pe. Erëi che aike nerëta pe wiwe kua kuña ikueri’ä uyurupite chepi,” jei chupe.

<sup>46</sup>“Nde niñono’ä chäka re aceite. Erëi kua kuña uipichi chepi re mbae utimbo kawi wae,” jei chupe.

<sup>47</sup>“Jáeramo che tae ndewe, yepe tëi kua kuña jeta uyawi Tumpa koti wae, erëi opa ma uyembái chuwi. Mase kërái jae tuicha cherau. Erëi ime yawe kía michiño uyembái chuwi Tumpa koti uyawi wae, jae michiño upuruau wi,” jei Jesús Simón pe.

<sup>48</sup>Jayawe Jesús jei kuña pe: “Cherindi mii, nde mbaembae ndiyawi Tumpa koti wae opa ma uyembái ndewi,” jei chupe.

<sup>49</sup>Jayawe Jesús ndiwe ukaru ñonoï wae reta uyemingeta jae yepái: “¿Kiaete pa kua pochi jei waerä, ‘Nde mbaembae ndiyawi Tumpa koti wae opa ma uyembái ndewi’?” jei reta.

<sup>50</sup>Erëi Jesús jei kuña pe: “Yepe tëi jeta ndiyawi, erëi Tumpa nderepi ma chuwi cheré nderowia ramo. Ekua ndepiakatu rewe,” jei chupe.

## Lucas 8

### Kuña reta ombori Jesús wae

<sup>1</sup>Jare kua jaikue rupi Jesús oo opaete tëta wasu reta rupi jare tëta wasu rai reta rupi, jare umimbeu ñee ikawi wae kërái uyembipi ma Tumpa imbaepuere mburuwicha wasu pewa kua iwí pe. Jare jokua doce jemimboe tenondewaete reta yuraa jae ndiwe.

<sup>2-3</sup>Jare amokue kuña reta yuraa wi Jesús ndiwe jae reta ombori waerä Jesús jare jemimboe reta mbaembae onoi wae rupi. Amokue kua kuña reta tenonde yawe imbaerasi yureko, jare amokue reta re aña uyembiiya. Erëi Jesús uminguera reta. Jare kua kuña reta ipite wi pëti wae ko jee María Magdalena. Jesús omoë chuwi chiu aña reta. Ìru wae jee Susana. Jare ìru wae ko jae Chuza jembireko Juana jee wae. Chuza ko jae mburuwicha wasu Herodes pe uyeyokui wae reta itenondewa.

### Jesús umbijaanga kuimbae umaeti wae re

(Mateo 13.1-9; Marcos 4.1-9)

<sup>4</sup>Pëti ara jeta keti keti tëta wasu reta wi yuweru uyembati Jesús oï wae pe. Jayawe Jesús jei chupe reta umbijaanga rewe:

5“Pëti kuimbae oo umaeti waerä. Jare umiái temiti yawe, amokue oa tape rai rupi. Jayawe ñru wae reta upïro jese, jare yuweru wira reta opa jou,” jei chupe reta.

6“Ñru temiti oa itapite rupi mbowiño ñwi wireko wae re. Kua reta jeñi tēi, erēi oē rupiwe opa ipiru, echa’ä jokua ñwi mbaeti iruru kawu chupe ramo,” jei.

7“Ñru temiti oa ñurätipite pe. Jare ñuräti ukuakuaa temiti ndiwe; jáeramo opa umbuputupa,” jei.

8“Erēi amokue temiti oa ñwikawu pe. Jokua reta jeñi kawu, ukuakuaa, jare ikawiete ía.” Jukuärái Jesús jei chupe reta umbijaanga rewe. Jare jei wu chupe reta usapikau rewe: “Ipotawe kía uipota uikuaa kawu wae, tuyapisaka kua chiñee re,” jei chupe reta.

### **Maera Jesús oporomboe umbijaanga rewe**

*(Mateo 13.10-17; Marcos 4.10-12)*

9Jayawe Jesús jemimboe reta jei chupe: “Ere mii orewe jokua nde ndere nembijaanga rewe wae rewa,” jei reta chupe.

10Jayawe Jesús jei chupe reta: “Tumpa imbaepuere mburuwicha wasu pewa umbipi ma uyekuaa kua ñwi pe. Jare jokua re ko che amimbeu aï,” jei. “Tenonde yawe Tumpa uikuaaka’ä kía pe awe kua mbaembae rewa. Erēi añawe uñemee ma pewe pikuaa kawu waerä. Erēi che amboe ñru wae reta ambijaanga rewe awiye waerä uikuaa kawu reta. Echa’ä jae reta uecha tēi che mbaembae ayapo wae jare uyandu reta tēi wu chiñee, erēi jesewe uipota’ä wirowia reta cheré,” jei chupe reta.

### **Jesús umiesäka kuimbae umaeti wae rewa**

*(Mateo 13.18-23; Marcos 4.13-20)*

11Jayawe Jesús jei wu chupe reta: “Jokua che ambijaanga rewe jae pewe wae uipota jei kuärái: Jokua temiti uyembijaanga oï Tumpa ñnee re,” jei.

12“Jare jokua tape rai rupi temiti oa wae uyembijaanga oï amokue wae Tumpa ñnee uyandu wae re. Echa’ä ou chupe reta Añawasu jare opa umiakañika reta Tumpa ñnee wu awiye waerä wirowia reta. Echa’ä Añawasu uipota’ä etei onoi reta waerä tekowe opa mbae wae,” jei chupe reta.

13“Jae nunga wu amokue temiti oa itapite rupi mbowiño ñwi wireko wae re,” jei. “Kua uyembijaanga oï ñru wae reta Tumpa ñnee uyandu wae re. Kua nunga reta jaeramo uyandu yawe, uyapisaka jese uyerowia rewe,” jei. “Erēi Tumpa ñnee uyembijapo kawu’ä ipia pe ramo, michi pewaño wirowia reta. Yembiawái ou chupe reta yawe, jayawe opia reta Tumpa jape wu,” jei chupe reta.

14“Jae nunga wu amokue temiti oa ñurätipite pe. Kua uyembijaanga oï ñru wae reta Tumpa ñnee uyandu wae re,” jei. “Kua nunga reta uyandu Tumpa ñnee, erēi umbipi uyembipia’ä mbaembae ñwi pewa reño. Jaeño uipota ikokatu reta jare jorikatu reta. Jáeramo uyekuaa’ä jese reta Tumpa jeko ikawu wae,” jei chupe reta.

15“Erēi amokue temiti oa ñwikawu pe. Jare kua jae nunga wu uyembijaanga oï ñru wae reta Tumpa ñnee uyandu wae re,” jei. “Kua nunga reta uipisi kawu Tumpa ñnee



ipia rewe. Jare uyapo reta ipiawasuwu rewe Tumpa iñee pe jei wae. Jáeramo uyekuaa jese reta Tumpa jeko ikawi wae,” jei chupe reta. “Jukuárái ko ambijaanga rewe jae pewe wae,” jei Jesús jemimboe reta pe.

### **Jesús oporomböe wae tembipe pe uyekuaa wae rami oíta**

*(Marcos 4.21-25)*

**16**Jare Jesús jei wi jemimboe reta pe umbijaanga rewe: “Mechero yamiendi yawe, ndaraúi ñañoño mbae jiru uyembowapo oí wae íwi pe ani wirapembí íwi pe. Ñañoño ko iwate mechero jenda pe, o pe uike wae reta ipuere uecha kawí waerä. Jare jukuárái rami wi ko che aporomböe wae ikota pemaerä,” jei.

**17**“Jare yepe tēi añawe pikuaa kawí’ä peí jare jae ko mbae uñeñomi oí wae rami pewe, erēi taikue rupi jesäka kawita oí pewe kuri. Ikota pewe mbae tembipe etei uyekuaa wae rami,” jei chupe reta.

**18**“Jáeramo piyandareko kawí piyé piyapisaka kawí waerä. Echa’ä ime yawe kía uyapisaka kawí jare wirowia chiñee re wae, uñemiiruta chupe iyarakuaa,” jei. “Erēi ime yawe kía uipota’ä uyapisaka añetete re wae, jokuwa jae wirowia tēi uikuaa michi mii yepe chiñee wae, jokuawe uñepirota chuwi,” jei Jesús chupe reta.

### **Jesús ichi jare tiwi reta ou ueka reta Jesús**

*(Mateo 12.46-50; Marcos 3.31-35)*

**19**Jayawe Jesús ichi jare tiwi reta ndiwe yuweru uwäe jokuwa tēta kiape Jesús oí wae pe. Erēi ipuere’ä yuraa oya reta jese jetaete ye ñonoí wae reta jeko pewa.

**20**Jayawe amokue wae reta jei Jesús pe: “Ndesi jare nderiwi reta ndereka ñonoí oka pe,” jei reta chupe.

**21**Jayawe Jesús jei chupe reta: “Kía reta Tumpa iñee re uyapisaka jare uyapo wae, jae reta ko jae chesi jare cheriwi reta,” jei chupe reta.

### **Jesús umimbíta iwitu**

*(Mateo 8.23-27; Marcos 4.35-41)*

**22**Pēti ara Jesús uyupi chalana pe jemimboe reta ndiwe jare jei chupe reta: “Ya ipa wasu jowaicho koti,” jei. Jayawe umbipi uasa reta ipa wasu.

**23**Jare yuraa yureko reta rambuwe, Jesús oke. Jayawe ou iwitu tāta, jare i uyembiaparoaroa uike chalana pe, jare umbipi usakambu pota echa.

**24**Jayawe jemimboe reta umbisareko Jesús jare jei reta chupe ukiye rewe: “¡Oporomböe wae, oporomböe wae, opata ma yandeputupa!” jei reta. Jayawe Jesús upüa, jare jei iñeeäta rewe iwitu pe jare iaparoa wasu pe upita waerä. Jare jupiwoi upita iwitu jare opaete kii ngatu.

**25**Jayawe Jesús jei chupe reta: “¿Maera pa perowia’ä cheré?” jei chupe reta. Jare jae reta ukiye jare ipiakañi, jare jei reta iyupe: “¿Mbae nunga kuimbae ra kua? I jare iwitu awe uyapo jae jei wae,” jei reta iyupe.

### **Jesús omoë añá reta kuimbae wi**

*(Mateo 8.28-34; Marcos 5.1-20)*

**26**Jayawe opa yuraa reta Galilea wi uwäe reta ipa wasu jowaicho pe, Gadara pewa reta iïwi pe.

**27**Joko wi koiño oï pëti tëta wasu. Jare Jesús uweyi chalana wi yawe, ou owäiti pëti kuimbae jokua tëta wasu pewa añä reta uyembiiya jese wae. Ima ma yepe kua kuimbae parawete nani etei iko. Iko'ä etei ma tëta rupi. Patü rupiño ma iko.

**28-29**Kua kuimbae parawete, jeta wese añä reta umimbikere. Jáeramo iyandarekoa reta uñapiti tēi ipi rupi jare ipo rupi cadena pipe. Erēi jae opa omondoo cadena reta jare oē osi chuwi reta tēta mbae rupi, echa'ä jokoti añä reta wiraa ramo. Jayawe kua kuimbae uecha yawe Jesús, jäse jare ou uyepiso iwi re Jesús jowai. Jare jei iñeeäta rewe: “Jesús, Tumpa imbaepuere tuichaete wae Tai, ¿mbae pa ndeyu ndeka kua pe? Che numiñera, awiye iporaraka chewe,” jei chupe. Jukuärái jei, echa'ä Jesús jei ma yepe añä reta pe oē waerä chuwi.

**30**Jayawe Jesús upirandu chupe: “¿Mbae pa nderee?” jei chupe. Jare kuimbae jei chupe: “Che cheree Jeta Wae,” jei. Jukuärái jei, echa'ä jeta yepe añä uyembiiya ma jokua kuimbae re.

**31**Jare añä reta jekuaeño umiñera Jesús awiye waerä omondo reta iwikua wasu juwa mbae wae pe.

**32**Jare joko wi ime koiño ñaipe re kuchi iyandarekoa reta umingarü ñonoï kuchi reta. Jayawe añä reta jei Jesús pe ikuasi katu rewe: “Emaeño mii oreré ndoo nduïke waerä pea kuchi reta re,” jei reta chupe. Jayawe Jesús umaeño jese reta.

**33**Jayawe añä reta opa oē kuimbae wi jare opa yuraa uïke kuchi reta re. Joko wi kuchi reta täta rupi opa osi uweyi yuraa iwia rupi uïke reta ipa wasu pe. Jare joko pe kuchi reta opa iputupa umano.

**34**Jayawe kuchi iyandarekoa reta kua uecha reta yawe, opa osi yuraa umimbeu tēta wasu pewa reta pe jare jokoropi ñonoï wae reta pe kua uyeyapo wae rewa.

**35**Jayawe uyandu wae reta yuweru uecha waerä mbae ko uasa wae. Jare yuweru uwäe reta yawe Jesús oï wae pe, uecha reta jokua kuimbae añä reta uyembiiyase jese wae uwapi oï Jesús jowai. Uecha reta uyemonde ye ma oï jare iyarakuaa ye ma oï. Jáeramo opa ukiye reta.

**36**Jare jokua tenonde uecha wae reta umimbeu ñru wae reta pe mbae uyeyapo jokua kuimbae pe jae ukuera waerä.

**37**Jayawe opaete gadareno reta ukiyete jare umiñera reta Jesús oē ye oo waerä jae reta iïwi wi. Jayawe Jesús uyupi ye chalana pe oo ye waerä.

**38**Jare jokua kuimbae añä reta uyembiiyase jese wae umiñera oo waerä tēi Jesús ndiwe. Erēi Jesús umaeño'ä jese jare jei chupe:

**39**“Ekua ye nerëta pe jare embeu ñru wae reta pe kërái mbae ikawi wae Tumpa uyapo ndewe wae rewa,” jei chupe. Jayawe kuimbae oo umimbeu opaete tēta wasu rupi mbae ikawi wae Jesús uyapo chupe wae rewa.

## Jesús umbijekowe ye pëti kuñatái

(Mateo 9.18-26; Marcos 5.21-43)

- <sup>40</sup>Jare Jesús oo ye uwäe yawe ipa wasu jowaicho pe, joko pe ime ma yepe jeta wae reta uäro ñonoï. Jayawe jei reta chupe uyerowia rewe: “Jaekawi ndeyu wite,” jei reta chupe.
- <sup>41</sup>Jayawe ou owäiti pëti kuimbae Jairo jee wae. Jae ko jae reta itupao iyandarekoa. Jae uñeño ipitía re iwí re Jesús jowai jare ikuasi katu rewe jei chupe: “Eyu mii cherëta pe.
- <sup>42</sup>Cherayi mii umanota ma oï chewi. Jae ko cherayi mii jae waeño wae doce año ma onoi,” jei chupe. Jayawe Jesús oo woi jae ndiwe. Jare jeta yuraa reta wi Jesús jupie, jare oyopi ye reta uwata kawí waerä.
- <sup>43</sup>Jare jae reta ipite pe oo wi pëti kuña doce año ma imbaerasi iko tuwí wasu pe wae. Kua kuña parawete opa ma ikorepoti uiporu iyuwí ukuera waerä tēi. Erēi pëti awe upurupiano wae reta ipuere’ä uminguera.
- <sup>44</sup>Jayawe kuña ou Jesús jaikue kotí wi jare uñatai Jesús jemimonde jembei pe. ¡Jare jupiwoiño juwí wasu upita chuwi!
- <sup>45</sup>Jayawe Jesús jei: “¿Kía pa cheremimonde uñatai?” jei. Jayawe opaete wae jei reta: “Nuñatai’ä nderemimonde,” jei reta. Jare Pedro jei Jesús pe: “Oporomoe wae, jeta wae reta ndeopi ye ñonoï. ¿Maera pa ndepirandu kía ra nderemimonde uñatai?” jei chupe.
- <sup>46</sup>Erēi Jesús jei: “Ime kía uñatai cheremimonde. Echa’ä aikuaa aminguera ma kía chembaepuere pe,” jei.
- <sup>47</sup>Jayawe kuña uikuaa yawe ipuere’ä oñomi jokua jae uyapo wae, oo ikoti uriri rewe jare uñeño iwí re jae jowai. Jare umimbeu chupe opaete wae jowake maera uñatai jemimonde wae jare kërái jupiwoi ukuera wae.
- <sup>48</sup>Jayawe Jesús jei chupe: “Cherayi, ndekuera ma ko cheré nderowia ramo. Ekua ndepiakatu rewe,” jei chupe.
- <sup>49</sup>Jare Jesús uyemingeta iko rambuewe, pëti wae ou uwäe Jairo jëta wi jare jei Jairo pe: “Nderayi mii umano ma. Awíye ma embiawái oporomoe wae,” jei chupe.
- <sup>50</sup>Erēi Jesús kua uyandu yawe, jei Jairo pe: “Awíye ndepiatiti. Erowiaño cheré. Nderayi ukuerata oï,” jei chupe. Jayawe opa yuraa reta Jairo jëta kotí.
- <sup>51</sup>Jare yuraa uwäe reta yawe tëta pe, Jesús umaño’ä ñru wae reta re uike waerä jae ndiwe – jaño Pedro, Jacobo, Juan, jare kuñatái tu jare ichi.
- <sup>52</sup>Jare ime ñonoï joko pe jeta wae reta mbiatiti wasu pe, jare jäse uyao ñonoï reta. Jayawe Jesús jei chupe reta: “Awíye piyao. Kua kuñatái umano’ä oï. Okeño ko oï,” jei chupe reta.

<sup>53</sup>Erëi jae reta kua ñee uyandu yawe, oyoyai reta Jesús. Echa'ä jae reta uikuaa kuñatái umano ma.

<sup>54</sup>Erëi Jesús uipisi kuñatái ipo pe jare jei chupe: “¡Kuñatái, epüa!” jei.

<sup>55</sup>Jayawe kuñatái ikowe ye jare jupiwoi upüa. Jayawe Jesús jei tu jare ichi pe umingaru waerä.

<sup>56</sup>Tu jare ichi ipiakañiete kua mbae uyeyapo wae re. Jayawe Jesús jei chupe reta: “Awiye kía pe awe pemiäri kua mbae uyeyapo wae re,” jei chupe reta. Jukuärái Jesús umbijekowe ye pëti kuñatái ueru umanokue wae reta ipite wi.

## Lucas 9

### Jesús omondo jokua doce jemimboe reta

*(Mateo 10.5-15; Marcos 6.7-13)*

<sup>1</sup>Pëti ara Jesús umbatika jokua doce jemimboe tenondewaete reta, jare umee chupe reta mbaepuere omoë waerä añä uyembiiya jese wae reta wi jare uminguera waerä imbaerasi wae reta.

<sup>2</sup>Jayawe omondo reta upuruminguera waerä jare umimbeu waerä kërái uyembipi ma Tumpa imbaepuere mburuwicha wasu pewa kua iwí pe.

<sup>3</sup>Jare jei chupe reta: “Peo yawe, awiye peraa mbae awe. Awiye peraa pepopoka, peurupuku, peremiurä, jare korepoti. Jokua peremimonde pemonde pei wae, jokuaño peraa,” jei chupe reta.

<sup>4</sup>“Jare peo ma pewäe yawe pëti tëta wasu pe, jare ime yawe kía uparea pewe pepita waerä jëta pe, pepita joko peño jokua tëta wasu wi peo ye rewa,” jei.

<sup>5</sup>“Erëi ime yawe pëti tëta wasu uipota'ä pepita waerä joko pe wae, jayawe peasa joko wi,” jei. “Jare peë jokua tëta wasu wi yawe, pemitimo pepipasa iwíkuí usururu waerä chuwi. Jukuärái pikuaakata chupe reta jae reta etei ko teko onoi Tumpa uiporaraka chupe reta waerä,” jei Jesús jemimboe reta pe.

<sup>6</sup>Jayawe Jesús jemimboe reta opa yuraa opaete tëta wasu rai reta rupi. Jare opaete kerupi yuraa wae rupi umimbeu reta ñee ikawi wae jare uminguera wi imbaerasi wae reta.

### Mburuwicha wasu Herodes uipota tëi uecha Jesús

*(Mateo 14.1-12; Marcos 6.14-29)*

<sup>7</sup>Jare mburuwicha wasu Herodes uyandu opaete Jesús uyapo wae rewa. Jayawe jopa iko, echa'ä amokue wae jei tëi: “Jae ko aipo Juan aramoi ikowe ye ma ou umanokue wae reta ipite wi,” jei reta tëi.

<sup>8</sup>Jare ñru wae reta jei tëi: “Jae ko Elías.” Jare ñru wae reta jei tëi: “Jae ko aipo pëti kuimbae arakae rupi Tumpa iñee umimbeu wae ikowe ye ma ou umanokue wae reta ipite wi,” jei reta tëi.

<sup>9</sup>Erëi Herodes jei: “Mbaeti ko Juan uyapo oï kua mbaembae, echa’ä che ayayusiaka kispuku pe. Erëi ¿kía ra aipo kua ayandu aï jesewa wae?” jei. Jáeramo Herodes uipota tēi uecha Jesús.

### **Jesús umingaru jeta wae reta Tumpa imbaepuere rupi**

*(Mateo 14.13-21; Marcos 6.30-44; Juan 6.1-14)*

<sup>10</sup>Jare Jesús jemimboe tenondewaete reta uñatima ye oporomboe reta wae wi Jesús oï wae pe. Jare imiäri reta chupe opaete jae reta uyapo wae re. Jayawe Jesús wíraa reta kii ngatu wae pe koiño tēta wasu Betsaida wi.

<sup>11</sup>Erëi jeta wae reta uikuaa jare yuraa jaikue. Jare Jesús umbiresiwe kawi reta, jare omboe reta këraita ko oï mbaembae Tumpa oï ma yawe opaete wae imburuwicha wasurä jaeño mái pewa. Jare jae nunga wi uminguera imbaerasi wae reta.

<sup>12</sup>Jare kaaruete ma oo yawe, jokua doce wae yuweru jei Jesús pe: “Emondo kua jeta wae reta tēta wasu rai reta koti jare kiaepe ime tēta wae rupi, joko pe ukaru reta waerä jare oke reta waerä. Echa’ä mbaeti etei mbae awe kua rupi,” jei reta.

<sup>13</sup>Jayawe Jesús jei chupe reta: “Pe reta etei ko pemeeta chupe mbae jou reta waerä,” jei chupe reta. Jayawe Jesús jemimboe reta jei chupe: “Jaeño ime nonoi pandepo mbiyape jare mokui pira chariki mii,” jei reta. “Erëi kua ndarau etei uepiti opaete pewarä. ¿Mbae ndere? ¿Ndoota pa ndowa tembiu opaete wae pewarä?” jei reta Jesús pe.

<sup>14</sup>Joko pe ñonoï jeta wae reta. Kuimbae retaño uyepapa pandepo miri rupi. Jayawe Jesús jei jemimboe reta pe: “Pembiwapi tee tee opaete wae reta cincuenta cincuenta rupi,” jei chupe reta.

<sup>15</sup>Jayawe jukuärái umbiwapi reta opaete wae.

<sup>16</sup>Jayawe Jesús uipisi jokua pandepo mbiyape jare mokui pira. Jare umae ara koti jare umee yasurupái Tumpa pe jese. Joko wi upisää mbiyape jare pira, jare umee jemimboe reta pe jae reta umee yuapi ye waerä opaete wae pe.

<sup>17</sup>Jayawe opaete wae reta ukaru ipunga rewa. Jare Jesús jemimboe reta umbati jokua jembirekue doce kanasta rupi.

### **Jesús uikuaaka jae ko Upuruepi wae jare imeta ko umano wae**

*(Mateo 16.13-28; Marcos 8.27-9.1)*

<sup>18</sup>Pēti ara Jesús usiri uyerure waerä jaeño pe etei Tumpa pe. Erëi taikue rupi jemimboe reta yuweru wi jae oï wae pe. Jare Jesús upirandu chupe reta: “¿Kërái pa ñru wae reta uyemingeta kía ko che wae?” jei chupe reta.

<sup>19</sup>Jayawe jae reta jei chupe: “Amokue wae jei nde ko jae Juan upurumbisakambuse wae. Jare ñru wae reta jei nde ko jae Tumpa ñnee arakae umimbeu wae Elías, ani ambie kuimbae Tumpa ñnee arakae umimbeu wae ikowe ye ma ou umanokue wae reta ipite wi,” jei reta.

<sup>20</sup>Jayawe Jesús upirandu ye chupe reta: “Jare pemaerä, ¿kía pa ko che?” jei chupe reta. Jayawe Pedro jei chupe: “Nde ko jae Cristo ndoe chupe wae,” jei.

<sup>21</sup>Jayawe Jesús jei chupe reta: “Awiye etei kua pemimbeu kía pe awe,” jei.

<sup>22</sup>Jare jei wi chupe reta: “Che kuimbaerä ayeyapo wae imeta ko aiporara jeta. Jare yandetenondewa reta, jare sacerdote itenondewa reta, jare Moisés uikuatía wae re oporomböe wae reta chererirota jare cheyukakata reta,” jei. “Erëi kua imeta ko uyeyapo. Jare joko wi mbapi ara pe aikowe yeta ayu ai kuri umanokue wae reta ipite wi,” jei chupe reta.

<sup>23</sup>Jayawe Jesús jei opaete wae pe: “Ime yawe kía uipota iko cheremimboerä wae, awiye ma tuiko jae jei wae rupiño. Erëi towoi ikurusu opa ara jare tou che ndiwe,” jei.

<sup>24</sup>“Echa’ä ime yawe kía jaeño uyembipia’ä uepi waerä tei jekowe kua iwí pewa re, umikañita iyuwi jekowe opa mbae wae ipuereta tei onoi wae. Erëi kía umee jekowe chereko pewa wae, yepe tei umano, erëi onoita tekowe opa mbae wae,” jei chupe reta.

<sup>25</sup>“Kua re ikawi ko piyemingeta waerä pepia pe. ¿Maera ra ikawita kía umingana waerä opaete kua iwí pe oi wae, erëi umano ma yawe, umikañi ma iyuwi jekowe opa mbae wae? Añetete jae umingana’ä mbae awe,” jei.

<sup>26</sup>“Ime yawe kía imara chewi jare chiñee wi wae, che kuimbaerä ayeyapo wae chemarata wi chuwi che ayu ye yawe. Echa’ä ayu yeta ko ai. Jare ayu ye ma yawe, ayuta chembaepuere jembipete rewe, cheRu imbaepuere jembipete rewe, jare araiwa Tumpa oñono tee wae reta imbaepuere jembipete rewe wi,” jei chupe reta.

<sup>27</sup>“Jare che tae pewe añetete wae, amokue pe reta kua pe pei wae pechata pei ndei pmano mbowe Tumpa imbaepuere mburuwicha wasu pewa,” jei Jesús chupe reta.

### **Amokue Jesús jemimboe reta uecha Jesús imbaepuere jembipete wae**

*(Mateo 17.1-8; Marcos 9.2-8)*

<sup>28</sup>Juri ara uasa yawe Jesús jei chupe reta wae, jae wiraa Pedro, Juan, jare Jacobo iru wae reta ipite wi. Jare irundi rewe yuraa uyupi reta peti iwitu wasu re, joko pe uyerure waerä Tumpa pe.

<sup>29</sup>Jare Jesús uyerure iko rambuwe, jowa uyembiambie jare jemimonde tiasi uwera uyekuaa.

<sup>30</sup>Jare uyekuaa wi mokui kuimbae uyemingeta ñonoí Jesús ndiwe. Jae reta ko arakaete Tumpa iñee umimbeu wae reta Moisés jare Elías jee wae.

<sup>31</sup>Jae reta mokui rewe uyekuaa tembipe uwerasiete wae pe, jare uyemingeta reta Jesús imano re kërái umanota iko Jerusalén pe.

<sup>32</sup>Erëi topei umiamiri Pedro jare iru reta wi. Jare aramoño jae reta usareko jare uecha Jesús imbaepuere jembipete wae oi jese. Jare uecha reta wi jokua mokui kuimbae Jesús ndiwe ñonoí wae reta.

<sup>33</sup>Erëi Moisés jare Elías yuraa ye ma ñonoï yawe, Pedro jei Jesús pe: “Oporomboe wae, jaekawi ko ore noï kua pe,” jei chupe. “Nduyapota mbapï warasïa ñanaroki pewa – pëti nemaerä, pëti Moisés pewarä, jare pëti Elías pewarä wi,” jei chupe. Añetete Pedro uyemingeta uikuaa mbae rewe mbae jei iko wae.

<sup>34</sup>Jare Pedro kua jei rambuewe, uweyi amapïtu jare opa oñowa reta. Jare kua uecha yawe, Jesús jemimboe reta ukiye.

<sup>35</sup>Jare amapïtu wi uyendu ñee jei: “Kua ko jae cheRai aucte wae. Piyapisaka jese,” jei.

<sup>36</sup>Jare ñee kii ma yawe, jae reta uecha’ä ma kiawe joko pe oï – jaeño ma Jesús. Jare jokuara reta rupi jae reta umimbeu’ä kía pe awe kua mbaembae reta uecha wae.

### **Jesús uminguera pëti kunumi rai añã uyembiiya jese wae**

*(Mateo 17.14-21; Marcos 9.14-29)*

<sup>37</sup>Jayawe piarewe pe jae reta uweyi iwïtu wasu wi. Jare uweyi reta ma yawe, jeta wae reta yuweru owäiti Jesús.

<sup>38</sup>Jare jae reta ipite wi pëti kuimbae jei Jesús pe ikuasi katu rewe: “Oporomboe wae, che numiñera netae waerä cherai mii re,” jei. “Jae ko cherai jae waeño wae.

<sup>39</sup>Amo wese rupi añã uyembiiya jese jare umiäse. Jae nunga wi umbiriñete, jare kunumi rai iyuru tiriye parawete. Jare añã jaeño ueya uiporarakate ma chupe yawe,” jei.

<sup>40</sup>“Che amiñera tã ma nderemimboe reta omoë waerä chuwi añã, erëi ipuere’ä reta,” jei kuimbae Jesús pe.

<sup>41</sup>Jayawe Jesús jei joko pe ñonoï wae reta pe: “Pe pepiatãta piko wae reta, ¿marái mbate ra perowia kawï’ä cheré? Chembikueri ma peï perowia mbae cheré wae. ¿Kërái yawe rewa ra arupiata pewe?” jei chupe reta. Jayawe Jesús jei kunumi rai tu pe: “Eru chewe kua pe nderai,” jei chupe.

<sup>42</sup>Jare kunumi rai ou ikoti rambuewe, aramoïño añã uipiaka jare umbiriñete. Jayawe Jesús iñee rupi omoë añã kunumi rai wi jare jukuärái uminguera kunumi rai. Jayawe jei tu pe: “Ko oï nderai mii,” jei chupe.

<sup>43</sup>Jare opaete joko pe ñonoï wae reta ipiakañiete Tumpa imbaepuere tuichaete wae re.

### **Jesús umimbeu ye jemimboe reta pe umanota iko wae**

*(Mateo 17.22-23; Marcos 9.30-32)*

Erëi opaete wae ipiakañi yureko rambuewe kua Jesús uyapo wae re, Jesús jei jemimboe reta pe:

<sup>44</sup>“Piyapisaka kawï kua che jaeta pewe wae re. Che kuimbaerä ayeyapo wae, imeta kía chemee oï cherowaicho reta pe wae,” jei chupe reta.

<sup>45</sup>Erëi Jesús jemimboe reta uikuaa kawi'ä mbae re ra Jesús uyemingeta iko wae. Echa'ä ndei uikuaa kawi yureko reta jokua mbaembae rewa. Jae nunga wi ukiye reta upirandu chupe waerä.

### ¿Kía nunga ra ko jae tenondewarä?

*(Mateo 18.1-5; Marcos 9.33-37)*

<sup>46</sup>Pëti ara Jesús jemimboe reta umbipi uyeaka jae yepái kía ra ikota tenondewarä wae.

<sup>47</sup>Jare Jesús uikuaa chuwi reta ipiyemingeta. Jayawe ueni pëti sambiai oñono iyipi mii pe.

<sup>48</sup>Jare jei jemimboe reta pe: “Jeta wae reta jei tēi sambiai reta usiriwe'ä ko. Erëi che tae pewe, ime yawe kía umbiasa kawi pëti sambiai kua rami wae, jare jukuärái uyapo cheré wírowia ramo, chembiasa kawi ko oí wi,” jei. “Jare jokua chembiasa kawi wae, umbiasa kawi ko oí wi chembou wae. Jayawe jokua pepite pe usiriwe mbae echa wae ko jae wae, jokua ko jae petenondewarä wae,” jei Jesús jemimboe reta pe.

### Oyowaicho'ä yandekoti wae, jae'ä ko yanderowaicho

*(Marcos 9.38-40)*

<sup>49</sup>Jayawe Juan jei Jesús pe: “Oporomboe wae, ore nduecha pëti kuimbae omoë iko añä reta kuimbae reta wi. Jare jae nderee re uyapo iko jukuärái,” jei. “Jare ore ndoe chupe awiye ma jukuärái uyapo waerä, echa'ä jae ñaneiru'ä ko,” jei chupe.

<sup>50</sup>Jayawe Jesús jei Juan pe: “Awiye piyopia chuwi. Echa'ä ime yawe kía mbaeti oyowaicho oí yandekoti wae, jae ko yanembori oí,” jei chupe.

### Jesús umbieta Jacobo jare Juan pe

<sup>51</sup>Jare uwäe seri ma ara Jesús oo ye waerä ara pe. Jáeramo jae jei oo waerä Jerusalén koti.

<sup>52</sup>Jayawe omondo amokue jemimboe reta jenonde. Jare jae reta yuraa iwí Samaria pe pëti tēta wasu rai pe, joko pe ueka reta waerä tēi pëti o Jesús pewartä.

<sup>53</sup>Erëi joko pewa reta uipota'ä Jesús upita waerä joko pe. Echa'ä uikuaa reta Jesús oo oí Jerusalén koti, jare jae reta uñemüiru kawi'ä Jerusalén pewa reta ndiwe.

<sup>54</sup>Jayawe Jesús jemimboe reta Jacobo jare Juan kua uecha yawe, jei reta Jesús pe: “OreYa, ¿ndipota pa ore nduyapo waerä kërái arakae Elías uyapo wae rami? ¿Ndipota pa nduyerure waerä Tumpa pe ombou waerä tata ara wi opa uapi waerä kua tēta wasu rai pewa reta?” jei reta chupe.

<sup>55</sup>Erëi Jesús uyerowa ikoti jare umbieta chupe reta jei rewe: “Pe reta pikuaa'ä kía wi ra ou oí kua pipota piyapo pei wae.

<sup>56</sup>Echa'ä che kuimbaerä ayeyapo wae ayu'ä ko apuruyuka waerä. Ayu ko apuruepi waerä,” jei chupe reta. Jayawe jae reta yuraa üru tēta wasu rai koti.

### Yawái ko oí kía iko waerä Jesús jemimboerä



(Mateo 8.19-22)

<sup>57</sup>Jare tape rupi yuraa reta rambuewe, pëti kuimbae jei Jesús pe: “Aipota aiko nderemimboerä. Taa nde ndiwe opaete kerupi ndeo wae rupi,” jei chupe.

<sup>58</sup>Jayawe Jesús jei chupe: “¿Añetete pa ndiyemingeta neï? Echa’ä awara reta ime onoi ikua, jare wira reta wi ime onoi jaiti. Erëi che kuimbaerä ayeyapo wae mbaeti anoi kiape awe ake waerä,” jei chupe.

<sup>59</sup>Jare Jesús jei ïru kuimbae pe: “Eyu che ndiwe ndiko waerä cheremimboerä,” jei chupe. Erëi kuimbae jei chupe: “Emaeño rani cheré a waerä cherëta pe cheru umano rewa. Jare añoti ma cheru yawe ramo taa nde ndiwe,” jei chupe.

<sup>60</sup>Jayawe Jesús jei chupe: “Emaeño jokua umano wae echa ñonoï Tumpa wi wae reta tuñeñoti kuri jae reta yepái,” jei chupe. “Erëi nde, ekua emimbeu kërái Tumpa imbaepuere mburuwicha wasu pewa uyembipi ma kua iwi pe,” jei chupe.

<sup>61</sup>Jayawe ïru kuimbae jei Jesús pe: “CheYa, che taa nde ndiwe aiko waerä nderemimboerä. Erëi emaeño rani cheré a waerä cherëta pe amimbeu waerä cherëtara reta pe che a aï nde ndiwe wae,” jei chupe.

<sup>62</sup>Jayawe Jesús jei chupe: “Kía umbipi ma umungúi iwi arao pipe wae jare umae jaikue koti wae, ndarau ikawi jokua mbarawiki pewarä. Jae ramiño wi ime yawe kía uipota uyeyokui Tumpa pe wae, ikawi’ä ko jekuaeño ipia pe uyemingeta waerä mbaembae ueya ma wae re. Echa’ä Tumpa ndarau uiporu jokua nunga reta ñee umimbeu waerä,” jei Jesús chupe.

## Lucas 10

### Jesús omondo setenta jemimboe reta

<sup>1</sup>Kua jaikue rupi yandeYa uiparawo ïru setenta kuimbae reta jare omondo tenonde mokui mokui rupi opaete tëta wasu reta jae oota wae rupi.

<sup>2</sup>Jare jei chupe reta umbijaanga rewe: “Jetaete oï yambaewiro waerä, erëi mbowiete oï umbaewiro wae reta. Jáeramo piyerure koo iYa pe ombou waerä umbaewiro wae reta,” jei chupe reta umbijaanga rewe.

<sup>3</sup>Jare jei wi chupe reta: “Pekua. Che pomondo aï ikawi mbae wae uyapo wae reta ipite rupi. Jukuärái pe reta pikota peï owecha yawapïta reta ipite rupi iko wae rami,” jei chupe reta.

<sup>4</sup>“Awiye peraa korepoti, jare urupuku, jare ïru mbipasa. Jare perowäiti yawe kía tape rupi, awiye ima piyemingeta jae ndiwe,” jei chupe reta.

<sup>5</sup>“Jare ime yawe kía uipota pembiasa jëta pe wae, pepita jae ndiwe. Jare pike yawe jae jëta pe, pereta chupe: ‘Tumpa tumae kua tëta re,’ pere.

<sup>6</sup>Jare jokua kuimbae jëtara reta pembiasa kawi yawe, jayawe Tumpa umaeta jokua tëta re. Erëi mbaeti pembiasa kawi reta yawe, Tumpa ndarau wi umae jese reta,” jei chupe reta.

7“Jare jokua tēta pe pei rambuewe, peu ipotawe tembiu umee pewe peu waerä wae. Echa’ä uparawiki wae jupi ko uyembiepi chupe waerä. Jare pepita jokua tēta peño. Awiye pekua koti koti pepita,” jei Jesús chupe reta.

8“Jare peo ma pewäe yawe pēti tēta wasu pe, jare joko pewa reta pembiasa kawi yawe, peu ipotawe tembiu umee pewe reta wae,” jei chupe reta.

9“Peminguera imbaerasi wae reta jokoropi ñonoï wae. Jare pemimbeu opaete joko pewa reta pe kērái uyembipi ma Tumpa imbaepuere mburuwicha wasu pewa kua iwi pe, jare koiñoete ma oï chuwi reta,” jei chupe reta.

10“Erēi peo ma pewäe yawe pēti tēta wasu pe, jare joko pewa reta uipota’ä pepita waerä joko pe yawe, peë calle rupi jare pere joko pewa reta pe:

11“Numitimo noï iwikuï perēta wasu pewa orepi re oya wae, pikuaa waerä pe reta pereko pewái ko Tumpa uiporarakata oï pewe. Pikuaa peyupe kua: Tumpa imbaepuere mburuwicha wasu pewa uyembipi ma kua iwi pe jare koiño ma oï tēi pewi.’ Jukuärái pereta chupe reta,” jei.

12“Che tae pewe, jokua ara iwi pewa reta uyemboï yawe Tumpa jowai Tumpa umbijeko reta waerä, jokua tēta wasu pewa reta tātate ye uiporarata ñonoï jokua arakae tēta wasu Sodoma pewa reta wi,” jei Jesús chupe reta.

### **Jesús umbijeko mbapi tēta wasu reta**

*(Mateo 11.20-24)*

13“Jokua tēta wasu Corazín jare Betsaida pewa reta, ¡ikuasita ñonoï reta!” jei. “Jeta mbaembae ayapo tēi ipite rupi Tumpa imbaepuere pe. Jukuärái moná ayapo yawe tēta wasu Tiro jare Sidón pe, arakaete ma ko jokua tēta wasu pewa reta ueyata tēi ipiayemingeta jupi mbae wae Tumpa rewa,” jei. “Jae reta omondeta tēi temimonde jaimbe wae mbiatiti pewa jare oñonota tēi reta tanimbu iñäka re, jukuärái jae reta uechaka waerä ipiatiti ko ñonoï jeko kachi re,” jei.

14“Jáeramo jokua ara iwi pewa reta uyemboï yawe Tumpa jowai, Corazín jare Betsaida pewa reta tātate ye uiporarata ñonoï Tiro jare Sidón pewa reta wi,” jei.

15“Jare Capernaum pewa reta wirowia tēi Tumpa umbutuichata onoi reta. Erēi mbaetita jukuärái,” jei. “Jae reta uiporarata umanokue wae reta jenda pe,” jei.

16“Ime yawe kía uyapisaka peré wae, cheré uyapisaka oï rami ko. Jare ime yawe kía pereriro wae, che etei ko chereriro wi. Jare chereriro wae, wiriro wi ko chembou wae.” Jukuärái Jesús jei jokua setenta jemimboe reta pe ndei jae omondo reta mbowe.

### **Setenta wae reta Jesús omondo wae yuweru ye**

17Jare taikue rupi jokua setenta wae reta yuweru ye uyerowia rewe Jesús oï wae pe, jare jei reta chupe: “OreYa, aña retawe uyapo ore ndoe wae, nderee re ndoe chupe reta yawe,” jei reta.

<sup>18</sup>Jayawe Jesús jei chupe reta: “Che aecha pe reta pemiamiri jae reta itenondewa – jae ko Satanás. Aecha jae oa ara wi amaterere oa wae rami,” jei.

<sup>19</sup>“Mase, che amee ma pewe mbaepuere añã reta re. Jare kërái kía uyapaso mboi jare chumikaräpe wae rami, jukuärái wi pe reta pepuereta pemiamiri reta,” jei. “Añetete ko, yanderowaicho Añawasú ime onoi mbaepuere. Erëi che amee ma pewe mbaepuere pemiamiri waerä. Ndarau etei mbae ipuere uyapo pewe,” jei.

<sup>20</sup>“Erëitu awiye piyerowia añã reta uyapo pe pere chupe wae re. Piyerowiata ko peree uyekuatía ma oï ara pe wae re,” jei chupe reta.

<sup>21</sup>Jokua ora pe etei Jesús uyerowiaete Espíritu Santo rupi jare umbipi uyerure Tumpa pe kuärái: “CheRu mii, nde ko jae ara pewa reta iYa jare iwi pewa reta iYa wi,” jei. “Che ambutuicha nderee, echa’ä kua mbaembae ndikuaaka ma sambiai reta pe, jare nemaño’ä iyarakuaa katu echa iyupe wae reta re uikuaa waerä,” jei. “Jukuärái ndiyapo, cheRu, echa’ä jokua nembiyerowia ramo,” jei uyerure.

<sup>22</sup>Jayawe Jesús jei wi joko pe ñonoï wae reta pe: “CheRu umee ma chewe mbaepuere opaete mbaembae re. Jaeño chekuaa kawi. Mbaeti ye kiawe chekuaa kawiete. Jae ramiño wi mbaeti kiawe uikuaa kawiete cheRu. Cheño aikuaa kawi. Jare jokua che aikuaaka chupe wae reta uikuaa wi,” jei chupe reta.

<sup>23</sup>Jayawe Jesús oï yawe jemimboe reta ndiweño, jei chupe reta: “Pe reta pecha ma mbaembae ikawiete wae. Jáeramo piyekouete peï,” jei.

<sup>24</sup>“Che tae pewe añetete wae, ime iko jeta Tumpa iñee arakae umimbeu wae reta jare mburuwicha wasu reta uipotaete tõi uecha mbaembae pe reta pecha peï wae, jare uipotaete tõi uyandu reta mbaembae pe reta piyandu peï wae. Erëitu ipuere’ä uecha reta, jare uyandu’ä reta wi,” jei Jesús jemimboe reta pe.

### **Kuimbae ipiakawi wae Samaria pewa**

<sup>25</sup>Jare joko pe ime iko pëti kuimbae Moisés uikuatía wae re oporomböe wae. Kua kuimbae uipota omboporowa Jesús iyarakuaa. Jayawe uyemboi jare upirandu Jesús pe: “Oporomböe wae, ¿mbae pa ayapota anoi waerä tekowe opa mbae wae?” jei chupe.

<sup>26</sup>Jayawe Jesús jei chupe: “¿Mbae pa ko uikuatía arakae Moisés? ¿Mbae pa ko nemingeta joko pe?” jei chupe.

<sup>27</sup>Jayawe kuimbae jei Jesús pe: “Uyekuatía oï kuärái: ‘Peau yandeYa Tumpa pepia rewe, pekirëi rewe, pepiayemingeta rewe, jare añetete rewe.’ Jare, ‘peau perapicha kërái pe reta etei piyerau wae rami.’ Jukuärái uyekuatía oï,” jei Jesús pe.

<sup>28</sup>Jayawe Jesús jei chupe: “Jokua nde ndere wae, jaekawi ko ndere. Jekuaeño ndiyapo jukuärái yawe, imeta neni tekowe opa mbae wae,” jei chupe.

<sup>29</sup>Erëi jokua kuimbae uipota tõi uyerepi. Jáeramo upirandu Jesús pe: “¿Kía nunga reta ra ko jae cherapicha imeta ko au wae?” jei chupe.

<sup>30</sup>Jayawe Jesús jei chupe umbijaanga rewe: “Pëti kuimbae Jerusalén wi oo iko tëta wasu Jericó koti. Jare tape rupi aramoño imonda wae reta uesapia. Jare jae reta omboi chuwi jemimonde, jare uinupa, jare uyuka tëi ueya reta tape pe,” jei.

<sup>31</sup>“Jare jese katu pëti sacerdote ou iko jokua tape rupi. Erëi uecha yawe kuimbae ipere wae, uipota’ä etei oya jese ombori waerä. Mbiri katu rupiño uasa chuwi,” jei.

<sup>32</sup>“Jae nunga wi pëti levita ou iko jokua tape rupi. Jare uecha yawe kuimbae ipere wae, mbiri katu rupiño uasa chuwi wi,” jei.

<sup>33</sup>“Erëi pëti kuimbae iwí Samaria pewa ou iko wi jokua tape rupi. Jare jae uecha yawe jokua kuimbae ipere wae, uiparareko umae jese,” jei.

<sup>34</sup>“Jayawe jae oya jese, jare ueki vino jare aceite uipiano waerä chuwi ipere, jare opa oyokua chuwi ipere. Jayawe umupüa jare ombopo jae imburika re, jare wíraa uruwäe pëti tëta pe. Jare joko pe uyandareko jese,” jei.

<sup>35</sup>“Jare piarewe pe jokua kuimbae Samaria pewa oota ma joko wi yawe, ueki korepoti mokui ara mbarawiki jepi pewa jare umee tëta iya pe. Jare jei chupe: ‘Iyandareko mii jese chewe. Jare uepiti’ä ndewe yawe kua che amee ndewe wae, iporuka miño ndekorepoti chupe. Jare che ayu ye yawe, opata ambiëpi ndewe kuri,’ jei chupe,” jei.

<sup>36</sup>Jayawe Jesús jei jokua mburuwicha pe: “Añawe tapirandu ndewe: Kua mbapi kuimbae reta wi, ¿kía nunga pa ko uau kua japicha ipere wae añetete rewe? ¿Mbae pa ndere?” jei chupe.

<sup>37</sup>Jare kuimbae jei Jesús pe: “Jokua uiparareko umae jese wae,” jei chupe. Jayawe Jesús jei chupe: “Jukuäraiete ko. Jayawe ekua nde, iyapo wi jae uyapo wae rami,” jei chupe.

### **Jesús opou Marta jare María ipi**

<sup>38</sup>Jayawe Jesús jare jemimboe reta ndiwe jekuaeño yuraa Jerusalén koti. Jare yuraa uwäe reta pëti tëta wasu rai pe. Joko pe iko pëti kuña Marta jee wae. Kua kuña umbiasa kawi Jesús jëta pe.

<sup>39</sup>Jayawe joko pe oï rambuwe, Jesús umbipi oporomboe Tumpa iñee re. Jare Marta ipikii María jee wae uwapi yandeYa iyipi pe uyapisaka waerä iñee re.

<sup>40</sup>Erëi Marta uyembipia’ä iko jeta mbaembae uyapo waerä. Jayawe oo jei Jesús pe: “CheYa,” jei. “Chepikii chembori’ä oï. Jáeramo cheño pe etei ayapo ai tembiurä. ¿Mbae’ä yerä ndewe jokua? Ere mii chupe chembori waerä,” jei chupe.

<sup>41</sup>Jayawe yandeYa jei chupe: “Marta, Marta, nde ndikorái nei jare ndiyembipia’ä nei jeta mbaembae re.

<sup>42</sup>Erëi ime pëtiño mbae ikawiete wae, jare jokua ko María uiparawo iyupe. Jokua ndarau kiawe upiro chuwi,” jei Jesús Marta pe.

## **Lucas 11**

## Jesús oporomboe yerure rewa

(Mateo 6.9-13, 7.7-11)

- <sup>1</sup>Pëti ara Jesús uyerure iko Tumpa pe. Jare opa ma uyerure yawe, pëti jemimboe jei chupe: “CheYa, Juan omboe jemimboe reta kërái uyerure waerä Tumpa pe. Jare ore nduipota wi nde oremboe waerä jukuärái,” jei chupe.
- <sup>2</sup>Jayawe Jesús jei jemimboe reta pe: “Pe reta piyerure yawe Tumpa pe, piyerureta ko kuärái: ‘OreRu mii ara pe neï wae, nderee tuñeño tee opaete ñru tee reta wi. Tuwäe ara imambae nde ndiko waerä opaete wae imburuwicha wasurä jaeño mái pewa. Jare jukuärái tuyeyapo kua ñwi pe nde ndipota wae kërái ara pe uyeyapo oï wae rami.
- <sup>3</sup>Jare emee mii orewe opa ara rupi orerembiurä.
- <sup>4</sup>Awïye mii nemandúa orewe mbaembae nduyawi ndekoti wae re, echa’ä jukuärái wi ore oremandua’ä uyawi orekoti wae reta pe. Awïye mii toya orekoti uyawïka orewe ndekoti wae, jare orerepi mii Añawasú wi.’ Jukuäráita ko pe reta piyerure,” jei Jesús chupe reta.
- <sup>5</sup>Jare jei wi chupe reta: “Yambijaanga. Pëti wae pe reta oo yawe japicha jëta pe piare mbïte rupi jare jei chupe: ‘Cheïru, iporuka mii chewe mbapi mbïyape.
- <sup>6</sup>Echa’ä pëti chemboupa ou opou chepi, jare che mbaeti anoi mbae amee jou waerä,’ jei.
- <sup>7</sup>“Jayawe tëta iya jeita chupe japipe wi: ‘Emaeño cheré. Echa’ä öke uyeyukenda ma oï. Che jare chesambiai reta opa ma nduyapakua noï. Jare jae ma noï ndoke waerä. Chepuere’ä ma apüa amee waerä ndewe,’ jeita chupe.
- <sup>8</sup>“Erëi che tae pewe, yepe tëi jokua tëta iya uipota’ä upüa, erëi japicha ikueri’ä uyerure chupe ramo, upüata ko umee chupe opaete ueka wae. Mbaeti ko jae ñru ramoño umeeta chupe,” jei Jesús chupe reta.
- <sup>9</sup>“Jayawe che tae pewe, mbae uata oï pewe yawe, piyerureñoi Tumpa pe jese. Pekañoi chupe, jare jae umeeta pewe. Piyerure chupe kía öke pe ueni pii oï wae rami, jare jae uipeata pewe,” jei.
- <sup>10</sup>“Echa’ä kía uyerure yawe Tumpa pe mbae re, Tumpa umeeta oï chupe. Jare jae nunga wi kía ueka yawe, uwäeta chupe wi. Jare uyepeata oï chupe wi kía öke pe ueni oï wae. Jukuärái ko peRu Tumpa,” jei.
- <sup>11</sup>“Mase. Nderai mbïyape ueka ndewe yawe, ndarau nemeeta chupe ita. Jare nderai pira chariki ueka ndewe yawe, ¿nemeeta yerá chupe mboi?” jei.
- <sup>12</sup>“Jae ramiño wi nderai ueka ndewe yawe ururupía, ¿nemeeta yerá chupe pëti chumïkaräpe?” jei.
- <sup>13</sup>“Pe reta, yepe tëi pereko ikawi mbae wae ko, erëi pikuaa ko pemee waerä mbaembae ikawi wae pesambiai reta pe. Jare jukuärái yawe, ¿këráita pa peRu ara

pe oï wae umeeta'ä pewe Espiritu Santo peka chupe yawe?" jei Jesús jemimboe reta pe.

### **Mburuwicha reta umbijeko tēi Jesús**

*(Mateo 12.22-30; Marcos 3.20-27)*

**14**Pēti ara Jesús omoë pēti kuimbae wi añã ñnee umikañi chuwi wae. Jare añã oë ma yawe kuimbae wi, kuimbae umbipi uyemingeta kawı ye. Jare jeta joko pe ñonoï wae reta ipiakañi jese.

**15**Erēi amokue wae reta jei: "Añawası imbaepuere rupi ko kua kuimbae omoë oï añã reta kuimbae reta wi," jei tēi reta.

**16**Jare ĩru wae reta uipota tēi uyawıka Jesús pe. Jáeramo jei reta chupe: "Añetete Tumpa nembou yawe, jayawe yaecha iyapo orewe mbae tuicha wae Tumpa imbaepuere pe," jei reta.

**17**Erēi Jesús uikuaa chuwi reta ipıayemingeta, jare jei chupe reta: "Pēti ĩwi pewái oyowaicho reta yawe jae yepái, opata ko uyererukachi reta. Jare jukuärıta wi ko pēti ñetära reta oyowaicho yawe jae yepái," jei.

**18-19**"Jayawe Satanás ndarau jaei uñemoë kuimbae wi. Echa'ä jukuärıı yawe, Satanás jare añã reta opata tēi uyembıyao tee tee oyowaicho waerä jae yepái, jare opata tēi uyererukachi reta. Jukuärıı che jae, echa'ä pe reta pere tēi peı che Añawası imbaepuere rupi ko amoë aı añã reta uyembııya jese wae reta wi," jei chupe reta. "Erēi peremimboe reta jae nunga wi omoë ñonoï añã uyembııya jese wae reta wi. Jayawe, ¿kía imbaepuere pe pa jae reta jokua uyapo ñonoï? Pepirandu chupe reta. Jae reta jei wae rupi pikuaata ko peı piyawı ma jokua mbae pere peı chekoti wae," jei chupe reta.

**20**"Añetete Tumpa imbaepuere pe ko che amoë aı añã uyembııya jese wae reta wi. Jáeramo añawe pecha peı Tumpa imbaepuere mburuwicha wasu pewa pepite rupi oï," jei Jesús chupe reta.

**21**"Yambijaanga. Pēti kuimbae ipıräta wae kispuku onoi wae uyandareko yawe jēta re, ndarau kía oñomi chuwi imbaembae," jei.

**22**"Erēi ou yawe ĩru kuimbae ipırätaete chuwi wae uñeräro waerä jae ndiwe, umıamırıta ko jare upırota ko chuwi ikispuku wırowıa katu tēi jese wae. Jare upırota wi chuwi imbaembae, jare wıraata opa umeemee japıcha reta pe," jei. "Jare jukuärıı wi che mbaeti yawe tenonde amıamırı añã reta itenondewa Añawası, ndarau wi chepuere amoë añã reta. ¿Kērıtıta ra chepuere jayawe amoë añã reta kía wi Añawası imbaepuere pe?" jei chupe reta.

**23**"Yande reta ñañeräro ko ñaı Añawası koti. Jare ipotawe kía uyemboya'ä che ndiwe ñeräro pe wae, oyowaicho ko oï chekoti. Jae ramiño wi kía uipota'ä mbarawıki pe chemııru wae, chembiawái ko oï," jei Jesús chupe reta.

### **Jesús umbijaanga judıo reta kuimbae añã uyembııya jese wae re**

*(Mateo 12.43-45)*

<sup>24</sup>“¿Mbae re ra chepuere pumbijaanga, pe pereko kachi wae reta?” jei chupe reta. “Pe reta ko jae kuärái: Pëti añä oë ma yawe kuimbae uyembiiya jese wae wi, jokua añä oo iwi utini wae rupi ueka kiaepe iko waerä tēi. Erēi uwäe’ä chupe yawe, jae jei iyupe: ‘Taa ye kuimbae aikose jese wae re,’ jei.

<sup>25</sup>Jayawe añä oo ye uwäe yawe jokua kuimbae oï wae pe, uecha kuimbae pëti tēta uyeyapikatu kawï oï wae rami jare uyeyoe kawï wae rami,” jei.

<sup>26</sup>“Jayawe añä oo ye ueru ïru chiu añä reta kachiete chuwi wae yureko waerä jokua kuimbae re. Jare juri rewe uike reta yureko waerä jokua kuimbae re,” jei. “Tenonde yawe, pëtiño añä uyembiiya jese yawe, jokua kuimbae uiporarase. Erēi añawe rupi oete ye ma uiporara parawete.” Jukuärái jei Jesús chupe reta.

### **Jesús uikuaaka kía reta ko jae uyekoueteta añetete rewe wae**

<sup>27</sup>Jare Jesús kua mbaembae jei ma yawe, pëti kuña joko pe oï wae jei chupe usapikái rewe: “Uyekouete oï jokua kuña ndea chuwi wae jare nembikambu wae,” jei chupe.

<sup>28</sup>Jayawe Jesús jei chupe: “Jukuärái tēi ko. Erēi uyekoueteta chuwi opaete Tumpa ñee re uyapisaka wae reta jare jae jei wae uyapo wae reta,” jei chupe.

### **Jesús umbieta chupe reta uipotaiño omboporowa reta imbaepuere ramo**

*(Mateo 12.38-42)*

<sup>29</sup>Jare jeta wae yuweru Jesús oï wae pe. Jayawe Jesús jei chupe reta: “Pe reta añawe peï wae reta, pereko kachi ko. Pipota tēi ayapo waerä pewe mbae tuicha wae Tumpa imbaepuere pe jukuärái aechaka waerä pewe Tumpa ko chembou wae. Erēi jaeño uasata oï kërái Tumpa ñee arakae umimbeu wae Jonás pe uasa wae rami. Jare jukuärái pikuaata pe reta Tumpa ko chembou wae,” jei.

<sup>30</sup>“Echa’ä jokua mbae Jonás pe uyeyapo wae uikuaaka Nínive pewa reta pe añetete ko Tumpa ombou wae. Jukuärái wi che kuimbaerä ayeyapo wae, jokua mbae chewe uyeyapo wae uikuaakata pewe añawe peï wae reta Tumpa ko chembou wae,” jei chupe reta.

<sup>31</sup>“Jare uwäe yawe ara piyemboi waerä Tumpa jowai, imeta ambie wae pembijeko oï wi, pe añawe peï wae reta,” jei chupe reta. “Jae ko kuña mburuwicha wasu arakae iko sur koti wae. Echa’ä jae ou mbiriete ye wi uyapisaka waerä mburuwicha wasu Salomón iyarakuaa re. Erēi yepe tēi che chearakuaa katuetete ye ko Salomón wi, erēi pe reta piyapisaka’ä chiñee re,” jei chupe reta.

<sup>32</sup>“Jae ramiño wi, uwäe yawe ara piyemboi waerä Tumpa jowai, arakae tēta wasu Nínive pewa reta pembijekota ñonoï wi, pe añawe peï wae reta,” jei chupe reta. “Echa’ä arakae rupi Jonás umimbeu yawe chupe reta Tumpa ñee, jae reta opa woi ueya ipiyemingeta jupi mbae wae Tumpa rewa. Erēi pe reta piyapo’ä ko jae reta uyapo wae rami, yepe tēi chembaepuere tuichaete ye ko Jonás imbaepuere wi,” jei Jesús chupe reta.

### **Yawata Tumpa ndiwe wae, jae ko tembipe pe yaiko wae rami**

33“Yambijaanga. Mechero yamiendi yawe, ndarau ñañomi. Jare ndarau ñañono yapepo uyembowapo oï wae íwi pe. Ñañono ko iwate mechero jenda pe, o pe uike wae reta uecha kawi waerä jembipe pe,” jei chupe reta.

34“Pe reta pëti pëti wae penoi peresa jare pecha tëi ma mbaembae ayapo wae. Erëi pe reta kía jesasiete oï wae rami ko,” jei. “Yande yaikuaa ñai kía jesasiete oï yawe, ndarau ipuere uyemingeta jupi ipia pe jae mbaembae uecha wae re. Jae ipiyemingeta opa ma uñemipitumimbi rami,” jei. “Erëi jesa ikawi oï yawe, ipuere uyemingeta jupi ipia pe jae mbaembae uecha wae re. Jayawe ipiyemingeta oï tembipe pe rami,” jei.

35“Jáeramo pe reta piyandareko kawi piyé, awiye waerä pepiyemingeta rupi pepita pütumimbi pe,” jei chupe reta.

36“Jayawe pe reta piko yawe chiñee rupi, pepiyemingeta oïta ko tembipe pe rami. Jare jukuarái Tumpa umbiembipeta pepia pe pëti tembipe tuicha wae uesape peré rami. Jayawe mbaeti ma pütumimbi pepia pe oï,” jei Jesús chupe reta.

### **Jesús umbijeko judío imburuwicha reta**

*(Mateo 23.1-36; Marcos 12.38-40)*

37Jare opa ma Jesús uyemingeta yawe, pëti fariseo uparea chupe oo ukaru waerä jëta pe. Jayawe yuraa reta fariseo jëta pe, jare joko pe Jesús uwapi ukaru waerä.

38Jare jokua fariseo uecha Jesús mbaeti uyepoe ukaru waerä kërái judío reta jeko rupi uyapo wae rami. Jáeramo ipiakañi umae jese.

39Jayawe yandeYa Jesús jei chupe: “Pe fariseo piko wae reta, jupi wae echa ko tëi. Erëi pe reta ko jae karúa reta jare vaso reta ikupekueño uyeyoe wae rami. Echa’ä pepia oï monda reño jare mbaembae kachi wae reño,” jei chupe.

40“Pe reta pearakuaa mbae echa ko Tumpa koti. Añetete ko, Tumpa uyapo yanderete yandepuere yaecha wae. Erëi jae uyapo wi yanderekowe mii japipe rupi oï wae. ¿Këraita pa perowia Tumpa uecha’ä oï mbaembae pepia pe oï wae?” jei.

41“Pe reta pipota’ä pekia peï Tumpa koti yawe, jayawe pemborita ko iparawete wae reta ime penoi wae pipe,” jei chupe.

42“Pe fariseo piko wae reta, ¡Tumpa tuicha uiporarakata oï pewe!” jei chupe. “Echa’ä pemeeñoi diezmo penoi wae wi, jare mbaembae tembiu pembipiche pipe wae retawe wi pemee diezmo. Erëi uata oï pewe piyapo waerä mbae jupi wae jare peau waerä Tumpa. Erëi pe reta pewarä, mbae’ä ko jokua,” jei chupe. “Pe reta diezmo pemee wae, jaekawi oï tëi. Erëi piyapota tëi ko wi jokua iru mbaembae reta,” jei chupe.

43“Pe fariseo piko wae reta, ¡Tumpa tuicha uiporarakata oï pewe!” jei chupe. “Echa’ä peo yawe tupao pe, jekuaeño pipotaete pewapi tenda tenondewa ikawiete wae pe. Jare pewata peï mercado rupi yawe, jekuaeño pipota iru wae reta uipiu rewe pembisaluda waerä,” jei chupe.



44“Pe fariseo piko wae reta, ¡Tumpa tuicha uiporarakata oï pewe!” jei chupe. “Echa’ä pe reta peporomboe wae rupi pemingia peï ñru wae reta Tumpa koti. Jare jukuärái pe reta ko jae teöwerenda uyekuaa’ä oï wae rami. Jare ñru wae reta jokoropi uwata ñonoï yawe, uikuaa’ä upïro ñonoï opa yea mbaekia re,” jei chupe.

45Jayawe pëti kuimbae Moisés uikuatía wae re oporomboe wae joko pe oï wae jei Jesús pe: “Oporomboe wae, kua ndiyemingeta wae rupi nde ndere neï wi mbae ikawi mbae wae orekoti,” jei chupe.

46Jayawe Jesús jei chupe: “Pe Moisés uikuatía wae re peporomboe wae reta, ¡Tumpa tuicha uiporarakata oï pewe wi!” jei chupe. “Echa’ä pe reta pemïru ñru wae reta pe jetaete ye mbaembae uyapo reta waerä, jare pere tëi chupe reta: ‘Kua rupi ko yayeyokuita Tumpa pe,’ pere. Erëi jukuärái pe reta jaeño piñono peï jese reta tewita poiete wae owoi wiraa waerä wae rami. Erëi pe reta michi mii awe yepe pembori’ä reta,” jei chupe.

47“¡Pe reta pikuasi parawete! ¡Tumpa tuicha uiporarakata oï pewe!” jei. “Arakae rupi Tumpa ombou kuimbae reta jae ñnee umimbeu waerä. Erëi peramikue reta opa uyuka reta. Jare añawe pe reta pemopöra peï kiae kiae jokua kuimbae jupi wae reta jeöwekue uñeñoti oï wae rupi,” jei.

48“Jare kua piyapo wae rupi jaeño piyapo peï yemimandúa peramikue reta uyapo wae. Pechaka peï jae reta uyapo wae jaekawiño oï pewe. Jae reta uyuka jokua kuimbae reta Tumpa ombou wae, jare pe reta añawe pemopöra peï kiae kiae jae reta jeöwekue uñeñoti oï wae pe,” jei chupe.

49“Jáeramo Tumpa iyarakuaa rupi jei: ‘Amondota judío reta pe chiñee umimbeu wae reta, jare jae nunga wi ñru wae reta amondota cheree re. Jare judío reta uyukata oñono amokue kua reta. Jare ñru wae reta pe uyapota reta ikawi mbae wae.’ Jukuärái Tumpa jei,” jei.

50“Jare jokua nungaete wi pe añawe peï wae reta piyapo peï. Jáeramo jokua jeko pewa pe reta penoita teko opaete jokua kuimbae Tumpa ombou wae reta imano re ñwi uyembipi wiwe

51— jae ko Abel wiwe Zacarías rewa. Jokua Zacarías, peramikue reta uyuka tupao wasu joka mbite pe etei,” jei. “Erëi yepe tëi peramikue reta ko opa uyuka reta, erëi Tumpa pembijekota oï wi pe añawe peï wae reta opaete jae reta imano re. Kua che jae pewe wae añetete ko,” jei chupe.

52“Pe Moisés uikuatía wae re peporomboe wae reta, ¡Tumpa tuicha uiporarakata oï pewe!” jei chupe. “Echa’ä pe reta peporomboe kawí’ä Tumpa ñnee re, jare jukuärái pepïro ma chuwi reta arakuaa Tumpa rewa. Pe reta etei pikuaa’ä Tumpa. Jare oete ma, piyopia peï chuwi reta awiye waerä uikuaa reta Tumpa,” jei chupe.

53Jayawe Jesús kua opa ma jei yawe, oë oo joko wi. Jare opaete Moisés uikuatía wae re oporomboe wae reta jare fariseo reta pochiete reta Jesús koti. Jare joko wiwe jae reta umbipi upirandu chupe jeta mbaembae yawái wae re.

<sup>54</sup>Echa'ä jukuärái rupi jae reta uipota tēi uyawika chupe jae iñee rupi umbijeko reta waerä.

## Lucas 12

### Jesús umikirēi jemimboe reta awiye waerä ukiye jowaicho reta wi

*(Mateo 10.26-33, 12.32, 10.19-20)*

<sup>1</sup>Jayawe jetaete ye uyembati Jesús oī wae pe, jare uñemiaña ye reta. Erēi Jesús ombone tenonde jemimboe reta rani. Jayawe jei chupe reta umbijaanga rewe: “Piyandareko kawi piyé kuri fariseo reta ilevadura wi – jae ko kērái jae reta uyeyokui Tumpa pe añetete wae nunga,” jei chupe reta.

<sup>2</sup>“Opaete mbaembae jae reta uyapo wiari tēi wae, taikue rupi oēta oī ikatu pe etei. Añawe jae reta uikuaku ñonoī jeko kachi reta, erēi jokua uyekuaata oī taikue rupi,” jei.

<sup>3</sup>“Jare pe reta wi, jokua pītumimbi pe piyemingeta wae uyenduta tembipe pe. Jare perēta japipe piyemingeta wiari wae jerākuata opaete wae pe,” jei chupe reta.

<sup>4</sup>“Jare che tae pewe cheiru reta, awiye pekiye perete ipuereta uyuka pewi wae reta wi. Echa'ä peyuka ma yawe, ndarau ye ma ipuere mbae uyapo pewe reta,” jei.

<sup>5</sup>“Erēi che taikuaaka pewe kía wi ko ikawi pekiye waerä. Ikawi ko pekiye waerä Tumpa wi. Echa'ä jae ipuere wi perete uyuka pewi. Jare joko wi ime onoi mbaepuere pemondo waerä Tatawasurenda pe. Jáeramo che tae pewe, chuwi ko ikawi pekiye waerä,” jei Jesús chupe reta.

<sup>6</sup>“Yande yaikuaa kawi ñaī wira raī reta jepi'ä ko. Erēitu jesewe Tumpa iñakañi'ä etei pēti awe chuwi reta.

<sup>7</sup>¿Kērāita pa jayawe peRu Tumpa uyandarekota'ä wi peré? Echa'ä jae perauete ye ko opaete wira raī reta wi,” jei chupe reta. “Jare jae pekuaa kawiete ramo, jae uikuaa wi mbowi ra pea penoi päka pe wi. Jáeramo awiye pekiye,” jei chupe reta.

<sup>8</sup>“Jae nunga wi che tae pewe kuärái: Ime yawe kía uyembeu kawi che rewa iru wae reta jowake, che kuimbaerä ayeyapo wae jae nunga wi amimbeu kawita jesewa opaete araiwa Tumpa pe uyeyokui wae reta jowake,” jei.

<sup>9</sup>“Erēi ime yawe kía chekuaku iru wae reta jowake, jayawe che aikuakuta wi araiwa Tumpa pe uyeyokui wae reta jowake,” jei chupe reta.

<sup>10</sup>“Jare che kuimbaerä ayeyapo wae, ime yawe kía mbae kachi jei chekoti wae, Tumpa ipuereta umbái chuwi jokua mbae kachi wae. Erēi ime yawe kía uyemingeta kachi Espiritu Santo koti wae, Tumpa ndarau umbái chuwi jokua,” jei Jesús chupe reta.

<sup>11</sup>“Jayawe iru wae reta pepisi jare pereraa yawe tupao reta pe pembiyemboi waerä mburuwicha reta jare iru mbaepuere onoi wae reta jowai, awiye piyembipia'ä mbae pere waerä.

<sup>12</sup>Echa'ä jokua ora etei Espiritu Santo uikuaakata oï pewe mbae pere waerä," jei Jesús jemimboe reta pe.

### **Kuimbae ikokatu jare iyarakuaa mbae echa wae**

<sup>13</sup>Jayawe jokua jeta uyembati ñonoï wae reta ipite wi pëti kuimbae jei Jesús pe: "Oporomboe wae," jei. "Ere cherikei pe umbiyao waerä chewe jokua orerukue ueya orewe wae," jei chupe.

<sup>14</sup>Jayawe Jesús jei chupe: "Tëtara, che ayu'ä ko jokua nunga mbarawiki ayapo waerä," jei chupe.

<sup>15</sup>Jayawe Jesús jei opaete wae pe: "Piyandareko kawi piyé awiye waerä jeta mbaembae pipotaete. Jeta wae reta wirowia tēi jeta mbaembae onoi yawe, jekowe ikawita oï. Erēi jukuäräi'ä ko," jei chupe reta.

<sup>16</sup>Jayawe Jesús jei chupe reta umbijaanga rewe: "Ime iko pëti kuimbae ikokatu wae iawati yawiye kawiete chupe wae.

<sup>17</sup>Jare jae jei iyupe ipia pe: "¿Mbae ra ayapota? Cheawatío reta opa ma tinee. Mbaeti ma kiapē cheawati añoño waerä," jei.

<sup>18</sup>Jayawe kuimbae jei iyupe: '¿Aikuaa ma mbae ayapo waerä! Ambaita opaete cheawatío reta jare ayapo yeta ambie awatío reta tuicha wae. Jare joko pe aupita opaete cheawati jare chembaembae.

<sup>19</sup>Jayawe jaeta cheyupe: 'Jetaete ma awati aupi. Uepitita jeta año pewa. Añoñawe taputuu, takaru, takau, jare tayerowia.' Jukuäräi kuimbae jei tēi iyupe.

<sup>20</sup>"Erēi Tumpa jei jokua kuimbae pe: '¿Ndearakuaa mbae echa ko nde! Echa'ä kua pïtu etei aekita ai ndewi nderekowe. Jayawe ndeupi tēi ma ko jeta mbaembae ndeyupe,' jei chupe."

<sup>21</sup>Jayawe Jesús jei wi chupe reta: "Jukuäräi etei ko uasata oï ipotawe kía umbati mbaembae imaerño wae pe, jare ikokatu'ä oï yawe Tumpa koti," jei chupe reta.

### **Awīye yayembīpia'ä mbae re awe**

*(Mateo 6.25-34)*

<sup>22</sup>Jayawe Jesús jei jemimboe reta pe: "Jayawe che tae pewe, awiye piyembīpia'ä jokua mbaembae piporuta wae re kua iwī pe peī rambuewe – jae ko perembiurä wae re jare peremimonderä wae re," jei.

<sup>23</sup>"Echa'ä ñai'ä ko yakaru wae reño. Jare yanderete oï'ä ko temimonde reño," jei chupe reta.

<sup>24</sup>"Mase. Pemaē wira reta re. Mbaeti jae reta umaeti jare mbaeti umbaewiro wi. Jare mbaeti upi reta wi awati awatío pe," jei. "Erēitu Tumpa umingarū reta. Jare jukuäräi yawe, ¿kērāita pa jae pemingaruta'ä pe reta wi? Echa'ä jae perauete ko wira reta wi," jei chupe reta.

25“¿Ime yerá kía uyembipia’ä rupi ipuere umiiru iyupe michi mii yepe jekowe wae? 26Mbaeti etei. Jayawe jokua pepuere’ä piyapo yawe, ¿maera ra piyembipia’ä pei ipotawe mbaembae re?” jei Jesús chupe reta.

27“Jae nunga wi pema mbaepoti reta re kërái ukuakuaa reta,” jei. “Uparawiki’ä reta jare umaepöwa’ä reta jemimonderä uyapo waerä. Erëi che tae pewe, pea mbaepoti reta maepöraete ye ko arakae mburuwicha wasu Salomón jemimonde ikawi wae wi, yepe tēi jae ikokatu wae rupi uyemonde kawiete ye,” jei.

28“Jukuärái Tumpa omopöra kawi ñana reta, yepe tēi ñana reta pēti ara jekowe rewe oī jare piarewe pe ñañono tata pe,” jei. “Jare pe reta, Tumpa perauete ye ko jokua mbaepoti reta wi. Jayawe ¿këräita pa jae umeeta’ä pewe peremimonderä? Tumpa re perowia wae michiete ko,” jei chupe reta.

29“Jayawe awiye piyembipia’ä mbaembae peuta wae re,” jei.

30“Echa’ä jokua nunga mbaembae reta re ko uyembipia’ä Tumpa re wirowia mbae wae reta. Erëi pe reta, awiye piyapo jukuärái, echa’ä peRu ara pe oī wae uikuaañño mái jokua mbaembae piporuta wae,” jei.

31“Piñono tenonde Tumpa pemburuwicha wasurä opaete mbaembae rupi. Jare jukuärái piyapo yawe, jae umeeta pewe wi jokua mbaembae uata oī pewe wae,” jei Jesús chupe reta.

### **Jesús oporomboe kërái mbaembae ikawi wae ñanoi waerä ara pe**

*(Mateo 6.19-21)*

32Jayawe Jesús jei wi chupe reta: “Awiye pekiye, cheremimboe mbowi mii pei wae reta. Echa’ä Tumpa umee ma pewe piko waerä jae ndiwe jae oī ma yawe opaete wae imburuwicha wasurä jaeño mái pewa. Jare jokua re ko jae uyerowiaete oī,” jei chupe reta.

33“Jayawe pewaka pemaembae korepotirä, pipe pembori waerä iparawete wae reta. Jare jukuärái piyapo yawe, penoita ara pe mbaembae ikawi wae opa mbae wae, kiape imonda wae reta uike mbae wae pe jare kiape kupii ipuere’ä mbae urükumewa wae pe,” jei.

34“Ikawi ko penoi waerä mbaembae ikawi wae ara pe, echa’ä kiape mbaembae ikawi wae penoi wae pe, joko pe ko oī wi pepia,” jei chupe reta.

### **Imeta ko ñääro kawi ara yandeYa Cristo ou yeta wae**

35Jare Jesús jei wi jemimboe reta pe: “Che a yeta ai pewi. Erëi ayu yeta ai kuri. Jáeramo, pe reta, jekuaeño piyeyapikatu kawi ara ayu yeta wae pewarä,” jei chupe reta.

36“Piko uyeyokui wae reta karái iwäe ara uäro ñonoī wae rami. Yambijaanga. Pēti karái oo menda pe yawe, ¿mbae ra uyapota uyeyokui ikawi wae reta? Jae reta uäro kawita karái jēta pe imechero jendi rewe karái ou ye rewa,” jei. “Jukuärái karái ou ye uwäe yawe jare öke pe ueni yawe, jae reta uipea woita chupe öke jare jae ma ñonoī reta uyeyokui waerä karái pe,” jei.

37“Jare jokua karái uecha yawe uyeyokui wae reta uäro ñonoï oke mbae rewe, jayawe uyerowiaeteta umae jese reta. Che tae pewe añetete wae, jokua karái umbiwapita uyeyokui wae reta mesa pe jare umingaruta reta jae etei,” jei.

38“Jáeramo, ¡kërái etei ndipo jokua uyeyokui wae reta uyerowiata jae reta uäro kawi yawe karái iwäe ara! Jukuäráita ko, yepe tēi aramoi jae outa uwäe piare mbite rupi ani ndei kōe mbowe,” jei Jesús chupe reta.

39“Che aipota pikuaa kawi waerä kua: Pēti tēta iya uikuaa yawe mbae nunga ora etei ra outa imonda wae oñomi waerä chuwi imbaembae, jae ndarau etei oke jare ndarau wi umaño imonda wae re uike waerä jēta pe,” jei.

40“Jae ramiño wi pe reta pikuaata’ä kërái yawe etei ra che kuimbaerä ayeyapo wae ayu yeta wae. Echa’ä ayu yeta äi pepiranoe pewa. Jáeramo jekuaeño piyandareko kawi piyé,” jei chupe reta.

### **Awiye yaiko pēti uyeyokui wae uyandareko’ä oï wae rami**

*(Mateo 24.45-51)*

41Jayawe Pedro upirandu Jesús pe: “CheYa, jokua ndere nembijaanga rewe wae, ¿ndere oremaeräño, ani opaete pewartä wi?” jei chupe.

42Jayawe yandeYa jei umbijaanga rewe: “Pēti karái ime onoi yawe pēti uyeyokui chupe wae iyarakuaa katu jare wirowia katu wae, jae oñonota opaete uyeyokui wae reta iyandarekoarä umingaruta waerä opa ara rupi,” jei.

43“Jukuärái yawe, jokua karái ipuere oo uwata ikotia rupi ipiawiwe rewe. Jare jae ou ye uwäe yawe jēta pe, jare uecha yawe jokua uyeyokui wae uyapo kawi oï iparawiki, jayawe karái uyerowiaeteta umae jese. Jare jae nunga wi jokua uyeyokui wae uyerowiata upita,” jei.

44“Che tae pewe añetete wae, jokua nunga uyeyokui wae pe karái umeeta uyandareko waerä opaete imbaembae re,” jei chupe reta.

45“Erēi aramoi jokua uyeyokui wae jeita iyupe: ‘Karái ndarau ou ye imambae,’ jeita. Jayawe umbipita uinupa ïru uyeyokui wae reta – kuimbae reta jare kuñatái reta – jare umbipita ukaru, jare ukau, jare usawipo,” jei.

46“Jayawe pēti ara jokua karái ou yeta uwäe ipiranoe pewa jēta pe. Jare uiporarakata jokua uyeyokui wae pe, jare joko wiwe ndarau ye wirowia katu jese,” jei chupe reta.

47“Añetete ko, pēti uyeyokui wae uikuaa tēi yawe karái jei chupe wae, erēi uyapo’ä yawe jare uyandareko’ä yawe, jayawe karái täta rupi uiporarakata oï chupe,” jei.

48“Erēi ime yawe pēti uyeyokui wae uikuaa’ä yawe karái jei wae, jare jokua jeko pewa uyapo’ä yawe, jayawe karái ndarau jeta uinupa,” jei. “Jare jukuärái wi ime yawe kía pe jeta mbaembae uñemee wae, jeta wi uyerekata oï chupe. Jare ime yawe kía pe jeta uñemee uyandareko waerä jese wae, jeta wi uyerekata oï chupe,” jei Jesús chupe reta.

## Jesús jeko pewa iwi pewa reta oyowaichota yureko

(Mateo 10.34-36)

49Joko wi Jesús jei umbijaanga rewe: “Che ayu kua iwi pe tata amiendi waerä, jare ;kerái moná aipota echa ma tata jendi oï waerä tēi!” jei.

50“Erēi che imeta ko aiporara rani tuicha rupi, jare tāta rupi chepiatiti ai jokuu uyeyapo rewa,” jei chupe reta.

51“Pe reta perowia tēi che ayu ko iwi pewa reta yureko waerä ipiawiwe rewe jare uñerāro mbae waerä. Erēi che tae pewe, mbaeti etei ko. Che ayu ko iwi pewa reta uyembiyao tee reta waerä iyuwi chereko pewa,” jei.

52“Chereko pewa añawe wiwe tētara reta uyembiyao teeta oï reta iyuwi,” jei. “Yambijaanga. Yureko yawe pandepo pēti tēta pe, mbapi wae ipuere oyowaicho mokui wae ndiwe, jare mokui wae ipuere oyowaicho mbapi wae ndiwe,” jei.

53“Jare chereko pewa jeta tu reta oyowaichota tai reta koti, jare jeta tai reta oyowaichota tu reta koti,” jei. “Jare chereko pewa jeta ichi reta oyowaichota imembi kuña reta koti, jare jeta imembi kuña reta oyowaichota ichi reta koti,” jei. “Jare chereko pewa jeta imesi reta oyowaichota imembitati reta koti, jare jeta imembitati reta oyowaichota imesi reta koti,” jei. “Jukuärái ko kua iwi pewa reta uyembiyao teeta iyuwi chereko pewa,” jei Jesús chupe reta.

## Jesús umbieta chupe reta

(Mateo 5.25-26, 16.1-4)

54Joko wi Jesús jei opaete joko pe uyembati ñonoï wae reta pe: “Pe reta pecha yawe amapitu oē oï warasi uike wae koti wi, jupiwai pereñoi, ‘Okita oï.’ Jare jukuärái wi uyeyapo,” jei.

55“Jae ramiño wi tāta iwitu yawe, pere, ‘Arakuta oï.’ Jare jukuärái wi uyeyapo,” jei.

56“;Peraakuaa katu añetete wae nunga! Pikuaa kawu ma peï pemae ara re jare iwi re kēraitā oï ara wae. Erēi pemae yawe mbaembae ayapo ai añawe rupi wae re, ;kerái mbate ra pikuaa’ā mbae ra uipota jei wae?” jei chupe reta.

57“;Maera pa pe retái pikuaa’ā kērai pemae waerä mbaembae re, jae ra ko jupi wae ani jupi mbae wae?” jei chupe reta.

58“Ikawu ko kua re piyemingeta waerä pepia pe. Pe reta pikuaa kawu peï, ime yawe kía uipota uñeapo nderé wae, ikawu ko ndeo ndiyeapikatu waerä jae ndiwe imembaeño. Echa’ā jukuärái’ā ndiyapo yawe, jae uñeapota oï nderé mburuwicha pe, jare nde imeta ko ndeo ndiyemboi mburuwicha jowai. Joko wi mburuwicha neñonota peresoriru iyandarekoa ipo pe jae neñonoka waerä peresoriru pe,” jei.

59“Che tae ndewe añetete wae, ndarau etei ndepuere neë peresoriru wi opa nembiepi rewa jokuu mburuwicha okowara ndewe wae.” Jukuärái Jesús omboe reta kērai ikawu ko uyeapikatu reta waerä Tumpa ndiwe ndei kaaruete mbowe.

## Lucas 13

### **Jesús jei chupe reta ueya reta waerä ipiyemingeta jupi mbae wae**

<sup>1</sup>Jayawe amokue joko pe ñonoï wae reta jei Jesús pe: “¿Ndikuaa pa jokua amokue iwi Galilea pewa reta opa umano tupao wasu pe wae?” jei reta chupe. “Jae reta uyuka jare umee yureko mbaemimba Tumpa pe. Jare aramoiño mburuwicha Pilato opa uyukaka reta. Jare jukuärái jae reta juwi uyepiyere jare ueya mbaemimba reta juwi ndiwe,” jei reta Jesús pe.

<sup>2</sup>Jayawe Jesús jei chupe reta: “¿Pe reta perowia pa jae reta jeko kachiete wae ko Tumpa jowai opaete ñru Galilea pewa reta wi, jare jokua jeko pewa jukuärái uasa chupe reta?” jei chupe reta.

<sup>3</sup>“Che tae pewe jukuärái’ä ko. Jare pe reta peya’ä yawe pepiayemingeta jupi mbae wae Tumpa rewa, jae nunga wi opata pekañi peï jae reta rami,” jei chupe reta.

<sup>4</sup>“Jare pemandúa peï wi jokua tēta iwate wae Siloé pe iko wae re, kērái opa uyapara jare opa uyuka jokua dieciocho wae reta. Aramoi pe reta perowia tēi opaete Jerusalén pewa reta ipite wi, jokua dieciocho umano wae reta jeko kachiete wae ko Tumpa jowai,” jei.

<sup>5</sup>“Erēi che tae pewe, jukuärái’ä ko. Jare pe reta peya’ä yawe pepiayemingeta jupi mbae wae Tumpa rewa, jae nunga wi opata pekañi peï jae reta rami,” jei chupe reta.

### **Jesús umbijaanga judío reta pēti iwa ía mbae wae re**

<sup>6</sup>Jayawe Jesús jei chupe reta umbijaanga rewe: “Ime iko pēti kuimbae ime wireko pēti iwa uvarupa pe wae. Jare pēti ara jae oo tēi umae jese ime ma ra ía wae re. Erēi uwäe’ä chupe,” jei.

<sup>7</sup>“Jayawe jei uvarupa iyandarekoa pe: ‘Mase, mbapi año ma che ayu tēi aeka kua iwa ía, erēi awäe’ä chupe. Jayawe eki joko wi. Echa’ä ¿maera pa ñamaeñota jese uiporuiño iwi waerä?’ jei chupe.

<sup>8</sup>“Jayawe uvarupa iyandarekoa jei iya pe: ‘Karái, emaeño tupita ye rani pēti año pewa. Tayoo rani iyipi rupi jare tañono rani iwi ikawi wae iyipi re.

<sup>9</sup>Aramoi jayawe iata. Erēi ia’ä yawe, ekika kuri,’ jei chupe.” Jukuärái jei Jesús chupe reta.

### **Jesús uminguera pēti kuña mbutuu ara pe**

<sup>10</sup>Pēti mbutuu ara pe Jesús oporomböe iko pēti tupao pe.

<sup>11</sup>Jare joko pe oï pēti kuña dieciocho año ma año umimbaerasi wae. Ikupeati uwata parawete. Mbaeti etei ipuere kērái rupi uyemisimi waerä.

<sup>12</sup>Jayawe Jesús uecha yawe, ueni ikoti jare jei chupe: “Cherindi mii, añawe ndekuera ma nembraerasi wi,” jei chupe.

<sup>13</sup>Jayawe Jesús oñono ipo jese. Jare jupiwoiño jokua kuña ipuere uyemisimi, jare jae umbipi umbutuicha Tumpa jee.

<sup>14</sup>Jayawe tupao iyandarekoa pochi jokua re. Echa'ä Jesús uminguera jokua kuña mbutuu ara pe. Jáeramo jei joko pe ñonoí wae reta pe: “Owa ara ime oí yaparawiki waerä. Peyu jokua ara reta pe pekuera waerä. Awiye peyu pekuera waerä mbutuu ara pe,” jei chupe reta.

<sup>15</sup>Jayawe yandeYa jei chupe: “Pe reta piyemingetaíño ko, echa'ä pe retawe piyapo'ä pe pere wae rupi. Echa'ä jekuaeño pe reta piyora peweye jare pemburika peraa waerä pemee jou i mbutuu ara pe.

<sup>16</sup>¿Maera ra jayawe chepuereta'ä aminguera kua kuña parawete mbutuu ara pe?” jei chupe reta. “Satanás dieciocho año ma umimbaerasi kua kuña parawete. Jare kua kuña ikawiete ko ipotawe perimba reta wi, echa'ä jae ko Abraham iñemoña pewa,” jei chupe reta.

<sup>17</sup>Jare Jesús kua jei ma yawe, opaete jowaicho reta imara upita. Erëi opaete ñru wae reta uyerowia rewe umae Jesús mbaembae ikawi uyapo wae re.

### **Jesús umbijaanga mostaza jäikue re**

*(Mateo 13.31-32; Marcos 4.30-32)*

<sup>18</sup>Jayawe Jesús jei chupe reta: “¿Kërái ra uyekuaa Tumpa imbaepuere mburuwicha wasu pewa kua iwí pe? ¿Mbae re ra yambijaangata kërái ra jekuaeño ukuakuaa oo oí?” jei.<sup>19</sup>“Jae ko pëti mostaza jäikue rai mii kuimbae oñoti iko pe wae rami,” jei. “Ukuakuaa jare uyeyapo pëti iwira. Jare wira reta uyapo jaitirä jáka rupi,” jei chupe reta.

### **Jesús uyapo yembijaanga levadura re**

*(Mateo 13.33)*

<sup>20</sup>Jare Jesús jei wi chupe reta: “Jae nunga wi yandepuere yambijaanga ye kërái Tumpa imbaepuere mburuwicha wasu pewa jekuaeño uyekuaa oo oí.

<sup>21</sup>Jae ko levadura kuña umbiyea jeta katu harina ndiwe wae rami,” jei. “Echa'ä kuña opa ma masa omona kawi yawe, levadura opa ma uyembiyea kawi opaete masa rupi,” jei chupe reta.

### **Jesús oporomboe umbijaanga rewe öke ipirai wae re**

*(Mateo 7.13-14,21-23)*

<sup>22</sup>Jayawe Jesús jare jemimboe reta ndiwe jekuae yuraa Jerusalén koti. Jare jokoti yuraa reta rambuwe, Jesús oporomboe oo tëta wasu reta rupi jare tëta wasu rai reta rupi.

<sup>23</sup>Jayawe pëti wae upirandu Jesús pe: “Oporomboe wae, ¿jeta ra oí reta tekowe opa mbae onoita wae Tumpa ndiwe?” jei chupe. Jayawe Jesús jei joko pe ñonoí wae reta pe umbijaanga rewe:

<sup>24</sup>“Jeta wae reta uipotata tëi jokua. Erëi ikota chupe reta pëti öke ipirai wae jeta wae reta uipota tëi uike pipe wae rami. Jáeramo piñemiatangätu pike waerä jokoropi,” jei.



25“Echa’ä pëti ara tëta iya uyukendata oï öke chuwi reta. Jare jokua ara kaarueteta ma chupe reta,” jei. “Jayawe pe reta imeño oka pe peï yawe, pemboputa tëi öke jare pereta tëi: ‘OreYa, ipea mii orewe öke.’ “Erëi jae jeita pewe: ‘Che pukuaa’ä etei.’

26“Jayawe pe reta pereta tëi: ‘Jukuärái’ä ko, echa’ä ore ndukaru nde ndiwe, jare nde ndeporomboe orerëta wasu reta rupi.’

27“Erëi jae jeita pewe: ‘Che tae pewe, che pukuaa’ä etei. Pe reta ko jae ikawi mbae wae piyapo wae. Pesiri chewi,’ jeita pewe.

28-29“Jare pe reta piyaota tëi jare peräi pembikiriuta tëi. Echa’ä kía oka wi o re umae oï wae rami, pechata Tumpa opaete wae imburuwicha wasurä ma oï. Jare pechata wi jae ndiwe peramikue reta Abraham, Isaac, Jacob, jare opaete Tumpa iñee arakae umimbeu wae reta,” jei. “Jare jokua ara yuweruta wi opaete keti keti wi jeta judío mbae wae reta yureko waerä Tumpa ndiwe. Jare pechata opaete wae ukaru ñonoï uyerowia rewe. Erëi pe reta ndarau pepuere pike piyekou waerä jae reta ndiwe,” jei chupe reta.

30“Pemandúa kua re: Amokue añawe rupi usiriwe mbae echa ñonoï wae reta, jokua ara Tumpa umbutuichata oï reta kuri. Jae ramiño wi amokue añawe rupi uyembutuichaka ñonoï wae reta, Tumpa umimichita oï reta kuri,” jei Jesús chupe reta.

### **Jesús ipiatiti Jerusalén pewa reta re**

*(Mateo 23.37-39)*

31Jokua ara amokue fariseo reta yuweru Jesús oï wae pe jare jei reta chupe: “Ekua kua wi ikotiä. Awiye kua rupiño eï. Echa’ä Herodes uipota ndeyukaka oï,” jei reta chupe.

32Jayawe Jesús jei chupe reta: “Herodes ikatu ko tëi mbae ikawi mbae wae uyapo waerä. Erëi pekua pemimbeu chupe che aminguerata aï imbaerasi wae reta añawe jare kuriye. Jare amoëta aï añña uyembiiya jese wae reta wi. Jare jukuärái ayapota aï opa cheparawiki ayapo rewa,” jei.

33“Erëitu a ñotái ko jekuaeño Jerusalén koti. Echa’ä opaete ñee Tumpa wi etei ou wae umimbeu wae reta imeta ko umano Jerusalén pe,” jei chupe reta.

34Joko wi Jesús jei tuicha ipiatiti rewe: “Pe Jerusalén pewa reta, jeta ma Tumpa ombou tëi pewe jae iñee umimbeu wae reta jare ñru chupe uyeyokui wae reta. Erëi pe reta jekuaeño piyapi ita pe opa piyuka,” jei. “Jeta wese ma chekirëi tëi pumbati ayandareko waerä peré, pëti uru imembi reta umbati ipepo ñwi pe wae rami, erëi pe reta pipota’ä,” jei.

35“Mase, añawe Tumpa pereyata oï, jare petupao wasu wi usirita oï. Jare che tae pewe, ndarau ma cherecha pe reta pere chewe rewa kuärái: ‘Tumpa tuyapo ikawiete wae kua Tumpa jee re ou oï wae pe.’ Jukuäräita ko,” jei Jesús chupe reta.

## **Lucas 14**

## Jesús uminguera pëti kuimbae opaete jete iruru wae

- <sup>1</sup>Pëti mbutuu ara Jesús oo ukaru pëti fariseo reta itenondewa jëta pe. Jare ime ïru fariseo reta jare Moisés uikuatía wae re oporomböe wae reta joko pe ñonoï wi. Jae reta ueka yureko tëi kërái umbijeko waerä Jesús. Jáeramo umae ngatu yureko jese.
- <sup>2</sup>Jare Jesús uecha joko pe oï pëti kuimbae opaete jete iruru wae. Tuicha uiporara parawete.
- <sup>3</sup>Jayawe Jesús upirandu jokua mburuwicha reta pe kuärái: “Moisés arakae uikuatía wae rupi, ¿yandepuere pa yapuruminguera mbutuu ara pe, ani mbaeti?” jei chupe reta.
- <sup>4</sup>Jayawe jae reta kiiño upita. Jayawe Jesús oñono ipo kuimbae imbaerasi wae re jare uminguera. Jare jei chupe: “Ekua ye nerëta pe,” jei chupe.
- <sup>5</sup>Joko wi Jesús jei joko pe ñonoï wae reta pe: “Pemburika ani peweye oa yawe iwikua pe mbutuu ara pe, ¿peota’ä yerá penoe jupiwai, yepe tëi jokua ara ko jae mbutuu ara?” jei chupe reta.
- <sup>6</sup>Jare joko pe ñonoï wae reta ipuere’ä jei mbae awe Jesús pe kua rewa.

## Uyembutuicha wae uñemimichikata

- <sup>7</sup>Jayawe Jesús uecha opaete tëta iya uparea chupe wae reta uiparawo ñonoï iyupe tenda tenondewa ikawi wae reta mesa pe. Jayawe umbiarakuaa reta kuärái:
- <sup>8</sup>“Kía uparea ndewe yawe menda pe, jare ndeo yawe joko pe, awiye ewapi tenda tenondewa pe. Echa’ä aramoi tëta iya uparea wi kía iwate oï ndewi wae pe,” jei.
- <sup>9</sup>“Jayawe tëta iya ueruta jokua kuimbae jare jeita ndewe: ‘Emee nderenda kua kuimbae pe,’ jeita ndewe. Jayawe nde nemara rewe ndeota ko ndewapi tenda taikuewaete pe,” jei Jesús chupe reta.
- <sup>10</sup>“Jáeramo uparea ndewe reta yawe, ewapi tenda taikuewaete pe. Echa’ä ou yawe tëta iya, aramoi jeita ndewe: ‘Tëtara, easa ewapi tenda tenondewa ikawiete wae pe,’ jeita ndewe. Jukuärái opaete yuweru ukaru wae reta umae kawita nderé,” jei.
- <sup>11</sup>“Echa’ä opaete uyembutuicha wae reta, Tumpa umimichita yepe kuri. Jare opaete uñemimichi wae reta, Tumpa umbutuichata yepe kuri,” jei chupe reta.
- <sup>12</sup>Jayawe Jesús jei tëta iya pe: “Nde ndeparea yawe, awiye eparea neiru reta pe, jare nerëtara reta pe, jare nerëta ïru ikokatu wae reta pe. Echa’ä jae reta ipuere wi uparea ndewe nde ndeparea chupe reta ramoño, jare jukuärái rupi umiñatimata ma ndewe,” jei chupe.
- <sup>13-14</sup>“Erëi nde ndeparea yawe, eparea jokua ipuereta’ä umiñatima ndewe wae reta pe,” jei. “Eparea iparawete wae reta pe, jare ipo chutu wae reta pe, jare iköcho wae reta pe, jare jesa mbae wae reta pe. Jare jukuärái ndiyapo yawe, ndiyekoueteta neï kuri. Echa’ä jokua ara jupi wae reta ikowe ye yawe umanokue wae reta ipite wi, Tumpa umiñatimata oï ndewe jokua ndiyapo wae re,” jei Jesús jokua tëta iya pe.

## Jesús umbijaanga mbarea re

(Mateo 22.1-10)

- 15 Kua uyandu yawe, pëti wae uwapî iko Jesús ndiwe wae mesa pe jei chupe: “Tumpa oï ma yawe opaete wae imburuwicha wasurä jaeño mái pewa, ¡kërái eteita ndipo uyekou joko pe ukaruta oï wae reta!” jei chupe.
- 16 Jayawe Jesús jei chupe kuärái: “Ime iko pëti karái jeta uyapoka tembiu wae. Jae uparea tëi jeta wae reta pe yuweru ukaru waerä jae ndiwe.
- 17 Jare tembiu jae ma oï yawe, omondo uyeyokui chupe wae jei waerä jokua uparea chupe reta wae pe: ‘Peyu. Jae ma oï tembiu mesa pe,’ jei.
- 18 “Erëi opaete wae uyeyopia reta. Pëti wae jei: ‘Chepuereta’ä a. Echa’ä jaeramo mii iwî awa cheyupe. Imeta ko a amae jese. Ere karái pe awiye mii tipia’ä cheré,’ jei chupe.
- 19 “Jare ïru wae jei chupe: ‘Chepuereta’ä a. Echa’ä jaeramo awa payandepo weye reta. Ata amboporowa reta aï. Ere karái pe awiye mii tipia’ä cheré,’ jei chupe.
- 20 “Jare ïru wae jei chupe: ‘Opa ramo amenda. Jáeramo chepuereta’ä a,’ jei chupe.
- 21 “Jayawe uyeyokui wae oo ye karái oï wae pe jare umimbeu chupe opaete kua mbaembae rewa. Jayawe karái pochi jare jei uyeyokui wae pe: ‘Ekuwa ye woi kua tëta wasu calle reta rupi jare eru kua pe iparawete wae reta, ipo chutu wae reta, iköcho wae reta, jare jesa mbae wae reta,’ jei chupe.
- 22 “Jayawe uyeyokui wae oo uyapo karái jei wae. Jare opa ma uyapo yawe, jei karái pe: ‘Karái, ayapo ma opaete nde ndere chewe wae, erëitu imeño amokue tenda reta ipo mbae oï wae,’ jei chupe.
- 23 “Jayawe jokua karái jei ye uyeyokui wae pe: ‘Ekuwa opaete tape wasu rupi jare koo reta rupi, jare ere neowäiti wae reta pe yuweru waerä tinee reta waerä cherëta pe,’ jei.
- 24 “Echa’ä che tae pewe, ndarau pëti awe jokua tenonde aparea tëi chupe reta wae ukaru che ndiwe cherëta pe,’ jei chupe.” Jukuärái Jesús jei.

## Yawái ko kía iko waerä Jesús jemimboerä

(Mateo 10.37-38)

- 25 Jokua ara reta rupi jetaete wae reta yuraa Jesús jupie. Jare pëti wese Jesús uyerowa umae jese reta jare jei chupe reta:
- 26 “Ime yawe kía uipota oo che ndiwe wae iko waerä cheremimboerä, imeta ko cherauete tu wi, ichi wi, jembireko wi, isambiai reta wi, jare jëtara reta wi. Jae nunga wi jaeño uyerauete yawe chewi, ndarau ipuere iko cheremimboerä,” jei.
- 27 “Jare ime yawe kía mbaeti owoi wiraa ikurusu oo cherupie wae, ndarau ipuere iko cheremimboerä,” jei chupe reta.

28“Ime yawe kía uipota iko cheremimboerä wae, tuyapo kua rami – yambijaanga: Pëti kuimbae uipota uyapo yawe tëta iwate wae, tenonde uwapita ko uyemboe jese waerä uikuaa waerä mbowi ra jepita jokua tëta, jare jukuäräi uikuaa waerä ikorepoti uepiti ra opa uyapo waerä,” jei.

29“Echa’ä jae uyapo’ä yawe jukuäräi, aramoi umbipita tëi tëta uyapo, erëi ndarau ikorepoti uepiti chupe opa uyapo waerä. Jáeramo opaete uecha wae reta upukata umae jese.

30Jare jeita reta: ‘Kua kuimbae parawete iyarakuaa’ä oï. Jae umbipi tëi uyapo tëta iwate wae, erëi ipuere’ä opa uyapo,’ jeita reta,” jei.

31“Jae ramiño wi pëti mburuwicha wasu uecha yawe ñru mburuwicha wasu ou oï ikoti

20.000 sindaro reta ndiwe, jare jae jaeño ime onoi

10.000 sindaro reta, jayawe ¿mbae ra jae uyapota?” jei. “Jayawe, ¿jare tenonde uwapita’ä yerá uyemingeta kawi waerä ipia pe ipuereta ra jokua

10.000 isindaro reta umiamiri waerä jokua

20.000 sindaro reta ñonoï wae? Jukuäräita ko,” jei.

32“Jare uikuaa yawe ipuereta’ä umiamiri wae, jare omondota amokue wae uyapikatu waerä jowaicho ndiwe mbiri witeño ñonoï chuwi reta rambuewe,” jei Jesús umbijaanga rewe.

33“Jare ramiño wi pe pipota cheremimboerä piko wae reta, piyemingeta kawi kua re pepia pe. Echa’ä ime yawe pepite pe kía uipota iko cheremimboerä wae, imeta ko jare ma oï opaete imbaembae ueya waerä. Erëi jukuäräi’ä yawe, ndarau ipuere iko cheremimboerä,” jei chupe reta.

### **Jesús oporomboe yuki jembochi mbae wae re**

*(Mateo 5.13; Marcos 9.50)*

34Jayawe Jesús jei wi chupe reta umbijaanga rewe: “Yuki ikawi ko. Erëi yuki opa ma jembochipa yawe, ¿këräita ra ipuere jembochi ye? Ndarau ipuere.

35Ikawi’ä ma ko jokua maeräwe. Yandepuere’äwe yaiporu abonorä. Imeta ko yamomboño,” jei. “Ipotawe kía uipota uikuaa kawi wae, tuyapisaka kua chiñee re,” jei chupe reta.

## **Lucas 15**

### **Ime yerowia tuichaete wae ara pe kía ueya yawe ipiyemingeta jupi mbae wae**

*(Mateo 18.10-14)*

1Jokua ara reta rupi jekuaeño uyembati yureko Jesús oï wae pe jeta mburuwicha pewarä okowara wae reta jare jeta jeko kachi wae reta uyapisaka waerä Jesús ñnee re.

<sup>2</sup>Jayawe fariseo reta jare Moisés uikuatía wae re oporomböe wae reta jei ikawi mbae wae Jesús koti kuärái: “Kua kuimbae pochi uñemiiru jeko kachi wae reta ndiwe, jare ukaru wi jae reta ndiwe,” jei reta.

<sup>3</sup>Jayawe Jesús jei chupe reta umbijaanga rewe:

<sup>4</sup>“Ime yawe kía pepite pe pëti chiëto owecha onoi wae, jare ukañi yawe chuwi pëti owecha, ¿mbae ra uyapota? ¿Ndarau yerá ueya jokua noventa y nueve ñana pe oo waerä ueka jokua ukañi chuwi wae uwäe chupe rewa? Jukuäraita ko,” jei.

<sup>5</sup>“Jare uwäe ma chupe yawe, uyerowia rewe owoita ueru ye iyati re.

<sup>6</sup>Jare ou ye ma uwäe yawe jëta pe, umbatita opaete ñru reta jare jëta iyipi rupiwa reta, jare jeita chupe reta: ‘Piyerowia che ndiwe, echa’ä awäe ma cheowecha ukañi chewi wae,’ jeita,” jei.

<sup>7</sup>“Che tae pewe, jukuäraiete wi ime yerowia tuichaete ara pe pëti jeko kachi wae ueya yawe ipiyemingeta jupi mbae wae. Ipuere ñonoï aramoi noventa y nueve jupi wae reta. Jare ime yerowia ara pe jokua re. Erëi ime yerowia tuichaete ye jokua wi ara pe pëti jeko kachi wae ueya yawe ipiyemingeta jupi mbae wae Tumpa rewa,” jei chupe reta.

<sup>8</sup>Jare Jesús jei wi chupe reta umbijaanga rewe: “Jae ramiño wi pëti kuña ime onoi yawe payandepo riare korepoti jepiete wae, jare umikañi yawe pëti riare o pe, ¿mbae ra jae uyapota? ¿Ndarau yerá jae umiendi mechero jare utupeï ueka kawi waerä uwäe chupe rewa? Jukuäraita ko,” jei.

<sup>9</sup>“Jare uwäe ma chupe yawe, jae umbatita opaete ñru reta jare jëta iyipi rupiwa reta, jare jeita chupe reta: ‘Piyerowia che ndiwe, echa’ä awäe ma chekorepoti amikañi wae,’ jeita,” jei.

<sup>10</sup>“Che tae pewe, jukuäraiete wi ko imeta yerowia tuichaete wae Tumpa iaraiwa reta ndiwe pëti jeko kachi wae ueya yawe ipiyemingeta jupi mbae wae,” jei chupe reta.

### **Ikawi ko yayerowia waerä kía uyerowa ye yawe Tumpa koti**

<sup>11</sup>Jayawe Jesús jei wi chupe reta umbijaanga rewe: “Ime iko pëti kuimbae mokui tai onoi wae,” jei.

<sup>12</sup>“Jare pëti ara jokua tai taikuewa jei tu pe: ‘Cheru, emee chewe añawe woi jokua nembraebae chemaerä ikota wae. Echa’ä chembae ko jare aipota’ä aäro nemano rewa anoi waerä,’ jei tu pe. Jayawe tu umbiyao tee tee imbraebae reta jare umee tai reta pe,” jei chupe reta.

<sup>13</sup>“Jare ndei jeta ara uasa mbowe, jokua tai taikuewa opa ma owaka jokua mbraebae tu umee tēi chupe wae. Jare jokua korepoti re jae oë oo mbiri ambie iwi koti. Jare joko pe uipiu mbae rewe opa uiporu iyuwu ikorepoti mbraebae kachi wae rupi,” jei.

14“Jare mbaeti etei ma mbae onoi yawe, ou karuái wasu jokua iwi pe. Jáeramo jokua kunumi parawete umbipi ikuasi.

15Jayawe jae oo ueka iyupe mbarawiki jokua iwi pewa kuimbae pe. Jare jokua kuimbae omondo umingaru waerä kuchi reta,” jei.

16“Jokua kunumi parawete iyembaiete, jare uipota echa uyemupunga tēi jokua iwope kuchi reta jou wae pipe. Erēi kiawe mbaeti ye mbae umee chupe jou waerä,” jei chupe reta.

17“Jayawe jokua kunumi aramoño iyarakuaa wite ye, jare jei iyupe: ‘Cheru pe uparawiki wae reta opa’ä ye tembiu jou ñonoï. Erēi kua pe che amanota ma äi yembaï pe,’ jei.

18‘Taa ye cheru oï wae pe jare tae chupe: ‘Cheru mii, tuicha ma ayawi Tumpa koti jare ndekoti wi.’<sup>19</sup>Añawe jupi’ä parawete ma aiko waerä nderairä. Emaeño mii cheré nepionerä aiko waerä,’ tae chupe,’ jei kunumi iyupe.

20Jayawe jokua kunumi uñatima ye tu jēta koti,” jei Jesús chupe reta. “Jayawe kunumi mbiri witeño oï tu jēta wi yawe, tu umae jare uecha tai ou oï. Jare uipararekoete umae jese. Jáeramo osi oo owäiti tai, jare uikuäwa, jare uyurupite jowa pe.

21Jayawe kunumi jei tu pe: ‘Cheru mii,’ jei chupe. ‘Tuicha ma ayawi Tumpa koti jare ndekoti wi. Añawe jupi’ä parawete ma aiko waerä nderairä,’ jei tu pe.

22“Erēi uyerowia rewe tu jei uyeyokui chupe wae reta pe: ‘Peru woi kua pe ñepēwaka ikawiete wae jare pemondeka kua cherai mii pe,’ jei chupe reta. ‘Jae ramiño wi piñono moäkarewa jese, jare piñono mbipasa ipi re.

23Jare joko wi pekua woi piyuka waka taurusu wae yamingira ñai wae jare pemboyi,’ jei chupe reta. ‘Yakaru jare yayerowia.

24Echa’ä kua cherai mii umano rami iko chewi, jare añawe ikowe ye rami ma ko chewe. Jare ukañi iko chewi, jare añawe ou wite ye ma chepi,’ jei tu. Jayawe umbipi jorikatu reta,” jei Jesús chupe reta.

25“Jare jukuärái jorikatu yureko reta rambuewe, tai tenondewa uparawiki iko koo pe. Jare jae ou ye yawe tēta koti, oka wi uyandu temimbi reta jare uyandu wi yerowia tuicha wae o pe.

26Jayawe ueni pēti uyeyokui wae jare upirandu chupe: “¿Mbae pa ko uyeyapo oï?” jei chupe.

27Jare uyeyokui wae jei chupe: ‘Nderiwi ou yewi. Jáeramo nderu uyukaka ma chupe waka taurusu wae umingira wireko wae, echa’ä tai ou wite ye chupe marái mbae ramo,’ jei chupe.

28“Jare jokua uyandu yawe, tai tenondewa pochiete, jare uipota’ä uike oo tēta pe. Jáeramo tu oē ou jēta wi jare umiñera tēi tai uike waerä oo ukaru jae reta ndiwe,” jei.

<sup>29</sup>“Jayawe tai jei chupe iarasi rewe: ‘Mase. Jeta año ma ayeyokui ndewe jare jekuaño ayapo nde chokui wae. Erëitu pëti wese awe nde nemeë’ä chewe pëti kapura rai mii yepe ayuka jau waerä cheïru reta ndiwe,’ jei chupe.

<sup>30</sup>‘Erëi añawe kua nderai pochi ou ye ramo, nde ndiyukaka wirae chupe waka taurusu nemingira ndiko wae. Jukuärái ndiyapo ma, yepe tëi jae opa ma uiporu opaetei nde nemeë chupe wae kuña jete re umingana wae reta ndiwe,’ jei tai tu pe.

<sup>31</sup>Jayawe tu jei tai tenondewa pe: ‘Cherai mii,’ jei. ‘Nde jekuaño ndiko che ndiwe. Jare opaete chembaembae anoi wae, nembae ko wi,’ jei chupe.

<sup>32</sup>‘Erëi jupi ko yande yayerowia waerä jare yanderorikatu waerä. Echa’ä kua nderiwi mii umano rami iko yandewi, erëi añawe ikowe ye rami ko yandewe. Jare ukañi iko yandewi, erëi añawe ou wite ye ma yandepi,’ jei tai pe.” Jukuärái jei Jesús umbijaanga rewe chupe reta.

## Lucas 16

### Kërái ra yaiporuta yanembaembae kua iwi pewa

<sup>1</sup>Jae nunga wi Jesús jei jemimboe reta pe: “Ime iko pëti karái ikokatu wae, jare ime wireko pëti uyeyokui wae opaete imbaembae re uyandareko wae,” jei. “Erëi jeräkua karái pe jokua uyeyokui wae uyandareko kawï’ä iko imbaembae re.

<sup>2</sup>Jayawe karái uenika jokua uyeyokui wae jare jei chupe: “¿Mbae pa ko kua nereräkua chewe wae? Nemimbeuta chewe opaete mbae ndiyapo chembaembae reta ndiwe wae. Kua wiwe ndarau ye ma amee ndewe chembaembae re ndiyandareko waerä,’ jei chupe.

<sup>3</sup>“Jayawe uyeyokui wae jei iyupe ipia pe: ‘Karái chemombo oï cheparawiki wi. ¿Mbae ra ayapo paraweteta añawe? Ndarau chepuere aparawiki koo pe, echa’ä chepiräta’ä ma aï. Jare chemarata ko ayerure waerä mbae re,’ jei.

<sup>4</sup>“¿Kërái ra ayapota ïru wae reta chembori waerä kiape aï waerä karái upïro yawe chewi cheparawiki? Aaa. Aikuaa ma aï mbae ayapo waerä,’ jei iyupe.

<sup>5</sup>“Jayawe jokua uyeyokui wae uenika pëti pëti rupi jokua karái pe ipia wae reta karái uikuaa mbae rewe. Jare upirandu tenonde ou wae pe: “¿Mbowi pa ndepia karái pe?’ jei chupe.

<sup>6</sup>‘Chepia aï karái pe irundi miri litro olivo iaceite,’ jei. Jayawe uyeyokui wae jei chupe: ‘Ko oï tupapire. Kua pe uyekuatia tëi iko mbowi ndepia wae. Erëi añawe ewapi ikuatia piaue ye ndepia – jae ko mokui miri litroño ma ndepia oï,’ jei chupe.

<sup>7</sup>Joko wi upirandu ïru wae pe: “¿Nde, mbowi pa ndepia nei karái pe?’ jei chupe. ‘Chepia aï karái pe pëti chiëto quintale trigo,’ jei. Jayawe uyeyokui wae jei chupe: ‘Ko oï tupapire. Kua pe uyekuatia tëi iko mbowi ndepia wae. Erëi añawe ewapi ikuatia piaue ye ndepia – jae ko ochenta quintaliño ma ndepia oï,’ jei chupe.

<sup>8</sup>“Jayawe jokua karái uikuaa yawe uyeyokui wae ikatu rewe uyapo wae, umae kawi iyarakuaa re jare uyemingeta kawi jeseewa. Echa’ä Tumpa re wirowia mbae wae reta ikatuete ko uyereruwata kawi waerä japicha reta ndiwe Tumpa pe uyeyokui wae reta wi,” jei Jesús chupe reta.

<sup>9</sup>“Jayawe che pumbiarakuaa kuärái: Piporuta ko pekorepoti jare pemaembae kua iwi pe penoi wae pembali waerä ñru wae reta. Echa’ä jukuärái piyapo yawe, jare kua iwi pewa opa uasa yawe, jae reta jeita pewe pëti pëti rupi pewäe yawe ara pe: ‘¡Jaekawi ndeyu! Kua pe oï nerëta ikumewa mbae wae,’ jeita pewe,” jei.

<sup>10</sup>“Ime yawe kía uyandareko kawi mbae michi re wae, jokua nunga yandepuere yarowia katu wi uyandareko kawi waerä mbae tuicha wae re,” jei. “Jae ramiño wi ime yawe kía uyandareko kawi’ä mbae michi re wae, jokua nunga yandepuere’ä yarowia katu uyandareko waerä mbae tuicha wae re,” jei.

<sup>11</sup>“Jáeramo pe reta piyandareko kawi’ä yawe pekorepoti jare pemaembae kua iwi pewa re, jayawe Tumpa ndarau wirowia katu peré piyandareko waerä mbaembae chupe waerä ikawiete oï wae re,” jei.

<sup>12</sup>“Jare ñru wae imbaembae re piyandareko kawi’ä yawe, ¿kía ra jayawe umeeta pewe mbaembae pemaeräño ikota wae?” jei chupe reta.

<sup>13</sup>Jare Jesús jei wi umbijaanga rewe: “Pëti uyeyokui wae ndarau ipuere uyeyokui mokui karái pe pëti jei wae peño. Echa’ä jukuärái yawe, uauta pëti wae jare ñruwe uñamitäata. Jae nunga wi jae jatängütuta oï pëti wae pe, jare ñruwe re ndarau uipota umae. Jukuärái wi ko pe reta pepuere’ä piyeyokui Tumpa pe pipotaete korepoti rewe,” jei chupe reta.

<sup>14</sup>Jare fariseo reta kua uyandu yawe, oyoyai Jesús. Echa’ä jae reta uipotaete korepoti.<sup>15</sup>Jayawe Jesús jei chupe reta: “Pe reta piyembujupi tēi ñru wae reta jowake. Erēi Tumpa uikuaa jokua pepia pe oï wae, jare kachi oï chupe. Echa’ä mbaembae iwi pewa reta umbutuicha wae, Tumpa pewarä ikawi’ä etei ko,” jei chupe reta.

### Moisés uikuatía wae ndarau ukañi

<sup>16</sup>Jayawe Jesús jei wi chupe reta: “Ndei Juan ou mbowe, Moisés jare ñru arakae Tumpa ñnee umimbeu wae reta uikuatía wae uyemimbeu,” jei. “Erēi Juan ou wiwe ñnee ikawi wae uyemimbeu ma oï kërái uyembipi ma Tumpa imbaepuere mburuwicha wasu pewa kua iwi pe. Jare jeta wae reta uipota Tumpa iko waerä imburuwicha wasurä,” jei.

<sup>17</sup>“Erēi jokua uipota’ä jei Moisés arakae uikuatía wae ukañi ma. Echa’ä ara jare iwi opa ranita ndei ukañi mbowe pëti awe jae uikuatía wae michi rai mii yepe,” jei chupe reta.

### Jesús oporomboe kía omombo jembireko wae rewa

(Mateo 5.31-32, 19.1-10; Marcos 10.11-12)



<sup>18</sup>Jare Jesús jei wi chupe reta: “Ime yawe kía omombo jembireko wae, jare wireko yawe ambie kuña, uyapo ko oï awasa Tumpa jowai,” jei. “Jare kía wireko yawe kuña ime omombo wae, jae nunga wi uyapo ko oï awasa,” jei chupe reta.

### **Kuimbae ikokatu wae jare Lázaro**

<sup>19</sup>Jare Jesús jei wi chupe reta: “Ime iko pëti kuimbae ikokatu wae. Kua kuimbae jekuaeño uyemonde kawiete, jare opa ara rupi uyekou tembiu ikawiete wae re,” jei.

<sup>20</sup>“Jare ime iko wi ñru kuimbae iparawete mii wae Lázaro jee wae. Kua kuimbae opaetei ituyu parawete wae. Opa ara rupi uyereruka uyapakua waerä kuimbae ikokatu wae jëta ikësea jöke pe.

<sup>21</sup>Echa’ä uipota echa jou tembiu kuimbae ikokatu wae imesa wi usururukue. Jare yimba reta yuweru jare uere chuwi ituyu,” jei.

<sup>22</sup>“Erëitu pëti ara jokua kuimbae iparawete mii wae umano, jare joko wi araiwa reta wiraa jekowe mii yerowiarenda pe Abraham oï wae pe. Jaikue rupi jokua kuimbae ikokatu wae umano wi jare oñoti reta,” jei.

<sup>23</sup>“Jare umanokue wae reta ñonoï wae pe kuimbae ikokatuse wae jesa uyepea, jare joko pe uiporaraete oï. Jare jowaiwa umae jare uecha Abraham mbiri oï chuwi. Jare uecha wi Lázaro oï jae ndiwe,” jei.

<sup>24</sup>“Jayawe usapikai rewe jei: ‘Cherami Abraham, cheparareko mii. Emondo Lázaro tumäki ipoäka i pe jare tou tomoroïsa chekü. Echa’ä aiporaraete ai kua tata pe,’ jei chupe.

<sup>25</sup>“Erëi Abraham jei chupe: ‘Tëtara, nemandúa kërái iwi pe ndikose yawe, ndiyekouse jeta mbaembae ikawi wae re. Erëi Lázaro parawete uiporarase. Erëi añawe jae ipiakatu oï kua pe, jare nde añawe ndiporara nei,’ jei chupe.

<sup>26</sup>“Jokuaño’ä wi. Tumpa oñono ñanepäu pe pëti iäkasoro wasu yandepuere’ä yasa wae. Jáeramo ore orepuereta’ä nduasa jokoti, jare jae nunga wi kiawe ipuereta’ä uasa joko wi kiwati,’ jei chupe.

<sup>27</sup>“Jayawe kuimbae ikokatuse wae jei Abraham pe: ‘Cherami, jukuärái yawe, che numiñera nemondo waerä Lázaro cheru jëta pe.

<sup>28</sup>Echa’ä ime anoi pandepo cheriwi reta, jare aipota’ä jae reta wi yuweru waerä kua pe ore nduiporaraete noï wae pe. Emondo mii Lázaro tumimbeu chupe reta,’ jei chupe.

<sup>29</sup>“Jayawe Abraham jei chupe: ‘Nderiwi reta ime onoi Tumpa iñeeriru. Tuyapisaka reta jokua re,’ jei chupe.

<sup>30</sup>“Jayawe kuimbae ikokatuse wae jei Abraham pe: ‘Ndarau uyapisaka reta jese, cherami. Erëi pëti umanokue wae oo umimbeu yawe chupe reta, jae reta ueyata ipiyemingeta jupi mbae wae jare wirowiata reta Tumpa jei wae re,’ jei chupe.

<sup>31</sup>“Erëi Abraham jei chupe: ‘Ipuere ko kía ikowe ye oo tēi nderiwi reta pe umanokue wae reta ipite wi. Erëi jokuawe ndarau wirowiaka chupe reta Tumpa re, jae reta uipota’ä uyapisaka yawe Tumpa iñeeriru re,’ jei chupe.” Jukuärái jei Jesús jemimboe reta pe.

## Lucas 17

### Jesús oporomboe kía japicha pe uyawika Tumpa koti wae rewa

(Mateo 18.6-7,21-22; Marcos 9.42)

<sup>1</sup>Jayawe Jesús jei wi jemimboe reta pe: “Ime jeta japicha pe uyawika Tumpa koti wae reta. Jukuärái ñotái ko. Erëi ime yawe kía japicha pe uyawika Tumpa koti wae, ¡ikuasi parawete! Echa’ä Tumpa tuicha rupi uiporarakata oï chupe,” jei.

<sup>2</sup>“¿Këraita ra ko kía uñapiti yawe peyayu re pēti ita tuicha wae, jare joko wi pemombo yawe i tipí wae pe? Jokua ikawi’ä ko. ¡Erëi oete yeta oï kía pe Tumpa koti uyawika yawe pēti cheré wirowia mii wae pe! Echa’ä Tumpa tuichaete ye uiporarakata oï chupe,” jei.

<sup>3</sup>“Jáeramo pe reta piyandareko kawí piyé awiye waerä piyawika perapicha pe Tumpa koti,” jei chupe reta. Jare Jesús jei wi chupe reta kuärái: “Íru cheré wirowia wae uyawí yawe ndekoti, embieta chupe jokua re. Jare jae ueya yawe ipiyemingeta kachi wae jokua jae uyapo wae re, jayawe awiye nemandúa chupe jokua jeko re,” jei.

<sup>4</sup>“Jukuärái piyapota, yepe tēi aramoi chiu wese pēti ara pe jae uyawí ndekoti, jare aramoi yepe tēi chiu wese ou uñemimichi rewe nderowai. Yepe tēi jeta wese uyapo jukuärái, erëi nde awiyeta ko nemandúa chupe uyawí ndekoti wae re,” jei Jesús chupe reta.

### Yarowia yawe Tumpa re michi yepe, yandepuere yayapo mbaembae tuicha wae

<sup>5</sup>Jayawe yandeYa jemimboe tenondewaete reta jei chupe: “Orembori mii ndorowia kawí waerä Tumpa re,” jei reta.

<sup>6</sup>Jayawe yandeYa jei chupe reta: “Pe reta perowia yawe Tumpa re michi rai mii yepe, jayawe pepuereta piyapo mbaembae tuicha wae,” jei. “Pepuereta pere pea iwira pe oo waerä joko wi jare uñeñono waerä mar pe. Jare jukuärái uyapota ko iwira,” jei chupe reta.

### Yayeyokuita ko Tumpa pe mbae ñaäro mbae rewe

<sup>7</sup>Jare Jesús jei wi chupe reta: “Pēti uyeyokui wae oo uparawiki yawe koo pe ani oo umingarú yawe mbaemimba reta, jare joko wi ou ye yawe karái jēta pe, ¿mbae ra jeita chupe karái? ¿Jae jeita yerá chupe: ‘Eyu ewapi ekaru che ndiwe?’ Ndarau jei chupe,” jei.

<sup>8</sup>“Jaeño jeita chupe: ‘Ekua iyapo mbae jau waerä. Jare iyandareko cheré akaru aï rambuwe. Joko wi ramo nde ndekaruta kuri,’ jeita chupe.

<sup>9</sup>Jare uyeyokui wae mbae uyapo wae re ¿umeeta yerá karái yasurupái chupe? Ndarau,” jei.

<sup>10</sup>“Jae ramiño wi pe reta opa ma piyapo yawe opaete Tumpa jei pewe piyapo waerä wae, pereta ko kuärái: ‘Ayapo’ä mbae ayembutuichaka waerä cheYa pe. Jaeño ayapo jokua jae jei chewe ayapo waerä wae.’ Jukuäraita ko pere,” jei Jesús jemimboe reta pe.

### **Jesús uminguera payandepo kuimbae ipire okui wae reta**

<sup>11</sup>Jayawe Jesús jare jemimboe reta ndiwe jekuaeño yuraa Jerusalén koti. Jare uasa reta iwi Samaria jare iwi Galilea ipäu rupi.

<sup>12</sup>Jayawe yuraa uwäe reta pëti tëta wasu rai pe. Jare uike ma yureko reta yawe jokua tëta wasu rai pe, yuweru owäiti payandepo kuimbae ipire okui wae reta. Erëi mbiri katuño uyemboi reta Jesús wi.

<sup>13</sup>Jayawe jae reta usapikai rewe jei Jesús pe: “¿Jesús, oporomboe wae, orepáreko mii!” jei reta chupe.

<sup>14</sup>Jare Jesús uecha reta yawe, jei chupe reta: “Pekua piyechaka sacerdote reta pe, jae reta umae waerä peré,” jei chupe reta. Jayawe yuraa yureko reta rambuewe, ¿aramoiño opa ukuera kawi reta!

<sup>15</sup>Jare pëti wae uyerecha yawe ukuera kawi ma oi wae, uñatima ye ou Jesús oi wae pe Tumpa jee umbutuicha usapikai rewe.

<sup>16</sup>Jayawe uñeñoño iwi re uñemimichi rewe Jesús jowai jare umee yasurupái chupe. Jare jokua kuimbae ko jae iwi Samaria pewa.

<sup>17</sup>Jayawe Jesús jei joko pe ñonoï wae reta pe: “¿Payandepo’ä yerá kuimbae reta opa ukuera wae? ¿Kiape ñonoï ñru reta?”

<sup>18</sup>¿Këraita ra jaeño kua kuimbae judío mbae wae ou ye umbutuicha waerä Tumpa jee?” jei.

<sup>19</sup>Jayawe jei kuimbae pe: “Epüa jare ekua ye. Ndekuera ma nderowia cheré ramo,” jei chupe.

### **Jesús oporomboe Tumpa imbaepuere mburuwicha wasu pewa re**

*(Mateo 24.23-28,36-41)*

<sup>20</sup>Pëti wese fariseo reta upirandu Jesús pe kërái yawe etei ra uyekuaata Tumpa imbaepuere mburuwicha wasu pewa kua iwi pe. Jayawe Jesús jei chupe reta: “Jokua jae’ä ko mbae pepuere pemaee jese wae,” jei.

<sup>21</sup>“Jare ndarau kía jei: ‘Mase, ko oi,’ ani, ‘Mase, pee oi.’ Echa’ä Tumpa imbaepuere mburuwicha wasu pewa ime ma pepite rupi oi,” jei chupe reta.

<sup>22</sup>Joko wi Jesús jei jemimboe reta pe: “Outa oi ara reta pipotata tëi michi pewa mii yepe cherecha, che kuimbaerä ayeyapo wae, chembaepuere mburuwicha wasu pewa rewe. Erëi ndei mii rani jokua,” jei.

- 23“Jayawe iru wae reta jeita tēi pewe: ‘Mase, ko oī,’ ani ‘Mase, pee oī,’ jeita tēi pewe. Erēi awiye perowia kuri. Jare awiye wi pekua jupie.
- 24Echa’ä che kuimbaerä ayeyapo wae ayu ye yawe, ayekuaata kērái ama uwera wae uyekuaa opaete ara re wae rami. Echa’ä opaete wae cherechata oī kuri,” jei.
- 25“Erēi ndei jokua uyeyapo mbowe, che imeta ko tāta aiporara, jare añawe rupi yureko wae reta imeta ko chereriro wi,” jei chupe reta.
- 26“Pikuaa kawi peī kērái yureko iwī pewa reta arakae rupi Noé iko rambuewe. Jukuäraiete wi yurekota che kuimbaerä ayeyapo wae ayu ye yawe,” jei.
- 27“Echa’ä arakaete rupi, ndei iporu wasu ou mbowe, iwī pewa reta ipiawiwe yureko jekoño mái rupi. Echa’ä jae reta ukaruñoi jare ukauñoi yureko. Jare jekuaeño umenda reta jare umimendaka reta wi. Jukuärái uyapo yureko reta jokua ara Noé jare jētara reta ndiwe opa uike rewa chalana wasu pe. Jayawe ou iporu wasu jare opa umikañi reta opaetei,” jei chupe reta.
- 28“Jare jukuäraiete wi uasa arakae Lot iko rambuewe. Pikuaa kawi peī Lot iko yawe tēta wasu Sodoma pe, jokua tēta wasu pewa reta ukaruñoi jare ukauñoi, jare jekuaeño owa reta jare owaka reta mbaembae, jare umaetiñoi reta, jare uyapoñoi reta jētarä,” jei.
- 29“Erēi jokua ara Lot jare jētara reta ndiwe opa oē yawe Sodoma wi, Tumpa ombou ara wi tata azufre jendi wae ndiwe jare opa umbái opaetei jokua tēta wasu pewa reta. Jukuärái jae reta uyepokouka reta,” jei.
- 30“Jare jukuärái wi iwī pewa reta uyepokoukata ñonoī kuri, che kuimbaerä ayeyapo wae ayekuaa ye yawe,” jei chupe reta.
- 31“Jare jokua ara uwäe yawe, jokua jēta joka pe oī wae tosi woi joko wi oyepē waerä. Awiye awe tuike jēta pe wiraa waerä imbaembae. Jare iko pe uparawiki oī wae tosi woi wi. Awiye awe tou ye jēta pe,” jei.
- 32“Pemandúa Lot jembireko pe mbae uasa wae re. Awiye piyapo jae uyapo wae rami,” jei.
- 33“Ime yawe kía jaeño uyembipia’ä uepi waerä tēi imbaembae kua iwī pewa re, umikañita iyuwi jekowe opa mbae wae ipuereta tēi onoi wae. Erēi kía umee jekowe chereko pewa wae, yepe tēi umano, erēi onoita tekowe opa mbae wae,” jei Jesús chupe reta.
- 34“Che tae pewe, jokua pītu che ayu ye yawe, uyeyapota oī kua nunga mbaembae: Imeta mokui wae uyapakua ñonoī pēti tupa pe. Pēti wae uyereraata, jare iru wae uyereyata,” jei.
- 35“Jae ramiño wi imeta mokui kuña umbaesō ñonoī pēti angúa pe. Pēti wae uyereraata, jare iru wae uyereyata,” jei.
- 36“Jae ramiño wi imeta mokui kuimbae uparawiki ñonoī pēti koo pe. Pēti wae uyereraata, jare iru wae uyereyata,” jei chupe reta.

<sup>37</sup>Jayawe Jesús jemimboe reta upirandu chupe: “CheYa, ¿kiape pa kua uyeyapota oï?” jei reta. Jayawe Jesús jei chupe reta umbijaanga rewe: “Yaecha uruwi reta uyembati ñonoï yawe, yaikuaa woi ime ko mbaereöwe aipo joko pe. Jae ramiño wi che ayu ye yawe, opaete wae uikuaata che ayu ye wae,” jei chupe reta.

## Lucas 18

### Ikawi ko yayerure waerä yandekueri mbae rewe Tumpa pe

<sup>1-2</sup>Jare Jesús uipota omboe iko jemimboe reta kërái ikawi ko jekuaeño uyerure reta waerä Tumpa pe ikueri mbae rewe. Jáeramo jei chupe reta umbijaanga rewe: “Ime iko pëti tëta wasu pe pëti mburuwicha. Kua mburuwicha uipiu’ä etei Tumpa wi, jare mbae’ä chupe ïru wae reta kërái oï wae,” jei.

<sup>3</sup>“Jare ime iko wi jokua tëta wasu pe pëti kuña ime umano wae. Kua kuña parawete uipota uñeapo jowaicho re. Jáeramo jekuaeño oo tëi ueka yembori jokua mburuwicha pe,” jei chupe reta.

<sup>4</sup>“Mbowi ara rupi jokua mburuwicha uyapo’ä mbae awe uepi waerä jokua kuña. Erëi aramoiño jei wite iyupe: ‘Che aipiu’ä Tumpa wi, jare mbae’ä chewe ïru wae reta kërái oï wae.

<sup>5</sup>Erëi kua kuña ime umano wae umaeño’ä cheré ramo, taepi. Echa’ä aepi’ä yawe, jekuaeño outa jare ndarau ma chepuere arupia,’ jei iyupe,” jei.

<sup>6</sup>Jayawe yandeYa jei: “Kua re ikawi ko pepia pe piyemingeta waerä. Kua mburuwicha, yepe tëi ko jae jupi’ä, erëi mase kërái jae uyemingeta ipia pe,” jei.

<sup>7</sup>“Erëi Tumpa tuichaete ye ipiakawi chuwi. ¿Këraita pa jayawe Tumpa uepita’ä jae uiparawo wae reta, jae reta ara rupi jare pïtu rupi uyerure chupe yawe? ¿Këraita yerá jayawe jae ima uäro uepi reta waerä?<sup>8</sup>Che tae pewe, imambae jae uepita reta,” jei. “Erëi jeseuwe che kuimbaerä ayeyapo wae ayu ye yawe kua iwi pe, ¿imeta ra ñonoï cheré wirowia wae reta?” jei chupe reta.

### Pëti yembijaanga fariseo jare mburuwicha pewarä okowara wae re

<sup>9</sup>Jare Jesús oï wae pe ime yureko amokue reta jupi umaie tëi yureko iyé wae. Jae reta umaie ïru wae reta re usiriwe mbae wae echa ko. Jayawe Jesús jei chupe reta umbijaanga rewe:

<sup>10</sup>“Pëti ara pëti fariseo oo tupao wasu pe uyerure waerä Tumpa pe. Jare oo wi mburuwicha pewarä okowara wae,” jei.

<sup>11</sup>“Jokua fariseo uyemboi jare uyerure uyembutuicha rewe kuärái: ‘Tumpa, amee yasurupái ndewe. Echa’ä che jae’ä ko ïru kuimbae reta rami. Echa’ä che jae’ä ko imonda wae. Ayapo’ä jupi mbae wae. Ayapo’ä awasa. Ayapo’ä wi pea mburuwicha pewarä okowara wae uyapo wae rami.

<sup>12</sup>Che añoño teeñoi mokui ara opa semana rupi akaru mbae waerä numbiyerowia waerä. Jare jae nunga wi amee ndewe payandepo wae wi pëti opaete che amingana wae wi,' jei jokua fariseo.

<sup>13</sup>“Erëi jokua mburuwicha pewarä okowara wae uyemboi oï mbiri katu mii jokua fariseo wi, jare uipota'äwe jowaiwa umae parawete ara koti imara ramo. Jaeño okua pii pii ipitia re jare jei parawete: ‘Tumpa, cheparareko mii. Che jeta ayawi ndekoti,’ jei.”

<sup>14</sup>Jayawe Jesús jei wi chupe reta: “Che tae pewe, jokua mburuwicha pewarä okowara wae oo ye jëta pe ipiakatu rewe, Tumpa ndiwe uyeapikatu ramo. Echa'ä Tumpa umae jese jeko mbae wae rami,” jei. “Erëi jokua fariseo re jukuärai'ä umae. Echa'ä Tumpa umimichita oï uyembutuicha wae reta, jare umbutuichata oï uñemimichi wae reta,” jei chupe reta.

### **Jesús uyerure Tumpa pe sambiai reta re**

*(Mateo 19.13-15; Marcos 10.13-16)*

<sup>15</sup>Jayawe amokue wae reta ueru Jesús pe isambiai mii reta, jare uipota reta Jesús oñoño waerä ipo jese reta. Jayawe Jesús jemimboe reta kua uecha yawe, uñeengata jokua sambiai ueru wae reta pe. “Awiye jekuaeño pemiawái Jesús,” jei chupe reta.

<sup>16</sup>Erëi Jesús ueni sambiai reta yuweru waerä ikoti jare jei: “Pemaño sambiai reta re yuweru waerä chekoti. Awiye piyopia reta, echa'ä jaeño kua sambiai rami wae reta oita Tumpa ndiwe, Tumpa oï ma yawe opaete wae imburuwicha wasurä,” jei chupe reta.

<sup>17</sup>“Che tae pewe añetete wae, pipota pei Tumpa ndiwe yawe, jayawe imeta ko perowia jese pëti sambiai wirowia tu re wae rami,” jei chupe reta.

### **Pëti mburuwicha ikokatu wae ou Jesús oï wae pe**

*(Mateo 19.16-30; Marcos 10.17-31)*

<sup>18</sup>Jare ou Jesús oï wae pe pëti mburuwicha, jare jei chupe: “Oporomboe wae, jupi wae ko nde. ¿Mbae pa ayapota tekowe opa mbae wae anoi waerä?” jei chupe.

<sup>19</sup>Jayawe Jesús jei chupe: “¿Maera pa ndere chewe jupi wae? Mbaeti ko pëti awe jupi wae. Jaeño ko Tumpa jupi wae,” jei.

<sup>20</sup>“Nde ndikuaa ko Tumpa arakae jei wae: ‘Awiye iyapo awasa. Awiye epuruyuka. Awiye nemonda. Awiye ndapu nembijeko waerä nderapicha. Ipiu nderu jare ndesi wi,' jei,” jei Jesús chupe.

<sup>21</sup>Jayawe kuimbae jei: “Che ayawi'ä etei pëti awe kua reta chemichi wiwe,” jei chupe.

<sup>22</sup>Jare Jesús kua uyandu yawe, jei chupe: “Imeño mbae uata oï ndewe ndiyapo waerä,” jei chupe. “Ekua ewaka opaete nambaembae, jare jokua korepoti emee iparawete wae reta pe. Jare jukuärai imeta neno mbaembae ikawiete wae ara pe. Joko wi eyu kuri che ndiwe ndiko waerä cheremimboerä,” jei chupe.

<sup>23</sup>Jayawe mburuwicha kua uyandu yawe, tuicha ipiatiti. Echa’ä jae ikokatuete ko jare uauete imbaembae opa umee waerä iyuwi.

<sup>24</sup>Jare Jesús uecha jokua mburuwicha ipiatiti oï, jayawe jei jemimboe reta pe: “Pëti ara Tumpa ikota opaete wae imburuwicha wasurä jaeño máí pewa. Erëi yawaieteta ko ikokatu wae reta uyekou waerä jokua re jare onoi reta waerä tekowe opa mbae wae,” jei chupe reta.

<sup>25</sup>“¿Këraita ra ko pëti camello uasa waerä yuu jesakua mii rupi? Jokua yawái. Erëi yawaieteta ko pëti ikokatu wae onoi waerä tekowe opa mbae wae,” jei chupe reta.

<sup>26</sup>Jayawe kua uyandu wae reta jei: “Jukuärái yawe, ¿kía ra ipuereta uyerepi awiye waerä oo Tatawasurenda pe jayawe?” jei reta.

<sup>27</sup>Jayawe Jesús jei chupe reta: “Iwi pewa reta jaei ndarau kiawe ipuere uyerepi chuwi. Erëitu Tumpa ipuere uyapo chupe reta, echa’ä Tumpa pewarä mbaeti mbae yawái,” jei chupe reta.

<sup>28</sup>Jayawe Pedro jei Jesús pe: “Mase, ore ndueya ma opaetei nduiko waerä nderemimboe retarä. ¿Imeta ra mbae oremaerä?” jei chupe.

<sup>29</sup>Jayawe Jesús jei chupe: “Amokue wae reta ueya ma jeta mbaembae uyeyokui waerä Tumpa pe,” jei. “Ueya ma reta jëta, jare tu, jare ichi, jare tikei reta, jare tiwi reta, jare jembireko, jare isambiai reta,” jei. “Erëi che tae pewe añetete wae, ime yawe kía jukuärái uyapo wae,

<sup>30</sup>jeta wese ye ko uñemiñatimata oï chupe kuri jekowe pe oï rambuewe. Jare taikue rupi Tumpa umeeta oï chupe tekowe opa mbae wae,” jei chupe reta.

### **Jesús umimbeu ye jemimboe reta pe umanota iko wae**

*(Mateo 20.17-19; Marcos 10.32-34)*

<sup>31</sup>Jayawe Jesús ueni ikoti jokua doce jemimboe reta jare jei chupe reta: “Mase, pe reta pikuaa peï añawe ya ñaï Jerusalén koti. Jare aipota pikuaa kawu waerä kua: Joko pe uyeyapota oï opaete Tumpa iñee arakae umimbeu wae reta uikuatía che kuimbaerä ayeyapo wae re,” jei.

<sup>32</sup>“Echa’ä joko pe chemeeta reta judío mbae wae reta ipo pe. Jae reta cheyoyaita, jare uyapota reta chewe mbaembae ikawu mbae wae, jare undiwita reta cheré,” jei.

<sup>33</sup>“Joko wi chembipiuta reta jare cheyukata reta. Erëitu joko wi mbapi ara pe aikowe yeta ayu aï kuri umanokue wae reta ipite wi.” Jukuärái jei Jesús jemimboe reta pe.

<sup>34</sup>Erëi Jesús jemimboe reta uikuaa kawu’ä mbae ra Jesús uipota jei chupe reta wae. Echa’ä jokua ko ipuere’ä uepiti reta wae.

### **Jesús uminguera pëti kuimbae jesa mbae wae**

*(Mateo 20.29-34; Marcos 10.46-52)*

<sup>35</sup>Jayawe Jesús uwäe seri ma oo tëta wasu Jericó pe. Jare tape jembei pe uwapi oï pëti kuimbae jesa mbae wae uyerure iko mbae re.

- <sup>36</sup>Jae uyandu jeta wae reta uasa oï jokoropi, jare upirandu: “¿Mbae pa ko aipo?” jei.
- <sup>37</sup>Jayawe jei reta chupe: “Jesús Nazaret pewa ko uasa oï koropi,” jei reta.
- <sup>38</sup>Jayawe jesa mbae wae usapikai rewe jei: “¿Jesús, David ñemoñaá pewa, cheparareko mii!” jei parawete.
- <sup>39</sup>Jayawe tenonde yuraa wae reta uñeengata tēi chupe. “¿Nekii!” jei chupe reta. Erēi jae jeiete usapikai Jesús pe: “¿David ñemoñaá pewa, cheparareko mii!” jei parawete.
- <sup>40</sup>Jayawe Jesús uyemboi jare jei: “Peru chewe kua pe jokua kuimbae,” jei chupe reta. Jayawe ueru reta Jesús koti, jare Jesús upirandu chupe:
- <sup>41</sup>“¿Mbae pa ndipota ayapo waerä ndewe?” jei chupe. Jayawe kuimbae jei chupe: “CheYa, aipota amae mii,” jei chupe.
- <sup>42</sup>Jayawe Jesús jei chupe: “Emae. Ndekuera ma nderowia cheré ramo,” jei chupe.
- <sup>43</sup>Jare jupiwai kuimbae ipuere umae kawi, jare oo Jesús jupie Tumpa jee umbutuicha rewe. Jare opaete joko pe ñonoï wae reta kua uecha yawe, umbutuicha reta wi Tumpa jee.

## Lucas 19

### Jesús oo opou Zaqueo ipi

- <sup>1</sup>Jayawe Jesús uike tēta wasu Jericó pe jare uasa oo iko tēta wasu rupi.
- <sup>2</sup>Jare iko joko pe pēti kuimbae ikokatu wae Zaqueo jee wae. Jae ko mburuwicha pewarä okowara wae reta itenondewa pēti wae.
- <sup>3</sup>Jae uipota tēi uecha Jesús. Erēi ipuere’ä uecha, echa’ä jeta wae reta ñonoï joko pe ramo, jare Zaqueo tuicha mbae wae ko parawete.
- <sup>4</sup>Jáeramo jae osi oo tenonde uyupi waerä pēti iwira tape jembei pe oï wae re sicómoro jee wae, joko wi uecha waerä Jesús.
- <sup>5</sup>Jayawe Jesús oo uwäe yawe joko pe, umae iwate koti jare uecha Zaqueo. Jare jei chupe: “Zaqueo, eweyi woi. Echa’ä kua ara apitata ai ndepi,” jei chupe.
- <sup>6</sup>Jayawe Zaqueo jawoi pewa uweyi jare wiraa Jesús jēta pe uyerowia rewe.
- <sup>7</sup>Jare opaete wae reta kua uecha yawe, jaekawi’ä chupe reta jare jei iyupe reta: “¿Kērái jokua añawe Jesús oo upita oï kuimbae jeko kachi wae jēta pe?” jei reta.
- <sup>8</sup>Jare yuraa ma uwäe reta yawe tēta pe, Zaqueo uyemboi yandeYa jowai jare jei chupe: “Mase, cheYa, ameeta chembaembae mbite iparawete wae reta pe. Jare ime yawe kía pe uasaete akowara wae, irundi wese ye amiñatima yeta chupe,” jei chupe.
- <sup>9</sup>Jayawe Jesús jei: “Kua ara ou tekowe opa mbae wae kua tēta pe. Echa’ä kua kuimbae omomoe oï tamikue Abraham jeko,” jei.



10“Jeta wae reta ukañi ñonoï wae echa uikuaa’ä reta Tumpa ramo. Jáeramo che kuimbaerä ayeyapo wae ayu ko aeka reta waerä jare aepi reta waerä,” jei.

### **Jesús umbijaanga mbapi uyeyokui wae re**

*(Mateo 25.14-30)*

11Jare kua mbaembae uyandu wae reta uyerowia. Echa’ä añawe Jesús uwäe seri ma Jerusalén pe. Jare jae reta wırowia tēi joko pe ma oï yawe, Tumpa umbipita iko waerä opaete wae imburuwicha wasurä jaeño mái pewa. Jáeramo Jesús jei chupe reta umbijaanga rewe kuärái:

12“Ime iko pēti kuimbae ikokatu wae uipota iko jētáiwa reta imburuwicharä wae. Jayawe jae uyeyapikatu oo waerä mbiri mburuwicha wasu oï wae pe uyembijeeke waerä jētáiwa reta imburuwicharä,” jei.

13“Jare ndei oo mbowe, uenika payandepo uyeyokui chupe wae reta, jare umee chupe reta korepoti pēti pēti pe jei rewe: ‘Pemimbarawiki kawi kua korepoti che ayu ye rewa,’ jei chupe reta. Jare joko wi jokua kuimbae oē oo,” jei Jesús.

14“Erēitu jētáiwa reta uñamitāa umae jese. Jáeramo omondo reta tēi jaikue jei reta waerä jokua mburuwicha wasu pe: ‘Ore nduipota’ä jokua kuimbae oï waerä oremburuwicharä,’ jei reta tēi.

15“Erēi jesewe jokua kuimbae uyeyapoñoi jētáiwa reta imburuwicharä. Jare ou ye yawe uwäe jēta pe, omondo uenika jokua payandepo uyeyokui wae reta korepoti ueya chupe reta wae. Echa’ä uipota uikuaa kērái ra pēti pēti umimbarawiki jokua korepoti,” jei.

16“Jayawe pēti uyeyokui wae jei chupe: ‘Karái, amimbarawiki ma jokua ndekorepoti ndeya chewe wae jare amingana ma payandepo ye,’ jei chupe.

17“Jayawe karái jei chupe: ‘Jaekawi ndiyapo. Nde ko jae ndiyeyokui kawi chewe wae,’ jei chupe. ‘Ndiyeyokui kawi ma chewe kua mbowi wae re. Jáeramo añawe che noñonota payandepo tēta wasu imburuwicharä,’ jei chupe.

18“Jayawe ĩru uyeyokui wae jei chupe: ‘Karái, amimbarawiki ma jokua ndekorepoti ndeya chewe wae jare amingana ma pandepo ye,’ jei chupe.

19“Jayawe karái jei chupe: ‘Jukuärái ndiyapo ramo, che noñonota pandepo tēta wasu imburuwicharä,’ jei chupe.

20“Jayawe ĩru uyeyokui wae jei chupe: ‘Mase, karái, ko oï ndekorepoti,’ jei. ‘Che aupi kawi ma ndewe awiye waerä amikañi.

21Echa’ä akiye ndewi ramo aramoi ndiporarakata chewe ndekorepoti amikañi yawe,’ jei. ‘Echa’ä aikuaa ndepochi rái wae. Nde nepiro ĩru wae reta imbaembae chuwi, jare ĩru wae reta ipapi reño ndiyembiikokatu nei,’ jei chupe.

22“Jayawe jokua karái jei uyeyokui wae pe: ‘Nde ko jae ndiyeyokui kawi mbae chewe wae,’ jei chupe. ‘Nde ndere wae rupi etei che numbijekota. Nde ndikuaa

kērái ko chepochi rái wae jare kērái apīro ĩru wae reta imbaembae chuwi wae. Jare ndikuaa wi kērái ayembiikokatu aĩ ĩru wae reta ipapĩ re,' jei chupe.

23“¿Maera pa jayawe nderaa'ä niñono chekorepoti banco pe? Jare jukuärái che ayu ye yawe, nemeeta tēi ko chewe chekorepoti uñemĩiru wae yepe ndiwe,' jei chupe.

24“Jayawe jokua karái jei ĩru uyeyokui wae reta pe: ‘Pepīro chuwi jokua pēti korepoti jare pemee jokua payandepo korepoti onoi wae pe,' jei chupe reta.

25“Jayawe jae reta jei chupe: ‘Karái, jae ime ma onoi payandepo korepoti,' jei reta.

26“Jayawe jokua karái jei chupe reta: ‘Jukuärái tēi ko. Erēi che tae pewe, kía uiporu kawi yawe jokua jae ime onoi wae, uñemĩiruta ko chupe. Jae ramiño wi kía mbaeti uiporu kawi yawe jokua jae ime onoi wae, jare yepe tēi mbowi mii ime onoi yawe, jokuawe uñepīrota ko chuwi,' jei.

27‘Erēi jokua cherowaicho reta uipota'ä tēi aiko waerä imburuwicharä wae reta, peru kua pe piyuka cherowake,' jei chupe reta.” Jukuärái jei Jesús chupe reta umbijaanga rewe.

### **Jesús uike Jerusalén pe**

*(Mateo 21.1-11; Marcos 11.1-11; Juan 12.12-19)*

28Jare Jesús kua jei ma chupe reta yawe, jekuaeño uwata oo Jerusalén koti ĩru wae reta jenonde.

29Koiño tēta wasu Jerusalén wi, ñaipe Olivorenda jee wae jowai, ime ñonoĩ mokui tēta wasu rai reta Betfagé jare Betania jee wae. Jayawe Jesús jare jemimboe reta ndiwe yuraa seri ma uwäe reta yawe joko pe, Jesús jei mokui jemimboe reta pe:

30“Pekua pea tēta wasu rai yanderenonde oĩ wae pe. Jare joko pe pewäe yawe, pewäeta peĩ kuri pēti mburika taurusu wae uñeñapiti oĩ wae, ndei kiawe opo jese wae. Piyora peru kua pe,” jei chupe reta.

31“Jare ime yawe kía upirandu pewe maera ra piyora peĩ mburika wae, pereta chupe: ‘YandeYa uipota uiporu,' pere.” Jukuärái jei Jesús chupe reta.

32Jayawe Jesús jemimboe reta yuraa uwäe tēta wasu rai pe, jare uwäe chupe reta mburika taurusu wae Jesús jei wae rami.

33Jare oyora ñonoĩ yawe, jokua mburika iya reta upirandu chupe reta: “¿Maera pa piyora peĩ mburika?” jei chupe reta.

34Jayawe Jesús jemimboe reta jei: “YandeYa uipota uiporu,” jei chupe reta. Jayawe umaeño jese reta wiraa waerä.

35Joko wi Jesús jemimboe reta ueru mburika taurusu wae Jesús oĩ wae pe jare omboi reta ñepēwaka oñono waerä mburika ikupe re. Jayawe jae reta omborĩ Jesús uyupi waerä jese.

36Jare jae uasa opo iko rambuwe Jerusalén koti, jeta wae reta yuweru jare ñepēwaka uipiso reta tape rupi mburika jenonde.

<sup>37</sup>Jayawe Jesús koiño ma uweyi waerä oo ñaipe Olivorenda wi. Jare opaete jae jemimboe reta umbipi uyerowia. Umbutuicha reta Tumpa jee usapikai pii rewe, echa'ä jae reta uecha Jesús uyapo jeta mbaembae kiawe ipuere'ä uyapo wae.

<sup>38</sup>Jare jei reta: “¡Kua ko jae yanemburuwicha wasurä Tumpa jee re ou oï wae! ¡Tumpa tuyapo ikawiete wae chupe! ¡Añawe Tumpa uyapo ma yandewe yaiko waerä yandepiakatu rewe! ¡Tuyembutuichaka Tumpa jee ara pe!” Jukuärái jei reta usapikai pii rewe.

<sup>39</sup>Jeta wae reta joko pe ñonoï. Jare amokue fariseo reta jae reta ipite pe ñonoï wae jei Jesús pe: “Oporomboe wae, emikii nderemimboe reta. Awiye jukuärái tanembutuicha reta,” jei reta chupe.

<sup>40</sup>Erëi Jesús jei chupe reta: “Che tae pewe, kua reta kii yawe, jayawe ita reta usapikaita jae reta ipepika pe,” jei chupe reta.

<sup>41</sup>Jare Jesús uwäe seri ma oo Jerusalén pe yawe jare uecha yawe, umbipi ipiatiti jokua tëta wasu pewa reta re jare jesai oë.

<sup>42</sup>Jare jei: “¡Kërái moná pikuaa kua ara pepiakatu waerä Tumpa ndiwe! Erëi añawe ndarau ma pikuaa,” jei.

<sup>43</sup>“Echa'ä outa uwäe ara perowaicho reta opa pekëse waerä jare ndarau umaño peré peë pesi waerä,” jei. “Jae reta jeta umbatita iwi tëta wasu ikësea iyipi re jokoropi uyupi reta waerä. Jare jukuärái jae reta uiketa oï pewe ipotawe rupi,” jei.

<sup>44</sup>“Jare jae reta opata peyuka oï jare opata urukachi kua perëta wasu. Ndarau ueya reta pëti awe ita ñru ita iáramo. Jukuärái uyeyapota oï, echa'ä pe reta pikuaa'ä Tumpa ou tëi pepite pe perepi waerä ramo,” jei Jesús.

### **Jesús omoë mbaemimba owaka wae reta tupao wasu joka wi**

*(Mateo 21.12-17; Marcos 11.15-19)*

<sup>45</sup>Jayawe Jesús uike oo tupao wasu joka pe kiaepe judío mbae wae reta ipuere uyembati umbutuicha reta waerä Tumpa jee. Erëi joko pe ime jeta wae reta owaka ñonoï mbaemimba uñemee waerä Tumpa pe wae. Jayawe Jesús umbipi omoë joko wi jokua mbaemimba owaka wae reta.

<sup>46</sup>Jare jei chupe reta: “Tumpa jei iñeeriru pe kuärái: ‘Cherëta ko jae yerurerenda.’ Jukuärái Tumpa jei. Erëi pe reta piyapo ma imonda wae reta iñemía rami,” jei Jesús chupe reta.

<sup>47</sup>Jare opaete jokua ara rupi Jesús oporomboe iko tupao wasu joka pe. Jare sacerdote itenondewa reta, jare Moisés uikuatía wae re oporomboe wae reta, jare judío itenondewa reta ueka yureko kërái rupi ipuere uyukaka waerä Jesús.

<sup>48</sup>Erëi jëwa'ä chupe reta uyukaka reta waerä. Echa'ä opaete wae jekuaño uyembati yureko reta Jesús oï wae pe ipuere waerä uyapisaka kawu reta jese.

## **Lucas 20**

## Jesús umikii jowaicho reta

(Mateo 21.23-27; Marcos 11.27-33)

- <sup>1</sup>Pëti ara Jesús oporomboe iko tupao wasu joka pe, jare umimbeu iko ñee ikawi wae joko pe ñonoï wae reta pe. Jayawe yuweru wi joko pe sacerdote itenondewa reta, Moisés uikuatía wae re oporomboe wae reta, jare judío itenondewa reta.
- <sup>2</sup>Jayawe jae reta jei Jesús pe: “Emimbeu orewe: ¿Kía pa nembou kua mbaembae ndiyapo waerä? ¿Kía pa jei ndewe ndepuere nemoë waerä mbaemimba owaka wae reta tupao wasu joka wi?” jei reta chupe.
- <sup>3</sup>Jayawe Jesús jei chupe reta: “Che tapirandu wi pewe mbae re. Pemimbeu chewe:
- <sup>4</sup>¿Kía pa ombou Juan upurumbisakambu waerä? ¿Tumpa ra ombou, ani kuimbae retaño ra ombou?” jei chupe reta.
- <sup>5</sup>Jayawe jae reta yuraa ikotía mii jare jei iyupe reta: “Yae yawe, ‘Tumpa ko ombou Juan,’ jayawe Jesús jeita yandewe, ‘Jukuärái yawe, ¿maera pa perowia’ä jae jei wae?’ jeita yandewe.
- <sup>6</sup>Erëi yae yawe, ‘Kuimbae retaño ko ombou,’ jayawe opaete kua pe ñonoï wae reta yandeapita ita pe yandeyukata. Echa’ä kua pochí reta wirowia tēi Tumpa ko ombou Juan umimbeu waerä ñee Tumpa wi etei ou wae,” jei iyupe reta.
- <sup>7</sup>Jayawe jei reta Jesús pe: “Ore nduikuaa’ä kía ra ko ombou Juan wae,” jei reta.
- <sup>8</sup>Jayawe Jesús jei chupe reta: “Jayawe che wi ndarau amimbeu pewe kía ko chembou kua mbaembae ayapo waerä,” jei chupe reta.

## Jesús umbijaanga uvarupa uiporu wae reta re

(Mateo 21.33-46; Marcos 12.1-12)

- <sup>9</sup>Jayawe Jesús umbipi uyemingeta joko pe ñonoï wae reta pe umbijaanga rewe kuärái: “Pëti kuimbae oñoti jeta uva iko pe,” jei. “Jare opa ma uyapikatu kawi yawe jokua uvarupa, iya umee ambie reta pe uyandareko jese waerä. Jare jei chupe reta: ‘Piyandareko kawi uvarupa re. Jare uva yawiye ma yawe, mbite ameeta pewe kuri,’ jei chupe reta. Jayawe uvarupa iya oo mbiri ikotía ima rewa,” jei Jesús.
- <sup>10</sup>“Jayawe uva yawiye ma yawe, uvarupa iya ombou pëti uyeyokui chupe wae uvarupa uiporu wae reta pe ueka waerä tēi chupe reta jae imbae wae. Erëi uvarupa uiporu wae reta uinupa jare umee’ä chupe mbae awe. Jare omondo ye jukuärái etei reta,” jei.
- <sup>11</sup>“Jayawe uvarupa iya ombou ye tēi ñru uyeyokui wae. Erëi uvarupa uiporu wae reta uinupa wi, jare uyapo reta chupe mbaembae ikawi mbae wae, jare omondo ye jukuärái etei reta,” jei. <sup>12</sup>“Jayawe uvarupa iya ombou ye tēi ñru uyeyokui wae. Erëi uvarupa uiporu wae reta umbipere, jare onoe omombo reta koo wi,” jei.
- <sup>13</sup>“Jayawe uvarupa iya jei tēi iyupe: “¿Mbae ra ayapota? Tamondo cheraï auete wae. Aramoi chuwi jae reta uipiuta,’ jei tēi.

<sup>14</sup>“Erëi uvarupa uiporu wae reta uecha tai ou oï yawe, jei reta iyupe: ‘Pea ou oï wae ko jae uvarupa iyarä wae. Yayuka ñañono, jare uvarupa upitata yanemaerä,’ jei iyupe reta.<sup>15</sup>Jayawe jae reta onoe omombo uvarupa wi oka pe, jare joko pe uyuka etei reta,” jei chupe reta. Jare Jesús jei wi jokua mburuwicha reta pe: “Jayawe, ¿mbae ra uyapota uvarupa iya jokua uvarupa uiporu wae reta pe?” jei chupe reta.

<sup>16</sup>“Che tae pewe, outa oï opa uyuka reta waerä, jare uiporukata uvarupa ambie wae reta pe,” jei chupe reta. Jare kua uyandu reta yawe, jei reta: “¿Awiye etei jukuärái kua nunga mbaembae tuasa!” jei reta.

<sup>17</sup>Jayawe Jesús umae ngatu jese reta jare jei: “¿Këraita pa jayawe ipuere uyeyapo Tumpa iñeeriru pe uyekuatía oï wae? Echa’ä joko pe uyekuatía oï kuärái: ‘Jokua ita tëta iyapoa reta wiriïro omombo iyuwi reta wae, añawe uyeyapo ma chuwi reta ita ikawiete ye wae opaete ñru ita reta tëta pewa wi,’ jei.

<sup>18</sup>Che ko jae jokua ita rami. Jare yande reta yaikuaa kawi ñai pëti yambii oa yawe ita re, ani ita oa yawe yambii re, yambii opata iperaso,” jei. “Jare jukuärái rami wi ko uyeyapota oï ipotawe kía chereriïro wae pe. Jae uyererukachita oï.” Jukuärái Jesús jei mburuwicha reta pe.

<sup>19</sup>Jayawe jokua sacerdote itenondewa reta jare Moisés uikuatía wae re oporomboe wae reta uikuaa kawi Jesús jei iko chupe reta wae – jae reta ko jokua uvarupa uiporu wae reta rami, echa’ä wiriïro reta Jesús. Jáeramo jae reta uipota tëi jawoi pewa uipisika reta Jesús. Erëi ukiye reta uipisika waerä. Echa’ä uipisika reta yawe, aramoi jokua uyembati wae reta uyembopochita ikoti.

### **Amokue reta uipota tëi uyawika Jesús pe iñee rupi**

*(Mateo 22.15-22; Marcos 12.13-17)*

<sup>20</sup>Jayawe jokua mburuwicha reta jekuaeño umae yureko Jesús re, jare omondo wi ñru wae reta uipiäro waerä Jesús. Jae reta uipota tëi umbitawi Jesús jae wirowia waerä jae reta jupi wae ko. Erëitu jae reta jaeño uipota tëi umbijeko Jesús jae uyemingeta wae rupi, uñeapo reta waerä tëi jese mburuwicha romano pe.

<sup>21</sup>Jayawe jae reta jei Jesús pe: “Oporomboe wae, ore nduikuaa nde ndiyemingeta wae jare ndeporomboe wae jupi rupi kawi ko. Nde neme oyowake opaete wae re. Jare nde ndeporomboe kawi kërai yambiyerowia waerä Tumpa,” jei reta.

<sup>22</sup>“Jayawe ore nduipota ndupirandu ndewe mbae re. Romano reta imburuwicha wasu César jei yandewe yambiepi waerä chupe korepoti pe opa año rupi. Erëi, ¿mbae pa ndere nde? ¿Jupi ra yambiepi chupe waerä, ani jupi’ä ra?” jei reta chupe.

<sup>23</sup>Erëi Jesús uikuaa kërai jae reta uipota tëi uyawika chupe iñee rupi. Jáeramo jei chupe reta:

<sup>24</sup>“Pechaka chewe pëti korepoti. ¿Kía jowa iä pa oï jese, jare kía jee pa uyekuatía oï jese?” jei chupe reta. “César,” jei reta.

<sup>25</sup>Jayawe Jesús jei chupe reta: “Jayawe kua ko jae César imbae. Pemee ye chupe jayawe. Erëi pemee wi Tumpa pe jokua mbaembae Tumpa uipota wae,” jei chupe reta.

<sup>26</sup>Jayawe jokua upurumbitawî wae reta ipiakañi upita reta Jesús jei wae re. Jáeramo kiiño upita reta. Jae reta ipuere’ä uiti Jesús iñee pei opaete wae jowake.

### **Jesús oporomboe umanokue wae reta ikowe yeta wae rewa**

*(Mateo 22.23-33; Marcos 12.18-27)*

<sup>27</sup>Jayawe yuweru Jesús oî wae pe amokue mburuwicha reta, saduceo jei chupe reta wae. Opaete saduceo reta jei tēi umanokue wae reta ndarau ma ikowe ye.

<sup>28</sup>Jayawe yuweru wae reta jei Jesús pe: “Oporomboe wae, ore nduipota ndupirandu ndewe pēti mbae re. Moisés arakae uikuatía ueya yandewe kuärái: ‘Pēti kuimbae umano yawe jembireko umimembi mbae rewe, jayawe kuimbae amiri tiwi tumenda jokua kuña ndiwe. Jayawe umimembi yawe, kuimbae amiri onoita iñemoña tiwi rupi.’ Jukuärái uikuatía Moisés,” jei reta.

<sup>29</sup>“Jayawe ime iko pēti kuimbae owa tiwi reta onoi wae. Kua kuimbae umenda, jare umano jembireko umimembi mbae rewe,” jei reta.

<sup>30</sup>“Jayawe kuimbae amiri tiwi jae iyeuka umenda jokua kuña ndiwe. Jare jae wi umano jembireko umimembi mbae rewe,” jei reta.

<sup>31</sup>“Jae nunga wi jukuärái uyeyapo jaikue rupiwa reta pe. Opaete chiu rewe pēti pēti umenda jokua kuña ndiwe, jare opaete pēti pēti rupi umano reta umimembi mbae rewe.

<sup>32</sup>Jare jaikue rupi kuña parawete umano wi,” jei reta.

<sup>33</sup>“Jayawe añetete yawe umanokue wae reta ikowe yeta, ¿kía nunga wae jembirekorä pa ikota jokua kuña jae reta ikowe ye yawe? Echa’ä opaete chiu rewe umenda jae ndiwe.” Jukuärái jei saduceo reta Jesús pe.

<sup>34</sup>Jayawe Jesús jei chupe reta: “Añawe rupi iwi pewa reta umenda jare umimendaka reta.

<sup>35</sup>Erëi kua oïta’ä jekuaeño jukuärái, echa’ä kua iwi opata oï,” jei. “Jare Tumpa umbipiau ye ma yawe opaete mbaembae, jae umbijekowe yeta ueru jupi wae reta uyekou waerä jese,” jei. “Jare jae reta ndarau ye ma umenda jare ndarau ye ma umimendaka reta.

<sup>36</sup>Echa’ä jae reta yurekota araiwa reta rami, jare ndarau ye ma umano reta. Añetete jae reta ikowe ye wae rupi uyekuaata kërái jae reta ko jae Tumpa Tai wae,” jei chupe reta.

<sup>37</sup>“Tamimbeu pewe kërái ko umanokue wae reta. Jae reta ikowe yeta ko,” jei. “Jukuärái Moisés arakae uikuaaka yandewe. Echa’ä jae uikuatía kërái Tumpa ikoño mái wae jei chupe yái jendi wae wi: ‘Che ko jae nderamikue reta Abraham, Isaac,

jare Jacob iTumpa.’Jukuärái Tumpa jei Moisés pe yepe tēi Moisés tamikue reta arakaete ye ma opa umano,” jei.

<sup>38</sup>“Añetete umanokue wae reta mbaeti yawe onoi tekowe, jayawe Tumpa ndarau jei tēi jae ko jae reta iTumpa wae, echa’ä jae ko ime tekowe onoi wae reta iTumpa. Echa’ä Tumpa pewarä, umanokue wae reta imeño oï jekowe rewe,” jei Jesús chupe reta.

<sup>39</sup>Jayawe amokue Moisés uikuatía wae re oporomboe wae reta jei Jesús pe: “Jaekawi ndiyemingeta, oporomboe wae,” jei reta.

<sup>40</sup>Jare joko wiwe kiawe uipota’ä ye ma upirandu Jesús pe mbae re awe, echa’ä aramoi ipuere uñemimaraka reta.

### **Upuruepi wae David iñemoña pewaño’ä ko**

*(Mateo 22.41-46; Marcos 12.35-37)*

<sup>41</sup>Jayawe Jesús jei joko pe ñonoï wae reta pe: “Jeta wae reta jei Cristo yae chupe wae jae ko David iñemoña pewaño. Erēi, ¿kērái ra jokuá?”

<sup>42</sup>Echa’ä uyekuatía oï tupapire Salmos pe David etei jei arakae wae kuärái: “Tumpa ikoño mái wae jei cheYa pe kuärái: ‘Ewapi kua cheakata koti,

<sup>43</sup>nderowaicho reta opa añonoka rewa itawa re nderowai,’ jei Tumpa.’ Jukuärái David uikuatía arakaete rupi kērái Cristo jae’ä ko kuimbaeño. Jae ko iYa wi.

<sup>44</sup>Jayawe David etei jei chupe yawe, ‘CheYa,’ ¿kērāita pa jayawe Cristo ipuere iko David iñemoña pewaño?” jei Jesús chupe reta.

### **Jesús umbijeko Moisés uikuatía wae re oporomboe wae reta**

*(Mateo 23.1-36; Marcos 12.38-40; Lucas 11.37-54)*

<sup>45</sup>Jayawe Jesús jei jemimboe reta pe opaete joko pe ñonoï wae reta jowake:<sup>46</sup>“Piyandareko kawi piyé Moisés uikuatía wae re oporomboe wae reta wi,” jei chupe reta. “Echa’ä jae reta jekuaeño uipota uyeipiuka waerä ñru wae reta pe. Jáeramo jekuaeño uyemonde kawi reta uyechaka waerä jae reta ko jae tenondewa reta,” jei. “Jare jae reta uwata ñonoï mercado rupi yawe, jekuaeño uipota ñru wae reta umbisaluda waerä uipiú chuwi rewe,” jei. “Jare yuraa reta yawe tupao pe, jae reta uipotaete uwapi tenda tenondewa ikawiete wae pe. Jare jukuärái uyapo reta wi uparea chupe reta yawe,” jei.

<sup>47</sup>“Jare jae reta puku uyerure reta Tumpa pe opaete wae umae waerä tēi jese reta jupi ko ñonoï Tumpa ndiwe wae. Erēi jae reta tawi rupi upiño kuña ime umano chuwi wae reta wi imbaembae. Jáeramo tāta rupi Tumpa uiporarakata oï chupe reta,” jei Jesús chupe reta.

## **Lucas 21**

### **Pēti kuña ime umano wae opa umee ikorepoti Tumpa pe**

*(Marcos 12.41-44)*

<sup>1</sup>Jare Jesús tupao wasu joka pe iko yawe, uecha ikokatu wae reta oñono ñonoï ikorepoti korepoti jiru pe. Kua korepoti jiru ko oï kiape oñono reta waerä korepoti Tumpa pewarä.

<sup>2</sup>Jare Jesús uecha wi pëti kuña iparawete mii wae ime umano wae. Kua kuña jaeño oñono mokui korepoti mii korepoti jiru pe.

<sup>3</sup>Jayawe Jesús jei jemimboe reta pe: “Che tae pewe añetete wae, pea kuña iparawete mii wae ime umano wae umee jetaete ye ïru wae reta wi Tumpa jowai,” jei.

<sup>4</sup>“Echa’ä ïru wae reta ueru umee jembire chupe wae wi. Erëi pea kuña, yepe tëi iparawete, erëi jembuurä owata tëi iko pipe wae opaetei umee Tumpa pewarä,” jei Jesús chupe reta.

### **Jesús umimbeu tupao wasu opata uiti wae rewa**

*(Mateo 24.1-2; Marcos 13.1-2)*

<sup>5</sup>Jare amokue Jesús jemimboe reta uyemingeta yureko tupao wasu rewa. Jei reta: “Ipöraete ko pea iwambi reta ita pewa. Jare ikawiete ko mbaembae umee reta wae omopöra waerä,” jei reta. Jayawe Jesús jei:

<sup>6</sup>“Kua mbaembae pecha peï wae, ipöra ñonoï tëi,” jei. “Erëi jeseuwe outa uwäe oï ara opa uiti reta waerä. Jare jokua ara ndarau pëti awe ita upita ïru ita iáramo,” jei chupe reta.

### **Jesús oporomböe mbaesusere reta uyeyapota oï wae rewa**

*(Mateo 24.3-21; Marcos 13.3-19)*

<sup>7</sup>Jayawe Jesús jemimboe reta upirandu chupe: “Oporomböe wae, ¿kërái yawe etei ra uasata kua mbaesusere tupao wasu rewa? Jare opaete kua uyeyapota ma oï yawe, ¿këraita pa nduikuaa?” jei reta chupe.

<sup>8</sup>Jayawe Jesús jei chupe reta: “Piyandareko kawi piyé kuri awiye waerä kiawe pembítawi,” jei chupe reta. “Echa’ä outa jeta cheree pe uyembijeeraanga wae reta. Jare jeita tëi reta: ‘Che ko jae Cristo.’ Jare jeita pewe reta wi: ‘Uwäe ma ara kua iwi opa waerä,’ jeita reta. Erëi pe reta awiye perowia jese reta,” jei chupe reta.

<sup>9</sup>“Jare imeta oï ñeräro reta jare tekorái reta. Erëi piyandu yawe kua reta rewa, awiye pekiye. Echa’ä kua mbaesusere reta uyeyapo ñotái ko tenonde. Erëi ndei witeño ko ara reta opa waerä,” jei.

<sup>10</sup>Jare jei wi chupe reta: “Jeta iwi pewa reta uñerärota ambie iwi pewa reta ndiwe, jare jeta mburuwicha reta uñerärota ambie mburuwicha reta ndiwe,” jei chupe reta.

<sup>11</sup>“Jare imeta iwíkáta tuicha wae reta kerupi rupi. Jare imeta karuái reta jare mbaerasi jasi wae reta. Jare ara re uyekuaata mbaembae kiye pewa,” jei.

<sup>12</sup>“Erëi ndei kua mbaembae uyeyapo mbowe, ïru wae reta pepisita jare uyapota ikawi mbae wae pewe cheré perowia ramo,” jei. “Echa’ä jae reta pereraata itupao reta pe pembijeko waerä joko pe. Jare peñonota reta peresoriru pe. Jare pereraata



reta wi mburuwicha reta jare mburuwicha wasu reta jowai pembijeko reta waerä,”  
jei.

<sup>13</sup>“Erëi jokoropi jëwata pewe pemimbeu kawu waerä chupe reta che rewa,” jei Jesús chupe reta.

<sup>14</sup>“Erëi awiye piyembipia’ä tenonde woi mbae ra pereta piyerepi waerä.

<sup>15</sup>Echa’ä che etei ameeta pewe ñee jare arakuaa piyemingeta waerä. Jare jukuärái pëti awe perowaicho reta ipuereta’ä peré jare uikuaata’ä mbae jei waerä pewe,” jei chupe reta.

<sup>16</sup>“Jokua ara reta rupi amokue peru reta jare pesi reta, jare perikei reta jare periwi reta, jare perëtara reta, jare peïru reta peñonota oï perowaicho reta ipo pe. Jare amokue pe reta peyukakata.

<sup>17</sup>Jare cheré perowia ramo, opaete seri peamitääta,” jei.

<sup>18</sup>“Erëi awiye piyembipia’ä kua re. Echa’ä pe reta peï ko Tumpa ipo pe jare jae uyandarekota oï peré,” jei. <sup>19</sup>“Jare pemiawäta yawe opaete kua mbaembae, Tumpa perepita oï chuwi kuri,” jei chupe reta.

<sup>20</sup>“Jare pecha yawe sindaro reta opa oñowa ñonoï kua tëta wasu Jerusalén, pikuaata jae ma ko ou uwäe opa uyembái waerä,” jei.

<sup>21</sup>“Jayawe kua iwï Judea pe ñonoï wae reta tosi iwïtu wasu reta koti. Jare kua Jerusalén pe ñonoï wae reta toë wi tosi. Jare kua tëta wasu ikatu rupi ñonoï wae reta awiye tou ye wi tuike tëta wasu pe.

<sup>22</sup>Echa’ä jokua ara reta rupi Tumpa uiporarakata oï kua tëta wasu pewa reta pe. Jukuärái uyekuatía oï Tumpa iñeeriru pe. Jare jukuärái Tumpa uyapota oï jokua uyekuatía oï wae uyeyapo waerä,” jei chupe reta.

<sup>23</sup>“¡Ikuasita parawete kuña ipurúa wae reta jare imembi umbikambu ñonoï wae reta jokua ara reta rupi! Echa’ä imeta mbaesuseru tuichaete wae kua iwï pe Tumpa uiporaraka yawe kua ñëtara judío reta pe,” jei.

<sup>24</sup>“Jare jeta jae reta umanota kispuku pe. Jare ñuru wae reta uyereraata peresorä ambie iwï reta pe,” jei. “Jare judío mbae wae reta uyembiyata kua Jerusalén re jare yurekota pipe jae reta ime mbaepuere onoi wae opa rewa,” jei Jesús jemimboe reta pe.

### **Kuimbaerä uyeyapo wae ou yeta oï**

*(Mateo 24.29-35; Marcos 13.24-31)*

<sup>25</sup>Jare Jesús jei wi chupe reta: “Jayawe uyekuaata oï mbaembae ambie ye ye wae warasi re, yasi re, jare yasitata reta re. Jare jokua uikuaakata oï ara reta jae ma oï opa waerä wae,” jei. “Jare kua iwï pe, mar jiapueteta jare iaparoaroa tuichaeteta. Jáeramo iwï pewa reta ukuyeta ñonoï jare uikuaata’ä mbae uyapo reta waerä,” jei.

<sup>26</sup>“Jae reta ukiye pipei opata ipiräta ukañi, jare jeita reta: “¿Mbae ye ra ko aipo uasata oï yandewe?” jeita reta. Echa’ä opaete ara re oï wae reta uñemitimota,” jei.

- 27“Jayawe che kuimbaerä ayeyapo wae, iwi pewa reta cherechata ayu ye ai amapitu re chembaepuere jembipete rewe,” jei chupe reta.
- 28“Jayawe opaete kua mbaembae umbipi uyeyapo oi yawe, piñemiatangätuta ko kuri. Echa’ä imambae Tumpa perepita oi,” jei chupe reta.
- 29Jayawe Jesús jei chupe reta umbijaanga rewe: “Mase. Pemaie iwa re jare opaete iwira reta re,” jei.
- 30“Uyembipi ma joki ye yawe, yaikuaa ñai koiño ma ko oi ama oki waerä,” jei.
- 31“Jae ramiño wi pe reta pecha yawe uasa oi kua mbaembae amimbeu ai pewe wae, pikuaata ko pei koiño ma oi Tumpa iko waerä opaete wae imburuwicha wasurä jaeño mai pewa,” jei chupe reta.
- 32“Che tae pewe añetete wae, kua iwi pe yureko wae reta ndarau opa umano opaete kua mbaembae reta ndei opa uyeyapo mbowe,” jei.
- 33“Pepuere pikuaa kua ñee che jae ai pewe wae añetete ko. Echa’ä yepe tei ara jare iwi opata ko, erëi chiñee ndaraui opa,” jei chupe reta.
- 34-35“Jáeramo piyandareko kawi piyé awiye waerä jokua ara piyepokouka peti wira ipiranoie pewa oa ñuai pe wae rami,” jei. “Echa’ä jukuäraitä uyeyapo oi iwi pewa reta pe. Jáeramo awiye pekau jare awiye perorikatuño piko. Jare awiye wi piyembipia’ä mbaembae iwi pewa re,” jei.
- 36“Jare jekuaeño piyandareko piyé. Jare piyerure Tumpa pe pepuere waerä peoyepe opaete kua mbaembae uyeyapota oi wae wi. Jare piyerure chupe wi pepuere waerä piyemboi jokua ara pemara mbae rewe cherowai, che kuimbaerä ayeyapo wae.” Jukuäräi Jesús jei jemimboe reta pe.
- 37Jare opa ara rupi Jesús oporomboe tupao wasu joka pe. Jare opa pitu rupi oë oo upita waerä ñaipe Olivorenda jee wae re.
- 38Jare opa ndimboweasi rupi opaete teta wasu pewa reta yuraa tupao wasu joka pe uyapisaka waerä Jesús iñee re.

## Lucas 22

### Judío itenondewa reta uyemboemboe uyukaka waerä Jesús

(Mateo 26.1-5,14-16; Marcos 14.1-2,10-11; Juan 11.45-53)

- 1Koiño ma iko uwäe waerä pascua ara jare uyembipi waerä yemimandúa mbiyape levadura mbae pewa jei chupe reta wae.
- 2Jare sacerdote itenondewa reta jare Moisés uikuatía wae re oporomboe wae reta ueka yureko keräi ipuere waerä uyukaka Jesús. Erëi jae reta uipota’ä uyapo opaete wae jowake, echa’ä ukiye reta opaete teta wasu pe ñonoï wae reta wi. Echa’ä aramoi ipuere uyembopochi reta ikoti uipisi reta yawe Jesús.
- 3Jayawe Satanás uike Judas Iscariote ipia pe. Judas ko jae Jesús doce jemimboe reta wi peti wae.

<sup>4</sup>Jayawe Judas oë wiari oo sacerdote itenondewa reta ñonoï wae pe. Jare joko pe ñonoï wi sindaro tupao wasu iyandarekoa reta. Judas uipota uyemingeta jae reta ndiwe uikuaa waerä kërái rupi ipuere ombori uipisi reta waerä Jesús.

<sup>5</sup>Kua Judas jei wae umbiyerowia reta. Jare upita reta umee waerä korepoti Judas pe jae ombori reta waerä.

<sup>6</sup>Kua ikawi Judas pe. Jayawe umbipi ueka kërái ipuere waerä umee wiari chupe reta Jesús.

### **Jesús jou tembiu pascua pewa**

*(Mateo 26.17-30; Marcos 14.12-26; Juan 13.21-30)*

<sup>7</sup>Jayawe uwäe ara tenondewa yemimandúa mbiyape levadura mbae pewa jei chupe reta wae. Jare jokua ara judío reta uyukañoi owecha pascua pewa.

<sup>8</sup>Jayawe Jesús jei Pedro jare Juan pe: “Pekua tēta wasu pe piyapo yandewe tembiu pascua pewa yau waerä,” jei chupe reta.

<sup>9</sup>Jayawe jei reta chupe: “¿Kiape pa ndipota ndoo nduyapikatu waerä?” jei reta.

<sup>10</sup>Jare Jesús jei chupe reta: “Mase, peo ma pewäe yawe tēta wasu pe, pēti kuimbae i wiraa oï wae outa perowäiti oï kuri,” jei chupe reta. “Peota jaikue jare piketa jēta pe jae ndiwe.<sup>11</sup>Jayawe pereta tēta iya pe: ‘Oporomboe wae upirandu oï kiape ra ime oï o jae jou waerä tembiu pascua pewa jemimboe reta ndiwe,’ pere chupe.

<sup>12</sup>Jayawe tēta iya uechakata oï pewe pēti o tuicha wae jae joo iwate oï wae, opaete mbaembae yaiporuta ñaï wae rewe. Jare joko pe piyapikatuta yandewe yakaru waerä kuri,” jei Jesús chupe reta.

<sup>13</sup>Jayawe Pedro jare Juan yuraa uwäe tēta wasu pe. Jare uyeyapo opaete Jesús jei chupe reta wae rupi etei. Jayawe uyapo reta tembiu pascua pewa joko pe.

<sup>14</sup>Jare uwäe ma ora yawe, Jesús uwapi mesa pe ukaru waerä jokua doce jemimboe tenondewaete reta ndiwe.

<sup>15</sup>Jayawe jei chupe reta: “Uwäe ma ara aiporara waerä jeta mbaembae kachi wae. Jare chekirēiete jau kua tembiu pascua pewa pe reta ndiwe ndei jokua uyeyapo mbowe,” jei.

<sup>16</sup>“Che tae pewe, ndarau ye ma jau kua nunga tembiu Tumpa oï rewa opaete wae imburuwicha wasurä jaeño mái pewa. Jayawe ramo opaete kua tembiu uyembijaanga oï jese wae opa kawita uyeyapo,” jei chupe reta.

<sup>17</sup>Jayawe Jesús uipisi copa jare umee yasurupái Tumpa pe jese. Jare jei chupe reta: “Opaete pe reta peu kua,” jei.

<sup>18</sup>“Che tae pewe, ndarau ye ma jau uva tikue Tumpa oï rewa opaete wae imburuwicha wasurä jaeño mái pewa,” jei chupe reta.

<sup>19</sup>Jae nunga wi Jesús uipisi mbiyape jare uyapo wi yasurupái jese. Jayawe upisää mbiyape jare umee jemimboe reta pe, jare jei chupe reta umbijaanga rewe: “Kua ko

jae chere te ameeta ai peré wae. Añawe wiwe peuta kua piyemimandúa waerä cheré,” jei chupe reta.

<sup>20</sup>Jae ramiño wi opa ma ukaru reta yawe, Jesús uipisi ye copa jare jei wi chupe reta umbijaanga rewe: “Kua ko jae cheruwi uyepiyereta oi wae. Kua cheruwi pipe Tumpa uyapo oi peti yemingeta ipiau wae pe reta ndiwe,” jei chupe reta.

<sup>21</sup>“Erëi ime yandepite pe uwapi oi chemeeta oi cherowaicho reta pe wae,” jei.

<sup>22</sup>“Añetete ko, che kuimbaerä ayeyapo wae amano ñotái ai kërái Tumpa jei wae rami. Erëi ikuasi paraweteta oi jokua kuimbae chemeeta oi wae, echa’ä tuicha rupi uiporarata oi kuri,” jei Jesús chupe reta.

<sup>23</sup>Jayawe jemimboe reta umbipi upirandu iyupe: “¿Kía nunga yande wae reta uyapota oi jokua?” jei reta iyupe.

### **Kía ikota tenondewarä wae**

<sup>24</sup>Jare Jesús jemimboe reta umbipi uyeaka kía ra ikawi iko waerä tenondewarä.

<sup>25</sup>Jayawe Jesús jei chupe reta: “Iwi pewa mburuwicha wasu reta uipotaete uechaka imbaepuere onoi ko jétáiwa reta re. Jare jae reta uipota jeräkua waerä kërái ombori onoi jétáiwa reta wae,” jei chupe reta.

<sup>26</sup>“Erëi pe reta, awiye jukuärái piyapo. Jokua pepite pe tenonde oi wae tuyeyapo taikuewaeterä. Jare jokua pemburuwicharä iko wae tuyeyokui iru wae reta pe,” jei chupe reta.

<sup>27</sup>“¿Mbae pa pere? ¿Kía pa ikawiete iwi pewa reta pe: jokua mesa pe uwapi ukaru oi wae ra, ani jokua tembiu ueru oi wae ra? ¿Jae’ä yerá jokua mesa pe uwapi ukaru oi wae? Erëi che aiko pepite pe ayeyokui waerä pewe peti uyeyokui wae rami,” jei chupe reta Jesús.

<sup>28</sup>Jare jei wi chupe reta: “Che asa ma jeta yembiawái reta rupi. Jare pe reta peasa ma wi jokoropi che ndiwe,” jei chupe reta.

<sup>29</sup>“Jáeramo kërái cheRu umee chewe mbaepuere aiko waerä opaete wae imburuwicha wasurä, jukuärái wi che amee ai pewe mbaepuere piko waerä mburuwicha retarä,” jei chupe reta.

<sup>30</sup>“Jare che ai ma yawe opaete wae imburuwicha wasurä jaño mái pewa, pe reta pepuereta jekuaño pekaru che ndiwe. Jare pewapita pei kuri wi wapia reta pe piko waerä Israel inemoñaeta reta imburuwicha retarä,” jei Jesús jemimboe reta pe.

### **Jesús umimbeu Pedro pe uikuakuta oi wae**

*(Mateo 26.31-35; Marcos 14.27-31; Juan 13.36-38)*

<sup>31</sup>Joko wi Jesús jei Simón Pedro pe: “Simón, Simón, mase, Satanás uipota uyapo pe reta opa pesiri waerä chewi. Jáeramo jae ueka Tumpa pe Tumpa umaño jese waerä,” jei chupe.

<sup>32</sup>“Jayawe michi pewa ndiyerowata nei chewi kuri. Erëi che ayerure ma Tumpa pe nderé nde jekuaeño nderowia waerä cheré. Jare ndiyerowa ye ma chekoti yawe, emimiräta kua nderiwi reta,” jei chupe.

<sup>33</sup>Jayawe Pedro jei Jesús pe: “CheYa, taa nde ndiwe peresoriru pe – jare mbaetita peresoriru peño. Ndipota yawe, tamano wi nde ndiwe,” jei chupe.

<sup>34</sup>Jayawe Jesús jei chupe: “Pedro, che tae ndewe, kua pïtu woi, ndei uru kuimbae uñee mbowe, mbapi wese ma nde chekuakuta nei kuri. Mbapi wese ndereta nei kuri chekuaa’ä wae,” jei chupe.

### **Jesús jei jemimboe reta pe uyeyapikatu kawi reta waerä**

<sup>35</sup>Jayawe Jesús jei wi jemimboe reta pe: “Pe reta pemandúa kawi peï, jokua wese che pomondo yawe chiñee peraa waerä, amimbeu pewe awiye waerä peraa korepoti, jare peurupuku, jare mokui mbipasa. Añawe tapirandu pewe: ¿Uata pa pewe jokua wese mbae?” jei chupe reta. “Uata’ä orewe,” jei reta.

<sup>36</sup>Jayawe Jesús jei wi chupe reta: “Erëi añawe tamimbeu pewe kua: Ime yawe penoi korepoti jare urupuku, jayawe peraa. Jare kispuku mbaeti penoi yawe, pewaka piñepëwaka kispuku pewa waerä,” jei.

<sup>37</sup>“Echa’ä uyekuatía oï Tumpa iñeeriru pe kuärái: ‘Jeta wae reta umae jese pëti jeko kachi wae rami.’ Jukuärái uyekuatía oï,” jei. “Kua uyekuatía oï wae, cheré ko uyemingeta oï jare imeta ko uyeyapo chewe. Jare jokua ko uyeyapo oï añawe,” jei chupe reta.

<sup>38</sup>Jayawe jae reta jei chupe: “OreYa, mase, ko nonoi mokui kispuku,” jei reta. Jayawe Jesús jei chupe reta: “Jaekawiño ma ko,” jei.

### **Jesús oo Getsemaní pe uyerure waerä**

*(Mateo 26.36-46; Marcos 14.32-42)*

<sup>39</sup>Jayawe Jesús oë oo tëta wasu wi ñaipe Olivorenda jee wae re kërái jeta wese jae uyapo wae rami. Jare jemimboe reta wi yuraa jae ndiwe.

<sup>40</sup>Jayawe yuraa ma uwäe yawe, Jesús jei jemimboe reta pe: “Jarei katu mii imeta penoi kirëi chererïro waerä. Jayawe piyerure Tumpa pe jokua re awiye waerä piñemiamirika jokua kirëi pe,” jei chupe reta.

<sup>41</sup>Jayawe Jesús usiri katu chuwi reta, jare uñeño itawa re uyerure waerä Tu pe.

<sup>42</sup>“CheRu mii,” jei. “Nde ndipota yawe, embiasa mii chewi kua aiporarata äi wae. Erëi awiye tuyeyapo che jae waeño. Tuyeyapo chewe nde ndere wae,” jei.

<sup>43</sup>Jayawe uyekuaa chupe pëti araiwa umimiräta waerä.

<sup>44</sup>Jesús ikuasi katu uiporara iko täta rupi; jáeramo jeiete uyerure Tumpa pe. Jare ipirei utiki iwi pe tuwi rami.

<sup>45</sup>Jare opa ma uyerure yawe, Jesús upüa jare oo ye jemimboe reta ñonoï wae pe. Jare uecha oke ñonoï reta. Echa'ä jae reta täta rupi ipiatiti ramo opa ipiräta ukañi chuwi reta.

<sup>46</sup>Jayawe Jesús umbisareko reta jare jei chupe reta: “¿Peke yerá peï? Pepüa, piyerure Tumpa pe awiye waerä jarei katu mii pemaño piyé chererïro waerä,” jei chupe reta.

### **Jesús jowaicho reta yuweru uipisi**

*(Mateo 26.47-56; Marcos 14.43-50; Juan 18.2-11)*

<sup>47</sup>Jare Jesús uyemingeta iko rambuewe, aramoño uyekuaa jeta kuimbae reta. Jare Judas – jae ko Jesús jemimboe doce wae wi pëti – jae ou tenonde. Jayawe ou uwäe Jesús oï wae pe jare uyurupite jowa pe.

<sup>48</sup>Jayawe Jesús jei chupe: “Judas, ¿këraita pa pëti yurupite rupi chemee neï cherowaicho reta pe?” jei chupe.

<sup>49</sup>Jare Jesús jemimboe reta uikuaa yawe mbae uasata oï wae, upirandu reta Jesús pe: “OreYa, ¿nduiporuta pa kïsepuku jese reta?” jei reta.

<sup>50</sup>Jayawe pëti wae jae reta uiporu ikïsepuku sacerdote tenondewaete pe uyeyokui wae re, jare uyasia chuwi inambi iyakata kotiwa.

<sup>51</sup>Jayawe Jesús jei chupe: “¿Joko peño ma! ¿Pemaño ma jese reta!” jei. Jayawe uyawiki chuwi kuimbae inambi jendakue, jare ukuera.

<sup>52</sup>Yuweru wi joko pe sacerdote itenondewa reta, jare sindaro tupao wasu iyandarekoa reta, jare ïru judío itenondewa reta. Jare Jesús jei chupe reta: “¿Maera pa peyu chekoti kïsepuku rewe jare iwira rewe? ¿Jae yerá che imonda jeko kachi wae?” jei.

<sup>53</sup>“Opa ara rupi che aiko pe reta ndiwe tupao wasu joka pe. ¿Maera pa joko pe chepisi'ä?” jei chupe reta. “Erëi añawe uwäe ma ora che aï waerä pepo pe. Kua ko jae ora Añawasü jare añä reta imbaepuere uyekuaa waerä michi pewa,” jei Jesús chupe reta.

### **Pedro uikuaku Jesús**

*(Mateo 26.57-58,69-75; Marcos 14.53-54,66-72; Juan 18.12-18,25-27)*

<sup>54</sup>Jayawe uipisi reta Jesús jare wiraa reta sacerdote tenondewaete jëta pe. Jare Pedro oo jae reta jaikue, erëi mbiri katu mii upita chuwi.

<sup>55</sup>Jare sacerdote tenondewaete joka pe sindaro reta uyatapi jare uwapi reta tataipi rupi. Jare Pedro uwapi wi jae reta ipite pe uyepee waerä.

<sup>56</sup>Erëi pëti kuñatái uyeyokui wae uecha Pedro uwapi oï tataipi pe. Jayawe jae umae ngatu jese jare jei: “Kua kuimbae iko wi Jesús ndiwe,” jei.

<sup>57</sup>Erëi Pedro uikuaku jei rewe: “Aikuaa'ä jokua kuimbae,” jei.

<sup>58</sup>Joko wi ndei ima mbowe, iru wae uecha Pedro jare jei chupe: “Nde wi ko jae Jesús jemimboe,” jei chupe. “Mbaeti,” jei Pedro. “Jae’ä ko che.”

<sup>59</sup>Jare pëti ora rupi ma uasa yawe, iru kuimbae jeiete uyemingeta japicha ndiwe: “Añetete kua kuimbae wi ko jae Jesús ndiwe iko wae, echa’ä jae wi ko Galilea pewa,” jei.

<sup>60</sup>Erëi Pedro jei: “Aikuaa’ä mbae re ra ndiyemingeta nei,” jei chupe. Jare Pedro uyemingeta rupiwe, uru kuimbae uñee.

<sup>61</sup>Jayawe yandeYa uyerowa umae Pedro re. Jare Pedro imandúa yandeYa jei chupe wae re: “Kua pïtu woi, ndei uru kuimbae uñee mbowe, mbapi wese ma nde chekuakuta nei kuri,” jei chupe.

<sup>62</sup>Jayawe Pedro oë oo joko wi, jare umbipi uyao täta rupi ipiatiti rewe.

### **Uyapo reta mbaembae ikawi mbae wae Jesús pe**

*(Mateo 26.67-68; Marcos 14.65)*

<sup>63</sup>Jayawe Jesús järoa reta oyoyai jare uinupa reta.

<sup>64</sup>Jare uesañoma reta, jare okua reta Jesús jowa re jei rewe: “Yaecha Tumpa tuikuaaka ndewe kía ra okua oï nderé wae,” jei reta chupe.

<sup>65</sup>Jare jeta mbaembae kachi wae jei reta chupe.

### **Jesús uyemboi judío imburuwicha reta jowai**

*(Mateo 26.59-66; Marcos 14.55-64; Juan 18.19-24)*

<sup>66</sup>Jayawe köe ma yawe, uyembati ye judío itenondewa reta, jare sacerdote itenondewa reta, jare Moisés uikuatía wae re oporomböe wae reta. Jare jae reta ueruruka Jesús jae reta jowai jare jei reta chupe:

<sup>67</sup>“Nde ko jae Cristo ndoe chupe wae yawe, emimbeu orewe simi kawi rupi,” jei reta. Jare Jesús jei chupe reta: “Che amimbeu pewe yawe jae ko che, ndarau chererowia.

<sup>68</sup>Jare che apirandu yawe pewe mbae re, ndarau pemimbeu chewe,” jei chupe reta.

<sup>69</sup>“Erëi che kuimbaerä ayeyapo wae añawe wiwe awapita Tumpa opaetei mbaepuere onoi wae iyakata koti,” jei chupe reta.

<sup>70</sup>Jayawe opaete jae reta upirandu chupe: “Jayawe, ¿nde pa ko jae Tumpa Tai?” jei reta. Jayawe Jesús jei chupe reta: “Pe reta pere rami jae ko che,” jei chupe reta.

<sup>71</sup>Jayawe jae reta jei iyupe: “¿Maera ye ra yaekata iru wae reta umbijeko waerä? Echa’ä yande etei yayandu ma mbae jei iyuru pe etei wae,” jei reta.

## **Lucas 23**

### **Wiraa reta Jesús mburuwicha Pilato jowai**

*(Mateo 27.1-2,11-14; Marcos 15.1-5; Juan 18.28-38)*

<sup>1</sup>Jayawe opaete jae reta upüa jare wiraa Jesús mburuwicha romano Poncio Pilato jee wae jowai.

<sup>2</sup>Jare umbipi reta umbijeko Jesús. Jae reta jei: “Kua kuimbae nduecha urukachi onoi kua yandeiwi pewa reta jeko. Echa’ä jae jei oï chupe reta awiye waerä umbiepi reta mburuwicha wasu César okowara orewe wae,” jei reta. “Jare jae nunga wi jei tēi oï iyupe jae ko Cristo, jare jokua oremaerä uipota jei jae ndaye uyeypota mburuwicha wasurä,” jei reta chupe.

<sup>3</sup>Jayawe Pilato upirandu Jesús pe: “¿Nde pa ko jae judío reta imburuwicha wasu?” jei chupe. Jayawe Jesús jei chupe: “Nde ndere wae ko jae,” jei.

<sup>4</sup>Jayawe Pilato jei sacerdote itenondewa reta pe jare joko pe ñonoï wae reta pe: “Awäe’ä teko kua kuimbae re,” jei chupe reta.

<sup>5</sup>Jayawe jae reta jeiete jei: “Jae oporomböe wae rupi umiñeräroka oo oï opaete kua iwi rupi. Jae umbipi Galilea rupi jare añawe ou ma uwäe kua Judea pe,” jei reta Pilato pe.

### **Jesús uyemboi mburuwicha Herodes jowai**

<sup>6</sup>Pilato kua uyandu yawe, upirandu chupe reta: “¿Kua kuimbae jae ra Galilea pewa?” jei chupe reta.

<sup>7</sup>“Añetete jukuärái ko,” jei reta. Jayawe Pilato wiraaka Jesús Herodes pe. Echa’ä Herodes ko jae Galilea pewa reta imburuwicha. Jare jokua ara reta rupi Herodes opou iko Jerusalén pe.

<sup>8</sup>Jare Herodes uecha Jesús yawe, uyerowiaete, echa’ä ima ma jae uipota tēi uecha Jesús. Echa’ä jeräkua chupe jeta mbaembae Jesús uyapo wae rewa. Jáeramo jae uipota tēi uecha Jesús uyapo chupe mbae kiawe ipuere’ä uyapo wae.

<sup>9</sup>Jayawe Herodes upirandu jeta mbaembae re Jesús pe, erēi Jesús jei’ä chupe mbae awe.

<sup>10</sup>Jayawe sacerdote itenondewa reta jare Moisés uikuatía wae re oporomböe wae reta iñeeäta rewe umbijeko Jesús Herodes jowai.

<sup>11</sup>Jayawe Herodes jare isindaro reta jei iyupe: “Kua kuimbae usiriwe’ä etei ko,” jei reta. Jare oyoyai reta waerä, omondeka chupe reta pēti temimonde ikawi wae mburuwicha wasu echa. Jare joko wi Herodes wiraaka ye Jesús Pilato pe.

<sup>12</sup>Jare jokua ara etei Pilato jare Herodes uyeapikatu reta. Echa’ä tenonde yawe uñeamitäase reta.

### **Pilato umee Jesús umano waerä**

*(Mateo 27.15-26; Marcos 15.6-15; Juan 18.39-19.16)*

<sup>13</sup>Jayawe Pilato umbatika sacerdote itenondewa reta, jare judío itenondewa reta, jare opaete judío joko pe ñonoï wae reta.



<sup>14</sup>Jare jei chupe reta: “Pe reta peru ma kua kuimbae chewe jare pere, ‘Jae urukachi onoi kua yandeiwi pewa reta jeko.’ Erëi che apirandu chupe perowake jokua re, jare awäe’ä etei teko jese pe reta pembijeko rami,” jei.

<sup>15</sup>“Jae nunga wi Herodes uwäe’ä jese teko; jáeramo ombou ye kua pe,” jei. “Mase, mbaeti onoi teko umano waerä kua kuimbae.

<sup>16</sup>Jáeramo ainupakata, jare taikue rupi ambopoikata,” jei Pilato chupe reta.

<sup>17</sup>Jukuärái Pilato jei chupe reta, echa’ä jae uikuaa opa año rupi pascua ara pe imeta ko opoika chupe reta pëti pereso.

<sup>18</sup>Jayawe opaete wae usapikái reta pëti ramiño jei rewe: “¡Tumano kua kuimbae! ¡Embopoika orewe Barrabás!” jei reta.

<sup>19</sup>Jokua kuimbae Barrabás iko peresoríru pe, echa’ä jae upuruyuka wae ko. Jare tenonde yawe jae uyapoka tekorái Jerusalén pe ombowaichoka waerä sindaro romano reta.

<sup>20</sup>Erëi Pilato imeño uipota tēi ombopoika Jesús. Jáeramo jei ye chupe reta tēi.

<sup>21</sup>Erëi jae reta jeiete usapikái pii pii jei: “¡Ikutuka kurusu re! ¡Ikutuka kurusu re!” jei reta.

<sup>22</sup>Jayawe Pilato upirandu ye chupe reta: “¿Marái ramo pipota umano waerä kua kuimbae? ¿Mbae ikawi mbae wae pa uyapo? Che awäe’ä etei teko jese umano waerä. Jáeramo ainupakata, jare joko wi ambopoikata,” jei tēi chupe reta.

<sup>23</sup>Erëi jeieteño täta rupi usapikái rewe jei reta uikutuka waerä Jesús kurusu re. Jare täta usapikái chupe reta ramo,

<sup>24</sup>Pilato uyapo chupe reta jae reta uipota wae rupi.

<sup>25</sup>Jayawe omoëka chupe reta peresoríru wi jokua kuimbae jae reta uipota wae – jae ko jokua upuruyuka wae jare tekorái uyapoka ombowaicho waerä romano reta wae. Erëi umee Jesús sindaro reta pe uyeyapo waerä chupe judío reta uipota wae.

### **Uikutu reta Jesús kurusu re**

*(Mateo 27.32-44; Marcos 15.21-32; Juan 19.17-27)*

<sup>26</sup>Jayawe sindaro reta wiraa Jesús joko wi uikutu reta waerä kurusu re. Jare yuraa yureko reta rambuwe, owäiti reta pëti kuimbae Simón jee wae uwäe ma ou oï tēta wasu pe. Kua kuimbae tēta wasu Cirene pewa ko. Jayawe sindaro reta uipisi kua kuimbae jare oñono reta Jesús ikurusu iyatii re jae wiraa waerä Jesús jaikue.

<sup>27</sup>Jeta wae reta yuraa wi Jesús jaikue. Jare jae reta ipite pe yuraa amokue kuña reta. Jae reta täta rupi jäse rewe uapíro reta Jesús.

<sup>28</sup>Jayawe Jesús uyerowa umae jese reta, jare jei chupe reta: “Kuña reta Jerusalén pewa, awiye piyao cheré. Piyao piyé jare pemembi reta re.

- <sup>29</sup>Echa'ä outa ara jei reta waerä: 'Uyekouete ñonoï imembi mbaei wae reta jare mbaeti uikuaa imembi umbikambu wae reta.' Jukuärái jeita reta, echa'ä jokua ara reta rupi tuicha rupi uiporarata ñonoï reta," jei.
- <sup>30</sup>"Jayawe jeta wae reta jeita tēi: 'Tuyapara cheré iwitu wasu reta jare ñaipe reta cheati waerä,' jeita reta. Jukuärái uipotata tēi uyeyapo waerä chupe reta awiye waerä uiporara ima rupi jowaicho reta ipo pe," jei chupe reta.
- <sup>31</sup>"Che mbaeti ayapo mbae ikawi mbae wae, erēi mase kērái chapo ñonoï reta. Oeteta ndipo pe jupi mbae piko wae reta pewarä. ¡Kērái etei ndipo piporarata pei!" jei Jesús chupe reta.
- <sup>32</sup>Jare sindaro reta wiraa wi mokui kuimbae ikawi mbae wae uyapo wae reta uyuka reta waerä wi Jesús ndiwe.
- <sup>33</sup>Jare yuraa uwäe reta yawe Äkakuerenda jei chupe wae pe, joko pe uikutu reta Jesús kurusu re. Jare uikutu reta wi jokua kuimbae ikawi mbae uyapo wae reta Jesús iyikeyike pe, pēti pēti ikurusu rei.
- <sup>34</sup>Jayawe Jesús uyerure Tu pe kuärái: "CheRu, awiye mii nemandúa chupe reta kua uyapo ñonoï wae re. Echa'ä jae reta uikuaa'ä mbae ra uyapo ñonoï wae," jei. Jayawe sindaro reta uyuwari Jesús jemimonde re, pēti pēti wae uikuaa waerä mbae nunga wiraata iyupe wae. Jukuärái umbiyao iyupe reta Jesús jemimonde.
- <sup>35</sup>Jeta wae reta joko pe umae ñonoï. Jare judío itenondewa reta oyoyai Jesús. Jei reta upuka rewe: "Jae ndaye uepi ñru wae reta. Añawe yaecha tuyerepi wi, añetete yawe jae ko Cristo Tumpa uiparawo wae," jei reta.
- <sup>36</sup>Jare sindaro reta wi oyoyai Jesús. Oya reta jese jare uipota tēi uyuwanga katu rewe umee jou vino uasakue.
- <sup>37</sup>Jare jei reta upuka rewe: "Nde ko jae judío reta imburuwicha wasu yawe, jayawe yaecha iyerepi," jei reta chupe.
- <sup>38</sup>Jare oñono reta kurusu re pēti iwira ipe wae Jesús iñäka iáramo. Jare uyekuatía iko jese umbijeko wae kuärái: "KUA KO JAE JUDÍO RETA IMBURUWICHA WASU," jei. Kua uyekuatía iko griego ñee pe, jare romano ñee pe, jare arameo ñee pe.
- <sup>39</sup>Jare pēti jeko pochi wae Jesús iyipi pe uyekutu oï wae, jae nunga wi jei ikawi mbae wae Jesús pe. "¿Nde jae'ä yerá Cristo ndoe chupe wae? Iyerepi jayawe, jare orerepi wi," jei chupe.
- <sup>40</sup>Erēi ñru kuimbae uyekutu oï joko pe wae uñeengata chupe. "¿Ndekiye'ä yerá Tumpa wi? Echa'ä nde nemanonei wi kua kuimbae rami," jei chupe.
- <sup>41</sup>"Yande jupi ko ñamano waerä, echa'ä mbae ikawi mbae wae yayapo ramo. Erēi kua kuimbae uyapo'ä etei mbae ikawi mbae wae," jei chupe.
- <sup>42</sup>Jayawe jae jei Jesús pe: "Jesús, nemandúa mii cheré nde nei ma yawe opaete wae imburuwicha wasurä jaeño mái pewa," jei chupe.

<sup>43</sup>Jayawe Jesús jei chupe: “Che tae ndewe añetete wae, kua ara etei nde neïta che ndiwe ara pe,” jei chupe.

### **Jesús umano kurusu re**

*(Mateo 27.45-56; Marcos 15.33-41; Juan 19.28-30)*

<sup>44</sup>Jayawe ara mbite wiwe uñemipitumimbi mbapi ora rupi opaete jokua iwi rupi.

<sup>45</sup>Warasi jembipe’ä etei. Jare puyu tupao wasu joo umbiyao pipe wae osoro mbite rupi.

<sup>46</sup>Jayawe Jesús täta usapikai rewe jei: “CheRu, añono cherekowe mii ndepo pe,” jei. Jare kua jei ma yawe, umano.

<sup>47</sup>Jare Jesús ikurusu jowai uyemboi oi sindaro reta itenondewa. Jae uecha yawe kua mbae uyeyapo wae, umbutuicha Tumpa jee jare jei: “Añetete yepe, kua kuimbae ko jae jupi wae,” jei.

<sup>48</sup>Jare opaete joko pe ñonoï wae reta uecha yawe mbae uyeyapo wae, opa ye yuraa reta jëta jëta rupi ipiatiti rewe.

<sup>49</sup>Erëi opaete Jesús uikuaa wae reta upita mbiri wiño umae. Jare jae reta ndiwe ñonoï wi kuña reta Jesús ndiwe Galilea wi yuweru wae.

### **Oñono reta Jesús jetekue teöwerenda pe**

*(Mateo 27.57-61; Marcos 15.42-47; Juan 19.38-42)*

<sup>50-51</sup>Jare joko pe oi wi pëti kuimbae José jee wae. Jae ko tëta wasu Arimatea pewa. Jokua oi iwi Judea pe. José ko jae pëti mburuwicha ipiakawi wae jare jupi wae. Echa’ä ikawi’ä chupe ñru mburuwicha reta uyukaka Jesús wae. Jae uäro iko ikirëi rewe Tumpa oi waerä opaete wae imburuwicha wasurä jaeño mái pewa.

<sup>52</sup>Jayawe José oo ueka Pilato pe Jesús jetekue wiraa waerä oñono teöwerenda pe.

<sup>53</sup>Jare kua ikawi Pilato pe. Jayawe José oo umbiweyi kurusu wi Jesús jetekue, jare oñoma nieso pe. Joko wi wiraa oñono pëti teöwerenda itape uyeyoo wae pe. Jokua teöwerenda ndei awe kía uiporu wae ko.

<sup>54</sup>Jokua ara opaete judío reta uyeyapikatu yureko mbutuu ara pewarä. Jare mbutuu ara uyembipita ma iko.

<sup>55</sup>Jayawe kuña reta Jesús ndiwe Galilea wi yuweru wae yuraa reta José jaikue. Jare uecha reta teöwerenda jare kërái José oñono Jesús jetekue teöwerenda pe wae.

<sup>56</sup>Joko wi opa ye yuraa reta kiape upita ñonoï wae pe. Jare joko pe uyapikatu reta mbaembae utimbo kawi wae uipichi reta waerä kuri Jesús jetekue re. Jayawe uputuu reta mbutuu ara pe kërái Moisés arakae uikuatía wae rupi.

## **Lucas 24**

### **Jesús ikowe ye ou umanokue wae reta ipite wi**

*(Mateo 28.1-10; Marcos 16.1-8; Juan 20.1-10)*

- <sup>1</sup>Jayawe domingo ara ndimboweasi kuña reta opa yuraa ye teöwerenda koti. Jare wiraa reta wi jokua mbaembae utimbo kawi wae uyapikatu reta wae.
- <sup>2</sup>Jare yuraa uwäe reta yawe teöwerenda pe, uecha reta ita tuicha wae uyembisiri ma oi teöwerenda jöke wi.
- <sup>3</sup>Jayawe uike reta japipe, erëi uwäe'ä chupe reta yande Ya Jesús jetekue.
- <sup>4</sup>Jáeramo uikuaa'ä mbae jei reta waerä. Jare aramoño uyekuaa mokui kuimbae jemimonde uwerasi wae reta uyemboi ñonoï jae reta iyipi pe.
- <sup>5</sup>Jáeramo kuña reta opa ukiye jare inäkatindi rewe umae reta iwi re. Jayawe jokua kuimbae reta jei kuña reta pe: “¿Maera pa peka peï tekowe onoi wae umanokue wae reta ipite pe?”
- <sup>6</sup>Jae mbaeti ma kua pe oi. Ikowe ye ma ko,” jei chupe reta. “Pemandúa jae jei pewe wae re jae iko yawe pe reta ndiwe Galilea pe.
- <sup>7</sup>Echa'ä jae jei pewe: ‘Che kuimbaerä ayeyapo wae, imeta ko chemee reta jeko kachi wae reta ipo pe. Jare jae reta chekututa kurusu re cheyuka waerä. Erëi joko wi mbapi ara pe aikowe yeta ayu ai umanokue wae reta ipite wi.’ Jukuärái Jesús jei pewe,” jei chupe reta.
- <sup>8</sup>Jayawe kuña reta imandúa Jesús jei chupe reta wae re.
- <sup>9</sup>Jayawe yuraa ye reta teöwerenda wi imiäri waerä Jesús once jemimboe tenondewaete reta pe jare iru wae reta pe opaete kua mbaembae uyeyapo wae re.
- <sup>10</sup>Jokua kuña reta ko jae María Magdalena, Juana, Jacobo ichi María jee wae, jare iru kuña reta jae reta ndiwe yuraa wae. Erëi kuña reta imiäri yawe Jesús jemimboe tenondewaete reta pe,
- <sup>11</sup>jae reta wirowia'ä. Echa'ä jae reta imaerä imiäri pochiño wae echa chupe reta.
- <sup>12</sup>Erëitu jese Pedro uyandu yawe, upüa oë oo, jare osi etei oo teöwerenda koti. Jare joko pe oo uwäe yawe, umae japipe koti. Jare uecha tarapo uyeyokua pipe wae retaño joko pe oi. Jayawe joko wi oo ye ipiakañi rewe.

### **Jesús uyekuaaka mokui jemimboe reta pe**

*(Marcos 16.12-13)*

- <sup>13</sup>Jare jokua ara etei mokui Jesús jemimboe reta yuraa yureko Jerusalén wi tēta wasu rai Emaús jee wae koti. Kua tēta wasu rai oi once kilometro rupi Jerusalén wi.
- <sup>14-15</sup>Jayawe jae reta uyemingeta yuraa yureko rambuewe opaete mbaembae uasa wae rewa. Jare aramoño Jesús etei oya oo jese reta jare umbipi uwata oo jae reta ndiwe.
- <sup>16</sup>Erëi jae reta uikuaa'ä jae ko Jesús wae, echa'ä Jesús umaeno'ä jese reta uikuaa waerä.
- <sup>17</sup>Jayawe Jesús upirandu chupe reta: “¿Mbae re pa piyemingeta peï pewata rambuewe? ¿Maera pa pepiatiti peï?” jei chupe reta.

18 Jayawe pëti wae jae reta Cleofas jee wae jei Jesús pe: “¿Ndikuaa’ä yerá kua ara rupi mbaembae uasa Jerusalén pe wae? Opaete opou wae reta wi, ndeeño chawaa ndikuaa’ä kua mbaembae uasa wae,” jei chupe.

19 “¿Mbae pa uasa?” jei Jesús chupe reta. “Jokua Jesús Nazaret pewa pe mbae uyeyapo wae re,” jei reta. “Echa’ä Tumpa ombou jae iñee umimbeu waerä. Jare jae uyapo imbaepuere rewe jeta mbaembae ikawi wae, jare ikawi oporomboe wi. Tumpa umae kawu jese, jare jae nunga wi opaete wae reta umae kawu jese,” jei reta.

20 “Erëi sacerdote itenondewa reta jare yanemburuwicha reta umee romano reta pe uyukaka reta waerä kurusu re,” jei reta.

21 “Erëi ore ndorowia tēi nduiko jae yanderepita iko opaete yande Israel iñemoña yaiko wae reta. Jare añawe jae ko mbapi ara ma uasa oï kua mbae uyeyapo wae,” jei reta.

22-23 “Jare jokuaño’ä ko. Iyei ndimbowe amokue kuña reta orepite pe yureko wae yuraa teöwerenda pe. Jare jae reta yuweru ye yawe, jei reta orewe mbaeti ndaye Jesús jetekue joko pe oï,” jei reta. “Jare imiäri reta orewe wi jae reta ndaye uecha araiwa reta joko pe ñonoï. Jare jokua araiwa reta ndaye jei chupe reta Jesús ikowe ye ma ou umanokue wae reta ipite wi,” jei reta. “Jare jokua jae reta imiäri orewe wae orembipiakañiete.

24 Jayawe amokue wae orepite wi yuraa wi teöwerenda pe. Jare jae reta uecha opaete kërái kuña reta imiäri orewe wae rami etei. Uecha’ä reta Jesús,” jei reta Jesús pe.

25 Jayawe Jesús jei chupe reta: “Pearakuaa mbae echa ko pe reta. ¿Pepuere’ä mbate pa pikuaa? Echa’ä arakaete ma Tumpa iñee umimbeu wae reta uikuatía kua mbaembae uasata iko wae. ¿Këraita pa ndeiño perowia jese?” jei chupe reta.

26 “¿Uyekuatia’ä yerá oï kërái Cristo yae chupe wae tenonde imeta ko uiporara rani? Jare uiporara ma yawe, yandeRu Tumpa etei umbutuichata oï ara pe,” jei chupe reta.

27 Jayawe Jesús umbipi umiesäka chupe reta kërái ko uyekuatía oï jesewa Tumpa iñeeriru pe. Jae umbipi Moisés uikuatía wiwe, jare joko wi arakae Tumpa iñee umimbeu wae reta uikuatía wae rupi umiesäka wiraa wiraa chupe reta.

28 Jayawe yuraa seri ma uwäe reta yawe tēta wasu rai pe, Jesús uasaraanga oo iko chuwi reta.

29 Jayawe jae reta jei chupe: “Epita mii ore ndiwe. Echa’ä kaaruete ma oï ndewe. Jare warasi uiketa ma oo oï,” jei reta. Jayawe Jesús uike tēta pe upita waerä jae reta ndiwe.

30 Jayawe jae reta uwapi mesa pe ukaru waerä. Joko wi Jesús uipisi mbiyape, jare umee yasurupái Tumpa pe jese, jare upisäa umee chupe reta.

<sup>31</sup>Jayawe ramo jae reta iyarakuaa uyepea jare uikuaa reta jae yepe Jesús. Erëi jupiwoiño Jesús ukañi chuwi reta.

<sup>32</sup>Jayawe jei reta iyupe: “Jáeramo yepe yayerowiaete yaiko jae tape rupi umiesäka yandewe yawe Tumpa iñee,” jei reta.

<sup>33</sup>Jayawe jupiwoiño jae reta upüa mesa wi, jare yuraa ye Jerusalén pe kiape Jesús once jemimboe tenondewaete reta ñonoï wae pe. Jare uwäe reta yawe joko pe, uyembati ñonoï Jesús jemimboe tenondewaete reta ïru wae reta ndiwe.

<sup>34</sup>Jayawe jae reta jei jokua mokui wae pe: “Añetete yepe yandeYa ikowe ye ma ou umanokue wae reta ipite wi, jare uyekuaa Simón pe,” jei reta.

<sup>35</sup>Jayawe jokua mokui wae reta umbipi umimbeu chupe reta mbae uasa chupe reta tape rupi wae, jare kërái Jesús uyekuaaka chupe reta mbiyape upisäa yawe.

### **Jesús uyekuaa jemimboe reta pe**

*(Mateo 28.16-20; Marcos 16.14-18; Juan 20.19-23)*

<sup>36</sup>Jare uyemingeta yureko rambuewe, aramoiño Jesús etei uyekuaa jae reta ipite pe uyemboi oï. Jare jei chupe reta: “Pepiakatu, cheriwi reta,” jei.

<sup>37</sup>Erëi jae reta ukiyete. Wirowia reta tëi uecha ñonoï pëti umanokue wae iä.

<sup>38</sup>Jayawe Jesús jei chupe reta: “¿Maera pa pekiye? ¿Maera pa yawái pewe perowia waerä che aikowe ye wae?” jei.

<sup>39</sup>“Pemaie chepo re jare chepi re. Che ko. Pepuere pipisi pikuaa waerä. Echa’ä pëti umanokue wae iä mbaeti onoi soo jare mackäwe kërái pe reta cherecha che anoi wae rami,” jei chupe reta.

<sup>40</sup>Jare kua jei ma yawe, Jesús uechaka chupe reta ipo jare ipi.

<sup>41</sup>Jayawe jae reta ipiakañi. Erëi tuicha rupi uyerowia ramo, ndei ipuere wirowia kawi reta. Jayawe Jesús upirandu chupe reta: “¿Ime pa kua pe penoi mbae jau waerä?” jei chupe reta.

<sup>42</sup>Jayawe jae reta ueru chupe pira peraso oyikue jare ei iiraiti rewe wae.

<sup>43</sup>Jare Jesús uipisi jare jou jae reta jowake.

<sup>44</sup>Joko wi jei chupe reta: “Pemandúa kawi peï, che aiko yawe pe reta ndiwe, che amimbeu pewe kua mbaembae uyeyapota iko chewe wae,” jei. “Che jae pewe imeta ko uyeyapo chewe opaete Moisés arakae uikuatía cheré wae, jare jae nunga wi jokua ïru kuimbae reta Tumpa iñee arakae umimbeu wae uikuatía cheré wae, jare salmo reta pe wi,” jei chupe reta.

<sup>45</sup>Jayawe Jesús uipea chuwi reta iyarakuaa jae reta uikuaa kawi waerä Tumpa iñee uyekuatía oï wae.

<sup>46</sup>Jei chupe reta: “Uyekuatía oï kërái Cristo pere chupe wae imeta ko uiporara jare umano, jare joko wi ikowe ye ou mbapi ara pe,” jei chupe reta.

<sup>47</sup>“Jare uyekuatía oĩ wi kërái ñee uyemimbeuta oĩ opaete rupi ueya reta waerä ipiayemingeta jupi mbae wae Tumpa rewa jare wirowia kawi reta waerä jese. Jare uyemimbeuta oĩ wi kërái ipuere uyembái waerä chuwi reta mbaembae uyawi Tumpa koti wae,” jei. “Kua mbaembae uyemimbeuta oĩ cheree re, jare uyemimbeuta rani Jerusalén pe jare joko wi opaete iwi rupi,” jei Jesús chupe reta.

<sup>48</sup>“Pe reta pecha opaete kua mbaembae uyeyapo chewe wae. Jare añawe pemimbeuta opaete wae pe kua pecha wae.

<sup>49</sup>Erëi imeta mbae rani uyeyapo pewe,” jei chupe reta. “Mase, che abouta aĩ pewe Espíritu Santo cheRu jei umeeta oĩ pewe wae. Jae outa ara wi pemimbaepuere waerä. Erëi pepitata ko kua tëta wasu Jerusalén pe jokua mbaepuere penoi rewa.” Jukuärái Jesús jei jemimboe reta pe.

### **Jesús oo ye ara pe**

*(Marcos 16.19-20)*

<sup>50</sup>Jayawe Jesús wiraa jemimboe reta Betania koti. Jare yuraa uwäe reta joko pe yawe, Jesús upi ipo ara koti jare jei: “CheRu, jekuaeño iyapo mii ikawi wae kua reta pe,” jei.

<sup>51</sup>Jare jukuärái uyapo iko rambuewe, Jesús uyereraa chuwi reta ara koti.

<sup>52</sup>Jayawe jemimboe reta umbutuicha Jesús jee. Jare joko wi opa ye yuraa reta Jerusalén pe tuicha uyerowia rewe.

<sup>53</sup>Jare jekuaeño yuraa reta tupao wasu pe umbutuicha reta waerä Tumpa jee. Jaeño ma.

## Juan

### Kua tupapire rewa:

Kua tupapire, jae ko Juan uikuatía wae. Juan ko jae pëti Jesús jemimboe, jare Pedro jare Jacobo ndiwe uñemiiru kawiete Jesús ndiwe iiru jemimboe reta wi. Ndei Juan Jesús jemimboerä iko mbowe, jae ikose pira uipisi wae. Kua jae uikuatía wae, jae ko jeta mbaembae yandeYa Jesucristo uyapo wae jare jei wae kua iwi pe iko rambuewe. Jare kua tupapire rupi Juan uikuaaka yandewe Jesús ko jae Tumpa Tai ikoño mái wae etei. Jukuärái yaikuaa mbaembae Jesús uyapo wae rupi jare jei wae rupi. Kua tupapire pe jeta wese Jesús uyemingeta tekowe opa mbae wae rewa jare kërái imeta ko yarowia jese ñanoi waerä jokua tekowe. Jare Juan etei jei yandewe jae uikuatía ma yandewe kua mbaembae yarowia waerä Jesús re jare jukuärái ñanoi waerä tekowe opa mbae wae (20.30-31).

### Juan 1

#### Jesucristo ikoño mái

- <sup>1</sup>Iyipi wiwe ime pëti wae Ñee jee wae. Jae iko Tumpa ndiwe jare jae ko Tumpa etei.
- <sup>2</sup>Jukuärái iyipi wiwe Ñee ikoño mái Tumpa ndiwe.
- <sup>3</sup>Jare jae rupi uyekuaa opaete mbaembae reta ime oï wae. Mbaeti mbae awe jae uyapo mbae wae.
- <sup>4-5</sup>Jae ko tekowe iYa. Jare jae jekowe rupi uikuaaka iwi pewa reta pe Tumpa rewa kërái tembipe umbiembipe pütumimbi pe wae rami. Jare pütumimbi ndarau etei ombowe jokua tembipe.
- <sup>6-7</sup>Ime iko pëti kuimbae Juan jee wae. Kua kuimbae Tumpa ombou umimbeu waerä opaete wae pe jokua tembipe rewa. Tumpa uyapo jukuärái opaete wae wirowia waerä tēi jokua tembipe re Juan iñee rupi.
- <sup>8</sup>Juan jae'ä ko jokua tembipe. Jaeño ko ou umimbeu waerä jokua tembipe rewa.
- <sup>9</sup>Echa'ä jokua tembipe uyekuaata ma iko kua iwi pewa reta pe. Jae añetete pewa ko, jare uikuaaka iwi pewa reta pe Tumpa rewa.
- <sup>10</sup>Jayawe jae ko jee Ñee wae ou kua iwi pe. Erēi yepe tēi jae etei uyapo kua iwi, jesewe kua iwi pewa reta uikuaa'ä kía ko jae wae.
- <sup>11</sup>Jae ou judío reta ipi. Jare yepe tēi jae reta ko jétáíwa, erēitu opaete seri jae reta wiriro.
- <sup>12</sup>Erēi amokue wae reta umbiresiwe. Wirowia reta jese. Jáeramo jae reta Tumpa uyapo tai retará yureko waerä.



<sup>13</sup>Jae reta ko jae Tumpa tai reta, echa'ä Tumpa etei uyapo reta jukuärái ramo. Mbaeti uyeyapo reta jukuärái kua iwi pewa reta jeko rupi – jae ko tu jare ichi uipota uñemoña ramo.

<sup>14</sup>Jayawe jae ko jee Ñee wae ou kua iwi pe iko waerä yandepite pe. Jae uyeyapo kuimbaerä. Jare ore nduikuaa kía ko jae wae, echa'ä ore nduecha jae imbaepuere jupiete ye wae – jae ko Tumpa Tai jae waeño wae etei imbaepuere. Jare ore nduecha wi jae ipiakawiete yandekoti, jare opaete mbae jae jei wae añetete ko.

<sup>15</sup>Juan umimbeu kawi jeseva jaeramo uecha yawe. Jae jei iru wae reta pe: “Pemandúa kawi peï, tenonde yawe che jae pewe: ‘Outa oï kuri cheraikue rupi chetenondewa. Jae imbaepuere chewi, echa'ä jae ikoño mái ndei che aiko mbowe,’ jae pewe. Mase, añawe pemae. Ko ma uwäe ou, jare jae ko kua kuimbae.” Jukuärái jei Juan chupe reta.

<sup>16</sup>Jayawe jae ko jee Ñee wae ipiakawiete ye ramo, jekuaeño yayekou mbaembae ikawiete ye wae re – jae ko mbaembae jae ipo wi etei ou wae.

<sup>17</sup>Tenonde yawe Tumpa uikuaaka yandewe Moisés rupi kërái yaiko waerä. Erëi añawe Jesucristo rupi yaikuaa añetete wae jare kërái Tumpa ipiakawiete yandewe wae.

<sup>18</sup>Mbaetii kiawe uecha ma yandeRu Tumpa wae. Erëi Tumpa Tai jae waeño wae uikuaaka ma yandewe kërái ko jae wae. Tai ko Tumpa etei jare jekuaeño uñemirru oï Tu ndiwe.

### **Juan upurumbisakambu wae uyemimbeu kía ko jae wae**

*(Mateo 3.1-12; Marcos 1.1-8; Lucas 3.1-20)*

<sup>19</sup>Jayawe Juan jeräkua ma judío itenondewa reta pe tëta wasu Jerusalén pe. Jayawe jae reta uipota uikuaa kawi jeseva. Jáeramo omondo reta amokue sacerdote reta jare imboria reta ndiwe kiape Juan oï wae pe. Jare jae reta yuweru ma uwäe yawe, upirandu reta chupe: “¿Kía ko nde?”

<sup>20</sup>Jayawe Juan umimbeu kawi chupe reta. “Che jae'ä ko Cristo yande yae chupe wae,” jei chupe reta.

<sup>21</sup>Jayawe upirandu reta ye chupe: “Nde'ä ko jae Cristo yawe, jayawe ¿nde pa ko jae Elías arakae Tumpa iñee nemimbeuse wae ndiyekuaa ye ma kua iwi pe?” Jayawe Juan jei: “Jae'ä ko che.” “Jayawe ¿nde pa ko jae Tumpa iñee umimbeu wae Moisés arakae jei Tumpa ombouta iko wae?” jei reta chupe. “Jae'ä ko che,” jei chupe reta.

<sup>22</sup>Jayawe upirandu reta ye Juan pe: “Jayawe ¿kía pa ko nde? ¿Mbae ndere ndiyé? Emimbeu mii orewe, echa'ä ore nduipota numimbeu orembou wae reta pe,” jei reta chupe.

<sup>23</sup>Jayawe Juan jei chupe reta: “Tumpa iñee arakae umimbeu wae Isaías uikuatía cheré kuärái: ‘Jae oïta iwitini wasu rupi, jare jeta wae reta yuraata jae oï wae pe. Jare jae usapikai rewe jeita chupe reta kuärái: ‘Piyerowa jare piyeyapikatu

yandeYa kotì, echa'ä koiñoete ma oï iwäe ara,' jeita chupe reta.' Jukuärái Isaías arakae uikuatía cheré," jei Juan chupe reta.

<sup>24</sup>Amokue jokua yuweru wae reta fariseo reta ko.

<sup>25</sup>Jare jae reta upirandu Juan pe: "Nde jae'ä ko yawe Cristo jare Elías jare Tumpa ñnee umimbeu wae outa oï wae, jayawe ¿kía pa ko umee ndewe mbaepuere ndepurumbisakambu waerä i pe?" jei reta chupe.

<sup>26</sup>Jayawe Juan jei chupe reta: "Che apurumbisakambuño ko aï i pe. Erëi yandepite pe oï añawe pëti wae pe reta pikuaa'ä peï kía ko jae wae.

<sup>27</sup>Jae ko jokua outa iko cheraikue rupi wae. Jae ko imbaepuerete ye chewi. Jare che jupi'ä etei ko ipipasa ìcha yepe ayora waeräwe," jei chupe reta.

<sup>28</sup>Opaete kua mbaembae uyeyapo kiape Juan upurumbisakambu iko tëta wasu rai Betábara jee wae wi koiño. Jokua tëta wasu rai oï i wasu Jordán jee wae jowaicho pe.

### Juan uikuaaka Jesús ko jae Tumpa Tai wae

<sup>29</sup>Piarewe pe Juan uecha Jesús ou oï ikoti, jare jei joko pe ñonoï wae reta pe: "Mase, pee oï Tumpa ombou wae," jei. "Jae ko pëti owecha kuimbae yaraa yayuka ñamee Tumpa pe wae rami. Echa'ä Tumpa ombou umano waerä yanderé, jae rupi umbái waerä teko ñanoi Tumpa kotì wae. Jae ko opaete iwi pewa reta pewarä tēi," jei.

<sup>30</sup>"Che jae ma pewe cheraikue rupi outa oï kuri chetenondewa. Jae imbaepuerete chewi, echa'ä chewi jae ikoño mái iko. Jukuärái che jae pewe, jare kua kuimbae ko jae," jei Juan chupe reta.

<sup>31</sup>"Tenonde yawe che awe aikuaa'ä aiko kía ko jae wae. Erëi ayu apurumbisakambu i pe aikuaaka waerä ñanerëtara Israel pewa reta pe," jei chupe reta.

<sup>32-34</sup>Jayawe Juan jei wi chupe reta: "Che awe aikuaa'ä aiko kía ko jae wae. Erëi jokua chembou apurumbisakambu waerä i pe wae jei chewe: 'Ndechata Espiritu Santo uweyi ou upita pëti kuimbae re. Jokua kuimbae ko jae oñonota jese wirowia wae reta iko waerä pëti ramiño jae ndiwe etei Espiritu Santo rupi,' jei chewe. Añawe che aecha ma Espiritu Santo uweyi ou ara wi pëti pikasu rami jare upita kua kuimbae re," jei. "Jáeramo añawe che amimbeu aï pewe kua kuimbae ko jae Tumpa Tai," jei chupe reta. Jukuärái Juan uikuaaka Israel pewa reta pe Jesús.

### Jesús umbipi ueni jemimboe retarä

<sup>35</sup>Piarewe pe Juan joko pe oï yewi mokui jemimboe ndiwe.

<sup>36</sup>Jayawe Jesús uasa jokoropi ou. Jare Juan umae ngatu jese jare jei ye: "Mase, pea kuimbae Tumpa ombou umano waerä yanderé pëti owecha yayuka ñamee Tumpa pe wae rami," jei chupe reta.

- <sup>37</sup>Jayawe kua uyandu yawe, jokua mokui Juan jemimboe reta yuraa Jesús jaikue.
- <sup>38</sup>Jare Jesús uyerowa umae jare uecha reta yuweru ñonoï ikoti wae. “¿Mbae pa peka peï?” jei chupe reta. “Rabí,” jei reta chupe. (Kua uipota jei jae reta iñee pe, ‘oporomboe wae.’) “¿Kiape pa ndepita neï?” jei reta chupe.
- <sup>39</sup>Jayawe Jesús jei: “Peyu pikuaa,” jei chupe reta. Jayawe jae reta yuraa uikuaa waerä kiape Jesús upita iko wae. Jare kaaruete ma iko; jayawe upita reta Jesús ndiwe pïtu rewa.
- <sup>40</sup>Jokua mokui uyandu Juan mbae jei Jesús rewa wae jare uwata Jesús jupie wae, pëti wae jee Andrés. Jae ko Simón Pedro tiwi.
- <sup>41</sup>Joko wi jawoi pewa Andrés oo ueka tikei Simón. Jare uwäe chupe yawe, jei chupe: “Ore nduecha wite ma jokua yae chupe Mesías wae,” jei chupe. (Kua ñee Mesías uipota jei ‘Cristo’ jae reta iñee pe.)
- <sup>42</sup>Jayawe Andrés ueru Simón Jesús oï wae pe. Jayawe yuraa ma uwäe reta yawe Jesús oï wae pe, Jesús umae ngatu Simón re jare jei chupe: “Che ndukuaa. Nde ko Jonás tai Simón. Añawe wiwe che numbijeeta wi Cefas,” jei chupe. (Kua tee ko jee Pedro yande yae chupe wae.)

### **Jesús ueni Felipe jare Natanael yureko waerä jemimboerä**

- <sup>43</sup>Piarewe pe Jesús uipota oo iwï Galilea koti. Jare uwata iko rambuewe, oñowäiti pëti kuimbae Felipe jee wae ndiwe jare jei chupe: “Eyu che ndiwe ndiko waerä cheremimboerä,” jei chupe.
- <sup>44</sup>Kua Felipe tëta wasu Betsaida pewa ko. Andrés jare Pedro jae nunga wi Betsaida pewa ko.
- <sup>45</sup>Jayawe Felipe oo ueka kuimbae Natanael jee wae – jae ko Felipe ïru. Jare uwäe chupe yawe, Felipe jei Natanael pe: “Nde ndikuaa Moisés jare ïru Tumpa iñee arakae umimbeu wae reta uikuatía wae, kërái outa oï Upuruepi wae. Añawe ore nduikuaa ma jae. Jae yepe José tai Jesús jee wae tëta wasu Nazaret pewa,” jei chupe.
- <sup>46</sup>Jayawe Natanael jei chupe: “¿Ipuere yerá mbae ikawi wae uyekuaa Nazaret wi?” jei chupe. “Ya emae jese,” jei Felipe. Jayawe yuraa uwäe reta Jesús oï wae pe.
- <sup>47</sup>Jayawe Jesús uecha Natanael ou oï ikoti yawe, jei: “Mase, ko ou pëti kuimbae Israel pewa ikawi wae, upurumbitawi'ä etei wae,” jei.
- <sup>48</sup>Jare Natanael jei chupe: “¿Kërái pa nde chekuaa?” jei chupe. Jayawe Jesús jei chupe: “Ndei Felipe nereni mbowe, che aikuaa iwa íwi pe nde ndewapi ndiko wae,” jei chupe.
- <sup>49</sup>“Oporomboe wae,” jei Natanael, “añawe aikuaa nde ko jae Tumpa Tai. Nde ko jae oremburuwicha wasurä ndikota wae,” jei chupe.

<sup>50</sup>Jare Jesús jei chupe: “¿Jaeño ra nderowia cheré che aikuaa nde ndiko iwa íwi pe jae ndewe ramo? Cherechata mbaembae tuichaete ayapota aï wae,” jei chupe.

<sup>51</sup>Joko wi Jesús jei Felipe jare Natanael pe: “Che tae pewe añetete wae, pechata ara uyepea oï kërái yanderamikue Jacob uecha ipau pe wae rami. Jare pechata wi Tumpa iaraiwa reta uyupi ñonoï jare uweyi ñonoï che kuimbaerä ayeyapo wae rupi,” jei chupe reta.

## Juan 2

### Jesús uyapo i vinorä

<sup>1</sup>Joko wi mbapi ara pe ime iko pëti umenda oï wae iwi Galilea pe tëta wasu rai Caná jee wae pe. Jare Jesús ichi oo wi joko pe.

<sup>2</sup>Jare uparea reta wi Jesús jare jemimboe reta pe.

<sup>3</sup>Jayawe joko pe opaete wae ukaru yureko reta rambuewe, opa chuwi reta vino. Jare Jesús ichi ou jei Jesús pe: “Opa ma vino,” jei chupe.

<sup>4</sup>Jayawe Jesús jei ichi pe: “Chesi mii, kua jae’ä ko mbae re yayembipia’ä jese waerä. Ndei witeño ko uwäe ara ayapo waerä cheparawiki,” jei chupe.

<sup>5</sup>Jayawe Jesús ichi jei amokue uyeyokui wae reta pe: “Piyapo opaete mbae chemembi jeita pewe wae,” jei chupe reta.

<sup>6</sup>Joko pe ñonoï owa iru wasu ita pewa. Judío reta umbiru i jokua nunga iru wasu reta pe uyepoe reta waerä pipe jare oyoe reta waerä pipe wi iru mbaembae Moisés arakae uikuatía wae rupi. Pëti pëti jokua iru wasu reta uepiti pëti chiëto litro rupi.

<sup>7</sup>Jayawe Jesús jei uyeyokui wae reta pe: “Pemitinee kua iru reta,” jei chupe reta. Jayawe umitineeasi reta.

<sup>8</sup>Joko wi Jesús jei chupe reta: “Añawe peki michi jare peraa petenondewa pe,” jei. Jayawe jukuärái uyapo reta.

<sup>9</sup>Kua i iru reta pe oï wae Jesús uyapo vinorä. Jare uyeyokui wae reta itenondewa omboporowa yawe, jëete chupe. Jae uikuaa’ä iko keti wi ra ou jokua vino, erëi iru uyeyokui wae reta uikuaa kawi. Jayawe uyeyokui wae reta itenondewa uenika kuimbae umenda oï wae jare jei chupe:

<sup>10</sup>“Opaete wae reta uyepokuaa tenonde upuruminguo vino ikawiete wae pe. Jare joko wi, jeta ma ukau reta yawe ramo umee chupe reta vino ikawi nunga’ä wae, echa’ä uikuaa’ä reta kërái ko ambie ye oï wae. Erëi nde añawe ramo nenoe vino ikawiete wae,” jei chupe.

<sup>11</sup>Jesús kua uyapo iwi Galilea pe tëta wasu rai Caná pe. Jare jokua ko jae jaeramo etei Jesús mbae uyapo kiawe ipuere’ä uyapo wae. Jukuärái umbipi uechaka jae imbaepuere tuicha wae. Jare jokua jae uyapo wae jeko pewa jemimboe reta wirowia jese.

<sup>12</sup>Kua jaikue rupi Jesús oo tēta wasu Capernaum pe. Jare yuraa wi jae ndiwe ichi, jare tiwi reta, jare jemimboe reta wi. Jare upita reta joko pe mbowi ara rupi.

### **Jesús umbietete ye tupao wasu**

<sup>13</sup>Jare koiño ma ou pascua iara reta. Jayawe Jesús jare jemimboe reta ndiwe yuraa tēta wasu Jerusalén pe tupao wasu pe.

<sup>14</sup>Jare Jesús uecha tupao wasu joka pe jeta wae reta owaka ñonoï waka reta, jare owecha reta, jare pikasu reta wi. Jare joko pe ñonoï wi iwi ambie wi korepoti ueru wae reta uipepika wae uwapi ñonoï imesa reta pe.

<sup>15</sup>Jayawe kua mbaembae reta Jesús uecha yawe, pochi. Jáeramo uyapo iyupe chikote, jare jokua pipe omoë omombo tupao wasu joka wi opaete mbaemimba owaka wae reta jimba reta ndiwe. Jare jokua korepoti uipepika wae imesa reta opa umbiyapara wiraa chuwi reta. Jare jukuärái opa upiyere korepoti iwi re.

<sup>16</sup>Jare Jesús jei pochi rewe pikasu owaka wae reta pe: “¡Pemoë kua wi kua mbaembae reta! Awiye cheRu jēta piyapo mercadorä,” jei chupe reta.

<sup>17</sup>Jayawe Jesús jemimboe reta imandúa uyekuatiaño mái iko Tumpa iñeeriru pe kuärái: “Ambietete ye aï nerēta. Jukuärái nerēta ambiete rewe amanota aï.” Jukuärái uyekuatía oï.

<sup>18</sup>Jayawe judío itenondewa reta yuweru jei Jesús pe: “Nde ndere kua tupao wasu pe ‘cheRu jēta.’ Jayawe añetete Tumpa nembou yawe ndiyapo waerä kua mbaembae, yaecha echaka orewe mbae tuicha wae kiawe ipuere’ä uyapo wae ore nduikuaa waerä,” jei reta chupe.

<sup>19</sup>Jayawe Jesús jei chupe reta: “Opa perukachi kua tupao, jare che amupüa yeta mbapi ara pe,” jei chupe reta.

<sup>20</sup>Jayawe jei reta Jesús pe: “Cuarenta y seis año ma uparawiki reta uyapo waerä kua tupao wasu. ¿Këraita pa nde nemupüa ye mbapi ara pe?” jei reta Jesús pe.

<sup>21</sup>Jukuärái jei reta, echa’ä uikuaa’ä yureko reta Jesús umbijaanga iko jete re wae.

<sup>22</sup>Jare taikue rupi, Jesús umano ma yawe jare ikowe ye ma ou yawe umanokue wae reta ipite wi, jemimboe reta imandúa kua jae jei wae re. Jare jayawe jeiete ma wirowia reta Jesús jei wae re jare Tumpa iñeeriru pe uyekuatiaño mái iko wae re – jae ko kiape uyekuatía oï Upuruepi wae ikowe yeta ou iko wae re.

### **Jesús uikuaa opaetei kërái ko jae reta wae**

<sup>23</sup>Jayawe Jesús upita Jerusalén pe umbiasa waerä pascua iara reta yemimandúa pewa. Jare jae joko pe oï rambuewe, uyapo mbaembae kiawe ipuere’ä uyapo wae uechaka waerä chupe reta Tumpa wi ou wae ko jae. Jáeramo jeta wae reta wirowia jese.

**24-25** Erëi Jesús wirowia katu'ä jese reta, echa'ä jae uikuaa kawi kërái ko jae reta. Kua ara ipuere wirowia reta, erëi kuriye ipuere wiriro reta. Añetete, jae ueka'ä kiawe umimbeu waerä chupe iwi pewa reta kërái ko jae reta wae.

## Juan 3

### Jesús omboe Nicodemo

- 1**Ime iko pëti fariseo Nicodemo jee wae. Jae ko pëti judío reta imburuwicha.
- 2**Pëti wese kua kuimbae ou Jesús oï wae pe pïtu yawe uyemingeta waerä jae ndiwe. Jare jei chupe: “Oporomboe wae, ore nduikuaa ko Tumpa nembou ndeporomboe waerä. Echa'ä nde ndiyapo neï mbaembae kiawe ipuere'ä uyapo wae. Erëi Tumpa nembori'ä yawe, ndarau etei ndepuere ndiyapo jokua nunga mbaembae,” jei chupe.
- 3**Jayawe Jesús jei chupe: “Pëti ara Tumpa ikota mburuwicha wasurä jaeño mái pewa kua iwi pe. Jare che tae ndewe añetete wae, ndarau kía ipuere oï jae ndiwe mbaeti oa piau ye yawe,” jei chupe.
- 4**Jayawe Nicodemo jei: “Ndarau kía ipuere uyapo jukuärái. Yandepuere'ä etei yaa piau ye yakuakuaa ma yawe. ¿Këraita pa yandepuere yaïke ye yandesi jie pe yaa piau ye waerä?” jei chupe.
- 5**Jayawe Jesús jei chupe: “Kua iwi pe opaete wae onoi tekowe ichi wi oa ma yawe. Erëi che tae ndewe añetete wae, kía mbaeti oa piau ye Espiritu Santo rupi wae, ndarau ipuere onoi Tumpa imburuwicha wasurä jaeño mái pewa.
- 6**Imeta ko onoi rani tekowe ipiau wae, jare jokua nunga tekowe jaeño ou Espiritu Santo rupi. Yandesi retaño mbaeti umee yandewe jokua nunga tekowe. Jae reta jaeño umee yandewe tekowe iwi pewaño,” jei chupe.
- 7**“Che amimbeu ma ndewe kërái pe reta imeta ko pea piau ye penoi waerä Tumpa pemburuwicha wasurä. Erëi awiye ndepiakañi kua re,” jei chupe.
- 8**“Yepe tëi yawái ndewe ndikuaa kawi waerä kua rewa, erëi jokua añetete ko. Jae ko iwitu rami. Añetete nde ndikuaa kawi'ä iwitu rewa. Ndikuaa kawi'ä keti wi ra ou wae jare keti ra oo wae. Erëi ndikuaa ko ime iwitu wae, echa'ä iwitu uyepeyu ipotawe rupi wi jare ndiyandu jïapu wae wi,” jei chupe. “Jukuäraiete wi ko kía oa Espiritu Santo rupi wae. Añetete ko uyeyapo jokua, yepe tëi ndikuaa kawi'ä jokua rewa,” jei chupe.
- 9**Nicodemo jekuaeño uikuaa kawi'ä jare jei Jesús pe: “¿Këraita ra uyeyapo jokua?” jei chupe.
- 10**Jayawe Jesús jei chupe: “Nde ko jae pëti oporomboe wae kua Israel pe, jare jeta ñanerëtara reta uyapisaka nderé. ¿Këraita pa jayawe nde ndikuaa kawi'ä kua rewa?” jei.<sup>11</sup>“Che tae ndewe añetete wae, kua mbaembae ore numimbeu pewe wae, jae ko mbaembae ore nduikuaa wae jare nduecha oreresa pe etei wae. Erëi pe fariseo piko wae reta orererowia'ä etei kua ore nduikuaaka pewe wae re,” jei chupe.

<sup>12</sup>“Ime ye ñru mbaembae ara pewa chepuere tēi aikuaaka pewe wae. Erēi pipota’ā yawe chererowia kua mbaembae iwī pewa ayemingeta wae, jayawe ǀkēraitā pa chererowia ayemingeta yawe mbaembae ara pewa re?”

<sup>13</sup>Jaeño che kuimbaerā ayeyapo wae chepuere chemiāri pewe kua mbaembae re, echa’ā cheeño ko ayu ara wi. Mbaetii kía uyupi oo ara pe,” jei chupe.

<sup>14</sup>“Yanemandúa kawī ñāi: Arakaete yanderamikue reta yureko yawe iwītini wasu rupi, Moisés oñono iwira re pēti mboiraanga jiero bronze pewa jare umbiyemboi oñono. Jare jukuārāi ipotawe kía mboi uichuu wae umae jese yawe, ukuera woi,” jei chupe. “Jae ramiño wi jokua mboiraanga rami, ñru wae reta cheñonota iwira re che kuimbaerā ayeyapo wae, jare chembiyemboita cheño.

<sup>15</sup>Kua imeta ko uyeyapo ipotawe kía wirowia cheré wae onoi waerā tekowe opa mbae wae.” Jukuārāi jei Jesús Nicodemo pe.

### **Kērāi Tumpa uauete iwī pewa reta**

<sup>16</sup>Tumpa uauete iwī pewa reta. Jáeramo umee Tai jae waeño wae, ipotawe kía wirowia jese wae onoi waerā tekowe opa mbae wae. Ndarau etei oo Tatawasurenda pe.

<sup>17</sup>Echa’ā Tumpa mbaeti ko ombou Tai kua iwī pe umbijeko waerā iwī pewa reta. Ombou ko uepi reta waerā.

<sup>18</sup>Jare opaete Tumpa Tai re wirowia wae reta, Tumpa mbaeti ma umbijeko reta. Erēi opaete Tai re wirowia’ā wae reta, Tumpa umbijeko ma reta, echa’ā jae reta wiriō Tumpa Tai jae waeño wae.

<sup>19</sup>Jare Tumpa jupi ko umbijeko reta waerā. Echa’ā Tai ou ma umbiembipe waerā iwī pewa reta ipia jae reta uikuaa waerā añetete wae Tumpa rewa. Erēi jeseuwe opaete seri uipotaete iko reta pītumimbi pe. Uipota’ā iko reta jokua tembipe pe, echa’ā uipota uyapo reta mbaembae ikawi mbae wae ramo.

<sup>20</sup>Jare jae reta oete ma uñamitāa jokua tembipe jare uipota’ā etei oya reta jese, echa’ā uipota’ā mbaembae kachi uyapo reta wae oē waerā ikatu pe.

<sup>21</sup>Erēi añetete pewa rupi yureko wae reta oya jokua tembipe re, echa’ā jae reta uipota uikuaaka opaete wae pe uyapo ko ñonoī Tumpa uipota wae.

### **Juan upurumbisakambu wae uñemimichi Jesús koti**

<sup>22</sup>Kua jaikue rupi Jesús oo jemimboe reta ndiwe iwī Judea jee wae pe jare upita reta joko pe. Jare yuweru jeta wae reta uyembisakambuka waerā i pe.

<sup>23</sup>Jae nunga wi ikotiā rupi Juan upurumbisakambu iko wi iwī Enón jee wae pe, echa’ā jokoropi tuicha i usiri oī. Joko wi koiño oī tēta wasu rai Salim jee wae. Jare jekuaekuae yuweru Juan oī wae pe jokua iwī pewa reta uyembisakambuka reta waerā i pe.

<sup>24</sup>Jukuārāi uasa ndei Juan oñono reta mbowe peresoriru pe.

<sup>25</sup>Jayawe pëti ara Juan jemimboe reta umbipi uyeaka iiru judío ndiwe kërái etei ipuere reta waerä uyeyoe Tumpa koti wae re.

<sup>26</sup>Jayawe yuraa reta Juan oi wae pe jare jei reta chupe: “Oporomboe wae, nde ndiko yawe i wasu Jordán jowaicho pe, ime iko wi nde ndiwe pëti kuimbae. Nde nemimbeu kawi orewe jae ko Tumpa Tai wae. Añawe jae upurumbisakambu oi wi i pe, jare opaete wae yuraa ñonoï jae oi wae pe,” jei reta chupe.

<sup>27</sup>Jayawe Juan jei chupe reta: “Jokua jaekawi oi. Tumpa ko ombou orewe kía kía kërái jae uipota wae rupi,” jei.

<sup>28</sup>“Jare wi pe reta pikuaa kawi peï che jae pewe wae, ‘Che jae’ä ko Cristo yande yae chupe wae. Jaeño ko Tumpa che rani chembou chuwi,’ jae ma pewe.

<sup>29</sup>Añetete jae ko pëti kuimbae umenda oi wae rami, jare che jaeño ko kuimbae umenda oi wae umiiru oi wae rami,” jei. “Kuñatái umenda oi wae ime pewaräño ko. Jare kuimbae umenda oi wae uyerowiaete oi jokua re. Jare umiiru oi wae uyerowia oi umiiru oi ramoño jare iñee re uyapisaka oi ramoño,” jei. “Jukuärái wi añawe che ayerowiaete ai yuraa ñonoï reta Jesús koti ramo.

<sup>30</sup>Añawe jae jupi ko uyembutuichaka oo waerä, jare che ikawi ko ayembiweyika a waerä.” Jukuärái Juan jei chupe reta.

### **Tumpa jekuaeño iarasi oi Jesús wiriö wae reta re**

<sup>31</sup>Jokua ara wi ou wae, jae imbaepuerete opaete wae wi. Yande parawete reta kua iwi pewa ko jare jaeño yayemingeta mbaembae iwi pewa reño. Erëi jukuärái’ä ko jae. Jae ko ara pewa.

<sup>32</sup>Jae uecha mbaembae ara pewa jare uyandu wi. Jáeramo jae uikuaaka kawi ma yandewe jokua mbaembae ara pewa re. Erëitu opaete seri wirowia’ä jae mbae umimbeu wae.

<sup>33-34</sup>Erëi Tumpa ko ombou jare umee chupe Espíritu Santo opaete imbaepuere rewe. Jáeramo jae jupi umimbeu Tumpa iñee. Jare ime yawe kía wirowia jae iñee re wae, uikuaa Tumpa iñee añetete yepe.

<sup>35</sup>YandeRu Tumpa uau Tai jare oñono opaete mbaembae ipo pe.

<sup>36</sup>Jare ipotawe kía Tumpa Tai re wirowia wae ime onoi tekowe opa mbae wae. Erëi Tumpa Tai re wirowia mbae wae ndarau onoi jokua tekowe, jare Tumpa iarasi jekuaeño oi jese.

## **Juan 4**

### **Jesús uyemingeta pëti kuña iwi Samaria pewa ndiwe**

<sup>1</sup>Pëti ara yandeYa Jesús pe jeräkua fariseo reta jei kuärái: “Jesús uyapo oi jetaete jemimboerä Juan wi jare umbisakambu reta oi i pe,” jei reta.

<sup>2</sup>(Erëi añetete Jesús etei mbaeti upurumbisakambu iko. Jemimboe retaño upurumbisakambu.)



<sup>3</sup>Jayawe kua uikuaa yawe, Jesús oë iwí Judea wi jemimboe reta ndiwe, jare yuraa ye iwí Galilea koti awiye waerä uyembowaicho fariseo reta ndiwe.

<sup>4</sup>Jare jokoti yuraa reta rambuewe, imeta ko uasa reta iwí Samaria rupi.

<sup>5</sup>Jokua iwí pe ime oï pëti tëta wasu rai Sicar jee wae. Jare joko wi koiño ime oï iwí Jacob arakae umee tai José pe wae.

<sup>6</sup>Jare jokua tëta wasu rai iyapi re ime oï pëti ikua kipe wae Jacob arakaete oyoo wae. Jayawe Jesús jare jemimboe reta ndiwe yuraa uwäe yawe joko pe, ara mbíteta ma iko. Jare Jesús ikandi, echa'ä uwata reta ma mbiri ramo. Jayawe Jesús uwapi jokua ikua iyipi mii pe uputuu.

<sup>7-8</sup>Jare Jesús uputuu iko rambuewe, jemimboe reta opa yuraa tëta wasu rai pe owa waerä jemiurä. Aramoño ou uwäe pëti kuña Samaria pewa i onoe waerä jokua ikua wi. Jare Jesús jei chupe: “Emee mii tau ndei,” jei chupe.

<sup>9</sup>Jayawe kuña ipiakani jare jei chupe: “Nde ko jae judío, jare che ko jae kuña Samaria pewa. ¿Maera pa nde ndiyemingeta nei che ndiwe jare ndeka nei chewe i?” jei chupe. Jukuärái jei kuña, echa'ä judío reta mbaeti etei ko uñemiiru Samaria pewa reta ndiwe.

<sup>10</sup>Jayawe Jesús jei chupe: “Nde ndikuaa'ä jokua mbae Tumpa uipota umee ndewe wae. Jare ndikuaa'ä wi kía ko che i aeka ai ndewe wae. Jokua ndikuaa yawe, nde ndekata tēi chewe i tekowe umee wae, jare che ameeta tēi ndewe,” jei chupe.

<sup>11</sup>“¿Këraita ra jokua?” jei kuña. “Nde mbaeti neni mbae pipe nenoe waerä i, jare kua ikua kipe oï. ¿Kiawi pa nde nderuta chewe jokua i tekowe umee wae?”

<sup>12</sup>Jare wi, ¿këraita pa nde ndepuere neme orewe i ikawiete wae kua i wi? Yanderamikue Jacob etei ko oyoo arakae kua ikua ueya orewe. Jare jae etei, jare tai reta, jare opaete jimba reta wi kua ikua wi jou i. ¿Nde yerá ndepuerete chuwi?” jei chupe.

<sup>13</sup>Jayawe Jesús jei chupe: “Opaete kua i jou wae reta iwe yeta ko,” jei.

<sup>14</sup>“Erēi ipotawe kía jou jokua i che ameeta chupe wae, ndarau etei ma iwe yewi. Echa'ä jokua i che ameeta chupe wae uyeyapota ipia pe pëti ikua iwororo jekuaeño oë wae rami, jare umeeta chupe tekowe opa mbae wae,” jei chupe.

<sup>15</sup>Jare kuña jei chupe: “Emee mii tau jokua i, awiye ye waerä cheiwe jare awiye ye waerä ayu kua pe anoe waerä i,” jei chupe.

<sup>16</sup>Jayawe Jesús jei chupe: “Eku neme eni, jare peyu mokui rewe kua pe,” jei chupe.

<sup>17</sup>“Che mbaeti ko cheme oï,” jei kuña. Jare Jesús jei chupe: “Jupi ko ndere mbaeti ko neme wae.

<sup>18</sup>Echa'ä pandepo ma nemekue, jare jokua kuimbae añawe neni wae, jokua jae'ä ko neme. Añetete wae ko nde ndere,” jei chupe.

- 19**Jare kuña jei chupe: “Añawe ramo che aikuaa nde yepe jae Tumpa nembou wae nemimbeu waerä jae iñee. Jayawe tapirandu ndewe mbae re,” jei.
- 20**Jayawe kuña upuwëe iwitu wasu re jare jei chupe: “Ore samaritano nduiko wae reta numbutuicha Tumpa jee pea iwitu wasu re, echa’ä oreramikue reta jukuärái uyapo ramo. Erëi pe judío piko wae reta pere Jerusalén peño ko jupi Tumpa jee uyembutuichaka waerä. ¿Kía nunga pa jei jupi wae?” jei kuña Jesús pe.
- 21**Jayawe Jesús jei chupe: “Iyapisaka cheré. Uwäeta ma ara awiye waerä peo pea iwitu wasu re pembutuicha waerä yandeRu jee. Jare peota’ä wi Jerusalén pe awe,” jei.
- 22**“Pe Samaria pewa piko wae reta pembutuicha tēi Tumpa jee, erëitu pikuaa’ä kërái ko jae wae. Erëi ore judiorä nduiko wae reta numbutuicha Tumpa jee nduikuaa rewe. Echa’ä ore rupi Tumpa uikuaaka oï tekowe opa mbae wae rewa,” jei.
- 23**“Erëi uwäeta ara – jae ko añawe etei – jokua añetete rewe Tumpa jee umbutuicha wae reta imeta onoi Tumpa iEspíritu ipia pe. Jare jae reta umbutuichata ñonoï Tumpa jee Tumpa iEspíritu rupi jare añetete wae rupi kawi. Jokua nunga reta ko yandeRu Tumpa ueka oï umbutuicha reta waerä jae jee.
- 24**Echa’ä Tumpa ko jae Espiritu. Jáeramo Tumpa jee umbutuicha wae reta tumbutuicha Tumpa iEspíritu rupi jare añetete wae rupi kawi,” jei chupe.
- 25**Jayawe kuña jei Jesús pe: “Che aikuaa jokua yae chupe Mesías wae outa oï – jae wi ko Cristo yae chupe wae. Jare jae ou yawe, umimbeuta oï yandewe opaete mbaembae rewa,” jei chupe.
- 26**Jare Jesús jei chupe: “Jae ko che ayemingeta aï nde ndiwe wae,” jei chupe.
- 27**Jesús kua jei oï yawe, yuweru ye uwäe jemimboe reta. Jae reta ipiakañi Jesús uyemingeta oï kuña ndiwe wae re, echa’ä ndarau etei jukuärái uyapo judío oporomboe wae reta. Erëi kía nungawe upirandu’ä chupe mbae ra uipota iko jare maera ra uyemingeta iko kuña ndiwe.
- 28**Jayawe kuña ueya iiru joko pe, jare oo ye tēta wasu rai pe umimbeu joko pewa reta pe. Jei chupe reta:
- 29**“Peyu pemaē pēti kuimbaē aikuaa mbae wae re. Jae umimbeu chewe opaete mbae tenonde yawe ayapo wae re. ¿Jae’ä ra ko Cristo yae chupe wae?” jei.
- 30**Jayawe opa oē yuweru reta tēta wasu rai wi Jesús oï wae pe.
- 31**Jokua kuña oo rambuewe, Jesús jemimboe reta jei chupe: “Oporomboe wae, ko oï tembiu. Ekaru,” jei reta chupe.
- 32**Jayawe Jesús jei: “Ime anoi cherembiu pe reta pikuaa mbae wae,” jei chupe reta.
- 33**Jayawe jemimboe reta upirandu iyupe: “¿Ueru ma ra kía mbae jou waerä?”

<sup>34</sup>Jare Jesús jei chupe reta: “Che ayapo yawe Tumpa chembou ayapo waerä wae, jokua ko jae tembiu rami chemaerä. Echa’ä ayerowiata äi opa ma ayapo yawe mbarawiki jae umee chewe wae,” jei chupe reta.

<sup>35</sup>“Jeta wae reta jei: ‘Ñamaeti ma. Añawe ñaärota irundi yasi yewi yambaewiro waerä,’ jei reta. Erëi che tae pewe: Mase, pemaie yandeyipi rupi. Jeta ma ñonoï reta wirowia waerä cheré. Jae reta ko jae koo pe awati opa ma yawiye kawi wae rami,” jei.

<sup>36</sup>“Jare ime yawe kía umimbeu kawi chupe reta Tumpa rewa wae, jae ko pëti umbaewiro wae rami. Jare Tumpa umiñatimata oï chupe ikawi wae iparawiki re. Echa’ä jae iparawiki rupi jeta wae reta onoita tekowe opa mbae wae. Jáeramo jokua umaeti rami wae reta jare umbaewiro rami wae reta uyerowiata päwe rewe,” jei chupe reta.

<sup>37</sup>“Pe pikuaa kërái jeta wae reta jei kuärái: ‘Pëti wae umaeti jare ñru wae umbaewiro,’ jei reta. Jare jukuäráita wi ko pemaerä.

<sup>38</sup>Echa’ä che pomondo äi pemaewiro waerä kiape mbaeti pemaeti wae pe. Ñru wae reta uparawiki ma täta, jare añawe pe reta piyekouta peï jae reta iparawiki re,” jei Jesús umbijaanga rewe jemimboe reta pe.

<sup>39-40</sup>Jayawe jokua tëta wasu rai pewa reta yuweru uwäe Jesús oï wae pe, jare umiñera reta Jesús upita waerä jae reta ndiwe. Jeta jae reta wirowia Jesús re jokua kuña umimbeu chupe reta wae jeko pewa. Echa’ä kuña jei ma chupe reta: “Yepe tëi che aikuaa’ä jokua kuimbae, erëi opaete ayapo wae jae umimbeu chewe,” jei. Jayawe Jesús upita jae reta ndiwe mokui ara pewa. Jae reta iwi Samaria pewa ko.

<sup>41</sup>Jayawe jokua mokui ara rupi Jesús umimbeu chupe reta Tumpa ñnee. Jare jukuärái jeta ye wirowia Jesús re.

<sup>42</sup>Jei reta kuña pe: “Añawe mbaeti ko nde nemimbeu orewe ramoño ndorowia noï jese. Añawe ore etei nduyapisaka ma jese. Jare añawe ore nduikuaa añetete yepe jae ko Upuruepi wae ou kua iwi pe wae,” jei reta kuña pe.

<sup>43</sup>Jayawe mokui ara ma uasa yawe, Jesús jare jemimboe reta ndiwe oë yuraa joko wi jare jekuaeño yuraa reta iwi Galilea koti.

<sup>44</sup>Jesús etei jei ma jemimboe reta pe: “Tumpa ñnee umimbeu wae oï yawe iwi kiape ukuakuaa wae pe, kiawe uipota’ä umaie jese,” jei chupe reta.

<sup>45</sup>Erëitu jae reta yuraa uwäe yawe Galilea pe, Galilea pewa reta umbiasa kawi Jesús. “Jaekawi ndeyu,” jei reta chupe. Erëi jaeño jukuärái uyapo reta, echa’ä jeta jae reta tenonde yawe uecha Jesús mbaembae uyapo wae Jerusalén pe pascua ara reta pe.

### **Jesús uminguera mburuwicha tai**

<sup>46</sup>Jayawe Jesús jare jemimboe reta ndiwe yuraa ye uwäe reta tëta wasu rai Caná pe, kiape tenonde yawe Jesús i uyapo vinorä wae pe. Joko wi koiño ime oï pëti tëta

wasu Capernaum jee wae. Jare Capernaum pe ime iko pëti mburuwicha tai imbaerasiete oï chuwi wae.

<sup>47</sup>Kua mburuwicha pe jeräkua Jesús ou ma ko uwäe Judea wi Galilea pe. Jayawe jae oo uwäe Jesús oï wae pe, jare uyerure chupe tai re kuärái: “Cheraí mii umanota ma oï chewi. Ya mii cherëta pe eminguera chewe,” jei chupe.

<sup>48</sup>Jayawe Jesús jei: “Mbaeti ayapo pewe yawe mbaembae kiawe ipuere’ä uyapo wae, ndarau etei ndipo perowia cheré,” jei.

<sup>49</sup>“Cherikei mii,” jei mburuwicha parawete, “ya miño cherëta pe ndei cheraí umano mbowe chewi,” jei chupe.

<sup>50</sup>Jayawe Jesús jei chupe: “Iñatima yeño nerëta pe. Nderai ukuera yeta oï,” jei chupe. Jayawe mburuwicha wirowia Jesús jei chupe wae re jare oo ye jëta koti.

<sup>51</sup>Jare piarewe pe, jëta koti oo ye iko rambuwe, yuweru owäiti uyeyokui chupe wae reta jare jei reta chupe: “¡Nderai ukuera ye ma!” jei reta chupe.

<sup>52</sup>Jayawe mburuwicha upirandu chupe reta: “¿Mbae nunga ora pe pa umbipi ukuera ye?” jei chupe reta. “Káarumo una rupi umbipi jaku upita chuwi,” jei reta chupe.

<sup>53</sup>Jare kunumi tu uikuaa jokua ora pe etei yepe Jesús jei chupe, “Nderai ukuera yeta oï.” Jayawe jokua mburuwicha jare opaete jëta pewa reta ndiwe wirowia Jesús re.

<sup>54</sup>Jukuärái Jesús uyapo mbae kiawe ipuere’ä uyapo wae uikuaaka waerä chupe reta jae Tumpa wi etei ko ou wae. Mokuï wese ma ko Jesús uyapo jokua nunga mbae jae ou yawe Judea wi Galilea pe.

## Juan 5

### Jesús uminguera pëti kuimbae ipuere mbae uwata wae

<sup>1</sup>Kua jaikue rupi judío reta uyemimandúa yureko Jerusalén pe pëti ara ikawi wae re Tumpa pewartä. Jare Jesús oo wi jokoti.

<sup>2</sup>Jare ime oï Jerusalén pe öke Owecharöke jee wae iyipi pe pëti i jiru tuicha wae. Kua i jiru jee Betesda judío reta iñee pe. Jare ime pandepo korero reta kua i jiru iyipi rupi.

<sup>3</sup>Jokua korero rupi uyapakua yureko jeta imbaerasi wae reta – jae ko jesa mbae wae reta, jare ipuere mbae uwata wae reta, jare ipuere mbae omi wae reta wi. Opaete kua reta uäro yureko i omi waerä.

<sup>4</sup>Echa’ä jae reta wirowia amo amo pe uweyi pëti araiwa omoomi waerä i. Jare i omi yawe, jokua imbaerasi wae tenondete uike jokua i pe wae ukuerata ipotawe mbaerasi wi.

<sup>5</sup>Jare imbaerasi wae reta ipite pe oï pëti kuimbae treinta y ocho año ma ipuere mbae uwata wae.

<sup>6</sup>Jayawe Jesús uasa jokoropi jare uecha jokua kuimbae uyapakua oï parawete joko pe. Jare jae uikuaa imaete ma ko jokua kuimbae uwata'ä. Jayawe upirandu chupe: “¿Ndipota pa ndekuera?” jei chupe.

<sup>7</sup>“Aipota tēi,” jei parawete, “erēi mbaeti kía chemiinge waerä i pe i omi yawe. Yepe tēi che añapañere a parawete, erēi jeseuwe imeñoi kía tenonde uike chewi wae,” jei chupe.

<sup>8</sup>Jayawe Jesús jei chupe: “Epüa. Eupi nderupa jare ewata,” jei chupe.

<sup>9</sup>Jare jupiwoiño kuimbae ukuera kaw! Jae upüa, jare upi jupa, jare uwata oo ye. Jokua ara ko jae mbutuu ara. <sup>10</sup>Jare amokue judío itenondewa reta uecha jokua kuimbae jupa upi wiraa oï, jare jei reta chupe: “Kua ara mbutuu ara ko. Moisés arakae uikuatía wae rupi yaikuaa jupi'ä ko kía wiraa waerä jupa ara mbutuu pe,” jei reta chupe.

<sup>11</sup>Jayawe kuimbae jei chupe reta: “Jokua kuimbae cheminguera wae ko jei chewe cherupa aupi waerä jare awata waerä,” jei chupe reta.

<sup>12</sup>Jayawe upirandu reta chupe: “¿Kía pochi jukuärái jei ndewe?” jei reta chupe.

<sup>13</sup>Erēi kuimbae ukuera wae uikuaa'ä kía nunga kuimbae etei ko jokua uminguera wae. Echa'ä jeta wae reta joko pe ñonoï jare Jesús oo ma jae reta ipite rupi.

<sup>14</sup>Jayawe ndei ima mbowe, Jesús owäiti ye jokua kuimbae tupao wasu joka pe jare jei chupe: “Mase, ndekuera ma ko. Añawe wiwe awiye iyawi Tumpa koti, awiye waerä oa ye nderé mbae ikawi mbaete wae,” jei chupe.

<sup>15</sup>Jayawe kuimbae oo umimbeu judío itenondewa reta pe Jesús ko uminguera wae. <sup>16</sup>Jáeramo judío itenondewa reta ueka kërái Jesús pe uiporaraká waerä jare uipota uyukaka reta wi, echa'ä Jesús uyapo iko kua nunga mbae mbutuu ara pe.

<sup>17</sup>Erēi Jesús ukiye'ä chuwi reta. Jae jei chupe reta: “CheRu jekuaeño uyapo oï mbarawiki ipiakawi pewa. Jare jukuärái che ayapo aï wi,” jei chupe reta.

<sup>18</sup>Jare Jesús kua jei yawe, jokua judío itenondewa reta jeiete uipota uyukaka. Echa'ä añawe Jesús mbaeti jaño uyawi jae reta jei wae mbutuu ara rewa. Añawe jae jei wi Tumpa etei ko jae Tu wae, jare jukuärái jae uyemboyowake iko Tumpa ndiwe. Jokua ko jae teko tuicha wae chupe reta pewartä.

### **Jesús ko jae tekowe iYa**

<sup>19</sup>Jayawe Jesús jei chupe reta: “Che tae pewe añetete wae, che Tumpa Tairä aï wae, cheiño chepuere'ä mbae ayapo. Jaeño mbae aecha cheRu uyapo wae chepuere ayapo. Jare jokua mbaembae cheRu uyapo wae, jokua etei che ayapo wi,” jei.

<sup>20</sup>“Jare jokua mbaembae che chepuere ayapo wi, echa'ä cheRu cherau che jae Tairä aï wae, jare jae uechaka ma chewe opaete mbaembae uyapo oï wae,” jei. “Erēi kua mbaembae pe reta cherecha ma ayapo wae, mbaeti ko mbae awe. Che ayapota aï wi mbaembae ikawiete ye wae cheRu jei wae rupi. Jare pe reta pepiakañita peï jese kuri,” jei.

21“CheRu Tumpa, jae ko tekowe iYa jare jae ipuere umbijekowe ye umanokue wae reta. Jare jukuärái wi che jae Tairä aï wae chepuere amee tekowe ipotawe kía aipota wae pe,” jei chupe reta.

22“Jare jokuaño’ä ko. Pe reta perowia tēi Tumpa jowai ko piyemboita peï ara taikuewa pe jae jei waerä pereko re. Erēi añetete cheRu jeita’ä mbae awe kía pe jeko rewa. Echa’ä cheRu umee ma chewe che jae Tairä aï wae pe che ayapo waerä jokua. Che ko jaeta aï opaete pēti pēti wae pe ime penoi tekowe opa mbae wae ani mbaeti penoi wae,” jei chupe reta.

23“Echa’ä cheRu uipota opaete wae reta uipiu waerä chewi, che jae Tairä aiko wae wi, kērái chuwi uipiu reta rami. Añetete ime yawe kía uipiu’ä chewi wae, cheRu wi ko uipiu’ä oï, echa’ä cheRu etei ko chembou,” jei chupe reta.

24“Che tae pewe añetete wae, ipotawe kía chiñee re uyapisaka wae jare chembou wae re wirowia wae, jae onoi tekowe opa mbae wae. Tenonde yawe oo iko Tatawasurenda koti, erēi añawe ime ma onoi tekowe opa mbae wae. Tumpa ndarau ma umbijeko,” jei chupe reta.

25“Che tae pewe añetete wae, kua iwi pewa reta umano wae echa ñonoï Tumpa wi. Erēi uwäeta ma ara jae reta uyandu waerä che Tumpa Tairä aiko wae chiñee. Añetete yepe añawe uwäe ma jokua ara. Jare jokua uyapisakata chiñee re wae reta onoita tekowe ipiau wae.

26Jukuäräita ko, echa’ä kērái cheRu ko jae tekowe iYa, jukuäräiete wi jae umee chewe che aï waerä tekowe iYarä.

27Jare wi cheRu umee ma chewe mbaepuere che jae waerä iwi pewa reta jeko re. Che ko jaeta opaete wae pe pēti pēti rupi: “Nde ndiporarata neï ndereko kachi re,” ani, “Nde nenoita tekowe opa mbae wae.” Jare jukuärái ko uñemee ma chewe mbaepuere ayapo waerä, echa’ä che ko jae jokua ‘uyeyapo kuimbaerä wae’ jei chupe reta wae,” jei.

28“Awīye pepiakañi kua che jae pewe wae re. Echa’ä uwäeta ara opaete umanokue wae reta uyandu waerä chiñee.

29Ikawi wae uyapo wae reta ikowe yeta onoi waerä tekowe opa mbae wae. Jare ikawi mbae wae uyapo wae reta ikowe yeta uiporara waerä jaeño mái pewa,” jei chupe reta.

### **Jesucristo rewa umimbeu wae reta**

30Jare Jesús jei wi judío itenondewa reta pe: “Cheño chepuere’ä mbae ayapo. Jayawe jokua ara che jae yawe iwi pewa reta jeko rewa, ayapota’ä aï cheño aipota wae rupi. CheRu ko jeita oï chewe mbae jae waerä. Jáeramo jupi ko jokua mbae che jaeta aï wae, echa’ä mbaetita ayemingeta aï che aipota waeño. Ayemingetata aï chembou wae uipota wae,” jei chupe reta.

31“Jare mbaeti ko cheño ayembeu aï kuärái. Echa’ä jukuärái yawe, pepuereta tēi pere: “¿Kēräita ra yaikuaa jae uyemingeta wae añetete ko?”

- <sup>32</sup>Erëi ime ìru wae umimbeu oï wi che rewa. Jae ko Juan. Jare che aikuaa jokua jae umimbeu pewe wae añetete ko,” jei chupe reta.
- <sup>33</sup>“Pe reta etei pemondo kuimbae reta Juan oï wae pe pikuaa waerä che rewa. Jare Juan umimbeu chupe reta wae añetete ko.
- <sup>34</sup>Che aeka’ä kiawe umimbeu waerä che rewa. Erëitu kua re pumimandúa aï aramoi pe reta perowia waerä Juan jei wae re, jare jukuärái Tumpa perepi waerä teko penoi wae wi,” jei chupe reta.
- <sup>35</sup>“Juan ikose pëti mechero jendi jare umbiembipe iko wae rami. Jare pe reta michi pewa miño pipota piyerowia piko jae ñee re.
- <sup>36</sup>Erëi añawe ime ye mbae uikuaaka pewe waerä kía ko che wae. Jare jokua ikawiete Juan umimbeu pewe wae wi. Jae ko kua mbaembae ayapo aï wae. CheRu etei umee chewe kua mbarawiki ayapo waerä, jare kua mbaembae reta etei uikuaaka pewe cheRu ko chembou wae,” jei chupe reta.
- <sup>37</sup>“Jare jokuaño’ä ko. CheRu chembou wae, jae etei ko uikuaaka pewe kía ko che wae. Erëi pe reta pecha’ä etei, jare ñee piyandu’ä etei wi.
- <sup>38</sup>Jare pe reta añetete perïro ma jae ñee, echa’ä yepe tëi jae etei ko chembou wae, erëi pe reta chererowia’ä,” jei chupe reta.
- <sup>39</sup>“Pe reta peratangätu peï piyemboe waerä Tumpa ñee re, echa’ä perowia peï jokoropi ko pikuaata tekowe opa mbae wae penoi waerä. Jokua jaekawi tëi ko, echa’ä Tumpa ñee pe cheré ko umimbeu oï.
- <sup>40</sup>Erëi pe reta pipota’ä etei peyu chekoti penoi waerä tekowe opa mbae wae,” jei chupe reta.
- <sup>41</sup>“Chemaerä, mbae’ä ko kía reta chembutuicha waerä.
- <sup>42</sup>Erëi jukuärái’ä ko pe reta. Che pukuaa kía nunga kuimbae reta ko pe reta wae. Aikuaa pe reta mbaeti ko peau Tumpa pepia pe añetete rewe,” jei.
- <sup>43</sup>“Che ayu ko cheRu jee re, erëitu pe reta chererïro peï. Erëi jekuaeño pembiasa kawi ipotawe kía jaei uipotata ramoño ou wae,” jei.
- <sup>44</sup>“Pe reta pipotaete pe yepái piyembutuichaka waerä. Erëi peka’ä peï Tumpa pembutuichaka waerä. Jare jukuärái yawe, ¿këraita pa pepuere perowia cheré? Ndarau piyapo,” jei chupe reta.
- <sup>45</sup>“Añetete pe reta ime penoi teko cheRu jowai, erëi che ndarau pumbijeko waerä. Moisés etei ko pembijekota oï,” jei. “Pe reta pere tëi: ‘Ore nduyapo kawi Moisés uikuatía wae rupi. Jáeramo ikawita oï orewe,’ pere tëi.
- <sup>46</sup>Erëi Moisés uikuatía wae perowia yawe añetete rewe, chererowiata tëi ko. Echa’ä Moisés uikuatía wae cheré ko umimbeu.
- <sup>47</sup>Erëi perowia’ä Moisés uikuatía wae ramo, ndarau wi perowia chiñee re.” Jukuärái jei Jesús judío itenondewa reta pe.

## Juan 6

### Jesús umingaru jeta wae reta Tumpa imbaepuere rupi

(Mateo 14.13-21; Marcos 6.30-44; Lucas 9.10-17)

- <sup>1</sup>Kua jaikue rupi Jesús jare jemimboe reta ndiwe yuraa uwäe reta ipa wasu Galilea jowaicho pe. Jokua ipa wasu jee wi Tiberias.
- <sup>2</sup>Jare jeta wae reta yuraa jaikue, echa'ä uecha reta kërái Jesús uminguera imbaerasi wae reta imbaepuere rupiño. Jukuärái Jesús uyapo uechaka waerä chupe reta Tumpa wi ou wae ko jae.
- <sup>3</sup>Jare yuraa ma uwäe reta yawe, uyupi reta pëti iwitu re jare Jesús uwapi joko pe jemimboe reta ndiwe.
- <sup>4</sup>Jokua ara reta rupi koiño ma ou judío reta uyemimandúa waerä pascua ara reta re.
- <sup>5</sup>Jare Jesús uecha jeta wae reta yuweru ñonoï ikoti. Jayawe upirandu jemimboe Felipe pe: “¿Kiawi pa yawata tembiu yamingaru waerä kua jeta wae reta?” jei chupe.
- <sup>6</sup>Erëi añetete Jesús uikuaa ma iko mbae uyapota oï wae. Jaeño upirandu Felipe pe uikuaa waerä Felipe wirowiata ra oï jese.
- <sup>7</sup>Jayawe Felipe jei chupe: “Kua jepiete oïta yandewe. Mokui chiëto ara mbarawiki jepi pewa awe ndarau uepiti chupe reta jou waerä michi yepe,” jei chupe.
- <sup>8</sup>Jare pëti Jesús jemimboe Andrés jee wae – jae ko Simón Pedro tiwi – jei Jesús pe:
- <sup>9</sup>“Ime kua pe oï pëti kunumi ime onoi pandepo mbiyape cebada pewa jare mokui pira chariki mii. Erëi jokua ndarau etei uepiti kua jeta wae reta pewarä,” jei chupe.
- <sup>10</sup>Jayawe Jesús jei jemimboe reta pe: “Pemimbeu chupe reta uwapi reta waerä,” jei. Jayawe opa uwapi reta, echa'ä ime iko jeta kapiichape jokoropi. Jare kuimbae retaño uyepapa pandepo miri rupi.
- <sup>11</sup>Jayawe Jesús uipisi jokua mbiyape jare umee yasurupái Tumpa pe jese. Joko wi jae umee jemimboe reta pe, jemimboe reta umee yuapi ye waerä uwapi ñonoï wae reta pe. Jae nunga wi pira chariki mii uyapo kërái mbiyape uyapo rami. Jare opaete wae reta ukaru jare opa ipunga reta. Jukuärái Jesús umbijeta mbiyape jare pira umingaru waerä jokua jeta wae reta.
- <sup>12</sup>Jare opa ma ipunga reta yawe, jeta mbiyape uñepisäakue jembire. Jayawe Jesús jei jemimboe reta pe: “Pembati mbiyape uñepisäakue jembire wae awiye waerä uyemombo,” jei chupe reta.
- <sup>13</sup>Jare jokua pandepo mbiyape wae wi jembirekue, jae reta umbati jare umitinee doce kanasta.
- <sup>14</sup>Jukuärái Jesús uyapo mbae kiawe ipuere'ä uyapo wae uechaka waerä chupe reta Tumpa wi ou wae ko jae. Jare joko pe ñonoï wae reta kua uecha yawe, jei reta



iyupe: “Kua kuimbae yepe jae Tumpa iñee umimbeu wae Moisés arakae jei Tumpa ombouta iko wae,” jei reta.

<sup>15</sup>Jare Jesús uikuaa chuwi reta jae reta uipota wíraa uyapo waerä imburuwicha wasurä jae uipota’ä rewe. Jáeramo oo chuwi reta iwítu wasu koti jaeño pe etei.

### **Jesús uwata i iáramo rupi**

*(Mateo 14.22-33; Marcos 6.45-52)*

<sup>16</sup>Jare pítu awe ma yawe, Jesús jemimboe reta uweyi yuraa ipa wasu pe.

<sup>17</sup>Jare joko pe uyupi reta chalana pe jare umbipi yuraa reta Capernaum koti. Pítumimbi ma iko, erëi Jesús ndeiño ou ye umiiru reta.

<sup>18</sup>Jare täta iwítu uyeyapo chupe reta jare i umbipi uyembiaparoaroa.

<sup>19</sup>Jare pandepo kilometro rupi ma uwata reta yawe, aramoíño uecha reta Jesús uwata ou oí i iáramo rupi jare oya katu ou oí chalana koti. Jayawe jemimboe reta ukiyete ye.

<sup>20</sup>Erëi Jesús jei chupe reta: “Che ko. Awiye pekiye,” jei chupe reta.

<sup>21</sup>Jayawe uyerowia rewe jae reta umbuyupi Jesús chalana pe. Jare jupiwoiño yuraa uwäe reta jokua iwi kiaepe jae reta yuraa ñonoí wae pe.

### **Jokua ukaru wae reta ueka Jesús**

<sup>22</sup>Piarewe pe jeta wae reta imeño upita ipa wasu jowaicho pe. Jare jae reta jei iyupe: “¿Mbae pipe ra Jesús oo? ¿Kërái ra oo yandewi?” jei reta. Jukuärái jei reta, echa’ä iruwe ara pe uecha reta pëtiño chalana joko pe oí, jare uikuaa reta Jesús jemimboe reta opa ma oë yuraa pipe. Erëi Jesús mbaeti oo jae reta ndiwe.

<sup>23</sup>Jayawe yuweru uwäe iru chalana reta tëta wasu Tiberias wi joko pe. Joko wi mbiri’ä iko iruwe ara pe ukaru reta wae – jae ko kiaepe jou reta mbiyape yandeYa umbijeta chupe reta wae umee yawe yasurupái Tumpa pe.

<sup>24</sup>Jayawe opaete wae uikuaa reta yawe Jesús jare jemimboe reta mbaeti yepe joko pe ñonoí, jayawe uyupi reta jokua chalana reta pe jare opa yuraa reta Capernaum koti ueka reta waerä Jesús.

### **Jesús ko jae mbiyape tekowe opa mbae wae umee wae rami**

<sup>25</sup>Jare yuraa ma ipa wasu jowaicho pe uwäe reta yawe, owäiti reta Jesús. Jare jei reta chupe: “Oporomboe wae, ¿kërái yawe pa ndeyu kua pe?” jei reta chupe.

<sup>26</sup>Jayawe Jesús jei chupe reta: “Che tae pewe añetete wae, che ayapo ma pewe mbaembae kiawe ipuere’ä uyapo wae pe reta pikuaa waerä tēi añetete kía ko che wae. Erëi jokua jeko pewa’ä ko pe reta chereka pei. Pe reta chereka pei jokua mbiyape pemingapii wae ramoño,” jei.

<sup>27</sup>“Erëi awiye peparawiki perembiurä imata’ä iko pewe wae reño. Peparawikita ko perembiurä opata mbae wae re – jokua ko jae tekowe opa mbae wae che kuimbaerä

ayeyapo wae chepuere amee pewe wae. Jare jukuärái chepuere ayapo, echa'ä cheRu Tumpa umee ma chewe mbaepuere jokua ayapo waerä," jei chupe reta.

<sup>28</sup>Jayawe upirandu reta Jesús pe: "¿Këraita pa mbarawiki Tumpa uipota ore nduyapo waerä tekowe opa mbae wae nonoi waerä?" jei reta.

<sup>29</sup>Jayawe Jesús jei chupe reta: "Perowia Tumpa ombou wae re – jae ko che. Kua ko jae mbarawiki Tumpa uipota piyapo waerä wae," jei chupe reta.

<sup>30-31</sup>Jare jei reta Jesús pe: "¿Mbae pa ndiyapota orewe nduecha waerä jare ndorowia waerä nderé? Nduipota ndiyapo waerä orewe mbae tuicha wae mbaeti kiawe ipuere uyapo wae," jei reta. "Arakaete Moisés umee yanderamikue reta pe maná jou reta waerä iwitini wasu rupi yureko reta rambuewe. Jukuärái ko jei Tumpa iñeeriru pe, echa'ä joko pe uyekuatía oĩ kuärái: 'Jae umee chupe reta mbiyape ara pewa jou reta waerä,' jei. Erëi nde, ¿mbae pa ndiyapota orewe ndorowia waerä nderé?" jei reta chupe.

<sup>32</sup>Jayawe Jesús jei chupe reta: "Che tae pewe añetete wae, Moisés jae'ä ko umee chupe reta mbiyape ara pewa. CheRu ko umee chupe reta. Jare añawe cheRu uipota umee oĩ pewe mbiyape añetete wae ara pewa.

<sup>33</sup>Jare mbiyape Tumpa añawe umee wae jae ko kua ou ara wi wae. Jae ko umee tekowe opa mbae wae iwi pewa reta pe," jei chupe reta umbijaanga rewe.

<sup>34</sup>"Orerikei," jei reta, "jekuaeño emee mii orewe jokua nunga mbiyape," jei reta.

<sup>35</sup>Jayawe Jesús jei chupe reta: "Che etei ko jae jokua mbiyape tekowe opa mbae wae umee wae," jei. "Ipotawe kía ou chekoti cheré wirowia rewe wae ndarau etei iyembai jare ndarau etei iwe wi," jei umbijaanga rewe.

<sup>36</sup>"Erëi pe reta ndarau piyekou jokua re, echa'ä yepe tēi pe reta cherecha peĩ, erëi perowia'ä cheré. Jukuärái che jae ma pewe.

<sup>37</sup>Erëitu opaete kía kía cheRu umee chewe wae reta yuweruta chekoti. Jare ipotawe kía chekoti ou wae ndaraúi amombo.

<sup>38</sup>Echa'ä jokua ko jae cheRu uipota wae. Jare jae chembou ara wi ayapo waerä jae jei wae. Ayu'ä ko ayapo waerä che jae waeño," jei chupe reta.

<sup>39</sup>"Jare cheRu uipota wae ko jae kua: Jae uipota che ayandareko kawi waerä jae umee chewe wae reta re. Ndarau pēti awe ukañi chewi. Jare cheRu uipota ambijekowe ye reta waerä umanokue wae reta ipite wi ara taikuewa pe," jei.

<sup>40</sup>"Jayawe opaete cheré wirowia wae reta onoita tekowe opa mbae wae. Jare jae reta che ambijekowe yeta aĩ kuri umanokue wae reta ipite wi ara taikuewa pe. Jokua ko jae cheRu uipota wae," jei Jesús chupe reta.

<sup>41</sup>Jayawe judío itenondewa reta umbipi uyemingetangeta wiari Jesús koti. Echa'ä chupe reta pewarä ikawi'ä Jesús jei yawe: "Che ko jae mbiyape ara wi ayu wae."

42Jeï reta iyupe: “¿Jae’ä yerá kua Jesús José tai? Echa’ä yaikuaa katu ko tu jare ichi wi. Jayawe, ¿kërái yerá añawe jae jei oï, ‘Che ayu ko ara wi’?” jei reta iyupe.

43Jayawe Jesús jei chupe reta: “Peya jokua piyemingeta peï wae,” jei.

44“CheRu ko chembou. Jare ipuere’ä kía ou chekoti cheRu umikirëi’ä yawe ou chekoti waerä. Jare jokua chekoti ou wae reta ambijekowe yeta aï kuri ara taikuewa pe,” jei chupe reta.

45“Pëti kuimbae Tumpa iñee arakae umimbeu wae uikuatía cheré wirowiata wae reta re kuärái: ‘Tumpa etei omboeta oï opaete jae reta.’ Jukuärái uyekuatía oï,” jei. “Jayawe opaete kía kía uyapisaka jare uyemboe cheRu re wae reta yuweruta chekoti,” jei chupe reta.

46“Kiawe uecha’ä etei cheRu. Jaeño che aecha, echa’ä chuwi ko ayu.

47Erëi yepe tëi kiawe uecha’ä etei cheRu, erëitu che tae pewe añetete wae, ipotawe kía wirowia cheré wae ime onoi tekowe opa mbae wae.

48Che ko jae mbiyape tekowe opa mbae wae amee wae,” jei Jesús chupe reta.

49“Pe reta pikuaa kawï peï peramikue reta jou maná jokua iwitini wasu rupi yureko reta yawe. Erëitu umanoñoi reta.

50Erëi kua mbiyape ara wi ou wae ikawiete ye ko. Echa’ä kía jou kua mbiyape wae, ikota jaeño mái pewa,” jei.

51“Jare che etei ko jae jokua mbiyape ara wi ayu wae tekowe opa mbae wae amee wae. Jare ipotawe kía kua mbiyape jou wae onoita tekowe opa mbae wae,” jei umbijaanga rewe. “Cherete etei ko jae jokua mbiyape. Jare che ameeta aï cherete opaete iwï pewa reta re opaete onoi waerä tëi tekowe ipiau wae,” jei Jesús chupe reta.

52Jayawe judío reta umbipi täta rupi uyeaka jae yepái Jesús jei wae re. “¿Këraita pa kua kuimbae umee yandewe jete yau waerä?” jei reta iyupe.

53Jayawe Jesús jei chupe reta umbijaanga rewe: “Che tae pewe añetete wae, che kuimbaerä ayeyapo wae, pe reta peu’ä yawe cherete jare cheruwi, ndarau penoi tekowe añetete pewa,” jei chupe reta.

54-56“Erëi ipotawe kía cherete jare cheruwi jou wae, jekuaeño che ndiwe oï, jare che ndarau etei asiri chuwi. Jokua nunga ime onoi tekowe opa mbae wae, jare che ambijekowe yeta aï kuri ara taikuewa pe. Jukuärái ko, echa’ä cherete jare cheruwi jae ko mbae yau wae jare añetete pewa,” jei chupe reta umbijaanga rewe.

57“CheRu ikoño mái wae chembou, jare che aiko jae imbaepuere rupi. Jae ramiño wi jokua cherete jou wae ikota che chembaepuere rupi,” jei chupe reta umbijaanga rewe.

58“Jayawe jukuärái ko kua mbiyape ara wi ou wae. Kua mbiyape jae’ä ko jokua peramikue reta jou wae rami. Echa’ä yepe tëi jokua mbiyape jae reta jou wae

ombori reta michi pewa, erëi jaikue rupi opañoi umano reta. Jare jokua mbiyape ipuere’ä umee chupe reta tekowe opa mbae wae. Erëi jukuärái’ä ko kua mbiyape che amee wae. Echa’ä ipotawe kía kua mbiyape jou wae onoita tekowe opa mbae wae,” jei Jesús chupe reta.

<sup>59</sup>Jukuärái oporomoe Jesús tupao pe tēta wasu Capernaum pe.

### Jeta uyapisaka iko jese wae reta ueya Jesús

<sup>60</sup>Kua uyandu reta yawe, jeta Jesús ndiwe uwata wae reta jei iyupe: “Kua jae jei wae yawaiete ko. ¿Kía ra jayawe ipuereta wirowia jese?” jei reta.

<sup>61</sup>Jesús uikuaa chuwi uyemingeta reta iko jese wae. Jayawe jei chupe reta: “¿Jayawe kua che jae pewe wae kachi pa oï pewe?” jei.

<sup>62</sup>“Jukuärái yawe, ¿këraita ra peï kuri jayawe che kuimbaerä ayeyapo wae cherecha ayupi ye a aï ara pe tenonde aiko wae pe? Che aikuaa aï pe reta pipota’ä jokua nunga Upuruepi wae,” jei chupe reta.

<sup>63</sup>“Jare jokua ara che a ye yawe, ¿këraita pa penoi tekowe opa mbae wae pe retaiño? Ndarau pepuere, echa’ä jaeño Tumpa iEspíritu umee kua nunga tekowe. Jare kua chiñee mii reta ou ko Espíritu Santo wi jare ueru tekowe opa mbae wae.

<sup>64</sup>Erëitu amokue pe reta perowia’ä cheré,” jei. Jukuärái Jesús jei chupe reta, echa’ä jae uikuaa iyipi wiwe kía nunga reta wirowiata’ä iko jese wae jare kía nunga umeeta iko jowaicho reta pe wae.

<sup>65</sup>Joko wi jei chupe reta: “Amokue pe reta perowia’ä cheré, jare jokua jeko pewa che jae ma pewe ipuere’ä kía ou chekoti cheRu mbaeti yawe umikirëi,” jei Jesús chupe reta.

<sup>66</sup>Joko wiwe jeta Jesús ndiwe uwata wae reta opa uñatima yewi jare uipota’ä ye ma uwata reta jae ndiwe.

<sup>67</sup>Jayawe Jesús upirandu jokua doce jemimboe reta pe: “¿Jare pe reta pipota wi peo ye chewi?” jei chupe reta.

<sup>68</sup>Jare Simón Pedro jei chupe: “¿OreYa, ¿kía re pa ndoota nduyemboya?” jei. “Ndeño ko nemimbeu kawi orewe tekowe opa mbae wae kërái nonoi waerä.

<sup>69</sup>Jare wi ore ndorowia ko nderé jare nduikuaa ndeño ko jae Tumpa Tai jupiete wae,” jei Pedro Jesús pe.

<sup>70</sup>Jayawe Jesús jei chupe reta: “Che etei ko puparawo pe doce wae reta. Erëitu ime pëti pepite pe aña pe uyeyokui oï wae,” jei.

<sup>71</sup>Jukuärái Jesús uyemingeta Simón Iscariote tai Judas jee wae re. Jae ko jokua doce wae reta wi pëti. Jare taikue rupi kua kuimbae umeeta wireko Jesús jowaicho reta pe.

## Juan 7

### Jesús tiwi reta wirowia'ä jese

- <sup>1</sup>Kua jaikue rupi Jesús jare jemimboe reta ndiwe yuraa tēta wasu reta rupi iwi Galilea pe. Jesús uipota'ä oo iwi Judea pe, echa'ä joko pe uipota judío itenondewa reta uyukaka ramo.
- <sup>2</sup>Jare koiñoete ma ou judío reta uyemimandúa waerä tabernáculos iara reta re.
- <sup>3</sup>Jayawe Jesús tiwi reta jei chupe: “Ekua iwi Judea pe nembiasa waerä tabernáculos iara reta. Echa'ä ikawi ko opaete nderupie uwatase wae reta uecha waerä mbaembae ndiyapo nei wae.
- <sup>4</sup>Nde ndikuaa kawi nei ime yawe kía uipota uñemieräkua wae, mbaeti mbae uyapo wiari. Jayawe yaecha ekua Jerusalén pe, jare joko pe iyapo opaete wae reta jowake kua nunga mbae ndiyapo nei wae,” jei reta chupe.
- <sup>5</sup>Kua jei Jesús tiwi reta, echa'ä wirowia'ä jese reta ramo.
- <sup>6</sup>Jayawe Jesús jei chupe reta: “Ndei ara uwäe jokuaerä. Erëi pe reta pepuere peo pekirëi wae rupi,
- <sup>7</sup>echa'ä mbaeti mbae re awe kua iwi pewa reta peamitää waerä,” jei. “Erëi jukuärái'ä ko che. Che kua iwi pewa reta cheamitää, echa'ä che amimbeu chupe reta mbae ikawi mbae wae uyapo reta ramo,” jei chupe reta.
- <sup>8</sup>“Pekua, pe reta, pembiasa waerä tabernáculos iara reta. Che ata'ä rani, echa'ä ndei ara uwäe che a waerä joko pe.” Jukuärái Jesús jei tiwi reta pe.
- <sup>9</sup>Jare jukuärái Jesús upitaño rani iwi Galilea pe.

### Tabernáculos iara reta pe Jesús oo oporomboe

- <sup>10</sup>Jayawe Jesús tiwi reta opa ma yuraa yawe Judea pe umbiasa waerä tabernáculos iara reta, Jesús oo wi jae reta jaikue. Erëi jae mbaeti umimbeu kía pe awe.
- <sup>11</sup>Jare Judea pe judío itenondewa reta ueka tēi yureko Jesús. “¿Kiape ra jokua kuimbae pochí oí?” jei reta iyupe.
- <sup>12</sup>Jare joko pe yuweru wae reta uyeaka wiari jae yepái Jesús re. Amokue wae reta jei: “Kuimbae jeko kawi wae ko jae.” Jare iiru wae reta jei: “Mbaeti ko. Jae ko upurumbitawi wae,” jei reta.
- <sup>13</sup>Erëi kía nungawe jae reta wae wi oë'ä Jesús ipepika pe, echa'ä ukiye reta itenondewa reta wi ramo.
- <sup>14</sup>Jare tabernáculos iara reta mbite ma uasa yawe, Jesús uike tupao wasu joka pe jare joko pe umbipi oporomboe.
- <sup>15</sup>Jare jokua judío itenondewa reta ipiakañi kua Jesús oporomboe wae re jare jei reta iyupe: “¿Kërái ra kua kuimbae pochí jeta uikuaa mbaembae kía omboe mbae rewe?” jei reta.

**16**Jayawe Jesús jei chupe reta: “Kua aporomboe aï wae, chiñee’ä ko. Jae ko jokua chembou wae iñee,” jei.

**17**“Erëi pe reta, ¿këraita ra pikuaa jokua che aporomboe wae ou ra ko chewiño ani ou ra Tumpa wi? Che tae pewe, tenonde imeta ko piñeño piyapo rani waerä Tumpa jei wae rupi. Jayawe ramo pikuaata che aporomboe wae ou ko Tumpa wi wae,” jei.

**18**“Kua che jae wae añetete ko. Chapu’ä etei ko aï pewe, echa’ä che aipota ambutuicha chembou wae jee. Erëi jukuäräi’ä ko jokua iñee rupii oporomboe wae reta. Jae reta jaeño uipota uyembutuichaka waerä,” jei chupe reta.

**19**“Jare pe reta, yepe tëi Moisés uikuaaka pewe Tumpa jei wae, erëi pëti awe pe reta piyapo’ä jae jei wae rupi. Jayawe ¿maera pa pipota cheyuka pei?” jei chupe reta.

**20**Jayawe jeta joko pe uyembati ñonoï wae reta jei: “¿Aña nemimbikere oï! ¿Kía pa uipota ndeyuka oï?” jei reta.

**21**Jare Jesús jei chupe reta: “Che aminguera pëti kuimbae mbutuu ara pe, jare jokua jaekawi’ä oï pewe. Pe reta pere: ‘Jae uparawiki oï ara mbutuu pe,’ pere.

**22**Erëi añetete pe reta peparawiki wi ara mbutuu pe pembicircuncida yawe pesambiai kuimbae reta. Echa’ä arakae Moisés jei tuyembicircuncidaka sambiai kuimbae reta juri ara ma onoi yawe. Jare jukuäräi pe reta piyapo, yepe tëi jokua juri ara amo pe ara mbutuu ko,” jei chupe reta. “Añetete kua teko yembicircuncidaka ou’ä Moisés wi. Kua teko ou Moisés tamikue reta wi,” jei.

**23**“Jayawe pe reta pipota’ä piyawï Moisés jei wae ramo, amo pe piyapo kua mbarawiki mii ara mbutuu pe. Jáeramo, ¿marái ramo jayawe pe reta pepochi pei chewe kua mbae ikawiete wae ayapo ara mbutuu pe ramo? Che aminguera pëti kuimbae opaetei jete, jare jokua mbarawiki ikawiete ye ko yembicircuncidaka wi,” jei.

**24**“Awiye pepurumbijeko wirae këräi mbae pecha wae rupiño. Pikuaa kawï ranita ko pepurumbijeko waerä,” jei Jesús chupe reta.

### **Upirandu iyupe reta: “¿Jae ra Upuruepi wae?”**

**25**Jayawe amokue Jerusalén pewa reta jei: “¿Jae’ä yerá kua kuimbae mburuwicha reta uipota tëi uyukaka ñonoï wae?”

**26**Añawe mase, ko kua pe jae uyemingeta oï opaete wae reta jowake. Jare kiawe jei’ä mbae chupe. Aramoi mburuwicha reta wirowia ma chawaa ñonoï jae ko Cristo yae chupe wae.

**27**Erëi ¿këraita ra jae Cristo? Yande yaikuaa kía pewa ko kua kuimbae wae. Erëi Cristo ou yawe, jukuäräi’ä oï. Ndarau kiawe uikuaa kía pewa ko jae wae,” jei tëi iyupe reta.

**28**Jesús imeño oporomboe iko tupao wasu joka pe. Jayawe jei usapikai rewe: “Añetete pe reta chekuaa ko, jare pikuaa tëi wi kía pewa ko che wae. Jare perowia

tēi wi che ayu ko aipota ramoño. Erēi jukuārai'ā ko. Tumpa añetete wae, jae ko chembou. Erēi pe reta pikuaa'ā jae.

<sup>29</sup>Erēi che aikuaa, echa'ā jae ko chembou jare che chuwi ko ayu," jei Jesús chupe reta.

<sup>30</sup>Jáeramo kua uyandu reta yawe, amokue wae reta uipota tēi uipisi Jesús. Erēi mbaeti kiawe ipuere uipisi, echa'ā ndei uwāe iko ara jae uyepisika waerā.

<sup>31</sup>Erēitu jeta joko pe ñonoī wae reta wirowia jese. "Jae ko aipo Cristo yae chupe wae," jei reta. "Mase kērái jeta mbaembae uyapo kiawe ipuere'ā uyapo wae. ¿Kía ye ra ipuereta uyapo mbaembae uasaete ye kua kuimbae wi? Kiawe," jei reta.

<sup>32</sup>Jare fariseo reta uikuaa jeta wae reta uyemingeta wiari yureko Jesús rewa kērái jae ko Cristo wae. Jayawe fariseo reta jare sacerdote itenondewa reta ndiwe ombou sindaro tupao wasu iyandarekoa reta uipisi waerā tēi Jesús.

<sup>33</sup>Jare Jesús jei opaete wae pe: "Mbaetita ima aī pe reta ndiwe. Joko wi imambaeño a yeta ma chembou wae pe.

<sup>34</sup>Jare pe reta cherekata tēi, erēi ndarau ma chewāe, echa'ā ndarau pepuere peo che ata aī wae pe," jei chupe reta.

<sup>35</sup>Jayawe judío itenondewa reta jei iyupe: "¿Ketī ra oota kua kuimbae yande awiye waerā ñawāe chupe? ¿Oota ra aramoi ambie iwī rupi kerupi rupi ñanerētara reta ñonoī wae rupi? ¿Oota ra oī jokoti omboe waerā judío mbae wae reta wi?

<sup>36</sup>¿Mbae ra jokua uipota jei yandewe jae jei yawe, 'Pe reta cherekata tēi, erēi ndarau ma chewāe, echa'ā ndarau pepuere peo che ata aī wae pe,' jei yandewe?" jei reta.

### **Espíritu Santo uñemeeta Cristo re wirowia wae reta pe**

<sup>37</sup>Jayawe uwāe tabernáculos iara reta iyapi pe. Jokua ara ikawiete ĩru ara reta wi chupe reta waerā. Jayawe Jesús uyemboi jare jei usapikai rewe: "Ime yawe kía ĩwe wae, tou chekoti tuyemingapi," jei.

<sup>38</sup>"Jare ime yawe kía cheré wirowia wae, ipia wi jeta i usirita tekowe umee wae. Echa'ā jukuārai uyekuatía oī Tumpa ñeeriru pe," jei chupe reta.

<sup>39</sup>Jesús kua jei yawe, uyemingeta iko umbijaanga rewe Espíritu Santo re – jae ko Tumpa umeeta iko opaete kía kía Jesús re wirowia wae reta pe wae. Jukuārai Jesús jei yawe, ndeiño uñemee chupe reta Espíritu Santo, echa'ā Jesús ndeiño oo ye ara pe ramo.

<sup>40</sup>Jayawe uyandu reta yawe kua ñee, amokue wae reta jei: "Añetete yepe kua kuimbae ñee Tumpa wi etei ko ou. Jae ko jokua arakae Moisés jei outa iko wae," jei reta.

<sup>41</sup>Jare iru wae reta jei: “Jae ko jokua yande yae chupe Cristo wae,” jei reta. Erëi amokue wae jei: “Ambie ko. Echa’ä Cristo mbaetita oa Galilea pe kua kuimbae rami.

<sup>42</sup>Echa’ä Tumpa iñeeriru pe uyekuatía oï Cristo ikota David iñemoñaá rupi jare oata tēta wasu rai Belén pe kiape David oa wae pe. Erëi kua kuimbae jukuäráí’ä oï,” jei reta tēi.

<sup>43</sup>Jayawe joko pe ñonoï wae reta uyeaka jae yepái Jesús rewa.

<sup>44</sup>Jare amokue wae uipota tēi uipisi Jesús, erëi kiawe uipisi’ä.

### **Opaete seri Judío itenondewa reta wirowia’ä etei Jesús re**

<sup>45</sup>Jayawe sindaro tupao wasu iyandarekoa reta yuraa ye jukuäráíño omondo wae reta pe – jae ko sacerdote itenondewa reta jare fariseo reta pe. Jare jokua ombou wae reta uecha yawe sindaro reta mbaeti ueru Jesús, jei chupe reta: “¿Maera pa pipisi’ä peru?” jei chupe reta.

<sup>46</sup>Jare sindaro reta jei: “Echa’ä mbaetii kiawe uyemingeta jokua kuimbae uyemingeta rami,” jei chupe reta.

<sup>47</sup>Jayawe fariseo reta jei: “¿Pe retawe opa ma piyembitawika wi?

<sup>48</sup>Ore fariseorä nduiko wae reta ndorowia’ä jese, jare jukuäráí wi ko iru mburuwicha reta.

<sup>49</sup>Jaeño Tumpa jei wae uikuaa mbae pochi reta ko wirowia ñonoï Jesús re. Tumpa uyepipeyu ma ko jese reta,” jei tēi fariseo reta.

<sup>50</sup>Jae reta ipite pe oï Nicodemo. Jae ko fariseo wi. Jare jae ko tenonde yawe oo opou Jesús ipi pītu yawe wae. Jayawe jae jei iru fariseo reta pe:

<sup>51</sup>“Yandereko rupi ime yawe kía yaipota yambijeko wae, tenonde imeta ko yande yayapisaka kawī jese. Jare jukuäráí yaikuaa kawita jae ime ra onoi mbae nunga teko wae,” jei tēi chupe reta.

<sup>52</sup>Erëi iru reta jei Nicodemo pe: “¿Nde yerá jae wi Galilea pewa? Yaecha iyemboe kawī jese. Tumpa pēti wese awe uiparawo’ä kía Galilea pewa jae iñee umimbeu waerä,” jei reta chupe.

<sup>53</sup>Jayawe pēti pēti wae opa ye yuraa reta jēta rupi.

## **Juan 8**

### **Jesús umikii judío itenondewa reta**

<sup>1</sup>Erëi Jesús oo Jerusalén wi ñaipe Olivorenda jee wae re umbiasa waerä pītu joko pe.

<sup>2</sup>Jare piarewe pe ndimboweasi jae oo ye tupao wasu joka pe. Jayawe jeta wae reta yuweru ikoti, jare jae uwapi jare umbipi omboe reta.



<sup>3</sup>Jayawe Moisés uikuatía wae re oporomböe wae reta jare fariseo reta ueru pëti kuña umbiyemboi oñono mbite pe. Jae ko pëti kuña uyepokouka awasa uyapo iko wae.

<sup>4</sup>“Oporomböe wae,” jei reta Jesús pe, “kua kuña uyepokouka awasa uyapo iko wae pe etei.

<sup>5</sup>Moisés arakae jei wae rupi imeta ko yayapi ita pe yayuka waerä kua nunga kuña. Jare nde, ¿mbae pa ndere kua kuña rewa?” jei reta Jesús pe.

<sup>6</sup>Kua jei reta Jesús pe, echa’ä ueka yureko tëi kërái uiti waerä Jesús iñee pei umbijeko reta waerä. Erëi Jesús jei’ä chupe reta mbae awe. Jaeño uwapichuku jare ipoäka pe umbipi uikuatía iwi re.

<sup>7</sup>Erëi jae reta jekuaeño upirandu chupe. Jayawe Jesús uyemboi jare jei chupe reta: “Kía pepite pe mbaeti etei teko onoi wae, jokua rani tuyapi ita pe,” jei.

<sup>8</sup>Jare kua jei ma yawe, Jesús uwapichuku ye jare jekuae uikuatía ye mbae iwi re.

<sup>9</sup>Erëi kua uyandu yawe jokua upurumbijeko wae reta, ipia umbijeko reta. Jayawe umbipi yuraa ye pëti pëti wae. Tenonde oo indechi wae reta, jare jaikue rupi oo ñru wae reta. Jare opa ma yuraa reta yawe, kuña upita jaeño pe etei Jesús ndiwe.

<sup>10</sup>Jayawe Jesús uyemboi ye jare jei kuña pe: “Cherindi, ¿kiape pa ñonoï jokua nembijeko reta wae?” jei chupe. “¿Mbaeti ma kiawe nembijeko wae?”

<sup>11</sup>Jayawe kuña jei: “Mbaeti ma kiawe,” jei parawete. Jayawe Jesús jei chupe: “Che jae nunga wi numbijeko’ä. Ekua jare awiye iñatima ye ndereko kachi pe,” jei chupe.

### **Jesús ko tembipe rami iwi pewa reta pe**

<sup>12</sup>Jayawe Jesús umbipi ye omböe joko pe ñonoï wae reta: “Che ko jae tembipe rami iwi pewa reta pe, echa’ä aikuaaka chupe reta añetete wae Tumpa rewa. Jare ipotawe kía che ndiwe oi wae ndarau ye ma iko pütumimbi pe rami. Echa’ä che amee chupe tekowe ipiau wae jare opa mbae wae, jare jokua ko tembipe rami chupe,” jei chupe reta.

<sup>13</sup>Jayawe amokue fariseo reta jei Jesús pe: “Jokua nde ndere neï wae, mbae’ä ko, echa’ä ndeei ndiyemingeta neï ramo,” jei reta chupe.

<sup>14</sup>Jayawe Jesús jei chupe reta: “Jukuärái tëi ko. Erëitu kua che jae chiyé wae añetete ko, echa’ä che aikuaa ko keti wi ayu wae jare keti a wae. Erëi pe reta pikuaa’ä jokua rewa. Jáeramo pepuere’ä pere chewe: ‘Nde ndere neï wae mbae’ä ko.’

<sup>15</sup>Pe reta pepurumbijeko kua iwi jeko rupiño. Erëi che ayu’ä ko ayapo waerä jukuärái.

<sup>16</sup>Erëitu aipota jae yawe kía jeko rewa, che ayapota jupi rupi kawi, echa’ä cheiño’ä ayapo ai. CheRu chembou wae jae che ndiwe oi. Jare che cheRu ndiwe ndupurumbijeko jupi rupi kawi,” jei chupe reta.

<sup>17</sup>“Pe reta imeta tēi ko chererowia, echa’ä pereko rupi etei mokui wae jei yawe mbae oyowakeño, perowiata ko iñee re,” jei chupe reta.

<sup>18</sup>“Añawe piyandu tēi ma che ayembeu pewe wae. Jare ime wi iiru jukuäraiete umimbeu oi che rewa. Jae ko cheRu chembou wae,” jei Jesús fariseo reta pe.

<sup>19</sup>Jayawe jae reta jei chupe: “¿Kiape pa oi nderu?” jei reta chupe. Jayawe Jesús jei: “Pe reta chekuaa’ä jare pikuaa’ä wi cheRu. Añetete pe chekuaa yawe, pikuaata tēi ko wi cheRu,” jei chupe reta.

<sup>20</sup>Jesús kua jei tupao wasu joka pe korepoti Tumpa pewarä uñemee wae jiru iyipi pe. Erēi yepe tēi jowaicho reta jowai iko, erēi jowaicho reta ndei uipisi, echa’ä ndei uwäe ara Tumpa uiparawo wae Jesús uyepisika waerä.

### **Jesús uyekuaaka chupe reta kía ko jae wae**

<sup>21</sup>Jare Jesús jei wi chupe reta: “Che a yeta ai pewi. Jare pe reta cherekata tēi. Erēi ndarau pepuere peo che ata ai wae pe, jare opata pmano pei teko penoi Tumpa koti wae uyembái mbae rewe,” jei chupe reta.

<sup>22</sup>Jayawe judío itenondewa reta jei iyupe: “¿Uyeyukata ra oi? Aramoi jokua jeko pewa jei yandewe, ‘Ndarau pepuere peo che ata ai wae pe,’ jei.” Jukuärái jei tēi iyupe reta.

<sup>23</sup>Jayawe Jesús jei chupe reta: “Pe reta ara pewa’ä ko. Erēi che ara pewa ko. Pe reta kua iwi pewa ko. Erēi che kua iwi pewa’ä ko.

<sup>24</sup>Che jae pewe pmanota pei teko penoi Tumpa koti wae uyembái mbae rewe. Echa’ä jukuärái uyeyapota oi pewe perowia’ä yawe cheré CHE KO CHE wae,” jei chupe reta.

<sup>25</sup>Jayawe jae reta jei chupe: “¿Kía pochi pa nde jukuärái ndiyemingeta waerä?” jei reta chupe. Jayawe Jesús jei chupe reta: “Che ko jae ayembeuñoi pewe wae,” jei chupe reta.

<sup>26</sup>“Añetete che ime jeta mbaembae re chepuere tēi jae pewe pumbijeko waerä. Erēitu che jaeño amimbeu iwi pewa reta pe jokua chembou wae jei chewe wae etei. Jare jae jekuaeño uyemingeta jupi rupi kawi,” jei chupe reta.

<sup>27</sup>Erēi jae reta uikuaa’ä Jesús uyemingeta iko chupe reta Tu ara pe oi wae rewa.

<sup>28</sup>Jáeramo Jesús jei wi chupe reta: “Che kuimbaerä ayeyapo wae, pe reta cheñonota pei kuri pēti kurusu re jare chembiyemboita cheñono pei opaete wae jowake. Jayawe ramo pikuaata pei kuri CHE KO CHE wae. Jare pikuaata pei wi cheiño’ä ko mbae ayapo wae. Jaeño ko cheRu jei chewe wae rupiño che jae pewe wi,” jei.

29“CheRu ko chembou jare jae oï che ndiwe. Jae chereya’ä etei, echa’ä che jekuaeño ayapo jae umbiyerowia wae,” jei chupe reta.

30Jare Jesús jukuärái jei yawe, jeta wae reta wirowia jese.

### **Jesús uikuaaka kërái yayembopoika waerä teko ñanoi wae wi**

31Jayawe Jesús jei jokua wirowia jese wae reta pe: “Pe reta jekuaeño piyapo yawe jokua che pomboe wae re, jayawe añetete rewe pikota cheremimboe retarä.

32Jare jukuärái pikuaata añetete wae, jare jokua pembopoikata oï,” jei chupe reta.

33Jayawe jae reta jei chupe: “Abraham iñemoña pewa ko ore. Mbaetii nduyeyokui täta rupi kía pe awe. Jáeramo, ¿maera pa nde ndere nei orewe nduyembopoikata noi wae?” jei reta chupe.

34Jayawe Jesús jei chupe reta: “Che tae pewe añetete wae, kía jekuaeño uyawi oï Tumpa koti wae, teko kachi ipionerä iko wae rami ko,” jei.

35“Jare kua pe ime ye oï mbae pikuaa waerä. Uyeyokui wae reta ndarau yureko tēta iya jētaraä etei. Erēi tai ko jae jētara jaeño mái pewa,” jei.

36“Jare tēta iya tai onoita mbaepuere ombopoika waerä uyeyokui wae reta. Jayawe che Tumpa Tairä aiko wae pombopoika yawe, añetete piyembopoikata ko,” jei Jesús chupe reta.

37“Che aikuaa Abraham iñemoña reta ko pe reta tēi. Erēi pemomoe’ä ko peï jae jeko, echa’ä pipota cheyuka peï. Jukuärái pe reta pipota piyapo peï, echa’ä perowia’ä chiñee re,” jei.

38“Kua che aikuaaka ai pewe wae, jae ko cheRu uechaka chewe wae. Erēitu pe reta piyapo peï peru jei waeño,” jei Jesús chupe reta.

39“Abraham ko jae orerukue,” jei reta chupe. Jayawe Jesús jei chupe reta: “Pe reta añetete Abraham tai yawe, jayawe pemomoeta tēi ko Abraham jeko.

40Erēi jukuärái’ä piyapo peï. Echa’ä añawe yepe tēi che aikuaaka ma pewe añetete wae Tumpa jei chewe wae, erēitu pe reta pipota cheyuka peï. Abraham uyapo’ä jokua nunga mbae.

41Jáeramo Abraham jae’ä ko perukue. Pe reta ime penoi ambie peru. Jare jokua peru jekoño pemomoe peï,” jei Jesús chupe reta. Jayawe jae reta jei: “¡Awasa rupi uyekuaa wae’ä ko ore reta! ¡Tumpaño ko jae oreru!” jei reta.

42Jayawe Jesús jei chupe reta: “Añetete Tumpa ko jae peRu yawe, jayawe pe reta cherauta tēi ko, echa’ä che ayu ko Tumpa wi. Tumpa etei ko chembou. Che ayu’ä ko che aipota ramoño,” jei chupe reta.

43“¿Maera pa pikuaa kawí’ä kua che aikuaaka pewe wae? Echa’ä pe reta pipota’ä piyapisaka peï chiñee re. Jáeramo jokua jeko pewa ko pe reta pikuaa’ä peï,” jei chupe reta.

44“‘Añawasu ko jae peru. Jare jokua mbaembae jae uipota uyapo wae, jokua nunga etei ko pe reta pipota piyapo pei wi. Añawasu iyipi wiwe upuruyuka wae ko. Jare jae opa ueya mbaembae jupi wae, echa’ä jae ko mbaembae kachi wae iya. Jare jae iyapu yawe, jae etei uyekuaaka oi, echa’ä jae ko iyapu wae jare jae etei ko apu iya,” jei chupe reta.

45“Erëi che, yepe tēi amimbeu ma pewe añetete wae, erëi pe reta pipota’ä chererowia.

46Pe reta imeta tēi ko chererowia, echa’ä che ayawi’ä etei Tumpa koti. Ani ¿ime ra pēti wae pe reta pepuere pechaka chewe kērāi ra ayawi Tumpa koti wae? Pēti awe ndarau ipuere. Jáeramo pepuere pikuaa che chapu’ä etei ko. Jayawe, ¿maera pa pe reta chererowia’ä?47Echa’ä pe reta Tumpa tai’ä ko. Jokua jeko pewa pipota’ä piyapisaka. Jaeño Tumpa tai reta uyapisaka Tumpa iñee re,” jei Jesús chupe reta.

### **Jesús jei jae ko Tumpa ikoño mái wae**

48Jayawe judío itenondewa reta jei chupe: “¡Añetete yepe! ¡Samaria pewa pochi ko nde, jare aña uyembiiya ma nderé!” jei reta chupe.

49“Jukuärāi’ä ko,” jei Jesús. “Mbaeti ko aña uyembiiya cheré, echa’ä che ambutuicha cheRu jee. Erëi pe reta piyapo’ä jokua, echa’ä yepe tēi cheRu chembou, erëi pe reta chereriro pei,” jei.

50“‘Añetete chemaerä che aipota’ä ayembutuicha. Erëi ime oi pēti wae uipota cheree uyembutuichaka waerä. Jae ko cheRu Tumpa. Jae uikuaakata chiñee añetete wae ko,” jei.

51“Che tae pewe añetete wae, kía chiñee uyapo wae ndarau umano,” jei chupe reta.

52Jayawe judío itenondewa reta jei Jesús pe: “¡Añawe ore nduikuaa kawī ma noi añā uyembiiya ma nderé! Echa’ä Abraham jare iru kuimbae reta Tumpa iñee arakae umimbeu wae, yepe tēi jae reta uyapo kawī Tumpa jei wae, jeseuwe opa umano reta. Jáeramo añawe, ¿kērāita pa nde ndere nei orewe, ‘Kía uyapo chiñee wae ndarau umano’?” jei reta chupe.

53“Jare nde ndiyererowia katu chwāa nei yanderamikue Abraham wi, echa’ä Abraham umano. Jare jukuärāi opa umano wi opaete Tumpa iñee arakae umimbeu wae reta. ¿Kía pochi ra nde jukuärāi ndiyemingeta waerä?” jei reta Jesús pe.

54Jayawe Jesús jei chupe reta: “Che ayembutuicha’ä ai cheiño. Echa’ä che ayembutuicha yawe cheiño, jokua mbae’ä etei ko. CheRu ko chembutuichaka oi. Jare jae ko pe reta ‘oreRu Tumpa’ pere tēi chupe wae.

55Erëitu pe reta pikuaa’ä Tumpa. Che aikuaa ko. Che jae yawe, ‘Aikuaa’ä,’ chaputa tēi ko pe reta papu rami. Erëi che aikuaa ko, jare ayapo ai jae jei wae rupi,” jei chupe reta.

<sup>56</sup>“Jare perukue Abraham arakaete uikuaa kawi iko che ayuta aiko wae jare jae uyerowiaete iko jokua re. Tumpa uechaka chupe chewäe ara jare jae ipiakatu iko jokua re,” jei Jesús chupe reta.

<sup>57</sup>Jayawe judío itenondewa reta jei chupe: “¿Këraita pa ndecha Abraham nde? Abraham ko jae arakaete iko wae, erëi nde ndei awe cincuenta año neni,” jei reta chupe.

<sup>58</sup>Jayawe Jesús jei chupe reta: “Che tae pewe añetete wae, Abraham ndei awe iko mbowe, CHE KO CHE,” jei chupe reta.

<sup>59</sup>Jare kua uyandu reta yawe, opaete wae reta pëti pëti wae upi ita uyapi uyuka waerä tëi Jesús. Erëitu jae ukañi chuwi reta jare oë oo tupao wasu wi jae reta ipite wi etei.

## Juan 9

### Jesús uminguera pëti kuimbae jesa mbae wae

<sup>1</sup>Jare Jesús uasa oo yawe, uecha pëti kuimbae jesa mbae ichi wi oa wiwe wae.

<sup>2</sup>Jayawe Jesús jemimboe reta upirandu chupe: “Oporomboe wae, ¿kía jeko pewa pa kua kuimbae oa ichi wi jesa mbae? ¿Tu jare ichi uyawi Tumpa koti jeko pewa ra, ani jae etei uyawi jeko pewa?” jei reta chupe.

<sup>3</sup>Jayawe Jesús jei chupe reta: “Tu jare ichi jeko pewa’ä ko, jare jae jeko pewa’ä wi. Jukuärái oa Tumpa imbaepuere uyekuaa jese waerä,” jei.

<sup>4</sup>“Kua mbae añawe ayapota äi wae, jae ko jokua chembou wae umee chewe mbarawiki ayapo waerä wae. Yande reta imeta ko yayekou kua ara re yayapo waerä kua nunga mbarawiki. Echa’ä añawe rupi ara reta yaparawiki waerä ko. Jae ko köe ma yawe rami. Erëi uwäeta ara kiawe ipuereta’ä uparawiki waerä. Jare jokua ara kaarueteta ma chupe warasi uike ma rami.

<sup>5</sup>Erëi añawe rupi ko äi kua iwi pe. Jare che ko jae tembipe rami iwi pewa reta pewarä,” jei chupe reta.

<sup>6</sup>Jare kua jei ma yawe, Jesús undiwi iwi re jare jokua jendiayi pipe uyapo tuñuu mii. Jare jokua tuñuu mii oñono kuimbae jesa re jare jei chupe:

<sup>7</sup>“Ekua i jiru tuicha wae Siloé jee wae pe iyoe nderesa,” jei chupe. Kua tee Siloé uipota jei judío reta iñee pe ‘uyemondo wae.’ Jayawe kuimbae oo i jiru pe oyoe jesa, jare oo ye jëta koti uecha kawi rewe.

<sup>8</sup>Jáeramo jae jëta iyipi rupiwa reta jare ñru wae reta tenonde yawe uecha korepoti re uyerure iko wae jei: “¿Jae’ä yerá kua kuimbae uwapi uyerurese korepoti re wae?” jei reta iyupe.

<sup>9</sup>Amokue wae jei: “Jae etei ko.” Jare ñru wae reta jei tëi: “Jae’ä ko, erëi uyawi mbae ko,” jei reta. Erëi jokua kuimbae jesa mbae ikose wae jei chupe reta: “Che ko jae.”

<sup>10</sup>Jayawe jei reta chupe: “¿Kërái pa añawe ndepuere ndecha?”

<sup>11</sup>Jayawe kuimbae jei chupe reta: “Jokua kuimbae Jesús jee wae uyapo tuñuu mii jendiayi pipe, jare oñono cheresa re, jare jei chewe, ‘Ekua iyoe nderesa Siloé pe,’ jei chewe. Jayawe che a, jare opa ayoe cheresa yawe, aecha woi,” jei chupe reta.

<sup>12</sup>Jayawe jae reta jei chupe: “¿Kiape añawe oï jokua kuimbae?” jei reta chupe. “Aikuaa’ä,” jei kuimbae chupe reta.

### Fariseo reta wiriroete Jesús

<sup>13</sup>Jayawe jae reta wiraa fariseo reta ñonoï wae pe jokua kuimbae jesa mbae ikose wae. <sup>14</sup>Mbutuu ara pe yepe Jesús uyapo tuñuu mii jendiayi pipe jare uminguera kuimbae jesa mbae wae.

<sup>15</sup>Jayawe fariseo reta upirandu jokua kuimbae pe: “¿Kërái pa ndepuere nema?” jei reta chupe. Jayawe jae jei chupe reta: “Jesús oñono cheresa re tuñuu mii. Joko wi che a ayoe cheresa jare aecha woi,” jei chupe reta.

<sup>16</sup>Jayawe amokue fariseo reta jei: “Tumpa wi’ä ko ou jokua kuimbae Jesús. Echa’ä jae uyapo oï awiyeta tēi uyapo mbutuu ara pe wae,” jei reta. Erēi iru fariseo reta jei: “Erēi, mase, jae uyapo mbaembae kiawe ipuere’ä uyapo wae. ¿Ipuereta ra kía Tumpa kotī uyawī wae uyapo kua nunga mbaembae?” jei reta. Jayawe jae reta ipuere’ä oyowake uyemingeta pēti ramiño.

<sup>17</sup>Jáeramo jei reta ye kuimbae jesa mbae ikose wae pe: “Nde, ¿mbae pa ndere jokua kuimbae chemimae ndere chupe wae jesewa?” jei reta chupe. Jayawe kuimbae jei chupe reta: “Jae ko pēti kuimbae Tumpa etei ombou wae iñee umimbeu waerä,” jei chupe reta.

<sup>18</sup>Erēi judío itenondewa reta wirowia’ä jokua kuimbae jesa mbae ikose wae. Jare wirowia’ä reta wi ukuera wae. Jáeramo uenika reta kuimbae tu jare ichi.

<sup>19</sup>Jare upirandu chupe reta: “¿Jae pa ko kua pesambiai jesa mbae oa pere chupe wae? ¿Kërái ramo pa añawe ipuere uecha oï?” jei reta.

<sup>20</sup>“Oresambiai ko,” jei reta. “Jare ore nduikuaa kawi jae ko jesa mbae oa wae.

<sup>21</sup>Erēi nduikuaa’ä kërái ra añawe ipuere uecha. Jare nduikuaa’ä wi kía ra uminguera. Pepirandu chupe, echa’ä jae ukuakuaa ma ko. Jae etei ipuere imiári iyé,” jei reta.

<sup>22</sup>Jukuärái jei kuimbae tu jare ichi, echa’ä ukiye parawete reta judío itenondewa reta wi ramo. Echa’ä jokua mburuwicha reta jei ma, “Ipotawe kía nunga jei ‘Jesús ko jae Cristo yae chupe wae,’ imeta ko uyemomboka yandetupao wi,” jei reta.

<sup>23</sup>Jokua jeko pewa tu jare ichi jei chupe reta: “Pe reta pepirandu chupe, echa’ä ukuakuaa ma ko jae,” jei reta.

<sup>24</sup>Jayawe judío itenondewa reta uenika ye kuimbae tenonde yawe jesa mbae iko wae, jare jei reta chupe: “Iyemingeta orewe Tumpa jowake. Echa’ä ore nduikuaa jokua Jesús uyawi oï Tumpa jei wae,” jei reta chupe.

<sup>25</sup>Jayawe kuimbae jei chupe reta: “Che aikuaa’ä uyawi ra oï Tumpa jei wae. Erëi pëti mbae aikuaa: jae ko tenonde yawe cheresa mbae aikose wae, erëi añawe chepuere amae,” jei chupe reta.

<sup>26</sup>Jayawe upirandu reta ye chupe: “¿Kërái pa nemimae? ¿Mbae pa uyapo ndewe?” jei reta chupe.

<sup>27</sup>“Amimbeu tëi ma pewe,” jei kuimbae, “erëi pe reta pipota’ä piyapisaka cheré. Jáeramo, ¿maera pa pipota jekuae amimbeu ye pewe? ¿Pipota yerá piko jae jemimboe retará wi?” jei chupe reta.

<sup>28</sup>Jayawe judío itenondewa reta pochi jare uñeengata reta chupe jei rewe: “Nde ko jae jokua kuimbae pochi jemimboe. Erëi ore Moisés jemimboe reta ko.

<sup>29</sup>Ore nduikuaa Tumpa ko ombou Moisés, echa’ä uyemingeta jae ndiwe. Erëi jokua Jesús, ore nduikuaa’ä etei kía ra ombou wae,” jei reta kuimbae pe.

<sup>30</sup>“¿Këraita ra pikuaa’ä kía ra ombou wae?” jei kuimbae. “Jae ko chemimae wae. Kua ambie yeete oï chemaerä.

<sup>31</sup>Yande yaikuaa ñaï Tumpa ndarau uyapisaka jeko kachi wae reta re. Erëi ime yawe kía Tumpa jee umbutuicha wae jare uyapo Tumpa jei wae, Tumpa uyapisakata oï jese,” jei chupe reta.

<sup>32</sup>“Ara iyipi wiwe mbaetii jeräkua kía umimae jesa mbae ichi wi oa wae.

<sup>33</sup>Kua kuimbae ou’ä Tumpa wi yawe, ndarau etei ipuere uyapo kua mbaembae jae uyapo wae,” jei kuimbae chupe reta.

<sup>34</sup>Jayawe judío itenondewa reta jei chupe: “¿Ndereko woi ma ndesi wi ndea wiwe! ¿Kía pa ko nde oremboe waerä?” jei reta chupe. Jayawe jokua mburuwicha reta omombo kuimbae parawete joko wi.

<sup>35</sup>Jayawe jeräkua Jesús pe judío itenondewa reta omombo ma jokua kuimbae. Jáeramo Jesús oo ueka jokua kuimbae. Jare owäiti ma yawe, upirandu chupe: “¿Nde nderowia pa kuimbaerä ayeyapo wae re?” jei chupe.

<sup>36</sup>“Aikuaa’ä ko che parawete,” jei kuimbae. “¿Kía ra ko jae? Emimbeu mii chewe arowia waerä jese,” jei chupe.

<sup>37</sup>Jayawe Jesús jei chupe: “Añawe etei ndecha ma neï. Che ayemingeta aï nde ndiwe wae ko jae,” jei chupe.

<sup>38</sup>Jayawe kuimbae jei: “CheYa, arowia aï nderé,” jei chupe. Jayawe kuimbae uñeñono iwi re Jesús jowai jare umbutuicha.

<sup>39</sup>Jare Jesús jei: “Che ayu ko ambiyekuaa waerä iwi pewa reta mbae oï ipia pe wae. Jokua uikuaa iyupe jesa mbae ñonoï Tumpa koti wae reta, che jesa aipeata chuwi

reta. Jare jokua uyererowia tēi ipuere uecha kawi wae reta, ambiyekuaata kērái añetete jesa mbae ñonoĩ Tumpa koti wae,” jei.

<sup>40</sup>Jayawe amokue fariseo reta joko pe ñonoĩ wae kua uyandu yawe, upirandu reta Jesús pe: “¿Nde ndere pa nei ore jae nunga wi oreresá’ä noĩ Tumpa koti?” jei reta chupe.

<sup>41</sup>Jayawe Jesús jei chupe reta: “Pe reta moná pikuaa yawe peresa mbae peĩ Tumpa koti wae, jayawe teko penoi Tumpa koti wae opata tēi uyembái pewi. Erēi pe reta pere peyupe, ‘Ore numae kawi noĩ,’ pere tēi. Jáeramo jokua jeko pewa imeño teko penoi Tumpa jowai,” jei Jesús fariseo reta pe.

## Juan 10

### Jesús uyembijaanga owecha reta iyandarekoa ikawi wae re

<sup>1</sup>Jayawe Jesús jei umbijaanga rewe: “Che tae pewe añetete wae, jaeño imonda wae reta uike’ä owecharokai pe jöke rupi. Jae reta uike wiari ikotia rupi,” jei.

<sup>2</sup>“Erēi owecharokai jöke rupi uike wae, owecha reta iyandarekoa ko,” jei.

<sup>3</sup>“Jare owecha reta iyandarekoa uipota uike yawe, öke uäro wae uipeata chupe. Jare jae uike ma yawe, yuweruta ikoti iowecha reta, echa’ä jae reta uikuaa iyandarekoa iñee ramo. Jare jae uenita pēti pēti iowecha reta jee rupi jare onoeta wiraa reta owecharokai wi,” jei.

<sup>4</sup>“Jare opa ma onoe wiraa reta yawe jokai wi, owecha iyandarekoa uwatata tenonde chupe reta jare owecha reta yuraata jupie, echa’ä uikuaa reta iya iñee ramo,” jei.

<sup>5</sup>“Erēi ndarau yuraa reta ambie wae jupie, echa’ä uikuaa’ä reta jokua ambie wae iñee ramo. Jáeramo jae reta opata osi chuwi,” jei chupe reta.

<sup>6</sup>Jukuärái Jesús omboe tēi reta umbijaanga rewe, erēitu jae reta uikuaa’ä mbae re ra umbijaanga chupe reta wae.

<sup>7</sup>Jayawe Jesús jei wi chupe reta: “Che tae pewe añetete wae, che ko jae jokua owecharokai jöke rami. Echa’ä che rupiño ko ipuere uike kía Tumpa jēta pe,” jei.

<sup>8</sup>“Ndei che ayu mbowe, ime iko jeta oporomoe kachi wae reta. Jae reta ko jae kía jaeño uipota owecha reta oñomi jare umbipere wae rami. Erēi cheowecha reta – jae ko Tumpa re wírowia wae reta – jae reta uyapisaka’ä jese reta,” jei chupe reta.

<sup>9</sup>“Che ko jae owecharokai jöke rami,” jei. “Ime yawe kía uñepiro cheré wae, che aepita ko. Jae ikota pēti owecha ipiawiwe wae rami. Jae ipuereta oē oo ukaru uyemingapii kapii re rami. Jare mbae uyamondo yawe, ipuereta osi oo jokai pe uike uñepiro waerä. Jukuärái ko, echa’ä iyandarekoa umae kawi oĩ jese ramo,” jei chupe reta.

<sup>10</sup>“Imonda wae jaeño ou oñomi waerä, jare upuruyuka waerä, jare upurukachi waerä. Erēi che joku aerä’ä ko ayu. Che ayu ko amee waerä tekowe opa mbae wae



cheré wirowia wae reta pe. Jare jokua tekowe onoi reta yawe, tuicha rupi uyekouta reta,” jei Jesús chupe reta.

<sup>11</sup>“Jare che ko jae owecha reta iyandarekoa ikawi wae rami. Pëti owecha reta iyandarekoa ikawi wae umeeta jekowe iowecha reta re uepi reta waerä,” jei.

<sup>12</sup>“Erëi jukuärái’ä ko kía korepoti reño owecha re uyandareko wae. Jae jae’ä ko owecha reta iyandarekoa ikawi wae jare jae imbae’ä ko owecha reta. Jáeramo jae uecha yawe yawapïta ou oï ikoti, jae osi jare opa ueya owecha parawete reta. Jayawe yawapïta ou uipisi amokue owecha reta, jare ïru owecha reta opa uñemiái,” jei.

<sup>13</sup>“Jukuärái uyeyapo, echa’ä jokua kuimbae uyandareko tëi owecha reta re korepoti umingana waeräño. Mbae’ä chupe owecha parawete reta. Jáeramo ueya reta yawapïta pe,” jei.

<sup>14</sup>“Che ko jae owecha reta iyandarekoa ikawi wae rami. Echa’ä aikuaa kawi kía kía ko cheowecha reta wae, jare jae reta chekuaa kawi wi.

<sup>15</sup>Kërái cheRu chekuaa kawi jare che aikuaa kawi wi cheRu, jukuärái wi cheowecha reta ndiwe nduyekuaa kawi. Jare che ameeta ko cherekowe cheowecha reta re aepi reta waerä,” jei Jesús chupe reta.

<sup>16</sup>“Jare imeta oï wi ïru cheowecha reta. Erëi ndei ko jae reta oï cheowecharokai pe, echa’ä jae’ä ko judío reta. Jae reta wi uyapisakata chiñee re che aeni reta yawe. Jare che imeta ko jae reta wi aru amiinge waerä cheowecharokai pe. Jare aru reta ma yawe, yurekota reta pëti wae peño jare pëtiño opaete jae reta iyandarekorä aikota,” jei chupe reta.

<sup>17</sup>“Che ameeta cherekowe jare joko wi aikowe yeta aï. Jokua jeko pewa ko cheRu cherau.<sup>18</sup>Mbaeti kía ipuere upïro chewi cherekowe, erëi amanota aï chekirëi rewe. Chepuere amee cherekowe, jare ime wi anoi mbaepuere aikowe ye waerä. Jukuärái chepuere ayapo, echa’ä jokuaerä cheRu chembou ayapo waerä. Jokua añawe che jae pewe,” jei Jesús chupe reta.

<sup>19</sup>Jayawe joko pe ñonoï wae reta jekuae ipuere’ä oyowake uyemingeta yewi pëti ramiño.

<sup>20</sup>Jeta jae reta jei iyupe: “Aña uyembïiya ma jese. Imbikere ma kua oï. ¿Maera ra yayapisaka yeta jese?” jei reta.

<sup>21</sup>Erëi ïru wae reta jei: “Pëti kuimbae aña uyembïiya jese wae ndarau ipuere uyemingeta jukuärái. Jare ndarau wi ipuere umimae jesa mbae wae reta,” jei reta.

### **Jesús jare Tu pëtiño ko**

<sup>22</sup>Uwäe ma roi ara yawe, judío reta umbiara yureko tupao wasu Jerusalén pe.

<sup>23</sup>Jare Jesús uwata iko tupao wasu joka rupi, pëti korero Salomón Ikorero jee wae rupi.

**24**Jayawe judío itenondewa reta yuweru uyembati Jesús oï wae pe jare jei reta chupe: “Ima ma ore nduipota tēi nduikuaa kawī nde rewa, erēi oreropa noī. Nde ko jae Cristo ndoe chupe wae yawe, jayawe ikuaaka kawī orewe awiye waerā ma imeño jukuārāi noī,” jei reta chupe.

**25**Jayawe Jesús jei chupe reta: “Che aikuaaka kawī ma ko pewe tēi, erēi pe reta chererowia’ä,” jei chupe reta. “CheRu jee re mbaembae ayapo wae ko uikuaaka ma pewe tēi kía ko che wae.

**26**Erēitu pe reta perowia’ä, echa’ä pe reta cheowecha reta’ä ko,” jei chupe reta.

**27**“Cheowecha reta uyapisaka chiñee re. Jare che aikuaa kawī cheowecha reta, jare jae reta uwata cheraikue.

**28**Che amee chupe reta tekowe opa mbae wae, jare jae reta ndarau etei yuraa Tatawasurenda pe. Añetete, mbaeti kiawe ipuere upiro reta chepo wi,” jei chupe reta.

**29**“CheRu etei ko umee reta chewe yureko waerā chemaerā. Jare mbaeti kiawe ipuere upiro reta cheRu ipo wi, echa’ä cheRu imbaepuere tuichaete ye ko opaete wae wi.

**30**Añetete, che jare cheRu pētiño ko noī,” jei chupe reta.

**31**Jayawe joko pe ñonoī wae reta pochi jare upi ye tēi reta ita uyapi uyuka waerā Jesús.

**32**Jayawe Jesús jei chupe reta: “Ayapo ma jeta mbaembae ikawī wae perowake cheRu imbaepuere rupi. Erēi ¿mbae nunga jokua mbae ayapo wae jeko pewa pa pipota cheyuka pei?” jei chupe reta.

**33**Jare jei reta chupe: “Mbae ikawī wae ndiyapo wae jeko pewa’ä ko ndiyeyapikata neī. Erēi nde ndere mbae kachi wae Tumpa koti. Echa’ä yepe tēi nde pēti kuimbaeño ko, erēi niñereni Tumpa etei. Jokua jeko pewa ko ndiyeyapikata neī,” jei reta chupe.

**34**Jayawe Jesús jei chupe reta: “Pe reta etei ime penoi Tumpa iñeeriru, jare joko pe uyekuatía oï kuārāi: ‘Che jae pe reta ko jae tumpa reta.’ Jukuārāi uyekuatía oï.

**35**Jare yande reta yaikuaa jokua ñee ndarau ipuere uyawī. Erēi ¿kía reta pe pa jei jayawe tumpa? ¿Jae’ä yerá kuimbae reta?” jei chupe reta.

**36**“Erēitu añawe pe reta chembijeko pei, echa’ä che jae pewe che ko jae Tumpa Tai ramo. ‘Nde ndere mbae kachi wae Tumpa koti,’ pere chewe. Erēi awiyeta tēi ko pere jukuārāi, echa’ä che pēti kuimbaeño’ä ko. Echa’ä cheRu Tumpa etei ko cheño tee jae imaerā jare chembou kua iwī pe,” jei Jesús chupe reta.

**37**“Erēi pe reta mbaeti pecha yawe ayapo aī mbaembae cheRu uyapo wae, jayawe awiye chererowia.

<sup>38</sup>Erëi ayapo ko aï mbaembae cheRu uyapo wae. Jayawe piyemingeta kawi pepia pe kua mbaembae pecha ayapo aï wae re,” jei chupe reta. “Yepe tēi pipota’ä perowia chiñee re, erëi kua mbaembae ayapo aï wae re yepe chererowia. Jukuärái pikuaa kawita cheRu oï che ndiwe wae, jare che aï cheRu ndiwe wae,” jei Jesús chupe reta.

<sup>39</sup>Jayawe jokua judío itenondewa reta uipota ye tēi uipisi Jesús, erëi jae ukañi chuwi reta.

<sup>40</sup>Jare Jesús oo ye i wasu Jordán jowaicho pe kiape tenonde yawe Juan upurumbisakambu iko wae pe. Jare Jesús upita joko pe.

<sup>41</sup>Jare jeta wae reta yuweru jae oï wae pe jare jei reta iyupe: “Juan uyapo’ä pēti awe mbae ambie ye wae kiawe ipuere’ä uyapo wae. Erëi opaete jae jei kua kuimbae rewa añetete yepe,” jei reta.

<sup>42</sup>Jare jeta wae reta wirowia Jesús re joko pe.

## Juan 11

### Lázaro imano

<sup>1-2</sup>Ime iko pēti kuimbae Lázaro jee wae tēta wasu rai Betania pe. Jare jae jindi reta ko jae María jare Marta jee wae reta. Kua María ko jae taikue rupi upiyereta iko mbae utimbo kawi wae yandeYa ipi re jare umitinita iko ía pipe wae. Jare Lázaro imbaerasi iko.

<sup>3</sup>Jáeramo jindi reta omondo kía umimbeuka waerä Jesús pe: “OreYa, kua kuimbae ndeau wae imbaerasi oï,” jei chupe.

<sup>4</sup>Jesús kua uyandu yawe, jei jemimboe reta pe: “Kua mbaerasi mano pewa’ä ko. Oa jese jukuärái rupi ñru wae reta uecha waerä Tumpa imbaepuere jupiete ye wae, jare jae nunga wi jukuärái rupi uyembutuichaka waerä che cheree, che Tumpa Tairä aiko wae,” jei chupe reta.

<sup>5</sup>Jesús uau Marta jare ipikii María jare Lázaro.

<sup>6</sup>Erëitu Jesús uikuaa ma yawe Lázaro imbaerasi oï wae, upitaño rani mokui ara yewi kiape jae oï wae pe.

<sup>7</sup>Joko wi ramo jei jemimboe reta pe: “Ya yewi Judea pe,” jei chupe reta.

<sup>8</sup>“Oporomboe wae,” jei reta, “ndei awe ko ima oï judío itenondewa reta uipota tēi ndeyuka yureko joko pe. Jáeramo, ¿maera pa ya yeta jokoti?” jei reta chupe.

<sup>9</sup>Jayawe Jesús jei umbijaanga rewe: “Mbaeti mbae wi yakiiye waerä. Ime doce ora onoi ara. Ara rupi uwata wae ndarau ipisapää, echa’ä onoi warasi jembipe,” jei.

<sup>10</sup>“Erëi pītu yawe uwata wae ipisapääta ipotawe mbae re, echa’ä mbaeti uwata oï tembipe pe.”<sup>11</sup>Jukuärái jei Jesús jemimboe reta pe. Jare joko wi jei wi chupe reta: “Ñaneiru Lázaro oke ma oï, jare che ata ambisareko waerä,” jei chupe reta.

<sup>12</sup>Jayawe jemimboe reta jei chupe: “OreYa, okeño oï yawe, ukuera yeta ko oï,” jei reta chupe.

<sup>13</sup>Erëi Jesús jokua jei yawe, uipota jei Lázaro parawete umano ma. Erëitu jae reta wirowia tēi Jesús jei iko Lázaro okeño yepe oï.

<sup>14</sup>Jayawe Jesús umimbeu kawi chupe reta: “Lázaro umano ma.

<sup>15</sup>Jare che ayerowia aï joko pe’ä aiko wae re. Echa’ä jukuärái ko jaekawi pemaerä. Echa’ä añawe kua mbae ayapota aï wae rupi pe reta perowiata peï cheré. Ya ñamae jese,” jei Jesús chupe reta.

<sup>16</sup>Jayawe Tomás – jae ko Chowakiri pe umbijee reta wae – jei Jesús ñru jemimboe reta pe: “Ya wi yande ñamano pochi jae ndiwe jowaicho reta ipo pe,” jei chupe reta.

### **Jesús ko jae tekowe opa mbae wae umee wae**

<sup>17</sup>Jayawe jae reta opa yuraa Betania pe. Jare uwäe seri ma yuraa reta yawe, amokue wae reta yuweru umimbeu Jesús pe ñrundi ara ma yepe oï Lázaro teöwerenda pe.

<sup>18</sup>Betania koiño oï Jerusalén wi. Jae ko mbapi kilometro rupi.

<sup>19</sup>Jare jeta judío reta yuweru ma Jerusalén wi Marta jare María ipi umbipiakatu waerä tēi ikiwi umano ramo.

<sup>20</sup>Jare ime kía umbeu Marta pe Jesús outa ma uwäe oï. Jayawe Marta oo owäiti Jesús. Erëi María upitaño jēta pe.

<sup>21</sup>Jayawe Marta owäiti ma yawe Jesús, jei chupe: “CheYa, nde moná kua pe neï yawe, ndarau tēi chekiwi mii umano orewi.

<sup>22</sup>Erëi jese we che aikuaa aï ipotawe nde ndiyerure yawe mbae re Tumpa pe, Tumpa umeeta oï ndewe,” jei Jesús pe.

<sup>23</sup>Jayawe Jesús jei Marta pe: “Ndekiwi ikowe yeta ou umanokue wae reta ipite wi,” jei chupe.

<sup>24</sup>“Aikuaa ko, cheYa,” jei Marta. “Aikuaa jae ikowe yeta oï ara taikuewa pe, Tumpa umbijekowe ye yawe opaete umanokue wae reta,” jei chupe.

<sup>25</sup>Jayawe Jesús jei chupe: “Che ko jae tekowe amee wae jare umanokue wae reta ambijekowe ye wae,” jei chupe. “Cheré wirowia wae reta, yepe tēi umano, erëi ikowe yeta ñonoï.

<sup>26</sup>Jare opaete jekowe ñonoï wae cheré wirowia wae reta yurekota jaeño mái pewa. ¿Nderowia pa kua che jae aï ndewe wae?” jei Jesús Marta pe.

<sup>27</sup>“Arowia, cheYa,” jei Marta. “Arowia nde ko jae Cristo ndoe chupe wae. Arowia nde ko jae Tumpa Tai outa iko kua iwi pe wae,” jei chupe.

<sup>28</sup>Marta kua jei ma yawe, oo ueni ipiki María. Jare umingeta wiari jei rewe: “Oporomboe wae kua pe oï. Jae nereni oï,” jei chupe.

- <sup>29</sup>Jayawe María kua uyandu yawe, jupiwoiño upüa oë oo owäiti Jesús,
- <sup>30</sup>echa'ä ndei Jesús uike tēta wasu rai pe. Marta owäiti wae peño upita.
- <sup>31</sup>Jayawe jokua judío reta yuweru umbipiakatu waerä tēi María wae uecha María aramoiño upüa wiraē oë oo tēta wi. Jae reta wirowia tēi María oo ko aipo oī teöwerenda pe uyao waerä joko pe. Jayawe jae reta opa yuraa wi jaikue.
- <sup>32</sup>Jare María oo ma uwäe yawe Jesús oī wae pe, uecha rupiwe oo uñeño ipitía re iwī re jae jowai jare jei chupe: “CheYa, nde moná kua pe nei yawe, ndarau tēi umano orewi chekiwi mii,” jei chupe.
- <sup>33</sup>Jare Jesús uecha yawe María jare opaete judío María umiiru wae reta uyao ñonoī, tuicha rupi ipiatiti jare uiparareko reta.
- <sup>34</sup>Jayawe upirandu chupe reta: “¿Kiape pa piñono jetekue?” jei. “Ya echa kiape oī wae,” jei reta chupe.
- <sup>35</sup>Jayawe Jesús jesai oë ipiatiti ramo.
- <sup>36</sup>Jare kua uecha yawe, judío reta jei iyupe: “Mase parawete, uauete yepe,” jei reta.
- <sup>37</sup>Erēi amokue wae jei: “Kua kuimbae umimae jesa mbae wae. Jáeramo, ¿ipuerē'ä ra jae uyapo mbae awe awiye waerä tēi umano Lázaro?” jei reta.

### **Jesús umbijekowe ye Lázaro**

- <sup>38</sup>Jayawe Jesús jekuae tuicha rupi ipiatiti rewe oya teöwerenda re. Jokua teöwerenda pēti iwawira uyeyoo wae ko, jare pēti ita tuicha wae oī jōke re.
- <sup>39</sup>Jayawe Jesús jei: “Pembisiri jokua ita jōke wi,” jei. Erēi Marta – jae ko jokua kuimbae umano wae jindi – jei chupe: “CheYa, ine ma ko aipo oī. Echa'ä irundi ara ma oī umano wae,” jei chupe.
- <sup>40</sup>Jayawe Jesús jei chupe: “¿Jae'ä yerá ndewe nderowia cheré yawe, ndechata Tumpa imbaepuere jupiete ye wae?” jei chupe.
- <sup>41</sup>Jayawe umbisiri reta jokua ita teöwerenda jōke wi. Jare Jesús jowaiwa ara koti umae jare jei: “CheRu mii, amee yasurupái ndewe, echa'ä nde ndiyapisaka cheré ramo.
- <sup>42</sup>Aikuaa nde ndiyapisakañoi cheré. Erēi che jae ai kuarái opaete kua cheyipī rupi ñonoī wae reta wirowia waerä nde ko chembou wae,” jei.
- <sup>43</sup>Jayawe Jesús kua jei ma yawe, usapikai rewe jei: “Lázaro, eë joko wi,” jei chupe.
- <sup>44</sup>Jayawe jawoi pewa kuimbae umano iko wae oë oo joko wi. Ipo jare ipi uñeño oī tarapo pipe, jare jowa uñeño oī nieso pipe kērái jae reta jeko rupi. Jayawe Jesús jei: “Piyora chuwi iñomaa jare tuwata,” jei chupe reta.

### **Judío itenondewa reta uyemboemboe uyukaka waerä Jesús**

*(Mateo 26.1-5; Marcos 14.1-2; Lucas 22.1-2)*

<sup>45</sup>Jare jeta judío yuweru opou María ipi wae reta uecha kërái Jesús umbijekowe ye Lázaro. Jayawe wirowia reta jese.

<sup>46</sup>Erëitu amokue wae reta yuraa umimbeu fariseo reta pe Jesús mbae ikawi wae uyapo wae re.

<sup>47</sup>Jayawe fariseo reta jare sacerdote itenondewa reta ndiwe umbatì opaete ìru mburuwicha reta. “¿Mbae ra yayapota?” jei reta iyupe. “Jokua kuimbae pochi jekuaeño uyapo oï jeta mbaembae ipuere’ä uyapo kía nungawe kuimbae wae.

<sup>48</sup>Ñamaeño ñaï jese yawe, opaete ñanerëtara reta wirowiata ñonoï jese jae ko Upuruepi wae jare uyapota reta imburuwicha wasurä. Jayawe romano reta wirowiata yande yambowaicho ma ñaï wae. Jayawe jae reta yuweruta opa urukachi waerä tupao wasu, jare yande judiorä yaiko wae reta wi opata yandeyuka,” jei reta.

<sup>49</sup>Erëi pëti wae – jae ko Caifás jee wae jare jae ko sacerdote tenondewaete jokua año rupi – jei chupe reta: “Pe reta piyemingeta peï pikuaa mbae echa,” jei chupe reta.

<sup>50</sup>“Pipota’ä yawe romano reta yuweru opa yandeyuka waerä, jayawe ikawita ko jokua kuimbae Jesús umano waerä, awiye waerä ñanerëtara reta opa ukañi romano reta ipo pe. Jokua ikawita yandewe,” jei chupe reta.

<sup>51</sup>Jukuärái jei Caifás, erëi añetete jae uyemingeta’ä iko jaeiño. Tumpa uikuaaka iko Caifás rupi mbae uyeyapota iko wae. Kua nunga amo amo pe Tumpa uyapo sacerdote tenondewaete rupi. Jare kua wese Tumpa uikuaaka iko Caifás rupi Jesús umanota iko opaete judío reta ipepika pe.

<sup>52</sup>Erëi mbaetita umano judío reta reño. Umanota iko wi opaete Tumpa tai reta kerupi rupi ñonoï wae re jae reta yureko waerä pëti ramiño.

<sup>53</sup>Jayawe Caifás jei wae jeko pewa, jokua ara wiwe opaete judío itenondewa reta uyemboemboe kërái Jesús uyukaka waerä.

<sup>54</sup>Jáeramo Jesús uwata’ä ma judío reta jowake, erëi oo joko wi pëti tëta wasu Efraín jee wae pe. Jokua tëta wasu oï iwitini wasu jembei pe. Jare joko pe Jesús upita jemimboe reta ndiwe.

<sup>55</sup>Jare koiño ma ou pascua iara reta uyemimandúa waerä judío reta. Jáeramo jeta wae reta yuraa opaete tëta wasu rai reta wi Jerusalén pe ndei uwäe pascua mbowe. Echa’ä uipota uyeyapikatu kawi reta Tumpa koti ipuere umbiasa kawi reta waerä pascua iara reta.

<sup>56</sup>Jare opa ma yuraa uwäe reta yawe, ueka tëi reta Jesús. Jare tupao wasu joka pe yureko reta yawe, jei reta iyupe: “¿Mbae pa pere? Outa’ä chawaa Jesús oï,” jei reta iyupe.

<sup>57</sup>Jae reta wirowia tëi Jesús ndarau ou, echa’ä sacerdote itenondewa reta jare fariseo reta oyokui ma opaete wae kuärái: “Ime yawe kía uikuaa kiae ra oï Jesús wae, tumimbeu orewe orepuere waerä nduipisika,” jei reta.

## Juan 12

### María upiyere mbae utimbo kawi wae Jesús ipi re

(Mateo 26.6-13; Marcos 14.3-9)

<sup>1</sup>Owa araño ma uata uwäe waerä pascua iara reta. Jayawe Jesús jare jemimboe reta ndiwe yuraa ye Betania pe kiape Lázaro iko wae pe. Jae ko jokua kuimbae tenonde yawe Jesús umbijekowe ye ueru umanokue wae reta ipite wi wae.

<sup>2</sup>Jare amokue Betania pewa reta uyapo mbae nunga tembiu mii jou reta waerä Jesús ndiwe. Marta oñono iko tembiu, jare Jesús jare Lázaro uwapi ukaru iko ñru reta ndiwe.

<sup>3</sup>Jayawe Lázaro jindi María jee wae ueru medio kilo nardo jee wae. Kua ko mbae utimbo kawi wae jare jepiete wae. Jayawe upiyere Jesús ipi re jare umbipi umitini ipi ía pipe. Jare o rupi opa tinee utimbo kawi wae.

<sup>4</sup>Jare joko pe oí wi Jesús jemimboe Judas Iscariote jee wae – jae ko umeeta iko Jesús jowaicho reta pe wae. Jae jei Jesús pe:

<sup>5</sup>“¿Maera pa kua kuña umee’ä orewe kua mbae utimbo kawi wae ore ndowaka waerä? Jukuärái ime waerä nonoi korepoti nombori waerä iparawete wae reta. Echa’ä jepi ko mbapi chiëto ara mbarawiki jepi pewa.”

<sup>6</sup>Jukuärái jei tēi Judas, erēi añetete mbae’ä chupe iparawete wae reta. Jokua jei, echa’ä jae ko imonda wae ramo. Echa’ä jae uyandareko iko Jesús jare jemimboe reta ikorepoti re, jare joko wi yepe oñomi wiari iyupe korepoti jae imaeä.

<sup>7</sup>Jayawe Jesús jei Judas pe: “Awiye ere mbae kua kuña pe,” jei. “Jae upi ma kua mbae utimbo kawi wae kua ara pewarä etei. Jae uyapikatu oí chere teöwerenda pe cheñono reta waerä.

<sup>8</sup>Jare wi iparawete wae reta jekuaeñota yureko pepite rupi, jare pepuere pembori ipotawe ara rupi. Erēi che ndarau aiko jekuaeño pepite pe kuärái,” jei. Jukuärái Jesús oē María ipepika pe.

### Uyemboemboe reta Lázaro uyukaka waerä wi

<sup>9</sup>Jare jeräkua jeta judío reta pe Jesús joko pe yepe oí. Jáeramo yuweru reta uecha waerä Jesús. Erēi yuweru’ä reta Jesús uecha waeräño. Yuweru reta wi uecha waerä Lázaro. Echa’ä uipota uecha reta jokua kuimbae tenonde yawe umano jare Jesús umbijekowe ye ueru wae.

<sup>10</sup>Jayawe sacerdote itenondewa reta uyemingeta jae yepái kërái uyukaka waerä Lázaro wi.

<sup>11</sup>Echa’ä Lázaro ikowe ye wae jeko pewa jeta judío reta uyerowa sacerdote reta wi Jesús koti jare wirowia reta jese.

### Jesús uike Jerusalén pe

(Mateo 21.1-11; Marcos 11.1-11; Lucas 19.28-40)

<sup>12</sup>Jare piarewe pe Jesús oo Jerusalén koti. Kua jeräkua opaete Jerusalén pe ñonoï wae reta pe. Kua reta tenonde ma yuweru Jerusalén pe uyemimandúa reta waerä pascua iara reta re. Jare jae reta uikuaa yawe Jesús ou oï Jerusalén pe wae, tuicha rupi uyerowia reta.

<sup>13</sup>Jayawe jae reta ueki karandai joki umbiwawa reta waerä Jesús jenonde, jare yuraa owäiti reta. Jare jei reta usapikai pii rewe: “¡Tuyembutuichaka yandeRu Tumpa jee! ¡Tumpa tuyapo ikawiete wae kua ou oï Tumpa jee re wae pe! ¡Jae ko yande Israel pewa yaiko wae reta yanemburuwicha wasurä ikota wae!” jei reta.

<sup>14</sup>Jare Jesús uiporu kía pe pëti mburika taurusu wae jare opo jese. Jokua uyeyapo kërái Tumpa iñeeriru pe jeiño mái uyeyapota iko wae rami. Echa’ä joko pe jei kuärái:

<sup>15</sup>“Tëta wasu Sion pewa reta, awiye ye ma pekiye. Mase, pemburuwicha wasurä ou oï pepi. Jae opo ou oï pëti mburika imembi taurusu wae re.” Jukuärái uyekuatía oï.

<sup>16</sup>Jokua ara Jesús jemimboe reta uikuaa kawi’ä yureko kua mbaembae rewa. Erëi Jesús oo ye ma ara pe yawe ramo jae reta imandúa uyekuatía yepe iko Tumpa iñeeriru pe kua mbaembae reta uyeyapota iko wae.

<sup>17-18</sup>Jayawe jeta wae reta yuraa owäiti Jesús, echa’ä jokua uecha Jesús kërái umbijekowe ye Lázaro ueru wae reta jekuaeño imiäri yureko jokua re. Jei reta: “Ore nduecha Jesús jei jokua umanokue wae pe oë waerä teöwerenda wi jekowe rewe, jare jukuärái uyeyapo. Jokua ko jae mbae kiawe ipuere’ä uyapo wae,” jei reta.

<sup>19</sup>Jayawe fariseo reta jei iyupe: “Mase, kua kuimbae pochi, opaete wae reta yuraa ñonoï jupie. Jare yandepuere’ä yayopia chuwi,” jei reta iyupe.

### **Jesús umimbeu umanota wae**

<sup>20</sup>Jare Jerusalén pe ñonoï wae reta ipite pe iko amokue griego reta. Jae reta ko judío mbae wae reta jare yuweru ma kua pascua pe umbutuicha reta waerä Tumpa jee.

<sup>21</sup>Jare jeräkua chupe reta Jesús; jáeramo jae reta uipota uikuaa. Jayawe yuraa owäiti reta Jesús jemimboe Felipe jee wae – jae ko tëta wasu Betsaida pewa. Kua Betsaida iwí Galilea pe oï. Jare jei reta chupe: “Kei, ore nduipota nduikuaa Jesús,” jei reta chupe.

<sup>22</sup>Jayawe Felipe oo umimbeu Andrés pe, jare mokui rewe yuraa umimbeu yuapí ye reta Jesús pe.

<sup>23</sup>Jayawe Jesús jei: “Tenonde che kuimbaerä ayeyapo wae imeta ko mbae asa äi rani, jare jukuärái cheree uyembutuichaka waerä. Jare añawe uwäe ma ara jokua uyeyapo waerä,” jei.

<sup>24</sup>“Che tae pewe añetete wae, cheree uyembutuichakata oï chemano rupi. Yande yaikuaa kawi ñai pëti atiräi mii ñañoti’ä yawe, ndarau uñemoña. Jekuaeño ikota



jaeño pe etei. Erëi ñañoti yawe, yepe tēi umano, erëi jekuaeño uñemoña. Jukuärái ko chemano rupi jeta wae reta onoita tekowe ipiau wae,” jei.

<sup>25</sup>“Jayawe ime yawe kía uauete jekowe kua iwi pe wae, umikañita iyuwi jekowe opa mbae wae ipuereta tēi onoi wae. Erëi ime yawe kía jekowe umee uyeyokui waerä Tumpa pe wae, uyekouta oï tekowe opa mbae wae re,” jei.

<sup>26</sup>“Jayawe ime yawe kía uipota uyeyokui chewe wae, tuwata che ndiwe oï waerä che aï wae pe. Jare jukuärái uyapo yawe, cheRu umbutuichakata oï,” jei Jesús.

### **Jesús umimbeu kërái etei umanota iko wae**

<sup>27</sup>Jare Jesús jei wi chupe reta: “Añawe tuicha rupi chepiatiti aï. Erëi ndarau aeka cheRu pe jae cherepi waerä kua aiporarata aï wae wi. Echa’ä jokuaerä ko che ayu kua iwi pe,” jei chupe reta.

<sup>28</sup>Joko wi Jesús uyerure Tu pe: “CheRu mii, tuyembutuichaka nderee,” jei. Jayawe jupiwoi ou ñee ara wi jei: “Cheree ambutuichaka ma. Jare jokua ayapo yeta aï,” jei.

<sup>29</sup>Jare jeta joko pe ñonoï wae reta uyandu jokua ñee jare jei iyupe reta: “Ara ko jiapu.” Jare ïru wae reta jei: “Pëti araiwa ko aipo iñee ombou chupe.”

<sup>30</sup>Jayawe Jesús jei chupe reta: “Kua ñee piyandu wae, pemikirëi waerä ko. Mbaeti ko chemaerä,” jei chupe reta.

<sup>31</sup>“Kua iwi pewa reta opaete seri oyowaicho ñonoï Tumpa koti. Erëi añawe uwäe ma ara Tumpa umbijeko reta waerä mbae che ayapota aï wae rupi. Jare Tumpa umbijekota wi jae reta imburuwicha wasu – jae ko Añawasu,” jei.

<sup>32</sup>“Erëi che, ïru wae reta chekututa ñonoï kurusu re jare chembiyemboita cheñono reta. Jare jokua ara uwäe yawe, che amikirëita opaete iwi pewa reta ou waerä chekoti,” jei chupe reta.

<sup>33</sup>Kua jei Jesús uikuaaka waerä chupe reta kërái etei jae umanota iko wae.

<sup>34</sup>Jayawe jae reta jei Jesús pe: “Nde ndere tēi nei ndeyupe ‘che kuimbaerä ayeyapo wae.’ Erëi ¿mbae ra jokua uipota jei? Ore nduikuaa Cristo ndoe chupe wae ou yawe, jae upitata oï jaeño mái pewa, echa’ä jukuärái Tumpa iñeeriru pe uyekuatía oï. Jayawe nde ko jae Cristo yawe, ¿këraita pa nde ndere nei orewe, ‘chekututa ñonoï kurusu re jare chembiyemboita cheñono reta’? Kua pe opa orembopa nei,” jei reta Jesús pe.

<sup>35</sup>Jayawe Jesús jei chupe reta umbijaanga rewe: “Tembipe imeñota oï pe reta ndiwe michi pewaño. Jáeramo pemaño kua tembipe re umbiembipe waerä pepia pe. Jukuärái ndarau pepiranoewewa pëtu pewe. Echa’ä pëtumimbi pe uwata wae reta jopa ñonoï jare uikuaa’ä keti ra yuraa ñonoï wae,” jei chupe reta.

<sup>36</sup>“Jare kua tembipe oï pe reta ndiwe rambuewe, perowia jese pepuere waerä piko Tumpa tai retarä,” jei Jesús chupe reta. Jare kua jei ma yawe, Jesús oo ukañi chuwi reta.

### Opaete seri judío reta wirowia'ä Jesús re

<sup>37</sup>Jesús uyapo ma judío reta jowake jeta mbaembae kiawe ipuere'ä uyapo wae uikuaaka chupe reta waerä tēi kía ko jae wae. Erēi jeseuwe opaete seri wirowia'ä jese.

<sup>38</sup>Echa'ä imeta ko uyeyapo jokua arakae Tumpa iñee umimbeu wae Isaías uikuatía wae. Echa'ä jae uikuatía kuärái: “CheYa, ¿ime ra kía yepe wirowia oriñee re wae? ¿Uecha'ä yerá reta nembraepuere?” Jukuärái uikuatía arakae Isaías.

<sup>39</sup>Jáeramo jokua judío reta ipiatäta ramo, ipuere'ä wirowia reta Jesús re.

<sup>40</sup>Uyeyapo chupe reta kērái Isaías uikuatía ye wae rami. Echa'ä jae uikuatía kuärái: “Jokua ipiatäta wae reta, Tumpa opa uesañoma rami ko awiye waerä uikuaa kawi reta. Jare jae umbipiatäta ma reta wi awiye waerä uikuaa reta. Jukuärái Tumpa uyapo ma awiye waerä jae reta uyerowa ikoti. ‘Añetete,’ jei Tumpa, ‘jae reta uyerowa chekoti yawe, aepita tēi reta,’ jei.”

<sup>41</sup>Isaías uikuatía arakae kua mbaembae reta, echa'ä tenonde yawe jae uecha Jesús imbaepuere jupiete ye wae kērái onoita iko wae. Jare jukuärái Isaías uikuatía mbae uasata chupe reta wiriro reta yawe Jesús.

<sup>42</sup>Erēitu jeseuwe jeta judío itenondewa reta wirowia Jesús re. Erēi wirowia reta kía uikuaa mbae rewe. Echa'ä jae reta uikuaa oē reta yawe Jesús ipepika pe, fariseo reta omombota itupao wi.

<sup>43</sup>Jáeramo umimbeu'ä reta kía pe awe wirowia reta Jesús re wae. Añetete jae reta uipotaeete umbiyerowia japicha retañō Tumpa wi etei.

### Jesús ou uepi waerä iwi pewa reta

<sup>44</sup>Pēti wese ye Jesús omoē iñee chupe reta usapikai rewe: “Kía wirowia cheré wae, mbaeti ko chereño wirowia oī. Wirowia ko oī wi Tumpa chembou wae re.

<sup>45</sup>Jae ramiño wi kía cherecha wae, uecha ko oī wi chembou wae,” jei.

<sup>46</sup>“Che ayu ko ambiembipe waerä iwi pewa reta ipia pe. Jare jukuärái ipotawe kía cheré wirowia wae ndarau iko pītumimbi pe,” jei.

<sup>47</sup>“Erēi ime yawe kía chiñee uyandu wae, erēi jae uyapo'ä yawe che jae wae rupi, jae onoita teko Tumpa jowai. Erēi che'ä ko ambijekota aī, echa'ä che jokuaerä'a ko ayu. Ayu ko aepi waerä iwi pewa reta teko onoi wae wi,” jei.

<sup>48</sup>“Erēi jokua chereriro wae reta jare chiñee wirowia mbae wae reta onoita ko teko ara taikuewa pe jae reta uyemboi yawe cheRu jowai. Añetete, cheRu umbijekota reta chiñee jae wae rupi etei,

<sup>49</sup>echa'ä chiñee ou'ä chewiño. CheRu ko chembou, jare jae ko jei chewe mbae jae waerä jare kērái jae waerä,” jei.

<sup>50</sup>“Jare che aikuaa jokua mbaembae cheRu jei chewe jae waerä wae, jokua ueru tekowe opa mbae wae opaete wirowia jese wae reta pe. Jáeramo ko amimbeu kawi ma opaete jae jei chewe wae,” jei Jesús chupe reta.

## Juan 13

### Jesús oyoe jemimboe reta ipi

<sup>1</sup>Añawe koiñoete ma iko pascua iara reta yemimandúa pewa. Jare Jesús uikuaa uwäe ma ara ueya waerä kua iwí oo ye waerä Tu oí wae pe. Jae uauño máí jemimboe reta kua iwí pe ñonoí wae. Jare añawe jae uechakata iko chupe reta kërái jae uauete reta wae.

<sup>2</sup>Añawe pítu ma jare Jesús jemimboe reta ndiwe ukaru päwe yureko reta. Añawasu oñono ma ñee Judas Iscariote ipía pe umee waerä Jesús jowaicho reta pe.

<sup>3</sup>Erëi Jesús uikuaa kawi Tu umee ma chupe mbaepuere opaete mbaembae re. Jare uikuaa wi jae Tumpa wi ou wae, jare uikuaa wi oo yeta ma oí Tumpa pe wae.

<sup>4</sup>Jayawe Jesús upüa, jare omboi iñepëwaka, jare jumbi re uñapíti pëti toalla tuicha wae.

<sup>5</sup>Joko wi jae oñono í pëti ía wasu pe, jare umbipí oyoe jemimboe reta ipi pëti uyeyokui wae rami. Jare pëti pëti oyoe ma ipi yawe, umitini ipi jokua toalla jumbi re onoi wae pipe.

<sup>6</sup>Jare oo uwäe yawe Simón Pedro oí wae pe, Pedro jei chupe: “CheYa, ¿këraita pa nde ndiyoe neí chepi?” jei chupe.

<sup>7</sup>Jayawe Jesús jei chupe: “Kua ayapo aí wae, añawe ndikuaa kawi’ä neí. Erëi taikue rupi ndikuaa kawita neí kuri,” jei chupe. Jayawe Pedro jei chupe: “Che ndarau etei amaño chepi ndiyoe waerä pëti uyeyokui wae rami,” jei chupe.

<sup>8</sup>Jayawe Jesús jei chupe: “Che ndepí ayoe’ä yawe, ndarau etei ndepuere ndiko cheremimboerä,” jei chupe.

<sup>9</sup>Jayawe Pedro jei Jesús pe: “Jayawe, cheYa, iyoe chepo jare chäka wi. Awíye iyoe chepiño,” jei chupe.

<sup>10</sup>Jayawe Jesús jei chupe: “Uyau ma wae ipiño ma oyoeta, echa’ä jete ikia’ä ma oí. Jare pe reta ikia mbae ma ko. Erëi ime pëti pepite pe ikia reweño oí Tumpa koti wae,” jei chupe reta.

<sup>11</sup>Jesús uikuaa kawi iko kía nunga etei umeeta jowaicho reta pe wae. Jare jokua jeko pewa yepe jei: “Ime pëti pepite pe ikia reweño oí Tumpa koti wae.”

<sup>12</sup>Jayawe opa ma jemimboe reta ipi oyoe yawe, Jesús omonde ye iñepëwaka jare oo uwapi ye jenda pe. Jare upirandu chupe reta: “¿Pikuaa kawi pa peí kua mbae che ayapo pewe wae re?”

<sup>13</sup>Pe reta pere chewe ‘CheYa,’ jare pere wi ‘Oporomboe wae.’ Jare añetete jupi ko pere chewe waerä jukuärái, echa’ä che ko jae peYa jare pemboea,” jei chupe reta. <sup>14</sup>“Erëi yepe tēi che ko jae peYa jare pemboea, erëi che ayoe pewi pepi reta. Jáeramo ikawi ko pe reta piyapo waerä peyupe wi jukuärái.

<sup>15</sup>Echa’ä che kua ayapo aikuaaka waerä pewe, pe reta wi piyapo waerä jukuärái,” jei chupe reta.

<sup>16</sup>“Yande yaikuaa kawi ñai pēti pione ndarau uasa ipatrón jei wae iáramo rupi. Jae ramiño wi pēti ñeeruwataa ndarau uasa ombou wae jei wae iáramo rupi,” jei chupe reta. “Añawe che peYarä ai wae añemimichi ma pewe pēti uyeyokui wae rami. Jayawe jukuäraita ko pe reta wi piyapota ñru wae reta pe,” jei chupe reta.

<sup>17</sup>“Añawe pe reta pikuaa kawi kua mbaembae reta. Jayawe kua mbaembae reta piyapo yawe, piyekoueteta ko pei kuri,” jei Jesús chupe reta.

### **Judas umeeta Jesús jowaicho reta pe**

*(Mateo 26.20-25; Marcos 14.17-21; Lucas 22.21-23)*

<sup>18</sup>“Erëi che aikuaa mbaeti ko opaete pe reta piyekoueteta jukuärái,” jei. “Che pukuaa kawi ko puparawo ramo wiwe. Jare aikuaa wi pēti pepite pe oi wae chemeta cherowaicho reta pe, echa’ä imeta ko uyeyapo kërái Tumpa ñeeriru pe arakae uyekuatía iko wae rami. Echa’ä joko pe uyekuatía oi kuärái: ‘Jokua ukaruse che ndiwe wae añawe uyerowa chewi jare chemee cherowaicho reta pe.’ Jukuärái uyekuatía oi,” jei chupe reta.

<sup>19</sup>“Kua animbeu ma pewe añawe ndei uyeyapo mbowe. Echa’ä jukuärái uyeyapo ma yawe, perowia waerä CHE KO CHE wae,” jei chupe reta.

<sup>20</sup>“Che tae pewe añetete wae, che amondo yawe kía umimbeu waerä cheré, jare kía wirowia jese yawe, cheré etei ko wirowia oi. Jare jokua cheré wirowia wae, chembou wae re etei ko wirowia oi wi,” jei Jesús jemimboe reta pe.

<sup>21</sup>Kua jei ma yawe, Jesús tuicha ipiatiti jare jei wi chupe reta: “Che tae pewe añetete wae, pēti yandepite pe oi wae chemeta oi cherowaicho reta pe,” jei chupe reta.

<sup>22</sup>Jayawe Jesús jemimboe reta umbipi umae iyé reta pēti pēti wae. Jae reta uikuaa’ä kía re etei ra uyemingeta iko wae.

<sup>23</sup>Pēti wae Jesús jemimboe – jae ko uauete wae – ukaru iko iyipi pe.

<sup>24</sup>Jayawe jokua jemimboe pe Simón Pedro jowa umiatamiata upiranduka waerä Jesús pe kía re etei ra uyemingeta iko.

<sup>25</sup>Jayawe jokua kuimbae oya katu jese jare upirandu wiari chupe: “CheYa, ¿kía etei pa ko jae nemeeta oi wae?”

<sup>26</sup>Jare Jesús jei chupe: “Che ameeta chupe mbiyape peraso mii amäki ma tembiu pe wae. Jokua etei ko jae,” jei chupe. Jayawe Jesús uipisi mbiyape jare upisäa. Joko wi umäki peraso mii tembiu pe jare umee Judas pe – jae ko Simón Iscariote tai.

<sup>27</sup>Jare Judas jou. Jare jou ma yawe, jupiwoiño uike Satanás ipia pe. Jayawe Jesús jei chupe: “Iyapo woi jokua ndiyapota wae,” jei chupe.

<sup>28-29</sup>Jare joko pe ñonoï wae reta uyandu tēi kua Jesús jei Judas pe wae. Erēi jae reta wirowia tēi Jesús oyokui ma Judas oo owa waerä tembiurä ani aramoi umee waerä mbae iparawete wae reta pe. Jukuärái wirowia reta tēi, echa’ä Judas uyandarekose opaete jae reta ikorepoti re.

<sup>30</sup>Erēitu Judas opa ma jou yawe mbiyape, upüa oē oo chuwi reta. Jare pītu ma iko.

### **Jesús jei mbae ipiau wae uyapo reta waerä**

<sup>31</sup>Jayawe oē ma oo yawe Judas, Jesús jei: “Añawe ramo che kuimbaerä ayeyapo wae cheree uyembutuichakata oï. Jare Tumpa jee uyembutuichakata oï wi che rupi.

<sup>32</sup>Jare Tumpa jee uyembutuichakata oï che rupi ramo, jayawe jae cheree umbutuichakata oï wi jae ndiwe. Jare imambaño jae uyapota oï jokua,” jei chupe reta.

<sup>33</sup>“Mase cheriwi mii reta, michi pewaño ma aïta pe reta ndiwe. Koiñoete ma ou oï ara pe reta chereka tēi waerä. Erēi pe reta pepuere’ä peo parawete che ata aï wae pe. Jukuärái che jae judío itenondewa reta pe wi, jare añawe jukuäriete wi che jae aï pewe,” jei chupe reta.

<sup>34</sup>“Añawe che aikuaaka aï pewe mbae ipiau wae piyapo waerä. Jae ko kua: Piyerauta ko päwe rewe. Piyerau päwe kërái che puau rami.

<sup>35</sup>Jare jukuärái piyerau yawe, opaete wae reta uikuaata pe reta ko jae cheremimboe reta wae,” jei Jesús chupe reta.

### **Jesús umimbeu Pedro pe uikuakuta oï wae**

*(Mateo 26.31-35; Marcos 14.27-31; Lucas 22.31-34)*

<sup>36</sup>Jayawe Simón Pedro jei Jesús pe: “CheYa, ¿keti pa ndeota?” jei chupe. Jare Jesús jei chupe: “Ndarau añawe ndepuere ndeo che ata wae pe. Erēi taikue rupi ndeota neï kuri joko pe,” jei chupe.

<sup>37</sup>Jayawe Pedro jei: “CheYa, ¿maera pa chepuereta’ä a nde ndiwe añawe? Che tamee cherekowe nderepi waerä,” jei chupe.

<sup>38</sup>“¿Añetete nemanota ra cheré?” jei Jesús. “Che tae ndewe añetete wae, ndei uru kuimbae uñee mbowe, mbapi wese ma nde chekuakuta neï kuri,” jei chupe.

## **Juan 14**

### **Jesús ko jae tape Tumpa pe oo wae**

<sup>1</sup>Jayawe Jesús jei wi jemimboe reta pe: “Awiye pepiatiti. Perowia Tumpa re jare perowia wi cheré,” jei chupe reta.

<sup>2</sup>“CheRu jëta pe ime jeta o, jare uepiti oï opaete pewarä. Jukuärai’ä yawe, amimbeuta tēi ko pewe. Che ata ma aï joko pe ayapikatu waerä kiae peïta che ndiwe wae.

<sup>3</sup>Jare opa ma ayapikatu yawe, ayu yeta aï puraa waerä joko pe, pe reta wi piko waerä kiape che aïta wae pe.

<sup>4</sup>Pe reta pikuaa jokua tape kerupi ata wae,” jei chupe reta.

<sup>5</sup>Jayawe Tomás jei chupe: “OreYa, ¿këraita ra ore nduikuaa jokua tape? Echa’ä ore nduikuaa’ä keti ra ndeota neï wae,” jei chupe.

<sup>6</sup>Jare Jesús jei chupe: “Che ko jae tape Tumpa koti oo wae. Che ko jae añetete ayemingeta Tumpa rewa wae. Cheño ko jae tekowe opa mbae wae amee wae. Jare kiawe ipuere’ä oya cheRu re – jaeño che rupi,” jei chupe.

<sup>7</sup>“Pe reta chekuaa kawi yawe, pikuaata tõi ko cheRu wi. Erëi añawe wiwe pikuaa ko cheRu, echa’ä pecha ma,” jei chupe reta.

<sup>8</sup>Jayawe Felipe jei Jesús pe: “OreYa, echaka mii orewe ndeRu. Jokuaño nduipota,” jei chupe.

<sup>9</sup>Jare Jesús jei chupe: “Che ima ma aï pe reta ndiwe. ¿Këraita pa nde chekuaa’ä, Felipe?” jei chupe. “Kía cherecha wae, uecha ma ko cheRu. ¿Këraita pa nde ndere neï chewe, ‘Echaka mii orewe ndeRu?’” jei chupe.

<sup>10</sup>“¿Mbaeti yerá nderowia che aï cheRu ndiwe jare cheRu oï che ndiwe wae? Kua ñee reta amimbeu aï pewe wae ou’ä ko chewiño. CheRu wi ko ou. CheRu pëtiño ko che ndiwe, jare jae ko uparawiki oï che rupi,” jei.

<sup>11</sup>“Che jae ma pewe, ‘che aï cheRu ndiwe jare cheRu oï che ndiwe wi.’ Kua aipota perowia. Erëi aramoi pipota’ä perowia yawe kua chiñee re etei, chererowia yepe kua mbaembae che ayapo aï wae re,” jei chupe reta.

<sup>12</sup>“Che jae aï pewe añetete wae, jokua cheré wirowia wae reta uyapota wi kua nunga mbaembae che ayapo wae etei. Añetete jae reta uyapota tuichaete ye mbaembae chewi, echa’ä che ata aï cheRu oï wae pe jare joko wi che amborita reta,” jei chupe reta.<sup>13</sup>“Jayawe ipotawe mbae re pe reta piyerure yawe cheRu pe cheree re, che ayapota aï. Echa’ä jukuärái ayapota cheRu jee uyembutuichaka waerä.

<sup>14</sup>Piyerure yawe ipotawe mbae re cheree re, che ayapota aï pewe,” jei Jesús chupe reta.

### **Jesús jei Espíritu Santo outa oï**

<sup>15</sup>Jare Jesús jei wi jemimboe reta pe: “Pe reta añetete cherau yawe, jayawe piyapota peï che jae wae rupi.

<sup>16</sup>Jare che aekata aï cheRu pe jae ombou waerä pewe iiru jokua nungaete Oporombori wae oï waerä pe reta ndiwe jaeño mái pewa.

<sup>17</sup>Jae ko Espíritu Santo,” jei. “Jae uikuaakata oï pewe añetete wae. Erëi cheré wirowia mbae wae reta ndarau uipota Espíritu Santo, echa’ä jae reta uecha’ä jare

uikuaa'ä ramo. Erëi pe reta pikuaa Espíritu Santo, echa'ä jae oï pe reta ndiwe jare oïta pepia pe," jei chupe reta.

18“Che a yeta ma pewi, erëi che pueyata'ä aï peño pe etei kía jëtara mbae wae reta rami. Echa'ä che ayu yeta aï aiko waerä pe reta ndiwe,” jei chupe reta.

19“Ndei ima mbowe, kua iwi jeko rupi yureko wae reta ndarau ye ma cherecha. Erëi pe reta cherecha yeta peï kuri. Jare che aikowe yeta aï ramo, pe reta penoita wi tekowe ipiau wae.

20Jare jokua ara ramo pikuaa kawita che aï cheRu ndiwe wae, jare pe reta peï che ndiwe wae, jare che aï pe reta ndiwe wae,” jei chupe reta.

21“Ime yawe kía che jae wae uikuaa jare uyapo wae, jae cherau ko. Jare cheRu uauta jokua cherau wae, jare che auta wi. Jare ayekuaakata chupe kía etei ko che wae,” jei chupe reta.

22Jayawe Judas (kua jae'ä ko Judas Iscariote) jei chupe: “OreYa, ¿këraita pa oreweño ndiyekuaakata nei? ¿Maera pa ndiyekuaakata'ä opaete wae jowake?” jei chupe.

23Jare Jesús jei chupe: “Cherau wae uyapota chiñee rupi. Jare cheRu uauta jae. Jare che jare cheRu mokui rewe ndoyuta nduiko waerä jae ndiwe. Jayawe che ayekuaakata chupe,” jei.

24“Erëi cherau'ä wae reta ndarau uyapo chiñee rupi. Jáeramo, ¿maera pa ayekuaakata chupe reta jayawe?” jei. “Kua aporomboe aï wae chiñeeño'ä ko. Jae ko cheRu chembou wae iñee etei,” jei Jesús chupe reta.

25“Kua mbaembae aikuaaka aï pewe añawe pe reta ndiwe aï rambuewe,” jei.

26“Jare outa oï wi jokua Oporombori wae – jae ko Espíritu Santo cheRu ombouta oï pewe cheree re wae. Jare jae ou yawe, pemboeta oï opaete mbaembae Tumpa uipota pikuaa waerä wae re. Jare jae pemimanduata oï wi opaete mbaembae che pomboe ma jese wae re,” jei chupe reta.

27“Añawe che pueya aï pepiakatu rewe. Kërái chepiakatu aï rami, jukuárái wi ayapo pewe pepiakatu waerä añetete pewa. Kua iwi pewa reta 'ndepiakatu,' jei yandewe yawe, jae reta uyemingetaiño ñonoï. Erëi che ayapota pepiakatu waerä añetete pewa. Jáeramo awiye pepiatiti mbae uasata oï wae re, jare awiye wi pekiye chuwi,” jei chupe reta.

28“Che jae ma pewe: ‘Che ata ma jare ayu yeta aiko waerä pe reta ndiwe.’ Jukuárái amimbeu pewe. Jare pe reta añetete cherau yawe, piyerowiata tëi ko, echa'ä che a yeta ma aï cheRu oï wae pe. Jare cheRu imbaepuere tuichaete chewi,” jei chupe reta.

29“Kua mbaembae amimbeu ma pewe añawe ndei uyeyapo mbowe. Echa'ä jukuárái uyeyapo ma yawe, perowia waerä cheré,” jei chupe reta.

<sup>30</sup>“Ndarau ma jekuaeño ima ayemingeta ai pe reta ndiwe. Echa’ä uwäe ma ara che aiporara waerä kua iwi imburuwicha ipo pe – jae ko Añawasu. Erëi jae ndarau etei ipuere cheré,” jei chupe reta.

<sup>31</sup>“Erëitu kua uyeyapota oi cheRu jei ramo. Jáeramo che añemee ai ayapo waerä cheRu jei wae, echa’ä aipota opaete iwi pewa reta uikuaa waerä auete ko cheRu wae,” jei Jesús jemimboe reta pe. Jare Jesús kua opa ma jei yawe, jei chupe reta: “Pepüa. Ya ma kua wi.”

## Juan 15

### Jesús ko jae uva iyipi añetete wae rami

<sup>1</sup>Joko wi Jesús jei jemimboe reta pe umbijaanga rewe: “Che ko jae uva iyipi añetete wae. Jare cheRu ko jae uva iyandarekoa. Jare opaete cheremimboe reta ko jae uva jáka reta,” jei chupe reta.

<sup>2</sup>“Opaete jáka ía mbae oi cheré wae reta, cheRu uyasiata. Jare opaete jáka ía oi cheré wae reta, cheRu uitiota jare oyoeta taikue rupi ía kawiete waerä,” jei chupe reta.

<sup>3</sup>“Jare pe reta ko jae jokua uva jáka uyeyoe wae rami, echa’ä añawe che pomboe wae japo kawi ma pepia pe jare pekia mbae pei Tumpa koti,” jei chupe reta.

<sup>4</sup>“Jekuaeño piñemiiru che ndiwe, jare che jekuaeño añemiiruta ai pe reta ndiwe. Jare jukuärái uyekuaata peré Tumpa jeko ikawi wae,” jei. “Yambijaanga. Yande yaikuaa kawi ñai jaeño uva jáka uyepisi oi iyipi re wae reta ipuere ía. Jare pëti jáka uyepisi’ä oi yawe iyipi re, ndarau ma ía,” jei. “Jae ramiño wi pe reta mbaeti yawe jekuaeño piñemiiru kawi che ndiwe, ndarau uyekuaa peré Tumpa jeko ikawi wae,” jei chupe reta.

<sup>5</sup>“Che ko jae uva iyipi rami, jare pe reta ko jae jáka reta rami. Jekuaeño piñemiiru kawi yawe che ndiwe, uyekuaata oi peré Tumpa jeko ikawi wae, echa’ä che jekuaeño aita pe reta ndiwe pombori waerä. Añetete pe retaiño ndarau pepuere piyapo mbae ikawi wae Tumpa pewarä che pombori mbae rewe,” jei chupe reta.

<sup>6</sup>“Erëi ime yawe kía mbaeti jekuaeño uñemiiru kawi che ndiwe wae, uyemombota pëti iwira jáka uyeyasia uyemombo wae rami. Jokua nunga jáka reta opa ma utini yawe, uyembatita jare uyemombota tata pe opa okai waerä,” jei chupe reta.

<sup>7</sup>“Erëi pe reta jekuaeño piñemiiru kawi yawe che ndiwe jare jekuaeño piyapo yawe che pomboe wae rupi, jayawe pepuereta piyerure cheRu pe ipotawe mbae pipota wae re, jare cheRu uyapota oi pewe,” jei chupe reta.

<sup>8</sup>“Jare jekuaeño piñemiiru kawi yawe che ndiwe, uyekuaata oi peré Tumpa jeko ikawi wae. Jare jukuärái rupi uyekuaata pe reta ko jae cheremimboe reta wae. Jare jukuärái cheRu jee uyembutuichakata oi,” jei chupe reta.

<sup>9</sup>“Kërai cheRu cherau rami, jukuäriete wi che puau. Jayawe jekuaeño piko che puau wae re.



<sup>10</sup>¿Kërái ra pikota jukuärái? Pe reta piko yawe che jae wae rupi, jayawe jekuaeño piyekouta peï kuri che puau wae re. Jukuärái wi che jekuaeño ayekou aï cheRu cherau wae re, echa’ä che aiko jae jei wae rupi,” jei chupe reta.

<sup>11</sup>“Kua mbaembae jae ma pewe piyerowiaete waerä. Che ayerowiaete aï, jare che aipota wi pe reta penoi waerä kua yerowia che anoi wae,” jei Jesús jemimboe reta pe.

<sup>12</sup>“Jare kua ko che jae aï pewe piyapo waerä: piyerau päwe kërái che puau rami.

<sup>13</sup>Jare kía umee jekowe iru re yawe, uechaka ma chupe uauete wae. Mbaeti ye ma kërái uechaka waerä tuicha rupi uau wae,” jei chupe reta.

<sup>14</sup>“Jare pe reta ko jae cheïru reta piyapo yawe kua che jae pewe wae.

<sup>15</sup>Ndarau ye ma jae pewe uyeyokui wae reta, echa’ä uyeyokui wae reta uikuaa’ä opaete mbaembae ipatrón uipota uyapo wae. Ipatrón uikuaaka’ä chupe reta opaete,” jei. “Erëi che aikuaaka ma pewe opaete cheRu uikuaaka chewe wae. Jáeramo añawe che tae pewe cheïru reta ko,” jei chupe reta.

<sup>16</sup>“Pe reta’ä ko cheparawo. Che ko puparawo, jare amee ma pewe mbarawiki – jae ko opaete kerupi peo wae rupi Tumpa jeko ikawi wae tuyekuaa jeta peré. Jare jekuaeño jukuärái tuiko. Jare jayawe cheRu uyapota oï pewe ipotawe mbae piyerure jese cheree re wae,” jei chupe reta.

<sup>17</sup>“Jayawe kua ko che jae aï pewe piyapo waerä: ¡Piyerau päwe!” jei Jesús jemimboe reta pe.

### **Jeta wae reta uñamitääta Jesús jare jemimboe reta**

<sup>18</sup>Jesús jei wi jemimboe reta pe: “Kua iwi pewa reta opaete seri oyowaicho ñonoï Tumpa koti. Jayawe jae reta peamitää yawe, pemandúa kawi che rani ko cheamitää reta,” jei chupe reta.

<sup>19</sup>“Pe reta piko yawe jae reta rami, jae reta perauta tēi. Erëi pe reta mbaeti ma ko peï jae reta rami, echa’ä che puparawo ma jae reta ipite wi piko waerä chemaerä. Jokua jeko pewa ko jae reta peamitää,” jei chupe reta.

<sup>20</sup>“Añetete jae reta peamitääta ñonoï. Pemandúa kawi, che jae ma pewe pēti pione ndarau uasa ipatrón iáramo rupi. Jayawe kërái uyapo chewe reta rami, jukuäriete wi uyapota pewe reta. Jae reta uyapo yawe mbae kachi wae chewe, jukuäriete ko uyapota pewe reta wi. Jare jae reta chiñee uipisi yawe, jukuäriete ko uipisita reta piñee wi,” jei chupe reta.

<sup>21</sup>“Erëi jae reta uiporarakata pewe cheré perowia ramo, echa’ä uikuaa’ä reta kía ko chembou wae,” jei chupe reta.

<sup>22-24</sup>“Che ayu jare aikuaaka kawi ma chupe reta tēi Tumpa rewa. Jare che aechaka tēi ma chupe reta mbaembae kiawe ipuere’ä uyapo wae. Erëitu yepe tēi uecha reta jare uyandu reta, jeseuwe cheamitääñoi reta. Jáeramo ime onoi reta teko jare ndarau etei ipuere uyerepi reta Tumpa jowai,” jei chupe reta. “Jare cheño’ä ko cheamitää

reta. Jae reta uñamitää wi cheRu. Echa'ä kía cheamitää wae, uñamitää ko wi cheRu. Jáeramo jae reta tuicha onoi teko.

<sup>25</sup>Erëi kua uyeyapo ñotái ko, echa'ä uyekuatía oï Tumpa iñeeriru jae reta umingeta tēi wae pe kuärái: 'Cheamitää reta chereko mbae rewe.' Jukuärái uyekuatía oï," jei Jesús chupe reta.

<sup>26</sup>"Erëi che a ye ma yawe cheRu oï wae pe, joko wi che etei abouta aï pewe jokua Oporombori wae. Jae ko Espíritu Santo, jare jae cheRu wi etei ko outa oï. Jare jae uwäe yawe, uikuaakata oï che rewa jupi rupi, echa'ä jae jekuaeño uikuaaka añetete wae," jei chupe reta.

<sup>27</sup>"Jare pe reta wi chemieräkuata, echa'ä pe reta piko ma che ndiwe aporomboe ramo rupiwe jare pecha ma opaete mbae ayapo wae," jei Jesús jemimboe reta pe.

## Juan 16

<sup>1</sup>Jare Jesús jei wi jemimboe reta pe: "Opaete che kua jae ma pewe awiye waerä piyerowa Tumpa wi mbaesusere reta ou pewe yawe.

<sup>2</sup>Echa'ä cheré wirowia mbae wae reta pemombota perenoi petupao reta wi. Jare wi uwäeta ara pemano waerä jae reta ipo pe. Jare jae reta wirowiata tēi Tumpa pe ko uyeyokui ñonoï peyuka yawe," jei chupe reta.

<sup>3</sup>"Kua uyapota pewe reta, echa'ä jae reta chekuaa'ä jare uikuaa'ä wi cheRu.

<sup>4</sup>Erëi che amimbeu ma pewe kua ndei uyeyapo mbowe pemandúa waerä kua chiñee re jokua ara uwäe ma yawe," jei chupe reta.

### Espíritu Santo mbarawiki uyapota wae

"Kua mbaembae reta amimbeu'ä pewe tenonde wiwe, echa'ä che aiko pe reta ndiwe ramo jare puepi opa mbaembae wi.

<sup>5</sup>Erëi añawe a yeta pewi chembou wae pe, jare pēti awe pe reta pepirandu'ä pei chewe keti ra ata aï wae.

<sup>6</sup>Jare pepiatiti pei kua che jae pewe wae jeko pewa," jei chupe reta.

<sup>7</sup>"Erëi che tae pewe añetete wae, ikawita ko pewe che a ye waerä. Echa'ä che a yewi'ä yawe, ndarau ou pewe jokua Oporombori wae. Erëi a ye yawe, abouta pewe ara wi," jei chupe reta.

<sup>8</sup>"Kua iwi pewa reta uikuaa kawi'ä mbae ra ko jae ikawi wae jare mbae ra ko jae kachi wae Tumpa jowai. Jare uikuaa'ä reta kërái pēti ara jae reta uyemboita ñonoï Tumpa jowai jae jei waerä jae reta jeko re. Erëi Oporombori wae ou yawe, jae uikuaaka kawita chupe reta kërái uyawi ñonoï jokua mbaembae rewa," jei chupe reta.

<sup>9</sup>"Jae uikuaaka kawita chupe reta mbae kachi wae ko Tumpa jowai chereriro ma reta wae.

**10**Jare che a ye ma yawe cheRu oï wae pe jare pe reta cherecha'ä ma yawe, Oporombori wae uikuaakata oï iwi pewa reta pe añetete yepe che ko jae jupi wae," jei.

**11**"Jare jae reta uikuaa'ä wi pëti ara jae reta uyemboita ñonoï Tumpa jowai, jare Tumpa jeita jae reta uiporara waerä mbaembae uyawi reta ikoti wae re. Kua uyeyapo ñotái oï, echa'ä añawe uyembipi ma oï jae reta imburuwicha ndiwe. Añawe Tumpa jei ma Añawasú uiporara ñotái ko oï, jare jokua Tumpa jei wae jaeño mái jei. Jokua ko jae mbapi mbaembae reta Espiritu Santo uikuaakata oï kuri iwi pewa reta pe jae ou ma yawe," jei Jesús jemimboe reta pe.

**12**"Ime tēi che anoi jeta mbaembae aikuaaka pewe waerä. Erëitu jokua uasaete ma oï pe reta pikuaa kawí waerä aramoete," jei chupe reta.

**13**"Erëi Espiritu Santo ou ma yawe, jae pembiarakuaa kawita añetete wae rewa. Echa'ä ñee jae uikuaakata oï pewe wae jae ñeeño'ä ko. Tumpa jei chupe wae, jokua ko uikuaaka yuapi yeta oï pewe. Jare jae uikuaakata oï wi pewe mbaembae taikue rupi uasata oï kuri wae," jei.

**14**"Jare jokuaño'ä ko. Jae nunga wi Espiritu Santo uikuaakata oï pewe che aikuaaka chupe wae, jare jukuärái jae cheree umbutuichakata oï," jei chupe reta.

**15**"Opaete cheRu ñee, jae ko chiñee wi. Jáeramo, che jae pewe, Espiritu Santo uikuaakata oï pewe che aikuaaka chupe wae," jei Jesús jemimboe reta pe.

### **Jemimboe reta ipiatiti, erëi taikue mii rupi uyerowiata reta**

**16**Joko wi Jesús jei chupe reta: "Michi pewaño ma pe reta cherechata peï. Erëi imambae cherecha yeta peï kuri," jei chupe reta.

**17**Jayawe jemimboe reta umbipi upirandu iyupe reta kuärái: "¿Mbae ra uipota jokua jei? ¿Këraita ra michi pewaño ma yaecha ñaï jare imambae yaecha yeta? Jare jae nunga wi jei, 'Che a yeta cheRu pe,' jei. ¿Mbae ra uipota jokua jei?"

**18**Jare ¿mbae ra uipota jei wi, 'Michi pewaño ma,' jei wae? ¿Kërái ra jokua?" jei reta iyupe.

**19**Jesús uikuaa jae reta uipota tēi upirandu chupe kua mbaembae re. Jáeramo jei chupe reta: "Che jae pewe, 'Michi pewaño ma pe reta cherechata peï. Erëi imambae cherecha yeta peï kuri,' jae pewe. Jare añawe pe reta pepirandu peï peyupe mbae ra uipota jei jokua," jei chupe reta.

**20**"Che tae pewe añetete wae, imambaeño ata aï pewi. Jare jayawe cheré wirowia mbae wae reta tuicha rupi uyerowiata jokua re. Erëi pe reta pepiatitita jare piyaota peï jokua re. Erëi pepitata'ä peï jukuäraino. Taikue mii rupi piyerowiata peï," jei chupe reta.

**21**"Yande reta yaikuaa kawí ñaï pëti kuña imembi oata ma oï yawe, jasi chupe jare uyao jokua re. Erëi imembi oa ma yawe, imandua'ä ma jokua jasi chupe wae re. Echa'ä uyerowia oï imembi oa ramo," jei chupe reta.

22“Jare jukuärái wi pe reta añawe pepiatiti peï, echa’ä che ata ma aï pewi ramo. Erëi che puecha yeta aï, jare jokua ara ramo pe reta piyerowia yeta peï kuri. Jare ndarau kiawe ipuere upïro pewi jokua yerowia.

23Jare ndarau ma pepirandu chewe kua mbaembae re,” jei chupe reta. “Che tae pewe añetete wae, pe reta cheree re pepuereta piyerure ipotawe mbae re cheRu pe, jare cheRu uyapota pewe,” jei chupe reta.

24“Ndeïño peka Tumpa pe mbae cheree re. Erëi añawe piyerure chupe cheree re, jare cheRu uyapota oï pewe tuicha rupi piyerowia waerä,” jei Jesús chupe reta.

25“Añawe amimbeu ma pewe jeta mbaembae re ambijaanga rewe. Erëi uwäeta ma ara amimbeu waerä pewe simi kawi cheRu rewa. Ndarau ye ma ayemingeta pewe ambijaanga rewe,” jei chupe reta.

26“Jokua ara ramo piyerureta Tumpa pe mbaembae cheree re. Jare pepuereta piyerure chupe etei. Piyerureta’ä chewe che ayerure waerä peré cheRu pe.

27Echa’ä cheRu etei perau, echa’ä pe reta cherau jare perowia che ayu cheRu wi ramo,” jei chupe reta.

28“CheRu wi etei ko ayu kua iwi pe. Jare añawe a yeta ma aï kua iwi wi cheRu oï wae pe,” jei Jesús chupe reta.

29Jayawe Jesús jemimboe reta jei chupe: “Añawe ramo nemimbeu kawi ma neï orewe nembijaanga mbae rewe,” jei reta.

30“Añawe ramo nduikuaa kawi nde ndikuaa ko opaete mbaembae wae. Jare nde neäro’ä kía upirandu waerä ndewe mbae re ndikuaa waerä chuwi ipiyemingeta. Jáeramo ore ndorowia nde ndeyu ko Tumpa wi,” jei reta chupe.

31Jayawe Jesús jei chupe reta: “¿Añetete ra perowia ma peï añawe?”

32Mase, uwäeta ma ara – jae ko añawe etei – pe reta opa piñemiái waerä. Pe reta opata chereya cheño pe etei jare pëti pëti pe reta opata peo ye perëtarëta rupi. Erëi añetete ndarau aï cheño pe etei, echa’ä cheRu oï che ndiwe,” jei chupe reta.

33“Jare che jae aï pewe kua mbaembae piko waerä pepiakatu rewe che rupi. Kua iwi pe peï rambuewe, pe reta piporarata peï. Erëi piñemikirëi, echa’ä che amiamiri ma towaicho kua iwi pewa,” jei chupe reta.

## Juan 17

### Jesús uyerure Tu pe jemimboe reta re

1Kua jei ma yawe, Jesús jowaiwa ara koti umae jare jei: “CheRu mii, uwäe ma ara che amano waerä,” jei. “Añawe kua mbae asata aï wae rupi, ikuaaka mii che ndeRairä aiko wae cheree tuichaete ye ko wae. Jayawe chepuereta aikuaaka nderee tuichaete ye ko wi,” jei.

- 2“Jukuärái ayapota, echa’ä che ameeta tekowe opa mbae wae opaete nde neme che wae reta pe. Jukuärái chepuere ayapo, echa’ä nde chapo opaete wae iYarä ramo,” jei.
- 3“Jare ¿mbae ra jokua tekowe opa mbae? Nde ko jae pëtiño Tumpa añetete wae, jare che ko jae Jesucristo nde chembou wae. Tayandekuaa reta. Jokua ko jae tekowe opa mbae wae,” jei.
- 4“Añawe che opa ma ayapo mbarawiki nde neme che wae. Jare jukuärái ambutuichaka ma nderee kua iwi pewa reta jowake,” jei.
- 5“Jare añawe, cheRu, a yeta ma aï ndepi kiape aikose wae pe ndei iwi uyeyapo mbowe. Chemandúa kawi, che aikose nde ndiwe yawe, yande yayembutuichaka päwe yaiko. Añawe iyapo mii yayembutuichaka päwe ye waerä kërái yaikose wae rami,” jei.
- 6“Kua cheremimboe mii reta, nde neme ma che wae iwi pewa reta ipite wi. Jae reta nembae ko, jare nde neme che wae wi,” jei. “Añawe che amimbeu kawi ma chupe reta nde rewa, jare jae reta uyapo ma nde ndere wae.
- 7-8Jae nunga wi che amimbeu kawi ma chupe reta niñee nde neme che wae, jare jae reta wirowia ma jese. Añawe ramo jae reta uikuaa jokua ñee ndewi etei ko ou wae. Uikuaa kawi reta che ndewi ko ayu wae, jare wirowia reta ma nde ko chembou wae,” jei.
- 9“Kua kuimbae reta ndiyapo ma nemaerä jare nde neme che wae wi. Jáeramo che ayerure aï ndewe jese reta. Ayerure’ä aï ndewe opaete iwi pewa reta re,” jei.
- 10“Opaete chembae reta nembae ko wi. Jare opaete nembae reta chembae ko wi. Jare jae reta mbaembae uyapo wae rupi cheree uyembutuichaka oï,” jei.
- 11“CheRu jupiete ye wae, che mbaetita ma jekuaeño aï kua iwi pe, echa’ä a yeta ma aï ndepi ramo. Erëi kua kuimbae mii reta upitañota kua iwi pe. Jáeramo aeka aï ndewe ndiyandareko kawi waerä jese reta nembae puere rupi – jokua nunga mbaepuere nde neme che wae wi,” jei. “Iyandareko jese reta, jae reta yureko waerä pëti ramiño kërái yande pëti ramiño ñaï rami,” jei.
- 12“Che aiko rambuwe jae reta ndiwe, ayandareko kawi jese reta jokua mbaepuere nde neme che wae rupi. Amae kawi jese reta awiye waerä pëti awe ukañi ndewi. Erëi ime oï kua reta ipite pe kía jaeño mái pewa uiporarata oï Tatawasurenda pe wae, echa’ä niñee pe uyekuatía oï jokua uasa ñotái ko,” jei.
- 13“Erëi añawe, cheRu mii, che a yeta ma aï ndepi. Jare ayerure aï ndewe kua mbaembae re cheremimboe reta jowai, jukuärái jae reta uyerowiaete oï waerä che ayerowia rami,” jei.
- 14“Che aikuaaka ma chupe reta niñee. Jare añawe jae reta kua iwi pewa’ä ma ko. Jae reta ko ara pewa che rami. Jáeramo kua iwi jeko rupi yureko wae reta uñamitää,” jei.

15“Mbaeti aeka aï ndewe nde nderaa reta waerä kua iwi wi. Aeka aï ndewe nde ndepi reta waerä Añawasu wi,” jei.

16“Che kua iwi pewa’ä ko, jare jae reta jae nunga wi kua iwi pewa’ä ko. 17Jayawe iñono tee reta jae reta yureko waerä niñee rupi. Echa’ä niñee añetete ko,” jei.

18-19“Che añeñono tee ma amano waerä jese reta. Jare jukuärái jae reta ipuereta uñeñono tee nemaerä añetete rewe,” jei. “Añawe che amondo aï kua reta opaete iwi rupi kërái nde chembou iwi pe rami,” jei.

20“Jare kua reta reño’ä ko ayerure aï ndewe. Aikuaa aï iru wae reta wirowiata cheré jae reta iñee rupi. Jare jokua reta re wi che ayerure aï ndewe,” jei.

21“Ayerure aï ndewe opaete jae reta yureko waerä pëti ramiño. Echa’ä jukuärái ko yande ñaï. Nde jare che pëti ramiño ko ñaï yandiyé. Jare jukuärái wi jae reta tuiko pëti ramiño yanderé. Jukuärái, cheRu mii, kua aeka ndewe ndiyapo waerä kua iwi pewa reta wirowia waerä nde ko chembou wae,” jei.

22“Nde neme ma ko chewe nembraepuere jupiete wae. Jare jokua mbaepuere che amee ma chupe reta wi, jae reta ipuere waerä yureko pëti ramiño kërái yande pëti ramiño ñaï rami,” jei.

23“Che aikota pëti ramiño jae reta ndiwe, jare nde pëti ramiño che ndiwe. Tuiko reta wi pëti ramiño. Echa’ä iwi pewa reta uecha yawe kërái jae reta pëti ramiño ñonoï, jayawe ramo uikuaata reta nde ko chembou wae. Jare uikuaata reta wi nde ndeau ko cheré wirowia wae reta kërái nde cherau rami,” jei.

24“CheRu mii, ndei iwi uyeyapo mbowe, nde cherauño mái jare neme chewe mbaepuere jupiete ye wae. Jare che aipota jokua kía nunga nde neme chewe wae reta yureko waerä che ndiwe kiape che aikota wae pe. Echa’ä che aipota jae reta uecha waerä chembaepuere jupiete ye wae,” jei.

25“CheRu jupiete ye wae, kua iwi pewa reta ndekuaa’ä. Erëi che ndukuaaño mái. Jare kua chermimboe reta uikuaa nde ko chembou wae,” jei.

26“Che aikuaaka ma chupe reta nde rewa, jare jekuaeño che ayapota jukuärái jae reta cherau waerä kërái nde cherau rami. Jare jukuärái che etei aïta jae reta ndiwe. Jukuärái ko ayerure ndewe,” jei Jesús.

## Juan 18

### Uipisi reta Jesús

(Mateo 26.47-56; Marcos 14.43-50; Lucas 22.47-53)

1Jesús opa ma uyerure yawe, uasa jemimboe reta ndiwe iäka wasu Cedrón jee wae jowaicho pe yuraa uwäe reta temiti jenda pe.

2Jare Judas – jae ko jokua kuimbae umee Jesús jowaicho reta pe wae – jae uikuaa wi jokua temiti jenda. Echa’ä Jesús joko pe uyembatiseñoi jemimboe reta ndiwe.

<sup>3</sup>Jayawe Judas oo jokoti sindaro romano reta ndiwe. Jare yuraa reta wi jae jupie amokue fariseo reta jare sacerdote itenondewa reta isindaro reta. Opa yuraa reta mechero rewe jare kispuku rewe uipisi reta waerä Jesús.

<sup>4</sup>Erëi Jesús uikuaa jokua uyeyapota iko chupe wae. Jayawe oo owäiti reta jei rewe: “¿Kía pa peka pei?” jei chupe reta.

<sup>5</sup>“Jesús Nazaret pewa,” jei reta. Jayawe Jesús jei chupe reta: “CHE KO jae.” Jare Judas – jae ko umee jowaicho reta pe wae – uyemboi oï joko pe jae reta ndiwe.

<sup>6</sup>Jare Jesús “CHE KO jae” jei chupe reta yawe, opa usiri reta jaikue koti oa iwi re.

<sup>7</sup>Erëi Jesús jekuae upirandu ye chupe reta: “¿Kía pa peka pei?” jei. “Jesús Nazaret pewa,” jei reta chupe.

<sup>8</sup>Jayawe Jesús jei chupe reta: “Che jae tēi ma pewe CHE KO jae wae. Pe reta cheeño chereka pei yawe, pemaño too ye kua che ndiwe ñonoï wae reta,” jei chupe reta.

<sup>9</sup>Kua jei Jesús uyeyapo waerä tenonde yawe jei Tu pe wae. Echa’ä jae jei chupe: “Che ayandareko kawí nde neme chewe wae reta re. Ndarau pēti awe ukañi chewi,” jei.

<sup>10</sup>Jare Simón Pedro ueru yepē pēti kispuku. Jayawe ueki kispuku aramoño jiru wi jare uiporu sacerdote tenondewaete pe uyeyokui wae re. Jare uyasía chuwi inambi iyakata kotiwa. Kua kuimbae jee Malco.

<sup>11</sup>Jayawe Jesús jei Pedro pe: “Ñono ye ndekispuku jiru pe. CheRu umee chewe aiporara waerä wae, aiporara ñotái ko,” jei chupe.

### **Jesús uyemboi sacerdote tenondewaete ikose wae jowai**

*(Mateo 26.57-58; Marcos 14.53-54; Lucas 22.54)*

<sup>12</sup>Jayawe jokua sindaro reta itenondewa ndiwe uipisi reta Jesús jare uñapiti reta ipo. <sup>13</sup>Jayawe wiraa reta Jesús joko wi sacerdote tenondewaete ikose wae Anás jee wae jēta pe rani – jae ko Caifás jowaya. Caifás jae ko sacerdote tenondewaete jokua año rupi.

<sup>14</sup>Kua Caifás ko jae tenonde yawe jei judío reta pe: “Ikawita ko jokua kuimbae Jesús umano waerä awiye waerä ñanerētara reta opa ukañi romano reta ipo pe.”

### **Pedro uikuaku Jesús**

*(Mateo 26.69-70; Marcos 14.66-68; Lucas 22.55-57)*

<sup>15</sup>Jayawe Jesús jemimboe reta mokui wae – jae ko Simón Pedro jare iru wae – yuraa reta Jesús jaikue rupi. Jare yuraa ma uwäe reta yawe sacerdote tenondewaete jēta pe, kua iru jemimboe uike öke wasu rupi oo uwäe joka pe Jesús jaikue. Echa’ä sacerdote tenondewaete uikuaa jokua kuimbae; jáeramo öke uäro wae umaño jese.

<sup>16</sup>Erëi Pedro upitaño oka pe koiño öke wasu wi. Uasa’ä oo. Jayawe jokua iru jemimboe oē oo umingeta kuñatái öke uäro wae jare uruike Pedro.

<sup>17</sup>Jare kuñatái öke uäro wae jei Pedro pe: “¿Nde jae ko wi Jesús jemimboe?” jei chupe. “Mbaeti. Jae’ä ko che,” jei Pedro chupe.

<sup>18</sup>Jokua pïtu roiete iko. Jáeramo sacerdote tenondewaete pe uyeyokui wae reta jare sindaro reta uyatapi ma yepe reta jokua tëta joka pe jare uyepee yureko reta. Jayawe Pedro wi oya tata re, joko pe uyepee waerä jae reta ndiwe.

### **Anás upirandu Jesús pe**

*(Mateo 26.59-66; Marcos 14.55-64; Lucas 22.66-71)*

<sup>19</sup>Jare jokua rambuwe sacerdote tenondewaete umbipi upirandu Jesús pe jae oporomboe wae re jare jemimboe reta re.

<sup>20</sup>Jayawe Jesús jei chupe: “Che ayemingeta ko opaete wae jowake. Jekuaeño aporomboe tupao reta pe jare tupao wasu joka pe kiape opaete wae uyembatiñoi wae pe. Che ayemingeta wiari’ä etei,” jei chupe.

<sup>21</sup>“¿Maera pa chewe ndiyapo nei kua mbirandu reta? Añetete ndipota ndikuaa yawe kua ndepirandu nei chewe wae, epirandu jokua uyapisaka cheré wae reta pe. Echa’ä jae reta uikuaa mbae re che ayemingeta wae,” jei chupe.

<sup>22</sup>Jesús kua jei ma yawe, pëti sindaro tupao wasu iyandarekoa owapete Jesús jare jei chupe: “¿Kiaete pa nde jukuärái ndiyemingeta waerä sacerdote tenondewaete pe?” jei chupe.

<sup>23</sup>Jayawe Jesús jei chupe: “Awiyeta tëi ko cherowapete, echa’ä che ayemingeta ko jupi rupi. Erëi che ayemingeta kawi’ä ai yawe, jayawe emimbeu opaete wae pe kiape ra ayemingeta kawi’ä,” jei chupe.

<sup>24</sup>Jayawe Anás omondo Jesús uñeñapiti rewe sacerdote tenondewaete Caifás oi wae pe.

### **Pedro uikuaku ye Jesús**

*(Mateo 26.71-75; Marcos 14.69-72; Lucas 22.58-62)*

<sup>25</sup>Jare Simón Pedro imeño uyepee iko tataipi pe. Jayawe ïru wae reta upirandu chupe: “¿Nde jae ko wi Jesús jemimboe?” jei chupe. Erëi Pedro uikuaku jare jei: “Jae’ä ko che.”

<sup>26</sup>Jare joko pe ime iko wi Pedro uyasía chuwi inambi wae jëtara. Jae ko sacerdote tenondewaete pe uyeyokui wae wi. Jare jae jei Pedro pe: “¿Nde jae’ä yerá che nduecha temiti reta jenda pe Jesús ndiwe wae?” jei chupe.

<sup>27</sup>Jayawe Pedro jekuae uikuaku ye. Jare jupiwoiño pëti uru kuimbae uñee.

### **Jesús uyemboi Pilato jowai**

*(Mateo 27.1-2,11-14; Marcos 15.1-5; Lucas 23.1-5)*

<sup>28</sup>Añawe köe ma jare ndimboweasi wiraa reta Jesús Caifás jëta wi mburuwicha Roma pewa jëta wasu pe umbiyemboi reta waerä Jesús jae jowai. Jokua mburuwicha jee Pilato. Erëi jokua judío itenondewa reta uike’ä o pe, echa’ä jokua mburuwicha judío mbae wae ko. Jare jae reta wirowia tëi uike reta yawe judío



mbae wae jëta pe, upitata reta ikia rewe Tumpa koti. Jare jukuärái yawe, ndarau ipuere jou reta tembiu pascua pewa. Jáeramo upita reta oka pe.

<sup>29</sup>Jare Pilato oë ou uyemingeta jae reta ndiwe. “¿Mbae re pa pembijeko pei kua kuimbae?” jei chupe reta.

<sup>30</sup>Jayawe jei reta chupe: “Kua kuimbae uyapo’ä yawe mbae ikawi mbae wae, ndarau tēi ndueru numee ndewe,” jei reta chupe.

<sup>31</sup>Jayawe Pilato jei chupe reta: “Pe reta etei peraa piporaraka chupe pereko rupii,” jei tēi chupe reta. “Ndarau orepuere nduyapo jokua,” jei reta. “Pe romano piko wae reta pemaño’ä oreré nduyuka waerä kiawe,” jei reta.

<sup>32</sup>Kua uasa uyeyapo waerä Jesús tenonde yawe jei imano rewa wae. Echa’ä jae jei umanota iko romano reta ipo pe.

<sup>33</sup>Jayawe Pilato oo ye uike jëta japipe jare ueruruka Jesús jae jowai. Jare upirandu chupe: “¿Jae yerá nde judío reta imburuwicha wasu?” jei chupe.

<sup>34</sup>Jayawe Jesús jei chupe: “¿Ndeño pa ndiyemingeta nei jukuärái, ani ñru wae reta pa imiäri ma ndewe che rewa?” jei chupe.

<sup>35</sup>Jare Pilato jei chupe: “¿Jae yerá che judío? Nerétaiwa reta etei jare sacerdote itenondewa reta ndereru nembiyemboi cherowai. ¿Mbae pa ndiyapo nembopochika reta waerä?” jei chupe.

<sup>36</sup>Jayawe Jesús jei chupe: “Chembraepuere mburuwicha pewa ou’ä ko kua iwi pewa reta wi,” jei. “Jukuärái yawe moná, uyeyokui chewe wae reta uñerärota tēi awiye waerä chepisi judío itenondewa reta. Erēi chembraepuere mburuwicha pewa ou ikotia wi. Jae’ä ko kua iwi pewa,” jei chupe.

<sup>37</sup>Jayawe Pilato jei chupe: “Jayawe nde yepe jae pēti mburuwicha,” jei chupe. Jayawe Jesús jei chupe: “Nde ndere wae rami jae ko che. Jokuaerä ko aa chesi wi. Jare ayu ko kua iwi pe amimbeu waerä añetete wae. Jare opaete uipota yureko añetete wae rupi wae reta, jae reta ko uyapisaka chiñee re,” jei chupe.

<sup>38</sup>Jayawe Pilato jei chupe: “¿Mbae ra ko jokua añetete wae?”

### **Pilato jei Jesús umanota ko**

*(Mateo 27.15-31; Marcos 15.6-20; Lucas 23.13-25)*

Jare kua jei ma yawe, Pilato oë ye oo judío reta oï wae pe jare jei chupe reta: “Che mbaeti etei awäe teko jese,” jei.

<sup>39</sup>“Erēi pe judío piko wae reta jekuaeño pipota ambopoika waerä pewe pēti pereso pascua ara reta rupi. ¿Pipota pa jayawe ambopoika waerä pewe kua pemburuwicha wasu?” jei chupe reta.

<sup>40</sup>Jare jae reta jei usapikai rewe: “¿Awiye embopoika jokua kuimbae! ¿Embopoika orewe Barrabás!” jei reta. Jokua Barrabás ko jae pēti kuimbae imonda jeko kachi wae ñeräro reño iko wae.

## Juan 19

- <sup>1</sup>Jayawe Pilato jei isindaro reta pe wiraa umbĩpiu reta waerä Jesús.
- <sup>2</sup>Jare joko wi sindaro reta oñono Jesús iñäka re ñuräti uñeñopekue iñäkarewarä. Jare umiñepëwa reta Jesús pëti ñepëwaka mborao wae mburuwicha wasu echa oyoyai reta waerä.
- <sup>3</sup>Jare uyepepikapika oya reta Jesús re jeiraanga waerä chupe usapikai rewe: “;Tikoño mái kua judío reta imburuwicha wasu!” jei reta. Jare owapete reta wi Jesús.
- <sup>4</sup>Jare sindaro reta opa ma oyoyai yawe Jesús, Pilato oë ye oo Judío reta oï wae pe jare jei chupe reta: “Mase, che aruta pewe jokua kuimbae. Aipota pikuaa kawi waerä che awäe’ä etei ko teko jese,” jei chupe reta.
- <sup>5</sup>Jayawe Jesús oë ye oo äkarewa ñuräti pewa rewe jare ñepëwaka mborao wae rewe. Jare Pilato jei chupe reta: “Mase, ko oï kua kuimbae,” jei.
- <sup>6</sup>Jayawe judío itenondewa reta jare isindaro reta ndiwe uecha yawe Jesús, jei reta usapikai rewe: “;Ikutuka kurusu re! ;Ikutuka kurusu re!” Jayawe Pilato jei chupe reta: “Jayawe pe reta etei peraa pikutuka. Echa’ä che awäe’ä etei teko jese,” jei.
- <sup>7</sup>Jare judío itenondewa reta jei chupe: “Orereko pe jei kua nunga kuimbae imeta ko umano, echa’ä jae jei tēi iyupe Tumpa Tai ko,” jei reta chupe.
- <sup>8</sup>Pilato kua uyandu yawe, ukiyete ye.
- <sup>9</sup>Jayawe uruike ye o pe Jesús jare upirandu chupe: “;Kía pewa etei pa nde?” jei chupe. Erēi Jesús jei’ä mbae awe.
- <sup>10</sup>“;Maera pa niñee nemoë’ä?” jei Pilato. “;Ndikuaa’ä yerá che ime anoi mbaepuere ndukutuka waerä kurusu re ani nombopoika waerä?” jei chupe.
- <sup>11</sup>Jare Jesús jei chupe: “Jukuärái tēi añetete. Erēi ndarau etei mbaepuere neni cheré Tumpa umaño’ä nderé yawe. Añawe nde ime neni teko kua mbae uyeyapo oï chewe wae re. Erēi uasaete teko onoi jokua kuimbae chemee ndewe wae,” jei chupe.
- <sup>12</sup>Joko wiwe Pilato ueka tēi kērái ombopoika waerä Jesús. Erēi judío reta usapikai rewe jei: “Kua kuimbae uyembowaicho oï César koti, echa’ä jae uipota uyeyapo oï mburuwicha wasurä. Jayawe nde nembopoika yawe kua kuimbae, nde ko jae César jowaicho wi,” jei reta chupe.
- <sup>13</sup>Pilato kua uyandu yawe, onoeka ye Jesús. Jare joko wi oo uwapi mburuwicha iwapia pe. Jokua tenda iyipi rupi ipe kawi oï, jare ita ipe kawi wae katuii ko. Kua ko jee Gabata judío reta iñee pe.
- <sup>14</sup>Jokua ara judío reta uyeyapikatu yureko pascua iara reta pewarä, jare añawe ara mbite seri ma oï. Jayawe Pilato jei judío reta pe: “Ko oï pemburuwicha wasu,” jei.

<sup>15</sup>Jayawe judío reta usapikái rewe jei: “¡Tumano! ¡Tumano! ¡Ikutuka kurusu re!” Jayawe Pilato jei chupe reta: “¿Aikutukata yerá pemburuwicha wasu kurusu re?” Jare sacerdote itenondewa reta jei: “Jaeño César ko jae oremburuwicha wasu,” jei reta chupe.

<sup>16</sup>Jayawe ramo Pilato umee Jesús uyeyapo waerä chupe kërái judío reta uipota wae. Jayawe sindaro Roma pewa reta wiraa Jesús uikutu reta waerä kurusu re.

### **Uikutu reta Jesús kurusu re**

*(Mateo 27.32-44; Marcos 15.21-32; Lucas 23.26-43)*

<sup>17</sup>Jayawe oñono reta Jesús iyatii re kurusu jae uyekutukata jese wae wiraa waerä. Jare oo joko wi Jesús kurusu rewe. Jare sindaro reta wiraa uruwäe Äkakuenda jei chupe reta wae pe. Kua ko jee Gólgota judío reta iñee pe.

<sup>18</sup>Jare joko pe uikutu reta kurusu re Jesús jare umbiyemboi oñono reta. Jare uikutu reta wi mokui kuimbae pëti pëti ikurusu rei, jare umbiyemboi oñono reta Jesús iyikeyike pe.

<sup>19-20</sup>Jayawe Pilato uikuatía pëti iwira ipe wae re kuärái: “KUA KO JAE JESÚS NAZARET PEWA. JAE KO JUDÍO RETA IMBURUWICHA WASU.” Jukuärái uikuatía arameo ñee pe, jare griego ñee pe, jare romano ñee pe wi. Jare Pilato kua uikuatía ma yawe, oñonoka kurusu re Jesús iñäka iáramo. Jare mbiriete’ä iko Jerusalén wi kiapé uikutu reta Jesús wae. Jare jeta judío reta yuweru ma joko wi umingeta jokua Pilato uikuatía wae.

<sup>21</sup>Jayawe judío isacerdote itenondewa reta iyengeta Pilato pe jare jei reta chupe: “Awiyeta tëi ko ndikuatía jae ko judío reta imburuwicha wasu wae. Ndikuatia tëi ko kua kuimbae jaei jei tëi iyupe judío reta imburuwicha wasu wae ko,” jei reta.

<sup>22</sup>Erëi Pilato jei chupe reta: “Kua aikuatía wae, tupita jukuäraino,” jei.

<sup>23</sup>Jayawe sindaro reta uikutu ma yawe Jesús kurusu re, irundi rewe umbiyao reta iyupe Jesús jemimonde. Erëi pëti jemimonde jembire. Kua jemimonde puku jare uyembiwiwi’ä. Uyeyapo pëti wiño.

<sup>24</sup>Jare jei reta iyupe: “Kua awiye yamondorondoro. Yauwari jese yaikuaa waerä kía ra wiraata iyupe wae,” jei reta iyupe. Jukuärái uyeyapo Tumpa iñeeriru pe arakae wiwe jeiño mái uyeyapota iko wae. Echa’ä joko pe uyekuatía oï kuärái: “Umbiyao reta iyupe cheremimonde. Uyuwari reta jese uikuaa waerä kía ra wiraata iyupe wae.” Jukuärái uyekuatía iko jare jukuärái etei uyapo sindaro reta.

<sup>25</sup>Jare uyemboi ñonoï Jesús ikurusu iyipi pe Jesús ichi, jare ichi ipikii, jare Cleofas jembireko María jee wae, jare María Magdalena.

<sup>26</sup>Jare joko pe oï wi Jesús jemimboe jae uauete wae. Jayawe Jesús uecha yawe ichi jare jokua jemimboe uyemboi ñonoï koiño chuwi, jae jei ichi pe: “Chesi, joko oï nemembiraerä,” jei chupe.

**27**Joko wi jei jemimboe pe: “Cheríwi, joko oï ndesirä,” jei chupe. Jáeramo jokuara wiwe jokuara jemimboe wiraa jëta pe uyandareko waerä Jesús ichi re.

### **Jesús umano kurusu re**

*(Mateo 27.45-56; Marcos 15.33-41; Lucas 23.44-49)*

**28**Jayawe Jesús uikuaa opa ma uyapo opaete mbaembae Tumpa ombou uyapo waerä wae. Jayawe jei: “Cheiwe,” jei. Jukuärái uyapo uyeyapo waerä kërái Tumpa iñeeriru pe uyekuatía oï wae rupi.

**29**Jare joko pe iko vino uasakue pëti yapepo pe. Jayawe pëti wae umäki esponja pipe, jare oñono takuaräsi re, jare omondo oñono Jesús iyuru re jae jou waerä.

**30**Jare Jesús jou ma yawe, jei: “¡Opa ma ayapo. Jae ma!” jei. Jayawe iñakatindi jare jekowe oñono Tumpa ipo pe.

### **Uikutu reta Jesús iyike pe**

**31**Jesús umano yawe, pëti araño ma uata iko uwäe waerä pëti mbutuu ara ikawiete wae, echa’ä jae ko pascua iara wi. Jáeramo judío reta uyeyapikatu yureko jokuara mbutuu ara pewarä. Jare jae reta itenondewa reta uipota’ä kía jetekue uyekutu oï wae upita waerä kurusu re piarewe rewa, Moisés arakae uikuatía wae rupi uyapo reta waerä. Jáeramo jae reta yuraa umiñera Pilato omopëka chuwi reta waerä itimaka kurusu re usawawa yureko wae reta. Echa’ä jukuärái imambae umanota reta, jare joko wi Pilato ipuere waerä umbiweyika jetekue reta kurusu wi.

**32**Jokuara ikawi iko Pilato pe. Jáeramo omondo amokue sindaro reta omopë waerä chuwi reta itimaka kurusu re ñonoï wae reta. Tenonde omopë chuwi itimaka reta Jesús iyikeyike koti ñonoï wae reta.

**33**Erëi oya reta Jesús re yawe, uecha reta umano ma. Jáeramo omopë’ä reta chuwi itimaka.

**34**Erëi pëti sindaro uikutu Jesús iyike pe iwira isirowiasi wae pipe. Jare jukuärái uyapo yawe, oë woi chuwi tuwi i ndiwe.

**35**Yande yaikuaa ñai kua mbaembae añetete ko, echa’ä ime kía uecha wae. Jare jae umimbeu ma kua mbaembae rewa, pe reta pepuere perowia waerä wi.

**36**Arakae rupi Tumpa iñee umimbeu wae reta uikuatía Upuruëpi wae imano rewa kuärái: “Ndarau omopë reta chuwi pëti awe ikäwe.”

**37**Jare uyekuatía oï wi kuärái: “Umaeta reta kuimbae jae reta uikutu wae re.” Jukuärái arakae uikuatía reta mbae uyeyapota iko Upuruëpi wae pe rewa, jare jukuärái etei añawe uyeyapo ma.

### **Oñono reta Jesús jetekue teöwerenda pe**

*(Mateo 27.57-61; Marcos 15.42-47; Lucas 23.50-56)*

**38**Kua jaikue rupi pëti kuimbae José jee wae oo Pilato jowai jare jei chupe: “Emaeño mii cheré araa añono waerä Jesús jetekue teöwerenda pe,” jei chupe. Kua José tëta wasu Arimatea pewa ko jare jae ko Jesús jemimboe wi. Erëitu

uyekuaaka'ä, echa'ä ukiye judío itenondewa reta wi ramo. Jayawe Pilato jei chupe: “Jaekawi. Ndepuere nderaa jetekue,” jei chupe. Jayawe José oo umbiweyi kurusu wi Jesús jetekue jare wiraa.

<sup>39</sup>Jare José ndiwe oo wi Nicodemo – jae ko tenonde yawe oo opou Jesús ipi pïtu yawe wae. Jae wiraa mbae utimbo kawi wae mirra jare áloes uyeakue wae. Kua uepiti treinta kilo rupi.

<sup>40</sup>Jare umbiweyi reta ma yawe kurusu wi Jesús jetekue, oñono reta mbae utimbo kawi wae tarapo re jare jesewe oñoma reta Jesús jetekue. Echa'ä jukuärái ko judío reta jeko kía umano yawe.

<sup>41</sup>Jare Jesús uyekutuka iko wae pe ime oï amokue temiti reta. Jare jokua ipite pe ime oï pëti teöwerenda itape uyeyoo wae. Kua teöwerenda ipïau jare ndei awe kía uiporu wae ko.

<sup>42</sup>Jayawe Nicodemo jare José oñono reta Jesús jetekue jokua teöwerenda pe, echa'ä mbiri'ä iko ramo. Jare kaaruete ma iko chupe reta, jare jokua ara opaete wae uyeyapikatu yureko uyemimandúa reta waerä pascua ara re. Jayawe oñono reta ma yawe jetekue teöwerenda pe, uyukenda reta pëti ita tuicha yapúa wae pipe. Jare joko wi opa ye yuraa reta.

## Juan 21

### Jesús uyekuaa ye amokue jemimboe reta pe

<sup>1</sup>Kua jaikue rupi Jesús uyekuaa ye jemimboe reta pe ipa wasu Tiberias jee wae jembei pe. Kua uyeyapo kuärái:

<sup>2</sup>Joko pe ñonoï Simón Pedro, jare Tomás (jae ko Chowakiri pe umbijee reta wae), jare Natanael tëta wasu rai Caná pewa iwí Galilea pe oï wae. Jare joko pe ñonoï wi Zebedeo tai reta jare mokui ye Jesús jemimboe reta wi.

<sup>3</sup>Jayawe Simón Pedro jei ñru wae reta pe: “Ata ayepiraka,” jei. Jare ñru reta jei chupe: “Ore ndoota wi nde ndiwe,” jei reta. Jayawe opa yuraa uyupi reta chalana pe. Erëi jokua pïtu uipisi'ä reta mbae awe.

<sup>4</sup>Jare köe ma oo oï yawe, uecha reta kía uyemboi oï ipa wasu jembei pe. Jae ko Jesús, erëi jae reta uikuaa'ä.

<sup>5</sup>Jare Jesús usapikai chupe reta: “Cheriwi reta, ¿mbaeti etei pa penoi pira?” jei chupe reta. “Mbaeti nonoi pëti awe,” jei reta chupe.

<sup>6</sup>Jayawe Jesús jei chupe reta: “Pemombo pepisa chalana iyakata koti jare pipisita pira reta,” jei chupe reta. Jayawe jukuärái uyapo reta jare uipisi reta jetaete ye pira. Jáeramo pisa poiete ramo, ipuere'ä upi reta pisa chalana pe.

<sup>7</sup>Jayawe jokua jemimboe Jesús uauete wae jei Pedro pe: “¡Mase, jae yepe yandeYa!” jei chupe. Jare Simón Pedro uyandu yawe, jawoi pewa uyemonde,

echa'ä omboi yepe amokue jemimonde uparawiki kawi waerä. Jare uyemonde ma yawe, upiririki i pe jare uitai oo Jesús koti.

<sup>8</sup>Jare iru reta yuweru chalana pe umiata ueru pisa tinee oï pira pipe rewe. Echa'ä mbiri'ä ñonoï ipa wasu jembei wi. Oï pëti chiëto metro rupi.

<sup>9</sup>Jare yuweru ma uwäe reta yawe i jembei pe, uecha reta tata tatäpi rewe joko pe. Uecha reta wi pira tatäpi iáramo jare mbiyape wi.

<sup>10</sup>Jare Jesús jei chupe reta: “Peru mbowi pira pipisi wae,” jei chupe reta.

<sup>11</sup>Jayawe Simón Pedro oo uyupi ye chalana pe jare umiata pisa ipa wasu jembei koti. Jokua pisa tinee oï pira tuichakue pipe –

<sup>153</sup> rupi. Erëi yepe tēi jetaete ye oï, jeseuwe omondoro'ä pisa.

<sup>12</sup>Joko wi Jesús jei chupe reta: “Peyu pekaru,” jei. Erëi pëti awe jemimboe reta upirandu'ä chupe kía ra ko jae wae, echa'ä uikuaa reta jae ko yandeYa wae.

<sup>13</sup>Jayawe Jesús oo upi mbiyape jare umee chupe reta pira oyikue ndiwe.

<sup>14</sup>Kua re mbapi wese ma Jesús uyekuaa jemimboe reta pe ikowe ye ou wiwe umanokue wae reta ipite wi.

### Jesús oyokui Pedro

<sup>15</sup>Jare opa ma ukaru reta yawe, Jesús jei Simón Pedro pe: “Simón, Jonás tai, ¿cherauete pa kua reta wi?” jei chupe. “Nduau, cheYa,” jei chupe. “Nde ndikuaa kawi che nduau ko.” Jayawe Jesús jei chupe: “Emingaru cheowecha rai mii reta,” jei chupe.

<sup>16</sup>Jare jei ye chupe: “Simón, Jonás tai, ¿cherau pa?” Jare Pedro jei ye chupe: “Nduau, cheYa. Nde ndikuaa kawi che nduau ko,” jei chupe. Jayawe Jesús jei chupe: “Iyandareko cheowecha mii reta re.”

<sup>17</sup>Jare jei ye chupe mbapi wese ma: “Simón, Jonás tai, ¿cherau pa?” Añawe Pedro ipiatiti, echa'ä mbapi wese ma Jesús upirandu chupe uau ra wae. Jayawe jei ye Jesús pe: “CheYa, nde ndikuaa opaete. Nde ndikuaa kawi che nduau ko,” jei chupe. Jare Jesús jei ye chupe: “Emingaru cheowecha mii reta,” jei chupe.

<sup>18</sup>“Che tae ndewe añetete wae, ndetaurusu yawe, ndiyembikuaase jare ndewatase ndipota ndeo wae rupi. Erëi nendechi ma yawe, ndeupita ndepo, jare neapitita reta jare ndereraata reta kiape ndipota'ä tēi ndeo wae pe ndeyuka reta waerä,” jei chupe.

<sup>19</sup>Kua jei Jesús umimbeu waerä Pedro pe kërái umanota iko wae jare kërái Tumpa jee uyembutuichakata iko Pedro imano rupi. Jayawe Jesús jei wi chupe: “Eyu che ndiwe.”

<sup>20</sup>Jare Pedro uyerowa umae jare uecha ou oï jaikue jokua jemimboe Jesús uauete wae. Jae ko jokua kuimbae tenonde yawe ukaru yureko yawe, ukaru iko Jesús iyipi pe jare jei, “CheYa, ¿kía etei pa ko jae nemeeta oï wae?” jei chupe wae.

<sup>21</sup>Jayawe Pedro upirandu jesewa Jesús pe: “CheYa, ¿mbae pa uyeyapota oï chupe?” jei.

<sup>22</sup>Jare Jesús jei chupe: “Aramoi che aipota yawe, jae jekuaeñota oï che ayu ye rewa. Erëi jokuu mbae’ä ko nemaerä. Emaeño jese. Erëi nde, eyu che ndiwe,” jei chupe.

<sup>23</sup>Taikue rupi kua Jesús jei wae jeräkua opaete Cristo re wirowia wae reta pe. Jáeramo jeta jae reta wirowia tēi jokuu kuimbae ndarau umano. Erëi Jesús jei’ä ndarau umano. Jaeño jei: “Aramoi che aipota yawe, jae jekuaeñota oï che ayu ye rewa. Erëi jokuu mbae’ä ko nemaerä,” jei.

<sup>24</sup>Che ko jae jokuu kuimbae. Jare che chemiäri ma jare aikuatía ma kua mbaembae. Jare kua amimbeu wae ore nduikuaa añetete ko.

<sup>25</sup>Jare ime ye jeta mbaembae Jesús uyapo wae. Opaete jokuu mbaembae rewa uyekuatía oï yawe pēti pēti rupi, ndarau uepiti opaete tupapire jendarä kua iwí pe. Jaeño ma.

## Hechos

### Kua tupapire rewa:

Hechos ko jae tupapire mokuía kuimbae Lucas jee wae uikuatía wae. Lucas ko jae pëti doctor upurupiano wae jare Pablo iwataïru pëti wae. Lucas uikuatía kua tupapire jare tupapire Lucas jee wae wi pëti mburuwicha Teófilo jee wae pewarä. Ñee Hechos uipota jei “mbaembae kía uyapo wae.” Echa’ä kua tupapire Hechos uikuaaka yandewe mbaembae tenondete Cristo re wirowia wae reta uyapo Espiritu Santo imbaepuere rupi wae. Jare uikuaaka wi yandewe kërái jae reta umimbeu jeta wae reta pe Jesucristo rewa tëta wasu Jerusalén pe rani, jare joko wi opaete iwi Judea rupi, iwi Samaria rupi, jare opaete iwi rupi.

### Hechos 1

#### Lucas uikuatía ye mburuwicha Teófilo pe

<sup>1</sup>Chemburuwicha Teófilo, tenonde yawe aikuatía ma ndewe Jesús rewa. Jare jokua tupapire rupi chemiäri ma ndewe opaete Jesús uyapo wae rewa jare oporomboe wae rewa jae oo ye rewa ara pe.

<sup>2</sup>Añawe aikuatía äi ndewe kuärái: Jesús uiparawo amokue kuimbae reta omondo reta waerä umimbeu waerä ñnee. Kua reta ko jae Jesús jemimboe tenondewaete reta. Jayawe ndei Jesús oo ye mbowe ara pe, Espiritu Santo imbaepuere rupi uikuaaka chupe reta mbae uyapo reta waerä.

<sup>3</sup>Echa’ä Jesús umano jare jekowe ye yawe, jeta wese uyekuaa chupe reta cuarenta ara rupi. Jare jae uyekuaaka kawi chupe reta jae jekowe ye wae. Uikuaaka wi chupe reta këraita oï wae Tumpa oï ma yawe opaete wae imburuwicha wasurä jaeño mái pewa.

<sup>4</sup>Pëti ara Jesús iko jemimboe tenondewaete reta ndiwe ñaipe Olivorenda jee wae pe, jare jei chupe reta: “Awiye peë rani tëta wasu Jerusalén wi,” jei. “Peärota ko joko pe cheRu Tumpa umee pewe rewa jokua jae jei umeeta oï pewe wae,” jei. “Che amimbeu ma pewe jokua rewa tenonde yawe, jare añawe ou ma uwäe oï uyeyapo waerä jokua.

<sup>5</sup>Echa’ä mbowi ara rupi Espiritu Santo outa pepia pe iko waerä. Jare kërái Juan karamboe rupi pembisakambu i pe rami, jukuärái wi Espiritu Santo peñonota pe reta peï waerä pëti ramiño che ndiwe,” jei Jesús chupe reta.

#### Jesús oo ye ara pe

<sup>6</sup>Jayawe uyembati wae reta upirandu Jesús pe: “OreYa, ¿añawe nde ndikota pa oremburuwicha wasurä jaeño mái pewa kua Israel pe? ¿Añawe nde opata pa nemiamiri orerowaicho reta?” Jukuärái upirandu reta chupe.



<sup>7</sup>Jayawe Jesús jei chupe reta: “Ndarau pepuere pikuaa kërái yawe cheRu jokua uyapota oï wae. Jaeño cheRu jeita jokua re,” jei.

<sup>8</sup>“Erëi pe reta pepuere pikuaa kua rewa: Espíritu Santo ou ma pepia pe yawe, pemimbaepuereta oï,” jei. “Joko wi pe reta chekuaakata opaete wae reta pe – tëta wasu Jerusalén pe rani, jare joko wi opaete iwí Judea rupi, iwí Samaria rupi, jare opaete iwí rupi,” jei chupe reta.

<sup>9</sup>Jayawe opa ma kua jei chupe reta yawe, jupiwoiño Jesús uyeupi iwate koti. Jare jae reta umae jese iwate koti rambuewe, amapítu umbiyasoí Jesús jare uecha’ä ma reta.

<sup>10</sup>Jare jekuaeño täta umae yureko rambuewe ara koti Jesús oo wae re, uyekuaa chupe reta iyipi pe mokui araiwa kuimbae echa. Jare jemimonde tiasí.

<sup>11</sup>Jayawe araiwa jei chupe reta: “Kuimbae Galilea pewa reta, ¿maera pa jekuaeño pemae peï ara koti?” jei. “Kua Jesús oo ma pewi ara pe wae, pëti ara ou yeta oï kuri. Jare kërái pe reta pecha oo wae, jukuäraiete wi jae ou yeta oï,” jei araiwa chupe reta.

### Uiparawo reta iru wae Judas ipepika pe

<sup>12</sup>Joko wi Jesús jemimboe reta yuweru ye tëta wasu Jerusalén pe ñaipe Olivorenda wi. Jokua ñaipe koiño oï tëta wasu Jerusalén wi.

<sup>13</sup>Jayawe yuweru uwäe reta yawe, uike reta pëti tëta pe jare uyupi reta tëta joo iwate oï wae pe jae reta yureko wae pe. Jae reta ko Pedro, Jacobo, Juan, Andrés, Felipe, Tomás, Bartolomé, Mateo, Alfeo tai Jacobo jee wae, Simón Zelote, jare Jacobo tiwi Judas jee wae.

<sup>14</sup>Opaete jokua reta jekuaeño uyembati uyerure reta waerä Tumpa pe pëti ramiño. Jare jae reta ndiwe uyembati wi Jesús ichí María, jare iru kuña reta wi, jare Jesús tiwi reta.

<sup>15</sup>Jayawe pëti ara Cristo re wirowia wae reta joko pe uyembati

<sup>120</sup> rupi. Jare Pedro uyemboi jae reta ipite pe jare jei chupe reta:

<sup>16</sup>“Hermano reta jare hermana reta, arakae Espíritu Santo uikuaaka David pe uikuatía waerä Judas rewa. Jare jokua jae uikuatía wae jupi ko uyeyapo Judas pe. Echa’ä pe reta pikuaa Judas ko jae wiraa sindaro reta Jesús oï wae pe uipisi reta waerä wae,” jei.

<sup>17</sup>“Yepe tëi Judas ore ndiwe iko kua mbarawiki pe, jare uyepapa ore ndiwe,

<sup>18</sup>jesewe jae umee Jesús korepoti re jowaicho reta pe,” jei. “Jare jokua korepoti pipe owa pëti iwí. Jayawe joko pe jaei uyeyuka,” jei. “Jare jetekue oa iwate wi yawe, jie osoro jare opaete ichuri uyekuawo. Jukuärái umano Judas.

<sup>19</sup>Jare kua jeräkua opaete tëta wasu Jerusalén pewa reta pe. Jáeramo umbijee reta jokua iwí, fwí Tuwí Jepikue,” jei chupe reta.

<sup>20</sup>Jare Pedro jei wi chupe reta: “Arakae rupi David uikuatía tupapire Salmos pe kuärái: ‘Tupita jëta ipo mbae, jare awiye kía tuiko pïpe,’ jei. Jare uikuatía wi jesewa kuärái: ‘Ëru wae tuyapo iparawiki jae ipepika pe.’ Jukuärái uikuatía David, jare yaikuaa Judas rewa ko,” jei chupe reta.

<sup>21-22</sup>“Jayawe ikawi ko yaiparawo waerä ambie kuimbae Judas ipepika pe uyepapa waerä ore ndiwe. Tuiko pëti kuimbae jekuaeño ore ndiwe iko wae, Juan umbisakambu Jesús wiwe jare Jesús ara pe oo ye rewa,” jei. “Jae umimbeuta ïru wae reta pe ore ndiwe Jesús ikowe ye ko ou umanokue wae reta ipite wi.” Jukuärái jei Pedro chupe reta.

<sup>23</sup>Jayawe uiparawo reta mokui kuimbae. Pëti jee ko José Barsabás (jae jee wi Justo). Jare ïru kuimbae jee ko Matías.

<sup>24-25</sup>Jayawe uyerure reta Tumpa pe kuärái: “OreRu Tumpa, Judas opia kua mbarawiki wi ikawi mbae wae uyapo ramo, jare oo ma jendarä jae uiparawo wae pe. Nde ndikuaa opaete wae ipia. Echaka jayawe orewe kía nunga ra ndiparawo ma Judas ipepika pe kua mokui kuimbae ipite wi, jae orembori waerä kua mbarawiki pe.” Jukuärái uyerure reta Tumpa pe.

<sup>26</sup>Jayawe jokua mokui kuimbae jee uikuatía reta mokui ita rai re. Joko wi oñono ita reta pëti jïru japïpe jare umitimo oa rewa pëti ita. Jayawe ita rai oa wae, uyekuatía iko jese Matías jee. Jukuärái uikuaa reta jae ko Tumpa uiparawo wae. Jayawe Matías uñemiïru jokua ïru once Jesús jemimboe tenondewaete reta ndiwe.

## Hechos 2

### Espíritu Santo ou

<sup>1</sup>Jayawe uwäe Pentecostés ara, jare opaete Cristo re wirowia wae reta uyembati yureko pëti wae peño tëta wasu Jerusalén pe.

<sup>2</sup>Jare aramoïño uyendu ara wi mbae jïapu wae pëti iwïtu tãta ou oï wae rami. Jokua jïapu wae opa tinee tëta japïpe jae reta uwapi ñonoï wae pe.

<sup>3</sup>Jayawe uyekuaa chupe reta tata echa rami. Jokua uyembiyaoyao jare ou uyemboi pëti pëti wae íramo.

<sup>4</sup>Jayawe Espíritu Santo umimbaepuere opaete joko pe ñonoï wae reta. Jare jae reta umbipi uyemingeta ambie ye ye wae iñee pe kërái Espíritu Santo umbiyemingetaka wae rupi.

<sup>5</sup>Jare jokua ara reta rupi jeta judío Tumpa wi uipïuete wae reta ñonoï tëta wasu Jerusalén pe. Jae reta ambiembie iwï pewa reta ko. Jare yuweru reta uyemimandúa waerä Pentecostés ara re.

<sup>6</sup>Jayawe jokua jïapu wae uyandu reta yawe, oya ou reta tëta re uikuaa reta waerä mbae ra ko jokua uyandu reta wae. Jare opaete jae reta ipiakañi. Echa’ä pëti pëti wae uyandu iñee pe etei Cristo re wirowia wae reta uyemingeta yureko wae.

<sup>7</sup>Jayawe ipiakañiete rewe jei reta: “¿Mase, iwi Galilea pewa reta ko opaete kua uyemingeta ñonoï wae reta!” jei reta.

<sup>8</sup>“¿Kërái ra uikuaa reta uyemingeta waerä ñaniñeei ñanemichi wiwe yayemingeta pipe wae pe?” jei reta.

<sup>9</sup>“Jeta ambie ye ye iwi pewa ko yande: iwi Parto, iwi Medo, iwi Elam, iwi Mesopotamia, iwi Judea, iwi Capadocia, iwi Ponto, jare iwi Asia pewa ko yande reta,” jei reta.

<sup>10-11</sup>“Jare amokue yande reta wi iwi Frigia, iwi Panfilia, iwi Egipto, iwi Creta, iwi Arabia, jare iwi África pewa tēta wasu Cirene iyipi rupiwa reta wi. Yande ko jae romano reta wi – jae ko judío reta jare judiorä uyeyapo wae reta wi. Erëi yepe tēi yande ambie ye ye iwi pewa ko, erëi yayandu ñai ñaniñee pe etei uyemingeta ñonoï jeta mbaembae Tumpa uyapo imbaepuere rupi wae re,” jei reta.

<sup>12</sup>Jare ipiakañi rewe jekuaeño jei iyupe reta: “¿Mbae ra ko kua?” jei reta.

<sup>13</sup>Erëi ñru wae reta oyoyai jare jei: “Usawipo kua reta ñonoï,” jei reta.

### **Pedro umimbeu Cristo rewa**

<sup>14</sup>Jayawe Pedro oo tenonde ñru once Jesús jemimboe tenondewaete reta ndiwe, jare omoë ñnee yuweru uyembati wae reta pe kuärái: “Cherētara reta jare opaete Jerusalén pewa reta, piyapisaka kawi chiñee re, jare aikuaakata pewe kua uasa oï wae rewa,” jei chupe reta.

<sup>15</sup>“Pe reta pere tēi kua reta usawipo ñonoï. Erëi jukuärái’ä ko. Echa’ä ndimboweño oï ramo, jare kiawe ukau’ä ndimbowe rupi,” jei chupe reta.

<sup>16</sup>“Kua pecha jare piyandu peï wae, jae ko Tumpa ñnee arakae umimbeu wae Joel jee wae jei uyeyapota iko wae. Echa’ä jae jei kuärái:

<sup>17</sup>“Tumpa jei kuärái: ‘Kua ko ayapota ai ara taikuewa rupi: Ameeta cheEspíritu ipotawe kía chereka wae pe. Jayawe perai reta jare perayi reta umimbeuta chiñee ñru wae reta pe. Jare aechakata mbaembae amokue kuimbae ukuakuaa wae reta pe ipau rupi. Jare amokue kuimbae taurusu wae reta pe aechakata mbaembae ambipau wae echa rami.

<sup>18</sup>Jukuärái jokua ara reta rupi cheEspíritu ameeta kuimbae jare kuña uyeyokui chewe wae reta pe. Jayawe umimbeuta reta chiñee ñru wae reta pe.

<sup>19</sup>Jae nunga wi che ambiyekuaata ai ara re jare iwi re mbaembae pepiakañi rewe pecha waerä. Imeta tuwi, tata, jare tatäti.

<sup>20</sup>Warasi uñemipitumimbita, jare yasi uyeyapota tuwi rami. Jaikue rupi uwäeta ara ikawiete ye wae – jae ko ara yandeYa pewa jei chupe reta wae. Jare jokua ara che aiporarakata ai opaete cherowaicho reta pe.

<sup>21</sup>Erëi opaete ueka chewe aepi reta waerä wae aepita reta,’ jei Tumpa.’ Jukuärái Joel arakae umimbeu Tumpa ñnee,” jei Pedro chupe reta.

**22**Jare jei chupe reta wi: “Cherētara Israel pewa reta, piyapisaka kawi chiñee re: Pe reta pikuaa kawi pei Jesús tēta wasu rai Nazaret pewa uyapo pepite rupi jeta mbaembae kiawe ipuere’ā uyapo wae. Tumpa etei ko uyapo jokua mbaembae reta Jesús rupi jare jukuārái uikuaaka tēi pewe Jesús ko jae Tumpa wi etei ou wae,” jei.

**23**“Jesewe pēti wae umee pewe Jesús,” jei. “Jare pe reta etei pipisika Jesús jare pemee yuapi ye judío mbae wae reta pe uikutu kurusu re piyukaka waerä,” jei. “Erēitu pe reta jokoropi piyapo ma ko arakae Tumpa iñee pe uyekuatía oī wae jei piyapota piko wae,” jei. “Echa’ā Tumpa uikuaaño mái iko opaete mbaembae ndei uyeyapo mbowe,” jei Pedro chupe reta.

**24**“Erēi yepe tēi pe reta piyukaka Jesús, jesewe Tumpa umbijekowe ye ueru umanokue wae reta ipite wi,” jei. “Jesús uiporaraete mano pe. Erēi Tumpa uepi chuwi, echa’ā mano imbaepuere’ā etei jese ramo.

**25**Jukuārái wi mburuwicha wasu David arakae jei uyeyapota iko. Echa’ā jae uikuatía kērái Cristo yae chupe wae jei kuārái: ‘Aecha Tumpa ikoño mái wae jekuaeño che ndiwe oī. Jayawe ndarau kía chemiamiri.

**26**Jáeramo ayerowia chepia pe, jare amoë chiñee ayerowia rewe. Akiye’ā mano wi.

**27**Che ko jae jupi rupi ndewe ayeyokui wae. Jare aikuaa aī amano ma yawe, nde, cheTumpa, ndarau chereya neī umanokue wae reta ñonoī wae pe. Ndarau nemaeño cherete opa jüu waerä.

**28**Nde ndikuaaka chewe chembijekowe yeta neī wae umanokue wae reta ipite wi. Jare ayerowiaeteta, echa’ā nde che ndiwe neīta jaeño mái pewa ramo.’ Jukuārái David arakae uikuatía,” jei Pedro chupe reta.

**29**“Cherētara Israel pewa reta, yaikuaa ñai añetete wae yanderamikue David rewa. Jae umano jare uñeñotika, jare jeöwekue imeño oī yandeiwi pe.

**30**Erēi Tumpa jei David pe kuārái: ‘Che etei tae ndewe, pēti niñemoñaeta reta ipite wi ikota mburuwicha wasurä jaeño mái pewa.’ Jukuārái jei Tumpa chupe, jare yaikuaa jokua David iñemoñaeta ko jae Cristo yae chupe wae. Jare David uikuaa iko wi, echa’ā Tumpa uiparawo David uikuaaka chupe waerä Tumpa uyapota iko wae,” jei.

**31**“David uikuaa iko ndei uyeyapo mbowe Tumpa ndarau ueya Cristo umanokue wae reta ñonoī wae pe jare ndarau umaeño opa jüu waerä jete. Jayawe David wi uikuaaka yandewe Cristo ikowe yeta ko ou umanokue wae reta ipite wi,” jei chupe reta.

**32**“Jare kua opa ma uyeyapo, echa’ā Tumpa umbijekowe ye kua Jesús ueru umanokue wae reta ipite wi. Jare kua ore nduecha oreresa pe etei,” jei.

**33**“Añawe Tumpa wiraa ma Jesús ara pe. Jare joko pe uwapi oī Tumpa iyakata koti, jare Tumpa ndiwe Jesús ime onoi mbaepuere opaete wae re,” jei. “Tumpa jei umeeta iko Jesús pe ombou waerä Espíritu Santo, jare jukuārái añawe uyapo ma.

Echa'ä Jesús etei ombou ma kua Espíritu Santo orewe. Jayawe kua pe reta añawe pecha jare piyandu peï wae Espíritu Santo imbaepuere etei ko," jei chupe reta.

34-35“Yaikuaa ñaï David jae'ä ko uyupi ara pe iko waerä opaete mbaembae iYarä wae. Echa'ä David etei jei kuärái: ‘Tumpa ikoño mái wae jei cheYa pe kuärái: ‘Ewapi kua cheakata koti, nderowaicho reta opa añonoka rewa itawa re nderowai,’ jei.’ Jukuärái jei David,” jei chupe reta.

36“Jayawe aipota pe cherëtara Israel pewa reta pikuaa kawi waerä kua re: kua Jesús pe reta pikutuka jare piyukaka wae, Tumpa uyapo ma opaete mbaembae iYarä jare Upuruepi waerä.” Jukuärái jei Pedro chupe reta.

37Kua uyandu reta yawe, tuicha rupi ipiatiti reta. Jare upirandu Jesús jemimboe tenondewaete reta pe – jae ko Pedro jare ñru reta pe wi – kuärái: “Tëtara reta, ¿mbae pa orepuere nduyapo añawe?” jei reta.

38Jayawe Pedro jei chupe reta: “Opaete pe reta piyawí ma Tumpa koti jare jukuärái ime ma penoi teko ikoti. Jáeramo peya pepiayemingeta kachi wae jare piyembisakambuka i pe Jesucristo jee re. Jukuärái rupi pechakata ñru wae reta pe Tumpa umbái ma ko pewi jokua teko penoi wae. Jare Tumpa umeeta pewe Espíritu Santo,” jei chupe reta.

39“Jukuärái yandeTumpa ikoño mái wae jei uyapota oï ipotawe kía Tumpa ueni wae pewarä – jae ko pemaerä, piñemoñaeta pewartä, jare opaete kerupi rupi ñonoï wae reta pewartä wi,” jei Pedro chupe reta.

40Jare jukuärái Pedro omboe reta jeta mbaembae re, jare jokoropi umikirëi reta jare umbiarakuaa reta kuärái: “Añawe rupi yureko wae reta, opaete seri jeko kachi ko, jare Tumpa uiporarakata oï chupe reta. Jáeramo peka chupe perezepi waerä iarasi wi,” jei Pedro chupe reta.

41Jayawe jokua ara mbapi miri rupi wirowia reta jare uyembisakambuka reta i pe. Jare jae reta uñemiñru ñru wae reta Cristo re wirowia wae ndiwe.

### **Jaeramo Cristo re wirowia wae reta rewa**

42Joko wiwe opaete Cristo re wirowia wae reta ikirëi rewe uyemboe reta Jesús jemimboe tenondewaete reta oporomboe wae re. Jae reta jekuaeño uñemiñru kawi. Jare uyembati reta tëta tëta rupi uyerure reta waerä Tumpa pe, jare uyemimandúa reta waerä yandeYa Jesús imano re mbiyape jare copa wi jou reta wae rupi.

43Jare Jesús jemimboe tenondewaete reta uyapo jeta mbaembae Tumpa imbaepuere rupi kiawe ipuere'ä uyapo wae. Jáeramo opaete tëta wasu Jerusalén pewa reta ipiakañiete jare uipiuete Tumpa wi.

44Jare opaete Cristo re wirowia wae reta jekuaeño uyembati reta pëti ramiño. Jare opaete imbaembae mbaeti etei umbiete iyupe reta.

45Owaka reta imbaembae, jare umee jepikue ipotawe mbaembae uata oï chupe wae reta pe.

<sup>46</sup>Jare opa ara rupi yuraa uyembati reta tupao wasu joka pe umbutuicha reta waerä Tumpa jee. Jare tēta tēta rupi umbiyao tembiu iyupe reta, jare ukaru päwe reta uyerowia rewe jare uñemimichi rewe.

<sup>47</sup>Jae reta jekuaeño umbutuicha Tumpa jee, jare opaete tēta wasu pewa reta umae kawi jese reta. Jayawe opa ara rupi jeta wae reta wirowia yandeYa Jesucristo re, jare yandeYa uepi reta. Jukuärái yandeYa jekuaeño umbijeta iko jese wirowia wae reta.

## Hechos 3

### Pedro uminguera pēti kuimbae uwata mbae wae

<sup>1</sup>Pēti ara Pedro jare Juan yuraa tupao wasu pe mbapi ora ma ara mbite uasa yawe. Echa'ä jokua ora ko jae yembati yerure pewa opa ara rupi.

<sup>2</sup>Jare yuraa uwäe reta yawe, joko pe iko pēti kuimbae ipuere mbae uwata wae. Jokua kuimbae ichi wi oa wiwe ipuere'ä etei uwata. Jáeramo opa ara rupi amokue reta owoi ueru jokua kuimbae ueya waerä tupao ikēsea pēti jöke pe. Jokua öke jee ko Ipöra wae. Ueya reta joko pe jae ueka waerä korepoti opaete jokoropi uike wae reta pe.

<sup>3</sup>Jayawe kuimbae uecha Pedro jare Juan uike ma yuraa yureko reta yawe tupao wasu joka pe, jae ueka korepoti chupe reta.

<sup>4</sup>Jayawe Pedro jare Juan uyemboi umae jese, jare Pedro jei chupe: “Emae oreré,” jei.

<sup>5</sup>Jayawe kuimbae umae jese reta, umee pota echa mbae iko chupe ramo.

<sup>6</sup>Jare Pedro jei chupe: “Mbaeti nonoi korepoti numee ndewe waerä. Erēi numeeta ndewe ime nonoi wae. ¡Epüa ewata Jesucristo Nazaret pewa jee re!” jei chupe.

<sup>7</sup>Jayawe Pedro uipisi kuimbae ipo iyakata koti wi jare umupüa. ¡Jare jupiwai ipiräta kuimbae ipi jare ipiñúa!

<sup>8</sup>Jayawe kuimbae uyerowia pipei upiririki upüa jare umbipi uwata. Jare jukuärái upiririki rewe jare Tumpa jee umbutuicha rewe uike tupao wasu joka pe Pedro jare Juan ndiwe.

<sup>9</sup>Jayawe opaete tupao wasu joka pe ñonoï wae reta uecha jokua kuimbae uwata oi wae, jare uyandu reta Tumpa jee umbutuicha oi wae.

<sup>10</sup>Opaete jae reta uikuaa iko jae ko kuimbae ipuere mbae uwata iko wae, uwapise tupao wasu ikēsea jöke pe wae ueka waerä korepoti. Jayawe tuicha rupi ipiakañi reta kua uyeyapo chupe wae re.

### Pedro umimbeu uyembati wae reta pe tupao wasu joka pe

<sup>11</sup>Jayawe jokua kuimbae ukuera ma wae opoi'ä Pedro jare Juan wi. Jare opaete joko pe ñonoï wae reta ipiakañi rewe osi yuweru jae reta ikoti, tupao wasu ikorero Salomón jee wae pe.

<sup>12</sup>Jare Pedro uecha reta yawe, omoë iñee chupe reta jei rewe: “Pe cherëtara Israel pewa reta, ¿maera pa pepiakañi kua pecha wae re? ¿Maera pa täta pemae pei oreré?” jei. “Pepia pe piyemingeta ko aipo pei ore etei numbiwataka kua kuimbae orembaepuere rupii, ani aramoi Tumpa pe nduyeyokui kawinoi ramo. Erëi jukuärai’ä etei ko,” jei.

<sup>13</sup>“Yanderamikue reta iTumpa ko kua uyapo wae – jae ko Abraham, Isaac, jare Jacob iTumpa. Jare jukuärái uyapo umbutuichaka waerä Tai Jesús jee,” jei chupe reta. “Kua Jesús etei ko pe reta pemee judío mbae wae reta ipo pe piyukaka waerä. Jare yepe tei mburuwicha Pilato uipota ombopoika waerä Jesús, erëi pe reta pipota’ä jokua.

<sup>14</sup>Yepe tei Jesús jupi jare jeko mbaei wae ko, erëi pe reta peka Pilato pe ombopoika waerä pëti upuruyuka wae Jesús ipepika pe.

<sup>15</sup>Jare jukuärái piyukaka tekowe iYa etei,” jei. “Erëi yepe tei piyukaka, jeseuwe Tumpa umbijekowe ye ueru umanokue wae reta ipite wi. Jare kua ore nduecha oreresä pe etei,” jei chupe reta.

<sup>16</sup>“Añetete ko, ore ndorowia kawi Jesús re jeko pewa kua kuimbae uwata mbaei iko wae uwata ma oi. Pe reta pecha jare pikuaa ipuere mbae uwata iko wae. Erëitu ore ndorowia Jesús re ramo, jae umee orewe mbaepuere numinguera waerä kua kuimbae opaete pe reta perowai,” jei Pedro chupe reta.

<sup>17</sup>Jare jei chupe reta wi: “Añawe cherëtara reta, aikuaa pe reta jare pemburuwicha reta ndiwe piyapo kua ikawi mbae wae pikuaa mbae rewe,” jei.

<sup>18</sup>“Erëi jukuärái rupi Tumpa uyapo ma jae arakae jei uyeyapota iko wae. Añetete ko, Tumpa arakae uikuaaka jae iñee umimbeu wae reta rupi kërái Cristo yae chupe wae uiporara ñotái iko wae,” jei chupe reta.

<sup>19</sup>“Jayawe peya pepiyemingeta jupi mbae wae jare piyerowa Tumpa koti, jae umbái pewi waerä opaete teko penoi ikoti wae,” jei.

<sup>20</sup>“Jare joko wiwe Tumpa pembipiakatuta jare pemimirätata oi ikoti,” jei. “Jare pëti ara Tumpa ombou yeta yandewe Cristo kërái jae arakae uikuaaka yandewe rami – jae ko Jesús,” jei chupe reta.

<sup>21</sup>“Erëi añawe jae upitata ko ara pe opaete mbaembae yandeRu Tumpa uyapikatu kawi rewa,” jei. “Jokua mbaembae rewa Tumpa uikuaaka yandewe arakae wiwe jae iñee umimbeu wae reta rupi,” jei chupe reta.

<sup>22</sup>Pedro jei wi chupe reta: “Arakae Moisés jei yanderamikue reta pe kuärái: ‘Pëti ara yandeTumpa ikoño mái wae ombouta oi pewe iñee umimbeuta wae ñaniñemoñaä reta ipite wi, jae chembou rami. Piyapisaka kawita ko jese opaete jae jeita pewe wae re.

<sup>23</sup>Jare ipotawe kía uyapisaka’ä jese wae, Tumpa umbisirita iyuwi. Joko wiwe Tumpa imbae’ä ma ko.’ Jukuärái jei Moisés,” jei chupe reta.

<sup>24</sup>“Jukuäräiete wi Samuel umimbeu arakae jokua nunga ñeeño wi. Jare opaete Tumpa ñee arakae umimbeu wae reta Samuel wiwe umimbeu reta wi jokua rewa. Opaete pëti rami umimbeu reta kua ara reta rewa, mbae uasata iko wae rewa,” jei chupe reta.

<sup>25</sup>“Jare jokua jae reta uikuatía wae, jae ko yanemaerä añawe, yande ñemoñaaratarä yaiko wae. Jare jokua yemingeta ikawi wae Tumpa uyapo arakae yanderamikue Abraham ndiwe wae, jae ko yanemaerä wi. Echa’ä Tumpa jei chupe kuärái: ‘Ñemoñaar rupi opaete iwi pewa reta uyekouta,’ jei chupe.

<sup>26</sup>“Jayawe Tumpa umbijekowe ye ueru Tai umanokue wae reta ipite wi jare tenonde ombou yandewe, yande judiorä yaiko wae reta pe rani. Jukuärái jae uyapo yayekou waerä jare yanembiyerowaka waerä yandereko kachi wi,” jei Pedro chupe reta.

## Hechos 4

### Pedro jare Juan mburuwicha reta jowai

<sup>1</sup>Jayawe Pedro jare Juan uyemingeta rambuwe uyembati wae reta ndiwe, yuweru ikoti amokue sacerdote reta, jare saduceo reta, jare tupao wasu isindaro reta itenondewa wi.

<sup>2</sup>Jae reta pochi Pedro jare Juan oporomboe wae re. Echa’ä oporomboe ñonoï kërái yandeRu Tumpa umbijekowe ye ueru Jesús umanokue wae reta ipite wi, jare jukuärái umanokue wae reta ikowe yeta wi.

<sup>3</sup>Jayawe jokua mburuwicha reta uipisika Pedro jare Juan. Erëi uyemingeta’ä reta jae reta ndiwe, echa’ä kaaru ma iko ramo. Jáeramo oñonoka reta peresoriru pe piarewe rewa.

<sup>4</sup>Erëitu jokua uyembati wae reta ipite wi, jeta wirowia reta Pedro jare Juan oporomboe wae re. Jáeramo añawe Cristo re wirowia wae reta kuimbae retaño uyepapa pandepo miri rupi.

<sup>5</sup>Jayawe piarewe pe uyembati tëta wasu Jerusalén pe mburuwicha reta, judío itenondewa reta, jare Moisés uikuatía wae re oporomboe wae reta.

<sup>6</sup>Joko pe ñonoï wi sacerdote tenondewaete Anás jee wae, jare Caifás, Juan, jare Alejandro jee wae, jare ñru kuimbae sacerdote tenondewaete jëtara reta.

<sup>7</sup>Jayawe ueruruka reta Pedro jare Juan jae reta jowai, jare upirandu chupe reta kuärái: “¿Kërái pa pe reta pepuere kía peminguera? Jare ¿kía pa umee pewe mbaepuere kua piyapo waerä?” jei chupe reta.

<sup>8</sup>Jayawe Espíritu Santo imbaepuere rupi, Pedro jei chupe reta kuärái: “Mburuwicha reta jare Israel pewa itenondewa reta,” jei.

<sup>9</sup>“¿Pepirandu pa peï orewe jokua kuimbae uwata mbae wae pe nduyapo chupe ikawi wae re? ¿Pipota pa pikuaa kërái ukuera wae re?” jei.



10“Che aipota pe reta jare opaete ñanerëtara Israel pewa reta pikuaa kawu waerä kua: Jesucristo Nazaret pewa jee re ko ukuera kua kuimbae perowai oï wae,” jei. “Kua Jesús pe reta pikutuka kurusu re piyukaka waerä, erëi yandeRu Tumpa umbijekowe ye ueru umanokue wae reta ipite wi,” jei.

11“Kua Jesús pe reta perïro tëta iyapoa reta pëti ita wirïro omombo iyuwi reta wae rami. Erëi añawe jae uyeyapo ma chuwi reta ita ikawiete ye wae rami opaete ïru ita reta tëta pewa wi,” jei.

12“Jayawe mbaeti ye kía ipuere yanderepi waerä mbaembae yayawi Tumpa koti wae wi. Echa’ä yandeRu Tumpa ombou pëtiño kua iwi pe ipuere yanderepi waerä wae – jae ko Jesús.” Jukuärái jei Pedro chupe reta.

13Jayawe mburuwicha reta uecha Pedro jare Juan kërái yepe tëi mokui rewe jeta’ä uyemboe yemboerenda rupi, erëi uyemingeta reta ukiye mbae rewe. Jáeramo mburuwicha reta ipiakañi umae jese reta, jare imandúa reta kërái yurekose reta Jesús ndiwe wae.

14Erëi uwäe’ä ye ma jae reta iñeerä jei reta waerä Pedro jare Juan koti, echa’ä kuimbae ukuera wae uyemboi oï jae reta ndiwe.

15Jayawe mburuwicha reta omoëka Pedro jare Juan iyembati wi, jare jei iyupe reta. 16“¿Mbae ra yayapota kua kuimbae reta ndiwe?” jei reta. “Echa’ä opaete Jerusalén pewa reta uikuaa ñonoï uyapo reta ma mbae kiawe ipuere’ä uyapo wae. Jare ndarau yandepuere yaikuaku.

17Erëi yayopiata ko chuwi reta awiye jekuaeño jeräkua waerä. Jayawe yaeta ko chupe reta jae reta jekuaeño oporomboe yawe Jesús jee re, yaiporarakata chupe reta,” jei reta iyupe.

18Jayawe ueruruka ye reta Pedro jare Juan, jare umumburu rewe jei chupe reta: “Awiye ye ma piyemingeta jare peporomboe Jesús jee re,” jei chupe reta.

19Jayawe Pedro jare Juan jei chupe reta: “¿Mbae pa pere? ¿Ikawi ra ko Tumpa jowai ore nduyapo waerä pe reta pere wae rupi ani Tumpa jei wae rupi? Erëi ore ndoe pewe nduyapota ko Tumpa jei wae rupi,” jei reta.

20“Echa’ä ore imeta ko jekuaeño numimbeu ïru wae reta pe ore nduecha wae jare nduyandu wae,” jei chupe reta.

21Jayawe mburuwicha reta umumburu reta ye, jare umaeño jese reta oë oo ye waerä. Jare uiporaraka’ä chupe reta. Mburuwicha reta uikuaa’ä ma mbae ye uyapo chupe reta waerä, ukiye reta tëta wasu pewa reta wi ramo. Echa’ä opaete tëta wasu pewa reta umbutuicha yureko Tumpa jee jokua uyeyapo wae jeko pewa.

22Opaete uikuaa yureko reta jokua kuimbae ukuera wae uwata’ä etei iko ichi wi oa wiwe, jare cuarenta año uasa ma onoi.

**Cristo re wirowia wae reta uyerure Tumpa pe umiatangätu waerä**

<sup>23</sup>Jayawe Pedro jare Juan oë reta yawe, yuraa iru reta ñonoï wae pe. Jare umimbeu chupe reta opaete sacerdote itenondewa reta jare judío itenondewa reta jei chupe reta wae.

<sup>24</sup>Jare jokua uyandu reta yawe, uyerure reta pëti ramiño Tumpa pe kuärái: “OreRu mii Tumpa, nde ko jae ara, iwi, mar, jare opaete mbaembae ñonoï pipe wae iyapoa,” jei reta.

<sup>25</sup>“Arakae David uyeyokui kawi ndewe, jare nde ndikuaaka chupe Espiritu Santo rupi kuärái: ‘Judío mbae wae reta pochi ñonoï tēi. Jare Israel pewa reta uyemboemboe tēi uyapo reta waerä mbae kachi wae.

<sup>26</sup>Echa’ä judío mbae wae reta imburuwicha wasu reta jare Israel pewa itenondewa reta wi uyembati pëti rami Tumpa koti jare jokua Upuruepi wae jae ombou wae koti ombowaicho waerä tēi.’ Jukuärái jei David,” jei reta.

<sup>27</sup>“Jare jukuärái uyeyapo, oreRu Tumpa. Echa’ä mburuwicha wasu Herodes jare mburuwicha Poncio Pilato mokui rewe uyemboemboe reta pëti ramiño judío mbae wae reta ndiwe jare Israel pewa reta ndiwe wi. Jare kua tēta wasu pe etei uyembowaicho reta Jesús koti – jae ko ndeRai jupiete wae jare nde ndiparawo Upuruepi waerä wae,” jei reta.

<sup>28</sup>“Erēi ore nduikuaa nempaepuere tuichaete ko. Jare jae reta uyapo wae, nde ndere uyeyapo ñotái iko,” jei reta Tumpa pe.

<sup>29</sup>“Añawe, oreRu Tumpa, nde ndikuaa neï kërái jae reta oremumburu ñonoï wae. Jáeramo, orembori mii numimbeu waerä niñee ndukiye mbae rewe, echa’ä ore nduipotaete nduyeyokui ndewe ramo,” jei reta.

<sup>30</sup>“Jare emee mii wi orewe mbaepuere ndeRai jupi wae Jesús jee re ndupuruminguera waerä jare nduyapo waerä iru mbaembae kiawe ipuere’ä uyapo wae.” Jukuärái uyerure reta Tumpa pe.

<sup>31</sup>Jayawe, opa ma uyerure reta yawe Tumpa pe, aramoïño umbipi uñemitimo chupe reta kiape uyembati ñonoï wae pe. Jare opaete jae reta Espiritu Santo umimbaepuere reta. Jáeramo joko wiwe umimbeu reta Tumpa iñee ukiye mbae rewe.

### **Cristo re wirowia wae reta uyembori katu wae rewa**

<sup>32</sup>Jayawe opaete Cristo re wirowia wae reta yureko ipia pe pëti ramiño uyerowia rewe. Mbaeti pëti awe jae reta ipite pe mbaembae umbiete iyupe reta wae. Opaete mbaembae onoi reta wae umbiyaoñoi iyupe reta.

<sup>33</sup>Jare mbaepuere tuicha wae rewe Jesús jemimboe tenondewaete reta jekuaeño umieräkua Jesús rewa kërái Tumpa umbijekowe ye ueru umanokue wae reta ipite wi. Jare Tumpa ipiakawiete rupi ombori opaete Cristo re wirowia wae reta.

<sup>34-35</sup>Jare jeta wae reta owaka jëta jare iïwi, jare ueru umee reta jepikue Jesús jemimboe tenondewaete reta pe. Jare jae reta umbiyao umee yuapi ye mbae uata chupe wae reta pe. Jáeramo mbaeti pëti awe mbae uata chupe wae jae reta ipite pe.

<sup>36</sup>Jukuärái uyapo kuimbae José jee wae. Jae ko pëti Leví iñemoñaá pewa, jare iwi Chipre jee wae pewa ko. Jokua kuimbae Jesús jemimboe tenondewaete reta umbijee Bernabé. Jokua tee uipota jei Upurumbipiakatu wae.

<sup>37</sup>Jae ime wireko iïwi, jare owaka jare ueru umee opaete jepikue Jesús jemimboe tenondewaete reta pe.

## Hechos 5

### Ananías jare Safira uipota tëi iyapu Pedro pe

<sup>1</sup>Ime iko ïru kuimbae, Ananías jee wae. Jembireko Safira ndiwe ime yepe wireko iïwi wi, jare owaka reta.

<sup>2</sup>Erëi Ananías jembireko ndiwe umimbire yepe iyupe iïwi jepikue. Joko wi Ananías ueru umee korepoti Jesús jemimboe tenondewaete reta pe jare jei chupe reta kuärái: “Kua ko opaete oreiwi jepikue,” jei.

<sup>3</sup>Jayawe Pedro jei chupe: “Ananías, nde ndiyapisaka ma Satanás jei wae re jare nemaño ma ndiyembitawika. Jáeramo ndipota tëi ndapu Espíritu Santo pe, jare nemimbire ndeyupe ndeiwi jepikue,” jei.

<sup>4</sup>“Ndei ndewaka ndeiwi mbowe, nembae iko. Jare ndewaka ma yawe, jepikue nembae ko wi. ¿Maera pa ndepia pe ndiyemingeta mbae ikawi mbae wae ndiyapo waerä? Ndapu’ä ko kuimbae reta peño. Ndipota tëi ndapu Tumpa pe etei,” jei Pedro Ananías pe.

<sup>5</sup>Jayawe jokua uyandu yawe, Ananías oa iwi pe jupiwoiño umano. Jare opaete kua re uikuaa wae reta ukiyete.

<sup>6</sup>Joko wi yuweru amokue kuimbae taurusu wae reta, jare oñoma jetekue nieso pipe, jare wiraa oñoti reta.

<sup>7</sup>Jare mbapi ora ma uasa yawe, uike Safira Pedro oï wae pe. Jae uikuaa’ä iko ime umano ko wae.

<sup>8</sup>Jayawe Pedro uechaka chupe korepoti imekue Ananías umee chupe wae, jare upirandu chupe: “Embeu chewe, ¿kua pa ko jae opaete korepoti peiwi jepikue?” jei chupe. Jayawe Safira jei: “Añetete, jokua ko jae,” jei.

<sup>9</sup>Jayawe Pedro jei chupe: “Piyapo ma mbae ikawi mbaete wae. Echa’ä nde jare nemekue ndiwe piyemboemboe pemboporowa waerä tëi Tumpa iEspíritu iyarakuaa. Mase, kuimbae taurusu wae reta oñoti neme jetekue wae, ko ma ñonoï öke pe. Jare jae reta wi ndereraata oï,” jei Pedro chupe.

**10**Jare jukuärái jei rupiwe Safira wi oa Pedro jowai umano woi. Jare uike ma yawe kuimbae taurusu wae reta, uecha umano ma. Jayawe wiraa oñoti reta imekue iyipi pe.

**11**Jare jokua jeräkua opaete Cristo re wirowia wae reta pe, jare jeta ñru wae reta pe wi. Jayawe opaete jae reta uipiuete Tumpa wi.

**Jesús jemimboe tenondewaete reta uyapo jeta mbaembae kiawe ipuere'ä uyapo wae**

**12**Jokua ara reta rupi Jesús jemimboe tenondewaete reta uyapo jeta mbaembae kiawe ipuere'ä uyapo wae tēta wasu pewa reta jowai rupi. Jare jokua rupi uechaka chupe reta Tumpa imbaepuere. Jare opaete Cristo re wirowia wae reta jekuaeño uyembati tupao wasu ikorero wasu Salomón jee wae pe.

**13**Erēi opaete ñru wae reta ukiye uyembati waerä jae reta ndiwe joko pe. Jesewe uipiu chuwi reta.

**14**Jare opa ara rupi jeta ñru kuimbae jare kuña reta yandeYa re wirowia wae uñemñru jae reta ndiwe.

**15**Jare jeräkua opaete wae reta pe jokua mbaembae ikawi wae Jesús jemimboe tenondewaete reta uyapo yureko wae rewa. Jáeramo jeta wae reta wiraa imbaerasi wae reta jupa rewe oñono tapembei rupi. Jukuärái uyapo reta Pedro iwarasña yepe uasa waerä amokue wae reta íaramo rupi Pedro uasa oo oñ yawe, jare jukuärái ipuere ukuera reta waerä.

**16**Jare jeta wae yuweru Jerusalén pe ñru tēta wasu rai koiño Jerusalén wi ñonoñ wae reta wi. Jae reta ueru imbaerasi wae reta jare ñña uyembñya jese wae reta. Jare opa ukuera reta.

**Yembiawái ou Jesús jemimboe tenondewaete reta pe**

**17**Jayawe sacerdote tenondewaete jare ñru saduceo reta ndiwe uñamñtäa umaeta Jesús jemimboe tenondewaete reta re.

**18**Jáeramo uipisika jare oñonoka reta peresorñru tēta wasu pe oñ wae pe.

**19**Erēi jokua pñtu yandeYa ombou pñti arañwa uipea waerä peresorñru jōke reta jare omoē reta. Jare jei chupe reta kuärái:

**20**“Pekua ye tupao wasu joka pe, jare jekuaeño pemimbeu tēta wasu pewa reta pe kērái onoi reta waerä tekowe ipñau wae.” Jukuärái jei arañwa chupe reta.

**21**Jayawe piarewe ndimboweasñ Jesús jemimboe tenondewaete reta yuraa ye uike tupao wasu joka pe. Jare umbñpi oporombōe ye reta kērái arañwa jei chupe reta wae rupi. Jayawe jokua rambuewe, sacerdote tenondewaete jare jae ndiwe yureko wae reta ueni judío itenondewaeta uyembati reta waerä Jesús jemimboe tenondewaete reta koti. Jae reta uikuua'ä yureko Tumpa onoe ma reta peresorñru wi. Jayawe omondo sindaro reta ueruruka waerä tēi peresorñru wi Jesús jemimboe tenondewaete reta.

<sup>22</sup>Erëi sindaro reta yuraa uwäe yawe peresoriru pe, uwäe'ä chupe reta joko pe. Jayawe yuweru ye reta imburuwicha reta uyembati ñonoï wae pe jare jei chupe reta kuärái.<sup>23</sup>“Nduecha peresoriru jöke reta uyeyukenda kawi ñonoï,” jei reta. “Nduecha wi öke iyandarekoa reta ñonoï jenda jenda rupi. Erëi öke nduïpea yawe, mbaeti ma yureko japipe kiawe.” Jukuärái sindaro reta jei chupe reta.

<sup>24</sup>Jare jokua uyandu reta yawe, tupao wasu isindaro reta itenondewa jare sacerdote itenondewa reta ipiakañi, jare jei iyupe reta kuärái: “¿Kiape ye ma pa uwäeta kua?” jei iyupe reta.

<sup>25</sup>Aramoiño uwäe ou pëti wae uyembati ñonoï reta wae pe jare umimbeu chupe reta: “Jokua kuimbae reta piñonoka peresoriru pe wae añawe ñonoï tupao wasu joka pe. Jae reta omboe ñonoï tëta wasu pewa reta,” jei chupe reta.

<sup>26</sup>Jayawe tupao wasu isindaro reta itenondewa oo amokue isindaro reta ndiwe jare uipisi ueru reta Jesús jemimboe tenondewaete reta. Erëi uipiu rewe ueru reta. Echa'ä tëta wasu pewa reta umae kawi Jesús jemimboe tenondewaete reta re jare ipuere ko uyapi reta ita pe sindaro reta uyuka reta waerä.

<sup>27</sup>Jare sindaro reta ueru Jesús jemimboe tenondewaete reta mburuwicha reta jowai. Jayawe sacerdote tenondewaete jei chupe reta kuärái:

<sup>28</sup>“Poyokui tëi awiye ye ma peporomböe waerä jokua kuimbae jee re,” jei. “Erëi jesewe pe reta pemieräkua ma opaete tëta wasu Jerusalén rupi jokua yemböe. Jare pipota pemboyaka oreré jokua kuimbae imano,” jei chupe reta.

<sup>29</sup>Jayawe Jesús jemimboe tenondewaete reta ipite wi Pedro uyemingeta opaete pewarä, jare jei mburuwicha reta pe kuärái: “Pe reta pipota'ä tëi ore nduyapo waerä Tumpa jei orewe wae. Erëi nduyapota ko Tumpa jei wae, pe reta pere wae wi,” jei chupe reta.

<sup>30</sup>“Yepe tëi pe reta pikutuka kurusu re Jesús piyukaka, jesewe yanderamikue reta iTumpa umbijekowe ye Jesús ueru umanokue wae reta ipite wi.

<sup>31</sup>Joko wi wiraa ara pe. Jare joko pe Jesús uwapi oï yandeRu Tumpa iyipi iyakata koti, jare jae ndiwe ime onoi mbaepuere opaete wae re,” jei. “Jukuärái yandeRu Tumpa uikuaaka opaete wae pe Jesús ko jae yandeYa jare yandeRepï wae. Jare jukuärái Tumpa umee yandewe yandepuere waerä yaeya yandepiyemingeta jupi mbae wae Tumpa rewa. Jukuärái opaete mbaembae yayawi Tumpa koti wae jae opata umbái yandewi,” jei.

<sup>32</sup>“Jare opaete kua ore nduecha oreresä pe etei. Jare Espiritu Santo wi uikuaaka oï opaete jokua añetete wae ko. Echa'ä Tumpa umee oï Espiritu Santo opaete uyapo jae jei wae rupi wae reta pe.” Jukuärái jei Pedro chupe reta.

<sup>33</sup>Jokua ñee uyandu reta yawe, uyembati wae reta pochiete chupe reta jare uipota tëi uyuka reta.

<sup>34</sup>Erëi mburuwicha reta ipite pe oï wi pëti fariseo Gamaliel jee wae. Jae ko pëti wae Moisés uikuatía wae re oporomböe wae, jare opaete tëta wasu pewa reta umae kawi

jese. Jayawe Gamaliel uyemboi jare omoëka michi pewa Jesús jemimboe tenondewaete reta ikotia.

<sup>35</sup>Jayawe jae jei uyembati wae reta pe: “Cherëtara Israel pewa reta, pepia pe piyemingeta kawi rani mbae piyapota kua kuimbae reta ndiwe wae re,” jei.

<sup>36</sup>“Yanemandúa kawi ñai, karamboe yawe ou pëti kuimbae Teudas jee wae ombowaicho waerä tëi romano imburuwicha reta koti. Jae uyererowiaka ñru wae reta pe. Jare jeta kuimbae reta – aramoi irundi chiëto rupi – yuraa jae ndiwe,” jei. “Erëi sindaro reta uyuka Teudas. Jare opaete jae ndiwe yureko wae reta opa uñemiái, jare mbaeti ye ma mbae ipuere uyapo reta,” jei.

<sup>37</sup>“Joko wi, jokua ara reta rupi romano reta imburuwicha wasu opa yandepapaka iko yawe, ou ñru kuimbae Judas jee wae. Jae ko iwí Galilea pewa. Jae wiraa jeta ñru kuimbae reta wi ombowaichoka waerä tëi romano imburuwicha reta koti. Erëitu sindaro reta uyuka Judas jare opa uñemiái wi opaete jae ndiwe yureko wae reta,” jei.

<sup>38</sup>“Jáeramo añawe che jae pewe kuärái: Awiye ma piyapo mbae awe kua kuimbae reta koti, jare pemaño ma jese reta. Echa’ä kuimbae imbaepuere peño jae reta oporomboe ñonoï yawe, ndarau oo uwäe mbiri,” jei.

<sup>39</sup>“Erëi kua mbaepuere Tumpa wi ou yawe, ndarau pepuere pembiyemboi, echa’ä Tumpa ndiwe etei ko piyowaichota pei.” Jukuärái jei Gamaliel ñru mburuwicha reta pe.

<sup>40</sup>Jayawe jokua jae jei wae ikawi chupe reta. Jáeramo uenika ye Jesús jemimboe tenondewaete reta. Jare mburuwicha reta umbipiuka reta. Jare jei chupe reta: “¡Awiye ye ma pemboe ñru wae reta Jesús jee re!” jei chupe reta. Joko wi umaño jese reta oo ye waerä.

<sup>41</sup>Jayawe Jesús jemimboe tenondewaete reta oë ye yuraa joko wi. Jare uyerowiaete reta, echa’ä Tumpa umee chupe reta ipuere waerä uiporara Jesús re wirowia reta wae re.

<sup>42</sup>Jare opa ara rupi jae reta jekuaño oporomboe tupao wasu joka pe jare tëta tëta rupi. Jare jekuaño umimbeu reta wi ñru wae reta pe ñee ikawi wae kërái Jesús ko jae Cristo jei chupe reta wae.

## Hechos 6

### Uiparawo chiu kuimbae reta

<sup>1</sup>Jokua ara reta rupi tëta wasu Jerusalén pe jeta judío reta wirowia yandeYa Jesucristo re. Jare jeta jae reta iwí Israel pewa reta ko, jare uyemingeta reta ñee pe etei – jae ko hebreo ñee pe. Jare ime wi ñru judío reta ambiembie iwí pewa reta ko. Jokua reta uyemingeta griego ñee peño. Ime wi yureko jokua hermano reta ipite pe jeta kuña ime umano chuwi wae reta. Jare hermano Israel pewa reta jekuaño ombori reta. Opa ara rupi umee chupe reta jembuurä. Erëi yembiawái ou hermano reta pe kuärái: Opa ara rupi umee reta yawe, amo wese rupi umbiete chupe reta

kuña ime umano chuwi wae griego ñee pe uyemingeta wae reta pe. Jáeramo hermano griego ñee pe uyemingeta wae reta iyengeta jokua Israel pewa reta koti.

<sup>2</sup>Jare jokua yembiawái jeräkua jokua doce Jesús jemimboe tenondewaete reta pe. Jáeramo jae reta umbati opaete Cristo re wirowia wae reta jare jei chupe reta kuärái: “Tumpa umee orewe mbarawiki nduyapo waerä – jae ko ndoporomboe waerä Tumpa iñee re. Erëi orepuere’ä nduyapo kawi jokua mbarawiki jekuaeño numee noï tembiurä yawe,” jei reta.

<sup>3</sup>“Jáeramo hermano reta, piparawo pepite wi chiu kuimbae pemaec kawi jese wae reta,” jei. “Tuiko kuimbae reta iyarakuaa katu wae jare uyekuaa jese reta Espiritu Santo jei wae rupi yureko reta wae. Jare jae reta tuyapo yandewe jokua mbarawiki,” jei.

<sup>4</sup>“Jukuärái orepiawiwe kawi rewe orepuere nduyerure Tumpa pe jare ndoporomboe iñee re.” Jukuärái jei chupe reta.

<sup>5</sup>Jayawe jokua jei reta wae ikawi opaete hermano reta pe. Jáeramo jae reta uiparawo kua kuimbae reta: Tenonde uiparawo reta Esteban jee wae. Jae wirowia kawi Tumpa re jare uyekuaa jese Espiritu Santo jei wae rupi iko wae. Uiparawo reta wi Felipe, Prócoro, Nicanor, Timón, jare Parmenas jee wae reta. Jare uiparawo reta wi Nicolás jee wae – jae ko tēta wasu Antioquía jee wae pewa. Ndei wirowia Cristo re mbowe, jae judiorä uyeyapo.

<sup>6</sup>Joko wi wiraa reta jokua chiu kuimbae reta Jesús jemimboe tenondewaete reta jowai. Jayawe Jesús jemimboe tenondewaete reta uyerure Tumpa pe jese reta Tumpa ombori reta waerä. Jare Tumpa pe uyerure reta rambuwe, oñono reta ipo jokua chiu kuimbae reta re. Jukuärái uyapo reta uikuaaka waerä opaete hermano reta pe Tumpa umee kua kuimbae reta pe mbaepuere uyapo reta waerä jokua mbarawiki.

<sup>7</sup>Jáeramo Tumpa iñee jekuaeño uñemiái opaete tēta wasu Jerusalén rupi. Jayawe jokoropi uyembijeta Cristo re wirowia wae reta. Jare jeta judío isacerdote retawe wirowia wi Jesús re.

### **Umbijeko reta Esteban iyapu rewe**

<sup>8</sup>Jayawe jokua chiu kuimbae reta wi pēti wae ko jee Esteban. Jae ipirätaete Tumpa koti. Jare Tumpa umee chupe arakuaa jare mbaepuere jekuaeño uyapo waerä mbaembae kiawe ipuere’ä uyapo wae opaete wae reta jowai.

<sup>9</sup>Jokua año rupi tēta wasu Jerusalén pe yureko amokue judío reta tēta wasu Cirene jare Alejandría pewa reta. Jare ime yureko wi judío reta iwi Cilicia jare iwi Asia pewa. Jare opaete jae reta ko jae pēti tupao “Uyeyokui Iya Mbae Wae” jee wae pewa. Pēti ara amokue jokua reta yuweru Esteban koti jare umbipi uyeaka reta jae ndiwe Jesucristo rewa.

<sup>10</sup>Erëi jae reta uyeaka yawe Esteban ndiwe, ipuere’ä etei umiamiri reta, echa’ä Espiritu Santo umee arakuaa Esteban pe uyemingeta waerä jae reta ndiwe.

<sup>11</sup>Jáeramo jokua judío reta umbiepi wiari amokue kuimbae reta pe iyapu waerä Esteban re kuärái: “Ore nduyandu ma Esteban jei ñee ikawi mbae wae yanderamikue Moisés koti jare Tumpa koti wi,” jei reta.

<sup>12</sup>Jukuärái jae reta ombopochika Esteban koti jeta tēta wasu pewa reta, jare tēta wasu pewa itenondewa reta, jare Moisés uikuatía wae re oporomboe wae reta wi. Jayawe uipisi reta Esteban, jare wiraa reta judío imburuwicha reta jowai.

<sup>13</sup>Joko pe iyapu wae reta umbijeko ye Esteban kuärái: “Kua kuimbae jekuaeño jei ñee ikawi mbae wae yandetupao wasu koti jare Moisés arakae uikuatía wae koti,” jei reta.<sup>14</sup>“Mase, ore nduyandu jei jokua Jesús Nazaret pewa umbaita yandetupao wasu jare ueyakata yandewe yandereko Moisés uikuaaka yandewe wae,” jei reta.

<sup>15</sup>Jare jokua uyandu reta yawe, opaete joko pe ñonoï wae reta umae ngatu Esteban re. Jare uecha reta jae jowa araiwa jowa rami.

## Hechos 7

### Esteban jei wae mburuwicha reta pe

<sup>1</sup>Jayawe sacerdote tenondewaete jei Esteban pe: “Emimbeu orewe,” jei. “¿Añetete pa nde ndere jukuärái?” jei chupe.

<sup>2</sup>Jayawe Esteban omoë iñee joko pe ñonoï wae reta pe kuärái: “Cherētara reta jare chemburuwicha reta, piyapisaka mii cheré,” jei. “Pikuaa kawī peī arakae yandeTumpa jupiete wae uyekuaa yanderamikue Abraham pe. Uyekuaa chupe iwi Mesopotamia pe joko pe Abraham iko yawe, ndei oo uyakao mbowe tēta wasu Harán pe.

<sup>3</sup>Jare Tumpa jei chupe: ‘Eë jare eya kua ndeiwi jare nerētáíwa reta, jare ekua pēti iwi aikuaakata aī ndewe wae pe,’ jei chupe.

<sup>4</sup>“Jayawe Abraham oë oo caldeo reta iíwi wi jare upita rani ima katu rupi tēta wasu Harán pe. Jare joko pe umano tu,” jei. “Jayawe tu umano ma yawe, Tumpa ombou Abraham joko wi kua iwi añawe yaiko pipe wae pe,” jei.

<sup>5</sup>“Erēi Tumpa umee’ä Abraham pe iíwirä jaeramo kua pe ou uwäe yawe. Umee’ä chupe ipi jendarä yepe,” jei. “Erēitu Tumpa jei umee ñotái iko chupe kua iwi jae jare iñemoñaá reta pewarä. Jukuärái jei Tumpa chupe ndei ime wireko mbowe tai,” jei Esteban chupe reta.

<sup>6</sup>“Jare Tumpa jei wi chupe: ‘Niñemoñaá reta uiporarata ñonoï irundi chiēto año rupi ambie iwi pewa reta iíwi pe,’ jei. ‘Jokua iwi pewa reta uyapota ipione retarä tãta rupi uyeyokui chupe reta waerä.

<sup>7</sup>Jare jokua irundi chiēto año uasa ma yawe, aiporarakata aī jokua iwi pewa reta pe. Jare niñemoñaá reta oēta jokua iwi wi, jare aru yeta kua iwi pe chiñee umbutuicha reta waerä kua iwi pe.’ Jukuärái jei Tumpa Abraham pe,” jei chupe reta.



8“Joko wi Tumpa uyapo pëti yemingeta ikawi wae Abraham ndiwe,” jei. “Jokua yemingeta jei Abraham jare opaete iñemoñaeta reta ikota Tumpa imaera. Jare Tumpa jei Abraham pe: ‘Piyembicircuncidaka, nde jare opaete niñemoñaeta kuimbae reta wi. Jokua ko jae kua yemingeta ayapo aï pe reta ndiwe wae jaanga,’ jei chupe,” jei. “Jare pikuaa kawi peï wi Abraham tai Isaac oa yawe jare juri ara ma wireko yawe, jokua ara pe Abraham umbicircuncida tai. Jae nunga wi Isaac tai Jacob umbicircuncida. Jae ramiño Jacob doce tai reta wi. Jae reta ko jae yanderamikue reta,” jei Esteban chupe reta.

9“Jacob tai tenondewa reta uñamitaa tiwi José, echa’ä tu uauete José ramo. Jáeramo owaka reta tiwi mbaembae owaka wae reta pe. Joko wi mbaembae owaka wae reta wiraa iwi Egipto pe jare owaka yuapi ye pëti kuimbae pe täta rupi uyeyokui chupe waera. Erëi Tumpa jekuaeño iko José ndiwe.

10Jare jekuaeño ombori José opaete yembiawái reta rupi,” jei. “Joko wi Tumpa umbipiakawi mburuwicha wasu iwi Egipto pewa uma kawi waera José re. Jae uikuaa iko Tumpa umee José pe arakuaa. Jáeramo mburuwicha wasu umbijee José opaete iwi Egipto pewa reta imburuwichara. Jukuärái José wireko mbaepuere opaete Egipto pewa reta re, jare mburuwicha wasu jëtara reta re wi,” jei Esteban chupe reta.

11“Erëi karuái wasu ou opaete iwi Egipto rupi jare iwi Canaán rupi. Jáeramo jeta wae reta ikuasiete. Jare yanderamikue reta uwäe’ä mbae awe jou reta waera,” jei.

12“Jare Jacob uikuaa yawe ime tembiura wae iwi Egipto pe, omondo tai reta – jokua ko jae yanderamikue reta – joko pe owa iyupe reta waera. Jáeramo jae reta yuraa Egipto pe jaeramo etei,” jei chupe reta.

13“Jare opa yawe jokua tembiu owakue reta wae, Jacob omondo ye reta. Jare kua wese José uyekuaaka tikei reta pe jare tiwi pe. Jare uikuaaka wi mburuwicha wasu pe jëtara reta,” jei.

14“Jayawe José omondo ueruruka tu iwi Egipto pe, jae oï wae pe. Jare ueruruka wi opaete tu jëtara reta. Jayawe setenta y cinco Jacob iñemoñaeta reta yuraa iwi Egipto pe,” jei chupe reta.

15“Jukuärái Jacob oo uyakao iwi Egipto pe jare joko pe umano. Jare tai reta wi umano joko pe.

16Jaikue rupi iñemoñaeta reta ueru Jacob jare José ikäwekue reta tëta wasu Siquem jee wae pe, jare joko pe oñoti reta teöwerenda Abraham owa wae pe. Echa’ä arakaete Abraham umbiepi kuimbae Hamor jee wae tai reta pe korepoti pe, Siquem pe iko yawe,” jei Esteban chupe reta.

17“Jare koiño ma ou yawe ara Tumpa uyapo waera jokua Abraham pe arakaete jae jei wae, yanderamikue reta jeta ma uñemoñaeta reta iwi Egipto pe.

18Jokua año rupi iwi Egipto pe upüa ambie mburuwicha wasura uikuaa’ä etei José rewa wae,” jei.

- 19“Kua mburuwicha wasu iyarakuaa katuete uyapo waerä mbaembae kachi wae yanderamikue reta pe. Jae ueyaka chupe reta isambiai jaeramo oa wae reta umano waerä,” jei Esteban chupe reta.
- 20“Jokua año rupi oa Moisés. Kua sambiai maepöraete wae ko. Jare mbapi yasi rupi tu jare ichi uyandareko jese jëta pe,” jei.
- 21“Joko wi tu jare ichi imeta ko ueya Moisés, erëi mburuwicha wasu tayi uepi. Jare jae umbikuakuaa imembi rami.
- 22Jayawe Moisés uyemboe opaete arakuaa iwi Egipto pewa re, jare mbaepuere rewe uyemingeta jare ikatuete mbaembae uyapo,” jei Esteban chupe reta.
- 23“Pëti ara, Moisés cuarenta año ma wireko yawe, ipia pe uyemingeta iko jëtáíwa Israel ñemoñaeta reta rewa. Jáeramo oë oo opou waerä ipi reta.
- 24Aramoiño uecha pëti kuimbae Egipto pewa uinupa täta oï pëti uyeyokui wae Israel pewa. Jayawe Moisés uyuka jokua kuimbae Egipto pewa, jare jukuärái uepi uiporara iko wae,” jei.
- 25“Moisés jei tëi iyupe: ‘Cherëtáíwa reta uikuaata ko Tumpa chembou aepi reta waerä,’ jei. Erëi uikuaa’ä reta,” jei Esteban chupe reta.
- 26“Piarewe pe Moisés uecha uñeräro ñonoï mokui Israel ñemoñaeta reta jae yepái. Jayawe Moisés uipota tëi umbipiakatu reta jare jei chupe reta: “¿Maera pa piyapo pei mbae ikawi mbae wae peyupe? Pëti tëta pewa yepái ko pe reta,’ jei chupe.
- 27“Erëi upurunupa oï wae umiaña Moisés iyuwi jare jei chupe: “¿Kía pa neñono oremburuwicharä nde ndere waerä orereko rewa?” jei.
- 28“¿Ndipota pa cheyuka wi, jokua kuimbae Egipto pewa káarumo ndiyuka wae rami?’ jei.
- 29“Kua uyandu yawe, Moisés ukiye jare oë osi oo iwi Egipto wi iwi Madián jee wae koti. Jare joko pe iko rambuwe, Moisés umenda jare kuña mokui isambiai chupe,” jei Esteban chupe reta.
- 30“Erëi cuarenta año ma uasa yawe, Tumpa uyekuaa Moisés pe araiwa echa rami yái jendi oï wae pe. Jukuärái uasa iwitini wasu pe koiño iwitu wasu Sinaí jee wae wi.
- 31Moisés jokua uecha yawe, ipiakañi jare jei iyupe: ‘Yaecha, taa tamae jese,’ jei iyupe. “Erëi umbipi oya jese yawe, aramoiño uyandu yandeYa ñee.
- 32Jare yandeYa jei chupe: ‘Che ko jae nderamikue reta Abraham, Isaac, jare Jacob iTumpa,’ jei chupe. Jayawe Moisés uyandu yawe kua ñee, uriri ukiyete ramo, jare uipiuete umae waerä jese,” jei Esteban chupe reta.
- 33“Jayawe yandeYa jei chupe: ‘Eki ndepipasa, echa’ä kua iwi ndiyemboi nei jese wae año tee chemaerä,’ jei chupe.

34“Che aecha aĩ kërái uiporara ñonoĩ aiparawo wae reta iwĩ Egipto pe. Ayandu ma ipüe ñonoĩ ikuasi katu rewe. Jáeramo che ayu ma aepi reta waerä iwĩ Egipto pewa reta wi,’ jei. ‘Jayawe iyeyapikatu woi ndeo waerä iwĩ Egipto pe.’ Jukuärái jei Tumpa Moisés pe,” jei.

35“Kua Moisés ko jae tenonde yawe yanderamikue reta wirĩro wae. Echa’ä jae reta jei chupe: “¿Kía pa neñono oremburuwicharä nde ndere waerä orereko rewa?” jei reta. Erëi yepe tēi jae reta wirĩro Moisés, jeseuwe Tumpa omondo iko waerä jae reta imburuwicharä jare uepi reta waerä. Jukuärái Tumpa uyapo jokua araiwa yái jendi wae pe uyekuaa chupe wae rupi,” jei chupe reta.

36“Jayawe Moisés onoe wiraa reta iwĩ Egipto wi. Jare Tumpa imbaepuere rupi jae uyapo jeta mbaembae kiawe ipuere’ä uyapo wae iwĩ Egipto pe, jare Mar Pita jee wae pe, jare cuarenta año iwitini wasu rupi yureko reta rambuewe,” jei chupe reta.

37“Kua Moisés etei jei arakaete yanderamikue reta pe: ‘Pēti ara yande Tumpa ikoño mái wae ombouta oĩ pewe iñee umimbeuta wae ñaniñemoñaá reta ipite wi, jae chembou rami,’ jei Moisés chupe reta.

38Jare Moisés iko wi yanderamikue reta ndiwe iwitini wasu rupi yureko yawe. Jare iwitu wasu Sinaí pe umbatika reta. Joko pe araiwa umingeta Moisés, jare umee chupe Tumpa iñee tekowe pewa jae umimbeu yuapi ye waerä yandewe,” jei Esteban chupe reta.

39“Erëi yanderamikue reta uipota’ä uyapisaka Moisés re, jare wirĩro reta. Jae reta uipota tēi uñatima ye iwĩ Egipto pe.

40Jare jei reta Aarón pe: ‘Iyapo yandewe yandetumparä yandereruwata waerä. Echa’ä jokua Moisés yandereru iwĩ Egipto wi wae, yaikuaa’ä mbae ra uasa chupe wae,’ jei reta Aarón pe.

41“Jayawe uyapo reta iyupe waka rairaanga itumparä, jare uyuka reta mbaemimba umee chupe waerä. Jare uyerowiaete reta, echa’ä ipo pe etei uyapo reta iyupe itumparaangarä ramo. Jáeramo uyapo reta chupe arete wasu,” jei.

42“Jáeramo Tumpa iarasi rewe uyerowa chuwi reta, jare ueya reta umbiadora reta waerä ipotawe mbae jae reta uipota wae re. Jayawe jae reta umae mbaembae ara re oĩ wae jare umbiadora reta jokua mbaembae re. Echa’ä pe reta pikuaa Tumpa jei arakaete kía jae iñee umimbeu wae rupi kuärái: ‘Israel pewa reta, ¿chemaerä yerá piyuka mbaemimba reta, jare chemaerä yerá peru mbaembae ikawi wae jokua cuarenta año iwitini wasu rupi piko rambuewe?’

43Jukuärái’ä ko. Pewoise peraa pe ndiwe petumparaanga Moloc jee wae jēta iko pipe wae, jare petumparaanga Renfán jee wae perowia tēi yasitata iya ko wae. Jae reta jaanga pe reta piyapo peyupe pemiadora jese reta waerä. Jáeramo che pomondota mbiri peiwi wi iwĩ Babilonia koti.’ Jukuärái uyekuatía oĩ,” jei chupe reta.

44“Yanderamikue reta ime wireko tupao wiraañoi jae reta ndiwe wae yureko reta rambuewe iwitini wasu rupi. Tumpa uikuaaka Moisés pe kërái etei uyapoka waerä jokua tupao, jare Moisés uyapoka kawi kërái Tumpa jei chupe wae rupi,” jei chupe reta.

45“Joko wi, jeta año uasa ma yawe, jokua tupao uasa ñru yanderamikue reta ipo pe. Jare jae reta imeño wireko jokua tupao Josué uruwata reta yawe kua iwi pe. Jare Tumpa omombo judío mbae wae reta yanderamikue reta wi. Jukuärái yanderamikue reta upïro kua iwi chuwi reta. Jare jokua tupao upïta kua iwi pe. Jare David iko mburuwicha wasurä yawe, imeño iko,” jei chupe reta.

46“David iko kuimbae Tumpa umae kawi jese wae. Jare jae uipota tēi uyapoka Tumpa pewarä pēti tupao wasu ita pewa. Jáeramo jokua re jae uyerure tēi Tumpa pe – jae ko yanderamikue Jacob iTumpa pe.

47Erēi Tumpa umaño’ä David re uyapoka waerä. Echa’ä David tai Salomón ko jae uyapokata iko tupao wasu wae Tumpa pewarä,” jei chupe reta.

48“Erēitu yaikuaa ñai Tumpa imbaepuerete wae iko’ä pēti tēta kuimbae uyapo wae pe. Echa’ä Tumpa arakae jei ñee umimbeu wae Isaías rupi kuärái:

49‘Ara ko jae chewapia rami, jare iwi ko jae chepirenda rami. ¿Pe reta piyapota yerá chewe tupao ikawiete ye jokua wi? ¿Pe reta piyapota yerá chewe tēta aputuu pïpe waerä? Ndarau.

50Mase, che etei ayapo ma opaete mbaembae ara re oï wae jare iwi pe oï wae wi,’ jei Tumpa. Jukuärái uyekuatía oï,” jei chupe reta.

51“Jáeramo che tae pewe, mburuwicha reta, pe reta pepiatätaete ko Tumpa koti,” jei chupe reta. “Pipota’ä piyeyokui chupe, jare pipota’ä wi piyapisaka jese. Jekuaño piyowaicho Espiritu Santo ndiwe kërái peramikue reta uyapo wae rami,” jei chupe reta.

52“Echa’ä peramikue reta uyapo ikawi mbae wae opaete Tumpa ñee arakae umimbeu wae reta koti. Jare ipotawe kía umimbeu jokua Upuruepi jupi wae outa iko wae rewa yawe, jae reta uyuka. Jare añawe Upuruepi wae ou ma, erēi pe reta pemee ma piyukaka waerä,” jei chupe reta.

53“Mase, Tumpa uikuaaka yandewe mbaembae jae jei wae araiwa reta rupi, erēi jesepe pe reta piyapisaka’ä jese pepiatäta jeko pewa.” Jukuärái jei Esteban chupe reta.

### **Mburuwicha reta uyuka Esteban**

54Jayawe opaete mburuwicha reta uyandu yawe Esteban jei chupe reta wae, pochi reta jare iarasi rewe umbikiririü jai umae reta jese.

55Erēi Esteban ukiye’ä etei chuwi reta, Espiritu Santo umimbaepuere ramo. Jae umae ara koti jare uecha yanderu Tumpa imbaepuere uwersiete ye wae, jare uecha wi Jesús uyemboi oï Tumpa iyakata koti.

<sup>56</sup>Jayawe Esteban jei: “¡Mase! ¡Aecha ara uyepea oï, jare joko pe uyemboi oï kuimbaerä uyeyapo wae yandeRu Tumpa iyakata koti!” jei.

<sup>57</sup>Jokua uyandu reta yawe, mburuwicha reta täta usapikái jare oyopi reta iyapisa ipo pe awiye uyandu reta waerä Esteban jei wae. Jare opaete rewe uepeña reta Esteban jare uipisi reta.

<sup>58</sup>Jare wiraa reta täta wasu oka pe. Joko pe jokua iyapu rewe umbijeko wae reta ueki iñepëwaka umee pëti kuimbae Saulo jee wae pe uyandareko waerä jese. Jayawe umbipi uyapi reta Esteban ita pe uyuka reta waerä.

<sup>59</sup>Jare uyapi reta rambuewe, Esteban uyerure yandeYa Jesucristo pe kuärái: “CheYa Jesús, eraa cherekowe,” jei.

<sup>60</sup>Jayawe oa iwí re itawa re jare usapikái rewe jei: “CheYa, awiye mii embijeko kua reta kua mbae kachi uyapo ñonoï wae re,” jei. Jare jukuärái jei ma yawe, Esteban umano.

## Hechos 8

<sup>1-2</sup>Joko wi amokue kuimbae uipiu Tumpa wi wae reta wiraa oñoti Esteban jetekue jare täta rupi uapïro reta. Erëi Esteban imano ikawi iko Saulo pe.

### Saulo ueka Cristo re wirowia wae reta uiporaraka chupe reta waerä

Jayawe jokua ara uyuka reta Esteban yawe, jeta Jerusalén pewa reta pochi rewe umbipi uiporaraka Cristo re wirowia wae reta pe. Jáeramo hermano reta opa uñemiái iwí Judea jare Samaria rupi. Jesús jemimboe tenondewaete retaño upita täta wasu Jerusalén pe.

<sup>3</sup>Jare Saulo jekuaeño uiporaraka täta rupi Cristo re wirowia wae reta pe. Jae oo ueka reta täta rupi, jare umbitiriri wiraa kuimbae reta jare kuña reta wi oñonoka waerä peresoriru pe.

<sup>4</sup>Jesewe jokua uñemiái wae reta jekuaeño umimbeu ñee ikawi wae opaete kerupi yuraa reta wae rupi.

### Felipe umimbeu ñee ikawi wae täta wasu Samaria pe

<sup>5</sup>Jare pëti kuimbae Cristo re wirowia wae Felipe jee wae oë oo täta wasu Samaria jee wae koti. Jare joko pe umimbeu täta wasu pewa reta pe Jesús rewa kërái jae ko Cristo jei chupe reta wae.

<sup>6</sup>Jare jeta täta wasu pewa reta yuweru pëti rami uyapisaka waerä jese jare uecha reta waerä mbaembae Tumpa imbaepuere rupi jae uyapo wae.

<sup>7</sup>Echa’ä Felipe omoë jeta wae reta wi aña uyembiiya jese wae reta. Jare opaete joko pe yureko wae reta uyandu aña reta jäse rewe oë uyembiiya iko jese wae reta wi. Jare uecha reta wi jeta omi mbae iko wae reta ukuera, jare uwata mbae iko wae reta uwata ma.

<sup>8</sup>Jáeramo tuichaete uyerowia täta wasu pewa reta.

## Simón ipaye wae wirowia Cristo re

<sup>9</sup>Ime iko jokua tēta wasu Samaria pe pēti kuimbae Simón jee wae. Jae ko ipaye wae, jare ima ma ichoropa rupi umbipiakañi tēta wasu pewa reta. Jae uyererowia katuka iko chupe reta jae ko kuimbae ipaye imbaepuerete wae.

<sup>10</sup>Jare opaete wae, iparawete wae reta wiwe jare mburuwicha retawe, uyapisaka kawi reta jese. Jare jei iyupe reta: “Kua kuimbae ime onoi mbaepuere tuicha wae Tumpa wi ou wae.” Jukuärái jei iyupe reta.

<sup>11</sup>Jáeramo jeta wae uyapisaka kawi jese, echa’ä ima ma jae umbipiakañi reta ichoropa rupi.

<sup>12</sup>Erēi Felipe umimbeu chupe reta kērái Tumpa ikota opaete wae imburuwicha wasurä jaeño mái pewa. Jare umimbeu wi chupe reta mbae uyapo reta waerä ñonoï waerä Tumpa ndiwe jokua ara – jae ko wirowia reta waerä Jesucristo re. Jayawe jeta Samaria pewa reta wirowia Felipe jei wae re jare uyembisakambuka reta i pe, kuimbae jare kuña reta wi.

<sup>13</sup>Jare Simón ipaye wae wirowia wi Jesucristo re jare uyembisakambuka i pe. Jare joko wiwe umbipi uñemiiru Felipe ndiwe. Jare ipiakañiete umae Felipe uyapo wae re, echa’ä Felipe uyapo jeta mbaembae kiawe ipuere’ä uyapo wae. Jukuärái Felipe uikuaaka Tumpa oï jae ndiwe wae.

<sup>14</sup>Joko wi jeräkua Jesús jemimboe tenondewaete reta Jerusalén pe ñonoï wae pe kērái Samaria pewa reta wirowia ma Tumpa iñee re. Jáeramo omondo reta Pedro jare Juan tēta wasu Samaria pe.

<sup>15</sup>Jare yuraa uwäe reta yawe, uyembati jokua jaeramo Cristo re wirowia wae reta ndiwe. Jare mokui rewe uyerure Tumpa pe jese reta ou jese reta waerä Espiritu Santo.

<sup>16</sup>Echa’ä ndeiño ou Espiritu Santo jae reta ipia pe. Jaeño uyembisakambuka reta i pe yandeYa Jesús jee re.

<sup>17</sup>Jayawe opa uyerure reta yawe, Pedro jare Juan umbipi oñono ipo pēti pēti wae re jare Espiritu Santo ou jese reta.

<sup>18</sup>Jare Simón jokua uecha yawe, jae uipota tēi onoi wi jokua mbaepuere. Jáeramo jei chupe reta: “Ko oï korepoti,” jei.

<sup>19</sup>“Peme mii chewe wi kua mbaepuere ou waerä ipotawe wae re Espiritu Santo, che añono chepo jese yawe,” jei Pedro jare Juan pe.

<sup>20</sup>Jayawe Pedro pochi rewe jei chupe: “iNdekorepoti tukañi nde ndiwe! Echa’ä nderowia tēi nei ndepuere ko ndewa korepoti pe mbaepuere Tumpa wi ou wae,” jei.

<sup>21</sup>“Ndarau ndepuere ndeparawiki ore ndiwe, echa’ä ndepia jupi’ä ko Tumpa koti,” jei chupe.

<sup>22</sup>Jare Pedro jei wi chupe: “Eya ndepiyemingeta jupi mbae wae Tumpa rewa jare iyerure chupe jese. Aramoi rupi Tumpa ñakañita ndewe ndepiyemingeta kachi wae.

<sup>23</sup>Echa’ä aikuaa ai ndepia pe oi jeta mbaembasi, jare mbae kachi ime mbaepuere onoi nderé,” jei Pedro Simón pe.

<sup>24</sup>Jayawe Simón ipiatiti rewe jei chupe reta: “Piyerure mii Tumpa pe cheré, awiye uyeyapo waerä chewe kua pere chewe wae,” jei chupe reta.

<sup>25</sup>Joko wi Pedro jare Juan uikuaaka joko pe ñonoï wae reta pe yandeYa Jesucristo rewa, jare umimbeu chupe reta yandeYa ñee. Jayawe oë yuraa reta ye Jerusalén koti. Jare yuraa yureko rambuwe iwí Samaria rupi, umimbeu reta ñee ikawi wae jeta tēta wasu rai reta rupi.

### **Felipe umimbeu ñee ikawi wae kuimbae iwí Etiopía pewa pe**

<sup>26</sup>Pēti ara pēti araiwa yandeYa ombou wae uyekuaa Felipe pe jare jei chupe: “Ekua jokua tape rupi oo Jerusalén wi sur koti tēta wasu Gaza koti,” jei chupe. Kua tape uasa iwitini wasu rupi.

<sup>27</sup>Jayawe Felipe uyeyapikatu jare oë oo jokua tape rupi. Jare oo iko rambuwe, aramoiño ñeñowāiti pēti kuimbae eunuco iwí Etiopía pewa ndiwe. Jokua kuimbae uyeyokui kuña mburuwicha wasu Etiopía pewa pe. Jokua kuña mburuwicha wasu jee Candace. Jare eunuco ko jae uyeyokui wae reta itenondewa jare korepoti iyandarekoa. Jae oo ma Jerusalén pe umbutuicha waerä Tumpa jee.

<sup>28</sup>Jare jokua ara uñatima ye iko iwí koti pēti karosa pe. Jare jae oo iko rambuwe, umingeta oi Tumpa ñee arakae umimbeu wae Isaías uikuatía wae.

<sup>29</sup>Jayawe Espiritu Santo jei Felipe pe: “Ekua ñemiiru pea karosa pe oo oi wae ndiwe,” jei chupe.

<sup>30</sup>Jayawe Felipe osi oya oo karosa koti, jare uyandu jokua kuimbae umingeta oi Isaías uikuatía wae. Jare Felipe upirandu chupe: “¿Ndikuaa pa nemingeta nei wae?” jei chupe.

<sup>31</sup>Jayawe eunuco jei Felipe pe: “¿Kērāita pa chepuere aikuaa? Mbaeti kía uikuaaka waerä chewe,” jei. “Iyupi mii ewapi che ndiwe yayemingeta waerä,” jei chupe. Jayawe Felipe uyupi.

<sup>32</sup>Eunuco umingeta iko Tumpa ñeeriru pe kiape uyekuatía oi kuārāi: “Wiraa uyuka reta waerä jokua kuimbae kērāi pēti owecha uyuka reta rami. Kērāi pēti owecha rai umaño iyé ñeapika wae reta pe, jukuārāi rami jae omoë’ä ñee.

<sup>33</sup>Jowaicho reta jeiete uikura. Jare jae uyemboi yawe mburuwicha reta jowai, jae reta umaño’ä mburuwicha reta re jei waerä jupi wae jesewa. ¿Kía ra ipuere uikuaaka jae jētara reta rewa? Mbaeti kiawe, echa’ä jowaicho reta uyukaka ndei jae onoi mbowe ñemoñaararä.” Jukuārāi eunuco umingeta iko.

<sup>34</sup>Jare eunuco upirandu Felipe pe: “Embeu mii chewe, ¿kía re ra uyemingeta oí Isaías? ¿Uyemingeta pa iyei ani iiru wae re?” jei chupe.

<sup>35</sup>Jayawe Felipe umbipi umimbeu chupe kua Isaías uikuatía wae wi ñee ikawi wae Jesús rewa.

<sup>36</sup>Jare tape rupi yuraa rambuewe, oo uwäe reta ipa michi wae pe. Jare eunuco jei: “Ko oí ipa rai. ¿Mbae yembiawái ra anoi ayembisakambuka waerä?” jei chupe.

<sup>37</sup>Jayawe Felipe jei chupe: “Ndepia rewe nderowia yawe, ndepuere,” jei chupe. Jare eunuco jei Felipe pe: “Che arowia Jesucristo ko jae Tumpa Tai wae,” jei chupe.

<sup>38</sup>Jayawe eunuco umbiyemboika karosa, jare mokui rewe uweyi reta jare uike reta i pe. Joko pe Felipe umbisakambu eunuco.

<sup>39</sup>Jare oë ye reta yawe i wi, jupiwoi Felipe ukañi chuwi, echa’ä Espíritu Santo wiraa ramo. Joko wiwe eunuco uecha’ä ye ma Felipe. Jare uyerowia rewe oo ye iwi koti.

<sup>40</sup>Erëi Felipe uyekuaa tëta wasu Azoto jee wae pe, echa’ä Espíritu Santo jokoti wiraa ramo. Joko wi Felipe oë oo tëta wasu Cesarea koti. Jayawe umimbeu ñee ikawi wae tëta wasu rai rai rupi oo uwäe rewa tëta wasu Cesarea pe.

## Hechos 9

### Saulo wirowia Jesús re

(Hechos 22.6-16, 26.12-18)

<sup>1</sup>Jokua rambuewe, Saulo jekuaeño umumburu uyukaka waerä yandeYa re wirowia wae reta tëta wasu Jerusalén pe. Jare jae uipota oo tëta wasu Damasco jee wae pe ueka waerä Cristo re wirowia wae reta.

<sup>2</sup>Jayawe oo ueka tupapire sacerdote tenondewaete pe uikuatía waerä chupe. Echa’ä jokua tupapire Saulo ipuere uechaka pëti pëti tupao reta itenondewa pe. Jukuärái jae reta uikuaata Saulo, jare umeeta chupe mbaepuere uipisi waerä opaete Cristo re wirowia wae reta Damasco pe ñonoï wae reta. Echa’ä Saulo uipota uipisi ueru ye reta Jerusalén pe – kuimbae reta jare kuña reta wi – uiporaraka waerä chupe reta.

<sup>3</sup>Jayawe sacerdote tenondewaete uikuatía umee chupe tupapire. Jare Saulo jupiwoiño oë oo tëta wasu Damasco koti. Jare uwäe seri ma oo Damasco pe yawe, aramoïño jembipe Saulo re pëti tembipe uwerasi wae ara wi.

<sup>4</sup>Jáeramo Saulo jawoi pewa oa iwi re, jare uyandu ñee jei chupe: “Saulo, ¿maera pa jekuaeño ndiyapo neï ikawi mbae wae chekoti?” jei chupe.

<sup>5</sup>Jayawe Saulo upirandu: “¿Kía pa ko nde, mburuwicha?” jei. Jayawe ñee jei chupe: “Che ko jae Jesús,” jei. “Ndiporaraka neï cheré wirowia wae reta pe yawe, chekoti etei ko ndiyapo neï mbae ikawi mbae wae,” jei chupe.



<sup>6</sup>Jayawe Saulo uriri ukiye ramo, jare upirandu ye chupe: “¿Mbae pa ndipota ayapo waerä, cheYa?” jei. Jare yandeYa jei Saulo pe: “Epüa ekua ewäe tëta wasu Damasco pe, jare joko pe ambeukata ndewe mbae ndiyapota wae,” jei chupe.

<sup>7</sup>Jare kuimbae reta Saulo ndiwe yuraa wae reta uyandu wi ñee, erëi uecha’ä kiawe. Jáeramo kiiño uyemboi reta ipiakañi reta ramo.

<sup>8</sup>Joko wi Saulo upüa iwi wi jare umae tëi, erëi ipuere’ä uecha mbae awe. Jayawe jae ndiwe yuraa wae reta uipoko wiraa tëta wasu Damasco koti.

<sup>9</sup>Jare joko pe Saulo iko mbapi ara rupi umae mbae rewe. Jare jokua mbapi ara rupi Saulo ukaru’ä jare i awe jou’ä wi.

<sup>10</sup>Ime iko tëta wasu Damasco pe pëti kuimbae Cristo re wirowia wae Ananías jee wae. Jare yandeYa umbipau wae echa jei chupe kuärái: “Ananías,” jei. Jare Ananías jei: “¿Mbae pa, cheYa?” jei.

<sup>11</sup>Jayawe yandeYa jei chupe: “Ekua tape Simi jee wae rupi kuimbae Judas jee wae jëta pe. Joko pe eka kuimbae Saulo jee wae tëta wasu Tarso pewa,” jei. “Jae uyerure oï chewe kua ora etei.

<sup>12</sup>Jae wi ambipau wae echa. Jare jukuärái aechaka chupe kuimbae Ananías jee wae outa oï ipi jare oñonota ipo jesa re jukuärái jae umae ye waerä,” jei yandeYa chupe.

<sup>13</sup>Erëi Ananías jei yandeYa pe: “CheYa, jeräkua ma chewe jokua kuimbae rewa kërái jeta ikawi mbae wae uyapo Jerusalén pe nderé wirowia wae reta koti,” jei.

<sup>14</sup>“Jeräkua wi chewe sacerdote itenondewa reta umee ma chupe mbaepuere orepisi waerä, opaete nderé ndorowia wae reta kua tëta wasu pe noï wae, jare oreñonoka waerä peresoriru pe,” jei Ananías chupe.

<sup>15</sup>Jayawe yandeYa jei chupe: “Ekuaño eowäiti Saulo,” jei. “Echa’ä che aiparawo ma uyeyokui waerä chewe. Amondota ai Saulo chekuaaka waerä judío mbae wae reta pe, jare imburuwicha reta pe, jare Israel iñemoñaeta reta pe wi.

<sup>16</sup>Jare che etei aikuaakata chupe kërái jae uiporaraeteta chewe uyeyokui oï wae re.” Jukuärái yandeYa jei Ananías pe.

<sup>17</sup>Jayawe Ananías oë oo owäiti waerä Saulo. Jare oo ma uwäe chupe yawe, oñono ipo Saulo jesa re jare jei chupe: “Cheriwi Saulo, yandeYa Jesús etei uyekuaa ndewe ndeyu ndiko tape rupi rambuewe,” jei. “Jae ko chembou ndepi netae ye waerä jare Espiritu Santo umee waerä ndewe mbaepuere,” jei chupe.

<sup>18</sup>Jare jupiwoiño oa Saulo jesa wi mbae pira ipire echa wae rami, jare Saulo umae kawi ye. Jayawe Saulo upüa oo i koti uyembisakambuka waerä Ananías pe.

<sup>19</sup>Joko wi Saulo ukaru jare ipiräta ye ma.

### Saulo umbipi oporomboe Jesús ko jae Tumpa Tai wae

Jayawe Saulo upita mbowi ara rupi Cristo re wirowia wae reta Damasco pe yureko wae reta ndiwe.

<sup>20</sup>Jare jupiwoiño umbipi umimbeu judío reta pe tupao reta rupi Jesús rewa. Jare jei chupe reta: “Jesús ko jae Tumpa Tai,” jei.

<sup>21</sup>Jare opaete uyandu wae reta ipiakañi, jare jei iyupe reta: “¿Jae’ä yerá kua kuimbae täta rupi uiporaraka iko Jesús re wirowia wae reta pe Jerusalén pe wae?” jei. “¿Jare ou’ä yerá kua pe uipisi wiraa reta waerä sacerdote itenondewa reta pe?” jei. “¿Erëi añawe kua pe oï kua kuimbae jare uyemingeta kawi oï Jesús rewa!” jei iyupe reta.

<sup>22</sup>Jare Saulo jekuaeño uñemiatangätu wirowiaka waerä ñru wae reta pe Jesús re jare umiamiri waerä judío Damasco pewa reta uyeaka jae ndiwe wae. Echa’ä Tumpa ñeeriru pipe jae uikuaaka chupe reta kërái añetete yepe Jesús ko jae Cristo jei chupe reta wae.

### **Judío reta Damasco pewa uipota tõi uyuka Saulo**

<sup>23</sup>Jare ima ma uasa yawe, judío Damasco pewa reta uyemboemboe reta uyuka waerä tõi Saulo, echa’ä jae ikueri’ä oporomboe Jesús rewa ramo.

<sup>24</sup>Jayawe jae reta ukuatiro jese ara jare pïtu rupi tëta wasu ikësea jöke pe uyuka reta waerä tõi Saulo. Erëi jokua jeräkua Saulo pe jare ñru hermano reta pe wi.

<sup>25</sup>Jayawe amokue hermano reta wiraa Saulo pïtu yawe umbiasa wiari waerä tëta wasu ikësea iventana rupi. Jare oñono reta Saulo pëti canasta wasu japipe jare umbiweyi reta canasta wasu iwi pe pëti timasa pipe. Jukuärái Saulo oë oo tëta wasu Damasco wi.

### **Saulo uñatima ye tëta wasu Jerusalén pe**

<sup>26</sup>Joko wi Saulo uñatima ye oo tëta wasu Jerusalén pe. Jare joko pe uipota tõi uñemïiru Cristo re wirowia wae reta ndiwe. Erëi opaete jae reta ukiye chuwi, echa’ä wirowia’ä reta jae ko Cristo re wirowia ma wi wae.

<sup>27</sup>Jayawe pëti hermano Bernabé jee wae ombori Saulo. Jae wiraa Saulo Jesús jemimboe tenondewaete reta ñonoï wae pe. Jare imiäri chupe reta kërái yandeYa Jesús uyekuaa Saulo pe jare uyemingeta jae ndiwe jae oo iko rambuwe Damasco pe. Imiäri wi chupe reta kërái Saulo ukiye mbae rewe umimbeu Damasco pewa reta pe Jesús rewa.

<sup>28</sup>Jayawe Jesús jemimboe tenondewaete reta uyapisaka Bernabé jei chupe reta wae re. Jayawe ramo umbipi uñemïiru reta Saulo ndiwe. Jayawe joko wiwe Saulo upita jae reta ndiwe, jare oo opaete Jerusalén rupi jae reta ndiwe umimbeu waerä yandeYa rewa. Jare Saulo jekuaeño umimbeu opaete wae pe ukiye mbae rewe Jesús rewa.

<sup>29</sup>Jare Saulo jekuaeño uyeaka amokue judío griego ñee pe uyemingeta wae reta ndiwe Jesucristo rewa. Jáeramo jae reta pochi yureko Saulo koti jare uipota reta tõi uyuka.

<sup>30</sup>Erëi jokua jeräkua hermano reta pe. Jayawe amokue jae reta uepi Saulo chuwi reta, jare wiraa tëta wasu Cesarea jee wae pe mar jembei pe oi wae. Jare joko wi omondo ye reta pëti chalana wasu pipe Saulo jëta wasu Tarso jee wae koti.

<sup>31</sup>Joko wi ima katu rupi opaete iwi Judea rupi, Galilea rupi, jare Samaria rupi hermano reta ipiawiwe yureko jare uñemimiräta reta Tumpa re. Yureko reta uipiu rewe yandeYa wi, jare Espiritu Santo umbipiakatu reta. Jayawe jekuaeño uyembijeta yuraa Cristo re wirowia wae reta.

### **Pedro uminguera kuimbae omi mbae wae Eneas jee wae**

<sup>32</sup>Jokua rambuewe, Pedro oë oo Jerusalén wi oo opou waerä opaete Cristo re wirowia wae reta ipi kiae kiae uyembati wae pe. Jare oo uwäe tëta wasu rai Lida jee wae pe.

<sup>33</sup>Joko pe Pedro uecha pëti kuimbae ipuere mbae omi wae Eneas jee wae. Juri año ma iko jupa pe parawete.

<sup>34</sup>Jayawe Pedro jei chupe: “Eneas, Jesucristo neminguera ma. Epüa, embiyapa jare eupi nderupa,” jei chupe. Jare jupiwoiño jae upüa.

<sup>35</sup>Joko wi jeta wae reta Lida pewa jare Sarón pewa ipiakañi rewe uecha Eneas uwata kawi oi wae, jare uyerowa reta yandeYa koti.

### **Pedro umbijekowe ye Dorcas**

<sup>36</sup>Tëta wasu Jope jee wae pe ime iko pëti kuña Cristo re wirowia wae Tabita jee wae. Griego ñee pe jae jee Dorcas. Jae uyapoñoi jeta mbaembae ikawi wae, jare jekuaeño ombori iparawete wae reta.

<sup>37</sup>Jokua ara reta rupi jae imbaerasi jare umano parawete. Jáeramo jëtara reta umbiyau jetekue jare oñono reta tëta mokui piso pewa joo iwate wae pe.

<sup>38</sup>Jeräkua ma amokue hermano reta pe Jope pewa Pedro koiño oi tëta wasu rai Lida pe. Jáeramo omondo reta mokui kuimbae Lida pe ueruruka waerä Pedro. Jare oo uwäe reta yawe Pedro oi wae pe, jei reta chupe: “Eyu mii ore ndiwe imambae ndepuere rupi,” jei reta chupe.

<sup>39</sup>Jayawe Pedro jupiwoiño oo jae reta ndiwe. Jare yuraa uwäe reta yawe, wiraa reta Pedro Dorcas jetekue oi wae pe. O japipe ime iko opaete kuña ime umano chuwi wae reta. Jae reta uyao ñonoï, jare uechaka reta Pedro pe asoya reta Dorcas uyapokue chupe reta wae jae reta ndiwe iko rambuewe.

<sup>40</sup>Jayawe Pedro omoë opaete jae reta o wi. Jare jaeño pe etei iko yawe, uñeño itawa re jare uyerure Tumpa pe. Joko wi uyerowa umae Dorcas jetekue re jare jei: “¡Tabita, epüa!” jei. Jayawe kuña uipea jesa jare umae. Jare uecha Pedro yawe, upüa uwapi.

<sup>41</sup>Pedro uipisi ipo pe jare umupüa. Jayawe ueni kuña ime umano wae reta jare iru hermano reta joko pe ñonoï wae, jare uechaka chupe reta Dorcas jekowe ye ma wae.

<sup>42</sup>Kua jeräkua opaete tēta wasu Jope pewa reta pe. Jare jeta wae reta wirowia yandeYa Jesucristo re.

<sup>43</sup>Jare Pedro upita ima tēta wasu Jope pe. Jae iko kuimbae wakapi pīta uyapo wae Simón jee wae jēta pe.

## Hechos 10

### Tumpa ombou pēti araiwa kuimbae Cornelio jee wae pe

<sup>1</sup>Tēta wasu Cesarea pe iko pēti kuimbae romano Cornelio jee wae. Jae ko pēti chiēto sindaro reta Roma pewa itenondewa, pēti ati Italiana jee wae pewa.

<sup>2</sup>Cornelio jare jēta pewa reta uipiū Tumpa wi, yepe tēi jae reta judío mbae wae reta ko. Jare Cornelio jekuaēño uyerure Tumpa pe, jare jekuaēño ombori kawi ikuasi wae reta.

<sup>3</sup>Pēti ara, mbapi ora ma kaaru yawe, Tumpa umbipau wae echa Cornelio. Jukuärái uechaka chupe pēti araiwa ou oī ipi wae. Jare araiwa ueni Cornelio.

<sup>4</sup>Jayawe Cornelio ukiye rewe umae ngatu araiwa re jare upirandu chupe: “¿Mbae pa ndeka, mburuwicha?” jei chupe. Jare araiwa jei chupe: “Tumpa uyerowia umae oī nderé,” jei. “Jae uyandu oī ndiyerure chupe wae re jare uecha oī kērái nembori kawi ikuasi wae reta,” jei.

<sup>5</sup>“Añawe emondo amokue kuimbae reta tēta wasu Jope koti ueru waerä pēti kuimbae Simón jee wae. Jae jee wi Pedro,” jei.

<sup>6</sup>“Jae upita oī pēti kuimbae wakapi pīta uyapo wae jēta pe. Jae jee wi ko Simón. Jae jēta oī mar jembei pe,” jei araiwa Cornelio pe.

<sup>7</sup>Jayawe araiwa opa uyemingeta jae ndiwe yawe, oē oo ye joko wi. Jare jupiwoiño Cornelio uenika mokui uyeyokui chupe wae reta jare pēti isindaro jae wirowia katu jese wae. Jokua sindaro uipiū wi Tumpa wi jare uyeyokui kawi Cornelio pe.

<sup>8</sup>Jare Cornelio umimbeu chupe reta opaete araiwa jei chupe wae. Jayawe jae omondo reta tēta wasu Jope koti ueru waerä Pedro tēta wasu Cesarea pe.

### Tumpa uechaka Pedro pe wae

<sup>9</sup>Jayawe piarewe pe warasi ara mbiteta ma yawe, jae reta omokoi ma yuraa yureko tēta wasu Jope. Jare Pedro iko Simón jēta pe, jare uyupi tēta iáramo uyerure waerä Tumpa pe.

<sup>10</sup>Joko wi Pedro iyembai jare uipota ukaru. Jayawe uäro opa uyemiapo chupe rambuwe, Tumpa umbipau wae echa.

<sup>11</sup>Jare jukuärái Pedro uecha ara uyepea oī, jare uweyi ou iwi koti pēti tarapo tuicha wae. Kua uyemiweyi wae uyepisi iko irundi itiäkua reta pe.

<sup>12</sup>Jare uecha tarapo japipe yureko opa yea mbaemimba uwata wae reta, jare iwi rupi uyewichi wae reta, jare ipotawe wira reta wi.

- 13Jare Pedro uyandu pëti ñee jei chupe: “Pedro, epüa ekua iyuka jeu,” jei.
- 14Erëi Pedro jei: “Ndarau, cheYa,” jei. “Moisés arakae uikuatía wae uikuaaka orewe jokua nunga mbaemimba reta isoo ndou yawe, oremingiata ko ndekoti. Che jau’ä etei ko kua nunga soo aa wiwe,” jei.
- 15Jayawe ñee jei chupe: “Tenonde yawe che jae ikia wae ko jokua mbaemimba reta. Erëi añawe jae äi ikia mbae wae reta ko. Jokua che jae ikia mbae wae ko, awiye nde ere ikia wae ko,” jei chupe.
- 16Jare Pedro jokua uecha jare uyandu mokui wese ye. Joko wi jokua tarapo aramoño uyereraa ye ara koti.
- 17Jayawe Pedro jopa upita jokua uecha wae re jare jokua ñee uyandu wae re, jare ipia pe uyemingeta iko: “¿Mbae ra uipota uikuaaka chewe?” Jare jawoi pewa yuraa uwäe Simón jëta pe jokua kuimbae reta Cornelio omondo wae. Jae reta upirandu yureko jokoropi kiape ra Simón jëta wae.
- 18Jayawe yuraa uwäe reta yawe tëta ikësea jöke pe, usapikai reta jare upirandu joko pe ra iko pëti kuimbae Simón jee wae, jae jee wi Pedro wae.
- 19Jare Pedro imeño ipia pe uyemingeta iko rambuwe Tumpa uechaka chupe wae re, Espiritu Santo jei chupe ipia pe: “Mase, uwäe mbapi kuimbae reta ndereka ñonoï wae,” jei.
- 20“Eweyi ekua jae reta ndiwe natëi mbae rewe, echa’ä che ko ambouka reta,” jei chupe.
- 21Jayawe Pedro uweyi jare oo owäiti jokua kuimbae reta yuweru wae, jare jei chupe reta: “Che ko jae pe reta peka peï wae,” jei. “¿Maera pa peyu chereka?” jei chupe reta.
- 22Jayawe jae reta jei Pedro pe: “Pëti kuimbae romano sindaro reta itenondewa Cornelio jee wae ko orembou,” jei. “Jae ko kuimbae uipiu Tumpa wi wae jare opaete judío reta umae kawi jese wae. Pëti araiwa Tumpa ombou chupe wae jei chupe ombou ndereraaka waerä jëta pe, Cornelio uyapisaka waerä mbae nemimbeuta chupe wae re,” jei reta Pedro pe.
- 23Jayawe Pedro uparea chupe reta upita waerä jokua pïtu Simón jëta pe. Jare piarewe pe Pedro oo jae reta ndiwe. Jare yuraa wi jae reta ndiwe amokue hermano reta tëta wasu Jope pewa.

### **Pedro oo uwäe Cornelio jëta pe**

- 24Joko wi piarewe pe yuraa uwäe reta tëta wasu Cesarea pe. Joko pe Cornelio uparea ma yepe uyembati waerä jëtara reta jare ïru reta wi jae jëta pe. Jare uäro yureko reta Pedro.
- 25Jayawe Pedro oo uwäe yawe tëta pe, Cornelio oë oo owäiti jare uñeñono ïwi re Pedro jowai umbutuicha waerä tëi.

<sup>26</sup>Erëi Pedro jei chupe: “Epüa,” jei. “¡Awiye chembutuicha! ¡Kuimbaeño wi ko che!” jei chupe. Jare umupüa.

<sup>27</sup>Joko wi uyemingeta rewe yuraa uike reta tëta pe. Jare o pe Pedro uecha jeta uyembati ñonoï reta.

<sup>28</sup>Jayawe Pedro jei chupe reta: “Pe reta pikuaa kawu ko ore judiorä nduiko wae orereko umaeño’ä oreré nuñemüiru waerä pe judío mbae piko wae reta ndiwe. Orepuere’äwe ndopou pepi perëta pe, echa’ä jokua oremingiata ko Tumpa koti,” jei. “Erëi Tumpa jaeramo uikuaaka chewe awiyeta ko jae kía pe awe ikia.

<sup>29</sup>Jáeramo pe reta cherenika yawe, ayu chatëi mbae rewe. Añawe tapirandu pewe, ¿maera pa cherenika?” jei Pedro chupe reta.

<sup>30</sup>Jayawe Cornelio jei Pedro pe: “Irundi ara ma uasa, ayerure aiko kuärái ora rupi kua cherëta pe,” jei. “Jare mbapi ora ma kaaru yawe, aramoño uyekuaa chewe pëti araiwa kuimbae echa rami uyemboi iko cherowai. Jemimonde uwerasi,” jei.

<sup>31</sup>“Jare jae chereni jare jei: ‘Cornelio, Tumpa uyapisaka ndiyerure chupe wae re, jare uecha wi neme mbaembae ikuasi wae reta pe.

<sup>32</sup>Añawe emondo amokue kuimbae reta tëta wasu Jope pe ueru waerä pëti kuimbae Simón jee wae. Jae ko jee wi Pedro. Jae upita oï pëti kuimbae wakapi pita uyapo wae jëta pe. Jae jee wi Simón. Jae jëta oï mar jembei pe.’ Jukuärái araiwa jei chewe,” jei.

<sup>33</sup>“Jáeramo jupiwoiño amondo ndekoti, jare ore nduyerowiaete noï ndeyu wae re. Ore nduikuaa yandeYa umee ma ndewe ñee nemimbeu yuapi ye waerä orewe. Jare añawe opaete ore kua pe noï Tumpa jowai nduyapisaka waerä nderé,” jei Cornelio Pedro pe.

### **Pedro umimbeu chupe reta Jesús rewa**

<sup>34</sup>Jayawe Pedro jei chupe reta: “Añetete aikuaa ma kërái Tumpa umae oyowake rupi yanderé,” jei.

<sup>35</sup>“Echa’ä judío reta jare judío mbae wae reta ipite wi, Tumpa uiparareko umae ipotawe re uipü Tumpa wi wae jare jupi uyapo wae,” jei.

<sup>36</sup>“Pikuaa peï kërái Tumpa ombou ñee ikawi wae ore Israel inemoñaeta pe,” jei. “Jokua ñee ikawi wae uikuaaka orewe kuärái: kía ipuere uyeapikatu waerä Tumpa ndiwe Jesucristo rupi – jae ko opaete iwi pewa reta iYa,” jei Pedro chupe reta.

<sup>37-38</sup>Jare jei chupe reta wi: “Tenonde Tumpa ombou Juan umimbeu waerä orewe imeta ko nduyembisakambuka i pe nduechaka waerä ndueya ma ko orepiayemingeta jupi mbae wae Tumpa rewa,” jei. “Joko wi Tumpa ombou Jesús Nazaret pewa, jare umee chupe Espíritu Santo jare mbaepuere wi. Jayawe Jesús oo opaete rupi uyapo ikawi wae jare uminguera opaete Añawasü uiporaraka chupe wae reta,” jei. “Jae umbipi iwi Galilea pe jare oo opaete iwi Judea rupi. Jare Jesús

jekuaeño uyapo jokua mbaembae kiawe ipuere'ä uyapo wae, echa'ä Tumpa jekuaeño oï jae ndiwe ramo,” jei.

<sup>39</sup>“Jare ore, Jesús jemimboe tenondewaete reta, nduecha oreresä pe etei opaete Jesús uyapo wae tēta wasu Jerusalén pe jare opaete iwī Judea rupi wae,” jei Pedro chupe reta. Jare jei wi chupe reta: “Oremburuwicha reta uikutuka kurusu re uyukaka Jesús,” jei.

<sup>40</sup>“Erēi Tumpa umbijekowe ye ueru umanokue wae reta ipite wi mbapi ara ma uasa umano yawe. Jare umaeño jese uyekuaa waerä amokue wae reta pe,” jei.

<sup>41</sup>“Uyekuaa'ä opaete judío reta pe, jaeño orewe. Añetete ore nduecha Jesús jare ndukaru jae ndiwe jae ikowe ye ma yawe. Echa'ä Tumpa oreparawo ma tenonde wiwe numimbeu waerä ĩru wae reta pe ore nduecha wae. Jare ore nduecha ko Jesús ikowe ye ou umanokue wae reta ipite wi,” jei.

<sup>42</sup>“Jare Jesús etei jei orewe numimbeu waerä ĩru wae reta pe kērāi Tumpa umee jae iko waerä opaete wae iYarä. Jare ara taikuewa uwäe yawe, Tumpa umbatita opaetei tekowe onoi wae reta jare umanokue wae reta wi Jesús jowai jae jei waerä jae reta jeko re,” jei Pedro chupe reta.

<sup>43</sup>Jare jei wi chupe reta: “Opaete kuimbae Tumpa iñee arakae umimbeu wae reta uikuatía Upuruepi wae rewa. Jae reta uikuatía kērāi jae rupi Tumpa umbaita opaete jese wirowia wae reta wi mbaembae uyawi reta ikoti wae. Jare kua Upuruepi wae, jae ko Jesús,” jei Pedro chupe reta.

### **Tumpa ombou Espiritu Santo judío mbae wae reta re**

<sup>44</sup>Jayawe Pedro uyemingeta iko rambuwe, aramoño ou Espiritu Santo umimbaepuere opaete wae Pedro iñee re uyapisaka ñonoï wae reta. Jare umbipi uyemingeta reta ambie ye ye wae iñee pe Espiritu Santo umbiyemingetaka wae rupi.

<sup>45</sup>Jare jokua hermano judío reta tēta wasu Jope wi yuraa Pedro ndiwe wae ipiakañi reta kērāi añawe Tumpa umee wi Espiritu Santo judío mbae wae reta pe.

<sup>46</sup>Uikuaa yureko reta Tumpa umee ma chupe reta wae, echa'ä uyandu reta umbutuicha yureko Tumpa jee ambie ye ye ñee reta jae reta uyemingeta mbaei pipe wae rupi.

<sup>47</sup>Jayawe Pedro jare jokua ĩru hermano judío reta jei iyupe reta: “Ou ma Espiritu Santo oï waerä jae reta ipia pe, ou yandepia pe wae rami. Jáeramo ikawi ko yambisakambu reta waerä i pe,” jei iyupe reta.

<sup>48</sup>Jayawe Pedro umbisakambuka reta i pe uechaka waerä jae reta wirowia ma ko Jesucristo re wae. Jare joko wi Cornelio, jare jētara reta, jare ĩru reta wi ueka reta Pedro pe jare jae ndiwe ñonoï wae reta pe wi upita waerä jae reta ndiwe mbowi ara pewa. Jayawe upita reta jae reta ndiwe.

## **Hechos 11**

## Pedro umimbeu kërái judío mbae wae reta wirowia ma Jesús re wae

- <sup>1</sup>Imambae rupi jeräkua Jesús jemimboe tenondewaete reta pe jare ïru hermano reta ïwi Judea rupi yureko wae reta pe wi kërái judío mbae wae reta wi uyapisaka ma Tumpa ïnee re jare wirowia ma reta Jesucristo re.
- <sup>2</sup>Jayawe Pedro uñatima ye yawe Jerusalén pe, amokue hermano judío reta umbieta chupe.
- <sup>3</sup>Jare jei reta chupe: “ïNdiyawi ma yandereko jei wae, echa’ä ndike judío mbae wae reta jëta pe jare ndekaru jae reta ndiwe!” jei reta chupe.
- <sup>4</sup>Jayawe Pedro umbipi uikuaaka kawi chupe reta iyipi wiwe opaete uyeyapo tëta wasu Jope pe wae rewa.
- <sup>5</sup>Jae jei chupe reta: “Pëti ara tëta wasu Jope pe aiko rambuewe, ayerure aiko Tumpa pe. Jare aramoiño Tumpa chembipau wae echa,” jei. “Jukuärái aecha ara uyepea oï jare uweyi ou ïwi koti pëti tarapo tuicha wae. Kua uyembiweyi wae uyepisi iko irundi itiäkua reta pe,” jei chupe reta.
- <sup>6</sup>“Jare amae ngatu jese yawe, aecha tarapo japipe yureko opa yea mbaemimba reta. Ime iko mbaemimba ñana rupiwa reta, jare ïwi rupi uyewichi wae reta, jare ipotawe wira reta wi,” jei.
- <sup>7</sup>“Jare che ayandu pëti ñee jei chewe: ‘Pedro, epüa ekua iyuka jeu,’ jei chewe.
- <sup>8</sup>Erëi che jae chupe: ‘Ndarau, cheYa. Moisés arakae uikuatía wae uikuaaka orewe jokua nunga mbaemimba reta isoo ndou yawe, oremingiata ko ndekoti. Che jau’ä etei ko kua nunga soo aa wiwe,’ jae chupe.
- <sup>9</sup>“Jayawe ñee jei chewe: ‘Tenonde yawe che jae ikia wae ko jokua mbaemimba reta. Erëi añawe jae aï ikia mbae wae reta ko. Jokua che jae ikia mbae wae ko, awiye ere ikia wae ko,’ jei chewe.
- <sup>10</sup>“Jare kua mokui wese ye aecha jare ayandu. Joko wi tarapo aramoiño uyereraa ye ara koti jare aecha’ä ma ye,” jei Pedro chupe reta.
- <sup>11</sup>“Jupiwoiño yuweru uwäe jokua tëta che aiko wae pe mbapi kuimbae tëta wasu Cesarea wi ombou cherekaka wae,” jei.
- <sup>12</sup>“Jare Espiritu Santo chepia pe jei chewe a waerä jae reta ndiwe, jare awiye waerä ayembipia’ä jese jae reta ko judío mbae wae reta. Jayawe che aë a jae reta ndiwe. Jare yuraa wi che ndiwe kua owa hermano reta. Jare opa rewe ore noë ndoo tëta wasu Cesarea koti kuimbae Cornelio jee wae jëta pe. Jare ndoo nuwäe yawe, nduike jëta japipe,” jei chupe reta.
- <sup>13</sup>“Joko pe Cornelio umimbeu orewe kërái araiwa uyekuaa chupe jëta pe wae jare jei chupe: ‘Emondo amokue kuimbae reta tëta wasu Jope pe ueru waerä pëti kuimbae Simón jee wae. Jae jee ko wi Pedro,’ jei chupe.



14“Jae umimbeuta ndewe ñee ikawi wae. Jare nde jare nerëtara reta perowia jese yawe, Tumpa perepita mbaembae piyawí Tumpa koti wae wi.’ Jukuärái araiwa jei chupe,” jei.

15“Jayawe che ambipi amboe reta yawe, aramoiño Espíritu Santo ou umimbaepuere reta kërái ou yandewe yanemimbaepuere Pentecostés ara pe rami,” jei chupe reta.

16“Jare aramoiño chemandúa jokua yandeYa jei orewe wae re, echa’ä jei orewe: ‘Espíritu Santo outa pepia pe iko waerä. Jare kërái Juan karamboe rupi pembisakambu i pe rami, jukuärái wi Espíritu Santo peñonota pe reta pei waerä pëti ramiño che ndiwe,’ jei yandeYa orewe,” jei.

17“Jayawe aikuaa aiko Tumpa umee wi Espíritu Santo jokua judío mbae wae reta pe kërái umee yandewe wae rami yarowia yandeYa Jesucristo re yawe. Jáeramo, ¿kía ra ko che ambiawái waerä Tumpa uipota uyapo wae?” jei Pedro chupe reta.

18Jayawe Pedro jei wae uyandu reta yawe, jokua Pedro pe umbieta wae reta kii ngatu upita reta. Jare umbipi umbutuicha reta Tumpa jee jei rewe: “Mase, añawe Tumpa umee ma yepe oi judío mbae wae reta pe wi ipuere waerä ueya ipiyemingeta jupi mbae wae Tumpa rewa. Jukuärái jae reta wi ipuere onoi tekowe opa mbae wae,” jei reta.

### **Cristo re wirowia wae reta tëta wasu Antioquía pewa rewa**

19Jokua ara uyuka reta Esteban wiwe, jeta Jerusalén pewa reta umbipi iarasi rewe uiporaraká Cristo re wirowia wae reta pe. Jáeramo jeta hermano reta opa uñemiái ambie iwi reta rupi. Amokue reta yuraa uwäe iwi reta Fenicia jare Chipre jee wae rupi. Jare iru wae reta yuraa uwäe tëta wasu Antioquía pe, iwi Siria jee wae pe. Opaete jae reta jekuaeño umimbeu ñee ikawi wae, erëi judío reta peño.

20Erëitu amokue jokua hermano reta yuraa uwäe tëta wasu Antioquía pe. Jae reta iwi Chipre pewa ko jare tëta wasu Cirene jee wae pewa ko. Jae reta umbipi umimbeu ñee ikawi wae yandeYa Jesús rewa judío mbae wae reta pe wi.

21Jare yandeYa ombori reta umimbeu kawí waerä jae iñee chupe reta. Jayawe jeta judío mbae wae reta wi wirowia jese jare uyerowa reta yandeYa koti.

22Kua jeräkua hermano reta Jerusalén pe ñonoí wae pe. Jáeramo omondo reta Bernabé tëta wasu Antioquía pe.

23Jare jae oo uwäe yawe, uecha kërái jokua judío mbae wae reta añetete wirowia ñonoí yandeYa re jare uyekou ñonoí ipiakawí re. Jayawe Bernabé tuicha rupi uyerowia jokua re. Jare jae jekuaeño umikirëi reta awiye waerä uyerowa reta ye yandeYa wi. Jare umikirëi reta wi jekuaeño uyapo reta waerä ipia rewe yandeYa jei wae rupi.

24Bernabé ko jae kuimbae jupi wae, jare wirowia kawí Tumpa re wae, jare uyekuaa jese Espíritu Santo jei wae rupi iko wae. Jayawe jae ombori jeta jokua tëta wasu pewa reta wirowia waerä yandeYa re.

<sup>25</sup>Joko wi Bernabé oë oo tēta wasu Tarso koti ueka waerä Saulo. Jare uwäe chupe yawe, ueru tēta wasu Antioquía pe.

<sup>26</sup>Jare joko pe pēti año rupi Bernabé jare Saulo jekuaeño uyembati reta Cristo re wirowia wae reta ndiwe. Jare jae reta omboe jeta wae reta yandeYa rewa. Jare tēta wasu Antioquía pe jaeramo etei iru wae reta umbipi jei Cristo re wirowia wae reta pe cristiano reta.

<sup>27</sup>Jokua ara reta rupi amokue kuimbae reta yuweru Jerusalén wi Antioquía pe. Jae reta ko jae ñee Tumpa wi etei ou wae umimbeu wae reta.

<sup>28</sup>Pēti wae ko jee Agabo. Jare pēti yembati pe, aramoiño Agabo uyemboi jare Espíritu Santo imbaepuere rupi uyemingeta jei rewe: “Outa oï karuái tuicha wae opaete iwi rupi.” Jukuärái jei. Kua karuái uyeyapo Claudio mburuwicha wasurä iko yawe.

<sup>29</sup>Jayawe jokua uyandu reta yawe, Cristo re wirowia wae reta Antioquía pewa uyembipia’ä hermano reta iwi Judea pewa reta re. Jáeramo umbipi umbati reta korepoti ombori reta waerä. Pēti pēti wae umee kērái ipuere wae rupi wiraaka waerä chupe reta.

<sup>30</sup>Jare opa ma umbati reta korepoti yawe, uiparawo reta Bernabé jare Saulo wiraa waerä iwi Judea pe Cristo re wirowia wae reta itenondewa reta pe.

## Hechos 12

### Mburuwicha wasu Herodes oñonoka Pedro peresoriru pe

<sup>1</sup>Jokua ara reta rupi mburuwicha wasu Israel pewa, Herodes jee wae, uipisika amokue reta Cristo re wirowia wae Jerusalén pe yureko reta wae uiporaraka waerä chupe reta.

<sup>2</sup>Jare jae uyukaka kispuku pe Jacobo – jae ko Juan tikei wae.

<sup>3</sup>Jare jokua ikawi judío itenondewa reta pe. Jáeramo Herodes uikuaa yawe umbiyerowia oï judío reta, uipisika wi Pedro. Erēi uyukaka woi’ä, echa’ä jokua semana iko chiu ara yemimandúa mbiyape levadura mbae pewa jei chupe reta wae ramo.

<sup>4</sup>Jayawe Herodes oñonoka Pedro peresoriru pe, jare oñono irundi ati irundirundi sindaro reta uyandareko jese waerä awiye waerä oë osi. Herodes ipiyemingeta iko tēi ueya waerä Pedro peresoriru pe jokua chiu ara yemimandúa pewa uasa rewa. Jare joko wi uipota onoeika iko tēi umbijeko uyukaka waerä opaete tēta wasu pewa reta jowake.

<sup>5</sup>Jayawe Pedro iko rambuwe peresoriru pe, jeta hermano reta ikueri mbae rewe uyerure reta Tumpa pe jese.

### Tumpa onoeika Pedro peresoriru wi

<sup>6</sup>Jare jokua pïtu ndei Herodes Pedro onoekata iko mbowe, Pedro oke iko peresorïru pe mokui sindaro reta mbite pe. Jare jae iko mokui cadena pe jokua sindaro reta ipapï re. Jare ïru sindaro reta uyandareko yureko peresorïru jöke pe.

<sup>7</sup>Aramoiño pëti araiwa Tumpa ombou wae uyekuaa uyemboï oï Pedro iyipï pe. Jare pëti tembipe uwerasi wae umbiembipe peresorïru japïpe. Erëi sindaro reta uecha'ä. Jare araiwa uñatai Pedro iyike pe umbisareko waerä, jare jei chupe: “¡Epüa woi!” jei. Jayawe Pedro upüa uyemboï rupiwe, cadena reta uyera oa woi ipapï wi.

<sup>8</sup>Jare araiwa jei chupe wi: “Iyemonde, jare emonde ndepïpasa wi,” jei chupe. Jayawe Pedro uyapo araiwa jei wae rupi. Jare araiwa jei chupe wi: “Iñepëwa niñepëwaka pe jare eë eyu cheraikue,” jei chupe.

<sup>9</sup>Jayawe Pedro uñepëwa jare oë woi oo araiwa jaikue. Erëi Pedro uikuaa'ä iko añetete ra uyeyapo oï chupe wae. Jae wirowia iko tëi ipau rupi opaete kua uecha iko wae.

<sup>10</sup>Jayawe araiwa jare Pedro uasa oo pëti iyandarekoa jenda, jare jawoi pewa uasa oo reta ïru iyandarekoa jenda peresorïru japïpe iko wae. Erëi jokua sindaro reta uecha'ä etei reta. Joko wi yuraa uwäe reta peresorïru jöke jiero pewa tape koti oo wae pe. Jare aramoiño öke jaei uyepea chupe reta. Jayawe Pedro jare araiwa oë yuraa reta peresorïru wi. Jare ndei mbiri uwata reta mbowe, aramoiño Pedro uecha'ä ma araiwa, echa'ä oo ye ma chuwi.

<sup>11</sup>Jare araiwa oo ye ma chuwi yawe, Pedro jayawe ramo uikuaa añetete yepe uyeyapo iko chupe wae, jare jei iyupe: “Añawe ramo aikuaa aï cheYa yepe ombou araiwa cherepï waerä Herodes wi jare opaete mbae judío itenondewa reta uipota uyapo waerä chekoti wae wi,” jei iyupe.

<sup>12</sup>Jayawe Pedro kua uikuaa yawe, oo María jëta koti. Kua María ko jae Juan Marcos ichi. Jare María jëta pe jeta wae reta Cristo re wirowia wae uyembati ñonoï uyerure waerä Tumpa pe.

<sup>13</sup>Jare Pedro oo uwäe yawe, ombopu tëta jöke. Jayawe pëti kuñatái japïpe oï wae, Rode jee wae, oo tëta jöke pe. Jare ndei uipea öke chupe mbowe, upïrandu chupe: “¿Kía pa ko nde?” jei.

<sup>14</sup>Jare Pedro uñereni chupe. Jare kuñatái uikuaa Pedro iñee yawe, uyerowiaete. Erëi uyerowia pipei iñakañi uipea chupe waerä öke. Jare osi oo ye umimbeu ïru wae reta pe: “¡Pedro oï öke pe!” jei chupe reta.

<sup>15</sup>Jayawe jei reta kuñatái pe: “¡Ndapu ko aipo neï!” jei reta chupe. Erëi jeiete kuñatái jei chupe reta: “Añetete ko,” jei. Jayawe jae reta jei iyupe: “Aramoi araiwa Pedro re uyandarekose wae ko aipo. Aramoi ou umimbeu waerä yandewe Pedro umano ma wae,” jei iyupe reta.

<sup>16</sup>Jare jae reta uyemingeta yureko rambuewe, Pedro jekuaeño ombopu oï öke. Jayawe ramo pëti wae oo uipea öke jare uecha reta Pedro ko wae. Jáeramo opaete jae reta ipiakañiete.

<sup>17</sup>Jayawe Pedro ueupi ipo umikii reta waerä. Jare imiäri chupe reta kërái yandeYa onoe peresoriru wi wae. Jare jei chupe reta: “Kua mbaembae rewa pikuaaka mii Jacobo pe jare iru hermano reta pe wi,” jei chupe reta. Jare joko wi Pedro oë oo ye ikotia.

<sup>18</sup>Jare piarewe pe köe ou yawe, peresoriru pe tuicha rupi uyeaka sindaro reta Pedro rewa. Echa’ä uikuaa’ä yureko mbae ra uyeyapo Pedro pe wae.

<sup>19</sup>Jayawe mburuwicha wasu Herodes umbipi woi uekaka reta tēi Pedro, erēi uwäe’ä reta chupe. Jáeramo Herodes ueruruka jokuwa sindaro reta uyandareko Pedro re yureko wae, jare upirandu chupe reta Pedro osi wae rewa. Jayawe Herodes umbijeko jokuwa sindaro reta jare uyukaka reta.

### **Mburuwicha wasu Herodes umano wae rewa**

Joko wi Herodes oë oo iwi Judea wi jare oo upita tēta wasu Cesarea pe.

<sup>20</sup>Jokuwa ara reta rupi, Herodes pochi iko tēta wasu Tiro jare Sidón pewa reta koti. Jokuwa yawaiete iko chupe reta, echa’ä jae reta jekuaeño ueru jembuurä Herodes iwi wi. Erēi añawe Herodes owaka’ä ma chupe reta. Jáeramo jae reta omondo amokue itenondewa reta uyeapikatu waerä Herodes ndiwe. Jayawe jae reta uñemiiru kawi kuimbae Blasto jee wae ndiwe. Kua kuimbae Blasto uyeyokui Herodes pe, jare Herodes wirowia katu jese.

<sup>21</sup>Jáeramo Blasto ombori reta jare uyemingeta Herodes ndiwe jokuwa re. Jayawe Herodes uiparawo ara uyembati jare uyapisaka waerä jese reta. Jare jokuwa ara uwäe yawe, Herodes omonde temimonde ikawiete wae mburuwicha wasu pewa. Jare oo yembati pe jare uwapi mburuwicha wasu iwapika pe opaete wae reta jowake. Joko wi jae umbipi uñemiñee chupe reta.

<sup>22</sup>Jare joko pe ñonoï wae reta umbutuicha rewe usapikai reta kuärái: “¡Tumpa iñee ko, mbaeti kuimbae iñee!” jei reta.

<sup>23</sup>Jayawe jupiwoiño pēti araiwa yandeYa ombou wae umimbaerasi Herodes, echa’ä jae umbutuicha’ä etei Tumpa jee. Jáeramo Herodes jete re uyekuaa taso reta jare umbipi jou reta. Joko wi Herodes umano.

<sup>24</sup>Erēi Tumpa iñee jekuaeño uñemiái opaete jokuwa iwi rupi, jare jeta wae reta wirowia jese.

### **Omondo reta Bernabé jare Saulo umimbeu waerä ñee ikawi wae ambie iwi pewa reta pe**

<sup>25</sup>Jayawe Bernabé jare Saulo opa ma wiraa jokuwa korepoti Jerusalén pe. Jare joko wi uñatima reta ye Antioquía koti. Jare ueru jae reta ndiwe Juan. Jae jee wi Marcos.

## **Hechos 13**

<sup>1</sup>Tēta wasu Antioquía pe ime yureko jeta wae reta Cristo re wirowia wae. Jare jae reta ipite pe yureko amokue kuimbae ñee Tumpa wi etei ou wae umimbeu wae reta jare Tumpa iñee re oporomoe wae reta. Jae reta jee Bernabé, jare Simón (jare

nunga wi jee ko Jü wae), jare Lucio (jae ko tēta wasu Cirene jee wae pewa), jare Manaén (jae ukuakuaa mburuwicha wasu Herodes ndiwe), jare Saulo wi.

<sup>2</sup>Pēti ara jokua kuimbae reta uñeñono tee ukaru mbae waerä amokue ara rupi uyerure reta waerä Tumpa pe. Jare uyerure yureko reta rambuewe, Espíritu Santo jei chupe reta: “Piñono tee pepite wi Bernabé jare Saulo uyapo reta waerä mbarawiki amee ai chupe reta wae,” jei chupe reta.

<sup>3</sup>Jayawe jokua ara reta opa yawe yerure ukaru mbae rewe wae, oñono reta ipo Bernabé jare Saulo re, jare uyerure reta Tumpa pe jese reta ombori reta waerä. Jayawe ramo hermano reta joko wi omondo.

### **Bernabé jare Saulo umimbeu ñee ikawi wae iwi Chipre pe**

<sup>4-5</sup>Jayawe Bernabé jare Saulo yuraa kiape Espíritu Santo jei chupe wae rupi umimbeu reta waerä Jesús rewa. Jare Juan Marcos oo wi jae reta ndiwe ombori reta waerä. Jayawe oë yuraa reta Antioquía wi tēta wasu Seleucia jee wae pe. Joko pe uyupi reta pēti chalana wasu pe jare oë yuraa reta pēti iwi i mbite pe oi wae Chipre jee wae koti. Jare yuraa uwäe yawe Chipre pe, yuraa reta tēta wasu Salamina jee wae pe. Joko pe umimbeu reta Tumpa ñee judío reta itupao reta rupi.

### **Kuimbae ipaye wae uipota tēi umbiawái Tumpa ñee**

<sup>6</sup>Jare opaete iwi Chipre rupi umbapi reta yawe, yuraa uwäe reta tēta wasu Pafos jee wae pe. Joko pe uikuaa reta pēti kuimbae judío Barjesús jee wae. Jae ko pēti kuimbae ipaye wae jare Tumpa ñee umimbeuraanga wae.

<sup>7</sup>Kua kuimbae uñemiiru tēta wasu pewa imburuwicha ndiwe. Jokua mburuwicha jee Sergio Paulo, jare jae ko kuimbae iyarakuaa katu wae. Pēti ara mburuwicha uparea Bernabé jare Saulo pe yuweru opou waerä ipi, echa’ä jae ikirēiete uyapisaka Tumpa ñee re ramo. Jayawe Bernabé jare Saulo yuraa opou reta ipi jare umimbeu chupe Tumpa ñee.

<sup>8</sup>Jare Barjesús joko pe iko wi mburuwicha ndiwe, jare uipota tēi umbiawái mburuwicha awiye waerä wirowia Tumpa ñee re. Barjesús jee ko Elimas griego ñee pe, jare kua tee uipota jei ipaye wae.

<sup>9</sup>Jayawe Saulo – jae ko jee Pablo griego ñee pe – umae ngatu ipaye wae re. Jare Espíritu Santo imbaepuere rupi jei chupe kuarái:

<sup>10</sup>“Elimas, nde ko jae Añawasu pe ndiyeyokui wae, jare opaete jupi wae jare añetete wae jowaicho ko nde,” jei. “Nde ko jae upurumbitawi wae jare jupi mbae ndiyapo wae. Nde jekuaeño nemiyea mbaembae añetete wae Tumpa rewa añetete mbae wae ndiwe,” jei chupe.

<sup>11</sup>“Jáeramo añawe Tumpa uiporarakata ndewe, jare ndepitata nderesa mbae,” jei. “Mbowi ara rupi ndechata’äwe nei warasi jembipe wae,” jei Pablo chupe. Jare jupiwoiño Elimas ipuere’ä mbae uecha, pītumimbiete oi chupe wae rami. Jayawe koti koti jae uyerowa ueka tēi kía uipoko wiraa waerä.

<sup>12</sup>Jayawe mburuwicha Sergio Paulo jokua uecha yawe, wirowia opaete Bernabé jare Pablo jei chupe wae re Jesús rewa, jare ipiakañi jokua ñee uyandu wae re.

**Pablo jare Bernabé ñonoï tēta wasu Antioquía iwi Pisidia pewa pe**

<sup>13</sup>Joko wi Pablo jare jae ndiwe yureko wae reta oë yuraa tēta wasu Pafos wi, jare chalana wasu pe uasa reta iwi Panfilia jee wae tēta wasu Perge jee wae pe. Jare joko pe yureko rambuewe, Juan Marcos ueya reta jare uñatima ye oo Jerusalén koti.

<sup>14</sup>Erēi jesewe Pablo jare Bernabé jekuaeño oë yuraa Perge wi ambie tēta wasu Antioquía jee wae koti. Jokua Antioquía oï iwi Pisidia jee wae pe. Jare joko pe yuraa uwāe reta yawe, uike reta tupao pe jare uwapi reta. Jokua ara iko mbutuu ara. Jáeramo judío reta uyapo yureko yembati joko pe.

<sup>15</sup>Jare pēti jokua tupao pewa itenondewa umingeta Moisés jare iiru kuimbae reta Tumpa iñee arakae umimbeu wae reta uikuatía wae. Jayawe jae opa umingeta yawe, tupao pewa itenondewa reta omondo iñee Pablo jare Bernabé pe kuärái: “Hermano reta, ime yawe ñee penoi oremikirēi waerä, pepuere piyemingeta,” jei chupe reta.

<sup>16</sup>Jayawe Pablo uyemboi jare ueupi ipo umikii reta waerä. Jayawe omoë iñee chupe reta jei rewe: “Cherētara Israel pewa reta jare opaete Tumpa wi pipiu wae reta, piyapisaka mii cheré,” jei chupe reta.

<sup>17</sup>“Yande judiorä yaiko wae reta, arakae Tumpa uiparawo yanderamikue reta, jare umbijeta reta iwi Egipto pe yureko rambuewe. Jare Tumpa imbaepuere tuicha wae rupi opa onoe reta joko wi,” jei Pablo.

<sup>18</sup>“Jare cuarenta año rupi Tumpa urupia chupe reta iwitini wasu rupi yureko rambuewe,” jei.

<sup>19</sup>“Joko wi Tumpa opa umbái chiu tēta wasu reta iwi Canaán rupi yureko wae jare umee iiwikue yanderamikue reta pe jae reta imaerä,” jei.

<sup>20</sup>“Jayawe yanderamikue reta yuraa uwāe reta iwi Egipto pe wiwe,

<sup>450</sup> año ma uasa yawe, uyakao reta iwi Canaán pe,” jei. “Joko wi ima rupi Tumpa umee chupe reta imburuwicha retarä Samuel oï rewa. Samuel iko Israel imburuwicha jare pēti ñee Tumpa wi etei ou wae umimbeu wae wi,” jei Pablo.

<sup>21</sup>“Jare Samuel iko rambuewe, yanderamikue reta ueka Tumpa pe umee waerä chupe reta imburuwicha wasurä. Jáeramo Tumpa umee chupe reta kuimbae Cis tai Saúl jee wae imburuwicha wasurä. Jae ko Jacob tai Benjamín iñemoña pewa. Jare cuarenta año rupi Saúl iko mburuwicha wasurä,” jei.

<sup>22</sup>“Joko wi Tumpa umbijee David mburuwicha wasurä Saúl ipepika pe. Tumpa jei David rewa: ‘Aecha kērái Isaí tai David jee wae uipotaete chembiyerowia wae ko. Jae uyapota opaete che aipota wae rupi.’ Jukuärái jei Tumpa.

<sup>23</sup>Jare kua David iñemoña reta ipite wi ou Jesús. Jae ko yande judiorä yaiko wae reta yandeRepí wae arakae Tumpa jei ombouta iko wae,” jei Pablo chupe reta.

24“Ndei Jesús ou mbowe, Juan upurumbisakambu wae umimbeu iko opaete Israel pewa reta pe ueya waerä ipiyemingeta jupi mbae wae Tumpa rewa. Jare jukuärái uyapo reta ma yawe, Juan jei chupe reta uyembisakambuka reta waerä i pe,” jei.

25“Jare ndei opa uyapo mbowe iparawiki Tumpa umee chupe wae, Juan upirandu jemimboe reta pe kuärái: “¿Piyemingeta pa pei pepia pe che ko jae Upuruepi wae? Mbaeti ko che,” jei. ‘Erëi jae cheraikue rupi outa oi. Jare che jupi’ä etei ko ipipasa icha mii yepe ayora waeräwe.’ Jukuärái Juan jei chupe reta,” jei.

26“Jayawe cherikei reta jare cheriwi reta – jae ko pe Abraham inemoña pewa reta jare Tumpa wi pipiu wae reta wi – che tae pewe jokua ñee tekowe opa mbae wae pewa ou ma uwäe yandewe,” jei.

27“Tëta wasu Jerusalén pewa reta jare itenondewa reta wirowia’ä Jesús ko jae Upuruepi wae Tumpa wi ou wae. Jae reta uikuaata tēi ko kua rewa. Echa’ä opa mbutuu ara pe uyapisaka reta tēi kía umingeta Tumpa ñee arakae umimbeu wae reta uikuatía wae re. Jare joko pe uyekuatía kawii oi Upuruepi wae outa iko wae rewa,” jei. “Erëi jae reta uikuaa kawii’ä. Jáeramo umbijeko reta Jesús uyukaka reta waerä. Jare jukuärái opa uyapo reta jokua uyekuatía oi wae uikuaaka yandewe uyeyapota iko wae,” jei.

28“Jare yepe tēi jae reta uwäe’ä teko Jesús re uyukaka reta waerä, erëi jeseuwe ueka reta mburuwicha Pilato pe uyukaka waerä,” jei Pablo chupe reta.

29“Jare opa ma uyapo reta yawe Jesús pe opaete jese uyekuatía oi wae, umbiweyika reta jetekue kurusu wi, jare oñonoka reta teowerenda pe,” jei.

30“¿Erëi Tumpa umbijekowe ye ueru umanokue wae reta ipite wi!

31Jare jeta wese Jesús uyekuaa jemimboe reta pe. Jae reta ko yuraa jae ndiwe iwi Galilea wi Jerusalén pe wae reta. Jare jae reta etei añawe umimbeu ñonoï jesewa ñanerëtara judío reta pe,” jei Pablo chupe reta.

32“Jae nunga ore wi numimbeu noi pewe kua ñee ikawi wae Upuruepi wae rewa. Jae ko kua: Opaete Tumpa jei arakae yanderamikue reta pe jae uyapota iko wae,

33añawe uyapo ma yandewe. Jukuärái uyapo jae umbijekowe ye yawe ueru Jesús umanokue wae reta ipite wi,” jei. “Tumpa ñeeriru pe uikuaaka yandewe jokua rewa, echa’ä uyekuatía oi salmo mokui wae pe kërái Tumpa jei kuärái: ‘Nde ko jae cheRai. Kua ara etei aikuaaka ai opaete wae pe che ko jae ndeRu.’ Jukuärái uyekuatía oi,” jei.

34“Jare yandeRu Tumpa umbijekowe ye ueru Jesús umanokue wae reta ipite wi awiye etei jetekue ikumewa waerä. Jokua re arakae Tumpa jei: ‘Che pombori kawita kërái etei che jae peramikue David pe rami,’ jei.

35Jáeramo uyekuatía oi iru salmo pe kërái yandeYa jei kuärái: ‘Che ko jae jupi rupi ndewe ayeyokui wae. Jayawe ndarau nemaño cherete opa jüu waerä,’ jei. Jukuärái uyekuatía oi,” jei.

<sup>36</sup>“Erëi kua salmo pe uyemingeta’ä oï David rewa. Echa’ä David umano opa ma uyapo yawe opaete mbarawiki Tumpa umee chupe wae. Jare jetekue uñeñotika tamikue reta jetekue ñonoï wae pe jare opa ikumewa.

<sup>37</sup>Erëi jokuwa kuimbae Tumpa umbijekowe ye ueru umanokue wae reta ipite wi wae jetekue jüu’ä etei,” jei Pablo chupe reta.

<sup>38</sup>“Jáeramo cherëtara reta, pikuaa kawu kua: Ore ndoyu ma numimbeu waerä pewe kërái rupi mbaembae piyawu Tumpa koti wae ipuereta opa uyembái waerä – jae ko Jesús rupi.

<sup>39</sup>Echa’ä ipotawe kía wirowia Jesús re wae Tumpa umaeta jese jeko mbae wae rami,” jei. “Kua ikawiete ko, echa’ä ima ma yaipota tõi yayembujupika Moisés arakae uikuatía wae rupi. Erëi yandepuere’ä etei,” jei chupe reta.

<sup>40</sup>Jare Pablo jei wi chupe reta: “Jayawe piyandareko kawu piyé awiye waerä uyeyapo pewe kërái Tumpa iñee arakae umimbeu wae reta jei wae rupi,” jei. “Echa’ä pëti wae uikuatía kuärái:

<sup>41</sup>‘Tumpa jei: ‘Mase, pe chererïro wae reta pepiakañita, echa’ä che aiporarakata ai pewe jaeño mái pewa. Yepe tõi kía umimbeu pewe kërái aiporarakata ai pewe wae, erëi jesepe pe reta ndarau perowia jese,’ jei Tumpa.’ Jukuärái uyekuatía oï,” jei Pablo chupe reta.

<sup>42-43</sup>Jayawe opa yembati yawe, oë reta tupao wi. Jare jeta uyembati yureko wae reta yuweru umiñera Pablo jare Bernabé yuweru ye waerä ñruwe ara mbutuu pe oporomboe ye reta waerä Jesús rewa. Jayawe jeta judío reta jare judiorä uyeyapo wae reta wi yuraa reta Pablo jare Bernabé ndiwe. Jare Pablo jare Bernabé umikirëi reta jekuaneño uyeko reta waerä Tumpa ipiakawiete wae re.

<sup>44</sup>Jayawe ñruwe ara mbutuu uwäe yawe, opaete seri tëta wasu pewa reta yuweru uyembati uyapisaka reta waerä Tumpa iñee re.

<sup>45</sup>Erëi amokue judío itenondewa reta uecha yawe jeta wae reta uyapisaka ñonoï Pablo iñee re, jae reta uñamitää umaë Pablo re jare jei reta: “Kua Pablo jei wae añetete’ä ko,” jei reta. Jare jei reta ñru mbaembae kachi wae Pablo koti.

<sup>46</sup>Jayawe Pablo jare Bernabé ukiye mbae rewe umbieta chupe reta kuärái: “Tumpa oreokui numimbeu waerä iñee judío reta pe rani; jáeramo jukuärái nduyapo,” jei reta. “Erëi pe reta pipota’ä etei piyapisaka jese. Echa’ä perïro ma Tumpa iñee numimbeu pewe wae. Jare jukuärái pechaka ma jupi’ä ko penoi waerä tekowe opa mbae wae,” jei reta. “Jáeramo añawe wiwe ore numimbeuta judío mbae wae reta pe kërái ipuere onoi reta waerä tekowe opa mbae wae,” jei reta.

<sup>47</sup>“Mase, arakae Tumpa jei yanderamikue reta pe kuärái: ‘Che pomondo ai judío mbae wae reta pe peraa waerä chupe reta arakuaa. Jukuärái pikota chupe reta tembipe rami. Pemimbeuta opaete ñwi pewa reta pe kërái ipuere onoi reta waerä tekowe opa mbae wae.’ Jukuärái jei Tumpa chupe reta, jare jukuärái Tumpa oreokui nduyapo waerä,” jei Pablo jare Bernabé chupe reta.



<sup>48</sup>Jayawe judío mbae wae reta joko pe yureko wae uyandu reta yawe jokuá ñee, tuicha rupi uyerowia reta, jare umee reta yasurupái Tumpa pe jae iñee re. Jayawe jeta wae wirowia jese. Jare jukuárái uechaka reta jae reta ko Tumpa uiparawo wae onoi waerä tekowe opa mbae wae.

<sup>49</sup>Jare joko wiwe amokue jae reta yuraa umimbeu opaete jokuá iwí rupi Jesús rewa.

<sup>50</sup>Erëi judío itenondewa reta ombowaichoka Pablo jare Bernabé koti jokuá tēta wasu pewa amokue kuimbae itenondewa reta jare amokue kuña ikokatu wae Tumpa wi uipiu wae reta. Jayawe jae reta uiporaraka Pablo jare Bernabé pe, jare omombo reta iyuwi jokuá tēta wasu wi.

<sup>51</sup>Jayawe ndei oē yuraa reta mbowe, Pablo jare Bernabé umitimo ipipasa iwikuí usururu waerä chuwi. Jukuárái uikuaaka iko jokuá judío itenondewa reta pe jae reta etei ko teko onoi Tumpa uiporaraka chupe reta waerä. Joko wi oē yuraa reta tēta wasu Iconio jee wae koti.

<sup>52</sup>Jesewe Cristo re wirowia wae reta tēta wasu pe yureko wae uyerowiaete reta. Jare uyekuaa jese reta Espiritu Santo jei wae rupi yureko reta wae.

## Hechos 14

### Pablo jare Bernabé ñonoï tēta wasu Iconio pe

<sup>1</sup>Jayawe Pablo jare Bernabé yuraa uwäe reta tēta wasu Iconio pe. Jare uike reta pēti tupao pe kērái uyapoñoi wae rami. Jare umbipi oporomoe reta mbaepuere rewe Jesús rewa. Jáeramo jeta judío reta jare judío mbae wae reta wi joko pe yureko wae wirowia reta Jesús re.

<sup>2</sup>Erëi amokue judío reta wirowia'ä jese, jare wirowiaka jeta judío mbae wae reta tēta wasu pewa reta pe Pablo jare Bernabé iyapu ko jei reta. Jayawe jokuá judío mbae wae reta pochí upita Pablo jare Bernabé koti.

<sup>3</sup>Jesewe Pablo jare Bernabé upita reta joko pe ima rupi. Jare jekuaeño omboe reta ukiye mbae rewe yandeYa rewa opaete uyapisaka jese wae reta. Jare yandeYa umee mbaepuere Pablo jare Bernabé pe uyapo reta waerä opaete jowake jeta mbaembae kiawe ipuere'ä uyapo wae. Jukuárái yandeYa uechaka iko tēta wasu pewa reta pe kērái añetete ko iñee wae.

<sup>4</sup>Jayawe tēta wasu pewa reta uyembiyao iyuwi reta. Amokue wae reta uyemboya jokuá judío wirowia mbae wae reta re. Jare ñru wae reta uyemboya Jesús jemimboe tenondewaete reta re.

<sup>5</sup>Joko wi judío reta, jare amokue judío mbae wae reta, jare itenondewa reta wi uyemboemboe uyapi uyuka reta waerä tēi ita pe Pablo jare Bernabé.

<sup>6</sup>Erëi jeräkua Pablo jare Bernabé pe jokuá uyemboemboe reta wae. Jáeramo oē osi reta jokuá tēta wasu wi. Joko wi Pablo jare Bernabé yuraa reta iwí Licaonia jee wae koti. Jokuá iwí rupi ime mokui tēta wasu reta Listra jare Derbe jee wae reta. Jare ime wi ñru tēta wasu raí reta jokuá mokui tēta wasu reta iyipi rupi.

<sup>7</sup>Jayawe joko pe wi jae reta jekuaeño umimbeu ñee ikawi wae.

### **Amokue Litra pewa reta uyapi Pablo ita pe uyuka reta waerä tēi**

<sup>8</sup>Tēta wasu Litra pe ime iko pēti kuimbae ipuere mbae uwata wae ichi wi oa wiwe.

<sup>9</sup>Pēti ara jokuu kuimbae uwapi uyapisaka iko Pablo oporomboe iko wae re. Aramoño Pablo umaē ngatu jese, jare ipia pe uikuaa jokuu kuimbae wirowia oī Jesús ipuereta umingera wae.

<sup>10</sup>Jayawe Pablo usapikai rewe jei chupe: “¡Epüa iyemboi!” jei. Jayawe jokuu kuimbae upüa woi uyemboi jare umbipi uwata kawi.

<sup>11</sup>Jayawe joko pe yureko wae reta uecha yawe Pablo uyapo Tumpa imbaepuere rupi wae, tuicha rupi ipiakañi reta. Jayawe usapikai rewe umbipi jei iyupe reta ñee pei: “¡Mase, kua reta ko aipo jae amokue yandetumpa reta uyeyapo ma ñonoī kuimbaerä! ¡Uweyi ma reta ara wi yanembori waerä!” jei iyupe reta.

<sup>12</sup>Jae reta wirowia tēi Bernabé ko jae itumpa reta itenondewa Júpiter jee wae, jare Pablo ko jae itumpa Mercurio jee wae. Jukuärái wirowia reta tēi, echa’ä Pablo ñee wiraa wae ko jare jae reta wirowia itumpa Mercurio jee wae ikatu uyemingeta.

<sup>13</sup>Jare tēta wasu wi koiño oī pēti tupao, jare joko pe umbiadora reta itumparaanga Júpiter jee wae re. Jayawe Júpiter re umbiadora wae reta itenondewa kua uikuaa yawe, oñono mbaepoti amokue toro reta re ipoirä jare ueru jokuu toro reta tēta wasu ikēsea jöke pe. Joko wi jae umbatika tēta wasu pewa reta, jare jae reta umbipi uyeyapikatu uyuka waerä toro reta Pablo jare Bernabé umbutuicha reta waerä.

<sup>14</sup>Jayawe Bernabé jare Pablo kua uikuaa reta yawe, tuicha rupi ipiatiti reta. Jáeramo omonoro reta jemimonde, jare opa osi yuraa reta uyembati ñonoī wae reta ipite pe. Jare usapikai rewe jei chupe reta:

<sup>15</sup>“Kuimbae reta, ¡awiye etei kua piyapo! ¡Ore jae’ä ko tumpa reta! ¡Ore ko jae kuimbae retaño pe reta rami! Ndoyu ko numimbeu waerä pewe ñee ikawi wae Tumpa ikoño mái wae rewa. Kua Tumpa uyapo ara, jare iwi, jare mar, jare opaete mbaembae ime ñonoī pipe wae reta,” jei chupe reta. “Jare ore numimbeu noi pewe peya waerä petumparaanga usiriwe mbae wae reta jare piyerowa waerä Tumpa tekowe onoi wae koti,” jei chupe reta.

<sup>16</sup>Jare Pablo jei wi chupe reta: “Pe judío mbae piko wae reta, Tumpa arakae wiwe umaēnoi peré piko waerä pipota wae rupi.

<sup>17</sup>Erēitu Tumpa jekuaeño uyekuaaka pewe mbaembae ikawi wae jae uyapo pemaerä wae rupi. Echa’ä jae ombou pewe ama, jare umbikuakuaa kawi temiti reta ime waerä perembiurä. Jukuärái Tumpa uyapo piyerowia kawi piko waerä.” Jukuärái Pablo jei chupe reta.

<sup>18</sup>Erēi yepe tēi tēta wasu pewa reta uyandu Pablo jare Bernabé jei chupe reta wae, jesewe jae reta uipota ñeño uyuka chupe reta jokuu toro reta umbutuicha reta waerä.

Erëitu Pablo jare Bernabé umiamiri wite reta, jare tēta wasu pewa reta uyuka'ä ma jokua toro reta.

<sup>19</sup>Joko wi yuweru amokue judío reta tēta wasu Antioquía pewa jare tēta wasu Iconio pewa wi. Jae reta wırowiaka jeta tēta wasu Listra pewa reta pe Pablo ko jae upurumbıtawı uwata oı wae. Jayawe jeta tēta wasu pewa reta pochi rewe uyapi Pablo ita pe uyuka reta waerä. Joko wi umbıtırırı onoe wiraa reta tēta wasu joka koti. Jare joko pe ueya reta, echa'ä wırowia reta umano ma ko.

<sup>20</sup>Joko wi amokue hermano reta yuweru uyembatı ipiatıtı rewe Pablo iyıpi rupı. Jare aramoıno jae reta jowake, ;Pablo upıa oo ye tēta wasu pe!

### **Pablo jare Bernabé yuraa opou ye hermano reta ipı jare umbıjee itenondewa retarä**

Jayawe piarewe pe Pablo jare Bernabé oē yuraa tēta wasu Listra wi tēta wasu Derbe koti.

<sup>21</sup>Jare yuraa uwäe reta yawe Derbe pe, jekuaeño umımbeu reta ñee ikawi wae Jesucristo rewa joko pe yureko wae reta pe. Jare jeta Derbe pewa reta wırowia Cristo re. Joko wi Pablo jare Bernabé uñatıma ye yuraa reta tēta wasu reta Listra, Iconio, jare Antioquía pe.

<sup>22</sup>Jare jokua tēta wasu reta rupı, jae reta jekuaeño uyembatı Cristo re wırowia wae reta ndıwe. Jare omboe reta ye Tumpa iñee re umımıräta reta waerä Tumpa re. Jare umıkırēı reta awıye uyerowa ye reta waerä Tumpa wi. Jare jei wi chupe reta: “Pēti ara Tumpa ikota opaete wae imburuwıcha wasurä jaeño mái pewa. Jare yande yaıporara ñotái ko jeta ñai waerä jae ndıwe, echa'ä Tumpa jowaıcho reta ikuerita'ä uıporaraka yandewe ramo.” Jukuärái jei chupe reta.

<sup>23</sup>Jare kiape kiape uyembatı Cristo re wırowia wae reta, jokua ipıte wi Pablo jare Bernabé uıparawo jare umbıjee itenondewa retarä. Jare jekuaeño ndei oē yuraa reta mbowe, Pablo jare Bernabé oñono tee amokue ara reta ukaru mbae uyerure reta waerä Tumpa pe jese reta. Jare jukuärái oñono reta jokua tenondewa reta Tumpa ipo pe.

### **Pablo jare Bernabé uñatıma ye reta tēta wasu Antioquía pe**

<sup>24</sup>Jayawe Pablo jare Bernabé uasa iwi Pisidia rupı jare yuraa uwäe reta tēta wasu Perge jee wae pe. Jokua tēta wasu oı iwi Panfilia pe.

<sup>25</sup>Jare umımbeu reta Tumpa iñee jokua tēta wasu pewa reta pe. Joko wi yuraa yuapi ye reta sur koti tēta wasu Atalia jee wae koti.

<sup>26</sup>Jare joko wi uyupi reta chalana wasu pe, jare mar rupı uasa yuraa ye reta tēta wasu Antioquía pe. Echa'ä joko pe tenonde yawe hermano reta oñono Pablo jare Bernabé Tumpa ipıakawi wae ipo pe, jare omondo reta joko wi uyapo reta waerä jokua mbarawıki. Jare añawe Pablo jare Bernabé opa ma uyapo reta jokua mbarawıki.

<sup>27</sup>Jare yuraa uwäe reta ye yawe Antioquía pe, Pablo jare Bernabé umbatika Cristo re wirowia wae reta. Jare umimbeu chupe reta opaete mbaembae Tumpa uyapo wae jae reta uwata wae rupi. Umimbeu wi chupe reta kërái Tumpa umaeño wi judío mbae wae reta re wirowia waerä jese.

<sup>28</sup>Jayawe Pablo jare Bernabé ima rupi upita reta joko pe jae reta ndiwe.

## Hechos 15

### Hermano itenondewa reta uyembati tēta wasu Jerusalén pe

<sup>1</sup>Pablo jare Bernabé tēta wasu Antioquía pe ñonoï rambuwe, yuweru iwi Judea wi amokue oporomboe wae reta. Jae reta ko jae judío Cristo re wirowia wae reta. Kua reta umbipi omboe hermano reta kuärái: “Pe judío mbae piko wae reta piyembicircuncidaka’äyawe Moisés arakae uikuatía wae rupi, Tumpa ndarau perepi mbaembae piyawí ikoti wae wi.” Jukuärái oporomboe iko reta tēi.

<sup>2</sup>Erēi Pablo jare Bernabé tāta rupi uyeaka jae reta ndiwe jokua re. Jáeramo hermano reta upita omondo waerä Pablo jare Bernabé amokue iru hermano reta ndiwe tēta wasu Jerusalén koti. Echa’ä uipota jae reta uyemingeta waerä Jesús jemimboe tenondewaete reta ndiwe jare Cristo re wirowia wae reta itenondewa reta ndiwe jokua yemboe re.

<sup>3</sup>Jayawe yuraa reta tēta wasu Jerusalén koti. Jare yuraa yureko rambuwe, uasa reta iwi Fenicia rupi jare iwi Samaria rupi. Jare jokoropi umimbeu reta Cristo re wirowia wae reta pe kërái jeta judío mbae wae reta uyerowa ma Tumpa koti. Jare kua uyandu yawe, uyerowiaete opaete jokua hermano reta.

<sup>4</sup>Jare Pablo jare Bernabé yuraa uwäe reta yawe tēta wasu Jerusalén pe, Jesús jemimboe tenondewaete reta jare opaete Cristo re wirowia wae reta itenondewa reta ndiwe umbiasa kawí reta. Jare uyembati reta yawe, Pablo jare Bernabé umimbeu chupe reta opaete Tumpa uyapo jae reta rupi wae, kërái jeta judío mbae wae reta uyerowa ma Tumpa koti.

<sup>5</sup>Erēi amokue fariseo Cristo re wirowia wae reta uyemboi jare jei chupe reta: “Jokua judío mbae wae reta imeta ko uyembicircuncidaka reta, jare yaeta ko chupe reta uyapo waerä Moisés arakae uikuatía wae rupi,” jei reta.

<sup>6</sup>Jáeramo Jesús jemimboe tenondewaete reta jare Cristo re wirowia wae reta itenondewa reta wi uyembati tee reta uyemingeta waerä jokua re.

<sup>7</sup>Jare jeta ma uyemingeta reta yawe jokua re, Pedro uyemboi jare omoë iñee jei rewe: “Hermano reta, pe reta pikuaa pei kërái tenondete Tumpa cheparawo amimbeu waerä judío mbae wae reta pe ñee ikawí wae, jae reta wi wirowia jese waerä,” jei.

<sup>8</sup>“Tumpa uikuaa opaete wae ipia pe oí wae. Jare jae uechaka uyerowia ko umaee jese reta wae, echa’ä umee wi chupe reta Espíritu Santo yandewe umee wae rami,” jei.

9“*Añetete Tumpa oyowake rupi umae jese reta jare yanderé wi. Echa’ä jae reta wirowia yawe jese, Tumpa opa ma oyoe ipia,*” jei.

10“*Jayawe, ¿maera pa pemboporowa pei Tumpa ipiawasu? Pe pikuaa kawi ma Moisés arakae uikuatía wae ko jae pëti tewita poiete wae rami. Jare jokua tewita yande parawete reta yandepuere’ä yawoi. Yanderamikue reta wi ipuere’ä owoi. Jayawe, ¿maera pa añawe pipota piñono jokua tewita yandehermano judío mbae wae reta re?*” jei.

11“*Mase, yande yarowia Tumpa yanderepi ma ko yandeYa Jesús ipiakawi rupiño, mbaeti ko Moisés arakae uikuatía wae rupi. Jae nunga wi judío mbae wae reta uyerepika wi Jesús ipiakawi rupiño,*” jei Pedro chupe reta.

12Joko wi Bernabé jare Pablo umimbeu chupe reta kërái jae reta rupi Tumpa uyapo jeta mbaembae kiawe ipuere’ä uyapo wae judío mbae wae reta ipite rupi. Jare opaete uyembati yureko wae reta kiiño uyapisaka jese reta.

13Jare Bernabé jare Pablo opa ma uyemingeta yawe, Jacobo omoë iñee jei rewe: “*Hermano reta, piyapisaka mii cheré,*” jei.

14“*Simón Pedro umimbeu ma yandewe kërái Tumpa jaeramo etei uparawiki judío mbae wae reta ipite rupi oñono tee waerä amokue wae reta jae imaerä,*” jei.

15“*Kua re jei wi Tumpa iñee arakae umimbeu wae reta. Echa’ä uyekuatía oi kuärái:*

16“*Tumpa jei: ‘Kua jaikue rupi che ayu yeta amupüa waerä David iñemoñaa ipite wi pëti wae Israel pewa reta imburuwicha wasurä. Echa’ä David imbaepuere ko pëti tëta opa usururu wae rami. Erëi che amupüa yeta usururukue, jare ambipiau yeta.*

17Jukuärái rupi ayapota jeta ambie ye ye iwi pewa reta chereka waerä. Jare judío mbae wae reta che aiparawo ma chemaerä wae reta cherekata wi.’ Jukuärái jei Tumpa.

18Jae ko arakae wiwe uikuaaka kua mbaembae.’ Jukuärái uyekuatía oi,” jei Jacobo chupe reta.

19“*Jáeramo che tae awiye yambiwái jokua judío mbae wae reta Tumpa koti uyerowa wae.*

20Erëi ikawi ko yaikuatía waerä chupe reta tupapire kuärái: ‘*Awiye tuyemingia reta Tumpa koti tumparaanga reta rupi. Jare awiye tou reta wi mbaemimba uyeyuwikue isoo, jare awiye tou reta wi tuwi. Jare awiye tuyapo reta awasa.*’ Jukuärái yaikuatia chupe reta,” jei.

21“*Jae reta awiyeta ko uyapo kua mbaembae awiye waerä umbiarasi judío reta jae reta ipite pe ñonoï wae. Echa’ä arakae wiwe opaete tëta wasu reta rupi Moisés arakae uikuatía wae uyemimbeu ma. Jare judío reta imeño jokua umingeta reta opa mbutuu ara rupi tupao reta rupi. Jare jeta wae reta uikuaa Moisés uikuatía wae pe jei awiye yayapo waerä jokua mbaembae,*” jei Jacobo chupe reta.

## Tupapire uyekuatía hermano judío mbae wae reta pe wae

<sup>22</sup>Jokua Jacobo jei wae ikawi iko Jesús jemimboe tenondewaete reta pe, jare opaete Cristo re wirowia wae reta pe, jare itenondewa reta pe wi. Jáeramo upita reta omondo waerä tēta wasu Antioquía koti amokue kuimbae reta Pablo jare Bernabé ndiwe wiraa waerä tupapire. Jayawe uiparawo reta mokui hermano itenondewa reta Judas jare Silas jee wae reta. Jokua Judas jae nunga wi jee Barsabás.

<sup>23</sup>Jayawe omondo reta jae reta ndiwe pēti tupapire jei kuärái: Pe judío mbae wae Cristo re wirowia wae reta tēta wasu Antioquía, iwi Siria jare Cilicia pewa reta pe, ore nduraaka noi pewe saludo. Ore ko jae Jesús jemimboe tenondewaete reta, jare Cristo re wirowia wae itenondewa reta – pehermano tēta wasu Jerusalén pewa reta.

<sup>24</sup>Jeräkua ma orewe kērái amokue orepite wi yuraa pepi. Jare jae reta oporomboc wae rupi pembopa jare pembipiawiwe'ä. Jukuärái jae reta uyapo, yepe tēi ore nomondo'ä reta pepi.

<sup>25</sup>Ore jeta ma nduyemingeta jokua re jare ndupita nomondo waerä pepi amokue kuimbae orepite wi. Jae reta yuraa ñonoï yandehermano mii reta Pablo jare Bernabé ndiwe.

<sup>26</sup>Jeta wese jae reta ukiye mbae rewe umijēwa reta jekowe jowaicho reta pe uyeyokui kawi waerä yandeYa Jesucristo pe.

<sup>27</sup>Jokua kuimbae reta nomondo noi Pablo jare Bernabé ndiwe ko jae Judas jare Silas jee wae reta. Jae reta umimbeuta wi pewe perowake etei kua tupapire jei wae.

<sup>28</sup>Ore ndarau pumbiawái Moisés arakae uikuatía wae pipe, echa'ä tewita poi wae rami ko pewe. Kua ikawi oï Espiritu Santo pe jare orewe wi. Jáeramo kua mbowiño numimbeuta pewe:

<sup>29</sup>Awiye peu soo tumparaanga pe uñemee wae. Awiye peu wi mbaemimba uyeyuwikue isoo. Awiye peu tuwi. Jare awiye piyapo awasa. Kua ore ndoe pewe wae piyapo yawe, ikawita pewe. Tumpa tumae kawi peré. Jukuärái uyekuatía oï tupapire pe.

<sup>30</sup>Jayawe Pablo, Bernabé, Judas, jare Silas oë yuraa reta Jerusalén wi jare yuraa uwäe reta Antioquía pe. Joko pe umatika reta Cristo re wirowia wae reta jare umee chupe reta jokua tupapire.

<sup>31</sup>Jare opa ma umingeta reta yawe, opa rewe uyerowiaete jokua ñee umbipiakatu wae re.

<sup>32</sup>Joko wi Judas jare Silas jeta umimbeu chupe reta umikirēi reta waerä jare umimiräta kawi reta waerä Tumpa re. Echa'ä jae reta ko ñee Tumpa wi etei ou wae umimbeu wae reta.

<sup>33</sup>Mbowi ara rupi Judas jare Silas upita reta yawe joko pe, Cristo re wirowia wae reta ipiakatu rewe omondo ye reta. Jayawe Judas uñatima ye Jerusalén koti.

<sup>34</sup>Erēi Silas uipota upita joko pe.

<sup>35</sup>Pablo jare Bernabé upita wi Antioquía pe oporomboe waerä yandeYa iñee re jare umimbeu waerä ñee ikawi wae jeta ñru wae reta ndiwe.

### **Pablo jare Bernabé uyembisiri iyuwi reta**

<sup>36</sup>Joko wi mbowi ara rupi Pablo jei Bernabé pe: “Ikawi ko ñañatima ye ya yapou waerä Cristo re wirowia wae reta ipi kiape kiape yandeYa iñee re yaporomboe wae rupi. Ya yaikuaa waerä kërái ra jae reta ñonoï wae,” jei chupe. Jare kua ikawi Bernabé pe.

<sup>37</sup>Jare Bernabé uipota tēi Juan Marcos oo ye waerä jae reta ndiwe.

<sup>38</sup>Erēi jokua ikawi’ä Pablo pe. Echa’ä tenonde yawe, jae reta mbapi rewe uparawiki yureko Tumpa pewarä iwi Panfilia pe. Erēi Juan Marcos ueya reta jare oo ye chuwi reta jēta koti.

<sup>39</sup>Jayawe Pablo jare Bernabé uyeaka reta täta rupi jokua re. Jáeramo uyembisiri reta iyuwi. Joko wi Bernabé wiraa Juan Marcos jae ndiwe, jare jae reta uyupi chalana wasu pe jare uasa reta iwi Chipre koti.

<sup>40</sup>Jare Pablo uiparawo Silas iwatañrurä. Jare ndei yuraa reta mbowe, hermano reta uyerure Tumpa pe jese reta jare oñono reta Tumpa ipiakawi wae ipo pe.

<sup>41</sup>Jayawe Pablo jare Silas uasa reta iwi Siria jare Cilicia rupi, jare jekuaeño umimiräta Tumpa re hermano reta ime yureko jokoropi wae.

## **Hechos 16**

### **Pablo jare Silas wiraa Timoteo jae reta ndiwe**

<sup>1</sup>Jayawe Pablo jare Silas yuraa uwäe reta tēta wasu Derbe pe. Jare joko wi yuraa uwäe reta tēta wasu Listra pe. Joko pe iko pēti hermano Timoteo jee wae. Jae ichi ko judía Cristo re wirowia wae, jare tu ko jae judío mbae wae.

<sup>2</sup>Opaete Cristo re wirowia wae reta tēta wasu reta Listra jare Iconio pewa uyemingeta kawiete Timoteo re.

<sup>3</sup>Jayawe Pablo uipota Timoteo oo waerä jae reta ndiwe. Erēi ime iko pēti yembiawái chupe reta: Opaete wae reta uikuaa yureko Timoteo tu judío mbae wae ko. Jáeramo Timoteo uyembicircuncidaka mbae wae ko. Jare Pablo uikuaa iko yuraa uike tupao reta rupi yawe Timoteo ndiwe, jokua ombopochikata oï judío reta. Jáeramo ndei oē yuraa reta mbowe, Pablo umbicircuncidaka Timoteo.

<sup>4</sup>Jayawe Pablo jare jae ndiwe yureko wae reta uasa tēta wasu reta rupi. Jare Pablo jekuaeño omboe hermano reta jokoropi yureko wae. Jekuaeño omboe reta imandúa reta waerä Jesús jemimboe tenondewaete reta jare Cristo re wirowia wae itenondewa reta Jerusalén pe ñonoï wae uikuatía chupe reta wae re.

<sup>5</sup>Jáeramo pēti pēti uyembati wae rupi hermano reta uñemimiräta kawi Tumpa re Pablo oporomboe wae rupi. Jare opa ara rupi jeta ñru wae reta wirowia Cristo re jare uñemiiru jae reta ndiwe.

### **Pablo ipau rupi Tumpa jei chupe oo waerä iwi Macedonia pe**

<sup>6</sup>Joko wi Pablo jare jae ndiwe yureko wae reta uasa reta iwi Frigia jare Galacia jee wae rupi. Erëi Espiritu Santo umaño'ä jese reta yuraa umimbeu waerä Tumpa iñee iwi Asia rupi.

<sup>7</sup>Jáeramo yuraa reta iwi Misia jee wae pe. Jare joko wi uipota tēi yuraa reta iwi Bitinia jee wae koti. Erëi Espiritu Santo umaño'ä wi jese reta yuraa waerä joko pe.

<sup>8</sup>Jáeramo uasa wirae yuraa reta iwi Misia wi jare yuraa uwäe reta tēta wasu Troas jee wae pe.

<sup>9</sup>Jokua pītu Pablo ipau rupi Tumpa uechaka chupe pēti kuimbae iwi Macedonia pewa uyemboi oī Pablo jowai. Jare kuimbae umiñera Pablo jare jei chupe: “Eyu mii cheiwi Macedonia pe orembori waerä,” jei chupe ipau rupi.

<sup>10</sup>Piärewe pe Pablo uikuaaka orewe ipau rewa. Jayawe Pablo jare ore ndorowia Tumpa orereni iko pau rupi ndoo numimbeu waerä ñee ikawi wae jokua iwi Macedonia rupi. Jáeramo ore nduyeyapikatu woi ndoo waerä jokoti.

### **Kuña Lidia jee wae wirowia Cristo re**

<sup>11</sup>Jayawe nduyupi chalana wasu pe jare nduasa Troas wi simi mar rupi iwi Samotracia jee wae koti. Jayawe piärewe pe ndoo nuwäe tēta wasu Neápolis jee wae pe.

<sup>12</sup>Joko wi ndoo nuwäe tēta wasu Filipos jee wae pe. Filipos ko jae pēti tēta wasu ikawiete wae iwi Macedonia pe oī wae, jare umbipi arakae rupi amokue romano reta yuraa yawe uñemiēta joko pe. Jayawe kua tēta wasu pe ndupita mbowi ara rupi.

<sup>13</sup>Jare mbutuu ara pe ore noë ndoo oka pe tēta wasu ikēsea jōke rupi. Echa'ä jeräkua orewe ime koiño tēta wasu wi i wasu jembei pe pēti yerurerenda kiapē amokue judío reta uyembati uyerure waerä Tumpa pe. Jare ndoo nuwäe yawe joko pe, nduwapi nduyemingeta amokue kuña reta joko pe uyembati yureko wae ndiwe.

<sup>14</sup>Jare jokua kuña reta ipite wi, pēti wae jee Lidia. Jae uyapisaka kawī iko opaete ore ndoporomboe nduiko wae re. Lidia ko jae tēta wasu Tiatira jee wae pewa, jare asoya mborao wae owaka wae ko. Jae uipiu kawī Tumpa wi, jare yandeYa uñatai chuwi ipia uyapisaka kawī waerä jare wirowia waerä wi opaete Pablo jei iko wae re.

<sup>15</sup>Jayawe Lidia jare jētara reta ndiwe uyembisakambuka reta i pe wirowia reta yandeYa re ramo. Joko wi Lidia uparea orewe ndoo ndupita waerä jae jēta pe. Jae jei orewe: “Pe reta pikuaa ma añawe che ko jae Cristo re arowia wae. Jayawe pepita mii cherēta pe,” jei orewe. Jare jeta oremiñera ramo, ndoo ndupita jae jēta pe.

### **Pablo jare Silas uiporara reta peresoriru pe**

<sup>16</sup>Pēti ara ore ndoo nduiko yawe jokua yerurerenda koti, aramoiño nuñeñowāiti pēti kuñatái ndiwe. Jae ko pēti tāta uyeyokui wae. Kua kuñatái umingana jeta korepoti



iya reta pewartä, echa'ä pëti añä uyembiiya ma jese jare umee chupe mbaepuere umimbeu waerä mbaembae uyeyapota oï wae rewa.

<sup>17</sup>Jayawe kuñatái umbipi uwata oreraikue rupi, jare usapikai rewe jei pii: “Kua kuimbae reta uyeyokui Tumpa imbaepuerete wae pe. Jae reta umimbeu ñonoï yandewe kërái yandepuere ñanoi waerä tekowe opa mbae wae Tumpa ndiwe,” jei.

<sup>18</sup>Jeta ara reta rupi jokuä kuñatái uyapo jukuärái. Jayawe Pablo ikueri ma uyandu jokuä ñee. Jáeramo pëti ara Pablo aramoiño uyerowa jei añä pe: “Jesucristo jee re tae ndewe: ¡Esiri kua kuñatái wi!” jei chupe. Jare jupiwoiño añä usiri chuwi.

<sup>19</sup>Joko wi jeräkua kuñatái iya reta pe Pablo uyapo wae rewa. Jare uikuaa reta yawe kuñatái mbaeti ma onoi mbaepuere umimbeu waerä mbaembae uyeyapota oï wae, pochiete reta. Echa'ä ndarau ye ma ipuere umingana reta jese. Jáeramo uipisi reta Pablo jare Silas, jare wiraa reta tëta wasu iplaza pe kiape tëta wasu imburuwicha reta uyembati wae pe.

<sup>20</sup>Jare wiraa ma uruwäe reta yawe mburuwicha reta jowai, jei chupe reta: “Kua kuimbae reta judío reta ko, jare opa ombopa ñonoï opaete ñanerëta wasu pewa reta.

<sup>21</sup>Echa'ä jae reta oporomoe ñonoï teko yande romano reta yayapo mbaei wae re,” jei reta mburuwicha reta pe.

<sup>22</sup>Jayawe jeta joko pe ñonoï wae reta pochi Pablo jare Silas koti, jare jupiwoiño umbipi uepeña reta. Jare mburuwicha reta omondoroka Pablo jare Silas jemimonde chuwi reta jare uinupaka reta iwira pe.

<sup>23</sup>Jare jeta ma uinupaka reta yawe, mburuwicha reta oñonoka Pablo jare Silas peresoriru pe. Jare oyokui reta peresoriru iyandarekoa uyandareko kawï jese reta waerä, awiye waerä oë osi reta.

<sup>24</sup>Jáeramo peresoriru iyandarekoa wiraa umiinge reta peresoriru joo japipete oï wae pe, jare umbiwapi reta, jare oñono ipi cepo pe.

<sup>25</sup>Erëi piare mbite rupi Pablo jare Silas uyerure reta jare ukäta reta Tumpa pe. Jare iru pereso reta uyapisaka ñonoï jese reta.

<sup>26</sup>Jare aramoiño umbipi iwikäta täta wae jare uñemitimo peresoriru iwapika retawe. Jare jupiwoiño uyepea opaete peresoriru jöke reta, jare opa uyera cadena opaete pereso pe yureko wae reta wi.

<sup>27</sup>Jayawe peresoriru iyandarekoa usareko jare uecha opaete peresoriru jöke reta uyepea oï. Jayawe wirowia tëi pereso reta opa ma ko oë osi wae. Jare uikuaa iko mburuwicha reta umbijekota yureko wae pereso reta osi wae re, jare uyukakata tëi yureko wae. Jáeramo jae ukiye pipei ueki ikisepuku jiru wi uyeyuka waerä tëi.

<sup>28</sup>Erëi Pablo usapikai chupe: “¡Awiye iyeyuka!” jei. “Echa'ä ore opa reweño noï kua japipe,” jei chupe.

<sup>29</sup>Jayawe peresoriru iyandarekoa oyokui pëti imboria ueru waerä chupe tembipe. Jare ueru ma chupe yawe, osi oo Pablo jare Silas ñonoï wae pe. Jare uriri rewe uñeñono iwi re jae reta jowai ukiyete iko ramo.

<sup>30</sup>Joko wi jae uyukendaka ye ñru pereso reta, erëi Pablo jare Silas onoe wiraa oka pe. Jare uipiu rewe jei chupe reta: “Che jeta ma ayawi Tumpa koti. ¿Mbae pa ayapota ayerepika waerä teko anoi wae wi?” jei chupe reta.

<sup>31</sup>Jayawe jae reta jei chupe: “Erowia yandeYa Jesucristo re jare jae nderepita. Jare nerëtara reta wi torowia jese,” jei reta chupe.

<sup>32</sup>Jayawe Pablo jare Silas umimbeu Tumpa ñnee chupe jare opaete jëtara reta pe wi.

<sup>33</sup>Jare ndei köe mbowe peresoriru iyandarekoa wiraa Pablo jare Silas i ime oï wae koti. Joko pe oyoe chuwi reta ipere jare uipiano reta. Jayawe jae jare jëtara reta ndiwe wirowia ma Cristo re ramo, uyembisakambuka reta i pe.

<sup>34</sup>Joko wi peresoriru iyandarekoa wiraa jëta pe Pablo jare Silas umingaruru reta waerä. Jare jae jare opaete jëtara reta tuicha rupi uyerowia, echa’ä jae reta wirowia ma Tumpa re ramo.

<sup>35</sup>Jokua ndimboweasi, mburuwicha reta omondo amokue sindaro reta jeika peresoriru iyandarekoa pe opoi waerä Pablo jare Silas wi.

<sup>36</sup>Jayawe jae umbeu yuapi ye kua ñee Pablo pe jare jei chupe: “Mburuwicha reta chokui apoi pewi waerä,” jei. “Jáeramo añawe pepuere peë peo ye pepiawiwe rewe,” jei chupe.

<sup>37</sup>Erëi Pablo jei jokua sindaro reta pe: “Mase, mburuwicha reta orenupaka opaete wae reta jowake jare oreñonoka reta peresoriru pe orereko mbae rewe,” jei. “Jokua ikawi’ä etei ko, echa’ä romano reta ko ore ramo. Jare añawe umaño ndoo ye waerä wiari rupi jae reta uyawi ramo, awiye waerä tëta wasu pewa reta uikuaa. Ndarau ikawi uyapo reta waerä jukuärái. Tou jae reta etei,” jei Pablo chupe reta.

<sup>38</sup>Jayawe sindaro reta yuraa umimbeu yuapi ye mburuwicha reta pe Pablo jei chupe reta wae. Jare mburuwicha reta uikuaa yawe Pablo jare Silas romano reta ko wae, ukiye reta. Echa’ä romano reta imburuwicha wasu uikuatía wae jei awiyeta ko uiporaraka reta ñru romano reta pe jukuärái.

<sup>39</sup>Jayawe mburuwicha reta yuweru peresoriru pe uyeapikatu reta waerä Pablo jare Silas ndiwe. Jayawe onoe reta peresoriru wi oka pe jare umiñera reta oë ye yuraa reta waerä tëta wasu wi.

<sup>40</sup>Erëitu Pablo jare Silas oë ye ma yuraa reta yawe peresoriru wi, uñatima ye reta Lidia jëta pe. Joko pe uyembati reta Cristo re wirowia wae reta ndiwe, jare umikirëi reta Tumpa koti. Joko wi ramo yuraa reta ye jokua tëta wasu wi.

## Hechos 17

### Pablo jare Silas umimbeu Jesús rewa tëta wasu Tesalónica pe

<sup>1</sup>Jayawe Pablo jare Silas uasa reta tēta wasu reta Anfípolis jare Apolonia jee wae rupi. Jare yuraa uwāe reta tēta wasu Tesalónica jee wae pe. Jare joko pe upita reta mbapi semana rupi. Jokua tēta wasu pe ime iko judío reta itupao.

<sup>2</sup>Jayawe jokua mbapi semana rupi ara mbutuu yawe, Pablo oo uike tupao pe kērái jae uyapoñoi wae rami opaete tēta wasu reta rupi. Jare jokua tupao pe Pablo uyemingeta judío reta ndiwe Cristo rewa kērái uyekuatía oĩ jesewa Tumpa iñeeriru pe.

<sup>3</sup>Jukuārái umiesäka chupe reta kērái Cristo uiporara ñotái jare umano ñotái iko mbaembae yayawi Tumpa koti wae re, jare kērái jae ikowe ye ou umanokue wae reta ipite wi. Jare Pablo jei chupe reta: “Kua Jesús che amimbeu aĩ pewe wae, jae ko Cristo yae chupe wae,” jei chupe reta.

<sup>4</sup>Jayawe amokue jokua judío reta wirowia Pablo jei wae re. Wirowia reta wi jeta kuimbae judío mbae wae reta uipiu Tumpa wi wae, jare jeta kuña ikokatu wae reta wi. Jayawe kua reta umbipi uñemiiru Pablo jare Silas ndiwe.

<sup>5</sup>Erēi amokue judío reta wirowia’ä jare uñamitāa umae Pablo jare Silas re, echa’ä jeta wae reta uñemiiru iko jae reta ndiwe. Jayawe jokua judío reta umatika amokue jeko pochi wae reta jare jemiapo mbae wae reta, jare ombopochika reta Pablo jare Silas koti. Jayawe jae reta umbipi uyapo tekorái tēta wasu pe. Jare opaete rewe yuraa pochi rewe kuimbae Jasón jee wae jēta pe ueka reta waerä tēi Pablo jare Silas. Echa’ä uipota tēi uipisi reta uyapo waerä chupe reta mbae ikawi mbae wae.

<sup>6</sup>Erēi uwāe’ä chupe reta joko pe. Jayawe uipisi wiraa reta Jasón jare amokue iru hermano reta tēta wasu imburuwicha reta jowai. Jare iñeeäta rewe jei reta: “Ime mokui kuimbae reta ombopochika ma jeta wae reta opaete kerupi yuraa wae rupi. Jare añawe yuweru uwāe reta kua pe.

<sup>7</sup>Jare kua Jasón umbiasa ma reta jae jēta pe. Jare opaete jae reta ombowaicho ñonoĩ yanemburuwicha wasu imbaepuere wae jei wae. Echa’ä jei reta ime ambie mburuwicha wasu imbaepuerete wae Jesús jee wae,” jei reta mburuwicha reta pe.

<sup>8</sup>Jokua uyandu reta yawe, tēta wasu pewa reta jare imburuwicha reta ndiwe tuicha uyembipia’ä.

<sup>9</sup>Jayawe mburuwicha reta ueyaka korepoti Jasón pe jare jokua iru hermano reta pe ipepika pe, jare umaño jese reta oo ye waerä.

<sup>10</sup>Jayawe jokua pītu etei hermano reta omondo Pablo jare Silas Tesalónica wi tēta wasu Berea jee wae koti.

### **Pablo jare Silas umimbeu Jesús rewa tēta wasu Berea pe**

Jare tēta wasu Berea pe ime iko wi judío reta itupao. Jayawe ara mbutuu pe Pablo jare Silas yuraa uike reta jokua tupao pe.

**11**Jokua tēta wasu pewa judío reta jeko kawiete tēta wasu Tesalónica pewa reta wi. Echa'ä jae reta jekuaeño ikirēi rewe uyapisaka reta Tumpa iñee re. Jare opa ara rupi umingetañoi reta Tumpa iñee uyekuatía oï wae uikuaa kawi reta waerä añetete ra ko Pablo oporomboe wae.

**12**Jáeramo jeta judío reta wirowia Pablo oporomboe iko wae re. Jae nunga wi jeta kuña judía mbae wae ikokatu wae reta, jare jeta kuimbae judío mbae wae reta wi wirowia reta Cristo re.

**13**Erēi jeräkua judío Tesalónica pewa reta pe kērái Pablo umimbeu oï Tumpa iñee tēta wasu Berea pe wae. Jáeramo amokue wae jae reta yuraa joko pe ombopochika waerä tēta wasu pewa reta Pablo jare Silas koti.

**14**Jayawe jupiwoiño Cristo re wirowia wae reta omondo Pablo tēta wasu wi mar jembei koti uepi waerä chuwi reta. Jare amokue hermano reta yuraa wi jae ndiwe. Erēi Silas jare Timoteo upitaño reta tēta wasu Berea pe.

**15**Jayawe Pablo jare jae ndiwe yuraa wae reta uwäe reta tēta wasu Atenas jee wae pe. Joko pe ueya reta Pablo jare uñatima ye reta Berea koti. Jare ndei yuraa ye reta mbowe, Pablo jei chupe reta: “Silas jare Timoteo ipuere reta yawe, tou woi reta cheraikue,” jei chupe reta.

### **Pablo umimbeu Jesús rewa tēta wasu Atenas pe**

**16**Jayawe Pablo uäro iko rambuewe Silas jare Timoteo, oo uwata tēta wasu Atenas rupi uikuaa waerä. Jare jae uecha jeta tumparaanga reta tēta wasu rupi ñonoï. Jáeramo ipiatiti upita.

**17**Jayawe Pablo oo uike pēti tupao pe uikuaaka chupe reta waerä Jesús ko jae Cristo jei chupe reta wae. Jukuärái Pablo umimbeu judío reta pe jare judío mbae uipiu Tumpa wi wae reta pe wi. Jare opa ara rupi jae oo wi tēta wasu iplaza pe umimbeu waerä Tumpa iñee joko pe ñonoï wae reta pe.

**18**Pēti ara amokue oporomboe wae reta umbipi uyeaka Pablo ndiwe. Jae reta ipite wi ime iko epikúreo jeko omomoe wae reta, jare ime iko wi estoiko jeko omomoe wae reta. Jare Pablo umimbeu chupe reta Cristo rewa, kērái jae ikowe ye ou umanokue wae reta ipite wi wae rewa. Jayawe amokue jokua oporomboe wae reta jei iyupe: “¿Mbae ra jei oï kua iyemingetase wae?” jei reta. Jare ñru wae reta jei iyupe: “Jae oporomboe chwaa oï ambie tumpa reta rewa,” jei reta.

**19**Jáeramo jae reta uparea Pablo pe oo waerä jae reta ndiwe ñaipe rai Areópago jee wae pe. Joko pe uyembatiñoi tēta wasu itenondewa reta. Jayawe yuraa ma uwäe reta yawe yembati pe, oporomboe wae reta jei Pablo pe: “Emiesäka orewe kua yemboe ipiau wae nemimbeu nei wae rewa,” jei reta.

**20**“Echa'ä ndeporomboe wae jaeramo etei nduyandu noï. Jare nduipota nduikuaa kawi jokua rewa,” jei reta Pablo pe.

<sup>21</sup>Jukuärái jei reta, echa'ä tēta wasu Atenas pewa reta jare ambie iwí pewa uyakao joko pe wae reta wi jekuaeño ikirēi uyemingeta jare uyapisaka reta ñee ipiau wae re.

### **Pablo uikuaaka chupe reta Tumpa jae reta uikuaa mbae wae re**

<sup>22</sup>Jayawe Pablo uyemboi tēta wasu pewa itenondewa reta jowai jare umbipi jei chupe reta kuärái: “Atenas pewa reta,” jei. “Añawe aikuaa añ jeta ko petumpa reta jare kērái ko pe reta pipiute pei chuwi reta wae,” jei.

<sup>23</sup>“Echa'ä awata aiko rambuewe tēta wasu rupi, aecha jeta ambie ye ye petumpa reta pe uñeño tee oï yembiadorarenda reta,” jei chupe reta. “Jare aecha wi pēti mbaerenda ambie ye wae. Echa'ä uyekuatía oï jese kuärái: ‘TUMPA YAIKUA MB AE WAE PEWARÄ.’ Jukuärái uyekuatía oï jese. Jáeramo jokua Tumpa pe reta pikuaa mbae wae rewe pipiu chuwi wae, añawe aipota amimbeu kawí pewe jesewa,” jei chupe reta.

<sup>24</sup>“Echa'ä jokua Tumpa ko jae imbaepuerete ye wae. Jae ko uyapo ara jare iwí jare opaete oï pipe wae,” jei. “Jae ko ara jare iwí iYa. Jáeramo ndarau iko tupao reta yande yayapo jae imaerä tēi wae pe,” jei.

<sup>25</sup>“Jare Tumpa ueka'ä etei yandewe mbae awe jae ipuere iko waerä. Echa'ä jae ko umee yandewe yanderekowerä, jare ñanepütuerä, jare opaete mbaembae yaiko waerä,” jei chupe reta.

<sup>26</sup>“Jare pēti kuimbae wiño Tumpa uyapo opaete ambie ye ye iwí pewa reta kiape kiape ñonoï wae rupi. Jare ndei uyekuaa reta mbowe, Tumpa jei ma kiape etei ra yurekota wae jare kērái yawe rewa ra yurekota reta joko pe,” jei.

<sup>27</sup>“Jukuärái Tumpa uyapo, echa'ä jae uipota iwí pewa reta uikuaa waerä kiawe ko ipuere'ä iko Tumpa mbae. Echa'ä jokua uikuaa reta yawe, aramoi uekata reta Tumpa. Jare ueka reta yawe, aramoi uwäeta reta chupe,” jei chupe reta. “Añetete Tumpa mbiri'ä oï tēi pēti pēti wae wi.

<sup>28</sup>Echa'ä Tumpa imbaepuere rupi ime ñanoi tekowe. Jare opa ara rupi jae ko umee yandewe tekowe yaiko waerä. Jare jukuärái wi amokue perētáíwa reta uikuatía kuärái: ‘Opaete yande ko jae Tumpa tai reta.’ Jukuärái uikuatía reta,” jei chupe reta.

<sup>29</sup>“Añetete yawe yande ko jae Tumpa tai reta, jáeramo ndarau ikawí yarowia waerä Tumpa ko jae mbae oro pewa, jare korepoti jiero pewa, jare ita pewa. Mase, kuimbae reta iyarakuaa rupiño ko uyapo reta jokua nunga ipo pe,” jei.

<sup>30</sup>“Ima ma Tumpa ipiawasu iko chupe reta, echa'ä jae reta uikuaa'ä yureko kērái ko Tumpa wae. Erēi añawe jae jei oï opaete wae pe yaeya waerä yandepiyemingeta jupi mbae wae Tumpa rewa.

<sup>31</sup>Jukuärái jei Tumpa, echa'ä jae uiparawo ma pēti ara outa oï wae opaete iwí pewa reta yayemboi waerä jae jowai. Jare jae uiparawo ma pēti kuimbae jei waerä yandereko re jupi rupi. Jare Tumpa uikuaaka ma yandewe añetete ko jae uiparawo

jokua kuimbae, echa'ä umbijekowe ye ma ueru umanokue wae reta ipite wi.” Jukuärái jei Pablo chupe reta.

<sup>32</sup>Jayawe uyembati wae reta uyandu yawe kía ikowe ye ou wae rewa, amokue wae reta oyoyai. Erëi ñru wae reta jei Pablo pe: “Ore nduipota nduyapisaka ye nderé kuri ñru ara rupi kua rewa,” jei reta chupe.

<sup>33-34</sup>Erëi amokue wirowia reta Tumpa ñnee re, jare uñemiñru reta Pablo ndiwe. Kua reta ipite pe yureko pëti tëta wasu pewa itenondewa Dionisio jee wae, jare pëti kuña Dámaris jee wae, jare ñru wae reta wi.

## Hechos 18

### Pablo umimbeu Jesús rewa tëta wasu Corinto pe

<sup>1</sup>Joko wi Pablo oë oo Atenas wi tëta wasu Corinto jee wae koti.

<sup>2</sup>Jare joko pe uikuaa pëti kuimbae judío Aquila jee wae. Kua Aquila ko jae iwi Ponto jee wae pewa. Aquila jare jembireko Priscila jee wae jaeramo yepe uyakao reta tëta wasu Corinto pe. Tenonde yawe, jae reta yurekose iwi Italia pe tëta wasu Roma jee wae pe. Erëi romano reta imburuwicha wasu Claudio jee wae omoë opaete judío reta tëta wasu Roma wi. Jayawe Pablo oo Aquila jëta pe opou waerä ipi.

<sup>3</sup>Pablo uikuaa uyapo Aquila iparawiki – jae ko tëta wakapi pewa iyapoa. Jáeramo Pablo upita jae reta ndiwe uparawiki reta waerä päwe.

<sup>4</sup>Jare mbutuu ara reta rupi Pablo oo tupao pe uikuaaka waerä ñru judío reta pe jare judío mbae wae reta pe wi Jesucristo rewa, ipuere waerä jae reta wi wirowia jese.

<sup>5</sup>Jokua ara reta rupi Silas jare Timoteo yuweru uwäe iwi Macedonia wi. Jayawe Pablo ueya iparawiki tëta wakapi pewa uyapo wae. Jare uñeñono tee umimbeu waerä Tumpa ñnee jare wirowiaka waerä judío reta pe kërái Jesús ko jae Cristo jei chupe reta wae.

<sup>6</sup>Erëi jokua judío reta jekuaeño oyowaicho Pablo ndiwe, jare umbipi jei reta ikawi mbae wae chupe. Jáeramo Pablo umitimo jemimonde iwikuí usururu waerä chuwi, jare jei chupe reta: “Tumpa uiporaraka pewe yawe, pe reta ko teko penoi. Che mbaeti anoi teko. Añawe wiwe ata amimbeu judío mbae wae reta pe Cristo rewa,” jei chupe reta.

<sup>7</sup>Jayawe Pablo oë oo tupao wi jare oo pëti kuimbae Justo jee wae jëta pe. Kua kuimbae judío mbae wae ko jare uipiu Tumpa wi. Jae jëta oï jokua tupao iyipi pe.

<sup>8</sup>Jokua tupao itenondewa Crispo jee wae wirowia yandeYa Jesucristo re jare uyembisakambuka i pe. Jukuärái uyapo reta wi opaete jëtara reta, jare jeta ñru Corinto pewa reta wi.

<sup>9</sup>Pëti pïtu yandeYa umbipau wae echa Pablo, jare jei chupe kuärái: “Awiye ekiye jare awiye wi nekii,” jei. “Jekuaeño chemieräkua.

<sup>10</sup>Echa'ä che äi nde ndiwe jare ndarau kiawe ipuere marái ndapo," jei. "Jekuaeño chemieräkua, echa'ä imeño jeta wae reta wirowiata ñonoï cheré kua tēta wasu pe." Jukuärái yandeYa jei chupe.

<sup>11</sup>Jáeramo Pablo upita pēti año jare owa yasi pewa Corinto pe, jare jekuaeño omboe tēta wasu pewa reta Tumpa iñee re.

### **Judío reta tēta wasu Corinto pewa uipisi Pablo**

<sup>12</sup>Joko wi judío reta oyowaicho pēti rami Pablo koti, jare uipisi wiraa reta mburuwicha Galión jee wae jowai. Galión ko jae tēta wasu Corinto pewa reta jare opaete iwi Acaya pewa reta imburuwicha.

<sup>13</sup>Jayawe judío reta umbipi umbijeko reta Pablo kuärái: "OreTumpa arakae yawe uikuaaka orewe kērái etei numbutuicha waerä jae jee. Erēi kua kuimbae umbitawi oï jeta wae reta, echa'ä omboe oï ambie ye," jei reta.

<sup>14</sup>Jare Pablo omoēta ma iko yawe iñee, aramoiño Galión jei jokua judío reta pe: "Pe judío reta piko wae, kua kuimbae moná uyapo yawe mbae ikawi mbae wae ani mbae kachiete wae pekoti, jayawe ikawi ko ayapisaka waerä tēi peré," jei.

<sup>15</sup>"Erēi pe reta piyeaka yepe peï ñee reta re, jare tee reta re, jare pereko reta reño. Jáeramo ndarau ayapisaka peré jokua re. Piyapikatu pe yepái. Che aipota'ä ayemiinge jokua mbaembae pe," jei mburuwicha chupe reta.

<sup>16</sup>Jayawe omondoka ye reta iyuwi.

<sup>17</sup>Jare aramoiño judío mbae wae reta oka pe uyembati wae uipisi reta pēti judío Sóstenes jee wae – jae ko judío reta itupao itenondewa. Jare umbipi uinupa reta. Jare Galión uecha, erēi mbae'ä etei chupe.

### **Pablo uñatima ye tēta wasu Antioquía pe**

<sup>18</sup>Joko wi jeta ara ma uasa yawe, Pablo oo ye Corinto wi. Jare Priscila jare Aquila ndiwe yuraa reta tēta wasu Cencrea jee wae koti mar jembei pe oï wae. Joko pe yureko rambuwe, Pablo opa uñeñapika uikuaaka waerä opa ma uyapo jae jei Tumpa pe uyapota iko wae. Jokua ko jae judío reta jeko. Jayawe Pablo, Aquila jare Priscila ndiwe uyupi reta chalana wasu pe jare opa yuraa ye reta iwi Siria koti.

<sup>19</sup>Joko wi yuraa uwäe reta tēta wasu Éfeso jee wae pe kiae Pablo ueya Priscila jare Aquila. Jare mbutuu ara pe Pablo oo pēti tupao pe umimbeu waerä judío reta pe Jesús rewa.

<sup>20</sup>Jare judío reta umiñera tēi Pablo upita waerä jae reta ndiwe ima katu rupi, erēi Pablo uipota'ä upita joko pe.

<sup>21</sup>Jare jae oo yeta ma iko chuwi reta yawe, Pablo jei chupe reta: "Añawe a ye äi tēta wasu Jerusalén koti," jei. "Erēi Tumpa uipota yawe, tayu ye tapou pepi kuri," jei chupe reta. Jayawe ramo Pablo uyupi chalana wasu pe jare oo ye Éfeso wi.

<sup>22</sup>Jayawe Pablo oo uwäe tēta wasu Cesarea jee wae pe. Joko wi oo yuapi ye tēta wasu Jerusalén koti opou waerä Cristo re wirowia wae reta joko pe yureko wae ipi. Joko wi oo ye tēta wasu Antioquía koti.

<sup>23</sup>Jare joko pe upita ima katu rupi. Joko wi Pablo oē ye oo Antioquía wi jare uñatima ye oo iwi Galacia jare Frigia rupi. Jare opou ye opaete Cristo re wirowia wae reta jokoropi yureko wae ipi umimirāta reta waerä Tumpa re.

### **Apolos ou uwäe tēta wasu Éfeso pe**

<sup>24</sup>Jokua rambuewe, ou uwäe tēta wasu Éfeso pe pēti kuimbae Apolos jee wae. Apolos ko jae judío tēta wasu Alejandría jee wae pewa. Kua kuimbae ikatuete uyemingeta waerä, jare uikuaa kawi Tumpa iñee uyekuatía oī wae rewa.

<sup>25</sup>Jae uyemboe ma ko kērāi yambiyerowia waerä yandeYa, jare umimbeu ikirēi rewe jare oporomboe kawi jokua jae uikuaa wae. Erēi imeño uata iko chupe, echa'ä jaeño uikuaa Juan upurumbisakambuse wae oporomboe wae re.

<sup>26</sup>Jayawe Apolos ukiye mbae rewe umbipi umimbeu Tumpa iñee tupao pe. Jare Priscila jare Aquila uyandu yawe jae oporomboe iko wae re, uipota reta ombori kua kuimbae. Jáeramo wiraa reta jae reta jēta pe jare uikuaaka kawi chupe opaete Jesús rewa.

<sup>27</sup>Joko wi Apolos uipota oo iwi Acaya pe. Jare hermano reta Éfeso pewa uyerowia jokua re jare uipota reta ombori. Jáeramo uikuatía reta tupapire Cristo re wirowia wae reta iwi Acaya pewa pe, jare ueka chupe reta umbiasa kawi waerä Apolos. Tumpa ipiakawi rupi jokua hermano reta Acaya pewa wirowia ma Cristo re. Jare Apolos oo uwäe yawe joko pe, jae ombori kawi reta.

<sup>28</sup>Echa'ä ime yepe joko pe judío reta Jesús re wirowia'ä wae, jare Apolos uyeaka jae reta ndiwe. Opaete wae jowake jae uikuaaka kawi Tumpa iñeeriru rupi kērāi Jesús ko jae Cristo jei chupe reta wae, jare jukuärāi umikīi judío reta.

## **Hechos 19**

### **Pablo uñatima ye tēta wasu Éfeso pe**

<sup>1</sup>Apolos tēta wasu Corinto pe iko rambuewe, Pablo oo iwi Asia rupi uwäe ye rewa tēta wasu Éfeso pe. Jare oo uwäe ramo yawe joko pe, Pablo uñeñowāiti amokue wae yandeYa re wirowia wae reta ndiwe.

<sup>2</sup>Jare Pablo upirandu chupe reta: “¿Ou pa pepia pe Espiritu Santo perowia yawe yandeYa re?” jei. “Mbaeti,” jei reta. “Ore nduikuaa'ä etei ime iko Espiritu Santo wae,” jei reta chupe.

<sup>3</sup>Jayawe Pablo upirandu ye chupe reta: “¿Mbae nunga yemboe re pa piyembisakambuka?” jei. Jare jae reta jei chupe: “Juan oporomboe wae re nduyembisakambuka.”



<sup>4</sup>Jayawe Pablo jei chupe reta: “Juan omboe opaete wae reta uyembisakambuka waerä i pe jae reta uechaka waerä ueya ma ko ipiayemingeta jupi mbae wae Tumpa rewa. Jare jae jei wi chupe reta wirowia waerä outa iko jaikue rupi wae re. Jae ko Jesús. Jae ko Cristo yae chupe wae,” jei chupe reta.

<sup>5</sup>Jare kua uyandu reta yawe, uyembisakambuka reta i pe yandeYa Jesús jee re.

<sup>6</sup>Joko wi Pablo oñono ipo jese reta jare ou jese reta Espíritu Santo. Jare umbipi uyemingeta reta ambie ye ye wae ñee pe kërái Espíritu Santo umbiyemingetaka wae rupi. Jukuärái umimbeu reta ñee Tumpa wi etei ou wae.

<sup>7</sup>Kua kuimbae reta uyepapa doce rupi.

<sup>8</sup>Jare joko wi mbapi yasi rupi Pablo jekuaeño oo uike judío reta itupao pe mbutuu ara reta rupi. Jare ukiye mbae rewe uikuaaka chupe reta kërái Tumpa umee Jesús iko waerä opaete wae imburuwicha wasurä jaeño mái pewa jare kërái yayekou waerä jokua re.

<sup>9</sup>Jukuärái jae oporomboe kërái ñanoi waerä tekowe opa mbae wae. Erëi jese amokue judío reta ipiatäta ñeño reta jare uipota’ä wirowia reta Pablo oporomboe wae re. Jare jekuaeño uyemingeta kawí’ä reta opaete wae reta jowake Pablo oporomboe iko wae koti. Jayawe Pablo ueya jokua tupao, jare Cristo re wirowia wae reta yuraa wi Pablo ndiwe. Jare joko wiwe jae reta yuraa uyembati pëti yembatirenda pe kuimbae Tiranno jee wae jëta pe oï wae. Jare opa ara rupi Pablo uyembati joko pe yuweru wae reta ndiwe uyemingeta waerä yandeYa rewa.

<sup>10</sup>Jayawe Pablo oporomboe joko pe mokui año rupi. Jukuärái jeta judío reta jare judío mbae wae reta wi iwi Asia pewa reta uyandu yandeYa Jesús ñee.

<sup>11</sup>Jare Tumpa umee Pablo pe mbaepuere uyapo waerä mbaembae kiawe ipuere’ä uyapo wae.

<sup>12</sup>Jukuärái Pablo iasoya omonde wae jare ipañera yepe kía wiraa oñono yawe imbaerasi wae re, imbaerasi wae ukuera woi. Jare oñono yawe aña uyembiiya jese wae re, aña usiri woi chuwi.

<sup>13-14</sup>Jokua ara reta rupi uasa yureko amokue judío reta tëta wasu reta rupi omoë reta waerä ipotawe wi aña uyembiiya jese wae. Jare jukuärái uyapo yureko wi kuimbae Esceva jee wae tai chiu wae reta. Esceva ko jae pëti judío reta isacerdote tenondewa. Pëti ara tëta wasu Éfeso pe yureko yawe, Esceva tai reta uipota tëi omoë aña pëti kuimbae wi Jesús jee re. Echa’ä jei reta aña pe: “¡Jokua Jesús Pablo umimbeu oï wae jee re ndoe ndewe eë chuwi!” jei chupe.

<sup>15</sup>Jayawe aña jei chupe reta: “Che aikuaa ai Jesús, jare aikuaa ai wi kía ko jae Pablo wae. Erëi ¿kía reta ra ko pe?” jei chupe reta.

<sup>16</sup>Jare jokua kuimbae aña uyembiiya jese wae jawoi pewa pochi rewe uepeña reta, jare opa jae reta uñemiamirika. Jayawe jae reta opa oë osi jokua tëta wi nani etei jare opa iperepere reta.

<sup>17</sup>Jayawe jokua jeräkua judío reta pe jare judío mbae wae reta pe wi tēta wasu Éfeso pe. Jáeramo opaete rewe uipüete yandeYa Jesús wi, jare umbipi umbutuicha reta jae jee.

<sup>18</sup>Jare jeta jaeramo Cristo re wirowia wae reta uñemimichi rewe uyembeu reta iru wae reta jowake kërái Tumpa koti uyawi reta wae.

<sup>19</sup>Jare jeta ipaye wae reta wirowia wi Cristo re jare ueya reta ipaye wae. Jáeramo jae reta ueru itupapire reta ipaye pewa jare opa uapi reta opaete wae jowake. Jare jokua tupapire reta uapi reta wae jepiete ko. Echa'ä uyepapa yawe, uepiti

<sup>50.000</sup> riare korepoti pewa.

<sup>20</sup>Jukuärái Tumpa uechaka jeta wae reta pe imbaepuere tuicha wae. Jáeramo jeräkua opaete rupi yandeYa ñee, jare jeta wae reta wirowia jese.

<sup>21</sup>Kua jaikue rupi Pablo upita oo waerä iwi Macedonia jare iwi Acaya rupi Jerusalén pe. Jare jae jei iyupe: “Joko wi a ñotái ko tēta wasu Roma pe,” jei.

<sup>22</sup>Jayawe Pablo omondo iwi Macedonia koti mokui imboria reta Timoteo jare Erasto jee wae. Erēi jae upita mbowi ara pewa ye iwi Asia pe.

### **Tekorái uyembipi Pablo koti Éfeso pe**

<sup>23</sup>Jokua ara reta rupi tēta wasu Éfeso pe umbipi yembiawái tuicha wae yemboe yandeYa rewa wae koti.

<sup>24</sup>Echa'ä joko pe iko pēti kuimbae Demetrio jee wae. Jae iparawiki ko umindikui korepoti tii wae jare uyapo mbaembae pipe owaka waerä. Jokua año reta rupi jeta Éfeso pewa reta umbiadora itumparaanga Diana jee wae re. Jare Diana itupao iko Éfeso pe. Jáeramo Demetrio umingana kawiete uyapo owaka Diana itupaoraanga michi wae reta. Jare Demetrio umbiepi kawi wi imboria reta pe.

<sup>25</sup>Pēti ara Demetrio uyembati opaete jokua nunga mbarawiki uyapo wae reta ndiwe jare jei chupe reta: “Kuimbae reta, pe reta pikuaa pei yamingana kawiete ñai kua mbarawiki yayapo wae rupi,” jei.

<sup>26</sup>“Mase, pe reta pecha jare piyandu ma kërái jokua kuimbae Pablo jee wae umbipiambiaka oï jeta wae reta. Jae wirowiaka ma jeta wae reta pe kua Éfeso pe jare opaete iwi Asia rupi kërái tumparaanga reta kuimbae reta uyapo ipo pe wae tumpa reta'ä ko,” jei.

<sup>27</sup>“Jáeramo tēta wasu pewa reta aramoi wirirotu kua yandeparawiki. Jare jeieteta aramoi wirirotu reta wi yandetumpa kuña jupiete wae Diana itupao,” jei. “Yepe tēi Diana jeräkuaete kua iwi Asia rupi jare opaete iwi rupi wi, erēi aramoi ndarau ye ma umbiadora reta jese,” jei chupe reta.

<sup>28</sup>Jayawe jokua Demetrio jei wae uyandu reta yawe, pochiete reta jare ñeeäta rewe jei pii reta: “¡Tuyembutuichaka yandetumpa Diana jee!” jei reta.

<sup>29</sup>Jayawe tekoraí uñemiái opaete tēta wasu rupi. Jare jeta wae reta osi yuraa uyembati waerā tēta wasu pewa reta iyuwangarenda wasu pe. Jare amokue wae reta uipisi wiraa Gayo jare Aristarco. Jae reta ko jae Pablo iwatairu reta iwi Macedonia pewa.

<sup>30</sup>Jayawe Pablo oo tēi iko wi tēta wasu pewa reta uyembati ñonoí wae pe uyemingeta waerā jae reta ndiwe. Erēi amokue hermano reta oyopia Pablo, jukuarái rupi uepi reta jokua pochi wae reta wi.

<sup>31</sup>Jae nunga wi amokue mburuwicha reta iwi Asia pewa Pablo ndiwe uyepokuaa reta wae omondo umimbeuka Pablo pe awiye oo waerā yuwangarenda wasu koti.

<sup>32</sup>Jare yuwangarenda wasu rupi jeta tekoraí pe uyeminge wae reta opa uyembopa reta. Amokue wae reta iñeeäta mbaembae re, jare iru wae reta iñeeäta ambie re. Añetete opaete seri uikuaa'ä yureko maera ra uyembati yureko wae.

<sup>33</sup>Amokue judío reta umiaña jenonde kuimbae Alejandro jee wae, jare umiñera reta jae uikuaaka waerā yembati pe ñonoí wae reta pe mbae uasa oí wae rewa. Jayawe Alejandro ipo pipe uipota tēi umikii reta, echa'ä uipota tēi imiári tēta wasu pewa reta pe awiye waerā jae reta umbijeko judío reta jokua yembiawái re.

<sup>34</sup>Erēi yembati pe ñonoí wae reta uikuaa yawe jae ko judío wae, opaete pēti rami iñeeäta rewe jei pii reta: “¡Tuyembutuichaka yandetumpa Diana jee!” Jukuarái uyapo reta mokui ora seri rupi.

<sup>35</sup>Joko wi pēti mburuwicha tēta wasu pewa umikii wite reta, jare jei chupe reta: “Kuimbae Éfeso pewa reta, opaete iwi pewa reta uikuaa kawi ko ñanerēta wasu Éfeso pe yaiko wae reta ko jae Diana itupao iyandarekoa reta. Jare uikuaa reta wi kēraí yande yayandareko ñaí ita Diana echa oa ara wi wae re,” jei.

<sup>36</sup>“Jayawe ipuere'ä kía kua uikuaku ramo, ikawi ko pekii waerā awiye waerā mbae piyapo wirae ndei pepia pe piyemingeta kawi mbowe,” jei.

<sup>37</sup>“Mase, peru ma kua kuimbae reta kua pe. Erēi jae reta uyapo'ä mbae ikawi mbae wae yandetupao koti, jare jei'ä wi mbae ikawi mbae wae yandetumpa koti,” jei.

<sup>38</sup>“Demetrio jare imboria reta uipota uñeapo kía re yawe, ime mburuwicha reta ñonoí uyapisaka waerā jese reta,” jei.

<sup>39</sup>“Erēi jekuaeño ime yawe mbae re pipota piyemingeta waerā, piyapo iruwe yembati tēta wasu pewa pe,” jei.

<sup>40</sup>“Mase, añawe mburuwicha reta Roma pewa aramoi yanembijekota kua yayapo ñaí wae re. Jae reta upirandu yandewe yawe kua tekoraí rewa, ¿mbae ra yaeta chupe reta? Ndarau yaikuaa,” jei mburuwicha chupe reta.

<sup>41</sup>Jare mburuwicha opa uyemingeta yawe, umbiyapi yembati jare opaete wae yuraa ye reta.

## Hechos 20

## Pablo uñatima ye oo iwi Macedonia jare Grecia koti

- <sup>1</sup>Jokua tekoraí opa ma uasa yawe, Pablo umbatika Cristo re wírowia wae reta umikirēi reta waerä. Joko wi Pablo uikuäwa pēti pēti wae oo ye iko chuwi reta ramo. Jare oē oo ye Éfeso wi iwi Macedonia koti.
- <sup>2</sup>Jare uasa rambuewe jokua iwi rupi, Pablo jekuaeño umikirēi kawi opaete hermano reta jokoropi ñonoï wae. Jayawe oo uwäe iwi Grecia jee wae pe.
- <sup>3</sup>Jare mbapi yasi rupi Pablo upita joko pe. Jare joko wi, oota ma iko yawe mar rupi iwi Siria jee wae koti, jeräkua chupe amokue judío reta uyemboemboe ñonoï jese uyuka waerä tēi. Jáeramo Pablo upita oo ye waerä iwi Macedonia rupi awiye oa waerä jae reta ipo pe.
- <sup>4</sup>Jare yuraa yureko Pablo ndiwe wi amokue hermano reta. Jae reta ko jee: Sópater tēta wasu Berea pewa, Aristarco jare Segundo tēta wasu Tesalónica pewa, Gayo tēta wasu Derbe pewa, jare Timoteo, Tíquico, jare Trófimo iwi Asia pewa.
- <sup>5</sup>Kua kuimbae reta Pablo omondo orerenonde tēta wasu Troas jee wae pe. Jare joko pe jae reta oreraäro.
- <sup>6</sup>Erēi ore ndupita tēta wasu Filipos pe numbiäsa waerä joko pe ara reta yemimandúa mbiyape levadura mbae pewa jei chupe reta wae. Jare jokua uasa ma yawe, ore noē ndoo ye chalana wasu pe tēta wasu wi. Jare pandepo ara pe ndoo nuwäe tēta wasu Troas pe. Joko pe nuñeñowäiti iru reta ndiwe, jare ndupita joko pe chiu ara rupi.

## Pablo umbijekowe ye pēti kunumi

- <sup>7</sup>Jayawe domingo ara pe ore nduyembati Cristo re wírowia wae reta ndiwe nduyemimandúa waerä yandeYa imano re. Jayawe Pablo umbipi oporomboe Tumpa iñee re. Jare jeta mbaembae re jae oporomboe piare mbite rewa. Jae uipota'ä etei opa waerä chuwi oporomboe iko wae, echa'ä piarewe pe ndoo yeta nduiko ramo.
- <sup>8</sup>Jokua tēta ore nduyembati nduiko pipe wae mokui piso pewa ko, jare nduyembati nduiko piso iwate iko wae pe. Jare jokua o pe umiendi reta jeta mechero umbiembipe waerä.
- <sup>9</sup>Jare ime iko pēti kunumi Eutico jee wae uwapi iko iwate ventana pe. Jare Pablo jekuaeño oporomboe iko rambuewe, kunumi umiamiri topei jare oke. Jare aramoiño kunumi oa ventana wi oka koti iwi pe. Jayawe opaete ore ndosi nduweyi ndoo ndueupi waerä tēi. Erēi nduecha umano ma, echa'ä mokui piso wi oa ramo.
- <sup>10</sup>Jayawe Pablo uweyi oo kunumi uyepiso oï wae pe jare uikuäwa. “Awiye pepiatiti,” jei orewe. “Jae ikowe ye ma,” jei.
- <sup>11-12</sup>Jare Pablo umupüa kunumi jekowe rewe, jare amokue wae reta wíraa ye jēta pe. Jáeramo opaete ore nduyerowiaete ndupita jokua re. Joko wi orepiakatu rewe nduyupi ye ndoo tēta iwate pe jare nduyembati yewi. Jare ndou mbiyape jare copa

wi nduyemimandúa waerä yandeYa imano re. Jokua pïtu Pablo iköe oporomböe. Piarewe pe Pablo jare ore jae ndiwe nduiko wae noë ndoo ye jokua hermano reta Troas pewa wi.

**13**Jare ore rani ndoo nduasa mar rupi tëta wasu Asón jee wae pe. Nduipota nuñeñowäiti waerä Pablo ndiwe joko pe jae jei rami. Echa'ä jae uipota oo iwi rupi.

**14**Jare nuñeñowäiti yawe jae ndiwe Asón pe, Pablo uyupi chalana wasu pe jare ndoo päwe tëta wasu Mitilene pe.

**15**Jare joko wi ndoo ye mar rupi. Jare piarewe pe ndoo nduasa iwi i mbite pe oï wae Kío jee wae jowai. Piarewe pe ndoo nuwäe iwi i mbite pe oï wae Samos jee wae pe. Jayawe ndupita tëta wasu rai Trogilio jee wae pe. Jare piarewe pe ndoo nuwäe tëta wasu Mileto pe.

**16**Pablo ikirëi uasa wirae Éfeso wi awiye waerä upita ima iwi Asia pe. Echa'ä jae uipota oo uwäe tëta wasu Jerusalén pe Pentecostés ara pe ipuere yawe.

### **Pablo uyembati hermano reta Éfeso pewa itenondewa reta ndiwe**

**17**Jayawe ndoo nuwäe yawe tëta wasu Mileto pe, Pablo omondo uenika Éfeso pewa Cristo re wirowia wae itenondewa reta yuweru waerä orepi Mileto pe.

**18**Jare jae reta yuweru uwäe yawe, Pablo jei chupe reta: “Pe reta pikuaa peï kërái ko chereko wae jokua ara che a awäe kua peiwi Asia pe wiwe a ye pewi rewa,” jei.

**19**“Yepe tëi judío reta ikueri'ä chembiawái, erëi jeseuwe jekuaeño ayeyokui yandeYa pe pepite rupi añemimichi rewe jare cheresai rewe,” jei.

**20**“Jare che chekueri'ä etei amimbeu pewe mbae ikawita oï pewe wae. Jare amimbeuñoi pewe akiye mbae rewe yandeYa ñee yembati reta rupi jare perëtarëta rupi wi,” jei.

**21**“Jare jekuaeño amimbeu opaete wae pe – judío reta pe jare judío mbae wae reta pe wi – ueya reta waerä ipiayemingeta jupi mbae wae Tumpa rewa jare wirowia reta waerä yandeYa Jesucristo re,” jei chupe reta.

**22**“Jare añawe Espíritu Santo jei oï chewe a waerä Jerusalén koti. Erëi aikuaa'ä mbae ra ko joko pe uyeyapota oï chewe wae,” jei.

**23**“Jaeño aikuaa joko pe cherowaicho reta chepisita jare cheñonokata reta peresoriru pe, jare aiporarata ai. Kua aikuaa ai, echa'ä tëta tëta wasu rupi asa yawe, Espíritu Santo uikuaaka oï chewe jokua re,” jei chupe reta.

**24**“Erëi jeseuwe akiye'ä,” jei. “Chepia pe ayemingeta'ä etei ayerepi waerä. Jaeño aipota opa ayapo waerä ayerowia rewe jokua mbarawiki yandeYa Jesús umee chewe wae. Jare cheparawiki ko jae jekuaeño amimbeu waerä iru wae reta pe ñee ikawi wae kërái ko Tumpa ipiakawiete ye oï yandewe wae re,” jei chupe reta.

25“Jare añawe a ye aï pewi, jare pe reta ndarau ye ma cherecha peï,” jei. “Erëi amimbeu kawi ma pewe kërái Tumpa umee Jesús iko waerä opaete wae imburuwicha wasurä jaeño mái pewa,” jei chupe reta.

26-27“Añetete aipiu’ä etei ko amimbeu waerä pewe opaete Tumpa uipota pikuaa waerä wae. Jáeramo ime yawe kía nunga pepite wi umano Cristo re wirowia mbae rewe, chereko pewa’ä ma ko,” jei chupe reta.

28Jare jei wi chupe reta: “Jayawe, pe reta Cristo re wirowia wae itenondewa reta, piyandareko kawi piyé,” jei. “Jare piyandareko kawi wi opaete hermano reta Tumpa umee pewe wae re. Pikuaa peï kërái pëti owecha iyandarekoa uyandareko kawi iowecha reta re. Jukuärái wi piyandareko kawi hermano reta re jare pemboe kawi reta. Echa’ä yandeYa uepi reta jae juwi pipe etei, jare jukuärái jae reta yandeYa imbae ko. Jekuaeño pemandúa Espíritu Santo ko peparawo pe reta piko waerä jae reta itenondewarä,” jei Pablo chupe reta.

29“Aikuaa aï che a ye ma pewi yawe, yuweruta pepite rupi Tumpa ñee umimbeuraanga wae reta. Jae reta uipotata pererükumewa Tumpa kotí kërái yawapïta uipota ou uyuka jou owecha reta wae rami,” jei.

30“Amokue reta pepite wi etei umbipïta oporomboe oï apu rewe umbitawi waerä hermano reta. Echa’ä jae reta uipotata hermano reta uyerowa waerä yandeYa wi jae reta oporomboe kachi wae kotí,” jei chupe reta.

31“Jáeramo pemaie kawi peyupe,” jei. “Jekuaeño pemandúa jokua mbapi año rupi pe ndiwe aiko wae re. Pemandúa kërái ara rupi jare pïtu rupi cheresai rewe jekuaeño pumbiarakuaa aiko wae re,” jei chupe reta.

32“Añawe poñono aï Tumpa ipo pe. Jae tuyandareko kawi mii peré,” jei. “Pemanduañoi wi jokua ñee Tumpa ipiakawiete yandewe wae re. Echa’ä jokua ñee rupi Tumpa ñanemimiräta ikotí, jare umee yandewe yanderendarä opaete Tumpa oñono tee jae imaerä wae reta ndiwe,” jei Pablo chupe reta.

33“Che pëti wese awe amae’ä aipotaete rewe pekorepoti re, jare peoro re, jare peremimonde re,” jei.

34“Jare pe reta etei pikuaa peï kërái ko che aparawiki anoi waerä mbaembae chemaerä. Jare aparawiki wi ambori waerä cheïru reta,” jei.

35“Opaete mbae ayapo wae rupi aechaka ma pewe kërái ikawi ko yaparawiki yambori waerä ipuere mbae etei uparawiki iyupe wae reta,” jei. “Yanemandúa yandeYa Jesús etei jei wae re, echa’ä jae jei: ‘Ime yawe kía umee yandewe mbaembae uata oï yandewe wae, jokua re yayerowia ñai. Erëi yayerowiaeteta ñai ñamee yawe kía pe mbaembae uata oï chupe wae,’ jei Jesús.” Jukuärái Pablo jei chupe reta.

36Jare opa uyemingeta yawe, Pablo uñeño itawa re opaete ñru wae reta ndiwe jare uyerure päwe reta Tumpa pe.

<sup>37</sup>Jayawe opaete joko pe ñonoï wae reta uyao, jare pëti pëti wae uikuäwa Pablo jare jowa pe uyurupite reta, oo yeta iko chuwi reta ramo.

<sup>38</sup>Tuicha rupi ipiatiti reta, echa'ä Pablo jei ma chupe reta ndarau ye ma uecha reta ramo. Jayawe jae reta yuraa Pablo ndiwe chalana wasu oï wae pe rewa.

## Hechos 21

### Pablo oo ye Jerusalén koti

<sup>1</sup>Joko wi Pablo jare ore noë ndoo ye hermano reta wi, jare nduyupi chalana wasu pe, jare ndoo iwi i mbite pe oï wae Cos jee wae koti. Jare piarewe pe ndoo ambie iwi i mbite pe oï wae Rodas jee wae koti, jare joko wi tëta wasu Pátara jee wae koti.

<sup>2</sup>Pátara pe nuwäe chalana wasu oota oï iwi Fenicia koti wae. Jayawe ore nduyupi chalana wasu pe jare noë ndoo.

<sup>3</sup>Jare iwi i mbite pe oï wae Chipre jee wae nduecha oreaso koti; jayawe nduasa chuwi. Jare jekuae ndoo iwi Siria koti. Jayawe ndoo nuwäe tëta wasu Tiro jee wae pe, echa'ä joko pe chalana wasu ueyata iko jewita reta.

<sup>4</sup>Tiro pe ore ndueka Cristo re wirowia wae reta joko pewa. Jare nuwäe chupe reta yawe, ndupita jae reta ndiwe chiu ara rupi. Jare joko pe nduiko rambuewe, amokue jae reta Espiritu Santo rupi jei tëi Pablo pe awiye waerä oo Jerusalén pe.

<sup>5</sup>Erëitu jokua ara reta uasa ma yawe, ore noë ndoo joko wi. Jare opaete jokua hermano reta jare jembireko reta jare isambiai reta ndiwe oremiiru tëta wasu oka pe nuwäe rewa. Jare joko pe opa rewe ore nuñeñono oretawa re mar jembei pe jare nduyerure päwe Tumpa pe.

<sup>6</sup>Jayawe nuñekuäwa yawe jae reta ndiwe, ore nduyupi ye chalana wasu pe. Jare jae reta yuraa ye jëta jëtái rupi.

### Pablo tëta wasu Cesarea pe

<sup>7</sup>Jayawe Tiro wi ore ndoo nuwäe tëta wasu Tolemaida jee wae pe. Jare joko pe numbisaluda hermano reta jare ndupita jae reta ndiwe pëti ara rupi.

<sup>8</sup>Piarewe pe ore noë ndoo chuwi reta jare ndoo nuwäe tëta wasu Cesarea pe. Joko pe ore ndupita Felipe jëta pe. Felipe ko jae Cristo rewa ndei uikuaa wae reta pe umimbeu wae. Jare jae ko jokua chiu kuimbae wi pëti wae. <sup>9</sup>Jae ime onoi irundi tayi ndei umenda wae reta. Jae reta ko jae ñee Tumpa wi etei ou wae umimbeu wae reta.

<sup>10</sup>Jayawe mbowi ara ma joko pe ndupita yawe, ou opou orepi iwi Judea wi pëti kuimbae Agabo jee wae. Jae ko wi pëti ñee Tumpa wi etei ou wae umimbeu wae.

<sup>11</sup>Jae uecha yawe Pablo, ueki chuwi jumbikuaa jare uñeapiti jaei ipi jare ipo. Jare jei: “Kua jei oï Espiritu Santo: ‘Kuärái Jerusalén pe judío reta uñapitita kua

tumbikuaa iya jare umeeta reta judío mbae wae reta ipo pe.’ Jukuärái jei Espiritu Santo,” jei.

**12**Jokua ore nduyandu yawe, ore jare ñru wae reta wi joko pe ñonoï wae numñera tēi Pablo awiye waerä oo Jerusalén pe.

**13**Erēi Pablo jei orewe: “¿Maera pa piyao peï? Pe reta chembipiatitika peï,” jei. “Echa’ä che akiye’ä etei añeapitika waerä Jerusalén pe. Akiye’ä etei wi amano waerä joko pe yandeYa Jesús pe ayeyokui ramo,” jei orewe.

**14**Jayawe orepuere’ä ma ndoyopia Pablo ramo, ndueyaño ndoe rewe: “Tuyeyapo yandeYa uipota wae.”

### **Pablo oo uwäe Jerusalén pe**

**15**Joko wi ore nduyeyapikatu jare noë ndoo ye tēta wasu Cesarea wi Jerusalén koti.

**16**Jare yuraa wi ore ndiwe amokue hermano reta Cesarea pewa. Jae reta orereraa pēti kuimbae Mnasón jee wae jēta pe. Mnasón iwi Chipre pewa ko jare jae ko jeta año ma Cristo re wirowia wae. Jayawe ndupita nduputuu waerä jae jēta pe.

**17**Joko wi ore noë ndoo ye Jerusalén koti. Jare ndoo nuwäe yawe Jerusalén pe, hermano reta joko pewa jei orewe uyerowiaete rewe: “¿Jaekawi peyu!” jei reta orewe.

### **Pablo opou Cristo re wirowia wae itenondewa reta ipi Jerusalén pe**

**18**Piarewe pe Pablo oo ore ndiwe ndopou waerä Jacobo ipi. Jare joko pe ime yepe Cristo re wirowia wae itenondewa reta uyembati ñonoï wi.

**19**Jare opa ma umbisaluda reta yawe, Pablo umimbeu chupe reta iparawiki judío mbae wae reta ipite rupi rewa jare opaete mbaembae Tumpa uyapo chupe reta wae rewa.

**20**Jare Pablo jei wae uyandu reta yawe, opaete jae reta umbipi umbutuicha reta Tumpa jee. Jayawe jae reta jei Pablo pe kuärái: “Hermano, ndikuaa ma kērái jetaete judío reta wirowia ma ko Jesús re, jare opaete jae reta ikirēiete yureko waerä Moisés arakae uikuatía wae rupi,” jei reta.

**21**“Erēi ime yembiawái. Echa’ä jeräkua chupe reta nde ndeyaka neï Moisés uikuatía wae wi jokua judío reta yureko judío mbae wae reta ipite rupi wae pe. Echa’ä jeräkua nde ndere chupe reta awiye waerä umbicircuncidaka tai reta jare awiye waerä omomoe reta yandereko,” jei reta chupe.

**22**“Jayawe, ¿mbae pa yayapota? Echa’ä judío reta Jerusalén pewa wirowia tēi reta nde ndiyapo jukuärái. Jare uikuaata ñonoï reta nde ndeyu ma ko wae. Imeta chawaa yembiawái,” jei reta chupe.

**23**“Jáeramo iyapo mii kua ndoeta ndewe wae. Ime orepite pe ñonoï irundi kuimbae reta Tumpa jowai jei reta mbae uyapota yureko wae.



<sup>24</sup>Jayawe eraa kua kuimbae reta tupao wasu pe jare iyeyoe jae reta ndiwe Tumpa koti yandereko jei wae rami. Jare embiepi jae reta iñaka opa uipëpika reta waerä. Jukuärái opaete wae uikuaata añetete'ä yepe nereräkua chupe reta wae. Echa'ä jae reta uikuaata nde ko ndiyapo wi Moisés arakae uikuatía wae. Aramoi jukuärái yambiyerowiata ñanerëtara judío reta," jei reta chupe.

<sup>25</sup>"Erëi judío mbae wae Cristo re wirowia wae reta pe yaikuatía ma Moisés uikuatía wae rewa kuärái: Jaëño awiye tou reta soo tumparaanga pe uñemee wae. Jare awiye tou reta tuwi. Jare awiye tou reta wi mbaemimba uyeyuwikue isoo. Jare awiye tuyapo reta awasa. Jukuärái yambiarakuaa reta," jei reta Pablo pe.

<sup>26</sup>Jayawe Pablo wiraa jokua kuimbae reta jare umbiepi jae reta iñaka opa uipëpika waerä. Jare piarewe pe jae wiraa reta tupao wasu joka pe jare uñemiiru jae reta ndiwe uyeyoe waerä Tumpa koti. Joko wi Pablo umimbeu sacerdote reta pe mbae ara pe opata uyeyoe wae – jae ko chiu ara pe. Echa'ä uasa ma jokua chiu ara yawe, Pablo umeeta jokua irundi kuimbae reta pe mbaemimba reta jae reta wiraa sacerdote pe uyuka jare umee waerä Tumpa pe.

### Uipisi reta Pablo tupao wasu joka pe

<sup>27-29</sup>Jayawe jokua chiu ara opata ma yawe, Pablo oo ye tupao wasu joka pe jokua irundi kuimbae reta ndiwe. Jare joko pe ñonoï amokue judío iwi Asia pewa reta, jare uecha reta Pablo. Jayawe pochiete reta ikoti, echa'ä wirowia reta tēi Pablo ueru ko uruïke judío mbae wae reta tupao wasu joka pe ramo. Echa'ä judío reta umaëño'ä judío mbae wae reta re uïke waerä joko pe. Jare jokua ndimbowe rupi uecha reta yepe Pablo uwata iko tēta wasu rupi pēti kuimbae judío mbae wae Éfeso pewa Trófimo jee wae ndiwe. Jáeramo wirowia reta tēi Pablo ueru ko uruïke tupao wasu joka pe wae. Jayawe iarasi rewe umieräkua reta iru reta pe jesewa. Jare jawoi pewa uyapo reta tekoraï uipisi reta waerä Pablo. Jare iñeeäta rewe jei reta iru joko pe ñonoï wae reta pe: "Kuimbae Israel pewa reta, ¡peyu orembori!" jei reta. "Kua kuimbae ko jae jokua opaete kerupi oporomböe oï yandekoti, jare Moisés arakae uikuatía wae koti, jare kua yandetupao wasu koti wae. Jare jeïete, kua kuimbae ueru uruïke judío mbae wae reta kua yandetupao pe, jare jukuärái umingiaka ma kua tupao uñeñono tee oï Tumpa pewarä wae," jei reta.

<sup>30</sup>Jayawe jupiwoiño jeräkua jokua apu Pablo rewa opaete tēta wasu pewa reta pe. Jáeramo jeta wae reta yuweru Pablo koti, jare uipisi umbitiriri wiraa reta tupao wasu ikësea oka koti uyuka reta waerä tēi. Jare tupao wasu iyandarekoa reta uyukenda woi ikësea jöke chuwi reta awiye iko waerä tekoraï tupao wasu ikësea japipe.

<sup>31-32</sup>Jare jeräkua Jerusalén isindaro romano reta itenondewaete wae pe kërái jeta Jerusalén pewa reta uyapo ñonoï tekoraï wae. Jáeramo jupiwoiño jae osi ou tekoraï uyapo ñonoï wae reta koti isindaro reta jare sindaro itenondewaeta ndiwe. Jokua tekoraï uyapo ñonoï wae reta uyuka pota ma yureko Pablo. Erëi uecha reta yawe yuweru ñonoï sindaro reta, jawoi pewa ueya reta uinupa yureko wae wi.

<sup>33</sup>Jayawe sindaro reta itenondewaete oo uipisi Pablo chuwi reta jare oyokui isindaro reta oñono waerä mokui cadena pe. Joko wi upirandu tekoraí uyapo wae reta pe: “¿Kía ra ko jae? ¿Mbae ikawi mbae wae ra uyapo?” jei chupe reta.

<sup>34</sup>Jayawe amokue tēta wasu pewa reta iñeeäta rewe umbijeko Pablo jeta mbaembae ikawi mbae wae re. Erēi iñee oyowake’ä etei reta. Jayawe sindaro reta itenondewaete ipuere’ä uikuaa mbae nunga ra ko jae añetete wae. Jáeramo oyokui isindaro reta wiraa waerä Pablo sindaro reta yureko wae pe upirandu kawu waerä chupe mbae ikawi mbae ra uyapo jae wae.

<sup>35-36</sup>Erēi tekoraí uyapo wae reta uecha yawe sindaro reta wiraa ñonoí Pablo chuwi reta, jeiete ma pochi reta. Jare yuraa jaikue reta, jare iñeeäta rewe jei pii reta: “¡Tumano jokua kuimbae!” jei reta. Jare uwäe ma yuraa reta yawe grada oo tēta sindaro reta yureko wae pe, sindaro reta imeta ko owoi wiraa Pablo uepi reta waerä jokua pochi wae reta wi.

<sup>37</sup>Erēi ndei sindaro reta wiraa uruike mbowe Pablo tēta sindaro reta yureko wae japipe, Pablo jei griego ñee pe sindaro reta itenondewaete pe: “Emaño mii cheré mbae jae waerä ndewe,” jei chupe. Jayawe jae jei Pablo pe: “Aaa, nde ndikuaa yepe ndiyemingeta griego ñee pe,” jei.

<sup>38</sup>Jare jei wi chupe: “Arowia aiko tēi nde ko jae jokua kuimbae iwi Egipto pewa wae karamboe yawe omboemboe irundi miri wae reta oyowaicho waerä mburuwicha reta koti wae. Joko wi jae opa wiraa reta iwitini wasu pe sindaro reta awiye uipisi reta waerä,” jei chupe.

<sup>39</sup>Jayawe Pablo jei chupe: “Mbaeti. Jae’ä ko che,” jei. “Che ko jae judío tēta wasu Tarso iwi Cilicia pe oí wae pewa. Nde ndikuaa jokua tēta wasu jeräkuate wae ko,” jei. “Jayawe, kua mbae ayerure ndewe: emañó mii cheré ayemingeta waerä kua tēta wasu pewa reta pe,” jei chupe.

<sup>40</sup>Jayawe sindaro reta itenondewaete jei chupe: “Jaekawi,” jei. “Ndepuere nemingeta reta,” jei chupe.

### **Pablo umingeta tēta wasu pewa reta uyerepi waerä**

Jayawe Pablo uyemboi grada iwate oí wae pe, jare ipo pipe umikii opaete joko pe ñonoí wae reta. Jare opaete wae kii yawe, Pablo umbipi umingeta reta jae reta iñee pe etei – jae ko hebreo ñee pe. Jare jei chupe reta kuärái:

## **Hechos 22**

<sup>1</sup>“Cheriwi reta jare cherikei reta, piyapisaka mii cheré. Aipota pumingeta mii ayerepi waerä,” jei chupe reta.

<sup>2</sup>Jare tēta wasu pewa reta uyandu yawe Pablo uyemingeta chupe reta hebreo ñee pe wae, opa rewe kii ngatu uyapisaka jese reta, echa’ä jokua ko jae reta iñee ramo.

<sup>3</sup>Jayawe Pablo jei chupe reta: “Che ko jae pēti judío. Chesi wi aa tēta wasu Tarso pe iwi Cilicia pe oí wae, erēi akuakuaa kua tēta wasu Jerusalén pe. Gamaliel

chemboe kawi yanderamikue reta jeko re. Jare che chekirëiete aiko opaete Tumpa jei wae rupi, opaete pe reta añawe pipota rami,” jei chupe reta.

<sup>4</sup>“Karamboe rupi che aiporarakase Jesús re wirowia wae reta pe. Aipisi añonoka reta peresoriru pe, kuimbae reta jare kuña reta wi, jare amokue wae ayukaka,” jei Pablo chupe reta.

<sup>5</sup>“Sacerdote tenondewaete jare opaete yandetenondewa reta ipuere umimbeu pewe kua che jae ai pewe wae añetete ko. Echa’ä jae reta uikuatía umee chewe tupapire araa tëta wasu Damasco pe aechaka waerä pëti pëti tupao reta itenondewa pe. Jukuärái jae reta chekuaata iko tëi, jare umeeta iko chewe mbaepuere aipisi aru ye waerä kua Jerusalén pe opaete Cristo re wirowia wae reta aiporarakaka chupe reta waerä,” jei chupe reta.

<sup>6</sup>“Erëi che awäe seri ma Damasco pe yawe, warasi ara mbite rupi iko yawe, aramoiño jembipe cheré pëti tembipe uwerasi wae ara wi.

<sup>7</sup>Jawoi pewa aa iwí re, jare ayandu ñee jei chewe: ‘Saulo, ¿maera pa jekuaeño ndiyapo neí ikawi mbae wae chekoti?’ jei chewe.

<sup>8</sup>“Jayawe che apirandu chupe: “¿Kía pa ko nde, mburuwicha?” “Jayawe ñee jei chewe: ‘Che ko jae Jesús tëta wasu Nazaret pewa. Ndiporarakaka neí cheré wirowia wae reta pe yawe, chekoti etei ko nde ndiyapo neí mbae ikawi mbae wae,’ jei chewe.

<sup>9</sup>Jare che ndiwe yuraa wae reta uecha wi tembipe, erëi uikuaa’ä reta mbae jei jokua ñee chewe wae,” jei chupe reta.

<sup>10</sup>“Jayawe che apirandu chupe: “¿Mbae pa ndipota ayapo waerä, cheYa?” “Jare yandeYa jei chewe: ‘Epüa ekua tëta wasu Damasco pe, jare joko pe ambeukata ndewe mbae ndiyapo waerä,’ jei chewe,” jei.

<sup>11</sup>“Jayawe che ndiwe yuraa wae reta chepoko chereraa cheruwäe Damasco pe, echa’ä cheresa’ä apita jokua tembipe jeko pewa,” jei.

<sup>12</sup>“Jare iko joko pe pëti kuimbae Ananías jee wae. Jae uyapo kawi Moisés arakae uikuatía wae rupi, jare opaete judío joko pe yureko wae reta uyemingeta kawi jesewa.

<sup>13</sup>Jae ou opou chepi jare uyemboi cheyipi pe. Jare jei chewe: ‘Cheriwí Saulo, emae ye,’ jei. Jare jupiwoiño amae kawi ye, jare aecha Ananías joko pe oi,” jei Pablo chupe reta.

<sup>14</sup>“Jayawe jae jei chewe: ‘YandeRu Tumpa ndeparawo ma ndikuaa kawi waerä jae uipota uyapo wae, jare ndecha waerä jokua Jupiete wae, jare ndiyandu waerä iñee.

<sup>15</sup>Echa’ä ndikuaakata jesewa opaete wae reta pe. Nemimbeuta chupe reta ndecha wae jare ndiyandu wae,’ jei.

- 16“¿Mbae pa añawe neïro nei? Epüa woi. Iyerure yandeYa Jesucristo pe mbaembae ndiyawi Tumpa koti wae uyembái waerä ndewi, jare iyembisakambuka woi i pe jae jee re.’ Jukuärái jei Ananías chewe,” jei chupe reta.
- 17“Joko wi che ayu ye Jerusalén pe. Jare pëti ara ayerure aiko rambuewe tupao wasu joka pe, aramoño Tumpa chembipau wae echa,” jei.
- 18“Jukuärái aecha Jesús, jare jae jei chewe: ‘Eë ekua imambae Jerusalén wi. Echa’ä tëta wasu pewa reta uyapisakata’ä oï nemimbeuta nei che rewa wae,’ jei chewe.
- 19“Jayawe che jae chupe: ‘CheYa, jae reta uikuaa ñonoï kërái che ase opaete tupao reta rupi añonoka waerä peresoriru pe nderé wirowia wae reta jare ambipiuka reta waerä.
- 20Jare uyuka reta yawe Esteban nde rewa umimbeu wae, che wi aiko joko pe, jare ikawi iko chewe imano. Jare che ayandareko wi upuruyuka wae reta iñepëwaka reta re,’ jae chupe.
- 21“Jayawe yandeYa jei chewe: ‘Ekua. Echa’ä che nomondota mbiri judío mbae wae reta koti,’ jei chewe,” jei Pablo chupe reta.
- 22Erëi Pablo kua jei yawe, tëta wasu pewa reta uipota’ä ma uyapisaka jese. Iñeeäta rewe jei pii reta: “¿Tumano kua kuimbae! ¿Echa’ä jupi’ä ko iko waerä!” jei reta.
- 23Jare jokua jei pii rambuewe, umbiwawa reta iñepëwaka, jare omombo reta iwikuï iwate rupi.
- 24Jayawe sindaro reta itenondewaete oyokui isindaro reta uruïke waerä Pablo jae reta yureko wae japipe. Jare oyokui wi umbipiu reta waerä chikote pe, jukuärái rupi umbiyemingetaka waerä maera ra tëta wasu pewa reta jukuärái iñeeäta ikoti.
- 25Erëi sindaro reta timasa pipe uñapiti yawe Pablo umbipiu waerä, Pablo jei sindaro reta itenondewa joko pe oï wae pe: “¿Jupi ra pembipiu waerä pëti romano ndei jae uyemboï mbowe mburuwicha reta jowai jei reta waerä jae jeko re?” jei.
- 26Kua uyandu yawe, jokua sindaro reta itenondewa oo itenondewaete pe jare jei chupe: “Iyandareko mbae ndiyapoka nei wae. Echa’ä jokua kuimbae jae ko romano wi,” jei.
- 27Jayawe sindaro reta itenondewaete ou Pablo oï wae pe jare jei chupe: “Emimbeu chewe, ¿romano pa ko nde?” jei. Jayawe Pablo jei chupe: “Jae ko che,” jei.
- 28Jayawe jae jei Pablo pe: “Che ambiepi jeta korepoti ayeyapo waerä romanorä,” jei. Erëi Pablo jei chupe: “Che aa wiwe, jae ko che romano,” jei.
- 29Jayawe jokua sindaro reta umbipiuta tëi yureko reta Pablo wae kua uyandu reta yawe, uyemboï chuwi. Jare sindaro reta itenondewaete uikuaa yawe Pablo ko jae romano wae, ukiye, echa’ä tenonde oñonoka ma cadena pe ramo.
- 30Jare piarewe pe sindaro reta itenondewaete uipota uikuaa kawi iko mbae re ra judío reta umbijeko iko Pablo wae. Jáeramo oyora Pablo, jare umbatika sacerdote

itenondewa reta jare judío itenondewa reta. Jayawe ueruruka umbiyemboi Pablo jae reta jowai.

## Hechos 23

### Pablo uyemboi judío reta imburuwicha reta jowai

<sup>1</sup>Jayawe Pablo umae ngatu mburuwicha reta re jare jei: “Cherikei reta, kua ara rewa chepiawiwe ai Tumpa ndiwe,” jei.

<sup>2</sup>Kua uyandu yawe, sacerdote tenondewaete Ananías jee wae jei Pablo iyipi pe ñonoï wae reta pe okua waerä Pablo iyuru re.

<sup>3</sup>Jayawe Pablo jei chupe: “Tumpa okuata oi nderé. Echa’ä nde ko jae kuimbae mokui jowa wae rami. Nde ndewapi ko nei ndere waerä mbae che rewa Moisés arakae uikuatía wae rupi. Erëi nde rani ndiyawi, echa’ä ndere chupe reta okua waerä cheré,” jei chupe.

<sup>4</sup>Jayawe joko pe yureko wae reta jei chupe: “¿Këraita pa ndepuere ndere ñee ikawi mbae wae Tumpa isacerdote tenondewaete pe?” jei reta.

<sup>5</sup>Jayawe Pablo jei chupe reta: “Cherikei reta, aikuaa’ä aiko jae ko sacerdote tenondewaete wae. Añetete, Tumpa iñeeriru pe uyekuatía oi kuärái: ‘Ndereta’ä ñee ikawi mbae wae nemburuwicha koti,’ jei.”

<sup>6</sup>Jare Pablo uikuaa yawe amokue jae reta saduceo reta ko jare amokue fariseo reta ko, umbipi usapikai rewe jei chupe reta: “¿Cherëtara reta, che ko jae pëti fariseo tai, jare pëti fariseo wi ko che!” jei. “Che arowia umanokue wae reta ikowe yeta ñonoï. Jare jokua jeko pewa chereru reta perowai chembijeko waerä,” jei chupe reta.

<sup>7</sup>Jare Pablo jei wae uyandu reta yawe, umbipi uyeaka reta saduceo reta jare fariseo reta ndiwe. Jare jokua uyembati yureko wae reta uyembiyao iyuwu.

<sup>8</sup>Echa’ä saduceo reta wirowia wae ambie ye ko fariseo reta wirowia wae wi. Saduceo reta jei umanokue wae reta ndarau ma ikowe ye. Jei reta wi mbaeti ko araiwa reta jare umanokue wae reta iä. Erëi fariseo reta wirowia ime ko jokua nunga reta. Jare wirowia reta wi umanokue wae reta pëti ara ikowe yeta ñonoï wae.

<sup>9</sup>Jayawe täta rupi uyeaka reta. Aramoiño amokue fariseo Moisés uikuatía wae re oporomböe wae reta uyemboi, jare iñeeäta rewe jei reta: “¿Ore nuwäe’ä etei teko kua kuimbae re!” jei reta. “Aramoi pëti umanokue wae iä ani pëti araiwa uikuaaka ma chupe kua ñee ipiau wae,” jei reta.

<sup>10</sup>Jare opaete jae reta jeiete ma uyeaka reta. Jayawe uipisi reta Pablo jare umbipi uñemiata jese reta. Jayawe sindaro reta itenondewaete urukiye Pablo aramoi mburuwicha reta omondorondorota uyuka reta. Jáeramo oyokui isindaro reta uepi waerä Pablo chuwi reta jare wiraa ye waerä sindaro reta yureko wae pe uyandareko reta waerä jese joko pe.

<sup>11</sup>Jare jokua pïtu yandeYa uyekuaa Pablo pe jare jei chupe: “Iñemiatangätu,” jei. “Chemieräkua ma Jerusalén pe. Jare añawe chemieräkuata ko wi tëta wasu Roma pe,” jei chupe.

### **Amokue judío reta uipota tēi uyuka Pablo**

<sup>12</sup>Jayawe piarewe pe amokue judío reta uyemboemboe uyuka waerä tēi Pablo. Jae reta jei iyupe: “Yayukata ko Pablo,” jei reta. “Yakaruta’ä jare yauta’ä i yaipisi yayuka rewa. Erēi yayuka’ä yawe Pablo, Tumpa tuiporaraka yandewe,” jei iyupe reta.

<sup>13</sup>Jare jokua jei reta wae cuarenta uasa rupi iko kuimbae reta.

<sup>14</sup>Jayawe jae reta yuraa sacerdote itenondewa reta jare judío itenondewa reta pe, jare jei chupe reta: “Ore ndoe ma Tumpa jowake ndukaruta’ä etei nduyuka rewa Pablo.

<sup>15</sup>Jáeramo orembori mii. Pe reta ñru mburuwicha reta ndiwe pere sindaro reta itenondewaete pe tueru yewi Pablo perowai piarewe pe. Pere chupe: ‘Ore nduipota ndupirandu kawi Pablo pe mbae uyeyapo wae rewa.’ Jukuärái pere chupe. Jayawe ore nukuatïrota noï jese nduyuka waerä ndei ou uwäe mbowe,” jei chupe reta.

<sup>16</sup>Erēi kua uyemboemboe reta wae jeräkua Pablo jii pe. Jáeramo oo uike sindaro reta yureko wae pe, jare umimbeu Pablo pe.

<sup>17</sup>Jayawe Pablo ueni pēti sindaro reta itenondewa jare jei chupe: “Eraa mii kua kunumi nemburuwicha tenondewaete pe. Echa’ä ime mbae jei chupe waerä,” jei chupe.

<sup>18</sup>Jayawe wïraa kunumi sindaro reta itenondewaete pe jare jei chupe: “Jokua pereso Pablo ueka chewe aru waerä ndewe kua kunumi. Echa’ä jae ime onoi mbae jei waerä ndewe,” jei chupe.

<sup>19</sup>Jayawe sindaro reta itenondewaete uipisi kunumi ipo pe, jare wïraa ikotïa mii chuwi reta, jare upirandu chupe: “¿Mbae pa ndipota ndere chewe?” jei.

<sup>20</sup>Jayawe kunumi jei chupe: “Amokue judío reta uyemboemboe ma kërái nemiñera waerä kuriye nderaaka ye waerä Pablo mburuwicha reta jowai. Uipota reta tēi wïrowiaka ndewe jae reta upirandu kawieteta chupe mbaembae jesewa,” jei.

<sup>21</sup>“Erēi awiye mii erowia chupe reta. Echa’ä calle rupi ukuatïrota ñonoï jese cuarenta uasa rupi kuimbae reta. Jae reta jei Tumpa jowai ukaruta’ä jare jouta’ä i uyuka reta rewa Pablo. Jare añawe uäro ñonoï aramoi nderaaka rambuewe,” jei chupe.

<sup>22</sup>Jayawe sindaro reta itenondewaete jei kunumi pe: “Kua nemimbeu chewe wae, awiye kïa pe awe emimbeu yuapi ye,” jei chupe. Jayawe omondo ye kunumi.

### **Omondo reta Pablo mburuwicha Félix jowai**

<sup>23</sup>Joko wi sindaro reta itenondewaete ueni mokui isindaro reta juwicha reta jare oyokui reta wiraa waerä Pablo tēta wasu Cesarea jee wae koti. Jae jei chupe reta: “Piyapikatu kawi mokui chiēto sindaro reta peë peo waerä Cesarea koti chau ora ma kua pītu yawe,” jei. “Peraa wi pe ndiwe mokui chiēto sindaro wiraa ui puku wae reta, jare setenta sindaro kawayu re opo wae reta,” jei chupe reta.

<sup>24</sup>“Jare piyapikatu wi kawayu Pablo opo oo jese waerä, peraa kawi waerä iwī Judea imburuwicha Félix jowai,” jei chupe reta.

<sup>25</sup>Joko wi sindaro reta itenondewaete uikuatía pēti tupapire pe kuärái:

<sup>26</sup>“Chemburuwicha Félix, tuyembutuichaka nderee. Che ko jae Claudio Lisias. Araaka aī ndewe saludo.

<sup>27</sup>Judío reta uipisi kua kuimbae Pablo jee wae, jare uyukata tēi yureko reta. Jayawe che a sindaro reta ndiwe jare aepi chuwi reta. Echa’ä jeräkua chewe jae ko romano wae.

<sup>28</sup>Che aipota aikuaa aiko maera ra jae reta umbijeko wae. Jáeramo araa judío itenondewa reta jowai jae reta jei waerä jesewa.

<sup>29</sup>Joko pe aikuaa jae reta yepe umbijeko yureko judío reta jeko reño. Erēi jae mbaeti yepe onoi teko umano waerä jare oī waerä peresoriru pe.

<sup>30</sup>Joko wi jeräkua chewe judío reta ukuatīrota ñonoī jese wae. Jáeramo jupiwoiño amondoka ndekoti. Jare che jae umbijeko wae reta pe uñeapo waerä ndewe jese. Jokuaño aikuatía ndewe.” Jukuärái uikuatía.

<sup>31</sup>Jayawe pītu yawe sindaro reta wiraa Pablo tēta wasu Antípatris pe kērái itenondewaete oyokui wae rupi.

<sup>32</sup>Piarewe pe sindaro kawayu re opo wae reta wiraa yuapī ye Pablo. Erēi iru sindaro reta uñatima ye kiape yureko wae pe.

<sup>33</sup>Joko wi yuraa uwäe reta yawe tēta wasu Cesarea pe, sindaro reta umee Pablo mburuwicha Félix pe jokua tupapire ndiwe.

<sup>34</sup>Jayawe mburuwicha umingeta jokua tupapire. Joko wi upirandu Pablo pe: “¿Kía pewa pa ko nde?” jei chupe. Jare Pablo jei chupe: “Che ko iwī Cilicia pewa,” jei.

<sup>35</sup>Jare mburuwicha uikuaa yawe iwī Cilicia pewa ko wae, jei Pablo pe: “Ayapisakata aī nderé yuweru yawe nembijeko wae reta,” jei chupe. Jayawe oyokui isindaro reta uyandareko waerä Pablo re mburuwicha Herodes jēta pe.

## Hechos 24

### Mburuwicha Félix umimbita Pablo mokui año rupi peresoriru pe

<sup>1</sup>Pandepo ara ma uasa yawe, sacerdote tenondewaete Ananías oo tēta wasu Cesarea pe. Jare jae ndiwe yureko amokue judío itenondewa reta jare pēti kuimbae abogado

Tértulo jee wae. Jae reta yuraa Cesarea pe uyembati waerä mburuwicha Félix ndiwe uñeapo reta waerä Pablo re.

<sup>2</sup>Jayawe mburuwicha ueruruka Pablo jae reta jowai. Jare Pablo joko pe ma oï yawe, Tértulo uyemboi omoë waerä iñee kuärái: “Chemburuwicha Félix, tuyembutuichaka nderee. Echa’ä ndereko pewa ore nduiko orepiakatu rewe. Jare ndearakuaa rupi ndiyapoka jeta mbaembae ikawi wae kua oreiwi pe,” jei chupe.

<sup>3</sup>“Jayawe oremburuwicha numbutuicha wae, nduyapo ndewe yasurupái opaete kua mbaembae ndiyapo wae re,” jei chupe.

<sup>4</sup>“Ndepiakawi ramo, numiñera mii ndiyapisaka waerä oriñee re michi pewa yepe. Nduipota’ä nombopochika,” jei.

<sup>5</sup>“Ore nduikuaa ma kua kuimbae upurumbiawái pëti mbaerasi rami. Jae omboemboe judío reta opaete iwi rupi. Jare jae ko nazareno jei chupe reta wae jeko omomoe wae reta itenondewa,” jei chupe.

<sup>6</sup>“Jae uipota tēi wi uyapo jupi mbae wae oretupao wasu pe. Erēi ore ndoyopia chuwi. Jare numbijekota tēi nduiko orereko jei wae rupi.

<sup>7</sup>Erēi sindaro reta itenondewaete Lisias ou pochi rewe upiroka wiraa orewi,” jei.

<sup>8</sup>“Nde etei ndepuere ndepirandu chupe ndikuaa waerä opaete kua mbae ndoe wae añetete ko wae,” jei Tértulo mburuwicha Félix pe.

<sup>9</sup>Jare opaete judío reta joko pe ñonoï wae uechaka ikawi iko chupe reta Tértulo jei wae.

<sup>10</sup>Jayawe mburuwicha umee Pablo pe uyemingeta waerä. Jayawe Pablo jei: “Che aikuaa nde imaete ma ndiko kua iwi pewa reta imburuwicharä. Jáeramo ayerowia rewe amimbeuta ndewe ayerepi waerä,” jei.

<sup>11</sup>“Nde ndepuere ndepirandu ndikuaa waerä doce ara ramo uasa a Jerusalén pe wae Tumpa jee ambutuicha waerä.

<sup>12</sup>Kua reta cherecha’ä etei ayeaka kía ndiwe awe. Jare amboemboe’ä etei tēta wasu pewa reta tupao wasu pe, jare itupao reta rupi, jare tēta wasu rupi,” jei.

<sup>13</sup>“Jáeramo jae reta ipuere’ä etei uechaka ndewe añetete ko kua añawe chembijeko ñonoï wae,” jei Pablo chupe.

<sup>14</sup>“Erēi tamimbeu ndewe Jesucristo rupi ko che ambutuicha oreramikue reta iTumpa jee. Kua chembijeko wae reta jei tēi jokua ko jae teko ambie ye wae. Erēi jukuärái’ä ko. Echa’ä Moisés jare kuimbae ñee Tumpa wi etei ou wae umimbeu wae reta uikuaakaño mái yandewe jese. Jare che arowia jese reta,” jei.

<sup>15</sup>“Jae nunga wi tamimbeu ndewe che arowia Tumpa umbijekowe yeta oï umanokue reta wae. Jae umbijekowe yeta oï jupi wae reta jare jupi mbae wae reta. Jukuärái ko wirowia tēi wi kua chembijeko wae reta.



- 16**Jare kua che arowia ramo, che jekuaeño aipota aiko chepia chembijeko mbae rewe Tumpa jowai jare kuimbae reta jowai,” jei chupe.
- 17**“Che mbowi año ma mbaeti aiko cherëta wasu Jerusalén pe. Jáeramo ayu ye, jare aru korepoti ambori waerä iparawete wae reta cheiwi pewa. Jae nunga wi aipota tēi mbaemimba araa ayuka aiko Tumpa pewarä.
- 18**Jare jukuärái ayapota aiko tēi tupao wasu joka pe jokua ara chepisi reta yawe,” jei. “Che opata ramo ayeyoe aiko Tumpa koti Moisés arakae uikuatía wae rupi. Jare jokua ayapo aiko rambuewe, amokue Asia pewa judío reta cherecha tupao wasu joka pe. Erēi ayembati’ä aiko jeta wae reta ndiwe jare ayapo’ä aiko tekorái,” jei chupe.
- 19**“Jokua judío reta cherecha wae imeta tēi ñonoï kua pe uñeapo waerä tēi cheré ndewe, ime yawe mbae re chembijeko reta waerä,” jei.
- 20**“Ani kua mburuwicha reta kua pe ñonoï wae tumimbeu ndewe mbae nunga teko ra uwäe cheré. Echa’ä ayemboi ma jae reta jare opaete ñru oremburuwicha reta jowai. Jare jae reta uikuaa uwäe’ä ko reta teko cheré wae,” jei chupe.
- 21**“Aramoi jaeño pēti mbae re ipuere chembijeko reta. Jokua wese mburuwicha reta jowai aiko rambuewe, chiñeeäta rewe jae: ‘¡Che arowia umanokue wae reta ikowe yeta ñonoï! Jare jokua jeko pewa chereru reta perowai chembijeko waerä.’ Jukuärái jae chupe reta. Jokua re ko aramoi jae reta chembijeko oï kua ara.” Jukuärái jei Pablo Félix pe.
- 22**Félix uikuaaño mái Cristo re wirowia wae reta jeko rewa. Jare kua Pablo jei wae uyandu yawe, uipota’ä kía re awe ye uyapisaka. Jáeramo jei judío reta pe: “Sindaro reta itenondewaete Lisias ou uwäe yawe ramo che jaeta Pablo jeko rewa,” jei chupe reta.
- 23**Jayawe Félix oyokui sindaro reta itenondewa uyandarekoka waerä Pablo re. Erēi oyokui wi Pablo ipiawiwe mii iko waerä. Jare oyokui wi umaño Pablo ñru reta re ou ipi ombori waerä.
- 24**Mbowi ara ma uasa yawe, Félix ueruruka ye Pablo jae jowai. Jare joko pe oï wi Félix jembireko Drusila jee wae. Drusila ko jae pēti judía. Jayawe Félix uyapisaka Pablo jei wae re kërái imeta ko yarowia Jesucristo re wae.
- 25**Jare Pablo jei chupe kërái ikawi ko yayapo waerä jupi wae, jare yayopia waerä yandeyuwi yanderete uipota wae, jare kërái pēti pēti yande yayemboita ñai Tumpa jowai jae jei waerä yandereko rewa. Jare kua uyandu yawe, Félix ukiye rewe jei Pablo pe: “Ekuaño rani. Chepuere yawe, nuenika yeta kuri,” jei chupe.
- 26**Erēi Félix uipota tēi wi Pablo umee waerä korepoti chupe, jukuärái rupi ombopoika waerä tēi. Jáeramo uerurukañoi jae jowai uyemingeta waerä jae ndiwe.
- 27**Joko wi mokui año ma uasa yawe, kuimbae romano Porcio Festo jee wae ou Félix ipepika iwi Judea imburuwicharä. Erēi Félix oo ye ma iko yawe, ueya Pablo peresoriru pe umbiyerowia waerä Pablo jowaicho reta.

## Hechos 25

### Pablo uipota oo romano reta imburuwicha wasu imbaepuerete wae jowai

- <sup>1</sup>Jayawe Festo ou uwäe tēta wasu Cesarea pe umbipi iko waerä iwi Judea pewa reta imburuwicharä. Joko wi mbapi ara ma uasa yawe, oo Jerusalén koti.
- <sup>2</sup>Jare Festo Jerusalén pe oi rambuewe, yuweru amokue sacerdote itenondewa reta jare amokue judío itenondewa reta wi uyemingeta waerä jae ndiwe Pablo rewa.
- <sup>3</sup>Jare umiñera reta Festo uyapo waerä ikawi wae chupe reta. Jei reta chupe: “Eruruka mii Pablo kua Jerusalén pe uyemboi waerä nderowai kua pe,” jei reta chupe. Erëi jae reta ipiyemingeta iko tēi omondo reta waerä wiari rupi ukuatiro waerä Pablo re uyuka reta waerä.
- <sup>4</sup>Erëi Festo jei chupe reta: “Pablo peresoriru pe oi tēta wasu Cesarea pe, jare che a yeta ai joko pe kuri,” jei.
- <sup>5</sup>“Pipota yawe, amokue pe reta pepuere peo che ndiwe. Jukuärái jokuu kuimbae uyapo mbae ikawi mbae wae yawe, pepuere pembijeko cherowai joko pe,” jei chupe reta.
- <sup>6</sup>Jare mburuwicha Festo upita Jerusalén pe payandepo ara seri rupi ndei oo ye mbowe Cesarea pe. Joko wi oē ye Jerusalén wi jare oo uwäe Cesarea pe jokuu mburuwicha Jerusalén pewa reta ndiwe. Jare piarewe pe Festo umbatika mburuwicha reta jae jowai jare omondo ueruruka Pablo jae reta umbijeko waerä.
- <sup>7</sup>Jare Pablo ou ma uwäe yawe, mburuwicha Jerusalén pewa reta yuraa uyemboi Pablo iyipi rupi opa yati reta jese. Jare umbijeko reta jeta ikawi mbae wae re. Erëi ipuere’ä etei pēti awe uwäe jese teko ikawi mbae wae.
- <sup>8</sup>Jayawe Pablo uyerepi waerä jei Festo pe: “Che ayawi’ä etei ore judiorä nduiko wae orereko jare romano reta imburuwicha wasu jei wae wi. Jare chereko’ä ai tupao wasu re,” jei chupe.
- <sup>9</sup>Erëi Festo uipota umbiyerowia judío reta. Jáeramo upirandu Pablo pe: “¿Ndipota pa nomondo waerä Jerusalén pe ndiyemboi waerä cherowai joko pe?” jei chupe.
- <sup>10</sup>Jayawe Pablo jei Festo pe: “Aipota’ä etei,” jei. “Ko ai nderowai kua romano reta iñeaporenda pe. Kua pe ko jupi nde ndere waerä ime ra anoi teko ani mbaeti ra anoi wae,” jei. “Jare ndikuaa nei che ayapo’ä ko mbae ikawi mbae wae cherētara judío reta koti,” jei.
- <sup>11</sup>“Ime anoi yawe teko amanota ko jese wae, ndarau etei ayeyopia chuwi jare ayekota’ä tēi nderé cherepi waerä,” jei. “Erëi kua teko uipota reta omboya cheré wae ayapo’ä etei ko. Jáeramo jupi’ä ko nde chemee waerä chupe reta cheyuka waerä. Che aipota ko a ayemboi waerä romano reta imburuwicha wasu imbaepuerete wae jowai jae etei jei waerä ime ra anoi teko wae,” jei Pablo chupe.

**12**Jayawe Festo uyemingeta iiru mburuwicha romano reta ndiwe Pablo jei wae rewa. Joko wi jei Pablo pe: “Ndipota ndiyemboi yawe mburuwicha wasu imbaepuerete wae jowai, jayawe joko pe ndeota,” jei chupe.

### **Pablo uyemboi mburuwicha wasu Agripa jowai**

**13**Jare mbowi ara ma uasa yawe, mburuwicha wasu Agripa jare jindi Berenice yuweru Cesarea pe umbisaluda waera Festo.

**14**Jare mbowi ara ma joko pe yureko yawe, Festo umimbeu mburuwicha wasu pe Pablo rewa. Jei chupe: “Ime kua pe oi peti kuimbae Félix ueya peresoriru pe Pablo jee wae,” jei.

**15**“Jerusalén pe a yawe, sacerdote itenondewa reta jare judío itenondewa reta wi umimbeu chewe kua kuimbae rewa. Jae reta chemiñera tei che aiporaraka chupe waera mano pe,” jei.

**16**“Erëi che jae chupe reta: ‘Ore romano reta orereko pe, ime yawe kía iiru wae uñeapo oi jese wae, opa rewe uyemboita ko mburuwicha jowai. Jukuärai jae imeta onoi këräi ipuere waera uyerepi chuwi reta. Erëi jukuärai’ä uyeyapo yawe, orepuere’ä nduiporaraka chupe.’ Jukuärai jae jokua judío imburuwicha reta pe,” jei.

**17**“Jáeramo jae reta yuweru kua pe. Jare jupiwoiño piarewe pe ambatika reta jare aruruka Pablo,” jei.

**18**“Erëi jae reta umbipi umbijeko reta yawe jokua kuimbae, ayandu’ä teko ikawi mbae wae arowia tei aiko wae.

**19**Jaeño umbijeko reta mbae jae wirowia iko itumpa re wae jare peti kuimbae Jesús jee wae re. Jokua Jesús umano ma yepe, erëi Pablo jei tei ikowe ye ko,” jei.

**20**“Che aikuaa’ä mbae ra ayapota kua re. Jáeramo apirandu Pablo pe uipota ra oo Jerusalén pe, joko pe uyemboi waera mburuwicha reta jowai.

**21**Erëi Pablo uipota’ä. Jae ueka nduyandareko waera jese yanemburuwicha wasu imbaepuerete wae jowai uyemboi rewa. Jáeramo ayokui sindaro reta uyandareko waera jese Roma pe amondo rewa,” jei Festo mburuwicha wasu Agripa pe.

**22**Jayawe Agripa jei Festo pe: “Che wi aipota ayapisaka jokua kuimbae re,” jei. Jayawe Festo jei chupe: “Kuriye ndepuere ndiyapisaka jese,” jei.

**23**Jayawe piarewe pe Agripa jare Berenice yuweru uwäe yembatirenda pe jeta uyembutuichaka rewe. Jare jae reta ndiwe ñonoï wi amokue sindaro itenondewa reta jare tëta wasu pewa itenondewa reta wi. Jare opa ma uwäe reta yawe, Festo ueruruka Pablo jae reta jowai.

**24**Jayawe Festo omoë iñee jei rewe: “Mburuwicha wasu Agripa, jare opaete kua pe pei wae reta, mase, ko oi kua kuimbae. Opaete judío Jerusalén pewa reta jare kua pewa reta wi chemiñera tei iñeeäta rewe aiporaraka waera chupe mano pe,” jei.

<sup>25</sup>“Erëi che awäe’ä teko jese umano waerä. Jare jae uipota oo yanemburuwicha wasu imbaepuerete wae jowai mburuwicha jei waerä jae jeko rewa. Jáeramo apita amondo waerä ikoti tēta wasu Roma pe,” jei.

<sup>26</sup>“Erëi aikuaa’ä mbae ra aikuatía waerä yandeya mburuwicha wasu pe jesewa. Jáeramo ko oï perowai, jare nderowai wi, mburuwicha wasu Agripa. Opa yapirandu chupe yawe, jayawe aikuaata mbae ra aikuatía waerä.

<sup>27</sup>Echa’ä ikawi’ä ko yamondo waerä pēti pereso yandeya mburuwicha wasu pe yamimbeu mbae rewe mbae jeko pewa ra pereso oï wae,” jei chupe reta.

## Hechos 26

### Pablo uyemingeta mburuwicha wasu Agripa jowai

<sup>1</sup>Jayawe Agripa jei Pablo pe: “Ime nenoï ñee ndiyerepi waerä,” jei chupe. Jayawe Pablo ipo pe umee yasurupái mburuwicha wasu pe, jare umbipi uyemingeta.<sup>2</sup>“Chemburuwicha wasu Agripa, ayerowia aï kērái añawe chepuere ayerepi waerä nderowai opaete judío reta chembijeko wae re.

<sup>3</sup>Echa’ä nde ndikuaa kawi opaete judío reta jeko jare iyeaka reta rewa. Jáeramo che numiñera ndiyapisaka waerä cheré ndepiawasu rewe,” jei chupe.

<sup>4</sup>“Chetaurusu wiwe opaete judío reta chekuaa kērái ko chereko wae aiko yawe cherētáíwa reta ndiwe Jerusalén pe.

<sup>5</sup>Jae reta uipota yawe, ipuereta tēi chemimbeu ndewe kērái che ko jae fariseo wae. Jare ndikuaa neï opaete judío reta ipite wi ore fariseo reta nduipotaete nduyapo kawi Moisés arakae uikuatía wae rupi,” jei chupe.

<sup>6-7</sup>“Arakaete Tumpa jei oreramikue reta pe uyapota iko mbae ikawiete ye wae. Jare jokua ko jae mbae opaete Jacob doce tai ñemoñaa reta wi uäro ñonoï uyerowia katu rewe. Jáeramo jae reta ara rupi jare pītu rupi uyeyokui ñonoï Tumpa pe ikirēi rewe,” jei. “Erëi che arowia Tumpa añawe rupi uyapo oï jokua jae jei uyapota iko wae. Jare kua judío reta wirowia’ä jokua. Jáeramo jokua jeko pewa jae reta uñeapo ñonoï cheré. Jáeramo che kua pe aï nderowai, chemburuwicha wasu,” jei chupe.

<sup>8</sup>Jayawe Pablo jei jokua judío joko pe ñonoï wae reta pe: “¿Maera pa pe reta perowia’ä peï Tumpa ipuere umbijekowe ye umanokue wae reta?” jei chupe reta.

<sup>9</sup>“Che wi arowiase tēi ikawi ko ayapo waerä chepuere wae rupi arukachi waerä Jesús Nazaret pewa jee.

<sup>10</sup>Jare jukuärái ayapose Jerusalén pe. Echa’ä sacerdote itenondewa reta umee chewe mbaepuere añonoka waerä peresoriru pe jeta wae Jesús re wirowia wae reta. Jare mburuwicha reta uipota uyukaka reta yawe, che jaese wi tumano reta,” jei.

<sup>11</sup>“Jare jeta wese ase tupao reta rupi aipisi aiporaraka chupe reta waerä. Jare che aipota tēi jaeka chupe reta Jesús jae’ä ko yandeYa wae. Jare chepochi uasa ramo jae reta koti, aikuemoña reta ambie tēta wasu reta rupi,” jei.

<sup>12</sup>“Jukuärái, chemburuwicha wasu, pëti ara a aiko tëta wasu Damasco koti aikuemoña reta waerä. Echa’ä sacerdote itenondewa reta umee chewe mbaepuere jokua ayapo waerä.<sup>13</sup>Erëi warasi ara mbite rupi iko yawe tape rupi a rambuewe, aramoño jembipe cheré jare che ndiwe yuraa wae reta re pëti tembipe uwerasi wae ara wi. Jokua tembipe jembipete ye warasi wi.

<sup>14</sup>Jare opa rewe ndoa iwí re,” jei chupe. “Jayawe che ayandu pëti ñee hebreo ñee pe jei chewe: ‘Saulo, ¿maera pa jekuaeño ndiyapo neí ikawi mbae wae chekoti? Ndipota tëi chembowaicho neí pëti weye iya iwíra jakuarowi wae re upatara wae rami. Jáeramo ndiporara neí,’ jei chewe.

<sup>15</sup>“Jayawe che apirandu chupe: “¿Kía pa ko nde, mburuwicha?” “Jare yandeYa jei chewe: ‘Che ko jae Jesús ndiporarka neí chewe wae,’ jei.

<sup>16</sup>‘Epüa iyemboi. Che ayekuaa ma ndewe aipota ndiyeyokui waerä chewe ramo. Jare che nomondo aï nemimbeu waerä kua cherecha wae rewa. Jare nemimbeuta wi jokua aikuaakata aï ndewe wae,’ jei yandeYa chewe.

<sup>17</sup>“Jare jei wi chewe kuärái: ‘Che nduepita aï nerëtáíwa reta wi jare judío mbae wae reta wi. Jokua judío mbae wae reta, che nomondota aï ikoti

<sup>18</sup>nemimaeka reta waerä, jare jukuärái uyerowa reta waerä pítumimbi wi tembipe koti, jare wi uyerowa reta waerä Satanás imbaepuere wi Tumpa koti. Kua uyapo reta yawe, Tumpa opata umbái chuwi reta mbaembae ikoti uyawí reta wae. Jayawe tuicha rupi uyekouta ñonoí, echa’ä Tumpa oñono teeta reta jae imaerä kërái jae uyapo opaete ñru cheré wírowia wae reta pe rami.’ Jukuärái jei chewe yandeYa,” jei.

<sup>19</sup>“Jáeramo, chemburuwicha wasu Agripa, chatëi’ä ayapo jokua yandeYa chokui ayapo waerä wae,” jei.

<sup>20</sup>“Echa’ä tenonde amimbeu Damasco pewa reta pe. Joko wi amimbeu Jerusalén pewa reta pe, opaete Judea pewa reta pe, jare judío mbae wae reta pe wi. Amimbeu chupe reta ueya waerä ipiayemingeta jupi mbae wae Tumpa rewa jare uyerowa reta waerä Tumpa koti. Amimbeu wi chupe reta uechaka waerä teko kawí, jukuärái uechaka reta waerä ueya ma ko ipiayemingeta jupi mbae wae Tumpa rewa,” jei.

<sup>21</sup>“Kua amimbeu jeko pewa, amokue judío reta chepisi tupao wasu pe jare uipota tëi cheyuka reta.

<sup>22</sup>Erëi Tumpa cherepi chuwi reta ramo, imeño aiko kua ara rewa. Jare jekuaeño amimbeu aï kua mbaembae opaete wae reta pe, iparawete wae reta wiwe jare mburuwicha reta pe awe,” jei. “Jokua mbaembae Moisés jare ñru kuimbae Tumpa ñnee arakae umimbeu wae reta jei uyeyapota iko wae re, jokua reño ko che amimbeu wi.

<sup>23</sup>Echa’ä jae reta arakaete jei Cristo yae chupe wae uiporara ñotái iko jare umano ñotái iko. Jare joko wi jae rani ikowe yeta ou iko umanokue wae reta ipite wi

uikuaaka waerä judío reta pe jare judío mbae wae reta pe wi Tumpa iñee añetete wae. Jare jukuärái jae ikota pëti tembipe rami chupe reta,” jei Pablo Agripa pe.

<sup>24</sup>Jare Festo kua uyandu yawe, aramoño jei chupe iñeeäta rewe: “¡Pablo, nembikere ma chawaa nei! Jeta mbaembae ndiyemboe ramo, nembikere ma ndapo,” jei chupe.

<sup>25</sup>Erëi Pablo jei chupe: “Chembikere’ä tëi ko. Kua che jae ndewe wae añetete wae jare arakuaa pewa ko,” jei.

<sup>26</sup>“Mase, mburuwicha wasu Agripa uikuaa kawí kua mbaembae rewa. Echa’ä uyeyapo’ä ko wiari rupi jare jeräkua ma ko aipo chupe. Jáeramo che chepuere chemiäri chupe akiye mbae rewe,” jei chupe.

<sup>27</sup>Jare Pablo jei mburuwicha wasu Agripa pe: “Chemburuwicha wasu Agripa, ¿nderowia pa Tumpa iñee arakae umimbeu wae reta uikuatía wae? Che aikuaa nderowia ko jese,” jei chupe.

<sup>28</sup>Jayawe Agripa jei Pablo pe: “Ndipota tëi ndipo imambae chapo Cristo re arowia waerä,” jei chupe.

<sup>29</sup>Jayawe Pablo jei chupe: “Aipota echa imambae ani mbowí ara rupi nde jare opaete iru añawe uyapisaka ñonoí cheré wae reta piyeyapo waerä che rami. Erëi awiye peí kua nunga cadena pe,” jei chupe reta.

<sup>30</sup>Jare Pablo jukuärái ma jei yawe, mburuwicha wasu Agripa uyemboí. Jare mburuwicha Festo, jare Berenice, jare opaete jae reta ndiwe yureko wae uyemboí reta wi, jare oë yuraa reta yematirenda wi.

<sup>31</sup>Jare oka pe ñonoí reta yawe, jei iyupe: “Kua kuimbae uyapo’ä mbae umano waerä ani oí waerä peresoriru pe,” jei reta.

<sup>32</sup>Jayawe Agripa jei Festo pe: “Yambopoikata tëi ko kua kuimbae, jae ueka’ä yawe oo uyemboí waerä yanemburuwicha wasu imbaepuerete wae jowai,” jei chupe.

## Hechos 27

### Umbipi wiraa reta Pablo tëta wasu Roma kotí

<sup>1</sup>Jayawe ou ma uwäe ara mburuwicha Festo oremondo waerä iwí Italia kotí tëta wasu Roma pe. Jayawe umee Pablo jare amokue iru pereso reta sindaro reta itenondewa Julio jee wae pe orereraaka waerä. Jokua Julio ko jae mburuwicha wasu imbaepuerete wae isindaro reta pëti wae.

<sup>2</sup>Joko wi ndoo pëti chalana wasu tëta wasu Adramitio jee wae pewa pe. Kua uasata iko iwí Asia tëta wasu mar jembei pe ñonoí wae reta rupi. Jare oo wi ore ndiwe kuimbae Aristarco jee wae. Jae ko tëta wasu Tesalónica pewa. Tesalónica iwí Macedonia pewa ko.

- <sup>3</sup>Piarewe pe ndoo nuwäe tēta wasu Sidón jee wae pe. Jare Julio ipiakawi chupe rupi umaño Pablo re oo waerä opou iru reta pe, jae reta ipuere waerä ombori mbaembae uata chupe wae.
- <sup>4</sup>Joko wi ndoo yuapi ye, jare nduasa iwī i mbite pe oī wae Chipre jee wae ikupe rupi. Echa’ä iwitu orekoti uyepeyu iko ramo.
- <sup>5</sup>Jayawe nduasa Cilicia jare Panfilia jowai rupi, jare ndoo nuwäe iwī Licia pe tēta wasu Mira pe.
- <sup>6</sup>Joko pe sindaro reta itenondewa uwäe pēti chalana wasu iwī Egipto pewa, jare oo oī iwī Italia koti. Jayawe orembuyupi pipe.
- <sup>7</sup>Joko wi jeta ara rupi ndewe rupi ndoo. Jare yawaiete ndoo waerä nuwäe tēta wasu Gnido jowai, iwītu orekoti etei iko ramo. Jare jokua jeko pewa Gnido wi ndoo iwī Creta ikupe rupi iwī Salmón jowai.
- <sup>8</sup>Jare ndoo iwī iyipi rupi, jare añapea ndoo nuwäe Buenos Puertos pe. Kua wi koiño oī tēta wasu Lasea jee wae.
- <sup>9</sup>Jare imaete ma nduwata ramo, ikawi’ä ma iko jekuaeño nduwata waerä mar rupi. Echa’ä uyaro ma roi waerä, jare jokua yasi reta rupi ime täta iwītu jare iaparoa wasu reta. Jayawe Pablo umbiarakuaa tēi joko pe ñonoī wae itenondewa reta jei rewe:
- <sup>10</sup>“Cheiru reta, yaño ñai yawe, che aikuaa ukañita ko tewita reta jare chalana wasu, jare yande reta wi aramoi ñamanota,” jei chupe reta.
- <sup>11</sup>Erēi sindaro reta itenondewa uyapisaka’ä Pablo jei wae re. Jae wirowia katu iko chalana wasu uruwata wae reta itenondewa re jare chalana wasu iya re.
- <sup>12</sup>Echa’ä jokua chalana wasu uyemboirenda mar jembei pe oī wae ikawi’ä ndupita waerä opaete roi wasu iara reta rupi. Jáeramo jeta ore ndiwe ñonoī wae reta uipota ndoo waerä joko wi. Echa’ä jei reta: “Aramoi yandepuere ya ñawäe tēta wasu Fenice pe Creta pewa. Joko pe yandepuere yapita roi wasu iara reta uasa rewa,” jei reta. Fenice ko jae pēti chalana wasu uyemboirenda ikawi wae, echa’ä iwītu täta’ä uyepeyu joko pe.
- <sup>13</sup>Jare iwītu umbipi uyepeyu ndewe ndewe sur koti wi yawe, jae reta wirowia tēi ikawita ko ndoo yuapi ye waerä. Jayawe chalana wasu uruwata wae reta ueupi chalana iyepitasoka reta, jare ndoo Creta iyipi rupi koiño iwī wi.
- <sup>14</sup>Erēi ndei ima ndoo mbowe aramoiño orerowäiti pēti iwītu tätaete wae norte koti wi ou wae. Jokua iwī pewa reta uikuaa opa año uwäe jokua nunga iwītu roi ara pe.
- <sup>15</sup>Jokua iwītu uipota umbiyerowa chalana wasu, jare orepuere’ä ma numisimi iwītu koti. Jayawe numaeño iwītu re orereraa waerä.
- <sup>16</sup>Jare orembiawái iko wi chalana rai chalana wasu jaikue numbitiriri nduraa nduiko wae. Jayawe ndoo yawe iwī michi i mbite pe oī wae Claudia jee wae ikupe rupi, añapea ndupi chalana rai chalana wasu japipe.

**17**Joko wi chalana wasu uruwata wae reta oyokua chalana wasu timasa wasu reta pipe awiye chalana wasu ikumewa waerä. Erëi ukiye reta aramoi oota Sirte jee wae koti, echa'ä joko pe i tip'i'ä ko. Jáeramo umbiweyi reta chalana wasu iyepitasoa ndewe kawi rupi oo waerä.

**18**Jare jekuaeño tãtaete iwitu orewe. Jáeramo piarewe pe chalana wasu uruwata wae reta umbipi omombo reta i pe opaete tewita chalana wasu pe iko wae awiye waerä chalana wasu usakambu.

**19**Jare mbapi ara ma uasa yawe, imeño chalana wasu uipota usakambu. Jáeramo orepo pe etei nomombo i pe opaete tembiporu reta.

**20-21**Jeta ara ma uyekuaa'ä warasi jare yasitata reta, jare ima katu ma ndukaru'ä. Jare jekuaeño wi tãta iwitu orewe. Jae ma chwaa opa numano waerä nduiko tãi. Jayawe Pablo uyemboi orepite pe jare jei: "Pe cheiru reta, piyapisakata tãi ko chiñee re. Awiyeta tãi ko ñaë Creta wi. Añawe pemikañi ma kua mbaembae.

**22**Erëi añawe che tae pewe piñemiatangätu waerä, echa'ä ndarau kía umano yandepite pe. Jaeño chalana wasu ukañita oi," jei.

**23**"Echa'ä piare uyekuaa chewe pëti araiwa cheTumpa ayeyokui chupe wae ombou wae.

**24**Araiwa jei chewe: 'Pablo, awiye ekiye,' jei. 'Echa'ä ndeo ñotái ko ndiyemboi mburuwicha wasu Roma pewa jowai. Jare Tumpa ipiakawi ndewe ramo, uepita wi opaete kua nde ndiwe yuraa ñonoï wae reta,' jei araiwa chewe," jei.

**25**"Jayawe pe cheiru reta, piñemiatangätu. Echa'ä che arowia katu ai cheTumpa, jare aikuaa jokua jae jei chewe wae uyeyapota oi wae.

**26**Erëi iwitu yandereraata pëti iwi i mbite pe oi wae koti. Jare joko pe chalana wasu upäata, echa'ä i tip'i'ä ramo. Jare jokua iwi pe yandepuere yayerepi." Jukuärái Pablo jei chupe reta.

**27**Jare catorce ara ma uasa yawe, iwitu orereraa iko mar Adriático jee wae rupi. Jare piare mbite rupi chalana wasu uruwata wae reta uikuaakuaa yureko koiño ma nduiko iwi wi wae.

**28**Jayawe umbiweyi reta i tipi umianga pipe wae, jare uikuaa reta i tipikue oi treinta y siete metro rupi. Jare ndoo katu ye ma yawe, jae reta umianga ye, jare uikuaa reta i tipikue oi veintisiete metro rupi.

**29**Jayawe chalana wasu uruwata wae reta ukiye reta aramoi chalana wasu uyererokuata ita reta re. Jáeramo umbiweyi reta chalana wasu irundi iyepitasoa reta jaikue kotiwa. Jare uipota echa ma koe waerä tãi chupe reta.

**30**Jare chalana wasu uruwata wae reta uipota tãi oyepo chalana wasu wi. Jáeramo umbiweyi ye reta chalana rai i pe. Jare uipota tãi wirowiaka iru wae reta pe jae reta umbiweyi ñonoï chalana wasu iru iyepitasokarä chalana jenonde koti.



<sup>31</sup>Erëi Pablo jei sindaro reta pe jare itenondewa pe: “Kua reta upita’ä yawe chalana wasu pe, umanota ñonoï. Jare pe reta pemanota wi,” jei chupe reta.

<sup>32</sup>Jayawe sindaro reta uyasía chalana rai ïcha reta, jare umaëño ukañi waerä.

<sup>33</sup>Jare köeta ma iko yawe, Pablo umbiarakuaa opaete joko pe ñonoï wae reta ukaru waerä. Jei chupe reta: “Catorce ara ma piyembipia’ä jare pekaru’ä.

<sup>34</sup>Jáeramo che pumiñera pekaru pepiräta waerä. Echa’ä ndarau uasa pewe mbae awe,” jei chupe reta.

<sup>35</sup>Jare kua jei yawe, Pablo uipisi mbiyape jare umee yasurupái Tumpa pe jese opaete wae jowake. Jayawe upisäa mbiyape jare jou.

<sup>36</sup>Jayawe opaete jae reta uñemiatangätu jare ukaru reta wi.

<sup>37</sup>Jare opaete chalana wasu pe nduiko wae

<sup>276</sup> ko noi.

<sup>38</sup>Jare opa iyangapii reta yawe, omombo reta trigo i pe jare jukuärái umbiwewi katu chalana wasu.

<sup>39</sup>Jare köe ma yawe, nduecha iwi. Erëi kiawe uikuaa’ä jokua iwi. Jare nduecha i jembei jare iwi ipe kawi oi. Jáeramo upita reta omondo waerä chalana wasu jokoti ipuere wae rupi.

<sup>40</sup>Jayawe jae reta uyasía chalana iyepitasoa ïcha reta jare umungúe timón ïcha. Jayawe upi iwitu umiaña chalana wasu pipe michi wae jaikue koti oi wae, jare wiraa iembei koti.

<sup>41</sup>Erëi chalana wasu oo uyererokua iwikuüti re jare upäa ndei oo uwäe iembei pe mbowe. Jayawe chalana wasu iti uyeatika upita jare omi’ä ye. Jare joko pe i iaparoa täta ou uyepete oi jese. Jáeramo umbipi omopë chalana wasu jaikue koti wi.

<sup>42</sup>Jayawe sindaro reta uipota tēi opa uyuka pereso reta, awiye waerä kiawe uitai rewe oë osi.

<sup>43</sup>Erëi sindaro reta itenondewa oyopia sindaro reta, echa’ä uipota uepi Pablo ramo. Jáeramo ipuere uitai wae reta rani oyokui oporise waerä i pe yuraa waerä uwäe iwi pe.

<sup>44</sup>Jare joko wi iru reta oyokui yuraa waerä iwira pe ani ipotawe chalana wasu iperaso uwewi oi wae re. Jare jukuärái opa rewe yuraa kawi uwäe iwi pe.

## Hechos 28

### Pablo iwi i mbite pe oi wae Malta jee wae pe

<sup>1</sup>Opa rewe noë ma ndoo ikatu pe iwi utini wae pe yawe, nduikuaa jokua iwi i mbite pe noi wae yepe jee Malta.

- <sup>2</sup>Jare joko pewa reta ipiakawi orewe. Echa'ä orembiasa kawi jare uyatapi reta, echa'ä ama oki jare roi iko ramo.
- <sup>3</sup>Jare Pablo umbati yepea jare oñono iko tata pe. Aramoiño pëti mboi imbayachiete wae oë yepea wi jaku chupe ramo. Jare uichuu Pablo ipo pe jare jäi upäa jese.
- <sup>4</sup>Jare joko pewa reta uecha yawe mboi Pablo ipo re usawawa oi wae, jei reta iyupe: “Añetete yepe kua kuimbae upuruyuka wae ko. Yepe tēi umano'ä mar pe, erēi ndarau ikoño jupi'ä ramo,” jei reta.
- <sup>5</sup>Erēi Pablo umitimo ipo wi mboi tata pe jare uyeyapo'ä mbae Pablo pe.
- <sup>6</sup>Jare joko pewa reta ipia pe uyemingeta tēi iko iruruta chupe wae jare umano woita. Erēi jae reta uäro tēi ima yawe, uecha uyeyapo'ä mbae chupe wae. Jayawe jae reta jei'ä ma tenonde rami. Jei reta ma: “Kua kuimbae pëti tumpa yepe,” jei reta.
- <sup>7</sup>Jokua iwi pewa reta itenondewa ko jae kuimbae Publio jee wae. Jae ime onoi jokoropi iwi reta. Jae orembiasa kawi jëta pe jare ore ndupita mbapi ara jae ndiwe.
- <sup>8</sup>Publio tu imbaerasi oi jupa pe. Jaku jare jepotiuwi oi. Jayawe Pablo oo umae jese, jare oñono ipo jese uyerure rewe Tumpa pe, jare uminguera.
- <sup>9</sup>Jare kua jeräkua yawe, iiru imbaerasi wae reta jokua iwi pewa yuweru. Jare Pablo uminguera reta wi.
- <sup>10</sup>Jáeramo joko pewa reta orembutuichaete. Jare ndei nduyupi mbowe ambie chalana wasu pe ndoo ye waerä, jae reta ueru umee orewe jeta mbaembae reta mar rupi nduiporu waerä.

### **Pablo oo uwäe tēta wasu Roma pe**

- <sup>11</sup>Jare mbapi yasi ma uasa yawe, joko wi ndoo pëti chalana wasu tēta wasu Alejandria pewa pe. Jokua chalana wasu upita joko pe roi wasu iara reta uasa rewa. Chalana wasu itī re oi iwira pewa tumparaanga chowakiri jaanga Cástor jare Pólux jee wae.
- <sup>12</sup>Jayawe ndoo nuwäe tēta wasu Siracusa pe, jare ndupita joko pe mbapi ara rupi.<sup>13</sup>Jayawe joko wi ndoo yuapi ye jare nuwäe tēta wasu Regio jee wae pe. Jayawe piarewe pe iwitu uyepeyu sur koti wi, jare piarewe ye pe ramo ndoo nuwäe tēta wasu Puteoli jee wae pe.
- <sup>14</sup>Jare joko pe aramoiño nuñeñowäiti amokue wae Cristo re wirowia wae reta ndiwe. Jare jae reta uparea orewe ndupita waerä jae reta ndiwe chiu ara pewa. Joko wi ndoo yuapi ye tēta wasu Roma koti.
- <sup>15</sup>Jare orereräkua Cristo re wirowia wae reta Roma pewa pe. Jayawe amokue jae reta yuweru orerowäiti tēta wasu rai Foro Apio jee wae pe. Jare iiru wae reta yuweru orerowäiti tēta wasu rai Mbapi Tabernas jee wae pe. Jare Pablo uecha reta yawe, umee yasurupai Tumpa pe jare uñemiatangätu.

<sup>16</sup>Jayawe ndoo nuwäe tēta wasu Roma pe yawe, sindaro reta itenondewa oñono'ä Pablo peresoriru pe. Umaeño jese iko waerä pēti tēta pe jaēño pe etei. Erēi oyokui jekuaeño oī waerä pēti sindaro jae ndiwe uyandareko waerä jese awiye osi waerä.

### **Pablo uyemingeta judío itenondewa reta ndiwe Roma pe**

<sup>17</sup>Joko wi mbapi ara ma uasa yawe, Pablo uenika judío jokoropiwa itenondewa reta. Jare yuweru uyembati reta yawe, Pablo umbipi uyemingeta jae reta ndiwe jei rewe: “Cherētara reta, yepe tēi ayawi'ä ñanerētara reta koti, jare yanderamikue reta jeko koti, erēi jesewe Jerusalén pewa mburuwicha reta chepisi chemee romano reta pe cheyukaka reta waerä tēi,” jei chupe reta.

<sup>18</sup>“Erēi mburuwicha romano reta uwäe'ä etei teko ikawi mbae wae cheré amano waerä. Jáeramo uipota chembopoika reta waerä tēi,” jei.

<sup>19</sup>“Erēi judío itenondewa reta Jerusalén pewa uipota'ä chembopoika waerä, jare mburuwicha romano reta uyapisaka jese reta. Jáeramo che aipota a ayemboi waerä mburuwicha wasu kua Roma pewa jowai jae jei waerä ime ra anoi teko wae. Erēi añeapota'ä ai Jerusalén pewa itenondewa reta re jae jowai,” jei chupe reta.

<sup>20</sup>“Jayawe che puenika peyu waerä kua pe pepou waerä chepi jare yayemingeta waerä. Che aipota jae pewe wae ko kua: amokue wae reta cheñonoka kua cadena pe, echa'ä che arowia ai ou ma ko Upuruepi wae Tumpa jei ombouta iko yandewe wae,” jei Pablo chupe reta.

<sup>21</sup>Jayawe judío itenondewa reta jei Pablo pe: “Kía nungawe ombou'ä orewe tupapire iwi Judea wi nde rewa. Jare ñanerētáiwa jokoropiwa reta ou opou orepi reta yawe, jei'ä orewe mbae ikawi mbae wae ndekoti,” jei reta.

<sup>22</sup>“Erēi jeräkua orewe opaete kerupi jei reta ikawi'ä ko kua yemboe wae. Jáeramo nduipota nduyandu nduikuaa waerä ndeporomboe wae rewa,” jei reta chupe.

<sup>23</sup>Jayawe jae reta upita pēti ara yuweru uyapisaka reta waerä Pablo oporomboe wae re.

### **Pablo umimbeu ñee ikawi wae Cristo rewa Roma pe**

Jare jokua ara uwäe yawe, yuweru ye jokua judío itenondewa reta jeta iru wae reta ndiwe. Jayawe opaete uyembati reta Pablo oī wae pe. Jare jokua ndimbowe wiwe kaaruete rewa Pablo oporomboe. Jae umimbeu chupe reta kērái yandeRu Tumpa ombou Jesús iko waerä judío reta imburuwicha wasurä jaēño mái pewa. Jae uikuaaka wi chupe reta Jesús rewa Moisés uikuatía wae rupi jare iru kuimbae Tumpa ñee arakae umimbeu wae reta uikuatía wae rupi. Jukuärái oporomboe Pablo, echa'ä jae uipotaete jae reta wi wirowia waerä Jesús re ramo.

<sup>24</sup>Jare amokue wae jae reta ipite wi wirowia Pablo jei wae re, erēi iru wae reta wirowia'ä.

<sup>25</sup>Jare umbipi uyeaka reta Pablo oporomboe wae re. Jayawe ndei yuraa ye reta mbowe, Pablo jei chupe reta: “Kērái Espíritu Santo jei arakae Isaías rupi yanderamikue reta pe, jukuärái wi pemaerä. Echa'ä jae jei Isaías pe kuärái:

<sup>26</sup>‘Ekua ere Israel pewa reta pe che jae aï chupe reta kuärái: ‘Piyanduta tēi chiñee, erēi pikuaata’ä etei. Pechata tēi che mbaembae ayapo wae, erēi ndarau pikuaa kawi.’

<sup>27</sup>Jukuärái ere chupe reta, echa’ä jae reta ipiatäta uyeyapo chekoti. Iyapisa oyopi reta awiye waerä uyandu chiñee. Jare usapimi reta awiye waerä uecha mbaembae ayapo wae. Erēi jae reta moná uyandu chiñee yawe jare uecha reta ayapo wae yawe, ipia rewe uikuaa kawita reta jare uyerowata reta chekoti che aepi reta waerä.’ Jukuärái jei Espiritu Santo,” jei Pablo chupe reta.

<sup>28</sup>Jare Pablo jei wi jokua judío reta pe: “Pikuaa kawi kua: Tumpa umbipi ma uikuaaka judío mbae wae reta pe kërái rupi ipuere onoi reta waerä tekowe opa mbae wae Tumpa ndiwe. Jare jae reta uyapisakata jese,” jei Pablo chupe reta.

<sup>29</sup>Jayawe Pablo opa ma uyemingeta yawe, jae reta uyeaka rewe yuraa ye joko wi.

<sup>30</sup>Jaikue rupi Pablo umbipi jokua tēta iko pipe waerä mokui año rupi. Jare jokua tēta pe iko rambuwe, jae umbiasa kawi opaete yuweru opou ipi wae reta.

<sup>31</sup>Jare ukiye mbae rewe jekuaeño oporomboe yandeYa Jesucristo rewa jare këraita oï mbaembae Jesús oï ma yawe opaete wae imburuwicha wasurä jaeño mái pewa. Jare jokua mokui año rupi, mbaeti kiawe umbiawái Pablo wae.

## Romanos

### Kua tupapire rewa:

Kua tupapire Pablo uikuatía jare wiraaka Cristo re wirowia wae reta pe tēta wasu Roma pewa pe. Pablo pe jae reta jeräkua, jare Pablo uipota oo opou ipi reta omboe kawi reta waerä. Erëi ipuere'ä oo imambae. Jáeramo wiraaka chupe reta kua tupapire jokoropi umbiarakuaa kawi reta waerä. Kua tupapire yanemboe kawiete kërái yayeapikatu waerä Tumpa ndiwe – jae ko Jesucristo re yarowia wae rupi, jare mbaeti ko mbaembae ikawi wae yayapo wae rupi.

### Romanos 1

#### Pablo umbipi uikuatía tupapire

<sup>1</sup>Che ko jae Pablo, Jesucristo pe ayeyokui wae. Tumpa chereni chemondo waerä opaete kerupi jae jee re amimbeu waerä ñee ikawi wae. Jokuaerä etei ko jae cheñono tee. Kua ñee ikawi wae Tumpa wi etei ko ou.

<sup>2</sup>Jare jae ko ñee Tumpa jei arakae rupi uikuaakata iko yandewe wae. Echa'ä jukuärái uikuatía Tumpa ñee arakae umimbeu wae reta Tumpa ñeeriru jupi wae rupi.

<sup>3</sup>Jare kua ñee ikawi wae uikuaaka yandewe Tumpa Tai rewa. Jae ou kua iwi pe uyeyapo pēti kuimbaerä, jare jae ko arakae mburuwicha wasu David jee wae ñemoña rupi outa iko wae.

<sup>4</sup>Jare Tumpa uikuaaka yandewe kua uyeyapo kuimbaerä wae, jae ko Tai wae. Echa'ä Espiritu Santo rupi Tumpa umbijekowe ye ueru umanokue wae reta ipite wi imbaepuere tuichaete wae rupi. Kua Tumpa Tai, jae ko yandeYa Jesucristo etei.

<sup>5</sup>Kua Jesucristo uyekuaaka chewe ipiakawi rupi. Jare jukuärái Tumpa chemondo opaete iwi rupi amimbeu waerä opaete judío mbae wae reta pe, jae reta wi wirowia waerä yandeYa Jesucristo re jare jukuärái uyapo reta waerä Jesús jei wae. Jare kua mbarawiki ayapo ai Jesucristo jee uyembutuichaka waerä.

<sup>6</sup>Jare amokue pe judío mbae piko wae reta wi Tumpa pereni ma piko waerä Jesucristo imaerä.

<sup>7</sup>Aikuatía ai pewe kua tupapire mii opaete tēta wasu Roma pe piko wae pe, Cristo re perowia wae reta pe. Tumpa perau jare pereni piko tee waerä jae imaerä. YandeRu Tumpa jare yandeYa Jesucristo jekuaeño tipiakawi pewe jare tuyapo pewe piko waerä pepiakatu rewe.

#### Pablo uipota tēi oo opou Roma pewa reta pe

<sup>8</sup>Ambipi waerä kua tupapire, aipota amee yasurupái Tumpa pe Jesucristo mbaembae uyapo yandewe wae re. Jae nunga wi amee ai yasurupái chupe peré, echa'ä jeräkua oi opaete iwi rupi perowia pei Cristo re wae.

<sup>9</sup>Jare aipota pikuaa waerä wi che jekuaeño ayerure ai peré. Kua che jae ai Tumpa jowake, echa'ä chupe ko ayeyokui ai chekirëi rewe amimbeu ai rambuewe ñee ikawi wae Tumpa Tai rewa.

<sup>10</sup>Che ayerure ai wi Tumpa pe, jae uipota yawe, uipea waerä chewe tape chepuere waerä a apou pepi.

<sup>11</sup>Aipota apou pepi, echa'ä aikuaa Espiritu Santo uipota uyapo ikawi wae pewe che rupi pepiräta waerä Tumpa koti.

<sup>12</sup>Jare kuaño'ä ko. Jae nunga wi aipota pe reta wi chemikirëi waerä. Echa'ä che wi chekirëita aecha yawe këräi pe reta perowia Cristo re. Jare jukuäräi yandepuereta ñañemikirëi waerä päwe rewe kuri.

<sup>13</sup>Erëi, hermano mii reta, aipota pikuaa kawi waerä kua: Jeta wese ma aipota tëi a apou pepi, erëi jekuaeño mbae chembiawái añawe ara rewa. Aipota pombori pekuakuaa kawi waerä Tumpa koti këräi iru judío mbae wae reta ambori rami.

<sup>14</sup>Tumpa umee chewe mbarawiki amimbeu waerä ñee opaete wae pe – jae ko uyemboe wae reta jare uyemboe mbae wae reta, ñana rupi yureko wae reta jare tëta rupi yureko wae reta wi. Imeta ko amimbeu opaete wae pe.

<sup>15</sup>Jáeramo aipotaete apou pepi tëta wasu Roma pe piko wae reta pe, chepuere waerä amimbeu pewe wi ñee ikawi wae.

### **Tumpa yanderepi ñee ikawi wae Cristo rewa yarowia ramo**

<sup>16</sup>Mbaeti etei chemara amimbeu waerä ñee ikawi wae Cristo rewa. Echa'ä opaete jokua ñee re wirowia wae reta, Tumpa uepita oi reta imbaepuere rupi mbaembae uyawi reta ikoti wae wi. Jare jukuäräi ndarau omombo reta Tatawasurenda pe. Tenonde kua ñee ikawi wae ou judío reta pe rani, erëi añawe ou ma wi judío mbae wae reta pewartä.

<sup>17</sup>Kua ñee ikawi ko, echa'ä uikuaaka yandewe këräi rupi Tumpa umae yanderé yandereko mbae wae rami – jae ko Cristo re yarowia wae rupi. Jare jukuäräiño mái iyipi wiwe jare jukuäräita oo oi ara taikuewa rewa – jaeño Cristo re yarowia wae rupi. Jukuäräi yaikuaa, echa'ä Tumpa ñeeriru pe uyekuatía oi kuäräi: “Ipotawe kía wirowia Tumpa re wae, Tumpa umae jese jeko mbae wae rami, jare jae uyekouta oi tekowe ipiau wae re.” Jukuäräi uyekuatía oi.

### **Tumpa iarasi iwi pewa reta koti**

<sup>18</sup>Erëi Tumpa ara wi uikuaaka oi këräi jae pochiete oi wirowia mbae jese wae reta koti jare mbae ikawi mbae wae uyapo wae reta koti. Jare jupi ko jae këräi uiporaraka chupe reta waerä. Echa'ä yepe tëi jae reta uikuaa añetete wae Tumpa rewa, erëi jae reta jeko kachi rupi oyopia ñonoï jokua arakuaa.

<sup>19</sup>Jae reta uikuaa tëi Tumpa rewa, echa'ä Tumpa etei uyekuaaka chupe reta këräi ko jae wae.

<sup>20</sup>Añetete ko, mbaeti kiawe ipuere uecha Tumpa. Erëi opaete mbaembae yaecha wae Tumpa ko uyapo. Jayawe iwi uyembipi wiwe, iwi pewa reta uikuaa Tumpa rewa kërái jae mbaembae uyapo wae rupi. Yandepuere yaikuaa kërái ko imbaepuere opa mbae wae jare jaeño ko Tumpa wae. Jáeramo kiawe ipuere'ä jei: "Che aikuaa'ä aiko Tumpa rewa," jei waerä.

<sup>21</sup>Jayawe yepe tõi uikuaa reta Tumpa rewa jae mbaembae uyapo wae rupi, erëi jeseuwe umbutuicha'ä reta jae jee. Umee'äwe reta wi yasurupái chupe opaete jae mbaembae uyapo wae re. Jaeño opa uyembojopa reta ipiayemingeta rupi Tumpa wi. Jare jae reta ipiayemingeta opa uñemipitumimbi ramo, ipuere'ä etei uikuaa kawi reta mbae ikawi wae rewa.

<sup>22</sup>Jae reta iyarakuaa katu wae echa umae tõi iyé. Erëi jae retái uyeyapo iyarakuaa mbae echa.

<sup>23</sup>Jáeramo jae reta umbutuicha'ä Tumpa ikoño mái wae jee. Jaeño umbiadora reta kuimbaeraanga re jare kuñaraanga re, yepe tõi kuimbae jare kuña Tumpa rami'ä ko jare umanota ko. Jae nunga wi umbiadora reta wiraraanga reta re, jare mbaemimbaraanga reta re, jare iwi rupi uyewichi waeraanga reta re wi.

<sup>24</sup>Jáeramo Tumpa ipiatiti rewe opa ueya reta uyapo reta waerä mbaembae kachi wae ipiayemingeta jei wae rupi. Jae reta uyapo awasa opa kërái rái rupi, jare jukuärái uyapo reta iyupe mbaembae kachiete wae jete pe.

<sup>25</sup>Jae reta uikuaa tõi iko Tumpa rewa añetete wae, erëi uipota wirowia reta apu re. Echa'ä jokua mbaembae Tumpa etei uyapo wae, jae reta umbiadora jese reta jare uyeyokui wi chupe reta. Yepe tõi Tumpa jee uyembutuichakata oï jaeño mái pewa, erëi jae reta mbaeti umbutuicha Tumpa jee.

<sup>26</sup>Jáeramo, jokua jeko pewa Tumpa ipiatiti rewe opa ueya reta uyapo reta waerä mbaembae kachiete wae. Imeta tõi ko jae reta imara uyapo waerä jokua mbaembae. Echa'ä jeta kuña retawe umbipi uyepota jae yepái umae iyé jare uyerereko reta. Erëi Tumpa uyapo'ä kuña reta jukuärái yureko waerä tõi.

<sup>27</sup>Jae ramiño wi jeta kuimbae reta uipota'ä ma oroke jembireko. Jare umbipi uyepota reta kuimbae yepái umae iyé jare uyerereko reta wi. Yepe tõi Tumpa uyapo'ä kuimbae reta jukuärái yureko waerä, erëi uyapoñoi reta. Ñanemara rape tõi ko, erëi jae reta mbaeti etei imara. Jáeramo jokua jeko pewa jae reta uiporara ma ñonoï jete pe. Jare jupi ko Tumpa uiporaraka waerä chupe reta jukuärái, echa'ä jae reta uyembisiri mbiriete ye Tumpa wi.

<sup>28</sup>Jayawe opaete wae uikuaa tõi yureko Tumpa rewa, erëi jeseuwe opaete seri opa umbisiri iyuwi jokua arakuaa. Jáeramo Tumpa ipiatiti rewe opa ueya reta uyemingeta reta waerä ipia pe opaete mbaembae ikawi mbae wae re. Jare jokua jeko pewa jae reta añawe rewa jekuaeño uyapo opaete mbaembae ikawi mbae wae Tumpa jowai.

<sup>29</sup>Jae reta jekuaeño uyapo mbae jupi mbae wae, jare iawasapota reta. Jekuaeño uipotaete reta korepoti jae reta imaeräño. Jare uyapoñoi reta mbae ikawi mbae wae.

Iñemirose reta. Upuruyuka reta. Iyeakase reta. Upurumbitawi reta. Jeko kachi reta. Jare indayepota reta.

<sup>30</sup>Jae nunga wi jae reta kachi uyemingeta japicha koti. Uñamitaa reta Tumpa. Jeko pochi reta. Uyembikate reta. Uyemingeta reta uyembutuicha rewe. Ipiã pe uyemingeta reta mbaembae kachi wae uyapo waerã. Uyapo'ã reta tu jare ichi jei wae rupi.

<sup>31</sup>Iyarakuaa mbae echa reta ko. Uyapo'ã reta jae reta jei wae. Upuruau'ã etei reta. Uiparareko'ã etei japicha reta. Jukuãrãi ko jae reta.

<sup>32</sup>Jare jokuaño'ã ko, echa'ã jae reta uikuaa kawĩ tẽi ko kërãi Tumpa jei: “Opaete kua mbaembae uyapo wae reta tumano.” Erẽi yepẽ tẽi uikuaa reta, jeseuwe mbae'ã chupe reta. Jekuaeño uyapo reta jokua mbaembae ikawi mbae wae. Jare ñru reta wi uyapo yawe mbae ikawi mbae wae, chupe reta ikawi ko. Jukuãrãi ko opaete wirĩro Tumpa wae reta.

## Romanos 2

### Mbae jei Pablo uyererowia katu wae reta pe

<sup>1</sup>Aramoi imeta kĩa ipuere jei yandewe jupi ko Tumpa uiporaraka waerã jokua jeko kachi wae reta pe. Erẽi che tae jukuãrãi uyemingeta wae pe kuãrãi: Nde ndere yawe jukuãrãi, ndiyembijeko ma ko neĩ wi, echa'ã nde ndiyapo wi ko jokua nunga etei teko ikawi mbae wae. Jáeramo jupi ko Tumpa uiporaraka waerã ndewe wi, ipotawe wae rami ko nde wi.

<sup>2</sup>Yaikuaa ñãi Tumpa uyapo oĩ jupi wae rupi jae uiporaraka yawe jokua teko ikawi mbae uyapo wae reta pe.

<sup>3</sup>Jáeramo, ¿kërãita pa nde nderowia Tumpa ndarau uiti iarasi nderé? Echa'ã yepẽ tẽi nde ndere jupi ko Tumpa uiporaraka waerã ñru wae reta pe mbae ikawi mbae wae uyapo reta wae re, erẽi nde etei wi ndiyapo jokua nunga ikawi mbae wae.

<sup>4</sup>Añawe Tumpa ipiakawi oĩ ndewe jare ipiawasu oĩ ndewe; jáeramo ndeño uiporaraka oĩ ndewe. Erẽi nemaerã, mbae'ã chwaa oĩ ndewe. Erẽi aipota ndikuaa waerã kua: Tumpa ipiakawi oĩ ndewe ndeya waerã ndepiayemingeta jupi mbae wae Tumpa rewa.

<sup>5</sup>Erẽi nde ndipota'ã ndeya jare jekuaeño ndepiatãta neĩ. Jare jokua jeko pewa Tumpa iarasi wasu jekuaeño ukuakuaa oĩ ndekoti. Jare Tumpa jokua uitãta oĩ nderé uwãe yawe ara opaete iwĩ pewa reta uyemboi waerã jae jowai jae jei waerã jae reta jeko re. Jare jokua ara ramo Tumpa uiporarakata oĩ ndewe tãta rupi.

### Tumpa umiñatimata oĩ yandewe kërãi mbaembae yayapo wae rupi

<sup>6</sup>Jokua ara Tumpa umiñatimata oĩ yandewe kërãi mbaembae yayapo wae rupi.

<sup>7</sup>Echa'ã amokue wae reta ikirẽiete uyembutuichaka Tumpa pe. Jare uipota yureko reta jaẽño mãi pewa Tumpa ndiwe. Jáeramo jae reta uyapo ikawi wae. Jare Tumpa umeeta chupe reta tekowe opa mbae wae.



<sup>8</sup>Erëi iruwe reta jukuäráí'ä ko. Jae reta jaeño uipota yureko jae reta jei wae rupiño. Jae reta wirowia'ä añetete wae jare uipota uyapo reta mbae jupi mbae waeño. Jáeramo Tumpa uiporarakata iarasi rewe chupe reta. Jukuäráí uyapota oí jokua ara opaete wae uyemboi yawe jae jowai.

<sup>9</sup>Jayawe jokua ara opaete mbae ikawi mbae wae uyapoñoi wae reta uiporarata ko ikuasi katu rupi – judío reta, jare judío mbae wae reta wi.

<sup>10</sup>Erëi Tumpa umae kawita oí opaete ikawi wae uyapo wae reta re. Jae umae kawita jese reta uyerowia rewe opaete wae reta jowake, jare jae reta upitata ipiawiwe rewe. Jukuäráita ko judío reta pewarä, jare jae nunga wi judío mbae wae reta pewarä.

<sup>11</sup>Tumpa pewarä mbaeta'ä kía ko jae reta wae, echa'ä Tumpa umae oyowake opaete wae re.

### **Judío jare judío mbae wae reta mokui rewe ko onoi teko Tumpa jowai**

<sup>12-13</sup>Añetete judío jare judío mbae wae reta oyowakeño uyemboita ñonoí Tumpa jowai jae jei waerä jae reta jeko re. Jare Tumpa uiporarakata oí judío reta pe. Echa'ä Moisés arakae uikuaaka kawi jae reta tamikue reta pe kërái Tumpa uipota wae – jae ko mbaembae uyapota ko reta wae jare mbaembae awiyeta ko uyapo reta wae. Erëi judío reta mbaeti uyapo kawi Tumpa jei wae rupi. Jare Tumpa pewarä mbae'ä ko kía uikuaaño yawe jae jei wae. Imeta ko uyapo wi Tumpa jei wae Tumpa umae waerä jese jeko mbae wae rami. Jare judío reta mbaeti uyapo ñonoí jokua. Jare judío mbae wae reta, yepe tõi Moisés uikuaaka'ä chupe reta Tumpa uipota wae, erëi jae reta wi Tumpa omombota iyuwi jaeño mái pewa.

<sup>14</sup>Echa'ä jae retawe wi uikuaa tõi amokue mbaembae Tumpa jei wae mbaeti kía umimbeu chupe reta rewe. Erëi uyawiñoi reta. ¿Kërái ra uikuaa reta Tumpa jei wae? Añetete ko jae reta uikuaa. Echa'ä amo pe jae reta uikuaa mbae rewe yurekoño Tumpa jei wae rupi.

<sup>15</sup>Amo pe jae reta uikuaa teko onoi mbaembae kachi uyapo reta ramo, jare amo pe uyembipiakatu reta mbae ikawi wae uyapo reta yawe. Jukuäráí jae reta uikuaaka ñonoí ime ko oí Tumpa jei wae ipia pe wae. Jayawe jupi ko Tumpa uiporarakata waerä chupe reta wi, echa'ä uyawi reta jokua Tumpa jei wae ipia pe oí wae.

<sup>16</sup>Jayawe Tumpa mbaetita iñakañi jokua mbaembae reta wi, iwi pewa reta uyemboi yawe jae jowai. Jokua ara ramo Tumpa oñonota Jesucristo jei waerä jae reta jeko re opaete mbaembae uyapo reta wae rupi, jare mbaembae uyapo wiari ñonoí wae rupi wi. Jekuaeño jukuäráí chemiäri, ñee ikawi wae amimbeu aï wae rupi.

### **Judío reta uikuaa tõi Tumpa jei wae, erëi uyapo'ä reta**

<sup>17</sup>Añawe che aipota jae kua mbaembae opaete ore judiorä nduiko wae reta pe. Moisés arakae uikuatía yandewe mbaembae Tumpa jei wae. Jare jeta pe reta perowia tõi Tumpa umae kawita oí peré jae jei wae pikuaa ramo. Jare pere tõi piyembutuicha rewe: “Ore ko jae judío reta. Ore nduikuaa Tumpa.

<sup>18</sup>Jare nduikuaa Tumpa uipota wae, echa'ä nduyemboe ma jae jei wae re. Jáeramo ore nduikuaa noï ikawiete ye wae," pere tēi chupe reta. Jukuärái pe reta piyembutuicha pei.

<sup>19</sup>Jare pe reta pere tēi wi peyupe kuärái: "Judío mbae wae reta jesa mbae echa wae ko, jare pītumimbi pe ñonoï reta rami uikuaa'ä reta Tumpa ramo. Erēi yande yandepuere ñamimae reta jare yaechaka chupe reta tembipe.

<sup>20</sup>Echa'ä yande yaikuaa Tumpa jei wae, jare jukuärái yaikuaa opaetei Tumpa rewa jare añetete wae. Jáeramo yepe tēi jae reta iyarakuaa'ä jare ñonoï reta sambiai rami, erēi yande yandepuere yamboe kawi reta." Jukuärái pere tēi peyupe.

<sup>21</sup>Jaekawi. Añawe aipota apirandu pewe amokue mbaembae reta re. Pe reta pemboe pei iiru wae reta, erēitu pe reta, ¿maera pa piyemboe'ä? Pemboe pei iiru wae reta awiye waerä imonda, erēi pe reta, ¿pemonda'ä ra?

<sup>22</sup>Pe reta pemboe pei iiru wae reta awiye waerä uyapo awasa, erēi ¿pe reta jukuärái'ä ra? Jare piñamitāa pei tumparaanga reta, erēi ¿piyekou'ä ra mbaembae piñomi jokua tumparaanga jēta wi wae re?

<sup>23</sup>Jayawe yepe tēi pe reta piyererowia katu piyé Tumpa jei wae pikuaa ramo, erēi piyapo'ä jupi rupi jae jei wae. Jare jokua jeko pewa pemimichika pei Tumpa jee.

<sup>24</sup>Tumpa iñeeriru pe uyekuatía oï kuärái pe rami wae reta re: "Pereko pewa judío mbae wae reta jei ikawi mbae wae Tumpa koti." Jukuärái uyekuatía oï. Jayawe ¿mbae re ra yayemboe ñai kua pe? Yepe tēi pe reta ko jae judío reta, erēi jupi ko Tumpa uiporaraka waerä pewe wi.

### **Tumpa ipia umbiambie chuwi wae retaño ko jae imaerä etei**

<sup>25</sup>Erēi aramoi pe reta piyemingeta tēi pei pepia pe: "Tumpa ndarau uiporaraka chewe, echa'ä che ko jae ayembicircuncidaka wae. Tumpa chapo ma jae imaerä," pere tēi. Erēi awiyeta ko perowia jukuärái. Echa'ä jaeño ikawita tēi pewe piyembicircuncidaka wae, jekuaeño piyapo yawe opaete Tumpa jei wae rupi. Erēi piyawi yawe Tumpa jei wae, jayawe Tumpa pewarä mbae'ä ko piyembicircuncidaka pei wae. Oyowakeño pei uyembicircuncidaka mbae wae reta rami – jae ko judío mbae wae reta rami.

<sup>26</sup>Jae ramiño wi pēti judío mbae wae, yepe tēi uyembicircuncidaka wae'ä ko, erēi jae uyapo yawe jupi Tumpa jei wae rupi, ¿ndarau yerá Tumpa uma kawi jese?

<sup>27</sup>Jáeramo jokua judío mbae wae jeita oï Tumpa uyapo ko jupi rupi uiporaraka waerä pewe. Jukuärái jeita, echa'ä yepe tēi opaete Tumpa jei wae uyekuatía oï pewe, jare yepe tēi piyembicircuncidaka pei, erēi pe reta piyawíñoi Tumpa jei wae.

<sup>28</sup>Ipuere ko kía judío. Jare ipuere ko uyembicircuncidaka oï. Erēi jokua uipota'ä jei jae ko judío añetete wae Tumpa jowai. Uipota'ä jei jae ko oï Tumpa pewarä.

<sup>29</sup>Tumpa imaerä añetete wae reta ko jae kía kía ipia Tumpa umbiambie chuwi wae reta. Jare jokua uyekuaa'ä yanderete pe – jaeño oï yandepia pe. Jare kua ko Tumpa

uyapo Espiritu Santo rupi – mbaeti ko Moisés arakae uikuatía wae rupi. Jare jokua nunga retará yaiko wae re Tumpa umae kawita, yepe tēi ĩru wae reta aramoi umae kawita’ä yanderé.

### **Romanos 3**

#### **Tumpa jekuaño uyapo jupi rupi uiporaraka waerä teko onoi wae reta pe**

<sup>1</sup>Jayawe ¿maera ra ikawi judiorä yaiko wae? Jare ¿maera ra ikawi yayembicircuncidaka wae?

<sup>2</sup>Che tae jaekawiete ko judiorä yaiko wae. Echa’ä Tumpa umee yandewe ĩnee yayandareko kawi waerä jese awiye waerä ukañi.

<sup>3</sup>Erēi aramoi kía jeita: “Jukuärái tēi añetete. Erēi amokue yande judío yaiko wae reta yarowia’ä Tumpa ĩnee re. Jáeramo Tumpa ndarau uyapo mbaembae jae jei uyapota tēi yanemaerä wae.” Jukuärái ipuere jei tēi kía. Erēi ¿añetete ra Tumpa ndarau uyapo jae jei yandewe wae?

<sup>4</sup>¿Uyapota ko! Echa’ä yepe tēi opaete iwi pewa reta iyapu wae reta ko, erēi Tumpa jekuaño uyapo jupi jae jei wae rupi. Jukuärái yanderamikue David arakae uikuaa. Echa’ä jae uikuatía kuärái: “CheRu Tumpa, nde ndiyemingeta yawe, uyekuaata taikue rupi jokua nde ndere wae añetete ko. Jare yepe tēi ko kuimbae reta nembijeko, erēi ndarau nemaño niñemiamirika waerä chupe reta.” Jukuärái David arakae uikuatía. Jayawe Tumpa jekuaño uyapo jupi rupi jae jei wae.

<sup>5</sup>Erēitu amokue wae reta jekuaño wirowia tēi ñonoĩ jupi’ä ko Tumpa uiporaraka waerä chupe reta. Ipuere jae reta jei tēi kuärái: “Yamboyowake yandereko Tumpa jeko ndiwe yawe, uyekuaa Tumpa jupiete ye wae ko. Jare jukuärái jae jee uyembutuichakata oĩ yandereko pewa. Jáeramo jupi’ä ko Tumpa uiporaraka waerä yandewe, echa’ä yandereko kachi rupi jae jee uyembutuichaka oĩ.” Jukuärái ipuere jei reta tēi.

<sup>6</sup>Erēi jukuärái’ä ko. Echa’ä Tumpa uiporaraka’ä yandewe yandereko kachi re yawe, ¿këraita pa yandepuere yarowia jese uiporaraka waerä ĩru wae reta pe jupi rupi?

<sup>7</sup>Erēitu amokue wae reta jekuaño jei tēi wi kuärái: “Añetete ko chapu ma. Erēi kua jaño uechaka kërái Tumpa jupiete ye wae ko chewi. Jáeramo jupi’ä ko Tumpa chembijeko waerä chapu rupi, echa’ä chapu rupi jae jee uyembutuichaka oĩ,” jei tēi reta.

<sup>8</sup>Erēi jukuärái’ä ko. Echa’ä añetete yandapu rupi Tumpa jee uyembutuichaka oĩ yawe, jayawe yandepuere tēi yae wi: “Jaekawiño yayapo waerä mbae ikawi mbae wae jayawe, Tumpa jee uyembutuichaka waerä.” Jare amokue wae reta jei tēi ore jukuärái ndoporomboe noĩ, erēi iyapu ñonoĩ reta. Chupe reta ko Tumpa uiporarakata oĩ, jare jupi ko jukuärái jae uyapo waerä.

#### **Mbaeti ko kiawe jupi Tumpa jowai**

<sup>9</sup>Jayawe, ¿mbae pa añawe yaecha ñai kua pe? ¿Yande judiorä yaiko wae reta ikawi katu ra ñai judío mbae wae reta wi? Mbaeti ko. Echa'ä yaecha ma kërái judío reta jare judío mbae wae reta mokui rewe ko yayawi Tumpa koti, jare jukuärái ime ñanoi teko Tumpa jowai.

<sup>10</sup>Jukuärái jei wi Tumpa iñeeriru pe, echa'ä uyekuatía oï joko pe kuärái: “Mbaeti ko pëti awe jeko mbae wae.

<sup>11</sup>Mbaeti ko kiawe uikuaa kawi Tumpa rewa. Mbaeti ko kiawe ueka Tumpa wae.

<sup>12</sup>Opaete wae reta uyerowa ma Tumpa wi jare opa ma uñererükumewa reta. Mbaeti ko kiawe uyapo ikawi wae, mbaeti ko pëti awe.”

<sup>13</sup>“Jae reta uyemingeta wae, kachiete utimbo pëti teöweriru uyasoi mbae oï wae rami. Uyemingeta reta yawe, upurumbitawiñoi reta.” “Jare opaete mbae jei reta japicha koti wae jasiete, mboi imbayachi jasiete wae rami.”

<sup>14</sup>“Iyuru wi jekuaeño oë ñee yepipeyu pewa jare ñee mbaembasi pewa reta.”

<sup>15</sup>“Jare pochi rái upuruyuka reta waerä.

<sup>16</sup>Ipotawe kerupi oï reta wae rupi uyapoñoi reta opaño kërái rái rupi upurumbipiatiti waerä jare uyuwanga katu waerä japicha re.

<sup>17</sup>Jare uikuaa'ä etei yureko reta waerä ipiakatu rewe ñru wae reta ndiwe.”

<sup>18</sup>“Jare mbaeti etei uipiu reta Tumpa wi.” Jukuärái uyekuatía oï.

<sup>19</sup>Yaikuaa ñai kua uyekuatía oï Tumpa iñeeriru pe wae uyemingeta oï yande judiorä yaiko wae reta re wi. Jare uyekuatía oï jukuärái awiye waerä yandepuere yayerepi Tumpa jowai. Añetete kua ñee reta rupi yaikuaa yande ñanoi teko Tumpa jowai, opaetei yande judío jare judío mbae yaiko wae reta wi.

<sup>20</sup>Jare awiye yarowia yandepuere yayembujupi Tumpa koti yayapo yawe jupi opaete Tumpa jei wae rupi. Echa'ä ndarau kiawe uyapo jupi opaete Tumpa jei wae rupi. Moisés arakae uikuatía yandewe Tumpa jei wae, jokoropi yaikuaa kawi waerä yayawi ma ko Tumpa koti wae.

### **Tumpa umae yanderé yandereko mbae wae rami yarowia yawe Jesucristo re**

<sup>21</sup>Erëi añawe Tumpa uikuaaka ma yandewe kërái ñai waerä yandereko mbae wae rami jae jowai, erëi kua mbaeti ko opaete Moisés arakae uikuatía wae re yaiko wae rupi. Jukuärái Moisés etei uikuatía wae pe uikuaaka yandewe. Jare ñru kuimbae Tumpa iñee arakae umimbeu wae reta jukuärái wi uikuaaka yandewe.

<sup>22</sup>Tumpa umae yanderé yandereko mbae wae rami yarowia yawe Jesucristo re, ipotawe kía kía yande wae reta.

<sup>23</sup>Echa'ä opaete wae yayawi ma ko Tumpa koti, jare ndarau etei yandepuere yaepiti jae jeko jupiete ye wae.

<sup>24</sup>Añetete jokua teko yareko wae ñaneapiti iko rami jare yanembitiriri iko rami Tatawasurenda koti. Erëi Tumpa ipiakawi rupi umae yanderé yandereko mbae wae rami yambiepi mbae chupe rewe. Echa’ä Jesucristo opa ma umbiepi mbaembae yayawi Tumpa koti wae jare jukuärái yandeyora chuwi.

<sup>25</sup>Tumpa ipiyemingeta iko ombou waerä Cristo umano waerä mbaembae yayawi Tumpa koti wae re, jare jukuärái umbipiakatu waerä yandewe Tumpa iarasi tēi iko yandekoti wae. Añawe yarowia yawe Cristo re jare juwi uyepiyere yanderé wae re, Tumpa opata oyoe yandewi teko ñanoi wae. Jare Tumpa añawe uikuaaka ma yandewe kērái ko jae jupi wae Cristo pe uiporaraka wae rupi. Echa’ä arakae rupi, uyawi reta Tumpa koti yawe, Tumpa jeta wese ipiawasu chupe reta jare uiporaraka’ä chupe reta jokua re. Jare aramoi kía ipuere tēi jei Tumpa jupi’ä ko, echa’ä jae mbaeti chawaa imandúa oï jae reta jeko kachi re.

<sup>26</sup>Erëi añetete Tumpa jupi ko jare jekuaeño uyapo jupi rupi. Jeta wese Tumpa arakae rupi uiporaraka’ä chupe reta, echa’ä jae uikuaa iko Cristo umanota iko jae reta jeko kachi re wae. Jare jokua uyeyapo ma. Jare añawe rupi ipotawe kía wirowia Jesús re wae, Tumpa umae jese jeko mbae wae rami.

<sup>27</sup>Jáeramo yande reta mbaeti mbae re yayembutuicha waerä. Jeta wae reta uyembutuicha kērái jae reta uyapo opaete Moisés arakae uikuatía wae rupi. Erëi yande reta awiyeta ko yayapo jokua. Echa’ä yaikuaa Jesucristo re yarowia wae rupiño ko Tumpa umae yanderé yandereko mbae wae rami.

<sup>28</sup>Añetete ko, Tumpa ndarau umae kía re awe jeko mbae wae rami Moisés arakae uikuatía wae uyapo wae rupi – jaeño ko Cristo re yarowia wae rupi.

<sup>29-30</sup>Jare jukuärái ko opaete pewarä, echa’ä ime pētiño Tumpa. Jáeramo yaikuaa ñai jae ko judío reta iTumpa jare judío mbae wae reta iTumpa wi. Jayawe ime pētiño kērái rupi judío reta jare judío mbae wae reta ipuere waerä ñonoï jeko mbae wae rami Tumpa jowai – jae ko Cristo re yarowia wae rupiño.

<sup>31</sup>Jayawe yae ma ko Cristo re yarowia wae rupiño Tumpa umae yanderé yandereko mbae wae rami. Erëi, ¿kua uipota ra jei jokua Moisés arakae uikuatía wae ikawi’ä ma maeräwe yanemaerä? ¡Mbaeti etei! Ore jekuaeño ndoe jokua Moisés arakae uikuatía wae jupi ko.

## Romanos 4

### Tumpa umae Abraham re jeko mbae wae rami

<sup>1</sup>Yaikuaa kawu waerä kua rewa, ñamae kērái ra uasa Abraham pe. Ore judiorä nduiko wae reta nduikuaa kawu Abraham rewa, echa’ä jae ko jae oreipi. ¿Mbae jeko pewa ra Tumpa umae Abraham re jeko mbae wae rami?

<sup>2-3</sup>¿Abraham uyapo ra mbae ikawi waeño aramoi? Mbaeti. Echa’ä Tumpa iñeeriru pe jei yandewe kuärái: “Abraham wirowia Tumpa jei wae re; jáeramo Tumpa umae jese jeko mbae wae rami.” Jukuärái uyekuatía oï. Jayawe kua pe yaikuaa ko Tumpa umae Abraham re jeko mbae wae rami Abraham wirowia Tumpa jei wae re ramo,

jare mbaeti ko Abraham mbae ikawi wae uyapo wae rupi. Jáeramo Abraham ipuere'ä uyembutuicha jae mbae uyapo wae re Tumpa jowai.

<sup>4</sup>Yaikuaa ñai yaparawiki yawe yamingana waerä, jokuwa yaminganakue wae mbaeti ko uñemeño oi yandewe wae – jae ko jokuwa mbarawiki iya imeta ko umbiepi yandewe wae.

<sup>5</sup>Erëi jukuärai'ä ko Tumpa ndiwe. Echa'ä Tumpa umae jupi mbae wae reta re jeko mbae wae rami jae reta jese wirowia ramo – mbaeti ko mbaembae ikawi wae jae reta uyapo wae rupi.

<sup>6</sup>Jukuärai wi mburuwicha wasu David arakae uikuaaka yandewe. Echa'ä jokuwa jae uikuatia wae rupi yaikuaa mbaeti ko mbaembae ikawi wae yayapo wae rupi Tumpa umae yanderé yandereko mbae wae rami. Jare kía kía Tumpa umae jese jeko mbae wae rami wae, jae reta uyekouete ñonoi.

<sup>7</sup>David uikuatia arakae kuärai: “Ime yawe kía uyawi ma Tumpa koti wae, erëi Tumpa jokuwa umbái ma chuwi yawe jare imandua'ä ma chupe jokuwa re yawe, jae uyekouete oi.

<sup>8</sup>Uyekouete oi wi kía Tumpa ndarau ye ma umbijeko wae.” Jukuärai uikuatia David.

### **Judío mbae wae reta wi ipuere oi jeko mbae wae rami Tumpa jowai**

<sup>9</sup>Erëi aramoi ¿uyembicircuncidaka wae retaño ra ipuere uyekou kua mbae ikawi wae re? ¿Aramoi chuwi retaño ra Tumpa umbái mbaembae kachi uyapo reta wae? ¿Mbaeti! Echa'ä jae nunga wi uyembicircuncidaka mbae wae reta wi ipuere uyekou jokuwa re. Yaikuaa waerä añetete jokuwa rewa, yaecha ñamae ye mbae ra uyeyapo Abraham pe wae. Añawe yaikuaa Tumpa umae Abraham re jeko mbae wae rami Abraham wirowia Tumpa iñee re ramo.

<sup>10</sup>Erëi ¿kërai yawe ra umae jese jeko mbae wae rami? ¿Abraham uyembicircuncidaka ma yawe ra, ani ndei uyembicircuncidaka mbowe ra? Uyembicircuncidaka ma yawe'ä ko. Echa'ä Tumpa umae jese jeko mbae wae rami ndei uyembicircuncidaka mbowe.

<sup>11</sup>Jare jaikue rupi ramo ko Tumpa jei Abraham pe uyembicircuncida waerä. Erëi ¿maera ra Tumpa jei Abraham pe uyapo waerä jokuwa? Jokuwa circuncisión ko jae pëti yembijaangaño, jare uikuaaka iru wae reta pe kërai Tumpa umae ma iko Abraham re jeko mbae wae rami Abraham wirowia iñee re ramo. Jare kua uyeyapo ndei Abraham uyembicircuncidaka mbowe. Jáeramo opaete kía kía Tumpa jei wae re wirowia wae reta, yepe tēi ko aramoi jae reta uyembicircuncidaka mbae wae reta, erëi Abraham ko jae reta tuukue rami. Echa'ä Tumpa umae jese reta wi jeko mbae wae rami jae reta wirowia iñee re ramo.

<sup>12</sup>Jae nunga wi Abraham ko jae orerukue, opaete ore nduyembicircuncidaka wae reta. Erëi jaeño orepuere ndoe jukuärai, nomomoe yawe jae jeko. Kua uipota jei

jaeño ndorowia yawe Tumpa re kërái Abraham wirowia jese rami ndei jae uyembicircuncidaka mbowe.

<sup>13</sup>Yaikuaa kawi ñaï Tumpa jei Abraham pe wae: “Nde jare niñemoñaeta reta yurekota kua iwí iyará,” jei chupe. Erëi ¿marái ramo ra Tumpa jei chupe jukuárai? ¿Jae ra ko Abraham uyapo jupi rupi kawi Moisés uikuatía wae re ramo? Mbaeti. Echa’ä jokua ara reta rupi Moisés ndeiño iko. Abraham jaeño wirowia Tumpa jei wae re, jare jukuárai Tumpa umae jese jeko mbae wae rami.

<sup>14</sup>Jokua mbaembae Tumpa jei uyapota oï Abraham iñemoñaeta reta pewarä wae ikawi ko. Erëi jaeño Tumpa iñee jupi rupi kawi uyapo wae reta ipuere uyekou jese yawe, jayawe Tumpa uyemingetaiño iko jare yarowia Cristo re wae usiriwe’ä etei ko maeräwe.

<sup>15</sup>Echa’ä opaete yayawi ma ko Tumpa jei wae, jare jokua jaeño ko ueru yandewe Tumpa iarasi. Tumpa uikuaaka’ä ma yandewe jae jei wae yawe, jayawe yandepuereta tēi yaiko yandepiawiwe rewe. Echa’ä ndarau tēi yayawi Tumpa jei wae. Erëi Tumpa uikuaaka ma ko yandewe jae jei wae Moisés uikuatía wae rupi. Jáeramo teko pe ñaï jokua yayawi ramo. Jáeramo Moisés uikuatía wae rupi ndarau kiawe ipuere uyekou mbaembae ikawi wae re Tumpa jei uyapota oï Abraham iñemoñaeta reta pewarä wae.

<sup>16</sup>Erëi Tumpa ipiakawiete ye jeko pewa, jae uipota opaete wae yayekou waerä – jae ko judiorä yaiko wae reta jare judío mbae yaiko wae reta wi. Jáeramo jae jei yandewe jaeño yarowia waerä jese kërái Abraham wirowia jese rami. Jare jukuárai yayapo yawe, Abraham ko jae yanderukue rami Tumpa jowai.

<sup>17</sup>Jukuárai ko jei Tumpa iñeeriru pe. Echa’ä uyekuatía oï joko pe kua mbae Tumpa jei Abraham pe wae: “Che nduyapota aï jeta ambie iwí pewa reta tamirä.” Jukuárai Tumpa jei chupe jare jukuárai ma uyapo chupe, echa’ä opaete yande Cristo re yarowia wae reta ko jae Abraham iñemoñaeta añetete wae Tumpa jowai. Jare jukuárai yandepuereta yayekou Abraham ndiwe jokua mbaembae Tumpa umeeta oï chupe wae re.

### **Abraham ko jae jeta wae reta tuukue rami**

Tumpa uyapo kua mbae ikawi wae Abraham pewarä, echa’ä Abraham wirowia iñee re ramo. Abraham uikuaa Tumpa imbaepuere tuichaete ko, jare Tumpa uipota yawe, jae nunga wi ipuere umbijekowe ye umanokue wae reta. Jáeramo Abraham uikuaa yawai’ä ko Tumpa pewarä umee chupe uñemoñaeta waerä.

<sup>18</sup>Yanemandúa kawi ñaï, yepe tēi Abraham jare jembireko indechiete ma, erëitu Abraham uäro wirowia katu rewe jokua mbae ñaäro rape mbae wae. Jare jae jekuaeño wirowiaete Tumpa uyapota iko jeta ambie ye ye ñee pe uyemingeta wae reta tamirä. Echa’ä Tumpa jei ma chupe kuárai: “Mbaetita kía ipuere uipapa niñemoñaeta reta, echa’ä jetaete ye ikota ramo.”

<sup>19</sup>Jukuárai Tumpa jei Abraham pe pēti chiēto año seri ma wireko yawe. Abraham uikuaa jete indechiete ma iko jare añapea ma iko. Uñemoñaeta rape’ä ma iko iyupe.

Jare uikuaa wi jembireko Sara ko jae ipuere mbaei imembi wae. Erëi Abraham yepe tēi kua mbaembae uikuaa, erëitu ikueri'ä etei.

<sup>20</sup>Jae jekuaeño wirowiaete Tumpa uyapo ñotái jae jei chupe wae. Jare joku re Abraham uñemimiräta wirowia kawi waerä Tumpa re jare umbutuicha Tumpa jee.

<sup>21</sup>Abraham wirowiaete Tumpa imbaepuerete ko uyapo waerä opaete mbaembae jae jei uyapota iko wae.

<sup>22</sup>Jare Abraham wirowia kawi Tumpa jei wae re ramo, Tumpa umae jese jeko mbae wae rami.

<sup>23</sup>Jare kua ñee reta, “Tumpa umae jese jeko mbae wae rami,” jei wae, mbaeti uyekuatía oï Abraham reño.

<sup>24</sup>Uyekuatía ko oï yanderé wi. Echa'ä Tumpa umae wi yanderé yandereko mbae wae rami yarowia jese yawe – jae ko umbijekowe ye ueru yandeYa Jesús umanokue wae reta ipite wi.

<sup>25</sup>YandeRu Tumpa etei umee Tai umano waerä teko yareko ikoti wae re. Erëi jokuano'ä uyapo. Jae nunga wi umbijekowe ye Tai ueru umanokue wae reta ipite wi. Jare jukuärái uechaka yandewe añawe mbaeti ye ma ko mbae uata yandewe Tumpa umae waerä yanderé yandereko mbae wae rami.

## Romanos 5

### Mbaembae ikawi wae Tumpa uyapo yandewe wae

<sup>1</sup>Añawe yaikuaa ñai Tumpa umae ma yanderé yandereko mbae wae rami yandeYa Jesucristo re yarowia wae rupi. Jáeramo yayeapikatu ma Tumpa ndiwe, Cristo uyapo yandewe wae rupi.

<sup>2</sup>Jare añawe yarowia ma Cristo re ramo, Cristo uyapo ma yayekou waerä Tumpa ipiakawi re. Jare yayerowia ñai, echa'ä yaikuaa ko pēti ara yayekouta ñai kuri Tumpa imbaepuere jupiete ye wae re.

<sup>3</sup>Jare kuaño'ä ko. Jae nunga wi yandepuere yayerowia yaiporara ñai wae rupi. Echa'ä yaikuaa yaiporara ñai yawe, jokoropi ko yayemboe ñamiawäta waerä.

<sup>4</sup>Jare ñamiawäta ma yawe, joku re ko Tumpa umae kawita oï. Jare yaikuaa Tumpa umae kawi oï yanderé yawe, yaikuaa kawieteta Tumpa uyapota oï mbae ikawi wae yandewe kuri.

<sup>5</sup>Joku ko añawe ñaäro ñai yayerowia rewe. Jare joku re ndarau ñanemara yapita, echa'ä Tumpa yanderauete ko. Jare Espíritu Santo Tumpa umee yandewe wae jekuaeño uikuaaka yandewe Tumpa yanderau ko.

### ¿Kerái ra ko Tumpa yanderau?

<sup>6</sup>Jare ¿kerái ra ko Tumpa yanderau? Yaikuaa Tumpa yanderauete ko, echa'ä Cristo umano yanderé, yande jupi mbae yaiko wae reta re. Yande parawete reta teko pe



yaiko Tumpa jowai yayawi jae jei wae ramo. Jare yandepuere'ä etei yayerepi chuwi yandeiño. Erëi ou ma uwäe yawe ara Tumpa uiparawo wae, Cristo umano yanderé.

<sup>7</sup>Kua re ikawi yayemingeta waerä yandepia pe. Jeta'ä uipota umee jekowe pëti jupi wae re. Erëi aramoi imeta kía ipiakawiete wae re umee jekowe wae.

<sup>8</sup>Erëi Tumpa uechaka ma yandewe yanderauete ko. Echa'ä yepe tëi yande yayapoñoi mbaembae kachi wae Tumpa jowai, erëi jesewe jae etei ombou Cristo umano waerä yanderé.

<sup>9</sup>Jayawe jukuärái ko Tumpa yanderauete ye. Erëi ime ye mbae ikawi wae yaikuaa waerä. Yaikuaa ñai yandeYa Jesús upiyere juwi jare umano yanderé Tumpa ipuere waerä umae yanderé yandereko mbae wae rami. Jare jukuärái yawe, ¿këraita pa Tumpa iarasi oata oï yanderé kuri ara taikuewa pe? Ndarau etei ma.

<sup>10</sup>Echa'ä yepe tëi tenonde yawe yaikose Tumpa jowaichorä, erëi añawe yayeapikatu ma ko Tumpa ndiwe Tai imano rupi. Jare jukuärái yawe, ¿këraita pa Tumpa uiti oï iarasi yanderé kuri ara taikuewa pe? Ndarau uyapo, echa'ä Jesús jekuaeño oï yanderepi waerä.

<sup>11</sup>Jare jokuaño'ä ko. Añetete tuicha yerowia ñanoi, echa'ä Tumpa iarasi wasu ndarau ma oa oï yanderé. Erëi ime ñanoi yerowia tuichaete ye wae, echa'ä yandeYa Jesucristo uyapo yandewe wae rupi yayeapikatu ye ma Tumpa ndiwe.

#### **Adán uyapo wae uyemboyowake'ä etei Cristo uyapo wae ndiwe**

<sup>12</sup>Jayawe ¿mbae pa yaikuaa kua pe? Yande yaikuaa tenondete kuimbae iko wae jae ko tenondete uyawi Tumpa koti wae. Jare jae uyawi Tumpa koti jeko pewa mano uike kua iwi pe. Jáeramo opaete ñamanota ñai, echa'ä opaete wae yayawi Tumpa koti ramo.

<sup>13-14</sup>Añetete ko, ndei Moisés uikuaaka chupe reta Tumpa jei wae mbowe, imeño mái yepe teko kachi kua iwi pe. Erëi Tumpa umbijeko'ä iwi pewa reta jokua re, echa'ä jae reta ndeiño uikuaa Tumpa jei wae ramo jare uyawi'ä reta Tumpa jei wae Adán uyapo rami. Erëitu jesewe Adán wiwe Moisés rewa jae nunga wi mano opa uyembiiya jese reta Adán jeko pewa. Jayawe yandepuere yae Adán ko jae Cristo rami, echa'ä jae mbae uyapo wae oa jeta wae reta re.

<sup>15</sup>Erëi Tumpa jepi mbae awe umee yandewe Jesucristo rupi wae, oyowake'ä etei ko uasa yandewe Adán rupi wae. Echa'ä jokua pëti kuimbae uyawi Tumpa jei wae jeko pewa, jeta wae reta umano. Erëi Jesucristo uyapo wae rupi jeta yande reta yayekou ma ñai Tumpa ipiakawi re, jare Tumpa umae ma yanderé yandereko mbae wae rami.

<sup>16</sup>Che tae ye pewe, Tumpa jepi mbae awe umee yandewe wae, oyowake'ä etei ko uasa yandewe Adán rupi wae. Adán jaeramo etei uyawi Tumpa jei wae yawe, Tumpa umbipi umbijeko iwi pewa reta. Erëi Tumpa umee yandewe wae jeko pewa, yande ñai ma yandereko mbae wae rami Tumpa jowai, yepe tëi jeta ye ye yayawi ikoti.

<sup>17</sup>Añetete, jokua pëti kuimbae Adán uyawi Tumpa jei wae jeko pewa mano uyembiiya opaete wae re. Erëi yaipisi Tumpa ipiakawi yawe, jare jae umae yanderé yandereko mbae wae rami yawe, tuichaete ye uyembiiyata oï yanderé tekowe opa mbae wae jokua pëti kuimbae Jesucristo uyapo yandewe wae rupi.

<sup>18</sup>Jayawe jukuärái ko pëti kuimbae uyawi Tumpa jei wae jeko pewa, opaete yande reta ñanoi teko Tumpa jowai. Erëi Jesucristo jupi wae uyapo wae rupi, añawe opaete kía wirowia reta jese wae ime onoi tekowe opa mbae wae, jare Tumpa umae ma jese reta jeko mbae wae rami.

<sup>19</sup>Jae ramiño wi Adán mbaeti Tumpa jei chupe wae uyapo jeko pewa opaete wae uyawi wi Tumpa koti. Erëi Jesucristo Tumpa jei chupe wae uyapo ramo, Tumpa umaeta jeta wae reta re jeko mbae wae rami.

### **Tumpa jei wae uikuaaka yandewe yandereko tuicha ko**

<sup>20</sup>Arakae Tumpa uikuaaka Israel ñemoñaeta reta pe kërái yureko reta waerä – jae ko mbaembae uyapota ko reta wae jare mbaembae awiyeta ko uyapo reta wae. Jare jukuärái Tumpa uyapo opaete yande yaikuaa kawi waerä yandereko tuicha wae ko jae jei wae yayawi ramo. Erëi yepe tëi yande jeta yayawi Tumpa jei wae jare yandereko jekuaeño ukuakuaa oo iko, erëi jeseuwe Tumpa tuichaete ye ipiakawi yandewe.

<sup>21</sup>Jáeramo kërái yaikose teko yareko wae ipo pe jare jokua yanembisiri iko Tumpa wi, jukuärái wi añawe Tumpa ipiakawi wae ipo pe ko ñai jare ime ma ñanoi tekowe opa mbae wae. Echa'ä ime yawe kía wirowia yandeYa Jesucristo re wae, Tumpa umae jese jeko mbae wae rami.

## **Romanos 6**

### **Ndarau jekuaeño yayawi Tumpa koti**

<sup>1</sup>¿Mbae pa yayapota jayawe? ¿Ikawita ra jekuaeño yayawi waerä Tumpa jei wae Tumpa jeiete ipiakawi waerä yandewe?

<sup>2</sup>¿Mbaeti etei! Echa'ä ñamano rami ma ko yandereko kachi wi. Jáeramo yandepuere'ä etei jekuaeño yayawi waerä Tumpa jei wae. ¿Kërái ra jokua?

<sup>3</sup>Yaikuaa ñai yande yarowia Cristo re yawe, Espíritu Santo yandapo pëti ramiño Cristo re. Jare pëti ramiño ñai Cristo re ramo, ñamano rami wi ko jae ndiwe jae umano yawe.

<sup>4</sup>Jare yande ñamano rami ma Cristo ndiwe ramo, ñaneño rami wi ko jae ndiwe teowerenda pe. Erëi Cristo upita'ä joko pe. Echa'ä yandeRu Tumpa imbaepuere jupiete ye wae rupi umbijekowe ye Cristo ueru umanokue wae reta ipite wi. Jare jukuärái rami uyapo yandewe wi yandepuere yaiko waerä tekowe ipiau wae rupi – mbaeti jekuaeño yaiko waerä teko kachi rupi.

<sup>5</sup>Añetete ko, Tumpa yandapo ñamano rami ma ko Cristo ndiwe. Jáeramo yaikuaa ko jae yanembijekowe ye rami wi Cristo ndiwe.

<sup>6</sup>Yanemandúa kawi ñái kërái yaikose wae re. Jaeño yaikose yande yae wae rupiño, jare jukuärái jeta yayawise Tumpa koti. Erëi yarowia yawe Cristo re, Tumpa ñaneño pëti ramiño Cristo re yaiko waerä. Jáeramo Cristo uyekutuka kurusu re yawe, yandereko indechikue uyekutuka wi jae ndiwe rami. Jáeramo yepe tëi amo wese pe ime ñanoi kirëi mbae kachi yayapo waerä, erëi jokua kirëi ndarau ye ma mbaepuere ime onoi yanderé. Ndarau ma yaiko jokua kirëi pe täta rupi yayeyokui waerä.

<sup>7</sup>Echa'ä kía umano yawe, jokua kirëi ndarau ye ma oyokui mbae kachi uyapo waerä.

<sup>8</sup>Jare yande ñamano rami ma ko Cristo ndiwe ramo, yarowia wi ko jekuaeño ñaita jae ndiwe jaeño mái pewa.

<sup>9</sup>Jukuärái yaikuaa kawi, echa'ä yandeRu Tumpa umbijekowe ye Cristo ueru umanokue wae reta ipite wi jare Cristo ndarau ye ma umano. Añetete ko, mano ndarau ye ma onoi mbaepuere jese.

<sup>10</sup>Jare kua pe ime ye mbae re yayemingeta waerä yandepia pe. Cristo kua iwí pe iko rambuewe, Añawasú uipota tëi uyawika chupe Tumpa koti. Erëi Cristo umano chuwi pëti weseño jare ndarau ye umano. Jare ikowe ye yawe umanokue wae reta ipite wi, joko wiwe Cristo oí yandeRu Tumpa jee umbutuicha waeräño.

<sup>11</sup>Jukuärái wi pe reta, yepe tëi amo pe ime jokua kirëi mbae kachi piyapo waerä, erëi piyemingetata ko pepia pe kuärái: “Che pëti ramiño ko aï Cristo re. Jare jukuärái amano rami ma ko Cristo ndiwe kua kirëi wi. ¿Maera pa yawita Tumpa koti jayawe? Añawe aï ma ko Tumpa jee ambutuicha waeräño.” Jukuäraita ko yayemingeta yandepia pe.

### **¿Këraita ra añawe ikawi yaiko waerä?**

<sup>12</sup>Jáeramo ime penoi yawe jokua kirëi mbae kachi piyapo waerä wae, awiye etei pemaño jokua kirëi perete re tuyembiiya. Perete kua iwí pewa ko jare ndarau ima iko. Jáeramo awiye piñemee mbae kachi wae piyapo waerä perete pipe.

<sup>13</sup>Añawe pe reta ko jae umano wae ikowe ye ou wae rami. Jáeramo awiye ye ma pemee perete teko kachi pe. Awiye ye ma perete tuiko teko kachi jembiporu rami. Erëi piñemee mii Tumpa pe piyapo waerä mbae ikawi wae. Perete tuiko Tumpa jembiporu rami piyapo waerä mbae jupi wae.

<sup>14</sup>Añawe pe reta ko peï Tumpa ipiakawi rupi. Mbaeti ma ko peï Moisés arakae uikuatía wae rupi. Jáeramo ndarau ye ma tuyembiiya peré jokua kirëi mbae kachi piyapo waerä wae. Ndarau ye ma teko kachi tuiko pepatrón rami.

### **Tumpa ñaneño tee ma chupeño yayeyokui waerä**

<sup>15</sup>Che tae ye pewe, Tumpa ipiakawi rupi ma ñái ramo, mbaeti ko ñái Moisés arakae uikuatía wae rupi. Erëi ¿jokua uipota ra jei ikawiño ko yayawi waerä Tumpa koti? ¡Ndarau etei!

<sup>16</sup>Echa'ä yaikuaa ñai ñañemee ma yawe kía pe yayapo waerä jae jei wae, yayeyapo ma ko ipionerä. Jayawe yande ñañemee yayawi waerä Tumpa jei wae yawe, jokua oíta yandepatrón rami. Jare jokua jaeño ueruta oí yandewe mano – jae ko yanembisirita oí Tumpa wi jaeño mái pewa Tatawasurenda pe. Erëi Tumpa peño yayeyokui ñai yawe, jekuaeño yandereko oya katu oo oí jupi wae re.

<sup>17</sup>Tenonde yawe pe reta jekuaeño piyawí Tumpa koti. Añetete jokua pereko ime wireko mbaepuere peré pëti patrón rami. Erëi che tuicha rupi amee yasurupái Tumpa pe, echa'ä añawe pe reta piyemboe ma Tumpa rewa jare pipisi ma pepia rewe jokua yemboe.

<sup>18</sup>Añawe Tumpa perepi ma ko pereko kachi imbaepuere wi. Jáeramo jokua kirëi mbae kachi piyapo waerä wae ndarau ye ma ime onoi peré mbaepuere. Añawe pe reta pei ma ko Tumpa pe piyeyokui waerä jare piyapo waerä mbae jupi wae rupi.

<sup>19</sup>Che aiporu kua yembijaanga pione reta rewa pepuere waerä pikuaa kawi. Aipota pumikirëi kuärái: Tenonde yawe pemeese perete piyapo waerä mbaembae kachi wae, jare jukuärái jeta piyawise Tumpa jei wae. Añetete ko teko kachi pe täta rupi piyeyokuisse piko rami. Erëi añawe pemee mii perete piyapo waerä mbae jupi wae. Täta rupi ko piyeyokui mita mbae jupi wae piyapo waerä. Jukuärái perete uñeño teeta Tumpa pewartä.

<sup>20</sup>Pe reta pikuaa kawi pei jekuaeño piyawise Tumpa koti yawe, mbae'äse pewe mbae jupi wae.

<sup>21</sup>¿Mbae ikawi wae ra pewäe chupe? Mbaeti mbae awe. Jare añawe pemara tēi ko pei jokua mbaembae piyapose wae jeko pewa. Jokua mbaembae kachi wae iyapi ko jae mano jare Tatawasurenda.

<sup>22</sup>Erëi añawe, ime yawe jokua kirëi mbae kachi piyapo waerä wae, jokua kirëi ndarau ye ma onoi mbaepuere peré. Ndarau ma piko jokua kirëi pe täta rupi piyeyokui waerä, echa'ä Tumpa peyora ma ko chuwi jare añawe täta rupi piyeyokui pei Tumpa pe. Jare jokua ikawita oí pewe, echa'ä opa ara rupi jekuaeño pereko oya katu oo oí jupi wae re. Jare jae nunga wi perekowe opa yawe kua iwí pe, imeta penoi tekowe opa mbae wae.

<sup>23</sup>Echa'ä mbaembae yayawi Tumpa koti wae jepi ko mano – jae ko yembisiri Tumpa wi jaeño mái pewa Tatawasurenda pe. Erëi Tumpa umee yandewe tekowe opa mbae wae jepi mbae awe. Jare kua re ko yande yayekou ñai, echa'ä pëti ramiño ko ñai yande Ya Jesucristo re ramo. Jukuärái ko. Jáeramo mbaeti ikawi jekuaeño yayawi waerä Tumpa jei wae.

## Romanos 7

### Ndarau yayeyokui Tumpa pe Moisés arakae uikuatía wae rupi

<sup>1</sup>Jayawe hermano mii reta, pe reta pikuaa kawi kërái ko yaiko waerä iru wae imbaepuere pe. Imeta ko yaiko jae jei wae rupi. Erëi jokua jae jei yandewe wae jaeño ime mbaepuere onoi yanderé imeño tekowe ñanoi rambuwe.

<sup>2</sup>Kua yandepuere yambijaanga menda re. Yandereko pe jei kuña umenda wae pëti ramiño ko oï ime ndiwe, ime imeño tekowe pe oï rambuewe. Mbaeti ikawi umenda waerä ambie ndiwe. Erëi ime umano ma chuwi yawe, jayawe ramo kuña mbaeti ma oï jokua teko menda rewa imbaepuere pe, jare ipuere umenda ye ipiawiwe rewe.

<sup>3</sup>Jáeramo kuña ueya yawe ime jare umenda ye yawe ñru kuimbae ndiwe, kuña uyapo ko oï awasa. Erëi ime umano chuwi yawe, kuña mbaeti ma oï jokua teko menda rewa imbaepuere pe. Jare umenda ye yawe ñru kuimbae ndiwe, mbaeti ko uyapo oï awasa.

<sup>4</sup>Jukuäráiete wi, hermano mii reta, jokua Moisés arakae uikuatía wae mbaeti ma onoi mbaepuere yanderé. Jukuärái ko, echa'ä ñamano rami ma ko chuwi. ¿Kërái ra jokua? Yayemboe ma kërái ñamano rami ko Cristo ndiwe jae umano yawe. Jare jokua jeko pewa Moisés arakae uikuatía wae ndarau ye ma onoi mbaepuere yanderé. Añawe Tumpa yandapo ma Cristo pewarä – jae ko jokua ikowe ye ou umanokue wae reta ipite wi wae. Jukuärái Tumpa yandapo yandepuere waerä yayeyokui kawi chupe.

<sup>5</sup>Tenonde yawe, ndei yarowia Cristo re mbowe, yandepuere'äse yayeyokui kawi Tumpa pe. Echa'ä yaikose yande yae wae rupiño. Jare yepe tëi Moisés arakae uikuatía wae yanembiarakuaa kawi Tumpa jei wae rewa, erëi jokua jae uikuatía wae etei yepe uparawiki iko yanderé jeiete uipotaka waerä yandewe mbae kachi yayapo waerä yanderete pipe. Jare jokua yandereraa tëi iko mano koti jare Tatawasurenda koti.

<sup>6</sup>Añetete ko Moisés arakae uikuatía wae ñaneapiti iko rami awiye waerä yandepuere yayeyokui Tumpa pe. Erëi añawe Tumpa yandeyora ma chuwi, echa'ä Cristo ndiwe ñamano ma ko chuwi rami. Jáeramo ndarau ma yayeyokui Tumpa pe Moisés arakae uikuatía wae rupi tenonde yayapose wae rami. Ime añawe kërái rupi yayeyokui waerä Tumpa pe mbae ipiau wae rupi – jae ko tekowe Espiritu Santo umee yandewe wae rupi etei.

### **Tumpa jei wae uikuaaka yandewe yayawi ma ko Tumpa koti wae**

<sup>7</sup>¿Këraita pa jayawe? ¿Moisés arakae uikuatía wae ikawi'ä ra aramoi? ¿Mbaeti! Echa'ä Moisés uikuatía wae rupi Tumpa uikuaaka yandewe mbae ra ko jae mbae kachi wae jae jowai. Yambijaanga. Moisés uikuatía Tumpa jei chupe wae kuärái: “Awiye pepia pe pipotaete rewe pema mbaembae perapicha onoi wae re,” jei. Erëi Tumpa jei'ä yawe jukuärái, ndarau tëi aikuaa aiko mbae kachi wae ko Tumpa jowai cherapicha imbaembae aipota yawe.

<sup>8</sup>Erëi Tumpa jei wae aikuaa wae, chembori'ä oï ayapo waerä jae jei wae. Echa'ä Tumpa jei wae aikuaa ma yawe, jokua kirëi mbae kachi ayapo waerä wae jeiete uyembiiya cheré. Jáeramo jeiete aipota ñru wae reta imbaembae. Añetete, Moisés uikuatía wae mbaeti yawe, jayawe ndarau tëi jekuaeño ayemingeta chepia pe ñru wae reta imbaembae re. Ndarau tëi jekuaeño aipota ayawi Tumpa koti.

<sup>9</sup>Tenonde yawe, ndei aikuaa Tumpa jei wae mbowe, chepiawiweño aiko tēi, echa'ā aikuaa'ā aiko ayawi aiko Tumpa koti wae. Erēi aikuaa ma yawe Tumpa jei awiyeta tēi ayapo wae, jayawe ramo ambipi aikuaa ayawi ma yepe Tumpa koti wae. Jare jayawe ramo aikuaa wi amano wae echa yepe aiko Tumpa wi.

<sup>10-11</sup>Che aikuaa ramo Tumpa jei wae yawe, che jae tēi cheyupe: “Añawe aikuaa kērāi Tumpa uipota aiko waerā wae. Añawe ramo anoita tekowe opa mbae wae,” jae tēi. Erēi jukuārai'ā uasa chewe. Echa'ā Tumpa jei wae aikuaa ma yawe, jokuā kirēi mbae kachi ayapo waerā wae jekuaeño uyembiiya cheré ayawi waerā Tumpa jei wae, jare jukuārai chembisiri Tumpa wi. Añetete ayembitawika aiko parawete.

<sup>12</sup>Jayawe opaete mbaembae Tumpa jei Moisés rupi wae ikawi wae ko tēi jare jupi ko.

<sup>13</sup>Erēi aramoi imeta kía jei tēi: “Tumpa jei wae ikawi oī yawe, ¿maera pa chembisiri Tumpa wi?” jeita tēi. Erēi mbaeti ko Tumpa jei wae yanembisiri Tumpa wi. Ime yandepia pe kirēi mbae kachi yayapo waerā wae. Jare yande yayandu yawe Tumpa iñee ikawi wae, jokuā kirēi jeiete ñanemiata wae echa yayawi waerā Tumpa jei wae, jare jukuārai yandereraa mbiri Tumpa wi mano koti. Jukuārai yaikuaa jokuā kirēi mbae kachi yayapo waerā wae kachiete ye ko.

### **Yandepia pe ñerāro oī wae rewa**

<sup>14</sup>Jayawe yaikuaa jokuā mbaembae Tumpa uikuaaka Moisés pe uikuatía waerā wae ikawi ko, echa'ā Tumpa wi etei ko ou ramo. Erēi che ko jae kuimbaeño, jare yawái mbae ayawi Tumpa koti. Añetete teko kachi ipionerā aiko wae rami ko che.

<sup>15</sup>Cheropa aī parawete chereko rewa. Echa'ā jeta wese ayapo'ā mbae ikawi wae chekirēi tēi ayapo wae. Erēi mbae kachi añamitāa wae, jokuā ayapo parawete.

<sup>16</sup>Jare ayapo yawe mbae kachi wae aipota'ā tēi ayapo wae, chepia uikuaaka chewe jokuā ikawi'ā ko jare che etei ayembijeko jese. Jare jukuārai aikuaa Tumpa jei wae ikawi wae ko.

<sup>17</sup>Jayawe ayapo yawe mbae kachi wae aipota'ā tēi ayapo wae, jayawe mbaeti ko aī tekowe ipiau wae anoi wae rupi. Erēi ime chepia pe jokuā kirēi mbae kachi ayapo waerā wae. Jokuā ko chemiata oī wae echa ikoti.

<sup>18-19</sup>Jare che aikuaa amaeño jese yawe, jare aiko che jae wae rupiño yawe, ndarau uyekuaa ikawi wae. Echa'ā ndarau ayapo ikawi wae aipota tēi ayapo wae. Erēi jokuā mbae ikawi mbae wae aipota'ā tēi ayapo wae, jekuaeño jokuā ayapo parawete.

<sup>20</sup>¿Kērāi ra jekuaeño ayapo jokuā aipota'ā tēi ayapo wae? Jukuārai ko ayapo mbaeti aiko yawe tekowe ipiau wae anoi wae rupi. Erēi ime chepia pe jokuā kirēi mbae kachi ayapo waerā wae. Jokuā ko chemiata oī wae echa ikoti.

<sup>21</sup>Jayawe aikuaa kawī aī añawe mbae jekuaeño uyeyapo oī chewe wae. Jae ko kua: Mbae ikawi wae aipota tēi ayapo yawe, ime mbae kachi wae chembiawái oī.

<sup>22</sup>Yepe tēi chepia pe ayerowia aī Tumpa jei wae re,

<sup>23</sup>erēi aikuaa ime ambie mbaepuere oī cheré wae. Jare jokua mbaepuere umbiawái oī jokua ikawi wae chepia pe aipota tēi ayapo wae. Jare jokua mbaepuere chemiamiri oī che ayawī waerā Tumpa koti cherete pipe, jare chepuere'ā ayapo mbae awe cheiño ayerepi waerā chuwi.

<sup>24</sup>¡Aikuasi katu aī parawete! Echa'ā mbae kachi cherete uipota wae ueru oī chewe mano jare Tumpa iarasi. ¿Kía ra ipuere cherepi chuwi?

<sup>25</sup>Jaeño ko Tumpa cherepita chuwi yandeYa Jesucristo rupi. Jare jokua re amee yasurupái Tumpa pe. Jayawe añetete che aiko parawete kuárái: Chepia pe aipota tēi aiko kawī opaete Tumpa jei wae rupi. Erēi ime wi oī chepia pe jokua kirēi che jae wae rupiño aiko waerā. Jare jukuáraiño aiko yawe, jekuaeño ayawī Tumpa koti.

## Romanos 8

### Ndarau ma ñanoi teko Tumpa jowai

<sup>1</sup>Jayawe ¿mbae ra añawe yandepuere yaikuaa opaete kua mbaembae reta rupi? ¿Kérái ra ko ñaī añawe yande reta Cristo re pēti ramiño yaiko wae? Añawe yaikuaa ñaī Tumpa ndarau ma yanembijeko.

<sup>2</sup>Echa'ā yepe tēi yayawī Tumpa koti, jare jokua jeko pewa imeta tēi ko ya Tatawasurenda pe, erēi añawe Tumpa yanderepi ma chuwi Jesucristo rupi. Echa'ā pēti ramiño ñaī Jesucristo re, jare jukuárái Tumpa umee yandewe Espíritu Santo. Jare jokua Espíritu Santo rupi ime ma ñanoi tekowe ipiau wae. Jáeramo ndarau ma Tumpa yanembisiri iyuwi.

<sup>3</sup>Opaete Tumpa jei Moisés pe uikuatía waerā wae ipuere'ā yanderepi Tumpa iarasi wi, echa'ā ñanepirāta'ā ñaī yaiko waerā jupi opaete Tumpa jei wae rupi. Jáeramo Tumpa uyapo mbae ikawi wae yanderepi waerā. Jae ombou Tai kua iwī pe umano waerā mbaembae yayawī Tumpa koti wae re. Tai uyeyapo kuimbaerā jare uyekuaa yandewe ipotawe kuimbae uyawī Tumpa koti wae rami, erēi jae uyawī'ā etei Tumpa koti. Erēitu Tumpa uiporaraka chupe jete pe yande mbaembae yayawī wae re, jare jukuárái ndarau ma ñanoi teko Tumpa jowai.

<sup>4</sup>Jukuárái Tumpa uyapo yandepuere waerā yaiko jae arakae jei wae rupi añetete pewa. Erēi kua jaeño uyeyapota yande yaiko yawe Espíritu Santo jei wae rupi – mbaeti yande yae wae rupiño.

### Añawe yandepuere yaiko jupi Tumpa jowai Espíritu Santo rupi

<sup>5-6</sup>Espíritu Santo jei wae re yureko wae reta ipiyemingeta oī Espíritu Santo uipota wae re. Jae reta onoita tekowe opa mbae wae jare ipiakatuta reta wi. Erēi jokua jae jei wae rupiño yureko wae reta jaeño uikuaata mano jare Tatawasurenda, echa'ā ipiyemingeta oī mbaembae jete uipota wae reño.

<sup>7</sup>Kua nunga reta Tumpa jowaicho ko, echa'ā uipota'ā uyapo reta Tumpa jei wae rupi jare ipuere'āwe uyapo reta wi.

<sup>8</sup>Jáeramo jae jei wae rupiño yureko wae reta ipuereta'ä etei umbiyerowia reta Tumpa.

<sup>9</sup>Erëi añawe pe reta mbaeti ma piko jae reta rami. Mbaeti ma piko pe reta pere wae rupiño. Añawe Espiritu Santo uyembiiya ma peré, echa'ä Tumpa iEspiritu oï pepia pe ramo. Jare ikawi ko yaikuaa waerä wi kua: mbaeti onoi Cristo iEspiritu wae Cristo pewa'ä ko.

<sup>10</sup>Erëi pe reta jukuärái'ä ko, echa'ä Cristo oï pepia pe ramo. Jayawe, yepe tēi perete umanota oï piyawī Tumpa koti jeko pewa, erëi pe reta penoi ma ko tekowe ipiau wae, echa'ä añawe Tumpa umae ma peré pereko mbae wae rami.

<sup>11</sup>Jare Tumpa iEspiritu oï pepia pe ramo, jokua Espiritu rupi etei ko Tumpa umbijekowe yeta oï perete umanota oï wae. Jukuärái ko jokua Espiritu rupi etei wi Tumpa umbijekowe ye Jesucristo ueru umanokue wae reta ipite wi. Jare jukuärái wi ko uyeyapota oï pewe.

<sup>12</sup>Jáeramo hermano mii reta, yande reta ime ñanoi tekowe ipiau wae ramo, añawe ime oï kërái yaiko waerä. Erëi mbaeti ma ko yaiko waerä yande yae wae rupiño.

<sup>13</sup>Echa'ä jokua nunga reta Tumpa umbisirita oï iyuwi jaeño mái pewa Tatawasurenda pe. ¿Jayawe maera ra yande jekuaeño yaipota yaiko jukuärái? Erëi Espiritu Santo yanembori wae rupi yaya yawe yandereko kachi wae, jayawe yayekoueteta ñai tekowe ipiau wae re.

<sup>14</sup>Añetete ko, Tumpa tai añetete wae reta jae ko kía kía Espiritu Santo uparawiki oï jese wae.

### **Añawe yande ko jae Tumpa tai reta**

<sup>15</sup>Jayawe mbaeti ko ikawi yakiye waerä Tumpa wi kërái pione reta ukiye ipatrón wi rami. Echa'ä Espiritu Santo Tumpa umee yandewe wae yandapo'ä oï yakiye chuwi waerä. Echa'ä Espiritu Santo yandapo ko Tumpa tairä yaiko waerä. Jáeramo añawe yandepuere yae Tumpa pe: “CheRu.”

<sup>16</sup>Jare Espiritu Santo etei jekuaeño uikuaaka oï yandewe yandepia pe yande ko jae Tumpa tai wae.

<sup>17</sup>Jare yande ko jae Tumpa tai reta ramo, yandepuere yaikuaa kawī Tumpa upi oï yanemaerä mbaembae ikawiete ye wae umee waerä yandewe kuri. Jokua ko jae mbaembae añawe Cristo uyekou oï jese wae, jare yande reta wi yayekouta ñai kuri jokua mbaembae re Cristo ndiwe etei. Kua ikawi yaikuaa kawī waerä. Echa'ä añawe rupi yaiporara ñai Cristo re yarowia ramo. Erëi Cristo jae nunga wi uiporara kua iwi pe iko rambuwe. Jare yande yaiporara yawe kërái Cristo uiporara wae rami, jukuärái wi yayekouta ñai jae ndiwe jae oï ma yawe opaete wae imburuwicha wasurä jaeño mái pewa.

### **Tumpa jemiapo reta opaetei uyekouta ñonoi**



<sup>18</sup>Jáeramo che ayemingeta yawe chepia pe kua mbaembae ikawiete ye wae rewa, mbae'ä ko chewe añawe yaiporara ñai wae. Echa'ä yaikuaa ko uasaete ye yayekouta ñai kuri Tumpa imbaepuere jupiete ye wae re.

<sup>19</sup>Jare opaete mbaembae Tumpa uyapo wae uäro ñonoï wi ikirëiete rewe jokua ara. Echa'ä jokua ara Tumpa yandekuaakata oï opaete wae pe yande ko jae Tumpa tai reta wae.

<sup>20</sup>Añawe rupi Tumpa jembaliapo reta uiporara ñonoï, echa'ä opaete ikumewa oo oï ramo jare mano uyembiiya ma jese ramo. Erëi jukuärái'ä iko iyipi pe, echa'ä Tumpa jaeramo uyapo yawe mbaembae, ikawiete uyapo tēi. Erëi Adán uyawi Tumpa jei wae ramo, Tumpa umaño mano uyemimbaepuere waerä opaete jae jembaliapo reta re. Erëi jae jembaliapo reta ndarau jukuäráiño upita oï.

<sup>21</sup>Echa'ä yepe tēi añawe opaete Tumpa jembaliapo reta ikumewa oo oï, erëi pēti ara Tumpa uepita oï kuri reta. Jukuärái uyapota oï jokua ara jae opa umbiyapi yawe mano yandewe, yande jae tairä yaiko wae reta pe. Joko wi ramo Tumpa jembaliapo reta yande ndiwe uyekouta ñonoï reta Tumpa imbaepuere jupiete ye wae re. Jukuärái ko Tumpa ipiyemingeta.

<sup>22</sup>Erëi añawe rupi Tumpa jembaliapo reta uäro ñonoï ikirëi rewe pēti kuña imembirasi oï wae rami. Yaikuaa ñai pēti kuña umbipi imembirasi yawe, jae ipüe jasi chupe ramo, jare uipota imambae mii uasa chuwi waerä jokua jasi oï chupe wae. Erëi ikotia rupi jae uyerowia oï wi, echa'ä jae uikuaa imambae miño imembi oata oï. Jukuärái ko Tumpa jembaliapo reta ñonoï añawe rupi. Echa'ä yepe tēi uyembipi wiwe añawe rewa jeta uiporara ñonoï, erëi uikuaa reta koiño ma oï Tumpa uepi reta waerä.

<sup>23</sup>Jukuärái wi yande reta yaiporara ñai yandepia pe jokua kuña imembirasi oï wae rami. Echa'ä yepe tēi Tumpa umbitenonde ma yandewe Espiritu Santo, erëi imeño ñaäro ñai yayekou waerä iiru mbaembae reta re – jae ko jokua mbaembae Tumpa umeeta oï yandewe jae tairä ma yaiko wae reta pe. Jare jokua ko uyeyapota oï yandewe kuri, jokua ara Tumpa umbipiau yawe yanderete.

<sup>24</sup>Jokua ko jae yande reta ñaäro ñai wae yarowia katu rewe jokua ara Tumpa yandepi wiwe. Añetete, Tumpa umee ma yandewe yawe yanderete ipiau wae, jayawe ndarau ma jekuaeño ñaäro tēi ñai. Echa'ä, ¿kia ra uäro mbae ime ma onoi wae?

<sup>25</sup>Erëi yande ñaäro ñai mbaembae ndeiño ñanoi wae, jare jukuärái ñaäro ñai yandekueri mbae rewe jare yarowia katu rewe.

<sup>26</sup>Jae ramiño wi Espiritu Santo yanembori oï. Echa'ä añawe rupi imeño yaiporara ñai jare ñanepiräta'ä ñai parawete. Yaikuaa'ä kërái etei yayerure kawí waerä Tumpa pe mbae re. Amo pe uata yandewe ñaniñeerä yaeka waerä Tumpa pe. Erëitu Espiritu Santo etei uyerure oï yanderé jupi rupi kawí Tumpa pe. Kua ikawi yaikuaa kawí waerä. Espiritu Santo uyerure oï yanderé iañeki rewe mbaeti yande reta ñawäe ñee wae rupi.

**27**Jare Tumpa uikuaa kawí Espíritu Santo opaete mbae re uyerure oí wae. Echa'ä kërái Tumpa uikuaa yandepia pe yayemingeta wae, jukuärái wi jae uikuaa Espíritu Santo uyerure wae. Jare jae nunga wi Espíritu Santo jekuaeño uyerure oí Tumpa pe yanderé Tumpa uipota wae rupi.

**28**Jare yande Tumpa yaau wae reta yaikuaa ko Tumpa uparawiki oí opaete mbaembae uyeyapo oí yandewe wae rupi ikawi waerä yandewe. Jukuärái Tumpa uyapo oí, echa'ä jukuärái rupi uyeyapota oí ipiyemingeta yanemaerä wae. Jokuaerä ko jae ñanereni.

**29**Jare ¿kërái ra ko Tumpa ipiyemingeta yanemaerä? Iyipi wiwe jae yandekuaaño máí, yande jae imaerä yaiko wae reta. Jáeramo iyipi wiwe jae ipiyemingeta iko ñaneño tee waerä yande reta yaiko waerä Tai Jesucristo echa rami. Echa'ä Tumpa uipota onoi jeta tai reta, jare jae nunga wi jae uipota tai Jesucristo oí waerä ñanerëtara tenondewarä. Jukuärái ko Tumpa ipiyemingeta ikawi wae yanemaerä.

**30**Jare jokuaño'ä ko Tumpa ipiyemingeta yanemaerä. Tumpa ñaneño tee jae imaerä ramo, jae nunga wi ñanereni. Jare jae ñanereni ramo, jae nunga wi jae umae yanderé yandereko mbae wae rami. Jare jokuaño'ä ko uyapo. Jae uyapo ma wi yandewe ñanoi waerä jae ndiwe imbaepuere jembipete ye wae jaeño máí pewa.

### **Tumpa jekuaeño yanderauta Cristo rupi**

**31**Jayawe opaete kua mbaembae rupi yaikuaa ko Tumpa oí yandepépika pe yanembori waerä. ¿Kía ra ipuereta ñanemiamiri jayawe? ¡Ndarau ipuere kiawe!

**32**Echa'ä Tumpa umbiete'ä Tai umee waerä yandewe jare umano waerä yanderé. Jare jukuärái yawe, ¿këraita pa Tumpa umbiete mbaembae yandewe jae ndiwe ñái kawi waerä?

**33**Jayawe ¿kía ra ipuereta mbae re yanembijeko Tumpa jowai? Ndarau ipuere kiawe, echa'ä yande ko jae Tumpa etei yandeparawo wae reta, jare Tumpa etei umae ma yanderé yandereko mbae wae rami.

**34**Jayawe ¿imeta ra kía ye ipuere omboya teko yanderé Tumpa jowai? Ndarau ipuere kiawe, echa'ä Jesucristo etei ko umano jokua teko yareko wae re opa umbái waerä yandewi. Jare kuaño'ä ko, echa'ä jae ikowe ye ou wi umanokue wae reta ipite wi. Jare añawe jae ime oí yandeRu Tumpa ndiwe iyike pe iyakata koti. Jare jae etei ko uyerure oí yandeRu Tumpa pe yanderé.

**35**Cristo yanderauete, jare ndarau kiawe ipuere yanembisiri chuwi jae yanderau wae wi. Aramoi yaiporarata, jare aramoi yawaita ko yandewe yaiko waerä. Aramoi iru wae reta uyapota yandewe mbae ikawi mbae wae. Aramoi karuái outa yandewe. Aramoi ndarau ñanoi korepoti yanderemimonderä. Aramoi iru wae reta uipotata ñanenupa, jare aramoi yandeyukata reta. Erëi jokua mbaesusere reta uyeyapo yandewe yawe, jokua uipota'ä jei Cristo yanderau'ä ma oí wae.

**36**Jare yaikuaa opaete jokua mbaesusere reta ipuereta uyeyapo yandewe. Echa'ä jukuärái uyekuatía oí Tumpa iñeeriru pe. Joko pe jei kuärái: “Nderé ndorowia

ramo, opa ara rupi oremumburu oreyuka reta waerä. Ore ko jae owecha reta kía wiraata uyuka onoi wae rami.” Jukuärái uyekuatía oï.

<sup>37</sup>Aramoi yandewe wi uyeyapota opaete jokua nunga mbaembae reta, erëi jesewe Cristo jekuaeño yanderauete oï, jare jae imbaepuere rupi yande reta jekuaeño opata ñamiamiri jokua mbaembae reta.

<sup>38</sup>Jare che aikuaa kawii ai Tumpa yanderauete ko jare ndarau mbae awe ipuere yanembisiri chuwi jae yanderau wae wi. Aramoi ñamanota, jare aramoi jekuaeño yaikota. Erëi jesewe Tumpa jekuaeño yanderauta oï. Araíwa reta, jare aña reta, jare ipotawe iru mbaepuere onoi wae reta ndarau etei ipuere yanembisiri Tumpa yanderau wae wi. Opaete añawe uyeyapo oï yandewe wae jare opaete uyeyapota oï yandewe wae jae nunga wi ndarau etei ipuere yanembisiri Tumpa yanderau wae wi.

<sup>39</sup>Ipotawe mbaembae iwate oï wae reta, jare ipotawe mbaembae iwíwí rupi oï wae reta, jare ipotawe iru mbaembae Tumpa uyapo wae awe ndarau etei ipuere yanembisiri Tumpa yanderau wae wi. Jare Tumpa uechaka ma yandewe yanderauete wae ko yandeYa Jesucristo rupi.

## Romanos 9

### Pablo ipiatiti opaete seri Israel ñemoñaeta reta wiriro Jesucristo ramo

<sup>1</sup>Añawe kua pe che jaeta ai wae, jaeta ai Cristo jowake etei. Jae chapo pëti ramiño iyé etei, jare jae uikuaa chapu’ä etei ko ai wae. Jare jae nunga wi Espiritu Santo chepia pe oï wae uikuaaka chewe kua che jae wae añetete ko.

<sup>2</sup>Tuicha rupi chepiatiti ai jare jekuaeño aikuasi katu ai.

<sup>3</sup>Echa’ä Tumpa iarasi imeño oï cherëtaiwa Israel ñemoñaeta reta re. Jare aipota tõi Tumpa chembisiri waerä Cristo wi jare uiporaraka waerä chewe jae reta ipepika pe awiye waerä Tumpa iarasi uiti jese reta.

<sup>4</sup>Añetete ko Israel ñemoñaeta reta uyekouta tõi, echa’ä jae reta ko Tumpa uiparawo yureko waerä tõi tai retarä. Chupe reta ko Tumpa uechaka imbaepuere jupiete ye wae. Jae reta ndiwe Tumpa uyapo tõi pëti yemingeta, jare uikuaaka tõi chupe reta kërái jupi rupi yureko reta waerä wi. Omboe reta tõi kërái jupi rupi umbutuicha reta waerä jae jee. Jare chupe reta Tumpa jei uyapota jeta mbaembae ikawi wae.

<sup>5</sup>Jae nunga wi judío tamikue retaTumpa uiparawo wae reta ko, jare jae reta ñemoñaeta ko Cristo ou uyeyapo kuimbaerä wae. Erëi yepe tõi Cristo jae ko Tumpa etei jare opaete mbaembae iYa, jesewe judío reta wiriro. Tuyembutuichaka Cristo jee jaeño mái pewa. Jukuärái tuiko.

### Mbaeti opaete Israel ñemoñaeta reta Tumpa pewa ko

<sup>6</sup>Jayawe yepe tõi Tumpa jei judío tamikue reta pe kërái jae reta ñemoñaeta reta uyekouta yureko opaete kua mbaembae ikawi wae re, erëi añawe yaecha ñai mbaeti jeta jae reta uyekou ñonoï. ¿Aramoi uyawi ra Tumpa mbaembae jei uyapota iko

chupe reta wae? Mbaeti etei. Echa'ä mbaeti ko opaetei Israel inemoñaeta reta ko jae Israel inemoñaeta pewa añetete wae Tumpa jowai.

**7-9** Yepe tēi jae reta ko jae Abraham inemoñaeta pewa, erēi jokua uipota'ä jei Tumpa umaeta opaete jese reta jukuärái. Añetete opaete'ä ko jae Tumpa pewartä. Jaeño Tumpa jei wae re wirowia wae reta ko jae Abraham inemoñaeta pewa añetete wae reta Tumpa jowai. Jae reta ko jae Tumpa tai reta. Jukuärái wi uyemboe Abraham. Echa'ä yepe tēi Abraham ime wireko iru tai reta, erēi Tumpa jei chupe: “Jaeño nderai Isaac inemoñaeta reta yurekota añetete inemoñaeta chemaerä.” Jukuärái jei chupe, echa'ä Tumpa etei umbiyekuaa Isaac jae jei wae rupi – mbaeti ko Abraham jare jembireko uipota wae rupi. Jukuärái Tumpa jei Abraham pe jae jei chupe yawe kuärái: “Kua wi iruwe año pe ayu yeta ai, jare nembireko Sara imembita ma oi kuimbae,” jei chupe. Jayawe jokoropi Abraham uikuaa jaeño ko jokua tai Tumpa etei umbiyekuaata iko wae rupi Tumpa uyapota iko jae jei wae.

**10** Jare kua pe Tumpa ndeiño opa jei jokua mbaembae rewa. Imeño mbae. Echa'ä yanemandúa kawii ñai Sara imembii kuimbae Isaac ukuakuaa ma yawe, umenda Rebeca ndiwe jare joko wi uyekuaa tai chowakiri reta.

**11-12** Yande yaikuaa jokua tai tenondewa ikota tēi ko iru tai itenondewaeterä. Erēi ndei jokua chowakiri reta oa mbowe jare ndei awe mbae jae reta uyapo mbowe, Tumpa jei ichi Rebeca pe kuärái: “Pēti ara nemembii tenondewa uyeyokuita oi taikuewa pe,” jei chupe. Jukuärái ko Tumpa uikuaaka yandewe Tumpa ipiyemingeta upurumiamiriñoi wae ko. Jare jae ipiyemingeta ko kua: Tumpa uiparawo kía jae uipota wae rupi – mbaeti ko kía mbae uyapo wae rupi.

**13** Jukuärái wi jei yandewe Tumpa ineeriru pe jokua chowakiri reta rewa. Echa'ä joko pe Tumpa jei kuärái: “Aiparawo Jacob. Aiparawo'ä Esau,” jei.

### **Tumpa yandeparawo jae jei wae rupi**

**14** Añawe ¿mbae ra yaeta jayawe kua re? ¿Aramoi Tumpa uyapo'ä ra mbae jupi wae jae uiparawo yawe pēti wae jare uiparawo'ä yawe iru wae? ¿Mbaeti etei! Echa'ä Tumpa mbae uyapo wae jupi wae ko. Jare ndarau kiawe ipuere jei chupe mbae.

**15** Jukuärái ko uikuaaka yandewe Tumpa ineeriru pe, echa'ä joko pe uyekuatia oi kerái Tumpa jei Moisés pe wae: “Aipararekota ai chekirēi aiparareko wae reta. Jare chepiakawita ai chekirēi chepiakawi chupe wae reta pe.” Jukuärái jei Tumpa.

**16** Jayawe kua uikuaaka yandewe Tumpa uipota kía uiparawo yawe, jukuärái jae uyapota ipiakawi rupiño. Yande retái ndarau yandepuere yayeparawoka Tumpa pe yande yae wae rupi jare mbae yayapo wae rupi wi.

**17** Jare Tumpa uipota'ä ipiakawi kía pe yawe, ndarau uyapo wi. Yanemandúa ñai kerái Tumpa jei iwi Egipto pewa reta imburuwicha wasu pe kuärái: “Amaeño nderé ndiko waerä aikuaaka waerä ndewe chembaepuere, jare opaete iwi pewa reta uikuaa waerä che rewa.” Jukuärái Tumpa jei chupe.

**18**Jayawe kua pe yaecha ñai kërái Tumpa uiparareko jae uipota uiparareko wae, jare umbipiatäta kía jae uipota umbipiatäta wae.

**19**Erëi aramoi kía upiranduta oï: “Jukuärái yawe, ¿marái ramo jayawe Tumpa yanembijeko ñanepiatäta wae re? Echa’ä Tumpa uipota upurumbipiatäta yawe, mbaeti kiawe ipuere oyopia chuwi.” Jukuärái ipuere jei tëi.

**20**Erëi ¿kía pa ko yande yambijeko waerä Tumpa? Echa’ä yande ko jae Tumpa jembiaipo. Jare ikawi’ä etei ko tembiapo jei waerä iyapoa pe kuärái: “¿Maera pa nde chapo kuärái?” jei waerä.

**21**Yambijaanga yambii iyapoa re. Yambii uyapo wae ipuere uyapo ñau wi jae mbae uipota wae rupi. Echa’ä jae uipota yawe, ipuere uyapo pëti ñau wiño yambii ikawi maepöra wae upi waeräño. Jare ñru yambii ipuere uyapo wi uyeporu waeräño. Jukuärái ko yambii iyapoa reta.

**22**Jae ramiño wi Tumpa ipuere uyapo iwi pewa reta pe jae mbae uipota wae rupi. Tumpa ipuerete uiti tëi iarasi jowaicho reta re jare uechaka chupe reta imbaepuere. Echa’ä jae reta jeko kachi rupi uñererükumewa ma Tumpa koti. Erëi ima rupi Tumpa urupia chupe reta, jare umaño ukuakuaa oo waerä teko jae reta onoi wae.

**23**Jukuärái Tumpa uyapo, echa’ä jae uipota ñru wae reta uecha waerä imbaepuere tuichaete ye wae jokua ara jae uiti yawe iarasi wasu jowaicho reta re. Jare jokua ñru wae reta ko jae Tumpa uiparareko wae reta. Jae reta Tumpa uipota uyekou waerä jae imbaepuere jupiete ye wae re, echa’ä jokua ko jae ipiyemingeta iyipi wiwe.

**24**Jare yande reta ko jae jokua reta. Erëi Tumpa mbaeti ko ñanereni ikoti judío reta ipite wiño. Echa’ä jae ñanereni wi judío mbae wae reta ipite wi.

**25**Jukuärái arakae Tumpa jei uyapota iko. Echa’ä Tumpa iñee arakae umimbeu wae Oseas uikuatía kuärái: “Tumpa jei: ‘Tenondete chembae’ä iko wae reta yurekota ko chemaerä, jare tenondete au mbae wae reta añawe auta ko reta.’

**26**‘Tenonde yawe che jae chupe reta: ‘Pe reta chembae’ä ko,’ jaese chupe reta. Erëi opaete kerupi rupi jukuärái che jae wae rupi, pëti ara jaeta chupe reta: ‘Che ko jae peTumpa aikoño mái wae. Jare pe reta ko jae cheraí reta.’ Jukuärái jaeta chupe reta,’ jei Tumpa.” Jukuärái uikuatía arakae Oseas.

**27**Erëi Isaías uikuatía Israel iñemoñaeta reta rewa kuärái: “Jetaete ko Israel iñemoñaeta reta, iwikuíti i wasu jembei rupi oï wae rami. Erëi yepe tëi jetaete ye ko jae reta, erëi jesewe amokueño Tumpa uepita oï reta.

**28**Echa’ä imambaeño uwäeta oï ara yandeYa uiporaraka waerä iwi pewa reta pe jaeño mái pewa.” Jukuärái jei arakae Isaías.

**29**Jare tenonde yawe Isaías umimbeu wi chupe reta kuärái: “YandeYa opaetei mbaepuere onoi. Jare amokue wae yande reta jae yanderepi’ä yawe, jayawe jae opata tëi yanembái kërái jae opa umbái Sodoma jare Gomorra pewa reta rami.” Jukuärái uikuatía Isaías.

## Jeta Israel inemoñaeta reta wirowia'ä Jesucristo re

<sup>30</sup>Jayawe ¿mbae ra añawe yaecha ñai kua pe? Judío mbae wae reta, yepe tei ueka'ä reta uyembujupika waerä Tumpa koti, erëi uwäe chupe reta kërái rupi uyembujupika waerä. Echa'ä wirowia reta Jesucristo re, jare jukuärái rupi Tumpa umae oï jese reta jeko mbae wae rami.

<sup>31</sup>Erëi judío reta, yepe tei opaete seri jekuaeño ueka iyupe reta kërái mbae uyapo wae rupi uyembujupika waerä tei Tumpa koti, erëi uwäe'ä chupe reta.

<sup>32</sup>Echa'ä uyeko ñonoï reta iyé jokua mbaembae uyapo wae re. Mbaeti uyeko kawi ñonoï reta Tumpa re. Añetete, jae reta usiri ma Tumpa wi, echa'ä wirowia'ä reta Jesucristo re ramo.

<sup>33</sup>Jukuärái wi Tumpa inee uikuaaka yandewe jae reta rewa, echa'ä Tumpa jei ineeriru pe kuärái: “Mase, añoño ai pëti wae Israel inemoñaeta reta ipite pe. Jae ikota pëti ita rami ipotawe wae kía ipisapaa jese waerä. Echa'ä jae jeko pewa jeta wae reta ipisapaa oa oo, jare jukuärái ndarau uepiti reta tekowe opa mbae wae. Erëi ipotawe kía wirowia jese wae ndarau imara.” Jukuärái uyekuatía oï.

## Romanos 10

<sup>1</sup>Hermano mii reta, aipota tei ko Israel inemoñaeta reta opaete onoi waerä tekowe opa mbae wae. Jáeramo jekuaeño täta rupi ayerure ai jese reta Tumpa pe.

<sup>2</sup>Chepuere chemiäri jese reta kërái jatangätuete ñonoï reta uyeyokui waerä tei Tumpa pe. Erëi añetete jae reta uikuaa kawi'ä oï kërái uyeyokui kawi waerä chupe.

<sup>3</sup>Echa'ä yepe tei Tumpa uikuaaka ma yandewe kërái rupi umae yanderé yandereko mbae wae rami, erëi jae reta uikuaa'ä jokua jare uipota'äwe wi uikuaa reta. Jaeño uipota tei uyembujupika reta Tumpa koti jae reta jei wae rupiño – jae ko Moisés arakae uikuatía wae re yureko wae rupi.

<sup>4</sup>Erëi Cristo opa ma jupi uyapo yandepirika pe opaete Moisés uikuatía wae rupi. Jare jukuärái añawe Tumpa umae opaete kía Cristo re wirowia wae reta re jeko mbae wae rami.

### Tekowe opa mbae wae Tumpa umee wae yawái mbae ko yaikuaa waerä

<sup>5</sup>Jokua uipota tei uyembujupika Moisés uikuatía wae rupi wae reta, jokua reta rewa Moisés arakae uikuatía kuärái: “Kía uipota iko kua mbaembae reta rupi wae, jokua reño ko ikota. Jare imeta ko uyapo jupi rupi kawi uyekou waerä tekowe ipiau wae re.” Jukuärái uikuatía Moisés arakaete.

<sup>6-7</sup>Erëi Cristo re wirowia wae reta, Tumpa umae ma jese reta jeko mbae wae rami jae reta wirowia jese ramo. Jare jae reta ipuere jei: “Awiye yayemingeta yandepia pe kuärái: ‘Kiawe ipuere'ä uikuaa Tumpa uipota wae. Yaikuaa waerä mbae Tumpa uipota wae, imeta tei ko kía oo ueka Cristo ara pe ani umanokue wae reta ñonoï wae pe. Jare uwäe ma chupe yawe, imeta ko ueru ye imiäri waerä yandewe.’”

Awiyeta ko yayemingeta yandepia pe jukuärái, echa'ä Cristo ou ma ara wi jare jae ikowe ye ma ou umanokue wae reta ipite wi.”

<sup>8</sup>Jare Tumpa jei ñee rewa kuärái: “Chiñee mbiri'ä oï pawi. Piñee pe etei oï jare pepia pe oï wi.” Jukuärái jei. Kua ñee re imeta ko yarowia, jare jokua ñee etei ko numimbeu noï pewe.

<sup>9</sup>Kua ñee uikuaaka yandewe kuärái: yande towake etei yae yawe Jesús ko jae yandeYa wae, jare yarowia yawe yandepia rewe Jesús umano jare Tumpa umbijekowe ye ueru umanokue wae reta ipite wi, jayawe Tumpa yanderepita jare umeeta yandewe tekowe opa mbae wae.

<sup>10</sup>Echa'ä yandepia rewe yarowia jukuärái yawe, Tumpa umaeta yanderé yandereko mbae wae rami. Jare towake etei yae yawe Jesús ko jae yandeYa wae, jokoropi ko Tumpa yanderepi.

<sup>11</sup>Kua re yandepuere yaikuaa añetete ko, echa'ä uyekuatía oï Tumpa ñeeriru pe kuärái: “Opaetei kía kía wirowia reta jese wae ndarau imara, echa'ä Tumpa ndarau etei uyawi oï chupe reta ramo,” jukuärái jei.

<sup>12</sup>Jare jokua wirowia jese wae reta, jae reta ko judío yawe ani judío mbae wae yawe, jokua mbae'ä ko Tumpa pewarä. Echa'ä yandeYa ko jae opaete wae iYa, jare jae uyapota ikawiete wae opaete chupe uyerure wae reta pe.

<sup>13</sup>Jukuärái uikuaaka yandewe Tumpa ñeeriru pe jei yawe kuärái: “Opaetei kía reta uyerure yandeYa pe uepi reta waerä wae, yandeYa uepita reta,” jei.

### Israel ñemoñaeta reta uyandu tõi ñee ikawi wae

<sup>14</sup>Erëi ¿këraita ra ipuere uyerure reta yandeYa pe uepi reta waerä, mbaeti wirowia reta jese yawe? Jare ¿këraita ra ipuere wirowia reta, mbaeti uyandu reta jese wae yawe? Jare ¿këraita ra ipuere uyandu reta jese wae, mbaeti yawe kía umimbeu chupe reta wae?

<sup>15</sup>Jare ¿këraita ra kía ipuere umimbeu chupe reta, Tumpa omondo'ä kía yawe? Kërái Tumpa ñeeriru pe jei oï wae rami: “Ikawiete ko kía ou umimbeu yawe ñee ikawi wae.”

<sup>16</sup>Erëi yepe tõi ñee ikawi wae uyemimbeu oï, erëi amokueño wirowia ma jese. Jukuärái yaikuaa, echa'ä Isaías arakae jei Tumpa pe kuärái: “CheYa, ¿ime ra kía yepe wirowia oriñee re wae?” Jukuärái uikuatía arakae.

<sup>17</sup>Erëitu yaikuaa ñaï jaeño kía uyapisaka ñee ikawi wae re Cristo rewa wae ipuere wirowia jese.

<sup>18</sup>Erëi, ¿aramoi Israel ñemoñaeta reta uyandu'ä ra ñee ikawi wae? Uyandu reta tõi ko, echa'ä Tumpa ñee pe uikuaaka yandewe kuärái: “Kua ñee uyemimbeu ma opaetei iwi rupi. Iwi iyapi rewa ko yuraa uwäe reta umimbeu waerä.” Jukuärái uyekuatía oï.

<sup>19</sup>Jayawe ¿marái ramo ra Israel iñemoñaá reta opaete seri wirowia'ä ñee ikawi wae re? ¿Aramoi uikuaa kawi'ä ra jokua ñee uyandu reta wae? Uikuaa kawi reta tēi ko. Jáeramo Moisés rani uikuatía kērái Tumpa jei chupe reta kuärái: “Che ayapota aï mbae ikawi wae judío mbae wae reta pe, pe judío reta piko wae piñemiro waerä. Yepe tēi pe reta pere peï chupe reta iyarakuaa mbae wae ko jae reta, erēi che aechakata aï chupe reta chepiakawi wae jare jukuärái pombopochikata aï.” Jukuärái Moisés uikuatía Tumpa iñee.

<sup>20</sup>Jare joko wi Isaías umimbeu simi judío mbae wae reta rewá kuärái: “Tumpa jei: ‘Yepe tēi chereka'ä yureko reta, erēi añawe jae reta chekuaa ñonoï. Jare jokua upirandu'ä cheré wae reta pe, chupe reta ko ayekuaaka ma,’ jei Tumpa.” Jukuärái uikuatía Isaías.

<sup>21</sup>Erēi Isaías imiári yawe Israel iñemoñaá reta rewá, jei kuärái: “Tumpa jei ipiatiti rewe: ‘Ima rupi ma aeni tēi anoi reta uñatima ye chekoti waerä. Erēi jae reta jekuaeño uyembowaicho ñonoï chekoti, jare uipota'ä etei uyapo reta che jae wae rupi,’ jei Tumpa.” Jukuärái uikuatía Isaías arakae.

## Romanos 11

### Tumpa mbaeti wiriro opaete Israel iñemoñaá reta

<sup>1</sup>Jayawe, ¿mbae pa uipota jei yandewe kua? Israel iñemoñaá reta ko jae Tumpa uiparawo wae reta. Erēi ¿Tumpa opa ra wiriro reta añawe? ¡Mbaeti etei! Echa'ä che ko jae wi Israel pewa jare Benjamín iñemoñaá pewa. Abraham ko jae cheyipí wi. Jare Tumpa mbaeti chereriro che.

<sup>2</sup>Jáeramo Tumpa mbaeti orereriro opaete ore judiorä nduiko wae reta. Amokue ore reta, iyipi wiwe Tumpa orekuaaño mái jare oreparawo ore nduiko waerä jae imaerä. Yanemandúa kawi ñaï wi Elías rewá. Tumpa iñeeriru pe uikuaaka yandewe kērái arakaete Elías iyengeta jétáíwa Israel iñemoñaá reta koti Tumpa jowai kuärái:

<sup>3</sup>“CheYa, uyuka reta ma niñee umimbeu wae reta, jare opa ma urukachi reta kiape kiape nderee uyembutuichakase wae jenda reta. Añawe cheño pe etei ma aï arowia nderé wae, jare añawe che awe ma uipota cheyuka ñonoï reta,” jei Elías Tumpa pe. <sup>4</sup>Erēi ¿mbae ra Tumpa jei chupe? Jei chupe: “Mbaeti neño pe etei neï nderowia cheré wae. Echa'ä imeño iru

<sup>7.000</sup> kuimbae reta uñeñoño'ä ñonoï itawa re tumparaanga Baal jee wae jowai umbiadora reta waerä jese. Jae reta wi ko añono tee ma chemaerä.” Jukuärái Tumpa arakae jei Elías pe.

<sup>5</sup>Jare jukuärái wi añawe rupi ime amokue ore judío reta nduiko wae ndorowia kawi noï Tumpa re. Jare Tumpa oreparawo ma ipiakawi rupi.

<sup>6</sup>Mbaeti ko oreparawo mbae ikawi wae nduyapo wae rupi. Echa'ä jae oreparawo yawe mbae nduyapo wae rupi, jayawe mbaetita tēi ko uyekuaa ipiakawi oreparawo wae rupi.



## Tumpa umbipiatäta Judío Cristo re wirowia mbae wae reta

<sup>7</sup>Jayawe ¿mbae pa yaecha ñai kua pe? Yepe tei opaete seri judío reta uipota Tumpa umae waerä jese reta jeko mbae wae rami, erëi jukuärái'ä uyeyapo chupe reta. Amokueño uwäe chupe jokua mbae ikawi wae – jae ko ore iyipi wiwe Tumpa orepawo wae reta. Erëi jokua ñru judío reta, opa Tumpa umbipiatäta reta.

<sup>8</sup>Uyekuatía oï Tumpa ñeeriru pe jese reta kuärái: “Tumpa uyapo chupe reta awiye waerä iyarakuaa reta. Jae uyapo reta jesa mbae wae rami jare iyapisa mbae wae rami, awiye waerä jae reta uikuaa kawi Tumpa rewa. Jare jekuaeño añawe rupi jukuärái jae reta ñonoï.”

<sup>9</sup>Jae ramiño wi mburuwicha wasu David arakae uikuatía kuärái jae reta rewa: “Jokua mbaembae jae reta uyerowia jese wae, tuyeyapo chupe reta yembiawái. Tuiporara reta mbaembae kachi uyapo reta wae re.

<sup>10</sup>Tuiko jae reta jesa mbae wae rami, awiye waerä iyarakuaa reta. Tupita pione retarä jaeño mái pewa.” Jukuärái David uikuatía judío reta re wirowia mbae Cristo re wae.

## Judío reta uñatima yeta ñonoï yandeYa koti

<sup>11</sup>Jayawe judío reta opaete seri ma opia Tumpa wi, echa'ä jae reta wiriro Jesús ramo. Jukuärái jae reta tuicha teko onoi Tumpa koti. Erëi ¿kua uipota ra jei jae reta upitata jukuäráiño jaeño mái pewa? ¿Mbaeti etei! Erëi añawe rupi judío reta wiriro Jesucristo ramo, Tumpa umee oï judío mbae wae reta pe ipuere waerä jae reta onoi tekowe opa mbae wae. Jare jukuärái Tumpa uyapo judío reta uñemiro waerä.

<sup>12</sup>Añawe judío reta opia ma Tumpa wi, erëitu pëti ara jae reta uyerowa yeta ñonoï Tumpa koti. Jare jokua ara ikawieteta oï opaete pewarä. Añawe judío mbae wae reta uyekou ñonoï judío reta opia Tumpa wi ramo. Erëi ¿mbowi ye ye ra ko jae reta uyekouta ñonoï kuri judío reta uyerowa ye yawe Tumpa koti?

<sup>13</sup>Erëi añawe aipota ayemingeta pewe pe judío mbae piko wae reta pe. Tumpa chokui amimbeu waerä pewe ñee ikawi wae Cristo rewa, jare jokua re cheratangätu aï.

<sup>14</sup>Echa'ä judío reta uecha yawe kërái pe reta piñemïiru peï Tumpa ndiwe wae, aramoi amokue jae reta ikirëita wi uyerowa Jesucristo koti jae uepi reta waerä.

<sup>15</sup>Jukuärái aipota, echa'ä aikuaa aï jokua ara judío reta wirowia yawe Jesucristo re, ikawiete yeta ko yandewe. Añawe rupi judío reta wiriro ma Jesús ramo, jeta pe judío mbae piko wae reta piyeapikatu ma Tumpa ndiwe. Erëi ¿mbowi ye ye ra ko piyerowiata peï kuri judío reta uñatima ye yawe Tumpa koti? Añawe judío reta umano oï wae echa rami ko. Erëi jokua ara jae reta wirowia yawe, yurekota umanokue wae reta ikowe ye wae rami.

<sup>16</sup>Yambijaanga yaikuaa waerä këraita ra ko oï judío reta wae. Amo wese pe ore judío nduiko wae reta mbiyape nduyapo yawe, nduraa numee Tumpa pewarä jokua

masa wi peraso mii. Jare jukuärái nduyapo yawe, Tumpa umae kawi jokua masa numee chupe wae re jare jae nunga wi jokua masa jembire wae re. Jukuärái wi ko judío reta, echa'ä judío tamikue reta Tumpa oñono tee jae imaerä. Jáeramo iñemoñaá reta yurekota wi jae imaerä. Jukuärái wi pëti temiti japo reta ikawi oï yawe, jáka reta ikawi oï wi.

### **Judío mbae wae reta awiyeta ko uyembutuicha judío reta koti**

<sup>17</sup>Erëi añawe pe judío mbae piko wae reta, piyekou peï Tumpa ipiakawi re, echa'ä Tumpa peñono jeta judío reta jendakue pe. Kua yandepuere yambijaanga pëti temiti ikawi wae olivo jee wae re. Pe reta pikuaa yandepuere yayasia amokue temiti jáka reta, jare jokua jendakue pe yandepuere yamboya ye amokue olivo ñana rupiwa jáka reta. Joko wiwe jokua temiti ikawi wae iyaisi umbipi uasa ye jokua iwira jáka uyemboya wae reta rupi jare umee ye chupe reta tekowe. Jukuärái wi pe judío mbae piko wae reta jokua iwira jáka ambie wae reta rami ko. Echa'ä pe reta Abraham iñemoñaá pewa'ä ko. Jare jokua jeko pewa piyekou'äse mbaembae ikawi wae Tumpa uyapo judío reta pewartä wae re. Erëitu añawe opaete seri judío reta wirowia'ä Jesucristo re ramo, pe reta piyekou peï jokua mbaembae re jae reta ipepika pe.

<sup>18</sup>Erëi awiye piyembutuicha judío reta wi. Pemandúa kawi peï temiti jáka reta yureko japo re. Jare jukuärái wi añawe pe reta piyekou peï judío reta rupi. Ore judío nduiko wae reta mbaeti nduyekou noï pe judío mbae piko wae reta rupi.

<sup>19</sup>Erëi aramoi amokue pepite pe ñonoï wae reta jeita kuärái: “Erëi Tumpa omombo jeta judío reta temiti jáka yayasia yamombo wae rami, yande judío mbae yaiko wae reta ñaneñono waerä jae reta jendakue pe.” Jukuärái aramoi jeita reta.

<sup>20</sup>Añetete tēi ko jokua. Erëi Tumpa wiriro jokua judío reta jae reta wirowia'ä Jesucristo re ramo. Jare jae peñono ma ko jae reta jendakue pe perowia ma jese ramo. Erëi piyandareko kawi mii piyé pipiu rewe. Awiye piyembutuicha chuwi reta.

<sup>21</sup>Echa'ä yepe tēi jae reta ko jae jokua temiti jáka rami etei, erëi Tumpa wiriro ma jae reta. Jae ramiño wi pe judío mbae piko wae reta, Tumpa ipuere pereriro wi perowia'ä jese yawe.

<sup>22</sup>Añawe aipota pe reta pepia pe piyemingeta waerä mokui mbae re. Pëti ko jae Tumpa uiporaraka jokua judío reta pe jae reta wiriro Jesucristo ramo. Erëi iru wae ko jae kua: Jae uechaka oï ipiakawi pe judío mbae piko wae reta pe. Erëitu pe reta mbaeti yawe jekuaeño piyeko jae ipiakawi re, pikota iwira jáka kía uyasía omombo wae rami.

<sup>23</sup>Jare judío reta wirowia Jesucristo re yawe, Tumpa oñono yeta oï reta jenda jenda pei tenonde wireko wae rami, kía iwira jáka uyeyasia wae jendakue pei oñono ye wae rami. Tumpa uyapo yeta oï reta yureko waerä jae imaerä. Jare Tumpa ipuerete uyapo jukuärái.

<sup>24</sup>Echa'ä pe reta yepe tēi ko peī pēti iwira ñana rupiwa jāka reta rami, erēi Tumpa pewarā yawai'ä etei ko peñono waerā judío reta jendakue pe. Erēi judío reta ko jae pēti temiti ikawi wae jāka rami etei. Jáeramo yawai'ä etei ko Tumpa pe oñono reta ye waerā jae reta jendakue pei, jae reta uyerowa ye yawe Cristo koti.

### **Taikuete rupi Tumpa uepita oī opaete Israel iñemoñaá reta**

<sup>25</sup>Jáeramo hermano mii reta, ime mbae ndei etei uyekuaa oī wae aipota pe judío mbae piko wae reta pikuaa kawī waerā. Jare kua che aipota pikuaa waerā awiye waerā piyembikate. Yepe tēi añawe jeta judío reta ipiatāta ñonoī Jesucristo koti, erēi ndarau jukuäráiño upita reta. Tumpa uikuaa opaete judío mbae wae wirowiata oī jese wae reta, jare opa ma jae uipapa reta. Jare opaete jae reta wirowia ma yawe,

<sup>26</sup>jayawe ramo opaete Israel pewa reta wi wirowiata, jare Tumpa uepita onoi reta. Jukuärái wi uikuaaka yandewe Tumpa iñeeriru pe, echa'ä joko pe uyekuatía oī kuärái: “Upuruepi wae outa oī Sion wi. Jare jae umbiyerowa yeta Israel iñemoñaá reta mbae kachi uyapo reta wae wi.

<sup>27</sup>Tumpa jei: ‘Kua ko jae yemingeta ayapota aī jae reta ndiwe wae: che opata ambái aī chuwi reta mbaembae uyawi reta chekoti wae,’ jei Tumpa.” Jukuärái uyekuatía oī.

<sup>28</sup>Añetete, añawe judío reta opaete seri Tumpa jowaicho reta ko, echa'ä wirowia'ä reta ñee ikawi wae re. Jare jokua jaekawi oī pe judío mbae piko wae reta pewarā. Erēi jese Tumpa uauñoi judío reta, echa'ä imandúa kērái uiparawo arakae judío iyipi reta jae imaerā jare jei chupe reta uyapota iko mbaembae ikawi wae iñemoñaá reta pe.

<sup>29</sup>Jare Tumpa uiparawo yawe kía jae imaerā, jaeño mái ikota jae imaerā. Jare Tumpa umee yawe mbae ikawi wae kía reta pe, ndarau etei upiro ye chuwi.

<sup>30</sup>Pe judío mbae piko wae reta tenonde yawe piyapo'äse Tumpa jei wae jare pikuaa'äse Tumpa ipiakawi. Erēitu añawe judío reta opaete seri wirowia'ä Jesucristo re ramo, Tumpa uechaka ma pewe ipiakawi.

<sup>31</sup>Jukuärái wi ko judío reta. Yepe tēi añawe jae reta opaete seri uyapo'ä Tumpa jei wae, erēi Tumpa uechaka yeta chupe reta ipiakawi jae uechaka pewe wae rami.

<sup>32</sup>Jukuärái ko opaete yande judío jare judío mbae yaiko wae reta yayapo'ä Tumpa jei wae. Erēi Tumpa umaño yanderé, jukuärái ipuere waerā uechaka ipiakawi tuichaete wae opaete wae pe.

### **¡Tuyembutuichaka Tumpa jee mbaembae uyapo wae re!**

<sup>33</sup>¡Tuichaete ye ko Tumpa iyarakuaa! ¡Mbaeti mbae awe jae uikuaa mbae wae! ¿Kía ra ipuere uikuaa Tumpa ipiyemingeta jare maera uyapo jokua uyapo wae?

<sup>34</sup>Kērái Tumpa iñeeriru pe jei oī wae rami: “¿Ime ra kía uikuaa yandeYa ipiyemingeta wae? ¿Ime ra kía ipuere umbiarakuaa yandeYa wae?”

<sup>35</sup>“¿Ime ra kía tenonde umee yandeYa pe wae jare yandeYa imeta ko umiñatima ye chupe wae?

¡Mbaeti etei kiawe!”

<sup>36</sup>Echa’ä yandeYa ko jae opaete mbaembae iYa. Jae ipo wiño ko ou opaete mbaembae, jare jae rupi opaete mbaembae ñonoï. Jare opaete mbaembae ime oï wae reta jae uyapo jae imaerä. ¡Tuyembutuichaka yandeYa jee jaeño máí pewa! Jukuärái tuiko.

## **Romanos 12**

### **Këraita ko yambiyerowia Tumpa wae**

<sup>1</sup>Jayawe hermano mii reta, añawe yaikuaa ko Tumpa yandepararekoete wae. Jáeramo, ¿kërái ra ikawita yayeyokui waerä chupe añawe? Arakae rupi Israel iñemoñaa reta wiraa mbaemimba uyuka umee waerä Tumpa pe. Jare jokua mbaemimba Tumpa pewaräño ko. Jare jukuärái ramiete wi che pumiñera piñemee waerä Tumpa pe opaete perekowe rewe jae imaeräño piko waerä. Piñeño tee Tumpa pewarä pembiyerowia waerä. Echa’ä jukuärái ko jupi pembutuicha waerä Tumpa jee.

<sup>2</sup>Kua iwi pewa reta opaete seri oyowaicho ñonoï Tumpa koti jare jae reta jeko kachi oï Tumpa jowai. Jáeramo pereko awiye toï jae reta jeko rami. Pemaño Tumpa re umbipiau waerä pepiyemingeta, jare jukuärái umbiambie waerä pereko. Jare jukuärái piyapo yawe, pikuaa kawita peï mbae Tumpa uipota piyapo waerä wae – jae ko mbaembae ikawi wae, jare jupi wae, jare umbiyerowia Tumpa wae.

### **Ñai ko pëti ramiño, erëi mbaeti oyowake ñai**

<sup>3</sup>Tumpa ipiakawi rupi umee chewe mbaepuere jae waerä pewe kuärái: Awiye piyererowia katuete piyé. Erëi pëti pëti pepia pe piyemingeta kawi piyé añetete rewe kërái Tumpa peapo wae rupi. Echa’ä jokua ara perowia jese yawe, Tumpa umee pewe pëti pëti pe kërái rupi piyeyokui waerä chupe. Erëi mbaeti ko yayeyokui chupe oyowake.

<sup>4</sup>Kua yandepuere yambijaanga yanderete re. Echa’ä yanderete, yepe tëi pëtiño ko, erëi yanderete pe oï wae jeta ko, jare pëti pëti jokua reta ime onoi iparawikii.

<sup>5</sup>Jukuärái wi ko opaete yande Cristo re yarowia wae reta. Yepe tëi jeta ko yande reta jare oyowake’ä etei ko ñai, erëi Cristo opaetei yandapo ma pëti ramiño iyé. Jare pëti ramiño ko ñai jese ramo, yande reta pëti ramiño ko ñai yandiyé wi.

### **Tumpa umee pëti pëti pe kërái rupi yayeyokui waerä chupe**

<sup>6</sup>Jare Tumpa ipiakawi rupi umee ma yandewe pëti pëti wae pe yaikatu yayapo waerä mbae jukuärái yayeyokui kawi chupe waerä. Jare oyowake’ä ko mbaembae yaikatu yayapo wae. Jayawe kía pe Tumpa etei umee ñee iiru wae pe umimbeu waerä wae, tumimbeu kawi chupe.

<sup>7</sup>Jare kía pe Tumpa umee ñru hermano reta pe uyeyokui waerä wae, tuyeyokui kawi chupe reta. Jare kía pe Tumpa umee ñnee re oporomboe waerä wae, toporomboe kawi.

<sup>8</sup>Jare kía pe Tumpa umee ñru wae reta umikirëi waerä jare umbiarakuaa waerä wae, tumikirëi jare tumbiarakuaa kawi reta. Jare kía pe Tumpa umee kirëi yembori umee waerä ñru wae reta pe wae, tumee chupe reta umbiete mbae rewe. Jare kía pe Tumpa umee ñru hermano reta itenondewarä iko waerä wae, turuwata kawi mii. Jare kía pe Tumpa umee iparawete wae reta ombori waerä wae, tombori reta wi uyerowia rewe.

### **Kërái ko yayerau päwe waerä añetete rewe**

<sup>9</sup>Awíye piyerauraangaiño. Piyerauta ko päwe añetete rewe. Piñamitää opaete mbae ikawi mbae wae, jare piyemboya ikawi wae reño.

<sup>10</sup>Piyerau päwe rewe pëti tëtara reta uyerau wae rami, jare awíye piyembitenonde ñru wae reta wi.

<sup>11</sup>Awíye peakí Tumpa koti. Piyeyokuita ko yandeYa pe peratangätu rewe jare pepia rewe.

<sup>12</sup>Pikuaa pei Tumpa uyapota oí pewe mbaembae ikawiete wae; jáeramo pikota ko piyerowia rewe. Piporara yawe, jekuaeño pemiawäta pepiawasu rewe. Jare jekuaeño piñemiatangätu wi piyerure waerä Tumpa pe.

<sup>13</sup>Mbae uata yawe ñru hermano reta pe, pembori mbaembae penoi wae pipe. Jekuaeño pembiasa kawi piyerowia rewe opou pepi wae reta.

<sup>14</sup>Ime yawe kía uiporaraka pewe Cristo re perowia ramo, awíye piyepipeyu jese. Jaeño pere chupe: “Tumpa tuyapo ikawi wae ndewe.”

<sup>15</sup>Jare ime yawe kía pepite pe uyerowia oí wae, pe reta wi piyerowia jae ndiwe. Jae ramiño wi ime yawe kía pepite pe ipiatiti oí wae, pe reta wi pepiatiti jae ndiwe.

<sup>16</sup>Piko kawi pëti ramiño päwe rewe. Awíye piyererowia katuate piyé ñru wae reta wi. Piñemiüruta ko iparawete wae reta ndiwe wi. Jare awíye piyererowia katu opa mbae pikuaa wae echa.

### **Awíye yayepi kía ikawi mbae wae uyapo yandekoti wae**

<sup>17</sup>Kía mbae ikawi mbae wae uyapo pewe yawe, awíye mbae ikawi mbae wae piyapo chupe wi. Jekuaeño piyapo ikawi wae opaete wae jowake.

<sup>18</sup>Awíye pembipi piñee pemoë wirae. Pikota ko pepiakatu rewe pepuere wae rupi opaete wae reta ndiwe.

<sup>19</sup>Cheiru puau wae reta, ime yawe kía mbae ikawi mbae wae uyapo pewe wae, awíye piyepi jese. Pemaënota ko Tumpa re uiporaraka waerä chupe. Echa’ä Tumpa jei yandewe kuärái: “Che ko jae ayepita ai pewe wae. Che ko jae amiñatimata ai chupe reta wae.”Jukuärái uyekuatía oí Tumpa ñneerü pe.

<sup>20</sup>Jayawe kía oyowaicho pe ndiwe yawe, piyapo mii Tumpa iñeeriru pe jei oï wae rupi. Joko pe jei wi kuärái: “Perowaicho iyembaï yawe, pemingaru. Jare iïwe yawe, pemee tou i. Echa’ä jukuärái piyapo yawe, jae imarata oï ikawi mbae wae uyapo pekoti wae re.” Jukuärái uyekuatía oï.

<sup>21</sup>Jayawe kía uyapo pewe mbae ikawi mbae wae yawe, piyapo ikawi wae chupe. Awiye piyepi jese. Echa’ä piyepi jese yawe, piñemiamirikata jokua mbae ikawi mbae wae pe. Mbae ikawi wae rupi ko pemiamirita mbae ikawi mbae wae.

## Romanos 13

### Këraita ko yaiko mburuwicha reta ndiwe

<sup>1</sup>Jare yanemburuwicha reta, yaikuaa kawi Tumpa ko umee chupe reta mbaepuere opaetei yureko waerä mburuwicharä. Jayawe mbaeti pëti awe mburuwicha Tumpa oñono mbae wae. Jáeramo imeta ko yande reta yayapo mburuwicha reta jei wae rupi.

<sup>2</sup>Erëi ime yawe kía ombowaicho mburuwicha wae, jae ko Tumpa koti etei uyembowaicho oï wi. Echa’ä Tumpa etei ko oñono mburuwicharä. Jáeramo ime yawe kía ombowaicho mburuwicha wae, Tumpa umañota oï mburuwicha re uiporarakata chupe waerä.

<sup>3</sup>Añetete ko, jaëño mbae ikawi mbae wae uyapo wae reta ukiye mburuwicha reta wi. Mbae ikawi wae uyapo wae reta ndarau ukiye chuwi reta. Jayawe piyapo mii ikawi wae. Jare jukuärái piyapo yawe, ndarau pekiye mburuwicha reta wi, jare jae reta uyemingeta kawita oï peré.

<sup>4</sup>Tumpa jowai, mburuwicha reta uyeyokui ñonoï chupe ikawi waerä pewe. Erëi pe reta piyapo yawe mbae ikawi mbae wae, jupi ko pekiye waerä chuwi reta, echa’ä jae reta uiporarakata oï pewe. Jokuaerä ko Tumpa umee chupe reta mbaepuere, uiporarakata waerä mbae ikawi mbae wae uyapo wae reta pe.

<sup>5</sup>Jáeramo piyapota ko mburuwicha reta jei wae rupi awiye waerä jae reta uiporarakata pewe, jare piko waerä pepiawiwe rewe jare pepia pembijeko mbae rewe.

<sup>6</sup>Jare jokua jeko pewa wi jupi ko pembiepi waerä mburuwicha reta okowara pewe wae. Echa’ä yambiepi’ä yawe chupe reta, ipuereta’ä uyapo reta jokua mbarawiki Tumpa umee chupe reta wae.

<sup>7</sup>Jayawe piyapo jupi wae rupi opaete mburuwicha reta pe. Pembiepi jae reta okowara pewe wae, jare pipiu chuwi reta wi.

### Yayerau päwe, echa’ä koiño ma oï Cristo ou ye waerä

<sup>8</sup>Pepia kía pe yawe, awiye pemañño ima tuasa pembiepi ye waerä chupe. Erëi ime ñanoi pëti mbía opa mbae wae – jae ko yayerauta päwe rewe wae. Jekuañño piyerau päwe rewe jayawe. Echa’ä kía uau japicha wae, añetete uyapo oï jupi opaete Moisés arakae uikuatía wae.

<sup>9</sup>¿Kērái ra jokua? Ime jeta mbaembae Moisés uikuatía wae. Amokue jei kuärái: “Awiye piyapo awasa. Awiye pepuruyuka. Awiye pemonda. Awiye papu pembijeko waerä perapicha. Awiye pepia pe pipotaete rewe pema mbaembae perapicha onoi wae re.”Jukuärái Tumpa jei Moisés pe uikuatía waerä. Jare jei chupe ñru mbaembae reta wi. Erëi opaete jokua Moisés uikuatía wae, jae ko pëti waeño. Jae ko kua: “Peau perapicha kērái pe reta etei piyerau wae rami.”

<sup>10</sup>Jayawe yande yaau yawe yanderapicha añetete rewe, ndarau yayapo chupe mbae ikawi mbae wae. Jare jukuärái yaiko yawe, yaiko kawita Tumpa jei wae rupi.

<sup>11</sup>Pikota ko kua che pumbiarakuaa aï wae rupi. Awiye piko kía ike rái wae rami. Echa’ä pikuaa peï koiño ma oï ara yandewe Tumpa yanderepi waerä opaete mbaembae kachi wae kua iwi pewa wi. Añetete ko, yande Cristo re yarowia ramo yawe, jokua ara mbiri echa iko yandewi. Erëi añawe koiño ma oï yandewe.

<sup>12</sup>Köe ma yandewe rami jare ara koiño ma oï Cristo ou ye waerä. Jáeramo awiye ma yayapo mbae ikawi mbae wae, pütumimbi pe jeko kachi wae reta mbae uyapo wae rami. Yayapota ko ikawi waeño. Jare kērái sindaro reta oñono iyé jembiporu ñeräro pewa köe ma yawe, jukuärái wi yayeyapikatu yandepuere waerä ñamiamiri mbae ikawi mbae wae.

<sup>13</sup>Yaiko kawita ko opaete wae jowake. Jáeramo awiyeta ko yasawipo. Jare awiyeta ko yayapo arete opa mbaembae uasata oï wae. Jare awiyeta ko yayapo awasa. Awiye yayeaka yande yepái. Jare awiye wi ñañemiro yandeyupe.

<sup>14</sup>Yepe tēi amo pe ime ñanoi kirēi mbae kachi yayapo waerä, erëi awiye yayemingeta yandepia pe jese kērái yayapo waerä. Pëti pëti wae yaipisi yandeyupe yandeYa Jesucristo jeko.

## Romanos 14

### Mbaembae Tumpa ñeeriru pe uyekuaa’ä oï wae rewa

<sup>1</sup>Añawe aipota pumbiarakuaa ye ambie re. Ime yawe kía pepite rupi ndeiño ipiräta Tumpa koti wae, piñemiiru kawi jae ndiwe. Jare awiye piyeaka jae ndiwe ipotawe mbaembae Tumpa ñeeriru pe mbaeti oï wae re.

<sup>2</sup>Yambijaanga. Pe pikuaa kawi peï amokue wae reta wirowia ipuere jou ipotawe tembiu ipiawiwe rewe Tumpa jowai. Erëi ñru wae reta ndarau jou mbaemimba soo, echa’ä ndeiño ipiräta ñonoï Tumpa koti. Ndeiño uikuaa kawi reta Tumpa yanembijeko’ä mbaembae yau wae re.

<sup>3</sup>Jayawe jokua ipotawe mbae jou wae, awiye turiro jokua soo jou mbae wae. Jare jokua soo jou mbae wae, awiye tiñera jokua ipotawe mbaembae jou wae re. Echa’ä jae wi ko Tumpa pewarä jare Tumpa pe uyeyokui oï wi.

<sup>4</sup>Jare ¿kía pa ko yande ñaniñera waerä ñru wae pe uyeyokui wae re? Jaeño uyeyokui wae iya ipuere jei chupe ikawi’ä uyapo oï wae. Jare añetete Tumpa omborita oï opaete chupe uyeyokui wae reta uyapo waerä jupi wae jae jowai.

<sup>5</sup>Īru yembijaanga. Amokue wae Cristo re wirowia wae reta oñono tee iyupe pēti ara ikawiete ye ĩru ara reta wi Tumpa pewarā. Jare ĩru wae reta jei opaetei ara reta oyowakeño ko Tumpa pewarā. Erēi pēti pēti wae tuikuaa kawi iyupe maera ra jukuārāi wirowia ñonoĩ.

<sup>6</sup>Jokua oñono tee ñonoĩ ara reta wae, uyapo ko ñonoĩ umbutuicha waerā yandeYa jee jokua ara etei. Jae ramiño wi jokua uikuaa soo jou wae reta, jae reta wi ko wirowia uyapo ñonoĩ yandeYa umbiyerowia waerā jare umeeñoi yasurupái Tumpa pe jembiu re. Jukuārāi wi jokua soo jou mbae wae reta, jae nunga wi wirowia ko uyapo ñonoĩ yandeYa umbiyerowia waerā jare umee wi yasurupái Tumpa pe jembiu re. Mokui rewe uyapo ñonoĩ ikawi wae Tumpa jowai.

<sup>7</sup>Ikawi yaikuaa kawi waerā kua: Pēti awe yande reta yaiko'ā ko yandeyupe waerāño. Jare ndarau etei yandepuere ñamano yandeYa jei'ā yawe.

<sup>8</sup>Yande ñai yanderekowe pe rambuewe, imeta ko yaiko yambiyerowia waerā yandeYa. Jae nunga wi ñamano yawe, ñamanota yandeYa jei ramo. Jáeramo yanderekowe pe ñai yawe jare ñamano yawe, oyowakeño ko ñai yandeYa pewarā.

<sup>9</sup>Jokuaerā ko Cristo umano yanderé jare ikowe ye ou umanokue wae reta ipite wi. Jare añawe jae ko opaete tekowe onoi wae reta iYa, jare jae nunga wi jae ko opaete umanokue wae reta iYa wi.

<sup>10</sup>Jáeramo, ¿kía pa ko yande ñaniñera waerā ĩru hermano re mbae uyapo wae re? Jare ¿kía pa ko yande ñariro waerā ĩru hermano mbae uyapo'ā wae re? Echa'ā pēti ara yande pēti pēti wae yayemboita ñai Tumpa jowai jae jei waerā yandereko re.

<sup>11</sup>Jukuārāi jei yandewe Tumpa iñeeriru pe, echa'ā joko pe uyekuatía oĩ kuārāi: “YandeYa jei: ‘Che ko jae Tumpa aikoño mái wae. Jare che etei tae, pēti ara opaete wae ñonoita ko itawa re uipiu rewe cherowai, jare jeita reta chewe: ‘Nde yepe jae Tumpa añetete wae,’ jeita reta.’ Jukuārāi jei Tumpa.”

<sup>12</sup>Jayawe pēti pēti wae yayemboita ñai Tumpa jowai yamimbeu waerā mbaembae yayapo wae re.

<sup>13</sup>Jáeramo awiye ma ñaniñera yandiyé. Erēi ikawiete ko yayandareko kawi mii waerā yandiyé awiye waerā ĩru hermano opia Tumpa jape wi yandereko pewa.

<sup>14</sup>Che pētiño ai yandeYa Jesucristo re ramo, aikuaa kawi ai mbaeti ko pēti awe mbae yau wae ipuere yandapo ikia Tumpa koti. Erēi kía wirowia yawe ime amokue tembiu yandapo ikia Tumpa koti wae, jayawe jae awiye tou.

<sup>15</sup>Jare yande reta, awiyeta ko yau jokua nunga tembiu jae jowake. Echa'ā yepe tēi chupe waerā uyawi oĩ Tumpa koti jae jou yawe jokua nunga tembiu, erēi aramoi jae uipotata jou wi yanderecha yau ñai yawe. Jare jae jou yawe jokua tembiu, ipiatitita oĩ kuri jokua re Tumpa jowai. Jáeramo jukuārāi yayapo yawe, yaiparareko'ā ko ñai yandehermano. Jese ko Cristo umano. Jáeramo awiye mbaembae yau wae rupi ñarükumewa yandehermano Tumpa koti.



<sup>16</sup>Yanemaerä aramoi ime amokue mbaembae yandepuere yayapo yandepiawiwe rewe Tumpa jowai. Erëi ime yawe kía kachi uyemingeta jokua mbaembae re wae, jayawe awiye yayapo.

<sup>17</sup>Echa'ä ñanoi Tumpa yanemburuwicha wasurä yawe, jayawe mbae'ä ko mbaembae yau wae. Erëi ikawi ko yaiko waerä jupi rupi yandepiakatu rewe jare yerowia rewe ñru wae reta ndiwe. Jare Espíritu Santo imbaepuere rupi yandepuere yaiko jukuärái.<sup>18</sup>Jare jukuärái yayeyokui ñai Cristo pe yawe, jayawe yambiyerowiata ko ñai Tumpa, jare ñru wae reta umae kawita yanderé.

<sup>19</sup>Jáeramo yayapo kawii mii ñañemimiräta päwe waerä Tumpa re jare yaiko kawii waerä yandepiakatu rewe.

<sup>20</sup>Awiye ñarükumewa Tumpa iparawiki yandepite rupi oi wae mbae yau wae rupi. Añetete ko, Tumpa jowai yandepuere yau opaete mbaembae. Erëi ñru wae aramoi jou yawe mbae yandereko pewa jae wirowia ikawi'ä ko jou waerä wae, jokua re ko ipuere jae opia Tumpa jape wi. Jáeramo jokua jeko pewa ikawi'ä ko yau waerä jokua nunga tembiu jae jowake.

<sup>21</sup>Jae ipuere opia Tumpa jape wi yawe soo yau jeko pewa ani aramoi vino yau jeko pewa, jayawe ikawi'ä ko yau waerä soo jare vino. Jae ramiño wi awiyeta ko yayapo ipotawe mbae jae jowake chupe waerä kachi wae ko, awiye waerä jae opia Tumpa jape wi.

<sup>22</sup>Yepe tei aramoi yarowia yandepuere yayapo jokua mbaembae Tumpa jowai yandereko mbae rewe, erëi awiyeta ko yayapo. Jayawe Tumpaño tuikuaa jokua yarowia wae rewa. Awiye awe yayemingeta ambie ndiwe jokua rewa. Yayerowiaño jayawe jokua mbaembae re yandepuere yayapo Tumpa jowai yandepiawiwe rewe wae.

<sup>23</sup>Erëi ime yawe kía jou jokua tembiu jae wirowia awiyeta tei ko jou wae, jaei uyembijekota oi jokua re, echa'ä mbaeti uyapo oi jae wirowia wae rupi. Jare ime yawe mbae yandepuere'ä yayapo Tumpa jowai yarowia kawii rewe wae, erëi yayapo yawe, yayawi ma ko Tumpa kotii.

## Romanos 16

### Pablo wiraaka saludo reta

<sup>1</sup>Aipota amimbeu kawii pewe yanderindi mii Febe jee wae rewa. Jae jekuaeño ombori kawii Cristo re wirowia wae reta tēta wasu Cencrea pewa. Jare añawe jae uipota oo opou pepi.

<sup>2</sup>Jáeramo jae oo uwäe yawe, pembiasa kawii mii kuri yandeYa jee re. Echa'ä ikawi ko jukuärái yayapo waerä yandeyupe, yande Tumpa ñaneño tee jae imaerä wae reta. Jare ombori mii wi Febe aramoi mbae uata chupe yawe, echa'ä jae ombori ma jeta wae reta jare che chembori wi.

<sup>3</sup>Pembisaluda mii chewe Priscila jare ime Aquila. Jae reta ko jae cheparawiki iru, echa'ä ore päwe rewe nduyeyokui Jesucristo pe.

<sup>4</sup>Jae reta uñemee umano waerä tēi cherepi waerä. Jáeramo jekuaño ayapo yasurupái chupe reta. Jare cheño'ä ko ayapo yasurupái. Jae nunga opaete judío mbae Cristo re wirowia wae ikotiätia uyembati wae reta wi umee yasurupái chupe reta cherepi wae re.

<sup>5</sup>Pembisaluda mii chewe wi opaete hermano reta Priscila jare Aquila jēta pe uyembatiñoi wae reta. Jae nunga wi pembisaluda mii chewe cheiru au wae Epeneto. Jae ko tenondete wirowia Cristo re wae iwi Asia pe.

<sup>6</sup>Jae nunga wi pembisaluda mii chewe María. Jae uparawiki ma tātā pepite rupi Cristo pewarä.

<sup>7</sup>Jare pembisaluda mii chewe cherētáíwa reta Andrónico jare Junias. Che aiko yawe peresoriru pe, jae reta yureko wi che ndiwe joko pe. Jae reta wirowia Cristo re ndei che arowia jese mbowe, jare Jesús omondo wae reta uyemingeta kawi jese reta.

<sup>8</sup>Jae nunga wi pembisaluda mii chewe Amplias. Jae ko yandeYa re wirowia wae wi, jare che jae au wi.

<sup>9</sup>Jare pembisaluda mii chewe Urbano. Jae ko ore ndiwe uyeyokui Jesucristo pe wae. Jare pembisaluda mii chewe cheiru au wae Estaquis.

<sup>10</sup>Jae ramiño wi pembisaluda mii chewe Apeles. Jae jeta uiporara ma Cristo re wirowia jeko pewa, erēi opia'ä Tumpa jape wi. Jukuärái jae uechaka ma kērái wirowia Cristo re añetete rewe. Jare pembisaluda mii chewe Aristóbulo jēta pewa reta.

<sup>11</sup>Jae nunga wi pembisaluda mii chewe cherētáíwa Herodión jare opaete Narciso jēta pewa Cristo re wirowia wae reta wi.

<sup>12</sup>Jae ramiño wi pembisaluda mii chewe yanderindi mii reta Trifena jare Trifosa jare Pérsida wi. Jae reta tātā uparawiki ñonoï yandeYa pe.

<sup>13</sup>Jare pembisaluda mii chewe Rufo jare ichi wi. Rufo wirowia kawi yandeYa re, jare jae ichi jekuaño uyandareko kawi cheré chesi rami.

<sup>14</sup>Jae ramiño wi pembisaluda mii chewe Asíncrito, Flegonte, Hermas, Patrobas, Hermes, jare opaete hermano reta wi uyembatiñoi jae reta ndiwe wae.

<sup>15</sup>Jae nunga wi pembisaluda mii chewe Filólogo, Julia, Nereo, Nereo jindi, Olimpas, jare opaete hermano reta wi uyembatiñoi jae reta ndiwe wae.

<sup>16</sup>Jare pe reta piyembisaluda yawe, jekuaño piyembisaluda piyerau rewe. Opaete Cristo re wirowia wae reta kerupi rupi uyembati wae reta omondo wi pewe saludo.

### **Pablo umbiarakuua reta oporomboe kachi wae reta re**

<sup>17</sup>Añawe hermano mii reta, che pumiñera piyandareko kawi waerä piyé, awiye waerä kía jeko pewa piyembiyao tee tee peyuwi. Echa'ä ime amokue wae reta

mbaeti ikawi oporomböe. Jokua jae reta oporomböe wae ambie ye pe reta piyemböe wae wi, jare jae reta jeko pewa jeta wae reta opia ma Tumpa jape wi. Jáeramo awiye piñemiiru jae reta ndiwe.

<sup>18</sup>Jokua nunga oporomböe wae reta mbaeti uyeyokui ñonoï yandeYa Jesucristo pe. Jaeño ko uparawiki ñonoï jae reta jei wae rupiño. Jae reta iñee kawi rupi umbitawi onoi ikoi mii wae reta.

<sup>19</sup>Erëi pe reta pereräkua kawi ma opaete kerupi rupi, echa'ä jekuaeño piyapo kawi peï kërái piyemböe wae rupi. Jokua chembiyerowiaete oï. Erëi jaeño aipota pearakuaa katu waerä mbaembae ikawi wae pewaräño, jare awiye pearakuaa katu waerä mbaembae kachi wae pewarä.

<sup>20</sup>Tumpa ko jae jekuaeño yanembipiakatu wae. Jare jae imambaeño peñonota pemiamiri waerä Satanás kërái mbae re pepiro wae rami. YandeYa Jesucristo jekuaeño tipiakawi pewe.

<sup>21</sup>Kua pe oï che ndiwe cheparawiki iiru Timoteo jare iiru cherétáiwa reta Lucio, Jasón, jare Sosípater jee wae reta. Jae reta wi omondo oï pewe saludo.

<sup>22</sup>Jare Tercio wi omondo oï pewe saludo yandeYa jee re. Jae ko umbaekuatía oï chewe wae.

<sup>23</sup>Jare Gayo uipota pembisaluda wi. Jae jëta pe ko che ake aï añawe, jare opaete Cristo re wirowia wae reta kua tëta wasu pe ñonoï wae reta uyembatiñoi wi kua jae jëta pe. Erasto wi pembisaluda. Jae ko tëta wasu ikorepoti iyandarekoa. Jare hermano Cuarto omondo pewe wi saludo.

<sup>24</sup>YandeYa Jesucristo tumee opaete pewe ipiakawi. Jukuärái tuiko.

### **Tumpa jee tuyembutuichaka**

<sup>25</sup>Jare añawe yambutuicha Tumpa jee. Jae ko ipuere pemimiräta Tumpa re kua ñee ikawi wae Jesucristo rewa amimbeu pewe wae rupi. Ima rupi kua ñee kiawe uikuaa'ä iko.

<sup>26</sup>Erëi añetete Tumpa iñee arakae umimbeu wae reta uikuatiaño mái yepe kua ñee. Jare añawe Tumpa ikoño mái wae jei ma kua uyekuaa kawi waerä, jare jukuärái opaete iwi pewa reta ipuere waerä wirowia jese jare jukuärái uyapo reta waerä jae jei wae.

<sup>27</sup>Tumpaño ko jae iyarakuaa katuite ye wae. Jae jeeño tuyembutuichaka jaeño mái pewa Jesucristo uyapo wae re. Jukuärái tuiko.

## 1 Corintios

### Kua tupapire rewa:

Kua tupapire Pablo uikuatía jare wiraaka Cristo re wirowia wae reta pe tēta wasu Corinto pewa pe. Corinto ikose pēti tēta wasu iwi Grecia pe oī wae. Jare jerākua opaete iwi rupi jokuia Corinto pewa reta jaeño yureko uyembiyerowia reta waerä jare uyembiikokatu reta waerä. Jare joko pe oo Pablo pēti wese umimbeu waerä ñee ikawi wae Jesucristo rewa, jare jeta joko pewa reta wirowia jese (Hechos 18.1-11). Erēi Pablo oo ye chuwi reta yawe, Cristo re wirowia wae reta Corinto pewa umbipi uyeaka reta jae yepái jare uyembiyao tee tee reta iyuwi. Jae nunga wi umaeño reta teko kachi ukuakuaa waerä ipite pe. Jare jokuia jerākua Pablo pe yawe, jae uikuatía kua tupapire umbiarakuaa reta waerä.

### 1 Corintios 1

#### Pablo wiraaka saludo

<sup>1-2</sup>Cherikei reta, cheriwi reta, jare cherindi mii reta tēta wasu Corinto pe piko wae, tenonde araaka ai pewe saludo. Che ko jae Pablo. Ikawi iko Tumpa pe Jesucristo chemondo waerä opaete kerupi jae jee re amimbeu waerä ñee. Jokuiaerä ko jae chereni. Che jare hermano Sóstenes ndiwe aikuatía ai kua tupapire opaete pe piyembañoi Tumpa jee re wae reta pe. Pe reta ko pei pēti ramiño Jesucristo re. Jare Tumpa pereni ma jare peñoño tee ma piko waerä jae imaerä. Jare pe retaño'ä ko peapo jukuärái Tumpa. Jae nunga wi Tumpa uyapo ma jukuärái opaete kía kía wirowia yandeYa Jesucristo re wae reta ipotawe kerupi ñonoī wae. Echa'ä yandeYa ko jae reta iYa wi.

<sup>3</sup>YandeRu Tumpa jare yandeYa Jesucristo jekuaeño tipiakawi pewe jare tuyapo pewe piko waerä pepiakatu rewe.

#### Uata'ä etei mbae awe Espiritu Santo umee wae

<sup>4</sup>Che jekuaeño amee ai yasurupái Tumpa pe peré jare jokuia jae uyapo pewe wae re. Echa'ä jae ipiakawi rupi peapo ma pe reta piko waerä pēti ramiño Jesucristo re.

<sup>5</sup>Jare pēti ramiño pei Cristo re ramo, piyekou pei jeta mbaembae ikawiete wae re. Echa'ä Tumpa umee ma pewe arakuaa jae pikuaa waerä, jare jae nunga wi umee ma pewe pepuere waerä pemimbeu rupi kawi jesewa.

<sup>6</sup>Jukuärái piyekou pei, jare jukuärái rupi Tumpa uikuaaka oī opaete wae pe añetete ko jokuia ñee Cristo rewa ore numimbeu pewe wae.

<sup>7</sup>Jáeramo kua mbaembae reta rupi pepuere pikuaa kawi uata'ä etei pewe mbae awe Espiritu Santo umee wae. Jukuärái ko añawe rupi peäro pei rambuewe piyerowia rewe yandeYa Jesucristo ou yeta wae.

<sup>8</sup>Jare añawe rupi jokua ara yandeYa Jesucristo pewa ou rewa, Tumpa jekuaeño pemimirātata oĩ ikoti pepuere waerä jokua ara piyemboi jae jowai pereko mbae rewe.

<sup>9</sup>Jare pe reta pepuere perowia katu Tumpa re uyapo waerä pewe jukuärái, echa'ä jae etei ko pereni piñemiiru kawi waerä Tai yandeYa Jesucristo ndiwe. Jare Tumpa ndarau uyawi oĩ pewe.

### **Pablo umbieta chupe reta uyembiyao tee tee reta iyuwi ramo**

<sup>10</sup>Jayawe hermano mii reta, che pumiñera yandeYa Jesucristo jee re awiye waerä piyeaka pe yepái jare awiye waerä piyembiyao tee tee peyuwi. Erëi pumiñera piñemiiru päwe pëti ñee wae rupiño.

<sup>11</sup>Jukuärái che jae pewe, echa'ä amokue Cloé jëta pewa reta umimbeu ma chewe pe rewa, kërái piyeaka pei pe yepái wae.

<sup>12</sup>Jeräkua chewe amokue pe reta pere pei piyererowia katu rewe, “Che chemboea ko jae Pablo.” Jare amokue wi pere pei, “Che chemboea ko jae Apolos.” Jare iiru pe reta wi pere pei, “Che chemboea ko jae Pedro.” Jare iiru pe reta wi pere pei, “Che chemboea ko jae Cristo.” Jukuärái pe reta opa piyembiyao tee tee pei peyuwi.

<sup>13</sup>Jukuärái pere yawe, Cristo pembiyao tee tee pei rami ko. Erëi ¿uyembiyao tee tee ra oĩ Cristo? Ndarau. Jayawe, ¿maera pa pe Cristo jete pewa piko wae reta opa piyembiyao tee tee pei peyuwi oreré? ¿Che yerá amano kurusu re peré? ¿Cheree re yerá piyembisakambuka i pe? Mbaeti etei. Che jae'ä ko peYa.

<sup>14-15</sup>Chemaerä añawe che amee yasurupái Tumpa pe mbowiño ko pumbisakambu i pe ramo. Echa'ä añawe pepuere'ä etei pere piyembutuicha rewe, “Pablo jee re ko ayembisakambuka,” pere waerä. Jaeño ambisakambu Crispo jare Gayo.

<sup>16</sup>Añetete yepe ambisakambu wi Estéfanos jëta pewa reta. Erëi mbaeti chemandúa kawi ambisakambu ra iiru wae reta wi.

<sup>17</sup>Mbowiño pe reta pumbisakambu, echa'ä jokuaerä'ä ko Cristo chembou. Cristo chembou ko ñee ikawi wae animbeu waerä iiru mbaembae reta wi. Jare che animbeu yawe ñee ikawi wae, aiporu'ä arakuaa kua iwi pewa. Jaeño animbeu simi rupi kërái Cristo umano kurusu re yanderé mbaembae yayawi Tumpa koti wae re. Echa'ä kua ñee rupiño ko uyekuaa Tumpa imbaepuere yanderepi waerä jokua teko ñanoi wae wi.

### **Arakuaa kua iwi pewa mbae'ä ko Tumpa pewarä**

<sup>18</sup>Añetete jeta wae reta pewarä ñee ikawi wae Cristo umano kurusu re wae mbae'ä ko chupe reta. Jukuärái ko Tatawasurenda koti oo ñonoĩ wae reta. Erëi yanemaerä yaikuaa ko jokua ñee ime onoi mbaepuere, echa'ä jokua ñee rupi ko Tumpa yanderepi oĩ.

<sup>19</sup>Arakuaa kua iwi pewa ndarau ipuere yanembori. Jukuärái ko jei yandewe Tumpa iñeeriru pe, echa'ä joko pe uyekuatía oĩ kuärái: “Tumpa jei: ‘Che aikuaakata aĩ

jokua iyarakuaa katu echa iyupe wae reta pe iyarakuaa añetete mbae'ä ko. Jae ramiño wi aikuaakata ai opaete mbaembae uikuaa kawu echa iyupe wae reta pe añetete uikuaa'ä etei ko mbae awe,' jei." Jukuärái uyekuatía oi.

<sup>20</sup>Jayawe Tumpa jei jukuärái yawe, ¿mbae ra yaeta iyarakuaa katu echa iyupe wae reta rewa? Jare ¿mbae ra yaeta jeta uyemboe wae reta rewa jare jokua ikatu uyeaka waerä wae reta rewa? Yepe tõi kua reta iyarakuaa katu echa ko, erõi jae reta iyarakuaa kua iwi pewaño ko. Jare Tumpa uikuaaka ma yandewe arakuaa kua iwi pewa añetete mbae'ä etei ko.

<sup>21</sup>Echa'ä ipuere'ä kiawe uikuaa Tumpa jukuärái rupi. Jukuärái Tumpa uikuaaka ma yandewe, jare jaeño ko jae iyarakuaa katuete ye wae opaete wae wi. Jare yepe tõi ñee Cristo rewa uyemimbeu oi wae mbae'ä ko jeta wae reta pewarä, erõi ime yawe kía jokua ñee re wirowia wae, Tumpa uyerowia rewe uepi teko onoi wae wi.

<sup>22</sup>Erõi ñru wae reta pewarä, kua ñee mbaeti jaekawi chupe reta. Echa'ä jeta judío reta uipota tõi uecha reta rani ore nduyapo waerä mbaembae kuimbaeño ndarau etei ipuere uyapo wae ndei wirowia reta mbowe. Jare judío mbae wae reta jekuaeño ueka tõi ñonoï arakuaa jae reta iyarakuaa rupiño.

<sup>23</sup>Erõi ore mbaeti numimbeu kërái jae reta uipota ñonoï wae rami. Ore numimbeuñoi opaete wae pe kërái Cristo uyekutuka pëti kurusu re yanderé. Jare opaete seri judío reta pewarä, kua ñee pëti yembiawái ko awiye waerä jae reta wirowia. "Këraita ra Upuruepi wae umano," jei reta tõi. Jare jeta judío mbae wae reta pewarä, kua ñee mbae'ä ko chupe reta.

<sup>24</sup>Erõi Tumpa ñanereni ko judío reta ipite wi jare judío mbae wae reta ipite wi jae imaeñño ñai waerä. Jare yanemaerä kua ñee Cristo rewa wae ikawiete ko, echa'ä yaikuaa ko Cristo rupi uyekuaa Tumpa imbaepuere jare iyarakuaa.

<sup>25</sup>Añetete, jokua ñee Cristo imano rewa wae mbae'ä ko jeta wae reta pe, jare jei reta tõi yandewe: "Petumpa ipiräta'ä chwaa oi," jei reta tõi. Erõi jeseuwe Tumpa ko jae iyarakuaa katuete ye jare imbaepuere ye opaete wae wi.

### **Tumpa uiparawo wae reta**

<sup>26</sup>Jayawe hermano mii reta, pemandúa kawu pei Tumpa jaeramo peparawo yawe, mbowiño pe reta piko iyarakuaa katu kua iwi pewa reta iyarakuaa wi. Jare mbowiño piko imbaepuere wae reta, jare jae nunga wi mbowiño piko kuimbae jeräkua wae reta.

<sup>27</sup>Erõi Tumpa pewarä jokua mbae'ä etei ko. Tumpa uiparawo jae imaeñä jokua ñru wae reta jei tõi chupe iyarakuaa mbae wae reta ko. Jukuärái uyapo Tumpa umimaraka waerä iyarakuaa katu echa wae reta. Jae ramiño wi Tumpa uiparawo jae imaeñä imbaepuere mbae wae reta umimaraka waerä imbaepuere wae reta.

<sup>28</sup>Jae ramiño wi Tumpa uiparawo ikuasi wae reta, jare ñru reta wirörokue reta, jare usiriwe'ä etei jei chupe reta wae. Jokua nunga reta etei ko Tumpa uiparawo jae imaeñä umimichika waerä uyererowia katu iyé wae reta.

<sup>29</sup>Jukuärái ko Tumpa uyapo awiye waerä kiawe ipuere uyembutuicha jae jowai.

### **Yayerowia yandeYa uyapo wae re**

<sup>30</sup>Pe retái piyeyapo'ä ko pëti ramiño Jesucristo re. Tumpa ko uyapo jokua mbae. Jare Cristo rupi Tumpa uikuaaka yandewe iyarakuaa. Echa'ä Cristo uyapo wae rupi opa ma uyembiepi teko yareko wae, jare jukuärái Tumpa uma yanderé yandereko mbae wae rami jare ñaneño tee jae imaerä.

<sup>31</sup>Jáeramo Tumpa uyapo ma yandewe opaete kua mbaembae reta ramo, ikawi ko yayapo waerä Tumpa ñeeriru pe uyekuatía oï wae rami. Echa'ä joko pe jei kuärái: “Ime yawe kía uipota uyembutuicha wae, tuyembutuicha yandeYa mbae ikawi wae uyapo chupe wae re.” Jukuärái uyekuatía oï.

## **1 Corintios 2**

### **Pablo umimbeu yawe ñee ikawi wae, mbaeti uiporu ñee iwate wae**

<sup>1</sup>Jayawe hermano mii reta, jokua jeko pewa che jaeramo a pepi yawe amimbeu waerä añetete wae Tumpa rewa, mbaeti etei aipota ayemingeta pëti ñeengatu wae rami jare pëti iyarakuaa katu echa iyupe wae rami.

<sup>2</sup>Che aiko pepite pe yawe, apita amimbeu waerä pewe Jesucristo rewa jare kërái jae umano kurusu re wae. Mbaeti ye ma ambie mbae.

<sup>3</sup>Jare che jaeramo a pepi yawe, che a cherete ipiräta'ä iko rewe. Jare ariri aiko parawete akiye ramo, aramoi ayawita aiko mbarawiki Tumpa umee chewe wae.

<sup>4</sup>Jare amimbeu pewe yawe ñee ikawi wae, mbaeti aiporu ñee iwate wae arakuaa katu pewa arowiaka waerä pewe. Erëi pe reta pecha Espíritu Santo uparawiki iko che rupi imbaepuere rewe,

<sup>5</sup>jukuärái Tumpa imbaepuere rupi perowia waerä Cristo re – mbaeti pëti kuimbae iyarakuaa rupi.

### **Tumpa umee yandewe arakuaa Espíritu Santo rupi**

<sup>6</sup>Erëi che aï yawe kía kía Tumpa koti ukuakuaa ma wae reta ipite pe, che aiporu ko ñee arakuaa katu pewa. Erëi kua arakuaa mbaeti ko iwi pewa. Jare jae'ä ko wi mburuwicha reta kua iwi pewa iyarakuaa onoi wae rami. Echa'ä añetete jokua mburuwicha reta imbaepuere opata oï.

<sup>7</sup>Erëi kua ñee ore numimbeu wae jae ko arakuaa Tumpa wi etei ou wae. Ore numimbeu kërái iyipi wiwe Tumpa ipiyemingeta oï yayekou waerä jae ndiwe imbaepuere jupiete ye wae re. Erëi tenonde yawe kua ñee kiawe uikuaa'äse, echa'ä tenonde yawe Tumpa uikuaaka'ä etei yandewe ramo.

<sup>8</sup>Añetete mbaeti pëti awe mburuwicha yepe kua arakuaa uikuaa wae. Echa'ä mburuwicha reta kua uikuaa yawe, ndarau tēi uyukaka reta kurusu re yandeYa imbaepuere wae yambutuicha wae.

<sup>9</sup>Erëi ¿këraitá ra ipuere uikuaa reta? Echa'ä Tumpa iñeeriru pe jei yandewe kuärái: “Tumpa uyapikatu ma mbaembae ikawiete ye ye wae kía kía uau Tumpa wae reta pewarä. Erëi mbaetii kiawe uecha jare uyandu jokua mbaembae rewa wae. Jare mbaetii wi kiawe ipia pe yepe uyemingeta jese wae, echa'ä ikawiete ye ye wae ko.” Jukuärái uyekuatía oï.

<sup>10</sup>Erëi yepe tēi ñru wae reta uikuaa'ä jokua mbaembae, erëitu yande reta yaikuaa, echa'ä Tumpa uikuaaka ma yandewe Espíritu Santo rupi ramo. Jare Espíritu Santo ipuere umee yandewe kua arakuaa, echa'ä Espíritu Santo uikuaa opaetei mbaembae. Espíritu Santo uikuaa Tumpa ipiyemingeta retawe Tumpa uikuaaka'ä kía pe awe wae.

<sup>11</sup>¿Kërái ra uikuaa? Yande reta yaikuaa ñai kiawe ipuere'ä uikuaa ñru wae ipiyemingeta chuwi. Jaeño uikuaa. Jae ramiño wi mbaeti kiawe uikuaa Tumpa ipiyemingeta chuwi. Jaeño Tumpa iEspíritu uikuaa, echa'ä Espíritu Santo jare Tumpa pëtiño ko.

<sup>12</sup>Jare Tumpa kua ipiyemingeta uikuaaka ma yandewe wi, echa'ä jae iEspíritu oï yandepia pe ramo. Jare arakuaa Tumpa umee yandewe wae kua iwi pewa'ä ko. Jae ko Espíritu Santo pewa etei. Jare Tumpa umee yandewe Espíritu Santo yaikuaa kawi waerä opaete mbaembae ikawi wae Tumpa umee ma yandewe wae.

<sup>13</sup>Jare jokua ko jae mbaembae ore numimbeu noï wae. Jare ore numimbeu yawe jokua mbaembae rewa, mbaeti nduiporu arakuaa kua iwi pewa. Ore nduiporu ko ñee reta Espíritu Santo uikuaaka orewe wae. Jukuärái rupi ore nduikuaaka noï ñru wae reta pe mbaembae añetete wae Espíritu Santo uikuaaka orewe wae.

### **Jaeño Cristo re wirowia wae reta ipuere uikuaa kawi Espíritu Santo uikuaaka wae**

<sup>14</sup>Erëi Cristo re wirowia mbae wae reta mbaeti onoi Espíritu Santo. Jáeramo wiriro reta mbaembae Tumpa iEspíritu uikuaaka wae, echa'ä jokua mbae'ä ko chupe reta. Jare jae nunga wi ipuere'äwe uikuaa kawi reta jokua mbaembae, echa'ä jaeño Espíritu Santo onoi wae reta ipuere uikuaa jokua mbaembae rewa.

<sup>15</sup>Jare jokua Espíritu Santo onoi wae reta ipuere uikuaa kawi ipotawe mbaembae rewa, jare ipuere jei reta ikawi oï ani ikawi'ä oï wae. Erëi ñru wae reta ndarau ipuere uyapo jukuärái. Jae reta ndaraúi ipuere ikawi umae Cristo re wirowia wae reta ipiyemingeta re ikawi ra ani ikawi'ä ra wae.

<sup>16</sup>Jare ¿këraitá ra ipuere reta? Echa'ä: “¿Ime ra kía uikuaa yandeYa ipiyemingeta wae? ¿Ime ra kía ipuere umbiarakuaa yandeYa wae?” ¿Mbaeti etei kiawe! Erëi yande reta ime ñanoi Tumpa iEspíritu ramo, yaikuaa kërái Cristo umae mbaembae re ikawi ra ani ikawi'ä ra oï wae.

## **1 Corintios 3**

**Yayembiyao tee tee ñai yandeyuwi yawe, yande yae wae rupiño ko ñai**



<sup>1</sup>Jayawe hermano mii reta, che aiko pe reta ndiwe yawe, chepuere'ä pumingeta kërái ipiräta Tumpa koti wae reta ndiwe ayemingeta wae rami. Jaeño chepuere pumingeta kërái jae jei wae rupiño yureko wae reta ndiwe ayemingeta wae rami, echa'ä jaeramo perowia Cristo re piko ramo. Pëti sambiai rami piko Tumpa koti.

<sup>2</sup>Yande yaikuaa kawi ñai pëti sambiai ukambu oi wae ipuere'ä jou tembiu ukuakuaa wae reta jou wae rami. Jae ramiño wi che aiko pe reta ndiwe yawe, jaeño chepuere pomboe mbaembae yawái mbae wae re. Echa'ä pe reta ndeiño pepuere pikuaa kawi mbaembae yawái wae – jokua ko jae mbaembae jaeño ipiräta Tumpa koti wae reta pewarä. Jare jukuärái ko pei añawe rewa.

<sup>3</sup>Echa'ä imeño piko pei pere wae rupiño. Echa'ä piyeaka pei pe yepái jare piñemiro pei peyupe. Jare jukuärái piko yawe, ¿piko'ä yerá pei pere wae rupiño? Jukuärái ko. Añetete, pe reta piko pei Tumpa re wirowia mbae wae reta rami.

<sup>4</sup>Pe reta pere yawe piyererowia katu rewe, “Che chemboea ko jae Pablo,” ani “Che chemboea ko jae Apolos,” piyapo ko pei Tumpa re wirowia mbae wae reta uyapo wae rami.

### **Cristo omondo wae reta uparawiki ñonoï pëti ramiño Tumpa pewarä**

<sup>5</sup>Mbaeti etei ikawi jukuärái piyeaka waerä pe yepái cheré jare Apolos re. Echa'ä kia'ä ko che, jare jae nunga wi Apolos. Ore ko jae Tumpa pe uyeyokui wae retaño. Tumpa oreporuño ko parawete pe reta perowia waerä Cristo re. Jare pëti pëti nduyapo mbarawiki yandeYa umee orewe wae.

<sup>6</sup>Che rani amimbeu pewe ñee ikawi wae Cristo rewa kërái pëti kuimbae temiti oñoti wiraa wae rami. Jare cheraikue rupi Apolos ou pemboe kawi kërái pëti kuimbae jokua temiti umbiu rami. Erëi Tumpaño ko umbikuakuaa temiti. Jare jukuärái wi Tumpaño ko umbikuakuaa kía ikoti.

<sup>7</sup>Jayawe che ko jae jokua kuimbae temiti oñoti iko wae ramiño. Jare Apolos ko jae jokua kuimbae temiti umbiu iko wae ramiño. Erëi Tumpa jeeño ko ikawi uyembutuichaka waerä, echa'ä jaeño ko jae umbikuakuaa temiti wae.

<sup>8</sup>Añetete jokua ñee ikawi wae umimbeu wae jare Tumpa iñee re oporomboe wae mokui rewe uparawiki ñonoï pëti ramiño. Jare Tumpa pëti pëti pe umiñatimata oi kuri iparawiki jae reta uyapo wae re.

<sup>9</sup>Apolos jare che, yepe tēi oreparawiki oyowake'ä ko, erëi nduparawiki noi pëti ramiño Tumpa pewarä jae iko pe wae rami. Jare pe reta ko jae Tumpa iko rami.

### **Tumpa umiñatimata oi kuri Cristo re wirowia wae reta pe**

Jare jae nunga wi pe reta ko jae pëti tēta Tumpa uyapoka oi wae rami.

<sup>10</sup>Tumpa ipiakawi rupi cheñoño pëti kuimbae ikatu tēta uyapo wae rami. Jare kërái tēta iwapika ambiwapi rami ko, jukuärái ko che rani amimbeu pewe ñee ikawi wae Cristo rewa. Jare añawe ñru wae uyapo oi pëti tēta jokua iwapika iáramo wae rami

ko, echa'ä jae jekuaeño pemboe pereraa oï Tumpa rewa. Erëi ipotawe kía tumae kawi kërái uparawiki waerä Tumpa pe.

**11**Timandúa kawi jaeño Jesucristo ko jae tëta iwapika ikawi wae uñeño ma oï wae rami.

**12**Jare ipotawe kía Tumpa pe uyeyokui wae, jae ko pëti tëta uyapo oï jokuia iwapika iáramo wae rami. Jare jae iparawiki Tumpa pewarä ikawi oï yawe, jayawe uyapo ko oï pëti tëta ikawi wae ima pewa rami. Erëi iparawiki ikawi'ä oï yawe, jayawe uyapo oï pëti tëta imambae ikumewata oï chuwi wae rami.

**13**Jare uwäeta oï ara opaete yande reta yayemboi waerä Tumpa jowai jae umiñatima waerä yandewe kërái mbarawiki chupe yayapo wae re. Jokuia ara oïta kërái tëta pëti pëti yande yayapo wae uasata oï tata rupi wae rami. Jare jukuärái uyekuaata oï yandeparawiki Tumpa pe yayapo wae ikawi ra ani ikawi'ä ra.

**14**Echa'ä yandeparawiki ikawi yawe Tumpa jowai, jokuia ikota ko pëti tëta tata ou chupe yawe uapi'ä wae rami. Jare Tumpa umiñatimata yandewe jokuia mbarawiki ikawi oï wae rupi.

**15**Erëi yandeparawiki ikawi'ä yawe Tumpa jowai, jokuia ikota ko pëti tëta tata ou chupe yawe opa okai wae rami. Yandeparawiki Tumpa pewarä ñamikañi ma yandeyuwi jaeño mái pewa. Yande reta jekuaeño yayepeta ñai kuri, erëi jokuia ikota ko pëti kuimbae añapea tata wi oyepe wae jare wiraa'ä etei mbae awe iyupe wae rami.

**16**¿Pikuaa'ä yerá piko kërái pe reta ko jae Tumpa jëta rami etei wae jare kërái Tumpa iEspíritu iko pepite pe wae?

**17**Jayawe ime yawe kía pererükumewa oï wae, jae ko Tumpa jëta urükumewa onoi wae rami. Jare jokuia jeko pewa Tumpa uiporarakata oï chupe täta rupi. Echa'ä Tumpa jëta uñeño tee oï jae imaerä.

### **Arakuaa Tumpa pewa ikawiete ye ko arakuaa kua iwi pewa wi**

**18**Awiye piyembitawika. Ime yawe kía pepite rupi iyarakuaa katu echa iyupe wae, erëi jae iyarakuaa kua iwi pewaño ko yawe, tueya jokuia arakuaa. Tumaño Cristo re wirowia mbae wae reta re uma waerä jese iyarakuaa mbae wae echa. Jukuärái Tumpa umaeta jese iyarakuaa katu wae ko.

**19**Echa'ä arakuaa kua iwi pewa mbae'ä etei ko Tumpa pewarä. Jukuärái ko jei wi yandewe Tumpa iñeeriru pe. Echa'ä joko pe jei kuärái: “Jokuia iyarakuaa katu echa iyupe wae reta, Tumpa uyapota uyepiaka reta waerä jae reta iyarakuaa rupii.”

**20**Jare jei wi yandewe kuärái: “YandeYa uikuaa jokuia iyarakuaa katu echa iyupe wae reta ipiyemingeta mbae'ä ko wae.” Jukuärái uyekuatía oï.

**21**Jayawe opaete kua mbaembae reta rupi che jae ai pewe awiye ma pere piyembutuicha rewe kía ko jae pemboea wae. Echa'ä Tumpa umee ma pewe opaete mbaembae piyekou jese waerä.

<sup>22</sup>Kua uipota jei che jare Apolos jare Pedro wi, Tumpa oremondo pëti pëti pumimiräta waerä Tumpa koti. Jare jokuaño'ä ko. Jae nunga wi Tumpa umee ma pewe mbaembae kua iwi pewa ikawi waerä pewe. Jare pikoweño yawe ani pemaño yawe, oyowakeño ikawieteta pewe. Jare opaete añawe uyeyapo oï wae jare opaete uyeyapota oï wae wi ikawita pewe. Jayawe opaete kua mbaembae reta pemaerä ko piyekou waerä jese,

<sup>23</sup>echa'ä pe reta ko jae Cristo pewa. Jare Cristo ko jae Tumpa pewa.

## 1 Corintios 4

### YandeYa Jesús omondo wae reta rewa

<sup>1</sup>Jayawe che aipota pe reta pemaerä oreré waerä jaeño nduyeyokui ko noi Cristo pe. Tumpa oreokui ma numimbeu waerä pewe mbaembae tenonde yawe jae uikuaaka'ä kía pe awe wae.

<sup>2</sup>Jare yaikuaa ñai pëti uyeyokui wae iya oyokui yawe, imeta ko uyapo jupi iya jei chupe wae rupi. Echa'ä jaeño iya jowai uyemboita oï kuri iya jei waerä iparawiki re.

<sup>3</sup>Jayawe mbae'ä ko chewe pe reta pere cheparawiki rewa wae, ikawi ra ani ikawi'ä ra oï wae. Jae nunga wi ipotawe kía nunga cheparawiki rewa jei wae, mbae'ä ko chewe wi. Jare che awe wi jae'ä cheparawiki ikawi ra ani ikawi'ä ra.

<sup>4</sup>Echa'ä aikuaa ai yepe tēi chemaerä jupi ayapo ai mbarawiki Tumpa umee chewe wae, erēi jokua uipota'ä jei jupi ko ayapo mbarawiki. Jaeño yandeYa jeita oï cheparawiki ikawi ra oï ani ikawi'ä ra oï wae.

<sup>5</sup>Jáeramo awiye ma pikura kua mbarawiki Tumpa pewarä nduyapo noi wae. Peäro mii yandeYa ou yeta wae, echa'ä jokua ara ramo yandeYa jeita oï jupi rupi oreparawiki rewa. Jukuärái ipuereta uyapo, echa'ä jaeño oñonota oï ikatu pe etei opaetei yande mbae yayapo wiari tēi wae jare jokua mbaembae yandepia japipe oï wae. Jayawe yandeYa ou ye yawe ramo ko Tumpa jeita oï yandewe pëti pëti pe mbae ikawi wae yandeparawiki rewa ikawi oï yawe.

<sup>6</sup>Jayawe hermano mii reta, opaete kua mbaembae che jae ma pewe wae rupi, ayemingeta ma chiyé jare Apolos rewa. Jukuärái ayapo ai pepuere pikuaa waerä kërái piyemingeta waerä oreré pemboea re. Imeta ko piyemingeta pepia pe oreré kërái Tumpa iñee pe uyekuatía oï wae rupiño. Jare jukuärái piyapo yawe, ndarau piyembutuicha rewe oreparawo pëti waeño iiru wae wi.

### Pablo umbieta uyererowia katu iyé wae reta pe

<sup>7</sup>Erēi jekuaeño pe reta pipota oreparawo yawe jare orereriro yawe, tapirandu pewe: ¿Kía pa umee pewe mbaepuere jukuärái piyapo waerä? Jare ¿marái ramo ra jekuaeño piyembutuicha? ¿Ime yerá penoi aramoi arakuaa Tumpa umee'ä pewe wae? Mbaeti. Jayawe pe reta awiyeta tēi ko piyembutuicha.

<sup>8</sup>Pe reta perowia tēi chawaa Cristo peapo ma iwī pewa reta imburuwicharā piko waerā. Jáeramo perowia tēi pikokatu wae rami peī jare uata'ā mbae pewe tēi. Jare perowia tēi wi pe retaiño ko piyeyapo jukuärái ore pombori mbae rewe. Erēi jaekawita tēi ko piko yawe mburuwicha reta añetete wae. Echa'ā jukuärái yawe, Cristo oreapota tēi wi ko mburuwicha retarā pe reta ndiwe.

<sup>9</sup>Erēi añawe rupi jukuärái'ā ko jokua oremaerā, ore Jesús oremondo wae reta. Echa'ā añawe rupi Tumpa oreño ma chawaa ore taikuewaete nduiko waerā. Ore ko jae kuimbae reta ñerāro pe jamiri wae ramiño, jare jupiwoiño oreyukata reta opaete wae jowake pēti yuwangata wae ramiño – kuimbae reta jare araiwa reta jowake wi.

<sup>10</sup>Jeta wae reta umae oreré orearakuaa mbae echa ko Cristo pe nduyeyokui noi ramo. Erēi pe reta, pēti ramiño ko peī Cristo re ramo, pemae tēi piyé pearakuaa katu wae echa. Ore parawete reta, orembaepuere mbae wae echa ko. Erēi pe reta pemae tēi piyé pemaepuere wae echa ko. Jeta wae reta orereriro ma. Erēi pe reta piyembutuicha ma tēi.

<sup>11</sup>Añawe rewa jeta wese oriyembai jare oreiwe. Jare oreremimonde opa ipächa oī uata orewe ramo. Jeta wese orenupa reta, jare mbaeti tēta mii awe nonoi.

<sup>12</sup>Jeta wese orekandi nduparawiki orepo pe etei numingana orerembiurā. Jare jeta wese iru wae reta uyepipeyu oreré. Erēi jukuärái yawe, ore mbaeti numiñatima chupe reta jukuärái wi. Jaeño ndoe chupe reta: “Tumpa tuyapo pewe ikawi wae.” Jare jeta wese jae reta uyapo mbae ikawi mbae wae orekoti. Erēi jukuärái yawe, ore jaeño ndurupia chupe reta.

<sup>13</sup>Jare jeta wese iru wae reta uyemingeta kachi orekoti. Erēi jukuärái yawe, ore jaeño oriñee kawi chupe reta. Kua iwī pewa reta pewarā, ore ko jae iti rami, jare ikawi'ā ma maerāwe wae rami chupe reta. Jukuärái ko ore nduikuasi noi añawe rewa nduyeyokui Cristo pe ramo.

### **Pablo ko jae reta tu rami**

<sup>14</sup>Che mbaeti aikuatía aī kuärái pe reta pumimaraka waerā. Jaeño ko aipota pumbiarakuaa mii, echa'ā pe reta ko jae chesambiai au wae reta rami.

<sup>15</sup>Ipuere ko jeta pemboe ñonoī Cristo rewa, erēi cheño ko jae peru rami, echa'ā che rani amimbeu pewe ñee ikawi wae Jesucristo rewa.

<sup>16</sup>Jáeramo che pumiñera pemomoe waerā chereko.

<sup>17</sup>Jare che amondo ma pewe Timoteo jae pemimandúa waerā jokua rewa. Jae ko cheraī auete wae rami, jare jae uyeyokui kawi yandeYa pe. Timoteo oo uwāe yawe joko pe, jae pemimanduata oī kuri kērái ko chereko Cristo pe ayeyokui rambuwe wae re. Jare jokua mbaembae jae pemboeta oī wae, jokua nunga etei wi ko che amboe Cristo re wirowia wae reta opaete kerupi rupi.

<sup>18</sup>Che aikuaa amokue pepite rupi oī wae reta uyembutuicha tēi ma chekoti, echa'ā wirowia reta tēi ndarau ma a pepi.

<sup>19</sup>Erëi jukuäráí'ä ko. Echa'ä Tumpa uipota yawe, che ata imambae apou ye pepi. Jare joko pe a ma awäe yawe, yaecha mbae ra jeita chewe reta kuri. Yaikuaata ñäi uyemingetaiño ra ñonoí reta ani añetete ra Tumpa umimbaepuere ma reta.

<sup>20</sup>Echa'ä añetete ko Tumpa jae reta imburuwicha wasu yawe, uyekuaata ko mbaepuere Espiritu Santo umee chupe reta wae rupi. Ndarau uyekuaa jae retaiño mbae jei wae rupi.

<sup>21</sup>¿Mbae pa pipota ayapo waerä che a ma awäe yawe pepi? ¿Pipota ra aiporaraka waerä pewe, ani pipota ra a waerä pepi ñee kawí rewe jare puau rewe? Peré ma añawe oí. Pipota'ä aiporaraka waerä pewe yawe, jayawe piyapisaka kawí mii kua chiñee re.

## 1 Corintios 5

### Pablo umbieta chupe reta teko kachi wae ipite pe oí wae re

<sup>1</sup>Ime ye oí ambie ñee ambientata aí pewe wae. Jeräkua ma opaete kerupi mbae kachiete wae uasa oí pepite pe. Jare jokua mbae Tumpa re wirowia mbae wae retawe mbaeti ipuere umbiasaiño. Ime ndaye pepite pe pëti wae wireko oí ichiraanga.

<sup>2</sup>Jare pe reta pemaño peí jese. Jokua ko jae mbae ikawí'ä etei wae. Jayawe, ¿këraitá pa jekuaño piyererowia katu peí piyé? Imeta tëi ma ko pemara jokua mbae kachi wae re. Jare pemombota tëi ma ko pepite wi jokua kuimbae mbae kachi uyapo oí wae.

<sup>3-4</sup>Che tae pewe, jupi ko piporaraka waerä jokua kuimbae pe jeko kachi re. Jukuäráí che jae jokua mbaepuere yandeYa Jesús umee chewe wae rupi. Yepe tëi añawe che joko pe'ä aí, erëi jesewe pumbiarakuaa aí pepite pe aí wae rami. YandeYa Jesús umee ma pewe mbaepuere piporaraka waerä jokua kuimbae mbae kachi wae uyapo wae pe. Jáeramo iruwe wese pe piyembati ye yawe, aipota piyapo waerä che ayapota tëi aiko wae joko pe aí yawe.

<sup>5</sup>Awiye pemaño jokua kuimbae re uyembati waerä pe reta ndiwe. Pemoë pepite wi jae uiporara waerä Satanás ipo pe. Echa'ä aramoi uiporara ma yawe, imarata jeko kachi re. Jayawe uyerowa yeta aramoi añetete rewe yandeYa koti. Jare jukuäráí jae jekowe Tumpa uepita oí jokua ara yandeYa pewa ou yawe.

<sup>6</sup>Añawe rupi pe reta mbaeti etei ma mbae re piyembutuicha waerä. Pe pikuaa ma ko këráí mbowiño levadura umbiyasi opaete mbiyaperä uñemona oí wae. Jukuäráí wi pëti teko kachi ipuere uñemiái opaete pepite rupi.

<sup>7</sup>Jáeramo pe reta imeta ko pemombo jokua teko kachi peyuwi. Pe pikuaa ko judío reta uyapoñoi pascua ara pe wae. Echa'ä jokua ara pe jae reta omombo iyuwi mbiyape indechikue uyeyapo levadura rewe wae. Jare jokua yemimandúa uyapo reta yawe, jou reta mbiyape ipiau wae levadura onoi mbae wae. Jayawe këráí jae reta jokua ara omombo iyuwi jokua mbiyape indechikue, jukuäráí wi pe reta pemombota peyuwi teko kachi pepite rupi oí wae, pepuere waerä piko jupi jokua

mbiyape ipiau wae levadura onoi mbae wae rami. Jare añetete jukuärái ko peï Tumpa jowai. Echa'ä kërái judío reta uyuka owecha pascua ara pe, jukuärái wi Cristo uñemee umano waerä teko yareko Tumpa koti wae uyembái waerä.

<sup>8</sup>Jáeramo jekuaeño ko yayemimanduata Cristo uyapo yandewe wae re. Jare ¿kërái ra yayapota jokua? Awiyeta ma ko yaiko ye teko kachi rupi. Imeta ko yaiko jupi rupi jare teko kawi rupi.

<sup>9</sup>Pemandúa peï jokua ñru tupapire aikuatía pewe wae re. Joko pe jae pewe awiye piñemiiru waerä awasa uyapo wae reta ndiwe.

<sup>10</sup>Erëi jae'ä pewe jokua tupapire pe pesiri waerä Cristo re wirowia mbae wae reta wi. Echa'ä kua iwi rupi ime jetaete awasa uyapo wae reta. Jukuärái wi ime jetaete jae reta imaeräño uipotae korepoti wae reta, jare jetaete imonda wae reta, jare tumparaanga re umbiadora wae reta wi. Jare ndarau pepuere pesiri chuwi reta, echa'ä opaete kerupi jae reta ñonoï.

<sup>11</sup>Erëi jokua aikuatía pewe wae, aikuatía ko piyapo waerä kua: Ime yawe kía jei iyupe, “Cristo re wirowia wae ko che,” erëi jae ko awasa uyapo wae yawe, ani jae ko tumparaanga re umbiadora wae yawe, ani jae ko uyemingeta kachi japicha re wae yawe, ani jae ko isawipose wae yawe, ani jae ko imonda wae yawe, ani jekuaeño jae imaeräño korepoti uipota yawe – jukuärái yawe, awiye piñemiiru jae ndiwe. Awiyete awe pekaru jokua nunga reta ndiwe.

<sup>12-13</sup>Kua pe mbaeti etei ayemingeta ai Cristo re wirowia mbae wae reta rewa, echa'ä kía'ä ko yande yaiporarakata waerä chupe reta. Tumpaño ko uiporarakata oi chupe reta. Erëi yande Cristo re yarowia wae reta mbaeti ko jukuärái. Pe reta pepuere piporarakata pepite pe oi wae reta pe jae reta jeko kachi yawe. Jáeramo pembisiri pepite wi jokua kuimbae uasaete ye ma mbae kachi uyapo wae.

## 1 Corintios 6

### ¿Kía pa yaekata yanembori yayeapikatu waerä?

<sup>1</sup>Jare ime ye oi mbae re ambietata ai pewe wae. Jeräkua ma chewe kërái piñeapo peï piyé mbaembae re, jare kërái peka peï Cristo re wirowia mbae wae reta pembori piyeapikatu waerä. ¿Këraita pa jokua añawe? Jae reta uipi'u'ä Tumpa wi. ¿Maera pa peka'ä ñru hermano Cristo re wirowia wae uyapikatu waerä pewe?

<sup>2</sup>¿Pikuaa'ä yerá jokua ara opaete iwi pewa reta uyemboi yawe Tumpa jowai, yande Cristo re yarowia wae reta Tumpa ndiwe yaeta ñai wi jae reta jeko re? Jukuäraita ko. Jayawe ¿pepuereta'ä yerá piyapikatu jokua teko michi wae pepite pe oi wae?

<sup>3</sup>Jare jae nunga wi jokua araiwa reta arakae Tumpa omombo iyuwi wae reta pëti ara uyemboita ñonoï yanderowai yande yae waerä jae reta jeko re. Jare jukuärái yawe, jayawe mbaetita mbae yawái yambori waerä ñru hermano reta uyeapikatu waerä añawe rupi.

<sup>4</sup>Jáeramo ime yawe pepite pe teko kua iwi pewa, awiye pekua Cristo re wirowia mbae wae reta pe. Pe retaño pepuere piyapikatu.

- <sup>5</sup>Jukuärái che ayemingeta pumimaraka waerä. ¿Mbaeti yerá pëti awe iyarakuaa wae pepite pe ipuere waerä uyapikatu pewe teko? Ime ko aipo oï.
- <sup>6</sup>Erëi pe reta jaeño pipota piñeapo peï piyé. Jare oete ma pe reta piñeapo peï piyé Cristo re wirowia mbae wae reta jowai.
- <sup>7</sup>Añetete kua piñeapo peï piyé wae rupi pikuaaka peï piñemiamirika ma ikawi mbae wae pe. Ikawita tëi ko perupiaño waerä jokua mbae ikawi mbae uyapo pekoti wae pe. Ikawita tëi ko pemaño waerä ïru wae re pemitawi waerä.
- <sup>8</sup>Jukuäráita tëi ko. Erëi amokue pe reta pipotaete piyerepi. Jáeramo piyapo peï mbae ikawi mbae wae ïru hermano reta koti. Jare pemitawi reta peï wi.
- <sup>9</sup>¿Pikuaa'ä yerá ndarau oï Tumpa ndiwe jeko kachi wae reta Tumpa oï ma yawe opaete wae imburuwicha wasurä jaeño mái pewa? Awiye etei piyemitawika kua rewa. Che tae pewe, ndarau etei ñonoï Tumpa ndiwe kua nunga reta: ipotawe wae ndiwe oke wae reta, jare tumparaanga re umbiadora wae reta, jare awasa uyapo wae reta, jare kuimbae jae yepái uyereroke wae reta,
- <sup>10</sup>Jare imonda wae reta, jare jae reta imaeräño uipotaeete korepoti wae reta, jare isawipose wae reta, jare uyemingeta kachi japicha re wae reta, jare japicha imbaembae upiro wae reta wi. Jokua nunga reta ndarau etei ñonoï Tumpa ndiwe jae oï ma yawe opaete wae imburuwicha wasurä jaeño mái pewa.
- <sup>11</sup>Jare jukuärái pikose amokue pe reta. Erëi añawe Tumpa opa oyoe pewi opaete kua mbaembae ikawi mbae wae. Añawe jae peñoño tee jae imaerä jare umae peré pereko mbae wae rami. Jukuärái Tumpa uyapo iEspíritu rupi, echa'ä añawe pe reta peï pëti ramiño yandeYa Jesucristo re ramo. Jáeramo awiye ye ma piko jupi mbae wae reta rami.

### **Pablo umbiarakuaa reta awiye ma uyapo waerä awasa**

- <sup>12</sup>Amokue pe reta pere peï kuärái: “Chepuereño ayapo ipotawe mbae teko kachi'ä Tumpa pewarä wae.” Jukuärái pere peï. Ipuere tëi jukuärái, erëi mbaeti opaetei mbae yayapo wae ikawi yandewe. Jare chemaerä, yepe tëi aramoi chepuere ayapo ipotawe mbae teko kachi'ä Tumpa pewarä wae, erëi ndarau amaño ipotawe mbae uyembiiya waerä cheré.
- <sup>13-14</sup>Jare amokue pe reta pere peï kuärái: “Tembiu yanderie pewarä ko, jare yanderie tembiu pewarä ko wi. Erëi pëti ara Tumpa mokui rewe umbaita oï. Jare jukuärái ko yanderete oï wi. Pëti ara yanderete Tumpa umbaita oï. Jáeramo mbae'ä ko yayapo waerä awasa.” Jukuärái amokue pe reta pere tëi. Erëi jukuärái'ä ko. Añetete pëti ara yanderete kua iwi pewa opata oï. Erëi Tumpa umbijekowe yeta oï yanderete imbaepuere tuichaete wae rupi kërái jae umbijekowe ye yandeYa rami. Jayawe yanderete jae'ä ko awasa pewarä – jae ko yayeyokui kawi waerä yandeYa pe. Jare yandeYa ko jae yanderete iYa.

<sup>15</sup>¿Pikuaa'ä yerá piko yande reta ko jae Cristo jete rami etei jare yanderete ko jae Cristo pewartá wae? Jayawe ¿mbae pere? ¿Ikawita ra kía Cristo jete pewa uñemipëti waerá kuña jete re umingana wae ndiwe? ¿Ikawi'ä etei ko!

<sup>16</sup>Echa'ä kía oroke yawe kuña jete re umingana wae, pëti jete ramiño ko jae ndiwe. Jukuärái ko jei Tumpa iñeeriru pe, echa'ä joko pe uyekuatía oï kuimbae jare kuña mbae uyapo wae rewa kuärái: “Mokui wae uyeyapota pëti ramiño.” Jukuärái jei.

<sup>17</sup>Erëi ime yawe kía jae ko yandeYa pewa wae, pëti ramiño ko oï yandeYa re Espiritu Santo rupi.

<sup>18</sup>Jáeramo pe reta awiye etei piyapo awasa. Pesiri chuwi. Echa'ä jae ko mbae kachi Tumpa jowai, jare mbaeti etei ambie mbae kachi ipuere urükumewa perete wae kua mbae wi. Echa'ä kía uyapo awasa wae, jete koti etei ko uyapo oï mbae kachi.

<sup>19-20</sup>Ani aramoi ¿pikuaa'ä yerá piko perete ko jae Espiritu Santo jëta wae? Jukuärái ko, echa'ä Tumpa umbiepi ma ko jepiete ye wae pe reta piko waerá jae imaerä, jare umee pewe Espiritu Santo pepia pe oï wae. Jáeramo añawe perete jare perekowe pembae'ä ma ko. Jae ko Tumpa imaerä. Jáeramo pembutuicha Tumpa jee mbaembae piyapo perete pipe wae rupi.

## 1 Corintios 7

### Pablo upurumbiarakuaa menda rewa

<sup>1</sup>Añawe che aipota aikuatía pewe jokua mbaembae reta pepirandu chewe wae re. Amokue pe reta pere tëi pei: “Ikawi ko kuimbae awiye waerá umenda kuña ndiwe.”

<sup>2</sup>Erëi che tae pewe, awasapota jeko pewa kuimbae reta tumenda jare jukuärái oï waerá jembireko ndiweño. Jare kuña reta jukuärái wi toi ime ndiweño.

<sup>3</sup>Jare kuimbae tuyapo jembireko ndiwe jembireko jete uipota wae. Jae ramiño wi kuña tuyapo ime ndiwe ime jete uipota wae.

<sup>4</sup>Echa'ä umenda reta ma yawe, kuña mbaeti ye ma ko jaeño jete iya. Jae nunga wi ime ko jae kuña jete iya. Jare jukuärái wi kuimbae mbaeti ye ma ko jaeño jete iya. Jae nunga wi jembireko ko jae kuimbae jete iya.

<sup>5</sup>Jáeramo kuimbae awiyeta ko jei jembireko pe: “Che ayapota'ä mbae nde ndiwe.” Jare kuña awiyeta ko jei wi jukuärái ime pe. Erëi umenda wae reta uipota yawe, ipuere oñono tee iyupe amokue ara reta mbae uyapo mbae waerá uyerure reta waerá Tumpa pe. Jokua jaekawiño ko. Erëi opa ma jokua ara jae reta oñono tee iyupe wae uasa yawe, jayawe tuyapo ye reta mbae awiye waerá Satanáspe uñemijëwa jare awasa uyapoka chupe reta waerá. Echa'ä pe reta pikuaa pei yawái ko perete uipota oï wae pemiawäta waerá.

<sup>6</sup>Kua pe mbaeti che jae ai pewe imeta ko peñono tee ara reta piyapo mbae waerá. Jaeño che jae ai pewe pipota'ä piyapo yawe mbae mbowi ara pewa, jaekawiño ko jokua.



<sup>7</sup>Añetete che aipota echa tēi ko opaete wae ipuere iko umenda mbae che rami. Jesewe yande reta yaikuaa ñai Tumpa umee yandewe pēti pēti wae pe kērāi yaiko waerā. Amokue wae reta pe Tumpa umee kirēi umenda waerā. Jare ĩru wae reta pe Tumpa umee kirēi awiye waerā umenda.

<sup>8</sup>Jayawe che jae ai jembireko umano wae reta pe jare ime umano wae reta pe kuārāi: Ikawi ko awiye umenda reta ye waerā, che amenda'ā rami.

<sup>9</sup>Erēi mbaeti yawe ipuere umiawāta reta jete uipota wae, jayawe tumenda reta ye. Echa'ā mbaeti ikawi jekuaeño uñerāro reta waerā jete uipota wae ndiwe. Jukuārāi che pumbiarakuaa ai kua pe.

<sup>10</sup>Jare ime ñee umenda wae reta pewartā wi, erēi jokua ñee mbaeti chewi ou. Jae ko yandeYa wi etei ou wae jare jae ko kua: Kuña awiye tusiri ime wi.

<sup>11</sup>Erēi kuña usiri yawe ime wi, tuiko jukuārāiño ma umenda mbae ani tuyeapikatu ye ime ndiwe. Jare jukuārāi wi kuimbae awiye tomombo jembireko. Jukuārāi jei yandeYa. Jare jukuārāi ko kuimbae jare kuña mokui rewe wirowia Cristo re yawe.

<sup>12</sup>Erēi ¿kērāi ra pēti kuimbae wirowia yawe Cristo re, erēi jembireko uipota'ā wirowia? ¿Ipuereta ra jae omombo jembireko? Añetete yandeYa yanemboe'ā jokua re. Jayawe che pumbiarakuaa kuārāi: Ime yawe pēti kuimbae Cristo re wirowia wae jare jembireko mbaeti wirowia wae, erēi jembireko uipota iko yawe jae ndiwe, awiye tomombo.

<sup>13</sup>Jare jukuārāi wi ko kuña Cristo re wirowia wae jare ime mbaeti wirowia wae, erēi ime uipota iko jae ndiwe yawe, awiye tomombo.

<sup>14</sup>Echa'ā jokua kuimbae uyekou oi wi yembori Tumpa umee oi jembireko rupi wae re. Jare jukuārāi wi ko kuimbae Cristo re wirowia wae jembireko wirowia mbae wae ndiwe. Jae jembireko uyekou oi wi yembori Tumpa umee kuimbae rupi wae re. Erēi jukuārāi'ā ko yawe, jayawe sambiai reta ikota tēi ipotawe Cristo re wirowia mbae wae reta isambiai reta rami. Erēi jukuārāi'ā ko. Jae reta uyekou ñonoī wi tu ani ichi wirowia ramo.

<sup>15-16</sup>Jayawe kuña ani kuimbae Cristo re wirowia wae awiye tuyemombo. Echa'ā Tumpa uipota yureko reta waerā päwe ipiakatu rewe. Jare jae nunga wi aramoi jokua kuimbae ani kuña Cristo re wirowia mbae wae wirowiata oi ime ani jembireko jeko pewa. Erēitu Cristo re wirowia mbae wae uipota usiri yawe, tome tusiriño. Jukuārāi yawe, Cristo re wirowia wae ipuere iko ipiawiwe rewe jaeño pe etei. Ikawi ko jukuārāi.

<sup>17</sup>Erēitu pēti pēti wae jekuaeño tuiko ipuere wae rupi kērāi jaeramo Tumpa ueni yawe iko wae rami. Joko peño ko Tumpa oñono. Jukuārāi che jae opaete kía Cristo re wirowia wae reta pe kerupi rupi uyembati reta wae.

**Tumpa uipota yayeyokui waerā chupe ipotawe kērāi ñai wae rupi**

<sup>18</sup>Jare kua che jae aï wae, menda rewaño'ä ko. Echa'ä Tumpa ueni yawe pëti judíowírowia waerä jese, jokua judío awiyeta ko jei: "Aipota'ä ma judiorä aiko." Jae ramiño wi Tumpa ueni yawe pëti judío mbae wae, awiye tuyeyapo judiorä.

<sup>19</sup>Echa'ä judío ko yande wae mbae'ä ko. Jare jukuärái wi judio'ä ko yande wae mbae'ä ko. Erëi jaeño ko ikawiete yayapo waerä Tumpa jei yandewe wae.

<sup>20</sup>Jayawe che tae ye pewe, pëti pëti Cristo re wírowia wae jekuaeño tuiko kërái jaeramo Tumpa ueni yawe iko wae rami.

<sup>21</sup>Ipuere ko amokue wae pione iko wírowia yawe Cristo re. Jukuärái yawe, awiye tipiatiti jokua re, echa'ä pëti pione ipuere wi uyeyokui kawi Tumpa pe. Kua pe mbaeti che jae aï pione reta awiye tusiri ipatrón ipo wi. Jae reta ipuere yawe, tusiri chuwi reta. Jaeño che jae aï pëti pione ipuere uyeyokui kawi Tumpa pe.

<sup>22</sup>Echa'ä yepe tëi kía pëti pione ko, erëi yandeYa ueni yawe iko waerä jae imaerä, jokua pione uyenduta oï yandeYa uepi rami ma ko. Jae ramiño wi yepe tëi kía jae'ä ko pionerä iko wae, erëi yandeYa ueni yawe iko waerä jae imaerä, jae ma ko Cristo pe tãta rupi uyeyokui wae.

<sup>23</sup>Echa'ä Tumpa ombou Tai umano waerä yanderé, jare jukuärái umbiepi ma ko jepiete ye wae yande reta yaiko waerä jae imaerä. Jáeramo piyeyokuita ko Tumpa peño.

<sup>24</sup>Jayawe hermano mii reta, opaete kua mbaembae reta rupi che jae aï pewe yandepuere ñañemiiru Tumpa ndiwe ipotawe kërái ñaï wae rupi. Jayawe pëti pëti wae jekuaeño tuiko kërái jaeramo Tumpa ueni yawe iko wae rami. Jukuärái tuyeyokui Tumpa pe.

### **Pablo umbiarakuaa ndei umenda wae reta**

<sup>25</sup>Pe reta pepirandu chewe wi ndei umenda wae reta rewa. Erëi añetete yandeYa Cristo mbaeti oporomboe jokua rewa. Erëi che chepuere pumbiarakuaa. Jare pepuere chererowia, echa'ä yandeYa cheparareko rupi chembiarakuaa kawi ma.

<sup>26</sup>Pe reta pikuaa peï kua ara reta rupi yawaiete oï yande Cristo re yarowia wae reta pewarä. Jokua jeko pewa che jae aï ikawi ko jekuaeño peï waerä añawe kërái peï wae rupi.

<sup>27</sup>Jayawe jokua umenda wae reta, awiye tuyemombo. Jare jokua ndei umenda wae reta, awiye tumenda. Jukuärái che pumbiarakuaa aï.

<sup>28</sup>Erëi kunumi reta jekuaeño uipota umenda yawe, jokua jaekawiño ko. Jae nunga wi kuñatái reta uipota umenda yawe, jokua jaekawiño wi ko. Menda kachi wae'ä ko Tumpa jowai. Erëi pe reta pikuaa ko kua ara reta rupi yawái yanemaerä, jare umenda wae reta onoita jeta yembiawái reta kua iwi pewa. Jare che aipota'ä pe reta penoi waerä jokua nunga yembiawái wi.

<sup>29</sup>Hermano mii reta, che tae pewe koiño ma ou oï ara reta opa waerä. Jáeramo menda awiyeta ko pembiawái piyeyokui waerä Tumpa pe pepia rewe.

<sup>30</sup>Jae ramiño wi mbiatiti, jare yerowia, jare ipotawe mbae pewa peyupe wae awe awiyeta ko pembiawái piyeyokui waerä Tumpa pe.

<sup>31</sup>Jare yepe tēi ime penoi mbaembae kua iwi pewa, erēi awiye piko jokua mbaembae pewarāño. Echa'ä koiño ma oī kua iwi opa waerä.

<sup>32</sup>Jayawe che aipota'ä mbae re piyembipia'ä waerä. Jare pemenda yawe, imeta yembiawái reta pewe. Añetete kuimbae umenda mbae wae ipuere uyeyokui kawi yandeYa pe ipia rewe, echa'ä ipuere uñemee yandeYa pe umbiyerowia waerä jaeño.

<sup>33</sup>Erēi jukuärái'ä ko kuimbae umenda wae. Echa'ä jae uyembipia'ä oī wi mbaembae kua iwi pewa re umbiyerowia waerä jembireko.

<sup>34</sup>Jae ñemiatamiata pe oī parawete. Jare jukuärái ko kuña umenda wae ndiwe wi. Echa'ä uyembipia'ä oī wi mbaembae kua iwi pewa re umbiyerowia waerä ime. Erēi kuñatái uyandareko yandeYa iparawiki reño, jare jukuärái ipuere jete jare jekowe oñono tee Tumpa pewarāño iko waerä.

<sup>35</sup>Kua che jae ai pewe wae ikawi pewe waerä ko. Che jae'ä ko ai pewe awiye pemenda waerä. Jaeño ko aipota pepuere piyeyokui waerä yandeYa pe pepia rewe jare jupi rupi. Chemaerä jaekawiño ko pemenda waerä. Erēi pemenda'ä yawe, ikawieteta wi pewe.

<sup>36</sup>Erēi pēti kuimbae tayi uasa ma oī umenda ara wae, jare kuimbae pe mbaeti ikawi tayi jukuäráiño oī waerä, jare tayi uipota wi umenda yawe, jayawe tumaeño jese umenda waerä. Jokua mbae kachi wae'ä ko Tumpa jowai.

<sup>37</sup>Erēi aramoi iru kuimbae uipota'ä tayi umenda waerä. Aramoi mbaeti mbae awe umbiawái uyandareko waerä tayi re, jare ipuere'ä kiawe jei chupe waerä mbae jokua rewa. Jukuärái yawe, jae nunga wi ikawi jokua uyapo.

<sup>38</sup>Jayawe mokui rewe uyapo ikawi wae. Jokua kuimbae umaño tayi re umenda waerä wae, jokua jaekawi uyapo. Erēi jokua kuimbae umaño'ä tayi re umenda waerä wae, jokua jaekawiete ye uyapo, echa'ä kua ara reta rupi yawái oī yandewe ramo.

### **Pablo umbiarakuaa kuña ime umano wae reta**

<sup>39</sup>Tumpa iñee pe jei kuña umenda wae pēti ramiño ko oī ime ndiwe, ime iko rambuewe. Mbaeti ikawi umenda waerä ambie ndiwe. Erēi ime umano chuwi yawe, kuña ipuere umenda ye ipiawiwe rewe pēti kuimbae jae uipota wae ndiwe. Erēi tumenda pēti kuimbae yandeYa re wirowia wae ndiwe.

<sup>40</sup>Jokua jaekawiño ko. Erēitu che jae ai ikawieteta ko chupe umenda yewi'ä yawe. Jare aikuaa Tumpa iEspíritu ko chembiarakuaa oī ayemingeta waerä jukuärái. Jayawe jukuärái ko che pumbiarakuaa mii menda rewa.

## **1 Corintios 8**

### **Pablo oporomboe soo uñemee tumparaanga pe wae re**

<sup>1</sup>Jae nunga wi pepirandu chewe ikawi ra yau waerä soo tumparaanga pe uñemee ma wae. Añawe ime amokue mbae re yayemingeta waerä yandepia pe. Amokue pe reta pere pei: “Ore nduikuaa kawi kua rewa,” pere. Jokua jaekawi tēi ko. Erēi yandearakuaa pochiño ko yayembutuicha waerä. Ikawiete ko yayerau päwe waerä, echa’ä jukuärái ñañemimiräta päwe Tumpa koti.

<sup>2</sup>Ime yawe kía uyererowia katu opa mbae uikuaa wae, jae ko uikuaa’ä witeño mbae uikuaata tēi wae. Añetete jae mbae’ä ko.

<sup>3</sup>Erēi kía uau Tumpa wae, Tumpa uikuaa oī kía ko jae wae.

<sup>4</sup>Jayawe, ¿mbae pa pere? ¿Ikawita ra yau waerä soo tumparaanga pe uñemee ma wae? Yaikuaa ñai tumparaanga reta mbaeti ko onoi tekowe. Jare yaikuaa ñai wi ime ko pētiño Tumpa añetete wae.

<sup>5</sup>Jeta wae reta jei tēi: “Ime ko jeta tumpa reta jare mbaembae iya reta kua iwi pe jare ara pe wi,” jei reta.

<sup>6</sup>Erēi yanemaerä ime pētiño Tumpa añetete wae. Jae ko yandeRu Tumpa ara pe oī wae. Jae ko uyapo opaete mbaembae, jare yande reta yaiko yambutuicha waerä jae jee. Jare ime wi oī pētiño yandeYa. Jae ko yandeYa Jesucristo. Jae rupi ko opaete mbaembae uyekuaa. Jare jae rupi ko wi yande reta ime ñanoi tekowe ipiau wae.

<sup>7</sup>Erēi amokue reta Cristo re wirowia wae mbaeti uikuaa kawi kua rewa. Jae reta michi rai wiwe wirowia tēi tumparaanga reta ime onoi tekowe wae. Jáeramo yepe tēi añawe jae reta wirowia Cristo re, erēi mbaeti imambae ñakañi jokua mbae wi. Imeño wirowia tēi reta jokua soo owa jou reta wae, jae ko soo tumparaanga uyembidora pewa. Jare jou reta ma yawe, ipia pe uyerecha reta teko pe ñonoī wae. Jare uyerecha reta wi ikia rami Tumpa jowai. Jukuärái ko jeta wae reta.

<sup>8</sup>Erēi ikawi ko yanemandúa waerä Tumpa pewarä ipotawe tembiu yau wae mbae’ä ko. Ndarau Tumpa umae kawi yanderé ipotawe tembiu yau wae rupi jare yau mbae wae rupi.

<sup>9</sup>Erēi yepe tēi pepuere peu ipotawe tembiu pepiawiwe rewe, jeseuwe piyandareko kawi piyé. Echa’ä iru hermano ndeiño ipiräta Tumpa koti wae ipuere opia Tumpa jape wi mbae peu wae jeko pewa.

<sup>10</sup>¿Kerái ra ko jokua? Nde ndere ndeyupe ndikuaa kawi nei mbaeti onoi tekowe tumparaanga reta, jare tembiu yau wae mbae’ä ko Tumpa pewarä. Añetete tēi ko jokua. Erēi jokua ndeiño ipiräta Tumpa koti wae pewarä, jokua soo nde ndeu nei wae, chupe waerä imeño tumparaanga uyembidora pewa ko. Jare jae nderecha yawe kiae ndewapi nei tumparaanga uyembidora wae pe ndeu nei soo yawe, jayawe jae aramoi uipotata jou wi jokua soo uñemee ma tumparaanga pe wae.

<sup>11</sup>Jáeramo jokua ndeiño ipiräta Tumpa koti wae opiata oī Tumpa jape wi jokua nde ndikuaa wae ndere chupe wae jeko pewa. Ipuereta ko uipiu ye tumparaanga reta wi. Jokua ko jae mbae ikawi mbaete wae, echa’ä yandeYa Cristo umano jae imaerä wi.

<sup>12</sup>İru hermano uyapo yawe mbae yandereko pewa, erëi jae imaerä kachi ko Tumpa jowai, jayawe yande yayawi ma ko ikoti. Jare yandeYa Cristo koti etei ma ko yayawi wi.

<sup>13</sup>Jáeramo İru hermano ipuereta opia Tumpa jape wi soo che jau wae jeko pewa yawe, jayawe ndarau ye ma che jau soo. Echa'ä aipota'ä etei İru wirowia Cristo re wae opia waerä che mbae ayapo wae jeko pewa.

## 1 Corintios 9

### Maera Pablo ueka'ä yembori İru wae reta pe

<sup>1</sup>Pemae cheré kërái aiko wae re. Che chepuere tēi ayapo chepiawiwe rewe ipotawe mbae Tumpa umaño cheré wae. YandeYa Cristo etei ko chemondo jae jee re amimbeu waerä jese. Che aecha ko cheresa pe etei yandeYa Jesucristo. Jare pe reta perowia ma jese kua mbarawiki ayapo chupe wae rupi.

<sup>2</sup>Erëi amokue wae reta wirowia'ä yandeYa Cristo chembou wae. Erëi pe reta pikuaa kawi pei Cristo ko chembou wae, echa'ä che rupi ko pe reta etei perowia jese. Jese amokue wae reta iñera ñeño cheré.

<sup>3</sup>Erëi İru wae reta iñera yawe cheré jare jei yawe, “Pablo jeko mbaeti ko İru kuimbae reta Cristo omondo wae jeko rami,” che tae chupe reta kuärái:

<sup>4</sup>Che jare Bernabé nduipota yawe, orepuere tēi ndoe pewe pemee waerä orerembiurä jare siripi mii wi. Jukuärái orepuere nduyapo pepite rupi noĩ rambuewe.

<sup>5</sup>Jare nduipota yawe, orepuere wi numenda tēi kuña Cristo re wirowia wae ndiwe jare orepuere nduraa tēi orerupie. Jukuärái uyapo İru kuimbae reta Cristo omondo wae, jare Pedro, jare yandeYa tiwi reta wi. Jare jukuärái ore orepuere tēi nduyapo wi.

<sup>6</sup>Jare nduipota yawe, ndarau tēi nduparawiki ndukaru waerä. Jare orepuere tēi ndoe pewe piyandareko waerä oreré.

<sup>7</sup>Jukuärái orepuere tēi nduyapo, echa'ä yande yaikuaa ñai pēti sindaro ndarau iko iyé, echa'ä jokua oyokui wae umbiepi oĩ chupe. Jae nunga wi uva oñoti wae jou ko uva ía. Jare jae nunga wi kapura iyandarekoa jou ko wi kapura kambu uyetamikue. Jukuärái wi che aipota yawe, chepuere tēi aiko pe reta chembori rupi, echa'ä jekuaeño aparawiki ai pemaerä.

<sup>8</sup>Jare amaeta'ä kua iwi pewa reta jeko reño, echa'ä Tumpa iñeeriru pe jukuärái wi yanembiarakuaa.

<sup>9</sup>Echa'ä Moisés arakae uikuatía kuärái: “Umimbarawiki wae awiye tuyuruyokua weye trigo umbipiriri oĩ yawe, weye ipuere waerä jou trigo.” Jukuärái uyekuatía oĩ. Jare Tumpa kua jei yawe, jei'ä ko weye reta reño.

<sup>10</sup>Kua jei oĩ wi yanderé. Echa'á jokuá weye ko jae pēti yembijaanga mii, jare yanemboe oĩ uparawiki wae uyekouta ko jae iparawiki re. Jayawe umaeti wae jare trigo umbipiriri wae uyekouta ko reta iparawiki re.

<sup>11</sup>Jare jukuárai wi ko ore reta. Echa'á ore nduparawiki ma pepite rupi numimbeu waerá pewe Tumpa ñee. ¿Orepuere'á yerá nduyekou orembori wae re?

<sup>12</sup>Che aikuaa aĩ ñru oporomboe wae reta ueka pewe pembori waerá. Jare ñru wae reta ipuere uyapo jukuárai yawe, jayawe ore uasa katu mii ko orepuere tēi nduyapo chuwi reta. Echa'á ore rani ko numimbeu pewe Tumpa ñee. Erēi ore ndueka'á ko pewe mbae awe, echa'á ore nduipota'á pumbiawái ramo. Añetete ore nduipota'á kiawe wiriro waerá ñee ikawi wae Cristo rewa orereko pewa. Jáeramo ore ndoe oreyupe: “Yepe tēi ime mbaembae uata yandewe, erēi ikawi ko ñamiawäta waerá.” Jukuárai ore ndoe oreyupe.

<sup>13</sup>Jare kua pe ime ye mbae re yayemingeta waerá yandepia pe. Pe reta pikuaa ko sacerdote reta uparawiki tupao wasu pe wae uyekou ñru wae reta ueru umee mbaembae Tumpa pewartá wae re. Mbaemimba reta uyuka umee reta Tumpa pewartá wae, jokuá soo etei ko sacerdote reta jou.

<sup>14</sup>Jukuáraiete wi yandeYa jei jokuá ñee ikawi wae umimbeu wae reta tuiko ñru wae reta iporombori rupi.

<sup>15</sup>Jayawe che chepuereta tēi ko aeka pewe yembori, erēi ayapo'á jukuárai. Jare añawe awiye pepia pe piyemingeta peĩ kua aikuatía aĩ wae, jae ko pemee chewe waerá yembori. Che ayerowiaete aĩ aeka'á pewe mbae awe ramo. Jare chemaerá, ndei pembiepi chewe mbowe, jaekawi ko amano waerá.

<sup>16</sup>Che akowara'á ko pewe ñee ikawi wae amimbeu pewe wae re. Erēi yepe tēi ayerowia aĩ jokuá re, jesewe mbaeti chepuere ayembutuicha, echa'á jaeño ko ayapo aĩ Tumpa jei chewe wae. Erēi Tumpa tuiporaraka chewe amimbeu'á yawe ñee ikawi wae Cristo rewa.

<sup>17</sup>Añetete moná ayapo yawe che jae wae rupiño amimbeu waerá pewe ñee ikawi wae, jayawe jaekawita tēi ko pembiepi waerá chewe. Erēi jukuárai'á ko, echa'á Tumpa ko jei chewe amimbeu waerá ñee ikawi wae. Jokuáño ko che ayapo aĩ.

<sup>18</sup>¿Mbae ra jayawe amingana aĩ kua mbarawiki ayapo aĩ wae rupi? Ayerowiaete aĩ chepuere rambuwe amimbeu ñee ikawi wae akowara mbae rewe. Jare jokuá yerowia rupi ko jae uyembiepi wae echa chewe jokuá cheparawiki re. Jáeramo, yepe tēi chepuere aeka yembori jokuá cheparawiki re, erēi ayapo'á jukuárai.

### **Kerái Pablo iko ñru wae reta wirowia waerá Cristo re**

<sup>19</sup>Jayawe ndarau kiawe ipuere jei chewe mbae ayapo waerá, echa'á kiawe umbiepi'á oĩ chewe. Erēi che eteiño ma ko ayeyapo opaete wae pe ayeyokui waerá, jeta wae wirowia waerá Cristo re chereko rupi.

<sup>20</sup>¿Kerái ra jokuá? Yambijaanga. Che aĩ yawe judío reta ipite pe, che ayeyapo jae reta rami awiye waerá che ayapo mbae ikawi mbae wae jae reta jowai. Echa'á

aipota jae reta uyapisaka waerä chiñee re jare jukuärái wirowia waerä Cristo re. Judío reta yureko opaete mbaembae Moisés arakae uikuatía wae rupi. Jáeramo yepe tēi che jukuärái'ä ma aiko, erēi aī yawe judío reta ipite wi, aiko wi Moisés uikuatía wae rupi.

<sup>21</sup>Jae ramiño wi che aī yawe judío mbae wae reta ipite pe, che ayeyapo judío mbae wae reta rami jae reta uyapisaka waerä chiñee re. Jare jukuärái aramoi jae reta wirowiata Cristo re. Jae reta mbaeti yureko Moisés arakae uikuatía wae rupi. Jayawe che aī jae reta ipite pe yawe, aiko'ä wi Moisés uikuatía wae rupi. Erēi kua uipota'ä jei che aiko'ä Tumpa jei wae rupi, echa'ä opaete che ayapo Cristo jei wae rupi.

<sup>22</sup>Jae ramiño wi che aī yawe ipiräta'ä ñonoï Tumpa koti wae reta ipite pe, che ayeyapo wi jae reta rami. Echa'ä aipota jae reta chererowia katu waerä jare uyekou reta waerä che aporomboe wae rupi. Jayawe jukuärái ko che aiko ipotawe kiape aī wae rupi. Che ayeyapo jae reta rami uyapisaka reta waerä chiñee re. Jukuärái aramoi amokue wae reta wirowiata chiñee re jare Tumpa uepita reta Tatawasurenda wi.

<sup>23</sup>Jukuärái ko chereko, ñee ikawi wae Cristo rewa jekuaeño uñemiái waerä yembiawái mbae rewe. Echa'ä ñee ikawi wae uñemiái yawe, che ayekouta wi jeta wae reta ndiwe mbaembae ikawi wae re – jae ko jokua mbaembae ñee ikawi wae rupi ou yandewe wae re.

### **Yaiko kawita ko Tumpa umiñatima waerä yandewe jokua re**

<sup>24</sup>Erēi ndarau opaete wae uyekou oï jukuärái. Pe reta pikuaa uñeñokuiñokui wae reta opa rewe osi, erēi pētiño upita uyekou waerä. Jukuäräita ko piko wi pe reta jokua uipota upurumbisipe wae rami. Pechaka pereko kawi Tumpa umiñatima waerä pewe jese kuri.

<sup>25</sup>¿Kerái piyapota jokua? Pe reta pikuaa wi opaete uñeñokuiñokui wae reta uyemungúe kawi ma osi kawi waerä. Jae reta ueya ma opaete mbae ikawita'ä chupe wae. Jukuärái uyapo reta umingana waerä pēti iñäkarewa mii ñanaroki pewa imambae ikumewata oï chuwi wae. Erēi yande reta yaeka ñaī mbaembae ikumewata'ä oï yandewi wae ara pewa. Jáeramo yande jae nunga wi yaeyata ko jokua nunga mbaembae ikawita'ä yandewe wae.

<sup>26</sup>Jáeramo chemaerä, che aiko pēti kuimbae uñeñokuiñokui wae simi osi wae rami. Mbaeti aiko kuimbae osi pochiño wae rami. Jae ramiño wi che aiko pēti uñeräro wae uipota upurumiamiri wae rami.

<sup>27</sup>Jáeramo che amungúe cherete, cherete uyapo waerä che aipota wae. Aipota'ä cherete uipota wae uyembiiya waerä cheré. Echa'ä yepe tēi che jeta ma amimbeu iru wae reta pe Tumpa rewa, erēi aiko yawe cherete uipota wae rupiño, aramoi Tumpa ndarau umiñatima chewe kuri cheparawiki re.

## **1 Corintios 10**

## Awiye yayapo Israel iñemoñaeta reta uyapo wae rami

- <sup>1</sup>Jare awiye perowia peï kua ndarau ipuere uyeyapo pewe, hermano mii reta. Pemandúa kawi peï jokua uyeyapo arakae ore judiorä nduiko wae oreramikue reta pe. Arakae rupi jae reta uwata yureko yawe Moisés jupie, ime iko pëti amapïtu oo iko opaete jae reta jenonde rupi. Jare opaete jae reta uasa jokua mar mbïte rupi iwi utini wae rupi.
- <sup>2</sup>Jare opaete jae reta yureko pëti ramiño Moisés ndiwe uwata reta rambuewe amapïtu íwi pe jare uasa reta yawe jokua mar rupi.
- <sup>3-4</sup>Jare pemandúa kawi peï wi opaete jae reta jou maná jare i Tumpa umbiyekuaa chupe reta wae. Jokua ko jae i Tumpa omoëka itape wasu wi wae. Jokua itape wasu ko jae pëti yembijaanga yandeYa Cristo iko jae reta ndiwe wae.
- <sup>5</sup>Erëitu yepe tëi Tumpa jokua mbaembae ikawi wae uyapo chupe reta, erëi jese we jae reta opaete seri wiriro Tumpa. Jáeramo Tumpa uyerowia'ä umae jese reta jare umimbïta reta iwitini wasu rupi umano reta waerä joko pe.
- <sup>6</sup>Añawe rupi Tumpa uipota yanembiarakuaa jokua mbaembae uasa arakae wae rupi awiye waerä yande reta yaipota ikawi mbae wae jae reta rami.
- <sup>7</sup>Jayawe awiye mii pemiadora tumparaanga reta re kërái jeta jae reta uyapo wae rami. Tumpa iñeeriru pe uikuaaka yandewe kërái mbae jae reta uyapo wae rewa kuärái: “Uwapi reta tumparaanga jowai ukaru jare ukau reta waerä. Joko wi upüa jare uyapo reta mbae kachi wae imara mbae rewe.”Jukuärái uyekuatía oï.
- <sup>8</sup>Jare awiye wi yande reta yayapo awasa kërái jeta jae reta uyapo rami. Echa'ä jukuärái uyapo reta ramo, Tumpa täta rupi uiporaraka chupe reta. Jare jokua ara woi umano reta 23.000 rupi.
- <sup>9</sup>Jae nunga wi awiye yamboporowaiño yandeYa ipiawasu kërái amokue jae reta uyapo rami. Echa'ä jukuärái uyapo reta ramo, Tumpa ombou chupe reta mboi imbayachiete wae reta uyuka reta waerä.
- <sup>10</sup>Jae nunga wi, pe reta, awiye ma piyengeta Tumpa koti kërái amokue jae reta uyapo rami. Echa'ä jukuärái uyapo reta ramo, Tumpa ombou araiwa opa uyuka reta waerä.
- <sup>11</sup>Jukuärái ko arakae jokua mbaembae uasa wae añawe ikawi yandewe yayemboe jese waerä. Jare uyekuatía oï yanembiarakuaa waerä añawe rupi, yande reta awiye waerä yayapo wi jokua nunga mbaembae.
- <sup>12</sup>Jáeramo ime kía jei iyupe yawe, “Che tuicha arowia Tumpa re jare ndarau ma ayawi ye ikoti,” jei iyupe wae, tuyandareko kawi iyé awiye waerä jeko yewi Tumpa koti.
- <sup>13</sup>Echa'ä yaikuaa teko kachi jekuaeño opa wese ñanemiata oï wae echa ikoti jare yawái mbae ipuere waerä ñanemiamiri. Erëi yandepuere jekuaeño ñañemikirëi, echa'ä yandeeño'ä ko. Jokua uasa oï opaete wae rupi. Opaete yande yaikuaa jokua



kirëi mbae kachi yayapo waerä wae. Erëi Tumpa ndarau umaëño jokua kirëi uasaete ye ipiräta waerä yandewi. Jae jupi ko yanembori waerä. Jáeramo jae jekuaëño uikuaakata oï yandewe kërái rupi yandepuere waerä yasiri jokua kirëi mbae kachi yayapo waerä wae wi.

### **Awiyeta ko yambiadora tumparaanga reta re**

**14**Jayawe cheïru puau wae reta, awiye mii pemiadora tumparaanga reta re. Jekuaëño pesiri chuwi.

**15**Che arowia pe reta pearakuaa katu ko. Jayawe piyapisaka mii kua chiñee re, jare pe reta etei pepuere pikuaa añetete ra kua che jae ai wae.

**16**Yande reta yayembati yawe yayemimandúa waerä yandeYa imano re, ¿ñañemiïru'ä yerä yandeYa ndiwe etei mbaembae yau wae rupi? Jukuärái ko. Jokua copa wi yau yawe jare ñamee yasurupái jese yawe, yayemimandúa ñai yandeYa Cristo juwi jae upiyere yanderé wae re. Jukuärái wi yau yawe mbiyape, yayemimandúa ñai Cristo uiporara jete pe yanderé wae re. Jukuärái jokua mbaembae rupi ñañemiïru ñai yandeYa Cristo ndiwe etei. Jae ramiño wi kía jou yawe ipotawe mbae tumparaanga pe, jae uñemiïru ko oï jokua tumparaanga ndiwe.

**17**Jare ime ye mbae kua pe yaecha waerä. Mbiyape pëtiño ko, erëi joko wiño opaete yande reta ñapisäa yau päwe waerä. Kua pëti yembijaanga ko jare uikuaaka yandewe yepe tëi yande jeta ñai, erëi pëti ramiño ko ñai wi, echa'ä opaete yande reta Cristo pewa ko.

**18**Jare jae nunga wi ikawi ko ñamae waerä Israel inemoñaeta jeko re. Opa wese jae reta ueru yawe owecha tupao wasu pe jare uyuka umee waerä Tumpa pe yawe, jae reta jou wi jokua soo michi mii. Jare jukuärái jae reta imaerä uñemiïru ñonoï Tumpa ndiwe.

**19**Erëi ¿kua uipota ra jei wi kía umbiadora oï yawe tumparaanga re, umbiadora ra oï pëti tumpa añetete wae re? ¿Uipota ra jei wi jokua soo umee tumparaanga pe wae ambie ye ra ïru tembiu wi?

**20**Mbaeti etei. Erëi che jae ai pewe kuärái: Kía uyuka mbaemimba umee isoo tumparaanga pe wae, jae ko umee oï aña pe etei. Yepe tëi jae wirowia oï umee oï soo pëti tumpa pe, erëi jukuärái'ä ko. Pëti aña ko jae umbiyerowia oï. Jare che aipota'ä pe reta pemiyerowia peï waerä aña reta.

**21**Yau yawe copa wi mbae yandeYa juwi re uyembijaanga oï wae, jare jae nunga wi yau yawe mbae aña reta pewarä wi, jokua ikawi'äete ko Tumpa jowai. Jukuärái wi ko yau yawe mbiyape yandeYa jete re uyembijaanga oï wae, jare yau yawe soo aña reta pewarä wi.

**22**¿Mbae pa pere? ¿Ikawi pa ñamiawiroka waerä yandeYa aña reta koti? ¿Yande yerä yandepuerete yandeYa wi awiye waerä jae uiporarakä yandewe?

### **Awiyeta ko yayapo ipotawe mbae ikawi mbae ïru pewarä oï wae**

<sup>23</sup>Amokue pe reta pere pei kuärái: “Chepuereño ayapo ipotawe mbae teko kachi’ä Tumpa pewarä wae.” Jukuärái pere pei. Ipuere tei jukuärái, erëi mbaeti opaetei mbae yayapo wae ikawi yandewe. Jare mbaeti opaete mbae yayapo wae rupi omborita iiru wae reta ipiräta waerä Tumpa koti.

<sup>24</sup>Awiye kiawe tuiko iyupe waeräño. Erëi yaeka ikawita oi iiru wae reta pewarä wae.

<sup>25</sup>Jayawe cheiru mii reta, ¿mbae pa pere? ¿Ikawi ra yau waerä soo tumparaanga pe uñemee ma wae? ¿Mbae re ra yayemboe ma opaete kua mbaembae rupi? Che pumbiarakuaa kuärái: Pepuere pewa jare peu ipotawe soo uyewaka oi wae. Erëi mbaeti jaekawi pepirandu waerä uñemee ma ra peti tumparaanga pe wae. Añetete pepuere peu pepiawiwe rewe,

<sup>26</sup>echa’ä Tumpa iñeeriru pe uikuaaka yandewe kua iwi jare opaete mbaembae oi pipe wae yandeYa imbae ko. Jayawe aramoi yepe tei jokuä soo uñemee ma tumparaanga pe, erëitu jokuä soo etei Tumpa imbae ko.

<sup>27</sup>Jare kía Cristo re wirowia mbae wae uparea yawe ndewe ndeo ndekaru waerä jae ndiwe, jare nde ndipota ndeo ndekaru yawe jae ndiwe, jayawe jeu ipotawe tembiu jae umee ndewe wae. Jare awiye epirandu chupe jokuä soo uñemee ma ra tumparaanga pe wae. Jējuño ndepiawiwe rewe.

<sup>28</sup>Erëi aramoi kía jeita ndewe: “Kua soo ko uñemee ma tumparaanga pe wae.” Jukuärái jei ndewe yawe, jayawe awiye jeu. Echa’ä chupe waerä jokuä ko jae mbae kachi wae Tumpa jowai.

<sup>29</sup>Yepe tei pe reta pepuere peu pepiawiwe rewe jokuä soo Tumpa jowai, erëi iiru wae ipuereta’ä jou, echa’ä mbae kachi wae chupe ramo. Jare nde ndepiawiwe rewe ndepuere ndeu soo wae, awiye mii ere chewe kuärái: “Mbae’ä ko chewe iiru wae reta jei wae.

<sup>30</sup>Che jekuaeño amee yasurupái Tumpa pe ipotawe tembiu re. Jáeramo awiye chembijeko jese jau yawe.”

<sup>31</sup>Awiye mii jukuärái ere. Echa’ä pe reta pechakata ko pereko ikawi wae opaete wae jowake, jae reta umbutuicha waerä Tumpa jee pereko rupi. Jukuäräita ko piyapo mbaembae peu wae rupi jare ipotawe mbae piyapo wae rupi wi.

<sup>32</sup>Awiye jekuaeño piyapo ipotawe mbae ikawi mbae iiru pewarä oi wae – jae ko judío reta pe, jare judío mbae wae reta pe, jare hermano Cristo re wirowia wae reta pe wi. Echa’ä ipuereta ko opia reta Tumpa jape wi pereko pewa.

<sup>33</sup>Jare che jukuärái’ä ko chereko, echa’ä che aiko’ä ko cheño ayembiyerowia waerä. Erëi che aipota ayapo opaete mbaembae iiru wae reta jowai ikawi oi wae. Jare jukuärái aramoi jae reta wi uipotata wirowia Cristo re, jare Tumpa uepita reta Tatawasurenda wi.

## 1 Corintios 11

<sup>1</sup>Jayawe piko kërái che aiko Cristo jeko rupi wae rami.

### **Yaipiuta ko jokua onoi mbaepuere yanderé wae wi**

<sup>2</sup>Pe reta chembiyerowia peï, echa'ä jekuaeño pemandúa peï cheré jare jekuaeño piko peï che pomboe yuapí ye wae rupi.

<sup>3</sup>Erëitu aipota pikuaa kawi waerä wi kua: YandeYa Cristo ime onoi mbaepuere kuimbae re. Jare kuimbae ime onoi mbaepuere kuña re. Jare yandeRu Tumpa ime onoi mbaepuere Cristo re.

<sup>4</sup>Jáeramo pe reta piyembati peï yawe, jare pëti kuimbae uipota uyerure yawe Tumpa pe, tueki rani iyuwi iyakandio uechaka waerä uipiu ko oï Cristo wi wae. Jae nunga wi tuyapo jae umimbeu oï yawe ñee Tumpa wi etei ko ou wae.

<sup>5</sup>Erëi jukuärái'ä ko kuña reta ndiwe. Echa'ä ime pëti kuña uyerure Tumpa pe oï yembati pe yawe, ikawi ko uñeäkasoi waerä. Jae nunga wi tuñeäkasoi jae umimbeu yawe ñee Tumpa wi etei ko ou wae. Echa'ä pe reta pikuaa peï, pereko pe pëti kuña uipota'ä uñeäkasoi yawe ñru wae reta jowake, mbaeti ko uechaka oï uipiu oï kuimbae wi wae. Jae uñemimaraka ma pëti kuña opaetei iñäka uñepëpi wae rami.

<sup>6</sup>Jayawe pëti kuña uipota'ä uñeäkasoi yawe, tuñeäpi pochiño. Erëi jae uipota'ä uñemimaraka yawe, jayawe tuñeäkasoi.

<sup>7-8</sup>Erëi kuimbae reta awiye tuñeäkasoi yembati pe, echa'ä Tumpa uyapo kuimbae jae echa rami. Jare jae nunga wi kuimbae rupi yandepuere yaecha mbae ikawi wae Tumpa pewa, echa'ä Tumpa ko uyapo kuimbae. Erëi kuña reta ambie ye ko, echa'ä kuña Tumpa uyapo kuimbae wi. Jáeramo kuña rupi yandepuere yaecha mbae ikawi wae kuimbae pewa.

<sup>9</sup>Jae ramiño wi Tumpa mbaeti ko uyapo kuimbae kuña ñrurä. Tumpa uyapo kuña kuimbae ñrurä.

<sup>10</sup>Jáeramo jokua jeko pewa ikawi ko kuña reta uñeäkasoi waerä, jare jukuärái uechaka reta waerä uipiu ko ñonoï kuimbae wi. Jokua re uyerowiata ñonoï wi araiwa reta.

<sup>11</sup>Erëi yepë tëi kuimbae ime onoi mbaepuere kuña re, erëi mbaeti ikawi kuimbae wñiro waerä kuña. Echa'ä yande kuimbaerä yaiko wae reta jare kuña reta pëti ramiño ko ñai yandeYa Cristo re jare yayeko ñai yandiyé.

<sup>12</sup>Echa'ä kuimbae wi ko Tumpa uyapo kuña tenondewaete, erëi joko wiwe kuimbae oa kuña wi. Jare mokui rewe ou Tumpa wi.

<sup>13</sup>Che aipota pe reta piyemingeta kawi waerä pepia pe kua rewa. ¿Ikawita ra pereko pe kuña reta uyerure waerä Tumpa pe uñeäkasoi mbae rewe yembati pe?

<sup>14</sup>Yande reta yandepuere yayemboe kua rewa kërái mbaembae uyekuaa yandewe wae rupi. Echa'ä yaecha yawe pëti kuimbae iapuku oï wae, yae chupe pëti ñemimaraka ko.

<sup>15</sup>Erëi yaecha pëti kuña iapuku oï yawe, imaepöra oï yandewe. Añetete ko Tumpa etei umee kuña pe ía ññakasoï waerä.

<sup>16</sup>Jukuärái ko che pumbiarakuaa. Erëi ime yawe kía uipota uyeaka kua rewa wae, tuikuaa jokua ko jae ore reta orereko. Jare jukuärái wi ko opaete Cristo re wirowia wae reta jeko kerupi rupi uyembati ñonoï wae rupi.

### **Uyemimandúa kawí'ä reta yandeYa imano re**

<sup>17</sup>Jare añawe ime ye mbae re che imeta ko ambieta pewe wae. Jae ko kua: Pe reta piyembati yawe, uyekuaa oï mbae kachiete wae ikawi wae wi.

<sup>18</sup>Echa'ä tenonde jeräkua chewe kërái pe reta piyembati yawe pembutuicha waerä yandeYa jee, piyembiyao tee tee peï peyuwi. Jare che arowia jokua añetete ko aipo uasa oï.

<sup>19</sup>Pe reta perowia chawaa peï imeta ko piyembiyao tee tee peï peyuwi, jukuärái uyekuaa waerä kía nunga reta ra ko añetete umbiyerowia ñonoï Tumpa wae.

<sup>20</sup>Jayawe pe reta piyembati yawe uyemimandúa waerä yandeYa imano re, joko pe uyekuaa jokua yembiyao jare mbaeti piyapo peï ikawi.

<sup>21</sup>Echa'ä amokue wae pe reta piyembitenonde peï ñru wae reta wi pekaru waerä. Jayawe ¿mbae ra uasa oï? Amokue wae pe reta pesawipo. Erëi ñru wae reta upita iyembaï.

<sup>22</sup>¿Kua ikawi'ä ko! Pipota jukuärái pekaruño yawe, jayawe pepita perëta peño. Ani aramoi pipotái pemimaraka peï ñru mbaeti etei mbae onoi wae reta. Aramoi mbae'ä ko pewe ñru kía kía Tumpa imaerä iko wae reta. ¿Mbae ra añawe chepuereta jae pewe? ¿Pipota ra jae pewe che ayerowia aï kua mbaembae piyapo wae re? ¿Mbaeti etei jukuärái!

### **Pablo oporomboe kërái yayemimandúa waerä yandeYa imano re**

<sup>23</sup>Che chepuere'ä ayerowia kua mbaembae piyapo wae re, echa'ä mbaeti piyapo peï kërái che pomboe wae rupi. Jokua ko jae mbaembae yandeYa etei uikuaaka chewe wae. Jae ko kua: Jokua piare Judas umeeta iko yandeYa jowaicho reta pe yawe, yandeYa ukaru jemimboe reta ndiwe. Jare ukaru yureko reta rambuewe, yandeYa uipisi mbiyape,

<sup>24</sup>jare umee yasurupái Tumpa pe jese. Joko wi upisäa mbiyape jare jei jemimboe reta pe umbijaanga rewe: “Pipisi peu. Kua ko jae chere te ameeta aï peré wae. Añawe wiwe peuta kua uyemimandúa waerä cheré.” Jukuärái jei chupe reta.

<sup>25</sup>Jae ramiño wi opa ma ukaru reta yawe, yandeYa uipisi copa jare jei chupe reta: “Kua ko uyembijaanga oï Tumpa uyapota ma oï wae re. Echa'ä cheruwi uyepiyereta wae rupi jae uyapo oï pëti yemingeta ipiau wae jese wirowia wae reta pewartä. Peu kua. Jare kua wiwe opa wese rupi kua yemimandúa piyapo yawe, piyapota ko uyemimandúa rewe cheré.” Jukuärái Jesús jei chupe reta.

<sup>26</sup>Jayawe jukuärái opa wese piyembati peu waerä yawe mbiyape jare copa wi, yandeYa imano rewa ko pikuaaka pei. Jare jukuäraita ko oï yandeYa ou ye rewa.

<sup>27</sup>Jáeramo ime yawe kía mbiyape jare copa wi jou wae, jare mbaeti ikawi oï ipia pe yandeYa koti wae, jae oï teko pe. Echa'ä jae uyawi oï yandeYa jete jare juwi koti etei.

<sup>28</sup>Jáeramo pëti pëti tumae kawi rani iyé etei. Jare ipiyemingeta mbaeti yawe umbijeko mbae re awe, jayawe tou jokua mbiyape jare tou copa wi. Kua ikawi yayapo waerä.

<sup>29</sup>Echa'ä ime yawe kía mbaeti ikawi rupi jou oï mbiyape jare copa wi wae, ueru oï iyupe Tumpa uiporaraka chupe waerä. Echa'ä chupe waerä yandeYa jete jare juwi ikawi'ä maeräwe.

<sup>30</sup>Jukuärái uyapo ma jeta pepite pe ñonoï wae reta. Jare jokua jeko pewa ko jeta jae reta imbaerasi ñonoï, jare ikowe'ä ma, jare umano wi.

<sup>31</sup>Erëi yande pëti pëti wae imeta ko ñamae kawi rani yandiyé. Echa'ä jukuärái yayapo yawe, Tumpa ndarau uiporaraka yandewe.

<sup>32</sup>Erëi ime yawe mbae re Tumpa uiporarakata yandewe wae, awiye mii yandepiatitiete jokua jeko pewa. Echa'ä yandeYa uiporaraka yandewe yawe, jokua jae uyapo yanderau rewe yanembiarakuaa kawi waerä. Jukuärái uyapo yandeYa awiye waerä uiporaraka yandewe jaeño mái pewa Cristo re wirowia mbae wae reta ndiwe.

<sup>33</sup>Jayawe hermano mii reta, opa wese piyembati yawe piyemimandúa waerä yandeYa imano re, piñeraäro mii pekaru päwe rewe waerä.

<sup>34</sup>Jare ime yawe kía aramoi iyembaï oï wae, tukaru rani jëta pe, jukuärái awiye waerä piyembati pe uyembitenonde. Echa'ä pe reta jekuaeño piyembitenonde yawe iru wae reta wi, Tumpa ipuere uiporaraka pewe jokua jeko pewa. Jukuärái ko che pumbiarakuaa kua mbaembae rewa. Erëi aramoi ime ambie mbaembae yemimandúa rewa yawe, che pumbiarakuaata aï kuri a awäe pepi yawe.

## 1 Corintios 12

### Mbaepuere reta Espiritu Santo umee yandewe wae rewa

<sup>1</sup>Jayawe hermano mii reta, añawe ime ambie mbae re ambeuta pewe wae. Pe reta pepirandu piko chewe wi jokua mbaepuere reta Espiritu Santo umee yandewe wae re. Jaekawi. Kua rewa aipota pe reta pikuaa kawi waerä.

<sup>2</sup>Pe reta pikuaa kawi pei kërái ndei perowia yandeYa re mbowe, pe reta piyembitawika piko tumparaanga reta pe. Echa'ä yepe tëi tumparaanga reta ipuere'äwe mbae yepe jei, erëi pemaëño piyé pemiadora jese reta waerä.

<sup>3</sup>Jáeramo che aipota pikuaa waerä kía nunga ñee ko ou Tumpa wi. Ime yawe kía uyemingeta Espíritu Santo rupi añetete rewe wae, ndarau uyepipeyu Jesús re. Jare jaño Espíritu Santo rupi ipuere kía jei: “Jesús ko jae cheYa.”

<sup>4</sup>Jare jae nunga wi Espíritu Santo umee yandewe opaño kërái raí mbaepuere reta. Erëi yepe tēi oyowake’ä ko jokua mbaepuere reta, erëi opaete pēti Espíritu wiño ko ou.

<sup>5</sup>Jare yepe tēi yande reta oyowake’ä ko yayeyokui yandeYa pe, erëi yandeYa pētiño ko.

<sup>6</sup>Jare yepe tēi Tumpa uparawiki ambie ye ye pēti pēti yande reta rupi, erëi jae pētiño ko.

<sup>7</sup>Jayawe Espíritu Santo umee pēti pēti Cristo re wirowia wae pe kërái ombori waerä ñru hermano reta ambie ye ye rupi. Jare jukuärái opaete wae uñemikirëita Tumpa koti.

<sup>8</sup>Amokue wae pe Espíritu Santo umee uyemingeta waerä iyarakuaa katu rewe. Jare ñru wae reta pe umee uikuaaka kawi waerä mbaembae ñru wae reta uikuaa kawi’ä wae.

<sup>9</sup>Jare jae nunga wi Espíritu Santo umee ñru wae reta pe wirowia katuete waerä Tumpa re. Jare jae etei wi umee ñru wae reta pe ipuere waerä uminguera imbaerasi wae reta.

<sup>10</sup>Jare jae nunga wi Espíritu Santo umee ñru wae reta pe uyapo waerä mbaembae tuicha wae kiawe ipuere’ä uyapo wae. Jare ñru wae reta pe umee umimbeu waerä ñee Tumpa wi etei ou wae. Jare umee wi ñru wae reta pe uikuaa kawi waerä ñee ou ra Espíritu Santo wi ani ou ra añä wi. Jare umee ñru wae reta pe ñee ambie ye ye wae uyemingeta waerä – jae ko jae ñee uyemingeta mbaei pipe wae. Jare ñru wae reta pe Espíritu Santo umee ipuere waerä umbiasa ñnee pei jokua ambie ye ñee reta wae. Jukuärái ko amokue mbaepuere reta Espíritu Santo umee yandewe wae.

<sup>11</sup>Kua mbaepuere reta añetete ko jeta jare oyowake’ä ñnonoi. Erëi Espíritu Santo pētiño ko, jare jae ko umee yandewe pēti pēti wae pe ambie ye ye mbaepuere jae uipota wae rupi.

### **Opaete wirowia Cristo re wae reta Cristo jete pewa rami ko**

<sup>12</sup>Kua yandepuere yambijaanga yanderete re. Yande yaikuaa ñäi, yepe tēi yanderete pētiño ko, erëi yanderete pe ime jeta mbaembae ñanoi. Jare opaete kua mbaembae reta, yepe tēi oyowake’ä ko, erëi opaete wae yanderete pewa ko jare yanderete pētiño ko. Jare jukuärái wi ko opaete yande reta pēti ramiño ñäi Cristo re wae.

<sup>13</sup>Echa’ä yepe tēi opaete yande reta ambie ye ye ko yandeyuwi, erëi Espíritu Santo yandapo ma pēti ramiño Cristo re. Yande ko jae Cristo jete pewa rami ipotawe kía ko yande wae. Ipuere ko yande judío ani judío mbae wae, jare uyeyokui wae ani uyeyokui mbae wae. Erëi opaete yande reta pēti ramiño ko ñäi Cristo re, jare yandepuere yayekou oyowake Espíritu Santo re yandepia pe oi wae rupi.

**14**Erëitu yepe tēi ñāi pēti ramiño Cristo re, jesewe jeta ko ñāi yande reta jare oyowake'ā ko yaiko.

**15**Jokua ikawi ko, echa'ā, ¿kēraita ra ko yandepi jei yawe, “Che jae'ā ko ndepo; jáeramo che ayendu'ā ko nderete pewa echa”? Ipuere yawe jukuärái jei yandepi, jayawe ndarau yayapisaka jese, echa'ā yaikuaa yandepi yanderete pewa ikawi wae ko.

**16**Jae ramiño wi yandepisa jei yawe, “Che jae'ā ko nderesa; jáeramo che ayendu'ā ko nderete pewa echa,” jukuärái jei yawe, ndarau yayapisaka jese. Echa'ā yande yaikuaa yandepisa yanderete pewa ikawi wae ko.

**17**Añetete opaete yanderete pe oī wae ime iparawikii. ¿Kēraita ra ko opaete yanderete tesaño yawe? Ndarau tēi mbae yandepuere yayandu. Jukuärái wi yanderete opaete yandepisaño yawe, ndarau tēi mbae yandepuere ñaētu.

**18**Erēi jukuärái'ā ko yanderete, echa'ā Tumpa uyapo pēti pēti yanderete pewa reta oyowake'ā, jare oñono reta jenda jenda pe kawi kērái jae uipota wae rupi.

**19**Echa'ā jae uikuaa ndarau ikawi ime yawe pētiño mbae yanderete pe. Jae ramiño wi Tumpa yandapo pēti pēti yande reta ambie ye ye.

**20**Jare ikawi ko yaikuaa kawi waerā yande reta pēti pēti wae ikawi wae ko ñru wae reta pewartā. Yanemandúa kawi ñāi, yepe tēi yanderete pewa reta jeta ko oī, erēi pētiño ko yanderete jare opaete mbaembae yanderete pewa uyeko ñonoī iyé reta.

**21**Ndarau yanderesa jei yandepo pe: “Che aipota'ā nde chembori waerā.” Jukuärái wi ñanāka ndarau jei yandepi pe: “Che aipota'ā nde chembori waerā.”

**22-24**Añetete jukuärái'ā ko, echa'ā pēti pēti yanderete pe oī wae ikawi oī ñru wae reta pe. Kua re ikawi yayemingeta waerā yandepia pe. Yaikuaa yanderete pe oī wae jeta ko oī. Amokue yanderete pewa reta uyekuaa ikawi oī jare mbaeti yandepia'ā jese. Erēi ime ñru mbaembae yanderete pewa reta ñanemara yaechaka wae. Jáeramo yayandareko jese reta awiye waerā yaechaka. Jukuärái yayapo, echa'ā yaikuaa opaete mbaembae yanderete pewa ikawi ko. Jare oī wi ñru mbaembae yanderete pewa aramoi yarowia tēi usiriwe mbae wae. Erēi jesewe añetete ndarau yandepuere yaiko mbaeti jokua mbaembae yawe. Jayawe yepe tēi ime amokue mbaembae yanderete pewa mbae'ā echa yandewe wae, erēi Tumpa ko uyapo yande reta yayandareko kawi waerā jese reta.

**25**Jukuärái Tumpa uyapo mbaembae yanderete pewa uyandareko kawi waerā iyé jare awiye waerā uyembiyao reta iyuwí.

**26**Añetete pēti mbae yanderete pewa uiporara oī yawe, opaete yanderete pewa reta uiporara ñonoī päwe. Jukuärái wi pēti mbae yanderete pewa uyerowia oī yawe, opaete yanderete pewa reta uyerowia ñonoī wi.

**27**Jayawe yanemandúa kawi yawe opaete kua mbaembae reta re, añawe yandepuere yae yambijaanga rewe opaete yande ko jae yandeYa Cristo jete, jare pēti pēti ko ñāi jae jete pewa.

<sup>28</sup>Jukuärái ko yande jae imaerä yaiko wae reta. Jare yandepite pe Tumpa tenonde oñono amokue reta Cristo etei omondo jae jee re wae. Jaikue rupi oñono ñru wae reta umimbeu waerä ñee Tumpa wi etei ou wae. Jare jaikue rupi Tumpa oñono wi ñru wae reta oporomboe kawi waerä. Jare jaikue rupi Tumpa umee mbaepuere amokue wae reta pe uyapo waerä mbaembae kiawe ipuere'ä uyapo wae, jare ñru wae reta pe uminguera waerä amokue wae reta imbaerasi wi. Jare Tumpa oñono wi ñru wae reta ikatuete oporombori waerä, jare amokue ñru wae reta upurumbiarakuaa kawi waerä, jare amokue ñru wae reta uyemingeta waerä ambie ye ye ñee reta pe.

<sup>29</sup>Jayawe, ¿mbae pa uyekuaa oi kua pe? ¿Opaete ra ko jae Cristo etei omondo reta jae jee re wae? Mbaeti. Jare Tumpa umee'ä opaete wae pe ñee umimbeu reta waerä. Jare opaete'ä wi ko oporomboe waerä. Jare opaete'ä wi ko uyapo waerä mbaembae kiawe ipuere'ä uyapo wae.

<sup>30</sup>Jare opaete'ä wi ko ipuere waerä uminguera imbaerasi wae reta. Jare opaete'ä wi ko ipuere waerä uyemingeta ambie ye ye ñee reta pe. Jare opaete'ä wi ko ipuere umbiasa jokua ñee ñru wae reta pe ñee pei.

<sup>31</sup>Jukuärái ko oi jokua mbaepuere reta Espíritu Santo umee wae. Erëi pe reta pipotaete tēi penoi jaeño jokua mbaepuere reta ikawiete wae. Erëi ime mbae ikawiete ye wae peka waerä jokua mbaepuere reta wi. Jare añawe tamimbeu pewe jokua rewa.

## 1 Corintios 13

### Yapuruau'ä yawe, jokua mbaembae yayapo wae mbae'ä etei ko

<sup>1</sup>Aramoi chepuere ayemingeta ambie ye ye ñee reta pe, jare araiwa reta ñee pe awe aramoi. Erëi che apuruau'ä yawe, chiñee ko ñru wae reta pe kãpana jiapu pii oi wae rami jare platillo tãta uyendu pochiño wae rami.

<sup>2</sup>Jare aramoi Tumpa umee oi chewe ñee amimbeu waerä ñru wae reta pe. Jare aramoi ime anoi opaete arakuaa chepuere waerä aikuaa opaete mbaembae ñru wae reta uikuaa mbae wae. Jare aramoi chepuere ambisiri iwitu wasu reta che tuicha arowia Tumpa re ramoño. Erëi mbaeti apuruau yawe, mbae'ä etei ko che.

<sup>3</sup>Jare aramoi chepuere amee opaete chembaembae reta iparawete wae reta pe ambori reta waerä. Jare aramoi cherowaicho reta chepisi chemombo tata pe cheyuka, che arowia Cristo re ramo. Erëi mbaeti apuruau yawe, mbaeti etei usiriwe chewe.

### Yapuruau añetete wae rewa

<sup>4</sup>Yapuruau añetete rewe yawe, yandepiawasuta ko jare ñaniñee kawita ko. Añetete yapuruau yawe, ndarau ñañemiro, jare yayembikateta'ä, jare yayembutuichata'ä wi.

<sup>5</sup>Jare jae nunga wi yaiporuta'ä ñee kachi wae, jare yaekata'ä yanemaerãño. Jare jae nunga wi yandepochi woita'ä mbae re, jare ndarau yambaembasi wi.



<sup>6</sup>Añetete yapuruau yawe, yayerowiata'ä mbae kachi wae re, erëi yayerowiata ñai mbae jupi wae re jare añetete pewa re.

<sup>7</sup>Jare yarupiata wi mbae ikawi mbae wae yanderapicha pe. Añetete yapuruau yawe, yarowiata'ä jawoi pewa mii mbae kachi wae yanderapicha rewa. Jekuaño yarowia katuta mbae ikawi waeño uyapo waerä. Jare yepe tõi ko ñru wae reta uiporaraka yandewe aramoi, erëi yarupiata chupe. Jokoropi ko uyekuaa añetete yapuruau wae.

### Yapuruau wae ndarau etei opa

<sup>8</sup>Jekuaño imeta yapuruau waerä. Erëi jokua ñee reta Tumpa etei umee yandewe yamimbeu waerä wae opata ko. Jae nunga wi jokua mbaepuere ime oï ambie ye ye ñee reta pe yayemingeta wae ukañita oï. Jae nunga wi jokua mbaepuere ime oï yaikuaa kawi waerä mbaembae ñru wae reta uikuaa kawi'ä wae opata ko wi.

<sup>9</sup>Echa'ä ime mbae jupiete ye wae uyekuaata oï jokua mbaembae ipepika pe. Añawe rupi, yepe tõi amokue yande reta ime ñanoi mbaepuere yaikuaa waerä mbaembae ñru wae reta uikuaa kawi'ä wae, erëi jeseuwe jokua arakuaa uata oï. Jare yepe tõi añawe Tumpa umee oï amokue yandewe reta ñee yamimbeu waerä wae, erëi jokua ñee reta uata oï wi. Jare jukuärái oï wi opaete ñruwe mbaepuere reta ndiwe.

<sup>10</sup>Erëi ou ma uwäe yawe jokua jupiete ye wae, jayawe opaete jokua mbaepuere mbaeti opaetei oï wae reta opata ko, echa'ä ndarau ma yaiporu.

<sup>11</sup>Kua yandepuere yambijaanga kërái yakuakuaa ñai wae re. Yande reta, ¿kërái ra yaikose yande michi yawe? Yayemingetase sambiai rami, jare yaikuaase sambiai rami, jare yandepia pe yayemingetase wi sambiai rami. Erëi yakuakuaa ma yawe, yaiko'ä ma sambiai rami.

<sup>12</sup>Jae ramiño wi añawe rupi yandearakuaa Tumpa pewa uata oï kërái pëti sambiai ndei iyarakuaa rami. Yande ko jae kía uma oï iyé pëti yechaka jäwe oï wae pipe wae rami. Erëi pëti ara, jokua jupiete ye wae ou ma uwäe yawe, yandearakuaa ikota jupi rupi kërái yande reta ñamae koiño kía re rami. Jare jayawe ramo yaikuaa kawita Tumpa kërái jae yandekuaa kawi wae rami. Jare jokua ara wiwe ndarau ma yaiporu mbaepuere reta Tumpa añawe umee yandewe wae.

<sup>13</sup>Jukuärái ko opaete mbaepuere reta Tumpa añawe umee yandewe wae opata oï. Erëi jeseuwe jekuaño imeta yarowia waerä Tumpa re. Jare jekuaño imeta ñaäro waerä yarowia katu rewe Tumpa jei yandewe wae. Jare jekuaño imeta yapuruau waerä. Kua mbapi mbaembae jekuaño imeta yayapo waerä. Jare kua mbapi wae wi yapuruau wae ko jae ikawiete ye wae.

## 1 Corintios 14

### Ñee Tumpa wi etei ou wae yamimbeu wae rewa

<sup>1</sup>Jayawe jekuaño piko mii pepuruau rewe. Jare jekuaño wi pekirëi penoi waerä mbaepuere reta Espíritu Santo umee wae. Erëi ikawiete penoi waerä kirëi pemimbeu waerä ñee Tumpa wi etei ou wae.

<sup>2</sup>Echa'ä jokua re opaete ïru wirowia Cristo re wae reta ipuere uyekou päwe wi. Erëi ime yawe piyembati pe kía ambie ye ye ñee pe uyemingeta wae, ïru wae reta ndarau ipuere uyekou jese, echa'ä jae reta uikuaata'ä jokua mbae uipota jei wae. Tumpaño uikuaata jokua rewa. ïru wae reta pewarä jae uyemingetaño oï Espiritu Santo rupi mbaembae re kiawe ipuere'ä uikuaa wae.

<sup>3-4</sup>Jayawe ime yawe kía ambie ye ye ñee pe uyemingeta wae, jaeño uñemimiräta oï Tumpa re. Erëi jae umimbeu yawe jesäka kawi ñee Tumpa wi etei ou wae, jayawe opaete ïru wirowia Cristo re wae reta ipiräta päweta Tumpa koti, echa'ä jokua ñee umikirëita jare umbipiakatuta reta.

<sup>5</sup>Che jae'ä ko aï pewe mbaeti ikawi piyemingeta waerä ambie ye ye ñee reta pe. Añetete che aipota echa tëi opaete pe reta pepuere waerä piyemingeta ambie ye ye ñee reta pe. Erëi aipotaete tëi pepuere waerä pemimbeu ñee Tumpa wi etei ou wae. Jokua ikawita tëi ko. Echa'ä jukuäräi rupi opaete yembati pe ñonoï wae reta ipuereta uyekou kawi. Erëi ndarau uyekou reta piyemingetaño yawe ambie ye ye ñee reta pe jare mbaeti yawe kiawe ipuere umbiasa jokua ñee ñaniñee pe wae.

<sup>6</sup>Hermano mii reta, che a apou pepi yawe, ¿këraita ra ko ayemingeta yawe ambie ñee peño? Ndarau ikawi. Erëi ñaniñee pe etei che pomboe yawe, jare amimbeu yawe pewe mbae jaeramo Tumpa uikuaaka chewe wae, jokua re ko pepuere piyekou päwe. Jae nunga wi ñaniñee pe etei amimbeu yawe pewe mbae aikuaa wae jare pëti ñee Tumpa etei umee chewe wae, jokua re wi ko pepuere piyekou päwe.

<sup>7</sup>Yambijaanga temimbi wasu jare miöri yambopu wae re. Jokua reta yambopuño yawe, ndarau kiawe uikuaa mbae nunga taerari ra uyendu oï wae.

<sup>8</sup>Jukuäräi wi pe reta pikuaa ko sindaro reta uikuaa temimbi wasu mbae pewa ra uñee oï wae. Erëi jokua temimbi wasu uñee pochiño yawe, ndarau sindaro reta uyeyapikatu uñeräro waerä.

<sup>9</sup>Jae ramiño wi pe reta piyemingeta'ä yawe ñee ïru wae reta uikuaa wae, ndarau uikuaa reta mbae ra pere peï wae. Piyemingetaño ko iwitu pe.

<sup>10</sup>Kua iwi rupi ime ko jeta ambie ye ye ñee reta, jare opaete jokua ñee reta ikawi ko tëi.<sup>11</sup>Erëi ime yawe kía uyemingeta oï che ndiwe jae iñee pei wae, jare jokua ñee mbaeti che aikuaa yawe, jayawe jae ko ambie iwi pewa chemaerä. Jare jukuäräi wi ko che jae imaerä.

<sup>12</sup>Jokua re ikawi piyemingeta waerä pepia pe. Che aikuaa pe reta pipotaete penoi mbaepuere reta Espiritu Santo umee wae. Erëi peka mii jokua mbaepuere reta pemimiräta waerä pipe ïru hermano Cristo re wirowia wae reta.

<sup>13</sup>Jayawe ime yawe kía uipota uyemingeta piyembati pe ambie ñee pe wae, tuyerure mii Tumpa pe ipuere waerä wi umimbeu kawi ñaniñee pe mbae uipota jokua ñee jei wae. Echa'ä aramoi jae awe uikuaa'ä mbae uyemingeta oï wae.

**14** Che chepuere ayerure Tumpa pe ñee yaikuaa mbae wae pipe. Erëi jukuärái yawe, che ayerure pochiño aï. Che ayerure aï Espíritu Santo rupi, erëi che etei aikuaa'ä mbae jae aï wae.

**15** Jayawe ¿mbae ra ayapota añawe? Tayerure Tumpa pe Espíritu Santo rupi, jare jae nunga wi tayerure chupe aikuaa kawi rewe. Jae ramiño wi akäta yawe Tumpa pe, takäta chupe Espíritu Santo rupi, jare jae nunga wi takäta chupe aikuaa kawi rewe.

**16** Jare jukuärái pe reta piyapo mii wi. Echa'ä jukuärái'ä piyapo yawe, yepe tēi aramoi pemee peï yasurupái Tumpa pe Espíritu Santo rupi, erëi ñru piñee uikuaa mbae wae reta ndarau ipuere jei jokua re, “Jukuärái tuiko.” Echa'ä jae reta uikuaata'ä mbae ra piyemingeta peï wae.

**17** Añetete ko, yande reta ikawiete ñamee waerä yasurupái Tumpa pe. Erëi jokua ñee ambie ye oï ñru reta pe yawe, jayawe ndarau umikirëi reta Tumpa koti.

**18** Che amee yasurupái Tumpa pe kërái jetaete ayemingeta ambie ye ye ñee reta pe opaete pe reta wi.

**19** Erëitu ayembati yawe ñru wirowia Cristo re wae reta ndiwe, ikawiete ko amboe reta waerä ñnee pe etei jare jesäka kawi. Yepe tēi aramoi chepuere puku ayemingeta ñee ambie ye ye wae pe, erëi chemaerä ikawiete ko chupe reta che ayemingeta waerä chutu mii ñee jae reta uikuaa kawi wae rupi.

**20** Hermano mii reta, kua mbaembae reta rewa awiye jekuaeño pepia pe piyemingeta sambiai reta rami. Ime amokue mbaembae re ikawi ko pe reta piko waerä pēti sambiai iyarakuaa mbae wae rami – jae ko mbaembae ikawi mbae wae rewa. Erëi jokua mbaepuere reta Espíritu Santo umee yandewe wae, jokua re aeka pewe piyemingeta waerä pepia pe ukuakuaa wae reta rami.

**21** Tumpa ñneeriru pe uyekuatía oï mbae jei yande Ya Israel ñnemoñaeta reta pe wae. Jae jei chupe reta kuärái: “Che amondota aï pekoti ambiembie iwï pewa reta jae reta pemiamiri waerä. Jae reta pemingetata oï jae reta ñnee pe etei – jae ko ñee pe reta pikuaa mbae wae. Jukuärái ayapota aï pe reta piyerowa ye waerä tēi chekoti. Erëi jeseuwe piyapisakata'ä peï cheré.” Jukuärái Tumpa jei.

**22** Jayawe kua pe yaecha ñaï jokua mbaepuere ambie ye ye ñee reta pe yayemingeta wae, jokua ñee reta jae'ä ko Cristo re wirowia wae reta pewarä. Jokua ko jae jese wirowia mbae wae reta pewarä, jare uikuaaka chupe reta kërái Tumpa uiporarakata oï chupe reta jekuaeño wirowia'ä reta yawe. Erëi jokua mbaepuere yamimbeu waerä ñee Tumpa wi etei ou wae, jokua ko jae Cristo re wirowia wae reta pewarä – mbaeti ko wirowia mbae wae reta pewarä.

**23** Jayawe pe reta piyembati peï yawe päwe rewe pembutuicha waerä Tumpa jee, jare opaete pe reta piyemingeta peï yawe ambie ye ye ñee reta pe wae, ¿mbae ra uasata amokue wirowia mbae Cristo re wae reta uike yawe piyembati peï wae pe? Jae reta jeita pewe pe reta pembikere peï, echa'ä uikuaa kawi'ä reta kua mbaembae rewa.

<sup>24</sup>Erëi opaete pe reta pemimbeu pei yawe ñee Tumpa wi etei ou wae, jare uike yawe kía Cristo re wirowia mbae wae ani pëti uikuaa mbae wae, ¿mbae ra uasata? Jokua piñee rupi aramoi ipiawiweta’ä oï, jare jae uikuaata oï iyuwi kërái uyawi Tumpa koti wae jare jukuärái jae teko pe oï Tumpa jowai.

<sup>25</sup>Jae nunga wi aramoi jae uikuaata oï iyuwi Tumpa umae yepe oï jae ipia japipe etei wae. Jayawe jae uñeñonota iwi re umbutuicha waerä Tumpa jee jare jeita: “Añetete yepe Tumpa oï pe reta ndiwe.” Jukuärái ipuere uasa.

### **Yandiyembati reta toï simi rupi kawi jare uyembijisi kawi**

<sup>26</sup>Jáeramo hermano mii reta, opaete kua yayemboe yayu wae re, ¿kërái pa añawe yayapo? Pe reta piyembati yawe päwe rewe pembutuicha waerä Tumpa jee, pëti wae ipuere jei mbae nunga salmo pekäta waerä. Ìru wae ipuere oporomboe mii. Ìru wae ipuere uikuaaka pewe kërái Tumpa pëti mbae uechaka ma chupe wae. Jare ìru wae ipuere uyemingeta mii pëti ñee ambie pe. Jare ìru wae ipuere umbiasa jokua ñee ñaniñee pe. Erëi opaete kua mbaembae mii tuiko pepiräta päwe waerä Tumpa koti.

<sup>27</sup>Jare ime yawe kía reta uipota uyemingeta ambie ye ye ñee reta pe wae, tuyemingeta mokui ani mbapi wae jae reta, jare tuyepikapika reta. Jare imeta ko pëti wae umbiasa waerä jokua ñee ñaniñee pe wae.

<sup>28</sup>Erëi mbaeti yawe kiawe piyembati pe ipuere umbiasa jokua ñee ñaniñee pe wae, jayawe awiye kiawe tuyemingeta ambie ñee pe. Ipia peño tuyemingeta Tumpa pe jokua ambie ñee pe.

<sup>29</sup>Jae ramiño wi ime yawe kía reta uipota umimbeu pewe ñee Tumpa wi etei ou wae, tumimbeu pewe mokui ani mbapi wae jae reta. Jare uyapisaka jese wae reta ipia pe tuyemingeta kawi jokua uyandu wae re jupi ra ani jupi’ä ra.

<sup>30</sup>Erëi Tumpa umee yawe ñee kía nunga uyapisaka oï jese wae pe, jayawe jokua uyemingeta oï wae tumee chupe wi jae uyemingeta waerä.

<sup>31</sup>Echa’ä jukuärái pe reta pëti pëti wae pepuere pemimbeu ñee Tumpa wi etei ou wae. Jare jukuärái opaete pe reta pepuere waerä piyemboe jare piñemikirëi.

<sup>32</sup>Jukuäräita pepuere piyapo, echa’ä jokua ñee Tumpa wi etei ou wae umimbeu wae reta ime onoi mbaepuere iyé, jare jukuärái ipuere uñeraäro reta.

<sup>33</sup>Añetete Tumpa uipota yayapo waerä mbaembae simi rupi kawi jare uyembijisi rupi kawi – mbaeti ko opaño kërái rái yayapo waerä. Jukuärái ko opaete Cristo re wirowia wae reta jeko kerupi rupi uyembati reta wae rupi.

<sup>34</sup>Jare pe reta piyembati yawe, kuña reta tikii. Awiye tuyemingeta reta. Erëi toï reta uipiu rewe kuimbae reta jei wae rupi, echa’ä jukuärái jei Tumpa iñee pe.

<sup>35</sup>Jare ime yawe pëti kuña mbae uipota uikuaa wae, tupirandu ime pe jëta pe oo ye ma yawe. Echa’ä jupi’ä ko kuña uyemingeta yawe yembati pe.

<sup>36</sup>Kua mbaembae rewa pipota'ä piyapisaka yawe chiñee re, jayawe tapirandu pewe kuärái: ¿Pe reta etei yerá pikuatía Tumpa iñee? ¿Pe retaño yerá pikuaa jesewa? Mbaeti etei ko jukuärái. Jáeramo pe reta mbaeti ikawi pere waerä: “Kua ñee reta oremaerä'ä ko.”

<sup>37</sup>Aramoi ime kía pepite pe umae iyé jae ko pëti ñee Tumpa wi etei ou wae umimbeu wae. Ani aramoi ime kía wirowia Espiritu Santo imbaepuere onoi wae. Jokua nunga ime yawe, tuikuaa kawi kua mbaembae aikuatía ai pewe wae yandeYa wi etei ko ou wae.

<sup>38</sup>Erëi jae wiriro yawe kua chiñee, jayawe awiye ye ma piyapisaka jese.

<sup>39</sup>Jayawe hermano mii reta, che pumbiarakuaa kuärái: Ikawi ko pe reta pekirëi pemimbeu waerä ñee Tumpa wi etei ou wae. Jare ime yawe kía uipota uyemingeta ambie ye ye ñee reta pe wae, pemaño jese. Awiye piyopia chuwi.

<sup>40</sup>Jaeño ko tuyeyapo opaete simi rupi kawi jare uyembijisi kawi rupi kërái che jae ma pewe wae rupi. Jukuärái ko che pomboe kua mbaembae reta re.

## 1 Corintios 15

### Pablo umimandúa reta ñee ikawi wae re

<sup>1</sup>Añawe hermano mii reta, aipota pumimandúa ñee ikawi wae amimbeu pewe wae re. Jokua ñee re ko pe reta perowia, jare piñemimiräta ma jese täta.

<sup>2</sup>Jare jokua ñee ikawi wae rupi penoita tekowe opa mbae wae, perowia jese yawe añetete pewa. Erëi mbaeti pipisi kawi yawe ñee amimbeu pewe wae, jayawe jokua perowia tëi wae usiriwe'ä pewe.

<sup>3</sup>Che amimbeu yuapi ye pewe jokua ñee ikawi wae Cristo etei tenonde umimbeu ma chewe wae. Jare jokua ñee ikawiete oi opaete iru ñee reta wi. Kuärái ko jokua ñee: YandeYa Cristo umano mbaembae yayawi Tumpa koti wae re opa umbái waerä yandewi. Jare jukuärái jae uyapo kërái arakae Tumpa iñeeriru pe uyekuatía iko wae rupi.

<sup>4</sup>Jae jetekue iru reta oñono teöwerenda pe, jare joko wi mbapi ara pe Tumpa umbijekowe ye ueru umanokue wae reta ipite wi kërái Tumpa iñeeriru pe arakae uyekuatía iko wae rupi.

<sup>5</sup>Joko wi Cristo uychaka Pedro pe. Jare joko wi jae uychaka iruwe jemimboe tenondewaete reta pe.

<sup>6</sup>Jare joko wi jae uychaka jeta iru hermano reta pe uyembati yureko reta rambuwe. Jokua reta ko pandepo chiëto uasa mii rupi. Jare jokua reta, yepe tëi amokue wae umano ma, erëi jeta imeño ñonoï.

<sup>7</sup>Jare joko wi Cristo uychaka tiwi Jacobo pe, jare joko wi uychaka opaete iru kuimbae reta jae omondo ma wae pe.

<sup>8</sup>Jare taikuete rupi Cristo uyechaka chewe wi. Erëi yepe tēi che ko Tumpa tai wi añawe, erëi che ko jae pēti sambiaia oa kawi'ä ichi wi wae rami.

<sup>9</sup>Echa'ä tenonde yawe jeta che aiporarakase Cristo re wirowia wae reta pe. Jáeramo jokua iruwe kuimbae reta Cristo etei omondo wae ko jae cherikei tenondewa chemaerä, jare che jupi'ä etei ko jei reta waerä chewe Cristo etei omondo wae.

<sup>10</sup>Erëi jesewe Tumpa ipiakawi rupi Cristo omondo wae ko che. Jare jokua ipiakawi uechaka chewe wae ukañi'ä etei ko oï. Echa'ä che aparawiki tätaete iruwe kuimbae reta Cristo etei omondo wae wi. Erëi añetete cheiño'ä ko aparawiki. Tumpa ipiakawi rupi chembori oï.

<sup>11</sup>Jukuärái ko ñee ikawi wae ore kuimbae Cristo oremondo wae reta numimbeu noï wae. Erëi mbae'ä ko kía nunga ra ore reta numimbeu pewe jokua ñee wae. Ikawi wae ko jae pe reta perowia ma jokua ñee re.

### **Umanokue wae reta ikowe yeta**

<sup>12</sup>Jayawe ore numimbeu pewe jesäka kawi rupi kërái Cristo ikowe ye ou umanokue wae reta ipite wi. Jayawe, ¿këraita pa amokue pe reta pere peï ndarau kiawe ikowe ye ou umanokue wae reta ipite wi?

<sup>13</sup>Echa'ä umanokue wae reta mbaeti ikowe ye yawe, jayawe Cristo awe wi ko ikowe yewita'ä tēi ou umanokue wae reta ipite wi.

<sup>14</sup>Jare Cristo mbaeti yawe ikowe ye ou umanokue wae reta ipite wi, jayawe kua numimbeu pewe wae usiriwe'ä etei ko pewe, jare jokua perowia Cristo re wae jae nunga wi usiriweta'ä tēi pewe.

<sup>15</sup>Jae nunga wi umanokue wae reta ikowe yewi'ä yawe, jayawe ore reta oreapu ko noï tēi pewe Tumpa rewa. Echa'ä numimbeu ma pewe yandeRu Tumpa umbijekowe ye ko ueru Cristo umanokue wae reta ipite wi. Erëi kiawe ikowe yewi'ä yawe, jayawe jokua ndoe wae añetete wae'ä ko.

<sup>16</sup>Añawe kua pe che tae ye pewe umanokue wae reta mbaeti ikowe ye yawe, jayawe Cristo jae nunga wi ikowe yewi'ä tēi ko ou umanokue wae reta ipite wi.

<sup>17</sup>Jare Cristo mbaeti ikowe ye yawe, jayawe jokua perowia Cristo re wae usiriwe'ä etei ko pewe, jare jae nunga wi jekuaeñota tēi ko peï teko pe Tumpa jowai.

<sup>18</sup>Jae nunga wi Cristo re wirowia rewe umano wae reta opa ma ko yuraa tēi Tatawasurenda pe.

<sup>19</sup>Añetete, ñamae ñai Cristo koti wae jae ko yayekou waerä jaeño kua iwí pe ñai rambuewe yawe, jayawe ikawita tēi ko opaete wae reta umaie waerä yanderé yandeparareko rewe. Echa'ä jeiño ma yaeya tēi yandereko yaikose wae rupi.

<sup>20</sup>Erëi Cristo añetete ikowe ye ma ko ou umanokue wae reta ipite wi! Jare jukuärái jae rani ikowe ye uikuaaka waerä kërái opaete umanokue wae reta ikowe yeta ko wi.

**21-22** Kua yandepuere yambijaanga ambie mbae uasa yandewe wae re. Yande yaikuaa kawi ñaï kuimbae tenondewaete wae Adán uyawi ramo yawe Tumpa koti, mano uike kua iwi pe. Jukuärái opaete yande reta ñamanota ko, echa'ä yande ko jae Adán pewa ramo. Erëi Cristo wi etei ma ko ou tekowe. Jare añawe yande ko jae Cristo pewa ramo, yande yaikowe yeta ñaï wi umanokue wae reta ipite wi.

**23** Cristo rani tenonde ikowe ye. Jare Cristo ara wi ou ye yawe ramo yande yaikowe yeta ñaï kuri wi. Jukuäraita ko yasa opaete yande Cristo pewa yaiko wae reta.

**24** Joko wi ara taikuewa uwäe ma yawe, yandeYa Cristo opata umbiyapi oï kuri opaete jowaicho reta imbaepuere – jae ko mburuwicha reta kua iwi pewa, jare mburuwicha reta mbaeti kua iwi pewa wi, jare ñru mbaepuere onoi wae yaecha mbae wae reta wi. Joko wi opaete mbaepuere Cristo umee yeta Tu pe.

**25** Añetete ko, Cristo ikota mburuwicharä jae opa umbiyapi rewa jowaicho reta imbaepuere.

**26** Jare towaicho taikuewaete wae jae umiamirita onoi wae jae ko mano.

**27** Jokua mano re wi Cristo ime onoi mbaepuere, echa'ä Tumpa umee chupe mbaepuere opaetei mbaembae re. Jukuärái uyekuatía oï Tumpa ñneeriru pe. Erëi kua ñee opaetei jei wae uipota'ä jei yandeRu Tumpa etei oï wi Cristo ipo pe, echa'ä Tumpa ko umee chupe mbaepuere opaete mbaembae re.

**28** Jayawe Tumpa Tai opaetei mbaembae umiamiri yawe, jae etei ññemeeta oï Tu ipo pe. Jukuärái Cristo uyapota oï Tu onoi ye waerä mbaepuere opaetei mbaembae re jaeño mái pewa. Jukuäraita ko.

**29** Jae nunga wi jokua yaikowe yeta ñaï wae wirowia'ä wae reta pe, che aipota jae chupe reta kuärái: Pe reta pikuaa peï amokue wae reta uyembisakambuka ñonoï tēi i pe umanokue wae reta ipepika pe. Erëi ¿maera pa jukuärái uyapo reta tēi umanokue wae reta mbaetita ikowe ye yawe?

**30** Jare oremaerä, añetete ko umanokue wae reta ndarau ma ikowe ye yawe, jayawe, ¿maera pa ore jekuaeño nduiko yemumburu rupi?

**31** Echa'ä opa ara rupi chemumburu cheyuka reta waerä. Jokua aipota pe reta pikuaa waerä, echa'ä pe reta ko jae chehermano mii reta yandeYa Jesucristo rupi, jare amae peré ayerowia rewe.

**32** Täta aiporara ma parawete kua tēta wasu Éfeso pe kuimbae jeko pochi wae reta jeko pewa – jae reta mbaemimba pochi wae rami ko. Erëi añetete umanokue wae reta mbaetita ikowe ye yawe, jayawe opaete aiporara wae usiriweta'ä etei ko tēi. Echa'ä Tumpa ndarau umiñatima chewe ikawi wae aiporara aiko wae re. Jare jae nunga wi umanokue wae reta mbaetita ko ikowe ye yawe, jayawe jaekawita tēi ko aramoi yae waerä yandeyupe yandepiawiwe rewe: “Yakaru jare yakau añawe, echa'ä kuriye aramoi ñamanota.” Jukuärái aramoi yandepuere yayemingeta tēi.

<sup>33</sup>Erëi awiye piyembitawika pei jukuärái uyemingeta wae reta pe. Jekuaeño piñemiiru yawe jeko kachi wae reta ndiwe, jae reta urükumewata pewi pereko kawi.

<sup>34</sup>Piko ye arakuaa katu añetete wae rupi, jare awiye jekuaeño piyawí Tumpa koti. Chemaerä ime chawaa amokue pe reta ndeiño pikuaa Tumpa. Jukuärái che jae pewe pumimaraka waerä.

### **¿Këraita ra ikowe ye umanokue wae reta?**

<sup>35</sup>Erëi aramoi kía jeita: “¿Këraita ra ikowe ye umanokue wae reta? Jare añetete yawe umanokue wae reta ikowe yeta, jayawe ¿këraita pa jokua jekowe ye umanokue wae jete opa ma jüu wae?” jeita reta.

<sup>36</sup>Erëi che tae iyarakuaa mbae wae retaño ko jukuärái uyemingeta. Yande reta temiti rami ko. Echa’ä pëti temiti ñañoti yawe, imeta ko opa jüu rani ambie jeñi waerä.

<sup>37</sup>Jare yaikuaa kawi ñai yande ñañoti yawe pëti temiti – ipuere ko awati ani ipotawe iru temiti – oëta’ä jokua jäikue ñañoti wae etei.

<sup>38</sup>Erëi uyekuaata ko ambie ye kërái Tumpa jei wae rupi. Jare jukuärái wi opaete temiti ambie ye wae reta uyekuaata wi ambie ye ye.

<sup>39</sup>Jae ramiño wi mbaeti ko opaete tekowe ime kua iwi pe wae jete oyowake pëti ramiño. Echa’ä kuimbae jete, jare mimba jete, jare pira jete, jare wira jete oyowake’ä etei ko.

<sup>40</sup>Jare jae nunga wi mbaembae ara pe ñonoï wae ambie ye ko mbaembae kua iwi pe ñonoï wae wi. Mokuï rewe maepöra ko, erëi mbaeti oyowake.

<sup>41</sup>Jare jukuärái wi opaete mbaembae ara re ñonoï wae oyowake’ä ko reta. Echa’ä warasi, jare yasi, jare yasitata reta ambie ye ye ipöra. Jare yasitata retawe ipöra pe uyuawi iyuwi.

<sup>42</sup>Jae ramiño wi yanderete añawe ñanoi wae ambie yeta wi ko oï kuri yaikowe ye ma yawe. Echa’ä kua yanderete oñotita reta wae, opata ikumewa temiti rami. Erëi yaikowe ye ma yawe, ndarau etei ma ikumewa ye.

<sup>43</sup>Kua yanderete oñotita reta wae maepöra mbae wae ko jare ipiräta mbae wae ko. Erëi jokua ikowe yeta oï wae maepöraeteta ko jare ipirätaeteta ko.

<sup>44</sup>Yaikuaa kawi mbaembae kua iwi pe oï wae ime onoi jete iwi pewa. Jare jukuärái wi mbaembae ara pe oï wae ime onoi jete ara pewa. Añawe kua yanderete oñotita reta wae, jae ko kua iwi pewa. Erëi jokua ikowe yeta oï wae ikota ara pewa.

<sup>45</sup>Yaikuaa kawi waerä kua mbaembae rewa, yaecha ñamae yandetenondewaete reta Adán jare Cristo re. Uyekuatía oï Tumpa iñeeriru pe kuärái: “Kuimbae tenondewaete Adán jee wae umbipi tekowe onoi.” Jukuärái jei, jare jokua uyemingeta oï tekowe iwi pewa re. Erëi Cristo ko jae yandetenondewaete taikue rupi outa iko wae, jare jae ko umee yandewe tekowe ara pewa.



**46**Jayawe kua uikuaaka yandewe tenondete oï tekowe iwi pewa, jare joko wi tekowe ara pewa taikue uyekuaata oï kuri wae. Jukuäräita ko.

**47-48**Jare ¿këraita ra ko oï kuri yanderete? Jokua kuimbae tenondewaete wae iwi pewa ko, echa'ä iwi wi etei Tumpa uyapo ramo. Jare jukuärái wi yanderete iwi pewa ko Adán jete rami. Erëi joko wi ima katu rupi ou wi kuimbae ambie ye wae ara pewa – jae ko Cristo. Jare añawe yande ko jae Cristo pewa ramo, yanderete oïta wi kuri jae jete rami – jae ko ara pewa.

**49**Añawe këraí yande yaiko jokua kuimbae iwi pewa echaete, jukuäraiete wi yande yaikota kuri jokua kuimbae ara pewa echaete wi. Jukuäräita ko.

**50**Jayawe hermano mii reta, Tumpa oï ma yawe opaete wae imburuwicha wasurä jaeño mái pewa, ndarau etei yandepuere ñai kuri jae ndiwe kua yanderete iwi pewa ndiwe. Echa'ä kua yanderete jaeño mái pewa'ä ko, echa'ä jüuta oï. Jokua re ikawi yaikuaa kawi waerä.

**51**Mase, añawe tamimbeu pewe mbae tenonde yawe Tumpa uikuaaka'ä etei wae. Amokue yande Cristo re yarowia wae reta ndarau opa ñamano ñai kuri. Erëi opaete yande reta yanderete Tumpa umbipiau yeta oï kuri.

**52**Kua uyeyapota oï aramoete mii pëti jei wae peño pëti yasapimi peño Tumpa jemimbi wasu taikuewaete wae uñee yawe. Echa'ä Tumpa jemimbi wasu uñeeta oï, jare Cristo re wirowia rewe umano wae reta ikowe yeta onoi waerä jete ndarau etei ikumewa wae. Jare joko wi yande imeño ñai wae reta, Tumpa opata umbipiau ye oï yanderete.

**53**Echa'ä yanderete ikumewa oo oï wae imeta ko uyepepika yanderete ndaraúi ikumewa wae ndiwe. Ani yandepuere yae chupe yanderete mano koti oo oï wae imeta ko uyepepika yanderete ndarau etei ipuere umano wae ndiwe. Jukuärái uyeyapota oï yandewe kuri këraí kía yanembiyemimonde oï wae rami.

**54**Jayawe jokua uasa ma yawe, jare uyepepika ma yawe yanderete mano koti oo oï wae jare ikumewa oo oï wae, jayawe ramo uyeyapota ma oï Tumpa iñeeriru pe uyekuatía oï wae. Echa'ä joko pe uyekuatía oï kuärái: “Tumpa opa ma umiamiri mano jare opa ma umbiyapi wi.

**55**Jayawe nde, mano, ¿kiape pa nei añawe? Ndepuere'ä ma oremiamiri, jare ndarau ye ma ndea oreré.” Jukuärái uyekuatía oï.

**56**Mase, mano oa ma yanderé yayawi Tumpa koti jeko pewa. Añetete, Tumpa jei wae yayawi ramo, jekuaeño tuicha teko pe ñai Tumpa jowai.

**57**Erëi ñamee yasurupái Tumpa pe, echa'ä jae jekuaeño yanembori ñamiamiri waerä kua mbaembae yandeYa Jesucristo uyapo yandewe wae rupi.

**58**Jáeramo hermano mii reta, piñemimiräta yandeYa re, jare awiye pesiri chuwi. Jekuaeño piñemiatangätu piyapo waerä mbarawiki yandeYa umee pewe wae. Echa'ä pe reta pikuaa pei, peparawiki yawe yandeYa pe, yandeYa umeeta oï pewe kuri ikawiete wae jokua re.

## 1 Corintios 16

### Pablo uikuaaka chupe reta kērái oporombori reta waerä

<sup>1</sup>Añawe ime oĩ ambie re yayemingeta waerä. Pe reta pipota pikuaa piko kērái pepuere waerä pombori Cristo re wirowia wae reta tēta wasu Jerusalén pe ikuasi ñonoĩ wae reta. Kua re che ayokui ma hermano reta iwi Galacia rupi uyembati wae reta, jare añawe jukuäráiete wi pewe tamimbeu. Ikawita ko piyapo waerä kuärái:

<sup>2</sup>Opa domingo rupi pēti pēti wae pe reta piñono teeta ko jokua pemingana wae wi amokue korepoti kērái pemingana wae rupi. Jukuärái ko piyapota opa semana rupi awiye waerä che joko pe ma aĩ yawe ramo piyapo peĩ kuri.

<sup>3</sup>Jare che a ma awäe pepi yawe, piparawo kuri amokue wae reta peraaka waerä jokua korepoti piñono tee wae tēta wasu Jerusalén pe. Jare che aikuatiata tupapire reta aikuaaka waerä hermano reta Jerusalén pe ñonoĩ wae pe. Joko wi amondota reta Jerusalén pe jokua korepoti rewe.

<sup>4</sup>Jare jaekawi pewe yawe che wi a waerä jae reta ndiwe, jayawe jae reta ipuereta uwata yuraa che ndiwe.

### Pablo uikuaaka chupe reta jae ipiyemingeta

<sup>5</sup>Añawe chepiyemingeta aĩ asa waerä iwi Macedonia rupi. Jare jokua iwi rupi asa ma yawe, aipota a apou pepi.

<sup>6</sup>Jare aramoi apitata pepi ima katu rupi opa roi uasa rewa. Jare joko wi aramoi pe reta pepuereta chembori kuri keti ata wae rupi.

<sup>7</sup>Aipota'ä apou pepi michi pewaño, erēi aipota apita pe ndiwe ima katu rewa yandeYa uipota yawe.

<sup>8</sup>Añawe apitata kua tēta wasu Éfeso pe Pentecostés ara ou uwäe rewa.

<sup>9</sup>Echa'ä yepe tēi ime jeta towaicho reta kua pe, erēi öke uyepea ma chewe ayapo waerä kua pe mbarawiki yandeYa umee chewe wae.

<sup>10</sup>Erēi Timoteo oo uwäe yawe pepi, piyandareko kawi mii jese kuri, jukuärái ipiawiwe oĩ waerä pepi. Echa'ä jae uparawiki oĩ wi yandeYa pe che rami.

<sup>11</sup>Jáeramo awiye kía turïro. Jare jae ou yeta ma oĩ yawe chekoti ñru hermano reta ndiwe, pombori kawi mii kuri ou waerä ipiakatu rewe.

<sup>12</sup>Jare che tamimbeu pewe wi hermano Apolos rewa. Che jae tēi chupe: “Ikawi ko nde ndeo ndepou waerä jokua Corinto pewa reta ipi ñru hermano reta ndiwe jae reta yuraa ye yawe jokoti,” jae chupe. Erēi jae uipota'ä oo añawe. Erēi pepe katu mii rupi oota ko oĩ kuri, ara ime chupe yawe.

<sup>13</sup>Jae nunga wi che aipota jae pewe piyandareko kawi piyé awiye waerä kía pemitawí. Jekuaeño perowia katu Cristo re. Piñemiatangātu jare awiye pekiye mbae wi.

<sup>14</sup>Jare opaete mbae piyapo wae, piyapo pepuruau rewe.

<sup>15</sup>Hermano mii reta, pe reta pikuaa tenondete Estéfanas jëta pewa reta rani ko wirowia Cristo re iwi Acaya pe. Jare pikuaa wi jae reta uñeño ma uyeyokui waerä ñru wirowia Cristo re wae reta pe.

<sup>16</sup>Jáeramo che pumiñera piyapisaka waerä jokua nunga reta re. Jare jae nunga wi piyapisaka mii opaete uparawiki yandeYa pe wae reta re.

<sup>17</sup>Che ayerowia ai Estéfanas jare Fortunato jare Acaico yuweru chepi joko wi ramo. Echa'ä yepe tei añawe che chepuere'ä ai pepi, erëi jae reta ime ñonoï kua pe che ndiwe pepipika pe.

<sup>18</sup>Jare jae reta chemikirëi ngatu yewi kërái jae reta pemikirëi ngatu rami. Jáeramo ikawi ko pipiu waerä kua nunga reta wi.

### **Pablo omondo saludo**

<sup>19</sup>Cristo re wirowia wae reta iwi Asia rupi kiape kiape uyembati wae omondo pewe saludo. Jae nunga wi Aquila jare Priscila jare opaete jae reta jëta pe uyembati wae reta omondo wi pewe saludo. Jae reta wirowia wi yandeYa Cristo re.

<sup>20</sup>Jae nunga wi opaete hermano reta kua pe ñonoï wae omondo wi pewe saludo. Jare pe reta wi piyembisaluda yawe, jekuaeño piyembisaluda piyerau rewe.

<sup>21</sup>Che Pablo, che etei aikuatía ai pewe kua saludo miño chepo pe etei, pe reta pikuaa waerä che ko araaka ai pewe kua tupapire wae.

<sup>22</sup>Ime yawe kía uau'ä yandeYa Jesucristo wae, Tumpa tuiporaraka chupe. ¡Eyu ye, nde, oreYa!

<sup>23-24</sup>Che puau opaete pe pëti ramiño pei Jesucristo re wae reta. YandeYa Jesucristo jekuaeño tipiakawi pewe. Jukuärái tuiko.

## 2 Corintios

### Kua tupapire rewa:

Pablo wiraaka yawe tenondete tupapire Cristo re wirowia wae reta pe tēta wasu Corinto pewa pe, jae reta uyapisaka Pablo umbiarakuaa reta wae re. Erēi jokua jaikue rupi uike jae reta ipite pe ĩru wae reta, jare jae reta umbipi oporomboe kachi jare uyemingeta kachi reta wi Pablo koti kuārái: “Jesucristo ombou’ä Pablo.” Jare kua jeräkua Pablo pe yawe, jae uikuatía kua tupapire jare wiraaka chupe reta. Kua kuatía rupi Pablo uyemingeta jeta kērái Tumpa añetete ombou umimbeu waerä ñee ikawi wae Jesucristo rewa, jare kērái jae jeta uiporara uyeyokui waerä Tumpa pe. Jae nunga wi Pablo umbiarakuaa reta ĩru mbaembae reta re.

### 2 Corintios 1

#### Pablo wiraaka saludo

<sup>1</sup>Cherikei reta, cheriwi reta, jare cherindi mii reta tēta wasu Corinto pe piko wae, araaka ai pewe saludo. Che ko jae Pablo. YandeYa Jesucristo chemondo jae jee re amimbeu waerä jesewa, echa’ä jukuārái Tumpa uipota ramo. Che jare hermano Timoteo ndiwe aikuatía ai kua tupapire pewe piyembati pei Tumpa jee re wae reta pe. Jare nduikuatía noi wi opaete ĩru wae reta Tumpa oñono tee jae imaerä wae iwi Acaya rupi ñonoĩ wae reta pe.

<sup>2</sup>YandeRu Tumpa jare yandeYa Jesucristo jekuaeño tipiakawi pewe jare tuyapo pewe piko waerä pepiakatu rewe.

#### Tumpa umbipiakatu Pablo uiporara wae rupi

<sup>3</sup>Jambutuicha yandeRu Tumpa jee! Jae ko yandeYa Jesucristo Tu. Jae ko yandeRu Tumpa yandeparareko wae jare yanembipiakatu wae.

<sup>4</sup>Echa’ä jae yanembipiakatu opaete mbaembae yaiporara wae rupi, jukuārái yande reta yandepuere waerä wi yambipiakatu ĩru uiporara ñonoĩ wae reta kērái Tumpa yanembipiakatu rami.

<sup>5</sup>Añetete, kērái Cristo uiporara rami, jukuārái wi yande yaiporarata ñai. Erēi yande peti ramiño ñai Cristo re ramo, tuicha rupi Tumpa yanembipiakatu.

<sup>6</sup>Jukuārái uasa orewe. Echa’ä opaete ore nduiporara wae rupi, Tumpa orembipiakatu. Jare jokua ikawita oi wi pemaerä. Echa’ä añawe ore orepuereta pumbipiakatu pe reta piporara pei yawe. Jare jukuārái pe reta pepuereta pemiawäta pepiawasu rewe jokua mbaembae piporara pei wae reta. Echa’ä kērái ore nduiporara wae rami, jukuārái wi pe reta piporarata pei.

<sup>7</sup>Erëi ore nduikuaa yepe tēi pe reta piporarata pei ore nduiporara wae rami, erëitu Tumpa pembipiakatuta wi kërái jae orembipiakatu ma wae rami. Jáeramo ore ndorowia katu noĩ peré pe reta pemiawäta waerä.

<sup>8</sup>Jayawe hermano mii reta, ore nduipota pe reta pikuaa waerä kërái ore täta rupi nduiporara iwi Asia pe nduiko yawe. Ore nduiporaraete parawete jare orepuere'ä ma ndurupia. Jáeramo ndorowia tēi opa pota echa numano.

<sup>9</sup>Añetete ko, ndorowia tēi jaeño mái opa nukañi. Erëi kua uasa orewe ore nduyemboe waerä orepuere'ä ko nduyeko oriyé orepiräta reño. Jaeño orepuere nduyeko Tumpa re, echa'ä jaeño ipuere umbijekowe ye umanokue wae reta.

<sup>10</sup>Jukuärái Tumpa orerepi ma mano wi. Jare añawe rupi jekuaeño jae orerepi oĩ. Jare ore ndorowia katu jese jae jekuaeño orerepi waerä.

<sup>11</sup>Erëi orembori mii, pe reta, yerure rupi. Echa'ä jeta wae reta uyerure yawe Tumpa pe oreré, jae reta tuicha rupi uyapota yasurupái Tumpa pe jokua mbae ikawi wae Tumpa uyapo orewe wae re.

### Maera Pablo oo rani'ä Corinto pe

<sup>12</sup>Kua añawe ndoeta pewe wae, ndoeta pewe nduyerowia rewe jare orepia orembijeko mbae rewe. Jae ko kua: Ore nduiko yawe Cristo re wirowia mbae wae reta ipite rupi jare pe reta ndiwe wi, ore nduiko kawi orereko mbae rewe. Ndupurumbitawi'ä etei. Erëi ore mbaeti ko oreiño orearakuaa rupi nduiko jukuärái. Ore ko noĩ Tumpa ipiakawi rupi.

<sup>13-14</sup>Jare opaete ore nduikuatía pewe wae, pe reta pepuere pikuaa, echa'ä nduikuatía ko noĩ kërái pe reta ñee piporu wae. Pe reta michiño orekuaa. Mbaeti orekuaa kawiete. Erëi che aipota pe reta orekuaa kawi waerä. Echa'ä jukuärái yawe, piyerowia katuta oreré kërái ore nduyerowia katu noĩ peré rami. Jare jukuärieteta ko jokua ara Jesucristo ou ye yawe.

<sup>15</sup>Jare kua arowia ramo, ayemingeta aiko tēi chepia pe a apou pepi waerä mokui wese, jare jukuärái pe reta piyekou waerä mokui wese.

<sup>16</sup>Tenonde aipota tēi a apou aiko pepi Macedonia koti asa aiko yawe. Jare joko wi ayu ye yawe, jae nunga wi aipota tēi apou aiko pepi. Che ayemingeta tēi aiko chepia pe aramoi pe reta pepuereta chembori a waerä iwi Judea koti. Jukuärái ko chepiayemingeta iko tēi.

<sup>17</sup>Erëi pe reta pikuaa mbaeti jukuärái ayapo. Jayawe, ¿kua uipota ra jei aramoi che ayemingetaiño aiko? Mbaeti etei. Che mbaeti ko ayemingeta che jae wae rupiño. Ndarau etei che jae kía pe mbae ayapo waerä aikuaa rewe chepuereta'ä ayapo yawe.

<sup>18-19</sup>Kërái yarowia katu Tumpa, jukuärái wi pe reta pepuere orererowia katu. Echa'ä che jare Silvano jare Timoteo mbae ndoe yawe pewe, ore nduyemingeta'ä noĩ ambie ye orepia pe. Ore numimbeu kawi pewe Jesucristo Tumpa Tai rewa. Jare

pe reta pikuaa kawi jae jekuaeño uyemingeta añetete wae. Jekuaeño uyapo jae jei uyapota oï wae.

<sup>20</sup>Añetete, opaete Tumpa jei uyapota wae uyeyapo oï Cristo rupi. Jáeramo yandepuere yae, “Jukuärái tuiko,” Tumpa jee uyembutuichaka waerä.

<sup>21</sup>YandeRu Tumpa yandapo ma ñai waerä jaeño mái pewa pëti ramiño Cristo re jare ñaneño tee ma jae imaerä.

<sup>22</sup>Jare Tumpa oñono ma Espíritu Santo yandepia pe uikuaaka waerä yandewe jae imbae ma ko yande reta. Tumpa umbitenonde ma yandewe Espíritu Santo opaete mbaembae ikawi wae jae umeeta oï yandewe wae wi. Jare jukuärái yaikuaa añetete ko pëti ara Tumpa umeeta oï yandewe opaetei jokua mbaembae.

<sup>23</sup>Jayawe tamimbeu pewe marái ramo ra ndeiño a ye apou pepi. Echa’ä pereräkua pochi chewe. Jáeramo a’ä apou pepi jukuärái. Echa’ä jese katu a yawe, aramoi añeengatata aiko pewe, cheiru mii reta. Kua che jae pewe Tumpa jowake añetete rewe.

<sup>24</sup>Ore reta nduipota’ä etei poyokui piyapo waerä Tumpa jei wae kërái pëti patrón peokui wae rami. Ore jaeño nduipota pombori pewata kawi waerä Tumpa ndiwe pekirëi wae rupi, pe reta jeiete piyerowia waerä.

## **2 Corintios 2**

<sup>1</sup>Jáeramo che jae cheyupe ndarau ikawi a waerä chepiatiti rewe jeiete pumbipiatiti waerä.

<sup>2</sup>Echa’ä che pumbipiatiti yawe, jayawe, ¿kía ra umeeta chewe yerowia? Yawaita ko pewe pe reta chembiyerowia waerä che pumbipiatiti yawe.

<sup>3</sup>Jokua jeko pewa ko ndei a ye apou pepi. Jáeramo aikuatía pewe jokua tupapire pumbiarakuaa waerä. Jukuärái che a yawe apou pepi, ndarau chepiatiti peré. Erëi ayerowiata ai kërái imeta ko ayerowia. Jare jukuärái yawe, aikuaa kërái päwe rewe yayerowiata ñai.

<sup>4</sup>Che aikuatía pewe yawe jokua tupapire, aikuatía aiko cheresai rewe jare tuicha chepiatiti rewe. ¡Jasi katu ayao parawete! Erëi mbaeti aikuatía aiko pewe pumbipiatiti waerä. Jaeño aipota aikuaaka aiko pewe che tuicha rupi puau wae.

### **Pablo umbiarakuaa reta jokua kuimbae ikawi mbae uyapo wae rewa**

<sup>5</sup>Añawe che aipota pumbiarakuaa jokua kuimbae mbae ikawi mbae uyapo wae rewa. Añetete cheño’ä chembiatiti. Opaete pe reta wi ko pumbipiatiti jae mbae kachi uyapo wae rupi.

<sup>6</sup>Pe reta piporaraka chupe yawe, jupi wae ko piyapo. Erëi añawe jae ueya ma jokua jeko kachi wae.

<sup>7</sup>Jáeramo ikawi ko pe reta peakañi chupe waerä jare pemikirëi ye waerä Tumpa koti. Awiye ma jekuaeño piporaraka chupe awiye waerä uasaete ipiatiti.

<sup>8</sup>Jáeramo che pumiñera pemimbeu waerä chupe kërái jekuaeño ko peau wae.

<sup>9</sup>Che aikuatía pewe jokua tupapire aikuaa waerä piyapota ra opaete jokua che pumbiarakuaa wae. Erëi añawe aikuaa ma.

<sup>10-11</sup>Jáeramo añawe pe reta pemandua'ä ma yawe jokua kuimbae pe jeko kachi re, che jae nunga wi chemanduata'ä ma chupe jokua re. Kua re imeta ko yayowake ñai awiye waerä ñanerëwa ñai Añawasú pe. Echa'ä yaikuaa kawi ñai mbaembae Añawasú uipota yandekoti wae. Jae jaeño uipota yande yayembiyao ñai waerä yandeyuwi. Jáeramo ime yawe mbae jokua kuimbae uyapo pewe wae jare pe reta pemandua'ä ma chupe yawe, che jae nunga wi chemanduata'ä ma chupe Cristo jowake. Che jaeño aipota ikawi wae pemaerä.

### **Pablo umimbeu chupe reta jae uwata wae rewa**

<sup>12</sup>Jayawe cheiru mii reta, che a tëta wasu Troas pe amimbeu waerä joko pewa reta pe ñee ikawi wae Cristo rewa. Jare añetete yande Ya umee chewe aporomboe waerä joko pe.

<sup>13</sup>Erëi mbaeti chepiawiwe aiko. Echa'ä awäe'ä yanderiwi Tito joko pe. Jae ueruta tëi iko chewe ñee pe reta rewa. Jáeramo che aeya Troas pewa reta jare ayu chuwi reta kua Macedonia koti.

<sup>14</sup>Erëitu orepiakatu noi. Nume yasurupái Tumpa pe, echa'ä jae jekuaeño orembori ndupurumiamiri waerä, echa'ä ore noi pëti ramiño Cristo re ramo. Jare ore rupi opaete kerupi rupi uikuaa ñonoï Cristo rewa.

<sup>15-16</sup>Jare ore numimbeu yawe Cristo rewa ñru wae reta pe, numbiyerowia noi Tumpa kërái mbae utimbo kawi wae yanembiyerowia wae rami. Añetete kua ñee numimbeu noi wae, jae ko mbae utimbo oi wae rami opaete wae reta pewarä. Erëi mbaeti oyowake opaete pewarä. Echa'ä Tatawasurenda koti oo ñonoï wae reta pewarä, oriñee ko jae mbae ine oi wae rami, echa'ä jae reta uipota'ä etei uikuaa Cristo rewa. Erëi jokua tekowe opa mbae wae onoita wae reta pewarä, oriñee ko jae mbae jëe ngatu utimbo wae rami. Kua mbarawiki tuicha ko jare yawái. Orepuere rape'ä nduyapo tëi.

<sup>17</sup>Erëi pëti ramiño noi Cristo re ramo, orepuere nduyapo. Tumpa oreño numimbeu waerä Cristo rewa. Jare jukuärái nduyapo noi ndupurumbitawi mbae rewe Tumpa jowake. Pe reta pikuaa ko jeta wae reta umimbeu ñonoï Tumpa iñee umingana iyupe waeräño. Erëi ore reta jukuärái'ä ko.

## **2 Corintios 3**

### **Yemingeta ipiau wae Tumpa uyapo wae rewa**

<sup>1</sup>Ore reta mbaeti etei ko nduikuatía noi kua mbaembae reta nduyembutuicha waerä perowai. Ani ¿pipota yerá numee waerä pewe pëti tupapire uikuaaka waerä oreré wae? Jukuärái uyapo ñru wae reta. Erëi ore reta nduipota'ä nduyapo jokua. Jae ramiño wi ndarau ndueka pewe pikuatía waerä oremaerä jokua nunga tupapire ñru wae reta uikuaa waerä ore rewa.

<sup>2</sup>Echa'ä oremaerä pe reta etei ko jae jokua tupapire uyekuatía oï wae rami. Echa'ä opaete wae ipuere uecha pereko kërái ikawi oï wae, jare jukuärái rupi jae reta orekuaata oreparawiki ikawi oï Tumpa pewarä. Kua ikawiete oremaerä.

<sup>3</sup>Añetete pe reta ko jae pëti tupapire Cristo etei uikuatía wae rami. Jare kua jae uikuatía pepia re rami etei. Echa'ä ore pomboe Cristo re yawe, Tumpa ikoño mái wae iEspíritu etei umbiambie pereko opaete wae uecha waerä. Kua Tumpa uyapo pepia pe wae ikawiete ko ipotawe tupapire jare tinta wi. Jare ikawiete ko Tumpa arakae uikuatía ita re wae wi.

<sup>4</sup>Kua orepuere ndoe pewe, echa'ä ndorowia katu ore rupi ko Cristo uparawiki pe reta perowia waerä. Jukuärái ore ndoe Tumpa jowake.

<sup>5</sup>Ndorowia'ä etei oreño orepuereta nduyapo mbarawiki Tumpa pewarä. Tumpa ko oremimbaepuere.

<sup>6</sup>Jare Tumpa ko umee ma orewe mbaepuere numimbeu kawí waerä ñru wae reta pe kua ñee – jae ko Tumpa uyapo oï pëti yemingeta ipiau wae iwí pewa reta ndiwe wae. Kua yemingeta ipiau wae ikawiete ko, echa'ä Espiritu Santo wi ko ou ramo jare ueru yandewe tekowe ipiau wae. Ambie ye ko jokua yemingeta arakae Tumpa uyapo Moisés rupi wae wi. Moisés uikuatía opaete mbaembae Tumpa jei chupe wae, këraita ko Israel ñnemoñaá reta yureko wae. Erëi jokua jaëño ueru chupe reta mano, echa'ä uyawi reta Tumpa jei wae ramo.

<sup>7</sup>Yepe tëi Moisés uikuatía wae ueru mano, erëitu yaikuaa ko ikawi iko. Echa'ä Tumpa wi etei ko ou. Añetete Tumpa etei ko uikuatía rani jae jei wae ita re, jare jokua umee Moisés pe imbaepuere jembipete rewe. Jare jokua tembipe upita Moisés jowa re. Jare yepe tëi jokua tembipe ndewe ndewe rupi owe oo iko, erëi Israel ñnemoñaá reta jesapiräta'ä umae waerä jese.

<sup>8</sup>Erëi jikawiete ye ye ko kua yemingeta ipiau wae Espiritu Santo uyapo oï wae!

<sup>9</sup>Echa'ä jokua yemingeta arakae uyapo reta wae, yepe tëi Tumpa imbaepuere jembipete rewe ko uyapo jae reta ndiwe, jese we jaëño ueru chupe reta Tumpa iarasi uyawi reta jae jei wae ramo. Erëi kua yemingeta ipiau wae Espiritu Santo uyapo oï wae rupi Tumpa umae yanderé yandereko mbae wae rami.

<sup>10</sup>Añetete Moisés arakae uikuatía wae omboyowake'ä kua yemingeta ipiau wae, echa'ä yemingeta ipiau wae ikawiete ye ko.

<sup>11</sup>Moisés uikuatía wae, yepe tëi ñneme Tumpa imbaepuere jembipete ye rewe, erëi uasa oo iko. Erëi ikawiete ye ye ko kua yemingeta ipiau wae Espiritu Santo uyapo oï wae, echa'ä ndarau etei opa.

<sup>12</sup>Ore nduikuaa kua ñee ikawiete ye ko. Jáeramo numimbeu opaete wae pe nduipiu mbae rewe.

<sup>13</sup>Nduyapo'ä Moisés uyapo rami. Echa'ä jae umbiyasoí jowa tarapo pïpe awiye waerä Israel ñnemoñaá reta uecha kërái jowa jembipe wae owe oo iko.



<sup>14</sup>Erëi Israel inemoñaeta reta ipiatäta yureko. Uikuaa'ä reta jokua yemingeta Tumpa arakae uyapo jae reta ndiwe wae opata iko wae. Jare jukuärái ko jae reta añawe rewa. Echa'ä añawe rupi awe jae reta umingeta yawe Moisés arakae uikuatía wae, imeño uikuaa kawi'ä reta. Jae reta iyarakuaa imeño uyakasoi oï tarapo pe wae rami, kërái Moisés jowa tarapo pe umbiyasoi rami. Echa'ä jae reta wirowia Cristo re yaweño ko ipuere iyarakuaa uyepea.

<sup>15</sup>Añetete jae parawete reta añawe rewa umingeta yawe Moisés uikuatía wae, iyarakuaa imeño uyakasoi oï wae rami ko.

<sup>16</sup>Echa'ä kía uyerowa yandeYa koti yaweño ko uyepeata jokua iyarakuaa uyakasoi oï wae.

<sup>17</sup>YandeYa jae ko Espíritu. Jare ime yawe kía yandeYa iEspíritu onoi wae, ndarau ma iyarakuaa uyakasoi oï wae rami.

<sup>18</sup>Jare jukuärái ko yande reta. Tenonde yawe yaikuaa'ä yaiko yandeYa. Yandearakuaa uyakasoi ikose rami. Erëi añawe yandearakuaa uyepea ma, jare añawe yaecha kawi ma yandeYa kërái ikawiete ye ko. Jare ñamae yawe yandeYa koti, ndewe ndewe rupi yandeYa iEspíritu jekuaeño yanembiambie oï yandereko oya katu oo waerä yandeYa jeko re. Jare jukuärái yande rupi iru wae reta ipuere uecha yandeYa kërái ko jae wae.

## 2 Corintios 4

### Ñanepiräta'ä wae rupi uyekuaa Tumpa imbaepuere

<sup>1</sup>Jáeramo ore orekueri'ä etei. Echa'ä Tumpa oreparareko jare umee orewe nduyeyokui waerä chupe.

<sup>2</sup>Ore nduyapo'ä etei wiari rupi mbaembae kachi wae mara pewa. Ndupurumbitawi'ä. Jare ndorowa'ä wi Tumpa inee. Ore jaeño numimbeu noï añetete wae. Kua nduyapo Tumpa jowake opaete wae uikuaa waerä orereko.

<sup>3</sup>Amokue wae reta pe jokua ñee ikawi wae numimbeu wae yawái. Erëi jaeño ko Tatawasurenda koti yuraa ñonoï wae reta pewarä jukuärái.

<sup>4</sup>Jae reta wirowia'ä, echa'ä pítumimbi pe yureko reta rami. Echa'ä kua iwi iya – jae ko Añawasú – umipítumimbi ma iyarakuaa awiye waerä jae reta uikuaa kawi ñee ikawi wae Cristo rewa. Jokua jeko pewa jae reta uikuaa'ä kërái Cristo ikawiete ye ko jae jae ko Tumpa etei wae.

<sup>5</sup>Ore mbaeti ko numimbeu ore rewaño. Numimbeu ko Jesucristo rewa kërái jae ko opaete mbaembae iYa. Ore parawete reta numae oriyé pewe nduyeyokui wae retaño ko, Jesús nduau ramo.

<sup>6</sup>Nduyembutuicha'ä etei, echa'ä Tumpaño ko umbiyekuaa tembipe pítumimbi wi. Jare Tumpa etei ko umbiembipe yandepia pe yaikuaa kawi waerä kërái Cristo rupi etei ko uyekuaa Tumpa imbaepuere jembipete ye wae.

<sup>7</sup>Ore parawete reta orepiräta'ä noï. Erëi Tumpa umee orewe kua mbarawiki ikawiete wae. Jae ko kía umbiru oï mbae ikawiete wae pëti yambii oyi kawi mbae wae pe rami. Erëi jukuärái ko uyekuaa waerä ore rupi ipotawe mbaepuere nonoi wae Tumpa wi ko ou. Ou'ä ko orewi.

<sup>8</sup>Jayawe yepe tëi opaño mbaembae nduiporara noï, erëi jeseuwe mbaeti nuñemiamirika noï. Jeta wese ime yembiawái orewe, jare ore nduikuaa'ä mbae nduyapo waerä. Erëi jeseuwe orepiakatu noï.

<sup>9</sup>Jeta wese ïru wae reta uiporaraka tëi orewe, erëi Tumpa orereya'ä etei. Jae reta uipota tëi opaetei ore yukaka, erëi ipuere'ä reta.

<sup>10-11</sup>Opaete kerupi ndoo wae rupi oremumburu ore yuka reta waerä kërái Jesucristo pe uyeyapo wae rami. Añetete ore jekuaeño nduyendu mano oreáramo oï wae echa Jesús pe nduyeyokui ramo. Erëi kua jaekawi oï orewe, echa'ä jokoropiño ko uyekuaa kërái Jesús ikowe ye wae umimbaepuere oï orerete kua iwi pewa.

<sup>12</sup>Jukuärái ko ore parawete reta, mano orepisi seri ma oï rami. Erëi jokua mbae'ä ko orewe, echa'ä jokua nduiporara wae rupi pe reta piyekou peï tekowe opa mbae wae re.

<sup>13</sup>Jayawe ore jekuaeño numimbeu noï Tumpa rewa. Echa'ä jokua ndorowia wae oyowake oï Tumpa ñeeriru pe uyekuatía oï wae ndiwe. Echa'ä joko pe uyekuatía oï kuärái: “Che arowia Tumpa re. Jáeramo amimbeu jesewa,” jei.

<sup>14</sup>Jare wi ore nduikuaa Tumpa orembijekowe yeta oï umanokue wae reta ipite wi. Jukuärái Tumpa uyapo yandeYa Jesús pe, jare jukuärái wi jae uyapota oï orewe. Jare pewe reta wi jae uyapota oï jukuärái. Echa'ä päwe rewe jae yandereraata oï Jesús jowai yayekou waerä jae ndiwe.

<sup>15</sup>Jukuärái ko opaete kua mbaembae reta ore nduiporara noï wae ikawita oï pemaerä. Ore nduipotaete jekuaeño jeta wae reta uikuaa waerä Tumpa ipiakawi. Echa'ä jukuärái yawe, jeta wae reta umeeta yasurupái Tumpa pe, jare Tumpa jee uyembutuichakata oï.

### **Yanderete ipiau wae re yayekouta ñai ara pe**

<sup>16</sup>Jáeramo jokua jeko pewa orekueri'ä etei. Yepe tëi orerete ndewe ndewe rupi umano oo oï, erëitu Tumpa opa ara rupi orerekowe umbipiau oï.

<sup>17</sup>Añetete kua mbaembae añawe nduiporara noï wae, opata ko. Jare Tumpa umiñatimata oï orewe jokua re. Jare jokua ara numaeta noï jokua mbaembae reta nduiporara nduiko wae re mbae'ä etei iko jare ima'ä etei iko wi. Echa'ä Tumpa umiñatimata oï orewe wae ikawiete ye ko jare ndarau etei opa.

<sup>18</sup>Jáeramo ore numae'ä mbaembae uyekuaa oï wae reño – jae ko mbaembae kua iwi pewaño. Ore numae mbaembae uyekuaa mbae wae re – jae ko mbaembae ara pewa re. Echa'ä mbaembae uyekuaa wae opata oï. Erëi jokua mbaembae uyekuaa mbae wae ndarau etei opa.

## 2 Corintios 5

<sup>1</sup>Yande yaikuaa yanderete kua iwi pewa opata ko. Jae ko pëti tëta ima'ä iko wae rami. Erëi yanderekowe opa yawe kua iwi pe, Tumpa umeeta yandewe yanderete ipiau wae. Jare jokua ndarau etei opa, echa'ä ara pewa ko. Kua iwi pewa'ä ko.

<sup>2</sup>Añawe rupi yaipota echa ma ñanoi yanderete ara pewa. Jáeramo amo rupi jokua re ñaneañeki tēi parawete.

<sup>3</sup>Echa'ä yaipota'ä ñaneä upita waerä jukuäraiño ñamano ma yawe.

<sup>4</sup>Añetete, añawe rupi kua yanderete pe yaiko rambuewe, yaiporara jare ñaneañeki. Erëi mbaeti ko yaipota ñamano ramo jare opa waerä yanderete kua iwi pewa ramo. Mbaeti ko jokua. Jaeño yaipota ñanoi yanderete ipiau wae jare opata mbae wae, echa'ä jokua yanderete ndiwe ma ñai yawe, ndarau ye ñamano.

<sup>5</sup>Tumpa etei ko yandapo yayekou waerä kua re. Jare Tumpa umbitenonde ma yandewe Espiritu Santo uikuaaka waerä yandewe yayekouta ñai taikuate rupi yanderete ipiau wae re.

<sup>6</sup>Jáeramo ko ñañemiatangätu ñai. Yande yaikuaa kua iwi pe ñai rambuewe, ndeiño ñai yandeYa ndiwe etei.

<sup>7-8</sup>Erëi ñañemiatangätu ñai, echa'ä yaikuaa ko pëti ara kua yanderete iwi pewa yaeyata ñai yaiko waerä yandeYa ndiwe etei ara pe. Jare jokua ko jae yaipota echa ma tēi ipotawe mbae wi ñanoi waerä. Jare añawe rupi, yepe tēi yaecha'ä ñai Cristo, erëitu yaiko'ä mbaembae yandepuere yaecha wae rupiño. Yaiko ko yarowia rewe mbaembae yaecha'ä wae re.

<sup>9</sup>Jáeramo jekuaeño yaipota yambiyerowia yandeYa ipotawe kiape ñai wae rupi – jae ko kua yanderete pe ñai rambuewe, jare jae ndiwe ma ñai yawe wi.

<sup>10</sup>Echa'ä pëti ara Cristo uwapita iwapia mburuwicha wasu pewa re, jare opaete wae yayemboita ñai jae jowai. Jare jokua ara jae umiñatimata oï yandewe pëti pëti pe kua iwi pe yaiko rambuewe yayapo wae re. Jae umiñatimata yandewe ikawi wae yayapo wae re jare ikawi mbae wae yayapo wae re.

### **Pablo iparawiki ko jae umbipiakatu waerä jeta wae reta Tumpa ndiwe**

<sup>11</sup>Jayawe kua mbaembae reta nduikuaa ramo, nduipiu yandeYa wi, jare nduipota tēi ndorowiaka opaete wae pe yandeYa re. Tumpa uikuaa jokua añetete ko ore rewa. Kërái moná pe reta pikuaa wi.

<sup>12</sup>Ore ndoe ye pewe kua: Mbaeti etei nduikuatía noï kua mbaembae reta nduyembutuicha waerä perowai. Jaeño ko ore nduipota pe reta piyerowia katu waerä oreré. Echa'ä ore nduikuaa ime pepite pe uyembutuicha wae reta. Jae reta jaeño uyembutuicha mbaembae uyekuaa wae reño, jare mbae'ä chupe reta mbaembae ikawi wae ime tēi ipia pe oï wae. Erëi pe reta piyerowia katu peï yawe oreré, pikuaata mbae pere waerä orepepika pe jokua uyembutuicha wae reta pe.

<sup>13</sup>Jae reta umae oreré oreäka kawi'ä oï wae rami. Erëi jukuärái'ä ko. Ore reta jaeño nduipota nduyeyokui Tumpa pe. Ìru wae reta umae oreré orearakuaa katu wae ko ore wae. Jare jukuärái yawe, jukuärái ko noï ikawi waerä pewe. Erëi ipotawe mbae jei reta oreré wae, oremaerä mbae'ä ko.

<sup>14</sup>Echa'ä ore nduikuaa Cristo yanderauete ko, jare jokua oremiatangätu oï. Echa'ä nduikuaa Cristo umano yanderé. Jáeramo opaete yande ñamano rami wi ko yandereko indechikue wi.

<sup>15</sup>Jare Cristo umano ma yawe yanderé, ikowe yewi umee waerä yandewe tekowe ipiau wae, jare jukuärái yande yaiko waerä jae imaerä – mbaeti ma ko yande yae wae rupiño yaiko waerä.

<sup>16</sup>Jáeramo añawe wiwe ndarau ye ma numae kía re awe ipotawe kía kua iwi pewa japicha re umae wae rami. Jukuärái wi numaese Cristo re. Erëi añawe mbaeti ye ma jukuärái nduyapo.

<sup>17</sup>Jayawe ime yawe kía pëti ramiño oï Cristo re wae, jae ko Tumpa jembiaipo ipiau wae. Jae jeko indechikue uasa ma. Mase, añawe jae ko ipiau wae.

<sup>18-19</sup>Jare Tumpa ko uyapo opaete kua. Yepe tëi yande reta yayowaichose yaiko Tumpa koti, erëi jae yandeapikatu ma jae ndiwe etei Cristo rupi. Jare añawe Tumpa umee ma yandewe yamimbeu waerä ìru wae reta pe kërái jae reta ipuere waerä uyeapikatu Tumpa ndiwe. Kua ñee jae ko kuärái: Opaete yande kua iwi pe yaiko wae reta yayawi ma Tumpa koti jare teko pe ma ñai jae jowai. Erëi Tumpa uyapo ma kërái rupi yandepuere waerä yayeapikatu jae ndiwe etei – jokua ko jae Cristo uyapo yandewe wae rupi. Jare añawe kía wirowia Cristo re yawe, ndarau ye Tumpa umbijeko mbaembae uyawi ikoti wae re.

<sup>20</sup>Jáeramo Cristo oremondo jae jee re, jare ore rupi Tumpa umiñera oï iwi pewa reta uyeapikatu waerä jae ndiwe. Jáeramo ore pumiñera Cristo jee re pe reta piyeapikatu waerä Tumpa ndiwe.

<sup>21</sup>YandeYa Cristo uyapo'ä etei ko mbae kachi wae. Erëi Tumpa uiporaraka chupe opaetei mbaembae kachi yayapo wae re Cristo etei jokua mbaembae uyapo wae rami. Jukuärái Tumpa uyapo yandepuere waerä ñai kawi jae ndiwe yandereko mbae wae rami Cristo uyapo yandewe wae rupi.

## **2 Corintios 6**

<sup>1</sup>Ore nduparawiki noï Tumpa pewarä, jare jukuärái pumiñera awiye waerä piyuwangaiño Tumpa ipiakawi re.

<sup>2</sup>Echa'ä Tumpa jei yandewe iñeeriru pe kuärái: “Ou yawe uwäe jokua ara ikawi wae, che ayapisaka nderé. Jare ou yawe uwäe jokua ara nduepi waerä wae, che nombori.” Jukuärái Tumpa jei. Mase, añawe kua ko jae ara ikawi wae. Añawe ko jae ara Tumpa yanderepi waerä.

**Kërái Pablo uyeyokui Tumpa pe wae rewa**

- <sup>3</sup>Ore nduipota'ä kiawe umbijeko waerä oreparawiki Tumpa pewarä wae. Jáeramo nduyandareko kawi oriyé awiye waerä numbiawái kiawe Tumpa koti.
- <sup>4</sup>Opaete mbaembae rupi nduechaka kërái ore ko jae Tumpa pe nduyeyokui wae reta. Echa'ä jekuaeño numiawäta orepiawasú rewe mbaeporara reta, jare mbaesusere reta, jare yembiawái reta.
- <sup>5</sup>Numiawäta wi ñenupa, oreñoño peresoriru pe wae, jare tekorái uyapo reta orekoti wae. Jare ore nduikuaa mbarawiki täta wae, jare topei, jare yembai.
- <sup>6</sup>Erëi jesewe ore nduiko kawi orearakuaa katu rewe kërái Tumpa uipota wae rupi. Ndurupia opaete wae pe jare nduau reta. Espiritu Santo oremimbaepuere, jare ore nduiparareko opaete wae añetete pewa.
- <sup>7</sup>Tumpa imbaepuere rupi ore numimbeu ñee añetete wae. Jare Tumpa umae oreré orereko mbae wae rami ramo, orepuerete nduyerepi mbae ikawi mbae wae wi. Añetete ore ko jae sindaro täta uipisi oï ikisepuku jare iyeyopiaka wae rami. Jukuärái nduechaka opaete wae pe nduyeyokui ko noi Tumpa pe wae.
- <sup>8</sup>Amokue wae reta umae kawi oreré. Erëi iru wae reta orereriro. Amokue wae reta oremieräkua kawi. Erëi iru wae reta oremieräkua pochi. Jeta wae reta umae tõi oreré ndupurumbitawi noi wae echa, erëi jekuaeño ore nduyemingeta añetete wae.
- <sup>9</sup>Orekuaa reta opaete rupi, erëi jeta wae reta orekuaa mbae echa umae oreré. Amo pe numano pota echa nduiko parawete, erëi, mase, imeño nduiko. Yepe tõi orembipiu reta, erëi ndeiño oreyuka reta.
- <sup>10</sup>Amo pe orepiatiti noi, erëi jesewe nduyerowia wi. Oreparawete wae ko, erëitu ore numbiikokatu jeta wae reta Tumpa koti. Jeta wae reta umae tõi oreré mbaeti nonoi mbae awe wae echa. Erëitu añetete opaete mbaembae ara pe oï wae orepo pe oï.
- <sup>11</sup>Pe oreiru Corinto pewa reta, ore numinguee ma orepia pekoti nduau ramo, jare nduyemingeta ma pewe añetete rewe.
- <sup>12</sup>Jayawe pe reta mbaeti yawe peï kawi ore ndiwe, pe reta ko penoi teko. Pembiete ko peï orewe orerau wae.
- <sup>13</sup>Peminguee mii pepia orekoti wi kërái ore numinguee orepia rami. Kuärái che pumingeta puau rewe chesambiai mii reta rami.

### **Yayandareko kawi yandiyé mbae ikawi mbae wae wi**

- <sup>14</sup>Awiye piñemuñuta Cristo re wirowia mbae wae reta ndiwe. Echa'ä ¿këraita pa mbae jupi uyapo wae ipuere uñemiiru kawi mbae ikawi mbae uyapo wae ndiwe? Jare ¿këraita pa tembipe jare pitumimbi ipuere waerä yureko päwe?
- <sup>15</sup>¿Cristo uñemiiru yerá Añawasú ndiwe? Mbaeti etei. Jayawe, ¿këraita pa Cristo re wirowia wae reta ipuere uñemiiru kawi wirowia mbae wae reta ndiwe?
- <sup>16</sup>¿Këraita ra kía oñoño yawe tumparaanga reta tupao wasu japipe? Ndarau ikawi. Jare yande reta ko jae jokua tupao wasu rami, echa'ä Tumpa imeño mái iko wae

yandepite pe oï ramo. Jukuärái jei Tumpa ñeeriru pe. Echa'ä joko pe Tumpa jei yandewe kuärái: “Che aikota jare awatata cherëtara reta ndiwe. Che aikota jae reta iTumparä, jare jae reta yurekota chemaerä,” jei.

<sup>17</sup>Jae nunga wi yandeYa jei yandewe kuärái: “Jáeramo pe cherëtara mii reta, pesiri mbae ikawi mbae uyapo wae reta wi. Piyembisiri chuwi reta. Awiye pepia pemingia mbae ikawi mbae wae piyapo wae rupi. Jare che amae kawita peré.

<sup>18</sup>Che aikota peRurä, jare pe reta pikota cherairä jare cherayirä.” Jukuärái jei yandeYa imbaepuerete wae.

## 2 Corintios 7

<sup>1</sup>Opaete kua mbaembae Tumpa uikuaaka ma yandewe jae uyapota oï. Jáeramo cheiru puau mii wae reta, yamombota ko yandeyuwi ipotawe mbae yandererukachi Tumpa koti wae – jae ko mbae ikawi mbae yayapo yandepia pe wae jare yanderete pe wi. Yandereko toya katu too jupi wae re Tumpa wi yaipiu ramo.

### Pablo uyerowia Corinto pewa reta uyapo wae re

<sup>2</sup>Pipea mii pepia orekoti. Ore parawete reta nduyapo'ä etei mbae ikawi mbae wae kía pe awe. Ndurukachi'ä etei kiawe teko kawi wi. Jae nunga wi ndupurumbitawi'ä etei.

<sup>3</sup>Kua jae'ä ai pewe pumbijeko waerä. Echa'ä che jae ma pewe kërái ore puauete wae. Jare numano yawe ani imeño nduiko yawe, jekuaeño puaueteta noi.

<sup>4</sup>Che arowia che chepuere ayemingeta pewe añetete rewe. Che ayerowia katu ai peré. Jare jokua pereräkua chewe wae chembiyerowia wi. Jáeramo yepe tēi ore tuicha nduiporara noi kua pe, erēi che ayerowiaete ai.

<sup>5</sup>Añetete, ore ndoyu nuwäe yawe kua Macedonia pe, orepuere'ä etei nduputuu kawi. Echa'ä ime iko opaño kërái rái yembiawái reta. Jeta wae reta orembowaicho yureko, jare jokua re ore parawete nduyembipia'ä.

<sup>6</sup>Erēi Tumpa umbipiakatu ipiatiti wae reta. Jare jukuärái jae orembipiakatu ombou yawe Tito orepi.

<sup>7</sup>Jare mbaeti orepiakatu jokua reño. Orepiakatu wi nduikuaa yawe kërái pe reta pembipiakatu Tito. Jae imiäri orewe kërái pe reta pipotaete cherecha ye, jare kërái pipotaete chembiyerowia, jare kërái pepiatitiete pei jokua mbae uasa pepite pe wae re. Jáeramo kua che ayandu yawe, ayerowiaete apita.

<sup>8</sup>Che aikuaa jokua tenonde aikuatía pewe wae pembipiatiti ko. Jare jokua re che chepiatiti aiko wi. Erēitu che aikuaa ai jaekawi ko araaka pewe jokua tupapire. Añetete pepiatiti piko jokua kuatía rupi jae pewe wae jeko pewa. Erēi jokua michi pewaño ko.

<sup>9</sup>Jare añawe che ayerowia ai. Erēi mbaeti ayerowia ai pepiatiti ramoño. Ayerowia ai, echa'ä jokua mbiatiti jeko pewa peya pepiyemingeta jupi mbae wae. Jokua

nunga mbiatiti ikawi oï Tumpa pewarä. Jayawe che ayapo'ä mbae ikawi mbae wae pewe pumbipiatiti yawe.

<sup>10</sup>Añetete, ime yawe kía ipiatiti oï jae Tumpa koti uyawi ramo, jare jokua jeko pewa ueya yawe ipiayemingeta jupi mbae wae jokua jae uyawi wae rewa, jokua nunga mbiatiti Tumpa umbiyerowia. Jare kua re ndarau kiawe ipiatiti upita, echa'ä jokua ueruta chupe tekowe opa mbae wae. Erëi ime mbiatiti ambie ye wae. Jae ko mbiatiti kua iwi pewaño. Kua nunga yaecha kía ipiatiti oï yawe Tumpa koti uyawi ramo, erëi ueya'ä ipiayemingeta jupi mbae wae jokua jae uyawi wae rewa. Kua nunga mbiatiti jaeño ueru yandewe mano – jae ko yembisiri Tumpa wi jaeño mái pewa Tatawasurenda pe.

<sup>11</sup>Erëi aikuaa ko pe reta pepiatiti piko jokua piyawí wae re kërái Tumpa uipota wae rupi. Mase kërái etei añawe jokua pepiatiti piko wae jeko pewa opa piyepikatu jare pekirëi pechaka peï mbaeti ma teko penoi. Mase kërái etei uyekuaa ma pipiu waerä Tumpa wi, jare kërái etei pechaka peï pipota piyapo jupi wae. Mase kërái etei pekirëiete cherecha ye waerä. Opaete kua mbaembae rupi pikuaaka peï mbaeti etei ma ko penoi teko jokua uyeyapo pepite rupi wae re.

<sup>12</sup>Che aikuatía araaka pewe yawe, mbaeti aikuatía jokua kuimbae mbae ikawi mbae wae uyapo chewe wae jeko pewa. Aikuatía ko pewe pe reta pikuaa waerä Tumpa jowai kërái ko peï orepepika pe wae.

<sup>13</sup>Jukuärái uyekuaa ma orewe jare jokua orembipiakatuete. Jare ore nduyerowia noï wi kërái Tito ou pewi uyerowia rewe ramo, echa'ä pe reta pemikirëi piau ye.

<sup>14</sup>Tenonde yawe che chemiäri kawi ma Tito pe peré, jare pe reta chemimaraka'ä wi jokua re. Jokua Tito pe chemiäri peré wae añetete ko, kërái opaete mbae ore ndoe pewe wae añetete ko wi.

<sup>15</sup>Jare Tito imandúa kërái pe reta piyapo jae jei pewe wae re, jare kërái pembiasa kawi pipiu rewe. Jáeramo añawe Tito jeiete perau oï.

<sup>16</sup>Jare che wi ayerowiaete, echa'ä añawe arowia katu ai peré opaete mbaembae re.

## 2 Corintios 8

### Pablo umikirëi reta umbati waerä yembori ñru hermano reta pewarä

<sup>1</sup>Añawe hermano mii reta, ore nduipota numimbeu pewe hermano reta kua iwi Macedonia pe ñonoï wae rewa. Kerupi rupi uyembati ñonoï wae rupi uyekuaa oï kërái Tumpa ipiakawi oï chupe reta wae.

<sup>2</sup>Echa'ä yepe tõi uasa ñonoï yembiawái rupi jare uiporaraete ñonoï, erëitu jae reta jekuaeño uyerowiaete ñonoï yandeYa koti. Jare yepe tõi iparawete reta, erëi jokua mbowiño onoi wae wi etei jae reta jeta umee yuapi ye ñonoï ombori waerä ñru hermano Cristo re wirowia wae reta.

<sup>3-4</sup>Jeräkua chupe reta Cristo re wirowia wae reta iwi Judea pewa ikuasi ñonoï. Jare jeräkua chupe reta wi kërái ñru hermano reta ikotiätia wi omondo ñonoï chupe reta

yembori. Jayawe kua Macedonia pewa reta oreminiñera ipuere waerä wi omondo chupe reta yembori. Jare jukuärái uyapo reta kía jei mbae chupe reta rewe. Che chepuere aikuaaka pewe kërái jae reta umee ipuere wae rupi jare uasa ye umee reta.

<sup>5</sup>Añetete, uasa ye uyapo reta ore ndorowia uyapota yureko wae wi. Echa’ä tenonde uñemee reta yandeYa pe umbiyerowia waerä kërái Tumpa uipota wae rami. Jare joko wi uñeñono reta uyapo waerä ore ndoe wae. Jukuärái ko uyapo kua Macedonia pewa Cristo re wirowia wae reta.

<sup>6</sup>Jáeramo ore numikirëi Tito oo ye opou waerä pepi ipuere waerä opa uyapo jokujae umbipi wae. Echa’ä pe reta pikuaa kuee yawe jae etei umbipi pemikirëi pembati waerä pëti yembori mii peraaka waerä pepiakawi rewe wae.

<sup>7</sup>Pe reta perowia kawi Cristo re. Jare ikawiete ko peporomboe. Jeta mbaembae pikuaa. Peratangäute Tumpa koti. Jare orerauete wi. Opaete kua mbaembae rupi piyechaka kawi ma pei. Jáeramo pechaka mii wi kërái pepiakawiete ko kua pemeeta wae rupi.

<sup>8</sup>Kua che jae pewe wae rupi mbaeti ko aporoyokui ai. Jaeño aipota aikuaa añetete ra pepuruau pei. Pe reta pipota peporombori yawe kua Macedonia pewa reta oporombori ma rami, jayawe jukuärái aikuaata pepuruau añetete ko.

<sup>9</sup>Echa’ä pikuaa kawi ko kërái yandeYa Jesucristo uikuaaka ipiakawi wae ko. Jae ikokatuete ko, echa’ä opaete mbaembae ara pewa jae imbae ko. Erëi jae perauete ramo, ueya opaete jokujae mbaembae reta ou waerä kua iwi pe. Jukuärái jae uyembiparawete pe reta pikokatu waerä Tumpa koti.

<sup>10-11</sup>Jayawe, kua rewa che pumbiarakuaa kuärái: Ikawi ko opa piyapo waerä jokujae kuee año pembipi piyapo wae. Pe reta rani ko tenonde pekirëi ngatu peporombori waerä. Jare pe reta rani ko pembipi tēi yembori mii pembati peraaka waerä. Añawe ikawi ko jokujae opa piyapo waerä. Peme mii pepuere wae rupi pechaka waerä kërái jekuaneo pekirëi ngatu peporombori waerä.

<sup>12</sup>Jare kua jekuaneo toi päka pe: Yandepuere wae rupi yayerowia rewe ñamee yawe, jokujae umbiyerowia Tumpa. Tumpa jei’ä yandewe ñamee waerä jokujae mbaeti ñanoi wae.

<sup>13</sup>Che kua pe jae’ä ai pikulasi pei waerä jare iru wae reta yureko kawi waerä pewi.

<sup>14</sup>Jaeño aipota oyowake pei waerä. Añawe pe reta jeta penoi wae wi pepuere pembori iru ikuasi ñonoi wae reta. Jae ramiño wi jae reta jeta onoi yawe, ipuereta pembori wi pe reta pikulasi pei yawe. Jukuärái opaete wae oyowake oita

<sup>15</sup>kërái uyekuatía oi wae rami. Echa’ä uyekuatía oi kuärái: “Jeta omonoo iyupe wae jembire’ä, jare mbowiño omonoo iyupe wae uata’ä wi.” Jukuärái uyekuatía oi.

### **Tito jare iwatairu reta rewa**

<sup>16</sup>Che chepia’ä ai peré. Jare amee yasurupai Tumpa pe Tito ipia’ä oi rambuwe peré wi.



<sup>17</sup>Ore numikirēi Tito oo waerā opou pepi, jare chupewarā ikawi iko jokua. Erēi mbaeti jae oo oī ore ndoe chupe ramoño. Jae oo oī jae etei ikirēi oo ramo.

<sup>18</sup>Jare ore nomondo noī pekoti mokui yanderiwi reta Tito ndiwe. Pēti jae ko opaete kerupi rupi hermano reta uyemingeta kawi jese wae. Echa’ā jae umimbeu kawi ñee ikawi wae Cristo rewa.

<sup>19</sup>Jare jae nunga wi opaete hermano reta kerupi rupi uyembati reta wae uiparawo wi kua yanderiwi oremiiru waerā ore nduraa waerā yembori Jerusalén pe. Kua mbarawiki nduyapo noī Tumpa jee uyembutuichaka waerā, jare nduechaka waerā wi kērāi añetete ore nduipota ndoporombori noī.

<sup>20</sup>Yembori jeta ko aipo nduraata noī. Jayawe kua yanderiwi oremiiruta oī jokua nduraa waerā. Jare jokua jaekawi oī orewe, echa’ā nduipota’ā kiawe kua yembori re orembijeko waerā.

<sup>21</sup>Ore nduipota nduyapo jupi wae opaete wae jowake – mbaeti yandeYa jowakeño.

<sup>22</sup>Jare jae reta ndiwe nomondo noī wi iiru yanderiwi. Kua yanderiwi jeta ma uechaka orewe jae jatangātu wae opaete mbaembae uyapo waerā. Jare añawe jae uipotaete oo pombori waerā, echa’ā jae wirowia katu peré piyapo kawita peī jokua pere piyapota peī wae.

<sup>23</sup>Jare ime yawe kía upirandu pewe Tito re wae, pere chupe: “Jae ko Pablo iiru uyeyokui Tumpa pe wae, jukuärāi ore nduyekou waerā Tumpa ñee re,” pere chupe. Jare kía upirandu yawe kua mokui yanderiwi reta re, pemimbeu chupe jae reta ko kerupi rupi uyembati Cristo re wirowia wae reta ombou wae. Jare jae reta rupi Cristo jee uyembutuichaka oī.

<sup>24</sup>Jáeramo che tae pewe pechaka waerā Tito jare kua iwatairu reta pe kērāi peau wae. Jukuärāi piyapo yawe, jeräkuata iiru wirowia Cristo re wae reta pe añetete ko ore numimbeu kawi ma chupe reta pe rewa.

## 2 Corintios 9

### Yembori Cristo re wirowia wae reta pewarā

<sup>1</sup>Che aipota pumbiarakuaa ye kērāi pombori waerā jokua hermano Cristo re wirowia wae ikuasi ñonoī wae reta. Erēi añetete kua pikuaa kawi ma ko aikuatía mbae pewe rewe.

<sup>2</sup>Echa’ā che aikuaa pe reta pipotaete piyapo, jare jokua re che amimbeu kawi ma peré kua Macedonia pewa reta pe. Che jae chupe reta kuärāi: “Jokua Corinto pewa reta, pēti año ma oī uipotaete oporombori reta,” jae chupe reta. Jare jae reta uikuaa yawe pipota peporombori wae, jayawe jae reta ikirēi wi oporombori.

<sup>3</sup>Erēi che amondo aī pewe kua yanderiwi reta, jae reta ndiwe piyapikatu waerā jokua yembori peraaka waerā kuri. Echa’ā che amimbeu ma opaete wae pe ayerowia rewe piyapo peī jukuärāi, jare aipota’ā ñemimaraka pe cheritika waerā.

<sup>4</sup>Aramoi amokue kua Macedonia pewa reta yuraata che ndiwe che a yawe pepi. Jare ore ndoo ma nuwäe yawe pepi, jare aramoi pe reta pembati'ä yawe yembori, jayawe oremarata ndupita. “Yarowia katu tēi ma jese reta,” ndoeta. Jare pe reta wi pamarata pepita.

<sup>5</sup>Jáeramo chepia pe ayemingeta: “Ikawi ko yanderiwi reta yuraa waerä tenonde Corinto pe. Jukuärái jae reta ipuereta ombori joko pewa reta opa umbati reta waerä jeta yembori tenonde yawe jei umeeta yureko wae.” Jukuärái ko chepiayemingeta, echa'ä aipota uyekuaa waerä che a yawe pepi kērái pekirēi rewe pemee wae – mbaeti ko kía jei pewe ramoño.

<sup>6</sup>Pemandúa kua re: Kía jeta'ä umaeti wae, jetata'ä umbaewiro wi. Jare kía jeta umaeti wae, jetata umbaewiro wi.

<sup>7</sup>Jayawe pēti pēti tumee ipia jei wae rupi. Awiye kía tumee jakatēi rewe jare kía jei chupe ramoño. Echa'ä kía uyerowia rewe umee wae, jokuia Tumpa umbiyerowia.

<sup>8</sup>Tumpa imbaepuerete ko. Jare jae ipiakawi rupi ipuerete uyapo pewe piyekou waerä jeta mbaembae re. Jare jukuärái ndarau uata pewe mbae awe, jare jokuia penoi wae wi pepuereta jekuaeño peporombori ipotawe mbaembae ikawi wae rupi.

<sup>9</sup>Añetete ko, kía umee uyerowia rewe wae, ikota kērái uyekuatía oï Tumpa iñeeriru pe wae rami. Echa'ä joko pe jei kuärái: “Ime yawe kía jeta ombori iparawete reta wae, jupi wae ko uyapo. Jare Tumpa jaeño mái pewa imanduata oï jese.” Jukuärái uyekuatía oï.

<sup>10</sup>Tumpa ko umee yandewe yanderemitirä ñañoti waerä jare yanderembiurä yau waerä. Jare jae ko umeeta oï pewe opaete mbaembae uata oï pewe wae. Jare jokuiaño'ä ko. Jae umbijetata oï pewe mbaembae ime penoi wae, jukuärái pepuere waerä pembori ñru wae reta ipotawe mbae ikawi wae rupi.

<sup>11</sup>Jukuärái pe reta penoita opaete mbaembae ikawi wae pepuere jeta pemee waerä. Jare ore nduraa yawe ñru wae reta pe jokuia pemeeta wae, jae reta umeeta yasurupái Tumpa pe jokuia re.

<sup>12</sup>Jayawe kua mbae piyapota wae rupi uyeyapota oï mokui mbae ikawi wae. Tenonde jokuia wirowia Cristo re wae reta Jerusalén pe ñonoï wae uyemborikata ñonoï. Jare joko wi jae reta umeeta ñonoï yasurupái tuicha Tumpa pe.

<sup>13</sup>Añetete jae reta uecha yawe jokuia jeta yembori peraakata chupe reta wae, jae reta umbutuichata Tumpa jee. Jare uikuaata reta pe reta perowia ma ko añetete rewe ñee ikawi wae Cristo rewa, jare mbaeti ko peyuru peño piyeyokui peï Tumpa pe.

<sup>14</sup>Jare jae reta uyerureta Tumpa pe peré perau rewe, Tumpa ipiakawi uyekuaa peré ramo.

<sup>15</sup>Yasurupái Tumpa pe mbae ikawiete ye umee yandewe wae re! Yandepuere rape'ä opa ñanemiäri jese.

## 2 Corintios 10

## Pablo uepi iparawiki

<sup>1-2</sup>Amokue pepite pe ñonoï wae reta jei: “Pablo yande ndiwe oï yawe, uñemimichi. Erëi ikotiã oï yawe, uyemingeta yandekoti uipiu mbae rewe,” jei reta. Jae reta wirovia tõi ore nduiko kua iwi jeko rupiño. Jáeramo che a awäe pepi yawe, imeta ko aipo ambieta chupe reta aipiu mbae rewe. Erëi kërái yandeYa Cristo uñemimichi jare uyembutuicha’ã etei, jukuärái wi che añemimichi rewe pumiñera, awiye piko jae reta rami. Echa’ã che aipota’ã ambieta aï pewe wi jukuärái.

<sup>3</sup>Ore reta, yepe tõi kua iwi pe noi, erëi nuñeräro’ã kua iwi pewa reta uñeräro rami.

<sup>4</sup>Ore nuñeräro waerä, nduiporu’ã noi tembiporu kua iwi pewa. Ore nuñeräro ko noi Tumpa imbaepuere rupi. Jare jokua mbaepuere pe orepuere numiamiri ipotawe Tumpa koti oyowaicho wae.

<sup>5</sup>Jukuärái kía uipota yawe umbitawi jare umbiawái ñru wae reta awiye waerä uikuaa Tumpa, ore numiamiri jae jei wae. Jare jukuärái nduyapo opaete wae ipia pe uyemingeta waerä jare uyapo waerä kërái Cristo uipota wae rupi.

<sup>6</sup>Jare imeño yawe pepite pe kía uipota’ã Cristo jei wae rupi iko wae, jayawe ore nduiporarakata noi chupe. Erëi jaeño nduyapota noi jukuärái ore nduecha yawe pe reta peï kawi Cristo jei wae rupi.

<sup>7</sup>Amokue wae jei ñonoï iyupe, “Cristo chembou.” Erëi tuikuaa reta ore ko Cristo orembou wi. Pe pikuaa ko kua añetete wae.

<sup>8</sup>Jare yandeYa umee ko orewe mbaepuere nonoi waerä peré. Aramoi amokue wae reta jei: “Pablo uasaete ma uyemingeta mbaepuere yandeYa umee chupe wae re.” Jukuärái ipuere jei reta, erëi ndarau chemara kua che jae wae re. Añetete yandeYa umee orewe kua mbaepuere pumimiräta waerä Tumpa re, mbaeti ko purukachi waerä.

<sup>9</sup>Jáeramo awiye perowia che aikuatía aï pewe pumingiye waeräño.

<sup>10</sup>Echa’ã amokue wae jei chekoti kuärái: “Pablo uikuatía yandewe yawe, uikuatía jei wae yayapo waerä chupe, jare uikuatía mbaepuere onoi wae rami. Erëi jae oï yande ndiwe yawe, mbae’ã jare iñee ngatu’ã,” jei reta.

<sup>11</sup>Erëi jukuärái jei wae tuikuaa iyupe kua: kërái kua mbiri wi tupapire nduikuatía pewe rami, jukuärái etei wi ore noita ore noi yawe pe reta ndiwe.

<sup>12</sup>Erëi ore ndarau nduyembutuicha ñru wae reta uyembutuicha wae rami. Pe reta pikuaa kërái ko amokue wae reta jeko. Jae reta uyemingeta kawi tõi iyé, erëi jaeño ueka reta kërái uyembutuicha waerä ñru wae reta wi. Añetete jae reta ko jae iyarakuaa mbae wae reta.

<sup>13</sup>Erëi ore oremiäri yawe mbaembae nduyapo wae re, oremiäri noi jupi rupi. Jare jaeño nduyemingeta jokua mbarawiki Tumpa umee orewe wae re. Jare jae umaño oreré numimbeu waerä pewe ñee ikawi wae Cristo rewa. Jokua re ko oremiäri noi.

<sup>14</sup>Jare jukuärái ore miäri yawe, jupi ko nduyapo noi. Echa'ä ore ko jae tenondete ndoo numimbeu pewe ñee ikawi wae Cristo rewa.

<sup>15-16</sup>Amokue wae reta umimbeu ñonoï Tumpa iñee kiae ñee ikawi wae uyemimbeu ma wae rupi. Jare jae reta uyemingeta uyembikate rewe ambie wae iparawiki re jae reta uyapo wae rami. Erëi ore nduyapo'ä jukuärái. Ore nduipota numimbeu ñee ikawi wae kiae ñee ikawi wae uyemimbeu mbae wae rupi. Jare orepiayemingeta ko jae pe reta pepiräta kawi ma Tumpa re yawe, jayawe orepuereta numimbeu ñee ikawi wae perëta kuti rupi ñonoï wae reta pe.

<sup>17</sup>Ore nduipota nduyapo kërái Tumpa iñeeriru pe uyekuatía oï wae rupi. Echa'ä joko pe jei kuärái: “Ime yawe kía uipota uyembutuicha wae, tuyembutuicha yandeYa mbae ikawi wae uyapo chupe wae re.” Jukuärái uyekuatía oï.

<sup>18</sup>Echa'ä ime yawe kía jaei uyembutuicha wae, mbae'ä etei ko. Jaeño kía reta uyembutuichaka yandeYa pe wae tuichaete ko añetete rewe.

## 2 Corintios 11

### Pablo umbiarakuaa reta ‘Cristo chembou’ jeiraanga wae reta rewa

<sup>1</sup>Chemaerä, iyarakuaa mbae wae retaño imiäri iyé uyembutuicha rewe. Erëi aipota michi pewa mii pepiawasuwu chewe, che wi ayemingeta waerä jukuärái.

<sup>2</sup>Echa'ä che pumbiete ai, jare jokua ou Tumpa wi. Echa'ä che puyapikatu Cristo pewarä piko waerä jembirekorä rami. Jare che aipota pumee Cristo pe pëti kuñatái oroke'ä etei kuimbae wae rami.

<sup>3</sup>Erëi che ayembipia'ä ai peré. Aramoi pemaño piyembitawika kërái Eva uyembitawika jokua mboi ikatuete iyapu wae pe, jare jukuärái pikota'ä ma pekirëi ngatu rewe Cristo pewarä.

<sup>4</sup>Echa'ä che aikuaa ai ou yawe kía ambie ye umimbeu pewe Cristo rewa wae, pe reta pere'ä ko mbae awe jare pemaño ko jese. Jukuärái piyapo pei, yepe tēi jae umimbeu Cristo rewa ambie ye ore numimbeu pewe wae wi, jare yepe tēi jae ou'ä Espiritu Santo imbaepuere pe. Añetete ko jae ou ambie espíritu imbaepuere pe, jare jae iñee ambie ye ko ñee ikawi wae pe reta perowia ma jese wae wi.

<sup>5</sup>Jae reta jei tēi iyupe jae reta ko Cristo ombou wae tenondewaete reta. Erëi ¿añetete ra jae reta iwate ñonoï chewi? Arowia'ä.

<sup>6</sup>Che aramoi chiñee ngatu'ä parawete chemiäri waerä. Erëi aikuaa kawi mbae re ayemingeta ai wae. Jare pe reta pikuaa kawi ma jokua rewa, echa'ä ima rupi jare opa kërái rai rupi ore nduikuaaka ma pewe jokua orearakuaa ime nonoi wae.

<sup>7</sup>Che amimbeu yawe pewe ñee ikawi wae Tumpa wi ou wae, akowara'ä etei pewe mbae re awe. Jayawe amokue wae reta chereriro. Jae reta jei tēi: “Opaete jokua ikawi oporomböe wae reta okowara ko,” jei reta. Erëi añetete akowara'ä añemee añemimichi rewe pe reta piyembutuichaka waerä. ¿Mbae kachi yerá jokua?

<sup>8</sup>Che aiko rambuewe pepi, iru hermano reta ikotiätia rupi uyembati wae chembori pe reta pepuere waerä piyekou che aporomboe wae re jepi mbae rewe.

<sup>9</sup>Amo wese uata chewe mbae. Erëi che aeka'ä pewe mbae awe, echa'ä yanderiwi reta Macedonia pewa ueru chewe mbae uata chewe wae. Jare jokua re che aiko awiye waerä piyembipia'ä cheré. Jare jukuärái jekuaeño aipota aiko.

<sup>10</sup>Kua re ayerowiaete aï, jare chemiärita jese opaete iwi Acaya rupi. Jukuärái che jae aï Cristo jowake. Jare kua wi ndarau kía ipuere chemikii.

<sup>11</sup>¿Maera ra aeka'ä pewe yembori? ¿Mbaeti ra puau ramo aramoi? ¿Tumpa uikuaa puau ko!

<sup>12</sup>Pëti wese awe aporomboe yawe akowara'ä pewe. Jare ndaraúi ayapo jukuärái chepuere waerä amikii jokua uyembutuicha rewe uipota tēi oremboyowake wae reta. Echa'ä aikuaa jae reta ndarau oporomboe jepi mbae.

<sup>13</sup>Kua nunga reta jei tēi iyupe: “Cristo chembou.” Erëi upurumbitawi wae reta ko, echa'ä Cristo ombou'ä reta.

<sup>14</sup>Erëi awiye yandepiakañi kua re. Echa'ä Satanás etei ipuere uyekuaaka pëti araiwa ikawi wae Tumpa wi ou wae echa rami.

<sup>15</sup>Jáeramo yanembipiakañi rape'ä ko Satanás pe uyeyokui wae reta uyekuaaka yawe jupi wae nunga. Erëi taikue rupi Tumpa uiporarakata oï chupe reta iparawiki ikawi mbae wae re.

### **Pablo jeta uiporara Cristo pe uyeyokui rambuewe**

<sup>16</sup>Che tae ye pewe kua: Awiye kía torowia che ko jae pëti iyarakuaa mbae wae. Erëi perowia yawe cheré jukuärái, pepiawasu mii chewe michi pewa. Chemiärita ndipo aipo chiyé jayawe pëti iyarakuaa mbae wae rami.

<sup>17</sup>Kua chemiärita chiyé wae, mbaeti ko jae yandeYa umbiyerowia wae. Echa'ä ayemingetata aï iyarakuaa mbae wae rami jare che jae wae rupiño.

<sup>18-19</sup>Jukuärái uyapo ñonoï iru wae reta, jare pe reta pemaño ko jese piyerowia rewe. Jayawe che wi chemiärita chiyé iyarakuaa mbae wae rami. Pe Corinto pe piko wae reta pearakuaa katu wae rami pema tēi piyé.

<sup>20</sup>Echa'ä ime yawe kía uipota täta rupi peokui wae, ani ime yawe kía uipota uyekou peré wae ani uyuwanga katu peré wae, pe reta pemaño ko jese. Jae ramiño wi ime yawe kía uipota uyererowia katu pewi wae jare perowapete wae, pe reta pemaño ko jese.

<sup>21</sup>Ore parawete reta nduyapo'ä jokua nunga mbaembae. Jáeramo iru wae reta jei tēi orewe orepiräta'ä noï. Tome tuyemingeta pochiño reta jukuärái. Tapita jayawe ñemimaraka pe. Erëi jokua mbaembae re iru wae reta uyembutuicha rewe imiäri wae, che wi chemiärita jese reta ayembutuicha rewe, yepe tēi iyarakuaa mbae retaño ko jukuärái uyemingeta.

<sup>22</sup>Jae reta jei tēi: “Ore ko jae hebreo reta.” Jayawe che jukuārái jae wi. Che ko jae wi hebreo. “Ore ko jae Israel pewa reta,” jei reta tēi. Che ko jae wi Israel pewa. “Ore ko jae Abraham iñemoñaá pewa reta,” jei reta tēi. Che jae nunga wi.

<sup>23</sup>“Ore nduyeyokui Cristo pe,” jei reta tēi. Che jeiete ayeyokui Cristo pe chuwi reta. Añetete kua pe ayemingeta ye aī iyarakuaa mbae wae reta uyemingeta rami. Che ayapo jetaete mbarawiki chuwi reta Tumpa pewarā. Jare che ayapiraa reta peresoriru pe jare ñenupa pe – chepuere’ä etei opa kawí aipapa. Jeta wese amano seri.

<sup>24</sup>Pandepo wese ma judío reta uiporaraka chewe chembipiu reta. Jare opa wese chenupa yawe, uiporu cheré treinta y nueve wese chikote.

<sup>25</sup>Mbapí wese uiporaraka chewe iwira pipe. Pēti wese chapí reta ita pe cheyuka waerā tēi. Mbapí wese aiporara chalana wasu opa uwapí orewi wae, jare pēti wese apita parawete mar mbite pe pēti piare jare pēti ara.

<sup>26</sup>Jetaete awata opaete kerupí. Jare kerupí rupi awata wae rupi jekuaeño ime yembiawái chewe. Echa’ä mbowí wese i chereraa seri parawete. Jare kiape awata wae rupi imonda wae reta ukuatiro cheré. Jeta cherētáíwa reta jare judío mbae wae reta wi jekuaeño chemumburu ñonoí tēi mbae ikawí mbae wae uyapo chewe waerā. Amano seri ma tēta wasu reta rupi, jare ikotía rupi, jare mar rupi. Jare jeta wirowiaraanga Cristo re wae reta oyowaicho ñonoí che ndiwe.

<sup>27</sup>Tāta aparawiki aiporara rewe. Jeta wese ma aiporara topei, yembai, iwe, jare roi. Jare jeta wese uata chewe temimonde.

<sup>28</sup>Jare kuaño’ä ko. Opa ara rupi ayembipia’ä aī opaete Cristo re wirowia wae reta kerupí rupi uyembati ñonoí wae re.

<sup>29</sup>Ime yawe kía ipirāta’ä oī Tumpa re wae, che wi aiporara aī. Jare ime yawe kía japicha pe uyawika Tumpa koti wae, che chepochi aī jokua re.

<sup>30</sup>Pipota yawe che jekuaeño ayembutuicha waerā, jayawe che ayembutuichata chepirāta mbae wae re.

<sup>31</sup>Tumpa uikuaa chapu’ä etei aī wae. Jae ko yandeYa Jesucristo Tu, jare jae jee tuyembutuichaka jaeño máí pewa.

<sup>32</sup>Tēta wasu Damasco pe aiko yawe, jokua tēta wasu imburuwicha uipota tēi chepisika. Jae ko jokua kuimbae mburuwicha wasu Aretas jee wae umbijee Damasco pewa reta imburuwicharā wae. Jae oyokui sindaro reta cheraäroka waerā tēi opaete tēta wasu jöke rupi.

<sup>33</sup>Erēi cheiru reta chembiweyi parawete pēti kanasta wasu pe tēta wasu ikēsea iwentana rupi. Jare jukuārái ayepe chuwi reta. Kuārái chemiári pewe pikuaa waerā kērái chepirāta mbae wae ko che parawete.

## 2 Corintios 12

**Pablo imiári mbaembae Tumpa uechakaka chupe wae re**

- <sup>1</sup>Yepe tēi che aikuaa usiriwe'ä chemaerä chemiäri yawe ayembutuicha rewe kuärái, erēi jekuaeño ayapota. Añawe chemiärita pewe yandeYa mbaembae uikuaaka jare uechakaka chewe wae re.
- <sup>2</sup>Che ima ma arowia Cristo re. Jare uasa ma catorce año chereraa ara iwatete oï wae pe – jokuia ko jae kiape Tumpa oï wae pe etei. Aikuaa'ä oo ra cherete ani oo'ä ra.
- <sup>3</sup>Tumpaño uikuaa oo ra cherete ani mbaeti ra oo. Erēi aikuaa chereraa ko ara pe.
- <sup>4</sup>Jare jokuia yerowiarenda pe ayandu ñee ikawiete ye wae reta yayandu mbaei wae. Jae ko ñee reta Tumpa umaeño'ä kía re awe kua iwi pewa uyemingeta waerä.
- <sup>5</sup>Kua re chepuereta tēi jekuaeño ayembutuicha, erēi jaeño ayembutuichata chepiräta mbae wae re.
- <sup>6</sup>Erēitu aipota ayembutuicha yawe mbaembae ikawiete ye uyeyapo chewe wae re, che ndarau chemiäri jokuia iyarakuaa mbae wae reta imiäri rami. Echa'ä che chemiäri wae añetete ko uyeyapo chewe. Erēitu ndarau chemiäri jese ayembutuicha rewe, awiye waerä kía jokuia mbaembae aecha wae reño uyemingeta kawí cheré. Che aipota ayekuaaka chereko rupi jare che aporomoe wae rupi – mbaeti mbaembae aecha wae rupi.
- <sup>7</sup>YandeYa uechaka chewe jeta kua nunga mbaembae ikawiete ye wae. Erēi che awiye waerä ayembutuichaete jokuia re, Tumpa umaeño pēti mbae jasi chewe waerä. Jekuaeño jasi chewe pēti ñuräti yandesoo pe yandekutu oï wae rami. Satanás etei ombouka chewe kua uiporaraka waerä chewe.
- <sup>8</sup>Kua re mbapi wese ma yandeYa amiñera tēi umbisiri waerä chewi.
- <sup>9</sup>Erēi jae jei chewe kuärái: “Ambisirita'ä ndewi. Erēi che chepiakawi rupiño nomborita nemiawäta waerä. Jokuiaño ko ikawita ndewe. Echa'ä nepiräta'ä nei yawe, jare che nombori nemiawäta waerä yawe, jokoropi ko chepuere aechaka kērái chembaepuere tuichaete ko.” Jukuärái yandeYa jei chewe. Jáeramo che ayerowia chepiräta mbae wae re, jare jokuia re ko che chemiärita aï. Echa'ä chepiräta mbae wae rupi uyekuaa Cristo imbaepuere.
- <sup>10</sup>Jáeramo ime yawe kía mbae kachi jei chekoti wae, che ayerowia aï jokuia re. Jare jae nunga wi che ayerowia aï jokuia chepiräta mbae wae re, jare mbaesusere reta re, jare yembiawái reta re. Añetete che aiporara tuicha Cristo pe ayeyokui ramo. Erēi jokuia re ayerowia aï. Echa'ä che chepiräta'ä aï yawe, Cristo imbaepuere uparawiki cheré chepiräta waerä.

### **Pablo uyembipia'ä oï Corinto pewa reta re**

- <sup>11</sup>Kua chemiäri ayembutuicha rewe wae rupi ayeyapo ma pēti iyarakuaa mbae wae rami. Erēi pe reta ime penoi teko. Echa'ä pe reta pemiäri kawita tēi ko ñru wae reta pe che rewa. Aramoi che parawete mbae'ä ko, erēi jokuia Cristo omondo wae tenondewaete reta pere chupe wae, jae reta mbae pe awe chapiraa'ä.

<sup>12</sup>Pe reta pikuaa kawi ko che aiko yawe pe reta ndiwe, che ayekuaaka kawi pewe chepiawasu rewe Cristo chemondo jae jee re. Jare Tumpa imbaepuere rupi ayapo mbaembae kiawe ipuere'ä uyapo wae jukuärái rupi uyekuaa waerä che ko jae Cristo chemondo wae.

<sup>13</sup>Jukuärái che ayapo pepite rupi kërái ayapo ñru wirowia Cristo re wae reta kerupi rupi uyembati wae rupi rami. Jaeño aeka'ä pewe yembori kërái che aeka chupe reta rami. Erëi kuärái ayawi yawe pekoti, jayawe awiye pemandúa mii chewe jokua re.

<sup>14</sup>Mase, mokui wese ma a apou pepi. Jare añawe ayeyapikatu äi a ye apou waerä pepi. Jare a ma awäe yawe, jae nunga wi aipota'ä pe reta chembori waerä. Echa'ä che aipota'ä korepoti pewi. Che aipota pombori waeräño, echa'ä mbaeti ko sambiai reta uyandareko waerä tu re. Tu ko jae uyandareko waerä isambiai reta re. Jukuärái wi che ayandareko peré cheraí reta rami.

<sup>15</sup>Jáeramo che ayerowia rewe amikañita opaete chembaembae pombori waerä. Jare che etei wi añemeeta pombori waerä. Yepe tēi pe reta cherau'ä ma peo pei aramoi, erëi che jekuaeño jeiete puauta äi.

<sup>16</sup>Erëi aramoi amokue wae reta jeita kuärái: “Añetete Pablo mbaeti iko yandiyembori re. Erëi jae uikuaa upurumbitawi waerä. Ime ko aipo kërái rupi yanembitawi oï.” Jukuärái jeita tēi reta aramoi.

<sup>17</sup>Erëi, ¿kërái rupi ra pumbitawi? ¿Pumbitawi ra aramoi jokua kuimbae reta amondo pepi wae rupi?

<sup>18</sup>Che amikirëi hermano Tito oo waerä pepi, jare amondo wi jae ndiwe ñru hermano pe reta pikuaa wae. Erëi, ¿Tito pumbitawi yerá? Pe pikuaa jae pumbitawi'ä etei ko. Echa'ä che jare Tito oyowake ko noï.

<sup>19</sup>Aramoi perowia pei nduyerepi waeräño ko numimbeu noï pewe kua mbaembae. Erëi jukuärái'ä ko. Tumpa jowake ko numimbeu noï pewe, ore pēti ramiño noï Cristo re wae reta. Mase cheiru puau wae reta, opaete nduyapo wae, nduyapo ko pe reta pepiräta waerä Tumpa re.

<sup>20</sup>Che ayembipia'ä äi peré, aramoi a apou pepi yawe, puechata mbaeti ikawi pei kërái che aipota wae rami. Ayembipia'ä äi, aramoi puipokouta yeaka rupi, jare ñemiro rupi, jare mbochi rupi, jare yembutuicha rupi, jare yembikate rupi. Jare aramoi imeta pepite pe indayepota wae reta, jare iñera japicha re wae reta, jare tekoraí reta.

<sup>21</sup>Ayembipia'ä äi wi aramoi chemarata apita pewi Tumpa jowake, jare tuicha rupi chepiatitita jokua re. Echa'ä aramoi pepite pe jokua tenonde yawe teko kachi rupi yureko wae reta jekuaeño ueya'ä jokua ipiayemingeta kachi wae. Aramoi imeño ko awasa pe ñonoï reta jare mbikere rupi.

## 2 Corintios 13



<sup>1-2</sup>Mokui wese ma a apou pepi. Jare añawe ata apou ye ai pepi. Kua re mbapi wese ma. Pikuaa kawi pei taikue rupi apou aiko pepi yawe, che jae jokua teko kachi rupi yureko wae reta pe: “Che ayu ye yawe, aiporarakata ai pewe peya’ä yawe pereko kachi. Jare jukuärái ayapota ai ipotawe wae pe ueya’ä yawe jeko kachi,” jae chupe reta. Jare añawe, yepe tei ai’ä pe reta ndiwe joko pe, erëi pumimandúa ai jokua re kua aikuatía ai pewe wae rupi. Echa’ä Tumpa ñeeriru pe jei yandewe kuärái: “Ime yawe kía teko uyapo wae, imeta ko imiäri jese mokui ani mbapi wae uikuaa kawi jokua teko wae, jukuärái yaikuaa waerä añetete ra.” Jukuärái jei.

<sup>3</sup>Pe reta pipota pikuaa pei añetete ra Cristo uyemingeta che rupi wae. Jayawe che aechakata ai pewe aiporarakata yawe jokua teko kachi rupi yureko wae reta pe. Jukuärái pikuaata Cristo imbaepuere pepite rupi yepe oi. Jae mbaeti ko imbaepuere mbae wae rami pekoti.

<sup>4</sup>Añetete Cristo uyekutuka iko kurusu re imbaepuere mbae wae rami, erëi ikowe ye ou umanokue wae reta ipite wi Tumpa imbaepuere rupi. Jae ramiño wi ore etei mbaeti mbaepuere nonoi. Erëi pe reta pikuaata ore jae nunga wi nduiko Cristo rami Tumpa imbaepuere rupi. Jukuärái pe reta pikuaata pecha yawe kërái ore nduikota kuri pepite rupi.

### **Kua ko jae jaeño ma Pablo umbiarakuaa reta**

<sup>5</sup>Pemae kawi piyé etei pikuaa waerä añetete ra perowia pei Cristo re wae. Jesucristo oi yawe pepia pe, jayawe pikuaa ko perowia kawi pei.

<sup>6</sup>Jare Cristo oi yawe pepia pe, che arowia katu ai peré pe reta pikuaa waerä Cristo oi ore ndiwe wi jare jae ko orembou pekoti wae.

<sup>7</sup>Ore nduyerure noi Tumpa pe peré piyapo waerä jupi wae. Echa’ä jukuärái piyapo yawe, ndarau nduiporarakata pewe. Erëi aramoi amokue wae jeita: “Mase, Pablo uiporarakata’ä oi chupe reta. ¿Kiape ra oi imbaepuere uiporarakata waerä chupe reta? Tumpa chawaa ombou’ä Pablo yandewe.” Jukuärái aramoi kía ipuereta jei. Ñamaeño jese. Tome tuyemingeta pochino jukuärái.

<sup>8</sup>¿Këraita pa orepuere nduiporarakata kía pe jeko kachi ueya ma yawe? Ore nduipotaete numikirëi waerä jokua añetete wae rupi ma iko wae reta. Nduipota’ä nduiporarakata chupe reta.

<sup>9</sup>Ore nduyerowiata pe reta piko yawe Tumpa uipota wae rupi, yepe tei aramoi ore nduyekuaata orepiräta’ä wae rami. Jáeramo nduyerure noi peré opa piyeapikatu kawi waerä Tumpa ndiwe.

<sup>10</sup>Jokua jeko pewa añawe aikuatía ai pewe kuärái ndei a awäe pepi mbowe. Echa’ä aipota’ä aiporu mbaepuere yandeYa umee chewe wae aiporarakata waerä pewe che joko pe ai yawe. Añetete jokua mbaepuere yandeYa umee chewe wae, jae ko pumimiräta waerä Tumpa re, mbaeti ko purukachi waerä.

### **Pablo omondo saludo**

<sup>11</sup>Jayawe hermano mii reta, kuaño ma aipota pe reta piyapo waerä: Piyerowia jare jekuaeño peka mbae jupi waeño piyapo waerä. Piñemikirei päwe rewe. Piko kawi pepiakatu rewe pëti ramiño. Jare Tumpa oïta pe reta ndiwe. Jae ko yanderau jare yanembipiakatu wae.

<sup>12</sup>Jare pe reta piyembisaluda yawe, jekuaeño piyembisaluda piyerau rewe.

<sup>13</sup>Opaete wirowia Cristo re wae reta kua pe ñonoï wae omondo pewe saludo.

<sup>14</sup>YandeYa Jesucristo jekuaeño tipiakawi pewe. Jare yandeRu Tumpa jekuaeño tuechaka pewe perau wae. Jare jae nunga wi Espíritu Santo jekuaeño tuñemïïru kawi opaete pe reta ndiwe. Jukuärái tuiko.

## Gálatas

### Kua tupapire rewa:

Kua tupapire, jae ko Pablo uikuatía Cristo re wírowia wae reta pe uyembati iwi Galacia rupi wae pe. Jokua iwi Galacia pewa reta judío mbae wae reta ko. Jare Pablo rani umimbeu chupe reta Cristo rewa. Jare opa ma umimbeu chupe reta yawe, jae oo ikotía rupi jekuaeño umimbeu waerä Cristo rewa ñru wae reta pe. Erëi jae jendawe pe ou uwäe ñru oporomboe wae reta iwi Galacia pe, jare jae reta umbipi oporomboe kachi. Echa'ä omboe reta tēi judío mbae wae reta imeta ko uyembicircuncidaka jare uyapo kawi reta opaete judío reta jeko rupi onoi waerä tekowe opa mbae wae. Jeräkua Pablo pe kua oporomboe kachi wae reta rewa yawe, tuicha ipiatiti. Jáeramo jae uikuatía jare wiraaka kua tupapire Cristo re wírowia wae reta pe iwi Galacia rupi uyembati wae umbiarakuaa kawi reta waerä.

### Gálatas 1

#### Pablo wiraaka saludo

<sup>1-2</sup>Pe Jesucristo re perowia wae reta iwi Galacia rupi piyembati pei wae, che ko jae Pablo aikuatía ai pewe kua tupapire. YandeYa Jesucristo etei chemondo jae jee re amimbeu waerä jesewa. Jare jaeño'ä ko chemondo wae. YandeRu Tumpa umbijekowe ye Cristo wae, jae wi chemondo. Mbaeti ko peti awe kuimbae chemondo, jare kuimbae reta'ä ko chokui kua mbarawiki ayapo waerä. Jayawe che jare opaete hermano reta che ndiwe ñonoï wae nduraaka noi pewe saludo.

<sup>3</sup>YandeRu Tumpa jare yandeYa Jesucristo jekuaeño tipiakawi pewe jare tuyapo pewe piko waerä pepiakatu rewe.

<sup>4</sup>Kua iwi pewa reta opaete seri oyowaicho ñonoï Tumpa koti. Jare jae reta jeko kachi oi Tumpa jowake. Erëi yandeYa Cristo uñemee umano waerä yanderé mbaembae yayawi Tumpa koti wae opa umbái waerä yandewi, jare jukuärái yanderepi waerä kua iwi jeko ikawi mbae wae wi. Jukuärái Cristo uyapo yandeRu Tumpa uipota ramo.

<sup>5</sup>YandeRu Tumpa jee tuyembutuichaka jaeño mái pewa. Jukuärái tuiko.

#### Yanemaerä jaeño ko petiño ñee ikawi wae

<sup>6</sup>Tumpa pereni jare Cristo rupi uechaka pewe ipiakawi. Jare che chepiakañiete ai kerái pe reta imbae rupiño piyerowa ma Cristo wi perowia waerä ambie ñee ikawi echa wae re.

<sup>7</sup>Yanemaerä jaeño ko petiño ñee ikawi wae jare añetete wae. Erëi ime amokue oporomboe kachi wae reta, jare jae reta mbaeti umimbeu ñonoï ñee ikawi wae. Jae reta pembopa ñonoï jare uipota umbiambie reta ñee ikawi wae Cristo rewa.

<sup>8</sup>Ĵerĕi Tumpa tuiti iarasi jese reta jaeño mái pewa! Jare ime yawe pĕti wae orepĭte pe, ani pĕti araiwa yepe, umimbeu pewe yawe ñee ambie ye tenonde numimbeu pewe wae wi, jae nunga wi, ĴTumpa tuiti jese iarasi jaeño mái pewa!

<sup>9</sup>Jukuärái ore tenonde ma ndoe pewe, jare jukuäriete añawe che jae yeta pewe. Ime yawe kía umimbeu pewe ñee ambie ye tenonde perowia jese wae wi, ĴTumpa tuiti jese iarasi jaeño mái pewa!

<sup>10</sup>Añetete ko, kua re che aeka'ä äi ĩru wae reta umae kawi waerä cheré. Jare mbae'ä etei ko chewe ambiyerowia reta waerä. Jaeño aipota Tumpa umae kawi waerä cheré. Añetete kuimbae retaño jekuaeño aipota ambiyerowia äi yawe, che ayeyokui'ä ma ko äi Cristo pe.

### **Pablo oporomböe wae Cristo wi etei ko ou**

<sup>11</sup>Cherikei reta, cheriwi reta, jare cherindi mii reta, aipota pikuaa waerä kuimbae reta wi'ä ko ou kua ñee ikawi wae che amimbeu wae.

<sup>12</sup>Echa'ä mbaeti ko kiawe kua ĩwi pewa umimbeu chewe. Jare kiawe wi chemböe'ä jese. Jaeño Jesucristo uikuaaka chewe.

<sup>13-14</sup>Pe reta etei pikuaa kĕrái aiko ndei Cristo re arowia mbowe. Che ko jae judío. Jare che aipotase aiko jupi opaete orereko rupi. Añetete ko, opaete cherĕtáiwa reta jare cheyaweiwa reta ipite wi, mbowiño uipotaeete iko chewi oreramikue reta jeko rupi. Jare pe reta pikuaa wi kĕrái che tĕta aiporarakase Cristo re wirowia wae reta pe kerupi rupi yureko wae rupi. Aipotase tĕi opa ayukaka reta.

<sup>15</sup>Erĕitu Tumpa ipiakawiete chewe. Echa'ä ndei awe chesi wi aa mbowe, Tumpa chereni ma jare cheñono tee ma aiko waerä jae imaerä. Jare ikawi iko chupe

<sup>16</sup>Tai uikuaaka chewe waerä. Jukuärái uyapo chewe che a amimbeu waerä Tai rewa judío mbae wae reta pe kerupi rupi ñonoĭ wae rupi. Erĕi Tumpa Tai uyekuaa chewe yawe, che aeka'ä kiawe chembiarakuaa waerä jese.

<sup>17</sup>A'ä wi Jerusalén pe aeka waerä Cristo jemimböe tenondewaete reta. Yepe tĕi jae reta rani Cristo omondo, erĕi a'ä ayemingeta waerä jae reta ndiwe. Che a woi ĩwi Arabia pe. Jare joko wi añatima ye tĕta wasu Damasco pe kiape Jesús jaeramo uyekuaaka chewe wae pe.

<sup>18</sup>Jokua jaikue rupi, mbapi año ma uasa yawe ramo che a Jerusalén pe aikuaa waerä Pedro. Erĕi jaeño apita jae ndiwe quince ara rupi.

<sup>19</sup>Jare aecha'ä ĩruwe Jesús jemimböe tenondewaete reta. Jaeño che aecha yandeYa tiwi Jacobo.

<sup>20</sup>Mase, kua mbaembae che amimbeu äi pewe wae, Tumpa jowake chapu'ä etei ko äi.

<sup>21</sup>Joko wi che a ĩwi Siria pe jare ĩwi Cilicia pe wi.

<sup>22</sup>Jokua ara reta rupi Cristo re wirowia wae reta iwi Judea rupi uyembati ñonoï wae reta chekuua'ä etei.

<sup>23</sup>Jaeño uyandu jei reta cheré kuärái: “Jokua kuimbae tenonde yawe uiporarakase yandewe awiye waerä jekuaeño yarowia Cristo re. Erëi añawe jae wi umimbeu oï ñee ikawi wae Cristo rewa,” jei reta.

<sup>24</sup>Jayawe jae reta umbutuicha Tumpa jee Tumpa umbiambie chereko ramo.

## **Gálatas 2**

### **Jesús jemimboe tenondewaete reta umae kawi Pablo iparawiki re**

<sup>1-2</sup>Jokua jaikue rupi catorce año ma uasa yawe, Tumpa uikuaaka chewe a ye waerä Jerusalén pe. Jayawe che a. Jare kua wese Bernabé chemiiru. Jare araa wi Tito che ndiwe. Jare ore ndoo nuwäe yawe Jerusalén pe, che ayembati jaeño Cristo re wirowia wae itenondewa reta ndiwe. Jare che amiesäka kawi chupe reta kërái che amimbeu ñee ikawi wae judío mbae wae reta pe. Echa'ä che aipota aikuaa aiko kërái ra jae reta umae cheparawiki judío mbae wae reta ipite rupi wae re. Echa'ä jae reta uipota'ä uñemiiru yawe judío mbae Cristo re wirowia wae reta ndiwe, jayawe opaete cheparawiki opata tēi ikumewa.

<sup>3</sup>Erëi jukuärái'ä uyeyapo. Echa'ä jae reta wiriro'ä jokua che aporomboe wae. Jare yepe tēi Tito ko jae judío mbae wae, erëi jae reta jei'äwe Tito uyembicircuncidaka waerä.

<sup>4-5</sup>Jokua rewa ore nduyemingeta, echa'ä amokue iru wae reta uipota tēi opaete judío mbae Cristo re wirowia wae reta uyembicircuncidaka waerä. Erëi jae reta Cristo re wirowiaraanga wae reta ko uyembati reta añetete wae nunga ore ndiwe. Ko yepe jae reta jaeño uipota uikuaa ore nduyapo ra noï judío reta jeko rupi wae, jare uipota tēi uyapoka orewe jokua jae reta jeko. Erëi michi pewa awe numaeño'ä oriyé jese reta, echa'ä nduipota'ä numbiyea ñee ikawi wae Cristo rewa yemboe ambie wae ndiwe. Ore nduipota pe reta pikuaa waerä kërái ñee ikawi wae Cristo rewa añetete ko jare uata'ä etei chupe mbae awe. Yande yarowia jokua ñee re ramo, pēti ramiño ñai Jesucristo re jare yaikota'ä judío reta jeko rupi.

<sup>6</sup>Jayawe che amimbeu kua mbaembae re jokua Jerusalén pewa Cristo re wirowia wae itenondewa reta pe. Che aikuaa opaete wae umae jese reta uipiü rewe, erëi jokua mbae'ä chewe, echa'ä Tumpa pewarä opaete yande reta oyowakeño ko ñai. Jare che amiesäka chupe reta ñee ikawi wae amimbeu wae re yawe, jae reta upita oyowake che ndiwe jare umiiru'ä reta mbae ipiau wae ñee amimbeu wae pe.

<sup>7</sup>Jare jae nunga wi jae reta uikuaa ko Tumpa chokui che amimbeu waerä ñee ikawi wae judío mbae wae reta pe kërái Tumpa oyokui Pedro umimbeu waerä judío reta pe rami.

<sup>8</sup>Añetete Tumpa omondo Pedro judío reta ipite pe. Jare jukuärái wi Tumpa chemondo judío mbae wae reta ipite pe. Jayawe ore mokui rewe ko jae Tumpa oremondo jae jee re wae.

<sup>9</sup>Jare joko pe yureko wi Pedro, Jacobo, jare Juan. Jese reta iru wae reta umae Cristo re wirowia wae reta itenondewaete reta ko. Jare jae reta uikuaa ma yawe Tumpa ko umee chewe ipiakawi rupi kua mbarawiki, chepopisi reta opaete wae jowake. Jare uipopisi reta wi Bernabé. Jukuárái jae reta uikuaaka opaete wae pe oyowake ñonoï ore ndiwe jare jaekawi chupe reta jokua ñee ore numimbeu wae. Jare ikawi iko chupe reta ore jekuaeño numimbeu waerä judío mbae wae reta pe jare jae reta umimbeu waerä judío reta pe.

<sup>10</sup>Jaeño jei reta orewe: “Jekuaeño pemandúa mii pembali waerä iparawete wae reta orepite pe ñonoï wae,” jei reta orewe. Jare jokua ko jae che chekirëiete ayapo aiko wae. Jukuárái ore ndupita.

### **Tëta wasu Antioquía pe Pablo umbieta Pedro pe**

<sup>11</sup>Erëi kua jaikue rupi Pedro ou tëta wasu Antioquía pe. Jare joko pe oï rambuewe, che imeta ko ambieta chupe jae mbaeti jupi uyapo iko ramo.

<sup>12</sup>Echa’ä jaeramo ou yawe, ukaruñoi judío mbae wae reta ndiwe. Jokua jaekawi ko. Erëi yuweru uwäe amokue judío reta Jacobo ombou wae reta, jare Pedro umbipi usiri judío mbae wae reta wi. Echa’ä ukiye jokua judío reta wi aramoi umbijekota reta Pedro jae judío mbae wae reta ndiwe ukaru wae re.

<sup>13</sup>Jukuárái jae uyapo iko jokua mokui jowa wae reta uyapo wae rami. Jare iru judío joko pe yureko wae reta wi uyemboe Pedro jeko re. Jare Bernabé jae nunga wi uñemaño iyé uyapo waerä jae reta uyapo wae rami.

<sup>14</sup>Jayawe aecha yawe jae reta yureko’ä añetete wae rupi ñee ikawi wae yanemboe wae rupi, che jae Pedro pe etei opaete wae jowake: “Nde ko jae judío, erëi kua pe ndeya ma judío reta jeko ndiko waerä judío mbae wae reta rami. Jokua jaekawi ko. Erëi ¿këraita ra añawe ndesiri nei chuwi reta? ¿Ndiota ra jae reta wirowia waerä ikia ra ñonoï Tumpa koti jare imeta ko uyeyapo judío retarä?” jae chupe.

<sup>15</sup>Che jare Pedro judío ko oresi wi ndoa wiwe. Ore jae’ä ko judío mbae wae reta, jokua jeko kachi wae reta ndoese chupe wae.

<sup>16</sup>Moisés arakae uikuaaka oreramikue reta pe opaete mbaembae Tumpa jei chupe reta wae. Erëi che jare Pedro nduikuaa ma jokua Moisés uikuatía wae rupi’ä ko Tumpa umae yanderé yandereko mbae wae rami. Jaeño Jesucristo re yarowia wae rupi Tumpa umae yanderé yandereko mbae wae rami. Añetete ko Tumpa ndarau kía re awe umae jeko mbae wae rami Moisés arakae uikuatía wae uyapo wae rupi. Jayawe ore ndorowia Jesucristo re, echa’ä ore nduipota Tumpa umae waerä oreré orereko mbae wae rami. Jare jukuárái ko Tumpa uyapo ore ndorowia Cristo re ramo – mbaeti ko Moisés arakae uikuatía wae nduyapo ramo.

<sup>17</sup>Che jare Pedro nduyeko noï Cristo re, jukuárái Tumpa umae waerä oreré orereko mbae wae rami. Mbaeti ma ko ore nduiko Moisés uikuatía wae rupi. Jáeramo jeta judío reta umae oreré ore nduyawi noï wae echa Tumpa koti. Erëi ¿añetete ra nduyawi noï Tumpa koti? ¿Añetete ra mbae kachi ko yaeya yawe jokua Moisés arakae uikuatía wae yayeko waerä Cristo re? Mbaeti etei ko.

<sup>18</sup>Erëi che añatima ye yawe jokuwa aeya wae pe, jokuwa ikota tēi mbae kachi wae Tumpa jowai.

<sup>19</sup>Echa'ā ndarau kiawe ipuere umbiyerowia Tumpa Moisés arakae uikuatía wae rupi. Jukuärái che aipotase tēi ayapo, erëi jokuwa Moisés uikuatía wae umaño'ā cheré ambiyerowia waerä Tumpa, echa'ā jaeño uikuaaka chewe teko pe ai ayawi ramo. Erëi añawe Moisés arakae uikuatía wae ndarau ye ma ime onoi mbaepuere cheré, echa'ā amano rami ma ko chuwi ramo. Añawe ramo chepuere aiko Tumpa pewarä añetete rewe.

<sup>20</sup>Echa'ā che arowia Cristo re ramo, cherekowe indechikue umano rami jokuwa kurusu re Cristo ndiwe. Jare ndarau ye ma aiko tenonde aiko rami, echa'ā añawe Cristo oï ma chepia pe. Jare añawe imeño cherekowe ai rambuwe, jekuaño arowiata Tumpa Tai re. Echa'ā jae cherau jare uñemee umano waerä cheré.

<sup>21</sup>Tumpa ipiakawiete chewe, jare jokuwa che arïro'ā etei. Echa'ā jokuwa rupiño ko yandepuere yayeapikatu Tumpa ndiwe. Añetete yawe yandepuere yayembujupika Tumpa koti Moisés arakae uikuatía wae rupi, jayawe Cristo imano usiriwe'ā etei ko yandewe.

### **Gálatas 3**

#### **Cristo re yarowia wae rupiño ko Tumpa umae yanderé yandereko mbae wae rami**

<sup>1</sup>Pe reta Galacia pewa reta, ¿maera pa pearakuaa'ā mbate piko? Che perowake etei amimbeu kawi ma pewe kërái Jesucristo umano kurusu re wae. ¿Kía ra ko uyapo pewe pearakuaa mbae echa piko waerä?

<sup>2</sup>Jaeño aipota pikuaaka waerä chewe kua: ¿Marái ramo ra Tumpa umee pewe Espiritu Santo? ¿Aramoi piyapo jupi opaete Tumpa arakae jei Moisés pe wae rupi ramo? Mbaeti etei. Pe reta penoi ko Espiritu Santo, echa'ā perowia ñee ikawi wae Cristo rewa piyandu yawe.

<sup>3</sup>Jukuärái ko uyembipi kawi perekowe ipiau wae Espiritu Santo rupi. Erëi ¿këraita pa añawe pe reta pipota peo tenonde peï pe reta piyapo wae rupiño? ¿Pearakuaa'ā etei mbate ra ko, cheiru reta?

<sup>4</sup>Pe reta jeta ma piporara perowia Cristo re ramo. ¿Piyemboe'ā yerá mbae awe jokuwa mbaembae piporara wae rupi? Aipota'ā arowia jukuärái.

<sup>5</sup>Tapirandu ye pewe: “¿Marái ramo ra Tumpa umee pewe Espiritu Santo jare uyapo pepite rupi mbaembae kiawe ipuere'ā etei uyapo wae? ¿Aramoi piko ra Moisés arakae uikuatía wae rupi ramo? Jukuärái'ā ko. Pe reta ime ko penoi Espiritu Santo, echa'ā perowia ñee ikawi wae Cristo rewa piyandu yawe.

<sup>6</sup>Ikawi kua pe yayemingeta waerä yandepia pe mbae uasa Abraham pe wae. Tumpa iñeeriru pe jei yandewe kuärái: “Abraham wirowia Tumpa jei wae re; jáeramo Tumpa umae jese jeko mbae wae rami.” Jukuärái uyekuatía oï.

<sup>7</sup>Jayawe pikuaa kawita ko ipotawe kía wirowia Tumpa re Abraham rami wae, jae ko Abraham tai rami Tumpa jowai.

<sup>8</sup>Jae nunga wi arakaete wiwe uyekuatiaño mái Tumpa iñeeriru pe kërái Tumpa umaeta iko judío mbae wae reta re jeko mbae wae rami jae reta wirowia jese yawe. Kua ñee ikawi wae Tumpa uikuaaka Abraham pe jae jei chupe yawe: “Nde rupi opaete iwí pewa reta uyekouta ñonoï,” jei.

<sup>9</sup>Kua uikuaaka yandewe ipotawe kía Tumpa re wirowia wae uyekouta oï. Abraham wirowia Tumpa jei wae re jare tuicha rupi uyekou. Jare jukuäráita oï wi opaete jukuärái wirowia wae reta.

<sup>10</sup>Erëi opaete kía Moisés arakae uikuatía wae rupi uipota tēi uyembujupika Tumpa koti wae reta, jae reta añetete ko ñonoï Tumpa iarasi pe. Echa’ä Tumpa iñeeriru pe uyekuatía oï kuärái: “Kía mbaeti uyapo yawe opaetei Tumpa uikuatiaka wae rupi, Tumpa iarasi toa jese.” Jukuärái uyekuatía oï.

<sup>11</sup>Jayawe yaikuaa kawi ñaï mbaeti ko kiawe ipuere uyembujupi Tumpa koti Moisés arakae uikuatía wae rupi. Echa’ä ndarau kiawe ipuere uyapo jupi rupi opaetei Tumpa jei wae. Jae nunga wi Tumpa iñeeriru pe jei yandewe kuärái: “Ipotawe kía wirowia Tumpa re wae, Tumpa umae jese jeko mbae wae rami, jare jae uyekouta oï tekowe ipiau wae re.” Jukuärái uyekuatía oï.

<sup>12</sup>Erëi kía uipota iko Moisés arakae uikuatía wae rupiño wae, jokua reño ko ikota. Jukuärái ko jei wi Tumpa iñeeriru pe. Jáeramo jukuärái yaikuaa kía Moisés arakae uikuatía wae rupiño uipota iko wae, mbaeti ko wirowia kawi oï Tumpa re.

<sup>13</sup>Jayawe yepe tēi yande yaiko’ä ko jupi rupi opaete Tumpa arakae jei Moisés pe wae rupi, jare jokua jeko pewa Tumpa iarasi pe yaikose, jeseuwe yande Ya Cristo yanderepi ma chuwi. Echa’ä Tumpa iarasi oata tēi iko yanderé wae oa Cristo re yandepépika pe jae uyekutuka iko kurusu re rambuwe. Jukuärái jei yandewe Tumpa iñeeriru pe jei yawe: “Kía uyekutuka iwira re wae, Tumpa iarasi toa jese.”

<sup>14</sup>Jare Jesucristo kua uyapo yandewe wae rupi, judío mbae wae reta wi ipuere uyekou mbaembae ikawi wae re Tumpa jei Abraham pe uyapota iko wae. Jare jukuärái opaete yande Cristo re yarowia wae reta ñanoi ko Espíritu Santo Tumpa jei umeeta iko wae.

### **Moisés uikuatía wae umbai’ä Tumpa tenonde jei wae**

<sup>15</sup>Hermano mii reta, ñamae mii yandereko re. Yande reta yayapo yawe pēti yemingeta iru ndiwe, jare yamifirma ma yawe, ndarau ye ma kía ipuere umiiru jare umikañi wi.

<sup>16</sup>Jukuäráiete wi ko jokua arakae Tumpa jei uyapota iko Abraham jare iñemoñaá pewartä wae. Jeta wese Tumpa umimbeu Abraham pe uyapota iko chupe reta mbaembae ikawi wae. (Jare kua Tumpa jei wae, mbaeti jei opaete Abraham iñemoñaá reta pe. Erëi Tumpa jei Abraham pe: “Nde jare niñemoñaá piyekouta



peï,” jei chupe. Jare kua “niñemoñaa” jei wae uipota jei pëti wae. Jare jokua pëti wae ko jae Cristo.)

<sup>17</sup>Jáeramo che aipota jae wae ko kua: Tumpa tenonde uyapo pëti yemingeta Abraham ndiwe uyapo waerä chupe mbaembae ikawi wae. Joko wi,

<sup>430</sup> año ma uasa yawe ramo Moisés uikuaaka oreramikue reta pe opaete mbaembae Tumpa jei chupe reta wae. Erëi jokua Moisés uikuatía wae mbaeti etei umbái jokua yemingeta Tumpa tenonde uyapo Abraham ndiwe wae.

<sup>18</sup>Tumpa ipiakawi ramo, uyapo ñotái ko jae jei Abraham pe wae. Jayawe mbaeti ko opaete Moisés arakae uikuatía wae yaiko wae rupi Tumpa uyapo ikawi wae yandewe. Tumpa uyapo ikawi wae yandewe jae jei uyapota iko ramo.

### ¿Maera ra ikawi Moisés arakae uikuatía wae?

<sup>19</sup>Jayawe, ¿maera ra taikue rupi Tumpa uikuaaka Moisés pe kërái yureko reta waerä? Jukuärái Tumpa uikuaaka chupe reta mbae ra ko jae mbae kachi wae jae jowai jare kërái jae reta uyawi ma ko jokua jae jei wae. Jare jokua Moisés uikuatía wae imbaepuere pe yureko reta ara uwäe rewa ou waerä Abraham iñemoñaa rupi Tumpa jei ombouta iko wae. Jare yande yaikuaa jokua Tumpa jei Abraham pe uyapota iko wae ikawiete ko Moisés uikuatía wae wi. Echa’ä Tumpa uyemingeta simi wirae Abraham ndiwe. Erëi jukuärái’ä uyapo Moisés ndiwe. Echa’ä jae uikuaaka iñee Moisés pe araiwa reta rupi, Moisés umimbeu yuapi ye waerä Israel iñemoñaa reta pe.

<sup>20</sup>Jukuärái Tumpa uikuaaka iñee Israel iñemoñaa reta pe ñru wae reta rupi. Erëi Tumpa uyemingeta simi etei Abraham ndiwe – mbaeti ñru kía rupi.

<sup>21</sup>Erëi, ¿kua uipota ra jei Tumpa jei Moisés rupi wae oyowaicho ra oï jokua Tumpa jei Abraham pe uyapota iko wae ndiwe? Mbaeti etei. Echa’ä ndarau kiawe ipuere onoi tekowe ipiau wae Moisés uikuatía wae uyapo wae rupi. Jukuärái yawe, yandepuereta tëi yayembujupi Tumpa jowai mbaembae yayapo wae rupi.

<sup>22</sup>Erëi Tumpa iñeeriru pe uikuaaka yandewe opaete yande reta yayawi ma ko Tumpa koti, jare jokua teko ñanoi wae ñaneapiti oï rami ko. Jare jokua jeko pewa pëti peresoriru pe ñaï rami mbiri Tumpa wi. Erëi jukuärái ko yande, yaikuaa waerä jaëño Jesucristo rupi yepe yandepuere yayeyoraka teko ñanoi wae wi jare ñaï waerä Tumpa jowai yandereko mbae wae rami. Jare jokua jaëño uyeyapota yandewe yarowia yawe Jesucristo re.

<sup>23</sup>Añawe yaikuaa jaëño ko Cristo re yarowia wae rupi Tumpa umae yanderé yandereko mbae wae rami. Erëi ore judiorä nduiko wae reta nduikuaa’äse jokua. Tenonde yawe ore imeta ko jekuaëño nduiko Tumpa arakae jei Moisés pe wae rupi, jare jukuärái ore nduikose peresoriru pe iko wae reta rami Cristo re ndorowia rewa.

<sup>24-25</sup>Añetete, Tumpa arakae uikuaaka Moisés pe kërái nduiko kawi waerä, awiye waerä nduiko ore ndoe wae rupiño. Jare Moisés uikuatía wae rupi nduiko rambuwe, jokua uyandareko iko oreré Cristo ou rewa. Erëi añawe Cristo ou ma

ko. Jare ore ndorowia ma jese wae reta, Tumpa umae oreré orereko mbae wae rami. Jáeramo mbaeti ma ñai Moisés uikuatía wae imbaepuere pe.

### **Añawe yande Cristo re yarowia wae reta ko jae Tumpa tai reta**

<sup>26</sup>Jare añawe opaete pe reta Tumpa tai reta ma ko Jesucristo re perowia ramo.

<sup>27</sup>Añawe Tumpa peapo ma ko pei waerä pëti ramiño Cristo re, jare pe reta pipisi ma ko Jesucristo jeko.

<sup>28</sup>Añetete, ore judiorä nduiko wae reta jare pe judío mbae piko wae reta oyowakeño ko ñai pëti ramiño Cristo re. Jare jae nunga wi täta rupi yayeyokui wae reta jare yayeyokui mbae wae reta oyowakeño ko wi. Jare yande kuimbaerä yaiko wae reta jare kuña reta oyowakeño ko wi. Echa'ä opaete yande reta ñai pëti ramiño Jesucristo re ramo.

<sup>29</sup>Jare pe reta Cristo pewa yawe, Abraham iñemoñaeta reta pewa rami ko wi, echa'ä Cristo ko jae Abraham iñemoñaeta. Jáeramo pe reta wi piyekouta pei mbaembae ikawi wae re Tumpa jei umeeta oi Abraham pe wae.

## **Gálatas 4**

<sup>1</sup>Kua pe ime ye mbae re yayemingeta waerä yandepia pe. Yambijaanga. Yande yaikuaa kawi ñai pëti kuimbae ikokatu wae tai pëti ara onoita opaete tu imbaembae. Erëi tai ukuakuaa oo oi rambuewe, jae ko pëti uyeyokui wae rami, echa'ä imeño iiru wae reta onoi jese mbaepuere.

<sup>2</sup>Echa'ä kuimbae ikokatu wae oñono amokue wae reta tai re uyandareko waerä, jare jae nunga wi jokua mbaembae ikota tai imaerä wae re. Jukuärái oita uwäe ara tu jei wae rewa.

<sup>3</sup>Jare jukuärái wi yande reta yaikose jokua sambiai rami ndei Cristo re yarowia mbowe. Echa'ä yaikose ipotawe kua iwi pewa jeko re, jare jokua teko reta ime wireko mbaepuere yanderé.

<sup>4</sup>Erëi ara uwäe ma yawe Tumpa jei wae, jae ombou Tai kua iwi pe. Jae oa pëti kuña wi yande rami. Jare jae ko judío ramo, jae iko wi Moisés arakae uikuatía wae rupi. Jukuärái Tumpa ombou Tai

<sup>5</sup>orerepi waerä ore Moisés uikuatía wae rupi nduiko wae. Añetete Tumpa ombou Tai yanderepi waerä opaete yande reta yandepuere waerä yaiko Tumpa tai retarä.

<sup>6</sup>Jare Tumpa tai reta ma yaiko ramo, jae ombou Espiritu Santo ikoño mái Tai ndiwe wae iko waerä yandepia pe. Jare jae ko uparawiki yanderé yandepuere waerä yae Tumpa pe yandepia rewe, “Cheru.”

<sup>7</sup>Jayawe, ¿mbae pa añawe yaikuaa kua pe? Pe reta mbaeti ma ko jae täta uyeyokui wae reta rami. Pe reta Tumpa tai reta ma ko. Jare tai reta ma pei ramo, opaete mbaembae Tumpa umeeta tai reta pe wae pemaerä ma ko wi Cristo uyapo pewe wae rupi.

### Pablo uyembipia'ä Galacia pewa reta re

<sup>8</sup>Tenonde yawe, ndei Tumpa pikuaa mbowe, piyeyokuise tēi piko tumparaanga reta pe. Piyapose tēi chupe reta opa kērāi rāi jae reta pembedi waerä.

<sup>9</sup>Erēi añawe pikuaa ma ko Tumpa – ani ikawiete yae waerä chupe Tumpa pekuaa ma. ¿Kērāi ramo jayawe pipota piyerowa ye pei chuwi? ¿Maera pa pipota piyapo ye mbaembae ipuere'ä pembedi piyembujupika waerä Tumpa koti? ¿Pipota yerä piko ye jokua mbaembae imbaepuere pe?

<sup>10</sup>Añawe judío reta jeko rupi pe reta piyemimandúa pei ara reta re, jare yasi reta re, jare año reta re jukuärāi pembedirowia waerä tēi Tumpa.

<sup>11</sup>Che ayembipia'ä ai aramoi jeiño ma chwaa pomboe aiko.

<sup>12</sup>Hermano reta, añawe che pumiñera pemomoe waerä chereko. Che aiko yawe pepite rupi, che aiko pe reta rami – mbaeti aiko peti judío rami. Jare pe reta pepiakawi piko chewe.

<sup>13</sup>Pe pemandúa kawi pei, che jaeramo a yawe pepi amimbeu waerä pewe ñee ikawi wae Cristo rewa, chembaerasi aiko parawete.

<sup>14</sup>Jare yepe tēi chembaerasi yawai iko pewe, jesewe pe reta chereriro'ä jare mbaeti wi chemombo peyuwi. Pe reta chembiasa kawi peti araiwa rami jare Jesucristo rami etei wi.

<sup>15</sup>Che chemandúa kawi jokua yerowia penoise wae re. Jare aikuaa pepuere yawe, pekita tēi peresa peyuwi pemee waerä chewe.

<sup>16</sup>Erēi añawe, ¿jae yerä che perowaicho amimbeu pewe añetete wae re?

<sup>17</sup>Jokua oporomboeraanga wae reta pepipika pe ñonoï wae echa tēi, erēi añetete ueka'ä ñonoï ikawi wae pemaerä. Echa'ä jae reta jaeño uipota pembedi waerä orewi, pe reta piko waerä jae reta ipipika pe.

<sup>18</sup>Añetete ime yawe kía uipota oi pepipika pe wae, jokua ikawi ko tēi. Erēi imeta ko uyapo ikawi waerä pewe añetete rewe, jare uyapota ko jekuaeño – mbaeti che pepi ai yaweño añetete wae nunga uyapo oi reta.

<sup>19</sup>Pe reta ko jae cherai reta rami. Jare añawe kērāi peti kuña imembirasi oi wae ipia'ä oi imembi re rami, jukuäriete wi che chepia'ä ai peré. Jare jukuärāi chepiata'ä ai peré Cristo jeko uyekuaa peré rewa.

<sup>20</sup>Aipota echa ai tēi añawe woi pe reta ndiwe aikuaa waerä mbae ra pereta tēi kua rewa. Echa'ä che aipota'ä echa pumingeta kuärāi. Erēi aikuaa'ä ye ma kērāi pumingeta waerä.

### Yembijaanga Agar jare Sara re wae

<sup>21</sup>Pe Moisés arakae uikuatía wae rupi pipota piko wae reta, ikawi ko piyemingeta waerä pepia pe Moisés uikuatía wae re.

<sup>22</sup>Joko pe uikuaaka yandewe Abraham ime wireko mokui tai. Pëti tai ko jae kuña täta uyeyokui wae Agar jee wae imembi. Jare iiru tai ko jae kuña uyeyokui mbae wae Sara jee wae imembi.

<sup>23</sup>Jokua täta uyeyokui wae imembi oa tu jare ichi jei wae rupiño. Erëi jokua uyeyokui mbae wae imembi oa Tumpa jei wae rupi.

<sup>24</sup>Kua pëti yembijaanga ko. Echa'ä jokua mokui kuña uyembijaanga oï mokui mbaembae ambie ye ye wae Tumpa uyapo wae re. Pëti ko jae jokua yemingeta Tumpa arakae uyapo Israel inemoñaeta ndiwe wae iwitu wasu Sinaí jee wae pe – jae ko Moisés arakae uikuatía wae. Jokua Agar rami ko, echa'ä kërái Agar imembi jae nunga wi täta uyeyokui wae ko, jukuärái wi ko opaete Moisés uikuatía wae rupi yureko wae reta.

<sup>25</sup>Jayawe Agar uyembijaanga oï iwitu wasu Sinaí iwi Arabia pewa re. Jare uyembijaanga oï wi tëta wasu Jerusalén añawe yande yaikuaa wae re. Echa'ä jokua tëta wasu pewa reta yureko Moisés arakae uikuatía wae rupi, jare jukuärái jae reta ko täta uyeyokui wae reta rami.

<sup>26</sup>Erëi jukuärái'ä ko yande reta. Echa'ä Tumpa uyapo ma mbae ambie ye wae yanemaerä. Yande reta ko jae añawe Sara imembi rami. Jare yande ko jae tëta wasu Jerusalén pewa reta wi. Erëi kua Jerusalén, mbaeti ko kua iwi pewa. Jae ko ara pewa. Jare joko pewa reta yureko ipiawiwe rewe, jare uyeyokui'ä täta kía pe awe.

<sup>27</sup>Uyekuatía oï Tumpa ineeriru pe Sara rewa kuärái: “Iyerowia, nde nemembi mbae wae. Jare mbaeti ndikuaa nemembi rasi wae, esapikai ndiyerowia rewe. Echa'ä yepe tëi neme ndereya jare nemembi mbae neï, erëi nemembi reta jetaeteta kuña ime rewe oï wae wi.” Jukuärái uyekuatía oï.

<sup>28</sup>Jare pe chehermano mii reta, pe reta ko jae Tumpa tai reta kërái Tumpa jei uyapota iko wae rupi etei. Jare jukuärái pe reta ko jae Sara imembi Isaac jee wae rami, echa'ä Isaac oa ichi wi kërái Tumpa jei uyapota iko wae rupi etei.

<sup>29</sup>Jare jokua arakaete uasa wae, jokua etei wi uasa oï yandewe añawe. Echa'ä arakaete Agar imembi Ismael jee wae uiporaraka Isaac pe. Jare jukuärái jokua Abraham tai jae jei wae rupiño uyekuaa wae uiporaraka jokua tai Espiritu Santo imbaepuere rupi oa wae pe. Jae ramiño wi añawe rupi Moisés arakae uikuatía wae uipota uyapoka yandewe wae reta uiporaraka ñonoï yandewe yande Espiritu Santo rupi yaiko wae reta pe.

<sup>30</sup>Erëi yayapota ko jokua oporomboeraanga wae reta pe kërái Tumpa ineeriru pe jei wae rami. Echa'ä joko pe jei kuärái: “¡Emombo jokua kuña täta uyeyokui wae imembi ndiwe! Echa'ä jae imembi mbaetita uyekou tu imbaembae re kuña mbaeti kía pe awe uyeyokui wae imembi ndiwe.” Jukuärái jei.

<sup>31</sup>Jayawe hermano mii reta, yande mbaeti ko jae jokua kuña täta uyeyokui wae imembi rami, echa'ä Moisés arakae uikuatía wae mbaeti onoi mbaepuere yanderé ramo. Yande ko jae jokua kuña uyeyokui mbae wae imembi rami.

## Gálatas 6

### Kua ko jae jaeño ma Pablo umbiarakuaa reta

- <sup>1</sup>Jayawe hermano mii reta, ime ye mbaembae re pumbiarakuaa ye waerä. Ime yawe kía pepite pe oï wae uyerowa uyapo waerä mbae kachi wae, jayawe pe Espiritu Santo rupi pewata kawî peï wae reta imeta ko pemborî mii peau rewe jae uyeapikatu ye waerä Tumpa ndiwe. Erëi piyandareko kawî piyé awiye waerä jokua jae uyapo wae uyawika pewe wi Tumpa koti.
- <sup>2</sup>Jayawe piyemborî katu yembiawái reta rupi, piyemborî katu tewita poi wae pewoi wae rami. Jare jukuärái piyapo kawita peï kuri Cristo jei yandewe yayapo waerä wae.
- <sup>3</sup>Erëi ime yawe kía uyererowia katu jokua teko kachi pe oa wae wi, jae uyembitawî ko oï. Echa'ä jae mbae'ä ko.
- <sup>4</sup>Jáeramo awiyeta ko yamboyowake mbae yayapo wae iru wae reta mbae uyapo wae ndiwe awiye waerä yayembutuicha. Erëi pëti pëti ñamae kawî yandiyé kërái mbaembae yayapo wae re. Jare jokua mbaembae ikawî oï yawe, yandepia toï jenda pe.
- <sup>5</sup>Echa'ä Tumpa umee yandewe pëti pëti pe mbarawiki yayapo waerä. Jare pëti pëti wae yanderé oï yayapo waerä yandeparawikî.
- <sup>6</sup>Tumpa iñee re uyemboe oï wae tumee mbaembae ime onoi wae wi imboea pe.
- <sup>7</sup>Awiye piyembitawî. Echa'ä Tumpa umiñatimata oï yandewe pëti pëti pe mbae yayapo wae rupi, jare jokua rewa yande yandepuereta'ä yambitawî Tumpa. Yande yaikuaa kawî ñaï jokua ñañoti wae, jokua etei ko yawiye yawe, yaupi yeta ñaï kuri.
- <sup>8</sup>Jae ramiño wi kía iko yawe jae jei wae rupiño, jokua mbaembae jae uyapo wae rupi ikumewata oï kuri jekowe. Jare jukuärái wi kía iko yawe Espiritu Santo jei wae rupi, jokua mbaembae jae uyapo wae rupi tuicha rupi uyekouta oï kuri tekowe opa mbae wae re.
- <sup>9</sup>Jayawe awiye yandekueri ikawî wae yayapo wae wi. Echa'ä uwäe yawe ara Tumpa jei wae, yayekouta ñaï kuri ikawî wae yayapo wae rupi yandekueri'ä yawe.
- <sup>10</sup>Jáeramo yayapo mii ikawî wae opaete wae pe yandepuere wae rupi. Erëi tenonde Cristo re wirowia wae reta rani ko yamborita.
- <sup>11</sup>Mase, che etei aikuatía aï pewe kua kuantía tuicha wae.
- <sup>12</sup>Jokua imeta ko piyembicircuncidaka jei pewe reta wae jaeño uyembipia'ä ñonoï mbaembae uyekuaa wae reño. Añetete, jae reta jaeño uipota'ä iru judío reta uiporaraka waerä chupe reta. Echa'ä jukuärái uyeyapota oï chupe reta jae reta jei yawe: “Cristo umano kurusu re wae rupiño ko yandepuere ñanoi tekowe opa mbae wae.”

<sup>13</sup>Jayawe jae reta jei pewe piyembicircuncidaka waerä Moisés arakae uikuatía wae rupi. Erëi añetete jae retawe uyapo'ä jupi rupi opaetei Moisés uikuatía wae. Erëi jae reta uipota piyembicircuncidaka waerä ipuere waerä jei uyembutuicha rewe ïru judío reta pe: “Mase kërái ore nduyapo ma judío mbae wae reta uyembicircuncidaka waerä,” jei reta waerä.

### **Pablo jaeño umbutuicha yandeYa Cristo jee**

<sup>14</sup>Erëi che ndarau etei ayembutuicha mbae re awe. Jaeño ambutuichata yandeYa Jesucristo jee jae kurusu re uyapo yandewe wae re. Echa'ä jokua jae uyapo chemaerä jeko pewa, opaete mbaembae kachi wae Cristo re wirowia mbae wae reta ueka wae mbae'ä ma ko chewe. Añetete che amano rami ma ko chuwi. Jare jae reta imaerä mbae'ä ma ko che.

<sup>15</sup>Añetete, yande pëti ramiño ñai Jesucristo re ramo, mbae'ä ko yayembicircuncidaka ma wae. Jare mbae'ä ko wi yayembicircuncidaka mbae wae. Erëi mbae ikawi wae ko jae tekowe ipiau wae ñanoi wae.

<sup>16</sup>Jare Tumpa tumbipiakatu jare tuiparareko opaete kua tekowe ipiau wae rupi yureko wae reta – jae reta ko Tumpa pewa añetete wae reta.

<sup>17</sup>Mase, chere te re ime uyekuaa oï chembipere wae reta jendakue. Jokua uikuaaka oï kërái che tuicha aiporara ayeyokui kawi waerä yandeYa Cristo pe. Erëi jukuärái'ä ko jokua oporomboe kachi wae reta. Jáeramo añawe wiwe awiye ma jae reta chembiawái toï kuri.

<sup>18</sup>Jayawe hermano mii reta, yandeYa Jesucristo jekuaeño tipiakawi pewe. Jukuärái tuiko.

## Efesios

### Kua tupapire rewa:

Kua tupapire Pablo uikuatía jare wiraaka Cristo re wirowia wae reta pe tēta wasu Éfeso pewa pe. Pablo uikuatía kua tupapire peresoriru pe iko rambuewe tēta wasu Roma pe. Jokua rambuewe jae uikuatía wi tupapire reta Filipenses, Colosenses, jare Filemón. Pablo omondo imboria Tíquico jee wae wiraa waerä kua tupapire Éfeso pe. Kua tupapire rupi Pablo oporomboe kērái Tumpa ipiakawi rewe uyapo opaete wae Cristo re wirowia wae reta ñonoï waerä pēti ramiño Cristo re. Pablo oporomboe wi kērái kía Cristo re wirowia wae oïta Tumpa tairä. Jáeramo ikota ko añetete wae rupi kērái Tumpa jei wae rupi.

### Efesios 1

#### Pablo wiraaka saludo

<sup>1</sup>Cherikei reta, cheriwi reta, jare cherindi reta tēta wasu Éfeso pe piko wae, che araaka ai pewe saludo yandeYa Jesucristo jee re. Che ko jae Pablo. YandeYa Jesucristo chemondo jae jee re amimbeu waerä jesewa, echa'ä jukuärái Tumpa uipota ramo. Jare aikuatía ai kua tupapire pewe Cristo re perowia wae reta pe. Pe reta ko jae Tumpa peñono tee jae imaerä.

<sup>2</sup>YandeRu Tumpa jare yandeYa Jesucristo jekuaeño tipiakawi pewe jare tuyapo pewe piko waerä pepiakatu rewe.

#### **Pablo uikuaaka yandewe kērái Tumpa uyapo mbaembae ikawiete wae yanemaerä, echa'ä pēti ramiño ñai ramo Cristo re**

<sup>3</sup>Jambutuicha yandeRu Tumpa jee! Jae ko yandeYa Jesucristo Tu. Yambutuicha jae jee, echa'ä jae yandapo pēti ramiño Cristo re. Jare pēti ramiño ñai Cristo re ramo, jae ombou yandewe ara wi opaete mbaembae ikawiete wae ñanemimiräta waerä Tumpa re.

<sup>4</sup>Jukuärái Tumpa uipota uyapo yandewe opaete yande pēti ramiño ñai Cristo re wae. Echa'ä iyipi wiwe jae yanderau ndei iwi uyapo mbowe, jare yandeparawo ñai waerä jae imaeräño jare yandereko mbae wae rami.

<sup>5-7</sup>Jare wi iyipi wiwe Tumpa yandeparawo yaiko waerä tai jare tayi retarä yanderauete ramo. Jokua ko jae Tumpa ipiyemingeta uyerowia rewe uyapota iko wae, echa'ä jukuärái jae uipota ramo. Jáeramo ipiakawi ramo, ombou Cristo kua iwi pe. Jare Cristo upiyere juwi opa umbái waerä yandewi mbaembae yayawi Tumpa koti wae. Jukuärái jae yanderepi ma jokua teko yareko wae wi. Jayawe Tumpa yandapo ñai waerä pēti ramiño Tai uauete wae re. Jáeramo uyerowia umae yanderé. Jukuärái Tumpa uyapo yandewe yambutuicha waerä Tumpa jee ipiakawi tuichaete yandewe ramo.

<sup>8</sup>¡Tuichaete ko Tumpa ipiakawi yandewe wae! Echa'ä jae umee yandewe arakuaa. Jáeramo yandepuere yaikuaa añetete wae Tumpa rewa.

<sup>9</sup>Jukuärái Tumpa uikuaaka yandewe ipiyemingeta ikawiete wae. Jokua ko jae mbaembae uyapota oï Cristo rupi wae. Jare jokua ipiyemingeta tenonde yawe jae uikuaaka'ä kía pe awe. Erëi añawe uyerowia rewe Tumpa jokua uikuaaka ma yandewe.

<sup>10</sup>Jare Tumpa ipiyemingeta ko kuärái: Jokua ara jae jei wae uwäe yawe, umbatita opaetei ara pe ñonoï wae reta jare iwi pe ñonoï wae reta wi, jare oñonota Cristo iko waerä jae reta imburuwicha wasurä jaeño mái pewa.

<sup>11</sup>Jare yande ñai pëti ramiño Cristo re ramo, Tumpa umee yandewe yandepuere yayekou waerä opaete mbaembae Tumpa onoi Cristo pewarä wae re. Jukuärái ko tenonde wiwe Tumpa ipiyemingeta. Jare jokua jae uipota uyapo wae, jae jekuaeño uyapo.

<sup>12</sup>Jare jae ipiyemingeta wi ko ore judiorä nduiko wae rani ndorowia waerä Cristo re, jare jukuärái rupi jae jee uyembutuichaka waerä.

<sup>13</sup>Erëi oremaeräño'ä ko kua mbae ikawi wae. Echa'ä añawe pemaerä wi ko, pe judío mbae piko wae reta. Echa'ä pe reta piyandu yawe ñee añetete wae Cristo rewa jare perowia jese yawe, Tumpa peapo jae imaerä. Jare umee wi pewe Espíritu Santo kërái jae jei arakae wiwe umeeta iko jese wirowia wae reta pe wae. Jukuärái Tumpa umee yandewe Espíritu Santo uikuaaka waerä yandewe Tumpa pewa ma ko yande wae jaeño mái pewa.

<sup>14</sup>Jare jokuaño'ä ko. Jae nunga wi Espíritu Santo ñanoi ramo, uikuaaka yandewe pëti ara imeta ñanoi opaete mbaembae Tumpa jei umeeta yandewe wae. Jokua ara ramo opaete yarowia jese wae reta Tumpa yanderepita oï opaete mbae ikawi mbae wae wi. Jayawe, ¡yambutuicha Tumpa jee jae imbaepuere tuichaete ramo!

### **Pablo uyerureñoi Tumpa pe arakuaa umee waerä chupe reta**

<sup>15</sup>Jayawe hermano reta, jeräkua chewe perowia Jesucristo re wae jare kërái piyerau wae.<sup>16</sup>Jare jokua ayandu wiwe jekuaeño amee ai yasurupái Tumpa pe jae uyapo pewe wae re. Jare ayerureñoi ai Tumpa pe peré.

<sup>17</sup>Aeka ai chupe umee pewe waerä arakuaa Espíritu Santo rupi, jukuärái pikuaa kawi waerä Tumpa, yandeYa Jesucristo Tu jupiete ye wae.

<sup>18</sup>Aeka ai chupe wi pembipiarakuaa katu waerä, jukuärái pikuaa kawi waerä kërái ikawiete ye ko opaete mbaembae Tumpa ime onoi pemaerä wae. Jare jokua ko peäro peï perowia katu rewe, echa'ä jukuärái Tumpa umeeta oï opaete kía jae imaerä wae pe. Añetete ikawiete ye ko.

<sup>19</sup>Jare aeka ai chupe wi pikuaa kawi waerä tuichaete ye ko Tumpa imbaepuere yanembori waerä opaete yande Cristo re yarowia wae reta. Jukuärái ayerureñoi ai Tumpa pe peré.



## **Tumpa umee Cristo pe mbaepuere opaete wae re**

Jayawe che aipota pikuaa kawi waerä Tumpa imbaepuere rewa. Tumpa uikuaaka ma opaete wae pe tuichaete ye ko imbaepuere.

<sup>20</sup>Echa'ä jokua imbaepuere rupi Tumpa umbijekowe ye Cristo ueru umanokue wae reta ipite wi. Jare jokua imbaepuere rupi Tumpa wiraa Cristo ara pe jare umee chupe uwapi waerä iyike pe iyakata koti.

<sup>21</sup>Joko pe Tumpa ndiwe Cristo ime onoi mbaepuere tuichaete wae opaete mburuwicha reta ara jare iwi pe ñonoï wae reta re. Jukuärái Cristo Tu ndiwe imbaepuere tuichaete ko opaete wae reta mbaepuere ime onoi wae wi añawe wiwe jare jaeño mái pewa.

<sup>22-23</sup>Jayawe Tumpa umee Cristo pe mbaepuere opaete mbaembae re. Jare umee wi chupe iko waerä opaete jese wirowia wae reta iYarä. Kua yandepuere yambijaanga yanderete re. Echa'ä ñanäka ime onoi mbaepuere yanderete re. Jukuärái wi Cristo ko ñanäka rami jare ime onoi mbaepuere yanderé. Jare opaete yande Cristo re yarowia wae reta ñai ma ko jae jete rami. Jae imbaepuere tuichaete ye ko jare opa tinee ara jare iwi. Jare jokua imbaepuere uparawiki oï yande rupi uyeyapo waerä jae jei wae.

## **Efesios 2**

### **Tumpa yanderepi teko ñanoi ikoti wae wi ipiakawi ramo**

<sup>1</sup>Erëi ndei Jesucristo re perowia mbowe, pemano wae echa piko mbiri tekowe iYa wi, pereko kachi rupi jare piyawu Tumpa koti jeko pewa.

<sup>2</sup>Jukuärái pe reta pikose, echa'ä jekuaeño pemomoe piko kua iwi pewa reta jeko kachi wae re. Piyeyokuise piko Añawasu pe. Jae ko opaete añä reta imburuwicha, jare yandepuere'ä yaecha wae. Jae ko espíritu ikawi mbae wae jare uparawiki oï imbaepuere rewe opaete Cristo re wirowia mbae wae reta ipia pe.

<sup>3</sup>Jare pe judío mbae piko wae retaño'ä ko jukuärái pikose, echa'ä ore judiorä nduiko wae jukuärái wi nduikose. Añetete opaetei yande jukuärái yaikose ndei yarowia Jesucristo re mbowe. Yande yaikose yae wae rupiño, jare jekuaeño yayapo mbaembae kachi wae yandepiyemingeta jei wae rupiño. Jáeramo kua yandereko indechikue jeko pewa, jupi ko Tumpa uiporarakata yandewe waerä tēi opaete iru wae reta pe uiporarakata oï wae rami.

<sup>4</sup>Erëi Tumpa ipiakawiete jare yanderauete.

<sup>5</sup>Jáeramo yepe tēi ñamano wae echa yaiko Tumpa wi yayawu ikoti jeko pewa, jesewe Tumpa umee yandewe tekowe ipiau wae. ¿Kerái ra ko jokua? Yaikuaa ñai yandeRu Tumpa umbijekowe ye Cristo ueru umanokue wae reta ipite wi. Jukuärái rami Tumpa yanembijekowe ye ma jae yandapo pēti ramiño Cristo re yawe. Jayawe Tumpa ipiakawu tuicha ramo, yanderepi ma teko ikoti ñanoi wae wi.

<sup>6</sup>Jare jokuaño'ä ko. Jae nunga wi yandeRu Tumpa wiraa Cristo ara pe, jare jae uwapi oï Tumpa iyike pe iyakata koti jare onoi mbaepuere opaete wae re. Jukuärái rami wi Tumpa umae yanderé yawapi ñai Cristo ndiwe ara pe ñanoi waerä mbaepuere jae ndiwe. Jukuärái ko, echa'ä yande ñai pëti ramiño Cristo re ramo.

<sup>7</sup>Jukuärái Tumpa uyapo yandewe uikuaaka kawi waerä opaete wae pe taikue rupi kërái tuichaete ko Tumpa ipiakawi yanemaerä Jesucristo rupi.

<sup>8</sup>Echa'ä Cristo re yarowia wae rupi Tumpa yanderepi mbaembae yayawi ikoti wae wi. Jare jukuärái uyapo yandewe yambiepi mbae rewe ipiakawi ramo. Yande yamingana wae rupi'ä ko Tumpa yanderepi.

<sup>9</sup>Mbaeti kía mbaembae ikawi wae uyapo wae rupi ipuere jaei uyerepi. Jáeramo mbaeti kiawe ipuere jei uyembutuicha rewe: “Jupi ayapo wae rupi ko ayerepi ma.”

<sup>10</sup>¿Maera ra yayapo jayawe mbaembae ikawi wae? Mase, Tumpa umbipiau ma yanderekowe jae yandapo pëti ramiño Cristo re yawe. Jare añawe yanderekowe uyembipiau ma ramo, Tumpa uipota yayapo waerä mbaembae ikawi wae tenonde wiwe jae uipota yayapo waerä wae. Echa'ä jokuaerä ko Tumpa yandapo.

### **Cristo yanembipiakatu judío reta jare judío mbae wae reta ndiwe, jare Tumpa ndiwe wi**

<sup>11</sup>Añawe che aipota jae pewe, pe judío mbae piko wae, kuärái: Pemandúa kërái pikose mbiri Tumpa wi, echa'ä pesi wi pea judío mbae wae reta ramo. Jáeramo judío reta jei pekoti: “Jokua ko jae uyembicircuncidaka mbae wae reta, jare mbiri Tumpa wi yureko wae reta,” jei reta pekoti. Jukuärái jokua judío reta uyererowia katu uyembicircuncidaka ramo. Jae reta wirowia tõi jokua uyembicircuncidaka wae rupi iko ma Tumpa pewarä. Erëi jokua yembicircuncida oï jete ipire reño, jare umbiambie'ä oï ipia chuwi.

<sup>12</sup>Pemandúa jokua ara reta rupi pe judío mbae piko wae pikose mbiri Cristo wi. Jare opaete mbaembae ikawiete wae Tumpa jei umeeta iko Israel inemoñaeta reta pe wae pemaerä'ä ko, echa'ä Israel inemoñaeta reta'ä ko pe reta ramo. Jare jokua yemingeta Tumpa arakae uyapo Israel inemoñaeta reta ndiwe wae pemaerä'ä ko. Jáeramo pikoiñose kua iwi pe mbiriete Tumpa wi.

<sup>13</sup>Erëi añawe Tumpa pemokoiño ma iyé Jesucristo rupi, echa'ä Cristo upiyere juwi kurusu re umbái waerä teko penoi Tumpa koti wae. Jare Cristo re perowia ramo, Tumpa peapo ma pëti ramiño jese.

<sup>14-15</sup>Pe reta pikuaa pei tenonde yawe ore judiorä nduiko wae numae kawi'ä peré. Echa'ä pe reta pikuaa'ä jare piyapo'ä Moisés arakae uikuatía wae. Jare oremaerä jokua ko jae orereko iyipi. Jáeramo ore nduyembisirise pewi jare nduyembowaichose pe reta ndiwe. Erëi añawe Cristo kurusu re umano wae rupi opa ma umbái jokua ñamitää imese wae. Echa'ä añawe wiwe kiawe oyata'ä Tumpa re Moisés uikuatía wae rupi. Jáeramo mbaeti ye ma mbae re yayembowaicho waerä yande yepái. Cristo ipiyemingeta ko jae yandapo waerä pëti ramiño iyé, judío jare judío mbae wae reta, jare jukuärái yanembipiakatu waerä yande yepái.

<sup>16</sup>Jare jukuärái jae uyapo ma imano kurusu re wae rupi. Añetete Cristo imano rupi yanembipiakatu ma yande yepái jare jae nunga wi yanembipiakatu ma Tumpa ndiwe. Jáeramo mbaeti ye ma yayembowaicho ñái yande yepái.

<sup>17</sup>Jayawe Cristo ou umimbeu waerä yandewe ñee ikawi wae kërái yayeapikatu waerä Tumpa ndiwe. Jokua ñee ko oremaerä, ore koiño nduiko Tumpa wi wae. Jare pemaerä wi ko, pe reta tenonde pikose mbiri Tumpa wi wae.

<sup>18</sup>Jukuärái Cristo uyapo yandewe ramo, päwe rewe yandepuere yaya yandeRu Tumpa re Espíritu Santo rupi.

### **Opaete yande Cristo re yarowia wae reta ñái Tumpa jëta rami**

<sup>19</sup>Jáeramo pe reta judío mbae piko wae ambie'ä ma ko Tumpa pewarä, jare piyembiyao tee'ä ma ko Tumpa imaerä iko wae reta wi. Añawe pe reta wi ko Tumpa jëtararä pei waerä ara pe opaete iru uñeñono tee Tumpa pewarä wae reta ndiwe.

<sup>20</sup>Yandepuere yambijaanga pëti tëta re: Opaete yande Cristo re yarowia wae reta ko jae Tumpa jëta rami. Pëti tëta ikawi oï waerä, imeta ko ikawi oï iwapika. Tumpa jëta iwapika ko jae Jesús jemimboe tenondewaete reta jare Cristo rewa tenondete umimbeu wae reta. Jare Jesucristo etei ko jae tëta iwapika ita tenondewaete uñeñono wae rami.

<sup>21</sup>Jare yaikuaa ñái ime yawe kía tëta uyapo wae, jae oñono opaete ladrillo uyepindekua rewe jenda jenda pe kawi jëtarä uyapo kawi waerä. Jukuärái wi yande reta pëti ramiño ñái Cristo re ramo, Tumpa ñaneñono kawi pëti pëti wae yanderenda rupi. Jukuärái Tumpa yandapo oï itupaorä jupi wae rami.

<sup>22</sup>Jare pe reta judío mbae piko wae pei pëti ramiño ore ndiwe. Jukuärái opaete rewe yande reta ko jae Tumpa jëta rami jare oï pipe Espíritu Santo.

## **Efesios 3**

### **Tumpa uikuaaka ma yandewe ipiayemingeta yanderepita wae**

<sup>1-2</sup>Pe reta judío mbae piko wae, jeräkua ma ko pewe kërái Jesucristo umee chewe mbarawiki ikawi wae amimbeu waerä pewe ñee Tumpa ipiakawi rewa. Jayawe amiesäka pewe kërái Cristo rupi yandepuere ñanoi tekowe opa mbae wae. Jare jukuärái ayeyokui Jesucristo pe ramo, peresoriru pe ai.

<sup>3</sup>Pikuaa ma ko aipo pei kërái Tumpa etei uikuaaka ma chewe ipiayemingeta Cristo rewa jae tenonde yawe uikuaaka'ä etei wae. Jare kua rewa aikuatía ma pewe michi kua tupapire pe.

<sup>4</sup>Jayawe pemingeta yawe kua tupapire, pikuaa kawita ko kërái aikuaa ai Tumpa ipiayemingeta Cristo rewa.

<sup>5</sup>Kua ipiayemingeta tenonde yawe jae uikuaaka'ä kía pe awe. Erëi añawe Espíritu Santo rupi jae uikuaaka ma orewe. Ore ko jae Jesús oremondo jae jee re wae jare ñee Tumpa wi etei ou wae numimbeu wae reta.

<sup>6</sup>Jare Tumpa ipiayemingeta ko kua: Judío jare judío mbae Cristo re wírowia wae reta jae ma ko Tumpa tai jare tayi reta. Jae reta ñonoï ma ko pëti ramiño Cristo re jare oyowakeño onoitamaerä opaete mbaembae ikawiete wae Tumpa umeeta oï tai reta pe wae.

<sup>7</sup>Jukuärái ko Tumpa ipiayemingeta. Jare yepe tēi tenonde yawe arowia'ä aiko Cristo re, jeseuwe Tumpa ipiakawi tuicha chekoti. Echa'ä jae cheparawo ayeyokui waerä chupe imbaepuere rupi amimbeu waerä kua ñee ikawi wae iru wae reta pe.

<sup>8</sup>¡Tuichaete ko Tumpa ipiakawi yandekoti! Mase, che ko jae opaete Cristo re wírowia wae reta wi taikuewaete, echa'ä tenonde yawe ayembowaicho aiko Cristo koti. Erēi Tumpa ipiakawiete rupi umee chewe amimbeu waerä judío mbae wae reta pe kērái Tumpa umeeta oï ipotawe kía Cristo re wírowia wae pe jeta mbaembae ikawiete ye opa mbae wae.

<sup>9</sup>Jare umee wi chewe amiesäka kawi waerä opaete wae pe kērái jae uyapo oï ipiayemingeta wae. Echa'ä Tumpa opaete mbaembae uyapo wiwe uikuaaka'ä ipiayemingeta kía pe awe. Erēi añawe jae uikuaaka ma yandewe.

<sup>10-11</sup>Jukuärái Tumpa ipiayemingeta ikoño mái wae uyeyapo ma oï yandeYa Jesucristo rupi. Jare Tumpa uipota wi opaete araiwa reta uecha waerä jokua mbaembae jae uyapo wae Cristo re yarowia wae reta pe. Jare jukuärái araiwa reta jare araiwa itenondewa retawe uikuaa kērái tuichaete ye ko Tumpa iyarakuaa wae.

<sup>12</sup>Jayawe Cristo re yarowia ramo, pëti ramiño ñai jese. Jáeramo yandepuere ñañemirru kawi Tumpa ndiwe yakiye mbae rewe jare yandepiawiwe rewe.

<sup>13</sup>¡Ikawiete ye ko kua mbaembae Tumpa uyapo ma yandewe wae! Jáeramo yepe tēi che peresoriru pe aiporara ai, erēi awiye kua pikuaa wae re piyemiaki. Cheyukenda reta che amimbeu pewe Cristo rewa ramo. Erēi ayerowia ai Tumpa tai retarä ma pei ramo.

### **Pablo uikuaaka yandewe kērái Cristo yanderauete**

<sup>14</sup>Chepia pe ayemingeta yawe Tumpa ipiayemingeta ikawiete wae re, añeño chetawa re yandeRu Tumpa jowai ayerure waerä chupe peré. Jae ko yandeYa Jesucristo Tu.

<sup>15</sup>Jare jae ko opaete Cristo re wírowia wae reta ara pe ma ñonoï wae jare imeño iwi pe ñonoï wae reta Tu. Jare jae ko opaete mbaembae iyapoa.

<sup>16</sup>¡Tuichaete ko yandeRu Tumpa imbaepuere jupiete wae! Jare aeka ai Tumpa pe umimiräta waerä pepia Espíritu Santo rupi.

<sup>17</sup>Jare aeka ai chupe wi piñemiatangätu perowia katu waerä Cristo re, jukuärái Cristo jekuaeño oï waerä pepia pe ipiawiwe rewe. Jukuärái rupi pepuere piyerau päwe añetete rewe. Jáeramo piñemimirätata pei Tumpa re pëti temiti kipe japo oï wae rami.

<sup>18</sup>Jare jukuärái pepuere pikuaa kawi opaete Cristo re wirowia wae reta ndiwe kërái Cristo yanderau wae tuichaete ye ko, echa'ä opa tinee oï ara jare iwi.

<sup>19</sup>Mbaeti kiawe ipuere uikuaa opaete Cristo yanderau wae rewa, echa'ä tuichaete ye ko. Jáeramo aeka äi Tumpa pe jekuaeño pembipiarakuaa waerä jesewa, jare jukuärái peya katu waerä Tumpa jeko jupi wae re. Jukuärái ayerure äi chupe peré.

<sup>20</sup>¡Tuyembutuichaka Tumpa jee! Echa'ä jae imbaepuere tuichaete wae rupi uparawiki oï yandepia pe. Jare jae ipuere uyapo jetaete mbaembae yaeka chupe wae wi jare jetaete mbaembae yandepiyemingeta ueka wae wi.

<sup>21</sup>Opaete yande ñäi pëti ramiño Jesucristo re wae reta yambutuicha Tumpa jee, jae ipiakawiete yandewe ramo. ¡Tuyembutuichaka Tumpa jee jaeño mái pewa! Jukuärái tuiko.

## Efesios 4

### Yande ñäi pëti ramiño Espíritu Santo rupi

<sup>1</sup>Che äi peresoriru pe ayeyokui yandeYa Jesucristo pe jeko pewa ramo. Mase, yayeyokui Tumpa pe yawe, ipuere ou yandewe jeta yembiawái reta. Erëi jesewe che aipota pumikirëi mii. Añawe yaikuaa ñäi pëti ramiño ñäi Cristo re ramo, Tumpa uyapo ma jeta mbaembae ikawiete wae yanemaerä. Jáeramo jekuaeño pechaka mii teko kawi, echa'ä jokuaerä ko Tumpa yandeparawo. Piko teko kawi rupi iru wae reta jowai jae reta ipuere uikuaa waerä pe reta ko jae Tumpa tai reta.

<sup>2</sup>Jayawe pe reta pikota ko kuärái: Piñemimichi peyuwi jare pepiakawi peyupe. Awiye piñeengata peyupe. Pepiawasu peyupe jare perupia mii peyupe piyeru päwe rewe.

<sup>3</sup>Espíritu Santo yandapo ma pëti ramiño yaiko waerä. Jáeramo piyandareko kawi piyé pepiakatu rewe jukuärái piko waerä.

<sup>4</sup>Añetete yande ñäi pëti ramiño, echa'ä Cristo jete rami ko ñäi. Jae nunga wi Espíritu Santo yandepia pe oï wae pëtiño ko. Jae ramiño wi pëti ramiño yande ñäaro ñäi yarowia katu rewe jokua ara ñanoi waerä opaete mbaembae ikawiete wae Tumpa umeeta oï yandewe wae.

<sup>5</sup>Ime ñanoi wi pëtiño yandeYa, jare jae iñee re yarowia ñäi pëti ramiño. Jare wi opaete yande yayembisakambuka ma i pe yaechaka waerä iru wae reta pe kërái ñäi ma pëti ramiño Cristo re wae.

<sup>6</sup>Jare opaete yande ñanoi wi pëtiño yandeRu Tumpa. Jae ko opaete mbaembae iYa. Jae oï yandepia pe, jare yande rupi uyapo oï iparawiki kua iwi pe. Jukuärái yandepuere yaikuaa kawi pëti ramiño ko ñäi wae.

**Cristo uiparawo amokue wae reta uyeyokui waerä jese wirowia wae reta pe**

<sup>7</sup>Erëi yepe tëi yande ñäi pëti ramiño, jesewe Cristo ipiakawi rupi umee yandewe pëti pëti wae pe yaikatu yayapo waerä ambie ye ye mbarawiki yayeyokui chupe waerä.

<sup>8</sup>Jukuärái ko arakae wiwe Tumpa jei ñeeriru pe, echa'ä uyekuatía oï Cristo rewa kuärái: “Jae uyeupi oo ye iwate koti yawe, oo upurumiamiri wae wiraa oï ipereso reta wae rami. Jare umee mbaembae ikawi wae kuimbae jare kuña reta pe.” Jukuärái uyekuatía oï.

<sup>9</sup>Jokua uyekuatía oï wae jei yawe, “Jae uyeupi oo ye iwate koti yawe,” ¿mbae pa uipota uikuaaka yandewe? Uikuaaka yandewe jae tenonde ou ara wi iwí pe.

<sup>10</sup>Jare jokua ou wae ko jae Cristo. Joko wi uyeupi oo ye iwate ye ara pe oï waerä opaete kerupi rupi.

<sup>11</sup>Jare jae etei uiparawo amokue wae reta uyeyokui waerä jese wirowia wae reta pe. Amokue jae reta Cristo omondo jae jee re umimbeu waerä jese opaete kerupi. Jare wi amokue jae reta jae uiparawo umimbeu waerä ñee Tumpa wi etei ou wae. Jare wi amokue jae reta jae uiparawo umimbeu waerä ñee ikawi wae Cristo rewa ndei uikuaa wae reta pe. Jare wi amokue jae reta jae uiparawo uyandareko kawi waerä Cristo re wirowia wae reta re jare omboe kawi reta waerä Tumpa ñee re.

<sup>12</sup>Kua reta Cristo uiparawo yanemboe waerä kërái yayeyokui kawi waerä Tumpa pe, opaete yande Cristo jete pewa rami ñái wae reta, jare jukuärái ñanemimiräta waerä Tumpa koti.

<sup>13</sup>Jare jukuärái opaete yande ñáita pëti ramiño mbaembae jupiete yarowia wae re jare mbaembae yaikuaa Tumpa Tai rewa wae re. Jare jukuärái yakuakuaata ya yandereko oï rewa Cristo jeko rami.

### **Cristo uipota ñanepiräta kawi waerä Tumpa koti**

<sup>14</sup>Jukuärái ñanepiräta kawi yawe Tumpa koti, yaikota'ä ma sambiai reta rami. Echa'ä sambiai reta uikuaa'ä mbae re wirowia waerä. Pëti ara ipuere wirowia pëti mbae re, jare ñru ara ipuere wirowia ambie re. Erëi ñanepiräta kawi Tumpa koti yawe, ipuereta'ä kiawe yanembitawi. Echa'ä ime jeta wae reta ikatu upurumbitawi waerä kachi oporomboe wae rupi.

<sup>15</sup>Yayemboe kawi yawe, yaikuaata ñái añetete wae, jare yayerau päwe rewe yamboe yuapi yeta ñru wae reta. Jukuärái yaikota Cristo jeko jupi wae rami. Jare jukuärái ko Cristo uipota yaiko waerä, echa'ä jae ko ñanäka rami jare yande ñái ma ko jae jete rami.

<sup>16</sup>Kua yandepuere yambijaanga yanderete re. Echa'ä yanderete pe oï wae ambie ye ye ko, jare pëti pëti jokua reta ime onoi iparawikii. Erëi opaete jokua reta pëtiño ko. Jukuärái wi ko yande Cristo re yarowia wae reta. Cristo ko jae ñanäka rami, jare yande ñái ma ko jae jete rami. Pëti pëti yande ime ñanoi yandeparawikii Tumpa uipota yayapo waerä wae. Jare jukuärái yayapo yawe yayerau rewe, jare yayembori päwe rewe yawe, jayawe ñañemimirätata ñái Tumpa re.

### **Këraita ra ikawi yaiko waerä yanderekowe ipiau wae rupi**

- <sup>17</sup>Añawe che tae pewe yandeYa Jesús jee re piyandareko kawi piyé. Awiye ma piko Cristo re wirowia mbae wae reta yureko wae rami, echa'ä jae reta ipiyamingeta reta usiriwe'ä ko maeräwe.
- <sup>18</sup>Jae reta uyembipiatäta Tumpa wi, jare uipota'ä uyapisaka reta ñee ikawi wae Tumpa rewa. Jáeramo ñonoi reta pütumimbi pe wae echa jare mbiri Tumpa tekowe ipiau wae umee wae wi.
- <sup>19</sup>Imara'ä ma reta. Jáeramo opa imbikere reta jare uyapo reta opaete mbaembae kachi waeño.
- <sup>20</sup>Erëi jokua jae'ä ko pe reta piyemboe wae piyemboe yawe Cristo rewa. Echa'ä piyemboe ma ko awiye waerä piko jukuärái.
- <sup>21</sup>Añawe piyemboe ma Cristo re ramo, pikuaa pei añetete wae Cristo rupi ou wae.
- <sup>22</sup>Jare piyemboe ma kërái imeta ko opa peya peyuwi pereko indechikue awiye piko waerä kërái tenonde pikose wae rami. Echa'ä tenonde pikose pere wae rupiño, jare piyembitawi piko perete uipota wae rupiño. Erëi jokua mbaembae ko pererukachita.
- <sup>23</sup>Jare pe reta piyemboe ma wi pemaño waerä Espiritu Santo re umbipiau waerä pepia Tumpa koti,
- <sup>24</sup>jare kërái imeta ko piko pereko ipiau wae rupi. Jukuärái piyapota ikawi waeño jare jupi waeño. Jukuärái ko Tumpa jeko jare jukuäräita ko pereko wi.
- <sup>25</sup>Jáeramo awiyeta ma ko papu peyupe. Pereñoi añetete wae perapicha pe. Echa'ä yande Cristo re yarowia wae reta pëti ramiño ko ñai jete rami.
- <sup>26</sup>Aramoi kía ndiwe pepochi yawe, piyandareko kawi piyé awiye waerä piyawo Tumpa koti. Jayawe piyeapikatu jawoi pewa ndei ara uasa mbowe.
- <sup>27</sup>Echa'ä yayeapikatu'ä yawe jupiwoi, ñamaño ñai Añawasú re uyuwanga katu yanderé waerä.
- <sup>28</sup>Imondase wae awiye ye ma timonda. Añawe Cristo re wirowia wae ko; jayawe jukuärái tuiko. Añawe wiwe tuyapo iyupe mbarawiki ikawi wae ime onoi waerä imbaembaerä jare ipuere wi ombori waerä iparawete wae.
- <sup>29</sup>Jare piyandareko kawi piyé mbae pere wae rupi. Awiye ñee ikawi mbae wae pemoë. Pemoë ñee ikawi waeño pemikirëi waerä iru wae reta. Jare jukuärái ipotawe kía piñee re uyapisaka wae uñemimirätata Tumpa re.
- <sup>30</sup>Awiye pembipiatiti Espiritu Santo Tumpa umee pewe wae. Echa'ä Tumpa umee yandewe Espiritu Santo uikuaaka waerä yandewe jae umbiepi ma ko yande yaiko waerä jae imaerä jaeño mái pewa. Jare Espiritu Santo ñanoi ramo, uikuaaka wi yandewe kërái ara taikuewa pe Tumpa opata yanderepi oi opaete mbae ikawi mbae wae wi.

<sup>31</sup>Jare awiye ma pembasi piko peyupe. Peya opaete mbochi jare arasi reta. Awiye ma piñengata peyupe. Awiye ma piyemingeta kachi piyé. Jare awiye ma piyapo ikawi mbae wae peyupe.

<sup>32</sup>Pikota ko kuárái: Pikota ko piyerau päwe rewe jare pepiakawita ko peyupe. Kérái Cristo rupi Tumpa imandua'á ma yandewe ikawi mbae yayapo wae re, jukuárái wi pe reta awiye pemandúa peyupe ikawi mbae piyapo wae re. Jukuáraita ko piko.

## Efesios 5

### Ñáita ko Cristo jembipe pe

<sup>1</sup>Yande ko jae yandeRu Tumpa tai uauete wae reta. Jare yaikuaa tai reta uyapo tu uyapo wae rami. Jáeramo jekuaeño piyapo Tumpa jeko jupi wae rami.

<sup>2</sup>Jukuáraita ko piko piyerau päwe rewe. Cristo ko uikuaaka yandewe kéréai yayerau päwe waerä. Echa'á Cristo yanderauete ramo, uñemee umbái waerä yandewi teko Tumpa koti ñanoi wae. Jae umee jekowe yanderé kéréai pëti mbaemimba kía uyuka umee Tumpa pe wae rami. Jare yandeRu Tumpa uyerowiaete umae Cristo uyapo wae re. Jukuárái Cristo uikuaaka yandewe kéréai yayerau päwe waerä.

<sup>3</sup>Jare wi pe reta ko jae Tumpa oñono tee jae imaerä wae. Jáeramo ndarau ikawi piyapo waerä awasa jare mbaembae kachi wae. Jare awiye korepoti jekuaeño pipotaete pemaeräño.

<sup>4</sup>Jare piyemingeta yawe ñru wae reta ndiwe, jekuaeño piyemingeta pemee rewe yasurupái Tumpa pe. Awiye ma piyemingeta iyarakuaa mbae wae reta jare ipotawe imbikere wae reta uyemingeta wae rami. Echa'á ndarau ikawi kía Tumpa oñono tee jae imaerä wae uyemingeta waerä jukuárái.

<sup>5</sup>Echa'á pepuere pikuaa kawi kua re: Jokua ara Cristo oï ma yawe opaete wae imburuwicha wasurä, kía iawasapota wae jare kía jekuaeño mbae kachi uyapo wae oïta'á etei jae ndiwe. Jare oïta'á jae ndiwe wi kía korepoti jekuaeño uipotaeete jae imaeräño wae, echa'á korepoti oï chupe itumparaanga rami. Jáeramo awiye ma piyapo jokua mbaembae jae reta uyapo wae rami.

<sup>6</sup>Piyandareko kawi piyé, echa'á aramoi imeta oï kía jei pewe ikawiño ko yayapo waerä jokua mbaembae. Erëi awiye piyembitawika, echa'á jokua ñee upurumbitawi wae pewa ko. Jare Tumpa iarasi uitita oï jese jekuaeño uyapo jokua mbaembae ikawi mbae wae re.

<sup>7</sup>Jáeramo awiye piñemiiru jae reta ndiwe.

<sup>8-9</sup>Echa'á tenonde yawe pe reta pikose pütumimbi pe wae echa mbiri Tumpa wi. Erëi añawe pei tembipe pe, echa'á pei pëti ramiño yandeYa Jesucristo re jare jae umbiembipe oï pepia. Jare yaiko yawe jokua tembipe pe, yaikota yandepiakawi rewe añetete wae rupi jare jupi wae rupi. Tumpa peñono tee ma ko jae imaerä. Jáeramo piko tembipe pe jae umee pewe wae rupi.

<sup>10</sup>Jare jekuaeño piyemboe kéréai pemiwerowia waerä yandeYa Jesucristo.



**11-12**Pe reta pikuaa jokua pītumimbi pe ñonoï wae reta jeko. Jae reta jekuaeño uyapo wiari rupi mbaembae kachi wae mara pewa. Jare pikuaa wi jokua mbaembae ndarau ueru mbae ikawi wae. Jáeramo awiye piñemĩru jae reta ndiwe mbae kachi uyapo oï reta yawe. Awiye awe piyemingeta jokua mbaembae uyapo reta wae rewa. Erëi pembietata ko chupe reta jokua re opaete wae reta jowake.

**13**Kua yandepuere yambijaanga tembipe re. Ipotawe mbaembae re yambiembipe wae uyekuaa kawi. Mbaeti ma uñemi oï, echa'ä tembipe pe ma oï ramo. Jukuärái wi yambieta chupe reta yawe jokua mbaembae uyapo reta wae re, uyekuaata oï kërái jokua mbaembae kachiete oï Tumpa jowai.

**14**Jokua jeko pewa ko jei chupe reta kuärái: “Ndeke nei wae, esarekoño ma. Epüa eyu umanokue wae reta ipite wi. Jare Cristo umeeta oï ndewe tembipe,” jei chupe reta.

### **Espíritu Santo yandereruwata kawita oï yaiko kawi waerä**

**15**Pe reta peï ma ko tembipe pe; jáeramo piyandareko kawi piyé pechaka waerä teko kawi. Awiye piko wíraeño. Piko iyarakuaa katu wae reta rami.

**16**Añetete kua iwi pewa reta jeko kachi tuicha rupi ukuakuaa oo oï. Jáeramo piporu kawi ara reta piyeyokui waerä Tumpa pe.

**17**Awiye piko wíraeño. Piyemboe kawita ko piyapo waerä mbaembae yandeYa Jesucristo uipota piyapo waerä wae, jare jokuaño piyapo.

**18**Jare awiye pekause, echa'ä jokua pereruwata kachi rupi. Espíritu Santo uipota pereruwata piko waerä jupi wae rupi. Jayawe piñemee chupe jae pemimbaepuere waerä.

**19**Jare Espíritu Santo pereruwata ramo, jukuärái pekätata pe yepái pepia rewe salmoreta, jare himno reta, jare ĩru káta reta wi Tumpa jee pemptuicha waerä.

**20**Jare yandeYa Jesucristo jee re jekuaeño pemeeta yasurupái yandeRu Tumpa pe opaete mbae re.

**21**Jare wi piñemimichi rewe piyeyokuita peyupe. Jukuärái pikuaakata pipiu yepe peï Cristo wi.

### **Pablo oporomboe kërái iko waerä umenda wae reta**

**22**Añawe che jae ai kuña reta ime rewe wae pe kuärái: Tuiko ime jei wae rupi kërái yandeYa jei wae rami.

**23**Yaikuaa ñanäka onoi mbaepuere yanderete re. Jae ramiño wi Tumpa uyapo kuimbae iko waerä jembireko iñäka rami. Jáeramo kuña ikota ko ime jei wae rupi. Kua yandepuere yambijaanga kuärái: Cristo ko jae opaete yande jese yarowia wae reta yandeRepi wae. Jáeramo Tumpa uyapo Cristo iko waerä ñanäka rami. Jare opaete yande reta ñai ma ko jae jete rami. Jáeramo yaikota ko jae jei wae rupi.

<sup>24</sup>Jayawe kërái yande yaiko yandeYa jei wae rupi, jae ramiño wi kuña reta tuiko ime jei wae rupi.

<sup>25</sup>Jare jae wi kuimbae reta jembireko rewe wae pe kuärái: Tuau jembireko kërái Cristo uau opaete jese wirowia wae reta rami. Yaikuaa Cristo yanderauete, echa'ä jae uñemee umano waerä yanderé.

<sup>26</sup>Kërái yande mbae yayoe i pe wae rami, jukuärái wi jae iñee rupi opa yandepiayoe mbaembae kachi wae wi ñaneño tee waerä jae imaerä.

<sup>27</sup>Jare pëti ara jae yanembiyemboita oï jae jowai päwe rewe jupi jare teko mbae rewe. Jare joko wi yayerowia rewe ñaita ñai jae ndiwe jaño mái pewa. Jukuärái Cristo uñemee yanderé yaiko kawi waerä yanderauete ramo. Jae ramiño wi kuimbae reta uauta ko jembireko jae iko kawi waerä.

<sup>28-30</sup>Kua re yandepuere yambijaanga ye kuärái: Mbaetii kía uñamitaa jete wae. Opaete yande yayandareko ko yanderete re. Jáeramo yandiyembaï yawe, yakaru. Jare yandekandi yawe, yaputuu. Jukuärái wi kuimbae reta tuyandareko kawi jembireko re kërái jete re uyandareko wae rami. Jukuärái wi Cristo uyandareko yanderé, echa'ä yande ñai ma ko jae jete rami. Jare jukuärái wi kuimbae tuau jembireko. Echa'ä añetete kía jembireko uau wae, jae etei ko uyerau oï wi, echa'ä mokui rewe ko jae pëti ramiño.

<sup>31</sup>Jukuärái uyekuatía oï Tumpa iñeeriru pe, echa'ä joko pe uyekuatía oï kuärái: “Jáeramo kuimbae usirita tu jare ichi wi iko tee waerä jembireko ndiwe. Jare mokui wae uyeyapota pëti ramiño.” Jukuärái uyekuatía oï.

<sup>32</sup>Yawái ko yaikuaa kawi waerä opaete kua mbaembae rewa. Erëitu jokua uyekuatía oï wae umbijaanga oï wi yandewe kërái yande Cristo re yarowia wae reta ñai pëti ramiño Cristo re wae.

<sup>33</sup>Jayawe kuimbae reta tuau jembireko kërái uyerau wae rami. Jare kuña reta wi tuipiu ime uau rewe.

## Efesios 6

### Pablo oporomboe kërái sambiai reta jare tu reta iko waerä

<sup>1</sup>Añawe che jae wi sambiai reta pe kuärái: Tuyapo opaete mbaembae tu jare ichi jei wae rupi. Echa'ä jokua ko jae yandeYa uipota wae, jare jupi ko uyapo reta waerä.

<sup>2-3</sup>Uyekuatía oï Tumpa iñeeriru pe kuärái: “Pipiu peru jare pesi wi, piko kawi waerä jare perekowe puku waerä kua iwi pe.” Jukuärái uyekuatía oï. Añetete opaete mbaembae Tumpa arakae jei Israel iñemoñaeta reta pe wae wi, kua ko tenondewaete wae Tumpa jei umeeta chupe reta mbae ikawi wae jae reta uyapo yawe.

<sup>4</sup>Jare añawe che jae tu reta pe wi kuärái: Awiye tombopochikaño isambiai reta ipotawe mbaembae re. Erëi tomboe reta jupi wae re, jare tumbiarakuaa kawi reta kërái yandeYa uipota wae rupi.

### **Pablo oporomboe kërái uyeyokui wae reta iko waerä**

<sup>5</sup>Jare añawe che jae aï uyeyokui wae reta pe wi kuärái: Tuyapo uipiu rewe ipatrón jei wae rupi. Tuyeyokui reta chupe ipiakirëi rewe Cristo pe uyeyokui wae rami.

<sup>6</sup>Awiye tuparawiki kawi reta ipatrón umae oï jese reta yaweño ipatrón umbiyerowia waerä. Tuyeyokui kawinoi reta chupe Tumpa umbiyerowia waerä. Echa'ä kuimbae peño'ä ko uyeyokui ñonoï. Jae reta ko jae Cristo pe uyeyokui wae.

<sup>7</sup>Jayawe tuyeyokui reta ipatrón pe jatangätu rewe kërái yandeYa pe uparawiki ñonoï wae rami – mbaeti ko kuimbae pe.

<sup>8</sup>Jare timandúa reta kua re: Yayapo yawe mbaembae ikawi wae, yandeYa umiñatimata oï yandewe ikawi wae jokua re. Jukuäräita ko kía pe uyeyokui wae jare uyeyokui mbae wae wi.

### **Pablo oporomboe kërái patrón reta iko waerä**

<sup>9</sup>Jae nunga wi che jae patrón reta pe kuärái: Toyokui ipiakawi rewe uyeyokui chupe wae reta. Awiye tuñeengata chupe reta umingiye waerä. Timandúa patrón jare uyeyokui chupe wae reta wi oyowakeño onoi pëtiño iYa – jae ko yandeYa ara pe oï wae. Jare jae oyowake etei umae patrón re jare uyeyokui wae re. Echa'ä jae uau'ä pëti waeño iru wae wi.

### **Pablo oporomboe kërái yandepuere yayepitaso kawi waerä Añawasu pe**

<sup>10</sup>Añawe hermano reta, kua jaeño ma jaeta aï pewe: Ndarau yandepuere yayeyokui yandei yandeYa pe. Jáeramo yayekota ko jae imbaepuere tuichaete wae re.

<sup>11</sup>Echa'ä Añawasu jekuaeño yanembowaicho oï yanembitawi waerä. Erëi Tumpa umee ma yandewe mbaembae yayerepi waerä chuwi. Kua yandepuere yambijaanga pëti sindaro jemimonde jare jembiporu ñeräro pewa re. Jayawe piporu kawi opaete mbaembae Tumpa umee ma yandewe wae piyepitaso kawi waerä Añawasu pe.

<sup>12</sup>Pemandúa ñañeräro'ä ko ñaï iwi pewa reta ndiwe. Yanderowaicho reta ko jae Añawasu jare añä reta. Jae reta ko jae iwi pewa pütumimbi pe ñonoï reta wae echa iya. Jukuärái teko kachi tuicha ukuakuaa oo oï kua iwi pe.

<sup>13</sup>Jáeramo piporu kawi opaete temimonde jare tembiporu ñeräro pewa echa rami wae Tumpa umee yandewe wae. Jukuärái yanderowaicho reta yuweru pekoti yawe, pepuere piyepitaso kawi chupe reta awiye peramiri waerä. Jare jukuärái piyepitaso kawita chupe reta ñeräro opa rewa.

<sup>14</sup>Jayawe piyepitaso kawi piñeräro waerä. Jare piporu opaete temimonde jare tembiporu wae echa Tumpa umee yandewe wae. ¿Mbae ra ko jokua reta? Yaikuaa pëti sindaro uiporu jumbikuaa ikawi wae, jare ipitía yopiaka jiero pewa, jare ipipasa ikawi wae, jare iyeyopiaka ikawi wae, jare iñäka jiru jiero pewa, jare ikisepuku wi. Jukuärái ko sindaro jemimonde jare jembiporu ñeräro pewa. Jare jukuärái rami wi ko mbaembae Tumpa umee ma yandewe wae yayerepi kawi waerä. Jae ko kua reta: Yanderumbikuaarä Tumpa umee yandewe wae ko jae iñee añetete wae. Pipisi kawi

jayawe jokua ñee awiye waerä Añawasu pembıtawı. Jare pemandúa Cristo rupi ko yande ñaı Tumpa jowai yandereko mbae wae rami. Echa'ä jokua ko jae yandewe yandepıtıa yopiaka rami. Jukuärái Añawasu yanembıjeko yawe, ndarau yayapisaka jese.

**15**Jare pe reta pikuaa kërái ñee ikawi wae pemımıräta ma ko Tumpa re, echa'ä pembıpiakatu ma. Jáeramo piyekou jokua re, echa'ä jae ko yandepıpası ikawi wae rami.

**16**Jare yarowıa yawe mbaembae Tumpa uikuaaka yandewe wae, jokua ko jae yandeyopiaka rami Tumpa umee yandewe wae. Echa'ä Añawasu jare aña reta yuweru yandekotı yawe, jae reta uipota urukachi jokua yarowıa wae kía reta uipota ñaneñıwo ui jendı rewe pıpe wae rami. Jáeramo perowıa pepıa rewe Tumpa iñee re, jare jukuärái ikawıta pewe pëti sindaro iyeyopiaka ikawi chupe wae rami. Echa'ä jokua ui reta opa owe wae rami oata'ä peré. Jáeramo perowaıcho reta ndarau pemıamırı.

**17**Jare jekuaeño pemandúa Tumpa yanderepı ma ko teko yareko ikotı wae wi. Echa'ä jokua ko jae yanemaerä pëti äka jıru jıero pewa rami. Jukuärái ndarau ñanemıamırı yandepıayemıngeta rupi. Jare Tumpa umee wi yandewe Espıritu Santo rupi pëti kısepuku ñeräro pewa rami. Jokua ko jae Tumpa iñee eteı piyerepı waerä pıpe Añawasu wi.

**18**Jare Tumpa umee wi yandewe pëti tembıporu ye – jae ko yerure. Jayawe jekuaeño piyerure Tumpa pe. Pekañoı chupe pemborı waerä kërái Espıritu Santo uikuaaka oı pewe wae rupi. Jare awiye peakı piyerure waerä chupe opaete kerupı ñonoı Cristo re wırowıa wae reta re.

**19-20**Jare piyerure mii cheré wi Tumpa pe, echa'ä añawe che aı peresorıru pe. Jare oñoño reta wi cheré cadena, echa'ä Tumpa jee re che amımbeuñoı iñee ikawi wae jeko pewa. Jokua ñee tenonde yawe Tumpa uikuaaka mbae iko wae. Erëı uikuaaka ma chewe. Jáeramo yepe tēı peresorıru pe aıporara aı, jesewe jekuaeño amımbeuta ko jokua ñee. Jayawe piyerure mii Tumpa pe cheré chepuere waerä jekuaeño amımbeu jokua ñee akiye mbae rewe.

### **Pablo umbıyapı itupapıre**

**21-22**Jukuärái ko che aıpota aikuatıa aıko pewe. Jare pepuere pikuaa waerä kërái aı kua peresorıru pe wae, amondo aı pewe chemborıa Tıquıco jee wae. Tıquıco ko jae yandehermano arowıa katu jese wae. Jae wıraa oı pewe kua tupapıre aikuatıa pewe wae, jare uikuaakata oı pewe che rewa, jare pemıkırëıta.

**23**Jayawe hermano reta, ayerure aı yandeRu Tumpa pe peré. Aeka aı chupe jare yandeYa Jesucristo pe pembıpiakatu waerä, jare pemborı piyerau päwe waerä, jare jekuaeño perowıa kawı waerä jese wi.

**24**Tumpa tıpiakawı opaete yandeYa Jesucristo uauete wae reta pe. Jukuärái tuıko.

## Filipenses

### Kua tupapire rewā:

Kua tupapire Pablo uikuatía jare wiraaka Cristo re wirowia wae reta pe tēta wasu Filipino pewa pe. Yamingeta Hechos capítulo 16 pe kērái Pablo umimbeu ñee ikawi wae Cristo rewā kua tēta wasu pe jare kērái amokue wae reta wirowia jese. Joko wi, Pablo oo ikotía rupi yawe, Cristo re wirowia wae reta Filipino pe ñonoī wae amo wese pe wiraaka Pablo pe yembori. Taikue rupi iru wae reta oñono Pablo peresoriru pe tēta wasu Roma pe (emingeta Hechos capítulo 28 pe). Jare joko pe iko rambuewe, jokuā Filipino pewa reta wiraaka ye chupe yembori. Jare Pablo uikuatía kua tupapire umee chupe reta waerā yasurupái jare umbiarakuaa reta waerā wi.

### Filipenses 1

#### Pablo wiraaka saludo

<sup>1</sup>Pe yandeYa Jesucristo imaerā piko wae reta tēta wasu Filipos pe peī wae, jare petenondewa reta jare pembraia reta ndiwe, che ko jae Pablo aikuatía aī pewe kua tupapire hermano Timoteo ndiwe wae. Ore ko jae Jesucristo pe nduyeyokui wae reta.

<sup>2</sup>YandeRu Tumpa jare yandeYa Jesucristo jekuaeño tipiakawi pewe jare tuyapo pewe piko waerā pepiakatu rewe.

#### Pablo uyerure Tumpa pe Cristo re wirowia wae reta re

<sup>3</sup>Che amee yasurupái Tumpa pe opa wese chemandúa yawe peré.

<sup>4</sup>Jare opa wese ayerure yawe Tumpa pe peré, jekuaeño ayapo ayerowia rewe.

<sup>5</sup>Echa'ā jeta ma pe reta chembori chepuere waerā jekuaeño amimbeu ñee ikawi wae Cristo rewā. Jukuārái piyapo ma pembipi perowia Cristo re wiwe añawe rewā.

<sup>6</sup>Pe reta jaeramo perowia Cristo re yawe, Tumpa umbipi uparawiki pepia pe umbiambie waerā pereko, jukuārái piko waerā yandeYa Jesucristo rami. Jare che arowia katu aī Tumpa jekuaeño uyapota oī jokuā mbarawiki ara yandeYa Jesucristo pewa ou rewā. Jokuā ara ramo jae opata uyapo.

<sup>7</sup>Che jupi ko ayemingeta waerā kuārái peré, echa'ā che puauete ramo. Jae nunga wi yayekou ñaī päwe rewe Tumpa ipiakawi re. Echa'ā jae umaeño ma yanderé yaparawiki waerā pēti ramiño ñee ikawi wae uñemiái waerā. Echa'ā che amimbeu aī ñee ikawi wae jare aikuaaka aī chupe reta kērái jokuā ñee añetete wae ko. Jare pe reta chembori peī chepuere waerā ayapo jukuārái. Jare jokuano'ā ko. Jae nunga wi, yepe tēi che peresoriru pe aī, erēitu pe reta jekuaeño chembori peī.

<sup>8</sup>Tumpa uikuaa kērái che aipota echa puecha ye, echa'ā che puauete kērái Jesucristo etei perau rami.

<sup>9</sup>Jare che ayerure ai Tumpa pe peré pe reta jeiete piyerau päwe waerä arakuaa katu rewe.

<sup>10</sup>Jukuärái ayerure ai peré pikuaa waerä piparawo ikawi waeño. Echa'ä jukuärái piyapo yawe, pikota jupi rupi jare peita pereko mbae rewe ara yandeYa Cristo pewa ou rewa.

<sup>11</sup>Jare Jesucristo pemborita ime waerä penoi teko ikawi wae opaete wae uecha waerä. Jare jukuärái pereko pewa iiru wae reta uipiuta Tumpa wi jare umbutuichata jae jee. Jukuärái ko ayerure ai Tumpa pe peré.

### **Ñee ikawi wae jekuaeño uñemiái**

<sup>12</sup>Jayawe hermano mii reta, aipota pikuaa waerä kuärái: Kua mbae uyeyapo chewe wae rupi ñee ikawi wae Cristo rewa jeiete uyemimbeu oo oi.

<sup>13</sup>Echa'ä opaete mburuwicha wasu isindaro reta jare jeta iiru kua tēta wasu pewa reta añawe uikuaa che kua peresoriru pe ai Cristo pe ayeyokui ramo.

<sup>14</sup>Jare jokuaño'ä ko. Jae nunga wi che kua peresoriru pe ai wae jeko pewa hermano reta opaete seri uñemiatangātu ma yandeYa koti. Jare jae reta jeiete umimbeu ñonoï Tumpa iñee ukiye mbae rewe.

<sup>15</sup>Añetete ko, amokue jae reta iñakatāa cheré jare jaeño umimbeu ñonoï Cristo rewa ime waerä onoi jeta jemimboe reta chewi. Erēi iiru wae reta umimbeu ñonoï Cristo rewa upurumbitawi mbae rewe.

<sup>16</sup>Jae reta cherau jare uikuaa Tumpa cheñono ma kua pe aikuaaka waerä koropi kērái ñee ikawi wae Cristo rewa añetete ko.

<sup>17</sup>Erēi jukuärái'ä etei ko jokua iiru wae reta. Jae reta umimbeu ñonoï Cristo rewa upurumbitawi rewe. Jaeño uipota uyembutuicha reta, jare wirowia reta tēi che jeiete aiporara waerä jasi katu rupi kua peresoriru pe.

<sup>18</sup>Erēitu mbae'ä chewe mbae jeko pewa ra umimbeu ñonoï reta Cristo rewa – jae ko upurumbitawi rewe ra ani upurumbitawi mbae rewe ra. Che jaeño ayerowiaete ai ñee Cristo rewa uyemimbeu oi ramo. Jare jekuaeño jeiete ayerowiata.

<sup>19</sup>Echa'ä che aikuaa opaete kua mbaembae uyeyapo oi chewe wae ikawita oi chewe, echa'ä pe reta piyerure pei Tumpa pe cheré ramo, jare Espiritu Santo Jesucristo ombou wae chembori oi ramo.

<sup>20</sup>Jare che arowia katu ai Tumpa re jae chemimirāta waerä awiye waerä chemara Cristo wi, jare jekuaeño ambutuicha waerä Cristo jee akiye mbae rewe. Aipotaeete Cristo jee uyembutuichaka waerä opaete mbae ayapo wae rupi kua cherekowe pe ai rambuwe. Jare chemano rupi aipota Cristo jee uyembutuichaka waerä wi.

<sup>21</sup>Añetete che jekuaeño aiko rambuwe tekowe pe, aikota Cristo pewartā. Jare amano yawe, ikawieteta chewe, echa'ä aiita Cristo ndiwe ramo.

**22-23** Erëi chepuere yawe, ¿mbae nunga ra aiparawota tēi cheyupe? Aikuaa'ä. Aipota tēi mokui rewe parawete. Echa'ä che jekuaeño aiko yawe, chepuere jekuaeño ayeyokui Tumpa pe. Erëi jae nunga wi aipota amano, Cristo ndiwe ai waerä. Kua ikawieteta ko chewe.

**24** Erëitu ikawiete yepe jekuaeño aiko waerä añawe rupi ikawi waerä pewe.

**25** Kua aikuaa kawi. Jáeramo aikuaa wi che apitata ai kua iwi pe pe reta ndiwe jeiete pepiräta waerä Tumpa koti, jare jukuärái piyerowia waerä.

**26** Chekirëiete pe reta ndiwe ai ye waerä, jare jukuärái pe reta tuichaete ye piyerowia waerä yande Ya Jesucristo rupi chereko pewa.

### **Pablo umiñera jae reta uechaka waerä teko kawi reta**

**27** Erëi ipotawe mbae uasa chewe wae rupi, che pumiñera pechaka waerä teko kawi opaete wae jowake, jae reta umae kawi waerä ñee ikawi Cristo rewa wae re. Echa'ä jukuärái piyapo yawe, aikuaata pe reta piñemimiräta pei pēti ramiño, jare pēti ramiño piñemiatangātu pei ñee ikawi wae pemimbeu waerä. Jukuärái aipota pereräkua kawi waerä chewe chepuere'ä añatima ye pekoti yawe.

**28** Jare awiye pekiye jokua oyowaicho oi pe ndiwe wae reta wi. Echa'ä pekiye'ä chuwi reta yawe, pikuaakata chupe reta Tumpa umeeta oi pewe tekowe opa mbae wae, erëi chupe reta Tumpa uiporarakata oi jaeño mái pewa. Añetete Tumpa ko uparawiki oi kua mbaembae rupi.

**29** Echa'ä Tumpa mbaeti ko umee pewe Cristo re perowia waeräño. Umee ko pewe wi piporara waerä jae imaerä.

**30** Jáeramo jokua jeko pewa ko Cristo re wirowia mbae wae reta uiporaraka ñonoï pewe. Jukuärái pe reta pecha uyeyapo chewe aiko yawe pe reta ndiwe. Jare añawe pikuaa imeño jukuärái uyeyapo oi chewe.

## **Filipenses 2**

### **Kerái Cristo uñemimichi, jukuärái wi ko yande yaikota**

**1** Jayawe cheiru mii reta, ¿piñemikirëi ra pei pēti ramiño Cristo re pei ramo? ¿Pembipiakatu ra oi Cristo perau wae? ¿Piñemiiuru ra pei Espiritu Santo ndiwe? ¿Pikuaa ma ra pei añawe Cristo perau jare reparareko oi wae?

**2** Jukuärái yawe, aipota pe reta chembiyerowia mii waerä kuärái: Piyerau päwe rewe, jare pēti ramiño piko kawi päwe rewe jare pepiyemingeta oyowake rewe wi.

**3** Awiye mbae piyapo piyembutuicha rewe jare piyembikate rewe. Erëi pēti pēti tumae uñemimichi rewe iuru wae reta re jae ko itenondewa rami.

**4** Awiye iyeeño tuyandareko. Jae nunga tuyandareko wi iuru wae reta re.

**5** Pēti pēti piyemingetata ko pepia pe kerái Jesucristo ipia pe uyemingeta rami.

<sup>6</sup>Echa'ä yepe tēi Cristo oyowake oī Tumpa ndiwe jare jae ko Tumpa etei wi, erēi chupe waerä jokua jae'ä ko mbae täta yaipisi wae rami.

<sup>7</sup>Erēi jae ueya opaetei uyeyapo waerä kuimbaerä yande rami uyeyokui waerä iwi pewa reta pe.

<sup>8</sup>Jare kuimbaerä uyeyapo ma yawe, uñemimichi ye. Echa'ä uñemee umano waerä jare jukuärái uyapo waerä Tumpa uipota wae rupi. Erēi mbaeti umano ipotawe kía umano wae rami. Echa'ä uikutu reta kurusu re kuimbae jeko kachi wae uyuka reta wae rami. Jukuärái Cristo uñemimichiete.

<sup>9</sup>Jáeramo añawe yandeRu Tumpa umbutuichaka ma Cristo jee opaete wae reta wi, jare oñono ma opaete wae iYarä iko waerä.

<sup>10</sup>Jukuärái opaete ara pe ñonoī wae reta jare iwi pe ñonoī wae reta jare umanokue wae reta wi, pēti ara yandeRu Tumpa oñonokata reta itawa re Jesús jowai.

<sup>11</sup>Jare jae reta jeita chupe uipiu rewe: “Nde, Jesucristo, nde ko jae opaete wae iYa,” jeita reta. Jare kua uyeyapo ma yawe, yandeRu Tumpa jee uyembutuichakata oī wi opaete wae pe.

<sup>12</sup>Jáeramo cheiru puau mii wae reta, che pumiñerata mbae piyapo waerä. Pe reta pikuaa ime mbaembae Tumpa uipota pe reta piyapo waerä wae tekowe opa mbae wae ime penoi ramo. Jare che aiko yawe pe reta ndiwe, jekuaeño piyapo jokua mbaembae Tumpa wi pipiu rewe. Erēi che pumiñera jeiete jukuärái piyapo kawi waerä añawe rupi che mbaeti ma ai pe reta ndiwe rambuewe.

<sup>13</sup>Jare kua pepuerete piyapo, echa'ä Tumpa etei ñanemikirēi jare umee yandewe mbaepuere yayapo waerä jokua mbaembae Tumpa umbiyerowia wae.

<sup>14</sup>Opaete mbaembae piyapo wae, piyapota ko piyengeta mbae rewe jare piyeaka mbae rewe.

<sup>15-16</sup>Echa'ä jukuärái piyapo yawe, pikota jupi jare ndarau kía pembijeko mbae re. Jare uyekuaata wi Cristo re wirowia mbae wae reta ipite rupi kērái pe reta ko jae Tumpa tai jeko mbae wae reta. Jae reta jeko kachi jare jupi'ä ko reta. Erēi pe reta pemimbeu yawe chupe reta ñee tekowe opa mbae wae rewa, pikota tembipe rami jae reta ipite rupi. Piyapo mii kua mbaembae reta che chepuere waerä ayerowia tuicha jokua ara yandeYa Cristo pewa ou yawe. Echa'ä aikuaata cheparawiki pepite pe iko wae oē kawi ma yepe.

<sup>17</sup>Añawe yepe tēi piporara pei Cristo re perowia jeko pewa, erēi jeräkua chewe piyeyokuiñoi chupe piyerowia rewe. Jare che ayerowiata ai wi pe reta ndiwe kua aiporara ai wae rupi, yepe tēi cherekowe opata ma oī aramoi.

<sup>18</sup>Jare jukuärái wi ikawi ko pe reta wi piyerowia waerä che ndiwe.

### **Pablo omondota Timoteo jare Epafrodito**

<sup>19</sup>Jayawe, yandeYa Jesús uipota yawe, amondota ai pepi kuri Timoteo imambae, echa'ä aipota aikuaa kērái ra pei wae. Jare jokua aikuaa yawe, ayerowiata ai kuri.



- <sup>20</sup>Mbaeti ye ko iru kua pe kía uyemingeta jare imandúa peré wae Timoteo rami.
- <sup>21</sup>Echa'ä opaete iru wae reta imandúa iyeeño. Mbaeti imandúa oï reta Jesucristo iparawiki re.
- <sup>22</sup>Erëi pe reta pikuaa ko kërái Timoteo jeko jare kërái jae uyeyokui Tumpa pe che ndiwe cheraiete rami ñee ikawi wae numimbeu waerä.
- <sup>23</sup>Jáeramo jae aipota amondo pepi. Erëi ndei amondo mbowe, aipota aikuaa rani mbae ra uyeyapota oï chewe kua pe.
- <sup>24</sup>Erëi jaeño che ayeko ai yandeYa re cheyorata oï reta wae. Jare jukuärái yawe, che wi ata apou pepi kuri.
- <sup>25</sup>Erëi che aipota amondo ye pekoti Epafrodito. Pe reta pembou cheré uyandareko waerä. Che au cheriwi rami, jare jae uparawiki ma che ndiwe Tumpa pewarä pëti sindaro ikawi wae Tumpa pewa rami.
- <sup>26</sup>Che amondo ai ye pekoti, echa'ä jae ikirëiete perecha ye. Jae ipiatiti oï, echa'ä jae uikuaa kërái jeräkua pewe jae imbaerasi iko wae.
- <sup>27</sup>Añetete ko, jae imbaerasiete iko jare umano seri. Erëi Tumpa uiparareko umae jese jare uminguera. Jare jaeño'ä Tumpa uiparareko. Jae nunga wi che cheparareko, echa'ä tuicha chepiatiti aiko Epafrodito imbaerasi iko yawe. Jare jae umano yawe, uasaete chepiatitita aiko tēi jese.
- <sup>28</sup>Jáeramo añawe amondo ye ai pekoti pe reta piyerowia waerä jae pecha ye yawe. Jare jukuärái wi che chepiawiweta, echa'ä aikuaa pe reta piyembipia'ä pei jese.
- <sup>29</sup>Jáeramo jae oo ye uwäe pepi yawe, pembiasa kawi mii kuri piyerowia rewe yandeYa jee re. Pema kawi mii jese, jare pema kawi wi opaete jae rami wae reta re.
- <sup>30</sup>Echa'ä jae umano seri uyeyokui Cristo pe ramo. Echa'ä jae ou kua pe pepipika pe chembori waerä, jare jukuärái uñemijëwa mano pe.

## Filipenses 3

### Mbaeti etei ikawi yayeko waerä yandiyé

- <sup>1</sup>Jayawe hermano mii reta, piyerowia yandeYa uyapo yandewe wae re. Kua añawe aikuatiata ai pewe wae, aikuatía ma pewe tenonde yawe. Erëi jekuaeño aipota aikuatía ye pewe. Mbaeti etei chekueri, echa'ä ikawi oï pewe.
- <sup>2</sup>Piyandareko kawi piyé kuri, echa'ä ime amokue jeko kachi wae reta oporomboe ñonoï tēi kuärái: “Ime yawe kía Tumpa imaerä uipota iko wae, imeta ko uyembicircuncidaka,”jei ñonoï reta. Erëi awiye piyapisaka jokua yimba echa wae reta re.
- <sup>3</sup>Echa'ä yande reta ko jae Tumpa imaerä añetete wae. Yande reta ko yambuicha Tumpa jee Espiritu Santo rupi. Jare mbaeti yayeko ñai yandiyé jare mbaembae

yayapo wae re ñanoi waerä tekowe opa mbae wae. Jaeño yayeko ñai mbaembae Jesucristo uyapo yandewe wae re, jare jokua re ko yayemingeta.

<sup>4</sup>Erëi yandepuere yawe ñanoi tekowe opa mbae wae yande yae wae rupiño, jayawe che imeta tēi ko anoi ayeko waerä chiyé. Añetete ko, ime yawe kía wirowia ime onoi uyeko waerä iyé wae, che ime tēi jetaete anoi chuwi ayeko waerä chiyé.

<sup>5</sup>Echa’ä che ayemicircuncidaka juri ara ma anoi yawe kërái Tumpa arakae jei judío reta pe wae rupi. Che ko jae Israel iñemoña pewa jare Abraham jumimino Benjamín iñemoña pewa. Che ko jae hebreo añetete wae, echa’ä pēti hebreo tai ko che. Jae nunga che aikose pēti fariseorä wi, jare jukuärái che aipotase tēi aiko jupi rupi kawi opaete Tumpa jei oreramikue reta pe wae rupi.

<sup>6</sup>Añetete mbaeti kiawe ipuerese chembijeko mbae re, echa’ä chereko jekuaeño iko kërái Tumpa arakae jei chupe reta wae rupi. Jare jokuaño’ä ko. Jae nunga wi che cheratangätuete aikose tēi aiporaraka waerä Cristo re wirowia wae reta pe, jare jukuärái arowiase tēi ayeyokui kawi waerä Tumpa pe. Jukuärái ime arekose tēi jeta ayeko waerä chiyé.

<sup>7</sup>Tenonde yawe che arowiase tēi opaete jokua mbaembae chembujupi iko Tumpa koti. Erëi añawe aipotaeete ambiyerowia Cristo. Jare añawe aikuaa jokua mbaembae yepe jaeño chembiawái iko.

<sup>8</sup>Jare jukuärái wi ko opaete ñru mbaembae reta ayekose tēi jese wae. Añawe che aikuaa cheYa Jesucristo, jare che arowia jokua ikawiete ye oï ipotawe ñru mbaembae wi. Jáeramo che aeya ma opaete jokua mbaembae ayekose tēi jese wae. Jare aecha ma iti rami jokua mbaembae reta chepuere waerä akuakuaa Cristo koti.

<sup>9</sup>Jare jukuärái yaweño aikota pēti ramiño Cristo re jare chereko mbae Tumpa jowai – mbaeti etei ko Moisés arakae uikuatía wae jupi ayapo wae rupi. Che arowia ai Cristo re, echa’ä jukuärái yaweño ko Tumpa umae yanderé yandereko mbae wae rami. Cristo re yarowia wae rupiño ko. Mbaeti etei ko Moisés arakae uikuatía wae jupi rupi yayapo wae re.

<sup>10</sup>Che aipota aikuaa kawi Cristo. Jare jokua mbaepuere Tumpa uiporu umbijekowe ye waerä Cristo wae, jokua mbaepuere aipota uparawiki waerä che rupi wi. Jare yepe tēi aramoi aiporarata jare amanota Cristo rami, erëi aipota aiko wi Cristo rami.

<sup>11</sup>Jare aiporara yawe, jokua jaekawita oï chemaerä. Echa’ä amano yawe, aikuaa ai Tumpa chembijekowe yeta oï umanokue wae reta ipite wi.

<sup>12</sup>Kua ndeiño ko opa kawi aepiti, jare ndeiño ko jupi ai wi. Erëi jekuaeño cheratangätu ai jokua aepiti waerä. Echa’ä jokuaerä ko Jesucristo cheparawo.

<sup>13</sup>Mase hermano mii reta, yepe tēi opa’ä aepiti jokua, erëi ime mbae ayapo wae. Che pēti ñeñokuiñokui pe ai rami. Jare che mbaeti ma ayemingeta chepia pe mbaembae tenonde yawe chembiawaise wae rewa. Echa’ä aipota a tenonde Cristo koti.

<sup>14</sup>Jare jukuärái ayapota a aë rewa iyapi pe. Jayawe ramo Tumpa cherenita ara pe a aipisi waerä jokua mbae ikawi wae jae umiñatimata oï chewe wae cheparawiki re. Jokuaerä ko Tumpa chapo pëti ramiño Cristo re.

<sup>15</sup>Jukuäraita ko yayemingeta yandepia pe opaete yande yakuakuaa ma Tumpa koti wae reta. Erëi amokue wae pe reta mbaeti yawe pepiyemingeta che rami kua mbaembae re, Tumpa uikuaakata pewe kërái ikawi ko piyemingeta waerä pepia pe.

<sup>16</sup>Erëitu añawe rupi jekuaeño yaiko kërái Tumpa uikuaaka ma yandewe wae rupi.

<sup>17</sup>Jayawe hermano mii reta, pe reta pikuaa kawi ko chereko. Jáeramo pe reta pereko tuiko chereko rami. Jae nunga wi pemae jokua omomoe ñonoï chereko wae reta re.

<sup>18</sup>Echa'ä jeta wae reta uipota'ä etei kiawe umimbeu waerä ñee Cristo umano kurusu re yanderé wae. Jae reta towaicho ko. Kua jeta wese ma che jae pewe, jare añawe che jae ye aï pewe kua cheresai rewe.

<sup>19</sup>Jae reta yureko jaeño mbaembae jete uipota uyapo wae reño. Jare yepe tēi jae reta jeko kachi wae ko jare imeta tēi imara jokua re, erëi jekuaeño uyemingeta reta uyembutuicha rewe mbaembae kachi uyapo wae re. Jare jekuaeño uyemingeta ñonoï ipia pe mbaembae kua iwi pewa reño. Chupe reta Tumpa uiporarakata oï jaeño mái pewa.

<sup>20</sup>Erëi yande reta ñai'ä ko jae reta rami. Ñanerëta añetete wae ara pe ko oï. Jare ñaäro ñai wi yandeRepi wae joko wi ou ye waerä – jae ko yandeYa Jesucristo.

<sup>21</sup>Jae umbiambieta oï yanderete kua iwi pewa ikawiete ye oï waerä jae jete imbaepuerete wae ara pewa rami. Jukuärái yandeYa uyapota oï jae imbaepuere tuichaete wae rupi. Kua ko jae mbaepuere jae ime onoi opaete mbaembae re wae.

## Filipenses 4

<sup>1</sup>Jáeramo hermano mii reta, jekuaeño piñemimiräta yandeYa re opaete kua mbaembae pumbiarakuaa aï wae rupi. Che puau jare aipotaete puecha yewi. Pe reta chembiyerowia jare che ayerowia katu peré.

### Pablo umiatangätu reta

<sup>2</sup>Nde Evodia jare nde Síntique, pe reta mokui rewe pëti ramiño ko peï yandeYa Cristo re. Jáeramo che pumiñera piyeapikatu ye mii waerä pe yepái.

<sup>3</sup>Jare nde cheparawiki ñru, che numiñera nembori waerä kua kuña reta uyeapikatu waerä. Aipota'ä jae reta ikawi'ä oï waerä. Echa'ä yepe tēi jeta wae reta oyowaicho ore ndiwe, erëi kua kuña reta täta uparawiki che ndiwe ñee ikawi wae Cristo rewa uyemimbeu waerä. Jukuärái wi uyapo hermano Clemente jare ñru che ndiwe uparawiki wae reta. Opaete kua reta jee uyekuatía oï Tumpa itupapire pe – jokua tupapire ko jae kía kía tekowe opa mbae wae onoi wae reta jee uyekuatía oï pipe wae.

<sup>4</sup>Jekuaeño piyerowia yandeYa uyapo yandewe wae re. Jare che tae ye pewe jukuärái. ¡Piyerowia!

<sup>5</sup>YandeYa ou yeta wae koiño ma oi. Jáeramo opaete wae tuikuaa piñee kawi pei wae.

<sup>6</sup>Awiye etei piyembipia'ä mbae re awe. Erëi piyerure Tumpa pe opaete mbaembae re. Peka chupe opaete mbaembae uata oi pewe wae yasurupái pemee chupe rewe, echa'ä jae uyandu oi piyerure chupe wae re.

<sup>7</sup>Jare Tumpa pembipiakatuta oi añetete rewe. Añetete, ndarau kiawe ipuere uikuaa kawi këraita ra peasa pei yembiawái rupi pepiawiwe rewe. Erëi jukuärái Tumpa pemborita awiye waerä piyembipia'äete. Jukuäraita ko, echa'ä pe reta pei pëti ramiño Cristo re ramo.

<sup>8</sup>Añawe hermano mii reta, ime ye mbae re aipota pumbiarakuaa: Ime yawe mbae añetete wae jare ikawi oi wae, jokua re ko piyemingetata pepia pe. Jare piyemingeta wi pepia pe ipotawe mbae jupi oi wae re, jare ikia mbae oi wae re, jare ipöra oi wae re, jare ipotawe mbae uyekuaa kawi oi wae re wi. Ime yawe mbae jokua yae chupe, “Kua ikawi ko,” jare ikawi oi yawe yaipiu waerä chuwi, jayawe jekuaeño pepia pe piyemingeta jese.

<sup>9</sup>Pe reta piyemboe kawi ma che pomboe wae re. Jare piyandu ayemingeta wae jare cherecha mbaembae ayapo wae. Jáeramo jekuaeño jokua mbaembae piyapo wi. Jare Tumpa jekuaeño oita pe reta ndiwe. Jae ko yanembipiakatu wae.

### **Pablo umee chupe reta yasurupái yembori re**

<sup>10</sup>Che ayerowiaete ai jare amee yasurupái yandeYa pe peré. Echa'ä añawe pe reta peruruka ye ma chewe mbaembae mii chembori waerä. Che aikuaa pe reta pemanduaño mái piko tei cheré. Jaeño uata iko pewe kërái rupi ra chembori waerä.

<sup>11</sup>Mbaeti ko kua ayemingeta ai uata oi chewe ramo jare aipota pe reta chembori ye ramo. Añetete che aikuaa ma kërái aiko waerä chepiakatu rewe ipotawe mbae anoi wae rupi.

<sup>12</sup>Che aikuaa kërái ko mbae uata wae. Jare aikuaa wi kërái ko jeta mbaembae ñanoi wae. Jare aikuaa kërái ko yanemingari wae jare kërái ko yandiyembae wae. Erëi chemaerä oyowakeño. Echa'ä che ayemboe ma jokua re kërái aiko waerä chepiakatu rewe ipotawe mbae rupi.

<sup>13</sup>Añetete opaete kua mbaembae che chepuere amiawäta, echa'ä Cristo jekuaeño chemimiräta oi ramo.

<sup>14</sup>Erëitu amee ai pewe yasurupái pe reta chembori wae re aiporara ai wae rupi.

<sup>15</sup>Pe Filipos pe piko wae reta, pikuaa wi kërái ñee ikawi wae jaeramo uyemimbeu yawe pepite rupi, jare che a ye yawe iwi Macedonia wi, mbaeti ye iru hermano reta ueruruka chewe yembori. Jaeño pe reta peruruka mii chewe.

<sup>16</sup>Echa'ä tëta wasu Tesalónica pe aiko yawe wi, mbowi wese peruruka chewe yembori.

<sup>17</sup>Kua mbaeti ko che ayemingeta ai pe reta jekuaeño peruruka ye chewe waerä yembori. Jaeño aipota pe reta jekuaeño piyapo waerä kua nunga mbaembae, echa'ä pëti ara Tumpa umiñatimata oi pewe jokua piyapo wae re.

<sup>18</sup>Jayawe pe reta pikuaa waerä, uwäe ma chewe opaete mbaembae pe reta peruruka chewe wae. Epafrodito umee ma chewe opaete jare añawe ayekou ai. Uata'ä etei oi chewe mbae awe. Kua yembori pe reta peruruka chewe wae, jae ko mbae pemee Tumpa pe wae rami. Jokua nunga Tumpa umbiyerowia.

<sup>19</sup>Jare jukuärái wi cheRu Tumpa jetaete ye onoi wae wi umeeta pewe opaete mbae uata oi pewe wae. Jukuäráita ko, echa'ä pe reta pëti ramiño pei Jesucristo re ramo.

<sup>20</sup>¡YandeRu Tumpa jee tuyembutuichaka jaeño mái pewa! ¡Jukuärái tuiko!

### **Pablo wiraaka saludo**

<sup>21</sup>Pembisaluda mii chewe kuri opaete Cristo re wirowia wae reta joko pe ñonoï wae. Hermano reta che ndiwe ñonoï wae wi omondo pewe saludo.

<sup>22</sup>Jae ramiño wi opaete hermano reta kua tëta wasu pe ñonoï wae omondo pewe wi saludo. Jare mburuwicha wasu Roma pewa pe uyeyokui wae reta etei omondo pewe wi saludo.

<sup>23</sup>YandeYa Jesucristo jekuaeño tipiakawi pewe. Jukuärái tuiko.

## Colosenses

### Kua tupapire rewa:

Kua tupapire Pablo uikuatía jare wiraaka Cristo re wirowia wae reta pe tēta wasu Colosas pewa pe. Yepe tēi Pablo pēti wese awe oo'ā jokua tēta wasu pe, erēi jae uikuaa mokui wae yepe joko pewa – jae ko Filemón jare Epafraas jee wae reta. Epafraas ko jaeramo etei umimbeu Colosas pewa reta pe ñee ikawi wae Jesucristo rewa (1.7). Pablo uikuatía kua tupapire peresoriru pe iko rambuewe tēta wasu Roma pe. Echa'ā Epafraas ou ma opou ipi jare imiāri ma chupe ime yembiawái Colosas pe Cristo re wirowia wae reta ipite pe. Echa'ā ou ma uwāe joko pe amokue oporomboeraanga wae reta. Jare omboe wireko reta tēi imeta ko uyapo reta judío reta jeko rupi Tumpa umae kawi jese reta waerā. Jáeramo Pablo uikuatía jare wiraaka kua tupapire Colosas pe Cristo re wirowia wae reta pe umbiarakuaa kawi reta waerā awiye waerā jae reta uipisi jokua yemboe kachi wae. Kua tupapire rupi Pablo oporomboe kawi yandeYa Jesucristo ko jae Tumpa etei jare opaete jokua judío reta jeko jaeño uyembijaanga iko jese (2.9,17).

## Colosenses 1

### Pablo wiraaka saludo

<sup>1-2</sup>Cherikei reta, cheriwi reta, jare cherindi reta tēta wasu Colosas pe piko wae, che araaka ai pewe saludo yandeYa Jesucristo jee re. Che ko jae Pablo. YandeYa Jesucristo chemondo jae jee re amimbeu waerā jesewa, echa'ā jukuārái Tumpa uipota ramo. Che jare hermano Timoteo ndiwe aikuatía ai kua tupapire pewe Cristo re perowia wae reta pe. Tumpa peñono tee ko jae imaerā. YandeRu Tumpa jare yandeYa Jesucristo jekuaeño tipiakawi pewe jare tuyapo pewe piko waerā pepiakatu rewe.

### Kērái Pablo uyerure Tumpa pe jese reta

<sup>3</sup>Ore nduyerureñoi peré jare jekuaeño numee noī yasurupái Tumpa pe – jae ko yandeYa Jesucristo Tu.

<sup>4</sup>Numee chupe yasurupái jae mbaembae uyapo oī pepite pe wae re. Echa'ā pe reta pererākua ma orewe kērái perowia Jesucristo re jare kērái peau pei wi opaete Cristo re wirowia wae reta.

<sup>5</sup>Añetete kua jekuaeño piyapo pei, echa'ā pe reta peāro pei perowia katu rewe jokua mbaembae ikawi wae Tumpa ime onoi ara pe pemaerā wae. Jukuārái pikuaa ma ñee ikawi wae Cristo rewa piyandu ramo wiwe. Jokua ko jae ñee añetete wae.

<sup>6</sup>Kua ñee ikawi wae uyemimbeu pewe wae jae nunga wi uyemimbeu oo oï opaete iwi rupi, jare jeta wae reta wirowia oï jese. Jare añawe uyeyapo oï chupe reta wi pewe uyeyapo wae rami. Echa'ä pe reta pemandúa kawi peï jaeramo piyandu yawe ñee ikawi wae, jare pikuaa yawe añetete ko Tumpa ipiakawiete ye, ¿mbae pa uyeyapo pewe? Pe reta perowia jese, jare joko wiwe jokua ñee uparawiki oï pepia pe umbiambie waerä perekowe jukuärái piyeyokui kawi waerä Tumpa pe. Jare jokua etei wi añawe uyeyapo oï opaete iwi rupi.

<sup>7</sup>Yandehermano Epafras pemboe kawi Tumpa ipiakawi rewa. Epafras uyeyokui oï Cristo pe ore ndiwe jare ore nduau. Jae oo pepi orepepika pe pemboe waerä, jare jukuärái jae uyeyokui oï Cristo pe pepite rupi.

<sup>8</sup>Jare jae umimbeu ma orewe kërái Espiritu Santo imbaepuere rupi piyerau peï päwe rewe.

<sup>9</sup>Jáeramo ore kua mbaembae jeräkua orewe wiwe, jekuaeño nduyerure noi peré Tumpa pe. Nduyerure noi chupe jae umee waerä pewe arakuaa jesewa, jare jokoropi uikuaaka waerä pewe mbaembae jae uipota piyapo waerä wae.

<sup>10</sup>Jukuärái ore nduyerure noi peré pereko kawi waerä kërái ikawi ko yureko waerä kía kía Tumpa pewa iko wae reta. Echa'ä jukuärái piko yawe, pembiyerowiata Tumpa opaete mbaembae piyapo wae rupi. Echa'ä piyeyokui kawita chupe opaete mbae ikawi wae Tumpa pe piyapo wae rupi, jare jekuaeño wi pekuakuaata Tumpa koti arakuaa rupi.

<sup>11</sup>Jae nunga wi pe reta piko yawe Tumpa pembiyerowia waerä, Tumpa pemimirätata imbaepuere tuichaete wae pe, jukuärái pepuere waerä jekuaeño perupia ipotawe mbae pepiawasuwae rewe jare piyerowia rewe.

<sup>12</sup>Jare pemeeta wi yandeRu pe yasurupái, echa'ä jae peñono tee ma jae imaerä, jare ime onoi pemaerä mbaembae ikawiete ye wae umee waerä pewe kuri. Jayawe pe reta tuicha rupi piyekouta peï jokua ara opaete Cristo re wirowia wae reta tembipe pe ñonoï wae reta ndiwe.

<sup>13</sup>Echa'ä yandeRu Tumpa yanderepi ma Añawasu imbaepuere wi jare ñaneño ma Tai imbaepuere pe. Tumpa uauete Tai, jare añawe uyapo ma yandewe ñai waerä Tai ndiwe Tai oï ma yawe opaete wae imburuwicha wasurä jaeño mái pewa.

<sup>14</sup>Kua re yayekouta ñai kuri, echa'ä yepe tēi yayawi Tumpa koti, erēi Tumpa imandua'ä ma yandewe jokua re. Echa'ä Tai upiyere juwi jare umano yanderé opa umbiepi waerä jokua teko yareko Tumpa koti wae.

### **Jesucristo ko jae opaete mbaembae iYa**

<sup>15</sup>Mbaeti etei kía uecha yandeRu Tumpa. Erēi Tai rupi ko yaecha Tumpa uyekuaa mbae wae. Jare Tai ko jae opaete mbaembae ime oï wae iYa.

<sup>16</sup>Echa'ä jae etei umbiyekuaa opaete mbaembae ara pe oï wae jare iwi pe oï wae, yaecha wae jare yaecha mbae wae (jokua ko jae opaete araiwa reta opaño kërái rai

ime mbaepuere onoi wae). Jukuärái ko uyekuaa opaetei mbaembae Tai rupi etei jare Tai imaerä etei wi.

<sup>17</sup>Jare ndei mbae awe iko mbowe, Tai ikoño mái. Jare mbaetita tēi mbae ipuere iko Tai uyandareko'ä yawe jese.

<sup>18</sup>Jare opaete yande Tai re yarowia wae reta, Tai ko jae ñanäka rami. Echa'ä kērái ñanäka ime onoi mbaepuere yanderete re, jukuärái wi Tai ime onoi mbaepuere yanderé. Jae rupi uyembipi opaete mbaembae, jare jae rani ko ikowe ye umanokue wae reta ipite wi ndarau ye umano waerä. Jáeramo jae ko opaete mbaembae ime oï wae iYa.

<sup>19</sup>Jukuärái ko, echa'ä Tumpa etei iko Tai jete re opaete imbaepuere rewe. Jukuärái Tumpa uipota iko jare jukuärái jae uyapo.

<sup>20</sup>Jare ime ye mbae yandeRu Tumpa uipota uyapo iko wae. Jae uipota iko uyapikatu jae ndiwe etei opaete mbaembae iwí pe oï wae jare ara pe oï wae wi. Jare jukuärái jae opa uyapo Tai Jesucristo juwi uyepiyere wae rupi jae kurusu re iko rambuewe.

<sup>21</sup>Tenonde yawe pe reta piko mbiriete Tumpa wi jare piyowaichose piko ikoti. Echa'ä pepia pe piyemingetase kachi jare piyapose wi mbaembae ikawi mbae wae.

<sup>22</sup>Erēi añawe Tumpa peapikatu ma jae ndiwe etei Cristo imano rupi. Jare jukuärái jae uyapo ipuere waerä ara taikuewa pe pembiyemboi jae jowai jupi jare pereko mbae.

<sup>23</sup>Erēi peï waerä jukuärái jae jowai, imeta ko jekuaeño perowia Jesucristo re. Pepirätata ko jese pēti tēta uwapi oï iwapika täta wae re rami. Jare awiyeta ko peya jokua peäro peï perowia katu rewe wae ñee ikawi wae uikuaaka pewe wae – jae ko ñee ikawi wae pe reta piyandu wae jare añawe uyemimbeu oï opaete kerupi rupi wae. Jare che, Pablo, amimbeu ai wi jokua ñee jare jukuärái ayeyokui ai Tumpa pe.

### **Kērái Pablo jatangätu oï Cristo re wirowia wae reta pewarä**

<sup>24</sup>Che jeta ma aiporara jokua ñee amimbeu waerä jare pe reta piyekou waerä jese. Erēi ayerowia ai, echa'ä kua che añawe aiporara ai wae rupi añemüru ai Cristo ndiwe. Echa'ä Cristo uiporara wi kua iwí pe iko rambuewe. Jayawe che arupia ai ayerowia rewe opaete mbaembae aiporara ai wae, jukuärái opaete Cristo re wirowia wae reta uyekou waerä Tumpa re. Jae reta ko jae yandeYa Cristo jete rami.

<sup>25</sup>Añetete Tumpa chapo ma opaete Cristo re wirowia wae reta pe ayeyokui waerä. Echa'ä jae chokui opaetei iñee amimbeu pewe waerä pe judío mbae piko wae reta pe.

<sup>26</sup>Kua ñee tenonde yawe kiawe uikuaa'ä iko opaetei, echa'ä Tumpa uikuaaka'ä chupe reta ramo. Erēi añawe Tumpa uikuaaka ma yandewe yande Cristo re yarowia wae reta pe.

<sup>27</sup>Echa'ä Tumpa uikuaaka ma yandewe kērái opaete wae ipuere uyekou mbae ikawiete ye wae re – jae ko ipuere onoi Cristo ipia pe kērái pe reta penoi wae rami.



Jare jukuärái ipuere uäro reta wi uyerowia katu rewe uyekou reta waerä Tumpa imbaepuere jembipete ye wae re.

<sup>28</sup>Jayawe ore numimbeu noï Cristo rewa. Ndupurumbiarakuaa noï jare nomboe noï opaete wae arakuaa katu rewe. Echa'ä ore nduipota tēi opaete wae ñonoï waerä pēti ramiño Cristo re jare ukuakuaa kawi reta waerä Tumpa koti. Jukuärái ore nduipota tēi nduraa opaete wae Tumpa jowai.

<sup>29</sup>Jokuaerä ko che aparawiki ai täta. Jare yepe tēi yawái ko, erēi Cristo imbaepuere rupi chemimiräta che amiamiri waerä yembiawái.

## Colosenses 2

<sup>1</sup>Jare che aipota pe reta pikuaa waerä kērái täta aparawiki ai ikawi waerä pewe. Jare pereño'ä ko chepia'ä ai. Echa'ä ime Cristo re wirowia wae reta tēta wasu Laodicea pe wi. Jare jese reta wi che chepia'ä ai. Añetete che aparawiki ai ikawi waerä opaete Cristo re wirowia wae reta pe – jae ko chekuaa wae reta jare ndeiño chekuaa wae reta wi.

<sup>2</sup>Echa'ä aipotaete pe reta pekirēi waerä jare piko waerä pēti ramiño piyerau päwe rewe. Jare aipota wi pe reta pikuaa kawi waerä jokua ñee Tumpa tenonde yawe uikuaaka'ä Cristo rewa wae, jare jukuärái pepiakatu waerä añetete pewa.

<sup>3</sup>Pipota yawe pearakuaa, jayawe Cristo re uñewäe arakuaa. Jare pipota yawe pikuaa mbae rewa, Cristo uikuaa opaetei mbaembae. Jokua arakuaa ko jae mbae ikawiete ye wae yanemaerä.

<sup>4</sup>Kua mbaembae che jae pewe awiye waerä kía pemitawi yemboe jupi echa wae rupi.

<sup>5</sup>Echa'ä yepe tēi che etei ai'ä pe reta ndiwe, erēi chepia oi pe reta ndiwe. Jare che tuicha rupi ayerowia ai. Echa'ä jeräkua ma chewe pe reta pei pēti ramiño päwe rewe jare jekuaeño perowia kawi pei Cristo re.

### Cristo ikawiete ko arakuaa iwi pewa wi

<sup>6</sup>Jayawe pe reta perowia ma Jesucristo re peYarä iko ramo, jayawe jekuaeño piko Jesucristo uipota wae rupi. Echa'ä pe reta pēti ramiño ko pei jese.

<sup>7</sup>Piñemimiräta Cristo re piko waerä pēti temiti kipe japo oi wae rami jare pēti tēta ikawi iwapika wae rami. Jare piñemiatangätu perowia kawi waerä mbaembae añetete wae re, echa'ä jukuärái piyemboe ma piyapo waerä. Jare jekuaeñota ko pemee yasurupái Tumpa pe.

<sup>8</sup>Jare piyandareko kawi piyé awiye waerä kía pemitawi jae iyarakuaa rupiño. Jokua arakuaa jupi wae echa ko, erēi ou'ä ko Cristo wi. Ou kuimbae reta wiño, jare jae ko arakuaa kua iwi pewaño.

<sup>9</sup>Cristo ko jae ikawiete wae opaete jokua nunga arakuaa wi, echa'ä Cristo ko jae Tumpa etei uyeyapo kuimbaerä wae.

<sup>10</sup>Jare jae ko opaete mburuwicha reta ara pewa jare iwi pewa iYa. Jare pe reta pëti ramiño pei Cristo re ramo, uata'ä etei pewe mbae awe penoi waerä tekowe opa mbae wae.

<sup>11</sup>Jare pe reta pëti ramiño pei Cristo re ramo, piyembicircuncidaka rami ma ko pei. Erëi mbaeti ko kërái kuimbae reta uyapo rami. Jae reta kía umbicircuncida yawe, ueki chuwi ipire rai mii. Erëi jokua uyeyapo pewe wae ikawiete ko. Echa'ä Cristo etei umbisiri ma pewi pereko indechikue imbaepuere iko peré wae. Añawe wiwe mbaeti ma onoi peré mbaepuere jokua kirëi mbae kachi piyapo waerä wae.

<sup>12-13</sup>Ani yandepuere yae kuärái: Ndei Cristo re perowia mbowe, pe reta pikose pere wae rupiño. Jáeramo jekuaeño piyawise Tumpa koti, jare jokua jeko pewa pmano wae echa piko Tumpa wi. Erëi pëti ara pe reta piyandu kërái Tumpa imbaepuere tuichaete wae. Jare piyandu wi kërái jae umbijekowe ye ueru Cristo umanokue wae reta ipite wi wae. Jare perowia yawe jae imbaepuere perepi waerä wae re, jayawe Tumpa peapo pëti ramiño Cristo re etei. Kua uipota jei Cristo umano yawe, jare teöwerenda pe oñono reta yawe, pe reta wi pmano rami jae ndiwe. Jare Cristo ikowe ye yawe, pe reta wi Tumpa pembijekowe piau ye rami ko Cristo ndiwe. Yande ñanoi tekowe ipiau wae, echa'ä Tumpa opa ma umbái yandewi mbaembae yayawi ikoti wae.

<sup>14</sup>Añetete jokua mbaembae yayawi wae uyekuatía iko tupapire re rami opaete yanembijekose iko jese wae ndiwe. Jare jokua ko Tumpa opa ma uikutu kurusu re rami Cristo uyekutuka iko yawe. Jáeramo yande mbaeti ma teko pe ñai Tumpa jowai yayawi wae re.

<sup>15</sup>Jare jokuaño'ä ko. Cristo umano kurusu re yawe, jae opa umiamiri opaete añã reta jare upiro chuwi reta imbaepuere jae reta ime wireko yanderé wae. Jare joko wi jae umimichika reta opaete wae jowake. Jare jukuärái Cristo uechaka opaete wae pe jae ko upurumiamiri wae.

<sup>16</sup>Jáeramo opaete kua mbaembae rupi che jae ai pewe kuärái: Awiye piyembipia'ä kía pembijeko yawe ipotawe mbaembae peu wae re, jare ipotawe ara yemimandúa Tumpa pewa jare yasipiau pewa piyapo'ä wae re, jare ara mbutuu piyapo'ä jae reta rami wae re.<sup>17</sup>Añetete ko Tumpa jei arakae judío reta pe jokua mbaembae uyapo reta waerä. Erëi jokua mbaembae jaeño uyembijaanga iko kía outa iko wae re. Erëi añawe ou ma ko. Jae ko Cristo etei.

<sup>18</sup>Jáeramo ime yawe kía uipota pembijeko pe reta pembutuicha'ä Tumpa jee kërái jae uyapo rami wae re, awiye piyapisaka jese. Jokua nunga reta uipota uñemimichiraanga opaete wae jowake. Jare umbutuicha reta araiwa reta, jare jekuaeño jei reta uyembikate rewe, “Tumpa uikuaaka chewe,” jei reta tēi. Iyupe reta jae retái ipiyemingeta ikawi oī tēi, jare uyembikate reta jokua re.

<sup>19</sup>Erëitu jae reta uyembisiri ñonoī yandeYa Cristo wi, yepe tēi jae ko ñanäka rami jare yande reta ko jae jete rami. Añetete Cristo yandapo pëti ramiño kërái ñanekäwe reta iyupiyuapi wae jare yanderayi reta uyapo pëti ramiño yanderete rami. Jare jukuärái jekuaeño yakuakuaa ñai Tumpa koti kërái Tumpa uipota rami.

<sup>20</sup>Pe reta pikuaa pei kërái ko kua iwi jeko wae. Jare pe reta pëti ramiño pei Cristo re ramo, pemano rami ma ko Cristo ndiwe kua iwi jeko wi. Jáeramo jokua teko reta ndarau ye ma ime onoi mbaepuere peré. Jayawe, ¿maera pa jekuaeño pipota piñemee ye piko waerä kua iwi jeko rupi?

<sup>21</sup>Kua iwi jeko yanemboe tēi kuärái: “Yande yaipota yayembujupi yawe Tumpa koti, ime mbaembae yandepuereta’ä yaipisi wae. Jare ime mbaembae yandepuereta’ä yau wae. Jare ime iiru mbaembae re yandepuereta’ä yaya wae.” Jukuärái yanemboe tēi reta.

<sup>22</sup>Erēi opaete kua mbaembae ndarau iko ima, jare opata imambae yande yaiporu ma yawe. ¿Këraita pa jayawe ipuere yanembori yayembujupi waerä Tumpa koti? Kuimbae retaño ko yanemboe tēi jukuärái.

<sup>23</sup>Añetete jokua mbaembae jei reta yandewe yayapo waerä wae arakuaa katu wae echa ko. Echa’ä kía jukuärái iko wae jatangätu wae echa umbutuicha waerä Tumpa jee, jare uñemimichi oï wae echa. Jare jae nunga wi täta uiporaraka jete pe umbiyerowia waerä tēi Tumpa. Erëitu kua nunga teko reta ndarau etei yanembori awiye waerä yaiko yanderete uipota uyapo wae rupiño.

## Colosenses 3

### Kërái yaiko waerä yanderekowe ipiau wae rupi

<sup>1</sup>Jayawe Tumpa pembijekowe ye Cristo ndiwe ramo, jekuaeño piñono pepia mbaembae ara pewa re kiaepe yandeYa Cristo uwapi oï Tumpa iyakata koti.

<sup>2</sup>Jekuaeño pepia pe piyemingeta mbaembae ara pewa re – mbaeti mbaembae kua iwi pewa reño.

<sup>3-4</sup>Echa’ä pe reta pemano rami ma ko mbaembae iwi pewa wi, jare añawe tekowe ipiau wae rupi pei. Kua tekowe ipiau wae, yepe tēi pecha’ä peresa pe etei, erēi pepuere pepiakatu jese. Echa’ä Cristo wi etei ko ou, jare jae uyandareko oï jese Tumpa oï wae pe. Jare Cristo uyekuaa ye yawe imbaepuere jembipete ye wae ndiwe, pe reta jae nunga wi piyekuaata pei kuri jae ndiwe.

<sup>5</sup>Jayawe pe reta pei ma tekowe ipiau wae pe ramo, pemombo mii peyuwi pereko kua iwi pewa. Jáeramo awiye piyapo awasa. Jare awiye wi pembikere. Awiye awe piyemingeta pepia pe awasa piyapo waerä. Awiye pipota mbae ikawi mbae wae. Jare awiye jekuaeño jeta mbaembae pipotaete pemaeräño. Echa’ä jukuärái piyapo yawe, jokua mbaembae pipotaete wae uyeyapota petumparaangarä.

<sup>6</sup>Jeta wae reta uyapo ñonoï kua nunga mbaembae. Jare jokua jeko pewa Tumpa iarasi uitita oï jese reta.

<sup>7</sup>Tenonde yawe, ndei Cristo re perowia mbowe, pe reta piyapose wi jokua nunga mbaembae kachi wae.

<sup>8</sup>Erëi añawe pëti jei wae peño imeta ko peya opaete kua iiru ikawi mbae wae reta wi: jae ko arasi, mbochi, mbae ikawi mbae piyapo peyupe wae, kachi piyemingeta perapicha koti wae, jare ñee kachi wae.

<sup>9</sup>Jare awiye ma papu peyupe wi. Awiye ma piyapo ye jokua mbaembae reta, echa'ä pe reta peya ma peyuwi pereko indechikue jare mbaembae kachi piyapose wae.

<sup>10</sup>Jare pipisi ma peyupe teko ipiau wae. Añawe Tumpa jekuaeño umbipiau oï pepia, pe reta pikuaa kawi waerä Tumpa. Jare jukuärái pereko oya katu oo oï jae jeko jupi wae re.

<sup>11</sup>Jare kua tekowe ipiau wae rupi pëti wae rami yayowake ma ñai. Jayawe yanemaerä mbaeti ma judío reta jare judío mbae wae reta, uyembicircuncidaka wae reta jare uyembicircuncidaka mbae wae reta, ñana rupiwa reta jare ambie iwi pewa reta, uyeyokui wae reta jare uyeyokui mbae wae reta. YandeYa Cristo jeeño ko yambuicha. Jare opaete yande pëti pëti wae reta, jae oyowakeño oï yandepia pe.

<sup>12</sup>Pe reta ko jae Tumpa reparawo wae reta. Jae perauete jare peño tee ma piko waerä jae imaerä. Jáeramo piko mii kuärái: Piyeparareko, pepiakawi peyupe, piñemimichi peyuwi, piñee kawi peyupe, pepiawas peyupe,

<sup>13</sup>jare perupia peyupe. Jare aramoi ime tēi mbae re pepuere piyengeta peyupe wae, erëi awiye pemandúa peyupe jokua re. Pikuaa kawi pei yandeYa imandua'ä ma pewe mbaembae kachi piyapo wae re; jáeramo pe reta wi awiyeta ko pemandúa peyupe wi.

<sup>14</sup>Jare opaete kua mbaembae reta wi, tenonde imeta ko piyerau päwe rewe, echa'ä jokua ko jae yandapo pëti ramiño wae.

<sup>15</sup>Tumpa pereni piko waerä pëti ramiño pepiakatu rewe. Jokuaerä ko Cristo pembipiakatu. Jáeramo jekuaeño piko jukuärái. Jare jekuaeño pemee yasurupái Tumpa pe.

<sup>16</sup>YandeYa Cristo iñee jekuaeño tuiko pepia pe. Piyembiarakuaa päwe opaete arakuaa rewe. Pekäta wi Tumpa pe pemee rewe yasurupái chupe salmo reta, jare himno reta, jare ipotawe käta reta Tumpa jee pembutuicha waerä.

<sup>17</sup>Jare opaete mbaembae piyapo wae jare pere wae, piyapo yandeYa Jesús jee re. Jare jukuärái piyapota pemee rewe yasurupái Tumpa pe jare pemandúa rewe opaete mbaembae Cristo uyapo pewe wae re.

### **Kërái ko ikawi yaiko waerä päwe rewe ñanerëta pe**

<sup>18</sup>Añawe che aipota pumbiarakuaa kërái piko kawi waerä päwe rewe perëta rupi. Kuña reta tuiko ime jei wae rupi. Echa'ä jukuärái ko jupi yandeYa re wirowia wae reta yureko waerä.

<sup>19</sup>Jare kuimbae reta tuau jembireko jare awiye tipochiño chupe.

<sup>20</sup>Jare sambiai reta tuyapo kawi opaete mbaembae tu jare ichi jei wae rupi. Echa'ä jukuärái ko yambiyerowia yandeYa.

<sup>21</sup>Jae nunga wi tu reta awiye tumbiarasiño isambiai reta opaño mbaembae re awiye waerä jei iyupe reta: “Cheru jekuaeño pochi chewe. ¿Maera pa aipota ambiyerowia?”

### **Patrón jare pione reta kërái yureko waerä**

<sup>22</sup>Jare añawe che tae uyeyokui wae reta pe kuärái: Tuyapo reta opaete mbaembae ipatrón jei chupe reta wae rupi. Awiyé tuparawiki kawi reta ipatrón umaé oï jese reta yaweño jare ipatrón umbiyerowia waeräño. Tuyeyokui kawinoi reta chupe ipiakirëi rewe yandeYa wi uipiu rewe.

<sup>23</sup>Opaete mbaembae uyapo reta wae, tuyapo reta jatangätu rewe kërái yandeYa pe uparawiki ñonoï wae rami – mbaeti ko kuimbae pe.

<sup>24</sup>Echa’ä jukuärái uyapo reta yawe, yandeYa Cristo pe etei uyeyokui ñonoï. Jekuaeño timandúa reta yandeYa umiñatimata oï chupe reta ikawi wae opaete kía kía jae imaerä ñonoï wae reta ndiwe.

<sup>25</sup>Erëi ime yawe uyeyokui wae jekuaeño mbae ikawi mbae uyapo wae, Tumpa umiñatimata oï ikoti jupi rupi jokua mbae ikawi mbae uyapo wae re. Jare mbaeta’ä Tumpa pe kía ko jae wae, echa’ä Tumpa opaete wae re oyowake umaé.

## **Colosenses 4**

<sup>1</sup>Jae nunga wi che tae patrón reta pe kuärái: Tuyapo reta jupi wae uyeyokui chupe wae reta pe, jare awiye tumbitawí reta. Jekuaeño timandúa reta kërái patrón reta jare uyeyokui chupe wae reta wi oyowakeño onoi pëtiño iYa – jae ko ara pe oï wae.

### **Pablo ueka chupe reta yerure**

<sup>2</sup>Cheïru puau mii wae reta, jekuaeño piyerure Tumpa pe. Piñemiatangätu piyerure waerä chupe pemee rewe yasurupái.

<sup>3</sup>Jare piyerure mii oreré wi Tumpa umbisiri waerä orewi yembiawái, jukuärái orepuere waerä numimbeu ñee ikawi wae Cristo rewa. Echa’ä añawe cheño no reta cadena pe kua peresoriru pe ñee ikawi wae jekuaeño animbeu wae jeko pewa. Kua ñee kiawe uikuaa’ä tenonde yawe, erëi añawe yaikuaa.

<sup>4</sup>Jayawe piyerure mii cheré animbeu waerä jokua ñee jesäka kawi rewe kërái Tumpa uipota wae rami.

<sup>5</sup>Jayawe piko pearakuaa katu rewe Cristo re wírowia mbae wae reta ipite rupi. Jare piporu kawi ara reta piyeyokui waerä Tumpa pe.

<sup>6</sup>Jekuaeño piyemingeta piñee kawi rewe jare mbaembae ikawi wae re. Jukuärái yawe, pikuaa kawita kërái piyemingeta waerä kía upirandu pewe yawe mbaembae perowia wae re.

### **Pablo wiraaka saludo**

<sup>7</sup>Che aipota pe reta pikuaa waerä mbae uasa oï che ndiwe wae. Jáeramo amondo ai pepi yandehermano yaau wae Tíquico. Kua kuimbae che ndiwe uyeyokui kawi oï yandeYa pe. Pe reta pepuere perowia katu jese.

<sup>8</sup>Jae oo uwäe yawe pepi, uikuaakata oï pewe ore rewa kërái ko noï kua pe wae, jare jae pemikirëita wi Tumpa koti.

<sup>9</sup>Jare amondo ai wi jae ndiwe perëtaiwa Onésimo. Jae ko yandehermano yaau wae jare yarowia katu jese wae. Jae reta uikuaakata oï pewe opaete mbae uasa kua pe oï wae.

<sup>10</sup>Aristarco omondo oï pewe saludo. Jae oï kua peresoriru pe che ndiwe. Jare Marcos omondo pewe wi saludo. Jae ko Bernabé jii. Pemandúa peï, tenonde yawe che jae pewe Marcos oo opou pepi yawe, pembiasa kawi.

<sup>11</sup>Jare Jesús – jae ko iru wae reta ueni wi Justo pe – jae omondo pewe wi saludo. Opaete yandehermano judío reta ipite wi, kua mbapi kuimbae retaño umimbeu ñonoï che ndiwe kërái ñanoi waerä Tumpa yanemburuwicha wasurä. Jare jae reta ko tuicha rupi chembipiakatu.

<sup>12</sup>Jare jae nunga wi perëtaiwa Epafras omondo oï pewe saludo. Jae uyeyokui kawi oï Jesucristo pe. Jare jae jekuaeño täta rupi uyerure oï Tumpa pe peré pepiräta waerä Tumpa koti jare pikuaa kawi waerä opaete Tumpa uipota wae.

<sup>13</sup>Che etei chepuere amimbeu kawi pewe kërái Epafras ipia'ä oï peré. Jare mbaeti pereño ipia'ä oï. Jae nunga wi jae ipia'ä oï hermano reta tëta wasu Laodicea jare Hierápolis pe ñonoï wae reta re.

<sup>14</sup>Jae nunga wi Lucas jare Demas omondo oï pewe saludo. Lucas ko jae doctor upurupiano wae ore nduau wae.

<sup>15</sup>Pembisaluda mii chewe kuri hermano reta Laodicea pe ñonoï wae, jare jae nunga wi hermana Ninfas jare Cristo re wirowia wae reta jëta pe uyembati wae.

<sup>16</sup>Pe reta pemingeta ma yawe kua tupapire, pemondo yuapi ye Laodicea pe, joko pewa hermano reta umingeta waerä wi. Chupe reta wi amondo ambie tupapire. Jare jokua tupapire aipota pe reta pemingeta waerä wi.

<sup>17</sup>Jare pere wi hermano Arquipo pe tuñemiatangätu opa uyapo waerä mbarawiki yandeYa umee chupe wae.

<sup>18</sup>Kua che etei aikuatía ai pewe pikuaa waerä che ko amondo ai pewe kua tupapire wae. Awiye mii peakañi chewi parawete kua peresoriru pe ai rambuwe. Tumpa jekuaeño tipiakawi pewe. Jukuärái tuiko.

## 1 Tesalonicenses

### Kua tupapire rewa:

Kua tupapire, jae ko Pablo uikuatía Cristo re wirowia wae reta pe tēta wasu Tesalónica pe uyembati yureko wae pe. Pablo oo jokua tēta wasu pe umimbeu waerā ñee ikawi wae Cristo rewa (Hechos 17.1-10). Erēi ipuere'ā ima upita joko pe. Echa'ā amokue joko pe ñonoï wae reta uipota'ā wirowia jokua ñee re jare ueki omombo reta Pablo tēta wasu wi. Jae nunga wi umbipi uiporaraka reta jokua jaeramo Cristo re wirowia wae reta pe. Jayawe Pablo uyembipia'ā iko jese reta jare uipota tēi uñatima ye Tesalónica pe umikirēi reta waerā Tumpa koti. Erēi ipuere'ā. Jayawe Pablo omondo chupe reta iparawiki iuru Timoteo uikuaa waerā kērái ra ñonoï reta wae. Jare Timoteo ou ye yawe Pablo oï wae pe, umimbeu chupe jae reta ikawi ñonoï jare imeño ipirāta ñonoï Tumpa koti. Erēi ime iko pēti mbae re jae reta jopa yureko – jae ko yandeYa Jesucristo ou yeta wae rewa. Jayawe tēta wasu Corinto wi Pablo uikuatía jare wiraaka kua tupapire Tesalónica pe umbiarakuaa reta waerā.

### 1 Tesalonicenses 1

#### Pablo wiraaka saludo

<sup>1</sup>Pe reta yandeRu Tumpa jare yandeYa Jesucristo jee re piyembati tēta wasu Tesalónica pe peï wae, ore ko jae Pablo jare Silas jare Timoteo nduikuatía noï pewe kua tupapire. YandeRu Tumpa jekuaeño tipiakawi pewe jare tuyapo pewe piko waerā pepiakatu rewe.

#### Jeräkua opaete kerupi kērái jae reta wirowia Cristo re wae

<sup>2</sup>Ore nduyerure yawe Tumpa pe peré, jekuaeño numee yasurupái chupe opaete mbaembae jae uyapo oï peré wae re.

<sup>3</sup>Jare yandeRu Tumpa jowai jekuaeño oremandúa noï kērái perowia Tumpa re, jare kērái jokua pemikirēi oï piyeyokui kawi waerā chupe. Jare oremandúa noï wi kērái pe reta jekuaeño piyembori katu peï, echa'ā piyerau päwe añetete rewe ramo. Jare jekuaeño oremandúa noï wi kērái perupia peï opaete yembiawái reta. Echa'ā jukuärái peäro peï perowia katu rewe jokua ara yandeYa Jesucristo ou yeta oï wae. Jokua ara jae umiñatimata oï yandewe opaete yaiporara wae re.

<sup>4</sup>Tumpa perauete, pe chehermano mii reta. Jare ore numee yasurupái chupe, echa'ā ore nduikuaa Tumpa ko peparawo.

<sup>5</sup>Echa'ā numimbeu pewe yawe ñee ikawi wae Cristo rewa, ore nduyendu kērái Espiritu Santo oremimbaepuere iko wae. Ore nduyemingetaiño'ā ko. Jare pe reta pikuaa jokua numimbeu pewe wae añetete ko. Jare pemaeré yawe, pe reta pikuaa piko orereko ikawi ko jare jaeño ore nduipota ikawi wae pemaerā.

<sup>6</sup>Jayawe pe reta perowia ñee ikawi wae Cristo rewa. Jare yepe tēi iru wae reta tāta rupi uiporaraka pewe jokua re, erēi Espiritu Santo umee pewe tuicha yerowia. Jare pe reta piko ore nduiko rami jare yandeYa iko rami wi.

<sup>7</sup>Kua pereko ikawi oī ramo, opaete Cristo re wirowia wae reta iwi Macedonia jare Acaya pewa reta uikuaa wi kērái yureko waerä.

<sup>8</sup>Echa'ä pewi uñemiái yandeYa ñee opaete jokua iwi rupi. Erēi mbaeti Macedonia jare Acaya rupiño. Jeräkua wi opaete kerupi perowia pei Tumpa re. Jáeramo uata'ä ma mbae ore numimbeu waerä chupe reta.

<sup>9</sup>Añawe ipotawe kerupi ndoo wae rupi imiári reta orewe kērái mbae piyapo wae ore nduiko yawe pepi. Echa'ä imiári reta orewe kērái pe reta piyerowa ma Tumpa ikoño mái wae jare añetete wae koti tumparaanga reta wi.

<sup>10</sup>Jare imiári reta orewe wi kērái añawe peáro pei Tumpa Tai ou ye waerä ara wi – jae ko Jesús. YandeRu Tumpa umbijekowe ye ueru umanokue wae reta ipite wi. Jare Jesús ko yanderepi Tumpa iarasi outa oī wae wi.

## 1 Tesalonicenses 2

### Kērái Pablo uyeyokui Tumpa pe Tesalónica pe

<sup>1</sup>Jare hermano mii reta, pe reta pikuaa wi ndooño'ä ko pepi.

<sup>2</sup>Ndei ore ndoo pepi mbowe, jeta nduiporara tēta wasu Filipos pe. Jokua tēta wasu pewa reta uyapo mbaembae ikawi mbae wae orewe. Kua pikuaa ko. Erēi yepe tēi yawái iko orewe, jeseuwe Tumpa orembori ndoo numimbeu waerä pewe ndukiye mbae rewe ñee ikawi wae Tumpa wi ou wae.

<sup>3</sup>Echa'ä kua ñee numimbeu noī wae añetete ko. Mbaeti etei numimbeu pewe kua ñee pumbitawi waerä jare nduyekou waerä pembaembae re. Mbaeti etei jokua.

<sup>4</sup>Ore numimbeu pewe ñee ikawi wae, echa'ä nduipota numbiyerowia Tumpa ramo. Tumpa ko jekuaeño umae oī opaete orepiä re jare kērái nduyeyokui chupe wae re. Jare oreparawiki ikawi iko chupe ramo, jae wirowia katu ma oreré numimbeu waerä ñee ikawi wae. Jáeramo Tumpa ko nduipota numbiyerowia. Mbaeti ko kuimbae reta.

<sup>5</sup>Kua pikuaa kawi ko pe reta. Echa'ä pemandúa kawi pei ore ndoo pepi yawe, nduyemingeta'ä etei ko pe reta piyembutuichaka waerä. Jae nunga wi nduipota'ä pe reta orembori wae rupi nduikokatu. Jukuärái ndoe pewe Tumpa jowake.

<sup>6</sup>Ore ndueka'ä nduiko pe reta jare iru wae reta piyemingeta kawi waerä oreré. Jare yepe tēi Cristo etei oremondo ñee numimbeu waerä, jare jukuärái ore orepuere tēi ndoe pewe orembori waerä, erēi nduyapo'ä jukuärái.

<sup>7</sup>Ore nduyandareko ko peré puau rewe, pēti kuña imembi umbikambu oī wae re uyandareko wae rami.



<sup>8</sup>Jare ore puauete ramo, nduyerowia nduiko numimbeu pewe rambuewe ñee ikawi wae Tumpa wi ou wae. Jare jokuano'ä ko. Ore nduyerowia nduiko, echa'ä nuñemiiru kawi pe reta ndiwe ramo.

<sup>9</sup>Pemandúa kawi peï, hermano reta, kërái ore täta nduparawiki ara rupi jare pïtu rupi ime waerä nonoi orerembiurä. Jukuärái nduyapo awiye waerä pe reta piyembipia'ä oreré numimbeu pewe rambuewe ñee ikawi wae Tumpa wi ou wae.

<sup>10</sup>Pe Cristo re perowia wae reta pikuaa, jare jae nunga wi Tumpa uikuaa oï kërái ore nduiko pepite pe. Orereko kawi jare jupi. Jare mbaeti kía ipuere orembijeko mbae re awe.<sup>11</sup>Pe reta pikuaa kawi kërái pëti pëti pe reta ore pumbiarakuaa kawi kërái pëti kuimbae umbiarakuaa tai rami.

<sup>12</sup>Ore pumbipiakatu, jare pumikirëi, jare pumiatangätu piko waerä jupi rupi Tumpa jowai. Echa'ä Tumpa ko jae pemburuwicha wasu, jare pe reta piyekouta peï jae imbaepuere jupiete ye wae re jae oï ma yawe opaete wae imburuwicha wasurä jaeño mái pewa.

<sup>13-14</sup>Jayawe hermano mii reta, ore jekuaeño numee yasurupái Tumpa pe. Echa'ä ore numimbeu pewe yawe Tumpa ñee, pe reta perowia woi Tumpa ñee etei ko. Kuimbae ñee'ä ko. Jukuärái ko añetete, jare jukuärái pe reta perowia wi. Jare yepe tëi täta rupi piporara peï perëtaiwa reta ipo pe Cristo re perowia ramo, erëi pe reta piporara peï piyerowia rewe. Jare jukuärái uyekuaa oï kërái Tumpa ñee uparawiki oï pepia pe wae, pe Cristo re perowia wae reta. Jukuärái wi uyeyapo Jesucristo re wirowia wae reta pe iwi Judea rupi kerupi rupi uyembati wae rupi. Jae reta täta rupi uiporara wi jëtaiwa judío reta ipo pe. Jare añawe jukuäraiete wi uyeyapo ma pewe.

<sup>15</sup>Judío reta ko uyuka arakae Tumpa ñee umimbeu wae reta, jare taikue rupi judío reta uyukaka yandeYa Jesucristo etei. Jare jokuano'ä ko. Jae nunga wi judío reta jeta wese pochi rewe oremoë oremombo tëta wasu reta wi. Jáeramo jae reta ombopochika Tumpa. Jare jae reta opaete wae jowaicho ko.

<sup>16</sup>Echa'ä yepe tëi ore nduipota numimbeu judío mbae wae reta pe kërái ipuere onoi reta waerä tekowe opa mbae wae Tumpa ndiwe, erëi judío reta jekuaeño orembiawái ñonoï. Jukuärái jae reta jekuaeño jeiete uyawi ñonoï Tumpa koti. Jáeramo Tumpa iarasi oata ma oï jese reta.

### **Pablo uipota tëi oo ye opou Tesalónica pewa reta ipi**

<sup>17</sup>Jayawe hermano mii reta, yepe tëi ndei ima uasa ore nduiko pe reta ndiwe wae, erëi jekuaeño oremandúa peré. Nduipota echa tëi ko puecha yewi.

<sup>18</sup>Nduipota echa tëi ko ndoo ye ndopou pepi. Che Pablo jeta wese aipota tëi a ye apou pepi, erëitu Satanás jekuaeño orembiawái parawete.

<sup>19</sup>Ore nduipota tëi ndoo ye ndopou pepi, echa'ä pe reta tuicha rupi orembiyerowia peï. Jare ore nduikuaa jokua ara yandeYa Jesús ou ye yawe ara wi, pe reta wi peita jae ndiwe joko pe. Jare ore nduyerowiaeteta noï jae jowai jae oreporu rambuewe pe reta penoi waerä tekowe opa mbae wae.

<sup>20</sup>Añetete pe reta orembiyerowia, jare ore nduyerowiata noï yandeYa jei yawe ikawi ko piyapo.

### 1 Tesalonicenses 3

<sup>1</sup>Jáeramo yawái iko orewe nduikuaa'ä rambuewe kërái ra peï wae. Jare orepuere'ä ma ndurupia yawe, che jare Silas ndoe oreyupe: “Yapita pochi kua tëta wasu Atenas pe.

<sup>2</sup>Erëi yamondo hermano Timoteo jae reta ipi.” Jukuärái ndoe oreyupe. Pe reta pikuaa peï Timoteo ko jae oreparawiki ñru. Echa'ä jae ore ndiwe nduyeyokui noï Tumpa pe numimbeu waerä ñee ikawi wae Cristo rewa. Jare ore nduipota jae oo waerä opou pepi pemikirëi waerä Tumpa koti jare jeiete perowia waerä jese,

<sup>3</sup>awiye waerä uasaete pepiatiti kua piporara peï wae re. Pe reta etei pikuaa peï yaiporara ñotái ko ñái.

<sup>4</sup>Pemandúa kawi peï, ore nduiko yawe pe reta ndiwe, jekuaeño numimbeu pewe yaiporarata ñái Cristo re yarowia jeko pewa. Jare añawe uasa ma pewe jukuäriete pe reta pikuaa rami.

<sup>5</sup>Jokua jeko pewa che amondo Timoteo pepi. Che parawete chepuere'ä arupia aikuaa'ä kërái ra peï ramo. Jare aipota aikuaa aiko imeño ra perowia peï Cristo re wae. Che jae tëi aiko: “¿Ipuereta ra Añawasú mbae uyapo jae reta uyerowa waerä Tumpa wi?” Jukuärái jae aiko. Arowia tëi aiko aramoi jokua täta rupi nduparawiki pepite pe wae usiriwe'ä maeräwe.

<sup>6</sup>Erëi añawe Timoteo ou ye ma uwäe jokoti wi, jare umimbeu ma orewe kërái jekuaeño perowia peï Cristo re wae jare kërái piyerau päwe rewe wi. Umimbeu wi orewe pe reta jekuaeño pemandúa oreré orerau rewe, jare kërái pe reta pipota tëi orerecha ye kërái ore nduipota puecha ye rami.

<sup>7</sup>Jayawe hermano mii reta, yepe tëi ñru wae reta uyapo ikawi mbae wae orewe jare nduiporara noï, erëi orepiakatu noï jekuaeño perowia peï yandeYa re ramo.

<sup>8</sup>Añawe ramo nduyerowia piau ye noï, echa'ä nduikuaa ma pe reta pepiräta peï yandeYa re ramo.

<sup>9</sup>Järái etei ko numee yasurupái Tumpa pe jokua yerowia pemee orewe wae re!

<sup>10</sup>Jare tuicha rupi nduyerure noï Tumpa pe ara rupi jare pïtu rupi orepuere waerä ndoo puecha ye. Echa'ä nduipota pomboe mbaembae imeño uata pikuaa kawi waerä wae re, jukuärái perowia katujete waerä yandeYa re.

<sup>11</sup>Jayawe yandeRu Tumpa etei jare yandeYa Jesucristo tuipea mii orewe tape orepuere waerä ndoo ye ndopou mii pepi.

<sup>12</sup>Jare yandeYa tuparawiki pepia pe jeiete piyerau päwe waerä jare jeiete peau waerä opaete wae reta kërái ore puau rami.

<sup>13</sup>Pëti ara yandeYa Jesucristo ou yeta oi opaete kía kía jae oñono tee jae imaerä wae reta ndiwe. Jare jokua ara opaete yande yayemboita ñai Tumpa jowai. Jáeramo yandeYa tumimiräta pepia pepuere waerä piko jupi, jare jukuärái pepuere waerä piyemboi Tumpa jowai pereko mbae rewe jokua ara. Jukuärái tuiko.

## 1 Tesalonicenses 4

### Pablo umbiarakuaa reta kërái rupi umbiyerowia waerä Tumpa

<sup>1</sup>Jayawe hermano mii reta, ore pumiñera yandeYa Jesucristo jee re jekuaeño piko pembiyerowia waerä Tumpa. Ore pumbiarakuaa kawu ma jokua kërái piyapo waerä, jare jukuäraiete pe reta piyapo pei. Jaeño nduipota pe reta jeiete piyapo waerä jukuärái.

<sup>2</sup>Pe reta pikuaa kawu ma pei jokua ore ndoe pewe yandeYa Jesús jee re wae.

<sup>3</sup>Tumpa uipota pe reta piñeño tee waerä jae imaerä – jae ko awiye waerä piko awasa rupi.

<sup>4</sup>Pëti pëti wae tuyemboe umaeño'ä waerä iyé jete uipota wae rupi. Erëi tuyapo mbae jupi kawu wae jete rupi.

<sup>5</sup>Awiye tuiko jete uipota uyapo wae rupiño Tumpa uikuaa mbae wae reta yureko rami.

<sup>6</sup>Kua nunga mbaembae rupi awiye piyapo ikawu mbae wae perapicha koti jare awiye pemitawu wi. Echa'ä yandeYa uiporarakata oi kua nunga mbaembae uyapo wae pe kërái ore numimbeu pewe wae rami.

<sup>7</sup>Jae nunga wi Tumpa mbaeti ko ñanereni yande yaiko waerä kachi rupi. Ñanereni ko ñañeño tee waerä jae imaerä.

<sup>8</sup>Jukuärái ko Tumpa yanemboe. Jare umee wi yandewe Espíritu Santo yanembori yaiko waerä jae yanemboe wae rupi. Jáeramo kía wiriro yawe kua yemboe, wiriro ko Tumpa etei. Kuimbae'ä ko wiriro oi.

<sup>9</sup>Che ndarau aikuatía pewe kua tupapire pe piyerau päwe waerä. Echa'ä Tumpa etei jukuärái pemboe.

<sup>10</sup>Jare jukuäraiete pe reta piyapo pei. Pe reta peau pei opaete iwi Macedonia pewa reta Cristo re wirowia wae reta. Erëitu ore jaeño nduipota pumiätangätu jeiete piyerau päwe waerä, hermano mii reta.

<sup>11</sup>Jare pumiñera wi piko waerä teko kawu rupi pepiakatu rewe. Awiye piyemiinge opaño mbaembae pe. Peparawikita ko ime waerä penoi perembiurä kërái ore ndoe pewe rami.<sup>12</sup>Echa'ä jukuärái piko yawe, Cristo re wirowia mbae wae reta uipiuta pewi jare ndarau mbae uata pewe.

### Cristo re wirowia wae reta imano rewa

<sup>13</sup>Añawe hermano mii reta, ime ye mbae re ore nduipota pumbiarakuaa waerä. Nduipota pe reta pikuaa waerä mbae ra uasa kía Cristo re wirowia wae umano

yawe. Echa'ä jokua pikuaa yawe, ndarau pepiatitiete imano re Cristo re wirowia mbae wae reta ipiatiti rami. Echa'ä ime yande mbae ñaäro ñai yayerowia rewe wae jae reta mbaeti onoi wae.

<sup>14</sup>Echa'ä yande yarowia Jesús umano jare ikowe ye ou umanokue wae reta ipite wi. Jáeramo yande yarowia ñai wi Jesús ou ye yawe, Tumpa uyapota opaete wae Jesús re wirowia rewe umano wae reta umiiru waerä Jesús.

<sup>15</sup>Erëi jokua ara yandeYa Cristo ou ye yawe, yande reta imeño ñai wae ndarau ya umanokue wae reta wi tenonde. Jukuärái yandeYa oporomböe, jare jukuärái wi añawe numimbeu noi pewe.

<sup>16</sup>Añetete uyeyapota oi kuärái: YandeYa Jesucristo ou ye yawe, uyenduta pëti ñee ipiräta wae jare araiwa tenondewaete iñee jare Tumpa jemimbi wasu wi. Jare yandeYa Cristo etei uweyita ara wi, jare jese wirowia rewe umano wae reta ikowe yeta tenonde jete ipiau wae pe.

<sup>17</sup>Jare kua jaikue rupi yande imeño ñai wae reta, ndei ñamano wae reta, ya päweta jae reta ndiwe. YandeYa etei yandereupita ñañeowäiti waerä jae ndiwe amapitu re. Jare jukuärái yaikota yandeYa ndiwe jaeño mái pewa.

<sup>18</sup>Kua ñee añetete ko. Jáeramo piñemikirëi jese.

## 1 Tesalonicenses 5

### YandeYa ou yeta wae rewa

<sup>1</sup>Jayawe hermano mii reta, amokue wae reta upirandu ñonoï kerái yawe etei ra kua mbaembae uasata oi. Erëi che aikuatiata'ä pewe jokua rewa kua tupapire pe.

<sup>2</sup>Echa'ä pe reta etei pikuaa kawu ma jokua rewa. Pikuaa kawu pei ou yawe ara yandeYa pewa, jokua ara outa oi pëti imonda wae ou pitu yawe wae rami.

<sup>3</sup>Jokua ara iwi pewa reta jei yawe, “Añawe yaikota ñai yandepiakatu rewe jare yandepiawiwe rewe,” jayawe jokua ara ipiranoe pewa outa chupe reta mbaesusere tuicha wae. Jare jokua outa chupe reta aramoïno kerái pëti kuña aramoïno imembirasi ou chupe rami. Jare jae reta ndarau etei oyepe chuwi.

<sup>4</sup>Erëi hermano mii reta, pe reta jae reta rami'ä ko. Jokua ara ndarau ou pepiranoe pewa pëti imonda wae ou rami. Echa'ä pe reta pitumimbi pewa'ä ma ko – jae ko teko kachi pewa'ä ma.

<sup>5</sup>Pe reta tembipe pewa ko jare pereko oi ikatu pe etei. Mbaeti ma yande reta ñai pitumimbi pewa jare pitu yawe iko reta wae rami.

<sup>6-7</sup>Erëi Cristo re wirowia mbae wae reta jeko jukuärái'ä ko. Jae reta jeko ko pitu rupi mbae uyapo reta wae rami. Usawipo ñonoï rami, jare jeta wae reta oke ñonoï wae rami. Erëi yande reta pitumimbi pewa'ä ramo, awiye yaiko yake ñai wae rami. Jekuaeño yayandareko jare yaiko yandearakuaa katu rewe.

<sup>8</sup>Yandereko toi ikatu pe etei. Erëi ¿kërái ra yaikota yandearakuaa katu rewe? Imeta ko jekuaeño yarowia Cristo re jare jekuaeño yayerau päwe rewe. Echa'ä jokua yanderepita oï mbae ikawi mbae wae wi, pëti pitía yopiaka yamonde wae rami. Jare jae nunga wi jokua ara Tumpa uiporarakua yawe iwí pewa reta pe jae reta mbaembae uyawi ikoti wae re, yarowia katu jae yanderepita oï. Jayawe ñamaeño jokua yaikuaa wae re uyandareko waerä yandepiyemingeta re ñanäka jiru jiero pewa yamonde wae rami.

<sup>9</sup>Echa'ä Tumpa ñaneño tee ma yanderepi waerä Jesucristo rupi – mbaeti ko uiti waerä yanderé iarasi.

<sup>10</sup>Echa'ä Cristo umano yanderé yande yaiko waerä jae ndiwe. Jáeramo aramoi ñamano ma ani aramoi imeño yaiko, erëi ñai ñotái ko Cristo ndiwe jae ou ye yawe.

<sup>11</sup>Kua mbaembae añetete ko. Jáeramo jekuaeño piñemiatangätu päwe jare piñemimiräta Tumpa re kërái piyapo peï rami.

### **Pablo jekuaeño umbiarakuaa reta**

<sup>12</sup>Añawe hermano mii reta, imeño amokue mbaembae mii pumbiarakuaa waerä. Tenonde ko jae petenondewa reta rewa. Echa'ä jae reta uparawiki ñonoï pepite rupi uyandareko waerä peré, jare pembiarakuaa ñonoï yandeYa rewa. Jáeramo ore pumiñera pipiu waerä chuwi reta.

<sup>13</sup>Pe reta piyekou peï jae reta iparawiki re; jáeramo peau mii reta. Jare piko kawi päwe pepiakatu rewe.

<sup>14</sup>Jae nunga wi ime yawe pepite rupi iyaki wae reta, pembieta chupe reta jae reta uparawiki waerä. Jare pemikirëi wi ikoi wae reta. Jare pembori ipiräta'ä ñonoï wae reta. Jare pepiawasú mii opaete wae pewarä.

<sup>15</sup>Ime yawe kía mbae kachi uyapo pewe wae, awiye pemiñatima chupe. Erëi jekuaeño piyapo ikawi wae peyupe jare opaete wae pe wi.

<sup>16</sup>Jekuaeño piyerowia katu.

<sup>17</sup>Jare piyerure Tumpa pe pekueri mbae rewe.

<sup>18</sup>Jare jekuaeño pemee yasurupái Tumpa pe ipotawe mbae uyeyapo pewe wae rupi. Echa'ä jukuärái ko Tumpa uipota piyapo waerä, pe pëti ramiño peï Jesucristo re wae reta.

<sup>19</sup>Espíritu Santo uipota uparawiki pepite rupi. Jáeramo awiye piyopia chuwi.

<sup>20</sup>Ime yawe kía jei, “Che ime anoi ñee Tumpa wi ou wae,” awiye jawoi pewa perïro.

<sup>21</sup>Pemboporowa rani jokua ñee añetete ra ou Tumpa wi. Jare ikawi oï yawe jokua ñee, jayawe pipisi jare pemandúa jese.

<sup>22</sup>Erëi piñono ikotiä peyuwi ipotawe mbae ikawi mbae wae.

<sup>23</sup>Tumpa ko jae yanembipiakatu wae. Jare jae etei tapeñono tee opaete mbae ikawi mbae wae wi. Jare tuyandareko kawi peré – perekowe jare peä jare perete re – awiye waerä peï teko pe yandeYa Jesucristo ou ye yawe.

<sup>24</sup>Tumpa etei pereni, jare jae jupi ko uyapo waerä pewe kua mbaembae.

<sup>25</sup>Hermano mii reta, piyerure mii Tumpa pe oreré.

<sup>26</sup>Jare pembisaluda mii chewe peau rewe opaete hermano reta joko pe ñonoï wae.

<sup>27</sup>Che poyokui yandeYa jee re pemingeta waerä kua tupapire opaete hermano reta joko pe ñonoï wae pe.

<sup>28</sup>YandeYa Jesucristo jekuaeño tipiakawi pewe. Jukuärái tuiko.

## 2 Tesalonicenses

### Kua tupapire rewā:

Kua tupapire, jae nunga wi jae ko Pablo uikuatía Cristo re wírowia wae reta pe tēta wasu Tesalónica pe. Pablo omondo jokua tenondewa tupapire chupe reta (jae ko tupapire 1 Tesalonicenses jee wae) umbiarakuaa reta waerā yandeYa Jesucristo ou yeta wae rewā. Erēi jae reta mbaeti uikuaa kawi opaete Pablo uikuatía wae. Jayawe Pablo uikuatía ye chupe reta kua tupapire umiesāka kawi waerā chupe reta.

### 2 Tesalonicenses 1

#### Pablo wiraaka saludo

<sup>1</sup>Pe reta yandeRu Tumpa jare yandeYa Jesucristo jee re piyembati tēta wasu Tesalónica pe pei wae, ore ko Pablo jare Silas jare Timoteo nduikuatía noi pewe kua tupapire.

<sup>2</sup>YandeRu Tumpa jare yandeYa Jesucristo jekuaeño tipiakawi pewe jare tuyapo pewe piko waerā pepiakatu rewē.

#### Pablo umikirēi reta jae reta uiporara wae rupi

<sup>3</sup>Ore jekuaeño numee yasurupái Tumpa pe peré, hermano mii reta. Jare jupi ko jukuārái nduyapo waerā. Echa'ā jekuaeño ukuakuaa oo oī kērái perowia Tumpa re wae, jare jekuaeño wi tuicha rupi piyerau pei päwe rewē.

<sup>4</sup>Jáeramo ore nduyembati yawe kerupi rupi Cristo re wírowia wae reta ndiwe, nduyemingeta kawi peré nduyerowia rewē. Numimbeu chupe reta pe rewā kērái yepe tēi peasa pei yembiawái reta rupi jare tāta piporara pei Cristo re wírowia mbae wae reta ipo pe, jeseuwe pemiawāta pei jare jekuaeño perowia pei Tumpa re.

<sup>5</sup>Pēti ara yayemboi yawe opaete wae Tumpa jowai jae jei waerā yandereko re, Tumpa jeita pewe: “Jupi ko pei waerā che ndiwe jaeño mái pewa,” jeita pewe. Jare ore nduecha yawe kērái pemiawāta pei piporara pei wae, jokua uikuaaka orewe Tumpa jupi ko jei waerā pewe jukuārái.

<sup>6</sup>Tumpa jupi ko. Jáeramo jae uiporarakata oī wi jokua uiporaraka pewe wae reta pe.

<sup>7</sup>Jare jukuārái pe reta piporara pei wae, oyowake peputuuta pei kuri ore ndiwe kua yaiporara ñai wae wi. Jokua uyeyapota oī yandeYa Jesucristo uyekuaa yawe ara wi tata jendi rewē jare iaraiwa ipirātaete wae reta ndiwe,

<sup>8</sup>uiporaraka waerā opaete uikuaa'ā Tumpa wae reta pe. Echa'ā jae reta wírowia'ā ñee ikawi wae yandeYa Jesucristo rewā.

<sup>9</sup>Jáeramo jokua jeko pewa Tumpa opata omombo reta Tatawasurenda pe, jare joko pe jae reta uiporarata ñonoï jaeño máí pewa mbiriete yandeYa wi. Jare ndarau etei uecha reta yandeYa imbaepuere jembipete wae.

<sup>10</sup>Jukuárái uyeyapota oï jokua ara yandeYa ou ye yawe. Erëi yandeYa ou yeta'ä oï jaeño uiporaraka waerä jokua jese wirowia mbae wae reta pe. Jae nunga wi ou yeta oï opaete jese wirowia wae reta ipiakañi umae jese waerä. Jukuárái opaete kía kía jae imaerä iko wae reta umbutuichata jae jee. Jare pe reta joko pe peïta jokua ara, echa'ä perowia ma ñee ikawi wae numimbeu pewe ramo.

<sup>11</sup>Jayawe ore jekuaeño nduyerure noï peré. Echa'ä yandeYa ou ye yawe, ore nduipota Tumpa uyerowia rewe umae waerä peré jare jei waerä pewe: “Che jaekawi puparawo.” Jae nunga wi ore nduikuaa noï pe reta perowia Cristo re ramo, ime mbaembae ikawi wae pipota piyapo jae imaerä. Jare ore nduyerure noï Tumpa pe jae pembali waerä imbaepuere rupi pe reta opa piyapo waerä.

<sup>12</sup>Jukuárái ore ndueka noï Tumpa pe uyembutuichaka waerä yandeYa Jesucristo jee pe reta rupi, jare jae uyemingeta kawi waerä peré wi. Jukuárái tuyeyapo yandeRu Tumpa jare yandeYa Jesucristo ipiakawi rupi.

## 2 Tesalonicenses 2

### Jokua kuimbae ikawi mbaete oï jese wae iwäe ara rewa

<sup>1-2</sup>Añawe che aipota pumbiarakuaa yandeYa Jesucristo ou yeta wae rewa jare ñañowäitita jae ndiwe wae rewa. Añawe rupi amokue wae reta jei tēi ara yandeYa pewa uwäe ma. Aramoi pe reta piyandu ma jokua, jare aramoi kía jei ma pewe Espiritu Santo umimbeu ma chupe reta jukuárái. Jare aramoi piyandu ma ore jukuárái nduikuatía tupapire wae. Jukuárái yawe, ore pumiñera, hermano mii reta, awiye piyembopa jare awiye piyembipia'ä jokua re.

<sup>3</sup>Awiye wi pemaño kía re pemitawi waerä. Echa'ä ndei ara yandeYa pewa uwäe mbowe, imeta ko uyeyapo rani ñru mbaembae. Echa'ä jeta wae reta oyowaichoeteta Tumpa koti. Jare uyekuaata wi oï jokua kuimbae ikawi mbaete oï jese wae. Jokua kuimbae Tumpa omombota oï kuri Tatawasurenda pe.

<sup>4</sup>Erëi tenonde jokua kuimbae oyowaichota oï Tumpa koti jare opaete mbaembae iwi pewa reta umbiadora wae koti wi. Jaeño uyembutuichata oï chuwi reta, echa'ä jae uiketa judío reta itupao wasu o pe etei, jare joko pe uwapita mburuwicha wasu rami jei rewe: “Cheño ko jae Tumpa.”

<sup>5</sup>Pemandúa kawi peï, che aiko yawe pe reta ndiwe, amimbeu kawi pewe kua mbaembae rewa.

<sup>6</sup>Jare pe reta pikuaa peï wi ime mbae oyopia oï jokua kuimbae ikawi mbaete oï jese wae awiye waerä uyekuaa. Jare jukuárái uyeyapota oï uwäe ara Tumpa jei wae rewa.

<sup>7</sup>Jare añawe rupi jokua ara uwäe rewa, Añawasu uparawiki oï wiari rupi ombowaichoka waerä iwi pewa reta Tumpa koti. Erëitu ime mbae oyopia oï awiye



waerä jokua jeiete uyeyapo. Erëi pëti ara Tumpa ueupita jokua mbae oyopia oï wae iwi wi.

<sup>8</sup>Jare jayawe ramo jokua kuimbae ikawi mbaete oï jese wae uyekuaata oï. Erëi taikue rupi yandeYa Jesucristo etei ou yeta oï kuri tembipe uwerasiete rewe, jare umbaita oï jokua kuimbae iñee rupiño, jare uwera jese rupiwe uyukata oï kuri.

<sup>9</sup>Erëi ndei jokua uyeyapo mbowe, jokua kuimbae ikawi mbaete oï jese wae outa tuicha imbaepuere rewe. Jare Satanás imbaepuere rupi uyapota oï jeta mbaembae kuimbae reta ipuere'ä uyapo wae, jare jukuärái umbipiakañita reta. Erëi jokua mbaembae uyekuaata Tumpa imbaepuere echa rami.

<sup>10</sup>Jokua kuimbae uyapota opa kërái rái mbae jupi mbae wae umbitawi waerä jokua Tatawasurenda koti oo ñonoï wae reta. Jare jae parawete reta yawái mbae uyembitawikata, echa'ä uipotata'ä uikuaa reta añetete wae jukuärái Tumpa uepi reta waerä.

<sup>11</sup>Jáeramo, jokua jeko pewa Tumpa umañota jese reta uyembitawika waerä jokua kuimbae pe jare wirowia reta waerä iyapu re.

<sup>12</sup>Jayawe jokua añetete wae re wirowia'ä wae reta jare mbae kachi wae re uyerowia wae reta onoita teko jaeño mái pewa Tumpa koti.

### **Pablo umikirëi reta uñemimiräta waerä Tumpa re**

<sup>13</sup>Erëi ikawi ko ore jekuaeño numee waerä yasurupái Tumpa pe peré, pe yandeYa perau wae reta. Echa'ä Tumpa peparawo iyipi wiwe penoi waerä tekowe opa mbae wae añetete wae perowia wae rupi jare Espíritu Santo rupi – jae ko peñoño tee Tumpa pewarä wae.<sup>14</sup>Jokuaerä Tumpa pereni ñee ikawi wae ore numimbeu pewe wae rupi. Echa'ä jae uipota pe reta piyekou waerä yandeYa Jesucristo imbaepuere jupiete wae re ara taikuewa pe.

<sup>15</sup>Jáeramo hermano mii reta, jukuärái Tumpa uyapo yandewe ramo, jekuaeño pepiräta yandeYa re. Jare awiye peakañi jokua mbaembae ore pomboe jese wae wi jare mbaembae ore nduikuatía pewe wae wi.

<sup>16</sup>YandeYa Jesucristo etei jare yandeRu Tumpa yanderau jare ñanemikirëi. Jare jukuärái uyapota oï jaeño mái pewa. Jáeramo yandepuere ñaäro yarowia katu rewe jokua mbaembae ikawi wae jae ipiakawi rupi umeeta oï yandewe wae.

<sup>17</sup>Añawe jae tumee pewe kirëi jare miräta pere waerä ikawi wae jare piyapo kawi waerä wi.

## **2 Tesalonicenses 3**

### **Pablo ueka chupe reta yerure**

<sup>1</sup>Jayawe hermano mii reta, kuaño ma aipota pe reta piyapo waerä: Piyerure mii Tumpa pe oreré yandeYa iñee jekuaeño uñemiái waerä imbae, jare opaete wae wirowia waerä jese pe reta perowia jese rami.

<sup>2</sup>Jare piyerure mii wi chupe orerepi waerä kuimbae jeko kachi jare pichii wae reta wi. Echa'ä jeta wae reta wirowia'ä oriñee Cristo re wae.

<sup>3</sup>Erëi yandeYa jupi ko yanembori waerä. Jáeramo jae pemimirätata jare perepita Añawasu wi.

<sup>4</sup>Jare ore ndorowia katu noi peré jekuaño piyapo waerä ore ndoe pewe wae yandeYa re perowia ramo.

<sup>5</sup>Ayerure ai yandeYa pe jae pembori pikuaa kawi waerä kërái Tumpa perau wae, jare kërái pepiawasu waerä yembiawái reta rupi Cristo ipiawasu rami.

### **Pablo umbiarakuaa awiye waerä iyaki reta**

<sup>6</sup>Añawe hermano mii reta, ime yawe kía iyaki wae pepite pe oi, ore ndoe pewe yandeYa Jesucristo jee re piyembisiri waerä chuwi. Echa'ä jae uipota'ä iko kërái ore pomboe wae rupi.

<sup>7</sup>Pe reta etei pikuaa pei kërái ikawi ko piko waerä ore rami. Echa'ä ore nduiko yawe pepi, oreaki'ä.

<sup>8</sup>Jare ndueka'ä pewe oremingarü waerä. Ore täta nduparawiki ara rupi jare pïtu rupi awiye waerä kía uyembipia'ä oreré.

<sup>9</sup>Añetete jupi iko tei ndueka waerä pewe yembori. Erëi ore nduipota nduikuaaka pewe orereko, pe reta piko waerä wi jukuärái.

<sup>10</sup>Pemandúa kawi pei, ore nduiko yawe pepi, mbowi wese ndoe pewe kuärái: “Ime yawe kía ñatëi uparawiki wae, awiye pemingarü.”

<sup>11</sup>Ore pumimandúa noi kua mbaembae re, echa'ä jeräkua orewe ime ñonoï pepite rupi iyaki wae reta. Jae reta ndaye ikii'äraanga iyupe reta, erëi añetete uyapo'ä mbae awe reta. Jaeño uipota uyemiinge reta opaño mbaembae pe.

<sup>12</sup>Erëi ore ndoe jokua nunga reta pe yandeYa Jesucristo jee re uparawiki reta waerä iyupe ime waerä onoi jemiurä. Jukuärái numiatangätu reta.

<sup>13</sup>Erëi hermano mii reta, awiye pekueri ikawi wae piyapo wae wi.

<sup>14</sup>Jare kía nunga wae uyapo'ä yawe kua nduikuatía pewe wae, pemaë kawi jese kía ra jae. Jare awiye piñemïiru jae ndiwe jae imara waerä.

<sup>15</sup>Erëi awiye pemaë jese towaicho rami. Pembiarakuaa kawi pëti periwi pembiarakuaa rami.

### **Pablo umbiyapi uikuatía wae**

<sup>16</sup>YandeYa ko jae yanembipiakatu wae. Jare jae jekuaño tuyapo pewe pepiakatu waerä ipotawe mbae uyeyapo pewe wae rupi. YandeYa toi opaete pe reta ndiwe.

<sup>17</sup>Jayawe cheiru mii reta, Tumpa ndiweño pei. Kua chepo pe etei aikuatía ai pewe pikuaa waerä che ko amondo ai pewe kua tupapire wae. Jukuärainoi ambiyapi opaete tupapire aikuatía wae reta.

<sup>18</sup>YandeYa Jesucristo jekuaeño tipiakawi pewe. Jukuärái tuiko.

## 1 Timoteo

### Kua tupapire rewa:

Kua tupapire ko jae tenonde Pablo uikuatía wae kuimbae Timoteo jee wae pewarä. Timoteo taurusu wae ko jare uyeyokui Tumpa pe tēta wasu Éfeso pe. Timoteo tu judío mbae wae ko jare ichi ko jae judía Cristo re wirowia wae. Pablo oo umimbeu Tumpa iñee iwi Macedonia rupi jare iwi Acaya rupi yawe, Timoteo oo wi jae ndiwe imboriarä. Jare Timoteo ombori wi Pablo tēta wasu Éfeso pe mbapi año seri rupi Pablo joko pe oporomboe iko rambuwe. Pablo uyemingeta kawiete Timoteo rewa jare wirowia katu jese (Filipenses 2.20-22). Kua tupapire pe Pablo uikuaaka kērái jae uipota tēi oo opou Timoteo ipi, erēi ipuere'ä. Jáeramo Pablo wiraaka chupe kua tupapire umbiarakuaa waerä oporomboeraanga wae reta rewa. Pablo umbiarakuaa wi Timoteo kērái iko reta waerä Cristo re wirowia wae reta itenondewa retarä.

### 1 Timoteo 1

#### Pablo wiraaka saludo Timoteo pe

<sup>1</sup>Cherai mii Timoteo, che araaka ai ndewe saludo yandeYa Jesucristo jee re. Che ko jae Pablo. YandeRu Tumpa jare yandeYa Jesucristo cheparawo chemondo waerä opaete kerupi amimbeu waerä Tumpa iñee. Tumpa ko jae yandeRepi wae, jare ñaäro ñai yayerowia rewe yandeYa Jesucristo ou ye rewa.

<sup>2</sup>Che aikuatía ai kua tupapire ndewe, Timoteo. Nde ko jae cherai rami, echa'ä che ko jae nomboe Cristo rewa ramo. YandeRu Tumpa jare yandeYa Jesucristo jekuaeño tipiakawi ndewe, jare tumae nderé ndeparareko rewe, jare tuyapo ndewe ndiko waerä ndepiakatu rewe.

#### Pablo umbiarakuaa Timoteo oporomboeraanga wae reta rewa

<sup>3</sup>Kērái karamboe che jae ndewe rami ndei a ye ndewi mbowe iwi Macedonia koti, epitaño tēta wasu Éfeso pe. Jukuärái ndepuere ndiyopia jokua Tumpa iñee re oporomboeraanga wae reta wi, awiye waerä jekuaeño oporomboe reta añetete mbae wae re.

<sup>4</sup>Awiye ma jekuaeño toporomboe reta pēti pēti tamikue reta iyipi rewa, jare arakae miäri reta rewa. Echa'ä iiru wae reta uyapisaka jese yawe, umbipi uyeaka reta jokua re. Jáeramo ombori'ä kiawe wirowia kawi waerä Cristo re jare jukuärái uyapo waerä Tumpa jei wae rupi.

<sup>5</sup>Che jae ai ndewe ndiyopia waerä chuwi reta awiye jekuaeño oporomboe reta waerä kachi wae. Echa'ä jokua nunga yemboe ndarau ombori Cristo re wirowia wae reta uyeru päwe reta waerä. Jaeño umbiawái reta. Erēi Cristo re wirowia wae reta uyemboeta ko uyeru reta waerä. Jare jaeño ipuere uyapo reta jukuärái jae reta

upurumbitawi'ä yawe, jare ipia umbijeko'ä yawe mbae re awe, jare wirowia reta yawe Tumpa re añetete rewe.

<sup>6</sup>Erëi jokua oporomboeraanga wae reta oporomboe'ä ma kua yemboe rewa. Jae reta uyemingeta wae ombori'ä etei kía nungawe.

<sup>7</sup>Jare jae reta uipota tēi uñemieräkua ñru wae reta pe ikawiete oporomboe wae echa Moisés arakae uikuatía wae rewa. Jare oporomboe reta jese uikuaa kawiete wae echa. Erëi jae reta uikuaa kawi'ä etei ko jokua oporomboe ñonoï wae re.

### **Pablo uikuaaka maera ra ko mbaembae Moisés arakae uikuatía wae**

<sup>8</sup>Yande yaikuaa kawi ñai jokua arakae Moisés uikuatía wae jupi ko yaiporu yawe kërái Tumpa uipota wae rupi.

<sup>9</sup>Jare yaikuaa wi jokua uikuatía wae jeko mbae wae reta pewarä'ä ko. Jae ko kía teko onoi wae reta pewarä uikuaaka chupe reta waerä uyawi ma ko Tumpa koti. Jayawe jokua Moisés uikuatía wae jae ko kía uyapisaka'ä Tumpa ñnee re wae reta pewarä, jare kía uipota'ä iko Tumpa jei wae rupi wae reta pewarä, jare kía uipiu'ä etei Tumpa wi wae reta pewarä, jare kía uyawiñoi Tumpa koti wae reta pewarä, jare kía uyapo mbaembae kachi wae reta pewarä, jare kía uipotaete mbaembae iwi pewaeño wae reta pewarä, jare kía tu uyuka wae jare ichi uyuka wae reta pewarä, jare opaete upuruyuka wae reta pewarä.

<sup>10</sup>Jae nunga wi Moisés arakae uikuatía wae oñono teko pe Tumpa koti iawasapota wae reta, jare kuimbae yepái uyerereko wae reta, jare kuña yepái wi uyerereko wae reta, jare kía uipisi wiraa japicha owaka kía pe täta uyeyokui waerä wae reta, jare iyapuñoi wae reta, jare kía iyapu umbijeko waerä japicha wae reta. Jayawe Moisés arakae uikuatía wae ko jae oñono waerä teko pe ipotawe kía jeko ambie ye oï yemboe añetete wae wi.

<sup>11</sup>Kua yemboe añetete wae ou Tumpa wi. Jae ko ñee ikawi wae jae umee chewe amimbeu waerä ñru wae reta pe. ¡Tuyembutuichaka Tumpa jee!

### **Pablo umee yasurupái yandeYa pe tuicha ipiakawi chupe ramo**

<sup>12</sup>Jayawe che amee yasurupái yandeYa Jesucristo pe, echa'ä jae chemimiräta ramo. Amee yasurupái wi chupe, echa'ä jae chererowia katu ayapo waerä mbarawiki Tumpa pewarä jare cheparawo ayeyokui waerä chupe.

<sup>13</sup>Jukuärái Cristo uyapo chewe yepe tēi tenonde yawe che jaeñoi ikawi mbae wae ikoti, jare ayapoñoi ikawi mbae wae jese wirowia wae reta koti, jare chereko kachi ikoti reta. Erëitu yandeYa ipiakawi chewe, echa'ä ndei arowia aiko jese ramo, jare aikuaa'ä aiko jokua ayapo wae mbae ikawi mbae wae ko.

<sup>14</sup>Añetete tuicha ko yandeYa ipiakawi chewe. Jáeramo añawe chepia rewe arowia ai Jesucristo re, jare jae umee chewe chepuere apuruau waerä.

<sup>15</sup>Opaete wae reta yayawi Tumpa koti jare jukuärái ime ñanoi teko ikoti. Erëi ime pēti ñee añetete wae jare ikawi ko opaete wae yarowia jese waerä. Kua ñee ko

kuärái: Jesucristo ou kua iwi pe uepi waerä teko onoi Tumpa koti wae reta. Jare che amae yawe chiyé, aikuaa anoi teko tuichaete ye ñru wae reta wi.

<sup>16</sup>Erëi Tumpa ipiakawi chewe ñru wae reta ipuere waerä uikuaa añetete ko Jesucristo ipiawasu ipotawe uyawi ikoti wae reta pe. Jukuärái che ko jae pëti jaanga rami jae reta pewarä. Echa'ä jae reta uikuaa ma chereko rewa yawe, uikuaata jae reta wi ipuere wirowia waerä Cristo re jare onoi reta waerä tekowe opa mbae wae.

<sup>17</sup>Jáeramo, ¡yambutuicha Tumpa jee! Jae ko opaete wae imburuwicha wasurä jaeño mái pewa, jare yaecha mbae wae ko, jare ndaraúi umano wae. Jaeño ko jae Tumpa. Jare jae jee tuyembutuichaka jaeño mái pewa. Jukuärái tuiko.

### **Pablo umikirëi Timoteo uyapo waerä ikawi wae Tumpa koti**

<sup>18</sup>Jayawe cherai mii Timoteo, nde ndikuaa neï kërái Espiritu Santo karamboe uyemingeta nde rewa amokue kuimbae Tumpa ñnee umimbeu wae reta rupi. Jare jukuärái uikuaaka ndewe mbaembae ndiyapota neï wae. Jare che jae ndewe yawe ndiyopia waerä jokua oporomboeraanga wae reta, jokua mbaeti ko ambie ye Espiritu Santo jei ndewe wae wi. Jukuärái jae ai ndewe numikirëi waerä jare ndepuere waerä ndiyemboi kawi yanderowaicho reta koti pëti sindaro rami.

<sup>19</sup>Jare jekuaeño ñnemimiräta Cristo re nderowia wae re. Jare awiye iyapo mbaembae ndepia nembijekota oi kuri wae. Yaikuaa ime amokue wae reta jukuärái uyapo. Jáeramo uyerowa reta yandeYa wi.

<sup>20</sup>Jokua reta ipite wi ko jae Himeneo jare Alejandro. Jáeramo che añoño reta ma Satanás ipo pe uiporarakä waerä chupe reta. Jukuärái aramoi uyemboeta reta awiye waerä jei ye mbae ikawi mbae wae Tumpa koti.

## **1 Timoteo 2**

### **Pablo uikuaaka Timoteo pe Cristo re wirowia wae reta kërái uyembati reta waerä**

<sup>1</sup>Kua mbaembae che jae ndewe wae, emboe yuapi ye Cristo re wirowia wae reta. Jayawe tenondete tae ndewe kuärái: Cristo re wirowia wae reta uyembati rambuewe, jekuaeño tumee reta yasurupái Tumpa pe, jare tuyerureñoi reta chupe opaete wae reta re.

<sup>2</sup>Tuyerure reta Tumpa pe mburuwicha wasu reta re jare opaete ñru mburuwicha reta re. Jare tueka reta wi Tumpa pe ombori waerä jae reta uyapo waerä iparawiki jupi rupi, jukuärái yandepuere yaiko kawi waerä yandepiakatu rewe jare yandepuere waerä yayeyokui Tumpa pe jae jei wae rupi.

<sup>3</sup>Jayawe ikawi ko yayerure waerä Tumpa pe opaete wae reta re. Yayapo jukuärái yawe, yambiyerowiata Tumpa – jae ko yandeRepí wae.

<sup>4</sup>Echa'ä jae uipota tëi opaete wae uepiti kawi waerä añetete wae jare onoi waerä tekowe opa mbae wae.

<sup>5</sup>Echa'ä ime pëtiño Tumpa añetete wae. Jae ramiño wi ime pëtiño wae ipuere umbipiakatu iwi pewa reta Tumpa ndiwe. Jae ko kuimbae Jesucristo jee wae.

<sup>6</sup>Echa'ä opaete wae yayawi Tumpa koti jare yandereko ñaneapiti oi wae echa. Erëi Jesucristo uñemee umano waerä yanderé umbiepi waerä teko ñanoi wae. Jukuärái jae yandeyora ma yandereko wi. Jokua ko jae ñee ikawi wae Tumpa uikuaaka yandewe wae jokua ara jae uiparawo wae pe.

<sup>7</sup>Jare Tumpa cheparawo jare chemondo jae jee re opaete kerupi amimbeu waerä iñee. Jare kua che jae ai wae añetete ko. Chapu'ä etei ko ai. Echa'ä Tumpa etei cheparawo amboe waerä judío mbae wae reta pe añetete wae rewa.

<sup>8</sup>Jáeramo opaete kerupi rupi Cristo re wirowia wae reta uyembati reta rambuewe, che aipota kuimbae reta uyerure waerä Tumpa pe. Jare awiye tuyerure reta mbochi rewe jare mbae umbasi rewe. Erëi tuyerure reta ipiakia mbae rewe.

### **Këraita ko ikawi kuña reta uyeyokui waerä Tumpa pe**

<sup>9</sup>Jare kuña reta pe tae kuärái: Tuyemonde kawi reta. Awiye tuyemonde reta chutu rai awiye waerä kuimbae reta uipota rewe uma jese. Awiye jekuaño tuyembipia'äete jemimonde re, jare ía re, jare mbaembae oro pewa re, jare mbaembae ipöraete wae re.<sup>10</sup>Echa'ä ime kía nunga kuña jei yawe, “Aipiu ko Tumpa wi,” jei, jayawe ikawi ko jokua nunga kuña uñemimaepöra waerä Tumpa pewartä. Jare kuña reta uyapo yawe mbaembae ikawi wae ombori waerä ñru wae reta, jokua nunga kuña reta ko jae maepöraete Tumpa pewartä.

<sup>11</sup>Jare kía oporomboe oi rambuewe, kuña reta toi kiiño. Tuyapisaka reta uñemimichi rewe.

<sup>12</sup>Che amaño'ä kuña reta re omboe waerä kuimbae reta yembati pe jare onoi waerä mbaepuere jese reta. Imeta ko kuña reta kiiño ñonoï yembati pe.

<sup>13</sup>Echa'ä Tumpa uyapo Adán rani, joko wi ramo uyapo Eva.

<sup>14</sup>Jare Adán uyembitawika'ä Añawasu pe. Kuña ko uyembitawika, jare jukuärái uyawi Tumpa koti.

<sup>15</sup>Erëi kuña reta ipuereta uyerepika pëti kuña imembi rupi - jae ko Cristo. Jayawe kuña reta jekuaño torowia reta jese, jare tupuruau reta, jare tuñeño tee reta Tumpa pewartä, jare toyopia iyuwu reta jete uipota wae.

## **1 Timoteo 3**

### **Kërai iko kawi waerä pëti wae Cristo re wirowia wae reta itenondewarä**

<sup>1</sup>Kua ñee añetete ko: Ime pëti wae ikirëi iko Cristo re wirowia wae reta itenondewarä yawe, ikawi ko. Echa'ä jae uipota uyapo mbarawiki jupi wae Tumpa pewartä.

<sup>2</sup>Jayawe pëti wae Cristo re wirowia wae reta itenondewarä tuechaka teko kawi, awiye waerä kía ipuere umbijeko mbae re awe. Jare tureko wi pëtiño kuña. Jare

tuyandareko kawi iyé ñru wae reta uyemingeta kawi waerä jese. Jare tikatu toporomböe arakuaa rewe. Jare wi jekuaeño tikirëi umbiasa kawi waerä mboupa reta jëta pe.

<sup>3</sup>Jare awiye tikaese, jare awiye tiñerärose. Erëi tipiakawi. Awiye tuiko jowaichopota. Awiye korepoti jekuaeño tuipotaete jae imaeräño.

<sup>4</sup>Jare wi pëti wae Cristo re wirowia wae reta itenondewarä tuyandareko kawi jembireko jare isambiai reta re. Tuiko kuimbae isambiai reta uyapisaka jese wae uipiü rewe.

<sup>5</sup>Echa'ä kuimbae uyandareko kawi'ä jëtara reta re yawe, ndarau etei ipuere uyandareko kawi Tumpa tai reta re.

<sup>6</sup>Jare awiye toi Cristo re wirowia wae reta itenondewarä pëti kuimbae Cristo re wirowia ramo wae. Echa'ä jukuärái uyeyapo yawe, aramoi ipuere uyembikate. Jare Tumpa uiporarakata chupe Añawasü pe uiporarakata rami uyembikate ramo.

<sup>7</sup>Jae ramiño wi pëti wae Cristo re wirowia wae reta itenondewarä tuechaka teko kawi Cristo re wirowia mbae wae reta pe. Echa'ä jukuärái'ä uyapo yawe, jae reta uyemingeta kachita jese jare jukuärái jae oa ma Añawasü ñnuai pe.

### **Kërai iko kawi waerä pëti wae Cristo re wirowia wae reta imboriarä**

<sup>8</sup>Jae ramiño wi pëti wae Cristo re wirowia wae reta imboriarä tuiko jeko kawi wae. Awiye tupurumbitawise. Jare awiye tikaese wi. Awiye korepoti jekuaeño tuipotaete jae imaeräño.

<sup>9</sup>Jare torowia ipia rewe jokua ñee Tumpa umee yandewe yaikuaa waerä wae. Jare awiye tuyapo mbae ipia umbijekota oi kuri wae.

<sup>10</sup>Jayawe ndei kía ipuere iko mbowe Cristo re wirowia wae reta imboriarä, tenonde uikuaa ranita ko reta jae jeko. Jare uikuaa ma reta yawe jeko kawi wae, jayawe ramo ipuere umbipi uparawiki jae reta imboriarä.

<sup>11</sup>Jae ramiño wi pëti kuña Cristo re wirowia wae reta imboriarä tuiko jeko kawi wae. Awiye tindayepota. Jare tuyandareko kawi iyé mbaembae kachi wae wi, jare tuiko kawi ñru wae reta ipuere wirowia katu jese waerä.

<sup>12</sup>Jare wi pëti kuimbae Cristo re wirowia wae reta imboriarä tureko pëtiño kuña, jare tuyandareko kawi isambiai reta re jare opaete jëta pe iko wae reta re.

<sup>13</sup>Jayawe pëti wae Cristo re wirowia wae reta imboria uyapo kawi yawe mbarawiki Tumpa umee chupe wae, opaete wae uyemingeta kawita jese. Jayawe ipuereta uyemingeta ukiye mbae rewe kërai wirowia Cristo re wae rewa.

### **Yemboe añetete wae Tumpa uikuaaka yandewe wae**

<sup>14</sup>Che aikuatía ai ndewe kua tupapire rambuwe, chekirëi ai imambaeño a apou waerä ndepi.



<sup>15</sup>Erëi chepuere'ä a ndepi imambae yawe, aikuaaka ai ndewe kua tupapire rupi këraitä ko yureko Cristo re wirowia wae reta. Yande Cristo re yarowia wae reta ko jae Tumpa ikoño mäi wae tai jare tayi retarä. Jare Tumpa umee ma yandewe yemboe añetete wae yamimbeu waerä jare yayandareko waerä jese awiye waerä uyembiambie.

<sup>16</sup>Jare ikawiete ye ko kua yemboe, echa'ä uikuaaka yandewe kuärái: Jae ikoño mäi wae uyeyapo kuimbaerä. Espiritu Santo uikuaaka kawi yandewe jae ko Tumpa Tai wae. Araiwa reta uecha uyerowia rewe. Uyemimbeu jesewa opaete kerupi. Jare jeta wae reta wirowia jese. Jare Tu wiraa ye ara pe oi waerä jae ndiwe. Jukuärái jokuä yemboe añetete wae uikuaaka yandewe.

## 1 Timoteo 4

### Pablo umbiarakuaa ye Timoteo oporomboeraanga wae reta rewa

<sup>1</sup>Erëi Espiritu Santo uikuaaka kawi yandewe kërai ara taikuewa rupi amokue wae reta usirita jokuä yemboe añetete wae wi. Jae reta uyapisakata upurumbitawi wae reta jei wae re. Jare wirowiata reta yemboe añetete'ä wae aña reta wi etei ou wae.

<sup>2</sup>Kua yemboe kachi wae uyekuaa oi oporomboeraanga wae reta rupi. Jae reta iyapu wae reta ko, jare uyeyokui reta añetete wae nunga Tumpa pe. Ipia umbijeko'ä ma reta mbae re awe ima ma ipiatäta reta ramo.

<sup>3</sup>Jae reta jei tēi yandewe, “Pipota piyeyokui kawi Tumpa pe yawe, awiyeta ko pemenda,” jei yandewe. Jei reta tēi yandewe wi, “Pipota pembiyerowia Tumpa yawe, awiyeta ko peu amokue tembiu,” jei yandewe. Erëi yande Cristo re yarowia wae reta yaikuaa ñai añetete wae. Yaikuaa ñai Tumpa umee yandewe opaete tembiu yau waerä jare ñamee waerä chupe yasurupái jese.

<sup>4</sup>Echa'ä opaete mbaembae Tumpa uyapo wae ikawi ko. Jayawe awiyeta ko ñariro ipotawe tembiu. Ikawi ko yau waerä ñamee rewe yasurupái Tumpa pe.

<sup>5</sup>Jare jukuärái yayapo yawe, Tumpa iñeeriru pe jei yandewe yambiyerowia ko ñai Tumpa, echa'ä ñamee ma yasurupái chupe ramo jokuä tembiu re.

### Pablo umbiarakuaa Timoteo kërai uyeyokui kawi waerä Jesucristo pe

<sup>6</sup>Nde ndikuaaka yuapi ye yawe Cristo re wirowia wae reta pe kua mbaembae, jayawe nde ndiyeyokui kawi ko nei Jesucristo pe. Jare jukuärái nepirätata nei Tumpa re, echa'ä nderowia kawi iñee re jare ndiyandareko kawi nei yemboe añetete wae re.

<sup>7</sup>Jayawe awiye erowia ñee añetete mbae arakae imiäri reta wae re. Jokuä miäri reta ombori'ä kiawe uñemiru kawi waerä Tumpa ndiwe. Erëi nde jekuaeño iñemimiräta kawi Tumpa re.

<sup>8</sup>Echa'ä yanderete ñamimiräta yayemungúe rupi yawe, michi pewaño ikawi yandewe. Erëi ñañemimiräta kawi yawe Tumpa re, jokuä ko ikawiete yandewe.

Añetete, ikawi oï yandewe añawe tekowe pe ñaï rambuewe, jare ikawita wi yandewe kuri Tumpa ndiwe ma ñaï yawe.

<sup>9</sup>Jokua ñee añetete ko, jare ikawi ko opaete wae wirowia waerä jese.

<sup>10</sup>Jokuaerä ko ñanekirëi rewe yaparawiki täta. Jare jukuärái yayapo, echa'ä yarowia Tumpa ikoño mái wae re. Echa'ä jaeño ko Upuruepi wae iwi pewa reta pewarä. Jare jae uepi opaete kía wirowia jese wae.

<sup>11</sup>Jayawe kua mbaembae re emboe kawi Cristo re wirowia wae reta, jare ere chupe reta uyapo kawi reta waerä.

<sup>12</sup>Jare jekuaeño echaka ndereko kawi chupe reta kuärái: ndiyemingeta wae rupi, jare mbae ndiyapo wae rupi, jare ndepuruau rupi, jare kërái nderowia Tumpa re wae rupi, jare ndereko jupi wae rupi. Jukuärái ndiyapo yawe, ndarau kiawe mbae jei ndewe ndetaurusu ramo.

<sup>13</sup>Che a awäe ndewe rewa, jekuaeño emingeta Tumpa iñee ñru wae reta pe, jare emikirëi reta Tumpa re, jare emboe kawi reta.

<sup>14</sup>Jekuaeño iyapo mbarawiki Tumpa umee ndewe wae. Echa'ä Tumpa umee ma ndewe mbaepuere opa ndiyapo waerä jokua mbarawiki. Nemandúa kawi nei kërái karamboe Cristo re wirowia wae itenondewa reta oñono ipo nderé jare uyerure reta Tumpa pe nderé. Jare nemandúa nei kërái Espiritu Santo umee ñee pëti wae pe jokua mbaepuere Tumpa umee iko ndewe wae rewa. Awiye neakañi jokua wi, jare jekuaeño iñemiatangätu ndiporu waerä jokua mbaepuere ndiyeyokui kawi waerä Tumpa pe.

<sup>15</sup>Jekuaeño iyandareko kua mbaembae re nekirëi rewe, uyekuaa waerä opaete wae pe kërái ikawiete ko ndiyemboe nei.

<sup>16</sup>Jare iyandareko kawi ndiyé ndiko kawi waerä jare ndeporomboe kawi waerä. Jekuaeño iñemiatangätu kua mbaembae re. Echa'ä jukuärái ndiyapo yawe, Tumpa uepita jokua nderé uyapisaka wae reta kërái jae nderepita oï wae rami.

## 1 Timoteo 6

### Pablo umbiarakuaa Timoteo uyeyokui wae reta rewa

<sup>1</sup>Jare añawe che jae ndewe kuärái: Uyeyokui wae reta wirowia Cristo re yawe, tuiptu reta ipatrón wi. Echa'ä uipiu'ä reta yawe, aramoi ñru wae reta jeita tēi yandekoti: “Pe reta peporomboe wae rupi periroka pei uyeyokui wae reta pe ipatrón koti,” jeita. Jukuärái iñerata reta Tumpa koti jare yaporomboe wae koti. Jáeramo uyeyokui wae reta tuiptu ipatrón wi.

<sup>2</sup>Jare ipatrón Cristo re wirowia wae ko yawe, jekuaeño tuiptu reta chuwi. Tuyeyokui kawiete reta chupe, echa'ä ipatrón wi ko jae Cristo re wirowia wae Tumpa uau wae. Awiye tuyemingeta reta kuärái: “Yande ñaï ma hermanorä Cristo re yarowia ramo. Jáeramo ayeyokuita'ä ma ndewe.”

## **Pablo umbiarakuaa ye Timoteo oporomboeraanga wae reta rewa jare korepoti uipotaete wae reta rewa**

Jayawe kua mbaembae re eporomboe jare epurumbiarakuaa wi.

<sup>3</sup>Opaete kua mbaembae che jae ndewe wae kua tupapire pe jae ko añetete jare yandereraa Tumpa koti. Erëi jokua oporomboeraanga wae reta wirowia'ä jese jare ambie ye oporomboe. Jare jae nunga wi oporomboe reta ambie ye yandeYa Jesucristo oporomboe wae wi.

<sup>4</sup>Jae reta uyererowia katu iyé iyarakuaa wae echa. Jekuaeño uipota uyeaka reta opa mbaembae re. Erëi kua yeaka reta jaeño umbiyekuaa ñemiro, jare towaicho, jare ñee kachi wae japicha koti. Jae nunga wi yeaka jeko pewa wirowia katu'ä reta iyé.

<sup>5</sup>Jokua nunga reta uyeakaiño jae yepái. Ipiayemingeta jupi'ä ma ko, jare uikuaa'ä etei reta añetete wae. Jare jae reta oporomboe tēi kuärái: “Tumpa re yarowia kawi ramo, yaikokatuta.” Jukuärái jei tēi reta.

<sup>6</sup>Añetete tēi ko, Tumpa re yarowia kawi yawe, ikawiete ye ko yandewe. Erëi mbaeti ko jae reta oporomboe wae rami. Echa'ä Tumpa yanembori yandepiakatu rewe yaiko waerä yepē tēi aramoi jeta'ä mbaembae ñanoi.

<sup>7</sup>Yaikuaa ñai yaa yandesí wi yawe, yaru'ä mbae awe. Jukuärái wi ñamano yawe, yaraa'ä mbae awe.

<sup>8</sup>Jáeramo ikawi ko yaiko waerä yandepiakatu rewe ime ñanoi rambuwe yanderembiurä jare yanderemimonderä.

<sup>9</sup>Erëi kía uipotaete ikokatu wae yawai'ä oa waerä teko kachi pe, pēti mbaemimba ñuai pe oa wae rami. Jokua nunga iyarakuaa mbae wae ko, echa'ä uipotaete onoi jae imaeräño jeta mbaembae kua iwi pewa. Jáeramo uyeyapo chupe jeta ikawi mbae wae jae opa uñererükumewa rewa.

<sup>10</sup>Echa'ä kía uipotaete korepoti onoi wae uyawita opa kērái rái rupi Tumpa koti. Jukuärái amokue wae reta usiri ma yemboe añetete wae wi. Jáeramo jeta mbaesusere ou chupe reta.

### **Pablo jekuaeño umbiarakuaa Timoteo**

<sup>11</sup>Erëi nde ko jae kuimbae ndiyeyokui kawi Tumpa pe wae. Jáeramo esiri jokua mbaembae ikawi mbae wae wi. Jare awiye ipotaete korepoti. Jaeño nekirēi iyapo mbaembae ikawi wae. Jare eya katu Tumpa jeko re. Jekuaeño tukuakuaa nderowia Tumpa re wae. Jekuaeño epuruau. Jekuaeño ndepiawasu. Jare jekuaeño iko ndepiakawi rewe ñru wae reta ndiwe.

<sup>12</sup>Jare yembiawái reta ou ndewe yawe, jekuaeño iñemimiräta nderowia katu waerä Tumpa re. Iñemiiru kawi Cristo ndiwe, echa'ä jae umee yandewe tekowe opa mbae wae. Jokuaerä ko Tumpa nereni jokua ara nde nemimbeu kawi yawe jeta wae reta jowake nderowia ma ko Cristo re wae.

<sup>13</sup>Timoteo, yandeRu Tumpa tekowe iYa ko. Jare jae uikuaa oï opaete mbaembae nde ndiyapo wae. Jare Jesucristo uikuaa wi oï. Jae ko uyembeu kawi kía ko jae wae mburuwicha Poncio Pilato jowai.

<sup>14</sup>Jáeramo che tae ndewe, jekuaeño iyapo kawi opaete mbarawiki Tumpa umee ndewe wae yandeYa Jesucristo ou ye rewa. Jukuärái ndiyapo yawe, ndarau ndiyapo mbae ikawi mbae wae. Jare ndarau wi kía ipuere nembijeko mbae re awe.

<sup>15</sup>Jare nemandúa nei, jokua ara Tumpa uiparawo wae pe jae ombou yeta oï Jesucristo kua iwi pe. Tumpa jeeño ko jupi yambutuicha waerä, echa'ä jaeño ko mburuwicha wasu reta itenondewaete wae jare opaete wae iYa tenondewaete wae.

<sup>16</sup>Jaeño ikoño mái imbaepuere tuichaete rupi. Jare imbaepuere jupi wae jembipe tuicha uwerasi wae rami. Jáeramo mbaeti etei kiawe ipuere oya jese. Mbaeti etei wi kiawe iwi pewa reta ipuere uecha. Jayawe, ¡yambutuicha Tumpa jee jaeño mái pewa! Jukuärái tuiko.

<sup>17</sup>Jare añawe che aipota numbiarakuaa ikokatu wae Cristo re wirowia wae reta rewa. Ere chupe reta awiye waerä ikate iparawete wae reta koti. Ere wi chupe reta awiye waerä uyeko ikorepoti re, echa'ä aramoi imambae opata chuwi reta. Ikawiete ko uyeko reta waerä Tumpa imeño mái iko wae re. Jae ko umee yandewe opaete mbaembae yayekou waerä jese.

<sup>18</sup>Jare ere wi chupe reta uyapo waerä jeta mbaembae ikawi wae, jare jekuaeño umee reta waerä mbaembae onoi wae wi ombori waerä uata oï chupe reta wae pe.

<sup>19</sup>Echa'ä jukuärái uyapo reta yawe, uikuaata reta tekowe ipiau wae añawe rupi onoi wae, jare onoitá reta mbaembae ikawiete opa mbae wae ara taikuewa outa oï kuri wae pe.

### **Pablo jaeño ye ma umbiarakuaa Timoteo**

<sup>20</sup>Jayawe cheraí mii Timoteo, jekuaeño iyandareko kawi jokua yemboe uñemee ndewe wae re. Esiri ndaye wi. Jare awiye iyapisaka kía reta re ambie ye oporomboe ñonoï wae. Echa'ä jokua nunga reta jei tēi oporomboe ñonoï añetete wae re, erēi iyapu reta ko.

<sup>21</sup>Jare amokue wae reta usiri ma yemboe añetete wae wi uyapisaka jese reta ramo. YandeRu Tumpa jekuaeño tipiakawi ndewe. Jukuärái tuiko.

## 2 Timoteo

### Kua tupapire rewā:

Kua jae tupapire mokuía Pablo uikuatía wae wiraaka waerā jemimboe Timoteo pewarā. Pablo uikuatía kua tupapire peresoriru pe iko rambuewe tēta wasu Roma pe. Pablo uyemboi ma pēti wese Roma pewa reta imburuwicha wasu jowai. Jokua mburuwicha ko kuimbae jeko kachi wae Nerón jee wae. Pablo uikuaa iko jupiwoiño uyemboi yeta Nerón jowai jare umanota iko wae. Kua tupapire pe Pablo ueka Timoteo pe ou waerā ipi jupiwoiño. Jare wi Pablo uipota umikirēi jare umbiarakuaa Timoteo jekuaeño oporomboe kawi waerā Tumpa iñee. Kua ko tupapire taikuewaete wae Pablo wiraaka wae.

### 2 Timoteo 1

#### Pablo wiraaka saludo Timoteo pe

<sup>1</sup>Cherai mii Timoteo, che araaka ai ndewe saludo yandeYa Jesucristo jee re. Che ko jae Pablo. YandeYa Jesucristo etei chemondo jae jee re amimbeu waerā jesewa, echa'ā jukuārai Tumpa uipota ramo. Echa'ā jae chokui a amimbeu waerā opaete wae pe kērai yandepuere ñanoi tekowe opa mbae wae Jesucristo rupi.

<sup>2</sup>Timoteo, aikuatía ye ai ndewe kua tupapire. Nde ko jae cherai rami. YandeRu Tumpa jare yandeYa Jesucristo jekuaeño tipiakawi ndewe, jare tumae nderé ndeparareko rewe, jare tuyapo ndewe ndiko waerā ndepiakatu rewe.

#### Pablo umikirēi Timoteo jekuaeño uyapo kawi waerā mbarawiki Tumpa umee chupe wae

<sup>3</sup>Jekuaeño chemandúa nderé ayerure Tumpa pe rambuewe. Jare amee chupe yasurupái opaete mbaembae jae uyapo oi ndewe wae re. Ara rupi jare pītu rupi ayerure chupe, jare ayeyokui chupe cheramikue reta uyeyokui chupe wae rami. Jare ayapo'ā mbae chepia chembijeko oi wae rupi ayeyokui ai chupe rambuewe.

<sup>4</sup>Chemandúa ai wi nderesai re karamboe a ye aiko ndewi yawe. Jáeramo che aipota echa nduecha ye ayerowiaete waerā.

<sup>5</sup>Chemandúa ai wi nderé kērai nderowia Tumpa re añetete rewe. Jukuārai wi ndiyari Loida wirowia kawi Tumpa re. Jare jae imembi kuña – jae ko ndesi Eunice – wirowia kawi wi Tumpa re. Jare aikuaa añetete ko nderowia kawi wi.

<sup>6</sup>Jáeramo che numimandúa kua re: Ndikuaa nei kērai karamboe chepo añono nderé yawe, Tumpa umee ndewe mbaepuere ndiyeyokui kawi chupe waerā. Jayawe kērai kía uapīña tata oi wae rami, jukuārai wi iñemiatangātu jokua mbaepuere re ndiyapo kawi waerā mbarawiki Tumpa umee ndewe wae.

<sup>7</sup>Awiye ekiye opa ndiyapo waerä jokuwa mbarawiki. Echa'ä Tumpa umee ma yandewe Espiritu Santo, jare kiye ou'ä ko Espiritu Santo wi. Chuwi ou ko mbaepuere yayeyokui kawi waerä Tumpa pe, jare yapuruau waerä, jare yayopia waerä yanderete uipota uyapo wae.

<sup>8</sup>Jáeramo awiye nemara nemimbeu waerä yandeYa Jesucristo rewa. Jare awiye wi nemara chewi che aï kua peresoriru pe wae re. Echa'ä yandeYa pe ayeyokui ramo, aï kua pe. Nde ndikuaa kawi nei yamimbeu yawe ñee ikawi wae Jesucristo rewa, yaiporara ñotái ko. Erëi nde, iyapo che ayapo wae rami. Jekuaeño emimbeu jokuwa ñee. Jare yepe tēi ndiporarata nei, erëi Tumpa umee yandewe mbaepuere ñamiawäta waerä.

<sup>9</sup>Jeta ma yayawi Tumpa koti. Erëi Tumpa yanderepi ma jokuwa teko yareko wae wi, jare ñanereni ma ñañeño tee waerä jae imaerä. Yande mbaembae ikawi wae yayapo wae rupi'ä ko jokuwa, erëi Tumpa ipiakawi ramo ko uyapo yandewe jokuwa. Echa'ä iyipi wiwe ndei iwi jae uyapo mbowe, Tumpa ipiyemingeta ko uikuaaka waerä yandewe ipiakawi Jesucristo rupi.

<sup>10</sup>Jare añawe yaikuaa ñai kërái Tumpa ipiakawi yandewe wae. Echa'ä Jesucristo yandeRepi wae ou ma kua iwi pe. Jae opa ma umiamiri mano jare uikuaaka yandewe ñee ikawi wae. Jare jokuwa ñee ikawi wae rupi yaikuaa kërái ñanoi waerä tekowe opa mbae wae.

<sup>11</sup>Jayawe Tumpa cheparawo, jare chemondo jae jee re etei amimbeu waerä jeta wae reta pe jokuwa ñee jare aporomboe waerä jese.

<sup>12</sup>Jáeramo Jesucristo jowaicho reta cheñonoka kua peresoriru pe. Erëi che chemara'ä aï aiporara aï wae re, echa'ä aikuaa aï Jesucristo. Jare arowia katu aï jese chemborita oï wae opa ayapo waerä jokuwa jae umee chewe ayapo waerä wae. Jare jokuwa ara jae ou ye yawe, jae umeeta oï chewe mbae ikawi wae jokuwa ayapo wae re.

<sup>13</sup>Jayawe nde, jekuaeño eporomboe jupi jokuwa yemboe añetete wae chewi ndiyandu wae. Jare ndeporomboe nei rambuwe, jekuaeño echaka nderowia Jesucristo re wae jare echaka wi ndepuruau iru wae reta pe. Kua yandepuere yayapo, echa'ä pēti ramiño ñai Cristo re ramo,

<sup>14</sup>jare Espiritu Santo yandepia pe oï ramo. Jokuwa yemboe ko jae pēti mbae ikawiete wae jare jepiete wae rami. Jáeramo mbaepuere Espiritu Santo umee ndewe wae rupi, iyandareko kawi jese ndeporomboe yuapi ye waerä jupi rupi.

<sup>15</sup>Aramoi nde ndikuaa nei kërái opaete Cristo re wirowia wae reta iwi Asia pewa opa ma chereya reta. Jare Figelo jare Hermógenes, jae retawe ma opa chereya.

<sup>16</sup>Erëitu yandeYa Jesucristo tuiparareko Onesíforo jare jētara reta, echa'ä Onesíforo jeta wese ou opou chepi jare jekuaeño chembipiakatu. Jare yepe tēi peresoriru pe aï parawete, jese wae jae imara'ä chewi.

<sup>17</sup>Añetete ko, tēta wasu Roma pe ou uwäe rupiwe, jae jupiwoiño chereka opaete kerupi chewäe rewa.

<sup>18</sup>Nde ndikuaa kawi nei kërái karamboe tēta wasu Éfeso pe yaiko rambuewe, jae jetaete yanembori. Jayawe ara taikuewa uwäe ma yawe, yandeYa Jesucristo tuyapo ikawi wae chupe kërái Onesíforo uyapo chewe wae rami.

## 2 Timoteo 2

**Pablo umikirëi Timoteo jekuaeño oporomboe waerä jupi rupi Tumpa iñee**

<sup>1</sup>Yande pëti ramiño ñai Jesucristo re ramo, jeta yayekou ñai Tumpa ipiakawi re. Jáeramo nde, cherai mii, jekuaeño iñemimiräta kawi jae ipiakawi re.

<sup>2</sup>Nde ndiyandu jeta wae reta ndiwe yemboe añetete wae che jae wae. Jayawe jokua yemboe emimbeu yuapi ye kuimbae nderowia katu jese wae reta pe, jae reta ipuere waerä omboe yuapi ye ñru wae reta pe.

**Pablo umikirëi Timoteo kërái uyeyokui kawi waerä Tumpa pe**

<sup>3</sup>Emiawäta mii mbaembae ndiporara wae reta che amiawäta wae rami, echa'ä nde ko jae pëti sindaro rami Jesucristo pewarä. Jare sindaro reta uyeyokui kawi wae umiawäta ko uiporara ñonoï reta yawe.

<sup>4</sup>Pëti sindaro oo ñeräro pe wae awiyeta ko uyembipia'ä mbaembae kua iwi pewa re umbiyerowia waerä itenondewa. Jare jukuärái wi ikawi'ä ko yande yayembipia'ä waerä mbaembae iwi pewa re, echa'ä yandeYa Jesucristo pe yayeyokui ñai ramo.

<sup>5</sup>Ñru yembijaanga. Pëti uñeñokui wae osi'ä yawe oporombosi wae reta jei wae rupi, jayawe ndarau ipuere onoi jokua upurumbisipe wae pe uñemeeta wae.

<sup>6</sup>Jare ñru yembijaanga. Koo pe täta uparawiki wae, jupi ko jae rani uyekou waerä imbaewiro re.

<sup>7</sup>Jayawe jekuaeño ndepia pe iyemingeta kua che jae ai ndewe wae re, jare yandeYa nemborita oi ndikuaa kawi waerä opaete kua re.

<sup>8</sup>Jare jekuaeño nemandúa Jesucristo re. Jae ko Upuruepi wae arakae Tumpa jei mburuwicha wasu David pe ombouta iko David iñemoña rupi wae. Jare yandeRu Tumpa umbijekowe ye ueru umanokue wae reta ipite wi. Jokua ko ñee ikawi wae che aporomboe wae.

<sup>9</sup>Jare jokua ñee ikawi wae amimbeu ai jeko pewa, aiporara ai kua peresoriru pe. Echa'ä cheñono reta cadena pe pëti jeko pochi wae rami. Erëitu mbaeti kiawe ipuere oñono cadena pe Tumpa iñee oyopia reta waerä.

<sup>10</sup>Jayawe jokua ñee ikawi wae jekuaeño uyembeu oo oi ramo, chepiawasu rewe amiawätata ai opaete kua aiporara ai wae reta. Che ayapo ai jukuärái Tumpa uiparawo wae reta pewarä. Che aikuaa ai jokua ñee ikawi wae uyandu reta yawe, wirowiata jese. Jare chepia rewe che aipota Tumpa uepi reta waerä Jesucristo rupi jare yureko reta waerä jae ndiwe jaeño mái pewa.

<sup>11</sup>Ime pëti ñee añetete wae. Jae ko kua: Cristo ndiwe ñamano ma yawe, jae ndiwe wi yaikowe yeta ñai.

<sup>12</sup>Jare ñamiawäta yawe yaiporara wae yayeyokui chupe ramo, jae yandapota ñai waerä mburuwicharä jae ndiwe jaeño mái pewa. Erëi kía uikuaku yawe, jae uikuakuta wi.

<sup>13</sup>Jare yepe tēi amo pe yayapo'ä jupi jae jei yandewe wae rupi, erëi jesewe jae jekuaeño jupi uyapo yandewe opaete jae jei wae, echa'ä jukuärái ko jae, jare jae uyembiambie'ä etei.

<sup>14</sup>Emimandúa jekuaeño Cristo re wirowia wae reta kua yemboe amee ai ndewe wae re. Jare ere chupe reta Tumpa jee re awiye tuyeaka reta jae yepái ipotawe ñee re. Echa'ä jokua ombori'ä kiawe jukuärái uyeaka reta yawe. Jare kía reta uyandu yawe, uipotata opa uñerükumewa reta Tumpa koti.

<sup>15</sup>Jáeramo iñemiatangätu ndikuaa kawi waerä yemboe añetete wae re. Jare jekuaeño eporomboe jokua ñee jupi rupi kawi Tumpa umae nderé waerä nde ko jae jupi rupi uyeyokui wae. Jukuärái nde ndiyapo yawe, ndarau nemara Tumpa omboporowa yawe ndeparawiki.

<sup>16</sup>Jare awiye eporomboe pochíño nde ndere wae rupi. Echa'ä jukuärái ndiyapo yawe, nembopiakata Tumpa wi nderé uyapisaka wae reta.

<sup>17</sup>Kua nunga yemboe uñemiáita mbaerasi yanderete re uñemiái wae rami. Jokua nunga uyapo reta wae ipite wi ko jae Himeneo jare Fileto.

<sup>18</sup>Echa'ä jae reta opia ma añetete wae wi, jare oporomboe reta jokua yaikowe yeta wae uyeyapo ma wae. Jare jukuärái oporomboe reta ramo, amokue wae reta jopa ñonoí jokua re.

<sup>19</sup>Erëi yepe tēi ime amokue wae reta opia ma Tumpa iñee añetete wae wi, erëi jesewe yemboe añetete wae Tumpa wi ou wae imeño ipirätaete jare uyepepika'ä etei. Jae ko pēti tēta iwapika ikawiete wae ita pewa rami. Jare kua yemboe iyipi ko kuärái: “Tumpa uikuaa kawi oí opaete kía jae imaerä iko wae reta,” jare, “Ipotawe kía jei, ‘Jesucristo ko jae cheYa,’ jei wae, tusiri ikawi mbae wae wi.” Jukuärái ko kua yemboe iyipi.

### **Pablo jekuaeño umikirëi Timoteo usiri waerä ikawi mbae wae wi**

<sup>20</sup>Kua yembijaanga uikuaaka yandewe këraita ko yasiri ikawi mbae wae wi: Pēti ikokatu wae jēta pe ime jeta ambie ye ye jiru wae. Ime mbaembae jiru reta ikawiete wae jare jepi wae. Jare iya uiporu jokua reta mboupa reta ou yawe. Jare ime wi jēta pe mbaembae jiru jepi mbae wae reta. Jare iya uiporu jokua reta omombo waerä pipe mbaembae ikia wae.

<sup>21</sup>Jae ramiño wi yande pēti pēti wae ime ñanoi yandereko ikawi wae jare yandereko kachi wae. Erëi yaeya yawe yandereko kachi wae, yande reta ko jae jokua mbaembae jiru jepiete wae rami. Jare yandeYa ñaneño teeta jae imaerä ipuere waerä yandeporu mbaembae ikawiete wae pewarä.

<sup>22</sup>Jayawe esiri mbaembae kachi wae wi taurusu wae reta uipotanoí uyapo wae wi. Jare jekuaeño ndereko toya katu too Tumpa jeko re. Jekuaeño tukuakuaa nderowia



Tumpa re wae. Jekuaeño epuruau. Jare jekuaeño iko ndepiakawi rewe ñru wae reta ndiwe. Jukuärái yureko opaete yandeYa re ipia rewe wirowia wae reta.

### **Pablo umikirëi Timoteo oporomboe waerä ipiawasu rewe**

<sup>23</sup>Erëi ime yawe kía reta uyeaka ñonoï ipotawe mbae re wae, awiye iyemiinge joko pe. Echa'ä nde ndikuaa neï jokuja jaeño ueruta oï ndewe ñeräro.

<sup>24</sup>Jare kía Tumpa pe uyeyokui wae ndarau ikawi iñerärose waerä. Imeta ko ipiakawi opaete wae reta pe. Jare ikatuta ko oporomboe waerä ipiawasu rewe.

<sup>25</sup>Jare omboeta ko uñemimichi rewe oyowaicho jae ndiwe wae reta. Echa'ä aramoi Tumpa umeeta chupe reta ueya waerä ipiyemingeta jupi mbae wae jare uikuaa waerä añetete wae,

<sup>26</sup>jukuärái ipuere oyepete waerä Añawasu iñuui wi. Echa'ä mbaemimba yaipisi ñuui pe wae rami, Añawasu uipisi ma reta uyapoka waerä chupe reta jae jei wae.

## **2 Timoteo 3**

### **Ara taikuewa rupi jeta wae reta jeko kachita**

<sup>1</sup>Añawe che aipota aikuaaka ndewe mbaembae uyeyapota oï ara taikuewa rupi. Ikuaa kawi kua: Jokuja ara reta rupi imeta oï jeta yembiawái reta.

<sup>2</sup>Echa'ä jeta wae reta uyandarekota oï iyeeño. Jokuja nunga reta jekuaeño uipotata korepoti jae reta imaeräño. Uyembutuichata reta japicha koti. Jare uyembikateta reta. Jare jekuaeño uyemingetata reta japicha koti ikawi mbae wae. Jare ndarau uyapo reta tu jare ichi jei wae rupi. Jare ndarau umee yasurupái kía pe awe. Jare mbaembae Tumpa rewa mbaeta'ä chupe reta.

<sup>3</sup>Upuruauta'ä ma reta. Iyepiseta uyeyapo reta. Indayepotata reta. Jare jekuaeño uyapota reta jete uipotata wae. Jowaichopotata reta. Mbae ikawi wae uñamitääta reta.

<sup>4</sup>Jokuja ara reta rupi jeta wae reta wi umbitawita japicha reta. Jare uyapoñoita reta mbaembae ipia pe uyemingeta mbae rewe. Uyererowia katuta reta iyé. Uipotata'ä reta Tumpa, erëi uipotata jae retái uyembiyerowia.

<sup>5</sup>Jae reta uipiuraangaño Tumpa wi, erëi onoita'ä reta Tumpa imbaepuere. Jayawe awiye iñemñiru jokuja nunga reta ndiwe.

<sup>6</sup>Jokuja nunga kuimbae reta ipite pe oï oporomboeraanga wae reta. Jae reta upurumbitawi rewe uike teta reta rupi. Echa'ä uipotata uyererowia katuka kuña reta yawái mbae uyembitawika wae pe jokuja teta pewa. Jokuja nunga kuña reta ipia umbijeko tēi oï mbaembae kachi uyapo wae re. Erëi umaeño iyé reta uyereruwataka waerä mbae kachi wae rupi.

<sup>7</sup>Jae reta jekuaeño uipotata uyandu yemboe ipiau wae ipotawe kía wi ou wae, erëi ipuere'ä uepiti reta añetete wae.

<sup>8</sup>Jokuja kuimbae oporomboeraanga wae reta ipiyemingeta mbaeti ko jupi, jare jokuja wirowia reta tēi wae re añetete'ä ko. Jae reta oyowaicho yemboe añetete wae

koti, kërái arakae iwí Egipto pe kuimbae ichoropa wae reta Janes jare Jambres jee wae reta oyowaicho Moisés koti wae rami.

<sup>9</sup>Erëi jokuá nunga reta ndarau ipuere jekuaeño upurumbítawí. Echa'ä uyekuaa ñotái ko jae reta iyarakuaa mbae wae kërái arakae uyeyapo Janes jare Jambres pe rami.

### **Pablo umikirëi Timoteo jekuaeño wirowia waerä Tumpa ñee re**

<sup>10</sup>Erëi nde, Timoteo, ambie ye ko jae reta wi. Echa'ä nde nemomoe kawi neí chereko. Nde ndikuaa neí kërái ko che aporomoe wae, jare kërái chereko jare chepiayemingeta wae. Jare nde ndikuaa neí wi kërái ko arowia Tumpa re wae, jare kërái apuruau chepiawasu rewe, jare kërái amiawäta äi aiporara wae.

<sup>11</sup>Nde ndikuaa neí wi kërái che jeta aiporara tëta wasu Antioquía pe jare Iconio pe jare Listra pe yandeYa Jesucristo rewa amimbeu ramo. Erëi yepe tëi jeta aiporara parawete, jese we amiawäta opaete, jare yandeYa cherepi opaete aiporara wae wi.

<sup>12</sup>Añetete kía uipota iko jupi rupi pëti ramiño Jesucristo re wae, uiporara ñotái ko Tumpa jowaicho reta ipo pe.

<sup>13</sup>Erëi jeko pochí wae reta jare upurumbítawí wae reta jeieteta uyapo reta mbaembae ikawi mbae wae. Jae reta jekuaeño umbítawita ñru wae reta, jare jae reta uyembítawíkata wi.

<sup>14</sup>Erëi nde, jekuaeño erowia yemboe añetete wae ndiyemboe ma jese wae re. Nde ndikuaa neí jokuá yemboe añetete wae ko, echa'ä ndikuaa kawi neí nde nemboea reta jae ko nderowia katu jese wae reta.

<sup>15</sup>Nemandúa neí kërái nemichi wiwe ndikuaa Tumpa ñeeriru pe uyekuatía oí wae. Jare jokuá uyekuatía oí wae ko nembiarakuaa kërái Tumpa yanderepi Jesucristo re yarowia wae rupiño.

<sup>16</sup>Opaete Tumpa ñeeriru pe uyekuatía oí wae Tumpa wi etei ko ou. Jáeramo ikawiete yandewe. Echa'ä yanemboe kawi, jare umbieta yandewe yayawí yawe, jare yanembiarakuaa añetete rupi, jare uikuaaka yandewe kërái yaiko jupi waerä Tumpa koti.

<sup>17</sup>Jukuärái kía Tumpa pe uyeyokui wae ipuere uyapo kawi opaete Tumpa uipota wae.

## **2 Timoteo 4**

### **Pablo jei Timoteo pe jekuaeño umimbeu waerä ñee ikawi wae**

<sup>1</sup>Pëti ara yandeYa Jesucristo ou yeta oí iko waerä opaete wae imburuwicha wasurä jaëño máí pewa. Jare jokuá uyeyapo ma yawe, opaete umanokue wae reta jare opaete jekowe rewe oí wae reta uyemboita ñonoí jae jowai jae jei waerä jae reta jeko re. Jáeramo Tumpa jee re jare Jesucristo jee re che ndoyokui kuärái:

<sup>2</sup>Jekuaeño emimbeu Tumpa ñee. Jekuaeño ñemiatangätu nemimbeu waerä Tumpa ñee kía kía uipota uyapisaka nderé wae pe jare uipota'ä uyapisaka nderé wae reta

pe wi. Ikuaaka chupe reta kërái uyawi ñonoï wae, jare embieta chupe reta wi. Emikirëi reta Tumpa koti, jare emboe kawi reta ndepiawasuwae.

<sup>3-4</sup>Jukuärái che numbiarakuaa aï, echa'ä outa oï ara jeta wae reta uipotata'ä uyapisaka waerä yemboe añetete wae re. Miäri arakae pewa reño ikirëieteta uyapisaka reta. Jare jae reta jei wae rupiño yurekota reta. Jáeramo uekata reta oporomboeraanga wae reta jei chupe reta waerä jae reta uipota waeño.

<sup>5</sup>Erëi nde, jekuaeño iyandareko kawi ndiyé mbaembae kachi wae wi. Jekuaeño emimbeu ñee ikawi wae Jesucristo rewa, jare emiawäta ndiporara yawe ñee ikawi wae jeko pewa. Jare opa iyapo kawi mbarawiki Tumpa umee ndewe wae.

<sup>6</sup>Che jae ndewe jukuärái, echa'ä aikuaa aï koiño ma oï ara amee waerä cherekowe Tumpa pe. Echa'ä amanota ma aï.

<sup>7</sup>Che opa kawi ma ayapo mbarawiki Tumpa umee chewe wae. Añemiamirika'ä yanderowaicho pe. Ayandareko kawi Cristo oporomboe wae re.

### **Pablo jaeñoete ma umbiarakuaa Timoteo**

<sup>8</sup>Añawe aikuaa aï yandeYa upi oï mbae ikawiete wae chemaerä umee waerä chewe jokua ara jae ou ye yawe. Tumpa jokua umeeta oï chewe kërái pëti corona uñemee upurumbisipe wae pe rami, echa'ä mbae ikawi mbae wae amiamiri ramo. Erëi cheño'ä ko anoita. Echa'ä jokua mbae ikawiete wae yandeYa jupiete wae umeeta oï ipotawe kía pe ipiakirëi rewe uäro oï jokua ara jae ou yeta wae.

### **Pablo jaeñoete ma umbiarakuaa Timoteo**

<sup>9</sup>Timoteo, eyu mii ewäe imambae ndepuere wae rupi.

<sup>10</sup>Echa'ä Demas chereya oo tëta wasu Tesalónica koti, echa'ä jae uauete mbaembae kua iwi pewa jeko pewa. Crescente oo iwi Galacia koti joko pe uyeyokui waerä Tumpa pe. Jae nunga wi Tito oo iwi Dalmacia koti.

<sup>11</sup>Jaeño Lucas imeño oï che ndiwe. Jayawe ndeyu ma neï yawe, eka eru Marcos nde ndiwe. Echa'ä jae chembori kawita kua mbarawiki pe.

<sup>12</sup>Jare Tíquico amondo ma tëta wasu Éfeso koti.

<sup>13</sup>Ndeyu neï yawe, eru mii chewe chiñepewäka. Echa'ä aeya tëta wasu Troas pe Carpo jëta pe. Jare eru chewe wi chetupapire reta. Jare aipotaete nderu waerä chewe jokua mbaemimba ipirekue reta re uyekuatía oï wae.

<sup>14-15</sup>Nemandúa neï Alejandro re. Jae ko jokua kuimbae uyapo mbaembae jiero pewa wae. Iyandareko kawi ndiyé chuwi, echa'ä jae uyapo jeta ikawi mbae wae chekoti. Jae oyowaichoete oï yaporomboe wae koti. YandeYa umiñatimata oï chupe opaete mbae jae uyapo chekoti wae re.

<sup>16</sup>Judío itenondewa reta jaeramo uñeapo cheré yawe romano reta imburuwicha wasu pe, kiawe chembori'ä. Opaete chereya reta. Tumpa awiye timandúa chupe reta jokua teko re.

<sup>17</sup>Erëi yandeYa chembori jare chemimiräta kawi amimbeu waerä jupi rupi ñee ikawi wae opaete wae pe. Jukuärái jeta judío mbae wae reta uyandu ma jokua ñee ikawi wae yandeYa rewa. Jare kërái kía uepi pëti sambiai yawa ipo wi wae rami, yandeYa cherepi mano wi.

<sup>18</sup>Jare yandeYa cherepita opaete ikawi mbae wae wi, jare chereraata oï kuri ara pe aï waerä jae ndiwe – jae ko opaete wae imburuwicha wasu jaeño mái pewa. Tuyembutuichaka yandeYa jee jaeño mái pewa. Jukuärái tuiko.

### **Pablo wiraaka saludo**

<sup>19</sup>Embisaluda mii chewe Priscila jare Aquila, jare Onesíforo jëta pewa reta.

<sup>20</sup>Erasto upita tëta wasu Corinto pe. Erëi aeya Trófimo tëta wasu Mileto pe, echa'ä jae imbaerasi iko ramo.

<sup>21</sup>Iñemiatangätu mii ndeyu waerä chepi ndei roi oa mbowe. Omondo oï ndewe saludo Eubulo, Pudente, Lino, Claudia, jare opaete ïru reta Cristo re wirowia wae.

<sup>22</sup>YandeYa Jesucristo jekuaeño toi ndepia pe jare jekuaeño tipiakawi pewe. Jukuärái tuiko.

## Tito

### Kua tupapire rewa:

Kua tupapire Pablo uikuatía jare wiraaka kuimbae Tito jee wae pe. Tito ko jae judío mbae wae Cristo re wirowia wae. Jae uyemboe Cristo rewa Pablo oporomboe wae rupi. Pablo jare Bernabé yuraa yawe umimbeu waerä Cristo rewa, Tito oo wi jae reta ndiwe imboriarä. Jare joko wi Tito ombori Pablo iwi i mbite pe oï wae Creta jee wae pe umimbeu waerä Cristo rewa. Joko wi Pablo ueya Tito jokua iwi Creta pe Tito ipuere opa uyapo waerä mbarawiki Pablo opa'ä uyapo wae, jare umbijee waerä Cristo re wirowia wae reta itenondewa retarä opaete tēta wasu reta rupi. Kua tupapire rupi Pablo umbiarakuaa Tito kērái uyandareko waerä jokua iwi pewa Cristo re wirowia wae reta re.

### Tito 1

#### Pablo wiraaka saludo Tito pe

<sup>1</sup>Cherai Tito, che araaka aï ndewe saludo yandeYa Jesucristo jee re. Che ko jae Pablo. Che ayeyokui Tumpa pe, jare Jesucristo chemondo jae jee re amimbeu waerä jesewa. Jae chemondo Tumpa uiparawo wae reta pe ambori reta wirowia kawi waerä Cristo re jare uikuaa kawi reta waerä yemboe añetete wae. Jokua yemboe uikuaaka chupe reta kērái umbiyerowia reta waerä Tumpa.

<sup>2</sup>Jae reta wirowia kawi yawe Cristo re jare yemboe añetete wae uikuaa kawi reta yawe, wirowia katu rewe uärota ñonoï tekowe opa mbae wae. Echa'ä ndei iwi uyembipi mbowe, Tumpa jei umeeta oï yandewe tekowe opa mbae wae. Jare Tumpa ndarau etei iyapu yandewe.

<sup>3</sup>Tumpa ko jae yandeRepi wae, jare añawe uwäe ma ara jae uiparawo wae jokua yemboe uyemimbeu waerä. Jare che rupi jukuärái uyeyapo oï, echa'ä jokua ko jae mbarawiki Tumpa umee chewe wae.

<sup>4</sup>Che aikuatía aï ndewe kua tupapire, Tito. Nde ko jae cherai rami, echa'ä che ko jae nombone Cristo rewa ramo. YandeRu Tumpa jare yandeYa Jesucristo yandeRepi wae jekuaeño tipiakawi ndewe jare tuyapo ndewe ndiko waerä ndepiakatu rewe.

#### Kērái iko kawi waerä pēti wae Cristo re wirowia wae reta itenondewarä

<sup>5-6</sup>Che ndueya iwi Creta pe ndepuere opa ndiyapo waerä yandeparawiki opa'ä yayapo wae, jare nembijee waerä Cristo re wirowia wae reta itenondewa retarä opaete tēta wasu reta rupi. Jayawe kērái che jae ma ndewe rami, kía ikota pēti wae Cristo re wirowia wae reta itenondewarä wae tuechaka teko kawi. Jare tureko pētiño kuña. Isambiai reta torowia Cristo re jare awiye tuyapo reta jete uipota wae rupiño. Tuyapo reta tu jare ichi jei wae rupi. Jukuärái yawe, ndarau kía umbijeko reta mbae re awe.

<sup>7</sup>Tumpa umee oï Cristo re wírowia wae reta itenondewa reta pe mbarawiki jupi wae – jae ko uyandareko kawi waerä Cristo re wírowia wae reta re. Jáeramo tuechaka reta teko kawi awiye waerä kía umbijeko mbae re awe. Awiye tuyererowia katu reta iyé ñru wae reta jowai. Awiye tipochi rái reta. Awiye tikause reta. Awiye tiñerärose reta. Awiye tuiportaete reta korepoti jae imaeräño.

<sup>8</sup>Jae reta jekuaeño tikirëi umbiasa kawi waerä mboupa reta jëta pe. Ikawi waeño tuyapo reta uyerowia rewe. Tuyandareko kawi reta iyé mbaembae kachi wae wi. Tuyapo reta jupi waeño. Tuñeño tee reta Tumpa pewarä. Awiye tumaeno reta jete uipota wae rupiño.

<sup>9</sup>Jare torowia reta ipia rewe jokua ñee ikawi wae Cristo rewa yamboe wae re, echa'ä jokua ñee añetete ko. Jare Cristo re wírowia wae itenondewa reta uipisi kawi yawe jokua ñee, ipuereta umikirëi ñru wae reta yamboe añetete wae rupi. Jae nunga wi jae reta ipuereta umiamiri iñee rupi ipotawe kía uyemingeta kachi yawe ñee ikawi wae koti.

### **Pablo umbiarakuaa Tito oporomboeraanga wae reta rewa**

<sup>10</sup>Jokua che jae aï ndewe, echa'ä ime jeta ipiatäta wae reta. Jae reta ko jae upurumbitawi wae reta jare imiäri reta mbaembae usiriwe mbae wae re. Jare jokua nunga reta oete uipota uyapoka yandewe mbaembae Moisés arakae uikuatía wae. Jae reta jei kuimbae judío mbae wae reta pe uyembicircuncidakata ko umbiyerowia waerä Tumpa.

<sup>11</sup>Ikawi ko ñamikii waerä jokua nunga reta. Echa'ä jae reta oporomboe ñonoï awiyeta tēi oporomboe wae re. Jare jokua jae reta uyapo ñonoï korepoti umingana waeräño. Jare jae reta oporomboe kachi wae rupi, jeta tētara reta umbiyerowa ma yamboe añetete wae wi.

<sup>12</sup>Yaikuaa ñai arakae ime iko pēti kuimbae Creta pewa iyarakuaa katu wae. Jae jei jētáwa reta rewa kuärái: “Creta pewa reta jekuaeño iyapu, jare jowaichopota reta, jare iyaki reta, jare ikaruete reta.” Jukuärái jei.

<sup>13</sup>Jare kua jae jei wae añetete ko jare imeño añawe, echa'ä jukuärái ko jokua oporomboe kachi wae reta jeko. Jáeramo täta rupi embieta chupe reta awiye waerä jae reta ombopia Cristo re wírowia wae reta yamboe añetete wae wi.

<sup>14</sup>Jokua upurumbitawi wae reta oporomboe ñonoï arakae judío reta imiäri reta wae re. Jare jei tēi yandewe ime jeta mbaembae awiyeta ko yayapo awiye waerä yandekia ñai Tumpa koti. Erëi jae reta opa ma uyerowa yamboe añetete wae wi. Jáeramo Cristo re wírowia wae reta awiye ma tuyapisaka jese reta.

<sup>15</sup>Echa'ä kía wírowia Cristo re wae ikia'ä ma oï Tumpa koti. Erëi kía Tumpa koti ikia oï wae ndarau ipuere ikia mbae oï jokua oporomboeraanga wae reta jei wae rupi. Ipiayemingeta etei ikumewa. Jare ima rupi ipiatäta ramo, ipia umbijeko'ä ma mbae kachi uyapo wae re.

<sup>16</sup>Jae reta jekuaeño jei tēi: “Aikuaa Tumpa,” jei. Erēi mbaembae jae reta uyapo wae rupi uikuaaka reta uikuaa’ā etei ko Tumpa wae. Echa’ā jae reta uyapo mbaembae kachiete wae. Uyapo’ā reta Tumpa jei wae rupi, jare uyapo’ā etei reta mbaembae ikawi wae.

## **Tito 2**

### **Pablo umbiarakuaa Tito kērāi omboe waerā kuimbae ukuakuaa wae reta**

<sup>1</sup>Erēi nde, Tito, awiye iko jokua nunga reta echa. Nde jekuaeño eporomboe yemboe añetete wae rupi.

<sup>2</sup>Jukuārāi emboe kuimbae ukuakuaa wae reta uechaka waerā teko kawi, jare uyandareko kawi reta waerā iyé mbaembae kachi wae wi iru wae reta uipiū chuwi waerā. Emborī jae reta wirowia kawi waerā Tumpa re jare upuruau kawi waerā ipiawasū rewe.

### **Pablo umbiarakuaa Tito kērāi omboe waerā kuña ukuakuaa wae reta**

<sup>3</sup>Jae ramiño wi emboe kuña ukuakuaa wae reta uechaka waerā teko kawi ipuere umbiyerowia waerā Tumpa. Emboe reta wi awiye waerā indayepota jare awiye tikause reta wi. Jare emikirēi reta omboe waerā ikawi wae re kuña taurusu wae reta.

<sup>4</sup>Tomboe reta kērāi uau kawi waerā ime jare imembi reta.

<sup>5</sup>Tomboe reta wi kērāi uechaka waerā teko kawi, jare awiye waerā uyapo reta mbaembae kachi wae, jare kērāi uyandareko kawi reta waerā jēta re, jare kērāi iko reta waerā ipiakawi rewe jare ime jei wae rupi. Echa’ā jukuārāi yureko reta yawe, iru wae reta ipuereta’ā ma uyemingeta kachi yande yaporomboe Tumpa rewa wae re.

### **Pablo umbiarakuaa Tito kērāi omboe waerā kuimbae taurusu wae reta**

<sup>6</sup>Jae ramiño wi emboe kuimbae taurusu wae reta awiye tumaeño jete uipota uyapo wae rupi.

<sup>7-8</sup>Jare nde, Tito, echaka ndereko kawi taurusu wae reta pe jae reta omomoe waerā ndereko. Jare jekuaeño eporomboe añetete wae jare jupi wae ndipiū rewe Tumpa wi awiye waerā kía ipuere nembijeko mbae re. Echa’ā jukuārāi ndiyapo yawe, oyowaicho nde ndiwe wae reta kiiño upitata reta, echa’ā mbaetita chupe reta mbae re iñera waerā yandekoti.

### **Pablo umbiarakuaa Tito kērāi omboe kawi waerā uyeyokui wae reta**

<sup>9</sup>Emboe uyeyokui wae reta jekuaeño tuyapo uipiū rewe ipatrón jei wae, jare tumbiyerowia reta ipatrón opaete mbaembae uyapo wae rupi. Awiye tiyeakapota reta.

<sup>10</sup>Awiye timonda reta. Tuyekuaaka reta ipatrón pe jae ipuere waerā wirowia katu jese reta. Echa’ā jukuārāi uyapo reta yawe, iru wae reta uikuaata kērāi ikawiete ye ko yemboe Tumpa wi ou wae jare kērāi Tumpa ko jae yandeRepi wae.

### **Pablo umbiarakuaa Tito kërái oporomboe kawi waerä Tumpa ipiakawi re**

<sup>11</sup>Jayawe emboe opaete wae reta kuärái: Tumpa ipiakawiete ko, echa'ä jae umee tõi ma opaete iwí pewa reta pe kërái ipuere waerä onoi tekowe opa mbae wae jae ndiwe.

<sup>12</sup>Jare Tumpa ipiakawiete yandewe wae yanemboe yaeya waerä yandereko kachi wae jare mbae kachi yanderete uipota uyapo wae. Jare yanemboe wi kërái yepe tõi kua iwí tinee oí mbae kachi wae pipe, jeseuwe yaiko kawita ko jupi rupi jare Tumpa yambiwerowia waerä.

<sup>13</sup>Jukuärái ko yaikota añawe rupi, yande ñaäro ñai rambuwe yayerowia rewe yandeYa Jesucristo ou ye rewa. Jokua ara jae uyekuaata oí imbaepuere jembipete rewe. Echa'ä jae ko yandeTumpa jare yandeRepí wae, jare jae imbaepuere tuichaete.

<sup>14</sup>Opaete yande jeta ma yayawi Tumpa koti. Erëi Jesucristo uñemee umano waerä yanderé yanderepí waerä jokua teko ñanoi wae wi, jare oyoe waerä yandepia opaete ikawi mbae wae wi. Jukuärái jae ñaneñono tee ma jae imaerä, yande ñanekirëi yayapo waerä mbaembae ikawi waeño.

<sup>15</sup>Jokua ñee re ko ndeporomboeta. Emikirëi reta uyapo waerä opaete kua mbaembae che jae ma ndewe wae. Erëi uyapo'ä reta yawe, embieta chupe reta. Echa'ä Tumpa umee ma ndewe mbaepuere jukuärái ndiyapo waerä. Jayawe awiye kiawe taneriro.

### **Tito 3**

#### **Kërái Cristo re wirowia wae reta yureko waerä japicha reta ndiwe**

<sup>1</sup>Jekuaeño emimandúa Cristo re wirowia wae reta kua re: Jae reta tuipiu imburuwicha reta wi jare tuyapoñoi jae reta jei wae rupi. Toí reta uyapo waerä ipotawe mbae ikawi wae.

<sup>2</sup>Jare awiye tuyemingeta kachi reta japicha koti. Awiye tuyeaka reta. Tipiawasu chupe reta jare tuñemimichi reta.

<sup>3</sup>Emimandúa reta yande ndei Cristo re yarowia mbowe, yandereko ikawi'äse. Yande yaikose yandearakuaa mbae echa. Yaikose yaipota wae reño yayembiwerowia waerä. Jare yayembitawise. Mbaembae kachi yanderete re yareko wae jekuaeño ime wireko mbaepuere yanderé. Yayapoñoise mbaembae kachi wae, jare ñañemirose yanderapicha reta pe. Ñañeamitäase yanderapicha reta ndiwe. Jukuärái yande yaikose tenonde yawe.

#### **Kërái Tumpa yandeparareko**

<sup>4</sup>Erëi Tumpa ko jae yandeRepí wae. Jae uikuaaka yandewe kërái jae ipiakawiete yandekoti wae jare kërái yanderauete oí.

<sup>5</sup>Echa'ä jae opa umbái yandewi mbaembae yayawi ikoti wae, jare jukuärái yanderepí teko ime yareko ikoti wae wi. Jukuärái jae uyapo yandeparareko ramo –



mbaeti ko mbae jupi yayapo wae rupi. Añetete Espíritu Santo rupi Tumpa yandepiayoe, jare jukuárái umee yandewe tekowe ipiau wae. Jare yandereko umbipiau wi.

<sup>6</sup>Tumpa umee ma yandewe Espíritu Santo umbiete mbae rewe Jesucristo re yarowia ramo. Jae ko yandeRepí wae.

<sup>7</sup>Jare ipiakawiete ramo, Tumpa umae yanderé yandereko mbae wae rami. Jukuárái Tumpa uyapo yandewe yandepuere yaiko waerä tai jare tayi retará. Jáeramo ñaáro ñai yayerowia rewe yaiko waerä jae ndiwe jaeño mái pewa.

<sup>8</sup>Jokua ñee añetete ko. Jáeramo awiye ndekueri ndeporomboe waerä jese. Echa'ä jukuárái opaete Tumpa re wirowia wae reta uñemiatangätuta jekuaeño uyapo reta waerä mbaembae ikawi waeño.

### **Pablo jekuaeño umbiarakuaa Tito**

<sup>9</sup>Iyandareko kawi ndiyé, echa'ä jeta wae reta uyeakañoi tamikue reta re, jare judío reta jeko re, jare ipotawe mbae re. Awiye iyemiinge jokua mbaembae reta ipite pe. Echa'ä jokua ikawi'ä oï yandewe jare ndarau ombori kiawe uyapo waerä Tumpa jei wae rupi.

<sup>10</sup>Ime yawe kía oporomboe kachi wae jare jukuárái umbiyao tee oï Cristo re wirowia wae reta, jayawe embieta chupe. Jare jae uyapisaka'ä nderé yawe, embieta ye chupe. Erëi uyapisaka'ä ñeño yawe, nde jare iru hermano reta pesiri chuwi.

<sup>11</sup>Echa'ä jokua nunga reta uyawi ma oï Tumpa koti jare uyerowa ma añetete wae wi. Jae jeko pewái ma ko uyembijekoka oï.

### **Pablo jei Tito pe mbaembae uyapo waerä**

<sup>12</sup>Che aipota amondo ai ndepi cheiru Artemas ani Tíquico. Jare jae oo ma uwäe yawe ndepi, jupiwoiño eyu chepi teta wasu Nicópolis pe. Echa'ä che chekirëi apita ai joko pe roi uasa rewa.

<sup>13</sup>Embori kawi mii opaete ndepuere wae rupi abogado Zenas jee wae jare Apolos wi yuraa kawi reta waerä, jare awiye waerä mbae uata chupe reta.

<sup>14</sup>Opaete Cristo re wirowia wae reta tuyemboe jekuaeño uyapo reta waerä mbaembae ikawi wae ombori waerä mbae uata oï chupe wae reta pe. Jare jukuárái uyapo reta yawe, ndarau yureko iyaki wae reta rami.

### **Pablo wiraaka saludo**

<sup>15</sup>Opaete che ndiwe ñonoï wae reta wiraaka oï ndewe saludo. Embisaluda mii chewe opaete cheiru reta Cristo re wirowia wae joko pe ñonoï wae reta. YandeYa Jesucristo jekuaeño tipiakawi pewe. Jukuárái tuiko.

## Filemón

### Kua tupapire rewa:

Kua tupapire jae ko Pablo uikuatía jae ñru mii Filemón jee wae pe. Pablo uikuatía yawe, jae iko peresoriru pe. Jare joko pe iko rambuewe, uikuaa ñru pereso Onésimo jee wae. Kua Onésimo, jae ko tãta rupi uyeyokui Filemón pe wae, erëi osi ma chuwi. Onésimo Pablo ndiwe peresoriru pe yureko rambuewe, Pablo umimbeu chupe ñee ikawi wae Jesucristo rewa, jare Onésimo wirowia jese. Jare omoë reta ma yawe peresoriru wi, Onésimo uipota uñatima ye iya Filemón pe. Erëi ukiye chuwi, echa'ã aramoi Filemón uipotata uiporaraka chupe ramo. Jáeramo Pablo uikuatía jare wiraaka kua tupapire Filemón pe umiñera waerã umbiresiwe kawi ye waerã Onésimo.

### Filemón 1

#### Pablo wiraaka Filemón pe saludo

<sup>1</sup>Nde, Filemón, cheñru nduau mii wae jare cheparawiki ñru, che ko jae Pablo aikuatía aï ndewe kua tupapire. Mase, che parawete peresoriru pe aï amimbeu Jesucristo rewa ramo. Jare hermano Timoteo wi ime oï kua pe che ndiwe.

<sup>2</sup>Ore nduraaka noï ndewe saludo. Jare nduraaka noï saludo wi yanderindi Apia pe, jare yandeparawiki ñru Arquipo pe, jare opaete Cristo re wirowia wae reta nerëta pe uyembatiñoi wae pe.

<sup>3</sup>YandeRu Tumpa jare yandeYa Jesucristo jekuaeño tipiakawi ndewe jare tuyapo ndewe ndiko waerã ndepiakatu rewe.

#### Pablo uyerowia oï Filemón koti

<sup>4</sup>Che ayerure aï nderé. Jare jukuärái ayerure yawe, jekuaeño amee yasurupái Tumpa pe.

<sup>5</sup>Echa'ã jeräkua chewe kërái nderowia kawi neï yandeYa Jesús re wae jare kërái ndeau neï wi opaete Cristo re wirowia wae reta.

<sup>6</sup>Añetete yande yarowia Cristo re ramo, ime mbaembae ikawi Tumpa uyapo ma yandewe wae. Jare yarowia oyowake ramo, che ayerure aï nderé ndikuaa kawi waerã jokua mbaembae.

<sup>7</sup>Che ayerowiaete aï ndepuruau re jare chepiakatu aï jese wi. Echa'ã aikuaa nde, chehermano mii, nemikirëi ye ma jeta wae reta Cristo re wirowia wae.

#### Pablo umiñera Filemón awiye waerã pochi Onésimo pe

- <sup>8</sup>Jáeramo ime anoi mbae mii re che aipota numiñera jese wae. Jare kua pe jupi ko che jae waerä tēi ndewe mbae jupi wae ndiyapo waerä. Echa'ä Cristo umee chewe mbaepuere jukuärái ayapo waerä.
- <sup>9</sup>Erēi nduau rewe che numiñera. Mase, che chendechi ma ko, jare añawe kua peresoriru pe äi parawete amimbeu Jesucristo rewa ramo. Jáeramo cheparareko mii jare iyapo mii chewe ikawi wae.
- <sup>10</sup>Uyeyokui ndewe wae Onésimo, añawe jae uyeyapo ma cherairä Cristo re wirowia ramo, kua peresoriru pe äi rambuewe. Jare che numiñera äi ndiyapo mii waerä chupe ikawi wae.
- <sup>11</sup>Tenonde yawe Onésimo mbaeti uyeyokui kawi ndewe. Erēi añawe jae uyeyokui kawita ndewe kērái chewe uyeyokui kawi rami.
- <sup>12</sup>Yepe tēi che auete, erēitu amondo ye äi ndepi.
- <sup>13</sup>Añetete kua yawái chewe. Echa'ä nde ndikuaa neï che äi kua peresoriru pe ñee ikawi wae amimbeu ramo. Jare aipota tēi amimbíta Onésimo kua pe che ndiwe chembori waerä kua pe äi rambuewe. Che aikuaa nde ndipota tēi chembori neï, erēi ndepuere'ä. Jáeramo che jae: "Ikawi ko tēi Onésimo upíta waerä che ndiwe chembori waerä Filemón ipepika pe." Jukuärái che jae tēi.
- <sup>14</sup>Erēi aipota'ä ayapo kua nde ndere mbae. Che aipota ko nde ndiyapo waerä chewe kua ikawi wae nde ndere wae rupiño – mbaeti che jae ndewe ramoño.
- <sup>15</sup>Aramoi Tumpa jei wae rupi ko Onésimo usiri ndewi michi pewa jae wirowia waerä Cristo re, jare taikue rupi nde neni ye waerä kuri nde ndiwe jaeño mái pewa.
- <sup>16</sup>Erēi añawe jae mbaeti ma ko pēti uyeyokui ndewe waeño. Añawe jae ko pēti yandehermano yaau mii wae. Jare jokua ikawiete ko pēti uyeyokui wae wi. Che au ko, erēi nde uasaete ye ma ko ndeauta aipo. Awiye mii ma emae jese jae ko uyeyokui wae echaño. Emae mii jese jae ko nderiwiete rami yandeYa re wirowia ramo.
- <sup>17</sup>Jáeramo añetete neïru ko che yawe, jayawe eau mii Onésimo jae oo ye ndepi yawe kērái nde cherau rami.
- <sup>18</sup>Jare jae mbae ikawi mbae wae uyapo ndewe yawe, jare aramoi ipía ndewe yawe mbae re, awiye mii ekowara chupe. Chewe ekowara jokua re.
- <sup>19</sup>Chepo pe etei kua aikuatía äi ndewe ndikuaa kawi waerä ambiépita äi ndewe wae. Awiye neakañi nde ndepía ko chewe nderekowe re. Echa'ä che ko amimbeu ndewe Cristo rewa ndepuere waerä neni tekowe opa mbae wae.
- <sup>20</sup>Kuärái ayerure äi ndewe, chehermano mii. Iyapo mii chewe kua ikawi wae yandeYa jee re jare jukuärái chemikirēi ye waerä Cristo koti.

<sup>21</sup>Che arowia katu nderé ndiyapota neï kua aeka ndewe wae. Jáeramo kuärái aikuatía ma ndewe. Jare che aikuaa aï wi nde ndiyapota ko aipo uasaete ye che aeka aï ndewe wae wi.

<sup>22</sup>Jare ime ye pëti mbae mii aipota aeka ndewe wae. Iyapikatu mii chewe kiape ake waerä, echa'ä arowia imambae ata apou pepi. Echa'ä aikuaa pe reta piyerure peï cheré Tumpa pe che aë waerä kua peresoriru wi.

### **Pablo omondoka saludo**

<sup>23</sup>Epafras wi omondo ndewe saludo. Jae ime oï kua peresoriru pe che ndiwe umimbeu Jesucristo rewa ramo.

<sup>24</sup>Jare Marcos, Aristarco, Demas, jare Lucas omondo reta wi ndewe saludo. Jae reta wi ko cheparawiki ïru.

<sup>25</sup>YandeYa Jesucristo jekuaeño tipiakawi ndewe. Jukuärái tuiko.

## Hebreos

### Kua tupapire rewa:

Kua tupapire pe uyekuaa'ä kía uikuatía wae jee. Jayawe yaikuaa'ä kía etei ra uikuatía. Erëi yaikuaa uyekuatía iko judío Jesucristo re wirowia wae reta pe. Jokua año reta rupi ime iko mbapi mbaembae re judío reta uyemboya wae – jae ko Moisés arakae uikuatía wae, tupao wasu Jerusalén pe wae sacerdote reta ndiwe, jare mbaemimba reta uñemee Tumpa pewarä wae re. Jare pëti judío wirowia yandeYa Jesucristo re yawe, ueya jokua mbaembae. Echa'ä jokua mbaembae jaeño uyembijaanga iko Jesucristo re, jare Cristo ou ma ko. Jáeramo jokua mbaembae añawe mbae'ä ko. Erëi jokua judío Jesucristo re wirowia wae reta umbipi uiporara ïru judío reta ipo pe. Jare umbipi uiporara reta yawe, jeta wae reta uipota ueya Jesús re wirowia tēi wae jare uñatima ye opaete jokua judío reta jeko re. Jayawe kua tupapire uikuatía wae uipota umikirëi iko jokua judío Jesús re wirowia wae reta jekuaeño wirowia kawí waerä jese, jare awiye waerä uñatima ye jokua mbaembae pe. Jae uikuatía simi chupe reta Jesucristo ikawiete ye ko Moisés wi, tupao wasu wi, jare ipotawe sacerdote tupao wasu pe uparawiki wae wi.

### Hebreos 1

#### Tumpa uyemingeta Tai rupi

<sup>1</sup>Yande judío retarä yaiko wae, arakaete rupi yandeRu Tumpa uyemingetase jae iñee umimbeu wae reta rupi yanderamikue reta pe. Jeta wese jare opa kërái rái rupi uyemingetase chupe reta.

<sup>2</sup>Erëi añawe kua ara reta pe Tumpa uyemingeta ma yandewe Tai rupi – jae ko umbijee opaete mbaembae iYarä wae. Jare kua Tai rupi Tumpa umbiyekuaa opaete mbaembae ime ñonoï wae.

<sup>3</sup>Jare Tai iñee imbaepuerete wae rupi opaete jokua mbaembae jekuaeño ime ñonoï. Tai rupi uyekuaa Tumpa imbaepuere jembipete ye wae jare kërái etei ko Tumpa wae. Tai etei ou kua iwi pe umano waerä mbaembae yayawi Tumpa koti wae re opa umbái waerä yandewi. Joko wi jae ikowe ye ou umanokue wae reta ipite wi, jare oo ye ara pe uwapi Tumpa iyakata koti kiape onoi mbaepuere Tumpa ndiwe opaete mbaembae re.

#### Tumpa Tai ikawiete ye araiwa reta wi

<sup>4</sup>Jukuärái kua uyapo wae rupi Tumpa Tai uyapiraa opaete araiwa reta. Jare uñemee chupe imbaepuerete waerä opaete araiwa reta wi.

<sup>5</sup>Echa'ä Tumpa mbae jei Tai pe wae, jokua nunga jei'ä pëti awe araiwa pe. Echa'ä jae jei Tai pe kuärái: “Nde ko jae cheRai. Kua ara etei aikuaaka ai opaete wae pe che ko jae ndeRu.” Jae nunga wi Tumpa jei Tai rewa kuärái: “Che aikota chupe Tuurä jare jae ikota cheRairä.” Jukuärái Tumpa jei Tai rewa. Erëi jokua jei'ä pëti awe araiwa pe.

<sup>6</sup>Tai ko jae opaete mbaembae iYa. Jare Tumpa ombou yawe kua iwi pe, jei: “Opaete araiwa reta chewe uyeyokui wae tumbutuicha kua cheRai jee,” jei.

<sup>7</sup>Jokua araiwa reta rewa Tumpa jei kuärái: “Che ayapo araiwa reta iñäkuete iwitu rami. Jae reta jatangätuete uyeyokui waerä chewe tata jatangätu oi wae rami,” jei.

<sup>8</sup>Erëi Tumpa jei Tai pe kuärái: “Nde ko jae Tumpa etei, jare nembraepuere mburuwicha wasu pewa ndarau etei opa. Jekuaeño ndiyapota jupi wae rupi.

<sup>9</sup>Nde ndiyerowia neï jupi wae re jare niñamitää mbae ikawi mbae wae. Jáeramo che, ndeTumpa, ayapo ndewe mbae ikawiete wae opaete nde ndiwe ñonoï wae reta jowake. Echa'ä ayerowia rewe nduparawo nde ndiko waerä mburuwicha wasurä jaeño mái pewa,” jei.

<sup>10</sup>Jare Tumpa jei wi Tai pe kuärái: “Nde ko jae opaete mbaembae iYa. Nde ko jae iyipi wiwe ndiyapo iwi wae. Jare opaete mbaembae ara re oi wae, nde nderembiapo ko.

<sup>11</sup>Opaete jokua reta opata ko, erëi nde ndikota jaeño mái pewa. Opaete jokua reta indechita temimonde opa indechi wae rami.

<sup>12</sup>Jare kërái kía temimonde indechikue umbiyapa omombo wae rami, jare joko wi omonde temimonde ipiau wae, jukuärái wi nde ndiyapota uyeyapo waerä opaete mbaembae ara re oi wae pe. Erëi nde ndarau etei ndiyembiambie. Nde jaeño mái pewa ndikota.” Jukuärái Tumpa jei Tai pe.

<sup>13</sup>Jare jei wi chupe kuärái: “Ewapi kua cheakata koti, nderowaicho reta opa añonoka rewa itawa re nderowai.” Jukuärái jei Tumpa. Erëi jokua jei'ä pëti awe araiwa pe.

<sup>14</sup>Echa'ä araiwa reta ko jae Tumpa pe uyeyokui wae retaño. Tumpa ombou ma araiwa reta ombori waerä tekowe opa mbae wae onoita wae reta.

## Hebreos 2

### Awiye ñarïro ñee ikawi wae

<sup>1</sup>Jayawe opaete kua mbaembae añetete ko. Jáeramo imeta ko yaipisi kawi yandeyupe jokua ñee yayandu Tumpa Tai rewa wae, awiye waerä yapia Tumpa jape wi.

<sup>2</sup>Echa'ä, ¿mbae ra uasa arakaete Israel inemoñaá reta pe jae reta uyapo'ä yawe Tumpa jei wae rupi? Tumpa uiporaraka chupe reta jupi rupi. Tumpa uikuaaka chupe reta inee araiwa reta rupi, jare jokua ñee uyepepika'ä etei.

<sup>3</sup>Erëi ñee tekowe opa mbae wae rewa ikawiete ko. Jayawe, ¿këraita pa yayepe Tumpa iarasi wi yayapisaka'ä yawe jokua ñee re? Ndarau yandepuere. Jokua ñee ipiau wae ikawiete ko, echa'ä yandeYa etei tenonde umimbeu. Jare jaikue rupi jae inee uyandu wae reta umimbeu yuapi ye yandewe jupi rupi.

<sup>4</sup>Jare Tumpa etei uikuaaka jokua jae reta jei wae añetete ko. Echa'ä jae etei umee chupe reta ipuere waerä jae reta uyapo mbaembae opa kërái raí rupi kuimbae retaño ipuere'ä uyapo wae. Jae nunga wi Espíritu Santo umee mbaepuere ambie ye ye wae reta jokua ñee re wirowia wae reta pe kërái Tumpa uipota wae rupi.

### **YandeYa Cristo uyeyapo kuimbaerä yanderepi waerä**

<sup>5</sup>Tumpa pëti ara umbipiauta oí kua iwi. Erëi umeeta'ä araiwa reta pe mbaepuere onoi waerä jese.

<sup>6</sup>Echa'ä Tumpa ineeriru pe yamingeta kërái pëti wae jei Tumpa pe kuärái: “¿Kía pa ko ore nemandúa waerä oreré? ¿Kía pa ko ore ndiyandareko waerä oreré?”

<sup>7</sup>Nde oreapo orembaepuere rewe. Jaeño araiwa reta ime onoi mbaepuere iwate katu orewi.

¡Kërái etei orembutuicha ma!

<sup>8</sup>Opaete mbaembae niñono ma orepo pe.” Jukuärái jei. Jayawe Tumpa oñono yawe yandepo pe opaete mbaembae, kua uikuaaka yandewe mbaeti ko mbae awe ñanoi'ä mbaepuere jese wae. Erëitu añawe rupi ndeiño yaecha opaete mbaembae yandepo pe oí.

<sup>9</sup>Erëi yaecha ko Jesús opaete mbaembae re oí. Yepe tēi tenonde Tumpa umimichi Jesús araiwa reta wi Jesús uyeyapo yawe kuimbaerä, erëi jokua michi pewaño. Añawe Jesús umano yanderé ramo, Tumpa oñono ma opaete wae imburuwicha wasurä iko waerä jare umee chupe uyepiuka waerä opaete wae pe. Añetete Tumpa ipiakawiete ramo, ombou Jesús umano opaete pewartä.

<sup>10</sup>Tumpa ko jae opaete mbaembae iYa. Echa'ä jae rupi etei jare jae imaerä etei uyekuaa opaete mbaembae. Jare jae uipota iwi pewa reta jeta tairä yureko reta waerä jare uyekou reta waerä jae imbaepuere jupiete ye wae re. Jáeramo jae ipiyamingeta ko Jesús uyapo waerä yandewe tape tekowe opa mbae wae ñanoi waerä. Jare jaeño tuicha uiporara rewe Jesús ipuere opa uyapo jokua mbarawiki.

<sup>11</sup>Jesús ko ñaneño tee Tumpa pewartä. Jare yande ñai pëti tētara Jesús ndiwe ramo, jae uyerowiaete oí ñanerani tiwi jare jindi retarä.<sup>12</sup>Echa'ä yamingeta Tumpa ineeriru pe kërái Jesús jei Tu pe kuärái: “Che aikuaakata cheriwi reta pe jare cherindi reta pe nde rewa. Ambutuichata nderee akäta wae pipe nderé wirowia wae reta uyembati ñonoí wae rupi.” Jukuärái jei.

<sup>13</sup>Jare Jesús jei wi kuärái: “Che arowia katuta Tumpa reño.” Jare Jesús jei wi kuärái: “Mase, ko aï, jare ime wi kua pe ñonoï Tumpa tai reta jae umee chewe cheïru retarä wae.” Jukuärái jei.

<sup>14</sup>Opaete kua Tumpa tai reta yae chupe wae, jae reta ko jae soo jare tuwi jare maekäwe pewa. Jáeramo Jesús wi uyeyapo jae reta rami etei ipuere waerä imano rupi umiamiri mano iya – jae ko Añawasu.

<sup>15</sup>Yande parawete reta yande michi wiwe yakiyese mano wi jare jukuärái mano opa yandeyokua iko rami. Erëi Jesús uyapo wae yandeyora ma chuwi.

<sup>16</sup>Yaikuaa ñaï Jesús ou’ä ko ombori waerä araiwa reta. Ou ko yanembori waerä yande Abraham iñemoñaá retarä yaiko wae.

<sup>17</sup>Jáeramo jae imeta ko uyeyapo yande rami etei uyapo waerä yandewe kërái rupi yaya waerä Tumpa re. Jae uyeyapo yandesacerdote tenondewaeterä jupi wae. Jare jae uiporara wae rupi opa umbái yandewi mbaembae yayawi Tumpa koti wae. Añawe yandepuere yarowia katu jese jae uyapo waerä mbarawiki jupi yanemaerä Tumpa jowai, jukuärái yandepuere waerä yaya Tumpa re. Jare jae yande rami etei iko ramo, jae umae yanderé yandeparareko rewe.

<sup>18</sup>Jare Jesús ipuerete yanembori ou yawe mbae uipota uyawika yandewe Tumpa koti wae, echa’ä jae uikuaa kërái ko jokua. Chupe etei wi ou uyawika waerä tēi Tu koti, jare jukuärái jae wi uiporara yande rami.

## Hebreos 3

### Jesús ikawiete ye Moisés wi

<sup>1</sup>Cherëtara mii reta, Tumpa etei peñono tee jae imajerä jare peparawo jae ndiwe piko waerä ara pe. Jáeramo pepiyemingeta toi añetete rewe Jesucristo koti. Jae ko yandeRu Tumpa ombou wae, jare jae ko yandesacerdote tenondewaete yamimbeu ñru wae reta pe wae.

<sup>2</sup>Jare Jesucristo uyapo kawi opaete mbarawiki Tumpa umee chupe wae. Jare jukuärái wi arakaete rupi Moisés uyapo kawi wi opaete mbarawiki Tumpa umee chupe wae, echa’ä jae uyandareko kawi Tumpa uiparawo wae reta re.

<sup>3</sup>Erëi Cristo jee tuichaete ye Moisés jee wi kërái pēti tēta iyapoa ikawiete ko jokua tēta uyapo wae wi.

<sup>4</sup>Jare kërái pēti pēti tēta ime onoi iyapoa, jukuärái wi Tumpa ko jae opaete mbaembae iyapoa.

<sup>5</sup>Moisés uyapo jupi mbarawiki Tumpa umee chupe wae kërái pēti tēta iya pe uyeyokui wae uyapo jupi mbarawiki rami. Erëi Moisés mbae uyapo wae jaeño ko umbijaanga iko taikue rupi mbaembae uyemimbeuta iko wae re.



<sup>6</sup>Erëi Cristo ko jae tëta iya tai rami etei. Jare jae ko Tumpa jëta iyandarekoa. Jare yande reta ko jae Tumpa jëta pewa reta, jekuaëño ñaneratangätu yawe jare ñaäro yawe yarowia katu rewe Tumpa umeeta oï yandewe wae.

### Awiye yayembipiatäta Tumpa koti

<sup>7</sup>Jáeramo, piyapo mii kërái Espíritu Santo jei rami: “Kua ara chiñee piyandu yawe, <sup>8</sup>awiye pepia pemitäta kërái peramikue reta ipia umitäta rami. Jukuärái uyapo reta uyembowaicho yawe chekoti jare omboporowa reta yawe chepiawasú iwitini wasu rupi.

<sup>9</sup>Cuarenta año rupi jae reta uecha tëi mbaembae che ayapo wae. Erëitu jae reta chepiawasú omboporowa reta uikuaa waerä mbae ra ayapota aiko wae.

<sup>10</sup>Jokua jeko pewa chepochi aiko chupe reta jare che jae kuärái: ‘Kua reta jekuaëño ipia pe opia chewi reta. Uipota’ä etei reta uikuaa chereko.’ Jukuärái che jae.

<sup>11</sup>Jáeramo che jae chepochi rewe: ‘Che ayapota tëi aiko jae reta uputuu waerä añetete pewa. Erëi añawe ndarau ayapo chupe reta.’ Jukuärái che jae.” Jukuärái jei Espíritu Santo.

<sup>12</sup>Jáeramo, cherëtara mii reta, piyandareko kawi piyé awiye waerä peya Jesucristo re perowia wae. Echa’ä jokua ko jae mbae kachi wae Tumpa jowai, jare jukuärái piyapo yawe, piyerowa yeta Tumpa imeño mái iko wae wi.

<sup>13</sup>Añetete ko, Tumpa koti yayawi wae jeta wese ikawi wae echa uyekuaa yandewe. Erëi yanembitawi, echa’ä jaeño yanembipiatäta Tumpa koti yayawi yawe. Jáeramo, añawe imeño ara reta oï rambuewe, piñemikirëi päwe rewe piyandareko kawi waerä piyé.

<sup>14</sup>Yanemandúa kawi ñai kërái yarowia katu Cristo re jaeramo yarowia jese yawe. Jukuärái wi jekuaëño yarowia katu jese ara taikuewa uwäe rewa. Echa’ä jukuärái yayapo yawe, uyekuaata añetete ñanoi ma ko tekowe Cristo ndiwe.

<sup>15</sup>Tae ye pewe kua opa yamingeta wae: “Kua ara chiñee piyandu yawe, awiye pepia pemitäta kërái peramikue reta ipia umitäta rami. Jukuärái uyapo reta uyembowaicho yawe chekoti.” Jukuärái jei Tumpa.

<sup>16</sup>Mbirandu: ¿Kía reta pa jokua uyandu tëi jare uyembowaicho reta Tumpa koti wae? ¿Jae’ä yerá jokua Moisés onoe reta iwí Egipto wi wae? Jae reta ko.

<sup>17-18</sup>Jae reta uyawi Tumpa koti, echa’ä uyapo’ä reta Tumpa jei wae rupi. Jáeramo Tumpa iarasi chupe reta cuarenta año rupi, jare jei: “Che ayapota tëi aiko jae reta uputuu waerä añetete pewa. Erëi añawe ndarau ayapo chupe reta.” Jukuärái jei. Jáeramo Tumpa umaëño’ä jese reta uike waerä iwí Canaán pe opa umano rewa jokua jeko kachi wae reta iwitini wasu rupi.

<sup>19</sup>Jukuärái ko yaikuaa jae reta wirowia’ä Tumpa jei wae jeko pewa ipuere’ä uike reta jokua iwí pe kiape uputuuta tëi yureko wae pe.

## Hebreos 4

### Tumpa uyapo yandewe yaputuu waerä añetete pewa

<sup>1</sup>Erëi Tumpa jei yandewe ime kërái rupi yaputuu waerä añetete pewa, jare jokua imeño oï añawe yandepuere yayekou waerä jese. Jáeramo yande reta ikawi ko yayandareko kawí waerä yandiyé, jukuärái opaete yande reta yandepuere waerä yaputuu añetete pewa. Awiye kía nunga awe jukuäráiño tupita toi.

<sup>2</sup>Echa'ä jukuärái uasa arakaete. Tumpa uikuaaka tõi yanderamikue reta pe jae reta ipuere uputuu añetete pewa iwi Canaán pe. Erëi jae reta uyekou'ä jese, echa'ä wírowia'ä reta jokua uyandu wae re. Jae ramiño wi Tumpa uikuaaka ma yandewe pëti ñee ikawi wae – jae ko yandepuere yaputuu waerä añetete pewa.

<sup>3</sup>Erëi jaeño yande kua ñee re yarowia wae reta yandepuere yayekou jokua re. Ìru wae reta ndarau ipuere uyekou jese, echa'ä Tumpa jei jokua wírowia mbae wae reta rewa kuärái: “Jáeramo che jae chepochi rewe: ‘Che ayapota tõi aiko jae reta uputuu waerä añetete pewa. Erëi añawe ndarau ayapo chupe reta,’ jae.” Jukuärái jei Tumpa. Tumpa uyapíkatu tõi kërái rupi jae reta uputuu waerä añetete rewe. Jare jokua uyeyapíkatu ma oï chupe reta Tumpa kua iwi opa uyapo wiwe.

<sup>4</sup>Jukuärái yande yaikuaa, echa'ä kua ko uyekuatía oï ara chiu rewa: “Tumpa opa uyapo opaete jembiape reta owa ara pe jare uparawiki'ä chiu ara pe.” Jukuärái jei.

<sup>5</sup>Jayawe Israel iñemoñaá reta ipuereta tõi uputuu añetete pewa, erëitu jae reta uyekou'ä jese. Yaecha yamingeta ye mbae Tumpa jei wae: “Che ayapota tõi aiko jae reta uputuu waerä añetete pewa. Erëi añawe ndarau ayapo chupe reta,” jei.

<sup>6</sup>Jayawe ¿mbae pa yaikuaa kua pe? Añawe imeño oï kërái rupi yaputuu waerä añetete pewa jare amokue wae reta uyekouta oï jese. Jukuärái wi ko Tumpa uikuaaka tõi yanderamikue reta pe. Erëitu jae reta uyekou'ä jese, echa'ä wírowia'ä reta Tumpa jei wae re ramo.

<sup>7</sup>Jayawe ima año ma uasa yawe, Tumpa uikuaaka ma yandewe imeño oï kërái rupi yaputuu waerä añetete pewa, jare kua ara etei yandepuere yayekou jokua re. Jukuärái Tumpa uikuaaka yandewe mburuwicha wasu David rupi jae uikuatía yawe kua opa ma yamingeta wae. Jae ko jokua yamingeta wae pe jei: “Kua ara chiñee piyandu yawe, awiye pepia pemitäta,” jei.

<sup>8</sup>Yande yaikuaa Josué uruike iwi Canaán pe jokua opa umano iwitini wasu rupi wae tai jare tayi reta. Erëi jae retawe uputuu'ä añetete pewa joko pe. Echa'ä añetete jae reta uyekou jese yawe, Tumpa ndarau jekuaeño uyemingeta tõi yandewe ñru ara mbutuu rewa.

<sup>9-10</sup>Jáeramo kërái Tumpa opa uyapo iparawiki chiu ara pe jare uputuu, jukuärái wi imeño oï kërái rupi Tumpa tai reta uputuu waerä añetete pewa. Jare jokua ko Tumpa uipota umee oï yandewe. Jare yande yaputuu ma yawe jukuärái añetete pewa, jayawe yaputuu ma ko yandeparawiki wi. Yaputuu ma ko Tumpa re kërái jae uipota wae rupi.

<sup>11</sup>Jáeramo ñañemiatangätuta ko yaputuu waerä añetete pewa, awiye waerä ñañererükumewa yanderamikue reta rami. Jae reta uñererükumewa, echa'ä uyapo'ä reta Tumpa jei wae ramo.

<sup>12</sup>Jayawe yayapisaka Tumpa iñee re, echa'ä iñee tekowe pewa ko yanemaerä jare ime onoi mbaepuere. Jare ikawiete ko pëti kispuku jaimbeyowai wi. Pëti kispuku ipuere uyasia yandewi ñanekäwe iyuapika rupi jare ipuere omondoo yandewi. Erëi Tumpa iñee imbaepuerete ko kispuku wi. Echa'ä Tumpa iñee uike yandepia pe jare uikuaaka yandewe yandepiyemingeta rewa ikawi ra oï ani ikawi'ä ra.

<sup>13</sup>Añetete mbaeti kiawe Tumpa uyapo wae ipuere uñemi chuwi, echa'ä Tumpa uecha jare uikuaa opaetei mbaembae. Jare jae jowai yayemboita ñai kuri yamimbeu waerä yandereko rewa.

### **Jesús ko jae yandesacerdote tenondewaete**

<sup>14</sup>Erëi yande ime ma ñanoi pëti sacerdote tenondewaete – jae ko Jesús, Tumpa Tai etei. Jae oo ma ara pe etei yandeRu Tumpa jowai jare joko pe jae uyerure oï yanderé. Jáeramo jekuaeñota ko yarowia kawi jese.

<sup>15</sup>Kua yandesacerdote tenondewaete umae yanderé yandeparareko rewe ñanepiräta'ä ñai yawe, echa'ä jae uikuaa kërái ko jokua ñanepiräta'ä wae. Echa'ä kua iwi pe iko rambuwe, ou Jesús pe opa kërái rupi uyawika waerä tëi chupe Tumpa koti wae yande rami. Erëi jae pëti wese awe uyawi'ä Tumpa koti.

<sup>16</sup>Jare jae tuicha ipiakawi yandewe. Jáeramo yaya mii Tumpa re yakie mbae rewe Tumpa yandeparareko waerä jare yanembori waerä jae ipiakawi rupi.

## **Hebreos 5**

<sup>1</sup>Opaete sacerdote tenondewaete reta uyeparawo ko kuimbae reta ipite wi uyapo waerä mbarawiki Tumpa pe kuimbae reta pewarä. Echa'ä ime yawe kía uyawi Tumpa koti wae, jare jokua re uipota umee mbaemimba uyuka wae jare ñru mbaembae reta Tumpa pe yawe, sacerdote tenondewaete wiraa chupe.

<sup>2</sup>Jare ime yawe kía uikuaa mbae rewe opia Tumpa jape wi wae, sacerdote tenondewaete ipuere ombori uiparareko rewe, echa'ä jae ko ipiräta mbae wae wi.

<sup>3</sup>Jare jokua jeko pewa jae imeta ko wiraa wi mbaemimba uyuka umee waerä Tumpa pe jaei mbaembae uyawi Tumpa koti wae re kërái ñru wae reta pewarä uyapo rami.

<sup>4</sup>Jare yanemandúa kawi ñai, arakaete rupi Aarón uyeparawo yawe Israel iñemoñaeta reta isacerdote tenondewaeterä, ¿kía pa uiparawo? Tumpa etei ko uiparawo. Jare jukuärái yaikuaa jaño Tumpa uiparawo wae ipuere iko sacerdote tenondewaeterä. Ndarau kía ipuere uyeparawo jaei.

<sup>5</sup>Jae ramiño wi Cristo mbaeti ko jaei uyembijee sacerdote tenondewaeterä. YandeRu Tumpa ko uiparawo jare umbutuicha jei chupe yawe: “Nde ko jae

cheRai. Kua ara etei aikuaaka ai opaete wae pe che ko jae ndeRu.” Jukuärái jei chupe.

<sup>6</sup>Jare Tumpa jei wi chupe kuärái: “Nde ndikota pëti sacerdote Melquisedec rami jaeño mái pewa,” jei chupe.

<sup>7</sup>Cristo kua iwi pe iko rambuewe, uyerure usapikai rewe jare jesai rewe yandeRu Tumpa pe jae uepi waerä mano wi. Jare Cristo uñemimichi rewe uyapo Tumpa jei wae ramo, Tumpa uyapisaka uyerure chupe wae re. Echa’ä umbijekowe ye ueru Cristo umanokue wae reta ipite wi.

<sup>8</sup>Yepe tēi Cristo ko jae Tumpa Tai etei, erēi jae etei wi uiporara wae rupi uyemboe uyapo waerä Tumpa jei wae.

<sup>9</sup>Jare Cristo opa uyapo yawe opaete yandeRu Tumpa jei chupe wae, jae uyeyapo tekowe opa mbae wae iYarä. Jare añawe Cristo umee tekowe opa mbae wae opaete kía kía jae jei wae uyapo wae reta pe.

<sup>10</sup>Jare Tumpa oñono wi Cristo sacerdote tenondewaeterä Melquisedec rami.

### **Jekuaeño ñañemimiräta Tumpa re**

<sup>11</sup>Kua rewa aipota tēi jeta mbaembae amimbeu pewe, erēi yawái chewe amiesäka kawi waerä pewe, echa’ä jarea’ä pikuaa ramo.

<sup>12</sup>Ima ma pe reta perowia tēi Cristo re, jare peporomboeta tēi ma ko kua mbaembae re. Erēi pepuere’ä, echa’ä jokua yemboe yawái mbae mii awe Tumpa rewa ndeiño pikuaa wi. Imeta ko ou kía pemboe piau ye. Añetete pe reta ko jae michi wae reta necheño jou wae rami.

<sup>13</sup>Echa’ä michi wae reta necheño jou wae ndeiño uikuaa mbae jupi wae rewa. Jare jukuärái rami ko pe reta wi.

<sup>14</sup>Erēi ukuakuaa ma Tumpa koti wae reta ima rupi uyemboe ma uikuaa waerä mbae ra ko jae ikawi wae jare ikawi mbae wae. Jae reta ko kía ipuere jou tembiu ipiräta wae rami, echa’ä ipuere uikuaa kawi reta yemboe yawái wae.

## **Hebreos 6**

<sup>1</sup>Jáeramo yasa mii ya tenonde yemboe Cristo rewa yawái mbae oi wae wi yakuakuaa kawi waerä Tumpa koti. Awiye jekuaeño yayemboe jokua tenonde yambipi yayemboe wae reño – jae ko kërái imeta ko yaeya yandepiyemingeta jupi mbae wae jare yarowia kawi waerä Tumpa re. Echa’ä tenonde yawe yarowiase tēi mbaembae yayapo wae rupi ko yandepuere ñanoi tekowe opa mbae wae.

<sup>2</sup>Jare jae nunga wi yasa mii ya tenonde jokua yemboe yembisakambu rewa wi, jare jokua yemboe yandetenondewa reta ipo oñono yanderé wae wi, jare jae nunga wi jokua yemboe umanokue wae reta ikowe yeta wae rewa wi, jare kërái opaete wae yayemboita ñai Tumpa jowai jae umiñatima waerä yandewe jaeño mái pewa mbaembae yayapo wae re.

<sup>3</sup>Añawe yasa mii ya kua yemboe reta wi jare ya tenonde. Jare jukuärái yayapota Tumpa jei yawe.

<sup>4-6</sup>Ikawi'ä ko jekuaeño yapita waerä jukuäraino. Kía jaeramo wirowia Cristo re yawe, Tumpa umbiembipe ma ipia pe, jare jae umbipi ma uyekou mbaembae ara pewa re. Jae nunga wi uñemiiru ma oï Espiritu Santo ndiwe. Jare umbipi ma uyekou oï Tumpa iñee ikawi wae re jare Tumpa imbaepuere mburuwicha wasu pewa outa oï wae re. Kua ikawi ko. Erëi kua nunga uyerowa ye yawe kua mbaembae jupi wae wi, jayawe ndaraüi ma ipuere uyembipiauka ye tenonde rami jare ipuereta'ä ma umbiambie ipiyemingeta Cristo koti. Echa'ä jae uikutuka ye Cristo kurusu re rami ko, jare uyapo oï iru wae reta upuka waerä Cristo re.

<sup>7</sup>Kua re yandepuere yambijaanga pëti iwi ama okiñoi jese wae re. Jokua iwi iruru kawi yawe, temiti jeñi kawita jukuärái iwi iya ipuere uyekou waerä jese. Añetete Tumpa uyapo ma ikawi wae jokua iwi pe.

<sup>8</sup>Erëi jokua iwi pe jeñi yawe ñuräti katuii, jokua iwi ikawi'ä etei ma ko maeräwe, jare Tumpa koiño ma oï uyepipeyu waerä jese. Jaeño ma oï jokua iwi opa okai waerä.

<sup>9</sup>Erëi cheiru puau mii wae reta, yepe tëi chemiäri ma pewe kuärái, erëi che arowia katu pe reta ko jae jokua iwi ikawi wae rami. Jare arowia katu ai wi uyekuaata oï peré penoi ma ko tekowe opa mbae wae kërái mbaembae piyapo wae rupi.

<sup>10</sup>Echa'ä Tumpa jupi wae ko. Jare jae ndarau etei iñakañi oï jokua mbaembae piyapo chupe wae wi jare kërái jeta ma pembori iru hermano Cristo re wirowia wae reta. Echa'ä pembori yawe iru hermano reta, jukuärái uyekuaata peau ko pei Tumpa, jare jae ndarau iñakañi oï jokua wi.

<sup>11</sup>Jare che aipota pe reta jekuaeño peratangätu kua mbaembae piyapo waerä perekowe opa rewa, jare penoi rewa opaete mbaembae ikawi wae añawe peäro pei wae.

<sup>12</sup>Jeta wae reta Tumpa re wirowia wae jukuärái uyapo reta. Ima rupi uäro reta ipiawasu rewe jare wirowia katu rewe jokua mbaembae ikawi wae Tumpa jei umeeta oï yandewe wae. Jare añawe jae reta uyekou ma ñonoï jese. Jare che aipota pe reta piko waerä wi jae reta arakaete yureko wae rami. Awiyeta ko peaki Tumpa koti.

### **Yandepuere yarowia katu Tumpa uyapo waerä jae jei wae**

<sup>13-14</sup>Mase, yanemandúa kawi ñai mbae uasa Abraham pe wae. Tumpa jei chupe: “Che etei tae ndewe ayapota ikawi wae ndewe chiñee rupi, jare ambijetaeteta niñemoñaeta, ”jei chupe. Tumpa jei'ä chupe, “Che tae ndewe Tumpa jowake,” echa'ä jae etei ko Tumpa jare mbaeti ye kía imbaepuerete chuwi wae. Jaeño jei chupe: “Che etei tae ndewe.”

<sup>15</sup>Jayawe Abraham ima ma uäro yawe ipiawasu rewe, uyekou jokua Tumpa jei umeeta chupe wae re.

<sup>16</sup>Yaikuaa kawi ñaï kía jei yawe japicha pe uyapo waerä chupe mbae, jae jei chupe: “Che tae ndewe Tumpa jowake.” Jukuärái jae jei japicha wírowia katu waerä uyapota ko, jare jokua re opaete wae uyapisaka ñonoï. Mbaeti mbae re uyeaka ñonoï waerä.

<sup>17</sup>Jae ramiño wi Tumpa uipota uikuaaka iko yandewe ime mbaembae ikawi wae jae uyapota oï yandewe wae. Jare jae uipota yande yaikuaa waerä ipiayemingeta ndarau uyepepika. Jáeramo jae jei yandewe: “Che etei tae pewe.”

<sup>18</sup>Jukuärái Tumpa jei jare jae iyapu’ä etei ko. Jáeramo yandepuere yarowia katu Tumpa uyapo waerä jokua jae jei yandewe wae. Jayawe yande reta Tumpa re ñañepiro ñaï wae, kua mbaembae ñanemiatangätuete jekuaeño ñaäro waerä yarowia katu rewe Tumpa jei wae opaetei.

<sup>19-20</sup>Jokua mbae ikawi wae Tumpa jei uyapota yandewe wae, jae ko pëti chalana iyepitasoka rami yanemaerä. Echa’ä yanembori awiye waerä yapia Tumpa wi. Jare yande yayeko ñaï wi Jesucristo re. Jae rani ma oo tenonde yandewe Tumpa oï wae pe uyerure waerä yanderé. Echa’ä jae ko yandesacerdote tenondewaete Melquisedec rami jaeño máï pewa.

## Hebreos 7

### Jesús ko jae sacerdote Melquisedec rami

<sup>1</sup>Kua kuimbae Melquisedec arakaete iko tëta wasu Salem imburuwicha wasurä. Jare jae iko wi pëti sacerdote uyeyokui waerä Tumpa imbaepuere tuichaete wae pe. Yanemandúa ñaï, pëti wese Abraham opa umiamiri yawe amokue mburuwicha wasu jare isindaro reta, jare jae ou ye iko yawe ñeräro wi, Melquisedec oo owäiti Abraham jare jei pëti ñee ikawi wae chupe kuärái: “Tumpa tuyapo ikawi wae ndewe,” jei chupe.

<sup>2</sup>Jayawe Abraham opaete mbaembae upiro jowaicho reta wi wae, jokua wi umee diezmo Melquisedec pe. Jokua tee Melquisedec uipota jei “mburuwicha wasu jupi wae.” Jare jae iko tëta wasu Salem imburuwicha wasurä ramo, jae jee wi “mburuwicha wasu umbipiakatu wae.” Echa’ä tee Salem uipota jei “ipiakatu wae.”

<sup>3</sup>Kua kuimbae Melquisedec, yaikuaa’ä kía ra jae tu jare ichi wae. Yaikuaa’ä wi kía iñemoña pewa reta ra ko jae wae. Jare yaikuaa’ä wi kërái yawe ra oa, jare kërái yawe ra umano wae. Jáeramo Melquisedec yandepuere yambijaanga Tumpa Tai re, echa’ä jae ko pëti sacerdote ikoño máï iko wae rami.

<sup>4</sup>Mase, kërái etei ko kua kuimbae Melquisedec pëti mburuwicha wasu imbaepuerete wae. Echa’ä yanderamikue Abraham etei umee chupe opaete mbaembae upiro jowaicho reta wi wae diezmo.

<sup>5</sup>Kua ambie ye ko. Echa’ä Tumpa arakae jei jaeño uñemeeta ko diezmo Abraham jumimino yuapi ye Leví jee wae iñemoña reta peño. Jae reta ko jae opaete Abraham iñemoña isacerdote reta, jare chupe retaño ko jëtara reta umee diezmo.

<sup>6</sup>Erëi kua Melquisedec, yepe tēi jae'ä ko Leví ñemoñaaw pewa, erëi Abraham umee chupe diezmo. Jae nunga wi yaikuaa Tumpa jei pēti ñee ikawi wae Abraham pe kuärái: “Tayapo ndewe mbaembae ikawi wae,” jei chupe. Jáeramo Abraham ko jae pēti kuimbae imbaepuerete wae. Erëitu kua pe yaecha kërái Melquisedec jei chupe: “Tumpa tuyapo ikawi wae ndewe.”<sup>7</sup>Jare opaete yande judío yaiko wae reta yaikuaa kawi ko kía jukuärái jei japicha pe wae, jae ko imbaepuerete chuwi wae. Jayawe kua uikuaaka yandewe Melquisedec imbaepuerete ko Abraham wi.

<sup>8</sup>Jare kua pe ime ye mbae re yayemingeta waerä yandepia pe. Jokua Leví ñemoñaaw pewa reta, jae ko kuimbae reta imbaepuere wae, echa'ä uñemee chupe reta diezmo. Jesewe jae reta ko kuimbae umano ñotái ñonoí reta wae. Erëi Melquisedec umano mbae echa ko, echa'ä yandepuere'ä ñawäe Tumpa ñeeriru pe kiaepe jei jae imano rewa.

<sup>9</sup>Jare jokuaño'ä ko. Yepe tēi Leví ñemoñaaw reta pe uñemee diezmo, erëitu jae reta etei umee diezmo Melquisedec pe wae echa tamikue Abraham rupi.

<sup>10</sup>Echa'ä Melquisedec oo owäiti Abraham yawe, Leví ndeiño uyekuaa. Jare Abraham ko jae Leví tamirä ikota ramo, yandepuere yae Leví ime ma Abraham jete pe iko wae echa. Jayawe Abraham umee yawe diezmo Melquisedec pe, Leví wi umee chupe wae echa Abraham rupi. Jare kua uikuaaka yandewe Melquisedec imbaepuere tuichaete ko Leví imbaepuere wi.

<sup>11</sup>Añetete ko, yepe tēi Tumpa arakae jei Leví ñemoñaaw reta tuñeño tee sacerdote retarä, erëitu jae reta ipuere'ä opa umbái teko Tumpa koti ñanoi wae. Jáeramo ikawi ko ime waerä ñru sacerdote ambie ye chuwi reta wae – pēti sacerdote Melquisedec rami – mbaetita ko Leví jare Aarón rami.

<sup>12</sup>Erëi jokua uyeyapo waerä, Tumpa imeta ko jei piau ye mbae jokua tenonde yawe jei wae ipepika pe. Echa'ä tenonde yawe jei jaeño Leví ñemoñaaw reta tuiko sacerdote retarä.

<sup>13-14</sup>Erëi añawe kua ñru sacerdote yae chupe wae uyekuaa ma – jae ko yandeYa etei. Jare yaikuaa yandeYa jae'ä ko Leví ñemoñaaw pewa. Jae ko Judá ñemoñaaw pewa. Jare Moisés uikuatía yawe sacerdote reta rewa, jae jei'ä mbae awe Judá ñemoñaaw reta rewa. Jokua jeko pewa añawe rewa pēti awe Judá ñemoñaaw reta iko'ä ma sacerdote tupao wasu pe.

<sup>15</sup>Jayawe yandepuere yaikuaa kawi sacerdote reta Leví ñemoñaaw pewa mbae'ä ma ko añawe. Echa'ä uyekuaa ma ambie sacerdote Melquisedec rami.

<sup>16</sup>Jare jae mbaeti ko sacerdote pēti ñemoñaaw rupi kërái Tumpa tenonde yawe jei wae rami. Jae ko sacerdote, imbaepuere tuichaete ramo. Echa'ä jae ime onoi tekowe ndarau etei opa wae.

<sup>17</sup>Jukuärái jei Tumpa ñeeriru pe, echa'ä joko pe uyekuatía oí mbae Tumpa jei chupe wae kuärái: “Nde ndikota pēti sacerdote Melquisedec rami jaeño mái pewa.” Jukuärái uyekuatía oí Jesucristo re.

**18-19** Jayawe Tumpa arakae jei sacerdote reta rewa wae usiriwe'ä, echa'ä ipuere'ä umbujupi kiawe Tumpa koti. Jáeramo jokua jae jei wae uasa ma. Añawe Tumpa uyapo ma yandewe mbae ipiau wae jare ikawiete wae kërái rupi yandepuere waerä yaya jese.

**20-21** Jare Tumpa uikuaaka kawi ma yandewe yandepuere yarowia katu jokua re, echa'ä jae oñono yawe Cristo sacerdoterä iko waerä, jae jei chupe kuärái: “Nde ndikota pëti sacerdote Melquisedec rami jaeño mái pewa. Jukuärái che jae, jare jokua che jae wae ndarau etei aipepika.” Jukuärái jei chupe. Erëi Tumpa jei'ä jukuärái pëti wese awe Leví ñemoñaeta reta pe jae reta uyeyapo sacerdoterä yawe.

**22** Jayawe Jesús ko jae yandesacerdote imeño mái iko wae. Jare kua ikawiete ko yanemaerä, echa'ä Tumpa uyapo pëti yemingeta ipiau wae yande ndiwe. Jae ko yemingeta ikawiete wae jokua jae uyapo arakae yanderamikue reta ndiwe wae wi. Jare yandepuere yaikuaa kawi yayekouta ko ñai jokua yemingeta ipiau wae re, echa'ä Jesús jaeño mái yandepipika pe oï ramo.

**23** Kua pe ime ye mbae re yayemingeta waerä yandepia pe. Sacerdote Leví ñemoñaeta pewa reta jeta ma ko, echa'ä jae reta pëti pëti opa indechi jare umano reta. Jare umano yawe, ambie wae uike ipepika pe uyapo waerä iparawiki.

**24** Erëi Jesús imeño mái iko ramo, ipuere uyapo iparawiki sacerdote pewa jaeño mái pewa.

**25** Jáeramo ime yawe kía uipota iko Tumpa ndiwe wae jare wirowia ma Jesús re wae, Jesús ipuerete uepi jaeño mái pewa. Echa'ä Jesús ikoño mái uyerure waerä Tumpa pe ombori reta waerä.

**26** Kua nunga sacerdote tenondewaete ikawi ko yandewe. Echa'ä jae ko jupi wae, jare jeko mbae wae, jare ikia mbae Tumpa koti wae. Añetete Jesús mbaeti etei ko Tumpa koti uyawi wae reta rami. Jáeramo Tumpa oñono Jesús iwapika iwate opaete ara pe oï wae reta wi.

**27-28** Jae'ä ko ñru sacerdote tenondewaete reta kua iwi pewa rami. Echa'ä yepe tēi jae reta ko sacerdote reta Tumpa arakae jei wae rupi, erëi uyawiñoi reta Tumpa koti. Jáeramo jae reta opa ara rupi imeta ko wiraa mbaemimba uyuka umee waerä Tumpa pe. Tenonde umee reta jae reta mbaembae uyawi Tumpa koti wae rei, jare joko wi umee reta ñru wae reta mbaembae uyawi wae re. Erëi añawe Tumpa oñono ma jaeño mái pewa Tai sacerdote tenondewaeterä oï waerä, jare jukuärái opa ma umbiyapi jokua jae tenonde yawe jei sacerdote reta rewa wae. Tai pëti weseño uñemee umano waerä yanderé opa umbái waerä yandewi mbaembae yayawi Tumpa koti wae jaeño mái pewa. Jukuärái ko Tai pëti weseño jaeño mái pewa opa uyapo opaete Tu uipota jae uyapo waerä wae.

## Hebreos 8

### Jesús jare yemingeta ipiau wae



- <sup>1</sup>Opaete kua che jae ma pewe wae, jae ko kua: Jokua nunga sacerdote tenondewaete ikawi wae, yande ime ma ko ñanoi. Jae uwapi oï ara pe yandeRu Tumpa iyakata koti.
- <sup>2</sup>Joko pe oï wi pëti yembiadorarenda jaete wae Tumpa etei uyapo wae. Jokua mbaeti ko kuimbae reta uyapo wae. Jare joko pe Jesús uyapo oï iparawiki sacerdote pewa yanemaerä.
- <sup>3</sup>Opaete sacerdote tenondewaete reta iparawiki ko umee waerä Tumpa pe mbaembae ikawi wae reta jare mbaemimba uyuka reta wae. Jare jukuärái wi Jesucristo imeta ko umee mbae.
- <sup>4</sup>Erëi jae mbaeti uyapo oï iparawiki sacerdote pewa kua iwi pe. Echa'ä jae kua iwi peño iko yawe, ndarau iko tëi yandewe sacerdoterä. Echa'ä kua iwi pe ime ma ñonoï sacerdote reta. Jare jae reta umee ñonoï Tumpa pe mbaembae kërái Tumpa arakae jei wae rupi.
- <sup>5</sup>Erëi jae reta mbarawiki uyapo wae pëti yembijaangaño ko mbaembae ara pe oï wae re. Jukuärái yaikuaa, echa'ä yanemandúa kawi ñaï Tumpa jei yawe arakae Moisés pe uyapo waerä tupao, jei chupe kuärái: “Che aechaka ma ndewe iwitu wasu re ndiko rambuwe kërái ndiyapoka waerä tupao. Añawe iyapoka kawi opaete che aechaka ndewe wae rupi etei.” Jukuärái jei chupe.
- <sup>6</sup>Erëi añawe jokua mbarawiki Tumpa umee Jesús pe wae ikawiete ko ipotawe sacerdote iparawiki kua iwi pewa wi. Echa'ä Jesús rupi Tumpa uyapo pëti yemingeta ipiau wae yande ndiwe. Jare kua yemingeta ikawiete ko jokua yemingeta arakae uyapo reta wae wi. Echa'ä mbaembae añawe Tumpa jei umeeta oï yandewe wae ikawiete ko.
- <sup>7-8</sup>Jokua yemingeta arakae uyapo reta wae uata iko, echa'ä jae reta jokua pipe ipuere'ä uyembujupi Tumpa koti, jare Tumpa imeño uwäe teko jese reta. Jáeramo ikawi iko uyeyapo waerä pëti yemingeta ipiau wae. Jukuärái jei Tumpa jae jei yawe kuärái: “Mase, uwäeta oï ara ayapo waerä pëti yemingeta ipiau wae Israel iñemoñaeta reta ndiwe jare Judá iñemoñaeta reta ndiwe wi.
- <sup>9</sup>Kua mbaetita ko jokua yemingeta ayapo tamikue reta ndiwe wae rami, jokua ara che opa anoe aru reta yawe iwi Egipto wi. Echa'ä jae reta uyapo'ä jokua upita tëi uyapo reta waerä wae. Jáeramo che opa aeya reta.
- <sup>10</sup>Erëitu taikuate rupi ayapota aï pëti yemingeta ipiau wae Israel iñemoñaeta reta ndiwe. Jae ko kua: Che añonota aï chiñee jae reta ipia pe, jare jukuärái jae reta opata uikuaa kawi. Che aikota jae reta iTumparä jare jae reta yurekota chemaerä.
- <sup>11</sup>Jare ndarau ye ma ime kía omboe japicha wae jare jëtara wae chekuaa waerä. Ndarau ye ma ime kía jei ïru pe uyemboe waerä cheré. Echa'ä opaete wae – iparawete wae reta wiwe jare mburuwicha retawe – chekuaata ñonoï.

<sup>12</sup>Echa'ä che amaeta jese reta aiparareko rewe. Ambaita chuwi reta mbaembae uyawi reta chekoti wae jare ndarau ye ma chemandúa jese." Jukuärái jei Tumpa.

<sup>13</sup>Tumpa jei yawe, "Ayapota äi pëti yemingeta ipiau wae Israel inemoñaeta reta ndiwe," jei yawe, jokua uikuaaka oï yandewe jokua yemingeta tenonde uyapo reta wae indechi ma ko jare uasa ma. Jare yande yaikuaa kawi kërái mbae indechi wae ukañi ma ko oï.

## Hebreos 9

<sup>1</sup>Jayawe jokua yemingeta arakae uyapo reta wae uikuaaka yanderamikue reta pe kërái umbutuicha reta waerä Tumpa jee, jare kërái uyapo iyupe reta waerä kiaepe Tumpa jee umbutuicha reta waerä.

<sup>2</sup>Jáeramo jae reta uyapikatu tupao mokui o onoi wae. Tupao joo tenondewa wae jee o jupi wae. Joko pe iko mechero ikawiete wae oro pewa jare mbaerenda. Jokua mbaerenda re oñono reta mbiyape uñeño tee Tumpa pewarä wae.

<sup>3</sup>Jare pëti puyu o umbiyao pipe wae japipe koti ime iko ñru o rai – jae ko o jupiete ye jee wae.

<sup>4</sup>Joko pe iko mbaerenda oro pewa mbae utimbo kawi wae sacerdote reta uapi jese wae, jare Tumpa arakae jei wae yemimandúa jiru. Jokua jiru iwira pewa ko, erëi opaete ikupe rupi iko oro yepái. Jare jiru japipe ime iko mbapi mbaembae: Pëti wae ko jae yapepo oro pewa maná oï pipe wae. Ñru wae ko jae Aarón ipopoka joki wae. Jare taikuewaete ko jae mokui ita ipe kawi wae – jae ko jokua ita jese Tumpa uikuatía kërái jae reta yurekota ko jokua yemingeta rupi wae.

<sup>5</sup>Jare jokua jiru iyapeteka iáramo yureko mokui araiwa reta echa rami ikawiete wae kerubín jee wae reta. Jae reta umbiyasoï jiru iyapeteka iáramo ipepo pe, kiaepe Tumpa uechaka Israel inemoñaeta reta pe uiparareko reta wae. Imeño oï tõi kua reta re jekuaeño yayemingeta waerä tõi jese. Erëi jae'ä ko kua aipota yayemboe jese waerä añawe.

<sup>6</sup>Jayawe opaete kua mbaembae uyeyapikatu kawi ma yawe, sacerdote reta opa ara rupi uike tupao joo tenondewa wae pe uyapo reta waerä iparawiki.

<sup>7</sup>Erëi o jupiete ye wae pe sacerdote tenondewaeteño ipuere uike pëti weseño año pe. Jare jae uike yawe, imeta ko uruïke mbaemimba uyeyukakue wae juwi upiyere waerä Tumpa jowai. Jukuärái uyapo awiye waerä Tumpa uiporaraka chupe reta jae mbaembae uyawi Tumpa koti wae rei jare Israel inemoñaeta reta mbaembae uyawi uikuaa mbae rewe wae re.

<sup>8</sup>Opaete kua mbaembae rupi Espíritu Santo uikuaaka iko chupe reta kua: jokua tupao tenondewa imeño iko rambuewe, tape Tumpa pe oo wae ndeño uyepea iko opaete wae reta pewarä.

<sup>9-10</sup>Jare jokua ko jae pëti yembijaanga yanemaerä añawe wi, jare jokua uikuaaka yandewe kuärái: ndarau kía ipuere opa ipiyoye Tumpa koti mbaembae wiraa umee

Tumpa pe wae rupi. Jukuärái jeta wae reta uipota tēi uyapo. Echa'ä wiraa reta mbaemimba uyuka umee waerä Tumpa pe. Jae nunga wi ime amokue tembiu jae reta jou'ä wae. Jare opa kērái rái rupi uyeyoe reta wi. Añetete, opaño kērái rái uyapo reta umbutuicha waerä Tumpa jee. Erēi opaete kua mbaembae, jae ko mbaembae uyekuaa waeño jare ipuere'ä oyoe kiawe ipia Tumpa koti. Ipia imeño umbijeko oï mbaembae kachi uyapo wae re. Erēi yande judío reta yaiko wae imeta ko yayapo yaiko kua mbaembae tenonde yawe, Tumpa uyapo ye rewa mbae ipiau wae yanemaerä.

### **Jesucristo umano opa umbái waerä teko ñanoi Tumpa koti wae**

**11**Erēi añawe Cristo uyeyapo ma yandesacerdote tenondewaeterä. Jare añawe jae uyapo wae rupi yandepuere yayekou mbaembae ikawiete wae re. Echa'ä jae uike ma yandepipika pe pēti tupao ikawiete ye ara pe oï wae pe. Jokua tupao mbaeti uyapo kuimbae reta jare kua iwi pewa'ä ko.

**12**Jare jae uike yawe jokua tupao joo jupiete ye wae pe, jae uike pēti weseño jaeño mái pewa. Jare uruikē'ä kapura juwi ani toro taurusu wae juwi. Jae uruikē jae juwi etei, jare jukuärái opa umbiepi jaeño mái pewa mbaembae yayawi Tumpa koti wae.

**13**Yande judío yaiko wae reta yaikuaa kawi ñai kía uyemingia ma Tumpa koti wae ipuere'ä oo umbutuicha Tumpa jee tupao wasu pe jukuärái oï rewe. Jáeramo sacerdote reta uipi jokua kuimbae kapura juwi pe, ani toro juwi pe, ani waka taurusukue opa okai wae itanimbukue ndiwe i uyea wae pipe. Jare jukuärái uyapo ma yawe, jokua ikia iko Tumpa koti wae uyeyoe rami ma iko, jare jukuärái ipuere oo umbutuicha ye Tumpa jee tupao wasu pe.

**14**Erēi Cristo juwi ikawiete ye ko mbaemimba reta juwi wi. Echa'ä mbaemimba juwi jare ipotawe ñru mbae uyapo reta tēi wae ipuere'ä yandepiayoe añetete rewe. Erēi Jesucristo juwi opa oyoe yandepia yanembijekose wae wi, jukuärái yandepuere waerä yayeyokui Tumpa ikoño mái wae pe. Echa'ä Cristo jeko mbaei ko jare ñemee umano waerä yanderé Espíritu Santo ikoño mái wae imbaepuere rupi.

**15**Jare Cristo kua uyapo ramo, jae ipo pe ma oï uyeyapo kawi waerä yemingeta ipiau wae Tumpa uyapo oï yande ndiwe wae. Jokua ñru yemingeta arakae uyapo reta wae ipuere'ä yanembori. Echa'ä jokua yemingeta ime wireko mbaepuere yanderé yawe, yayawiñoi Tumpa koti. Jare jokua teko Tumpa koti yareko wae ñaneapiti iko rami ko. Erēi añawe Cristo umano ma yanderé opa umbiepi waerä mbaembae yayawi wae, jare jukuärái opa ma yandeyora jokua teko wi. Jáeramo añawe yande jae ñanereni wae reta yandepuere ñanoi yanemaerä opa mbaembae ikawi wae Tumpa jei umeeta oï yandewe wae jaeño mái pewa.

**16**Erēi añetete kua uyeyapo waerä, imeta ko Cristo umano rani. Echa'ä yaikuaa kawi ñai amo pe kua iwi pe ime amokue tu reta upita umee waerä tai reta pe imbaembae umano ma yawe.

**17**Jare jukuärái yawe, jae reta ndarau tu imbaembae uipisi iyupe tu imeño iko rambuwe. Jare tu umano yawe ramo tai reta ipuere onoi imaerä tu imbaembaekue.

<sup>18</sup>Jae ramiño wi jokua yemingeta arakae Tumpa uyapo yanderamikue reta ndiwe wae uyeyapo waerä imeta ko oï mano rani. Imeta ko tuwi uyepiyere wae.

<sup>19</sup>Yanemandúa kawi ñai, Moisés opa ma umimbeu yawe Israel inemoñaeta reta pe mbaembae Tumpa jei chupe reta wae, jae uyuka waka taurusu wae jare kapura, jare upiyere juwi. Joko wi uipisi pëti ñana mii hisopo jee wae jare owecharawe uñemipita wae, jare umäki tuwi pipe jare i pe. Jare jokua pipe Moisés uipi tupapire Tumpa jei wae uyekuatia pipe wae jare opaete Israel inemoñaeta reta wi

<sup>20</sup>jei rewe: “Kua tuwi pipe upita kawi ma oï kua yemingeta Tumpa uyapo pe reta ndiwe wae. Jare pe reta imeta ko opa piyapo kawi.” Jukuärái Moisés jei chupe reta.

<sup>21</sup>Jae ramiño wi Moisés uipi tuwi pe tupao jare opaete sacerdote reta jembiporu reta wi.

<sup>22</sup>Echa’ä Tumpa arakae jei wae rupi opaete seri uyeyoe oï Tumpa koti tuwi pe. Jare mbaeti tuwi uyepiyere yawe, Tumpa ndarau etei umbái mbaembae yayawi ikoti wae.

<sup>23</sup>Kua pe ikawi yanemandúa waerä kua re: Jokua tupao iwi pewa jare opaete mbaembae japipe oï wae, tupao ara pewa jaanga retaño ko. Jare jokua mbaembae imeta ko uyeripika mbaemimba juwi pipe uyeyoe waerä Tumpa koti. Erëi tupao ara pewa ikawiete ramo, imeta ko uyeyoe Tumpa koti mbae ikawiete wae pipe.

<sup>24</sup>Echa’ä jokua tupao mbaeti ko tupao kua iwi pewa kuimbae reta uyapo wae, jare jae’ä ko jaanga wi. Jokua tupao ara pewa etei ko. Jare joko pe ko Cristo uike Tumpa oï wae pe etei uyerure waerä yanderé.

<sup>25</sup>Jare Cristo mbaeti uyapo kërái sacerdote tenondewaete kua iwi pewa uyapo wae rami. Echa’ä sacerdote tenondewaete kua iwi pewa opa año rupi uruika mbaemimba juwi tupao joo jupiete ye wae pe. Erëi Cristo mbaeti uñemee jeta wese umano waerä.

<sup>26</sup>Jukuärái yawe, jayawe iwi uyeyapo wiwe jeta wese Cristo umanota tēi. Erëi añawe kua ara taikuewa rupi jae uñemee umano waerä pëti weseño jaeño mái pewa opa umbái waerä mbaembae yayawi Tumpa koti wae.

<sup>27</sup>Opaete yande kua iwi pewa reta, pëti weseño ñamanota ñai, jare jaikue rupi yayemboita ñai kuri Tumpa jowai jae umiñatima waerä yandewe mbaembae yayapo wae re.

<sup>28</sup>Jare jukuärái wi Cristo pëti weseño uñemee umano waerä jeta wae reta re mbaembae jae reta uyawi Tumpa koti wae opa umbái waerä. Jare jae ou yeta oï, erëi mbaetita ma ou umbiepi ye waerä mbaembae yayawi wae. Jae ou yeta oï umee waerä tekowe opa mbae wae opaete kía uäro ñonoï wae reta pe.

## Hebreos 10

**Jesús umano pëti weseño jaeño mái pewa yanderé**

- <sup>1</sup>Tumpa arakae uikuaaka yanderamikue judío reta pe iñee, jare Moisés uikuatía kawi. Erëi jokua ñee jaeño umbijaanga yandewe mbaembae ikawi wae Tumpa uyapota iko wae re. Jae'ä ko jokua mbaembae etei. Jokua ñee pe jei ime yawe kía uipota oya Tumpa re wae, turaa mbaemimba tuyuka tumee Tumpa pe. Jare jekuaeño jukuärái tuyapo opa año rupi. Erëitu jokua ndarau etei ipuere umbái chuwi mbaembae uyawi Tumpa koti wae.
- <sup>2</sup>Echa'ä jukuärái yawe moná, jayawe awiyeta tēi ma jekuaeño wíraa reta mbaemimba Tumpa pe. Echa'ä ndarau tēi ma ipia umbijeko reta mbaembae Tumpa koti uyawi reta wae re.
- <sup>3</sup>Erëi jokua mbaemimba reta uñemee Tumpa pe wae, jaeño ko pēti yemimandúa año año rupi jokua teko onoi reta Tumpa koti wae re.
- <sup>4</sup>Ndarau etei toro juwi jare kapura juwi ipuere opa umbái teko ñanoi wae.
- <sup>5</sup>Jokua jeko pewa ko Cristo ou yawe kua iwi pe, jei Tumpa pe kuärái: “Nde ndipota'ä mbaemimba uyeyukakue reta jare mbaembae ikawi wae reta uñemee ndewe waerä. Jáeramo nde neme che chere amee waerä mbaembae ndekoti uyawi reta wae re.
- <sup>6</sup>Jare nde ndiyerowia'ä mbaemimba uyeyukakue opa okai wae reta re jare ñru mbaembae uñemee mbaembae uyawi reta re wae.
- <sup>7</sup>Jayawe che jae ndewe: ‘Mase cheRu Tumpa, ko ai ayapo waerä nde ndipota wae kërái uyekuatía oï che rewa niñeeriru pe,’ jae.”
- <sup>8</sup>Kua pe tenonde Cristo jei kërái Tumpa uipota'ä mbaemimba uyeyukakue reta jare mbaembae ikawi wae uñemee chupe wae reta. Jare uipota'ä wi mbaemimba uyeyukakue opa okai wae reta jare ñru mbaembae uñemee mbaembae uyawi reta re wae. Yepe tēi Tumpa arakae jei opaete jokua mbaembae reta uñemee waerä, erëi Cristo jei añetete Tumpa uipota'ä.
- <sup>9</sup>Jare jaikue rupi jei: “Mase cheRu Tumpa, ko ai ayapo waerä nde ndipota wae,” jei. Jukuärái yaikuaa Cristo opa ma umbiyapi mbaemimba uyeyukakue uñemee wae. Jare jokua ipepika pe jae uyapo mbae ipiau wae.
- <sup>10</sup>Jare añawe kua mbae ipiau wae rupi Tumpa ñaneño tee jae imaerä Jesucristo uyapo yandewe wae rupi. Echa'ä Cristo uñemee umano waerä pēti weseño jaeño mái pewa yanderé.
- <sup>11</sup>Opa ara rupi sacerdote reta kua iwi pewa uparawiki tupao wasu pe jare jekuaeño umee ñonoï Tumpa pe mbaemimba uyuka reta wae. Erëi jokua ipuere'ä opa umbái mbaembae yayawi Tumpa koti wae.
- <sup>12</sup>Erëi yandesacerdote tenondewaete wae, Cristo, jae umee jekowe pēti weseño jaeño mái pewa mbaembae yayawi wae opa umbái waerä. Jare jokua jaikue rupi jae oo uwapi yandeRu Tumpa iyakata koti onoi waerä mbaepuere jae ndiwe.

<sup>13</sup>Jare jae oo uwapi wiwe, jekuaño uäro oï Tumpa opa oñonoka rewa Cristo jowaicho reta itawa re jae jowai.

<sup>14</sup>Jukuärái ko Cristo pëti weseño umee jekowe yanderé. Jare jukuärái jae opa yanembujupi kawi Tumpa koti jaeño mái pewa opaete yande Tumpa pewarä jekuaño ñaneño tee oï wae reta.

<sup>15</sup>Jae nunga wi Espiritu Santo jukuäraiete uikuaaka yandewe Tumpa iñeeriru pe. Echa'ä joko pe uyekuatía oï jae jei wae kuärái:

<sup>16</sup>“Che ko jae Tumpa aikoño mái wae. Jare che tae kuärái: Taikuete rupi ayapota ai pëti yemingeta ipiau wae Israel iñemoñaeta reta ndiwe. Jae ko kua: che añonota ai chiñee jae reta ipia pe jare jukuärái jae reta opata uikuaa kawi.” Jukuärái jei.

<sup>17</sup>Jare jaikue rupi jei wi kuärái: “Ndarau ye chemandúa chupe reta mbaembae uyawi reta chekoti wae re jare mbae ikawi mbae uyapo reta wae re.” Jukuärái jei Tumpa.

<sup>18</sup>Jayawe jokua mbaembae opa ma uyembái yandewi ramo, mbaeti ye ma mbae ñamee waerä mbaembae yayawi Tumpa koti wae re.

### **Yaya Tumpa re yandepiawiwe rewe**

<sup>19-20</sup>Jáeramo hermano mii reta, añawe yandepuere yaya Tumpa re yandepiawiwe rewe. Echa'ä Jesús umano yanderé jare juwi upiyere yanemaerä, jare jukuärái uyapo ma yandewe pëti tape ipiau wae Tumpa pe oo wae. Pemandúa kawi peï, tupao wasu pe ime pëti puyu o umbiyao pipe wae awiye waerä kiawe uike o jupiete ye wae pe Tumpa iko wae pe. Erëi añawe Cristo imano rupi jokua o umbiyao wae uipea ma yandewe rami ko.

<sup>21</sup>Jae nunga wi añawe Cristo ko jae yandesacerdote tenondewaete opaete yande Tumpa jëtararä ñai wae reta.

<sup>22</sup>Cristo opa ma yandepia oyoe awiye waerä yandepia jekuaño yanembijeko mbaembae kachi yayapo wae re. Jare kërái sacerdote reta jete oyoe ipuere waerä uyeyokui Tumpa pe rami, jukuärái wi Cristo opa yandepiayoe Tumpa koti i jesäka kawi wae pe rami ko. Jáeramo Cristo opa ma uyapo yandewe kua mbaembae reta ramo, yaya mii Tumpa re yandepia añetete rewe jare yarowia katu rewe.

<sup>23</sup>Jare ñäro mii yarowia katu rewe jokua mbaembae ikawiete wae Tumpa jei umeeta oï yandewe wae. Echa'ä yaikuaa Tumpa jupi ko uyapo waerä jae jei wae. Yande yamimbeu ma ñru wae reta pe jokua mbaembae rewa, jare Tumpa ndarau uyawi yandewe.

<sup>24</sup>Jae nunga wi ñañemiatangätu mii yayerau päwe waerä jare yayapo waerä ikawi wae.

<sup>25</sup>Amokue wae uyembati'ä ma ñru wae reta Cristo re wirowia wae ndiwe. Erëi yande reta awiye yayapo jae reta rami. Yayembati jare ñañemiatangätu päwe mii.

Jare jeieteta ko yayapo jukuärái, echa'ä yaikuaa yandeYa Jesucristo ou yeta wae koiñoete ma oï ramo.

<sup>26</sup>Echa'ä jekuaeño ñanekirëi rewe yayawi Tumpa koti yawe yepe tēi yaikuaa ma añetete wae Cristo rewa, jayawe mbaeti ye ma mbae uñemee waerä mbaembae yayawi wae re.

<sup>27</sup>Jaeño ma ñaärota yakiye rewe Tumpa uiporaraka waerä yandewe. Añetete koiño ma oï ara Tumpa opa umbái waerä jowaicho reta kërái tata tuicha jendi wae mbae opa uapi wae rami.

<sup>28</sup>Arakae rupi kía nunga wae yanderamikue reta wirïro yawe Moisés uikuatía wae, jare ime mokui ani mbapi añetete uecha wae reta yawe, jae imeta ko umano kiawe uiparareko mbae rewe.

<sup>29</sup>Oeteta oï kuri kía wirïro Tumpa Tai yawe! Echa'ä Tai juwi rupi Tumpa uyapo yemingeta ipiau wae. Erëi kía wirïro Tumpa Tai yawe, yepe tēi jokua yemingeta ipiau wae rupi jae uñeño tee iko Tumpa pewarä, erëi jae imaerä Tumpa Tai juwi mbae'ä ko. Añetete jae Tumpa Tai re upïro wae echa ko. Jare uyapo ma kachi Espiritu Santo koti wi, echa'ä Espiritu Santo ipiakawi chupe tēi.

<sup>30</sup>Jáeramo jupi ko jokua nunga uiporara waerä, echa'ä yaikuaa Tumpa jei kuärái: “Che ko jae ayepita aï wae. Che ko jae amiñatimata aï chupe reta wae.” Jare jei wi kuärái: “Che ko jae peYa. Che ko puparawo chemaerä piko waerä. Piyemboita peï kuri cherowai che amiñatima waerä pewe mbaembae piyapo wae re.” Jukuärái jei Tumpa.

<sup>31</sup>Jae ko kiye tuichaete ye wae Tumpa ikoño mái wae uiporaraka yandewe yawe.

<sup>32</sup>Erëi pemandúa ara reta uasa wae re yemboe Cristo rewa umbiembipe ma yawe pepia pe. Yepe tēi tãta piporara parawete, erëi jeseuwe pemiawãta wite opaete.

<sup>33</sup>Echa'ä amo pe ïru wae reta uyemingeta kachi pekoti opaete wae jowake jare uiporaraka pewe wi. Jare amo pe ïru wae reta uiporara yureko wi jokua nunga. Jare pe reta piñemiïru piko wi jokua uiporara wae reta ndiwe jare pembali reta wi.

<sup>34</sup>Jare jae reta uiporara yawe peresoriru pe, pe reta pepiatiti piko jae reta ndiwe. Jare ïru wae reta upïro pewi yawe pemaembae, piporara wi piko piyerowia katu rewe. Echa'ä pikuaa piko ara pe ime penoi mbaembae ikawiete wae jare opa mbae wae ko.

<sup>35</sup>Jáeramo jekuaeño piyeko kawi Tumpa re, echa'ä jokua re jae jeta umiñatimata oï pewe kuri.

<sup>36</sup>Ikawi ko jekuaeño piyeko waerä jese pepiawasu rewe. Echa'ä opa ma piyapo yawe jae uipota wae, penoita opaete mbaembae ikawi wae Tumpa jei umeeta oï pewe wae.

<sup>37</sup>Echa'ä Tumpa jei yandewe iñeeriru pe kuärái: “Koiñoete ma oï Upuruëpi wae ou waerä. Ima'ä ma oï.

<sup>38</sup>Jare ipotawe kía wirowia jese wae, che amaeta jese jeko mbae wae rami, jare jae uyekouta oï tekowe ipiau wae re. Erëi ime yawe kía uyerowa chuwi wae, che ndarau ayerowia amae jese.” Jukuärái Tumpa jei iñeeriru pe.

<sup>39</sup>Erëi yande reta jae’ä ko jokua Cristo wi uyerowa ye wae reta. Chupe reta Tumpa uiporarakata oï jaeño mái pewa. Erëi yande yarowia ko jese añetete rewe, jare jukuärái ñanoi tekowe opa mbae wae.

## Hebreos 11

### Amokue arakaete yureko wae reta wirowia kawi Tumpa re wae

<sup>1</sup>Jayawe, ¿kërái ra yarowia kawi Tumpa re? Ime jeta mbaembae ikawi wae Tumpa jei umeeta oï yandewe wae. Jare yande ñääro yawe jokua mbaembae yarowia katu rewe, jukuärái ko yarowia kawi Tumpa re. Jae nunga wi Tumpa uikuaaka yandewe jeta mbaembae yaecha’ä wae rewa. Jare yande yarowia kawi yawe jokua mbaembae re, jukuärái ko yarowia kawi Tumpa re.

<sup>2</sup>Jare jukuärái ko yanderamikue reta umbiyerowia Tumpa. Jae reta wirowia jese añetete rewe.

<sup>3</sup>Yande yarowia Tumpa jei wae re ramo, yaikuaa Tumpa uyapo iñee rupiño iwi jare opaete ara re ñonoï wae. Jare jukuärái opaete mbaembae yaecha wae Tumpa uyapo mbae awe wi.

<sup>4</sup>Yanemandúa kawi ñai Abel re. Jae wirowia Tumpa jei wae re; jáeramo wiraa mbaemimba uyuka umee Tumpa pewarä. Jare jukuärái umee chupe mbae ikawiete wae tikei Caín mbae umee wae wi. Jáeramo Tumpa uikuaaka yandewe jae umae Abel re jeko mbae wae rami, jare uyemingeta kawi jokua Abel ueru umee chupe wae re. Jare yepe tëi Abel umano, erëi jae jeko imeño yanemboe oï añawe rewa kërái yarowia waerä Tumpa re.

<sup>5</sup>Jae nunga wi yanemandúa Enoc re. Enoc wirowia Tumpa jei wae re, jare jukuärái umbiyerowia Tumpa. Añetete Tumpa umae kawi jese. Jáeramo Enoc umano’ä. Echa’ä Tumpa simi wiraa Enoc ara pe jekowe rewe, jare kiawe kua iwi pewa ipuere’ä uwäe chupe.

<sup>6</sup>Jayawe yande reta mbaeti yawe yarowia Tumpa jei wae re, ndarau etei yandepuere yambiyerowia Tumpa. Yaipota yaya jese yawe, imeta ko yarowia ime ko Tumpa wae. Jare imeta ko yarowia wi Tumpa uyapota ikawi wae yandewe yaeka yawe jae yandepia rewe.

<sup>7</sup>Jae nunga wi yanemandúa Noé re. Tumpa uikuaaka chupe ombouta iko iporu wasu. Jare Noé wirowia. Jáeramo uipiu rewe uyapo chalana wasu, jukuärái jae jare jëtara reta ipuere waerä oyepé iporu wasu wi. Jáeramo Noé wirowia Tumpa jei wae re ramo, Tumpa umae jese jeko mbae wae rami. Jare Noé kua uyapo wae rupi uyekuaa jupiete ko opa umano waerä opaete ñru iwi pewa reta iporu wasu pe, echa’ä jae reta wirowia’ä Tumpa re.



<sup>8</sup>Jae nunga wi yanemandúa Abraham re. Tumpa jei chupe oë oo waerä iwi wi ambie iwi pe – jae ko jokua iwi Tumpa umeeta iko chupe iiwirä wae pe. Jayawe yepe tēi Abraham uikuaa’ä keti ra oo iko wae, erēi oë oo Tumpa re wirowia rewe.

<sup>9</sup>Jare oo uwäe yawe jokua iwi pe, Abraham uyakao joko pe ipiawiwe rewe. Echa’ä jae wirowia Tumpa re, jare Tumpa jei ma chupe: “Kua iwi ameeta ai ndewe ndeiwirä jare niñemoñaeta reta iiwirä,” jei chupe. Jare Tumpa jukuäraiete jei wi Abraham tai Isaac pe jare jumimino Jacob pe. Erēi yepe tēi jae reta ko jokua iwi iyarä etei, erēi jesewe jekuaeño yureko joko pe o wakapi pewa pe ambie iwi pewa echa rami.

<sup>10</sup>Erēi Abraham pewarä, jokua mbae’ä etei ko chupe. Echa’ä jae uäro iko jokua tēta wasu opa mbae wae Tumpa etei uyapota wae.

<sup>11</sup>Jare yanemandúa wi Sara re. Yepe tēi jae ko imembi mbaei wae jare ukuakuaete ma, erēi Tumpa jei chupe: “Nemembita nei.” Jayawe Sara imembi, echa’ä jae wirowia Tumpa jupi ko uyapo waerä jae jei uyapota wae.

<sup>12</sup>Jáeramo yepe tēi Abraham indechi ma jare uñemoña rape’ä ma iko, erēi chuwi ou jetaete ye ye iñemoñaeta reta. Kērái jeta ko yasitata reta ara re oï wae jare jeta ye ye ko iwikiiti i wasu jembei pe oï wae, jukuärái rami ko Abraham iñemoñaeta reta.

<sup>13</sup>Abraham, Isaac, jare Jacob jekuaeño wirowia Tumpa jei chupe reta wae re, jare opa umano reta wirowia rewe. Jare yepe tēi uecha’ä reta opaete mbaembae Tumpa jei umeeta iko chupe reta wae, erēi jae reta wirowia Tumpa uyapota iko jae jei wae. Añetete jae reta imaerä Tumpa uyapo wae echa ma chupe reta. Jare jokua jaekawi chupe reta. Jae reta imara mbae rewe jei: “Ore kua iwi pewa’ä ko. Ore ko jae kua iwi rupi nduwata nduiko waeño,” jei reta.

<sup>14</sup>Jare kua jei reta ramo, yaikuaa jae reta ueka yureko kiaepe jaeño mái yureko waerä jare ipuere waerä jei, “Kua ko jae oreiwi,” jei waerä.

<sup>15</sup>Jare jokua iwi jae reta ueka yureko wae jae’ä ko kiaepe jae reta oa pipe wae jare opa ueya reta wae. Echa’ä jukuärái yawe, jae reta ipuereta tēi jokua iwi pe uñatima ye ipiawiwe rewe.

<sup>16</sup>Erēi jukuärái’ä uyapo reta. Jae reta ikeriiete yureko pēti iwi ikawiete ye wae pe – jae ko iwi ara pe oï wae pe. Jáeramo Tumpa uyerowiaete jae reta iTumparä iko ramo. Jukuärái yaikuaa, echa’ä Tumpa uyapikatu pēti tēta wasu jae reta imaerä ara pe.

<sup>17</sup>Ñamae ye Abraham re. Tumpa jei chupe uyapota iko mbaembae ikawi wae jae imaerä. Erēi Tumpa uipota omboporowa iko Abraham añetete ra wirowia iko jese wae. Jáeramo jei chupe wiraa uyuka waerä tai Isaac. Jare Abraham wirowia Tumpa re ramo, uyukata tēi iko tai jae waeño wae.

<sup>18</sup>Tenonde yawe Tumpa jei chupe: “Jaeño nderai Isaac iñemoñaeta reta yurekota ñemoñaeta añetete pewa chemaerä,” jei. Erēi Abraham jae ma iko tēi uyuka waerä Isaac,

<sup>19</sup>Echa'ä jae wirowia uyuka yawe tai, Tumpa ipuere umbijekowe ye ueru chupe umanokue wae reta ipite wi. Jare jukuärái rami uyeyapo, echa'ä Abraham pewarä tai umanota tēi iko. Jare umano'ä ramo, ikowe ye ma ou chupe wae echa.

<sup>20</sup>Jare yanemandúa wi Isaac re. Jae uikuaaka tai reta Jacob jare Esaú pe mbaembae Tumpa uyapota iko chupe reta wae. Jare jokua jae jei chupe reta wae, jae wirowia Tumpa uyapota iko chupe reta.

<sup>21</sup>Jae ramiño wi Jacob umanota ma iko yawe, uikuaaka pēti pēti José tai reta pe mbaembae Tumpa uyapota iko chupe reta wae. Jare jae wirowia Tumpa uyapota iko chupe reta. Jare ipopoka re uyeko iko rewe umbutuicha Tumpa jee.

<sup>22</sup>Jare yanemandúa José re wi. José wirowia Tumpa jei wae re. Jáeramo umanota ma iko yawe, jei: “Outa uwäe oï ara ñanerētara Israel ñemoñaá reta opa oë waerä kua iwi Egipto wi. Jare jokua ara ou ma uwäe yawe, turaa reta wi chekäwekue iwi Canaán pe oñoti waerä,” jei chupe reta.

<sup>23</sup>Jae nunga wi yanemandúa Moisés tu jare ichi re. Jae reta wirowia kawí Tumpa re. Jáeramo yepe tēi mburuwicha wasu jei opaete Israel ñemoñaá isambiai kuimbae jaeramo oa wae reta imeta ko umano, erēitu Moisés oa yawe, tu jare ichi oñomi reta Moisés o pe mbapi yasi rupi. Echa'ä jae reta uecha Moisés ko jae sambiai ikawi wae, jare ukiye'ä reta mburuwicha wasu wi.

<sup>24</sup>Jae nunga wi yanemandúa Moisés re. Jae wi wirowia kawí Tumpa re. Mburuwicha wasu Egipto pewa tayi umbikuakuaa Moisés mburuwicha wasu jēta pe imembirä. Erēi Moisés ukuakuaa ma yawe, ueya opaete mbae ikawi wae mburuwicha wasu jēta pewa.

<sup>25</sup>Jae ipuereta tēi jekuaeño iko mbae kachi waeño uipota uyapo wae rupi joko pe. Añetete jukuärái yaiko yawe, ipuere ko yanembiyerowia. Erēi jokua ko jae mbae kachi wae Tumpa jowai jare jokua nunga yerowia michi pewaño ko. Erēi Moisés uyapo'ä jukuärái. Jae uiparawo uiporara waerä Israel ñemoñaá reta ndiwe – jae ko Tumpa uiparawo wae reta ndiwe.

<sup>26</sup>Echa'ä Moisés wirowia Upuruepi wae outa iko wae re. Jare chupe waerä ikawiete ko uiporara waerä jokua jae wirowia wae re opaete mbaembae ikawi wae iwi Egipto pe ime tēi oï wae wi. Echa'ä jae wirowia Tumpa jetaete ye umñatimata iko chupe jokua re.

<sup>27</sup>Jare Moisés wirowia Tumpa jei wae re ramo, ukiye'ä mburuwicha wasu iarasi wi jare oë oo iwi Egipto wi. Yepe tēi Tumpa uyekuaa mbae wae ko, erēi Moisés uñemimiräta jese uecha oï rami.

<sup>28</sup>Tenonde yawe Tumpa uikuaaka Moisés pe araiwa upuruyuka wae outa uasa oo iko opaete jokua iwi rupi jare opata uyuka wireko opaete wae tairipi reta. Jare Tumpa uikuaaka chupe wi kērái uyerepi reta waerä. Jayawe Moisés wirowia Tumpa jei wae re ramo, jei Israel ñemoñaá reta pe pēti pēti tēta iya uyuka waerä mbaemimba jare juwi pipe uipi waerä jēta jōke, jukuärái awiye waerä umano tairipi reta. Jare jukuärái Moisés umbiara pascua tenondewa.

**29**Joko wi Israel iñemoñaá reta Tumpa re wirowia rewe uasa reta Mar Pita jee wae mbite rupi kërái iwi utini wae rupi uasa reta wae rami. Erëi sindaro reta iwi Egipto pewa jukuärái wi omboporowa tõi yawe, i uñatima ye jenda pe chupe reta jare opa iputupa reta.

**30**Jare taikue rupi Tumpa jei Israel iñemoñaá reta pe uyere reta waerä tËta wasu Jericó re chiu ara rupi. Jare jukuärái uyapo reta wirowia rewe. Jare chiu ara ma uyere reta yawe, tËta wasu ikësea ita pewa opa uyapara chupe reta.

**31**Jare yanemandúa wi jokua kuña Jericó pewa Rahab jee wae re. Jae ko kuña jete re umingana iko wae. Erëi jae wirowia Tumpa re ramo, umbiasa kawi jËta pe jokua Israel pewa upurupiäro wae reta. Jáeramo jokua tËta wasu ikësea opa uyapara yawe, jare opaete Jericó pewa Tumpa re wirowia'ä wae reta opa umano yawe, Rahab umano'ä.

**32**¿Mbae ye ra jaeta aipo? Echa'ä uepiti'ä ma chewe ara amimbeu waerä pewe Gedeón rewa, jare Barac, Sansón, Jefté, David, Samuel, jare opaete kuimbae Tumpa iñee arakae umimbeu wae reta rewa.

**33**Amokue kua reta wirowia Tumpa re ramo, opa umiamiri mburuwicha wasu imbaepuere wae reta, jare uyapo reta jupi wae rupi, jare uyekou reta Tumpa jei umeeta iko chupe reta wae re. Amokue wae ou chupe reta yawapita tuicha wae reta. Erëi wirowia kawi reta Tumpa re ramo, Tumpa uepi reta chuwi.

**34**Amokue reta, yepe tËi jowaicho reta omombo tata tuicha wae pe, erëi okai'ä. Echa'ä Tumpa ombowe chupe reta tata jae reta wirowia jese ramo. Amokue reta, yepe tËi jowaicho reta uipota tËi uyuka reta kispuku pe, erëi oyepe chuwi reta. Amokue reta ipiräta'ä, erëi wirowia reta Tumpa re ramo, Tumpa umimiräta reta. Jáeramo jae reta imbaepuerete ñeräro pe jare opa ombosi iyuwi jowaicho isindaro reta.

**35**Amokue kuña reta wirowia Tumpa re ramo, uecha ye jËtara umano chuwi wae, echa'ä Tumpa umbijekowe ye ueru chupe reta umanokue wae reta ipite wi ramo. Erëi amokue wirowia Tumpa re wae reta tuicha uiporara jowaicho reta ipo pe jare umano reta. Jae reta ueya yawe Tumpa re wirowia wae, jayawe opoita tËi chuwi reta. Erëi jae reta uiporara Tumpa uikuaku mbae rewe. Echa'ä uikuua reta jukuärái ikawieteta iko chupe reta Tumpa umbijekowe ye ueru reta yawe.

**36**Ïru wae reta wirowia Tumpa re jeko pewa uiporara ñenupa jare ñee kachi wae. Jae nunga wi oñono reta cadena pe, jare jae reta uiporara peresoriru pe.

**37**Amokue wae reta umano uyapi reta ita pe ramo. Jare ïru wae reta umano jowaicho reta ipo pe kispuku pe. Jare ïru wae reta jowaicho reta uyasia ikúa rupi omondoo sierra pipe. Jare amokue wae reta iparawete. Jae reta jemimonderä jaeño ime wireko owecha ipirekue jare kapura ipirekue uñeñowa waerä pipe. Tuicha rupi ikuasi jare uiporara reta Tumpa re wirowia jeko pewa.

**38**Jeta jae reta omombo reta jËta wasu wi. Jáeramo uwata reta ipotawe rupi iwitu wasu rupi jare iwitini wasu rupi. Jare yureko reta mbae ikua pe jare iwikua tuicha

wae pe. Añetete ko, iwi pewa reta, jupi'ä etei ko kua Tumpa re wirowia wae reta yureko waerä ipite pe.

<sup>39</sup>Opaete kua reta umbiyerowia Tumpa wirowia reta jese ramo. Erëi jae reta opa umano onoi mbae rewe Tumpa jei umeeta iko chupe reta wae.

<sup>40</sup>Tumpa ipuereta tēi umee woi chupe reta. Erëi jae uipota yande reta wi yayekou waerä jese päwe rewe jae reta ndiwe. Echa'ä jokuaño jae Tumpa ipiyemingeta uipota opa uyapo waerä wae.

## Hebreos 12

### Jekuaeño ñamae täta Jesús re

<sup>1</sup>Kua Tumpa re wirowia kawi wae reta che amimbeu pewe wae, jetaete ko. Opaete kua reta ko jae ñanemikirëi waerä Tumpa koti. Echa'ä yande reta añawe kua iwi pe ñai rambuwe, pēti ñeñokui pe ñai rami ko. Jáeramo imeta ko yayapo yandepuere wae rupi yasi kawi waerä. Yaeyata ko yandeyuwi opaete mbaembae yanembiawái wae jare yandereko kachi uipota yandepokua rami wae. Jare yasi mii tenonde koti yandekueri mbae rewe imeño uata oï yandewe wae.

<sup>2</sup>Jare kërái uñeñokui wae reta täta umaee oo oï iyapí re, jukuärái wi yande tätata ko ñamae Jesús re. Echa'ä jae oo ma tenonde yandewi jare uechaka ma yandewe kërái yarowia kawi waerä Tumpa re. Jare añawe jae yanemborita oï jukuärái wi yayapo waerä. Jae tuicha urupia kurusu re umanota iko yawe. Jare yepe tēi pēti ñemimaraka tuicha wae ko jae umano waerä pēti kurusu re, erëitu jokua mbae'ä chupe. Echa'ä jae uikuaa iko taikue rupi uyerowiaeteta iko. Jare jukuärái ko oï añawe rupi, echa'ä jae uwapí oï yandeRu Tumpa iyakata koti.

<sup>3</sup>Pemandúa Jesús re kërái jae urupia jeko kachi wae reta pe jae reta uyembowaicho jae ndiwe yawe. Pepia pe piyemingeta kawi jokua re awiye waerä pekueri jare awiye waerä peresawiri rami Tumpa koti.

<sup>4</sup>Añetete ime jeko kachi wae reta opaete kerupi. Jare amo pe ime yandepia pe wi kirëi mbae kachi yayapo waerä. Jáeramo jekuaeño ñañeräro ñai awiye waerä ñañemiamirika mbae kachi wae pe. Erëi piñemikirëi, echa'ä ndeiño piporara Cristo uiporara rami. Echa'ä jae uiporara yawe, upiyere juwi etei.

### Awiye yambasi yandeYa yanembiarakuaa yawe

<sup>5</sup>Jare awiye peakañi jokua ñee Tumpa iñeeriru pe oï wae wi. Echa'ä joko pe pembiarakuaa kërái pēti tu umbiarakuaa tai wae rami kuärái: “Nde, cherai mii, awiye eriro yandeYa nembiarakuaa yawe. Jare jae uiporarakuaa ndewe yawe, awiye ndepiatiti.

<sup>6</sup>Echa'ä yandeYa umbiarakuaa uau wae reta. Jare uiporarakuaa opaete tairä ueni wae reta pe.” Jukuärái jei.

<sup>7</sup>Jayawe pemiawäta jokua piporara peï wae, echa'ä jokua rupi Tumpa pembiarakuaa oï. Añetete Tumpa jukuärái uyapo oï pewe, pe reta ko jae tai reta ramo. ¿Ime ra tu ikawi wae mbaeti tai umbiarakuaa wae? Mbaeti.

<sup>8</sup>Jare jukuärái wi Tumpa umbiarakuaa opaete tai reta. Jáeramo Tumpa mbaeti pembiarakuaa yawe, jayawe pe reta añetete Tumpa tai reta'ä ko.

<sup>9</sup>Jare wi yande reta, yande michi rai mii yaiko yawe, yanderu reta kua iwí pewa yanembiarakuaa. Jare yaipiu wi ko chuwi reta. ¿Maera pa jayawe ñañemee'ä yandeRu ara pewa pe jae yanembiarakuaa waerä jare jukuärái yayekou waerä tekowe añetete wae re?

<sup>10</sup>Añetete, yanderu reta kua iwí pewa yanembiarakuaa michi pewaño jare kërái jae reta uipota wae rupi. Erëi Tumpa yanembiarakuaa ikawi waerä yandewe añetete pewa jare yaiko waerä jupi jae rami.

<sup>11</sup>Añetete ko, Tumpa uiporaraka yandewe yawe, yandepiatiti jare yayerowia'ä jokua re. Erëi jokua rupi yayemboe yayapo waerä jae jei wae yawe, jayawe taikue rupi yandereko oya katuta jupi wae re jare yaikota yandepiakatu rewe.

<sup>12</sup>Jáeramo yepe tēi pekueri jare pekandi peï aramoi Tumpa koti, erëi piñemimiräta.

<sup>13</sup>Íru wae reta aramoi opia pota ñonoï Tumpa jape wi. Jayawe jekuaeño pewata kawi Tumpa ndiwe jae reta jowake. Pechaka chupe reta tape jae reta uwata waerä jokoropi, awiye waerä opia reta.

### **Tumpa ipiakawi wiriro wae reta**

<sup>14</sup>Peka kërái piko kawi waerä opaete wae ndiwe. Jare piñeño tee Tumpa pewarto. Echa'ä kía uñeño tee'ä chupe yawe, ndarau uecha yandeYa.

<sup>15</sup>Piyandareko kawi piyé awiye waerä kía pepite pe oï wae uyerowa Tumpa ipiakawi wi. Jare awiye pemaño mbaembasi re ukuakuaa waerä pepite rupi jare jukuärái umbiawái waerä jeta wae reta. Echa'ä pemaño jese yawe, jeta wae reta ikiata Tumpa koti.

<sup>16</sup>Jare awiye piyapo awasa. Awiye wi piko Esaú iko wae rami. Echa'ä jae uipiu'ä Tumpa wi jare mbaembae Tumpa pewa wi. Echa'ä jokua tairipiyekou Tumpa umeeta tēi iko chupe wae, Esaú owaka tiwi pe tembiu reño.

<sup>17</sup>Jare pe reta pikuaa peï kërái taikue rupi Esaú uipota tēi tu umee waerä chupe jokua mbaembae tairipi pewarto. Erëi mbaeti ma uñemee chupe jokua jae imaerä ikota tēi wae. Yepe tēi uyerure jese uyao rewe, erëi mbaeti ma mbae ipuere uyapo. Jukuärái iko Esaú.

<sup>18</sup>Pe reta mbaeti ma ko peya Tumpa re yanderamikue reta rami. Arakaete jae reta oya Tumpa re pēti iwitu wasu jendi iko wae pe. Jare ime iko wi amapitu pītumimbiete wae jare iwitu tāta uyepeyu wae.

<sup>19</sup>Jare jae reta uyandu temimbi wasu ñee tätaete rupi jare Tumpa ñee etei. Jare Tumpa ñee uyandu reta yawe, jei reta Moisés pe ukiyete rewe: “;Nduipota’ä ma nduyandu kua ñee!

<sup>20</sup>;Orepuere’ä etei numiawäta kua Tumpa jei wae!” jei reta. Jukuärái jei reta, echa’ä Tumpa jei ma chupe reta: “Ipotawe kua iwitu wasu re upiro wae, tuyapi reta ita pe tuyuka – jare mbaemimba retawe wi,” jei.

<sup>21</sup>Añetete jokua iwitu wasu re uyekuaa wae kiye pewaete ko. Jáeramo Moisés etei jei: “Che aririete aï akiye ramo,” jei.

<sup>22</sup>Erëi pe reta peya ma ko iwitu wasu Sion jee wae re. Kua iwitu wasu kua iwi pewa’ä ko. Jae ko ara pewa. Joko pe ko oï Tumpa ikoño mái wae jëta wasu Jerusalén jee wae. Jare joko pe ñonoï wi jetaete ye araiwa reta uyembati ñonoï uyerowia rewe.

<sup>23</sup>Jare joko pe uyembati ñonoï wi Tumpa ueni ma tai tenondewa wae reta opaetei – jae ko opaete jee uyekuatía oï ara pe wae reta, jare jae ko opaete jupi yureko wae reta opa umano wae iäkue. Añawe Tumpa opa ma umbujupiete reta. Jare joko pe oï wi Tumpa etei – jae ko opaete yande reta yayemboita ñai jae jowai wae.

<sup>24</sup>Jare yaya ma wi Jesús re. Jae rupi ko Tumpa uyapo yemingeta ipiau wae yande ndiwe. Echa’ä jae upiyere juwi yande yandepuere waerä ñanoi tekowe opa mbae wae. Jáeramo Jesús juwi ikawiete ko Abel juwi wi, echa’ä Abel juwi jaeño uyembijaanga oï uyepi wae.

<sup>25</sup>Tumpa pemingeta oï. Jayawe piyapisaka kawi jese. Pemandúa peï yanderamikue reta re. Jae reta täta uiporara uyapisaka’ä reta yawe Moisés jei wae re. Erëi oeteta ko yande yayapisaka’ä yawe Jesús jei wae re. Echa’ä Moisés kua iwi pewaño ko, erëi Jesús ko jae ara pewa.

<sup>26</sup>Jokua ara Tumpa ñee ombou yawe iwitu wasu wi, jae ñee umikäta iwi. Erëi añawe jae jei kuärái: “Pëti wese ye amikätata iwi. Erëi mbaeti iwiño amikätata. Jae nunga wi amikätata ara jare opaete mbaembae ara re oï wae.” Jukuärái jei.

<sup>27</sup>Jare kua “pëti wese ye” jei wae uipota jei “opaete cherembiapo reta ipuere omi wae opata ambiyapi,” jei Tumpa. Echa’ä Tumpa uipota jaeño jokua mbaembae ipuere’ä omi wae jekuaeño oï waerä – jae ko mbaembae opa mbae wae pewa.

<sup>28</sup>Jáeramo ñamee yasurupái Tumpa pe, echa’ä jokua jae umee oï yandewe wae, ndarau etei opa. Echa’ä jae umee oï yandewe ñai waerä jae ndiwe jae oï ma yawe opaete wae imburuwicha wasurä jaeño mái pewa. Jáeramo yayeyokui Tumpa pe yaipiü rewe yambiyerowia waerä.

<sup>29</sup>Echa’ä yandeTumpa ko jae pëti tata opaete mbaembae jupi mbae wae opa uapi wae rami.

## Hebreos 13

### Kerái yambiyerowia waerä Tumpa

- <sup>1</sup>Jayawe, ¿këraita ra yaiko yambiyerowia waerä Tumpa? Pe reta ko jae Tumpa jëtara reta. Jáeramo piko jekuaeño piyerau päwe rewe.
- <sup>2</sup>Jare jekuaeño pembiasa kawí mboupa reta perëta pe, echa'ä jukuärái amokue wae reta umbiasa ma jëta pe araiwa reta uikuaa mbae rewe.
- <sup>3</sup>Awiye peakañi iiru hermano reta uiporara ñonoï peresoriru pe wae wi. Pemandúa mii jese reta pe reta joko pe peï jae reta ndiwe rami. Jare awiye peakañi wi jokua uiporara ñonoï Cristo re wirowia jeko pewa wae reta wi. Echa'ä pikuaa ko piporarata peï wi aramoi jae reta rami.
- <sup>4</sup>Umenda wae reta jekuaeño tuyerereko kawí. Awiye kía tuyapo awasa. Echa'ä Tumpa uiporarakata oï awasa uyapo wae reta pe jare imbikere wae reta pe.
- <sup>5</sup>Awiye pipotaete korepoti pemaeräño. Toï pepia jenda pe ime ma penoi wae re. Awiye wi piyembipia'ä jeta mbaembae penoi waerä, echa'ä Tumpa etei jei ma yandewe kuärái: “Che ndarau etei ndueya. Jekuaeño ayandarekota ai nderé.” Jukuärái Tumpa jei.
- <sup>6</sup>Jáeramo yandepuere yae yarowia katu rewe kuärái: “Che ndarau akiye mbae kía ipuere uyapo chewe wae wi. Echa'ä yandeYa ko jae chembori wae.” Jukuärái yandepuere yae.
- <sup>7</sup>Jekuaeñota ko pemandúa petenondewa reta re, echa'ä jae reta ko jae Tumpa iñee umimbeu pewe wae. Piyemingeta mii pepia pe jae reta ikawí uyapo wae rewa. Jare jekuaeño perowia Cristo re kërái jae reta wirowia jese rami.
- <sup>8</sup>Jesucristo uyembiambie'ä etei iyipi wiwe, añawe rewa, jare jaeño máí pewa.
- <sup>9</sup>Erëi kua iwi pe ime jeta yemboe ambie ye ye wae reta. Jáeramo piyandareko kawí piyé, echa'ä pemaño piyé yawe, jokua yemboe reta ipuere pembopia Jesucristo wi. Erëi ikawí ko yande reta jekuaeño ñañemimiräta waerä Tumpa ipiakawí re. Jeta wae reta uipota tëi uñemimiräta Tumpa re teko tembiu pewa rupi. Erëi mbaetii yanembori jokua nunga teko reta.
- <sup>10</sup>Jáeramo jokua teko reta rupi uyeyokui tëi reta Tumpa pe wae ndarau etei uyekou reta añetete pewa yande rami. Echa'ä Jesucristo uyapo kurusu re waeño ko ikawiete yandewe.
- <sup>11</sup>Jare kua pe ime mbae re yayemingeta waerä yandepia pe. Yande yaikuaa kawí ñai sacerdote tenondewaete uyuka mbaemimba yawe, uruiké juwi tupao joo jupiete ye wae pe. Jukuärái uyapo awiye waerä Tumpa uiporarakata jëtaiwa reta pe mbaembae uyawi reta Tumpa koti wae re. Joko wi sacerdote wiraa jokua mbaemimba jetekue tëta wasu wi oka pe opa uapi waerä.
- <sup>12</sup>Jukuärái wi Jesús uiporara rewe umano tëta wasu oka pe. Jare jae juwi upiyere wae rupi opa yandepiayoe Tumpa koti, jare jukuärái ñaneño tee Tumpa pewarä.

**13**Jáeramo yepe tēi jeta ñanerētara judío reta opa wiriro Jesucristo, erēitu yande reta yaya mii jese. Jare Jesucristo re yaya ramo, ñanerōta reta wi. Aramoi yanemombota iyuwī reta. Erēitu ñamaeño jese reta.

**14**Echa'ä yaikuaa kua iwi jare opaete tēta wasu reta oī pipe wae ndarau ima iko. Erēi jokua tēta wasu yande ñaäro ñai wae ara pewa ko jare ndarau etei opa.

**15**Añawe rupi yande reta mbaeti ma yambiyerowia Tumpa mbaemimba reta yaraa ñamee chupe wae rupi. Echa'ä Cristo opa ma umbiambie opaete jokua yandewe. Añawe rupi yambiyerowia ko Tumpa jae jee yambutuicha wae rupi. Jayawe yambutuicha jae jee opaete wae jowake.

**16**Jare jekuaeño yanemandúa yayapo waerä ikawi wae jare yayembori katu waerä päwe rewe ime ñanoi wae rupi. Echa'ä jukuärái rupi ko yambiyerowia ñai wi Tumpa añawe rupi.

**17**Petenondewa reta uparawiki ñonoī uyandareko kawi waerä peré, echa'ä jae reta uikuaa pēti ara uyemboita ñonoī Tumpa jowai umimbeu waerä iparawiki rewa. Jáeramo piko mii jae reta jei wae rupi. Echa'ä jukuärái piyapo yawe, jae reta uyerowia rewe uyeyokuita Tumpa pe. Erēi pe reta piyapisaka'ä yawe jese reta, jae reta ipiatitita, jare jokua ndarau ueru pewe mbae ikawi wae.

**18**Jayawe jekuaeño piyerure mii Tumpa pe cheré jare chewatairu reta re wi. Ore nduikuaa orepia orembijeko'ä oī mbae re awe. Erēi nduipotaete jekuaeño nduiko jupi ipotawe mbae uasa orewe wae rupi.

**19**Jare che pumiñera pe reta piyerure waerä cheré Tumpa pe jae chemondo ye waerä imambae pekoti.

### Saludo reta

**20**YandeRu Tumpa ko jae yanembipiakatu wae. Jare jae ko uyapo pēti yemingeta ipiau wae yande ndiwe. Jare yandeYa Jesucristo juwī uyepiyere wae pipe jokua yemingeta upita kawi ma oī jaeño mái pewa. Jáeramo Tumpa umbijekowe ye ueru Jesucristo uyandareko waerä yanderé pēti owecha reta iyandarekoa ikawi wae rami.

**21**Che ayerure ai Tumpa pe jekuaeño pembali piyapo kawi waerä opaete jae jei wae rupi. Jare jae tuparawiki yandepia pe yande reta jekuaeño yambiyerowia waerä jae. Jare jukuärái tuyapo yandeYa Jesucristo imbaepuere rupi. ¡Tuyembutuichaka yandeYa Jesucristo jee jaeño mái pewa! Jukuärái tuiko.

**22**Cherētara mii reta, che pumiñera piyapisaka kawi waerä kua ñee aikuatía ai pewe wae re. Puku'ä ko kua ñee reta.

**23**Aipota pikuaa waerä hermano Timoteo oē wite ma peresoriru wi. Jae kua ara reta rupi uwäe yawe kua pe, araata che ndiwe a apou yawe pepi.

**24**Pembisaluda mii chewe kuri opaete petenondewa reta jare iru wae reta Cristo re wirowia wae joko pe ñonoī wae. Kua pe ime ñonoī amokue hermano reta iwi Italia pewa. Jae reta omondo pewe saludo wi.



<sup>25</sup>Tumpa jekuaeño tipiakawi pewe, opaete pe reta. Jukuärái tuiko.

## Santiago

### Kua tupapire rewa:

Kua tupapire, jae ko Santiago uikuatía wae. Santiago jee wi ko Jacobo, jare jae ko aipo yandeYa Jesucristo tiwi ichi rupiño wae (Mateo 13.55; Gálatas 1.19). Tenonde yawe jae wirowia’ä Jesús re. Erëi Jesús ikowe ye ma ou yawe umanokue wae reta ipite wi, uychaka Jacobo pe (1 Corintios 15.7) jare joko wi ramo Jacobo wirowia jese. Taikue rupi jae iko Cristo re wirowia wae reta Jerusalén pe ñonoï wae itenondewa pëti wae (Hechos 12.17; Gálatas 1.18-19, 2.9). Jacobo uikuatía yawe kua tupapire, jeta wae reta uiporara yureko Cristo re wirowia jeko pewa. Jayawe Jacobo uikuatía kua tupapire umikirëi reta waerä jae reta umiawäta waerä yembiawái.

### Santiago 1

#### Santiago wiraaka saludo

<sup>1</sup>Pe Israel ñemonaã piko wae reta opaete piñemiái peï kerupi rupi wae, che araaka aï pewe saludo. Che ko jae Santiago aikuatía aï pewe wae. Che ko jae pëti wae yandeRu Tumpa jare yandeYa Jesucristo pe ayeyokui wae.

#### Yembiawái reta ou wae rewa

<sup>2</sup>Hermano mii reta, amo pe ou yandewe yembiawái reta opaño kërái rái. Erëi jukuärái uyeyapo pewe yawe, jokua ko jae mbae re piyerowia waerä.

<sup>3</sup>Echa’ä pikuaa kawi peï peasa yawe yembiawái reta rupi, jokoropi uyekuaata oï perowia ko Tumpa re añetete rewe – mbaeti ko perowia perowa peño. Jare jae nunga wi yembiawái reta yanemboe ñamiawäta waerä.

<sup>4</sup>Kua ikawi ko. Echa’ä imeta ko ñamiawäta yakuakuaa kawi waerä Tumpa koti jare yandereko jupi oï waerä. Jukuärái ndarau mbae uata yandewe yayeyokui kawi waerä Tumpa pe.

<sup>5</sup>Erëi ime yawe kía pepite rupi kua mbaembae rewa arakuaa uata chupe wae, tuyerure Tumpa pe jokua re. Jare Tumpa umeeta chupe arakuaa. Echa’ä Tumpa umeeta arakuaa ipiakawi rewe jare umianga mbae rewe opaete ueka reta chupe wae pe.

<sup>6</sup>Erëi jokua arakuaa uata chupe wae tuyerure Tumpa pe jese wirowia katu rewe. Awiye tuyemingeta ipia pe kuärái: “Tumpa ndarau umee chewe arakuaa.” Awiye tuyemingeta jukuärái, echa’ä ime yawe kía jukuärái jei wae, jae ko iwitu iaparoa koti koti wiraa wae rami.

<sup>7-8</sup>Echa’ä jae pëti ara wirowia jare ñru ara wirowia’ä, jare uikuaa’ä etei mbae uyapo waerä. Jáeramo jokua nunga awiye torowia yandeYa umeeta oï chupe mbae wae.

<sup>9</sup>Kía Cristo re wírowia wae iparawete wae tuyerowia, echa'ä Tumpa umbutuicha ikoti ramo.

<sup>10</sup>Jare ikokatu wae tuyerowia uñemimichi wírowia Cristo re ramo. Echa'ä añetete ikokatu wae reta ñana ipoti oí wae rami ko. Mbaeti ima iko reta.

<sup>11</sup>Warasi jasi oí yawe jare jakuwo oí yawe, opa ñana ipiru jare mbaepoti reta opa usururu. Maepöra'ä etei ma. Jukuärái wi ikokatu wae reta uyembíkokatu oí rewe ukañi oo ñonoí.

<sup>12</sup>Uyekouta oí kía umiawäta yembiawái reta ipiawasu rewe wae. Echa'ä jukuärái rupi uyekuaata jae wírowia ma ko Tumpa re añetete rewe. Jare Tumpa umiñatimata oí chupe kuri corona tekowe pewa. Jukuärái yaikuaa uyeyapota oí, echa'ä jukuärái Tumpa jei uyapota oí opaete uau reta wae pe.

<sup>13</sup>Jare ime yawe kía nunga pe uipota uyawíka chupe Tumpa koti wae, awiyeta ko jei iyupe: “Tumpa wi ko ou chewe kua.” Awíye jokua. Echa'ä Tumpa ndarau etei uyemíinge mbae ikawi mbae wae pe. Jae nunga wi jae ndarau etei ombou yandewe uyawíka waerä yandewe ikoti.

<sup>14</sup>Jayawe, ¿kiawi ra ou yandewe kirëi yayawi waerä Tumpa koti? Añetete yandepia wi ko ou. Jáeramo yandepiyemingeta etei ko yandereraa yayawi waerä Tumpa koti.

<sup>15</sup>Jare yande reta ñamaeño jese yawe, uyapoka yandewe teko kachi. Jare taikue rupi jokua yandereko kachi opa ma uyembapi yawe, ueru yandewe mano.

<sup>16</sup>Awíye piyembitawíka kua mbaembae rewa, hermano puau mii reta. Echa'ä mbae kachi wae ndarau etei ou Tumpa wi.

<sup>17</sup>Tumpa jaeño umee yandewe ikawi wae. Añetete opaete mbaembae ikawi wae jare jupi wae ou ara wi yandeRu Tumpa oí wae wi. Jae umbiyekuaa opaete tembipe reta ara re ñonoí wae ipiakawi rupi. Jare yepe tēi jokua tembipe reta opa kērái rái uyembiambie, erēi yandeRu Tumpa ndarau etei uyembiambie jare ndarau uyepepíka wi.

<sup>18</sup>Jare Tumpa uipota ramo, yandapo tai retarä ñee añetete wae yarowia wae rupi, jare jukuärái ñaneño tee waerä jae imaerä opaete ñru jemiapo reta wi.

### **Awiyeta ko yayanduiño Tumpa ñee**

<sup>19</sup>Jáeramo hermano puau mii reta, yande reta pēti pēti wae awiyeta ko yayemingeta wíraeño. Imeta ko ñaneratangātu rewe yayapisaka kawi yanderapicha re. Jare awiyeta ko yandepochi rái.

<sup>20</sup>Echa'ä jekuaeño yandepochi yawe, ndarau yandepuere yaiko jupi kērái Tumpa uipota wae rami.

<sup>21</sup>Jáeramo peya opaete pereko kachi wae jare opa kērái rái mbae ikawi mbae wae. Jare pipisi peyupe piñemimichi rewe jokua ñee Tumpa oño ma pepia pe wae. Echa'ä jaeño jokua ñee ipuere perepi opa mbae ikawi mbae wae wi.

<sup>22</sup>Erëi awiye mii piyanduiño Tumpa iñee. Imeta ko piyapo wi. Echa'ä piyanduiño yawe Tumpa iñee, piyembitawi ko pei.

<sup>23-24</sup>¿Këraita ra ko yande reta ñamae yawe yandiyé pëti yechaka pe, erëi yayapo'ä mbae awe yayeyapikatu waerä? Jare joko wi ñaneakañi kërai ko yanderowa wae. Jukuärai ko kía reta uyanduiño yawe Tumpa iñee jare uyapo'ä yawe jokua ñee jei wae.

<sup>25</sup>Erëi jukuärai'ä ko kía uyapisaka kawi yawe Tumpa iñee re, jare uyapo yawe iñakañi mbae rewe jokua ñee jei wae rupi. Echa'ä opaete jae uyapo wae rupi uyekoueteta oï kuri. Echa'ä Tumpa iñee jupi ko jare yandeyora.

<sup>26</sup>Ime yawe kía jei tëi iyupe “Che ayeyokui Tumpa pe” wae, erëi jae mbaeti uyandareko yawe iñee re jare ipotawëño uyemingeta, jayawe jae uyembitawiño ko oï. Jare jokua mbaembae jae wirowia tëi uyapo Tumpa pewarä wae mbae'ä etei ko. Jae mbaeti yepe uyeyokui oï Tumpa pe.

<sup>27</sup>Jayawe, ¿kërai ra yayeyokuita yandeRu Tumpa pe añetete pewa? Imeta ko yamboriñoi sambiai mii reta tu jare ichi umano chuwi wae jare kuña reta ime umano chuwi wae ikuasi ñonoï wae. Jare imeta ko yayandareko kawi yandiyé awiye waerä ñañererükumewa kua iwi jeko kachi wae rupi. Jukuärai rupi ko yayeyokuita yandeRu Tumpa pe.

## Santiago 2

### Ñamae kawi yandiyé yayeparawo mbae rewe

<sup>1</sup>Hermano mii reta, yandeYa Jesucristo jupiete ye wae ko. Jare pe reta perowia ma jese ramo, awiye etei piyeparawo pema kawi waerä piyé.

<sup>2</sup>Aramoi amo pe uiketa kuimbae ikokatu wae piyembaeti wae pe. Kua kuimbae onoi ipoäkarewa oro pewa jare jemimonde ipöraete wae. Jare aramoi uiketa wi piyembaeti wae pe kuimbae iparawete wae jemimonde ipächa wae.

<sup>3</sup>Aramoi pe reta pema kawita jokua kuimbae uyemonde kawi wae re jare aramoi pereta chupe, “Ewapi mii kua tenda ikawiete wae re.” Jare aramoi iparawete wae pe pereta, “Nde iyemboi ei,” ani, “Ewapi jokua iwi pe.”

<sup>4</sup>Erëi jukuärai piyapo yawe, mbaeti ko ikawi piyapo pei. Echa'ä pe reta mbaeti ko oyowake pema pei perapicha re. Añetete ko pema pei perapicha re pepia ikawi mbae rewe.

<sup>5</sup>Mase, hermano puau mii reta, ¿kía ra ko jae wirowia kawi Tumpa re wae reta? Jae ko iparawete wae reta. Jáeramo Tumpa uiparawo ma jae reta ikokatu waerä Tumpa koti. Añetete jae reta uyekouta ñonoï Tumpa imbaepuere mburuwicha wasu pewa re jaëño mái pewa. Echa'ä jae reta uau Tumpa jare Tumpa jei ma kuärai: “Opaete cherau wae reta, che aita chupe reta imburuwicha wasurä,” jei.

<sup>6</sup>Erëi pe reta pemimichika pei iparawete wae reta. Mase. ¿Ikokatu wae reta jae'ä yerá uyuwanga katu peré wae jare pereraa mburuwicha reta jowai wae?

<sup>7</sup>Pe reta ko jae yandeYa pewa. Erëi jeta ikokatu wae reta uyemingeta kachi yandeYa koti. Jayawe, ¿maera pa pambutuicha pei ikokatu wae reta?

<sup>8</sup>Tumpa iñeeriru pe uyekuatía oï kuärái: “Peau perapicha kërái pe reta etei piyerau wae rami,” jei. Tumpa – jae ko yaneMburuwicha wasu etei – jei ma yandewe jukuärái yayapo waerä. Jayawe pe reta peau yawe perapicha añetete rewe, jupi wae ko piyapo pei.

<sup>9</sup>Erëi piyeparawo yawe pema kawi waerä piyé, jayawe piyawí ko pei Tumpa koti. Tumpa jei wae rupi teko pe ma ko pepita.

<sup>10</sup>Añetete ko, ime yawe kía uyapo kawi opaete mbaembae Tumpa jei yandewe wae rupi, erëi pëti miño uyawi yawe, jae ma teko pe oï Tumpa jowai. Tumpa pewarä, opaete mbaembae jei yandewe wae opa ma uyeyawí rami ko.

<sup>11</sup>Kua re ikawi yayemingeta waerä yandepia pe. Tumpa jei yandewe: “Awiye iyapo awasa.” Jare jei wi yandewe: “Awiye epuruyuka,” jei. Aramoi nde ndiyapo’ä etei awasa. Erëi ndepuruyuka ma yawe, ndiyawí ma ko Tumpa jei wae jare teko pe ma ko nei, yepe tëi ndiyapo’ä awasa.

<sup>12</sup>Tumpa uikuaaka ma yandewe kërái yaiko waerä, jare jokua yandeyora wae echa rami ko. Jáeramo piko kawi jae jei wae rupi opaete mbae piyapo wae rupi jare pere wae rupi wi. Echa’ä pëti ara yande yayemboita ñai Tumpa jowai, jare uyekuaata oï yayapo ra yapuruau rewe jae jei wae rupi.

<sup>13</sup>Jare ime yawe kía uiparareko’ä japicha wae, Tumpa umbijekota onoi kuri uiparareko mbae rewe. Erëi kía japicha uiparareko wae uyerowiata oï kuri jokua ara.

### **Yarowia Tumpa re wae uyekuaata mbaembae yayapo wae rupi**

<sup>14</sup>Hermano mii reta, ipuere ko kía jei: “Che arowia Cristo re.” Erëi jokua nunga uyapo’ä yawe mbaembae ikawi wae, jokua jae jei wae ikawi’ä maeräwe jare ndarau ipuere uepi.<sup>15</sup> ¿Këraita ra ko ime yawe pëti hermano mbaeti onoi jembiurä wae jare uata oï chupe yawe jemimonderä,

<sup>16</sup>jare pe reta mbaeti pembali pei – jaeño pere chupe, “Tumpa tumae kawi nderé. Iyandareko kawi ndiyé kuri,” pere chupe yawe? Jokua mbae’ä etei ko chupe waerä.<sup>17</sup> Imeta ko yaechaka yarowia ko Tumpa re mbae ikawi wae yayapo wae rupi. Erëi jukuärái’ä yayapo yawe, yarowia Tumpa re wae ko jae pëti teöwe rami, echa’ä ikawi’ä maeräwe.

<sup>18</sup>Erëi aramoi kía jeita chewe: “Mbaeti yambiyerowia Tumpa oyowake rupi. Amokue wae reta jaeño wirowia Tumpa re, jare iru wae reta jae nunga wi uyapo mbaembae ikawi wae. Erëi mokui rewe umbiyerowia ñonoï Tumpa.” Jukuärái ipuere kía jei tëi chewe aramoi. Erëi che tae jukuärái uyemingeta wae pe kuärái: Yaecha echaka chewe nderowia Tumpa re wae mbaembae ikawi wae ndiyapo mbae rewe. Ndarau etei ndepuere. Erëi chemaerä, che aechakata ndewe arowia Tumpa re wae mbaembae ikawi wae ayapo wae rupi. Jukuärái che jae.

<sup>19</sup>Erëi aramoi jeita wi chewe kuärái: “Che arowia ime pëtiño Tumpa,” jeita chewe. Jokua jaekawi tëi. Erëi uepiti’ä, echa’ä añã reta wi ko wirowia jukuärái. Jare jae reta uriri ñonoï Tumpa wi ukiye ramo.

<sup>20</sup>Kua nunga pe che jae iyarakuaa mbae echa. Yarowia Tumpa re wae yaechaka’ä yawe mbaembae ikawi wae yayapo wae rupi, jae ko teöwe rami. Echa’ä ikawi’ä maeräwe.

<sup>21</sup>Ikawi ko yanemandúa waerä yanderamikue Abraham re. Jae mbae uyapo wae rupi uyekuaa kërái añetete yepe jae jupi wae ko. Echa’ä jae ma iko tëi uyuka waerä tai Isaac mbaerenda íramo kërái Tumpa jei wae rupi.

<sup>22</sup>Jukuärái Abraham mbae uyapo wae rupi uechaka jae wirowia ko Tumpa re añetete rewe. Jare jukuärái uyeyapo Tumpa ipiyemingeta Abraham pewarä. Echa’ä Abraham wirowia ramo wiwe, Tumpa uipota iko Abraham mbae uyapo wae rupi uechaka waerä wirowia ko jese wae.

<sup>23</sup>Jare jokua Abraham uyapo wae rupi yaikuaa wi kërái añetete yepe Tumpa iñeeriru pe uyekuatía oï wae. Echa’ä joko pe jei kuärái: “Abraham wirowia Tumpa jei wae re; jáeramo Tumpa umae jese jeko mbae wae rami.” Jukuärái jei. Jare jokua jeko pewa wi Tumpa jei chupe: “Cheïru.”

<sup>24</sup>Jayawe, ¿mbae pa yaecha ñai kua pe? Yandepuere yarowia Tumpa re, erëi Tumpa re yarowia wae rupiño’ä ko ïru wae reta umaeta yanderé jupi wae. Imeta ko uyekuaa etei mbaembae ikawi wae yayapo wae rupi. Jukuärái ko umaeta reta yanderé jupi wae.

<sup>25</sup>Jae ramiño wi ikawi ko yanemandúa waerä jokua kuña jete re uminganase wae Rahab jee wae re. Jokua kuña mbae ikawi wae uyapo wae jeko pewa ko ïru wae reta umae jese jupi. Echa’ä jae umbiasa kawi jëta pe jokua upurupiäro wae reta Josué omondo wae. Jare joko wi Rahab ombori oyepe reta waerä jowaicho reta wi, omondo reta ye yawe ambie tape rupi. Jukuärái Rahab mbaembae uyapo wae rupi uechaka añetete ko wirowia Tumpa re.

<sup>26</sup>Erëi yarowia Tumpa re wae yaechaka’ä yawe mbaembae ikawi wae yayapo wae rupi, jayawe yarowia wae ikawi’ä maeräwe. Jae ko yanderete mbaeti tekowe onoi wae rami.

## Santiago 3

### Yayandareko kawita ko kërái yayemingeta waerä

<sup>1</sup>Hermano mii reta, awiye tuyeyapo jeta Tumpa iñee re oporomboe wae reta pepite pe. Echa’ä pikuaa kërái ore ndoporomboe wae reta, Tumpa umae ngatuete oreré ïru wae reta wi.

<sup>2</sup>Jare opaete yande reta yayawiñoi ko jeta kërái rái rupi. Erëi ime yawe kía mbaeti uyawi iñee rupi wae, jae ko jeko jupi wae. Jare jae ipuere uyandareko kawi wi opaete jete re awiye waerä uyawi Tumpa koti.

<sup>3</sup>Kua re yandepuere yambijaanga kuärái: Pëti kawayu, yepe tēi tuicha oī, erēi ñañono yawe iyuru pewa iyuru pe, yandepuere yarowa yande yaipota yaraa wae kotī.

<sup>4</sup>Jukuärái wi amo pe yepe tēi chalana wasu tuichaete jare amo pe iwitu täta uipeyu, erëitu iya reta ipuere orowa keti uipota wiraa wae kotī itimón michiete wae pipe.

<sup>5</sup>Jae ramiño wi yande reta, yepe tēi yandeyuru michiete ko, erēi jokua pipe yandepuere yayembutuichaete. Mase. Yande yaikuaa kawi ñaī pëti tata, yepe tēi michi rai jendi, erēi ipuere uñemiái tuicha rupi opa uapī iwira reta.

<sup>6</sup>Jare jukuärái wi ñaniñee kachi wae reta jare ndaye reta tata rami ko, jare jokua jeko pewa jeta mbae ikawi mbae wae uyeyapo. Añetete opaete yanderete pe oī wae ipite wi, mbaeti ye ñru mbae ñanererükumewa wae yandeyuru rami. Jare yande yandesi wi yaa wiwe yanderekowe opa rewa, ñaniñee pëti tata rami ko. Echa'ä jokua yande yae wae jeko pewa ipuere jeta uyeyapo mbae ikawi mbae wae. Jare ¿kiawi ra ou jokua ñee kachi wae? Añawasu wi etei ko ou.

<sup>7</sup>Yande reta yandepuere ñamimaso jeta mbaemimba ambie ye ye wae reta, jare wira reta, jare iwī rupi uyewichi wae reta, jare mbaemimba i rupiwa reta wi. Jare jukuärái yayapo.

<sup>8</sup>Erëitu yandeyuru yandepuere'ä etei ñamimaso. Jae ko pëti mbaemimba pochi wae yandepuere'ä etei ñamiamiri wae rami. Pipe ko ñamoë ñee reta mbayachi yapuruyuka pipe wae rami.

<sup>9</sup>Yandeyuru pe yambutuicha yandeRu Tumpa jee. Pipe wi ko yayepipeyu yanderapicha re, yepe tēi Tumpa uyapo jae echa rami.

<sup>10</sup>Jayawe yandeyuru wi oë ñee yembiadora pewa jare yandeyuru wi oë wi ñee yepipeyu pewa. Erēi kua mbaeti etei ikawi jukuärái, hermano mii reta.

<sup>11</sup>¿Ipuereta ra pëti ikua wiño oë i ikawi wae jare i iro wae?

<sup>12</sup>¿Ipuereta ra pëti iwa wi ía saini reta? ¿Ipuereta ra uva wi ía iwa reta? Ndarau ipuere. Jae ramiño wi ipuereta'ä oë pëti ikua wiño i ikawi wae jare i jembochi wae. Jayawe hermano reta, imeta ko yayemingeta mbae ikawi waeño.

### **Kärái ko arakuaa Tumpa wi ou wae**

<sup>13</sup>Ime yawe kía pepite pe umae iyé iyarakuaa katu wae, jayawe tuechaka teko kawi ñru wae reta pe uñemimichi rewe. Jukuärái ko yaechaka arakuaa añetete wae.

<sup>14</sup>Erēi piñemiro yawe perapicha pe pembasi rewe, jare jaëno pipota piyembutuicha yawe, awiye pere peyupe, “Chearakuaa katu ko.” Echa'ä jukuärái pere yawe, papu ko peī jare pepuereta'ä pikuaku jokua re.

<sup>15</sup>Jokua arakuaa pere tēi ime penoi wae ou'ä ko Tumpa wi jare mbaeti etei ko Espiritu Santo pewa. Jokua nunga arakuaa ko jae kua iwī pewaño jare Añawasu wi ko ou.

<sup>16</sup>Jukuärái yaikuaa, echa'ä ñañemiro jare yayembutuicha yawe, joko pe ime oï ñeräro, jare yeaka, jare opaño kërái rái mbae kachi wae.

<sup>17</sup>Erëi arakuaa Tumpa wi ou wae jupi ko. Jare jokua arakuaa ñanoi yawe, yaikota yandepiakatu rewe jare yandepiawasu rewe. Ndarau yayembutuicha. Yaipararekota yanderapicha. Yandepiakawita, jare yayapota mbae ikawi wae. Jare ñamaeta oyowake rupi opaete wae re, jare ndarau mokui towa yaiko.

<sup>18</sup>Ime yawe kía yeaka uyapikatu wae, jae ko kía temiti oñoti wae rami. Echa'ä kërái jokua temiti jeñita jare ukuakuaata oo oï jare iata, jukuärái wi yande yayapo yawe yandepuere wae rupi pëti ramiño yaiko waerä yandepiakatu rewe, yandereko jekuaeño oya katuta oo oï jupi wae re.

## Santiago 4

### Awiyeta ko yaiko mbaembae iwi pewa reño

<sup>1</sup>¿Maera ra ime yeaka jare ñeräro pepite pe? Tamimbeu pewe. Ime ñeräro, echa'ä ime pepia pe kirëi mbae kachi piyapo waerä. Jare jokua ko pemiamiri oï. Jae ko pëti ñeräro oï pepia pe.

<sup>2</sup>Echa'ä ime mbaembae pipotaete tëi penoi wae, erëi mbaeti penoi. Jáeramo pepuruyuka. Jae nunga wi pemae iru wae imbaembae re pipotaete rewe, erëi pepuere'ä penoi. Jáeramo piyeaka jare piñeräro. Pe reta penoi'ä jokua mbaembae pipota wae, echa'ä piyerure'ä Tumpa pe jese ramo.

<sup>3</sup>Ani aramoi piyerure tëi chupe jese, erëi jae umee'ä pewe. Echa'ä piyerure kawí'ä pepia ikawí'ä oï ramo. Echa'ä jokua mbaembae piyerure jese wae, jaeño pipota piporu piyembiyerowia waeräño.

<sup>4</sup>Tumpa peñono tee ma jae imaerä piko waerä. Jae umenda rami ko pe reta ndiwe. Erëi pe reta awasa uyapo wae rami ko. ¿Pikuaa'ä yerá kua iwi pewa reta opaete seri oyowaicho ñonoï Tumpa koti wae? Jare ¿pikuaa'ä yerá kía uipisi jae reta jeko yawe, jae uyembowaicho ko oï Tumpa koti? Jáeramo kía uipota iko yawe kua iwi jeko rupiño, jae uyeyapo ko oï Tumpa jowaichorä.

<sup>5</sup>Echa'ä Tumpa iñeeriru pe uikuaaka yandewe Tumpa iEspíritu yandepia pe oï wae tuicha rupi yanembiete oï. Jukuärái jei, jare kua uyekuatiaño'ä ko oï.

<sup>6</sup>Yawái kua ñee mii reta, erëi Tumpa tuicha ipiakawi rupi yanembori jupi yaiko waerä jae imaerä. Jukuärái uyekuatía oï Tumpa iñeeriru pe, echa'ä joko pe jei yandewe kuärái: “Tumpa oyowaicho oï uyembutuicha wae reta ndiwe. Erëi ipiakawi oï uñemimichi wae reta pe.” Jukuärái uyekuatía oï.

<sup>7</sup>Jáeramo piñemee Tumpa pe piyapo waerä jae jei wae rupi. Jare piñemimiräta awiye waerä piyapo Añawasu jei wae. Jukuärái piyapo yawe, Añawasu usirita pewi.

<sup>8</sup>Piñemiiru Tumpa ndiwe, jare jae uñemiiruta pe ndiwe. Erëi pe piyawí peï Tumpa koti wae reta, awiye ma piko jukuärái. Pe reta pipota tëi piyeyokui Tumpa pe, erëi



jae nunga wi pipota piko mbaembae iwi pewa reño. Jayawe pemombo peyuwi pepiyemingeta kachi pepia pe oï wae jare piñono pepia Tumpa reño.

<sup>9</sup>Pepiatiti jare piyao Tumpa koti piyawî wae re. Pe reta añawe piyerowia peï, erëi imeta ko pepiatiti. Añawe pepuka peï, erëi imeta ko piyao.

<sup>10</sup>Piñemimichi yandeYa jowai, jare jae pembutuichata oï kuri.

### **Awiye ñaniñera ñru wae reta Cristo re wirowia wae re**

<sup>11</sup>Hermano mii reta, awiye piyemingeta kachi piyé. Echa'ä piyemingeta kachi yawe ñru hermano koti jare piñera jese yawe, Tumpa jei wae koti etei ko piyemingeta kachi peï. Echa'ä Tumpa jei yandewe yayerau päwe waerä. Erëi piñera yawe perapicha re, mbaeti ko piyapo peï Tumpa jei wae. Jaeño ko piyembutuicha peï Tumpa jei wae wi pe reta penoi mbaepuere jese wae rami.

<sup>12</sup>Tumpaño ko jei mbaembae iwi pewa reta uyapota ko wae jare uyapota'ä wae. Jare yande reta jaeño jae jowai yayemboita ñai jae jei waerä yandereko re. Jaeño Tumpa ipuere yanemombo Tatawasurenda pe jare jaeño wi ipuere yanderepi. Jayawe, ¿kía pa ko pe reta piñera waerä perapicha re?

### **Kërái yayemingeta waerä mbaembae yayapota ñai wae rewa**

<sup>13</sup>Piyapisaka mii michi pewa kua chiñee re. Amokue pe reta pere peï kuärái: “Kua ara ani kuriye ndoota ikotia. Jare joko pe nduparawikita noï pëti año pewa numingana waerä korepoti,” pere peï.

<sup>14</sup>Erëi pe reta awiyeta ko piyemingeta jukuärái. Echa'ä pikuaa'ä peï mbae awe kuriye rewa mbae ra uasata oï wae. Pikuaa'ä wi imeñota ra peï kuriye. Añetete perekowe iwiti rami ko, echa'ä uyekuaa michi pewaño jare imambae ukañi.

<sup>15</sup>Jáeramo imeta ko pere kuärái: “YandeYa uipota yawe, nduikota kua pe ani ikotia, jare nduyapota kua jare pea.” Jukuärái ikawi pere waerä.

<sup>16</sup>Erëitu pe reta piyemingeta peï piyembutuicha rewe mbaembae pe retaño piyapo wae re. Kua mbaeti etei ikawi.

<sup>17</sup>Pemandúa kawi kua re: yaikuaa yawe mbae ikawi yayapo waerä wae, erëi yayapo'ä yawe, yayawi ma ko Tumpa koti.

## **Santiago 5**

### **Ikokatu wae reta jeko kachi wae tuikuaa iyupe**

<sup>1</sup>Añawe che jaeta jokua ikokatu wae reta uiporaraka ñonoï pewe wae pe kuärái: Pe pikokatu piko wae reta, piyapisaka kua chiñee re. Ikawi ko piyao waerä peräse rewe, echa'ä outa oï ara ikawi'äete wae pemaerä.

<sup>2</sup>Jare pembaembae ikawi wae reta ndarau etei pembori, echa'ä opata ikumewa oï kuri. Kupii reta opata urükumewa oï peremimonde ikawi oï wae.

<sup>3</sup>Jare jokua oro jare korepoti penoi wae opata ikumewa, echa'ä peupi penoi pemaeräño ramo. Jáeramo peïta kuri teko pe jokua ara piyemboi yawe Tumpa jowai. Jare piporarata peï kuri tata perapi rami. Jukuärái peupi tēi ma peyupe mbaembae ikawi wae kua ara taikuewa rupi.

<sup>4</sup>Jare jokuaño'ä ko piyapo peï. Uparawiki peko pe wae reta umbaewiro tēi ñonoï pewe, erēi pe reta pembiepi'ä etei peï chupe reta. Mase, jokua korepoti pembiete peï chupe reta wae uñeapo oï wae echa yandeYa pe jae uiporaraka waerä pewe jokua re. Jokua umbaewiro wae reta iyengeta ñonoï pekoti, jare yandeYa imbaepuerete wae uyandu oï chupe reta.

<sup>5</sup>Pe pikokatu piko wae reta kua iwi pe peï rambuwe piyekou ma opaete mbaembae ikawiete wae re. Piko ma jaeño perete pembiyerowia waeräño. Pe reta ko jae waka uyemingira ñonoï wae rami. Jae reta uikuaa'ä koiño ma oï ara wiraa reta uyuka waerä. Jare jukuärái wi pe reta jekuaeño piyembiikokatu peï, erēi pikuaa'ä koiño ma oï ara Tumpa uiporaraka waerä pewe.

<sup>6</sup>Pe reta pembijeko ma jeko mbae wae reta jare piyukaka reta wi. Jare jae parawete reta ipuere'ä uyapo mbae awe uyerepi waerä pewi. Jukuärái che jae jokua ikokatu wae reta uiporaraka ñonoï pewe wae pe.

### **Ñamiawätata ko yandepiawasu rewe yaiporara ñai yawe**

<sup>7</sup>Jayawe hermano reta, pepiawasu mii yandeYa ou ye rewa. Mase kērái umaeti wae uäro mbaewiye ikawi wae. Jae uäro ipiawasu rewe tenondewa ama umaeti waerä. Jare jae uäro wi ama jekuaeño oki waerä opa yawiye kawi waerä.

<sup>8</sup>Jukuärái rami ko pepiawasu rewe jare piñemimiräta rewe peärota. Echa'ä uyaro ma oï yandeYa ou ye waerä.

<sup>9</sup>Añetete koiño ma oï yande yayemboi waerä jae jowai. Jáeramo awiye piyengeta ñru hermano reta koti awiye waerä peï teko pe jokua ara.

<sup>10</sup>Jare hermano mii reta, jekuaeño pemandúa jokua kuimbae reta ñee Tumpa wi etei ou wae arakae umimbeu wae reta re. Jae reta yepe tēi uiporara, erēi umiawäta reta ipiawasu rewe. Jayawe pemomoeta ko jae reta jeko.

<sup>11</sup>Echa'ä yande yaikuaa uyekoueteta ko ñonoï kuri jukuärái umiawäta wae reta. Yanemandúa kawi ñai wi jokua kuimbae Job jee wae re. Jae uiporara tuicha rupi, erēi umiawäta kawi opaete. Jare taikue rupi yandeYa uasaete ye ikawi uyapo chupe. Jukuärái yaikuaa yandeYa tuicha rupi yanembipiakatu jare yanderauete ko.

<sup>12</sup>Jare pe reta, ikawi ko pikuaa waerä kua: Pe reta mbae pere yawe, awiye pere Tumpa jowake ani iwi jowake ani ipotawe mbae jowake. Pe pere yawe, “Ayapota,” piyapota ko jukuärái. Jare pere yawe, “Ayapota'ä,” awiyeta ko piyapo wi jukuärái. Jukuäräita ko piyapo awiye waerä peï teko pe.

### **Yandiyerure reta ime onoi mbaepuere**

- 13**Ime yawe kía pepite pe uiporara oï wae, tuyerure Tumpa pe jokua re. Ime yawe kía pepite pe uyerowia oï wae, tumbutuicha Tumpa jee ukäta wae pipe.
- 14**Jare ime yawe kía pepite pe imbaerasi oï wae, tueni Cristo re wirowia wae itenondewa reta uipichi waerä aceite pipe jare uyerure reta waerä Tumpa pe jese yandeYa jee re.
- 15**Jare jae reta uyerure yawe jese wirowia rewe, imbaerasi wae ukuerata. YandeYa etei ko uminguerata. Jare jae uyawi Tumpa koti jeko pewa imbaerasi oï yawe, tuyemimbeu Tumpa pe uñemimichi rewe. Jare Tumpa imanduata'ä chupe uyawi wae re.
- 16**Jáeramo pe reta piyawí yawe Tumpa koti, piyemimbeu peyupe piñemimichi rewe. Jare piyerure piyé Tumpa pe pekuera waerä. Añetete ko, pëti jupi wae ipia rewe uyerure yawe Tumpa pe mbae re, jokua yerure ime onoi mbaepuere.
- 17**Echa'ä yanemandúa ñäi Tumpa iñee arakae umimbeu wae Elías jee wae re. Jae iko pëti kuimbae yande rami. Erëi jae uyerure Tumpa pe ipia rewe awiye waerä oki. Jayawe oki'ä etei mbapi año jare owa yasi rupi.
- 18**Joko wi Elías uyerure ye ipia rewe Tumpa pe oki ye waerä. Jare umbipi oki ye jare ime ye mbaewiye.
- 19**Jayawe hermano mii reta, ime pëti mbae re ye. Ipuere ko kía pepite pe iko wae usiri ma añetete wae wi jare uñatima ye ma teko kachi pe. Erëi ime yawe kía ombori jokua nunga uyerowa ye waerä jeko kachi wi wae,
- 20**pe reta pikuaa jae uepi ma ko mano wi. Jare japicha, yepe tëi jae jeta uyawi Tumpa koti, erëi opa ma uyembái chuwi. Jaeño ma.

## 1 Pedro

### Kua tupapire rewa:

Kua kuatía, jae ko Pedro uikuatía wae. Pedro ko jae pëti wae Jesús jemimboe, jare Juan jare Jacobo ndiwe uñemüru kawiete Jesús ndiwe üru jemimboe reta wi. Jokua año reta rupi romano reta imburuwicha wasu Nerón jee wae umbipi tuicha rupi uiporaraka Jesucristo re wirowia wae reta pe. Jare ndewe ndewe rupi jukuärái uasa opaete kerupi romano reta ime wireko mbaepuere jese wae rupi. Jáeramo Pedro uikuatía jare wiraaka kua tupapire Cristo re wirowia wae reta pe umikirëi reta waerä, awiye waerä opia reta Tumpa jape wi uiporara reta wae jeko pewa.

### 1 Pedro 1

#### Pedro wiraaka saludo

<sup>1-2</sup>Pe Tumpa peparawo wae reta piñemiái pei iwi Ponto, Galacia, Capadocia, Asia, jare Bitinia rupi wae reta, che ko jae Pedro aikuatía ai wae. Jesucristo chemondo jae jee re opaete kerupi amimbeu waerä jesewa. Tumpa jekuaño tuicha tipiakawi pewe jare tuyapo pewe piko waerä pepiakatu rewe. Añawe pe reta ambie iwi pewa rami ko pei kua iwi pe, echa'ä pe reta ara pewa ko. Iyipi wiwe yandeRu Tumpa pekuaño mái iko. Jare jokua arakuaa rupi jae peparawoño mái pe reta piko waerä jae imaerä. Jare Espiritu Santo peño tee piko waerä Jesucristo jei wae rupi jare pepiayoe waerä Tumpa koti Jesucristo juwi uyepiyere wae rupi.

#### Yayerowia Tumpa umee yandewe tekowe opa mbae wae ramo

<sup>3</sup>Jambutuicha yandeRu Tumpa jee! Jae ko yandeYa Jesucristo Tu. Jae yandeparareko wae rupi uyapo ma yandewe yaa piaü ye waerä Espiritu Santo rupi, jare jukuärái ñanoi waerä tekowe ipiaü wae. Jare Jesucristo ikowe ye ou umanokue wae reta ipite wi ramo, yandepuere yaikuaa kawimeta ñanoi jokua mbaembae ikawi wae jae jei umeeta oi yandewe wae. Jare kua mbaembae ñaäro ñai yarowia katu rewe.

<sup>4</sup>Echa'ä Tumpa upi oi yanemaerä ara pe. Jare joko pe jokua mbaembae ndarau etei ikumewa, jare ndarau jüu, jare ndarau ukañi yandewi.

<sup>5</sup>Erëi añawe pe reta peäro pei rambuwe, Tumpa uyandareko oi peré imbaepuere pe, echa'ä pe reta perowia jese ramo. Jare jae jekuaño uyandarekota oi peré ara taikuewa rewa. Jare ara taikuewa uwäe ma yawe, jayawe ramo uyekuaata oi opa ma uyeyapo Tumpa ipiyemingeta yanderepi waerä.

<sup>6</sup>Jáeramo kua jeko pewa, yepe tei aramoi añawe michi pewa piporara ma yembiawái reta opa kërái rái rupi, erëi pe reta ime penoi tuicha yerowia.

<sup>7</sup>Kua yembiawái reta yuweru ma pewe uyekuaa waerä perowia ko Tumpa re añetete rewe. Jare kua ikawiete ko oro wi Tumpa pewarä. Yaikuaa ñai oro awe

yamindikui tata pe opa jae yepái uyembati waerä. Jare jukuärái rami Tumpa uyapo oï pewe yembiawái rupi. Echa'ä jekuaeño perowia yawe Tumpa re yembiawái rupi, jayawe Tumpa uyemingeta kawita peré jare pembutuichakata. Kua uyeyapota oï jokua ara yandeYa Jesucristo ou ye yawe.

<sup>8</sup>Yepe tēi pecha'ä Jesucristo, erēi jeseuwe pe reta peau ko. Jare yepe tēi añawe ndeño pecha, erēi perowia ma jese, jare penoi ko yerowia tuichaete wae yandepuere rape'ä ñanemiäri jese wae.

<sup>9</sup>Echa'ä Cristo re perowia ramo, Tumpa jekuaeño perepi oï mbae kachi wae wi.

<sup>10-11</sup>Jokua re umimbeu Tumpa iñee arakae umimbeu wae reta. Jae reta ima ma umimbeu kērái yande añawe rupi yaiko wae reta yayekouta yaiko Tumpa ipiakawi re. Jae reta uipotaeete uikuaa kērái etei ra ko Tumpa yanderepita iko jare kērái yawe etei ra ko jokua uyeyapota iko. Jáeramo jae reta upiwíwi kawi jokua re. Jayawe yandeYa Cristo iEspíritu uikuaaka chupe reta kērái Cristo uiporarata iko jare taikue rupi uyembutuichakata iko. Jare jukuärái umimbeu jokua kuimbae reta Tumpa iñee arakae umimbeu wae.

<sup>12</sup>Erēi Tumpa uikuaaka chupe reta jokua ñee Cristo rewa wae mbaeti ko jae reta imaerä. Jae ko yanemaerä, yande añawe rupi yaiko wae reta pewarä. Jare añawe pe reta pikuaa ma ko kua mbaembae rewa, echa'ä ou ma umimbeu pewe amokue wae reta ñee ikawi wae umimbeu wae. YandeYa Cristo ombou ma Espíritu Santo ara wi, jare Espíritu Santo imbaepuere rupi jae reta umimbeu jokua ñee. Añetete araiwa retawe uipota echa uikuaa kawi kua mbaembae rewa.

### **Tumpa ñanereni yaiko waerä jupi rupi**

<sup>13</sup>Jayawe Tumpa kua mbaembae uyapo pewe ramo, pemisimi pepiayemingeta piyeyokui waerä chupe. Piko pearakuaa katu rewe. Jukuärái ko pe reta peärota pekirēi rewe Jesucristo ou yeta wae. Echa'ä jokua ara Tumpa ipiakawieteta oï pewe kuri.

<sup>14</sup>Tenonde yawe, pe reta pikuaa'äse Tumpa jare pikose kachi pe reta pere wae rupiño. Erēi añawe pe reta ko jae Tumpa tai reta etei. Jáeramo piko kawita ko Tumpa jei wae rupi.

<sup>15</sup>Tumpa pereni ma piko waerä jae imaerä. Jare Tumpa jupiete ye wae ko. Jáeramo pe reta pikota ko jupi wi opaete mbaembae piyapo wae rupi.

<sup>16</sup>Echa'ä Tumpa jei iñeeriru pe kuärái: “Che ko jae jupi wae. Jáeramo pe reta pikota ko jupi rupi.” Jukuärái jei.

<sup>17</sup>Tumpa – jae ko yande yae chupe “cheRu” wae – jae jekuaeño oyowake rupi umae oï yanderé. Jare taikue rupi pēti pēti wae pe jeita mbaembae yayapo wae re. Jáeramo piko kawi pipiu rewe kua iwi pe pei rambuewe. Añetete pe reta ko jae kua iwi rupi pewata piko waeño, echa'ä pe reta ara pewa ma ko pei.

<sup>18</sup>Tenonde yawe pe reta piko wiraeño pere wae rupi. Jukuärái peramikue reta pemboe. Jare pereko peapiti iko rami awiye waerä pikuaa Tumpa. Erēi añawe

Tumpa perepi ma jokua teko wi. Jare jae mbaeti etei perepi korepoti pe jare oro pe, echa'ä jokua mbaembae opata ko.

<sup>19</sup>Tumpa perepi ma Cristo juwi pe etei. Jare jokua juwi ndaraúi uñewäe chupe jepirä wae. YandeYa Cristo jae ko pëti owecha kuimbae ikawiete wae jare ipere mbaei wae kía wiraa umee Tumpa pe wae rami.

<sup>20</sup>Ndei iwi uyeyapo mbowe yandeRu Tumpa uiparawoño mái Cristo jae perepi waerä. Jare jukuärái jae uyapo ma pewe kua ara taikuewa reta pe, echa'ä ou ma ikawi waerä pewe.

<sup>21</sup>Jare kua Cristo uyapo pewe wae rupi pe reta piyeko pei Tumpa re. YandeRu Tumpa jae ko umbijekowe ye Cristo ueru umanokue wae reta ipite wi wae. Jare jae umbijekowe ye ma yawe, umee chupe mbaepuere jupiete ye wae. Jukuärái Tumpa uyapo pe reta pikuaa waerä pepuere perowia katu jese umee waerä pewe opaete jae jei umeeta pewe wae.

<sup>22</sup>Pe reta piyandu ma ñee añetete wae Cristo rewa jare perowia ma jese. Jare jukuärái añawe Espíritu Santo rupi pepiayoeka ma Tumpa koti. Jáeramo añawe pepuere piyerau päwe añetete rewe. Jayawe jekuaeño piyerau mii pepia rewe.

<sup>23</sup>Echa'ä pe reta pea piau ye ma ko jare penoi ma tekowe ipiau wae. Kua nunga tekowe ndarau opa, echa'ä ou'ä ko peru jare pesi wi. Ou ko Tumpa ñee rupi. Jare Tumpa ñee jekuaeño ikota jaeño mái pewa.

<sup>24</sup>Echa'ä jukuärái jei Tumpa ñeeriru pe: “Opaete iwi pewa reta ñana rami ko. Jare opaete jae reta ipöra wae ñana ipoti rami ko. Echa'ä kërái ñana ipiru jare ipoti reta opa usururu rami, jukuärái wi iwi pewa reta ipiräta opata ko jare umanota reta.

<sup>25</sup>Erëi yandeYa ñee ikota jaeño mái pewa.” Jukuärái uyekuatía oi. Jare kua ko jae ñee ikawi wae uyemimbeu pewe wae.

## **1 Pedro 2**

<sup>1</sup>Jáeramo peya peyuwi opaete mbaembae ikawi mbae piyapo wae. Awiye ma pepurumbitawi. Jare awiye ma piko mokui jowa wae rami. Awiye ma piñemiro peyupe. Jare awiye ma piyemingeta kachi perapicha koti.

<sup>2</sup>Kërái sambiai oa ramo wae ikambúe rami, jukuärái wi pe reta piyeta ko neche uyea mbae wae ara pewa – jae ko Tumpa ñee. Piyemboe jese pekirëiete rewe pepiräta waerä tekowe opa mbae wae penoi wae rupi.

<sup>3</sup>Echa'ä pikuaa ma yandeYa ipiakawi ko pewe.

### **Jesucristo ko jae pëti ita ipöraete jare jepiete wae rami**

<sup>4</sup>YandeYa Jesús ko jae pëti ita tekowe onoi wae rami jare tëta iyapoa reta wiriro omombo iyuwi reta wae rami. Erëi yepe tëi jeta wae reta wiriro Jesús, jese wae jae ko yandeRu Tumpa etei uiparawo wae. Jare Tumpa pewarä jae ko pëti ita ipöraete jare jepiete wae rami. Jare pe reta perowia ma jese ramo,

<sup>5</sup>Tumpa peapo oï pëti tupao wasu rami Espíritu Santo iko pipe waerä. Añetete pe reta ko jae jokua tupao wasu pewa ita tekowe ime onoi wae reta rami. Jukuärái Tumpa peñono tee oï piko waerä sacerdote retarä. Echa'ä jae uipota pe reta piyeyokui waerä chupe jare piyapo waerä jokua mbaembae jae umbiyerowia wae. Jare jukuärái pepuere piyapo Jesucristo pembedi oï wae rupi.

<sup>6</sup>Yaikuaa kua mbaembae añetete ko, echa'ä Tumpa jei ñeeriru pe Cristo rewa kuärái: “Mase, añono aï pëti wae Israel pewa reta ipite pe. Che ko aiparawo, jare jae ikota ita tenondewaete ikawiete jare jepiete wae tëta iyapoa uiporu wae rami. Jare ipotawe kía wirowia jese wae ndarau imara upita.” Jukuärái uyekuatía oï.

<sup>7</sup>Jayawe pe reta Cristo re perowia wae reta, pemaerä Cristo ko jae pëti ita ipöraete jare jepiete wae rami. Erëi jukuärái'ä ko oï Cristo re wirowia mbae wae reta pewarä. Chupe reta Cristo ko jae pëti ita tëta iyapoa reta wiriro omombo iyuwi reta wae rami. Erëi yepe tëi jae reta wiriro, jesewe Cristo uyeyapo ma chuwi reta ita ikawiete ye wae rami opaete iru ita reta tëta pewa wi.

<sup>8</sup>Jare jae nunga wi Cristo ikota pëti ita rami ipotawe wae kía ipisapää jese waerä. Echa'ä jeta wae reta ipisapääta oa oo rami, jare jukuärái ndarau uepiti reta tekowe opa mbae wae. Kua nunga reta uyapisaka'ä Tumpa ñee re, jare jokua jeko pewa ipisapää reta rami. Echa'ä Tumpa jeiño mái jokua uyeyapo waerä.

#### **Mbaembae ikawiete wae Tumpa uyapo yandewe wae**

<sup>9</sup>Erëi pe reta ko jae Tumpa uiparawo wae reta. Pe reta ko jae sacerdote reta piyeyokui peï yaneMburuwicha wasu ara pewa pe. Jare Tumpa peñono tee ma pe reta piko waerä jae imaerä, pemimbeu waerä kërái jokua jae uyapo wae ikawiete ye ko. Echa'ä tenonde yawe pikuaa'ä piko añetete wae Tumpa rewa jare jukuärái pikose pütumimbi pe rami. Erëi añawe jae uyekuaaka ma pewe, jare jukuärái pereni ma ikoti jokua pütumimbi wi piko waerä tembipe ikawiete wae pe.

<sup>10</sup>Tenonde yawe pe reta Tumpa pewa'ä piko. Erëi añawe Tumpa pewa ma ko peï. Tenonde yawe Tumpa iarasi uitita tëi iko peré. Erëi añawe jae peparareko ma.

#### **Yaechaka teko kawi Tumpa re wirowia mbae wae reta ipite rupi**

<sup>11</sup>Cheiru puau mii wae reta, yande ko jae kua iwi rupi uwata iko waeño. Ambie iwi pe opou iko waeño ko yande reta. Jáeramo che pumiñera awiye piko pere wae rupiño. Echa'ä jukuärái piko yawe, mbaembae pekirei wae kachi ko Tumpa jowai jare perekowe jowaicho ko wi.

<sup>12</sup>Pechaka mii teko kawi Tumpa re wirowia mbae wae reta ipite rupi. Añawe jae reta uyemingeta tëi kachi pekoti pereko kachi wae echa rami. Erëitu pereko ikawi oï yawe, jae reta uechata jare aramoi ipiakueeta kuri Tumpa koti. Jayawe uwäe yawe ara opaete wae uyemboi waerä Tumpa jowai, jae reta umbutuichata ñonoï Tumpa jee pereko pewa.

#### **Ñañeñono yayapo waerä mburuwicha reta jei yandewe wae**

<sup>13</sup>Ikawi'äete ko yandereko pewa ñru wae reta kachi uyemingeta waerä yandeYa koti. Jáeramo piyapo opaete mburuwicha reta kua iwi pewa jei pewe wae. Kua yandeiwi pe mburuwicha wasu opaete wae re onoi mbaepuere.

<sup>14</sup>Jare jae ombou ñru mburuwicha reta uiporaraka waerä mbae kachi wae uyapo wae reta pe jare umbutuicha reta waerä mbae ikawi wae uyapo wae reta. Jáeramo piyapo mii opaete wae jae reta jei wae rupi.

<sup>15</sup>Echa'ä Tumpa uipota kua mbae ikawi wae piyapo wae rupi pemikii waerä jokua pekoti kachi uyemingeta wae reta. Jae reta ko jae iyarakuaa mbae echa; jáeramo uyemingeta ñonoï uikuaa mbae rewe.

<sup>16</sup>Tumpa peyora ma ko pereko kachi wae wi. Añawe pe reta ko jae Tumpa pe piyeyokui wae reta. Jáeramo piko mii jukuärái. Awiye pere peyupe kuärái: "Tumpa cheyora ma. Jáeramo chepuere ayapo mbae kachi wae chepiawiwe rewe." Awiye pere jokua.

<sup>17</sup>Jare pipiu opaete wae wi. Peau opaete Cristo re wirowia wae reta. Pipiu Tumpa wi jare mburuwicha wasu wi.

### **Kärái pione reta uyeyokuita ko ipatrón reta pe**

<sup>18</sup>Uyeyokui wae reta pepite pe ñonoï wae tuyapo uipiu rewe ipatrón jei wae rupi. Awiye patrón ipiakawi jare ipiawasuwae wae reta peño tuyapo kawi reta mbarawiki. Jae nunga wi tuyapo kawi reta mbarawiki patrón jeko pochi wae reta pe.

<sup>19</sup>Echa'ä uyeyokui wae reta uiporara yawe jupi mbae rewe, jare umiawäta reta yawe Tumpa wi uipiu reta ramo, jokua umbiyerowia Tumpa.

<sup>20</sup>Erëi jae reta uyapo yawe mbae kachi wae, jare ipatrón uiporaraka chupe reta jokua jeko pewa yawe, jupi ko uiporara reta waerä jokua re. Jare yepe tēi umiawäta reta jokua uiporara reta wae, jeseuwe mbaeti mbae re Tumpa umiñatima waerä chupe reta. Erëi jae reta uiporara yawe mbae ikawi wae uyapo reta wae re, jare umiawäta reta yawe, kua ko jae Tumpa umbiyerowia wae.

<sup>21</sup>Echa'ä jokuaerä ko Tumpa ueni reta. YandeYa Cristo uiporara yanderé, jare jukuärái uechaka yandewe kärái ñamiawäta waerä yaiporara wae rupi. Jayawe pemomoe mii jae jeko.

<sup>22</sup>Cristo uyapo'ä etei ko mbae kachi wae, jare upurumbitawi'ä etei ko wi.

<sup>23</sup>Jare yepe tēi ñru wae reta jei mbae ikawi mbae wae ikoti, erëi Cristo mbaeti etei umiñatima chupe reta. Jare jae uiporara yawe jowaicho reta ipo pe, jae uyepi'ä etei jowaicho reta re. Jaeño oñono reta Tumpa ipo pe, Tumpa uyapo chupe reta waerä jupi wae.

<sup>24</sup>Yande jeta ma yayawi Tumpa koti. Erëi Cristo uyekutuka iko kurusu re yawe, jae etei uiporara jete pe yanderé jokua teko ñanoi wae opa umbái waerä yandewi. Jare jukuärái Cristo uyapo yandepuere waerä yaiko jupi rupi. Jare jukuärái ko



yandepuere yayapo, echa'ä yande reta ñamano rami ma ko yandereko kachi wi. Jare Cristo ipere wae rupi yakuera ma ko Tumpa koti.

<sup>25</sup>Tenonde yawe pe reta pewataiño piko owecha ukañi wae rami. Erëi añawe peyu ye ma ko Cristo koti. Jare jae umae jare uyandareko oï peré pëti owecha iyandarekoa rami.

## 1 Pedro 3

### Kërái yureko kawi waerä umenda wae reta

<sup>1-2</sup>Jae nunga wi che tae kuña reta pe kuärái: Tuiko reta ime jei wae rupi. Jare tuechaka reta teko kawi chupe reta. Amokue kuimbae wirowia'ä Tumpa iñee re. Erëi jae reta uecha yawe jembireko jeko kawi ikoti wae, aramoi uipotata wirowia Tumpa iñee re jembireko umimbeu mbae chupe rewe.

<sup>3</sup>Jare kuña reta awiye tuiportaete tuñemimaepöra mbaembae jete pe uyekuaa wae rupi. Echa'ä jeta kuña reta jukuärái uyapo ñonoï. Umbiepi reta jeta korepoti pe uyapo waerä opaño kërái raí ía. Jare oñono reta iyé mbaembae oro pewa jare omonde reta temimonde jepiete wae jukuärái uñemimaepöra waerä.

<sup>4</sup>Erëi kuña Cristo re wirowia wae reta ikawiete ko uñemimaepöra waerä ipia pe iñee kawi rupi jare ipiawiwe rupi. Echa'ä kua nunga ndarau opa jare ikawiete ko Tumpa jowai.

<sup>5</sup>Jukuärái rupi ko uñemimaepöra arakae kuña Tumpa re wirowia wae reta. Jae reta yureko ime jei wae rupi.

<sup>6</sup>Yanemandúa kawi ñaï Sara re. Jae uyapo uipiu rewe Abraham jei chupe wae rupi. Jukuärái wi kuña reta uyapo yawe ikawi wae jare mbaeti yawe ukiye uyapo reta waerä ime jei chupe wae, oïta reta Sara rami.

<sup>7</sup>Jae nunga wi che tae kuimbae reta pe kuärái: Tuiko kawi reta jembireko ndiwe. Timandúa reta kërái kuña reta ipiräta'ä ko chuwi reta. Jáeramo tuyandareko kawi jese reta jare tumbuicha reta, echa'ä kuña reta uyekou ñonoï wi tekowe opa mbae wae re ime reta ndiwe. Erëi kuimbae reta uyandareko kawi'ä yawe jembireko re, yawaita chupe reta uyerure waerä Tumpa pe mbaembae re.

### Kërái yaiko waerä opaete wae ndiwe

<sup>8</sup>Jayawe opaete kua mbaembae rupi aipota jae pewe kuärái: Piko kawi pëti ramiño päwe rewe. Piyeparareko. Piyerau päwe rewe. Pepiakawi jare piñemimichi peyupe.

<sup>9</sup>Kía mbae ikawi mbae wae uyapo pewe yawe, awiye pemiñatima chupe ikawi mbae wae rupi. Jae ramiño wi kía mbae kachi wae jei pewe yawe, awiye pemiñatima chupe. Jaeño pere chupe: “Tumpa tuyapo ikawi wae ndewe.” Echa'ä Tumpa pereni ma piyapo waerä ikawi wae ñru wae reta pe. Jare jukuärái piyapo yawe, Tumpa uyapota ikawi wae pewe wi.

<sup>10</sup>Echa'ä Tumpa ñeeriru pe uyekuatía oï kuärái: “Kía uipota iko yawe ipiawiwe rewe jare uyekou ara reta re wae, awiye tuyemingeta ikawi mbae wae japicha reta koti, jare awiye tiyapu wi.

<sup>11</sup>Tusiri ikawi mbae wae wi, jare tuyapo ikawi wae. Jekuaeño tueka kërái iko waerä ipiakatu rewe opaete wae ndiwe.

<sup>12</sup>Echa'ä yandeYa jekuaeño uyandareko oï jupi wae reta re jare uyapisaka oï uyerure reta chupe wae re. Erëi yandeYa oyowaicho oï mbae ikawi mbae uyapo wae reta ndiwe.” Jukuärái uyekuatía oï.

### **Yaiporara mbae ikawi wae yayapo wae rewa**

<sup>13</sup>Pe reta ikawi waeño pekirëi piyapo yawe, ¿kía ra uipotata uyapo pewe ikawi mbae wae jokua re?

<sup>14</sup>Erëitu aramoi piporarata peï ikawi wae piyapo wae re. Erëi jukuärái yawe, piyekouta peï. Echa'ä Tumpa umiñatimata oï pewe kuri jokua re. Jayawe ime yawe kía uipota uiporarakata pewe wae, awiye pekiye chuwi jare awiye wi piyembipia'ä jese.

<sup>15</sup>Pipiü Cristo wi añetete rewe. Echa'ä jae ko peYa, jare jae ipo pe oï opaete mbaembae. Aramoi imeta kía upirandu pewe: “Maera pa pemae peï Tumpa koti perowia katu rewe?” jeita. Jáeramo jekuaeño piyeyapikatuta ko peï pemimbeu chupe waerä. Erëi pemimbeuta ko chupe ñee kawu rewe jare pipiü rewe.

<sup>16</sup>Jare imeta kía kía reta aramoi kachi uyemingeta oï pekoti. Jáeramo awiye piyapo jokua pepia pembijekota oï jese wae, jae reta imara waerä kachi uyemingeta peré wae re. Echa'ä uikuaata reta kërái piyapo ikawi waeño Cristo re perowia ramo.

<sup>17</sup>Erëi aramoi pe reta piporarata ikawi wae piyapo jeko pewa. Jokua ipuereta ko uyeyapo Tumpa uipota yawe, jare jukuärái yawe, ikawita ko. Erëi piporara yawe mbae ikawi mbae piyapo wae jeko pewa, uyekuaata'ä mbae awe.

<sup>18</sup>Kua pe ikawi ñamae waerä Cristo re. Yepe tëi jae ko jupi wae, erëitu jae uiporara yande jupi mbae yaiko wae reta re. Yande jeta yayawi Tumpa koti. Erëi Cristo umano pëti weseño jaeño mái pewa jokua mbaembae yayawi wae re, jukuärái yandepuere waerä yaya Tumpa re. Cristo uyeyapo kuimbaerä. Jáeramo jae umano yawe, umano jete pe yande rami. Erëitu ikowe ye ou umanokue wae reta ipite wi Espiritu Santo imbaepuere rupi.

<sup>19</sup>Jare jukuärái rupi jae oo umimbeu kiaepe espíritu reta uñeñapiti ñonoï wae pe.

<sup>20</sup>Arakaete rupi, Noé chalana wasu uyapo iko rambuwe, kua reta uyapo'ä Tumpa jei wae rupi yepe tëi Tumpa ipiawasute chupe reta. Jare ou yawe jokua iporu wasu, mbowi miño kuimbae jare kuña reta oyepete reta chalana wasu pe. Añetete Tumpa jaeño jokua juri wae reta uepi iporu wasu wi.

<sup>21</sup>Jare jokua ko jae pëti yembijaanga yembisakambu re. Echa'ä jukuärái rupi pe reta penoi tekowe opa mbae wae. Erëi mbaeti i peyoe wae rupi penoi tekowe opa mbae

wae. Pe reta penoi tekowe opa mbae wae, echa'ä Tumpa uyapo ma pei waerä jae jowai pepia pembijeko mbae rewe. Jare jokua ko pemimbeu piyembisakambuka yawe i pe. Añetete yandeYa Jesucristo ikowe ye ou umanokue wae reta ipite wi, jare jokua rupiño ko yande ñanoi tekowe opa mbae wae.

<sup>22</sup>Jare añawe jae oo ye ma ara pe jare joko pe oï Tumpa iyakata koti. Jare ime onoi mbaepuere araiwa reta re, jare añã reta re, jare opaete ara pe mbaepuere onoi wae reta re.

## 1 Pedro 4

### Yaiko Tumpa pewarä

<sup>1</sup>Cristo uiporara yanderé kua iwí pe iko rambuewe. Jáeramo pe reta piyeyapikatuta ko piporara waerä jae rami. Echa'ä ime yawe kía uiporara Cristo re wirowia jeko pewa wae, jae jeko kachi wae ipiräta'ä ma jese jete re.

<sup>2</sup>Jare jukuärái jae jekowe opa rewa mbaetita ma iko jete uipota uyapo wae rupi. Jaeño uipotata iko Tumpa jei wae rupi.

<sup>3</sup>Pe reta ima rupi piyapose Tumpa re wirowia mbae wae reta ikawi echa chupe wae. Jetaete ma piyapo. Piyapose mbaembae perete uipota uyapo wae rupi, jare awasa rupi, jare sawipo rupi. Piyapose arete jare kau wasu opa mbaembae uasa wae. Jare yepe tēi tumparaanga reta kachi ko Tumpa jowai, erēi pemiadorase jese reta. Erēi añawe peya ma ko jokua mbaembae.

<sup>4</sup>Jare Tumpa re wirowia mbae wae reta pe yawái uikuaa waerä maera ra piyapo'ä ma jae reta ndiwe opaete kua mbaembae ikawi mbae wae reta. Jáeramo jae reta uyemingeta ñonoï kachi pekoti.

<sup>5</sup>Erēi pēti ara jae reta uyemboita ñonoï Tumpa jowai umimbeu reta waerä jae reta mbae uyapo wae. Jukuärái uyapota reta jokua ara umanokue wae reta jare ikowe wae reta wi uyemboi reta yawe Tumpa jowai.

<sup>6</sup>Jokuaerä ko ñee ikawi wae Cristo rewa uyemimbeu iko wi jokua añawe umano ñonoï wae reta pe. Echa'ä jukuärái rupi, yepe tēi jae reta umano opaete wae reta rami, erēi jae reta iä ipuereta iko Tumpa ndiwe.

<sup>7</sup>Uyaro ma oï opaete mbaembae reta ime oï wae iyapi waerä. Jáeramo piko pearakuaa katu rewe jare pemaē kawi rewe pepuere waerä piyerure kawi Tumpa pe.

<sup>8</sup>Jare opaete mbaembae reta wi, tenonde imeta ko tuicha rupi piyerau päwe rewe waerä. Echa'ä piko yawe jukuärái, ndarau ma pemandúa peyupe mbaembae kachi piyapo wae re.

<sup>9</sup>Jae nunga wi piyembiasa kawi mii perēta pe piyengeta mbae rewe.

<sup>10</sup>Tumpa ipiakawi ramo, umee ma yandewe pēti pēti wae pe yaikatu yayapo waerä mbae. Jayawe piyeyokui kawita ko peyupe jokua pikatu piyapo wae rupi. Jare jukuärái piyapo yawe, opa kērái rái uyekuaata peré Tumpa ipiakawi wae ko.

**11**Jayawe ime yawe kía Tumpa umee chupe iñeengatu uyemingeta waerä wae, tuyemingeta Tumpa etei uyemingeta oï wae rami. Jare ime yawe kía Tumpa umee chupe uyeyokui waerä ñru wae reta pe wae, tuyeyokui miräta Tumpa umee chupe wae rupi. Jukuärái ko piyeyokuita peyupe. Jare jukuärái piyapo yawe, jayawe opaete mbaembae piyapo wae rupi, pepite pe uyekuaata oï Jesucristo imbaepuere jare jukuärái Tumpa jee uyembutuichakata oï. YandeRu Tumpa tonoi opaete mbaepuere, jare jae jee tuyembutuichaka jaeño mái pewa. ¡Jukuärái tuiko!

### **Yaiporara yawe Cristo re yarowia jeko pewa, yayekouta ñäi**

**12**Cheïru puau mii wae reta, awiye pepiakañi añawe kua tuicha piporara peï wae re. Echa'ä kua nunga mbaembae uasa ñotái ko uyekuaa waerä añetete ko perowia peï Tumpa re. Jáeramo awiye pere: “¿Maera ra kua uasa oï chewe?”

**13**Piyerowiaño. Echa'ä piporara wae rupi piñemïru peï Cristo ndiwe. Jare jokua re piyerowiaeteta peï kuri jokua ara Cristo ou ye yawe imbaepuere jembipete rewe.

**14**Jáeramo ñru wae reta jei yawe mbae ikawi mbae wae pekoti Cristo re perowia jeko pewa, añetete piyekouete peï. Echa'ä Tumpa iEspiritu Santo jare jae imbaepuere jupiete wae oï pe reta ndiwe ramo.

**15**Erëi awiye kía pepite pe oï wae tupuruyuka, jare awiye timonda, jare awiye tuyapo ikawi mbae wae, jare awiye tuyemiinge opaño mbae pe. Echa'ä piyapo yawe kua nunga mbaembae, piporarata peï.

**16**Erëi piporara yawe Cristo re perowia jeko pewa, awiye pemara. Pembutuicha Tumpa jee, echa'ä Cristo peapo ma imaerä ramo.

**17**Jare yande yaikuaa yaiporara ñotái ko, echa'ä uwäe ma ara Tumpa umbipi waerä umiñatima iwi pewa reta pe kërái mbaembae uyapo reta wae re. Jare kua uyembipita yande reta ndiwe, yande Tumpa jëtararä yaiko wae reta. Erëi uyembipi ma jukuärái yande ndiwe yawe, uasaete yeta ndipo kuri jokua ñee ikawi wae wirowia mbae wae reta pe. Echa'ä jae reta wirowia'ä Tumpa iñee chuwi etei ou wae re.

**18**Jare kërái Tumpa iñeeriru pe uyekuatía oï rami: “Yawái yawe jupi wae reta pe onoi waerä tekowe opa mbae wae, uasaete yeta ndipo jokua jupi mbae wae reta pe jare jeko kachi wae reta pe.” Jukuärái uyekuatía oï.

**19**Jáeramo Tumpa jei wae rupi uiporara wae reta jekuaeño tuyapo ikawi wae jare tuñeño reta Tumpa ipo pe. Echa'ä Tumpa ko jae yandapoa, jare yandepuere yarowia katu jese uyandareko waerä yanderé.

## **1 Pedro 5**

### **Pedro umbiarakuaa Cristo re wirowia wae reta itenondewa reta**

**1**Añawe pe Cristo re perowia piko wae reta, che aipota ambiarakuaa petenondewa reta kuärái: Che ko jae peparawiki ñru. Jare che aecha cheresa pe etei kërái Cristo

uiporara yanderé. Jare Cristo ou ye yawe imbaepuere jembipete rewe, che wi ayerowiata pe reta ndiwe. Jáeramo che pumiñera

<sup>2</sup>piyandareko kawi waerä opaete hermano reta Tumpa oñono pepo pe wae re, echa'ä jae reta ko jae Tumpa imaerä iko wae reta. Piyandareko mii jese reta kërái owecha iyandarekoa uyandareko iowecha reta re rami. Pemae kawi jese reta piyerowia rewe jare kía jei mbae pewe rewe, echa'ä jokua ko jae Tumpa uipota wae. Jáeramo piyapo mii pekirëi ngatu rewe. Awiye piyapo pipota korepoti pemingana ramoño.

<sup>3</sup>Jare pechaka teko kawi chupe reta. Awiye piyokui uyeyokui pewe wae reta rami. Echa'ä Tumpa umee pewe piyandareko kawi waerä jese reta.

<sup>4</sup>Jare jokua ara Cristo ou ye yawe, jae umiñatimata oï pewe reparawiki re. Echa'ä yandeYa Cristo ko jae jese wirowia wae reta itenondewa itenondewa yuapi ye wae. Jare jae umeeta oï pewe kuri pëti coronaikawiete ye wae jare ikumewa mbaei wae.

<sup>5</sup>Taurusu wae reta tuyapo itenondewa reta jei wae rupi. Jare opaete pe reta, piyeyokuita ko peyupe piñemimichi rewe. Echa'ä Tumpa ipiakawi uñemimichi wae reta pe, erëi jae oyowaicho uyembutuicha wae reta ndiwe.

<sup>6</sup>Tumpa imbaepuere tuichaete ko. Jáeramo piñemimichi jae jowai, jae pembutuichaka waerä jae uipota yawe.

<sup>7</sup>Peya Tumpa ipo pe opaete piyembipia'ä jare pepiatiti peï jese wae, echa'ä jae uyandareko oï peré ramo.

<sup>8</sup>Jekuaeño piyandareko piyé jare piko pearakuaa katu rewe. Echa'ä perowaicho Añawasu ko jae yawapita tuicha wae uñee uwata oï wae rami jare ueka oï kía jou waerä rami.

<sup>9</sup>Erëi awiye piyapisaka jese. Piñemimiräta chuwi Tumpa iñee re. Pikuaa ko opaete iwï rupi yandehermano reta uiporara ñonoï wi pe reta piporara rami.

<sup>10</sup>Erëi piñemikirëi. Echa'ä michi pewaño piporarata peï. Jare opa ma piporara yawe, Tumpa etei pemupüata, jare pemiatangätuta, jare pemimiräta kawita awiye waerä piyepiaka. YandeRu Tumpa ipiakawi tuichaete ko. Jae ko ñanereni ñai waerä pëti ramiño Cristo re jare jukuärái yayekou waerä jae ndiwe jaeño mái pewa.

<sup>11</sup>YandeRu Tumpa jekuaeño tonoi opaete mbaepuere, jare jae jee tuyembutuichaka jaeño mái pewa. ¡Jukuärái tuiko!

### **Pedro wiraaka saludo**

<sup>12</sup>Kua mbowiño ma aikuatía pewe pumikirëi waerä, jare araaka ai pewe hermano Silvano ndiwe. Jae ko kuimbae arowia katu jese wae. Opaete kua aikuatía pewe wae rupi aipota pikuaa waerä Tumpa ipiakawi añetete ko. Piñemimiräta jese.

<sup>13</sup>Opaete wae reta Cristo re wirowia wae kua Babilonia pe ñonoï wae omondo pewe saludo. Tumpa uiparawo wi jae reta pe reta reparawo rami. Jae ramiño wi Marcos omondo pewe saludo. Jae ko cherai rami.

<sup>14</sup>Jare pe reta piyembisaluda yawe, jekuaeño piñekuäwa piyerau päwe rewe. Tumpa tuyapo pewe piko waerä pepiakatu rewe, opaete pe pëti ramiño pei Cristo re wae reta. Jukuärái tuiko.

## 2 Pedro

### Kua tupapire rewa:

Kua kuatía, jae ko iru tupapire Pedro uikuatía wae. Kua re jae uikuatía ma mokui. Pedro ko jae pëti wae Jesús jemimboe. Jokua tenondete tupapire pe Pedro uikuatía Cristo re wirowia wae reta pe umikirëi reta waerä. Echa'ä jae reta uiporara yureko Cristo re wirowia mbae wae reta ipo pe. Erëi kua wese Pedro uipota umimbeu chupe reta uyandareko kawi waerä iyé, echa'ä imeta oporomboeraanga wae reta jae reta ipite rupi etei. Jae nunga wi imeta amokue wae reta jeita: “Jesucristo ndarau ou ye.” Jayawe Pedro kua uikuatía wae rupi omboe reta wi jokua rewa jare uikuaaka chupe reta mbaembae uasata oï ara taikuewa pe wae rewa.

### 2 Pedro 1

#### Pedro wiraaka saludo

<sup>1</sup>Pe Jesucristo re perowia wae reta, che ko jae Simón Pedro aikuatía ai pewe wae. Jesucristo chemondo jae jee re opaete kerupi amimbeu waerä jesewa, jare chupe ko ayeyokui ai. Jesucristo ko jae yandeTumpa jare yandeRepi wae. Jare jae jupiete ramo, umee pewe jae iñee ikawiete wae jese perowia waerä kërái jae umee orewe wae rami.

<sup>2</sup>Tumpa jekuaeño tuicha tipiakawi pewe jare tuyapo pewe piko waerä pepiakatu rewe, echa'ä pe reta pikuaa Tumpa jare yandeYa Jesús ramo.

#### Cristo re wirowia wae reta kërái yureko waerä

<sup>3</sup>Tumpa ñanereni ma yayekou waerä imbaepuere jupiete wae re jare ipiakawi re. Jare añawe Tumpa yaikuaa ramo, jae imbaepuere rupi umee ma yandewe opaetei yaiko jupi waerä jae jowai jare yambiyerowia waerä wi.

<sup>4</sup>Jare Tumpa imbaepuere jare ipiakawi rupi yayekou ñai mbaembae ikawiete ye wae re Tumpa jei umeeta iko yandewe wae re. Jare pe reta kua re piyekou pei ramo, pereko ipuere iko Tumpa jeko rami. Jare jukuärái kua iwi pewa reta jeko ikawi mbae wae ndarau pererükumewa. Añetete kua iwi jeko rupi yureko wae reta uñererükumewa ma, echa'ä jaeño uipota uyapo reta mbae ikawi mbae wae.

<sup>5</sup>Jayawe kua mbaembae ikawi wae Tumpa uyapo pewe ramo, piñemiatangätu päwe rewe pechaka waerä pereko kawi rupi perowia ko Tumpa re. Jare jekuaeño pemiiru peraa jokua teko kawi pe arakuaa.

<sup>6</sup>Jare jekuaeño piñemiatangätu awiye waerä perete uipota wae piyapo. Jare jekuaeño jeiete pemiawäta yembiawái reta. Jare piñemiatangätu wi peya katu waerä Tumpa jeko jupi wae re,

<sup>7</sup>jare pepiakawi waerä peyupe, jare piyerau waerä päwe rewe.

<sup>8</sup>Echa'ä opaete kua jekuaeño piyapo yawe, pe reta pikuaa kawieteta Jesucristo jare jukuärái piyeyokui kawita chupe.

<sup>9</sup>Erëi kía opaete kua mbaembae uata chupe wae, jae ko michi miño umae wae rami ani jesa mbae wae etei Tumpa pewarä. Aramoi jae iñakañi ma Tumpa opa ko oyoe chuwi teko ime wireko Tumpa koti wae.

<sup>10</sup>Jáeramo hermano mii reta, piñemiatangätu peyupe pechaka waerä teko kawi opaete wae jowake. Echa'ä jukuärái piyapo yawe, uyekuaata añetete yepe Tumpa peparawo ma jare pereni ma piko waerä jae imaerä, jare jukuärái ndarau etei pepia yandeYa jape wi.<sup>11</sup>Jare ara uwäe ma yawe yandeRepí wae yandeYa Jesucristo iko waerä opaete wae imburuwicha wasurä jaeño mái pewa, jae pembiasa kawita tuicha uyerowia rewe.

<sup>12-13</sup>Kua mbaembae pe reta pikuaa kawi. Jare pepiräta ma jese añetete wae ko. Erëi che jekuaeño pumimanduata kua mbaembae re awiye peakañi chuwi waerä. Jare arowia ikawi ko ayapo waerä jukuärái che imeño ai rambuewe pe reta ndiwe kua cherekowe pe.

<sup>14</sup>Echa'ä yandeYa Jesucristo uikuaaka ma chewe imambae amanota ai.

<sup>15</sup>Jáeramo che aipota ayapo opaete chepuere wae rupi pe reta jekuaeño pemandúa waerä kua mbaembae re che amano ma yawe kuri.

### **Pedro uecha yandeYa Cristo imbaepuere jembipete wae**

<sup>16</sup>Ore numimbeu ma ko pewe kërái yandeYa Jesucristo ou yeta oi imbaepuere jembipete rewe. Erëi jukuärái numimbeu pewe yawe, numimbeu'ä ko pewe ore ndoe waeño. Ore nduecha oreresa pe etei yandeYa imbaepuere jembipete wae.

<sup>17-18</sup>Ore nduiko jae ndiwe yandeRu Tumpa umbiyekuaa yawe Jesús imbaepuere jembipe wae. Kua uyeyapo jokua iwitu wasu Tumpa oñono tee wae re. Jare nduyandu wi ñee ara wi ou wae jei: “Kua ko jae cheRai auate wae. Jae chembiyerowiaete.” Jukuärái jei.

<sup>19</sup>Jokua ñee re pe reta pepuere perowia. Jae nunga wi pepuere perowiaete Tumpa iñee arakae umimbeu wae reta uikuatía wae re. Jare ikawi ko pe reta piyapisaka kawi waerä jese. Echa'ä jae reta iñee pëti mechero pítumimbi pe jendi oi wae rami ko. Jare jukuärái ikota Jesucristo ou ye rewa. Jokua ara uwäe yawe, Cristo ikota yasitata ndimbowe uyekuaa wae rami, echa'ä jae umbiembipe piau yeta yandepia pe.

<sup>20</sup>Jare ikawiete ko pikuaa waerä kua wi: Tumpa iñee arakaete umimbeu wae reta uikuatía wae, jae reta iyemingetaiño'ä ko.

<sup>21</sup>Tumpa etei ko umee chupe reta iñee. Jare jokua ñee jae reta umimbeu Espiritu Santo imbaepuere rupi.

## **2 Pedro 2**

### **Awíye yayapisaka oporomboeraanga wae reta re**



<sup>1</sup>Erëi yanemandúa kawi ñai, jokuu ara reta rupi ime iko wi Israel inemoñaeta reta ipite rupi Tumpa inee umimbeuraanga wae reta. Jare jukuärái wi añawe rupi imeta wi pepite rupi Tumpa inee re oporomboeraanga wae reta. Jae reta ikatu oporomboe waerä tēi, erëi kachi oporomboeta, jare jukuärái umbitawita jeta wae reta. Jare yepe tēi yandeYa umbiepi juwi pe jae reta iko waerä tēi jae imaerä, erëi jae reta mbaembae oporomboe wae rupi uikuakuta yandeYa. Jare jukuärái jae reta ueruta iyupe imambae Tumpa iarasi.

<sup>2</sup>Jare jae reta jeko ikawi mbae re jeta wae reta Cristo re wirowia wae uyemboeta jese. Jare jokuu jeko pewa Cristo re wirowia mbae wae reta kachita uyemingeta Tumpa inee añetete wae re.

<sup>3</sup>Jare jokuu oporomboe kachi wae reta uipotateta korepoti. Jare imiärita reta iyapu rewe pemitawi waerä ipuere waerä umingana pewi korepoti. Erëi ima rupi Tumpa jei uiporaraka waerä chupe reta. Jare chupe reta waerä Tatawasurenda uyeyapikatu ma oi.

<sup>4</sup>Yaikuaa Tumpa uiporarakata oi chupe reta, echa'ä araiwa retawe ipuere'ä oyepi Tumpa iarasi wi arakaete uyawi reta Tumpa koti yawe. Echa'ä Tumpa ara wi omombo reta pitumimbiete oi wae pe, jare joko pe uñeñapiti ñonoï reta ara taikuewa uwäe rewa. Jare jokuu ara uwäe yawe, uyemboita reta Tumpa jowai Tumpa uiporaraka waerä chupe reta jaeño mái pewa.

<sup>5</sup>Jare yanemandúa kawi ñai wi, arakaete Tumpa uiporaraka opaete iwi pewa reta pe iporu wasu pe. Jaeño uepi chuwi Noé jare iru chiu wae. Noé umimbeu tēi iru wae reta pe kërái yureko reta waerä jupi Tumpa koti. Erëitu jae reta uipiu'ä Tumpa wi; jáeramo Tumpa opa umbái reta.

<sup>6</sup>Jare jae nunga wi yandepuere yanemandúa mbae uasa arakaete tēta wasu reta Sodomu jare Gomorra pe. Jokuu tēta wasu pewa reta jeko kachi Tumpa jowai. Jáeramo Tumpa ombou tata jokuu tēta wasu reta re jare opa umbái reta. Jaeño upita tanimbu joko pe. Tumpa jokuu uyapo uikuaaka waerä yandewe mbae uasata oi wae Tumpa wi uipiu'ä wae reta pe.

<sup>7-8</sup>Jare Tumpa opa umbái yawe jokuu tēta wasu reta, jae uepi Lot. Echa'ä Lot ko jae kuimbae jupi wae Tumpa koti. Opa ara rupi jae uecha mbaembae kachi jokuu tēta wasu pewa reta uyapo wae, jare uyandu wi kachi kachi uyemingeta reta. Jare Lot jupi ramo, uiporara jare ipiatiti parawete jokuu uyandu jare uecha wae re. Jáeramo Tumpa uiparareko jare uepi.

<sup>9</sup>Jayawe opaete kua mbaembae rupi yaikuaa Tumpa ikatuete yanderepi waerä mbaesusere reta wi, yande jae yambiyerowia wae reta. Jare jae ikatuete wi oñono tee waerä opaete mbae jupi mbae uyapo wae reta ara taikuewa uwäe rewa. Jokuu ara uwäe yawe, jae reta uyemboita ñonoï Tumpa jowai Tumpa uiporaraka waerä chupe reta jaeño mái pewa.

<sup>10</sup>Jare oete uiporarakata oi opaete kía uipota'ä Tumpa jei wae rupi yureko wae reta pe. Jae reta jei wae rupiño ko yureko reta, jare opa ma uñererükumewa reta jeko

kachi rupi. Jokua oporomboe kachi wae reta ikate iyé reta. Mbaeti etei ukiye reta uyemingeta waerä ipotawe mbaepuere onoi wae reta koti.

<sup>11</sup>Erëi araiwa retawe, yepe tēi jae reta imbaepuere chuwi reta jare Tumpa jowai ñonoï, erëi jae retawe ndarau kachi uyemingeta reta jokua mbaepuere onoi wae reta koti.

<sup>12</sup>Erëi jokua oporomboe kachi wae reta uyemingeta kachi mbaembae uikuaa mbae wae koti. Jae reta uikuaa mbae rewe uyapo ikirëi uyapo wae rupiño mbaemimba jesaete wae rami. Jokua nunga mbaemimba reta jaeño ikawi yaipisi waerä jare yayuka wirae waerä. Jare jukuärái rami wi uyeyapota kua kuimbae reta pe.<sup>13</sup>Echa'ä Tumpa tuicha uiporarakata oï chupe reta jae reta mbae ikawi mbae wae uyapo reta ramo. Echa'ä jae reta ikatu pe etei uyapo mbaembae kachi wae. Ikaruete reta jare ikause reta. Jae nunga wi jae reta uyembati jare ukaru pe reta ndiwe peïru reta rami. Erëi jae reta pemitawi ñonoï. Jokua pēti ñemimaraka ko pemaerä.

<sup>14</sup>Jae reta ipotawe kuña re umae yawe, umae jese uipota rewe. Jare ikueri'ä reta Tumpa koti uyawi wae wi. Jae nunga wi jae reta uyawika Tumpa koti jokua ipiräta'ä ñonoï Tumpa re wae reta pe. Jare jekuaeño umae reta japicha imbaembae re uipota rewe. Jáeramo Tumpa iarasi uitita oï jese reta.

<sup>15</sup>Añetete jae reta ueya tape simi wae jare omomoe ñonoï kuimbae Beor tai Balaam jee wae jeko. Echa'ä kërái Balaam uyapo rami, jae reta uipotaete korepoti mbae ikawi mbae uyapo wae rupi.

<sup>16</sup>Jokua Balaam, yepe tēi jae ko Tumpa iñee umimbeu wae, erëi jae opia Tumpa jape wi korepoti re. Erëi Tumpa umbieta chupe jae jeko kachi re pēti mburika rupi, jare jukuärái umaeno'ä Balaam re uyapo waerä jokua uyapota tēi iko iyarakuaa mbae rewe wae. Yepe tēi mburika reta ipuere'ä uyemingeta, erëi Tumpa umbiyemingetaka jokua mburika pēti kuimbae rami.

<sup>17</sup>Jokua oporomboe kachi wae reta ko jae ikua opa ma tipa wae rami, echa'ä jae reta oporomboe wae yanembori'ä maeräwe – jaeño upurumbitawi waerä. Jare jae nunga wi jae reta ko jae amapitu iwitu täta wae opa wiraa wae rami, jare oki'ä. Jukuäraiete wi kua kuimbae reta upurumbitawi. Jáeramo Tumpa uyapikatu ma chupe reta kiape pītumimbiete oï wae pe jae reta jendarä, joko pe omombo reta waerä jaeño mái pewa.

<sup>18</sup>Jare jokua oporomboe kachi wae reta, ime ye ambie mbae kachi uyapo reta wae. Jae reta uyemingeta uyembikate rewe. Yepe tēi iñengatu reta, erëi jokua usiriwe'ä etei kía imaeräwe. Jae reta jei tēi: “Yandepuere yaiko yanderete uipota wae rupiño. Jokua mbae'ä ko,” jei reta. Jukuärái jae reta umbitawi jaeramo wirowia Cristo re wae reta. Echa'ä umikirëi uyapo reta ye waerä jokua jaeramo mbaembae kachi opa tēi ueya reta wae.

<sup>19</sup>Jae reta jei tēi wi: “Tumpa yandeyora ma ko. Jáeramo yandepuere yaiko yande yae wae rupiño,” jei reta tēi. Erëi añetete jae reta mbae kachi wae pe täta rupi

uyeyokui wae reta ko, echa'ä teko kachi imbaepuere pe ñonoï reta. Jare mbae uyemimbaepuere yanderé yawe, ñanerenoï ipo íwi pe.

<sup>20</sup>Kua pëti mbiatiti ko. Echa'ä ipuere kía uikuaa yandeRepí wae yandeYa Jesucristo rewa, jare jokua arakuaa rupi ipuere ueya íwi jeko kachi wae. Erëi jokua nunga kía taikue rupi uñatima ye yawe jeko indechikue pe jare ipuere'ä ueya ye yawe, jae oeteta upita tenonde iko wae wi.

<sup>21</sup>Añetete ikawita tēi ko jae awiye uikuaa waerä tape jupi wae rewa. Erëi jokua tape uyemimbeu ma ko chupe jare jae uikuaa tēi. Erëi jae wiriro jokua tape.

<sup>22</sup>Jukuärái uyeyapo chupe jokua proverbio pe jei wae rami: “Yimba oo ye jou iwëekue, jare kuchi oyoe reta wae oo ye uyembisapayu tuñuu pe.”

## 2 Pedro 3

### YandeYa ou yeta wae rewa

<sup>1</sup>Cheiru puau mii wae reta, kua re mokui wese ma aikuatía ai pewe. Jare kua mokui rewe pe che pumimandúa pikuaa ma wae re pepia pe piyemingeta kawí waerä jese.

<sup>2</sup>Pe reta pikuaa ko kërái arakaete rupi Tumpa oñono tee amokue kuimbae reta jae imaerä umimbeu reta waerä jae iñee. Jokua ñee re aipota pe reta pemandúa ye waerä. Jare aipota pemandúa ye waerä wi yandeYa oporomböe wae re. Kua yemboe pikuaa ko, echa'ä yandeYa yandeRepí wae orembou numimbeu waerä pewe.

<sup>3</sup>Jare ikawiete ko pikuaa kawí waerä kua: añawe kua ara taikuewa rupi imeta oporoyoyai wae reta. Jae reta yurekota mbae kachi waeño uipota uyapo wae rupi

<sup>4</sup>Jare jeita reta tēi kuärái: “¿Mbae ra uasa Cristo ou yeta tēi iko wae? Echa'ä yanderamikue reta uäro tēi yureko wae opa ma umano. Opaete mbaembae jaewiraweño oï kua íwi Tumpa uyapo ramo wiwe,” jeita reta tēi upuka rewe.

<sup>5</sup>Erëi jae reta ipotái iñakañiraanga Tumpa wi kërái arakaete iñee rupiño uyapo ara jare íwi. Jare kua íwi jaeramo uyapo yawe, i opa oñowa iko íwi. Jayawe Tumpa iñee rupiño umbisiri i umbiyekuaa waerä íwi.

<sup>6</sup>Jare jae nunga wi jokua oporoyoyai wae reta ipotái iñakañiraanga reta Tumpa wi kërái iñee rupiño opa umbái tekowe íwi pe wireko wae reta iporu wasu pipe.

<sup>7</sup>Jare jae nunga wi añawe rupi ara jare íwi, Tumpa iñee rupi oñono tee oï ara taikuewa rewa. Jokua ara opaete wae uyemboita ñonoï jae jowai jare jae uiporarakata oï opaete uipiu mbae chuwi wae reta pe. Jare jokua ara ramo Tumpa opata umbái oï tata pipe kua íwi jare opaete mbaembae ara re ñonoï wae.

<sup>8</sup>Erëi cheiru puau mii wae reta, ikawi ko jekuaeño pemandúa waerä kua re: pëti ara jare pëti miri año oyowakeño ko oï yandeYa pewarä.

<sup>9</sup>Amokue wae reta jei tēi: “YandeYa jarea'ä uyapo oï jae jei wae,” jei tēi reta. Erëi jukuärái'ä ko. YandeYa ndeiño ou yewí, echa'ä ipiawasu oï pewe ramo jare

uipota'ä tēi pēti awe omombo Tatawasurenda pe. Jae uipota tēi opaete wae reta ueya waerä ipiayemingeta jupi mbae wae Tumpa rewa.

**10**Erēi ou uwäe yawe jokua ara yandeYa pewa, outa oï pēti imonda wae pītu yawe ou wae rami. Jayawe ara añawe yaecha ñai wae opata ukañi täta jiapu rewe. Jare opaete mbaembae ara re ñonoï wae reta opata uyembái jendi rewe. Iwi jare opaete mbaembae iwi pe ñonoï wae reta opata okai.

**11**Jukuärái opaete mbaembae añawe yaecha ñai wae opata uyembái oï. Jare kua pikuaa ramo, ikawi ko piko waerä jupi rupi jare pemirowia waerä Tumpa.

**12**Jukuäräita ko piyapo peäro peï rambuewe pekireiete rewe jokua ara Tumpa pewa. Jokua ara opaete mbaembae ara re ñonoï wae jendi rewe opata uyembái. Jakueteta oï, jare opaete mbaembae opata okai jare tikui.

**13**Erēi yande reta yaikuaa ñai taikue rupi Tumpa uyapota oï ara ipiau wae jare iwi ipiau wae. Jare joko pe imeta jaeño jupi wae. Jukuärái ko yaikuaa, echa'ä jukuärái Tumpa jei ramo. Jáeramo ko jokua ñaäro ñai yayerowia katu rewe.

**14**Jáeramo cheiru puau mii wae reta, kua mbaembae peäro peï rambuewe, piko teko kawi rupi pepuere wae rupi awiye waerä Tumpa pepokou teko pe jare pereko kachi rewe. Tuwäe pewe pepiakatu rewe jae ndiwe.

**15**Jare che aipota pikuaa waerä kua: YandeYa ipiawasu rewe uäro oï jeta wae reta ipuere waerä onoi tekowe opa mbae wae. Jare kua jae nunga wi uikuatía pewe yandehermano mii Pablo jokua arakuaa Tumpa umee chupe wae rupi.

**16**Opaete jae uikuatía wae rupi uyemingeta kua mbaembae re. Amo pe yawái yandewe yaikuaa kawi waerä jae uikuatía wae. Jare amokue wae reta uipepi Pablo uikuatía wae kërái uipepi reta iru kuatía reta pe Tumpa wi ou wae. Jukuärái jae reta ueru ñonoï iyupe Tumpa iarasi. Jae reta uyemboe kawi'ä Tumpa iñee re jare ndeiño wirowia kawi reta Tumpa re.

**17**Erēi, pe cheiru mii reta, pikuaa ma ko kua mbaembae uyeyapota oï. Jáeramo piyandareko kawi piyé awiye waerä piyembitawika jupi mbae uyapo wae reta pe, jare awiye waerä pepiräta'ä ma Tumpa re.

**18**Jekuaeño pekuakuaa Tumpa koti yandeRepí wae yandeYa Jesucristo ipiakawi rupi. Jare arakuaa jesewa tukuakuaa peré. ¡Jae jee tuyembutuichaka añawe jare jaeño mái pewa! Jukuärái tuiko.

## 1 Juan

### Kua tupapire rewa:

Kua tupapire, jae ko Juan uikuatía wae. Juan ko jae pëti wae Jesús jemimboe. Juan uikuatía wi iru kuaría reta Nuevo Testamento pe ñonoï wae – jae ko tupapire reta Juan jee wae, jare Apocalipsis jee wae, jare mokui ye tupapire rai reta. Kua tupapire Juan uikuatía jare wiraaka Cristo re wirowia wae reta pe iwi Asia pe ñonoï wae umbiarakuaa reta waerä. Echa’ä jokua año rupi amokue wae kachi oporomboe yureko. Jei reta tēi yandeYa Jesucristo jae’ä ko kuimbae wae jare jae ko pëti kuimbae echaño. Jokua kachi oporomboe reta wae ombopa iko jeta wae reta Cristo re wirowia wae. Jayawe Juan uikuatía kua tupapire ombowaicho waerä pīpe jokua yemboe kachi wae. Jae nunga wi Juan uipota iko jokua wirowia Cristo re wae reta uikuaa kawī waerä jae reta onoi ko tekowe opa mbae wae (5.13).

### 1 Juan 1

#### Jesucristo ikoño mái

<sup>1</sup>Cheïru mii reta, aikuatía ai pewe jae ko jee Ñee wae rewa. Jae ikoño mái iyipi wiwe. Ore reta nduyandu jare nduecha oreresa pe etei. Numae jese jare nduipisi wi orepo pe etei. Jae ko tekowe iYa etei.

<sup>2</sup>Jae ikoño mái yandeRu Tumpa ndiwe jare añawe uyechaka ma orewe. Ore reta etei nduecha ma, jare añawe nduikuaaka noï pewe jesewa jare kërái jae ikoño mái iko wae rewa.

<sup>3</sup>Kua mbaembae nduecha wae jare nduyandu wae nduikuaaka noï pewe, pe reta wi perowia jese waerä. Jare jukuärái yandepuere waerä ñañemïru kawī päwe rewe yandeRu Tumpa ndiwe jare Tai Jesucristo ndiwe.

<sup>4</sup>Jukuärái yawe, ore nduyerowiaeteta noï kuri añetete rewe. Jokuaerä ko kua mbaembae reta ore nduikuatía noï pewe.

#### Tumpa ko jae tembipe rami

<sup>5</sup>Ore numimbeu noï pewe ñee Jesucristo etei uikuaaka orewe wae. Jae ko kua: Tumpa jupiete ye wae ko jare ndaraúi uyapo mbae ikawī mbae wae. Jae ko pëti tembipe umbiembipe pītumimbi pe wae rami.

<sup>6</sup>Jayawe yande reta yae yawe, “Che añemïru kawī ai Tumpa ndiwe,” yae yawe, erēi yandereko jekuaeño kachi oï yawe, yandapu ko. Jokua ko jae pītumimbi pe jekuaeño ñai wae rami, echa’ä mbaeti ko yaiko añetete wae rupi.

<sup>7</sup>Erēi Tumpa ko jae arakuaa iYa, jare jokua arakuaa ko jae pëti tembipe rami yandewe. Jare yande yaiko yawe jokua arakuaa Tumpa umee yandewe wae rupi,

jayawe yande ñañemiiru kawita päwe rewe. Jare yandeRu Tumpa Tai Jesucristo juwi uyepiyere wae jekuaeño yandeyoe oï Tumpa koti. Echa'ä umbái oï yandewi mbaembae yayawi Tumpa koti wae.

<sup>8</sup>Erëi yande yae yawe, “Che ayawi'ä etei ko äi Tumpa koti,” jayawe yandei yayembitawi ko ñai. Yaikuaa'ä etei añetete wae.

<sup>9</sup>Erëi yayembeu yawe Tumpa pe yayawi wae rewa, jae opata umbái yandewi jokua teko ñanoi wae jare yandepiayoeta opaete mbae jupi mbae yayapo wae wi. Jukuärái Tumpa uyapota, echa'ä jukuärái jae jei uyapota iko ramo. Jare Tumpa jekuaeño uyapo jae jei wae, echa'ä jae jupiete ye wae ko.

<sup>10</sup>Erëi yande yae yawe, “Che ayawi'ä etei ko Tumpa koti,” jayawe yae ñai tēi Tumpa pe iyapu wae ko jare yaechaka ñai yarowia'ä ko Tumpa iñee re añetete pewa.

## **1 Juan 2**

### **Jesucristo uyerure oï yandeRu Tumpa pe yanderé**

<sup>1</sup>Cherai mii puau wae reta, aikuatía äi pewe kua mbaembae awiye waerä piyawi Tumpa koti. Erëi kía uyawi Tumpa koti yawe, ime ko pēti wae yandeRu Tumpa jowai oï yandepepika pe – jae ko Jesucristo. Jae jupiete ye wae ko.

<sup>2</sup>Jare jae etei ko uñemee umano waerä mbaembae yayawi Tumpa koti wae re, jare jukuärái umbipiakatu Tumpa iarasi tēi iko yandekoti wae. Jare yandereño'ä ko Cristo umano. Jae umano tēi ko wi opaete iwi pewa reta re.

### **Tumpa yaau ramo, yayapota jae jei wae rupi**

<sup>3</sup>Jare ¿kērái ra yandepuere yaikuaa añetete ra yaikuaa Tumpa wae? Yande yayapo yawe mbaembae Tumpa jei yandewe wae, jokua uikuaaka yandewe yaikuaa ko Tumpa wae.

<sup>4</sup>Ipuere ko kía jei iyupe, “Che aikuaa ko Tumpa,” jei. Erëi jae uyapo'ä yawe Tumpa jei wae rupi, iyapu ko. Iko'ä etei ko añetete wae rupi.

<sup>5</sup>Erëi Tumpa jei wae rupi yayapo yawe, yande yaau ñai Tumpa kērái jae jukuäráiño mái uipota wae rupi. Jare jukuärái yaikuaata yande ko ñai pēti ramiño Tumpa re wae.

<sup>6</sup>Jayawe ime yawe kía jei, “Che äi pēti ramiño Tumpa re” wae, jayawe tuiko kawi kērái Jesucristo iko rami.

<sup>7</sup>Cheiru mii puau wae reta, kua aikuatía äi pewe wae mbae ipiau wae'ä ko. Jae ko jokua iyipi wiwe pikuaaño mái piko wae. Echa'ä iyipi wiwe piyanduño mái kua ñee yayerauta ko päwe rewe wae.

<sup>8</sup>Erëi yepe tēi kua Tumpa jei wae ima ma yaikuaa, jesewe imeño ipiau oï wae echa. Echa'ä Cristo jei piau ye ma yandewe yayerau päwe waerä jae yanderau wae rami. Jare jukuärái pe reta añawe piyapo pei. Jáeramo pereko kachi opa ukañi oo oï jare

pereko kawi uyekuaa oo oï. Jokua ko pïtumimbi ukañi oo oï rami jare tembipe uyekuaa oo oï rami.

<sup>9</sup>Ime yawe kía jei, “Che aiko tembipe pe,” erëi uñamitaa yawe ñru hermano wae, jekuaeño oï pïtumimbi pe.

<sup>10</sup>Erëi ime yawe kía uau ñru hermano reta wae, jae jekuaeño oï tembipe pe. Jare jukuärái yawe, mbaetita mbae re uyepiaka waerä.

<sup>11</sup>Erëi ime yawe kía uñamitaa ñru hermano wae, imeño oï pïtumimbi pe jare jekuaeño uyapo mbaembae pïtumimbi pewa. Jae uikuaa’ä keti ra oo oï wae, echa’ä jae ko jesa mbae wae rami Tumpa jowai mbaembae kachi uyapo wae jeko pewa.

### **Awiyeta ko yaipotae mbaembae iwi pewa**

<sup>12</sup>Sambiai mii reta, che aikuatía ai pewe kua mbaembae, echa’ä Tumpa umbái ma pewi teko penoi ikoti wae ramo. Jukuärái jae uyapo ma yandeYa Jesucristo uyapo pewe wae rupi.

<sup>13</sup>Jare pe pekuakuaa ma piko wae reta, pe reta pikuaa jokua iyipi wiwe ikoño mái wae. Jare jokua jeko pewa ko aikuatía ai pewe. Jare pe taurusu piko wae reta, pe reta pemiamiri ma Añawasú. Jare jokua jeko pewa ko aikuatía ai pewe wi. Sambiai mii reta, taikuatía ye pewe kua mbaembae, echa’ä pe reta pikuaa yandeRu Tumpa ramo.

<sup>14</sup>Pe pekuakuaa ma piko wae reta, pe reta pikuaa jokua iyipi wiwe ikoño mái wae. Jare jokua jeko pewa ko aikuatía ai pewe. Jare pe taurusu piko wae reta, pe reta pepiräta pei Tumpa re, jare Tumpa iñee oï pepia pe, jare pemiamiri ma Añawasú. Jare jokua jeko pewa ko aikuatía ai pewe wi.

<sup>15</sup>Jayawe cheiru mii reta, che tae pewe kuärái: Kua iwi pewa reta opaete seri oyowaicho ñonoï Tumpa koti, jare jae reta jeko kachi ko Tumpa jowai. Jáeramo awiye pipotaete piko jae reta jeko rupi, jare awiye piñono pepia mbaembae kua iwi pewa re. Echa’ä kía jukuärái uyapo wae, uau’ä etei ko jayawe yandeRu Tumpa.

<sup>16</sup>Echa’ä kua iwi jeko rupi yureko wae reta jaeño uipota yureko teko kachi rupiño jare mbaembae chupe reta ipöra wae reño. Jare jekuaeño uipota uyemingeta reta uyembutuicha rewe mbaembae jae reta onoi wae re jare mbaembae uyapo wae re. Erëi jae reta jeko ou’ä etei ko yandeRu Tumpa wi, echa’ä kua iwi pewaño ko.

<sup>17</sup>Jare kua iwi jeko opata oï. Jare jukuäraiete wi opata mbaembae iwi pewa reta uipota wae. Erëi ipotawe kía uyapo Tumpa jei wae ikota jaeño mái pewa. Jukuäraita ko.

### **Cristo koti oyowaicho wae reta rewa**

<sup>18</sup>Cherai reta, añawe ñawäe ma ñai ara taikuewa reta pe. Pe reta piyandu ma ko jokua kuimbae Cristo uyembijeeraanga wae outa oï wae. Jare añawe ou ma tenonde jeta wae Cristo uyembijeeraanga wae reta. Jukuärái yaikuaa ara taikuewa rupi ma ko ñai wae.

<sup>19</sup>Jae reta uyembatise yande ndiwe añetete wae nunga. Erëitu opa ma usiri reta yandewi. Jae reta uñemiiru'ä añetete rewe yande ndiwe. Jae reta añetete uñemiiru yande ndiwe yawe, jekuaeñota tēi yureko yande ndiwe. Erëi opa usiri reta yandewi. Jukuärái yaikuaa jae reta mbaeti ko yande rami, echa'ä jae reta Tumpa pewa'ä ko.

<sup>20</sup>Erëi pe reta jokua nunga'ä ko. Echa'ä Tumpa jupiete ye wae umee ma pewe Espiritu Santo. Jáeramo pikuaa ma añetete wae.

<sup>21</sup>Jare che aikuatía aĩ pewe pumimiräta waerä jokua pikuaa wae re. Jare pe reta pikuaa kawi peĩ pēti apu ou'ä ko añetete wae wi.

<sup>22</sup>Jayawe, ¿kía oporomböe oĩ apu re? Jae ko ipotawe kía jei, “Jesús jae'ä ko Cristo Upuruepi wae,” jei wae. Jokua nunga etei ko Cristo koti oyowaicho oĩ wae. Erëi Tumpa Taiño'ä ko jae wiriöro oĩ. Wiröro ko oĩ wi yandeRu Tumpa etei.

<sup>23</sup>Echa'ä ime yawe kía wiriöro Tumpa Tai wae, jae mbaeti etei ko onoi yandeRu Tumpa. Erëi ime yawe kía jei, “Jesús ko jae Tumpa Tai” wae, yandeRu Tumpa etei ko onoi wi.

<sup>24</sup>Jáeramo jekuaeño tupita pepia pe jokua iyipi wiwe piyemböe jese wae. Jare jukuärái yawe, jekuae ñotái ko piñemiiru kawi Tumpa Tai ndiwe jare yandeRu Tumpa ndiwe etei wi.

<sup>25</sup>Jare kua ko jae Tumpa jei umeeta oĩ yandewe wae – tekowe opa mbae wae.

<sup>26</sup>Che aikuatía aĩ pewe kua mbaembae, echa'ä ime amokue wae reta uipota pembıtawı ñonoĩ.

<sup>27</sup>Erëi awiye piyapisaka jese reta, echa'ä pe reta ime ma penoi Espiritu Santo pemboe waerä. Tumpa etei ko umee ma pewe Espiritu Santo, jare jae jekuaeño uyemingeta añetete wae. Espiritu Santo ipuere'ä etei iyapu. Jare kërái jae pemboe wae rupi, jekuaeño piñemiiru kawi Cristo ndiwe.

### **Tumpa tai reta ndarau etei jekuaeño uyawi Tumpa koti**

<sup>28</sup>Jayawe cherai mii reta puau wae, jekuaeño piñemiiru kawi Jesucristo ndiwe. Echa'ä jukuärái yayapo yawe, ndarau yayepokouka jokua ara Cristo ou ye yawe. Ñaita jae jowai yayerowia rewe jare ñanemara mbae rewe.

<sup>29</sup>Jae nunga wi yande yayapo yawe jupi wae rupi, jokoropi uyekuaata yande ko jae Tumpa tai reta wae. Echa'ä pe reta pikuaa kërái Tumpa ko jae jupi wae. Jare jukuärái wi opaete tai reta uyapota ko jupi wae rupi.

## **1 Juan 3**

<sup>1</sup>Mase, kërái etei ra ko yandeRu Tumpa yanderau, echa'ä jae jei yandewe, “Cherai retarä ko.” Jare jokua ko jae yande reta. Erëi kua iwi jeko rupi yureko wae reta uikuaa'ä kía ko yande wae, echa'ä uikuaa'ä reta yandeRu Tumpa ramo.



<sup>2</sup>Cheïru puau wae reta, añawe yande ko jae Tumpa tai reta. Jare ndeiño Tumpa uikuaaka yandewe kërái eteita ra ko ñai kuri wae. Erëi yaikuaa ko ñaita Cristo rami jae ou ye yawe, echa'ä yaechata jae etei kërái ko jae wae.

<sup>3</sup>Kua añetete uyeyapota ko. Jare opaete kua uäro ñonoï wae reta wirïro mbae kachi wae, echa'ä jae reta uipota yureko jupi Cristo rami.

<sup>4</sup>Ime yawe kía Tumpa jei wae jekuaeño uyawi wae, jokua ko jae mbae kachi wae Tumpa jowai. Echa'ä yayawi Tumpa koti yawe, yambowaicho ko ñai Tumpa.

<sup>5</sup>Erëi pe reta pikuaa kawi peï Cristo uyeyapo kuimbaerä opa umbái waerä yandewi mbaembae yayawi Tumpa koti wae. Jare Cristo pëti wese awe uyawi'ä.

<sup>6</sup>Jáeramo kía uñemïiru kawi Cristo ndiwe wae ndarau jekuaeño uyawi Tumpa jei wae. Erëi kía jekuaeño uyawi Tumpa jei wae wirowia'ä ko Cristo re jare uikuaa'ä etei ko wi.

<sup>7</sup>Cherai puau wae reta, piyandareko kawi piyé awiye waerä kía pemitawi kua rewa. Kía re Tumpa umae jeko mbae wae rami ikota jupi wae rupi. Echa'ä jae uipota iko Jesucristo rami, jare Jesucristo jupi wae ko.

<sup>8</sup>Erëi ime kía Tumpa jei wae jekuaeño uyawi wae, jae Añawasu pewa ko. Echa'ä Añawasu iyipi wiwe uyawiño mái Tumpa koti. Erëi Tumpa Tai uyeyapo kuimbaerä opa umbái waerä Añawasu iparawiki.

<sup>9</sup>Jayawe ipotawe kía Tumpa uyapo tairä wae ndarau jekuaeño uyawi Tumpa koti. Echa'ä Tumpa etei ko uyapo tairä iko waerä jare umee chupe tekowe ipiau wae Tumpa pewa. Jokua jeko pewa ko Cristo re wirowia wae reta ipuere'ä jekuaeño uyawi Tumpa koti.

<sup>10</sup>Jukuärái ko yandepuere yaikuaa kía ra ko jae Tumpa tai reta wae jare kía ra ko jae Añawasu tai reta wae. Opaete mbae jupi mbae uyapo wae reta Tumpa pewa'ä ko. Jare jae nunga wi opaete uau'ä japicha wae reta Tumpa pewa'ä ko wi.

### **Tumpa tai reta uyerauta ko päwe rewe**

<sup>11</sup>Kua ñee ipiau wae'ä ko. Echa'ä pe reta piyanduño mái imeta ko yayerau päwe rewe. <sup>12</sup>Awiye yaiko Caín rami. Caín Añawasu pewa ko jare uyuka tiwi. Jare ¿mbae jeko pewa ra uyuka? Echa'ä Caín jeko kachi ko, erëi tiwi uyapo jupi wae.

<sup>13</sup>Jáeramo chehermano mii reta, kua iwï jeko rupiño yureko wae reta peamitaa yawe, awiye pepiakañi jokua re. Echa'ä jokua uasaño mái iyipi wiwe.

<sup>14</sup>Yande yarowia Cristo re wae reta yayerau päwe añetete rewe yawe, jokua uikuaaka yandewe ime ko ñanoi tekowe ipiau wae jare ndarau ye ñamano wae echa Tumpa wi. Erëi kía upuruau'ä wae imeño umano oï wae echa Tumpa wi.

<sup>15</sup>Jare ime yawe kía uñamitaa umae ïru hermano re wae, Tumpa pewartä jae upuruyuka ma. Jare pe reta pikuaa kawi pëti upuruyuka wae mbaeti etei ko onoi tekowe opa mbae wae.

<sup>16</sup>Jare yande reta yaikuaa ma kërái ko yapuruau añetete rewe. Echa'ä yandeYa Cristo jokua uechaka ma yandewe jae umee yawe jekowe yanderé. Jukuäráita ko yande yaau wi ñru hermano reta.

<sup>17</sup>Erëi, ¿këráita ra ko ime yawe kía jeta mbaembae onoi wae, jare jae uecha yawe ñru hermano ikuasi oï mbae uata chupe ramo? ¿Këráita ra ko jokua ikokatu wae ipiatáta jare uipota'ä ombori yawe? ¿Jae upuruau ra oï Tumpa rami? Mbaeti etei.

<sup>18</sup>Jayawe cherai puau wae reta, yapuruau mii mbaembae yayapo wae rupi añetete rewe. Awiye yapuruau ñaniñee peño.

<sup>19</sup>Jare yande yapuruauñoi yawe añetete rewe, jokoropi ko yaikuaa Tumpa pewa ko yande reta. Jukuärái ñai wi Tumpa jowai yandepiakatu rewe.

<sup>20</sup>Echa'ä aramoi yandepia yanembijeko oï mbae re. Erëi jeseuwe yandepuereta yandepiakatu Tumpa jowai, echa'ä yaikuaa Tumpa uikuaa yande rewa opaetei. Jare jokua jae jei yandereko rewa wae jupiete ko yandepia jei wae wi.

<sup>21</sup>Cheiru puau wae reta, yandepia mbaeti ma yanembijeko mbae re yawe, yandepuereta yaya Tumpa re yayerowia rewe.

<sup>22</sup>Jare ipotawe mbae yayerure chupe wae, jae uyapota yandewe, echa'ä yayapo jae jei wae ramo jare yayapo mbaembae jae umbiyerowia wae ramo.

<sup>23</sup>Jare kua ko jae Tumpa jei yandewe wae: imeta ko yarowia Tai Jesucristo re, jare imeta ko yayerau päwe rewe kërái Cristo jei yandewe rami.

<sup>24</sup>Jare kía kua Tumpa jei wae uyapo wae jekuaeño uñemiiru Tumpa ndiwe, jare Tumpa jekuaeño uñemiiru jae ndiwe wi. Jare yande yaikuaa Tumpa uñemiiru ko yande ndiwe, echa'ä jae umee yandewe Espíritu Santo ramo.

## **1 Juan 4**

### **Kërái yaikuaa waerä kía ra añetete oporomboe oï Espíritu Santo rupi**

<sup>1</sup>Cheiru puau wae reta, awiye perowia woi ipotawe kía Tumpa ñee ou umimbeu wae, echa'ä añawe rupi ime jeta wae reta Tumpa ñee umimbeuraanga wae reta. Jayawe ime yawe kía ou piyembati wae pe jare jei pewe yawe, “Che ko jae Tumpa ñee umimbeu wae,” pemboporowa rani jae ñee añetete ra ou Tumpa wi wae.

<sup>2</sup>Kuärái pepuere pikuaa jae ime ra onoi Tumpa iEspíritu wae. Jae jei yawe, “Jesucristo ko jae Upuruepi wae kuimbaerä uyeyapo wae,” jukuärái pepuere pikuaa jae ñee ou ko Tumpa wi.

<sup>3</sup>Erëi jae wirowia'ä yawe Jesús ko jae Upuruepi wae kuimbaerä uyeyapo wae, jukuärái pikuaata jae ñee ou'ä ko Tumpa wi. Ou ko Añawasú wi – jae ko pëti ara umeeta oï mbaepuere jokua kuimbae Cristo uyembijeeraanga wae pe. Pe reta piyandu ma kërái jokua kuimbae outa oï. Jare che aikuaaka ai pewe jae imbaepuere ime ma oï kua iwi rupi.

<sup>4</sup>Erëi pe cherai puau wae reta, pe reta opa ma pemiamiri jokua oporomboeraanga wae reta, echa'ä pe reta ko jae Tumpa pewa jare Espiritu Santo oï pepia pe. Jare yepe tëi Añawasu ko jae kua iwi iya, erëi Espiritu Santo imbaepuere tuichaete ye ko Añawasu imbaepuere wi.

<sup>5</sup>Jokua oporomboeraanga wae reta uikuaa'ä ko Tumpa jare jaeño yureko reta kua iwi jeko rupi. Jáeramo jae reta uyemingeta mbaembae iwi pewa reño. Jare ñru uikuaa mbae Tumpa wae reta uyapisaka kawi jese reta.

<sup>6</sup>Erëi ore reta, oriñee ou ko Tumpa wi. Jáeramo ime yawe kía uikuaa Tumpa wae, jae uyapisaka oriñee re. Erëi kía uikuaa'ä Tumpa wae uyapisaka'ä oriñee re. Jukuärái yaikuaa kía ko jae oporomboe jupi wae jare kía ko upurumbitawi wae.

### **Tumpa tuicha upuruau**

<sup>7</sup>Cheïru puau wae reta, jekuaeño yayerauta ko päwe rewe, echa'ä jokua ou Tumpa wi ramo. Ime kía Tumpa uyapo tairä wae jare uikuaa Tumpa wae, upuruauta oï.

<sup>8</sup>Erëi upuruau mbae wae uikuaa'ä Tumpa, echa'ä Tumpa ko tuicha upuruau. Añetete Tumpa etei ko jae mburuau.

<sup>9</sup>Jare Tumpa uechaka yandewe yanderau ko kuärái: Jae ombou Tai jae waeño wae kua iwi pe yande yandepuere waerä ñanoi tekowe opa mbae wae Tai uyapo yandewe wae rupi.

<sup>10</sup>Echa'ä Tumpa ombou Tai umano waerä mbaembae yayawi ikoti wae re, jare jukuärái umbipiakatu Tumpa iarasi tëi iko yandekoti wae. Yaipota yaikuaa yawe kërái yapuruau waerä añetete rewe, jokua re ko ikawi ñamae waerä. Awiye ñamae yandiyé kërái yaau Tumpa wae re. Echa'ä yaau Tumpa wae ndarau etei omboyowake Tumpa yanderau wae.

<sup>11</sup>Jukuärái ko, cheïru puau wae reta, Tumpa uikuaaka yandewe yanderau wae. Jáeramo yande reta wi yayerauta ko päwe rewe.

<sup>12</sup>Mbaetii kiawe uecha Tumpa. Erëitu yayerau päwe ñai yawe, ñañemiïru kawi ko ñai Tumpa ndiwe jare yaau ko ñai Tumpa kërái jae jukuäráiño mái uipota wae rupi.

<sup>13</sup>Jare yande yaikuaa ñañemiïru ko ñai Tumpa ndiwe jare Tumpa uñemiïru ko oï yande ndiwe wi, echa'ä jae umee ma yandewe iEspiritu Santo.

<sup>14</sup>Jare jokuaño'ä ko. Jae nunga wi yandeRu Tumpa ombou Tai iwi pe uepi waerä iwi pewa reta. Jukuärái ore nduecha ma, jare jukuäraiete wi ore nduikuaaka noï opaete wae pe.

<sup>15</sup>Jare ime yawe kía jei, “Jesús ko jae Tumpa Tai” wae, jae uñemiïru oï Tumpa ndiwe jare Tumpa uñemiïru oï jae ndiwe wi.

<sup>16</sup>Jayawe kua mbaembae rupi yaikuaa kawi ma Tumpa yanderau ko, jare jokua re yarowia jare yayeko ma jese. Tumpa ko tuicha upuruau. Añetete Tumpa etei ko jae mburuau. Jayawe kía upuruau rewe iko wae uñemiïru kawi ko oï Tumpa ndiwe, jare Tumpa uñemiïru kawi oï jae ndiwe wi.<sup>17</sup>Jare jukuärái yayapo yawe, yaikota

Cristo rami jare yayerauta päwe rewe kërái Tumpa jukuäraino máí uipota wae rupi. Jáeramo yande yayerowiata ñái kuri yayemboi yawe Tumpa jowai ara taikuewa uwäe yawe. Ndarau yakiye.

<sup>18</sup>Erëi imeño yakiye yawe Tumpa wi, jayawe yandepia pe imeño yayemingeta ñái Tumpa uiporarakata oï yandewe aramoi. Jare jukuärái yawe, ndeiño yaikuaa kawi kërái Tumpa uipotano máí wae rami. Echa'ä ndeiño yaikuaa kawi kërái Tumpa yanderauete wae. Erëi jokua yaikuaa kawi jare yarowia yawe, jayawe mbaetita mbae wi yakiye waerä.

<sup>19</sup>Yande yaau ko Tumpa, echa'ä jae rani yanderau ramo.

<sup>20</sup>Erëi ime yawe kía jei, “Che au Tumpa,” erëi uñamitää yawe ñru hermano, jayawe iyapu ko oï. Echa'ä yaau'ä yawe ñru hermano yaecha ñanoi wae, jayawe ¿këräita pa yandepuere yaau Tumpa yaecha'ä ñái wae? Ndarau yandepuere.

<sup>21</sup>Jare wi Tumpa yanemboe kuärái: “Jokua uau Tumpa wae, tuau wi ñru hermano reta,” jei.

## 1 Juan 5

### Ñamiamirita ko iwi jeko Cristo re yarowia wae rupi

<sup>1</sup>Opaete kía reta wirowia Jesús ko jae Cristo Upuruepi wae, jokua reta Tumpa uyapo tai retarä yureko waerä. Jare yande yaikuaa kawi ñái yaau yawe pëti kuimbae sambiai reta onoi wae, yaau wi ko tai reta.

<sup>2</sup>Jáeramo yaau yawe Tumpa, jare yaiko yawe jae jei wae rupi, yaau wi ko ñru hermano reta. Echa'ä jae reta ko jae Tumpa tai reta wi.

<sup>3</sup>Jare imeta ko yayapo Tumpa jei wae rupi, echa'ä jukuärái rupi yaau Tumpa. Jare mbaeti ko yawái yayapo waerä Tumpa jei wae rupi.

<sup>4</sup>Kua iwi jeko uipota tëi yanembiawái, erëi yande Tumpa tairä yaiko wae reta ñamiamiri ma ko kua iwi jeko. Jare jukuärái yayapo Jesucristo re yarowia wae rupi.

<sup>5</sup>Echa'ä jaeño kía wirowia Jesús ko jae Tumpa Tai wae umiamirita kua iwi jeko.

<sup>6</sup>Jare Jesucristo ko jae Tumpa Tai, echa'ä jukuärái Tumpa uikuaaka orewe Jesús uyembisakambuka yawe i pe. Jare jae juwi uyepiyere yawe kurusu re, jukuärái wi Tumpa uikuaaka orewe Jesús ko jae Tumpa Tai wae. Mbaeti ko uikuaaka orewe Jesús uyembisakambuka rupiño. Kua yaikuaa añetete wae ko, echa'ä jukuärái Espiritu Santo uikuaaka yandewe yandepia pe. Jare jokua jae jei wae añetete ko. Ndarau iyapu yandewe.

<sup>7</sup>Añetete ime mbapi mbaembae uikuaaka kawi yandewe Jesucristo rewa.

<sup>8</sup>Jae ko Espiritu Santo, jare Jesús usakambu i pe wae, jare juwi uyepiyere kurusu re wae. Jare kua mbapi mbaembae oyowakeño uikuaaka kawi yandewe Jesús ko jae Tumpa Tai wae.

<sup>9</sup>Jare yandepuerete yarowia kua ñee re, echa'ä Tumpa wi etei ko ou jare uikuaaka yandewe jae Tai re etei. Ou'ä ko ipotawe kuimbae wi.

<sup>10</sup>Kía Tumpa Tai re wirowia wae uikuaa ipia pe añetete ko kua mbaembae Tumpa uikuaaka yandewe wae. Erëi jokua wirowia'ä wae jei oï tēi Tumpa pe iyapu wae ko, echa'ä wirowia'ä Tumpa jei Tai rewa wae ramo.

<sup>11</sup>Jare Tumpa uikuaaka yandewe kuärái: Jae umee ma yandewe tekowe opa mbae wae, jare kua tekowe opa mbae wae ñawäe Tumpa Tai re.

<sup>12</sup>Jayawe kía ime onoi Tumpa Tai wae, ime onoi kua tekowe. Erëi kía mbaeti onoi Tumpa Tai wae, mbaeti etei onoi kua tekowe opa mbae wae.

### **Tumpa Tai re wirowia wae reta uikuaa onoi ko tekowe opa mbae wae**

<sup>13</sup>Jayawe pe Tumpa Tai re perowia peï wae reta, che aikuatía aï pewe kua mbaembae pe reta pikuaa waerä penoi ma ko tekowe opa mbae wae.

<sup>14</sup>Jáeramo yandepuere yayerure Tumpa pe ipotawe mbae re. Jare yayerure yawe jae uipota wae rupi, yandepuere yarowia katu jese uyandu waerä yandewe yandiyerure.

<sup>15</sup>Jare kërái yaikuaa jae uyandu yandewe yandiyerure wae, jukuärái wi yaikuaa jae uyapota oï yandewe jokua yayerure chupe wae re.

<sup>16</sup>Jayawe pēti hermano uecha yawe ñru hermano uyawi oï Tumpa jei wae, tuyerure Tumpa pe jese jokua jae uyawi wae mano pewa'ä yawe. Jare Tumpa umbipiau yeta oï jekowe. Jukuärái ko kía mbae uyawi wae mano pewa'ä yawe. Erëi ime pēti mbae yayawi wae mano pewa. Jare mbaeti che jae aï tuyerure jokua re.

<sup>17</sup>Añetete opaete mbae jupi mbae yayapo wae, jokoropi yayawi ma ko Tumpa jowai. Erëi mbaeti ko opaete mbaembae yayawi wae mano pewa.

<sup>18</sup>Jare yaikuaa kawu opaete kía kía Tumpa uyapo tai retarä wae ndarau jekuaeño uyawi Tumpa jei wae. Echa'ä Tumpa Tai etei jekuaeño uyandareko oï jese reta, jare Añawasu ndarau ipuere mbae uyapo chupe reta.

<sup>19</sup>Añetete ko, yande yaikuaa opaete kua iwí jeko rupi yureko wae reta Añawasu imbaepuere pe ko ñonoï. Erëi yaikuaa wi yande reta ko jae Tumpa pewa reta.

<sup>20</sup>Jare yaikuaa wi Tumpa Tai ou ma ko kua iwí pe jare umee ma yandewe arakuaa yaikuaa waerä Tumpa añetete wae. Jare añawe yande ñaï ma ko pēti ramiño Tumpa añetete wae re, echa'ä ñaï ma pēti ramiño Tai Jesucristo re ramo. Jae ko Tumpa añetete wae jare tekowe opa mbae wae iYa.

<sup>21</sup>Jayawe cherai puau wae reta, piyandareko kawu piyé awiye waerä pemiadora tumparaanga reta re. Jaeño ma.

## 2 Juan

### Kua tupapire rewa:

Kua tupapire, jae ko Juan uikuatía wae. Juan ko jae pëti wae Jesús jemimboe. Kua tupapire Juan uikuatía jare wiraaka pëti kuña jare imembi reta pe. Erëi jeta wae reta wirowia Juan jukuärái uikuatía yawe, uikuatía iko umbijaanga rewe Cristo re wirowia wae reta pe. Jokua ara reta rupi umbipi ma uyekuaa Cristo re oporomboeraanga wae reta. Jare jae reta uwata yureko kerupi rupi oporomboe waerä kipe ipuere wae rupi. Jáeramo Juan uikuatía jare wiraaka kua tupapire Cristo re wirowia wae reta pe umbiarakuaa reta waerä awiye waerä umbiresiwe reta jokua oporomboeraanga wae reta.

### 2 Juan 1

#### Juan wiraaka saludo

<sup>1</sup>Nde cherindi mii Tumpa ndeparawo wae, che ko jae Cristo re wirowia wae reta itenondewa. Kua tupapire aikuatía ai ndewe jare nemembi reta pe wi. Che puauete ko añetete rewe. Erëi cheño'ä ko puau ai. Jae nunga perau wi opaete ñee añetete wae uikuaa wae reta.

<sup>2</sup>Kua ñee añetete wae jekuaeño oi yandepia pe jare jekuaeño oita yande ndiwe jaeño mái pewa. Jare jokua ñee nduikuaa ramo, ore puau.

<sup>3</sup>YandeRu Tumpa jare Tai Jesucristo jekuaeño tipiakawi yandewe, jare tumae yanderé yandeparareko rewe, jare tuyapo yandewe yaiko waerä yandepiakatu rewe. Jukuärái tuiko yande yaiko rambuwe ñee añetete pewa rupi, jare yayerau päwe ñai rambuwe.

#### Yayerauta ko päwe rewe

<sup>4</sup>Che tuicha ayerowia ai, echa'ä awäe chupe amokue nemembi reta ñonoï ma añetete wae rupi kërái yandeRu Tumpa jei yandewe wae rupi.

<sup>5</sup>Jare añawe nde cherindi mii, che numiñera jekuaeño nemandúa waerä kua Tumpa jei yandewe wae re: yapuruau päwe rewe mii. Kua aikuatía ai ndewe wae, mbae ipiau wae'ä ko. Jae ko jokua iyipi wiwe Tumpa jeiño mái yandewe wae.

<sup>6</sup>Jare ¿kërái ra yapuruau añetete rewe? Imeta ko yaiko Tumpa jei wae rupi. Jare Tumpa jei yandewe yaiko waerä yapuruau rewe. Kua ko jae mbae iyipi wiwe piyandu ore ndoporomboe jese wae.

#### Yayandareko yandiyé oporomboeraanga wae reta wi

<sup>7</sup>Jukuärái jae pewe, echa'ä kua iwi pe ime jeta upurumbitawi wae reta. Jae reta wirowia'ä yandeYa Jesucristo uyeyapo kuimbaerä wae. Ime yawe kía jukuärái

uyemingeta wae, jae ko upurumbitawi wae jare jae ko Cristo koti oyowaicho oï wae.

<sup>8</sup>Jáeramo pe reta piyandareko kawi piyé awiye waerä piyembitawika chupe reta. Echa'ä pe reta peparawiki ma täta Tumpa pewarä, jare che aipota'ä pemikañi waerä peyuwi Tumpa umiñatimata oï pewe wae. Che aipota penoi waerä opaetei jokua reta.

<sup>9</sup>Ipotawe kía ueya yawe Cristo oporomboe wae iko waerä ambie yemboe rupi wae, kua nunga reta mbaeti etei onoi Tumpa. Erëi kía jekuaeño iko yawe Cristo oporomboe wae rupi, yandeRu Tumpa jare Tumpa Tai mokui rewe ñonoï jae ndiwe.

<sup>10</sup>Jayawe ou yawe kía uipota pemboe wae, erëi oporomboe oï ambie ye yawe kua ore ndoporomboe wae wi, jayawe awiye peparea chupe upita waerä perëta pe. Jare awiye awe pere chupe: “Jaekawi ko ndeyu.”

<sup>11</sup>Echa'ä pere yawe chupe jukuärái, piñemiïru ma ko peï jae ndiwe mbae kachi uyapo wae rupi jare teko pe ma peï.

### **Juan umbiyapi uikuatía wae**

<sup>12</sup>Ime tēi anoi jeta mbaembae jae pewe waerä, erëi aipota'ä jae pewe kua tupapire rupi. Echa'ä aipota a apou pepi yayemingeta waerä yayerecha rewe, jare jukuärái tuicha rupi yayerowiata päwe rewe.

<sup>13</sup>Ndepikii, jae ko Tumpa uiparawo wae wi. Jare jae imembi reta omondo pewe saludo. Jaeño ma.

## 3 Juan

### Kua tupapire rewa:

Kua tupapire, jae ko Juan uikuatía wae. Juan ko jae pëti wae Jesús jemimboe. Kua tupapire Juan uikuatía jae indechi ma iko yawe. Yawái iko chupe jekuaeño uwata waerä kerupi rupi omboe waerä Cristo re wirowia wae reta. Jáeramo jae uiparawo jare omondo amokue wae reta oporomboe waerä jae ipepika pe. Juan uikuatía jare wiraaka kua tupapire jae ñru Gayo jee wae pe. Gayo ko jae Cristo re wirowia wae reta itenondewa pëti wae. Jare Juan kua tupapire rupi umikirëi Gayo jekuaeño ombori waerä jokua oporomboe wae reta. Jae nunga wi Juan uipota iko umimbeu Gayo pe ñru kuimbae Diótfes jee wae mbae uyapo wae rewa.

### 3 Juan 1

#### Juan wiraaka saludo

- <sup>1</sup>Nde cheriwi mii Gayo, che ko jae Cristo re wirowia wae reta itenondewa aikuatía aï ndewe. Che nduau añetete rewe.
- <sup>2</sup>Cheriwi mii, che aikuaa ikawi neï Tumpa ndiwe. Jare che ayerure aï nderé opaete mbaembae ndiyapo wae rupi ndeo kawi waerä jare ndikowe katu waerä wi.
- <sup>3</sup>Che ayerowiaete aï, echa'ä amokue yanderiwi reta yuweru kua pe imiäri chewe kërái nde jekuaeño ndiko añetete wae rupi. Jare che aikuaa jokua añetete ko.
- <sup>4</sup>Mbaeti ye ambie yerowia tuicha wae kua wi ayandu yawe kërái cherai reta ñonoï añetete wae rupi.

#### Ikawi ko yambori waerä ñee ikawi wae umimbeu wae reta

- <sup>5</sup>Cheriwi nduau mii wae, jaekawi nde ndiyapo neï. Echa'ä nembori neï ñru Cristo re wirowia wae reta oo opou pepi yawe, yepe tēi ndikuaa'ä reta. Jare kua ndiyapo neï wae rupi, uyekuaa oï kërái jupi ndiyeyokui neï Tumpa pe wae.
- <sup>6</sup>Amokue jae reta kua pe imiäri nderé hermano reta jowake kërái nde ndepuruauete ko. Che tae ndewe, ikawita ko nde jekuaeño nembori waerä kua nunga reta, jae reta oë oo ye oï reta yawe nerëta wi. Iyapo mii ikawi wae chupe reta Tumpa umbiyerowia wae.
- <sup>7</sup>Echa'ä jae reta ueya jëta yuraa umimbeu waerä Jesucristo rewa. Jare jae reta ueka'ä ñonoï yembori Tumpa re wirowia mbae wae reta pe.
- <sup>8</sup>Jáeramo ikawi ko yande yambori waerä kua nunga reta. Echa'ä jukuärái yandepuere yaparawiki pëti ramiño jae reta ndiwe ñee añetete wae jekuaeño uyemimbeu waerä.

**Juan umbiarakuaa Gayo kuimbae reta Diótfes jare Demetrio jee wae rewa**



<sup>9</sup>Kua re che aikuatía ma pewe tēi, pe Cristo re perowia wae reta joko pe pei wae pe. Erēitu Diótrefes uipota'ā uyapisaka, echa'ā jaeño uipota iko hermano reta itenondewarā.

<sup>10</sup>Jáeramo che a awāe pepi yawe, che animbeuta opaete wae jowake mbaembae jae uyapo oī wae. Echa'ā jae iyapu rewe uyemingeta kachi oreré. Jare jokuaño'ā uyapo oī. Jae uipota'ā etei wi umbiasa iiru hermano reta ikotīa wi yuraa pepi wae. Jare ime yawe kía uipota tēi ombori kua uwata wae reta, Diótrefes oyopia chuwi jare umaeño'ā jese uyembati waerā iiru hermano reta ndiwe. Jukuārái uyapo oī jae.

<sup>11</sup>Cheiru nduau mii wae, nde awiye etei emomoe kua nunga ikawi mbae wae. Emomoe ikawi waeño. Ikawi wae uyapo wae reta Tumpa pewa ko. Erēi ikawi mbae wae uyapo wae reta uikuaa'ā etei ko Tumpa.

<sup>12</sup>Jayawe ikawi ko nde nembiasa kawi waerā Demetrio jae oo uwāe yawe pepi. Opaete wae uyemingeta kawi jese, echa'ā jae jekuaeño oī añetete wae rupi. Jare ore jae nunga wi nduyemingeta kawi noī pewe jese. Jare nde ndikuaa neī ore ndoe wae añetete ko.

### **Juan umbiyapi uikuatía wae**

<sup>13</sup>Ime tēi anoi jeta mbaembae jae ndewe waerā, erēi aipota'ā jae ndewe kua tupapire rupi.

<sup>14</sup>Echa'ā aipota a apou ndepi imambaeño yayemingeta waerā yayerecha rewe.

<sup>15</sup>Tumpa jekuaeño tuyapo ndewe ndiko waerā ndepiakatu rewe. Ñaneiru reta kua pe ñonoī wae omondo ndewe saludo. Embisaluda mii chewe kuri cheiru joko pe ñonoī wae reta pēti pēti rupi. Jaeño ma.

## Judas

### Kua tupapire rewa:

Kua tupapire, jae ko Judas uikuatía wae. Judas jare tikei Santiago ko aipo yandeYa Jesucristo tiwi ichi rupiño wae. Judas uikuatía jare wiraaka kua tupapire Cristo re wirowia wae reta pe kerupi rupi yureko wae rupi umbiarakuaa reta waerä. Echa'ä uike ma jae reta ipite rupi oporomboeraanga wae reta. Jáeramo Judas umikirëi reta uyandareko kawi waerä iyé oporomboe kachi wae reta wi jare uyandareko reta waerä Tumpa iñee añetete wae re. Kua tupapire jare jae nunga wi taikue mii tupapire uikuatía ye Pedro wae oyowake seri ko, echa'ä mokui rewe yanembiarakuaa oporomboeraanga wae reta rewa.

### Judas 1

#### Judas wiraaka saludo

<sup>1</sup>Pe yandeRu Tumpa perau jare pereni wae reta, yandeYa Jesucristo uyandareko kawi oï peré. Che ko jae Jacobo tiwi Judas jee wae aikuatía aï pewe kua tupapire. Che wi ko jae Jesucristo pe ayeyokui wae.

<sup>2</sup>Tumpa jekuaeño tipiakawi pewe jare tuyapo pewe piko waerä pepiakatu rewe jare tuicha pepuruau rewe.

#### Oporomboeraanga wae reta rewa

<sup>3</sup>Cheiru puau mii wae reta, che aipota tēi aikuatía aiko pewe jokua tekowe opa mbae wae ime ñanoi wae re. Erëi aikuaa ime ye ambie mbae re imeta ko aikuatía pewe. Tumpa ñaneño tee ma jae imaerä jare uikuaaka ma yandewe mbaembae re yarowia waerä. Kua mbaembae jaño mái pewa añetete ko jare ndarau etei uyepepika. Jáeramo aipota pumikirëi jekuaeño piyapo waerä pepuere wae rupi uyemimbeu waerä jupi rupi jokua mbaembae.

<sup>4</sup>Kua re aikuatía aï pewe, echa'ä amokue wae reta uyembati ñonoï pe reta ndiwe añetete wae nunga pe reta pikuaa mbae rewe. Jae reta jei tēi pewe: “Tumpa ipiakawi oï yandewe. Jáeramo yandepuere yaiko yande yae wae rupiño,” jei reta. Jare jukuärái jae reta uyapo ñonoï opaño mbaembae kachi wae. Erëi kua jae reta uyapo wae rupi wiriro ko ñonoï Jesucristo, yepe tēi jaño ko jae yandeYa jare yaneMburuwicha wasu imbaepuerete wae. Jae reta uipiu'ä etei Tumpa wi. Jare kërái uyekuatiaño mái ko oï Tumpa iñeeriru pe wae, Tumpa uiporarakata oï chupe reta tuicha rupi.

<sup>5</sup>Yanemandúa kawi ñai, arakae yawe yandeYa uepi jare onoe ueru Israel iñemoña rewa iwi Egipto wi. Erëi taikue rupi opa umbái jae reta ipite wi wirowia mbae jese wae reta. Che aikuaa pe reta pikuaa kawi ma kua rewa, erëi jaño aipota pumimandúa ye jese.

<sup>6</sup>Jare yanemandúa wi arakae mbae uasa amokue araiwa reta pe. Yepe tēi Tumpa umee chupe reta mbaepuere ara pe, erēi uwāe ara jae reta uipota'ā jokua mbaepuere jare opa ueya reta jenda ara pewa. Jáeramo Tumpa omombo reta kiae pītumimbiete oī wae pe, jare joko pe jae reta uñeñapīti ñonoī ara taikuewa uwāe rewa. Jare jokua ara uwāe yawe, uyemboita reta Tumpa jowai Tumpa uiporaraka waerā chupe reta jaeño mái pewa.

<sup>7</sup>Jare jae nunga wi yanemandúa jokua tēta wasu reta Sodoma jare Gomorra jare iyipi rupi yureko wae reta re. Jae reta jokua araiwa reta rami uipota'ā yureko kērái Tumpa uyapo reta wae rupi. Echa'ā uyapo reta awasa opa kērái rái jare kuimbae reta uipotaete jae yepái uyereroke reta. Jáeramo Tumpa tuicha rupi uiporaraka chupe reta tata pe. Jare jukuárái Tumpa uikuaaka opaete wae pe awiye waerā mbae kachi yayapo jae reta rami. Echa'ā jokua nunga mbae kachi uyapo wae reta uiporarata tata owe mbae wae pe.

<sup>8</sup>Jukuárái wi jokua oporomboeraanga wae reta pepite pe ñonoī wae uikuaa tēi opaete kua mbaembae reta, erēi mbae'ā chupe reta. Jae reta uyereraa ñonoī upau wae rupiño, jare jukuárái uñererükumewa reta awasa rupi jare wiriō reta yandeYa imbaepuere. Jare jokuaño'ā uyapo reta. Jae nunga wi uyemingeta kachi reta mbaepuere onoi wae retakoti,

<sup>9</sup>yepe tēi araiwa retawe uyemingeta'ā jukuárái. Echa'ā arakae araiwa tenondewa Miguel jee wae uyeaka iko yawe Añawasú ndiwe Moisés jetekue re, uipiu umbijeko waerā Añawasú pochi rewe. Jaeño jei chupe: “YandeYa tuñeengata ndewe,” jei chupe.

<sup>10</sup>Erēitu kua kuimbae reta uyemingeta kachi jeta mbaembae rewa, yepe tēi jae reta uikuaa kawī'ā jokua mbaembae rewa. Jare jokua michi mii jae reta uikuaa tēi wae, jokuawe urukachi reta. Jae reta yureko wiraeño ipotawe rupi mbaemimba iko wiraeño wae rami. Jare kua mbaembae jae reta uyapo wae rupi etei ou oī chupe reta Tumpa iarasi wasu.

<sup>11</sup>¡Kērái etei Tumpa uiporarakata oī chupe reta! Echa'ā jae reta omomoe ñonoī Caín jeko. Jare korepoti uipotaete reta ramo, uyapo reta ñonoī wi kuimbae Balaam jee wae uyapo rami. Echa'ā jae reta umikirēi iūru wae reta uyapo waerā mbae kachi wae jukuárái umingana waerā jese reta korepoti. Jae nunga wi jae reta ko kuimbae Coré jee wae rami, echa'ā uyapo'ā reta Tumpa jei wae rupi. Jáeramo opata umano reta Coré umano rami.

<sup>12</sup>Jae nunga wi pe reta piyembati yawe pekaru päwe waerā, kua kuimbae reta yuweru ukaru pe reta ndiwe uipiu mbae rewe. Kua pēti ñemimaraka ko. Jae reta ko owecha iyandarekoa ikawi mbae wae reta rami, echa'ā jaeño uyandareko reta iyé. Jae reta ko jae amapītu iwītu opa wiraa wae rami jare oki'ā, echa'ā jae reta ikawi'ā maerāwe. Jare jukuárái wi jae reta ko jae temiti iata tēi, erēi ia'ā wae rami. Ani yandepuere yae jae reta ko jae jokua temiti uyemondoro wae rami, echa'ā ndarau etei mbae ikawi wae uyekuaa jese reta.

<sup>13</sup>Jae nunga wi kua kuimbae reta ko jae iaparoa wasu tiriye rami. Echa'ä jae reta umaño iyé uyereraaka waerä koti koti jete uipota wae rupi, jare jukuärái jekuaño uyapo reta mbaembae ñemimaraka pewa. Kua nunga reta re ndarau ikawi kiawe wirowia waerä, echa'ä jae reta ko jae yasitata uwata wae reta rami. Jáeramo Tumpa uyapikatu ma chupe reta kiape p̄tumimbiete oĩ wae pe joko pe omombo reta waerä jaeño mái pewa.

<sup>14</sup>Yanemandúa ñai wi kuimbae Enoc jee wae re. Jae ko Adán jumimino chiu wese yuapi ye wae. Jae arakae umimbeu kërái mbae uasata oĩ oporomboeraanga wae reta pe kuärái: “Mase. YandeYa outa oĩ jetaete ye oñono tee jae imaerä wae reta ndiwe.

<sup>15</sup>Jare jayawe opaete wae uyemboita ñonoĩ jae jowai jae jei waerä jae reta jeko re. Jare yandeYa umbijekota opaete chuwi uip̄u'ä wae reta mbaembae kachi uyapo reta wae re jare ñee kachi jei reta yandeYa koti wae re.” Jukuärái umimbeu Enoc.

<sup>16</sup>Kua oporomboeraanga wae reta opa mbaembae re iyengeta reta jare umbijeko reta japicha. Jare uipota yureko reta jae reta jei wae rupiño uyembiyerowia waeräño. Uyemingeta reta uyembutuicha rewe. Jare jae reta jekuaño iñee kawi uyemingeta reta japicha ndiwe umbiyerowia waerä, jukuärái japicha umee waerä chupe reta mbaembae.

### **Judas umbiarakuaa reta**

<sup>17</sup>Erëi pe cheiru puau mii wae reta, pemandúa yandeYa Jesucristo jemimboetenondewaete reta umimbeu pewe wae re.

<sup>18</sup>Echa'ä jae reta jei pewe: “Kua ara taikuewa rupi imeta oporoyoyai wae reta. Jae reta yurekota mbae kachi waño uipota uyapo wae rupi.”

<sup>19</sup>Jare pe reta pikuaa kía reta ko jae wae, echa'ä jae reta ko opa umbiyao tee tee onoi Cristo re wirowia wae reta oporomboe kachi wae rupi. Jae reta yureko jei wae rupiño jare mbaeti onoi reta Espiritu Santo.

<sup>20</sup>Erëi pe cheiru puau mii wae reta, jekuaño piñemimiräta Tumpa iñee jupi wae rupi perowia jese wae. Jare jekuaño piyerure Tumpa pe Espiritu Santo jei wae rupi.

<sup>21</sup>Pe reta pikuaa peĩ yandeYa Jesucristo umeeta oĩ pewe tekowe opa mbae wae peparareko ramo. Jare añawe jokua peäro peĩ rambuewe, jekuaño pemandúa kërái Tumpa perau wae re.

<sup>22</sup>Amokue pepite pe ñonoĩ wae reta ndeiño ipiräta Tumpa re. Jayawe pembipiakatu reta jare piparareko reta wi.

<sup>23</sup>Jare ñru wae reta imeño wirowia'ä ñonoĩ Cristo re. Jayawe pemimbeu kawi chupe reta Cristo rewa, tata wi kía pepi wae rami. Jare ñru wae reta re pema piparareko rewe. Erëi piyandareko kawi piyé pip̄u rewe awiye waerä pereko kachi jae reta rami. Ikawi ko periro waerä chuwi jemimonde awe umingia jeko kachi pe wae.

### **Yambutuicha Tumpa jee**

<sup>24</sup>Añawe, ¡Tumpa jeeño yambutuicha! Echa'ä jaeño ipuere ñanemimiräta awiye waerä yapia jape wi. Jare jaeño ipuere yanembiyemboi jae jowai yandereko mbae rewe jare tuicha yerowia rewe.

<sup>25</sup>Jaeño ko jae Tumpa. Jaeño ko yanderepi ma yandeYa Jesucristo rupi. Jaeño tonoi mbaepuere, miräta, jare yembiadora añawe jare jaeño mái pewa. Jukuärái tuiko.

## Apocalipsis

### Kua tupapire rewa:

Kua tupapire, jae ko Juan uikuatía wae. Juan ko jae pëti wae Jesús jemimboe, jare jae uikuatía irundi ye tupapire reta Tumpa ñeeriru pe oï wae. Kua tupapire jee ko “Apocalipsis.” Jokua ñee griego ñee pe uipota jei, “mbaembae Tumpa uechaka wae.” Jukuärái ko jee, echa’ä uyekuatía oï kua tupapire pe mbaembae Tumpa uechaka Juan pe wae – jae ko mbaembae tenonde yawe uyekuaa’ä wae. Jokua año reta rupi romano reta imburuwicha wasu jei tēi iyupe, “Che ko Tumpa,” jare uipota tēi uyembutuichaka waerä opaete wae pe. Erēi Cristo re wīrowia wae reta umbutuicha’ä jokua mburuwicha jee, jare jokua jeko pewa mburuwicha wasu uiporarakā chupe reta. Juan jae nunga wi uiporara jokua mburuwicha wasu ipo pe, jare jaikue rupi mburuwicha omondo pëti iwi i mbite pe oï wae Patmos jee wae pe iru pereso reta ndiwe. Joko pe ko Juan uikuatía kua tupapire. Juan uikuatía kua tupapire jare wiraaka Cristo re wīrowia wae reta pe chiu tēta wasu iwi Asia pewa pe. Jae uipota iko umikirēi reta jokua uiporara yureko wae rupi, jare uikuaaka chupe reta Tumpa umiamirita oï opaete mbaepuere onoi wae reta kua iwi pewa. Jayawe jeta mbaembae uyekuatía oï kua tupapire pe wae, jae ko mbaembae uyeyapota oï ara taikuewa rupi wae. Erēi kua mbaembae mbaeti uyekuatía oï simi yandewe, echa’ä Juan uiporu jeta yembijaanga reta. Jukuärái wi uikuatía Tumpa ñee arakae umimbeu wae reta jae reta uikuatía yawe mbaembae ara taikuewa rupi uasata oï wae rewa.

## Apocalipsis 1

### Kua tupapire rewa

**1-2** Kua tupapire pe Juan uikuaaka yandewe jokua mbaembae reta uasata oï imambaeño wae. YandeRu Tumpa etei uikuaaka kua mbaembae Jesucristo pe jae uikuaaka yuapi ye waerä yandewe Juan rupi. Juan uyeyokui kawī Jesucristo pe. Jayawe Jesucristo ombou pëti araiwa Juan pe, jare jokua araiwa uechaka chupe kua mbaembae uyeyapota oï wae. Jare añawe Juan uikuaaka oï yandewe, yande Cristo pe yayeyokui wae reta pe, opaete mbaembae jae uecha wae. Kua ñee Tumpa ñee etei ko, jare jokua etei ko Jesucristo uikuaaka.

**3** Kua ñee umingeta wae reta uyekouete ñonoï. Jare jukuärái wi kua ñee re uyapisaka wae reta. Echa’ä uyaro ma oï kua aikuaaka aï pewe wae uyeyapo waerä.

### Juan wiraaka saludo

**4-5** Pe Cristo re perowia wae reta chiu tēta wasu iwi Asia pewa pe piyembati wae, che araaka aï pewe kua saludo. Che ko jae Juan kua aikuatía aï wae. Tumpa iyipi

wiwe ikoño mái, jare jekuaeño oï, jare jekuaeñota oï. Jae jekuaeño tipiakawi pewe jare tuyapo pewe piko waerä pepiakatu rewe. Jare jukuärái wi tuyapo pewe Jesucristo jare Espíritu Santo. Kua Tumpa iEspíritu chiu wese ye jupi jare Tumpa iwapia jowai oï. Jesucristo ko jae jekuaeño uikuaaka añetete wae. Jae ko opaete umanokue wae reta ikowe ye wae itenondewaete. Jare jae ko opaete iwi pewa mburuwicha wasu reta imburuwicha yuapí ye. Yande reta jeta ma yayawi Tumpa koti. Erëi Jesucristo yanderau jare upiyere juwí opa oyoe waerä yandewi yandereko.

<sup>6</sup>Jare jokuaño'ä uyapo. Jae yandapo wi mburuwicha wasu retarä jare sacerdote retarä jukuärái yayeyokui waerä Tu pe – jae ko yandeRu Tumpa pe. Jesucristo jee tuyembutuichaka, jare jaeño tonoi mbaepuere tuichaete wae jaeño mái pewa. Jukuärái tuiko.

<sup>7</sup>JiMase, ko jae ma ou amapítu re! Jare opaete wae uechata ñonoï. Uikutuka wae retawe uechata wi. Jare opaete kua iwi pewa reta tuicha ipiatitita jae jeko pewa. Añetete jukuärái tuiko.

<sup>8</sup>Jare yandeYa Tumpa jei: “Che ko jae Alfa jare Omega jee wae,” jei. “Che ko jae iyípiete wae jare iyápiete wae. Che ko jae jekuaeño oï wae, jare iyípi wiwe ikoño mái wae, jare jaeño mái pewa ikota wae. Che ko jae opaete mbaepuere anoi wae,” jei.

### **Juan imiäri kërái jae uecha Jesucristo**

<sup>9</sup>Che perikei Juan, che aiporara ai wi pe reta piporara pei rami. Jukuärái ñotái ko yaiporara Jesús re yarowia jeko pewa ramo. Erëi yandepuere ñamiawäta yandepiawasu rewe, echa'ä pëti ramiño ñai Jesús re ramo. Jare yande ñaita wi jae ndiwe jae oï ma yawe opaete wae imburuwicha wasurä jaeño mái pewa. Che ai pëti pereso iwi i mbite pe oï wae Patmos jee wae pe. Chereru reta kua pe Tumpa iñee amimbeu ramo jare Jesús rewa amieräkua ramo.

<sup>10</sup>Jare aipota aikuaaka pewe kua: Pëti domingo ara pe Espíritu Santo uechaka chewe amokue mbaembae. Jae chembipau wae echa. Jukuärái aramoño ayandu chekupe koti pëti ñee täta uyemingeta wae temimbi wasu uñee wae rami.

<sup>11</sup>Jare jokua ñee jei chewe: “Che ko jae Alfa jare Omega jee wae. Che ko jae tenondewaete wae jare taikuewaete wae,” jei. Jayawe jei chewe: “Ikuatía pëti tupapire pe ndechata nei wae. Joko wi eraaka kuri jokua tupapire ndikuatía wae iwi Asia pe kiape cheré wirowia wae reta uyembati ñonoï wae pe. Eraaka tëta wasu Éfeso pe, Esmirna pe, Pérgamo pe, Tiatira pe, Sardis pe, Filadelfia pe, jare Laodicea pe,” jei chewe.

<sup>12</sup>Jayawe ayerowa amae aecha waerä kía chemingeta oï wae. Jare amae yawe, aecha chiu mechero iwapika oro pewa.

<sup>13</sup>Jare jokua chiu mechero iwapika reta ipite pe aecha kía jae chawaa kuimbaerä uyeyapo wae. Jae omonde temimonde puku wae uwäe ipi rupi. Jare ipitía rupi onoi tumbikuaa oro pewa.

- 14**Jare ía tíasi owecharawe tíasi wae rami. Jare kërái roi tíasi, jukuárái wi tíasi ía. Jare jesa uyekuaa kërái tata jendi wae rami.
- 15**Jare ipi uwerasi jiero bronze yambiyepiro wae rami. Jare jae uyemingeta yawe, ñnee táta uyendu iaparoa wasu jiapu wae rami.
- 16**Jare ipo iyakata koti onoi chiu yasitata reta. Jare iyuru wi oë kisépuku jaimbeyowai wae. Jare jowa jembipeasiete warasi ara mbite yawe jembipeasi wae rami.
- 17**Jare aecha yawe, aa parawete iwi re jae jowai jare apita amano wae rami. Jayawe jae oñono ipo iyakata kotiwa cheré, jare jei chewe: “Awiye ekiye. Che ko jae tenondewaete wae jare taikuewaete wae,” jei.
- 18**“Che ko jae ikoño mái wae. Amano, erëi mase, añawe aiko jaeño mái pewa. Jare che ime anoi mbaepuere mano re jare umanokue wae reta jenda re wi,” jei.
- 19**“Añawe ikuatía kua mbaembae ndecha wae. Jare che aipota ndikuatía waerä wi ñru mbaembae reta añawe aechakata ai ndewe wae – jae ko mbaembae añawe uyeyapo oi wae jare taikue rupi uyeyapota oi kuri wae,” jei chewe.
- 20**“Taikuaaka ndewe mbae re ko uyembijaanga kua chiu yasitata ndecha chepo cheakata koti anoi wae. Jare taikuaaka ndewe wi mbae re ko uyembijaanga kua chiu mechero iwapika oro pewa,” jei. “Kua chiu yasitata reta uyembijaanga ñonoï chiu araiwa reta re. Jokua chiu araiwa reta uyandareko ñonoï jokua cheré wirowia wae reta re uyembati ñonoï jokua chiu tēta wasu reta rupi wae. Jare kua chiu mechero iwapika reta uyembijaanga ñonoï jokua cheré wirowia wae reta re jokua chiu tēta wasu reta rupi uyembati ñonoï wae,” jei chewe.

## Apocalipsis 2

### Cristo wiraaka ñee Éfeso pe jese wirowia wae reta pewarä

- 1**Jare yandeYa jei wi chewe: “Ime pēti araiwa uyandareko oi opaete cheré wirowia wae reta re tēta wasu Éfeso pe. Ikuatía chupe kua chiñee kuärái: ‘Che ko jae jokua chiu yasitata ipo iyakata koti onoi wae, jare jokua chiu mechero iwapika oro pewa ipite rupi uwata wae.
- 2**Jare che tae Éfeso pewa cheré wirowia wae reta pe kuärái: Che aikuaa opaete mbae piyapo wae, kërái táta peparawiki pei chemaerä jare kërái pemiawäta pei yembiawái reta pepiawasu rewe. Aikuaa wi piñemüru’ä pei ikawi mbae wae uyapo wae reta ndiwe. Jare aikuaa wi ime pepite pe amokue wae reta jei tēi ñonoï kuärái: “Che ko jae Jesús chembou jae jee re wae.” Erëi aikuaa wi pe reta pikuaa ma chuwi jae reta iyapu wae.
- 3**Jare che aikuaa wi perowia cheré ramo, táta piporara jare pemiawäta pekueri mbae rewe. Opaete kua ikawi ko.
- 4**“Erëitu ime mbae re pumbijeko waerä. Jae ko kua: pepuruau’ä ma kërái pepuruause jaeramo cheré perowia yawe.



<sup>5</sup>Awiye peakañi kërái tenonde yawe tuicha pepuruau. Jáeramo peya pepiayemingeta añawe penoi wae, jare piyapo ye kërái tenonde yawe piyapose wae rami. Erëi piyapo’ä yawe jukuärái, ayuta jupiwoiño ambisiri waerä pemechero iwapika jenda wi.

<sup>6</sup>Erëi ayerowia kua re: pemaerä kachi oï jokua nicolaíta reta mbae uyapo wae. Jare jukuärái wi chemaerä kachi oï.

<sup>7</sup>Ipotawe kía uipota uikuaa kawí wae, tuyapisaka kua ñee re – jae ko Espíritu Santo jei oï cheré wirowia wae reta pe kerupi rupi uyembati ñonoï wae reta pe. ‘Ikawí mbae wae umiamiri wae reta pe ameeeta jou reta waerä iwira ía Tumpa jëta pe oï wae. Jae ko iwira tekowe umee wae.’ Jukuärái ikuatía,” jei chewe.

### **Cristo wiraaka ñee Esmirna pe jese wirowia wae reta pewarä**

<sup>8</sup>Jare yandeYa jei wi chewe: “Ime pëti araiwa uyandareko oï opaete cheré wirowia wae reta re tëta wasu Esmirna pe. Ikuatía chupe kua chiñee kuärái: ‘Che ko jae jokua tenondewaete wae jare taikuewaete wae. Che amano, erëi aikowe ye.

<sup>9</sup>Jare che tae Esmirna pewa cheré wirowia wae reta pe kuärái: Che aikuaa opaete mbae piyapo wae, jare kërái piporara jare peparawete (erëi añetete pikokatu pei Tumpa koti). Aikuaa wi jei ñonoï ñee kachi pekoti jokua judío jei tëi iyupe wae reta. Jae reta uyererowia tëi Tumpa pewa reta ko, erëi jukuärái’ä ko. Jae reta ko uyembati Satanás jee re uikuaa mbae rewe.

<sup>10</sup>Mase, Añawasú peñonokata amokue pe reta peresoriru pe, echa’ä jae uipota uyawika pewe ramo. Jare joko pe piporarata payandepo ara pewa. Erëi awiye pekiye kua piporarata pei wae wi. Aramoi pemanota cheré perowia jeko pewa, erëi awiye peya cheré perowia wae. Jare che ameeeta aï pewe jokua corona tekowe opa mbae pewa.

<sup>11</sup>Ipotawe kía uipota uikuaa kawí wae, tuyapisaka kua ñee re – jae ko Espíritu Santo jei oï cheré wirowia wae reta pe kerupi rupi uyembati ñonoï wae reta pe. ‘Ikawí mbae wae umiamiri wae reta ndarau etei uiporara mano mokuía re.’ Jukuärái ikuatía,” jei chewe.

### **Cristo wiraaka ñee Pérgamo pe jese wirowia wae reta pewarä**

<sup>12</sup>Jare yandeYa jei wi chewe: “Ime pëti araiwa uyandareko oï opaete cheré wirowia wae reta re tëta wasu Pérgamo pe. Ikuatía chupe kua chiñee kuärái: ‘Che ko jae jokua kispuku jaimbeyowai onoi wae.

<sup>13</sup>Jare che tae Pérgamo pewa cheré wirowia wae reta pe kuärái: Che aikuaa opaete mbae piyapo wae. Jare aikuaa wi Satanás ime onoi iwapiä mburuwicha wasu pewa perëta wasu pe. Erëi pe reta jekuaeño perowia pei cheré jare chekuaku’ä. Chemandúa wi Antipas re. Jae jekuaeño umimbeu kawí iko che rewa, jare jokua jeko pewa perëtaiwa reta uyuka. Echa’ä añetete Satanás ime onoi jetaete mbaepuere joko pe. Erëitu jokua ara reta rupi awe peya’ä perowia cheré wae, yepe tëi yawaiete pewe. Kua ikawí ko.

14‘Erëitu ime amokue mbaembae re pumbijeko waerä. Jae ko kua: Ime pepite pe ñonoï amokue wae reta uipota’ä ueya jokua yemboe kuimbae Balaam arakae oporomboe wae. Balaam arakae umbiarakuaa mburuwicha Balac jee wae kërái ipuere waerä uyawika Israel iñemoñaeta reta pe Tumpa koti. Jayawe Balac umikirëi Israel iñemoñaeta reta jou waerä tembiu tumparaanga pe uñemee wae jare uyapo reta waerä awasa.

15Jare jukuärái wi pepite pe oporomboe ñonoï jokua nicolaíta reta. Jare yepe tēi jokua jae reta oporomboe ñonoï wae kachiete chewe, erëi amokue wae pe reta pipisi ma jokua yemboe.

16‘Jáeramo peya pepiayemingeta añawe penoi wae. Erëi piyapo’ä yawe jukuärái, ayuta jupiwoiño añeräro waerä jokua yemboe kachi wae uipisi wae reta ndiwe. Kua ayapota kispuku cheyuru wi oë wae pipe.

17‘Ipotawe kía uipota uikuaa kawi wae, tuyapisaka kua ñee re – jae ko Espiritu Santo jei oï cheré wirowia wae reta pe kerupi rupi uyembati ñonoï wae reta pe. ‘Ikawi mbae wae umiamiri wae reta pe ameeta jou waerä jokua maná ara pewa añawe uñeñomi oï wae. Jare ameeta chupe reta wi pēti ita rai tīi wae uyekuatía oï jese pēti tee ipiau wae. Jare jokua tee uikuaata’ä kiawe – jaeño jokua ameeta chupe wae uikuaata.’ Jukuärái ikuatía,” jei chewe.

### **Cristo wiraaka ñee Tiatira pe jese wirowia wae reta pewarä**

18Jare yandeYa jei wi chewe: “Ime pēti araiwa uyandareko oï opaete cheré wirowia wae reta re tēta wasu Tiatira pe. Ikuatía chupe kua chiñee kuärái: ‘Che ko jae Tumpa Tai. Che ko jae jokua jesa tata jendi wae rami, jare jokua ipi jiero bronca uwerasi wae rami.

19Jare che tae Tiatira pewa cheré wirowia wae reta pe kuärái: Che aikuaa opaete mbae piyapo wae jare kërái perowia kawi cheré wae. Aikuaa wi pepuruau, pepiawasu, jare kërái piyeyokui chewe wae. Jare aikuaa wi añawe peparawiki chewe wae jetaete piyapo tenonde piyapo wae wi. Opaete kua ikawi ko.

20‘Erëitu ime mbae re pumbijeko waerä. Jae ko kua: Pe reta pemaño peï jokua kuña Jezabel jee wae re oporomboe waerä pepite pe. Echa’ä jae jei tēi iyupe: “Che ko jae ñee Tumpa wi etei ou wae amimbeu wae,” jei tēi iyupe. Erëi umbitawī oï uyeyokui chewe wae reta jae reta uyapo waerä awasa jare jou reta waerä tembiu tumparaanga pe uñemee wae.

21Che amee tēi ma ara jokua kuña pe ueya waerä ipiayemingeta kachi wae. Erëi uipota’ä. Jekuaño uipota awasa uyapo.

22-23Jáeramo amimbaerasita jokua kuña, jare ayukata wi imembi reta jei chupe wae reta. Jare jae nunga wi aiporarakata tãta rupi ai jokua kuña ndiwe awasa uyapo wae reta pe, jae reta ueya’ä yawe ipiayemingeta kachi wae. Jukuärái opaete cheré wirowia wae kerupi rupi uyembati wae reta uikuaata che aikuaa opaete wae ipiayemingeta reta. Jare uikuaata reta wi amiñatimata pewe pēti pēti pe opaete mbae piyapo wae rupi.

<sup>24</sup>‘Erëi amokue pe Tiatira pe peï wae reta pipisi’ä jokuä kuña omboe wae re, jare pikuaa’ä jokuä arakuaa jei chupe reta wae erëi añetete Satanás wi ou wae. Kua pereko ikawi ko. Jáeramo che tae pewe kuaño piyapo waerä:

<sup>25</sup>Jekuaeño piyapo jokuä piyapo peï wae che ayu ye rewa.

<sup>26</sup>‘Ikawi mbae wae umiamiri wae reta – jae ko jokuä che jae wae uyapo ayu ye rewa wae reta – chupe reta ameeta mbaepuere iwi ambie pewa reta re.

<sup>27</sup>Tuicha mbaepuere onoita reta jare ndarau kía reta ipuere uyembowaicho ikoti. Kua mbaepuere ko cheRu umee chewe. Jare jukuärái wi che ameeta ai chupe reta.

<sup>28</sup>Jare ameeta wi chupe reta yasitata ndei köe mbowe mii uyekuaa wae. Jukuärái ayapota upurumiamiri wae reta pe.

<sup>29</sup>‘Ipotawe kía uipota uikuaa kawi wae, tuyapisaka kua ñee re – jae ko Espiritu Santo jei oi cheré wirowia wae reta pe kerupi rupi uyembati ñonoï wae reta pe.’ Jukuärái ikuatía,” jei chewe.

### **Apocalipsis 3**

#### **Cristo wiraaka ñee Sardis pe jese wirowia wae reta pewartä**

<sup>1</sup>Jare yandeYa jei wi chewe: “Ime pëti araiwa uyandareko oi opaete cheré wirowia wae reta re tëta wasu Sardis pe. Ikuatía chupe kua chiñee kuärái: ‘Che ko jae jokuä chiu yasitata ipo pe onoi wae jare Tumpa iEspiritu Santo chiu wese ye jupi wae onoi wae. Jare che tae Sardis pewa cheré wirowia wae reta pe kuärái: Che aikuaa opaete mbae piyapo wae. Jeta wae reta jei tëi pewe pe reta pepiräta peï Tumpa re. Erëi che tae pe reta jukuärái’ä ko wae.

<sup>2</sup>Aecha opa kawi’ä piyapo peremiapo reta Tumpa jowai. Jáeramo piñemupüa ye, jare piñemimiräta jokuä imeño penoi wae re awiye waerä opa ukañi pawi.

<sup>3</sup>Jekuaeño pemandúa opaete piyemboe Tumpa re wae. Piñemimiräta jese, jare peya pepiyemingeta jupi mbae wae. Echa’ä piyandareko’ä yawe, ayuta aiporarka waerä pewe. Jare che ayuta ai aramoño pëti imonda wae ou rami. Echa’ä pepiranoe pewa ayekuaata pewe.

<sup>4</sup>‘Ime pepite pe jokuä tëta wasu Sardis pe mbowi uñererükumewa’ä teko kachi pe wae reta. Jae reta uñemiruta che ndiwe jemimonde tii wae ndiwe, echa’ä jae reta jupi wae ko cherowai.

<sup>5</sup>‘Jukuärái wi ameeta temimonde tii wae ikawi mbae wae umiamiri wae reta pe. Jare jae reta jee ndarau ambái tupapire tekowe opa mbae pewa wi – jokuä ko jae tupapire kía kía tekowe opa mbae wae onoi wae reta jee uyekuatía oi pipe wae. Kua reta che aechakata cheRu pe jare cheRu iaraiwa reta jowake. Jare jaeta chupe reta: “Kua reta ayapo chemaerä,” jaeta. Jukuärái ayapota upurumiamiri wae reta pe.

<sup>6</sup>‘Ipotawe kía uipota uikuaa kawī wae, tuyapisaka kua ñee re – jae ko Espíritu Santo jei oĩ cheré wirowia wae reta pe kerupi rupi uyembati ñonoĩ wae reta pe.’ Jukuärái ikuatía,” jei chewe.

### **Cristo wiraaka ñee Filadelfia pe jese wirowia wae reta pewarä**

<sup>7</sup>Jare yandeYa jei wi chewe: “Ime pëti araiwa uyandareko oĩ opaete cheré wirowia wae reta re tëta wasu Filadelfia pe. Ikuatía chupe kua chiñee kuärái: ‘Che ko jae Jupiete wae jare Añetete pewa. Cheeño ime anoi tëta wasu Jerusalén ipiau wae jöke illave, kërái arakaete mburuwicha wasu David jëta wasu illave wireko wae rami. Jáeramo che aipea yawe jokua öke, ndarau kía ipuere uyukenda ye. Jae ramiño wi che ayukenda yawe jokua öke, ndarau kía ipuere uipea ye.

<sup>8</sup>Jare che tae jokua Filadelfia pewa cheré wirowia wae reta pe kuärái: Che aikuaa opaete mbae piyapo wae. Yepe tëi pembaepuere michi ko, erëi piyapo kawī ma che aporomböe wae rupi jare chekuaku’ä etei. Jáeramo, mase, öke uyepea oĩ pewe. Che etei aipea pewe. Jáeramo ndarau kía ipuere uyukenda ye jokua öke.

<sup>9</sup>‘Pe reta pikuaa jokua judío jei tëi iyupe wae reta. Jae reta uyererowia tëi Tumpa pewa reta ko, erëi jukuärái’ä ko. Jae reta iyapu wae reta ko jare uyembati Satanás jee re uikuaa mbae rewe. Mase, che ayapokata jae reta yuweru waerä pekoti jare uñeño reta waerä iwi re perowai uñemimichi rewe. Jare jeita reta pewe: “Añetete yepe yandeYa perau,” jeita reta.

<sup>10</sup>‘Che jae ma pewe pemíawäta waerä opaño mbaembae pepiawasu rewe, jare jukuärái piyapo ma. Jáeramo yepe tëi ara uwäeta oĩ opaete iwi pewa reta tuicha rupi uiporara waerä, erëi che puepita äi chuwi kuri.

<sup>11</sup>‘Mase, ayu yeta jupiwoiño. Jekuaeño piyapo jokua piyapo peĩ wae, awiye waerä iru wae pe uñemee pewi pecorona.

<sup>12</sup>‘Ikawī mbae wae umiamiri wae reta pe che ameeta yureko waerä tupao wasu ara pe kiape cheTumpa jee uyembutuichaka oĩ wae pe. Joko pe onoitä reta mbaepuere pëti ikita ipirätaete wae rami, jare joko pe ñonoita reta jaëño mäi pewa. Jare che aikuatiata äi jese reta cheTumpa jee jare cheTumpa jëta wasu jee – jae ko tëta wasu Jerusalén ipiau wae cheTumpa ombouta oĩ ara wi wae. Jae ramiño wi aikuatiata äi jese reta cheree ipiau wae. Jukuärái ayapota upurumiamiri wae reta pe.

<sup>13</sup>‘Ipotawe kía uipota uikuaa kawī wae, tuyapisaka kua ñee re – jae ko Espíritu Santo jei oĩ cheré wirowia wae reta pe kerupi rupi uyembati ñonoĩ wae reta pe.’ Jukuärái ikuatía,” jei chewe.

### **Cristo wiraaka ñee Laodicea pe jese wirowia wae reta pewarä**

<sup>14</sup>Jare yandeYa jei wi chewe: “Ime pëti araiwa uyandareko oĩ opaete cheré wirowia wae reta re tëta wasu Laodicea pe. Ikuatía chupe kua chiñee kuärái: ‘Che ko jae Amén jee wae. Jukuärái ko cheree, echa’ä pepuere perowia katu cheré amimbeu waerä jupi waëño. Che rupi ko uyekuaa arakaete Tumpa jembiaapo reta opaetei.

**15**Jare che tae Laodicea pewa cheré wírowia wae reta pe kuárái: Che aikuaa opaete mbae piyapo wae, jare kĕrái ko pe reta wae. Pe reta ko jae i jaku'áwe wae rami. I jaku wae jare i roísa wae mokui rewe ikawi ko. Erĕi ¿kía ra uipota jou i jaku'áwe wae? Kiawe. Jare jukuárái ko pe reta chemaerä, echa'ä pekirĕi rewe'ä piyeyokui chewe. ¿Kĕrái moná pe reta peratangätu piyeyokui chewe!

**16**Erĕi peratangätu'ä ko chekoti ramo, che pomombota ma äi kĕrái kía i jaku'áwe wae iyuru wi omombo wae rami.

**17**'Pe reta pere tĕi kuárái: "Yaikokatu ñäi. Jeta mbaembae ñanoi. Mbaeti etei mbae uata yandewe," pere tĕi. Erĕi jukuárai'ä ko. Pe reta pikuaa'ä kĕrái chekoti pikuasiete pei, jare peparawete pei, jare peresa mbae echa pei, jare penani etei wae echa pei. Jáeramo iiru wae reta umaeta tĕi peré peparareko rewe.

**18**'Jáeramo añawe che pumbiarakuaa äi piyapo waerä kuárái: Peyu chekoti pewa chewi waerä oro uwerasi wae rami. Echa'ä jukuárái pikokatuta chekoti. Jae nunga wi pewa chewi temimonde tĕi wae pemonde waerä, awiye waerä pemara penani pei ramo. Jae ramiño wi pewa chewi moa piñono waerä peresa pe pepuere waerä pemae kawi chekoti.

**19**Jukuárái che jae, echa'ä che ambieta jare aiporaraka au wae reta pe ambiarakuaa waerä. Jáeramo peya pepiayemingeta jupi mbae wae jare piyeyokui chewe peratangätu rewe.

**20**'Mase, ko öke pe äi jare che pueni äi. Ime yawe kía chiñee uyandu jare uipea chewe öke wae, che aiketa jĕta pe jare añemiiruta jae ndiwe ndukaru noi rambuewe.

**21**'Che opa ma apurumiamiri, jare joko wi awapi cheRu ndiwe iwapia mburuwicha wasu pewa re. Jare jukuárái wi ikawi mbae wae umiamiri wae reta pe che ameeta uwapi waerä che ndiwe chewapia pe.

**22**'Ipotawe kía uipota uikuaa kawi wae, tuyapisaka kua ñee re – jae ko Espíritu Santo jei oí cheré wírowia wae reta pe kerupi rupi uyembati ñonoí wae reta pe.' Jukuárái ikuatía," jei chewe.

## Apocalipsis 4

### Juan uecha ara pewa reta umbutuicha ñonoí Tumpa jee

**1**Kua jaikue rupi amae jare aecha pĕti öke uyepea oí ara pe. Jare ayandu jokua ñee tenonde yawe ayandu wae – jae ko jokua ñee täta uyemingeta wae temimbi wasu uñee wae rami wae. Jare jei chewe: "Iyupi kua iwate, jare aechakata ndewe mbaembae uasata oí kuri kua jaikue rupi wae," jei.

**2**Jare jupiwoiño Espíritu Santo uechaka chewe amokue mbaembae. Jae chembipau wae echa, jare jukuárái aecha ara pe pĕti mburuwicha wasu iwapia. Jare aecha wi kía joko pe uwapi oí.

<sup>3</sup>Jare joko pe uwapi oï wae uyekuaa chewe uwersiете ita ipöraete wae reta jaspe jare cornalina jee wae echa. Jare aecha wi yï jokua wapia iyipi rupi. Jare yï jembipe wi ita ipöraete wae esmeralda jee wae echa.

<sup>4</sup>Jare aecha jokua mburuwicha iwapia iyipi rupi ñru veinticuatro wapia reta uyere etei iko jese wae. Jare joko pe uwapi ñonoï veinticuatro mburuwicha reta. Jae reta omonde ñonoï temimonde tii wae, jare ñäka re onoi reta corona oro pewa.

<sup>5</sup>Jare jokua mburuwicha iwapia mbite pe oï wae wi uyekuaa uwera wae jare uyendu jiapu täta wae amaterere rami. Jare uyendu wi ara jiapu wae. Jare che aecha jokua wapia jowai chiu mechero jendi ñonoï. Kua uyembijaanga oï Espiritu Santo chiu wese ye jupi wae re.

<sup>6</sup>Jare aecha wi jokua wapia jowai pëti ipa wasu echa. Jare jokua jesäkasi vidrio rami. Jare jokua mburuwicha iwapia iyipi rupi etei aecha irundi mbae tekowe onoi wae reta. Jae reta jete rupi onoi jeta jesa reta jenonde koti jare jaikue koti.

<sup>7</sup>Jare jae reta ipite wi, pëti wae uyekuaa chewe yawapita tuicha wae echa. Jare ñru uyekuaa chewe weye echa. Jare ñru uyekuaa chewe kuimbae jowa echa. Jare ñru uyekuaa chewe pëti wirakee wasu uwewe oï wae echa.

<sup>8</sup>Jare pëti pëti jokua irundi mbae tekowe onoi wae reta ime onoi owa ipepo reta. Jare opaete jete rupi ime onoi jeta jesa reta. Jae reta ara rupi jare pïtu rupi jekuaeño jei reta ikueri mbae rewe: “Jupi, jupi, jupi wae ko jae Tumpa ikoño mäi wae jare opaete mbaepuere onoi wae. Jae ko iyipi wiwe ikoño mäi wae, jare jekuaeño oï wae, jare jaeño mäi pewa ikota wae.”

<sup>9</sup>Jukuärái jokua mbae tekowe onoi wae reta umbutuicha jokua wapia pe uwapi oï wae jee – jae ko ikoño mäi wae jee. Jare jae reta uyapo yawe jukuärái jare umee reta yawe yasurupái chupe,

<sup>10</sup>jokua veinticuatro mburuwicha reta uñeñoño iwi re uipiu rewe wapia pe uwapi oï wae jowai umbutuicha reta waerä jae jee – jae ko ikoño mäi wae jee. Jare oñoño reta icorona jokua wapia jowai jei rewe:

<sup>11</sup>“OreTumpa ndikoño mäi wae, jupi ko nde neni waerä opaete mbaepuere. Jare jupi ko wi opaete wae uipiu waerä ndewi, jare umbutuicha reta waerä nderee. Echa’ä nde ndiyapo opaetei mbaembae, jare nde ndipota wae rupi opaete mbaembae uyekuaa.” Jukuärái jei reta.

## Apocalipsis 5

### Tupapire jare Owecha kuimbae taurusu wae

<sup>1</sup>Jare che aecha wi jokua wapia pe uwapi oï wae ime onoi pëti tupapire uyembapúa oï wae ipo iyakata koti. Jokua tupapire uyekuatía oï japipe rupi jare ikupe rupi, jare chiu wese ye uyemboya oï imboyaka pe.

<sup>2</sup>Jare aecha pëti araiwa ipiräta wae täta uyemingeta rewe jei: “¿Kía pa jupi uipea waerä tupapire jare chiu imboyaka?” jei.

- <sup>3</sup>Jare mbaeti ko ara pe, jare iwi pe, jare iwiwi pe awe kía ipuere uipea jokua tupapire wae. Jare mbaeti wi kía ipuere umae kërái uyekuatía oĩ wae re.
- <sup>4</sup>Jayawe che ambipi ayao täta rupi. Echa'ä mbaeti kiawe jupi ipuere uipea waerä jokua tupapire jare umingeta waerä.
- <sup>5</sup>Jayawe jokua mburuwicha reta wi pëti wae jei chewe: “Awiye iyao. Mase, Judá iñemoña pewa reta ipite wi, Yawapita Wasu jei chupe reta wae, upurumiamiri wae ko. Jáeramo jae ipuere uipea jokua tupapire jare chiu imboyaka. Jae ko David iñemoña pewa mburuwicha wasurä ikota wae,” jei.
- <sup>6</sup>Jayawe aecha pëti Owecha kuimbae taurusu wae. Jare jete re uyekuaa ipere jendakue. Chemaerä jae chwaa jokua uyuka reta wae. Jae uyemboi oĩ jokua mburuwicha iwapia jare jokua irundi mbae tekowe onoi wae reta ipäu pe, jokua mburuwicha reta ipite pe. Jae onoi chiu jäti jare chiu jesa. Jare jokua chiu jesa uyembijaanga oĩ Tumpa iEspiritu chiu wese ye jupi wae Tumpa omondo opaete iwi rupi wae.
- <sup>7</sup>Jayawe Owecha kuimbae taurusu wae oo uipisi tupapire jokua wapia pe uwapi oĩ wae iyakata koti uipisi oĩ wae.
- <sup>8</sup>Jare tupapire onoi ma ipo pe yawe, jokua irundi mbae tekowe onoi wae reta jare jokua veinticuatro mburuwicha reta opa uñeñoño iwi re Owecha kuimbae taurusu wae jowai uñemimichi rewe. Pëti pëti onoi reta arpa jare copa oro pewa, jare tinee onoi reta pipe mbae utimbo kawi wae. Jokua mbae utimbo kawi wae uyembijaanga oĩ Tumpa re wirowia wae reta uyerure chupe wae re.
- <sup>9</sup>Jare jae reta ukäta Owecha kuimbae taurusu wae jowai pëti kätä ipiau wae kuärái: “Ndeñoete ko jupi nenoĩ waerä jokua tupapire jare ndipea waerä imboyaka reta. Echa'ä ndeyuka reta, jare nderuwi uyepiyere wae rupi ndewa piau ye ma jeta wae reta Tumpa pewarä. Jae reta ko jae opaete ambiembie iwi pewa reta kiapé kiapé ñonoĩ wae rupi jare opa kërái rái ñee pe uyemingeta wae reta.
- <sup>10</sup>Jare jae reta ndiyapo mburuwicha wasu retarä jare sacerdote retarä ipuere reta waerä uyeyokui yandeTumpa pe. Jare jae reta onoita mbaepuere iwi pe.” Jukuärái ukäta reta.
- <sup>11</sup>Jayawe amae ye, jare ayandu jeta araiwa reta iñee. Jare aecha jetaete ye ye araiwa reta ñonoĩ. Jae reta ñonoĩ jokua mburuwicha iwapia jare irundi tekowe onoi wae reta jare mburuwicha reta iyike rupi.
- <sup>12</sup>Jare araiwa reta täta uyemingeta rewe jei: “Jupi ko Owecha kuimbae taurusu wae uyuka reta wae onoi waerä mbaepuere, arakuaa, miräta jare opaete mbaembae ikawi wae. Jupi ko yaipiu waerä chuwi, jare yambutuicha waerä jae jee, jare ñamee chupe waerä yasurupái,” jei reta.
- <sup>13</sup>Joko wi che ayandu opaete Tumpa jembiapo reta ara pe ñonoĩ wae, iwi pe ñonoĩ wae, iwiwi pe ñonoĩ wae, jare mar rupi ñonoĩ wae reta jei: “Tuyembutuichaka jaeño mái pewa jokua wapia pe uwapi oĩ wae jare Owecha kuimbae taurusu wae.

Opaete wae tumbutuicha jae jee jare tuipiu reta chuwi. Jae tonoi mbaepuere opaete wae re jaeño mái pewa,” jei reta.

<sup>14</sup>Joko wi jokua irundi mbae tekowe onoi wae reta jei: “¡Jukuárai tuiko!” Jare jokua veinticuatro mburuwicha reta uñeñoño ye iwí re uñemimichi rewe jare umbutuicha reta ikoño mái wae jee.

## Apocalipsis 6

### Owecha kuimbae taurusu wae uipea owa tupapire imboyaka

<sup>1</sup>Jayawe che aecha jokua Owecha kuimbae taurusu wae uipea tupapire imboyaka pëti wae. Jayawe ayandu pëti mbae tekowe onoi wae jei: “¡Eyu!” Jare jae uyemingeta yawe, ñee uyendu ara jiapu wae echa.

<sup>2</sup>Jare aecha ou pëti kawayu tii wae. Jare opo jese wae onoi ipo pe pëti wirapa, jare uñemee chupe pëti corona. Jayawe jae oë oo upurumiamiri waerä, echa’ä jae ko pëti upurumiamiri wae.

<sup>3</sup>Joko wi Owecha kuimbae taurusu wae uipea ye tupapire imboyaka. Kua re uipea ma mokui imboyaka. Jayawe ayandu ñru mbae tekowe onoi wae jei: “¡Eyu!”

<sup>4</sup>Jare aecha ou pëti kawayu pítasi wae. Jare opo jese wae pe uñemee mbaepuere umiñeräroka waerä iwí pewa reta uyeyuka waerä jae yepái. Jukuárai ndarau yureko reta ipiawiwe rewe iwí pe. Jare uñemee wi chupe pëti kispukuete wae.

<sup>5</sup>Joko wi Owecha kuimbae taurusu wae uipea ye tupapire imboyaka. Kua re uipea ma mbapi imboyaka. Jayawe ayandu ñru mbae tekowe onoi wae jei: “¡Eyu!” Jare aecha ou pëti kawayu jü wae. Jare opo jese wae ipo pe onoi pëti pesa.

<sup>6</sup>Jare ayandu jokua irundi mbae tekowe onoi wae ipite wi jei: “Pëti kilo trigo jepi pëti ara mbarawiki pewa, jare mbapi kilo cebada jepi pëti ara mbarawiki pewa. Jare awiye erükumewa aceite jare vino,” jei.

<sup>7</sup>Joko wi Owecha kuimbae taurusu wae uipea ye tupapire imboyaka. Kua re uipea ma irundi imboyaka. Jayawe ayandu ñru mbae tekowe onoi wae jei: “¡Eyu!”

<sup>8</sup>Jare aecha ou pëti kawayu iyu wae. Jare opo jese wae jee ko Mano. Jare jaikue ou ñru wae Umanokue Wae Reta Jenda jee wae. Jare uñemee chupe reta mbaepuere jetaete iwí pewa reta re uyukaka reta waerä kispuku pe, jare karuái pe, jare mbaerasi pe, jare mbaemimba ñana rupiwa pe.

<sup>9</sup>Joko wi Owecha kuimbae taurusu wae uipea ye tupapire imboyaka. Kua re uipea ma pandepo imboyaka. Jayawe che aecha ara pe pëti mbaerenda. Jare jokua mbaerenda íwi pe aecha jeta umano wae reta iä. Jae reta uyeyukaka Tumpa ñee umimbeu ramo jare jupi yureko Tumpa re ramo.

<sup>10</sup>Jare jae reta usapikai rewe jei: “OreYa jupi wae jare añetete pewa, ¿kërai yawe rewa pa neärota ndiyepi waerä orewe oreyka wae reta pe? ¿Kërai yawe pa ndiporarakata chupe reta?” jei reta.



<sup>11</sup>Jare uñemee chupe reta temimonde tii wae, jare ayandu pëti ñee jei chupe reta: “Peäro mii rani michi pewa pepiawasuwae rewe. Echa’ä uyukata reta rani ko ñru wae reta Tumpa pe uyeyokui wae – jae reta ko pehermano reta Tumpa jee re. Jare jae reta imeta ko umano towaicho reta ipo pe kërái pe reta pëmano rami,” jei chupe reta.

<sup>12</sup>Joko wi aecha Owecha kuimbae taurusu wae uipea ye tupapire imboyaka. Kua re uipea ma owa imboyaka. Jayawe iwi täta ukäta. Jare aecha warasi opa uñemipitumimbi pëti tarapo jüasi wae rami, jare yasi opa uyeyapo pita tuwi rami.

<sup>13</sup>Jare yasitata reta ara re ñonoï wae opa oa iwi re kërái pëti iwa ía yawiye mbae wae iwitu täta yawe opa oa iwi re rami.

<sup>14</sup>Jare ara etei uyembapúa pëti tupapire yambapúa wae rami, jare ukañi. Jare opaete iwitu wasu reta jare iwi i mbite pe ñonoï wae reta usiri jenda wi.

<sup>15</sup>Jare opaete iwi pewa reta – jae ko mburuwicha wasu reta, jare ñru mburuwicha reta, jare ikokatu wae reta, jare sindaro itenondewa reta, jare mbaepuere onoi wae reta, jare opaete täta rupi uyeyokui wae reta, jare opaete uyeyokui mbae wae reta wi – opaetei jae reta opa uñemi tēi mbae ikua rupi jare iwitu wasu reta itape ipäu rupi.

<sup>16</sup>Jare jei tēi reta: “Tuyapara yanderé iwitu wasu reta jare itape reta awiye waerä yanderecha pea wapia pe uwapi oi wae, jare awiye waerä Owecha kuimbae taurusu wae iarasi oa yanderé.

<sup>17</sup>Echa’ä uwäe ma ara jae reta pochiete waerä yandewe, jare ndarau etei kía ipuere umiawäta,” jei reta.

## Apocalipsis 7

### Tumpa umiseñara 144.000 wae reta

<sup>1</sup>Jare kua jaikue rupi aecha irundi araiwa reta uyemboi ñonoï iwi pe. Pëti uyemboi oi warasi oë wae koti, jare ñru uyemboi oi warasi uike wae koti. ñru uyemboi oi norte koti, jare ñru uyemboi oi sur koti. Jare jae reta oyopia yureko irundi koti koti wi iwitu uyepeyu wae, awiye waerä iwitu uyepeyu iwi re, jare mar re, jare iwira reta re.

<sup>2</sup>Kua araiwa reta pe uñemee ma mbaepuere urükumewa waerä iwi jare mar. Jare aecha ñru araiwa uyupi oo oi ara koti warasi oë wae koti wi. Jare aecha ipo pe wiraa pëti marka – jokua ko jae Tumpa ikoño mái wae imarka. Jokua pipe araiwa umiseñarata iko Tumpa uiparawo wae reta.

<sup>3</sup>Jare kua araiwa usapikái rewe jei jokua irundi araiwa reta pe: “Awiye perükumewa iwi, jare mar, jare iwira reta ndei amiseñara mbowe yandeTumpa pe uyeyokui wae reta jesiwa pe,” jei chupe reta. Jayawe joko wi araiwa oo upurumiseñara.

<sup>4</sup>Jare oo ma opa umiseñara yawe, che ayandu mbowi ko Tumpa pe uyeyokui wae reta araiwa opa umiseñara wae. Umiseñara 144.000 Israel inemoñaeta.

<sup>5</sup>Judá iñemoñaá reta wi umiseñara 12.000. Rubén iñemoñaá reta wi umiseñara 12.000. Gad iñemoñaá reta wi umiseñara 12.000.

<sup>6</sup>Aser iñemoñaá reta wi umiseñara 12.000. Neftalí iñemoñaá reta wi umiseñara 12.000. Manasés iñemoñaá reta wi umiseñara 12.000.

<sup>7</sup>Simeón iñemoñaá reta wi umiseñara 12.000. Leví iñemoñaá reta wi umiseñara 12.000. Isacar iñemoñaá reta wi umiseñara 12.000.

<sup>8</sup>Zabulón iñemoñaá reta wi umiseñara 12.000. José iñemoñaá reta wi umiseñara 12.000. Jare Benjamín iñemoñaá reta wi umiseñara 12.000.

### **Jeta ye ye jemimonde tii wae reta ñonoï Tumpa iwapia jowai**

<sup>9</sup>Kua jaikue rupi aecha jetaete ye ye opaete kerupi rupi yureko wae reta jare opa kërái raí ñee pe uyemingeta wae reta. Jae reta uyemboi ñonoï jokua mburuwicha wasu iwapia jowai jare Owecha kuimbae taurusu wae jowai. Mbaeti kiawe ipuere opa uipapa reta, echa'ä jetaete ye ramo. Jae reta jemimonde tii, jare ipo pe onoi reta karandai joki.

<sup>10</sup>Jare usapikai rewe jei reta: “¡Yanderepi ma kua yandeTumpa uwapi oï iwapia mburuwicha wasu pewa pe wae jare Owecha kuimbae taurusu wae!” jei reta.

<sup>11</sup>Jare opaete araiwa reta uyemboi ñonoï jokua mburuwicha wasu iwapia jare jokua mburuwicha reta jare jokua irundi mbae tekowe onoi wae reta iyipi rupi. Jayawe jae reta uñeñono iwi re uñemimichi rewe mburuwicha wasu iwapia jowai jare umbutuicha reta Tumpa jee.

<sup>12</sup>Jare jei reta: “¡Jukuärái tuiko! Nde oreTumpa, numee yasurupái tuicha ndewe. Ndeñoete nenoï opaete arakuaa, miräta, jare mbaepuere. Jupi ko opaete wae uipiu waerä ndewi jare umbutuicha reta waerä nderee jaeño mái pewa.

¡Jukuärái tuiko!” jei reta.

<sup>13</sup>Jayawe pëti wae jokua mburuwicha upirandu chewe: “¿Ndikuaa pa kua jemimonde tii wae reta jare keti wi ra yuweru?” jei.

<sup>14</sup>“Aikuaa'ä etei. Nde ndikuaa,” jae chupe. Jayawe jae jei chewe: “Kua reta ko jae uasa mbaesuserere wasu rupi wae. Oyoe ma reta jemimonde jare umitii reta Owecha kuimbae taurusu wae juwi pe,” jei.

<sup>15</sup>“Jáeramo añawe ñonoï reta Tumpa joo pe iwapia jowai uyeyokui reta waerä chupe ara rupi jare pïtu rupi,” jei. “Jare jokua imburuwicha wasu iwapia pe uwapi oï wae uyandarekota oï jese reta.

<sup>16</sup>Jáeramo ndarau ye ma jae reta iyembai jare iïwe. Jare ndarau ye ma warasi jasi chupe reta jare araku wi.

<sup>17</sup>Echa'ä Owecha kuimbae taurusu wae wapia mburuwicha wasu pewa pe oï wae uyandarekota oï jese reta. Jare jae wiraata oï reta ikua iwororo jekuaeño oë wae pe,

joko pe jou reta waerä i tekowe umee wae. Jare Tumpa etei oyoeta jesai chuwi reta.” Jukuärái jokuwa mburuwicha jei chewe.

## Apocalipsis 8

### Owecha kuimbae taurusu wae uipea tupapire imboyaka taikuewa wae

<sup>1</sup>Jayawe Owecha kuimbae taurusu wae uipea ye tupapire imboyaka. Kua re uipea ma chiu imboyaka. Jare uipea ma yawe, upita kii ngatu ara pe mbite ora rupi.

<sup>2</sup>Joko wi aecha chiu araiwa reta uyemboi ñonoï Tumpa jowai. Jare pëti pëti pe uñemee chupe reta temimbi wasu.

<sup>3-4</sup>Jare ou ñru araiwa uyemboi Tumpa iwapia jowai, mbaerenda mbae utimbo kawi wae uyeapi jese wae iyipi pe. Jokuwa mbaerenda oro pewa ko. Jare araiwa onoi ipo pe pëti jiru oro pewa mbae utimbo kawi wae uapi pipe wae. Jare uñemee chupe jeta mbae utimbo kawi wae uapi waerä mbaerenda re Tumpa jowai. Jare jae uapi yawe, jatäti uyeupi päwe Cristo re wirowia wae reta iyerure ndiwe Tumpa jowai.

<sup>5</sup>Joko wi araiwa ueki tatäpi mbaerenda wi umitinee waerä pipe mbae utimbo kawi wae uapi pipe wae. Jare omombo ara wi iwi koti. Jare jukuärái uyapo yawe, uyekuaa uwera wae jare uyendu jiapu täta wae amaterere rami. Jare uyendu wi ara jiapu wae, jare iwi ukäta.

### Chiu araiwa reta umiñee jemimbi wasu

<sup>6</sup>Jayawe jokuwa chiu araiwa reta chiu temimbi wasu onoi wae uyeyapikatu umiñee waerä temimbi wasu reta.

<sup>7</sup>Jayawe pëti araiwa umiñee jemimbi wasu. Jare umiñee yawe, aramoiño oa iwi re amandau jare tata tuwi rewe. Jare mbite seri iwira reta iwi pe oi wae okai, jare opaete kapii opa okai.

<sup>8</sup>Joko wi ñru araiwa umiñee jemimbi wasu. Kua re mokui ma umiñee. Jare umiñee yawe, pëti iwitu wasu echa wae jendi rewe oa oo mar pe. Jare mar mbite seri opa uyeyapo tuwirä.

<sup>9</sup>Jare mbite seri jewae mar rupiwa reta opa umano. Jare jae nunga wi mbite seri chalana wasu reta opa ikumewa.

<sup>10</sup>Jayawe ñru araiwa umiñee jemimbi wasu. Kua re mbapi ma umiñee. Jare umiñee yawe, pëti yasitata tuicha wae oa ara wi jendi rewe pëti mechero tuicha wae jendi rami. Jare oa mbite seri i wasu reta re jare iwororo reta re.

<sup>11</sup>Jare jokuwa mbite seri i wasu reta opa iro uyeyapo. Jare jetaete wae umano jokuwa i iro wae jou ramo. Jáeramo jokuwa yasitata ko jee Ajenjo.

<sup>12</sup>Jayawe ñru araiwa umiñee jemimbi wasu. Kua re irundi ma umiñee. Jare umiñee yawe, mbae uyeyapo warasi pe awiye waerä jembipe irundi ora opa ara rupi. Jae nunga wi mbae uyeyapo yasi jare yasitata reta pe awiye waerä jembipe irundi ora opa pïtu rupi.

<sup>13</sup>Jayawe aecha pëti araiwa uwewe oï iwate rupi, jare jae mbapi wese usapikai rewe jei: “¡Kërái etei ndipo uiporaraeteta iwi pewa reta! ¡Echa’ä imeño mbapi araiwa reta jae ma ñonoï umiñee waerä jemimbi wasu!” jei.

## Apocalipsis 9

<sup>1</sup>Jayawe ñru araiwa umiñee jemimbi wasu. Kua re pandepo ma umiñee. Jare umiñee yawe, aecha iwi pe pëti yasitata echa wae ara wi oakue. Jare uñemee chupe iwikua wasu juwa mbae wae illave.

<sup>2</sup>Jayawe jae uipea iwikua wasu. Jare uipea ma yawe, oë tatäti tata tuichaete wae wi tatäti oë wae rami. Jare warasi uyekuaa’ä tatäti iwikua wi oë wae jeko pewa. Jáeramo opa pütumimbi.

<sup>3</sup>Jare tatäti wi oë tuku reta iwi re, jare tuku reta opa umbapi iwi. Jare uñemee chupe reta mbaepuere oñopi waerä iwi pewa reta chumikaräpe ñanopi wae rami.

<sup>4</sup>Jare Tumpa jei tuku reta pe awiye urükumewa waerä opaete temiti joki reta iwi pe oï wae jare iwira reta. Jaeño ipuere umbipere reta jokua mbaeti Tumpa imarka jesiwa re onoi wae reta.

<sup>5</sup>Jare mbaepuere uñemee chupe reta pandepo yasi pewa uiporaraka waerä iwi pewa reta pe. Jasieteta chupe reta, pëti chumikaräpe ñanopi wae rami. Erëi jokua tuku reta ipuere’ä upuruyuka.

<sup>6</sup>Jare jokua ara reta rupi iwi pewa reta uipotata tëi umano täta uiporara ñonoï ramo. Erëi ndarau ipuere reta, echa’ä mano usiri ma chuwi wae echa uyenduta reta.

<sup>7</sup>Jare jokua tuku reta uyekuaa kawayu uyeyapikatu uñeräro pewarä wae echa chewe. Jare iñäka re onoi corona oro pewa echa. Jare jowa uyekuaa kuimbae jowa echa.

<sup>8</sup>Jare ía puku kuña ía echa. Jare jäi reta uyekuaa yawa jäi echa.

<sup>9</sup>Jare ipitía re onoi yopiaka jiero pewa echa. Jare uwewe reta yawe, ipepo täta jiapu. Uyendu chewe jetaete kawayu reta ñeräro pe karosa ndiwe yuraa ñonoï wae echa.

<sup>10</sup>Jare tuku reta juwai chumikaräpe juwai echa. Jare juwai iyapi re ipöpia onoi wae echa. Jare joko pe onoi reta mbaepuere uiporaraka waerä iwi pewa reta pe pandepo yasi pewa.

<sup>11</sup>Jare jokua tuku reta imburuwicha wasu ko jae araiwakue. Jae ime onoi mbaepuere opaete jokua iwikua wasu juwa mbae wae pe ñonoï wae reta re. Jare jae jee ko hebreo ñee pe Abadón. Jare griego ñee pe jae jee ko Apolión.

<sup>12</sup>Jokua ko jae tenondewaete mbaesuserere wasu araiwa umimbeu wae. Erëi mokui mbaesuserere ye uyeyapota oï.

<sup>13</sup>Jayawe ñru araiwa umiñee jemimbi wasu. Kua re owa ma umiñee. Jare umiñee yawe, ayandu ñee oë jokua mbaerenda oro pewa Tumpa jowai oï wae wi. Jokua mbaerenda onoi irundi jäti, jare jokua ñee uyendu jäti reta ipite wi.

<sup>14</sup>Jare jokua ñee jei araiwa jemimbi wasu umiñee ramo wae pe kuärái: “Iyora jokua irundi araiwakue reta uñeñapiti ñonoï i wasu Éufrates jembei pe wae,” jei chupe.

<sup>15</sup>Jayawe araiwa oo oyora jokua irundi araiwakue reta jae reta yuraa uyukaka waerä mbite seri iwi pewa reta. Kua araiwakue reta, ima rupi Tumpa uyapikatu ma yepe oñono. Jare uäro yureko jokua año, jare jokua yasi, jare jokua ara, jare jokua ora etei.

<sup>16</sup>Jae reta ñonoï oyokui waerä jetaete ye sindaro reta kawayu re opo wae. Jare ayandu mokui chiëto miyón ko jae reta.

<sup>17</sup>Jare jokua kawayu reta jare opo jese wae reta uyekuaa chewe kuärái: Ime onoi ipitía re temimonde ñeräro pewa – jae ko jiero pewa pítasi wae, jare jowiasí wae, jare iyuasí wae. Jare kawayu reta iñäka yawapita tuicha wae iñäka echa. Jare iyuru wi oë tata jare tatäti jare azufre. <sup>18</sup>Jare tata jare tatäti jare azufre kawayu reta iyuru wi oë wae opa uyuka mbite seri iwi pewa reta.

<sup>19</sup>Erëi jokuaño’ä uyapo reta. Jae nunga wi juwai mboi echa jare iyapi re oï mboi iñäka echa. Jare jokua pipe upurumbipere reta. Jukuärái jokua kawayu reta iyuru jare juwai ime onoi mbaepuere umbipere jare uyuka waerä iwi pewa reta.

<sup>20</sup>Jare jokua iwi pewa reta umano’ä jokua mbaesusere reta rupi wae uipota’ä etei ueya ipiyemingeta mbaembae kachi uyapo wae rewa. Echa’ä jae reta jekuaeño uipota umbiadora aña reta re jare tumparaanga reta re oro pewa, jare korepoti jiero pewa, jare jiero bronce pewa, jare ita pewa, jare iwira pewa wi. Jokua tumparaanga reta ipuere’ä etei umae jare ayandu jare uwata wi. Erëi jeseuwe iwi pewa reta umbiadora jese reta.

<sup>21</sup>Jae nunga wi jae reta ko upuruyuka wae reta, jare ipaye wae reta, jare iawasapota wae reta, jare imonda wae reta. Erëi uipota’ä etei ueya reta ipiyemingeta jokua mbaembae rewa.

## Apocalipsis 10

### Araiwa jare tupapire michi wae

<sup>1</sup>Jare che aecha ñru araiwa ipirätaete wae uweyi ou ara wi. Jae uñeñowa oï amapitu pe, jare iñäka re oï yñ. Jare jowa jembipete warasi rami. Jare ipita wiwe iu rewa tata jendi oï wae echa chewe.

<sup>2</sup>Jare jae ipo pe onoi pëti tupapire michi wae uyepea oï. Jare ou oñono ipi iyakata kotiwa mar iáramo jare ipi iyaso kotiwa iwi iáramo.

<sup>3</sup>Jayawe täta usapikai yawapita tuicha wae uñee wae rami. Jare araiwa usapikai ma yawe, chiu wese ayandu ñee ara täta jiapu wae rami.

<sup>4</sup>Jare chiu wese ma ara jiapu yawe, che aikuatiata ma aiko tëi kua ayandu wae. Erëi ara wi ayandu jei chewe: “Awiye ikuatía jokua chiu wese ara jiapu uyendu ndewe wae. Ndeño ko ndikuaata,” jei.

- <sup>5</sup>Jare jokua araiwa aecha onoi ipi mar re jare iwi re wae upi ipo ara koti.
- <sup>6</sup>Jare jei: “Tumpa ko jae imeño mái iko wae. Jae ko uyapo ara, jare iwi, jare mar, jare opaete mbaembae pipe oĩ wae reta. Jare jae jowake che tae añawe uwäe ma ora.
- <sup>7</sup>Echa’ä araiwa taikuewaete umiñeeta ma oĩ jemimbi wasu. Jare jae umiñee ma yawe, Tumpa opata uyapo ipiyemingeta jaeño uikuaa wae. Arakaete Tumpa umimbeu jae iñee umimbeu wae reta pe kua ara uwäeta iko. Jare añawe jae ma uwäe,” jei araiwa.
- <sup>8</sup>Jare ara wi ayandu ye ñee jei chewe: “Ekua jokua araiwa onoi ipi mar re jare iwi re wae jowai. Jare ipisi ipo wi jokua tupapire uyepea oĩ wae,” jei chewe.
- <sup>9</sup>Jayawe che a araiwa pe aeka umee waerä chewe tupapire michi wae. Jayawe araiwa jei chewe: “Ipisi jare opa jeu. Ndeyuru pe jëeta oĩ ndewe ei rami. Erëi ndeu ma yawe, nderie jasita ndewe,” jei.
- <sup>10</sup>Jayawe aipisi jokua tupapire michi wae araiwa ipo wi jare opa jau. Jare cheyuru pe jëe iko ei rami. Erëi opa ma jau yawe, cherie jasi chewe.
- <sup>11</sup>Jayawe araiwa jei chewe: “Nde imeta ko jekuaeño nemimbeu kërái mbaembae Tumpa uyapota oĩ tëta wasu reta rupi, jare opaete ambiembie iwi pewa reta kerupi rupi ñonoĩ wae rupi, jare opaete ambiembie ñee pe uyemingeta wae reta rupi, jare mburuwicha wasu reta rupi,” jei.

## Apocalipsis 11

### Tumpa ombou mokui kuimbae umimbeu jese wae reta

- <sup>1</sup>Jare uñemee chewe pëti iwira mbaembae amianga pipe waerä. Jare ayandu ñee jei chewe kuärái: “Ekua emianga tupao wasu kiape cheree umbutuicha reta pipe wae. Jare joko pe emianga wi mbaerenda mbae utimbo kawu wae uyeapí jese wae. Jare ipapa wi mbowí joko pe cheree umbutuicha ñonoĩ wae reta,” jei.
- <sup>2-3</sup>“Erëi awiye emianga tupao wasu joka. Echa’ä jokua oka amee cheré wirowia mbae wae reta pe. Jae reta onoita mbaepuere Jerusalén re cuarenta y dos yasi pewa – jae ko 1.260 ara pewa,” jei chewe. “Jare jokua ara reta rupi che amondota mokui kuimbae umimbeu waerä ñee ameeta aĩ chupe reta wae. Jare jae reta umimbeu kawita che rewa. Jare mokui rewe omondeta temimonde mbiatiti pewa.” Jukuärái ñee jei chewe.
- <sup>4</sup>Jokua kuimbae reta ko jae jokua arakae mokui temiti olivo jare mokui mechero iwapika uyembijaanga jese wae. Jare jae reta uyemboi ñonoĩ iwi iYapoa jowai uyeyokui reta waerä chupe.
- <sup>5</sup>Jare ime yawe kía uipota tëi uyapo ikawi mbae wae jokua mokui kuimbae reta pe wae, oëta tata jokua kuimbae reta iyuru wi jare opata uapí jowaicho reta jokua tata pipe. Jukuärái umanota kía uipota tëi mbae ikawi mbae uyapo chupe reta yawe.

<sup>6</sup>Jare kua reta mokui rewe onoi mbaepuere uyukenda waerä ara awiye waerä oki jokua ara jae reta opa Tumpa iñee umimbeu rewa. Jae reta wi onoi mbaepuere i tuwirä uyapo waerä. Jae ramiño wi jae reta onoi mbaepuere uiporaraka waerä iwi pewa reta pe ipotawe mbaesusere pe mbowi wese jae reta uipota uyapo wae rupi.

<sup>7</sup>Jayawe jae reta opa ma Tumpa rewa umimbeu yawe, pëti mbaemimba echa ipirätaete jare pochiete wae oëta jokua iwikua wasu juwa mbae wae wi. Jare jae ombowaichota jokua mokui kuimbae reta, jare umiamirita, jare uyukata reta.

<sup>8</sup>Jare jokua mokui kuimbae jetekue upitata calle pe jokua tëta wasu kiape yandeYa kurusu re uikutu reta wae pe. Yandepuere yambijee jokua tëta wasu Sodoma jare Egipto wi, echa'ä jokua tëta wasu pewa reta oyowaicho Tumpa koti.

<sup>9</sup>Jare mbapi ara mbite rupi opaete ambiembie iwi pewa reta kerupi rupi ñonoï wae rupi jare opa kërái rái ñee pe uyemingeta wae reta uechata ñonoï jokua mokui kuimbae jetekue. Jare jae reta ndarau umaño kía re awe oñoti waerä jetekue reta.

<sup>10</sup>Jare iwi pewa reta uyerowiata jokua mokui kuimbae Tumpa iñee umimbeu wae umano reta ramo. Echa'ä tenonde yawe, kua kuimbae reta täta rupi uiporarakase chupe reta mbaesusere pe. Erëi añawe kua mokui kuimbae reta opa ma umano. Jáeramo iwi pewa reta uyapota arete jare umeeta iyupe reta regalo.

<sup>11</sup>Erëi che aecha mbapi ara mbite uasa ma yawe, Tumpa umee ye tekowe jokua mokui kuimbae jetekue reta pe. Jare jae reta mokui rewe upüa ye uyemboi reta. Jare opaete kua uecha wae reta opa ukiye reta täta rupi.

<sup>12</sup>Jare jokua mokui kuimbae reta uyandu ara wi ñee jei usapikai rewe: “Piyeupi peyu,” jei. Jayawe uyeupi reta oo ara koti amapitu re jowaicho reta jowake.

<sup>13</sup>Jare jupiwoiño iwi täta ukäta. Jare jokua iwikäta jeko pewa jeta tëta reta opa uyapara jokua tëta wasu pe. Jare umano wi 7.000 kuimbae jare kuña reta. Jare umano'ä wae reta ukiyete upita reta jare umbutuicha reta Tumpa ara pe oi wae jee.

<sup>14</sup>Jukuärái opa uyeyapo mokui mbaesusere. Erëi mase, imeño pëti ye uasa waerä jare jawoiño ma uyeyapota oi.

### **Araiwa taikuewaete umiñee jemimbi wasu**

<sup>15</sup>Jare joko wi ñru araiwa umiñee jemimbi wasu. Kua re chiu ma umiñee. Jare umiñee yawe, aramoiño uyendu ara pe jeta wae reta täta usapikai rewe jei reta kuärái: “Añawe wiwe yandeRu Tumpa jare yandeYa Cristo ikota opaete kua iwi imburuwicha wasurä jaeño mái pewa. Jare imbaepuere mburuwicha wasu pewa ndarau etei opa,” jei reta.

<sup>16</sup>Jayawe aecha jokua veinticuatro mburuwicha reta uwapi ñonoï iwapia pe Tumpa jowai. Jare kua reta uñeño iwi re umbutuicha waerä jae jee.

<sup>17</sup>Jare jei reta: “OreYa Tumpa, nde neni opaete mbaepuere. Nde ko jae jekuaeño oi wae, jare iyipi wiwe ikoño mái wae, jare jaeño mái pewa ikota wae. Ore numee

yasurupái ndewe. Echa'ä nembraepuere tuichaete wae rupi ndiyeyapo ma opaete wae imburuwicha wasurä.

<sup>18</sup>Iwi pewa reta uyembopochi tēi ndekoti. Erēi añawe ndearasi wasu nditita ma nei jese reta. Ou ma uwäe ara umanokue wae reta uyemboi waerä nderowai. Jare ipotawe kía urükumewa iwi pewa reta ndekoti wae, nde opata nembái. Jare niñee umimbeu wae reta pe jare opaete wae niñono tee nemaerä wae reta pe nemiñatimata nei chupe reta ikawi wae. Iparawete wae reta wiwe jare mburuwichakue retawe, opaete uipiu ndewi wae reta pe nde nemiñatimata nei.” Jukuärái jei jokua mburuwicha reta.

<sup>19</sup>Jare kua jei reta ma yawe, tupao wasu ara pe oi wae uyepea, jare o pe uyekuaa Tumpa arakae jei wae yemimandúa jiru. Jare uyekuaa uwera wae, jare uyendu jiapu täta wae amaterere rami. Jare uyendu wi ara jiapu wae. Jare jawoi pewa iwi ukäta. Jare oa wi amandau jeta wae.

## Apocalipsis 12

### Kuña jare teyu wasu pita wae

<sup>1</sup>Jare ime mbae uyekuaa ara re chepiakañiete jese wae. Jae ko pēti kuña warasi pe uyemonde rami. Jare kuña ipi iwi pe oi yasi. Jare doce yasitata reta onoi iñaka re icoronarä.

<sup>2</sup>Jare jokua kuña ipurúa, jare jäse imembirasi ramo. Echa'ä imembi oata ma oi.

<sup>3</sup>Jare uyekuaa iru mbae ara re chepiakañiete jese wae. Jae ko pēti teyu wasu pita wae dragón jei chupe wae. Jae onoi chiu iñaka jare payandepo jäti reta. Jare pēti pēti iñaka re onoi corona.

<sup>4</sup>Jare juwai pe uipisi mbite seri yasitata reta omombo iwi koti. Jare jae uyemboi kuña imembi oata wae jowai opa waerä tēi jou chuwi imembi oa yawe.

<sup>5</sup>Jare kuña imembi oa kuimbae. Jare jokua oa wae onoita tuicha mbaepuere opaete iwi pewa reta re. Erēi dragón ipuere'ä jou, echa'ä jokua kuña imembi uyereraa kiate Tumpa uwapi oi wae iwapia pe.

<sup>6</sup>Jare jokua kuña osi oo iwitini wasu koti. Echa'ä joko pe Tumpa uyapikatu chupe uñepiro waerä. Jare joko pe Tumpa uyandarekoka jese 1.260 ara.

### Tumpa omombo Añawasus ara wi

<sup>7</sup>Jayawe uyeyapo pēti ñeräro ara pe. Pēti araiwa tenondewa Miguel jee wae jare iaraiwa reta uñeräro jokua dragón ndiwe. Jare dragón jare jokua araiwa reta uyemboya jese wae uñeräro wi jae reta ndiwe.

<sup>8</sup>Erēi dragón jare iaraiwa reta opa jamiri, jare mbaeti ye ma jendarä ara pe.

<sup>9</sup>Jayawe Miguel jare iaraiwa reta omombo jokua dragón ara wi iwi pe opaete araiwa jese uyemboya wae reta ndiwe. Jokua dragón ko jae mboi arakaete Eva



umingeta wae. Jae ko Satanás, Añawasu yande yae chupe wae. Jae ko umbitawi opaete iwi pewa reta wae.

<sup>10</sup>Jayawe ara pe ayandu ñee usapikái rewe jei: “Añawe uwäe ma ara yandeTumpa opa uepi waerä jese wirowia wae reta, jare uyekuaa waerä imbaepuere tuicha wae. Echa’ä añawe jae uyeyapo ma opaete wae imburuwicha wasurä jaeño mái pewa. Añawe wiwe Cristo onoita opaete mbaepuere. Echa’ä Tumpa omomboka ma Añawasu ara wi. Jare Añawasu ndarau ye ma uyemboi Tumpa jowai umbijeko waerä yandehermano reta. Echa’ä jukuärái jae uyapose opa ara rupi jare opa pïtu rupi, erëi añawe ndarau ye ma uyapo chupe reta jukuärái.

<sup>11</sup>Echa’ä jae reta opa ma umiamiri Añawasu Owecha kuimbae taurusu wae juwi rupi jare Tumpa ñee umimbeu reta wae rupi. Jare mbaeti etei urukiye reta jekowe umano waerä.

<sup>12</sup>Jáeramo ara pe ma ñonoï wae reta tuyerowia! Erëi, pe reta iwi pe peï wae jare mar rupi peï wae, jkërái etei ndipo piporara paraweteta! Echa’ä Añawasu uweyi ma ara wi uyembowaicho waerä pekoti täta iarasi rewe. Echa’ä jae uikuaa michiño ma ara onoi wae.” Jukuärái jei jokua ñee ayandu wae.

<sup>13</sup>Jayawe jokua dragón uikuaa yawe Tumpa omomboka ma ko iwi pe wae, jae umbipi omoña jokua sambiaï kuimbae oa wae ichi.

<sup>14</sup>Jayawe uñemee kuña pe pëti wirakee wasu ipepo reta. Jokua pipe jae uwewe oo dragón wi mbiri iwitini wasu koti kipe uñepïro pipe wae pe. Jare joko pe Tumpa uyandarekoka jese mbapi año mbite rupi.

<sup>15</sup>Jayawe jokua dragón iyuru wi omondo jeta i kuña jaikue wiraa uyuka waerä tēi.

<sup>16</sup>Erëi iwi etei ombori kuña, echa’ä iwi uyepea kërái yandeyuru yaipea rami. Jare jokua dragón iyuru wi i wasu rami omondo wae opa ukañi iwi uyepea wae pe.

<sup>17</sup>Jayawe dragón pochiete upita kuña pe, jare oo uñeräro waerä kuña ñemoñaeta reta ndiwe – jae reta ko Tumpa jei wae rupi yureko wae reta jare Jesús rewa jupi umimbeu wae reta.

## Apocalipsis 13

### Bestia mar wi oë wae

<sup>1</sup>Che ayemboi aiko mar jembei pe. Jayawe aecha oë mar wi pëti mbaemimba echa – jae ko pëti bestia jei chupe reta wae. Jare jokua bestia ime wireko chiu ñäka jare payandepo jäti reta. Jare pëti pëti jäti re onoi corona mburuwicha wasu pewa. Jare pëti pëti ñäka re onoi tee jokua pipe jeika tēi iyupe jae ko Tumpa wae.

<sup>2</sup>Jokua bestia yawa echa chewe. Jare ipi oso ipi echa chewe. Jare iyuru yawapïta tuicha wae iyuru echa chewe. Jare jokua dragón umee imbaepuere kua bestia pe jare omondo jae jee re.

<sup>3</sup>Jare aecha jokua bestia mar wi oë wae pëti iñäka ipere oï. Umano rape tēi, erēi ukuera. Jare iwī pewa reta opaete seri ipiakañi umae jese.

<sup>4</sup>Jare umbutuicha reta jokua dragón jee, echa'ä bestia ou dragón jee re ramo. Jare umbutuicha reta wi jokua bestia jee. Jare jei reta: “Mbaeti etei kía kua nunga bestia rami. Ndarau kía ipuere uñeräro jae ndiwe jare umiamiri,” jei reta.

<sup>5</sup>Jare uñemee jokua bestia pe mbaepuere iwī pewa reta re cuarenta y dos yasi rupi. Jare uñemee wi chupe uyemingeta waerä uyembutuicha rewe jare jei tēi iyupe jae ko Tumpa wae.

<sup>6</sup>Jae jekuaeño jei jeta mbae ikawi mbae wae Tumpa koti. Jare uyemingeta kachi Tumpa jee koti, jare Tumpa jëta koti, jare ara pe yureko wae reta koti.

<sup>7</sup>Jare uñemee wi bestia pe uñeräro waerä Tumpa re wirowia wae reta ndiwe jare umiamiri reta waerä. Jare uñemee chupe mbaepuere opaete ambiembie iwī pewa reta re kerupi rupi ñonoï wae rupi jare opa kërái rái ñee pe uyemingeta wae reta rupi.

<sup>8</sup>Jare opaete seri iwī pewa reta umbutuicha bestia jee. Jaeño jokua Owecha kuimbae taurusu wae uyeyukaka wae itupapire pe jee uyekuatía oï wae reta umbutuicha'ä jae jee. Jokua tupapire ko jae opaete tekowe opa mbae wae onoi wae reta jee uyekuatía oï pipe wae. Jare jae reta jee uyekuatiaño mái iko iwī uyembipi wiwe.

<sup>9</sup>Ipotawe kía uipota uikuaa kawi wae, tuyapisaka kua ñee re:

<sup>10</sup>Tumpa uipota yawe ipotawe kía uyepisika waerä jowaicho reta pe, jukuärái ñotái oï. Jare Tumpa uipota yawe ipotawe kía uyeyukaka waerä kispuku pe, jukuärái ñotái oï wi. Kua nunga mbaembae uyeyapo ñotái oï. Jáeramo Tumpa re wirowia wae reta tumiawäta ipiawasu rewe jare jekuaeño wirowia kawi jese rewe.

### **Bestia iwīwi wi oë wae**

<sup>11</sup>Jayawe aecha ambie bestia oë iwīwi wi. Jare jokua bestia onoi mokui jäti owecha jäti rami. Erēi ñee ambie ye, echa'ä jae uyemingeta pëti dragón uyemingeta rami.

<sup>12</sup>Jare jokua tenondewa bestia mar wi oë wae ombou kua bestia iwī wi oë wae jae jee re. Jare jae iparawiki ko jae umbutuichaka waerä opaete iwī pewa reta pe jokua tenondewa bestia jee – jae ko jokua ipere umano rape iko tēi wae, jare ukuera ye wae.

<sup>13</sup>Jare jokua bestia taikue aecha wae uyapo opa kërái rái mbaembae kuimbae retaño ipuere'ä uyapo wae. Jare tata awe ombou ara wi iwī pewa reta jowake.

<sup>14</sup>Kua mbaembae reta ipuere uyapo, echa'ä jokua ñru bestia umee chupe mbaepuere jae jee re uyapo waerä ramo. Jare jukuärái rupi jae umbitawī iwī pewa reta. Echa'ä jae jei iwī pewa reta pe uyapo reta waerä jokua ñru bestia jaanga – jae ko jokua ipere iko kispuku pe wae jare ikowe ye wae jaanga.

<sup>15</sup>Jare uñemee jokua bestia taikue aecha wae pe onoi waerä mbaepuere umbiyemingetaka waerä jokua tenondewa bestia jaanga. Jare joko wi uyukaka opaete uipota'ä umbiadora jese wae reta.

<sup>16</sup>Jare bestia taikue aecha wae jei opaete wae onoi waerä pëti marka ipo iyakata koti ani jesiwa re. Jayawe ikuasi wae reta jare mburuwicha reta, jare ikokatu wae reta jare iparawete wae reta, jare täta rupi uyeyokui wae reta jare uyeyokui mbae wae retawe imeta ko onoi reta jokua marka.

<sup>17</sup>Jare ime yawe kía nunga mbaeti onoi jokua marka wae, ndarau ipuere owa mbae awe jare ndarau ipuere mbae owaka wi. Jokua marka ko jae jokua bestia jee, ani yandepuere yae chupe jae ko número umbijaanga bestia jee re wae.

<sup>18</sup>Kua pe ikawi ko yande ñanoi waerä arakuaa. Uikuaa kawi wae tuipapa bestia inúmero. Jae ko kuimbae inúmero. Jare jokua número ko jae 666.

## Apocalipsis 14

### 144.000 wae reta ñonoï Tumpa jowai

<sup>1</sup>Joko wi aecha jokua Owecha kuimbae taurusu wae uyemboi oï iwitu wasu Sion jee wae re. Jare joko pe ñonoï jae ndiwe jokua 144.000 wae reta. Jae reta jesiwa re uyekuatía oï Owecha kuimbae taurusu wae jee jare Tu jee.

<sup>2</sup>Jare ayandu ñee ara wi iaparoa wasu täta jiapu wae rami jare ara täta jiapu wae rami wi. Jare jokua uyendu wae ipöraete ko, echa'ä uyendu jeta wae reta arpa ombopu ñonoï wae rami.

<sup>3</sup>Echa'ä jokua 144.000 wae reta ukäta ñonoï Tumpa iwapia jowai, jare jokua irundi mbae tekowe onoi wae reta jare mburuwicha reta jowai. Jae reta ukäta ñonoï kätä ipiau wae. Jare ndarau kiawe ipuere uikuaa jokua ukäta reta wae – jaeño jae reta ipuere uikuaa. Tumpa uepi kua reta iwi pewa reta ipite wi.

<sup>4</sup>Jare jae reta uyemingia'ä Tumpa koti. Kërái pëti kuimbae uyapo'ä etei awasa wae rami, kua reta jekuaeño jupi Tumpa koti. Jae reta umiiru oï Owecha kuimbae taurusu wae ipotawe kerupi oo wae rupi. Jae uepi kua reta iwi pewa reta ipite wi oñono tee reta waerä jae imaerä jare Tumpa pewarä wi.

<sup>5</sup>Jae reta iyapu'ä etei, jare mbaeti kía ipuere umbijeko reta mbae re.

### Mbapi araiwa reta omoë ñee

<sup>6</sup>Jayawe aecha iru araiwa uwewe oï iwate rupi. Jae ime onoi ñee umimbeu waerä opaete ambiembie iwi pewa reta pe kerupi rupi ñonoï wae rupi jare opa kërái rái ñee pe uyemingeta wae reta rupi. Jokua ñee araiwa umimbeu wae jaeño mái pewa ko ikawi.

<sup>7</sup>Jei chupe reta usapikái rewe: “Pipiü Tumpa wi jare pembutuicha jee. Echa'ä ou ma uwäe ora opaete wae reta uyemboi waerä Tumpa jowai. Pembutuicha Tumpa jee, echa'ä jae uyapo ara, jare iwi, jare mar, jare iwororo reta,” jei.

<sup>8</sup>Jayawe jokua araiwa jaikue rupi uyekuaa iru araiwa. Jare jae usapikai rewe jei: “iOpata ma oi jokua tetä wasu jeräkuæte wae jare imbaepuere wae Babilonia jee wae! Jokua Babilonia pewa reta jeko kachi rupi urükumewa iwi pewa reta. Opa usawipo rami uyapo reta, echa’ä omboe reta umbiadora waerä itumparaanga reta re,” jei.

<sup>9-10</sup>Jayawe jokua araiwa jaikue rupi uyekuaa iru araiwa. Kua re uyekuaa mbapi ma. Jare jae jei usapikai rewe: “Opaete jokua tenondewa bestia re jare jae jaanga re umbiadora wae reta uikuaata ñonoï Tumpa iarasi wasu. Jare jae nunga wi jokua bestia imarka ime onoi jesiwa re ani ipo re wae reta uikuaata ñonoï wi Tumpa iarasi wasu. Echa’ä Tumpa pochiete chupe reta jare täta rupi uiporarakata chupe reta,” jei. “Jae reta uiporarata tata pe jare azufre jendi oi wae pe araiwa Tumpa oñono tee wae reta jowai jare Owecha kuimbae taurusu wae jowai,” jei.

<sup>11</sup>“Jare jokua tata jae reta uiporarata ñonoï pipe wae jae ko tata owe mbae wae. Ara rupi jare pïtu rupi uiporarata reta, jare ndarau michi pewa yepe uputuu reta,” jei. “Jukuärái uyeyapota opaete jokua tenondewa bestia re jare jae jaanga re umbiadora wae reta pe, jare opaete bestia imarka onoi wae reta pe. Jokua marka ko jae bestia jee,” jei.

<sup>12</sup>Jáeramo ipotawe kía Tumpa oñono tee jae imaerä wae reta – jae ko Tumpa jei wae rupi yureko wae reta jare Jesús re wirowia wae reta – tuñemikirëi jare tumiawäta ipiawasu rewe uiporara reta wae.

<sup>13</sup>Jayawe ayandu ara wi ñee jei chewe: “Ikuatía kuärái: Kua wiwe yandeYa re wirowia rewe umanota wae reta uyekoueteta ñonoï,” jei chewe. Jare joko wi Espiritu Santo jei: “Añetete ko. Jae reta uyekoueteta ñonoï, echa’ä uputuuta reta iparawiki wi. Jare Tumpa umiñatimata oi chupe reta mbarawiki uyapo reta Tumpa pewarä wae re,” jei.

### **Araiwa reta uawiro rami iwi pewa reta**

<sup>14</sup>Jayawe aecha amapïtu tii wae, jare jokua amapïtu re aecha kía uwapi oi. Jae chwaa kuimbaerä uyeyapo wae. Jare iñäka re onoi corona oro pewa, jare uipisi oi pëti josa jaimbe wae.

<sup>15</sup>Jare aecha tupao wasu ara pe oi wae wi oë iru araiwa. Jare jae jei usapikai rewe jokua amapïtu re uwapi oi wae pe: “Añawe ou ma uwäe mbaewiro iwi pe. Jae ma oi yawiro waerä. Jáeramo iporu jokua ndejosa nembraewiro waerä,” jei chupe umbijaanga rewe.

<sup>16</sup>Jayawe jokua amapïtu re uwapi oi wae uiporu ijosa jare uawiro iwi pewa reta.

<sup>17</sup>Jare aecha tupao wasu ara pe oi wae wi oë iru araiwa. Jae wi onoi ipo pe josa jaimbe wae.

<sup>18</sup>Jare ou wi iru araiwa mbaerenda mbae utimbo kawi wae uyeapi jese wae wi. Jae uyandareko tata mbaerenda re oi wae re. Jare jae usapikai rewe jei araiwa josa

jaimbe wae onoi wae pe: “Ekua opaete iwi rupi iyasia jare embati opaete uva ía jokua ndejosa jaimbe wae pipe. Echa’á yawiye ma oí,” jei.

**19-20** Jayawe jokua íru araiwa uiporu ijosa, jare opa uyasia uva ía iwi pe oí wae, jare opa umbati. Jare ime iko tēta wasu oka pe pēti uva uñetami pipe wae tuicha wae. Jare joko pe opa wiraa oñono uitami reta waerä. Kua uyembijaanga Tumpa iarasi oata oí iwi pewa reta re wae. Jare jokua uva uñetami pipe wae wi oē tuwi. Jare jokua tuwi tipí. Uepiti kawayu reta iyayu rupi jare usiri mbapi chiēto kilometro rupi.

## Apocalipsis 15

### Araiwa reta chiu mbaesuserere taikuewaete reta ndiwe

**1** Jayawe aecha ye ara re íru mbae ambie yeete wae. Jokua chembipiakañiete. Echa’á aecha chiu araiwa reta, jare pēti pēti jae reta ombouta ma oí mbaesuserere tuicha wae iwi pewa reta re. Jokua mbaesuserere reta ko jae taikuate oata oí iwi re wae, echa’á jokoropi opata oí Tumpa iarasi wasu.

**2** Jayawe aecha pēti ipa wasu vidrio uyea tata ndiwe oí wae echa chewe. Jare jeta wae reta uyemboi oí jese. Jae reta ko jae jokua bestia tenondewa koti umaño’á iyé wae reta, echa’á umbiadora’á reta bestia re jare jae jaanga re. Jare umaño’á reta wi oñonoka waerä marka iyé. Jokua marka ko jae número umbijaanga bestia jee re wae. Jare pēti pēti jae reta ime onoi arpa Tumpa umee chupe wae.

**3** Jare jae reta ukäta Moisés ikäta pe jare Owecha kuimbae taurusu wae ikäta pe. Ukäta reta kuärái: “OreYa Tumpa, nde opaetei mbaepuere nenoí.

¡Nderembiapo reta ikawiete jare orembipiakañiete! Nde ko jae opaete wae imburuwicha wasurä jaeño máí pewa. Jare opaete nde ndiyapo wae jupi ko jare añetete ko.

**4** Opaete wae uipiueteta ndewi, oreYa, jare umbutuichata ñonoí nderee. Echa’á ndeeño ko jae jupi wae. Opaete iwi pewa reta yuweruta umbutuicha waerä nderee. Echa’á uyekuaa ma mbaembae ndiyapo wae jupi ko.” Jukuärái ukäta reta.

**5** Kua jaikue rupi aecha ara pe uyepea oí o jupiete wae tupao wasu pe oí wae.

**6** Jare tupao wasu wi oē jokua chiu araiwa reta ombouta ma oí chiu mbaesuserere reta iwi pewa reta re wae. Jae reta jemimonde nieso tiasí ikia mbae wae ko, jare ipitía rupi onoi tumbikuaa oro pewa.

**7** Jare jokua irundi mbae tekowe onoi wae reta wi pēti wae umee jokua chiu araiwa reta pe pēti pēti copa oro pewa. Jare Tumpa ikoño máí wae iarasi tinee oí jokua copa reta pe.

**8** Jare tupao wasu opa tinee Tumpa imbaepuere jembipete ye tatāti echa wae pipe. Jáeramo kiawe ipuere’á uike tupao wasu pe ndei jokua chiu araiwa reta opa uiti mbowe mbaesuserere reta iwi pe.

## Apocalipsis 16

### Chiu copa reta Tumpa iarasi pewa

- <sup>1</sup>Jayawe ayandu pēti ñee tāta wae tupao wasu wi jei jokua chiu araiwa reta pe kuärái: “Pekua pepiyere iwi re jokua chiu copa Tumpa iarasi tinee oï pīpe wae,” jei.
- <sup>2</sup>Jayawe pēti araiwa oo upiyere icopa iwi re. Jare upiyere ma yawe, aramoiño iwi pewa reta opa kachi iyatiitii reta. Jukuärái uyeyapo jokua bestia jaanga re umbiadora wae reta pe jare bestia imarka onoi wae reta pe.
- <sup>3</sup>Joko wi ñru araiwa upiyere icopa mar re. Kua re mokui ma upiyere. Jare upiyere ma yawe, opaete mar uyeyapo tuwirä kise pe uyeyuka wae reta juwi uyepiyere wae rami. Jare opaetei mbaembae mar pe oï wae reta opa umano.
- <sup>4</sup>Joko wi ñru araiwa upiyere icopa i wasu reta re jare iwororo reta re. Kua re mbapi ma upiyere. Jare upiyere ma yawe, aramoiño i wasu reta jare iwororo reta opa uyeyapo tuwirä.
- <sup>5</sup>Jare ayandu pēti araiwa i re uyandareko wae jei Tumpa pe: “OreYa, jupi wae ko nde. Nde iyipi wiwe ndikoño mái jare jekuaeño neï. Jare jokua nde ndiyapo wae jupi ko, echa’ä nde ndiporaraka ma jokua jeko kachi wae reta pe.
- <sup>6</sup>Echa’ä jae reta upiyere ma jeta tuwi – jae ko nderé wirowia wae reta juwi jare niñee umimbeu wae reta juwi. Jáeramo nde ndeuka neï chupe reta tuwi wi. Echa’ä jupi ko uyeyapo oï jukuärái chupe reta.” Jukuärái araiwa jei Tumpa pe.
- <sup>7</sup>Jayawe ayandu ñru ñee oë mbaerenda mbae utimbo kawi wae uyeapi jese wae wi. Jare jei kuärái: “Añetete jukuärái ko, oreYa Tumpa. ¡Nde nempaepuerete ye wae ko! Nde ndepurumbijeko jupi wae rupi jare ndiporaraka añetete wae rupi,” jei.
- <sup>8</sup>Jayawe ñru araiwa upiyere icopa warasi re. Kua re irundi ma upiyere. Jare upiyere ma yawe, uñemee mbaepuere warasi pe ipuere waerä uapi iwi pewa reta jaku rái pīpe.
- <sup>9</sup>Jare warasi jasieta ramo, iwi pewa reta ipire uapi chuwi. Jáeramo jae reta jei ñee ikawi mbae wae Tumpa koti. Jae reta uikuaa tēi Tumpa ime onoi mbaepuere opaete kua mbaesusera reta re. Erēi jeseuwe jae reta uipota’ä etei ueya ipiayemingeta jupi mbae wae, jare umbutuicha’añoi reta Tumpa jee.
- <sup>10-11</sup>Joko wi ñru araiwa upiyere icopa. Kua re pandepo ma upiyere. Jare jae upiyere icopa bestia tenondewa iwapia re. Kua bestia ime tēi wireko mbaepuere opaete iwi re. Erēi araiwa icopa upiyere ma yawe, aramoiño opa uñemipitumimbi opaete iwi rupi. Jare opaete bestia pe uyeyokui wae reta uiporaraete. Uñeküsü tēi reta, echa’ä jasi chupe reta opa iyatiitii ñonoï reta ramo. Erēi jeseuwe jae reta ueya’ä ñeño ipiayemingeta jeko kachi wae rewa. Jaeño ñee ikawi mbae wae jei reta Tumpa koti.
- <sup>12</sup>Joko wi ñru araiwa upiyere icopa. Kua re owa ma upiyere. Jare jae upiyere icopa i wasu tuichaete Éufrates jee wae re. Jare upiyere ma yawe, jokua i wasu opa utini.

Kua uyeyapo mburuwicha wasu warasi oë wae kotiwa reta pewarä ipuere waerä jae reta imambae uasa isindaro reta ndiwe jowaicho koti.

<sup>13</sup>Jayawe aecha wi dragón jare jokua mokui bestia reta. Jokua taikuewaete bestia jei tēi jae umimbeu iko Tumpa iñee. Erēi umimbeu yepe iko bestia tenondewa iñee. Jare mbapi rewe jae reta iyuru wi aecha oë mbapi añä kachiete wae pite echa.

<sup>14-16</sup>Jokua añä reta ipuere uyapo mbaembae umbipiakañiete waerä iwi pewa reta. Jae reta yuraa opaete iwi rupi umbati waerä mburuwicha wasu reta jare isindaro reta ndiwe ombowaicho waerä tēi Tumpa. Jokua ñeräro uyeyapota oï Armagedón jee wae pe. Jukuärái ko jee hebreo ñee pe. Erēi Tumpa opaetei mbaepuere onoi. Jare jae uiporarakata oï chupe reta jokua ara. YandeYa jei, “Mase, che ayu yeta aï pepiranoë pewa pēti imonda wae ou rami. Jare jokua uyandareko kawï ñonoï wae reta jare jupi rupi yureko wae reta uyekoueteta ñonoï. Echa’ä che ayu ye awäe yawe, jae reta ndarau imara kía nani etei uyepokouka wae rami,” jei.

<sup>17</sup>Joko wi ñru araiwa upiyere icopa. Kua re chiu ma upiyere. Jare upiyere yawe, jae upiyere iwitu uyepeyu wae re. Jare jupiwoiño oë ñee täta wae tupao wasu ara pe oï wae wi, Tumpa iwapia wi. Jare jokua ñee jei kuärái: “¡Tumpa iarasi opata ma oï!” jei.

<sup>18</sup>Jare uyekuaa uwera wae, jare uyendu jiapu täta wae amaterere rami. Jare uyendu wi ara jiapu. Jare iwi täta ukäta. Kua nunga iwikäta mbaeti iwi pewa reta uyembipi wiwe, echa’ä tätaete iko.

<sup>19</sup>Jare iwikäta jeko pewa, iwi opa osorosoro jare jokua tēta wasu jeräkuete wae uyembiyao tee tee mbapi pe. Jare jukuärái wi opaete iwi rupi tēta wasu reta opa uyapara. Tumpa iñakañi’ä jokua tēta wasu Babilonia jeräkuete wae wi jare imbaepuerete wae wi uiti waerä jese iarasi.

<sup>20</sup>Jare iwi ukäta yawe, opaete iwi i mbite pe ñonoï wae reta opa ukañi i pe, jare jae nunga wi iwitu wasu reta mbaeti ma.

<sup>21</sup>Jare ara wi oa amandau tuicha tuicha wae iwi pewa reta re. Jare pēti pēti amandau poi cuarenta kilo rupi. Jare iwi pewa reta jei ñee ikawi mbae wae Tumpa koti amandau wasu jeko pewa, echa’ä jokua mbaesusere ikawi’äete ye ko ramo.

## Apocalipsis 17

### Kuña jete re umingana wae opo oï bestia re wae

<sup>1</sup>Jare jokua chiu araiwa chiu copa onoi wae reta wi pēti wae ou jei chewe: “Eyu che ndiwe. Aechakata ndewe kērái Tumpa uiporarakata oï kuña jete re umingana wae jeräkuete wae pe. Jae uwapi oï i wasu reta re,” jei.

<sup>2</sup>“Iwi pewa mburuwicha wasu reta uyapo awasa jokua kuña ndiwe. Jare jokua awasa ko vino rami iwi pewa reta pe. Jare jokua pipe jae reta opa usawipo rami ñonoï,” jei chewe.

<sup>3</sup>Jayawe Espíritu Santo imbaepuere pe aecha araiwa chereraa oĩ iwitini wasu koti. Apau wae rami aecha joko pe pëti kuña opo oĩ bestia pïta wae re. Jare opaete jokua bestia jete rupi uyekuatía oĩ jeta tee jokua pipe jeika tēi iyupe jae ko Tumpa wae. Chiu ko jokua bestia iñäka jare payandepo jäti reta.

<sup>4</sup>Jare kuña jemimonde mborao jare pïta, jare uñemimaepöra oro jare ita ipöraete wae reta pipe. Uipisi oĩ pëti copa oro pewa, jare jokua copa tinee oĩ pipe mbaembae kachiete wae. Jokua uyembijaanga oĩ mbaembae kachiete kuña uyapo wae re jare tumparaanga reta re umbiadora wae re.

<sup>5</sup>Jare kuña jesiwa re uyekuatía oĩ umbijaanga rewe jee kuärái: “Babilonia jeräkuaete wae jare imbaepuerete wae. Kuña jete re umingana wae reta jare mbae kachiete uyapo wae reta iyipi.” Jukuärái uyekuatía oĩ jokua kuña jesiwa re.

<sup>6</sup>Jokua kuña jatangätuete uyuka waerä Tumpa oñono tee iyupewarä wae reta. Jare upiyere ma jeta wae reta Jesús rewa umimbeu wae juwi. Kërái usawipose wae ueka awariëte rami, jukuärái wi kuña oete ueka jae reta juwi upiyere chuwi reta waerä. Jare che aecha yawe jokua kuña, chepiakañiete apita.

<sup>7</sup>Jayawe araiwa jei chewe: “¿Maera pa ndepiakañi nei? Taikuaaka ndewe kuña rewa. Jare taikuaaka ndewe wi jokua bestia kuña opo oĩ jese wae rewa chiu iñäka jare payandepo jäti reta onoi wae. Kua aikuaakata aĩ ndewe wae kiawe uikuaa’ä tenonde yawe,” jei.

<sup>8</sup>Jayawe araiwa jei wi chewe: “Kua bestia ndecha wae ikose tenonde yawe, erëi añawe mbaeti ma. Erëi uyekuaa yeta oĩ, echa’ä oëta ma oĩ iwikua wasu juwa mbae wae wi. Erëi jokua jaikue rupi Tumpa omombota Tatawasurenda pe jaeño mái pewa,” jei. “Jare iwi pewa reta ipiakañieteta uecha yawe jokua bestia tenonde ikose wae uyekuaa ye ramo. Jae reta jee mbaeti uyekuatía oĩ iwi uyembipi wiwe Tumpa itupapire pe. Echa’ä jaeño tekowe opa mbae wae onoi wae reta jee uyekuatía oĩ jokua tupapire pe,” jei chewe.

<sup>9</sup>“Jare iyarakuaa wae tuikuaa: Jokua bestia chiu iñäka reta uyembijaanga oĩ chiu iwitu wasu reta re. Jare jokua chiu iwitu wasu reta re uwapi oĩ jokua kuña,” jei chewe.

<sup>10</sup>“Jae nunga wi uyembijaanga oĩ chiu mburuwicha wasu reta re. Pandepo jokua mburuwicha reta opa ma ukañi. Jare pëti wae añawe ime onoi mbaepuere, jare iiru wae ndeiño ou. Jare jae ou ma yawe, michi pewaño imeta onoi mbaepuere,” jei chewe.

<sup>11</sup>“Jare jokua bestia tenonde yawe ikose wae erëi añawe mbaeti ma iko wae, jae uyembijaanga oĩ ambie mburuwicha wasu ndeiño ou wae re. Jokua re juri. Jare jae ikota jokua chiu mburuwicha wasu reta rami. Erëi taikue rupi Tumpa omombota Tatawasurenda pe jaeño mái pewa,” jei chewe.

<sup>12</sup>“Jare jokua payandepo bestia jäti ndecha wae uyembijaanga oĩ payandepo mburuwicha wasu reta re. Kua payandepo reta ndeiño ñonoĩ mburuwiharä. Erëi pëti ara imeta onoi reta mbaepuere michi pewa jokua tenondewa bestia ndiwe,” jei.



<sup>13</sup>“Opaete kua payandepo mburuwicha wasu reta onoita oyowake iyemingeta – jae ko uñemee reta waerä bestia pe jae onoi waerä mbaepuere jese reta jare opaete iwi pewa reta re wi,” jei.

<sup>14</sup>“Kua reta ombowaichota tēi Owecha kuimbae taurusu wae. Erëitu Owecha kuimbae opata umiamiri reta, echa’ä jae ko mburuwicha wasu reta itenondewaete wae jare opaete wae iYa tenondewaete wae,” jei. “Jare jae nunga wi ñonoita jae ndiwe jae uiparawo wae reta ñeräro pe. Kua reta jae ueni, jare jae reta jupi uyeyokui chupe wae ko,” jei chewe araiwa.

<sup>15</sup>Jayawe jei wi chewe: “Añawe taikuaaka ndewe mbae uipota jei jokua i wasu reta kuña jete re umingana wae uwapi oï jese wae,” jei. “Jokua i wasu reta ndecha wae uyembijaanga oï opaete ambiembie iwi pewa reta re kerupi rupi ñonoï wae rupi jare opaete kërái rái ñee pe uyemingeta wae reta. Jokua jeta wae reta re uyembijaanga oï jokua i wasu reta,” jei chewe.

<sup>16</sup>“Jare jokua bestia payandepo jäti ndecha wae, jae ko jokua payandepo mburuwicha wasu reta. Jae reta bestia ndiwe uñamitääta reta kuña jete re umingana wae. Jáeramo jae reta opata urükumewa jare upïrota chuwi opaete jemimonde. Jare joko wi jouta reta kuña isoo. Jare jokua opa mbae jou reta wae, jae reta uapita tata pe,” jei chewe araiwa.

<sup>17-18</sup>“Jokua kuña ndecha wae uyembijaanga oï jokua tēta wasu jeräkua wae re – jae ko ime onoi mbaepuere opaete iwi pewa mburuwicha wasu reta re wae. Jare kua mbaembae uyeyapota oï jokua tēta wasu pe, echa’ä jokua ko jae Tumpa ipiyemingeta. Tumpa ko oñono jokua payandepo mburuwicha wasu reta ipia pe kirëi pēti ramiño uñemee reta waerä bestia pe jae onoi waerä jese reta mbaepuere. Jare jae reta uyeyokuita bestia pe Tumpa jei wae opa uyeyapo rewa,” jei araiwa chewe.

## Apocalipsis 18

### Juan uecha tēta wasu Babilonia opa uyembái

<sup>1</sup>Joko wi aecha ñru araiwa uweyi ou ara wi tuicha imbaepuere rewe. Jare araiwa imbaepuere uyekuaa tembipe rami jare umbiembipe iwi re.

<sup>2</sup>Jare usapikai rewe jei: “¡Opata ma oï Babilonia, jokua tēta wasu jeräkuaete wae jare imbaepuerete wae! Añawe wiwe jaeño aña kachi kachi wae reta yurekota joko pe. Jae nunga wi wira kachi wae reta jare ikawi’ä maeräwe wae reta yurekota jokoropi.

<sup>3</sup>Tumpa uiporarakata ma oï Babilonia pe, echa’ä Babilonia pewa reta jeko kachi rupi opa urükumewa iwi pewa reta. Jae reta uyapo awasa iwi pewa reta ndiwe jare jae nunga wi imburuwicha wasu reta ndiwe. Jokua awasa ko vino rami chupe reta, jare jokua pipe jae reta opa usawipo rami ñonoï. Babilonia pewa reta jekuaeño ueka opa kërái rái mbae kachi wae. Jare opaete iwi rupi mbaembae owaka wae reta uyembikokatu chuwi reta jokua mbaembae kachi owaka wae rupi,” jei araiwa.

<sup>4</sup>Joko wi ayandu iru ñee ara wi jei: “Peë joko wi, cherëtara reta, awiye waerä piyapo kachi jae reta uyapo wae rami, jare awiye waerä piporara mbaesusere reta chupe reta uyeyapota wae.

<sup>5</sup>Jae reta uasaete ye ma uyawi chekoti, jare jokua jeko kachi reta oo ma ara re oya. Jare che, peTumpa, ndarau cheakañi ai mbaembae kachi uyapo reta wae wi.

<sup>6</sup>Tuyeyapo chupe reta kërái uyapo reta wae rupi. Tumiñatima chupe reta mokui wese ye kërái mbaembae uyapo reta wae rupi. Jae reta jeko kachi rupi urükumewa iwi pewa reta; jáeramo jae reta ikawi ko opaetei uñererükumewa waerä.

<sup>7</sup>Jokua tëta wasu pewa reta uyembutuicha jare uyekou opaete mbaembae ikawi wae kua iwi pewa re. Erëi añawe kërái tuicha rupi uyekou reta, jukuärái wi tuicha rupi tuiporara reta jare tipiatiti reta. Echa’ä jae reta jei tëi iyupe ipia pe: ‘Yande ñanoi opaete mbaepuere kuña mburuwicha wasu rami. Yande reta ndarau yaiko kuña ime umano chuwi wae rami. Ndarau etei yaikuaa mbiatiti mano pewa,’ jei tëi reta.

<sup>8</sup>Jáeramo pëti ara peño jeta mbaesusere uyeyapota oi chupe reta. Outa chupe reta karuái, jare mano, jare mbiatiti. Jare jae reta jëta wasu opata okai chuwi reta. Echa’ä yandeYa Tumpa tuicha imbaepuere uiporaraka waerä chupe reta.” Jukuärái jei jokua ñee ara wi.

<sup>9</sup>Jare jokua ara iwi pewa mburuwicha wasu reta uecha yawe jokua tëta wasu Babilonia opa okai oi jare tatäti upüa oi joko wi, jae reta ipiatitita jare uyaota reta jese. Echa’ä ima rupi jae reta uyerowiase yureko jokua tëta wasu pewa reta jeko kachi rupi. Jare uyekouse reta wi opaete jokua tëta wasu imbaembae ikawi wae re.

<sup>10</sup>Erëi jae reta upitata mbiri tëta wasu wi ukiye reta ramo, echa’ä uipota’ä uiporara reta jokua tëta wasu pewa reta ndiwe ramo. Jare jeita reta: “¡Ikawi’ä etei uyeyapo! Kua Babilonia tëta wasu tuicha jare ipiräta tëi wae ko. Erëi ipiranoë pewa Tumpa uiporaraka chupe,” jeita reta ipiatiti rewe.

<sup>11</sup>Jare opaete iwi rupi mbaembae owaka wae reta ipiatitita jare uyaota jokua tëta wasukue re. Echa’ä jae reta jeta mbaembae owaka Babilonia pe, jare añawe ndarau ye ma kía owa chuwi reta imbaembae.

<sup>12</sup>Ndarau ye ma kía owa chuwi reta mbaembae oro pewa, jare korepoti jiero pewa, jare ita ipöraete wae pewa. Ndarau ye ma kía owa chuwi reta temimonde reta nieso ipöraete wae, jare ipuasi wae, jare pita wae, jare mborao wae. Ndarau ye ma kía owa chuwi reta mbaembae iwira ikawiete wae pewa, jare mbaemimba tuicha wae elefante jee wae jäikue pewa mbaembae uyapo reta wae. Ndarau ye ma kía owa chuwi reta mbaembae iwira jepiete wae pewa, jare cobre pewa, jare jiero pewa, jare ita pewa.

<sup>13</sup>Ndarau ye ma kía owa chuwi reta canela jare opaete mbaembae utimbo kawi wae jare ipiche kawi wae reta, jare vino, jare olivo iaceite, jare harina ipuasi wae, jare trigo. Ndarau ye ma kía owa chuwi reta waka reta, jare owecha reta, jare kawayu

reta, jare karosa reta. Jare ndarau ye ma kía owa chuwi reta kuimbae jare kuña reta tãta uyeyokui reta waerã.

<sup>14</sup>Jare jokua mbaembae owaka wae reta jeita: “Pe Babilonia pewa reta, añawe opa ma pewi pemaembae pipotaete wae. Jare opaete pemaembae ipõraete wae jare jepiete wae opa ma ukañi pewi. Ndarau ma piyekou jese,” jeita reta.

<sup>15</sup>Jokua mbaembae owaka wae reta uyembiikokatu Babilonia pe. Erëi jokua ara uyemboita reta mbiri jokua tãta wasu wi ukiye reta ramo. Echa’ã jae reta uipotata’ã uiporara jokua tãta wasu pewa reta uiporara wae. Jare ipiatitita reta jese jare uyaota reta

<sup>16</sup>jei rewe: “¡Ikawi’ã etei kua uyeyapo! Kua Babilonia tãta wasu tuicha tãi wae ko. Jare tãta wasu pewa reta jemimonde nieso ipõra tãi wae ko. Omonde reta temimonde jepiete mborao wae jare pãta wae. Jare oñono reta iyé mbaembae oro pewa jare ita ipõra wae pewa.

<sup>17</sup>Erëi pëti ora peño opa ukañi chuwi reta opaete imbaembae ikawi wae,” jeita reta ipiatiti rewe. Jare opaete chalana wasu iya reta jare uruwata wae reta, jare chalana wasu pe uwata wae reta, jare opaete mar rupi uparawiki wae reta upitata mbiri Babilonia wi.

<sup>18</sup>Jare jae reta uecha yawe jokua tãta wasu opa okai oi jare tatãti upia oi joko wi, jeita reta: “¡Mbaetii jokua nunga tãta wasu!” jeita reta.

<sup>19</sup>Jayawe oñonota reta iwikuí iñãka re uechaka reta waerã tuicha ipiatiti. Jare uyaota reta, jare ikuasi katu rewe jeita reta: “¡Ikawi’ã etei kua uyeyapo! Kua Babilonia tãta wasu tuicha tãi wae ko. Yande chalana wasu ñanoi wae reta yawaka mbaembae jepi wae jokua tãta wasu pe, jare jukuärái yande yaikokatu ñai. Erëitu pëti ora peño opa ukañi tãta wasu.” Jukuärái jeita reta ipiatiti rewe.

<sup>20</sup>Joko wi ayandu pëti ñee jei kuärái: “Tuyerowia kua re opaete wae ara pe ma ñonoi wae reta. Jare tuyerowia wi opaete wae Tumpa oñono tee ma jae imaerã wae reta jare opaete wae ñee Tumpa wi etei ou wae umimbeu wae reta. Jare tuyerowia wi opaete wae Tumpa omondo jae jee re wae reta. Echa’ã Tumpa uyepi ma chupe reta Babilonia pe.” Jukuärái jei.

<sup>21</sup>Jayawe aecha pëti araiwa ipirãtaete wae owoi pëti ita tuichaete wae – jae ko pëti ita umbaesõ pipe wae rami. Jare owoi ma yawe, araiwa omombo mar pe jei rewe: “Yepe tãi Babilonia ko jae tãta wasu jerãkuaete wae jare imbaepuerete wae, erëi kuärái opata uyembái oi. Ndarau ye ma kía uecha.

<sup>22</sup>Jare ndarau ye ma uyendu joko pe temimbi reta, jare arpa reta, jare temimbi wasu reta, jare ukãta wae reta. Ndarau ye ma iko joko pe ikatu opa kërái rái mbarawiki uyapo wae reta. Jare umbaesõ wae retawe ndarau ye ma uyendu joko pe.

<sup>23</sup>Jae ramiño wi ndarau ye ma uyekuaa mechero jendi joko pe. Jare ndarau ye ma kía umenda joko pe. Jukuärái Tumpa uiporarakata oi Babilonia pe, echa’ã joko

pewa mbaembae owaka wae reta uyembutuicha opaete iwi rupi. Jare jae nunga wi jokua tēta wasu pewa reta umbitawi opaete iwi pewa reta kērái ipaye wae reta upurumikañi wae echa.

<sup>24</sup>Oata oï teko tuicha wae Babilonia pewa reta re. Echa'ä jae reta upiyere Cristo re wirowia wae reta jare Tumpa iñee umimbeu wae reta juwi. Opaete iwi rupi jae reta upuruyuka." Jukuärái jei araiwa.

## Apocalipsis 19

### Ara pewa reta umbutuicha yandeYa jee

<sup>1</sup>Kua jaikue rupi ayandu ara pe ñee täta uyendu wae. Jetaete ye ye wae reta usapikai ñonoï jare jei ñonoï pēti ñee waeño kuärái: "YandeTumpa ko jae yandeRepi wae. Jare jae ime onoi opaete wae re mbaepuere.

¡Opaete wae tumbutuicha Tumpa jee jare tuipiu chuwi!

<sup>2</sup>Echa'ä jae upurumbijeko jupi wae rupi, jare uiporaraka iwi pewa reta pe añetete wae rupi. Añawe jae uiporaraka ma jokua kuña jete re umingana wae jeräkuete wae pe. Echa'ä jokua kuña opa urükumewa iwi pewa reta awasa uyapo wae rupi, jare upiyere Tumpa pe uyeyokui wae reta juwi. Jáeramo Tumpa uyepi ma chupe reta jokua kuña pe." Jukuärái jei reta.

<sup>3</sup>Jare jei reta wi: "¡Opaete wae tumbutuicha Tumpa jee! Jokua tēta wasu Babilonia opa ma okai, jare jendakue wi upüata tatäti jaeño mái pewa." Jukuärái jei reta usapikai rewe.

<sup>4</sup>Jayawe jokua veinticuatro mburuwicha reta jare jokua irundi mbae tekowe onoi wae reta uñeñono iwi re Tumpa iwapia jowai jare jae jee umbutuicha reta. Jare jei reta: "¡Jukuärái tuiko! ¡Opaete wae tumbutuicha Tumpa jee!" jei reta.

<sup>5</sup>Jare Tumpa iwapia wi oē pēti ñee jei kuärái: "Pembutuicha yandeTumpa jee opaete piyeyokui chupe wae reta jare chuwi pipiu wae reta. Iparawete wae reta wiwe jare mburuwicha retawe, opaete pe reta pembutuicha yandeTumpa jee," jei.

### Owecha kuimbae taurusu wae umenda wae rewa

<sup>6</sup>Jayawe ayandu iru ñee. Jetaete ye ye uyemingeta ñonoï pēti wae echaño chewe. Täta uyendu iaparoa wasu jiapu rami jare ara täta jiapu rami. Jare ayandu jei reta: "¡Opaete wae tumbutuicha Tumpa jee! Echa'ä yandeYa Tumpa imbaepuerete ko, jare jae ko opaete wae imburuwicha wasurä jaeño mái pewa.

<sup>7</sup>Yayerowia jare yambutuicha jae jee, echa'ä uwäe ma ara Owecha kuimbae taurusu wae umenda waerä. Jare jembirekorä wae uyeyapikatu kawi ma oï.

<sup>8</sup>Jare uñemee ma chupe temimonde ikawi wae jare tiäsi ikia mbae wae. Echa'ä jokua temimonde ikawi wae uyembijaanga oï Tumpa re wirowia wae reta mbaembae ikawi wae uyapo wae re," jei.

<sup>9</sup>Jare pëti araiwa jei chewe: “Ikuatía kua ñee: ‘Owecha kuimbae taurusu wae umenda oï, jare uyapikatu ma tembiu ikawiete wae uyekou reta waerä jese. Uyekouete ñonoï Tumpa uparea chupe reta wae.’ Jukuärái ikuatía.” Jare jei wi chewe: “Kua ñee añetete ko. Tumpa iñee etei ko,” jei.

<sup>10</sup>Jayawe che añeñono iwi re araiwa jowai ambutuicha waerä tēi. Erēi jae jei chewe: “¡Awiye iyapo!” jei. “Che ayeyokui Tumpa pe nde jare ndehermano reta rami. Kērái pe reta pemimbeu jupi Jesús rewa, jukuäráiño wi ko che,” jei. “Tumpa jeeño embutuicha. Echa’ä jae ko umee yandewe ñee Jesús rewa yamimbeu waerä,” jei araiwa chewe.

### **YandeYa opa umiamiri opaete jowaicho reta**

<sup>11-13</sup>Jayawe che aecha ara uyepea oï. Jare aecha pëti kawayu tii wae. Jare opo jese wae ko jee Tumpa Iñee. Jesa uyekuaa kērái tata jendi wae rami, jare iñäka re onoi jeta corona mburuwicha wasu pewa reta. Jare jae jemimonde tuwi yepái. Jae ko jekuaeño jupi uyapo wae jare añetete wae umimbeu wae. Jae jupi rupi upurumbijeko, jare uñeräro jowaicho reta ndiwe. Jare uyekuatía oï jese pëti tee kiawe uikuaa’ä wae. Jaeño uikuaa wae.

<sup>14</sup>Jare jae jaikue rupi yuweru ara wi jetaete wae sindaro reta rami. Jae reta jemimonde ikawi jare tiasí ikia mbae wae. Jare pëti pëti jae reta opo ñonoï kawayu tii wae re.

<sup>15</sup>Kua Tumpa Iñee jee wae, iyuru wi oë pëti kispuku jaimbe wae. Jokua pipe opata umiamiri iwi pewa reta. Jare jae onoitá jese reta tuicha mbaepuere. Upïrota jese reta kērái uva iya uitami yawe upïro jese wae rami. Jare jukuärái jae rupi Tumpa opaete mbaepuere onoi wae uitita oï iarasi wasu jowaicho reta re.

<sup>16</sup>Jare jae jemimonde re jare iu re uyekuatía oï kua tee:

**MBURUWICHA WASU RETA ITENONDEWAETE WAE**

**JARE OPAETE WAE IYA TENONDEWAETE WAE**

<sup>17</sup>Jare che aecha pëti araiwa uyemboi oï warasi jembipe pe. Jare jae usapikai rewe jei opaete wira reta uwewe ñonoï wae pe: “Tumpa uparea oï pewe pekaru kawi waerä. Jáeramo peyu piyembati

<sup>18</sup>peu waerä Tumpa jowaicho reta jetekue – jae ko mburuwicha wasu reta jetekue, jare sindaro itenondewa reta jetekue, jare kuimbae ipiräta wae reta jetekue, jare kawayu reta jetekue, jare opo jese wae reta jetekue. Jae ko opaete Tumpa jowaicho uyeyokui wae reta jare uyeyokui mbae wae reta, jare iparawete wae reta jare mburuwicha reta jetekue,” jei.

<sup>19</sup>Jayawe aecha jokua bestia, jare iwi pewa mburuwicha wasu reta jare opaete isindaro reta ndiwe. Jae reta uyembati ma ñonoï uñeräro waerä jokua kawayu tii wae re opo wae ndiwe jare isindaro reta ndiwe.

<sup>20</sup>Jare joko pe oï wi jokua bestia taikue rupi uyekuaa wae – jae ko jokua Tumpa iñee umimbeuraanga wae. Jare jae ko tenonde yawe tenondewa bestia jee re uyapo

mbaembae kuimbae retaño ipuere'ä uyapo wae. Jukuärái jae umbitawi jokuia bestia imarka onoi wae reta jare jaanga re umbiadora wae reta. Erëi Tumpa uipisika jokuia bestia jare Tumpa iñee umimbeuraanga wae. Jare jae reta mokui rewe Tumpa omomboka Tatawasurenda pe. Jokuia tata wasu jendi oi azufrendiwe.

<sup>21</sup>Jare opaete bestia isindaro reta jare sindaro imburuwicha reta opa umano. Echa'ä jokuia kawayu re opo wae opa uyuka reta ikisepuku iyuru wi oë wae pipe. Jare opaete wira reta opa ipunga jae reta jetekue re.

## Apocalipsis 20

### Araiwa uñapiti Añawasu miri año pewa

<sup>1</sup>Jayawe che aecha pëti araiwa uweyi ou ara wi. Jare jae onoi iwikua wasu juwa mbae wae illave, jare ipo pe aecha pëti cadena tuicha wae.

<sup>2</sup>Jare araiwa uipisi jokuia dragón. Jae ko jokuia mboi arakaete Eva umingeta wae. Jae ko Añawasu, jare jee ko Satanás. Jayawe araiwa uñapiti oñono Satanás cadena pipe miri año pewa.

<sup>3</sup>Jare uñapiti ma oñono yawe, omombo jokuia iwikua wasu juwa mbae wae pe. Jare uyukenda kawi iwikua jöke illave pipe. Jukuärái uyapo awiye waerä Satanás jekuaeño umbitawi iwi pewa reta jokuia miri año rupi. Erëi miri año ma uasa yawe, araiwa oyorata ko Satanás michi pewa.

<sup>4-5</sup>Jare aecha wi jeta mburuwicha reta iwapiä jare joko pe uwapi ñonoï wae reta. Tumpa umee chupe reta mbaepuere mburuwicha wasurä yureko waerä. Jare aecha wi jeta umanokue wae reta joko pe ñonoï. Jae reta umimbeu kawise Tumpa iñee jare Cristo rewa. Jare umbutuicha'ä reta jokuia bestia jee re jare umbiadora'ä reta jae jaanga re. Jare mbaeti onoi reta wi bestia imarka jesiwa re jare ipo re. Jáeramo bestia uyayuasiaka reta kisepuku pe. Erëi Tumpa umbijekowe ye ueru reta umanokue wae reta ipite wi. Jare jae reta onoita mbaepuere Cristo ndiwe miri año pewa. Jae reta rani ko jae Tumpa umbijekowe ye wae. Erëitu ïru umanokue wae reta ikowe yeta'ä jokuia miri año uasa rewa.

<sup>6</sup>Jare jokuia tenonde ikowe ye wae reta uyekouete ñonoï. Echa'ä Tumpa oñono tee ma reta jae imaerä, jare ndarau uiporara reta Tatawasurenda pe – jae ko jokuia mano mokuía jei chupe reta wae. Jae reta yurekota sacerdote retarä uyeyokui waerä Tumpa pe jare Cristo pe. Jare jae reta ñonoïta mburuwicharä Cristo iyipi pe miri año pewa.

### Añawasu iyapi

<sup>7</sup>Jayawe jokuia miri año uasa ma yawe, Tumpa oyoraka yeta Satanás jokuia cadena uñapiti iko pipe wae wi jare onoekata jokuia iwikua wasu juwa mbae wae wi.

<sup>8</sup>Jare Añawasu oota oi opaete iwi rupi umbitawi waerä iwi pewa reta. Jae reta ko Gog jare Magog pewa jei chupe reta wae. Jayawe Satanás umbatita jetaete ye uñeräro waerä tēi yandeYa ndiwe. Jae reta jetaete ye ye ko, iwikuïti ipa wasu jembei rupiwa yandepuere'ä etei yaipapa wae rami.

<sup>9</sup>Jare che aecha jae reta yuweru opa keti keti wi jokua tēta wasu Tumpa uau wae koti. Jare yuraa ma uwāe reta yawe joko pe, opa oñowa reta Tumpa oñono tee jae imaerā wae reta jokua tēta wasu pe. Erēi uyapo'ā reta mbae awe, echa'ā Tumpa ombou tata ara wi jare opa uapī reta.

<sup>10</sup>Jae reta uyembitawika Añawasu pe. Jare joko wi aecha jokua tata wasu azufre ndiwe jendi oī wae. Joko pe ko tenonde yawe Tumpa omomboka jokua bestia jare Tumpa iñee umimbeuraanga wae ndiwe. Jare amae aiko rambuewe, Tumpa omomboka Añawasu joko pe wi. Jae reta mbapī rewe uiporarata joko pe ara rupi jare pītu rupi jaeño mái pewa.

### **Umanokue wae reta uyemboi Tumpa jowai**

<sup>11</sup>Joko wi aecha pēti wae uwapī oī iwapīa mburuwicha wasu pewa pe. Jokua iwapīa tīi jare tuicha. Jae imbaepuere jembipete ye ramo, ara jare iwi opa ukañi oo chuwi.

<sup>12-13</sup>Jare aecha wi umanokue wae reta jenda uyepea ma oī. Jare aecha opaete umanokue wae reta joko pe yureko wae uyemboi ñonoī Tumpa jowai. Iparawete wae reta wiwe jare mburuwichakue retawe, opaetei joko pe ñonoī. Jare jokua mar pe iputupa umano wae reta joko pe ñonoī wi. Jare joko pe oī wi tupapire reta opaete iwi pewa reta mbaembae uyapo wae uyekuatía oī pipe wae. Jayawe araiwa uipea jokua tupapire reta, jare Tumpa umbijeko umanokue wae reta pēti pēti mbaembae uyapo wae rupi. Jare joko pe oī wi pēti tupapire tekowe opa mbae wae onoi wae reta jee uyekuatía oī pipe wae. Jare jokua tupapire araiwa uipea wi.

<sup>14-15</sup>Jare opaete kía kía jee uyekuatia'ā oī jokua tupapire pe wae reta Tumpa opa omomboka reta Tatawasurenda pe. Kua ko jae mano mokuía jei chupe reta wae. Jare joko wiwe ndarau ye ma ime mano jare umanokue wae reta jenda, echa'ā jokua mbaembae opa ma ukañi tata wasu pe.

## **Apocalipsis 21**

### **Ara ipiau wae jare iwi ipiau wae**

<sup>1</sup>Joko wi aecha ara ipiau wae jare iwi ipiau wae, echa'ā ara jare iwi tenonde ikose wae opa ma uasa. Jare mar mbaeti ma wi.

<sup>2</sup>Jare aecha wi tēta wasu Tumpa oñono tee wae uweyi ou oī ara wi Tumpa oī wae wi. Jae ko Jerusalén ipiau wae jei chupe reta wae. Uyeyapikatu kawī oī jare maepōraete, pēti kuñatái umendata oī wae rami.

<sup>3</sup>Jare ayandu pēti ñee ara wi usapikai rewe jei: “Mase, añawe wiwe Tumpa jēta oī iwi pewa reta ipite pe. Tumpa ikota jae reta ndiwe jare jae reta yurekota Tumpa imaerā. Jare Tumpa etei ikota jae reta iTumparā,” jei.

<sup>4</sup>“Jare Tumpa oyoeta opaete jae reta jesai. Ndarau ye ma kía umano, jare ipiatiti, jare uyao. Jare ndarau ye ma jasi kía pe mbae. Echa'ā añawe opa ma mbaembae ipiau. Jare ndarau ye ma uyekuaa tenonde mbaembae ime iko wae reta,” jei.

<sup>5</sup>Jare jokua wapi pe uwapi oï wae jei: “Mase, ayapo piau ye aï opaetei mbaembae reta,” jei. Jare jei wi chewe: “Ikuatía kua chiñee, echa’ä kua añetete ko jare opaete wae ipuere wirowia katu jese,” jei chewe.

<sup>6</sup>“Añawe opaete mbaembae che jae wae opa ma uyeyapo,” jei. “Che ko jae Alfa jare Omega jee wae. Che ko jae iyipiete wae jare iyapiete wae. Ime yawe kía iïwe wae, che amecta chupe jou waerä i tekowe umee wae iwororo wi oë wae jepi mbae,” jei.

<sup>7</sup>“Jare ikawi mbae wae umiamiri wae reta pe amecta opaete kua mbaembae ipiau wae reta. Che etei aikota jae reta iTumparä jare jae reta yurekota cherai retarä,” jei.

<sup>8</sup>“Erëi jokua urukiye jekowe umee wae reta, jare uipota’ä wirowia cheré wae reta, jare mbae kachi wae uyapo wae reta, jare upuruyuka wae reta, jare iawasapota wae reta, jare ipaye wae reta, jare tumparaanga re umbiadora wae reta, jare opaete iyapu wae reta wi – opaete jokua nunga reta iyapi ko jae tata wasu azufre jendi oï wae pe. Kua ko jae mano mokuía jei chupe reta wae,” jei Tumpa.

### **Juan uecha Jerusalén ipiau wae**

<sup>9</sup>Joko wi pëti araiwa ou che aï wae pe. Kua araiwa tenonde yawe aecha ime wireko pëti copa tinee mbaesusera pewa – jae ko chiu wae wi pëti. Jare jae jei chewe: “Eyu che ndiwe. Taechaka ndewe Owecha kuimbae taurusu wae jembirekorä,” jei chewe.

<sup>10</sup>Jayawe Espiritu Santo imbaepuere pe araiwa chereraa pëti iwitu wasu iwate wae iyapite re. Apau wae rami jae uechaka chewe Tumpa jëta wasu Jerusalén uweyi ou oï ara wi Tumpa oï wae wi.

<sup>11</sup>Jokua tëta wasu wi oë Tumpa imbaepuere jembipe ye wae. Jáeramo tëta wasu uwera pëti ita uweraete ye wae rami – jae ko pëti ita ipöraete wae jare jesäka wae jaspe jee wae rami.

<sup>12</sup>Jare tëta wasu ime onoi ikësea tuicha kawi jare iwate. Jare ime onoi doce jöke. Jare pëti pëti jöke pe oï pëti araiwa uyandareko waerä jese. Jare pëti pëti öke re uyekuatía oï pëti Israel pewa reta iyipi jee.

<sup>13</sup>Warasi oë wae koti tëta wasu jöke reta mbapi ko. Norte koti tëta wasu jöke reta mbapi wi. Sur koti tëta wasu jöke reta mbapi wi. Jare warasi uike wae koti tëta wasu jöke reta mbapi wi.

<sup>14</sup>Jare tëta wasu ikësea ime onoi doce iwapika. Jare uyekuatía oï jese reta Owecha kuimbae taurusu wae doce jemimboe tenondewaete jee reta pëti pëti rupi.

<sup>15</sup>Jare araiwa chemingeta wae wiraa ipo pe pëti yamianga pipe wae oro pewa umbianga pipe waerä tëta wasu, jare jöke reta jare ikësea.

<sup>16</sup>Jayawe jokua pipe jae umbianga tëta wasu. Jokua tëta wasu irundi itiäkua onoi. Jare ipiwasu jare puku rupi jare iwate koti oyowakeño. Pëti pëti onoi 2.200 kilómetro.



- <sup>17</sup>Jare joko wi araiwa umbianga tēta wasu ikēsea. Umbianga yanambusu wae
- <sup>75</sup> metro. Kērái kuimbae reta mbaembae umbianga, jukuärái araiwa umbianga tēta wasu.
- <sup>18</sup>Jare tēta wasu ikēsea ita ipōraete wae jaspe jee wae pewa ko. Jare tēta wasu etei oro yepái ko jare uwersiete vidrio jesākasi wae rami.
- <sup>19</sup>Jare pēti pēti jokua tēta wasu ikēsea iwapika uñemopōra oĩ ambie ye ye ita ipōraete wae pipe. Pēti wae uñemopōra oĩ ita jaspe jee wae pipe. Īru uñemopōra oĩ zafiro jee wae pipe. Īru uñemopōra oĩ ágata jee wae pipe. Īru uñemopōra oĩ esmeralda jee wae pipe.
- <sup>20</sup>Īru uñemopōra oĩ ónice jee wae pipe. Īru uñemopōra oĩ cornalina jee wae pipe. Īru uñemopōra oĩ crisólito jee wae pipe. Īru uñemopōra oĩ berilo jee wae pipe. Īru uñemopōra oĩ topacio jee wae pipe. Īru uñemopōra oĩ crisopraso jee wae pipe. Īru uñemopōra oĩ jacinto jee wae pipe. Jare Īru uñemopōra oĩ amatista jee wae pipe.
- <sup>21</sup>Jare jokua tēta wasu doce jōke reta ita ipōraete wae perla jee wae pewa ko. Pēti pēti ōke reta uyeyapo pēti perla wiño. Jare tēta wasu icalle reta oro yepái ko jare jesāka vidrio ikia mbae wae rami.
- <sup>22</sup>Jare mbaeti etei aecha tupao wasu jokua tēta wasu pe. Echa'ā yandeYa Tumpa imbaepuerete ye wae jare Owecha kuimbae taurusu wae, jae reta etei ñonoĩ joko pe tupao wasu ipepika pe.
- <sup>23</sup>Jare jokua tēta wasu pewa reta ndarau ueka warasi jare yasi, echa'ā Tumpa imbaepuere jembipe ye wae jare Owecha kuimbae taurusu wae etei jembipeta tēta wasu re.
- <sup>24</sup>Jare opaete iwí pewa reta yureko kawita jokua tēta wasu jembipe pe. Jare jokua ara rupi iwí pewa mburuwicha wasu reta yuweruta jokua tēta wasu pe umbutuicha reta waerä Tumpa jee.
- <sup>25</sup>Jare tēta wasu jōke reta ndarau etei uyeyukenda, echa'ā ndarau ime pītu joko pe.
- <sup>26</sup>Jare opaete keti keti wi uipiu rewe yuweruta iwí pewa reta jokua tēta wasu pe umbutuicha reta waerä Tumpa jee.
- <sup>27</sup>Erēi ndarau etei uike joko pe ipotawe mbae ikia oĩ Tumpa koti wae. Jare ndarau uike wi joko pe jeko kachi wae reta jare iyapu wae reta. Jaeño uiketa joko pe Owecha kuimbae taurusu wae itupapire pe jee uyekuatía oĩ wae reta. Jae ko jokua tupapire tekowe opa mbae wae onoi wae reta jee uyekuatía oĩ pipe wae.

## Apocalipsis 22

- <sup>1</sup>Joko wi araiwa uechaka chewe i wasu ikia mbae wae – jae ko i tekowe opa mbae wae umee wae. Jokua i uwersi vidrio uwersi wae rami. Jare uyekuaa oē ou Tumpa jare Owecha kuimbae taurusu wae iwapia wi.

<sup>2</sup>Jare usiri tēta wasu icalle mbite rupi. Jare i wasu jembei rupi oyowai rewe ñonoï iwira ía tekowe umee wae reta. Jokua iwira reta umee ía doce wese opa año rupi – jae ko opa yasi rupi pēti wese. Jare iwira joki ikawi iwi pewa reta uñepiano pipe waerä.

<sup>3</sup>Jare joko pe ndarau ye ma ime yepipeyu. Jare Tumpa jare Owecha kuimbae taurusu wae iwapia oïta joko pe. Jare uyeyokui chupe wae reta umbutuichata jae jee.

<sup>4</sup>Jae reta uechata Tumpa jowa etei jare onoitā reta Tumpa jee jesiwa re.

<sup>5</sup>Jare ndarau ime joko pe pītu. Jare ndarau uiporu reta mechero jare warasi jembipe, echa'ä yandeYa Tumpa etei jembipeta chupe reta. Jare jae reta yurekota mburuwicharä jaeño mái pewa.

### **Cristo ou yeta jupiwoiño**

<sup>6</sup>Jayawe araiwa jei chewe: “Kua ñee reta añetete ko jare opaete wae ipuere wirowia katu jese,” jei. “Arakaete rupi yandeYa Tumpa uikuaaka mbaembae uasata oï wae jae iñee umimbeu wae reta rupi. Jare añawe jae ombou pēti araiwa uikuaaka waerä uyeyokui chupe wae reta pe jupiwoiño mbaembae uasata oï wae,” jei.

<sup>7</sup>“YandeYa jei: ‘Mase, ayu yeta jupiwoiño. Aikuaaka ma kua tupapire rupi mbaembae uasata oï wae. Jayawe uyekouete ñonoï kua ñee uipisi wae reta,’ jei,” jei araiwa chewe.

<sup>8</sup>Che ko jae Juan kua ñee aikuatía aï wae. Che etei aecha jare ayandu kua mbaembae. Jare araiwa opa ma uechaka chewe yawe kua mbaembae, añeñono iwi re jae jowai ambutuicha waerä tēi.

<sup>9</sup>Erēi jae jei chewe: “¡Awiye iyapo!” jei. “Che ayeyokui Tumpa pe nde rami, jare ndehermano Tumpa iñee umimbeu wae reta rami, jare kua tupapire pe uyekuatía oï wae uipisi iyupe wae reta rami. Tumpa jeeño embutuicha,” jei chewe araiwa.

<sup>10</sup>Jare jei wi chewe: “Opaete ñee reta kua tupapire pe uyekuatía oï wae umimbeu mbaembae uyeyapota oï wae. Awiye iñomi kua ñee reta. Tuikuaa opaete wae, echa'ä koiño ma ou uyeyapo waerä,” jei.

<sup>11</sup>“Jupi mbae uyapo wae reta, tuiko pochiño jukuärái mbae jupi mbae rupi. Jare ikia oï Tumpa koti wae reta, tuiko pochiño jukuärái ikia rewe. Jae ramiño wi mbae ikawi wae uyapo wae reta jekuaeño tuyapo ikawi wae. Jare mbae jupi wae uyapo wae reta jekuaeño tuyapo jupi wae,” jei.

<sup>12</sup>Joko wi yandeYa jei: “Mase, ayu yeta jupiwoiño. Jare jayawe amiñatimata aï pēti pēti pe jae reta mbaembae uyapo wae rupi,” jei.

<sup>13</sup>“Che ko jae Alfa jare Omega jee wae. Che ko jae iyipiete wae jare iyapiete wae. Che ko jae tenondewaete wae jare taikuewaete wae,” jei.

14“Uyekouete ñonoï opaete ikia mbae Tumpa koti ñonoï wae reta. Echa’ä jae reta uiketa ipiawiwe rewe öke reta rupi kua tëta wasu pe, jare jouta reta iwira ía tekowe umee wae,” jei.

15“Erëi ndarau uike kua tëta wasu pe jeko kachi wae reta, jare ipaye wae reta, jare iawasapota wae reta, jare upuruyuka wae reta, jare tumparaanga re umbiadora wae reta, jare opaete uyerowia rewe upurumbitawi wae reta,” jei.

16“Che ko jae Jesús. Jare che etei amondo chearaiwa pëti wae umimbeu waerä pewe kua mbaembae. Kua ko jae cheré wirowia wae reta opa kerupi rupi uyembati ñonoï wae reta pewarä,” jei. “Che ko jae David iñemoña pewa mburuwicha wasurä ikota wae. Che ko jae yasitata uwerasi ndei köe mbowe mii uyekuaa wae,” jei.

17Espíritu Santo jare Owecha kuimbae taurusu wae jembirekorä wae jei: “Eyu, oreYa.” Jare jae nunga wi kua uyandu wae reta tei: “Eyu, oreYa.” Iiwe wae reta tou kua pe jou waerä i tekowe opa mbae wae umee wae. Jokua jepi mbae ko.

18Opaete ñee reta kua tupapire pe uyekuatía oï wae uikuaaka mbaembae uyeyapota oï wae. Che tamimbeu opaete kua ñee uyandu wae reta pe kuärái: Piyandareko kawi piyé. Echa’ä ime yawe kía umiiru kua ñee reta wae, Tumpa uitita jese mbaesusere reta kua tupapire pe uyekuatía oï wae.

19Jare ime yawe kía amokue kua ñee reta umbái wae, Tumpa ndarau umaño jese jou waerä jokua iwira ía tekowe umee wae. Jare ndarau wi umaño jese uike waerä jokua tëta wasu Tumpa oñono tee jae imaerä wae pe. Jare ndarau wi umaño jese onoi waerä jae imaerä mbaembae ikawi wae kua tupapire pe umimbeu yandewe wae.

20YandeYa etei uikuaaka chewe opaete kua mbaembae. Jae jei: “Añetete che ayu yeta jupiwoiño.” Jayawe che tae: “¡Jukuärái tuiko! Eyu, cheYa Jesús.”

21YandeYa Jesús jekuaeño tipiakawi pewe. Jukuärái tuiko.

## Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira  
2021, Vitória/ES - Brasil